


# Wandala



The Holy Bible in the Wandala language of Cameroon

**Wandala**  
**The Holy Bible in the Wandala language of Cameroon**  
**La Bible en wandala**

copyright © 1999 Wycliffe Bible Translators, Inc.

Language: Wandala

Contributor: Wycliffe Bible Translators, Inc.

All rights reserved.

2025-05-13

---

PDF generated using Haiola and XeLaTeX on 13 May 2025 from source files dated 13 May 2025  
dec75dd5-4784-5059-aa00-668d508a6b0d

## Contents

Gavge-aha . . . . .	1
Mata . . . . .	91
Markus . . . . .	157
Luka . . . . .	199
Yuhanna . . . . .	270
Slera-aha . . . . .	320
Rauma-aha . . . . .	384
1 Kaurintus-aha . . . . .	416
2 Kaurintus-aha . . . . .	447
Galatiya-aha . . . . .	467
Aifaisus-aha . . . . .	477
Filipi-aha . . . . .	488
Kaulausiya-aha . . . . .	495
1 Taisalauniki-aha . . . . .	502
2 Taisalauniki-aha . . . . .	509
1 Timaute . . . . .	513
2 Timaute . . . . .	522
Titus . . . . .	528
Filaimaun . . . . .	532
Ibraninᵑkau-aha . . . . .	534
Yakuba . . . . .	557
1 Piyer . . . . .	565
2 Piyer . . . . .	573
1 Yuhanna . . . . .	578
2 Yuhanna . . . . .	586
3 Yuhanna . . . . .	588
Yahuda . . . . .	590
Wahayu . . . . .	593

## GAVGE-AHA

### *A nderan estuwa Dadaamiya duksa bademme*

<sup>1</sup> Am fakta, Dadaamiya a ndere samayaha antara haha.

<sup>2</sup> Haha bademme ba yalanje, ndza baaka ba naazara keni aatekwa, a hedetaa ba tabedammire yawaha, Shedekwe aà Dadaamiya ankwaa aà ja d'aba argina.

<sup>3</sup> A ba Dadaamiya: A gevge parakkire. A gevhe ge parakkire.

<sup>4</sup> Dadaamiya aà zhara parakkire na shagera jipu. Daaci a tegaa tara parakkire an tabedammire.

<sup>5</sup> Parakkire a d'ahanaa an vaaha, tabedammire a d'ahanaa an vayiya. Magaamaga icawaya, a werehe ge ekse, una nanna hare ge zuññwire.

<sup>6</sup> A ba Dadaamiya: A gevge an tega dagave aà yawaha ge dise nakwahaatare.

<sup>7</sup> A gevhe ge dagave aà yawaha. Daaci Dadaamiya a magaa dagavaha nanna, a tegaa dagave aà yawaha na am aha antara yawaha na aàtìre.

<sup>8</sup> Dadaamiya a d'aha dalbe na aàdetìre: Samaya. Una nanna keni a gevhe. Magaamaga icawaya, a werehe ge ekse, una nanna hare ge buwire.

<sup>9</sup> A ba Dadaamiya: A jarammeje yawaha na am ekte aà samaya na bademme aà dem slede palle, geni a jesarje dalbe na an ula. Una nanna keni a gevhe.

<sup>10</sup> Dalbe na an ula na Dadaamiya a d'ahanaa an haha. Dalbe na jarammeje yawaha aatekwa na waà, a d'ahanaa an haye. Dadaamiya a naa una nanna shagera jipu.

<sup>11</sup> Daaci a ba Dadaamiya: Haha a sansese essebaha antara slapaha taà an wulfaha am itare, antara nafaha na aà ya egdzere taà an wulfahaatare, jaba a duksa nanna bademme. Una nanna keni a gevhe.

<sup>12</sup> Slerekke haha a sanse masaha, antara slapaha, ma uwe keni taà an wulfaha am itare. Nafaha keni ba estuwa, jeba a nafaha gergere, ma urara keni taà aà ba an wulfahaatare bademme. Dadaamiya a naa una nanna shagera jipu.

<sup>13</sup> Magaamaga icawaya, a werehe ge ekse, una nanna hare ge keyire.

<sup>14</sup> A ba Dadaamiya: A gevge parakkiraha ate samaya, ge tega tara vaaha antara vayiya. Una nanna aà gev nalaamaha ge maàraà sartaha, vaàhaha, antara ivaha.

<sup>15</sup> Parakkiraha nanna a gevge ate samaya, ge maàraà parakkire aàsete haha. Una nanna keni a gevhe.

<sup>16</sup> Dadaamiya a magaa parakkiraha sadafde buwa: Palle waà, yaikke jipu, nane aà maga sleksiraara am vaaha, cekwaara keni aà maga sleksiraara an vayiya antara terlyakwaha.

<sup>17</sup> Dadaamiya a puwateraa ate samaya ge maàraà parakkire aàsete haha,

<sup>18</sup> geni taà maga sleksiraatare vayivacika, antara ganakini taà teganaà itare dagave aà tara parakkire, antara tabedammire. Dadaamiya a naa una nanna shagera jipu.

<sup>19</sup> Magaamaga icawaya, a werehe ge ekse, una nanna hare ge ufadire.

<sup>20</sup> A ba Dadaamiya: A demda yawe ba nga am naàzena an shifa, a ngyairngye yiyaha aà dem samaya. Una nanna keni a naba gevhe.

<sup>21</sup> Dadaamiya a ndere dabbaha sadafde antara naazu an shifa aà zlala am yawe bademme. Daaci yawe a fantau ge yaà jeba duksa gergere

baaka zlaktaara. A nderehe zlafe aàdaliye yiyaha taà an lyakwahaatare, jebahaatare keni gergere bademme. Dadaamiya a naa una nanna shagera jipu.

<sup>22</sup> A gaterar barka, a ba nane: Yawtiya, gawevge ba kwakya, hyaiwemhye am hayaha bademme. yiyaha keni hyairemhye am huđe aà duniya bademme.

<sup>23</sup> Magaamaga icawaya, a werehe ge ekse, una nanna hare ge ilyebire.

<sup>24</sup> A ba Dadaamiya: Haha a sansese naàzena an shifa ate haha bademme. Dabbaha, naàzena aà hulmba am haha ira naàzena an shifa ate haha bademme, ma uwe keni jeba gergere bademme. Una nanna keni a naba gevhe.

<sup>25</sup> Dadaamiya a magaa estuwa dabbaha aà kaamba jeba gergere bademme, dabbaha aà haà keni jeba gergere ira naàzu aà hulmba am haha keni jeba gergere bademme. A naa una nanna shagera jipu.

<sup>26</sup> Daaci a ba Dadaamiya mazlaara waà, nderaumindera urimagwe ate nderaamiya, aà gaàraàva an miya. Daaci aà kwaranaà nane kelfaha am haye, yiyaha aà samaya, dabbaha, naàzu aà hulmba am haha ira duksaha umele na ate haha bademme.

<sup>27</sup> Daaci Dadaamiya a nderehe urimagwe, a nderanaa ate nderaara, aà gaàraàva an nane. A nder zhele antara mukse.

<sup>28</sup> Dadaamiya a gaterar barka, a ba nane aà elvan ge itare: Yawtiya, gawevge ba kwakya, hyawtehye ate haha bademme, fawansarfe keni. Magawmaàga sleksiraakure ate kelfaha am haye, ate yiyaha aà samaya, ate dabbaha na ate haha bademme.

<sup>29</sup> A ba Dadaamiya aà elvan ge itare: Bademme a naàzena a kyesaa am haha, antara wulfahaatare bademme, antara nafaha na aà yaà egdzere antara wulfahaatare bademme, una nanna naàza zaakure.

<sup>30</sup> Ge dabbaha na ate haha bademme, ge yiyaha aà samaya bademme, ge naàzena aà hulmba am haha bademme ira naàzena ni aà puwa shifa bademme na, ya vaterte masa aàṅwasla, una nanna naàza zaatare. Una nanna keni a gevhe aà ba ate una nanna.

<sup>31</sup> Dadaamiya a naa nazena a maganaa nane bademme shagera jipu. Magaamaga icawaya, a werehe ge ekse, una nanna hare ge unkwahire.

## 2

<sup>1</sup> Dadaamiya a zlanaa estuwa slera a ndera samaya antara haha ira naàzu am itare bademme.

<sup>2</sup> Am hare ge vuyire, am bademme a slerahaara zlauzle, a puwansehe vacite nanna.

<sup>3</sup> Dadaamiya a gaa barka am hare ge vuyire, a ganve cudedde. Adaba a puwanse vacite nanna am sleraha bademme ge ndera duksa bademme.

### *Urimagwe am fe aà Adnin*

<sup>4</sup> Kwaya nane labare aà tara samaya an haha am sarte na a nderaterndera Dadaamiya. Am sarte na ni Dadaamiya nder samaya antara haha waà,

<sup>5</sup> zlafe ndza baaka nafa ate haha emtsaade, ndza baaka slapaha aà kaamba emtsaade, adaba zlafe Dadaamiya Yaakadada fantauka ge hya yawe aàsete haha. Am sarte nanna zlafe ndza baaka urimagwe ge herda haha.

<sup>6</sup> Amaà ndza ankwawire aà yawe aà segashe am haha, a remanaa nane haha bademme.

<sup>7</sup> Daaci Dadaamiya Yaakadada a nder urimagwe an berbere à haha, a fem effeya à shifa am ñane à kya ektare, daaci urimagwe a gev estuwa an shifa.

<sup>8</sup> Am igaara maa, Dadaamiya Yaakadada a de icese fe am Adnin, à dem dalbe à gedí, a de njanaahe àahuwa urimagwe na a nderanaa ñane.

<sup>9</sup> Dadaamiya Yaakadada a fantau ge sanse nafaha jeba gergere am haha, à yaà egdzere shagera, emtake ge ezza. Am dagave à fe ñanna maa, a sanse nafa à shifa, antara nafa à diya shagerire antara shagerkire.

<sup>10</sup> Am Adnin ñanna maa, a naba sesehe ge yawe, a magaa guwa yaikke antara yawe àatekwa, à vantaà ñane lailaidífire ge fe ñanna. Fantau à ba am tate ñaana, guwa yaikke na a naba tagire, a magaa guwaha umele ufade.

<sup>11</sup> Zhera à zuññwire à guwaha ñanna Pisaun. A jantaava ñane ge haha à Hawila, ankwá dindar am haha ñanna.

<sup>12</sup> Dindar à larde ñanna an daradza jipu. Ankwá zlabé naàzase navawaara am haha ñanna, antara jeba nakwa umele an daradza jipu, zhera à nakwa ñanna aunikis.

<sup>13</sup> Zhera à buwire à guwaha ñanna Gihaun. Guwa ñanna keni maa, a de jantaave ge haha à Kus katakappe.

<sup>14</sup> Zhera à keyire à guwaha ñanna Hidakail. ñane una à kela am larde à Asura am dalbe à gedí. Zhera à ufadífire à guwaha ñanna Aifratís.

<sup>15</sup> Daaci Dadaamiya a eksetaa urimagwe ñanna, a njanaahe am fe ñanna am Adnin na, geni à ehherda, à effufa.

<sup>16</sup> Naàwa naàzena ni a faara Dadaamiya Yaakadada ge urimagwe: A ba ñane à elvan ge ñane: Nafaha na am faha na bademme, ezza ba seke una à katana ervaunña.

<sup>17</sup> Amaà nafa à diya shagerire an shagerkire na waà, zeka. Adaba vacitu maà de zakuze, emtsaana keni ba vacite ñanna.

<sup>18</sup> A ba Dadaamiya Yaakadada: Urimagwe maàki baaka ura taà nja kerde waà, shagerka. Yaà maganaamaga slemelanumele, à garava à ba antara ñane.

<sup>19</sup> Dadaamiya Yaakadada a ndere dabbaha à kaamba bademme, antara yiyaha à cena daha na ni watse àadhatera ñane. Bademme a nazena an shifa, ma a dante estara keni à gev ba zheraara.

<sup>20</sup> Urimagwe a fafete zheraha à dabbaha à haà, antara dabbaha à kaamba ira yiyaha bademme, amaà shanka una ta kalkale antara ñane ge melanumele.

<sup>21</sup> Daaci Dadaamiya Yaakadada a naba far jeba paàhaàre na jauje ge ndzedá ge urimagwe, a naba pu hare. Dadaamiya Yaakadada a tedese hyaihye à slerpaara palle, a hedete sledaara an hyuwa.

<sup>22</sup> Dadaamiya Yaakadada a magaa mukse an hyaihye à slerpa ñanna a sanse am urimagwe na, a danaàn ge urimagwe.

<sup>23</sup> Ba a puwete icaara ate ñane urimagwe waà, a ba ñane à ba an kaà kwara: Yawwaa, kwaye una kwa waà, palle à hyaihyahaaruwa antara hyuwa à vuwaaruwa. ñane waà, taà dhana an mukse, adaba ta sanse am zhele.

<sup>24</sup> Adaba una ñanna zhele à yaà tara eddenaara an emmenaara, taà maàslava antara muksaara, taà gev vuwa palle.

<sup>25</sup> Urimagwe antara muksaara bukerde taà an ukhyiye dey, amaà waterka zherwe.

### 3

#### *Urimagwe fansarka ge Dadaamiya*

<sup>1</sup> Am dabbaha àà kaamba na a nderanaa Dadaamiya Yaakadada bademme waà, a jaterwa ba zahe an yaimyaimire. Zahe a de ndavanu ge mukse, a ba ñane: Ba jirire a banba Dadaamiya geni zauka egdzara àà nafaha na am fahe na bademme?

<sup>2</sup> A ñwanante ge mukse, a ba ñane: Egdzara àà nafaha na am fe bademme ñaà ezza.

<sup>3</sup> Sey ba egdzara àà nafa na kwa ya ñane am dagave àà fe na waà, a ba Dadaamiya zauka, fauka erva ate nafa ñanna geni emtsaweka.

<sup>4</sup> A ba zahe àà elvan ge mukse na: Fida kwaà emtseka ðekideki.

<sup>5</sup> Dadaamiya diyaadiya ganakini maà zakuruze egdze àà nafa ñanna waà, àà de wera icaakure, kwaà de gev ba seke ñane, kwaà de dzegwaàndzegwa dise shagerire antara shagerkire.

<sup>6</sup> Mukse na àà zhara egdze àà nafa na waà, àà ba am ice keni zariya jipu, watse emtake ge ezza. Shagerire àà egdze àà nafa ñanna àà naba vante enjkale ge ura. Daaci a naba enzlevaaha egdze àà nafa ñanna, a zuhe, a vante ge zhelaara na atevege ñane na, ñane keni a naba zuhge.

<sup>7</sup> Daaci a werte ge icaatare, ta naba diyeddiye geni taà an ukhyiye dey. Adaba una ñanna ta kazlevaa slape àà nabugda, ta hedfe nasheriraatare an ñane.

<sup>8</sup> An icavaciya waà, taà cena ba maga àà duksa, Dadaamiya Yaakadada anjwa àà jaà d'aba am hudfe àà fe. Tara zhele antara mukse shebareshebe am ice àà nafaha, taà shebe aàtuge Dadaamiya Yaakadada.

<sup>9</sup> Dadaamiya Yaakadada a naba d'aha urimagwe, a ba ñane àà elvan ge ñane: Kaà aàma ka?

<sup>10</sup> A ñwanante ge urimagwe, a ba ñane: Ya cenaa kwaraaña am fe, iya yaà an ukhyiye dey, adaba una ñanna jija lyawa shebaneshebe.

<sup>11</sup> A ba Dadaamiya Yaakadada àà elvan ge ñane: A ndaaka ware ganakini kaà an ukhyiye dey na? Emtu zakuze egdze àà nafa na piyanaktepiya zeka àà ba iya na?

<sup>12</sup> A ñwete ge urimagwe, a ba ñane: Ba mukse ñanna ka vitaa ka na waà, a vitaa ba ñane egdze àà nafa ñanna, iya keni ya naba zuhe.

<sup>13</sup> A ba Dadaamiya Yaakadada àà elvan ge mukse: Ka magan ge uwe una? A ñwete ge mukse a ba ñane: A kediyaa ba zahe ate enjkale lauktu ya zu egdze àà nafa ñanna.

<sup>14</sup> Am iga àà una ñanna, a ba Dadaamiya Yaakadada àà elvan ge zahe: Ekka ni magakanaamaga tsawe una waà, kaà an nyainye am dagave àà dabbaha, antara naàza kaambaha bademme. Sey kaà zlala ate hudaaña, kaà zaà ba haha haà a zlauwa estuwa shifaaña am duniya.

<sup>15</sup> Yaà femfa kelaadire am dagavaakure antara mukse na, am dagave àà wulfahaaña, antara wulfahaara. Wulfe àà mukse na àà de hakaaha ire ba kacakaca. Ka keni naba uwwa ate nadegadegaara.

<sup>16</sup> A ba ñane àà elvan ge mukse: Yaà kwakyakanvekwakya zladfa àà yaà, kaà yaà egdzaraaña am palasa. Sey kaà de kumte àà ba an kuma nja antara zhelaaña, amaà ñane àà de maga ba sleksiraara ate ka.

<sup>17</sup> A ba ñane àà elvan ge urimagwe: Ka yaa ba elvaaruwa, ka cenvaa elva àà muksaaña, ka naba zu egdze àà nafa na piyanaktepiya, ya bakaa zeka na! Kwaye yaà nyainyainyainyainye haha adaba ka. Sey kaà shushe zladfa cuuwe, lauktu kaà shaà nazu kaà ezza ate haha na, haà àà zlauwa estuwe shifaaña.

<sup>18</sup> Haha aà sakanse ba dakaha antara masaha na baaka paydaara na, kaà de za ba slapaha am kaamba.

<sup>19</sup> Sey aà sesse ngudeffire cuuwe ate wafkaana, lauktu kaà shaà nazu kaà ezza. Njaana ba una, dem sarte na maà eptsekpetsa zlaɓe adaliye aà dem haha, adaba ndza ya sakse aà ba am haha. Ekka irana ka haha, kaà eptsa aà ba dem haha nanna.

<sup>20</sup> Aadama a fete zhera aà muksaara Hawwa, adaba nane gevge emmarge emnde na taà an shifa bademme.

<sup>21</sup> Dadaamiya Yaakadada a magateraa naàza heda nasherire an gwagwa ge tara Naadama antara Hawwa muksaara, daaci a tsekwateremhe.

<sup>22</sup> A ba Dadaamiya Yaakadada: Kina waà urimagwe gevge ba seke pallaamiya mazlaara, diyaadiya shagerire antara shagerkire. Shagera mi piyantepiya, aà feteka erwaara zlaɓe adaliye ate egdze aà nafa aà shifa. Maàki zauze una nanna aà de nja an shifa dem ba ge dekideki.

<sup>23</sup> Adaba una nanna Dadaamiya Yaakadada a ngyanse urimagwe am fahe aà Adnin geni a ezlzala aà de herdaara ate haha na ta sanse am kwan.

<sup>24</sup> A ngyanse urimagwe, a tsatsaa Kairubaha am dalba aà gedɪ ge fahe nanna, taà an katsakar am erwa, aà mbe pelpele ba seke nara aà kara, taà ankwa ufa barama a dem tate aà nafa aà shifa na.

## 4

### *Kayinu antara Habila*

<sup>1</sup> Am iga aà una nanna maa, Naadama a deza muksaara Hawwa, a shaa hufe, a ye egdzere zhele, zheraara Kayinu. A ba Hawwa: A shiyantaa ba Yaakadadaaruwa egdzere zhele na.

<sup>2</sup> A yehe zlaɓe adaliye umele, zheraara Habila, egdze a emmenaara ge Kayinu. Habila gevge suni, Kayinu nane gevge sleherda.

<sup>3</sup> Vacite umele, Kayinu a sanaa sadake ge Yaakadada am naàzena a vanta uzaara.

<sup>4</sup> Habila keni a de sanaa sadake ge Yaakadada am dabbahaara, a de sanaa ba emnde na ta zuɲɲwe ge mamahaatare, taà an nasla jipu na. Dadaamiya Yaakadada hayanhaya Habila lyevaalya sadakaara kani.

<sup>5</sup> Amaà Kayinu waà, Yaakadada hyanka nane, lyiyaaka sadakaara keni. Daaci jaaja erwaunde Kayinu na, aà kwasha feke.

<sup>6</sup> A ba Yaakadada aà elvan ge nane: Labara aà jaka erwaunde kaà kwasha feke na?

<sup>7</sup> Maà shagera maàgaana, watse ka kanteka ire. Maà shagerka maàgaana, kwaye haypa njanunje ge wakiyaana, bademme a wederaara aà ba ate ka. Amaà naàzena yaà bakanaa ya waà, gegga ba ka ndzedɪ arge nane.

<sup>8</sup> Daaci a ba Kayinu aà elvan ge egdze a emmenaara Habila: Sawa mi zlala aà dem kaamba. Daraada am kaamba maa, Kayinu nanna a naba darge egdze a emmenaara na an waàva, a je shifaara.

<sup>9</sup> A ba Yaakadada aà elvan ge Kayinu: AÀma egdze a emmena Habila? A nwanante a ba nane: Diyanka ya, ya sle ufa egdze a emmerwa emtu?

<sup>10</sup> A ba Yaakadada aà elvan ge nane: Azara una ka maganaa ka na? Eccena ba ngaa: Se shisha kyuwa aà uzhe aà egdze a emmena aà sawa am haha.

<sup>11</sup> Kina waà, kaà an nyainye, baaka barkaana, ambane ba ka baaka ate haha nanna a shu uzhe aà egdze a emmena na, ka puwanvaa ba ka an erwaana na.



<sup>12</sup> Kaà de herda, amaà watse àà yaiveye haha naàmpire na àà magateraàn ge emnde na. Kaà de jaà d'aba seke ba kuye, dammaru kaà de shanka tate na ni àà de ekhyekhya ervaunfaana ààtekwa na.

<sup>13</sup> A ba Kayinu àà elvan ge Yaakadada: Elva na demfeme jauje ge ndzedaarua, yaà tsa sepanteka.

<sup>14</sup> Varena ngyaikisengye am slede àà herda, ngyaikisengye àà katafkaana keni bademme. Ganevge ba seke kuye, baaka tate àà tsaaruwa dekideki ate haha na. Una aàbi ma a shiyaa ware keni àà de jaà ba shifaaruwa?

<sup>15</sup> A nwanante ge Yaakadada, a ba nane: baaka ura jagja dekideki. A ba nane: Ma ware una a je Kayinu, àà pelava an shifa vuye. Daaci Yaakadada a magaa nalaama ate Kayinu, geni ma ta jaa ire antara ware keni, eddaara a fanfeka erva dekideki.

<sup>16</sup> Am iga àà una nanna maa, ba ezlalaara ge Kayinu yiyiye an Yaakadada, kwaye a de nja am haha àà Naudi, àà dem gedyaara ge Adnin.

### *Eggyahanaara ge Kayinu*

<sup>17</sup> Kayinu a deza muksaara, mukse shansha huđe, a yese egdzere zhele zharaara Hanauk. Kayinu a ndere berni, a fete zhara àà berni nanna Hanauk, zhara àà egdzaara.

<sup>18</sup> Hanauk a yese Irađ, Irađ a yese Maihuya'el, Maihuya'el a yese Maitsusa'el. Maitsusa'el a yese Lamaik.

<sup>19</sup> Lamaik nane a halante nwashabuwa. Palle zharaara Adda, palle na keni zharaara Jila.

<sup>20</sup> Adda a yese egdzere zhele, zharaara Yabal. nane eggyetare ge emnde a kumkum, taà nja àà ba am beraha àà kacakaca, taà an waldahaatare.

<sup>21</sup> Zhara àà egdze a emmenaara Yubal, nane eggyetare ge emnde a jaà gadzavera antara emnde a ferta nalgaita.

<sup>22</sup> Jila keni a yese egdzere zhele zharaara Tubalkayinu, nane slejaà ekzla, àà jaànaà nane kazlana àà slera bademme, an verzhagane antara ire danjwe. Ankwa egdze a emmenaara mukse, zharaara Naama.

<sup>23</sup> A ba Lamaik àà elvan ge nwashahaara, tara Adda antara Jila: Cenau-cena naàwa yaà bakura elvaaruwa, kwa nwashahaaruwa ya Lamaik aàbi! Yawwaa, faufa hyema ba ngaa ge cena elvaaruwa na. Iya Lamaik waà, maàki garifege ververe, iya yaà jaà shifa àà zhele palle. Maàki zariyuze an jaà, iya yaà jaà shifa àà egdzere zhele palle.

<sup>24</sup> Maàki ta cebaa zaala vuye ge pela hume a Kayinu waà, naàzaaruwa iya Lamaik zaala kul vuye ju vuye.

<sup>25</sup> Naadama a duhe zlađe aàdeza muksaara, muksaara a shaa huđe zlađe adaliye, a ye egdzere zhele, Hawwa a fante Saitu ge egdzaara, adaba a ba nane: A vitaa ba Dadaamiya egdzere zhele umele am slede àà Habila na jaaja Kayinu.

<sup>26</sup> Saitu keni a shaa egdzere zhele, a fete zharaara Ainaus, ta fantau àà ba am sarte nanna emndimagwaha ge d'aha zhara àà Yaakadada am maduwa.

## 5

### *Eggyahanaara ge Naadama dem Nuhu*

<sup>1</sup> Naàwa wakita na waà, àà tsaka wulfaha àà Naadama. Am sarte na Dadaamiya àà nderaà urimagwe, a nderanaa ate nderaara ge nane.

<sup>2</sup> A nderaterhe tara zhele an mukse, a gaterar barka, a vaterte zhara àà urimagwire ba vacite na ni a nderaterndera.

<sup>3</sup> Yawe à Naadama dermeke an kul keye am sarte na a shaa Saitu, egdze na ni a de eksa ba ñane mazlanaaka ba tatara kini ate ñane.

<sup>4</sup> Am iga à iva ñanna a ye Saitu ààtekwa na waà, Naadama a magaa iva dermeke tise zlaabe adaliye. A yayaa egdzar zaala umele antara egdzar ñwasha.

<sup>5</sup> Yawe à Naadama bademme lauktu àà emtsa waà, dermeke maselmane an kul keye

<sup>6</sup> Saitu a magaa yawe dermeke an ilyebe lauktu a ye Ainaus.

<sup>7</sup> Am iga à iva ñanna a ye Ainaus ààtekwa na maa, Saitu a magaa yawe dermeke tise an vuye. A yayaa egdzar zaala umele antara egdzar ñwasha.

<sup>8</sup> Yawe à Saitu bademme, dermeke maselmane an kelaawa ju buwa lauktu àà emtsa.

<sup>9</sup> Ainaus a magaa yawe kul maselmane kalkale lauktu a ye Kaynan.

<sup>10</sup> Am iga à iva ñanna a ye Kaynan ààtekwa na, Ainaus a magaa yawe dermeke tise an kelaawa jilyebe, a yayaa egdzar zaala umele antara egdzar ñwasha.

<sup>11</sup> Yawe à Ainaus bademme, a magaa dermeke maselmane an ilyebe lauktu àà emtsa.

<sup>12</sup> Kaynan keni a magaa yawe kul vuye kalkale lauktu a ye Malaliyail.

<sup>13</sup> Am igaara, a magaa yawe dermeke tise an kul ufadde zlaabe adaliye. A yayaa egdzar zaala, umele antara egdzar ñwasha.

<sup>14</sup> Yawe à Kaynan bademme a magaa dermeke maselmane an kelaawa lauktu àà emtsa.

<sup>15</sup> Malaliyail keni magaamaga yawe kul unkwaha jilyebe lauktu a ye Yarat.

<sup>16</sup> Am igaara, a magaa yawe dermeke tise an kul keye, a yayaa egdzar zaala umele, antara egdzar ñwasha.

<sup>17</sup> Iva àà Malaliyail bademme, dermeke tise an kul maselmane jilyebe lauktu àà emtsa.

<sup>18</sup> Yarat a magaa yawe dermeke an kul unkwaha ju buwa lauktu a ye Anuhu.

<sup>19</sup> Am igaara zlaabe adaliye, Yarat a magaa yawe dermeke tise kalkale. A yayaa egdzar zaala umele antara egdzar ñwasha.

<sup>20</sup> Yawe àà Yarat bademme, dermeke maselmane an kul unkwaha ju buwa lauktu àà emtsa.

<sup>21</sup> Anuhu magaamaga yawe kul unkwaha jilyebe lauktu a ye egdzere zhele zheraara Matusala.

<sup>22</sup> Am iga à iva ñanna a ye Matusala ààtekwa na maa, Anuhu a magaa yawe dermeke keye kalkale zlaabe adaliye, ankwaha àà d'aba Dadaamiya. A yayaa egdzar zaala umele antara egdzar ñwasha.

<sup>23</sup> Yawe àà Anuhu bademme, a magaa dermeke keye an kul unkwaha jilyebe lauktu àà emtsa.

<sup>24</sup> Anuhu d'abeted'aba Dadaamiya. Emnde taà zhaàràà ba baaka am dagavaatare, ad'aba eksanteksa Dadaamiya àà ba an shifa ààdezenaara.

<sup>25</sup> Matusala a magaa iva dermeke an kul tise ju vuye, lauktu a ye Lamaik.

<sup>26</sup> Am igaara, Matusala a magaa yawe dermeke vuye an kul tise ju buwa. A yayaa egdzar zaala umele antara egdzar ñwasha.

<sup>27</sup> Iva àà Matusala bademme, a magaa yawe dermeke maselmane an kul unkwaha ju maselmane lauktu àà emtsa.

<sup>28</sup> Lamaik keni a magaa iva dermeke an kul tise ju buwa, lauktu a ye egdzere zhele.

<sup>29</sup> A fete zhera àà egdze ñanna Nuhu. A ba ñane: Edgze na waà, watse àà ekhyañera ñane ervaun'de am slerahañere bademme, ad'aba

ngedepa na n̄aà an̄kwa aà magana n̄ere ate haha na. Adaba Dadaamiya nyainyainvenyainye haha.

<sup>30</sup> Am iga aà iva n̄anna a ye Nuhu aàtekwa na, Lamaik a magaa iva dermeke ilyebe an kul maselmana jilyebe zlabbe adaliye. A yayaa egdzar zaala umele antara egdzar n̄washa.

<sup>31</sup> Iva aà Lamaik bademme, a magaa dermeke vuye an kul vuye ju vuye, lauktu aà emtsa.

<sup>32</sup> Nuhu keni maa, a magaa yawe dermeke ilyebe kalkale, lauktu a fantau ge yaà egdzara. Tara Saim, antara Haamu ira Yafait.

## 6

### *Mandzawire aà emndimagwaha jasseje am ire aà Dadaamiya*

<sup>1</sup> Am sarte na emndimagwaha farantaufe aà ba an ndzedã taà an̄kwa huya ate haha, taà an̄kwa aà yaya gyaalaha zarizariya keni.

<sup>2</sup> Emnde aà Dadaamiya taà an̄kwa a zhaàrà gyaalaha aà emndimagwaha na ta zariyaha jipu, daaci ta naba dzerese gyaalaha n̄anna, ta gaterve n̄washahaatare.

<sup>3</sup> Daaci a ba Yaakadada: Mazlaara yaà yanka Shedefkwaaruwa aà nja am urimagwe dem ba ge ðekideki. Adaba urimagwe an vuwa, a n̄aa ba emtsa. Yaà gulanagula sladfire aà shifaara, a juka am yawe dermeke palle an kul buwa taà nja an shifa.

<sup>4</sup> Am zamane n̄anna, emnde a samaya ta ge gyaalaha aà emndimagwaha, ta gaterve n̄washahaatare na waà, ba egdzara aà n̄washa n̄anna ta ge emnde a samaya na una ndza ta emnde a n̄gan̄ga, yaikkire keni ndza ba naàzaatare.

<sup>5</sup> Daaci Yaakadada aà zhaàrà mandzawire aà emndimagwaha a far ba wala ate haha, naàzena taà dzamana am ervaun̄daatare bademme ba mandzawiri

<sup>6</sup> Yaakadada demda am ambane ge ndera urimagwe ate haha, zladevzladẽ ervaun̄daara jipu.

<sup>7</sup> Adaba una n̄anna, a ba n̄ane: Emnde n̄anna ya nderateraa ba iya na waà, sey yaà jaàteraàja ate haha ba ðekideki. Dete dabbaha, naàzu aà hulmba am haha ira yiya aà samaya bademme. Adaba danemda am ambane geni ambane ma nderanaterka ba ðekideki.

<sup>8</sup> Amaà Nuhu waà, n̄ane shansha n̄gurna aàza Yaakadada.

### *Dadaamiya aà kwanse maàga paàre aà yawe ge Nuhu*

<sup>9-10</sup> Naàwa una waà, labare aà Nuhu, eddarga dawalaha keya: Tara Saim, antara Hamu ira Yafait. Nuhu ndza ur jirire, ndza baaka duksa maàndzawe ate n̄ane, ndza aà ðaba ba Dadaamiyaara.

<sup>11</sup> Amaà emnde bademme waà, duniya bademme sepse am ice aà Dadaamiya, a juwaa ba kelaadire baaka dukse umele.

<sup>12</sup> Dadaamiya aà ezhzhaàrà waà, duniya n̄anna bademme badzavbadze. Adaba bademme a emndimagwaha baaka ura aà zlala ndedde am duniya.

<sup>13</sup> Daaci a ba Dadaamiya aà elvan ge Nuhu: Maàga aà emndimagwaha n̄anna hyaahya, adaba duniya bademme badzavbadze adaba maàgaatare. Adaba una n̄anna yaà jaàteraàja ba ðekideki ate haha na.

<sup>14</sup> Amaà ekka waà, maganaamaga paàre aà yawe yaikke ge iraan̄a, kaà maganaà an nafa aà gaurfir. Kaà maga huðe ma gergere waanyara keni am huðara. A jerka tate aàtekwa, kaà vanyavanya bademme an naàvawe, tara huðe an iga bademme.

<sup>15</sup> Paàre àà yawe ñanna naàwa kaà de magana ate una: An sladfdire kaà kura dza dermeke keye kalkal, an huya waà, dza kul ilyebe. Sladfdiraara àà dem samaya keni dza kul keye keslsle.

<sup>16</sup> Maà kaà maga pare ñanna waà, kaà maga bere arge bere, bere arge bere haà keye. Wakyiyaara am dalbe palle, kaà maganaà am dagavaara ge dalbe ñanna. Sey kaà mazlanaamazla wabiye ààtekwa àà ba an niya deydey dza palle, am dagave àà tara vuwa àà pare an mbakye.

<sup>17</sup> Adaba uwe, kwaye watse yaà hya yawe yaikke jipu ge kefa duniya bademme, naàzena an shifa bademme ate haha na bademme àà kefa.

<sup>18</sup> Amaà ekka waà, yaà anjka maga namaàna am dagavaamiya antara ka, kaà kefeka defekedi. Naba dawumda am pare àà yawe antara muksaana, egdzaraakure ira shawlahaakure.

<sup>19</sup> Iyau halatertehala zlafe adaliye àà dem pare antara ka, duksa bubuwa tara zhele an mukse am naàzu an shifa bademme geni itare keni a kefeka shifaatare, a enzlarsenzle antara ka.

<sup>20</sup> Ma am yiyaha, ma am dabbaha, ma am naàzu àà hulmba am haha keni, am naàzena an shifa bademme, kaà tsaka bubuwa tara zhele an mukse, watse taà sawa ba itare ààsezena geni taà enzlesenzle antara ka.

<sup>21</sup> Ekka waà, ejaàhaà ka ba naàza za, jili àà naàza za gergere fanufe hyema ààzena, watse kaà ña irana an ñane, antara ààzaha ñanna bademme.

<sup>22</sup> Nuhu a maganaahe àà ba ate una ñanna, a magaa ba naàzena ni a faara Yaakadada bademme.

## 7

### *Yawe àà zla duniya*

<sup>1</sup> Daaci a ba Yaakadada àà elvan ge Nuhu: Dawumda am pare àà yawe antara emndaana bademme. Adaba ya ber ba ka palle edda àà jirire am dagave àà emnde a zamane na.

<sup>2-3</sup> Am dabbaha na cufedfe waà, tsakvaatsaka ààdezena zaala vuye, ñwasha keni vuye àà ba am jeba palle. Am yiyaha keni ba estuwa, kaà tsaàkaà zaala vuye, ñwashahaara keni vuye àà ba am jeba palle, geni a jauje wulfaatare am hufe àà duniya. Amaà am dabbaha na haraam waà, kaà tsaàkaà ba bubuwa tara zhele an mukse tara zhele an mukse zlauzle.

<sup>4</sup> Adaba a juwaa ba hare vuye njerainje, yaà de hyaà yawe yaikke, vayivacika, hare kul ufufe watse àà hya ba yawe ñanna, bademme naàzena ya nderanaa ya ate haha na àà de jauka ba palle keni.

<sup>5</sup> Daaci Nuhu maganaamaga naàzena a faara Yaakadada na bademme.

<sup>6</sup> Am sarte na Dadaamiya a hyaa yawe yaikke ge kefa duniya bademme na waà, iva àà Nuhu dermeke unjwahe kalkale.

<sup>7</sup> Daaci ta demhe ge tara Nuhu am paàre àà yawe antara muksaara, antara egdzaraatare ira ñwashaha àà egdzaraatare bademme, geni a kefateraaka yawe yaikke ñanna.

<sup>8</sup> Dabbaha cufedfe, antara dabbaha na garevka cufedfe, antara yiyaha ira naàzu àà hulmba am haha,

<sup>9</sup> bademme saremsa ààseza Nuhu am pare bubuwa bademme, ma uwe keni ba tara zhele an mukse tara zhele an mukse, ba seke una a ndahana Dadaamiya ge Nuhu na.

<sup>10</sup> Am magaaamaga hare vuye ñanna waà, tsekwaatsekwa yawe yaikke àà sawa am samaya ààsetarge haha bademme.

<sup>11</sup> Ate iva na ni iva àà Nuhu magaaamaga dermeke unjwahe na waà, ate tere ge buwire, haraara keni kelaawa ju vuye na waà, vacite ñanna a naba

sesehe ge yawaha, bademme heraaheera sledge, ate samaya keni a weretaa ba biyaara ge yawe,

<sup>12</sup> Maà a de fantau ge hya yawe à sawa am samaya waà, ba ka hedu we. Vacivayika hare kul ufade à hya ba yawe na.

<sup>13</sup> Vacite nanna tara Nuhu ta demhe am pare à yawe antara muksaara, egdzaraara, tara Saim antara Hamu ira Yafait, antara shawlahaara keye.

<sup>14</sup> AÀ dem pare à yawe nanna ta demhe ba kerde antara dabbaha à kaamba jeba gergere, dabbaha à haà jeba gergere, naàzu à hulmba am haha jeba gergere, antara yiyaha keni jeba gergere.

<sup>15</sup> Bademme à naàzena an shifa, ta semhe bubuwa aàseza Nuhu am pare à yawe na.

<sup>16</sup> Am jeba duxaha na bademme, ta semaa tara zhele an mukse à ba ate una a bannaa Dadaamiya ge Nuhu na. Am iga à una nanna maa, ba Yaakadada an iraara a hedanu ge Nuhu am pare à yawe.

<sup>17</sup> Hare kul ufade kalkale vacivayika à hya ba yawe yaikke na à sawa am samaya, haha bademme walarwaàla yawe, ankwà à kaà pare à yawe na à detire, gevge waà, pare à yawe na à jaà daba ba estuwa arge yawe bademme.

<sup>18</sup> Yawaha na ba a farfe a ba an ndzedà, gevge haha yiyiye jipu ge sledfire a yawe argine, pare à yawe na a ja daba arge yawaha.

<sup>19</sup> Adaba yawe nanna ankwà à far ba waàla à dem samaya, antare ba ire à waha sadafde keni à naaka mazlaara ndawnde.

<sup>20</sup> Yawe ndawnde waha bademme. AÀ ba arge ire à waha keni waàlaà à yawe dza kelaawa jilyebe.

<sup>21</sup> Bademme a naàzena à puwa ba shifa ate haha na jauka. Amaana: yiyaha, dabbaha à haà, dabbaha à kaamba, naàzu à hulmba am haha, antara ba emndimagwaha.

<sup>22</sup> Bademme a naàzena à puwa shifa à kya ektare, à nja ate haha dzayye emtsaremsta.

<sup>23</sup> Yaakadada a janaahe estuwa naàzena ndza an shifa ate haha bademme. Tsante ate urimagwe, dabbaha sadafde, dabbaha mesheshe, yiyaha, bademme a kedaterahe ba dekideki ate haha. Sey a jauwa ba Nuhu an shifa, antara emnde na ndza taà antara nane am pare à yawe.

<sup>24</sup> Waàla à yawe ate haha gejaaka emtsaade dekideki, a magaa hare dermeke an kul ilyebe.

## 8

### *Dadaamiya a vante estuwa barama a segashe am pare à yawe ge Nuhu*

<sup>1-2</sup> Daaci Dadaamiya viyanaaku Nuhu, antara dabbaha à kaamba ira dabbaha à haà na taà antara nane am pare à yawe na, a naba saa effeya, ankwà à vata effeya na ate haha bademme, daaci yawaha na a segashe am hufe à haha na, antara biyaha na ndza ate samaya na bademme hadettehaàda, yawe na à hya na keni a naba belehe, lauktu waàlaà à yawe na ate haha na a fantau ge tsekwa.

<sup>3</sup> Waàlaà à yawe ate haha à far ba gula an cekwa an cekwa, a magaa hare dermeke an kul ilyebe lauktu gulaagula kwa waàlaà à yawe nanna ba nga.

<sup>4</sup> Ate tere ge vuyire am iva nanna, ate hare kelaawa ju vuyire ate tere nanna waà, de tsaatse pare à yawe am hufe à wa à Araraada.



<sup>5</sup> Yawe na anƙwa àà far ba gula ate haha. Ate tere kelaawire, am hare ge zuññwire ate tere ñanna waà, marapsemaàre ire àà waha, naranna emnde.

<sup>6</sup> A magaa hare kul ufaɗe am iga àà una ñanna, Nuhu a naba werante we àà biye na a maganaa àà ba an niyaara ate pare na,

<sup>7</sup> a belaa zalke, zalke na a naba ñgye, de janteja ɗaba, a naba saahe. Zalke na anƙwa àà zlala, àà saà adaliye, anƙwa àà ja ɗaba ba estuwa haa a zlu ge yawe ate haha, eptsaka mazlaara.

<sup>8</sup> Am iga àà una ñanna maa, a belaa takala zlaɓe adaliye geni àà zharanaa ààtekwa maàki ba jirire gulaagula yawe ate haha.

<sup>9</sup> Amaa takala ñanna shanka tate na ni a tsekwa ààtekwa ba geni àà puwansepuwe seraara keni. Am zlaɓe anƙwa yawe ààte haha baɗemme, takala na a naba eptsaka ààsete vuwa àà pare àà yawe. Nuhu a velese ervaara, a eksante takala na a dem huɗe a pare àà yawe.

<sup>10</sup> A pakvaa hara vuye zlaɓe adaliye am iga àà una ñanna, a belaa takala na zlaɓe adaliye ààdegashe.

<sup>11</sup> Takala na a saa ààsezeñaara an icavaciya, antara hyema àà anyaran-yara am mbuwe. Daaci diyeddiye Nuhu geni gulaagula yawe ate haha.

<sup>12</sup> Am iga àà una ñanna, a magaa hare vuye zlaɓe adaliye, a naba belaa takala na adaliye. Amaa eptsaka takala na ààsezeñaara mazlaara.

<sup>13</sup> Ate iva na ni Nuhu shanaasha iva dermeke an palle waà, ate zuññwire àà tere, hare keni zuññwire ate tere ñanna waà, yawe keni zlauzle ate haha baɗemme. Daaci Nuhu a naba fiyaa ire àà pare, a zharanaahe baɗemme waà, baaka, zlauzle yawe ate haha mazlaara.

<sup>14</sup> Ate tere ge buwire, haraara keni kul buwa ju vuye waà, welasewele haha kanngelanje.

<sup>15</sup> Mazlaara a ba Dadaamiya àà elvan ge Nuhu:

<sup>16</sup> Sesse am pare àà yawe mazlaara. Muksaana, egdzaraana, shawla-haana, itare keni a sarsese baɗemme.

<sup>17</sup> Satersese ààzaha na taà ààzeña na keni baɗemme: yiyaha, dabbaha ira naàzu àà hulmba am haha. Naba satersese, puwataapuwa a zlarzlala ma ààdeme keni ate haha baɗemme, a yairteya, a hyartehye ate haha baɗemme.

<sup>18</sup> Daaci a sesehe ge Nuhu am pare àà yawe, muksaara, egdzaraara, antara shawlahaara keni ta sesehe antara ñane am pare àà yawe na.

<sup>19</sup> Am igaatare, ta sesehe ge dabbaha jeba gergere, yiyaha jeba gergere, naàzu àà hulmba am haha keni jeba gergere ira naàzu an shifa àà zlala ate haha baɗemme jeba gergere, sarsese am pare àà yawe.

<sup>20</sup> Daaci Nuhu a nderanaa tate àà fana sadake ààtekwa ge Dadaamiya Saksage. Am igaara, a eksevaa palpalle am dabbaha cuɗeɗe, am yiyaha na cuɗeɗe keni a eksevaa palpalle, a vante sadakaara ge Dadaamiya ate tate ñanna, baɗemme a zuwaa ba kara.

<sup>21</sup> Yaakadada sanaase emtakire àà sadake na waà, a ba ñane am ervaunɗaara: Yaà dalika àà nyainya haha ɗekideki aɗaba urimagwe. Ge jirire waà, urimagwe àà ba am cekwire keni baaka duksa umele am ervaunɗaara, sey ba dzama ire maàndzawe. Aley keni yaà naba yanya, yaà dalika àà ceba naàzu an shifa seke una ya maganaa ya kina.

<sup>22</sup> Maàki zlaɓe àà ba anƙwa haha na waà, jaà duksa, antara icanaa àà se mba iceka. Iyau sarte àà ñgudeffire antara sarte àà lailaidfire, viya antara erva a vaciya ira vaaha antara vayiya, baaka tsatare ɗekideki.

## 9

### *Dadaamiya a ngudanaa namaàna ge Nuhu*

<sup>1</sup> Dadaamiya a gar barka ge Nuhu antara egdzaraara, a ba ñane àà elvan ge itare: Yaiwtiya, gawevge ba kwakya, hyawtehye ate haha bademme.

<sup>2</sup> Bademme a dabbaha, bademme a yiyaha àà samaya, bademme àà naàzena àà hulmba am haha, bademme a kelfaha am haye, sey taà kuvakurkuva. Fanakuremfa ààzaha ñanna bademme am erva ge kure.

<sup>3</sup> Bademme a naàzena àà zlala ate haha, bademme a naàzena an shifa, vanakurteva ààzaha ñanna ge ezza. Ba seke una ndza ya vakurte masaha bademme ge ezza na waà, una keni ba estuwa.

<sup>4</sup> Sey ba hyuwa na ni saska shifa am hudfaara na waà, una ñanna zauka ðekidèki. Amaana: hyuwa na icaaka.

<sup>5</sup> Uzhaakure keni, amaana: shifaakure, sey watse yaà enndaàva ààza eddawna a je shifaakure. Shifa àà urimagwe waà, ma a janaa dabba keni, sey yaà ndavanundave, ma a janaa ura keni eddawna a je shifa àà ukfeñaara na sey yaà ndavanundave.

<sup>6</sup> Ma ware una a puvaa uzhe àà urimagwe na, uzhaara ge ñane keni àà de puwana ba ura seke ñane. Adaba Dadaamiya a ndere urimagwe ate nderaara ge ñane.

<sup>7</sup> Kina kure waà, yaiwtiya, huyawhuya, hyawtehye ate haha baaka zlaktaakure ðekidèki.

<sup>8</sup> A ba Dadaamiya zlaɓe adaliye, àà elvan ge Nuhu antara egdzaraara:

<sup>9</sup> Iya waà, naàwa yaà magakura namaàna ge kure antara eggyahaakure na ni watse taà sawa am igaakure,

<sup>10</sup> ira naàzena àà ba an shifa anƙwa ate haha antara kure. Amaana: yiyaha, dabbaha, egdzar dabbaha mesheshe na àà zlala am haha na, bademme àà naàzena ni a segashe am pare antara kure.

<sup>11</sup> Naàwa namaànaaruwa na yaà ngudakur ge kure: ðekidèki yaà hyeka yawe yaikke na ààdete haha, àà zlaà naàzu an shifa bademme na. Jeba àà yawe ñanna àà dalika àà sawa ðekidèki ge zlaà naàzu ate haha bademme na.

<sup>12</sup> A farhe zlaɓe adaliye Dadaamiya, a ba ñane: Naàwa nalaama àà namaàna na yaà ngudana iya am dagavaamiya, iya antara kure ira naàzu an shifa bademme dem eggyeggye maà ba taà anƙwa emndimagwaha ate haha:

<sup>13</sup> Yaà de fem kataliyavere am dagave àà kumbaha. Una ñanna nalaama àà namaànaaruwa, am dagavaaruwa antara emnde na ta ate haha bademme.

<sup>14</sup> Ba kelaa maà maganaamaga kumba arge haha ni jesarje kataliyavere am hudfaara waà,

<sup>15</sup> sey ba yaà yehammeyehe namaànaaruwa na am dagavaaruwa antara kure ira naàzu an shifa bademme na, àà gevka ðemme yawe yaikke mazlaara ge zlaà shifa ate haha bademme na.

<sup>16</sup> Watse àà tsatse kataliyavere am dagave àà kumbaha yaà de zharanaà an icaaruwa, yaà de yehete aàtekwa namaàna saksage na ni am dagavaanere iya Dadaamiya antara naàzena an shifa ate haha bademme.

<sup>17</sup> Dadaamiya a fanarhe zlaɓe adaliye ndandahaara ge Nuhu, a ba ñane a elvan ge ñane: Una ñanna nalaama àà namaàna ya ngudanaa ya, am dagavaanere antara naàzena an shifa ate haha bademme.

### *Nuhu an egdzaraara*

<sup>18</sup> Egdzara à Nuhu egdzar zaala na ta segashe am pare à yawe waà, ba tara Saim an Haamu ira Yafait. Haamu waà, ñane eddenjaara ge Kanaana.

<sup>19</sup> Egdzara à Nuhu keye ñanna waà, ta huya ba itare, bademme à emnde na ta ate haha na ta segashe à ba am itare.

<sup>20</sup> Ay Nuhu waà, ñane ndza sleherda, a magaa fe à inabauhi, zhera à nafa ñanna.

<sup>21</sup> Daaci vacite umele maa, a hyana mbazla à egdza à nafa à inabauhi na, jaaja, a de zlavehe am beraara an ukhyiye dey.

<sup>22</sup> Duwa à Haamu eddenjaara ge Kanaana, a de zhareme am nasherire à eddenjaara na, a de balateranse ge egdzar mamahañara buwa taà aàgashe.

<sup>23</sup> Daaci ta tsetehe ge egdzar mamahañara na, tara Saim antara Yafait, ta haltaa zane, ta puwete zane na ate nahyaipaihyaipaatare, ta duwa an iga an iga aàdeza eddetare na geni a naraanka nasherire à eddetare na an ukhyiye dey na, ta de shebanaa nasherire ge eddetare.

<sup>24</sup> Am sarte na tsetse Nuhu, kyanvaarkye mbazla bademme, a naba diyeddiye naàzena a magannaa egdzaara na bademme, kudere keni ba ñane am egdzaraara.

<sup>25</sup> Daaci a ba Nuhu: A nyainyainvenyainye Dadaamiyalla Kanaana! A gevge kataliya à ba am naàvaha à egdzar mamahañara keni!

<sup>26</sup> A farhe zlahe adaliye, a ba ñane: Dadaamiyaaruwa Saksage, barka à ñinja antara Saim, sey Kanaana à gevge navaara.

<sup>27</sup> Huyanaahuya Yafait, ñjanaanja an hairire am mba à egdze a emmeñaara Saim. Amaà Haamu waà, a gevge navaatare.

<sup>28</sup> Am iga à yawe yaikke ñanna maa, Nuhu a magaa yawe dermeke keye an kul ilybe zlahe adaliye ankwaa à zaà shifa.

<sup>29</sup> Ivaara bademme am duniya, a magaa dermeke maselmane an kul ilyebe lauktu à emtsa.

## 10

### *Wulfaha à egdzara à Nuhu*

<sup>1</sup> Am iga à yawe yaikke na a kedaa naàzu an shifa ate haha bademme na waà, egdzara à Nuhu, tara Saim an Haamu ira Yafait huyaraahuya, ta yayaa egdzar zaala.

<sup>2</sup> Naàwa egdzara à Yafait: Tara Gaumair an Magaug an Maday an Yawan an Tubal an Maisaik ira Tiram.

<sup>3</sup> Naàwa una keni egdzara à Gaumair: Tara Askanas an Rifat ira Taugarma.

<sup>4</sup> Naàwa egdzara à Yawan: Tara Ailiza an Tarsis an Kiti ira Raudani.

<sup>5</sup> Bademme a lardaha na taà am dagave a haye na, antara lardaha na taà ate we à hayaha na, ta segashe à ba am itare. Garevge jebaha gergere kwakya, taà ndaha elvaha keni gergere kwakya, zlamaha gergere kwakya, ma emndara keni taà à ba an lardaatare. Emnde ñanna bademme ba wulfaha à Yafait.

<sup>6</sup> Naàwa egdzara à Haamu keni: Tara Kus an Mitsarayim an Put ira Kanaana.

<sup>7</sup> Naàwa egdzara à Kus: Saiba an Hawila an Sabaita an Rama ira Sabitka. Naàwa emnde na keni ta egdzara à Rama: Tara Saba an Daidan.

<sup>8</sup> Kus waà, Nimrudu keni a yanaa ba ñane. A fantuwa ba Nimrudu ñanna maga hakuma ate haha.



<sup>9</sup> Nimrudu nanna waà, sledzega an haàkuma àà dzega keni jipu ààkatafke àà Yaakadada. Adaba una nanna, ta baàntsa: Sledzega seke Nimrudu na an haàkuma àà dzega àà katafke àà Yaakadada na.

<sup>10</sup> Naàwa eksaha na Nimrudu a fantau ge maga sleksiraara am hudàara na: Am Baabila, am Airaik, am Akat, antara am Kalne. Eksaha nanna bademme àà ba am larde àà Siniyar.

<sup>11</sup> A kezlese am larde nanna, kwaye àà zlala àà dem larde àà Asuura. Nimrudu a de nder berniyaha gergere ààhuwa: Berni àà Niniwe, berni àà Raikaubaut Ir, berni àà Kalak

<sup>12</sup> antara berni àà Raissain. Raissain waà, am dagave àà tara Niniwe antara Kalak berni na yaikke jipu na.

<sup>13</sup> Mitsarayim maa, nane eggyetare ge Lundiyaha an Anamiyaha an Laihabiyaha an Naftuwaha

<sup>14</sup> an Paterusiyaha an Kasluwaha ira Kaftauriyaha. Filistiyaha keni ta segashe àà ba am emnde nanna.

<sup>15</sup> Kanaana a yese Sidaun makaajiyaara antara Haitu.

<sup>16</sup> Yaibusiyaha an Amauriyaha an Gairgasiyaha,

<sup>17</sup> Haiwiyaha, Arkiyaha, Siniyaha,

<sup>18</sup> an Arwidiyaha, Jaimariyaha ira Hamatiyaha, bademme a jebaha nanna, ta segashe àà ba am Kanaana. Am iga àà una nanna maa, emnde àà Kanaana nanna jeba gergere na bademme zadarevzaàde hyaremnye am tate nanna.

<sup>19</sup> Emnde àà Kanaana waà, hahaatare yaikke jipu. Tsante am Sidaun am dalbe àà Gairar, dem Gaaja, dem Saudauma antara Gaumaura, an Adama an Saibauyim, kwaye de shanaasha Laisa, bademme ba hahaatare.

<sup>20</sup> Kwaya nane wulfaha a Haamu, garevge jebaha gergere kwakya, ma emndara keni taà ndaha ba elvaatare, taà am lardahaatare gergere, antara zlamaha gergere.

<sup>21</sup> Saim maleñaara ge Yafait, nane keni a yayaa egdzar zaala, eggyetare ba nane ge emnde àà Aibair bademme.

<sup>22</sup> Naàwa egdzara àà Saim: Tara Ailam an Assuuru, Arfasada, Luuda ira Aram.

<sup>23</sup> Egdzara àà Aram nanna maa, tara Us an Hul an Gaitair ira Mas.

<sup>24</sup> Arfasada a yese Sala, Sala a yese Aibair.

<sup>25</sup> Aibair, nane a yayaa egdzar zaala buwa: Pallaatare Falaik. Ta fante zhera àà Falaik adaba a tegava am zamanaara duniya. Zhera àà egdze a emmeñaara Yaktaan.

<sup>26</sup> Yaktaan a yese tara Almaudat an Saitaif an Hajamawait an Yairak

<sup>27</sup> an Hadauram an Usal an Dikila

<sup>28</sup> an Aupal an Abimayail an Saiba

<sup>29</sup> an Aufir, an Hawila ira Yaubaba. Bademmaatare na ta ba egdzara àà Yaktaan.

<sup>30</sup> Hahaatare ge itare keni maa, tsante am Maisar, dem Safar, dete wa na àà dem gedì na, bademme ba hahaatare.

<sup>31</sup> Kwaya nane wulfaha àà Saim, garevge jebaha gergere kwakya, ma emndara keni taà ndaha ba elvaatare, taà am lardahaatare gergere antara zlamaha gergere.

<sup>32</sup> Kwaya nane jebaha àà emnde gergere na ta yanaa egdzara àà Nuhu, ate kergema àà eggyahaatare. Bademme a nalgaadama ta segashe àà ba am itare, lauktu ta hyete ate haha am iga àà yawe yaikke na a kedaa duniya bademme na.

# 11

## *Bere sladfe am Baabila*

<sup>1</sup> Werre waà, bademme a duniya, emnde ndza taà ndaha ba elva palle, nara aà emnde ndza ba palle.

<sup>2</sup> Daaci tsaretse emnde ta d'aba baraàma aà gedfi maa, ta de beraa slede yaikke am haha aà Sinaiyar, d'aàmbake zlafe adaliye, ta naba nja am slede nanna.

<sup>3</sup> A ba itare am dagavaatare: Magaumimaga jalapa, deraumidera an kara geni aà gevge an ndzedà. Daaci ta magaa bere an nane ba seke ta maganaa an nakwa, ta vecaa bere nanna an haha an gya an gaderaun.

<sup>4</sup> A ba itare zlafe adaliye am dagavaatare: Dawamiyemda am slera, sey mi nderndera berni yaikke antara bere sladfe an tsaka ire an hudaara, sey ire aà bere nanna a shanaasha samaya. Sey mi maganaamaga una nanna, geni a kedeka zharaamiya, zadaumiyemka aà dem duniya bademme.

<sup>5</sup> Daaci a tsekwe ge Yaakadada aà sa am samaya, ge se zhara berni yaikke na ta nderanaa egdzara aà Naadama na.

<sup>6</sup> A ba Yaakadada: Emnde na waà, naàwa ta emnde a jeba palle, elva na taà ndahana itare keni ba palle, emnde na, ma ta nderaa maàga uwe am ervaun'daatara keni, baaka naàzu aà de piyatertepiya dekideki. Una ta maganaa itare kina na zlafe ba emtakwaara.

<sup>7</sup> Mindalawa, tsekwaumitsekwa, mi de weshaterantewesha elva na taà an'kwa aà ndahana itare geni a cenaraaveka am dagavaatare dekideki mazlaara.

<sup>8</sup> Daaci a de kyateraaha ge Yaakadada aàhuwa, aà dem duniya bademme, yaranya ndera berni yaikke na.

<sup>9</sup> Adaba una nanna, ta fante zhara aà Baabila ge berni nanna. Adaba Yaakadada a weshante elva na ta ndahanaa emnde am berni nanna, a kyesaa emnde aà dem duniya bademme.

## *Wulfaha aà Saim*

<sup>10</sup> Naàwa kergema aà wulfaha aà Saim: Saim magaamaga yawe dermeke lauktu a ye egdzere zhele, zharaara Arfasada. Zlafe ba yawe buwa am iga aà yawe aà keda duniya na.

<sup>11</sup> Am iga aà a ye Arfasada keni, Saim a magaa yawe dermeke ilyebe zlafe adaliye, a yayaa egdzar zaala antara egdzar n'washa umele.

<sup>12</sup> Arfasada a magaa yawe kul keye jilyebe, a ye egdzere zhele, zharaara Sala.

<sup>13</sup> Am iga aà a ye Sala maa, Arfasada a magaa yawe dermeke ufade an keye zlafe adaliye, a yayaa egdzar zaala antara egdzar n'washa umele.

<sup>14</sup> Sala magaamaga yawe kul keye waà, shansha egdzere zhele zharaara Aibair.

<sup>15</sup> Sala a magaa yawe dermeke ufade an keye zlafe adaliye, a yayaa egdzar zaala antara egdzar n'washa umele.

<sup>16</sup> Aibair magaamaga yawe kul keye ju ufade waà, a ye Falaik.

<sup>17</sup> Am iga aà a ye Falaik maa, Aibair a magaa yawe dermeke ufade an kul keye a yayaa egdzar zaala antara egdzar n'washa umele.

<sup>18</sup> Falaik magaamaga yawe kul keye, nane keni a ye Ragaw.

<sup>19</sup> Am iga aà a ye Ragaw maa, Falaik a magaa yawe dermeke buwa an maselmana. A yayaa egdzar zaala antara egdzar n'washa umele.

<sup>20</sup> Ragaw magaamaga yawe kul keye ju buwa, a ye Saraku.

<sup>21</sup> Am iga aà a ye Saraku maa, Ragaw a magaa yawe dermeke buwa an vuye zlafe adaliye, a yayaa egdzar zaala antara egdzar n'washa umele.

<sup>22</sup> Saraku magaamaga yawe kul keye, a ye Nakaur.

<sup>23</sup> Am iga àa a ye Nakaur maa, Saraku a magaa yawe dermeke buwa zlafe adaliye, a yayaa egdzar zaala, antara egdzar njwasha umele.

<sup>24</sup> Nakaur magaamaga yawe kul buwa ju maselmane, a ye Taara.

<sup>25</sup> Am iga àa a ye Taara maa, Nakaur a magaa yawe dermeke an kelaawa ju maselmane zlafe adaliye, a yayaa egdzar zaala, antara egdzar njwasha umele.

<sup>26</sup> Taara magaamaga yawe kul vuye, a ye Abraama, antara Nakaur ira Haran.

### *Labare àa Taara an emndaara*

<sup>27</sup> Naàwa labare àa Taara an emndaara: Taara a ye tara Abraama antara Nakaur ira Haran. Haran a ye Ludu,

<sup>28</sup> mazlaara a naba emtsehe eddenaara keni zlafe àa ba an shifa. A emtsaa àa ba am ekse na ta yanaa am hudaara na, am berni àa Ur, am Kaldiya.

<sup>29</sup> Tara Abraama antara Nakaur ta ge gyaalaha. Zhera àa mukse àa Abraama Saray. Zhera àa mukse àa Nakaur Milka. Milka njanna waà, egdze àa Haran eddetare palle an Yiska.

<sup>30</sup> Saray maa, njane dzire àa yeka baaka egdzaara.

<sup>31</sup> Taara a naba tse antara egdzaara Abraama, antara eggyenaara Ludu egdze àa egdzaara Haran, antara Saray shawlaara, mukse àa egdzaara Abraama, a naba tsetehe am Ur, am kwara àa Kaldiya antara emndaara, kwaye ta zlala àa dem Kanaana. Daraada am Harran waà, de njarinja àahuwa.

<sup>32</sup> Iva àa Taara magaamaga dermeke buwa an ilyebe lauktu àa emtsa. A emtsaa am Harran njanna.

## 12

### *Naàwa Dadaamiya a dante estuwa Abraama*

<sup>1</sup> A ba Yaakadada àa elvan ge Abraama: Sesse am lardaana, sesse am jebaana, sesse am mba àa eddena, ezlzlala àa dem larde na ni watse yaà kwaraksaà ya.

<sup>2</sup> Yaà de yaikteya, yaà de gagve larde yaikke. Yaà de gak barka, yaà de ganvege zheraanja zhera yaikke. Kaà de gev barka ge emnde bademme.

<sup>3</sup> Yaà de gater barka ge emnde na ni taà de gak barka ge ekka. Yaà de nyainyai emnde a nyainyaiknyainye. Yaà de gaterar barka ge emnde na taà ate haha bademme adaba ka.

<sup>4</sup> Daaci a naba tsetehe ge Abraama, a naba zlala ba seke una a bannaa Yaakadada na.

<sup>5</sup> Abraama magaamaga yawe kul vuye jilyebe am sarte na a kezla am Harran. A eksetaa muksaara Saray antara Ludu egdze àa egdze a emmenaara, antara navahaara na a shateraa am Harran njanna bademme ira nalmanaatare bademme, ba zlalaatare àa dem Kanaana.

Daraada am larde àa Kanaana njanna maa,

<sup>6</sup> Abraama a naba degashe an hufe àa larde àa Kanaana njanna peraatte, haa a daahe àa dem tate na taà dahana an Sikaim na, am tate àa nafa yaikke na taà dahana an Maure na. Am sarte njanna maa, emnde a larde taà ankwa am Kanaana.

<sup>7</sup> A naba marapsehe ge Yaakadada àa katafke àa Abraama, a ba njane àa elvan ge njane: Larde na waà, yaà de vaterte ge wulfahaana. Daaci Abraama a naba nderanaa tate àa fana sadake àatekwa ge Yaakadada na a maranaa iraara na am tate njanna.

<sup>8</sup> A tsetehe am tate nanna maa, kwaye a zlala à dem Baytila, à dem gedfiyaara am hufe à wa. A de icese slalaara am tate nanna, a magaa berahaara an kacakaca am dagave à tara berni à Baytila am puti antara berni à Ayu am gedfiyaara nane keni. AÀhuwa keni Abraama a nderanaa tate à fana sadake àatekwa ge Saksage, a magaa maduwa, a dfaa Dadaamiya an Saksage am maduwaara.

<sup>9</sup> Mazlaara a naba kezla àahuwa keni, a eksetaa baraàmaara à dem dalbe à manem.

### *Abraama am larde à Misera*

<sup>10</sup> Samsa waya à sem larde, waya nanna keni yaikke jipu. Abraama a naba kezla à dem Misera geni à de shekwaashekwa àahuwa cek-waangudi.

<sup>11</sup> Herzharanteherzhe haha à Misera waà, a ba Abraama à elvan ge muksaara Saray: Ka cenancena emtu, naàwa ekka, ka mukse zari jipu. Diyandiya geni

<sup>12</sup> maà de puwartepuwa icaatare ate ka emnde à Misera, taà de baà: Muksaara degi una, daaci taà de ja shifaaruwa, amaà ekka waà, taà de jan̄ka.

<sup>13</sup> De bateranba ka egdze a emmerwa, geni a fariyufe hyema, a njaninja lapiya am barkaana. Yaà enzlanaañezla shifaaruwa am barkaana.

<sup>14</sup> De tsekwatsekwa Abraama am Misera, emnde a Misera taà zhara zarire à muksaara na jauje ge ndzedà.

<sup>15</sup> Galipaha à Firawna keni naranna. Itare ta naba danaa zlebaara ge slekse, se daranda mukse na à dem mba à slekse.

<sup>16</sup> Sleksu Firawna a maganaa shaigerire kwakya jipu ge Abraama adaba mukse na. A naba halanu dabbaha kwakya: kyawaha, eslaha, ezzenwaha antara ezlegwamaha. A vante antara navaha ira kwatenaha.

<sup>17</sup> Amaà Dadaamiya Saksage a belanar masiba yaikke ge sleksu Firawna antara emndaara bademme adaba elva à Saray, mukse à Abraama.

<sup>18</sup> Mazlaara Firawna a naba dante Abraama, a ba nane à elvan ge nane: AÀzara una ka magita ka na? Labara bakiyanka geni muksaana?

<sup>19</sup> Labara ka bantsa egdze a emmena geni yaà naba eksanteksa, yaà ganvege muksaaruwa? Kwaye muksaana mazlaara eksanteksa, ezlzala!

<sup>20</sup> Firawna a vaterte elvaara palle ge emndaara, geni a varanteva baraàma ge Abraama, a ezlzala. A eksaneksa muksaara antara kazlan̄aara bademme, a ezlzala.

## 13

### *Tegava à tara Abraama an Ludu*

<sup>1</sup> Tsetse Abraama am Misera, an̄kwa à eptsa à sem Kanaana am Puti, nane antara muksaara, antara kazlan̄aatare bademme. Ludu keni à àzenaara.

<sup>2</sup> Abraama nanna ndza sleberba jipu. Kwakya dabbahaara, kwakya gursaara antara dindar bademme.

<sup>3</sup> Abraama an̄kwa à maga ba shula. A tsetehe am manem nanna, kwaye a zlala à dem Baytila, am tate na ni ndza a magaa beraha à kacakaca àatekwa na, am dagave à tara Baytila an Ayu.

<sup>4</sup> A baà am tate na ni ndza a nderanaa tate à fana sadake àatekwa ge Dadaamiya werre na. Abraama a magaa maduwa, a dante Dadaamiya an Saksage am maduwaara.

<sup>5</sup> Ludu na aàzeɲaara na maa, ɲane keni an waldaha aà elsahaara antara kyawahaara, antara nawahaara halal. An beraha aà kacakacaara keni bademme.

<sup>6</sup> Nalmane aà tara Abraama antara Ludu kwakya jipu. Cekwa kaambaatare geni taà nja aàtirpalle.

<sup>7</sup> Adaba una ɲanna tsetse wava am dagave aà suniyaha aà Abraama antara suniyaha aà Ludu. Emnde a haha am sarte ɲanna, emnde a Kanaana antara Pairaisiyaha, itare keni taà aà ba am haha ɲanna.

<sup>8</sup> Daaci a ba Abraama aà elvan ge Ludu: Taslaaɲa a jerka dagala am dagavaamiya antara ka dekidɛki, ma am dagave aà suniyahaamiya keni. Adaba ma ba emnde a haà palle.

<sup>9</sup> Naàwa haha bademme aà katafkaaɲa. Mi naba tegave. baaka laambaɲa dekidɛki naba eksese dalbe na kaà katana ka. Maki ka eksese dalbe aà naɗafa, iya yaà dem nazlaɓa. Maàki ka eksese dalbe aà nazlaɓa, iya yaà dem naɗafa.

<sup>10</sup> Ludu a kante ice, a naa kaamba aà Urdun shaigera jipu, kaamba bademme ba slerekke. Adaba am sarte na zlaɓe Yaakadada kaɗanaaka tara Saudauma antara Gaumaura, dem Jauwar ndza ba seke zlanɲa aà Yaakadada, ndza ba seke haha aà Misera.

<sup>11</sup> Daaci Ludu a eksananse kaamba aà Urdun ɲanna bademme ge iraara, mazlaara a naba kezla aà dem gedī. Ta tegava estuwa tara Abraama antara Ludu.

<sup>12</sup> Abraama ɲane njaanɲa am haha aà Kanaana, Ludu, ɲane a de icese slalaara am huɗe aà kaamba, a velanaa aà dem Saudauma. A magaa berahaara an kacakaca.

<sup>13</sup> Amaà waà, emnde a Saudauma ɲanna ta maàndzawaha jipu. Kwakya haypaatare aà katafke aà Yaakadada

<sup>14</sup> Am sarte na Ludu yanaaya Abraama, zlaazlala, a ba Dadaamiya aà elvan ge Abraama: Kanteka icaaɲa, ezhzhara aà dem yala antara aà dem gedī, aà dem puti, antara aà dem manem bademme.

<sup>15</sup> Haha ɲanna kaà aɲkwa aà zharana ka na waà, yaà vakte ge ekka antara wulfahaɲa bademme, dem ba ge dekidɛki.

<sup>16</sup> Yaà yaktiya ba seke berbere aà haha. Ba seke una ni kaà dzegwanka kezla berbere aà haha na waà, wulfahaɲa keni taà hyanuka ba estuwa.

<sup>17</sup> Tsetse, naba jemje ɗaba am haha na bademme, nanaana walaara antara yaikkiraara an vuwa bademme. Adaba ya vakte ge ekka.

<sup>18</sup> Abraama a naba kezla, a de magaa slalaara an beraha aà kacakaca am ekte aà nafaha am Mamre, herzhe an Haiburuun. A nderanaa tate aà fana sadake aàtekwa ge Yaakadada am tate ɲanna keni.

## 14

### *Abraama gaaga ndzedɗa arge sleksaha, a ɲezlaa Ludu*

<sup>1</sup> Am zamane aà sleksu Amrafail slekse aà Sine'ar, antara Ariyauk slekse aà Ailasar, antara Kaidaulayaumair slekse aà Ailam, antara Tidal slekse aà Gauyim,

<sup>2</sup> sleksaha ɲanna ta naba dateraa waàva ge sleksaha umele ilyeɓe: ta dateraa waàva ge tara sleksu Baira, slekse aà Saudauma antara Birsa, slekse aà Gaumaura, antara Siniyabu, slekse aà Adama, antara Saimaibair, slekse aà Jaibauyim ira slekse aà Baila, Jau'ar keni ba zhera aà kwara ɲanna.



<sup>3</sup> Sleksaha ilyebe na keni ta naba magaa waada, ta jamme am kaamba aà Siddim, dfaàmbake zlafe adaliye. Kina waà, tate nanna gevge haye bademme, taà dfahana an haye aà izhe.

<sup>4</sup> Yawe kelaawa ju buwa taà aànkwa aà fansarfe ge sleksu Kaidaurlayaumair. Amaà ate iva kelaawa ju keyire waà, basharka mazlaara.

<sup>5</sup> Ate iva kelaawa ju ufadire maa, sleksu Kaidaurlayaumair antara sleksaha umele na yaatare palle na, ta naba se gaa ndzedfa arge emnde a Raifa am Astairaut Karnayim, ta de gaa ndzedfa arge emnde a Suni am Hama, ta de gaa ndzedfa arge emnde a Aimi am kaamba aà Kiriyatayim.

<sup>6</sup> Ta de gaa ndzedfa arge emnde a Hauri zlafe adaliye aà ba ate ire aà waatare, am Sai'ir. Ta dfabemhe peraatte dem Ail Paran herzhe an we aà kaamba, zaruze bademme.

<sup>7</sup> Daaci ta naba eptse kwa. Saraasa am Ain Mispat, an Kaadais keni taà dfaha ba ekse nanna aàhuwa keni ta se gaa ndzedfa arge Amalaikiyaha am hahaatare bademme, ta zateruhe mette an naàza erva. Amauriyaha na taà am Hasasau Tamar keni ba estuwa, itare keni zarateruze an naàza erva bademme.

<sup>8</sup> Daaci duwa aà sleksaha, slekse aà Saudauma, slekse aà Gaumaura, slekse aà Adama, slekse aà Jaibauyim ira slekse aà Baila, amaana Jau'ar. Sleksaha nanna ta naba sesaa emndaatare bademme, ta se tsatsaa waàva am kaamba aà Siddim.

<sup>9</sup> Daaci se daremnda am waàva yaikke antara sleksaha na, itare keni taà an emndahaatare: Sleksu Kaidaurlayaumair nane slekse aà Ailam, antara Tidal slekse aà Gauyim, antara Amrafail slekse aà Sine ^ar, antara Ariyauk slekse aà Ailasar, amaana: sleksaha ilyebe taà wava an sleksaha ufadfe.

<sup>10</sup> Ay mbate, kaamba aà Siddim nanna bademme an yaà evvegaha. Ta de zhagade, de valyaremvalye aà dem evvegaha na tara slekse aà Saudauma antara slekse aà Gaumaura. Jugena aà emnde na, kyarekya, zhagadarzhagade aà dem waha.

<sup>11</sup> Daaci emnde na garega ndzedfa na ta naba halante nalmane aà emnde a Saudauma antara emnde a Gaumaura na bademme, antara ba naàza zaatare na ndza an shebe, habazarsehabaze bademme, zlarzlala an nane.

<sup>12</sup> Ludu egdze aà egdze a emmejaara ge Abraama na ndza an Saudauma na keni eksarvaks, nane-ka, nalmanaara-ka, bademme zlarzlala an nane.

<sup>13</sup> Ankwa edda aà sera umele nezlanzla, a se balanansa nane labare ge Abraama, ura Ibraniñkau, aà nja am ekta aà nafaha aà Maàmre ura Amauri, nafaha nanna sadadfe jipu. Mamre nane egdze a emmetare ge tara Aiskaul antara Anair, ta emnde a namaàna jipu antara Abraama.

<sup>14</sup> De cenaàncena Abraama geni kelaadaha eksarvaks egdze aà egdze a emmejaara daraànda, a naba jemaa emndaara, dawalaha na mbarmbe waàva jipu na, zaala dermeke keye an kelaawa ju tise. Daaci yalla, a daa dfaba kelaadaha na dem Dan.

<sup>15</sup> Abraama a de tegese emndaara gergere kwakya, daaci nane antara dawalahaara na a naba datererhe ge kelaadaha na an waàva an vayiya. A naba gaa ndzedfa arge sleksaha nanna, a kyaterahe, a dfabateremhe aà dem Hauba herzhe an Damas, am dalbe aà manem.

<sup>16</sup> A lyevaa nalmanaatare bademme, a saahe an nane. Ludu egdze aà egdze a emmejaara na keni a naba sanaahe. Ludu nanna, nwashaha, emnde umele na ndza sluwaratervasluwe na, antara nalmanahaatare bademme sarateraasa.

*Malkisadaka aà gar barka ge Abraama*

<sup>17</sup> Am sarte na Abraama gaaga ndzedfa arge Kaidaurlayaumair antara sleksaha umele na yaatare palle na maa, a naba eptsu. A naba sesehe ge slekse aà Saudauma, a de yainuhe am kaamba a Sawe. Kaamba nanna waà, taà d'ahana an kaamba aà sleksaha.

<sup>18</sup> Malkisadaka, slekse aà Salima, zlafe adaliye nane liman aà Dadaamiya na an nire ge emnde bademme na, nane keni a sesehe, a saa d'afa antara egdze a mbazla am erva.

<sup>19</sup> A se gar barka ge Abraama, a ba nane: Abraama, a gagga Dadaamiya na an ire ge emnde bademme na barka. nane edda aà samaya antara haha.

<sup>20</sup> Zharaara a gevge an gaàlaà, Dadaamiya na ni an nire ge emnde bademme, a fakem kelaadahaana am erva na. Daaci Abraama a sanse luser am nalmanaara bademme, a vante.

<sup>21</sup> A ba slekse aà emnde a Saudauma na aà elvan ge Abraama: Taslaana viteva ka ba emndaaruwa, nanaana nalmane bademme.

<sup>22</sup> A nwanante ge Abraama, a ba nane aà elvan ge nane: Naàwa ervaaruwa, kanakanteka aà katafke aà Yaakadada, Dadaamiya na aà nire ge emnde bademme, edda aà samaya antara haha na, yaà zaku ba wadaara:

<sup>23</sup> ba uwe keni yaà ekseka ya am nalmanaana. Una ba zawa aà kimakaana palle, ba hulma aà sluzhaana keni. Kaà de baanka ka gananga nalmane ge Abraama.

<sup>24</sup> Ba naàzaraana keni yaà ekseka ya maà ba una ta zuwaa dawalaha-ka. Amaà dza aà malaha na ta daa d'abid'aba na waà, yaà eksarekse, tara Anair, Aiskaul ira Mamre. Itare waà, a halarvaahala nubaatare.

## 15

### *Dadaamiya aà ngudfa namaàna an Abraama*

<sup>1</sup> Am iga aà labare nanna maa, Abraama shansha waàhaya, an'kwa aà ndahan elva Saksage, a ba nane: Abraama, a wan'ka lyawa d'ekid'eki, ya gwelakwana ba iya an iraruwa. Kwakya ladaana aàzerwa.

<sup>2</sup> A nwanante ge Abraama, a ba nane: Ba estuwa Yaakadadaaruwa, Saksagaaruwa. Amaà watse kaà de vite uwe d'emme ka? Naàwa an'kwa aà zla ndzedfaaruwa bademme, amaà egdzaaruwa yaà de yaànaà am iga keni baaka. Ba warataaruwa keni a de zaànaà ba Ailiyaijair egdze aà emnde a Damas.

<sup>3</sup> A farhe zlafe adaliye, a ba nane: Saksagaaruwa, bashakika wulfe ma, eddawnu ta yanaa am huàde aà haaruwa na waà, watse sleza warataaruwa ba nane.

<sup>4</sup> Amaà a tsekwe ge kwara aà Yaakadada zlafe adaliye aàsezenaara, a ba nane: nane ka sleza warataana. Aà de zaànaà ba eddawnu aà de segashe am ka malle.

<sup>5</sup> A sanse aàsegashe, a ba nane aà elvan ge nane: Ezhzhaàrà ice aà dem samaya, ekkezla terlyakwaha na maà kaà dzegwaàndzegwa! Daaci a ba nane aà elvan ge nane: Wulfahaana keni watse ba estuwa.

<sup>6</sup> Abraama a naba fetarhe ate elva na a ndasaa Saksage na. Adaba una nanna, Yaakadada keni a fe nane ate edda aà jirire.

<sup>7</sup> A ba Dadaamiya aà elvan ge Abraama: Ba iya una ya Yaakadada, ya saxe am Ur am haha aà Kaldiya, ya sakaa aàsehuna geni yaà vakte haha na ge ekka.

<sup>8</sup> A nwanante ge Abraama, a ba nane: Yaakadadaaruwa, Saksagaaruwa, yaà de dise estara geni ba jirire haha na vakiteva ge iya?

<sup>9</sup> A ba Yaakadada aà elvan ge ñane: Kwaye, de tatayevaatataya gyaale sla aà yawe keye antara naàwe a yawe keye antara zhel kyawe a yawe keye ira takala a masar palle antara takala a kaamba palle, siyansa bademme.

<sup>10</sup> Abraama a naba tatayevaa dabbaha ñanna antara yiyaha ñanna bademme, a datsanme bubuwa am dagave kalkale. Sey ba yiyaha waà, datsaaka am dagave na. Amaà ba kelaa dabba waà, ba a icanme kalkale waà, a ba zlateraaha ma urara keni an ndañjire a una.

<sup>11</sup> Waàva ge zaatataha arge hyuwaara, amaà a bakaterbaka Abraama.

<sup>12</sup> Herzhe aà eblya vaciya maa, Abraama ñanaa hare jipu, lyawa keni aà wanwa adaba gevge ba tabedamme an tsaka ire.

<sup>13</sup> Daaci a ba Saksage aà elvan ge ñane: A njinja am vuwaana ganakini wulfahaana taà de nja am larde aà emnde. Watse taà de gev navaha aà emnde ñanna, taà de magatera palasa am iva dermeke ufade.

<sup>14</sup> Amaà watse ya pelsepele ya ate emnde ñanna taà de magateraà navire ñanna. Am iga aà una ñanna maa, taà de sesse am larde ñanna an nalmane kwakya jipu.

<sup>15</sup> Ekka maa, kaà de bere eggyahaana am faya aà ba an hairire. Kaà de gev emgyegwe kurcumme lauktu kaà de emtsa.

<sup>16</sup> Wulfahaana taà de eptsaa aàsehuna waà, sey am zamane ge ufadire. Adaba kina zlafe haypa aà Amauriyaha jawka ge ndzedã geni yaà bakatersebake.

<sup>17</sup> Eblyablya vaciya ba dekideki, gevge vayiya bademme maa, taà zhaaraa ba gahe aà kaaraa, tara nara aà kaaraa antara yire aà kaaraa taà segashe am huɗaara, aà zlala gahe na am dagave aà dabbaha na an datsa na.

<sup>18</sup> Dadaamiya Saksage keni a ñgwede namaana ba vacite ñanna an Abraama, a ba ñane aà elvan ge ñane: Haha na waà, vanaterteva ge wulfahaana, tsante ate haye aà Misera, dete haye yaikke na taà dahanaa an Aifratis na bademme.

<sup>19</sup> Larde aà Kainiyaha, larde aà Kainijiyaha, larde aà Kadmauniyaha,

<sup>20</sup> larde aà Haitiyaha, larde aà Pairaisiyaha, larde aà Raifaha,

<sup>21</sup> larde aà Amauriyaha, larde aà Kanaaniyaha, larde aà Girgasiyaha ira larde aà Yaibusiyaha bademme, yaà de vakte ge ekka.

## 16

### *Hajara a yan Ismayiila ge Abraama*

<sup>1</sup> Saray, mukse aà Abraama yaneka egdzere ge zhelaara dekideki. Ankwa kwatenaara egdze aà emnde a Misera, zheraara Hajara.

<sup>2</sup> A ba Saray aà elvan ge zhelaara Abraama: Naàwa iya, fiyarfe Dadamiya yaà yeka. Naba njawinja antara kwatenaaruwa na, ambane watse yaà shansha deme egdzere ate ñane. Lyavaalya ervaunɗe aà Abraama elva aà Saray na.

<sup>3</sup> Daaci Saray a naba eksante Hajara kwatenaara, a vante ge zhelaara Abraama geni aà ganvege muksaara. Iva kelaawa una a maganaa Abraama am haha Kanaana.

<sup>4</sup> Daaduwa Abraama aàdeza Hajara, Hajara a naba shaa huɗe. Ba a naa a shaa huɗe na waà, a naba fantau ge zhaaraa zanwaara Saray an ice a epsawa.

<sup>5</sup> Daaci a ba Saray aà elvan ge Abraama: Emtanjire na ni ndza arge iya na waà, kina eptsakaareptse ge ekka. Hajara kwatenaaruwa ge iya, ya eksante ba iya ervaaruwa ya fakem am huviye ni, gevge ni aà zhari ba seke



ya kere am icaara adaba a shaa hufe! Miya antara ka waà, àà hyephye Dadaamiya Yaakadada dagavaamiya.

<sup>6</sup> A ba Abraama àà elvan ge Saray: Kwaye kwatenaana, ba kina keni àà ba am ervaana. Emmaga naàzena ni kaà katana ka an nane. Daaci Saray a naba maranaa zlada kwakya ge Hajara, Hajara zhagadaazhagade aàtuge nane, a naba kedeme am kaamba.

<sup>7</sup> Malika àà Yaakadada a de bere Hajara am kaamba, àà nja ate we àà yawe. Yawe nanna herzhe an barama a dem Sura.

<sup>8</sup> A ba malika na àà elvan ge Hajara: Hajara kwatena àà Saray, ka sawa ame? Kaà deme kina? A nwanante, a ba nane: Yaà anjwa àà zhagade aàtuge zanwaaruwa Saray.

<sup>9</sup> A ba malika na àà elvan ge nane: Ba kina eptsepts aàdeza zanwaana. De ganaaga irana àà dem aha ààkatafkaara.

<sup>10</sup> A ba malika àà Yaakadada àà elvan ge nane zlafe adaliye: A ba Yaakadada yaà de yaterteya egdzaraana, taà de gev kwakya jipu, baaka kezlakulaatare.

<sup>11</sup> A ba malika àà Yaakadada àà elvan ge nane: Naàwa kaà àà hufe, watse kaà yaà egdzere zhele, kaà fana zhera àà Isemayiila, adaba Yaakadada cenancena zladaana bademme.

<sup>12</sup> Amaà egdzaana nanna waà, watse slemaàndzawa ba seke ezzenwa a kaamba. Ervaara àà de sha emnde bademme, emnde keni bademme watse ervaatare àà de sha nane. Watse àà nja ba nane palle àà de gaterapteka ge egdzar mamahaana dèkideki.

<sup>13</sup> Am iga àà una nanna maa, a ba Hajara: Abi iya keni ya nanna nane eddawn a nina na? Adaba una a daha Yaakadada na a ndahan elva na an: Dadaamiya na àà nina.

<sup>14</sup> Adaba una nanna, suwa nanna taà anjwa àà dahana an suwa àà Dadaamiya anjwa àà nina. Suwa nanna am dagave àà tara Kaadais antara Baarait.

<sup>15</sup> Daaci Hajara a yan egdzere zhele ge Abraama. Abraama a fete zhera àà egdzara na a yanaa an Hajara na Isemayiila.

<sup>16</sup> Iva àà Abraama shanasha kul tise junjwahe am sarte na Hajara a yan Isemayiila.

## 17

*Dem shedekwe gevge nalaama àà namaàna àà*

*Dadaamiya an Ibrahiima*

<sup>1</sup> Abraama shanaasha yawe kul maselmane, Yaakadada a naba mara-psehe àà kataftkaara, a ba nane àà elvan ge nane: Ba iya una ya Dadaamiya, hakuma bademme àà ba am ervaaruwa. Njinjana aàkatafkaaruwa, a jerka duksa maàndzawe ate ka am njaana.

<sup>2</sup> Naàwa yaà anjwa àà maga namaàna am dagavaamiya antara ka: Yaà vakte yaà, yaà de yaàkteyaà kwakya jipu.

<sup>3</sup> Daaci Abraama a kezlan uge ge Dadaamiya, wafkaara ba teppe ate haha. A ba Dadaamiya àà elvan ge nane zlafe adaliye:

<sup>4</sup> Elvaaruwa ge ekka waà, namaànaaruwa vanakteva zlauzle, kaà de gev eddarge nalgaha kwakya.

<sup>5</sup> AÀsalikataliya na waà, taà dalika àà dhahaàkaà an Abraama mazlaara, amaà Ibrahiima. Adaba ganagvege eddarge nalgaha àà emnde kwakya.

<sup>6</sup> Yaà de gagvege eddawna ni jebaara kwakya jipu na, yaà de yakteya kwakya jipu, kaà de gev eddarge nalgaha à emnde, sleksaha gergere taà de segashe am emndaana.

<sup>7</sup> Namaànaaruwa na ya ngudakan ge ekka na waà, antara ge egdzaraana keni bademme, dem eggyeggye. Namaànaaruwa nanna saksage geni ya Dadaamiyaana, ya Dadaamiya à egdzaraana keni am igaana.

<sup>8</sup> Haha nanna naàwa ka wayve am huɗaara na waà, yaà vakte ge ekka antara egdzaraana bademme, naàza ba ge ðekideki. Haha à Kanaana bademme à de gev naàzaana, antara egdzaraana am igaana, watse ba iya una ya Dadaamiyaatare.

<sup>9</sup> A ba Dadaamiya à elvan ge Ibrahiima zlaɓe adaliye: Ekka waà, ðemanvedeme ka ba namaànaaruwa, ekka antara egdzaraana bademme dem eggyeggye.

<sup>10</sup> Naàwa naàzena kwaà de magana kure ge tsufa namaàna na ya ngudana ya antara kure: Ba kelaa ma yakuraya egdzere zhele kwaà belana am shedekwe.

<sup>11</sup> Dawemda am shedekwe. Una nanna nalaama à namaàna na am dagavaamiya na, iya antara kure.

<sup>12</sup> Ba kelaa maà yakuraya egdzere zhele am jebaakure, kwaà belana am shedekwe am hare ge tisire. Dete ba una gavka jebaakure keni ma ta yanaa à ba am huɗe à haà à kure tsawe.

<sup>13</sup> Ma una ta yanaa am huɗe à haà à kure, ma una kwa shekweve an shekwe keni bademme puwawaterempuwa am shedekwe baaka shaige. Una nanna nalaama à namaànaaruwa ge kure, an puwa ate vuwaakure. Namaàna nanna saksage.

<sup>14</sup> Amaà zhele na baaka am shedekwe, icaaka zheliraara ðekideki na waà, a jaranaaja shifaara ba ðekideki am jebaara. Adaba nane ebzubze namaànaaruwa.

<sup>15</sup> Daaci a ba Dadaamiya à elvan ge Ibrahiima: Kina waà, ðaheka muksaana an Saray mazlaara. AÀ salikataliya na waà, zheraara Saratu.

<sup>16</sup> Yaà de ga barkaaruwa ate nane, yaà de vakte egdzere zhele an nane. AÀ de gev emmarge nalgaha gergere. Sleksaha gergere antara jebaha à emnde gergere à de segashe am nane.

<sup>17</sup> Ibrahiima a kezle uge, wafkaara ba teppe ate haha, amaà waà, ambera à dzaka. Adaba a ba nane am ervaunɗaara: Emgyegwe a zhele yawe dermeke ni kwasau zlaɓe à de yaà egdzere? Ma Saratu keni emgyegwe a mukse yawe kul maselmani ni aè de ya egdzere?

<sup>18</sup> Daaci a ba nane à elvan ge Dadaamiya: A shifeteshifa nane ba Isemayiila aàkatafkaana, baaka naàzu yaà yekana umele.

<sup>19</sup> Amaà a nwanante ge Dadaamiya a ba nane: Baaka shaigaara ðekideki, muksaana Saratu à de yaka egdzere zhele, kaà de ðahana an Isiyaaku. Yaà de ngudana namaànaaruwa antara nane ira egdzaraana am igaana ge nane. Namaànaaruwa nanna saksage.

<sup>20</sup> Duksa palle waà, lyanvaalya yekaana ate Isemayiila. Yaà de ga barkaaruwa ate nane, yaà ganve ura kwakya jebaara. Yaà huyanahuya kwakya jipu, sleksaha kelaawa ju buwa una taà de segashe à ba am nane. nane nanna waà, yaà de ganvege nalga yaikke.

<sup>21</sup> Amaà namaànaaruwa waà, yaà ngudana antara Isiyaaku, egdze na ni à de yakaa Saratu na. AÀ de yakaa egdze nanna am shifa sarte ba seke una.

<sup>22</sup> Zlaurle am tsakana elvaha na ge Abrahiima maa, a zlalehe ge Dadaamiya.

<sup>23</sup> Am iga à una nanna, Ibrahiima a eksante egdzaara Isemayiila, antara navaha na ta yateraa am huđe à haara ira emnde na a shekwaterve an nalmanaara, bademme a puwaterme am shedekwe vacite nanna, ba seke una a ndahanaa Dadaamiya.

<sup>24</sup> Am sarte na Ibrahiima à dem shedekwe, ivaara kul maselmane ju maselmane.

<sup>25</sup> Egdzaara Isemayiila an yawe kelaawa ju keye am sarte na à fana am shedekwe.

<sup>26</sup> Tara Ibrahiima antara egdzaara Isemayiila ta dem shedekwe à ba ate vaci palle.

<sup>27</sup> Ba duksa palle ge emnde na taà am huđe à haara keni. Emnde na ta yateraa am huđe à haara, antara emnde na a shekwaterve an shekwa, zaalaha bademme, ta dem shedekwe à ba am hare nanna.

## 18

### *Dadaamiya a balese estuwa sarte a yaà Isiyaaku*

<sup>1</sup> Yaakadada a naba marana iraara ge Ibrahiima am dagave à nafaha sadafde am Mamre. Ibrahiima anƙwa à nja ate we à wakiyaara, beraara bademme a maganaa à ba an kacakaca. Sarte nanna keni erva a vaciya jipu.

<sup>2</sup> Ba estuwa a kante ice waà, à zhara ba emnde keye, zaala taà anƙwa à tsatse. Hatstse à bina a naba tsetehe, anƙwa à de yaiteruye ate we à wakiya, a kezle ugje ate haha,

<sup>3</sup> a ba nane à elvan ge pallaatare: Yaakadadaaruwa, maàki ba zakivaareze waà, taslaana deska ba estuwa, sawa tsatse am mba à navaana.

<sup>4</sup> Daaci a ba nane à elvan ge itare: Sawmbare puwawansepuwe cekwaanƙuđe am ekte à nafa aàhuna, taà sakura egdze a yawe kwaà baraabara serahaakure.

<sup>5</sup> Yaà katakurva antara egdze a naàza za, kwaà shansha ndzedfa, lauktu kwaà fanu ge baraamaakure à de katafke ba seke una kwaà katanaà kure. Daaci estuwa, dakureska ba dey arge haà à slesleraakure. Ta nwanante ge wayvaha na, a ba itare: Shagera jipu, naba emmaàga sleraana.

<sup>6</sup> Ba watsewatse, a eptsà à ba an hadzala Ibrahiima à dem bere aàza Saratu, a ba nane à elvan ge nane: Degevaadega ukpa na leppe jipu na keye ate daramaara, emmaàga gatau watsewatse.

<sup>7</sup> nane an iraara, zhagadaara à dem walde a esla, a de eksese egdze a esla na shagera vuwaara, hyuwaara kudƙuđe jipu na, a naba fanem am erva ge slesleraara, nane anƙwa à ganve naàza dfaàle à ba ate watsewatsire.

<sup>8</sup> Gyepgye naàza dfaàle na maa, Ibrahiima a satera jeba naza za umele anƙwa ta magana an uba, antara uba à waya, a sateranhe aàtirpalle antara hyuwa na, a faterhe à katafkaatare. nane keni a tsahe à ba aàzetare am ekte à nafa nanna haa ta zuhe.

<sup>9</sup> Daaci ta ndavanuhe, a ba itare taà elvan ge Ibrahiima: AÀme muksaana Saratu? A nwaterante, a ba nane: Kwaye nane anƙwa am bere.

<sup>10</sup> A ba palle à wayvaha na à elvan ge Ibrahiima: Sarte seke una am shifa watse yaà eptsà, una yaà ndak ba jirire baaka eptsankaara, watse yaà se bere Saratu an egdzere zhele am erva. Saratu keni à tse à ba am iga à Ibrahiima nanna ate we à wakiya, anƙwa à cena elva na.

<sup>11-12</sup> Daaci dzaka ge Saratu an ila, adaba Ibrahiima antara nane bukerdaatare garevge emgyegwaha. nane d'eme ba naàdaatare nwashaha

keni naàzaara icevice. Adaba una nanna a ba nane am ervaunɗaara: Am njaaruwa na ni kwasau zlaɓe anƙwa emtakire àà nja antara zhele? Edda àà haaruwa keni gevge emgyegwe a zhele kurcumme!

<sup>13</sup> A ba Saksage àà elvan ge Ibrahiim: Labara àà dzaka Saratu? Labara a bantsa nane am ervaunɗaara ganevge emgyegwe a mukse ni yaà yaà egdzere-he?

<sup>14</sup> Una keni anƙwa najipuwaara ààza Saksage emtu an sleksiraara? Sarte seke una am shifa, yaà anƙwa àà epts a àsezeɗa, yaà se bere Saratu an egdzere zhele am erva.

<sup>15</sup> Jaaja lyawa Saratu maa, a ba nane: Dzakanka. A ba Yaakadada keni ba parakke: Ka dzaka.

### *Ibrahiima anƙwa àà yekateru shifa ge emnde a Saudauma*

<sup>16</sup> Am iga àà una nanna maa, tsaretse wayvaha na keye kerɗe, taà anƙwa àà zlala waà, ta kurese ba ndanɗire àà Saudauma. Ibrahiima keni a zlala antara itare, a daa àà puwatersepuwe.

<sup>17</sup> Daaci a ba Yaakadada: Yaà tsa shebanvuweka ge Ibrahiima naàza na yaà de magana ya.

<sup>18</sup> Adaba Ibrahiima àà de gev eddarge nalga yaikke, nalga na ni watse an hakuma jipu na. Baɗemme àà emnde na taà ate haha taà de sha barka adaba nane.

<sup>19</sup> Ya eksese nane ganakini àà kwaratersekwere ge egdzaraara antara wulfahaara am igaara ge nane geni a farfa zherwe ate shairiyahaaruwa, a magarmaàga jirire, a magarmaga duksa baɗemme an baramaara, lauktu yaà gananvege ge Ibrahiima naàzena ya banaa watse yaà vanteva na.

<sup>20</sup> Daaci a ba Yaakadada àà elvan ge Ibrahiima: De shisha yawe àà kyuwa àà emnde kwakya, adaba naàzena taà àanƙwa àà maganaà emnde a Saudauma antara Gaumaura. Haypa àà emnde nanna jauje ge ndzeɗa.

<sup>21</sup> Adaba una nanna yaà anƙwa tsekwa aàdehuwa, yaà de habaza magaatare nanna maàki ba jirire ba estuwa. Maàki gavka estuwa keni watse ya nja ba diyeddiye.

<sup>22</sup> Daaci emnde buwa am wayvaha na eptsaratervepts a iga, zlarzlala am tate nanna, taà anƙwa àà zlala àà dem Saudauma. Amaà Yaakadada waà, zlalaaka, anƙwa àà tse àà ba am tate nanna, Ibrahiima keni anƙwa àà ba àà tse àà katafkaara.

<sup>23</sup> Ibrahiima a ganapte ge Yaakadada, a ba nane àà elvan ge nane: Kina emnde a jirire na taà aàhuwa keni kaà de keɗaterakeda aàtirpalle antara emnde a haypa emtu Yaakadada?

<sup>24</sup> AÀmbane taà anƙwa emnde a jirire kul ilyebe am Saudauma nanna, kaà de keɗaterakeda itare keni emtu? Kaà yaterareka ge emnde a ekse nanna adaba emnde a jirire kul ilyebe na taà am huɗaara na emtu?

<sup>25</sup> Kay! Ekka kaà ta maganaaka jeba una. Emnde àà jirire ni kaà cebatera aàtirpalle antara emnde a haypa? Shairiyaatare kalkale? Una àà magaaveka. Eddawna watse àà kyana nane shairiya àà duniya baɗemme ni àà kyanaka shairiya a jirire?

<sup>26</sup> A nwanante ge Yaakadada, a ba nane àà elvan ge nane: Maàki shanansha emnde a jirire kul ilyebe am huɗe àà berni àà Saudauma waà, yaà naba yateraareye ge emnde a ekse nanna baɗemme adaba itare.

<sup>27</sup> A ba Ibrahiima: Taslaanɗa yiyareye Yaakadadaaruwa, adaba maganka lyawa àà katafkaanɗa ɗekiɗeki ge ndakse elva parakke. Iya waà, ya berbere àà haha ba dey, ya kelpa àà kara ba dey.

<sup>28</sup> AÀmbane watse ßaaka ura ilyeße am emnde a jirire kul ilyeße na, kaà de kedaterakeda bademme adaba emnde ilyeße na ßaaka am hudaara na emtu? A ba Yaakadada: Maki shanansha emnde a jirire kul ufade jilyeße am ekse ñanna waà, yaà kedeka ekse.

<sup>29</sup> Aley, zlaße Ibrahiima yaànka Yaakadada, a ba ñane aà elvan ge ñane zlaße adaliye: AÀmbane emnde a jirire ta ba kul ufade am ekse ñanna maa? A ñwete ge Yaakadada, a ba ñane: Maàki shanansha emnde a jirire kul ufade am ekse ñanna waà, yaà kedeka ekse.

<sup>30</sup> A ba Ibrahiima: Taslaaña Yaakadadaaruwa, a jañka ervaunße, yaà añkwa aà ndavakundave zlaße adaliye: AÀmbane emnde a jirire ta ba kul keye am ekse ñanna maa? A ba Yaakadada: Maàki shanansha emnde a jirire kul keye am ekse ñanna waà, yaà gejeka ekse.

<sup>31</sup> A ba Ibrahiima: Taslaaña Yaakadadaaruwa yiyareye. Adaba kwakya elvaaruwa aà katafkaaña: AÀmbane emnde a jirire ta ba kul buwa am ekse ñanna maa? A ba Yaakadada: Maàki shanansha emnde a jirire ni hyephye kul buwa am ekse ñanna waà, yaà gejika ekse ðekideki adaba emnde a jirire kul buwa ñanna.

<sup>32</sup> A ba Ibrahiima: Taslaaña Yaakadadaaruwa, ñanaaña ervaunßaaña an slakala, yaà ndavaku ba palle mazlaara, yaà farka umele. AÀmbane emnde ñanna ta ba kelaawa njainje am ekse ñanna maa? A ba Yaakadada: Maàki shanansha emnde a jirire kelaawa am ekse ñanna waà, yaà gejeka ekse mazlaara adaba emnde a jirire kelaawa na.

<sup>33</sup> Am sarte na ni Yaakadada mbedanumbede elvaara bademme ge Ibrahiima, a naba yaa Ibrahiima, a naba zlalehe. Ibrahiima keni ba eptsara aà sem tataara.

## 19

### *A segashe estuwa Ludu am Saudauma*

<sup>1</sup> Herzhe añkwa aà maga mangaripu waà, daraada malikaha buwa na keni am Saudauma. Ludu maa, ñane añkwa aà nja ate we aà walkame aà Saudauma ñanna. Ba a puwete ice ate itare waà, hatstse a naba tsetehe, a de yaiteruye, a kezle ugje aà kataftkaatare wafkaara ba teppe ate haha.

<sup>2</sup> A ba ñane aà elvan ge itare: Yaakadadaaruwa, taslawaakure, daweska ba estuwa arge haà aà naàvaakure. Sawmbare barawaabare serahaakure, harauhaàre, an enlya werre waà, lauktu kwaà tse, kwaà maga shulaakure adaliye. Amaà ta ñwanante, a ba itare: ñere ñaà duka aà dem mba aà ura, ñaà haraanjere aà ba aàgashe.

<sup>3</sup> Amaà Ludu keni a tsaa aà ba ate naàzaara, aà magatera tasle estuwa, aà ñatertaà sera. Daaci ta naba duhe, ta demhe aà dem huße aà haara. A de magateraa munri antara depain na ßaaka shahi aà makala am hudaara na, ta zuhe.

<sup>4</sup> Ba zlaàva keni zlavareka emtsaade waà, saremsa emnde a ekse aà Saudauma, dawalaha antara emgyegwar zaalahaatare bademme saresse am slalaha kaàtaàkaappe se jarantaaveje ge haà aà Ludu.

<sup>5</sup> Ta ðante Ludu, a ba itare taà elvan ge ñane: Taà aàme dawalaha na ta tsekwaam am mbaaña aà ba an vayiya vatena na? Satersese aàseze ñere, ñaà kaàtaà zlava an itare.

<sup>6</sup> A sesehe ge Ludu aàsezetare, a tsahe ate we aà wakyiya, a heðanu ge wakyiya am igaara,

<sup>7</sup> a ba ñane aà elvan ge itare: Estuweka emndaaruwa, magauka mandzawire na taslawaakure.



<sup>8</sup> Naàwa taà anƙwa egdzarahaaruwa ta buwa, garevge gyaalaha, zlaɓe diyarka zhele waà, yaà satersese itare, kwaà de maga naàzena kwaà katana kure an itare. Amaà zaala na waà, taslawaaakure yawaterya, adaba ta wayvaha, taà am huɗe àa haaruwa.

<sup>9</sup> Amaà a ba itare taà elvan ge Ludu: Janernaaja ka ate we àa wakyiya! Ka wa ka sawa an sawa, ka wayve ba dey degiya gakevge narkaliyaanere? Use dawale, shagera kwa elvaana. Ba kinamina nyaà magakanaamaga palasa, àa jauje ba ge naàza àa emnde nanna. Ta naba puwana tsekweɗa ge Ludu, taà kata kezla paàre àa wakyiya maa,

<sup>10</sup> malikaha buwa na ta naba velese erva, ta tedante Ludu àa dem huɗe àa haà, ta heɗanu ge wakyiya.

<sup>11</sup> Ta naba wulfete emnde nanna taà ate we àa wakyiya na, malaha dete egdzaraha bademme baaka ura àa nanna ice ɗekideki. Ta kuɗevaa ba itare ge tataya we àa wakyiya geni taà demda.

<sup>12</sup> Daaci a ba malikaha na taà elvan ge Ludu: Taà anƙwa emndaana umele am ekse na emtu? Ma egdzaraana, ma shawlahaana, ma emndaraana keni, maà ta varahaana am huɗe àa ekse na waà, satersese.

<sup>13</sup> Adaba nyaà kata keɗanaakeda ekse na ba ɗekideki. Yaakadada cenancena kyuwa emnde kwakya adaba maàga àa emnde a Saudauma. Adaba una nanna a belanera Yaakadada geni nyaà se keɗanaakeda ekse na.

<sup>14</sup> A sesehe ge Ludu, a de mbedateru ge shawlahaara, emnde na ta anƙwa àa sheba egdzaraara, a ba nane àa elvan ge itare: Magaumaàga watsewatsire mi zlalawa am ekse na, adaba Yaakadada àa kata keɗe ekse ba ɗekideki. Amaà shawlahaara nanna ta ganve ba elva a shawya.

<sup>15</sup> Kyaakya adaga waà, malikaha na ta bakante ge Ludu àa ba an ndzeɗa. A ba itare taà elvan ge nane: Tsetse ba watsewatse antara emndaana, muksaana, antara egdzaraana buwa, dawedde watsewatse, a zakuruka duniya adaba shariya àa haypa àa emnde a ekse na.

<sup>16</sup> Am taà ezhzhara àa hadzaleka Ludu, ta naba nanaahe ate erva, ta nanaa erva ge muksaara, ta nateraa erva ge egdzaraara buwa nanna, ta daterse àa dete iga a ekse, ta yatera ahuwa, adaba Yaakadada wayaaka keɗaara.

<sup>17</sup> Am sarte na daratersede aàdete iga a ekse nanna maa, a ba palle àa malikaha na àa elvan ge Ludu: Ezhzhagade shifaana àa de cuwa waà, geni a keɗeka shifaana. Zhareka ice àa sem iga, tseka am kaamba keni.

<sup>18</sup> Amaà a nwanante ge Ludu, a ba nane: Estuweka Yaakadada, yaà de dzegwaanka.

<sup>19</sup> Urara keni ya ba naàvaana, shanansha ngurna aàzena magakiyan-maga shaigerire yaikke, nezlakisenzle waà, yaà dzegwaanka zhagade àa de cuwa wa. Yaà tama àa de shisha emtanƙire, yaà de cuvaaka wa yaà emtsa.

<sup>20</sup> Kaà anƙwa àa nanna egdze a ekse na kwaye nane na emtu? Herzhe ba egdze a ekse nanna, yaà dzegwaàndzegwa zhagade àa de cuwa tate nanna, taslaana viteva barama ge dehuwa. Egdze a ekse nanna ba cekwaanƙuɗi, daaci yaà de sheba iraruwa am huɗaara.

<sup>21</sup> Shagera, a ba malika na, yaà magakaà ngurna zlaɓe adaliye, yaà yaka egdze a ekse nanna, yaà gejeka.

<sup>22</sup> Ezlzlala watsewatse, kaà de sheba irana am egdze a ekse nanna, yaà manƙa ba uwe keni sey maà dakaada am ekse nanna. Adaba una nanna, ta fante zhera àa Jau'ar ge egdze a ekse nanna.

*Dadaamiya ndza a keɗan estuwa Saudauma antara Gaumaura*

<sup>23</sup> Sesse vaciya am haha waà, Ludu keni de tsekwaatsekwa am Jau'ar.

<sup>24</sup> Daaci Yaakadada a naba fantau ge hya kaàràà an wesha an baraudu àà sawa am samaya, àà setarge Saudauma antara Gaumaura.

<sup>25</sup> Yaakadada a eptsante eksaha ñanna, antara kaamba a tate ñanna, antara nafaha bademme a ganve ba seke ndza tate ñanna ka.

<sup>26</sup> Mukse àà Ludu maa, ñane a zharaa ice àà dem kataliya, ñane keni a naba eptsapte a gev naàkwa àà izhe, amaà ba naàwa ura àà tse àà ba ka.

<sup>27</sup> Maàkurallaara a tsetehe ge Ibrahiima an enlya werre, a duhe àà dem tate na ni a tsaa àà katafke àà Yaakadada na,

<sup>28</sup> a kante ice àà dem Saudauma antara Gaumaura antara kaambaha àà tate ñanna bademme waà, àà zhara ba yire àà kaàràà yaikke jipu, ba seke yire àà kaàràà kaamba yaikke.

<sup>29</sup> Am sarte na Dadaamiya a kefaa eksaha àà tate ñanna, a naba yehamme Ibrahiima, daaci a naba sanse Ludu ba lapilayye am masiba ñanna. Amaà eksaha ñanna ndza Ludu am hudàara na waà, a ganve ba seke ndza tate ñanna ka.

### *Slalwe àà Mau'abiyaha antara Amauniyaha*

<sup>30</sup> Ludu maa, jaaja lyawa ge nja am egdze a ekse ñanna taà ðahanaà an Jau'ar na, adaba una ñanna a naba kezla, kwaye a de nja am hwalakwa am huðe àà waà, antara egdzaraara buwa egdzara ñwasha.

<sup>31</sup> Daaci a ba egdzere zuñwire àà elvan ge kudereñaara: Naàwa eddemiya keni gevge emmgyegwe, am haha na keni baaka eddawna àà shebamisheba seke una taà ankwaa àà maganaà emnde bademme.

<sup>32</sup> Sawa mi eja eddemiya an mbazla waà, mi zlava an ñane, watse mi fanefa wulfe ge eddemiya.

<sup>33</sup> An vayiya vacite ñanna, ta naba hyanhe ge eddetare na an mbazla telkusse, a de haàre male aàzeñaara. Amaà ma sarte na a zlavanuzlave na, ma sarte a zlalaara keni diyaaka eddetare ðekideki.

<sup>34</sup> An enlya werre, a ðante kudereñaara, a ba ñane àà elvan ge ñane: Yawwaa, zlawzle kwa naàzaaruwa, an vayiya vatena zlavanezlava antara edderwa. Sey mi hyanhya zlaðe adaliye an mbazla, kaà de hara ka vatena. Estuwa, mi naba fanefa wulfe ge eddemiya.

<sup>35</sup> An vayiya, ta naba hyanhe zlaðe adaliye ge eddetare an mbazla, a de hare sledabaara aàza eddetare na. Eddetare diyaaka ðekideki sarte na a de zlavanuzlave na ma sarte a zlalaara keni.

<sup>36</sup> Egdzara àà Ludu bukerðe sharaànsha huðe an eddetare.

<sup>37</sup> Egdze a zuñwiraara a ye egdzere zhele, a fate zharaara Mau'ab. ñane una eggyetare ge Mau'abiyaha sem vatena.

<sup>38</sup> Kudereñaara keni ba estuwa, ñane keni a ye egdzere zhele, a fete zharaara bii'Ammi. ñane una eggyetare ge Ammauniyaha sem vatena.

## 20

### *Labare àà tara Ibrahiima antara sleksu Abimailaik*

<sup>1</sup> A naba kezla Ibrahiima am tate ñanna, kwaye a de nja am Puti, a de icese slalaara am dagave àà tara Kadais antara Sura. Am iga àà una ñanna maa, kwaye a de nja am Gairar. Am sarte na taà am Gairar ñanna maa,

<sup>2</sup> a ba Ibrahiima àà elvan ge emnde a ekse ñanna ate muksaara Saratu: Egdze a emmerwa àà bina. Daaci a sariyansa mukse ñanna a ba slekse àà emnde a Gairar, zharaara Abimailaik. A naba bela emndaara, ta de eksanvaah.

<sup>3</sup> An vayiya waà, daàmda Dadaamiya à deza sleksu Abimailaik am shene, a ba ñane à elvan ge ñane: Kina waà, samsa emtsaanja, sey kaà emtsa. Adaba mukse na ka eksevaa ka na waà, mukse à zhele.

<sup>4</sup> Am sarte ñanna maa, zlafe Abimailaik d'ahaaka emtsaade mukse na aàdezeñaara. A ba ñane à elvan ge Dadaamiya: Yaakadadaaruwa, ma emnde na baaka ba haypaatare keni kaà diya ba cebaterceba emtu?

<sup>5</sup> Adaba a binaa ba Ibrahiima an waara, egdze a emmerwa à bina. A ba mukse keni egdze a emmerwa. Ya maganaa à ba an ervaunɗaaruwa palle, maganka niya a maga mandzawire ðekid'eki.

<sup>6</sup> Aà ba am shene ñanna, a ba Dadaamiya à elvan ge ñane: Ba iya keni diyandiya ganakini ka maganaa a ba an shagerire à ervaunɗe. Adaba una ñanna piyanaktepiya maga haypa an ya, vanakteka barama ge nja antara mukse ñanna.

<sup>7</sup> Kina waà, danaada mukse na à dem mba à zhelaara, adaba zhelaara nabi. Watse à yekakuwa ñane shifa geni kaà enzlesenze. Amaà maàki dakannaaka muksaara waà, diyeddiye geni ekka iraanja antara emndaanja bademme kwaà de njeka an shifa.

<sup>8</sup> A tsetehe ge Abimailaik an enjya werre, a d'etaa galipahaara bademme, a tsakaterse elva ñanna bademme, jaterja lyawa jipu.

<sup>9</sup> A d'ante Ibrahiima keni, a ba ñane à elvan ge ñane: Labara ka magite una? Ya gaku uwe kena estuwa ni, ka de magite una antara emndaaruwa bademme am kwaraaruwa na? Naàzena ka magita ka na waà, taà manja emnde ðekid'eki.

<sup>10</sup> A ndavanuhe zlafe adaliye, a ba ñane à elvan ge ñane: A waktaa uwe demme ni ka naba wayete magite una na?

<sup>11</sup> A ñwanante ge Ibrahiima, a ba ñane: Iya, ya kurken emnde a larde na taà kuvaka Dadaamiya, watse taà kediyaa'akeda arge muksaaruwa.

<sup>12</sup> Demme keni waà, egdze a emmerwa ba miyenne. Adaba gergere ba mama ka waà, eddenjere palle. ñane, egdze a edderwa, gevge muksaaruwa ge iya.

<sup>13</sup> Am sarte na sisese Dadaamiya am huɗe à haà à edderwa, ya ndaana ba iya, a ba iya yaà elvan ge ñane: Maè mi de tsek'waa am eksara keni, naba ndaterndaha ge emnde a ekse ñanna geni ka egdze a emmerwa.

<sup>14</sup> Daaci Abimailaik a eptsanaa muksaara ge Ibrahiima, a ndakanaare antara duksaha kwakya: kyawaha antara eslaha antara ba emndimagwaha a vanteva, navaha antara kwatenaha.

<sup>15</sup> A ba Abimailaik à elvan ge Ibrahiima: Kwaye lardaaruwa bademme à katafkaanja, naba njinja am tate na ni à katana ervaunɗaanja.

<sup>16</sup> A ba ñane à elvan ge Saratu: Naàwa yaà vante gursa debu ge egdze a emmeña, una ñanna lafayaanja, naàza hedakaa nasherire à katafke à sleriyaahaanja bademme. Estuwa, kaà an bara à katafke à emnde bademme.

<sup>17</sup> Daaci Ibrahiima a magaa maduwa, maàzlaara Dadaamiya keni a naba ekhyaterna'he ge tara Abimailaik antara muksaara ira kwatenahaatare bademme, ta fantau ge yaà egdzere zlafe adaliye.

<sup>18</sup> Adaba ndza Dadaamiya a hedete yaà egdzere ba ðekid'eki am huɗe à haà à Abimailaik bademme adaba elva à Saratu mukse à Ibrahiima.

## 21

### *Laukte à yaà Isiyaaku*

<sup>1</sup> Yaakadada viyanaaka Saratu, a gananve naàzena ndza a ndanndaha, a ba nane watse à magannaamaga na.



<sup>2</sup> Saratu a naba shaa huɗe, a yane egdzere zhele ge Ibrahiima. Daaci Ibrahiima a shansha egdzere zhele àà ba am emgyegwire. Saratu a ye egdzere àà ba am sarte na a tsanaa Dadaamiya na.

<sup>3</sup> Ibrahiima a fete zhera àà egdzaara na a yannaa Saratu na, Isiyaaku.

<sup>4</sup> Isiyaaku magaamaga hare tise am erva maa, Ibrahiima a beleme am shedekwe ba seke una a bannaa Dadaamiya na.

<sup>5</sup> Ate iva ɗanna Ibrahiima a shaa egdzaara Isiyaaku na waà, iva àà Ibrahiima dermeke.

<sup>6</sup> Daaci a ba Saratu: Dzakitedzaka Dadaamiya, emtake ervaunɗaaruwa jipu. Una ma a cenanaa ware labaraaruwa keni sey àà dzaka, àà higiyuhige.

<sup>7</sup> A farhe zlaɓe adaliye, a ba ɗane: Ndza a tamanaa ware àà katafke àà Ibrahiima ni watse Saratu a yiya egdzere! Amaà kwaye ɗane yaneya egdzere, ɗane keni emgyegwe tsa.

<sup>8</sup> Daaci anɗkwa àà wala egdzere, ta ɗezlaa ate uba. Vaci ɗezla Isiyaaku ate uba, Ibrahiima a magaa muɗri, a ɗetaa emnde.

### *Ibrahiima a1 ɗgyanse estuwa Hajara antara Isemayiila*

<sup>9</sup> Vacite umele maa, egdze na Ibrahiima a shanaa an Hajara egdze àà emnde a Misera na, taà anɗkwa àà gaà gusa antara Isiyaaku àà Saratu, naterna Saratu.

<sup>10</sup> A ba Saratu àà elvan ge Ibrahiima: ɗgyansenɗye kwatena na, a zlarzlala antara egdzaara bademme. Adaba wayanka, yanaaya ervaunɗaaruwa egdze àà kwatena taà de zaà warata kerɗe antara Isiyaakuwaaruwa.

<sup>11</sup> Elva ɗanna yanaaya ervaunɗe àà Ibrahiima jipu, adaba Isemayiila keni ba egdze a huɗaara.

<sup>12</sup> Amaà a ba Dadaamiya àà elvan ge Ibrahiima: A guleka higaanɗa adaba kwatena antara egdze na ka shanaa an ɗane. Naba magananmaga ge Saratu naàzena a ndavakuwa ɗane bademme. Adaba àà ba am jirire keni wulfahaanɗa na watse ta kwakya àà ba iya, ya ndakndaha na keni, bademme watse taà segashe àà ba am Isiyaaku.

<sup>13</sup> Amaà egdze a kwatena na keni maa, yaà de huyanaahuya ɗane keni, yaà de ganvege larde yaikke adaba ɗane keni ba egdze a huɗaana.

<sup>14</sup> Daaci ba makurallaara an enɗya werre, Ibrahiima a eksetaa naàza za antara kanyakanya yawe am huɗaara, a far ge Hajara ate nahyapaihyapaara, a eksevaa egdzaara ɗanna, a vante, daaci a naba ɗgyanse, ezlzlalaanɗa àà ba ɗane àà elvan ge ɗane. Daaci ba zlala ge Hajara àà dem kaambaara, kwaya a de deriya am kaamba àà Birsaba.

<sup>15</sup> De zlarzle yawe am kanyakanya maa, a naba eblyanve egdzere am ekte àà nafa.

<sup>16</sup> ɗane an iraara a de njehe yiyire an egdze na deydey àà zlala àà gurme palle, am ndanɗjiraara. Adaba a bantsa ɗane: Wayanka zhara egdzaaruwa àà emtsa ate icaaruwa. Daaci a de njehe, a kuresa ba ndanɗjire àà tate na ni egdzaara aàtekwa na, a fantau ge kyuwa.

<sup>17</sup> Daada kyuwa àà egdze na aàdeza Dadaamiya, a naba tsekwehe ge malika a Dadaamiya àà sawa am samaya, a ba ɗane: A jaara uwe ge ekka Hajara? A waɗka lyawa ɗekidɗeki, adaba Dadaamiya cenancena hula àà egdzere am tate na aàtekwa egdze ɗanna.

<sup>18</sup> Naba tsetse, de eksanteksa egdzaanɗa, ɗanaanɗa ba shagera, adaba watse yaà ganve larde yaikke an egdze ɗanna.

<sup>19</sup> Dadaamiya a naba weranante ice maa, Hajara a zhara ba suwa, hatstse a naba tsetehe, a de nante kanyakanyaara an yawe na, una a fanu ge egdzere.

<sup>20-21</sup> Dadaamiya icaaka antara Isemayiila ðekideki haa a waltehe. Waltewala maa, a naba nja am huðe àà kaamba àà Paran, gevge zhel matsame, àà dzega naàza kaambaha an gume. Emmenjaara a de eksanante gyaale am Misera.

### *Namaàna na am dagave àà tara Ibrahiima antara Abimailaik*

<sup>22</sup> Am sarte ñanna maa, a sawhe ge sleksu Abimailaik antara Pikaul male àà sawjiyahaara ààseza Ibrahiima, a ba ñane àà elvan ge ñane: Ekka waà, ankwà Dadaamiya antara ka am naàzena kaà magana ka bademme.

<sup>23</sup> Kina waà, sey kaà ziyuze wada an Dadaamiya geni kaà de magiteka keladire ðekideki, ma ge iya, ma ge egdzarahaaruwa, ma ge eggyahaaruwa keni. Ba seke una ni iya ya magakaa shagerire, huðaarua palle ate ka na waà, ka keni maginaamaga ba estuwa. Kaà magiya shagerire ge iya antara ge larde na naàwa njakinja am huðaaara na.

<sup>24</sup> Yaà ezza, àà ba Ibrahiima.

<sup>25</sup> Daaci Ibrahiima a naba sananse parakke ge Abimailaik shagerkire na ni ta maganaa emndaara, ta naba lyevaa suwa àà ba an ndzedfa beresse na.

<sup>26</sup> A ñwanante ge Abimailaik, a ba ñane: Diyanka una ðekideki ma a maganaa ware keni. Ekka keni mbedfakiyuka, iya keni cenananka ðekideki maà vateneka.

<sup>27</sup> Am iga àà una ñanna, Ibrahiima a naba haltaa nawaha antara kyawaha ira eslaha, a naba vante ge Abimailaik, bukerðaatare gevge namaàna dagavaatare mazlaara.

<sup>28</sup> Ibrahiima a naba dzerese kyawaha na deydey deydey na vuye, a tsateraahe an iraatare.

<sup>29</sup> A ba Abimailaik àà elvan ge Ibrahiima: Labara ka dzerese kyawaha na vuye, ka tsateraahe an iraatare na?

<sup>30</sup> A ñwanante ge Ibrahiima, a ba ñane àà elvan ge ñane: Una waà, lyevaalya am ervaaruwa ba ge iya, ge seydire a katafkaaña, geni suwa na waà, ba jirire ya yanaa ba iya.

<sup>31</sup> Adaba wada àà emnde buwa ñanna ta zanaa am tate ñanna, ta ðaàhaà tate ñanna an Birsaba kina.

<sup>32</sup> Kwaye ñane, ta ñguðanaa estuwa tara Ibrahiima antara Abimailaik namaàna am dagavaatare. Am iga àà una ñanna maa, a tsetehe ge Abimailaik antara Pikaul male àà sawjiyahaara, ta eptsa àà dem eksaatare àà ba am Filisti ñanna.

<sup>33</sup> Daaci Ibrahiima a dzebe nafa àà ðaale am Birsaba. A magaa maduwa, a fantau ge ðaàha Dadaamiya Saksage an Yaakadada am maduwaara.

<sup>34</sup> Ibrahiima haraahare jipu am larde àà Filisti.

## 22

### *Dadaamiya ankwà àà gyaà hala àà Ibrahiima*

<sup>1</sup> Am iga àà unaha ñanna maa, Dadaamiya a naba gyaà hala àà Abrahiima. A ðante: Ibrahiima! A ñutehe: Naàwa ya Yaakadada, a ba Ibrahiima.

<sup>2</sup> A ba Dadaamiya àà elvan ge ñane: Eksanteksa egdzaaña Isiyaaku, egdzaaña na palle ba ñane wayakwaya jipu na, ezlzlala an ñane àà dem

larde àà Mauriya ate ire àà wa na watse yaà de ngyekwakanvaa ya, de iciyantica sadakaara am tate nanna, sadake na ni taà epshana an kara na.

<sup>3</sup> Ba makurallaara, a tsetehe ge Ibrahiima an enjlya werre, a tataa hazla na watse àà de epsha sadake an nane na, a puwete serde ate ezzenwaara, daaci daredde antara egdzaara Isiyaaku, àà dem tate na ni a ngyekwannaa Dadaamiya na. A detaa emnde buwa am waladfiyahaara, ta duwa antara nane.

<sup>4</sup> Am hare ge keyire waà, Ibrahiima a kante ice, a nanna tate nanna amaà zlabbe yiyyiye jipu.

<sup>5</sup> A ba nane àà elvan ge waladfiyahaara buwa na: Kure waà, njawinja aàhuna antara ezzenwa. Amaà nere antara egdzere waà, kwaye nàà de kezlan ugje ge Dadaamiya ate ire àà wa na kwaye nane na. Maà zlanjeruzle nàà se berakurbera.

<sup>6</sup> Daaci Ibrahiima a eksante hazla na taà epsha naàza sadake an nane na, a farhe ge egdzaara Isiyaaku na. nane an iraara maa, a eksante kara antara washe, daredde taà anjwa àà zlala ba itare ta buwa mazlaara.

<sup>7</sup> Daaci Isiyaaku a ndavanu elva ge eddenjare taà aàtire a zlala nanna, a ba nane: Eddaye! A nwanante ge Ibrahiima, a ba nane: Naba enndaha elvaanja egdzaaruwa, yaà anjwa àà eccena. A ba Isiyaaku àà elvan ge nane: Naàwa maà an hazlaha antara kaàràà badfemme, aàme egdze a zhil kyawe na mi de maga sadake an nane na?

<sup>8</sup> A nwanante ge Ibrahiima, a ba nane: Watse àà de jansaare ba Dadaamiya nanna an iraara ge egdze a kyawe nanna egdzaaruwa. Daaci taà anjwa àà zlalaatare àà ba aàtirpalle.

<sup>9</sup> Daraada am tate nanna a ngyekwannaa Dadaamiya nanna maa, Ibrahiima a de ndere naàzena taà icanaà sadake aàtekwa ge Dadaamiya na, a kazlante hazla, daaci a naba takwasaa egdzaara Isiyaaku na, daaci a belete ate hazla na ate tate àà fana sadake ge Dadaamiya na.

<sup>10</sup> Daaci a velese erva, a eksante washe, àà kaàtaà ica egdzaara waà,

<sup>11</sup> Ibrahiima, Ibrahiima, anjwa àà dfahanaà malika àà Dadaamiya àà sawa am samaya. A nutehe ge Ibrahima: Na'am.

<sup>12</sup> A ba malika: Fanfeka ervaanja ge egdzere dfekideki, maganaanka ba uwe keni. Kina waà, dyaneddiye mazlaara ganakini kaà anjwa àà kuva Dadaamiya, adaba yaikiveka egdzaanja palle ba nane.

<sup>13</sup> Ibrahiima a kante ice waà, àà zhara ba zhel kyawe am igaara am gwezla àà dake tabedfamme, dermahaara an nana am gwezla nanna. A naba duhe ge Ibrahiima suuwe, a de lyevaa zhel kyawe na, a maganaa sadake ge Dadaamiya an nane am slede àà egdzaara.

<sup>14</sup> Ibrahiima a fete zhera àà tate nanna: Dadaamiya anjwa àà nanna. Sem vatena keni, emnde taà dfaha tate nanna a ba an: Dadaamiya anjwa àà nanna nanna.

<sup>15</sup> Malika àà Yaakadada a dfante Ibrahiima ge buwire àà sawa am samaya,

<sup>16</sup> a ba nane àà elvan ge nane: Naàwa elva àà Yaakadada. A ba nane: Ba seke una ni ekka eksakarekse magiya una, yaikiveka egdzaanja palle a ba nane na waà, yaà zaku ba wadfaara an zheraarua ba ge iya:

<sup>17</sup> ba jirire yaà anjwa àà gakar barkaarua, yaà yaàkteya, egdzaraanja taà de gev ba seke terlyakwaha ate samaya, ba seke shili na am guwa na. Ma vatara keni sey taà de gaànaà ba emndaanja ndzedfa arge kelaadahaatare.

<sup>18</sup> Badfemme a nalgaha am duniya taà de shaà barka nanna yaà de gaterar ge emndaanja na, adaba ka na ebzanja elvaaruwa.

<sup>19</sup> Daaci a eptsehe ge Ibrahiima à seza dawalahaara na, ta naba daatare à dem Biirsabe. Adaba Ibrahiima à nja am Biirsaba nanna.

### *Egdzara à Nakaur*

<sup>20</sup> Am iga à labare nanna bademme na maa, ta se mbedanu shawya umele ge Ibrahiima, ta baàntsa: Milka, mukse à egdze a emmena Nakaur a yayane egdzar zaala.

<sup>21</sup> Naàwa zherahaatare: Uus, nane maàkaajiyaara, taà an Bus sledabaara, antara Kamuyail nane waà, eddaàra ge Aram,

<sup>22</sup> sledaba Bus maa Kaisaid antara Hazau antara Pilda antara Yidlaf ira Baitu'iila.

<sup>23</sup> Baitu'iila nane a ye Raibaika. Kwaye nanne egdzara aè Milka tise nanna, egdzar zaala bademme, a yayanna ge Nakaur egdze a emmenaara ge Ibrahiima.

<sup>24</sup> Ankwa mukse à Nakaur umele a gaàn ge burwire, zheraara Raiwma, nane keni a yaye egdzara. Naàwa zharahaatare: Taibak, taà antara Gaham, antara Tahas ira Maaka.

## 23

### *A shekweve estuwa Ibrahiima tate na a hedaken muksaara Saratu*

<sup>1</sup> Saratu a magaa iva dermeke an kul buwa juvuye lauktu à emtsa.

<sup>2</sup> A emtsaa am haha à Kanaana, am ekse à Kiriya Arba, ba nane una taà daha an Haiburun na. Ibrahiima a naba jemaa emnde, a kyuse Saratu.

<sup>3</sup> Am keda muksaara nanna maa, Ibrahiima a naba yaa emtsa na am bere, a tsetehe, a duhe à deza Haitiyaha, a ba nane à elvan ge itare:

<sup>4</sup> Naàwa iya, ya sawa an sawa, ya wayve am dagavaakure. Vatena na waà, shisha mandzawe, yaà kata egdze a slede àza kure taslawaakure, geni yaà de hedfa muksaarua am slede nanna.

<sup>5</sup> Ta nwanante ge Haitiyaha, a ba itare taà elvan ge Ibrahiima:

<sup>6</sup> Estuweka aambarkaana. Ekka ka ura ngaa am dagavaanere a gakaara Dadaamiya barka. Naba edduwa, de zharanaazhara irekhyahaanere, eksesekse ba una baaka argina dekideki na, kaà hedfa muksaana am hudaara. Aà jerka ura am dagavaanere à de yaikve irekhyaaara deàkideki.

<sup>7</sup> Daaci a tsetehe ge Ibrahiima, a tsaahè à katafke à Haitiyaha, emnde a haha nanna, a gaa iraara à katafkaatare,

<sup>8</sup> a ba nane à elvan ge itare: Maàki ba jirire lyavaalya ervaunfaakure ganakini yaà hedfa muksaarua aàhuna waà, taslawaakure, ndavawisendave àza Aifruna egdze à Jauhar,

<sup>9</sup> maàki à bashibasha waà, hwalakwa à Makpaila na ate we à fahaara na, adaba tate nanna naàzaara. A viteva à ba ate gane na ni à zlayaàn ge tate nanna, yaà shekwana à katafkaakure bademme, geni iya keni yaà shansha tate à irekhyaarua halal am dagavaakure.

<sup>10</sup> Mbate, Aifruna nanna keni à ba nja am dagave à emndaatare Haitiyaha, taà à fada ate we à walkame na. A ba Aifruna à elvan ge Ibrahiima à ba an kaa kwara à katafke à zlamakelaawa:

<sup>11</sup> Estuweka aambarkaana, baaka elva a vela am hudaara. Aà katafke à emndaaruwa bademme, ma fe nanna, ma hwalakwa nanna keni vanakteva ba dey ge hedfa muksaana am hudaara. Nada eccena ka naàzena yaà ankwa à ndaka ya na.

<sup>12</sup> Ibrahiima a gaa iraara zlafe adaliye à katafke à emnde a haha nanna bademme,

<sup>13</sup> a ba ñane àà elvan ge Aifruna àà katafkaatare bademme: Taslaaña, yanaaka elvaaruwa na: Gane àà fahaaña waà, yaà ebbiya bademme, naba lyevalya nalmanaaña am ervaaruwa, lauktu yaà de hedfa muksaaruwa.

<sup>14</sup> Amaà a ba Aifruna àà elvan ge Ibrahiima:

<sup>15</sup> Labara kwa aàmbarkaaña, ka yanaa ge uwe ka elvaaruwa na? Naàwa gane àà slede ñanna gursa dermeke ufada, amaà yaikke ba dagavaamiya ka emtu arge nalmane? Naba ezlzlala de ehhedfa muksaaña seke!

<sup>16</sup> Daaci Ibrahiima a ekserhe àà ba an higa gane àà fahe ñanna a ndaasa Aifruna àà ba an waara àà katafke àà Haitiyaha bademme, lipela dermeke ufade àà ba ñane na. Ibrahiima keni a naba kezlanaa gursa dermeke ufade ñanna tuwesse am erva. Una ñanna shunguwaatare na taà tsakala an ñane.

<sup>17-18</sup> Mazlaara, fantau àà ba am sarte ñanna, fahe àà Aifruna am Makpaila, àà dem gedīyaara ge Mamre, damda am rezege àà Ibrahiima àà katafke àà Haitiyaha bademme am kendekiya yaikke ate we àà walkame; fe ñanna antara hwalakwa na, antara nafaha na am fe ñanna ira nafaha na ate nakwaha àà tate ñanna bademme.

<sup>19</sup> Zlaruzle am una ñanna bademme, lauktu Ibrahiima a de hedfa muksaara Saratu. A hedanaa am hwalakwa, am fe am Makpaila, am gedī àà Mamre am tate na ta dāhana an Haiburun na, am haha àà Kanaana.

<sup>20</sup> Kwaye ñane, a gev estuwa fe ñanna antara hwalakwa na am hudaara na, am rezege àà Ibrahiima. A shekwanaa am erva a Haitiyaha, a ganve tate àà hedfa emndaara bademme.

## 24

### *Nika àà tara Isiyaaku antara Raibaika*

<sup>1</sup> Ibrahiima ndza gevge emgyegwe a zhele kurcumme, Dadaamiya garga barka am duksa bademme.

<sup>2</sup> ñane ndza an navaha antara waladiyaha kwakya. Vacite umele, a ba ñane aè elva ge eddawnaañana ñane huđe àà haara bademme na: Sawa femfa ervaaña am dagave àà serahaaruwa, àà bina,

<sup>3-4</sup> adaba yaà kata kaà ziyuze wadfa. Ganeka gyaale ge egdzaaruwa Isiyaaku am dagave àà emnde àà Kanaana na naàwa yaà am dagavaatare na dēkideki. Sey kaà zlala àà ba àà dem lardaaruwa, kaà de gan gyaale ge egdzaaruwa Isiyaaku am dagave àà varahaaruwa. Watse kaà emmaàga he? Ziyuze wadfa an zhera àà Yaakadada, Dadaamiya na a nderanaa ñane samaya antara haha na.

<sup>5</sup> A ñwanante ge slesleraara, a ba ñane àà elvan ge ñane: Aàmbane àà de eksarka gyaale ge dābidāba àà sem larde na maa? Maàki de gevge estuwa yaà naba eptsanaptsa emtu Isiyaakyuwaaña àà dem larde na ndza ka sawa am hudaara na?

<sup>6</sup> A ba Ibrahiima àà elvan ge ñane : Effa hyema, manka una. Daànka egdzaaruwa aàdehuwa.

<sup>7</sup> Yaakadada Dadaamiya na a nderanaa ñane samaya na, a sisaa ba ñane am huđe àà haà àà edderwa, a sisaa ba ñane am lardaaruwa na ta yiyaa am hudaara na. A biyantsa ba ñane, àà de vaterte larde na bademme ge eggyahaaruwa, a ziyu wadfa geni baaka gafkaara. Daaci àà de belana ba ñane malikaara àà katafkaaña ge dem lardaaruwa, kaà de sana gyaale ge egdzaaruwa àà sawa aàhuwa.

<sup>8</sup> Maàki a kwalvaa ba gyaale waà, wadfa na ka ziwa ka ge iya na keni àà dabanaka mazlaara. Amaà duksa palle waà, daànka egdzaaruwa àà dehuwa dēkideki.



<sup>9</sup> Daaci, ane a ba waladfi na, a naba fanem erva am dagave à serahaara, a zanu ge zaànwaaara geni àà emmaga a ba ate una nanna.

<sup>10</sup> Am iga àà una nanna maa, waladfi àà Ibrahiima a naba dzerese kelaawaara am ezlegwamaha àà zanwaara, antara kazlaja umele an daàraàdza jipu, a naba maga shula àà dem ekse àà Nakaur am Misaupautamiya.

<sup>11</sup> Shanaasha ekse nanna maa, de shansha suwa ate iga a ekse nanna. Daaci a naba kazlateraa ugje ge ezlegwamahaara, reppe njarinja ate we àà suwa nanna. Sarte nanna keni gevge icavaciya, sarte a dem yawe ge njwasha.

<sup>12</sup> A magaa maduwa, a ba nane: Yaakadada, Dadaamiya àà zaànwaaaruwa Ibrahiima, taslaaja giyanvege naàzena ni ya sawa adaba nane vatena na. Magannaamaga ngurna ge zanwaaruwa Ibrahiima.

<sup>13</sup> Naàwa yaà tse ate we àà suwa, gyaalaha na taà am ekse na taà de sawa, taà se kaà yawe am suwa na.

<sup>14</sup> Watse yaà ndavanundave ge gyaale palle am itare: Ginaaga hwaamaanà yaà shushe yawe, maà baànbà gyaale nanna naàwa shushe eddaye, yaà kateruke ge ezlegwamaana keni maà taà esha waà, ba nane gyaale na ni ka eksanansaa ka ge sleslaraanja Isiyaaku. Yaà de dise ate una nanna ngurna na ka maganaàn ge zanwaaruwa Ibrahiima.

<sup>15</sup> AÀ ba am tsaka elvaara àà katafke àà Dadaamiya keni zlafe zlawka waà, àà zhara ba sesse Raibaika an hwama ate nahyapaihyaipaara. Raibaika nanna maa, zhera aè eddenjaara Betu'iila egdze a Milka, mukse àà Naàkaur, egdze a emmenjaara ge Ibrahiima.

<sup>16</sup> Raibaika gyaale zariya an tsaka ire, zlafe diyaaka zhele deki. Kacawkakacawe sesse, a de tsekweme am suwa, a kem yawe am hwamaara, kerten a ferhe ankwà àà zlala.

<sup>17</sup> Daaci zhagade ge male àà waladiyaha àà Ibrahiima na, a de ica ba wafkaara, tsaatse, a ba nane àà elvan ge nane: Tasle a nà ganaaga seke hwama yaà shushe yawaana na cekwaanjudi?

<sup>18</sup> A nwanante ge Raibaika, a ba nane: Labara? Naàwa shushe eddaye! Kerten a gannaahè, zhèl na a shu yawe na a yanaa ba nane.

<sup>19</sup> Hyanhya ge zhèl na, a ba Raibaika àà elvan ge nane: Yaà payateraapaya ge ezlegwamaana keni maà taà esha, taà yaànaà ba itare yawe.

<sup>20</sup> Kerten a puwese yawe na ndza am hwama na àà dem kyaale, ba watsewatse a de kem umele, a se puwese adaliye, a payateru yawe na ge ezlegwamaha àà zhèl na bademme, ta yanaa ba itare yawe na.

<sup>21</sup> Am sarte na Raibaika ankwà àà maga slera na waà, waladfi àà Ibrahiima na a duhe tseriye àà ndaka elva, àà zharanaà àà ba an ice. Amaà àà maga ba najipuwaara. A ba nane am ervaunfaara: Una giyanvege Yaakadada naàzena ya se katanaa ya na emtu estara?

<sup>22</sup> Hyaterhya yawe ge ezlegwamahaara bademme waà, zhèl na a naba vante jade àà dindar ge Raibaika. Jade nanna ganaara kwakya jipu. A naba fante ate ektare, a vante zlafe adaliye naàdanwaha buwa, una nanna keni ta janaa àà ba an dindar nanna zlafe adaliye, a naba puwante ate erva.

<sup>23</sup> A ba nane àà elvan ge nane: Taslaaja ndindaha, ka egdze àà ware am ekse na? A naba jerje emtu sledè am mbaakure geni yaà de tsekwa am mbaakure antara emnde na taà ankwà puwisepuwe na bademme?

<sup>24</sup> A nute ge gyaale, a ba nane: Ya egdze àà Betu'iila, ya eggyetare ge tara Naàkaur antara muksaara Milka.

<sup>25</sup> A farhe zlahe adaliye, a ba nane: Ankwa slede ge tsekwa wayvaha am mbaanere. Dete ba kandiske antara masa ge dabbahaakure keni ankwa kwakya am mbaanere, tate àà hare a wayvaha keni ankwa bademme.

<sup>26</sup> Daaci zhel na a naba kezle ugje am aha, a kezlan ugje ge Yaakadada, a slafan waara,

<sup>27</sup> a ba nane: Yaà ankwa àà slafaka waaruwa Yaakadada, Dadaamiya àà zaanwaaruwa Ibrahiima. Yaà slafakaà we, adaba marakiyaanmara parakke ngurna, antara jirire na kaà ankwa àà maganaan ge zaanwaaruwa. Naazaarua ge iya waà, diyandiya mazlaara geni a siya ba Yaakadada an iraara àà sem hufe àà haà àà egdze a emmenjara ge zanwaaruwa suuwe.

<sup>28</sup> Raibaika a naba kante sera àà daà, a de balananse labare ge emmenjara.

<sup>29-30</sup> Ankwa egdze a emmenjara zhele ge Raibaika, zheraara Laban; nane keni nanna jade na am ektare àà egdze a emmenjara na, antara naadanwaha na ate ervaara na bademme. Cenancena keni àà etsaka Raibaika naàzena a bannaa zhel njanna bademme. Daaci a naba sessehe ge Laban am mba, zhagadaara àà dete we àà suwa na, a de bere zhel na antara ezlegwamahaara ate we àà suwa.

<sup>31</sup> A ba Laban àà elvan ge nane: Labara ka tsaa am kaamba! Sawa àà se mbaanere eddaye! Ekka, ka eddawna Yaakadada a gakar barka an tsaka ire na, tsatsannaatsatse ba iya an iraarua tate àà tsekwa wayvaha am mbaanere, slede ge ezlegwamaha keni ankwa bademme.

<sup>32</sup> Daaci ta duhe, ta de tsekwa gwatamaha ate iga àà ezlegwamaha, ta vaterte kandiske antara masa ge ezlegwamaha na, ta sateraa yawe àà bara sera ge nane antara emnde na ta daa àà puwansepuwe na bademme.

<sup>33</sup> Ta sateraa naàza za, ta faterhe àà katafkaatare waà, a ba waladi àà Ibrahiima: Yaà zeka duksa maà ndanakurseka labare na ni a sisa na. A ba Laban: Naba endaha elvaanja edda!

<sup>34</sup> A ba nane àà elvan ge itare: Iya waà, ya waladi a Ibrahiima.

<sup>35</sup> Dadaamiya Saksage a gar barka an tsaka ire ge zanwaaruwa Ibrahiima, a ganve ur ngaa. A vante nawaha antara kyawaha, eslaha, lipela antara dindar, antara navaha antara kwatenaha, ezlegwamaha antara ezzenwaha, bademme a duksa.

<sup>36</sup> Muksaara Saratu a naba yane egdzere àà ba am emgyigwire. Zanwaaruwa a yanaa rezegaara bademme ge egdze njanna kina.

<sup>37</sup> A ba zanwaaruwa àà elvan ge iya: Yaà kata kaà ziyuze wada. Kaà ganka mukse ge egdzaaruwa am dagave àà emnde a Kanaana na njàà am dagavaatare na defideki.

<sup>38</sup> Sey kaà zlala àà ba àà dem lardaruwa, àà dem dagave àà egdzar mamahaaruwa, antara emnde a jebaaaruwa, kaà de gan gyaale ge egdzaaruwa ààhuwa. Watse kaà emmaga he ate una njanna? Sey kaà ziyuze wada, àà bina.

<sup>39</sup> A ba iya yaà elvan ge zanwaaruwa: AÀmbane watse àà d'abika gyaale àà sem larde na maa?

<sup>40</sup> A ba zanwaaruwa àà elvan ge iya: Dadaamiya, Yaakadada na yaà ankwa àà kezlan ugje kelaazare na waà, àà de belana ba nane malikaara àà katafkaanja, àà de gakanvege nane shulaanja ate una ni kaà de hayaanhaya na. Daaci kaà sannaasa gyaale ge egdzaaruwa àà sawa am jebaaaruwa, àà sawa am dagave àà egdzar mamahaaruwa.

<sup>41</sup> Maàki ba dakaada ka aà dem jebaaruwa waà, wadà na yaà farkar ezzaara na keni aà daban̄ka mazlaara. Una ma de shakanaànkà gyaale ge egdzaaruwa, varakteka keni tsekwaatsekwa ate ka, aà daban̄ka wadà na kaà zaànaà ka na mazlaara.

<sup>42</sup> Kwaye ñane daliila a shulaaruwa vatena, ya se tsekwaate we aà suwa. Tsekwantsekwa ate we aà suwa waà, ya magaa maduwa, a ba iya: Yaakadada, Dadaamiya aà zanwaaruwa Ibrahiima, maà lyavaalya ervaun̄daana waà, taslaana hyiyanfeyhe shulaaruwa vatena na.

<sup>43</sup> A ba iya zlaɓe adaliye am maduwaaruwa: Naàwa iya, yaà tse ate we aà suwa, maà sesse gyaale am huɗe aà ekse, a se ka yawe am suwa na, ya banaa: Taslaana viteva yawe yaà shushe cekwaan̄gud̄i am hwamaana ni, yiveka,

<sup>44</sup> maà banba gyaale ñanna: naàwa shushe eddaye, yaà payaterapaya ge ezlegwamahaana keni maà taà esha, maà baànbà gyaale ñanna estuwa waà, daaci ba gyaale na ni ka eksesaa ka geni aà gev mukse aà egdze aà zanwaaruwa.

<sup>45</sup> Iya keni zlaɓe yaà aàtira tsaka elva ñanna am ervaun̄daaruwa, yaà zhara ba sesse Raibaika an hwama ate nahyapaihyapaara, a de tsekweme am suwa, a kem yawe, a ferhe. A ba iya yaà elvan ge ñane: Taslaana viteva seke yawaana na yaà kuke?

<sup>46</sup> Kerten̄ eksaksa yawe ate nahyapaihyapaara: naàwa eddaye, yaà kateruke ge ezlegwamahaana keni aà bina. Iya ya shu yawe na, a payateraa ge ezlegwamaha, itare keni ta yanaa ba itare yawe.

<sup>47</sup> A ba iya yaà elvan ge ñane: Ka egdze aà ware? A ba ñane: Ya egdze a Batu'iila, ya eggyetare ge tara Nakaur antara muksaara Milka. Daaci ya naba fanem jad̄e am ektare, ya puwante nadan̄waha ate erva.

<sup>48</sup> Daaci ya kezle ugje am aha, ya kezlane ugje ge Yaakadada, ya slafan waaruwa ge Yaakadada, Dadaamiya aà zanwaaruwa Ibrahiima, adaba a kwarisaa ba ñane barama a shulaaruwa, zlalavezlale baaka argina, geni yaà ganega egdze aà egdze a emmen̄aara ge zanwaaruwa ge egdzaara.

<sup>49</sup> Kina waà, elva a juwaa aà ba aàze kure. Maàki eksaarekse irakure maganaa shaigerire antara jirere ge zanwaaruwa, kwa ndahihe. Maàki aà gevka keni ba kwa ndahihe parakke, daaci yaà zlalaaruwa aè dem tate umele.

<sup>50</sup> Ta ñwanante ge tara Laban antara Batu'iila, a ba itare taà elvan ge ñane: Duksa waà, ba naàzena ni a ganvaa Dadaamiya na. baaka elva na ni ñaà ndaaka ñere, ña tsa bakanka shagera elvaana, ña tsa bakanka keni shagerka elvaana.

<sup>51</sup> Kwaye Raibaika aà katafkaana, eksanteksa daànda, a de gevge mukse aà egdze aà zanwaana ba seke una a ndaaka Yaakadada na. Dawaada aà ba an hairire.

<sup>52</sup> Ba a cenaa una ñanna male aà waladiyaha aà Ibrahiima, a kezlan ugje ge Yaakadada am aha.

<sup>53</sup> Am iga aà una ñanna, a sanse kazlana aà gyaale zarizariya bademme, umelahaara ta janaa an lipela, umelahaara ta janaa an dindar, antara nan̄gyuwaha, a vante ge Raibaika. A sanse kazlana umele zlaɓe adaliye an daradza jipu maa, una ñanna a vaterte ge tara Laban egdze a emmen̄aara ge gyaale antara emmen̄aara ge gyaale.

<sup>54</sup> Zlaruzle am shawyaatare bademme, lauktu male aà waladiyaha aà Ibrahiima antara emnde na ta daa aà puwansepuwe na ta zu duksa, ta sharhe, lauktu ta de zlava ta hare.



Maàkurallaara an enlyya werre waà, ta tsetehe, a ba male àà waladiyaha na àà elvan ge emnde a haà: Vawiteva kwa baraàma, yaà daà àà deza zanwaaruwa.

<sup>55</sup> A ba tara egdze a emmejaara ge gyaale antara emmejaara taà elvan ge njane: Amaà gyaale waà, aè shekwashakwa emtsaade deydey hare kelaawa palle lauktu watse kwa daà.

<sup>56</sup> A ba njane àà elvan ge itare: njanjawika seke taslawaaakure. Naàwa shulaaruwa a tsatsanaa ba Yaakadada an iraara. Kure waà, vawiteva kure ba baraàma, yaà eptsa àà deza zanwaaruwa.

<sup>57</sup> A ba itare taà elvan ge njane: Una waà, sey njàà d'aha ba gyaale an iraara, àà se njuta ba njane.

<sup>58</sup> Daaci ta d'ante gyaale, a ba itare taà elvan ge njane: Kaà ed'faba he zhel na àà kata àà daàkaàda ba vatena? A njute: Yaà ed'faba, àà bina.

<sup>59</sup> Daaci ta sawhe ge egdzar mamahaajaara ge Raibaika, antara emnde haatare bademme, ta magateraa aàjaàmimaà shifa ge tara Raibaika antara slenjana egdzere antara male àà waladiyaha àà Ibrahiima ira emnde na ta saa àà puwansepuwe na bademme.

<sup>60</sup> Egdzar mamahaajaara ge Raibaika ta gan barka ge egdze a emmetare, a ba itare ma waraatare keni: A vakteva Dadaamiya egdze a hude egdze a emmerwa. Egdzaraaja a garevge ma debu waànyarwaànyara keni. Kelaadaha a njà taà de gevge ba njwashaha àà katafke àà egdzaraaja.

<sup>61</sup> Daaci a tsetehe ge Raibaika antara kwatenahaara, ta d'adafte ate iga ezlegwamaha, a d'abete male àà waladiyaha àà Ibrahiima. Male àà waladiyaha àà Ibrahiima a gan estuwa Raibaika, a zlalehe an njane.

<sup>62</sup> Am sarte njanna maa, Isiyaaku zlabè ba unjule a saara, ndza a dete we àà suwa. Zhèra àà suwa njanna Lahay Ruwa. Amaana: Dadaamiya Saksage anjkwà àà nina. Adaba njane an iraara a nja am haha njanna am puti.

<sup>63</sup> Vacite umele an icaviciya maa, Isiyaaku a de tataya tate àà tsekad'fire am fe, a kante ice waà, àà zhara ba ezlegwamaha taà anjkwà àà sawa.

<sup>64</sup> Raibaika keni kanteka ice, nanna Isiyaaku na, a naba tsekwehe ate ezlegwamaara.

<sup>65</sup> A ndavanu ge male àà waladiyaha àà Ibrahiima, a ba njane àà elvan ge njane: Ware njane zhèl na kwaye njane am fe, àà se jaà ire an miya na? A njwanante ge zhèl na, a ba njane àà elvan ge njane: Una njanna degiya zanwaaruwa. Ba watsewatse Raibaika a haltaa lafayaara, a puwar ge iraara.

<sup>66</sup> Male na a se ndahanhe ge Isiyaaku naàzena a maganaa njane am shulaara bademme.

<sup>67</sup> Daaci Isiyaaku a daa Raibaika ba suuwe àà dem bere àà emmejaara Saratu. Raibaika gevge mukse àà Isiyaaku, wayaawaya jipu an muksaara. A ekhya estuwa ervaun'de àà Isiyaaku, adaba ndza a ked'aa emmejaara.

## 25

### *Egdzara àà Ibrahiima a yanaa an Kaitura*

<sup>1</sup> Ibrahiima a naba ge mukse umele zhèraara Kaitura.

<sup>2</sup> Mukse njanna a yayane egdzar zaala ge Ibrahiima. A yese Simran, antara Yauksan antara Maidan antara Madiyan antara Yisbak ira Suhak.

<sup>3</sup> Yauksan, njane keni a ye tara Saiba antara Daidan. Daidan keni a yese emnde a Asuri antara emnde Laitusi ira emnde a Laiwmi.

<sup>4</sup> Naàwa emnde na keni egdzara à Maidiyan: Tara Aifa antara Aifair antara Hanauk antara Abida ira Aildaba. Bademme a emnde na ba egdzara à Kaitura.

<sup>5</sup> Warata waà, Ibrahiima a vante warata à nalmanaara bademme ba ge Isiyaaku palle.

<sup>6</sup> Amaà egdzara à ñwashaha umele na waà, zlahe ñane an shifaara, a tegateraa nalmane à ba an ervaara, a ñgyekwateraa sledaatare à dem gedi, yiyiye jipu an Isiyaaku, una ñanna keni larde umele.

#### *Emtsa à Ibrahiima antara tate a ehhefaara*

<sup>7</sup> Ibrahiima a magaa iva dermeke an kul vuye jilyebe,

<sup>8</sup> lauktu a zluwaa hairiraara, gevge emgyegwe an tsaka ire, ndza a jesanje am iraara nja an shifa. Amaà a emtsaa am ñgahire, zlazlala à deza eggyahañara.

<sup>9</sup> Ta hedanaa ba egdzaraara, tara Isiyaaku antaa Isemayiila am hwalakwa à Makpaila, am fahe à Aifruna egdze a Jauhar ura Haiti, fe ñanna à dem gediyaara ge Mamre.

<sup>10</sup> Amaà fe ñanna waà, Ibrahiima shekwefshekwe am erva à Haitiyaha. Daaci ta hedateraa à ba am huđe à fe ñanna tara Ibrahiima antara muksaara Saratu.

<sup>11</sup> Am iga à keda Ibrahiima maa, Dadaamiya a gar barka jipu ge egdzaara Isiyaaku. Isiyaaku a njehe, haara ba herzhe an suwa ñanna taà ðahana an Dadaamiya ankwaa à nina na.

#### *Egdzara à Isemayiila antara sledaatare*

<sup>12</sup> Naàwa kergema à egdzara à Isemayiila, egdze à Ibrahiima na a yanaa Hajara egdze à emnde a Misra, ndza kwatena à Saratu.

<sup>13</sup> Naàwa zheraha à egdzara à Isemayiila an ðabava an ðabava: Naibayaut, ñane makaaji à Isemayiila, sledabaara Kaidar, lauktu Adbair, lauktu tara Maipsaam

<sup>14</sup> antara Misma antara Duma antara Masa

<sup>15</sup> antara Hadat antara Taima antara Yaituru antara Maafis ira Kaiduma.

<sup>16</sup> Kwaye ñane egdzara à Isemayiila kelaawa jubuwa antara zherahaatare bademme. Ma waraatare keni huyaahuya gevge jeba. Ba zherahaatare una a gev zheraha à eksahaatare antara zheraha à sledaha na taà de tsekwa itare am huđaara am kezlakezlahaatare.

<sup>17</sup> Isemayiila magaamaga iva dermeke an kul keye ju vuye lauktu à emtsa, a daahe à deza eggyahañara am faya.

<sup>18</sup> Egdzara à Isemayiila ta nja am dagave à tara Hawila antara Sura, à dem gedi à haha à Misera, ate baraama a dem Sura. Am emnde à Ibrahiima bademme, ta de nja ba itare yiyiye an emnde bademme.

#### *Isiyaaku a yeka egdzere a shaa wulhaha*

<sup>19</sup> Naàwa labare à Isiyaaku egdze à Ibrahiima:

<sup>20</sup> Isiyaaku magaamaga yawe kul ufade kalkale lauktu a ge Raibaika egdze a emmeñara mukse ge Laban egdze à Batu'iila, ura Paddan Aram.

<sup>21</sup> Isiyaaku a ñaala Yaakadada, adaba muksaara Raibaika yaaka egdzere, gevge dzire. Dadaamiya Yaakadada lyavaalya ñaalaara, muksaara a naba shaa huđe.

<sup>22</sup> Huđe à Raibaika ñanna waà, wulhaha. Egdzara taà ankwaa à dagala am huđe, a naba fu hula Raibaika, a ba ñane: Maà ba estuwa, ya shan ge uwe ñane huđe ñanna ba ðekideki? Daaci a de ndava àza Yaakadada.

<sup>23</sup> A ba Yaakadada à elvan ge ñane: Ankwaa zlamaha buwa, jeba buwa am huđaana. Jebaha buwa ñanna taà ankwaa à tegaava à sawa am

hudaana. Am jebaha buwa nanna waà, anƙwa palle aà de jauje ge palle an ndzedà. Am egdzara nanna waà, male aà de gev waladì aà kudere.

<sup>24</sup> De hyephye sarte aà Raibaika ge yaà, a de ye waà, a yese wulhaha buwa.

<sup>25</sup> Am egdzaraara nanna, una a sawa zunjwe na verande, an uje ate vuwa ba seke naàza aà egdze aà sla. Ta fete zharaara Isuwa.

<sup>26</sup> A de sawa sledabaara waà, a naa naàdegadega aà Isuwa na am ervaara. nane keni ta fete zharaara Yakubu. Isiyaaku magamaga yawe kul unƙwahe kalkale am sarte na ta ye egdzara nanna.

### *A veluwa estuwa Isuwa daradza aà makaajiyiraara*

<sup>27</sup> Daaci walartewaàlaà egdzara buwa na. Isuwa a gev matsame, aà eblyeka ervaara aà dem haha dekideki, nane gevge slekaamba. Amaà Yakubu waà, nane sletsekadde, aà nja aà ba am mba duksaara.

<sup>28</sup> Isiyaaku waà, ndza aà waya ba Isuwa kwakyaara, adaba aà sanaà hyuwa ba kelaazare. Amaà Raibaika waà, nane a hayaa ba Yakubu.

<sup>29</sup> Vacite umele maa, Yakubu keni gyanvegye naàza za kyanje, Isuwa keni saasa am kaamba, kufukkude an tsaka ire.

<sup>30</sup> A ba Isuwa aà elvan ge Yakubu: Taslaana yiyanya naàza za na an gya kyanje na, yaà ndabundabe ya emtsaade, adaba baaka naàzu yaà maganaà ya mazlaara. Ta fante adaba una nanna zhera Aidaum ge Isuwa, amaana: Kyanje.

<sup>31</sup> A nwanante ge Yakubu, a ba nane: Veliyuvele daàraàdza aà makaajiyiraana emtsaade lauktu kaà ezza.

<sup>32</sup> A ba Isuwa: Yaà emtsa ni makaajiyire, watse aà magiya uwe nane makaajiyire nanna?

<sup>33</sup> A ba Yakubu aà elvan ge nane: Maà eksakarekse waà, sey kaà ziyuze wada emtsaade. Isuwa a naba zanu wada ge Yakubu, geni yanaanya makaajiyire. Isuwa a velu estuwa daàraàdza a makaajiyiraara.

<sup>34</sup> Daaci Yakubu a naba vanteva kwa naàza za na ge Isuwa, depaij antara jeba a yire umele anƙwa dfaàlaara aàgire. A zuhe, a sharhe, a tsetehe duksaara ba ezlzlala. A epsawaa estuwa Isuwa daradza aà makaajiyiraara.

## 26

### *Isiyaaka am larde aà Failaistiyaha*

<sup>1</sup> Daaci samsa waya yaikke a sem larde, amaà waà, waya na ndza am zamane aà Ibrahiima na ka. Daaci a naba duhe ge Isiyaaku aà deza sleksu Abimailaik slekse aà Failaistiyaha am Gairar,

<sup>2</sup> de marapsemare Yaakadada aà katafkaara, a ba nane aà elvan ge nane: Duka aà dem Misra dekideki, naba njinja am larde na yaà de bakana iya.

<sup>3</sup> Gejeka emtsaade seraana am larde na, iya yaà anƙwa antara ka, yaà de gakar barkaarua. Adaba bademme a kwaraha na, yaà de vakte ba ge ekka antara wulfahaana am igaana. Yaà de ganve estuwa wadaaruwa na ya zanu ge eddena Ibrahiima.

<sup>4</sup> Yaà de huyateraahuya egdzaraana, taà de gev ba seke terlyakwaha ate samaya, kwaraha na bademme watse yaà de vaterte ba ge wulfahaana. Bademme a jebaha na ate haha ta de sha barka adaba wulfahaana.

<sup>5</sup> Adaba Ibrahiima a cenaa elvaaruwa, a eddaba naàzena ya banna ya, a tsaa aà ba ate naàzena ya tsanaa ya, dabadaba jipu naàzena ya puwetaa ya antara shairiyahaaruwa bademme.

<sup>6</sup> A njanaa ba una nanna Isiyaaku am Gairar.

<sup>7</sup> Am sarte na emnde a ekse taà ankwaa à ndavanu elva ate muksaara Raibaika, egdze a emmerwa à bina. A wana lyawa ge ba muksaara, adaba a kuva emnde a ekse nanna jipu geni a jareka arge muksaara, adaba muksaara Raibaika zariya jipu, baaka arge nane.

<sup>8</sup> Am haraare Isiyaaku am ekse nanna, vacite umele, naterna sleksu Abimailaik slekse à Failaistiyaha à kya we à biye à bere, taà ankwaa à gwagwesa tara Isiyaaku antara muksaara Raibaika.

<sup>9</sup> Abimailaik a naba dante Isiyaaku, a ba nane à elvan ge nane: Mbate mukse na muksaana! Ka ndana estara kena egdze a emmena à ba ka na? A nwanante ge Isiyaaku a ba nane à elvan ge nane: A wiyaa ba lyawa geni a jarika adaba nane.

<sup>10</sup> A ba Abimailaik: AÀzara kena una ka maganerta ka na? A yaa ba cekwaanjudi ma andze ura umele à ganvege muksaara am emndaaruwa, daaci ekka keni sakaneranka emtu haypa?

<sup>11</sup> Daaci sleksu Abimailaik a ndaase elvaara palle, a ba nane à elvan ge emndaara: Ma ware una a ndanse elva yayiaihe ge zhel na, ma a fete erva ate muksaara keni, eddaara à njeka an shifa dekideki.

*Tara Isiyaaku antara Abimailaik taà ankwaa zaà wadã am dagavaatare*

<sup>12</sup> Ate iva nanna, Isiyaaku a herdã à ba am haha nanna, amaà jaaja duksa baaka zlaktaara, adaba Yaakadada garga barka.

<sup>13</sup> Nalmane Isiyaaku ankwaa à far ba saga, a gev sleberba baaka arge nane dekideki.

<sup>14</sup> Ndza an waldaha à sla kwakya, antara kyawaha antara nawaha, kwakya jipu. Emnde a maganaa slera keni ndza baaka zlaktaatare. Daaci Failaistiyaha ta naba shelha ate nane.

<sup>15</sup> Adaba shelha na maa, Failaistiyaha ta naba dashem suwaha na ndza a yayanaa eddenaara Ibrahiima na bademme an haha. Adaba Ibrahiima keni ndza kwakya waladiyahaara, ta yayanaa ba itare suwaha nanna.

<sup>16</sup> Daaci a ba Abimailaik à elvan ge Isiyaaku: Gakevge kaà an hakuma jipu, jakuje ge ndzedaanjere, ezlzlala am lardaanjere.

<sup>17</sup> A naba kezla Isiyaaku, a de icese slalaara am kaamba a Gairar, dambake zlafe adaliye, a njaara aahuwa.

<sup>18</sup> Isiyaaku a naba yayese zlafe adaliye suwaha na ta yayanaa am zamane à eddenaara Ibrahiima, ta daishemhe ge Failaistiyaha am igaara na. nane a naba yayese, a fafete zheraha na ni ndza Ibrahiima a dafa suwaha nanna an nane na.

<sup>19</sup> Waladiyaha à Isiyaaku keni ta yaye suwaha umele anwaslire, ta shaa yawaha na à emtseka dekideki na.

<sup>20</sup> Suniyaha à emnde a Gairar ta naba daàgala an suniyaha à Isiyaaku arge suwa. Adaba ta baantsa itare: Suwa na nazaanjere. Isiyaaku a naba fante zhera à Aisaik ge suwa nanna. Amaana: Daàgala. Adaba ta kaataà dagala an nane arge suwa nanna.

<sup>21</sup> Waladiyaha à Isiyaaku ta ye suwa umele, arge una nanna keni ta naba tsa elva zlafe adaliye Failaistiyaha. Isiyaaku a fete zhera à suwa nanna Sitna. Amaana: Kelaadire.

<sup>22</sup> A tsetehe am tate nanna, a de ye suwa umele ge keyire; arge una nanna waà, tsateka dagala. Isiyaaku a fete zhera à suwa nanna Raihaubaut. Amaana: Hwihwiyire. Adaba a bantsa nane: Yaakadada sagamiyanvesage slede geni mi hwiya am larde na.

<sup>23</sup> Am iga à una nanna, Isiyaaku a naba kezla zlafe adaliye am tate nanna, kwaye a de nja am Birsaba.

<sup>24</sup> AÀhuwa ñanna, Yaakadada a de maranaa iraara àà ba am hare ñanna, a ba ñane àà elvan ge ñane: Ba iya una ya Dadaamiya àà eddena Ibrahiima. Gazleka ðekideki, adaba iya yaà anƙwa antara ka, yaà de gakar barkaaruwa, yaà de yaàtertiya egdzaraaŋa adaba barka àà eddena.

<sup>25</sup> Daaci Isiyaaku a naba ndere naàzena taà fana sadake aàtekwa ge Dadaamiya na am tate ñanna, a magaa maduwa, a dāha Dadaamiya an Yaakadada am maduwaara. A magaa beraara an kacakaca am tate ñanna, waladiyahaara ta naba ye suwa umele.

<sup>26</sup> A sawhe ge Abimailaik àà sawa am Gairar aàsezenaara, ta sawa antara uraara Ahusat ira Pikaul, ñane male àà sawjiyahaara.

<sup>27</sup> Isiyaaku a naba ndavateruhe, a ba ñane àà elvan ge itare: Kina mu a sakuraa uwe aàsezerwa, aàbi ñgyaikurisenɣye am dagavaakure yakuriyaaya?

<sup>28</sup> Ta eptsanaa jawapa, a ba itare taà elvan ge ñane: ñaà anƙwa àà ezhzhara ñanna waà, anƙwa Yaakadada antara ka ba parakke. A ba sawariyaanɣere, shagera àà demda waɗa am dagavaamiya. Ekka antara ñere waà, namaàna dagavaamiya.

<sup>29</sup> Kina waà, kaà zaɣeruze waɗa geni kaà de maganerteka kelaadire ðekideki. Adaba ñere keni fanerka zladā ate ka, ña magakaa shaigerire jipu, ka segashe ba lapilayye am dagavaanɣere. Kwaye ñane gakevge ura àà Yaakadada kaà an barkaara am vuwa.

<sup>30</sup> Daaci Isiyaaku a magatera a munri ta zuhe, ta sharhe.

<sup>31</sup> Makurallaara ta tsetehe an enlyya werre, ta zu waɗa ñanna am dagavaatare. Am iga àà una ñanna Isiyaaku a magatera a àjamimashifa, ta daahe àà ba an hairire.

<sup>32</sup> Ba vacite ñanna, waladiyahaara ta sanaa labare àà suwa na taà anƙwa àà eyya, a ba itare: Shaɣeransha yawe.

<sup>33</sup> Isiyaaku a fete zhera àà suwa ñanna Saba. Amaana: Waɗa. Adaba una ñanna zhera àà ekse ñanna Birsaba sem vatena. Amaana: Sawa àà waɗa.

### *ñwashaha àà Isuwa*

<sup>34</sup> Isuwa maa, ñane magaamaga yawe kul ufade, a naba ge ñwasha buwa. A ge tara Yaihudit egdze àà Bairi, antara Basmat egdze àà Ailaun. Bukerdaatare ta ba egdzara àà Haitiyaha.

<sup>35</sup> ñwashaha àà Isuwa ñanna ta zladateranve ervaunɗe jipu ge tara Isiyaaku antara muksaara Raibaika.

## 27

### *A gaare estuwa Isiyaku barka ge Yakubu*

<sup>1</sup> Isiyaaku gevge emmgyegwe kurcumme, ba ice keni a nanka mazle-aara. A dante Isuwa makaaji-aara á deɣera, a ba ñane á elvan ge ñane: Isuwa egdze-aaruwa. A ñwanante ge Isuwa : Ná'am !

<sup>2</sup> A ba eddenara á elvan ge ñane: Iya na wá, ganevge emmgyegwe jipu, ba sarte a emtsa-aaruwa keni diyanka ya.

<sup>3</sup> Daaci kina wá, halantehala náza erva á ña, kudeme á ña, antara leka á ña, ezlzala á dem kaamba, de eksivaksa dabba a kaamba,

<sup>4</sup> se gyianvegye hyuwa a dabba kaamba na ka de eksana ka na njebakke ate una ya katana ya, daaci siyansa yá zuze, yá gakar barka lauktu yá emtsa.



<sup>5</sup> Cenancena Raibaika am sarte na Isiyaaku an̄kwa á tsakana elva na ge makaaji-aara Isuwa. Daaci zlazlala Isuwa á dem kaamba, a de tsagwada náza kaamba geni a sanansa ge eddenjara maa,

<sup>6</sup> a ba emmetare Raibaika á elvan ge Yakubu: Náwa ya cenancena a ba eddekure á elvan ge egdze emmeja:

<sup>7</sup> Ezlzala á dem kaamba de eksevaksa dabba a kaamba, se gyianvegye njebakke, yá zuze, ya gakar barka á katafke á Yaakadada lauktu yá emtsa.

<sup>8</sup> Daaci kina wá, náwa yá ndaaka elva-aaruwa, eccena ba shagera yanaaka elva-aaruwa njanna.

<sup>9</sup> Naba duwa á dem walda, de siyansa egdzara usale-aha shagera shagera buwa wá, yá se gyananvegye ge eddenja njebakke ate una á katana njane,

<sup>10</sup> ká se dananda a zuze, á gakar barka lauktu á emtsa.

<sup>11</sup> A ba Yakubu á elvan ge emmenjara: Egdze a emmerwa an ugje ate vuwa, baaka náza-aaruwa maa,

<sup>12</sup> máki tapiyatapa edderwa, diyisediye mu á de banka ya far uk-sanwirehe? Daaci máki gevge estuwa, á de kita barka edderwa yá de shanka barka na.

<sup>13</sup> A njwanante ge emmenjara, a ba njane: A daban̄ka dekideki, á sem mbiye-aaruwa ge iya egdze-aaruwa. Yanaaka ka elva-aaruwa na, naba edduwa de siyansa egdzara usale-aha na.

<sup>14</sup> Yakubu a naba de sanaa egdzaar usale-aha na ge emmenjara, njane a se tsatsaa náza za njebakke ate una á katana eddetare.

<sup>15</sup> Am iga a una njanna, a demhe am bre á egdze-aara Isuwa, egdzere zun̄wire-aara, a dzarese nan̄gyuwe-aara na an daradza jipu na, a tsekwanme Yakubu am hude-aara, egdze-aara ge buwire.

<sup>16</sup> An gwagwa á nawe-aha njanna maa, a mbuwanaa ye á erva-aha an njane antara ye, adaba ye á Yakubu slerdfakke jipu.

<sup>17</sup> Daaci Raibaika a naba fanem náza za na a tsatsanaa njane na am erva ge egdze-aara Yakubu, hyuwa an gya njebakke antara depain.

<sup>18</sup> Mazle-aara a naba duhe ge Yakubu adeza eddenjara na. Edda, a ba njane á elvan ge njane. A njwanante ge eddenjara: Na'am. Ka ware egdze-aaruwa?

<sup>19</sup> A ba Yakubu á elvan ge njane: Ba iya makaaji á njana Isuwa, ya sakaa nazena ka ndavanaa ka na. Tsetse-kwa njinja, ká zuze hyuwa na ya sakánse na lauktu ká giyar barka.

<sup>20</sup> A ba Isiyaaku á elvan ge njane: Ka shanaa estara kena ba watsawatse na egdze-aaruwa? A njwanante a ba njane á elvan ge njane: A sanaa ba Yaakadada, Dadaamiya á njana á se katafke-aaruwa.

<sup>21</sup> A ba Isiyaaku á elvan ge Yakubu: Sawa emtsaade egdze-aaruwa, yá tapakaatapa an erva-aaruwa ba jirire ka ba Isuwa? Máki ka Isuwa ka keni ya diyeddiye.

<sup>22</sup> Daaci a naba gaptehe ge Yakubu á deza eddenjara Isiyaaku na, á ettapa Isiyaaku an erva-aha-aara, a ba njane: Ye-aara máki á ndaha elva wá, Yakubu, amá erva-aha-aara wá, Isuwa.

<sup>23-24</sup> Diyaaka Isiyaaku dekideki, adaba baaka erva-aha á Yakubu agashe, bademme ba ugje ba seke náza á egdze a emmenjara Isuwa. A ndavanuhe ge Isiyaaku, a ba njane: Ba jirire ka ba makaaji-aaruwa Isuwa? A njwanante ge Yakubu, a ba njane: Ba iya degiya Edda. Mazle-aara a naba fantau ge gar barka.

<sup>25</sup> A ba Isiyaaku á elvan ge njane: Siyansa hyuwa á náza kaamba na ka sinaa ka, ka makaaji-aaruwa, yá zuze lauktu yá gakar barka. Yakubu a vante, a zuhe, a de sanaa mbazla, a vante a sharhe.



<sup>26</sup> Am iga á una ñanna, a ba Isiyaaku: Sawa kwa egdze-aaruwa takwaliyatakwala.

<sup>27</sup> Takwalle á ba Yakubu a de ñañaa eddenjara na. Cenancena Isiyaaku emtakkire á se á nanjyuwe-aara, a garhe barka, a ba ñane: Emtakkire á se á egdze-aaruwa na wá, ba seke emtakkire á se á fahe na Yaakadada garge barka jipu na.

<sup>28</sup> A vakteva Dadaamiya werhe á sawa am samaya antara dikele á nalmane na ni a vanta haha ge ura na. Tara hiya antara mbazla na emtakke na wá, sey tá ndavana á ba am mba á ña.

<sup>29</sup> Larde-aha gergere tá de magakaa slera ge ka, jeba-aha gergere ta de ganaaga ire-aatare á katafke á ña. Ká de geva ka zanwe á egdzara mama-aha a ña, ta de gana ba itare ire-aatare a katafke á ña. A de sha barka eddewna ni á de gak barka ge ekka. Amá á de gev an nyainye eddawna ni á de nyainya ka na.

<sup>30</sup> Isiyaaku keni zlauzle am gar barka ge Yakubu, sesse Yakubu áza eddenjara, vanayye saasa egdze a emmanjara Isuwa á sa am baka na.

<sup>31</sup> Ñane a se gyanve hyuwa á náza a kaamba njebakke, a sanánhe kwa ge eddenjara na. A ba ñane á elvan ge eddenjara: Tsetse kwa edda, náwa sanakanmesa hyuwa á náza kaamba na, zuze lauktu ká gar barka ge egdze á ña.

<sup>32</sup> A ba eddenjara á elvan ge ñane: Ka ware ka? A ba ñane: Ba iya egdze á ña Isuwa, ya makaaji á ña.

<sup>33</sup> Jaaja emtanjire Isiyaaku, diyaaka ba názena á magana ñane keni ðekideki. A ba ñane: Ware ñane ni a duhe á dem kaamba, a de je náza kaamba, a siyaa hyuwa-aara ya zuhe, náwa a tsantaa ba sera á ña na! Barka wá, ganarga, shansha zlauzle.

<sup>34</sup> Isuwa ba á cenaa elva na á tsakana eddenjara na wá, ñane keni jaaja ervaude jipu, a fu hula á ba á dem samaya. A ba ñane á elvan ge eddenjara: Tasle á ña eddaye-aaruwa, iya keni giyarge barka.

<sup>35</sup> A ba Isiyaaku á elvan ge ñane: Saasawa egdze a emmeña an zlerma, dánda ñane barka na ma andze náza á ña na.

<sup>36</sup> A ba Isuwa: Ñane na wá, Yakubuwire na sharanansha, egdze á zlerma. Werre keni, a berdu daradza á makaajiyire-aaruwa á ba an ndzedá beresse. Nawa vatena zlafe adaliye a se berdu barka-aaruwa gevge ser buwa kina. A ba ñane á elvan ge eddenjara: Mazlakinaaki barka ñanna ge iya emtu?

<sup>37</sup> A ba Isiyaaku á elvan ge Isuwa: Baaka elva-aara, gananvege ñane zanwe a ña. Ya fanem egdzara mama-aha-ñara baðemme am erva ge ñane, tá de magana slera. Vananteva ndzedá jipu an hiya kwakya, ma mbazla emtakke keni tá de ndavana á ba am mba-aara. Yá magaká uwe kina mazle-aara egdze-aaruwa

<sup>38</sup> A ba Isuwa á elvan ge eddenjara zlafe adaliye: Ndza ká á ba an barka palle ñanna emtu edda, giyarge seke barka ge iya keni eddaye-aaruwa. Mazle-aara Isuwa a naba fu hula, anjkwá á kyuwa a ba an ká kwara.

<sup>39</sup> A ñwanante ge eddenjara Isiyaaku, a ba ñane á elvan ge ñane: Sledé á nja ña ge ekka wá, watse ká yiyiye an sledé na gelgela, werhe na á sawa am samaya na á de duka a dem dalbe á ña ðekideki.

<sup>40</sup> Ekka wá, á de vakta shifa ba masalam á ña, ká de magana slerga ba ge egdze a emmeña. Amá máki yak-ya hala wá, ká naba sansese ire á ña am erva-aara.

<sup>41</sup> Daaci Isuwa jaaja ervaude jipu ate egdze a emmeñara Yakubu, adaba barka na ni a gaara eddetare na. A ba ñane am ervaunde-aara: A ba á

sawa ndza nane vaci kyuwa eddemiya, má watse tá dá ba buwa antara Yakubu nanna ma.

<sup>42</sup> Balaranansebale ge Raibaika názena ni á kata magana Isuwa egdze a zunḡwire-aara na ate egdze a emmeḡara. A ḡante Yakubu ádezeḡara, a ba nane á elvan ge nane: Effa hyema ate ire á ḡa, aḡaba aḡkwa a tsagwadaktsagwada egdze a emmeḡa Isuwa, á kata ja shifa á ḡa ba ḡekideki.

<sup>43</sup> Kina wá, eccena ka názena yá ndaka ya: Tsetse, ezlzlala á ḡa egdze-aaruwa á dem mba á egdze a emmerwa Laban am Harran.

<sup>44</sup> Naba njanaanja ire á ḡa am mba-aara dem sarte na má ekhyakhya ervaunḡe á egdze a emmeḡa.

<sup>45</sup> Sey má viyanáviya ba ḡekideki am ire-aara názena ka maganta ka na, lauktu watse yá belakva we geni sawa a sa. Labara yá puwem egdzara buwa am evege am hare palle?

### *Isiyaaku a belanse erva ge Yakubu á dem mba á emnde a emmeḡara*

<sup>46</sup> A ba Raibaika á elvan ge Isiyaaku: Mága á shawle-aha-aaruwa, egdzara á Haiti-aha na wá, jiseje gwaygway am ire ba ḡekideki. Máki Yakubu keni gaaga zlaḡe adaliye ba egdze á Haiti-aha nanna seke náza á Isuwa na wá, náza-aaruwa watse baaka daliila a nja an shifa nanna mazle-aara.

## 28

<sup>1</sup> Am iga á una nanna maa, Isiyaaku a ḡante Yakubu, a gar barka, a ba nane á elvan ge nane: Ya nda ba ka: Geka mukse á ḡa am egdzara á emnde a Kanaana na ḡekideki.

<sup>2</sup> Ekka wá, tsetse ezlzlala á dem mba á emnde á emmeḡa am Padda-Aram, á dem mba eggyeḡa Baitu' iila. De eksanteksa gyaale am dagave á egdzara á Laban, egdze a emmeḡara ge emmeḡa.

<sup>3</sup> A gagga Dadaamiya Slekse barka-aara, a gagvege ura kwakya jeba-aara, a huyakaahuya Dadaamiya, a gagvege eggyetare ge emnde a jeba gergere kwakya.

<sup>4</sup> A vakteva Dadaamiya ge ekka, antara ge egdzara á ḡa am iga á ḡa, barka na ni ndza a vante ge Ibrahiima na, geni haha nanna náwa ka wayve am huḡe-aara na wá, á demde am rezege á ḡa. Aḡaba vanteva Dadaamiya ge Ibrahiima zlauzle.

<sup>5</sup> A danse estuwa Isiyaaku Yakubu-aara á dem Padda-Aram, a de nja am mba á Laban egdze á Baitu' iila ura Arama. Laban nanna keni maa, egdze a emmeḡara ge Raibaika emmetare ge tara Isuwa antara Yakubu nanna.

### *A sawa estuwa lauktu Isuwa a ge mukse umele*

<sup>6</sup> Cenancena Isuwa ganakini eddetare Isiyaaku a gar barka zlaḡe adaliye ge Yakubu, a belananse erva á dem Padda-Aram, geni á de gá gyaale áhuwa. Am sarte na aḡkwa á gar barka eddetare, a ba nane á elvan ge nane: Geka mukse am egdzara á emnde a Kanaana na ḡekideki.

<sup>7</sup> Diyaadiya ba nane keni geni Yakubu a magateraa ba fesarfire ge tara eddeḡara an emmeḡara, zlazlala á dem Padda-Aram nanna.

<sup>8</sup> Isuwa keni a naba diyeddiye ganakini yanaaya ervaunḡe á eddetare geni tá gá ḡwasha-aha-aatare am egdzara á emnde a Kanaana nanna.

<sup>9</sup> A naba njante ga mukse umele maa, a de ndava egdze a Ismayiila, egdze á Ibrahiima. Zhara á gyaale nanna Makalat, egdze a emmeḡara mukse ge Naibauyaut. A naba gehe, a se belar ge ḡwasha-aha-aara am mba.

### *A maranse estuwa Dadaamiya ire-aara ge Yakubu am Baytila*

<sup>10</sup> Tsetse Yakubu am Birsaba, a dem Harran.

<sup>11</sup> De garga vayiya am tate umele, a naba hare am tate nanna. A eksante nakwa a belete ire atekwa, a naba zlava.

<sup>12</sup> Darde ba seke shene wá, á zhara ba nǎlá yaike, sladfde jipu ire-aara shanaasha samaya, malika-aha á Dadaamiya tá ankwá á dala, tá tsekwa an nǎla nanna.

<sup>13</sup> A tsaahé ge Yaakadada átekwa, ate ire-aare, a ba nane á elvan ge nane: Ba iya una ya Yaakadada, Dadaamiya á eggyeja Ibrahiima ya Dadaamiya á Isiyaaku. Yá ndaaka ba iya una: Haha nanna kwaye ká zlava átekwa na wá, vanakteva ge ekka, antara ge egdzara á nǎ am iga á nǎ bademme.

<sup>14</sup> Egdzara á nǎ tá de gev kwakya jipu ba seke berbere á haha. Sledf-aatare keni watse an nakweka. Tsante am gedí dem yala, tsante am manem dem puti, bademme. Jeba-aha á emnde bademme ate haha tá de sha barka ázerwa adaba ka, antara adaba egdzara á nǎ.

<sup>15</sup> Eccena ba shagera: Yá ankwá ba iya an ire-aaruwa antara ka, yá ankwá á tsufaktsufa ma ká deme keni. Sey yá sakasa zlafe adaliye á sem haha na, yá yakaaka d'ekid'eki sey yá ganvege nǎzena ya ndaka ya na.

<sup>16</sup> Tsetse Yakubu am hare, a ba nane: Baaka shaige-aara, ankwá Saksage am tate na, diyanseka ba iya.

<sup>17</sup> Gazlaagazla wá, a ba nane: Kay! Tate na wá, baaka shage átekwa d'ekid'eki ankwá há á Dadaamiya áhuna. Walkame á samaya-aha áhuna degey!

<sup>18</sup> Ankwá á wera ekse wá, a tsetehe ge Yakubu an enlya werre, a eksetaa nǎkwa na a fante ge ire-aara na, a dzebehe ndedfde una nanna nǎkwa á yiha Dadaamiya, a puwar waye ate ire-aara, a ganve nǎkwa cudfedfde.

<sup>19</sup> A fete zhera á tate nanna Baytila. Amá werre wá, zhera á ekse nanna ndza Luus.

<sup>20</sup> Yakubu a tsakanse nǎzu am ervaunfde-aara ge Dadaamiya, a ba nane: Máki ká ankwá ka Dadaamiya antara ya, tsufakitetsufa am shula-aaruwa, máki shanánsha nǎzu yá ezza antara nǎzu yá eshsha yá atsekwa,

<sup>21</sup> máki danaada lapiya á dem mba á edderwa, daaci ká de gev Dadaamiya-aaruwa.

<sup>22</sup> Nǎkwa nanna nǎwa ya tsanaa iya ndedfde ge yiha Dadaamiya na wá, á gevge bere á nǎ ka Dadaamiya. Yá de vakte luser am nǎzena ká de vita ka bademme.

## 29

### *A daa estuwa Yakubu á dem mba á Laban*

<sup>1</sup> Daaci Yakubu a fanu ge baráma-aara zlafe adaliye, ankwá a zlala á dem larde á emnde a gedí.

<sup>2</sup> Vacite umele maa, a naa suwa am kaamba. Walde-aha á kyawe-aha antara náwe-aha gergere keye tá ankwá zlava ate we á suwa nanna. Adaba tate á fateru yawe ge dabba-aha-aatare una nanna. Suwa nanna keni an hedá we-aara an nǎkwa yaike.

<sup>3</sup> Má jarammeje walde-aha badfeme maa, lauktu tá berhanvuwe nǎkwa na ge we á suwa, tá fateru yawe ge dabba-aha-aatare badfeme. Má zlaruzle ta eptsaa nǎkwa na zlafe adaliya á sete we á suwa.

<sup>4</sup> Yakubu a naba ndavateruhe, a ba nane á elvan ge itare: Kwa emnde a ekse-ara kure egdzara mama-aha-aaruwa? Ta nwanante, a ba itare: Nǎ emnde a ekse á Harran.

<sup>5</sup> A ba nane á elvan ge itare: Diyakurdiya Laban á Nakaur emtu? A ba itare: Diyanerdiya.

<sup>6</sup> A ba ɲane á elvan ge itare: Awára ɲane? A ba itare: Ba layye. Bayra kwaye Rahiilu-aara keni anƙwa á sawa an kyawe-aha, egdzere mukse na kwaye ɲane na.

<sup>7</sup> A ba Yakubu á elvan ge itare: Kwaye kapteke vaciya ba ɲгаа, sarte na sarte á jaha dabba-aha á dem tate palle ka maa, fawaterufe yawe, dawaterda á de piya.

<sup>8</sup> Ta eptsanaa jawapa, a ba itare: A gevka sey má jarammeje dabba-aha baɗeme lauktu ɲá wera yawe, ɲá faterufe.

<sup>9</sup> ɲane keni zlaɓe á ndaha ba elva antara suni-aha na, Rahiilu keni samsa antara kyawe-aha á eddeɲara, aɗaba ɲane slepiya.

<sup>10</sup> Yakubu a zharaa Rahiilu egdze á daslareɲara Laban, a duhe á dete we á suwa na, a berhanvuwe náƙwa ge we á suwa, a fateru yawe ge kyawe-aha á Laban egdze a emmeɲara ge emmeɲara.

<sup>11</sup> Am iga á ɲanna maa, á de gan use ge Rahiilu. Takwalle a de takwalaá egdze na wá, anƙwa á kyuwa á ba an yawe á kyuwa.

<sup>12</sup> Daaci a palanaa varire-aatare antara eddeɲara ge Rahiilu na geni ɲane egdze á Raibaika. Zhagade á dá ge Rahiilu, a danaa labare ge eddeɲara.

<sup>13</sup> De cenancena labare á Yakubu egdze á egdze a emmeɲara mukse, zhagade ge ɲane keni a de yainuye. De jarje ire, tákwalle a de ɲaɲaa Yakubu na, a danaahe á dem mba-aara. Daaci ɲane keni a de balananse názena ni a shaa ɲane na baɗemme ge daslarnara.

<sup>14</sup> A ba Laban á elvan ge ɲane: Baaka shaige am una ɗekideki ka wulfe á ɲere ba paráƙke. Yakubu a magaa tere kalkale am mba Laban.

### *Yakubu a magana slera ge Laban ge sheba tara Lee' a an Rahiilu*

<sup>15</sup> Daaci a ba Laban á elvan ge Yakubu: Aɗaba ka egdze a kwate-aaruwa ni ká magiyá slera á dey wá, una á gevka. Naba ndindaha názena ká katana ka ge mbera á ɲa ire na.

<sup>16</sup> Laban maa, tá anƙwa egdzara-aara buwa, egdzara ɲwasha. Una male na zhera-aara Lee' a, sledɗaba-aara, zhera-aara Rahiilu.

<sup>17</sup> Lee' a, ɲane á náƙka ice shagera. Amá Rahiilu wá, garlaka, zariya zlaɓe adaliye.

<sup>18</sup> Daaci Yakubu a wayete ɲane, a ba ɲane á elvan ge Laban: Yá magaka slera yawe vuye aɗaba Rahiilu \*egdze á ɲa ge buwire na.

<sup>19</sup> Ane, a ba Laban, naba njaminja yá de vakteva. Ya keni ya hayaa ba una ɲanna arge una yá vante ge ura jeba umele.

<sup>20</sup> Yawe vuye kalkale Yakubu anƙwa á maganá slera ge Laban aɗaba Rahiilu, amá ɲane a zharán ba seke hare cekwaangudí aɗaba wayetewa jipu an Rahiilu.

<sup>21</sup> Am iga á una ɲanna maa, a ba Yakubu á elvan ge Laban: Yá kata mukse-aaruwa mazle-aara, aɗaba daada ate sarte na mi enndaha na ge magaka slera. Yá kata ɲana erva ge mukse-aaruwa.

<sup>22</sup> Daaci Laban a naba magaa muɲri á nika, a jemaa emnde a ekse baɗemme.

<sup>23</sup> Magaamaga mangaripu ba ɲгаа wá, Laban a naba eksante Lee' a, a de jatermehe an Yakubu. ɲane a naba ɲanaa erva, ta hare kerɗe.

<sup>24</sup> Laban a eksetaa Jilpa kwatena-aara ge ɲane, a vante ge Lee' a, a gev kwate-aara.

<sup>25</sup> Werawera ekse wá, Yakubu á zhar ba Lee' a ta hare kerɗe. A ba ɲane á elvan ge Laban: Labara ka magiya zlerma na? Abi ya magakaa slera aɗaba Rahiilu? Labara ka magite jeba una?

<sup>26</sup> A nwanante ge Laban, a ba nane á elvan ge Yakubu: Shagerka am ekse á n̄ere danse kudere zun̄n̄we á dem mba á zhele arge male.

<sup>27</sup> Naba zlan̄aazle ka hare make na antara nane lauktu yá vakte sledfaba-aara na keni. Amá wá, ká magiyá slera yawe vuye zlafe adaliye adaba nane.

<sup>28</sup> Ane, a ba Yakubu, ta magaa make palle antara Lee'a, Laban a naba vante Rahiilu zlafe adaliye.

<sup>29</sup> Laban a eksetaa kwatena-aara Bilha, a vante ge egdze-aara Rahiilu a gev kwatena-aara.

<sup>30</sup> Yakubu a nanaa erva ge Rahiilu keni, a ganve mukse-aara. Welawa ba Rahiilu ázen̄ara arge Lee'a. A naba demhe zlafe adaliye am slera á Laban, yawe vuye an̄kwa á emmága.

### *Nawa egdzara á Yakubu*

<sup>31</sup> Am nanna Yaakadada ganakini Lee'a gevge mukse keliya, a naba vante yá ge nane, amá Rahiilu wá, a ganve dzire.

<sup>32</sup> Lee'a a shaa huđe, a ya egdzere zhele, a fete zhera-aara Ruubain. Adaba a ba nane: Yaakadada nanna palasa-aaruwa, kina wá watse á wayiwaya zhele mazle-aara.

<sup>33</sup> A shaa huđe umele zlafe adaliye, a ya egdzere zhele adaliye. A ba nane: Cenáncena Saksage keliyire-aaruwa ba jire. Adaba una nanna a vite egdzere zhele umele. A fete zhere á egdze nanna Simaun.

<sup>34</sup> A shaa huđe umele zlafe adaliye, a ya ba una nanna. A ba nane: Kina wá, á de deska ba essaba keni am dagave á n̄ere antara zhele-aaruwa, adaba ya yayan dawale-aha keye kalkale. Adaba una nanna a fete zhere á egdze nanna Laiwi.

<sup>35</sup> A shaa huđe umele zlafe adaliye, a yese ba egdzere zhele nanna. A ba nane: Kina wá, sey yá gala Dadaamiya Saksage. Adaba una nanna, a fete zhera á egdze nanna Yahuuda. Mazle-aara a naba yaa ya egdzere.

## 30

<sup>1</sup> Nanna Rahiila geni nane yaneka egdzara ge Yakubu, a naba tsante shelha á dete egdze a emmen̄ara. A ba nane á elvan ge Yakubu: Sey ká viteve egdzara ge iya keni, má baaka una wá, yá njeka an shifa.

<sup>2</sup> Tsetse ervaun̄de á Yakubu á dete Rahiilu, a ba nane á elvan ge nane : Iya ya Dadaamiya na a piyakte yá egdzere na emtu ?

<sup>3</sup> A ba Rahiilu á elvan ge Yakubu : Nawa kwatena-aaruwa Bilha, naba njawinja antara nane tara zhele an mukse, a yiya nane egdzara ate ugje-aaruwa, iya keni yá shansha egdzara ate nane.

<sup>4</sup> A nabe vante kwatena-aara Bilha ge Yakubu, nane a naba ganve i mukse, ta hare kerde.

<sup>5</sup> Bilha a shaa huđe, a yan egdzere zhele ge Yakubu.

<sup>6</sup> A ba Rahiilu : Yawwa, jirivejire Dadaamiya, cena-cena Dadaamiya nala-aaruwa, adaba una nanna a vite egdzere zhele. Adaba una nanna a fete zhera á egdze nanna Dan.

<sup>7</sup> Bilha kwatena á Rahiilu a shaa huđe umele, a yan egdzere zhele adaliye ge Yakubu, egdzere ge buwire.

<sup>8</sup> A ba Rahiilu : Kwakya wava na ya maganaa ya á dete egdze a emmerwa á katafke á Dadaamiye, kwaye nane ganega ndzedá. A fete zhera a egdzere Naftalim.

<sup>9</sup> A ezhzhara Lee'a á shanka huđe mazle-aara á yeka maa, a eksante kwatena-aara Jilpa, a vante ge Yakubu geni a ganve mukse-aara.



<sup>10</sup> Jilpa kwatena a Lee'a, a yan egdzere zhele ge Yakubu.

<sup>11</sup> A ba Lee'a : Kay! Ya slerezeye. A fete zhera á egdze ṅanna Gada.

<sup>12</sup> Jilpa kwatena á Lee'a, a yan egdzere ge buwire ge Yakubu.

<sup>13</sup> A ba Lee'a : Una wá, barka-aaruwa. Baɗemme a ṅwasha tá de biyanba geni shanansha barka áza Dadaamiya. A fete zhere-aara Asair.

<sup>14</sup> Am slakslakire, sarte á ica hiya, Rubain a dem kaamba, a sanaa egdzara á nafa ge emmenara Lee'a. A ba Rahiilu á elvan ge Lee'a : Tasle á ṅa, viteva seke egdzara á nafa na a sakanaa egdze á ṅa na ?

<sup>15</sup> A ṅwanante ge Lee'a, a ba ṅane : Hyaaka ba una ka lyevaa zhele-aaruwa na, ká kata lyiya egdzara á nafa á egdze-aaruwa zlaɓe adaliye? Shagera, a ba Rahiilu : Máki estuwa wá, a de hare zhele ázeṅa vatena aɗaba egdzara á nafa à egdze á ṅa.

<sup>16</sup> An icavaciya aṅkwa á sa Yakubu am kaamba wá, a de yenu á ba an ye Lee'a, a ba ṅane á elvan ge ṅane : Vatena wá, ká se hare ázerwa, ya shekweve an egdzara á nafa á egdze-aaruwa. Daaci Yakubu a de hare ázeṅara vacite ṅanna, tara zhele an mukse.

<sup>17</sup> Dadaamiya lyavaalya yeka á Lee'a, a naba shaa huɗe, a yan egdzere zhele ge ilyebire ge Yakubu.

<sup>18</sup> A ba Lee'a : Pelisepele Dadaamiya, aɗaba ya naba eksante kwatena-aaruwa, ya vante ge zhele-aaruwa, a ganve mukse-aara na. A fete zhera á egdze ṅanna Issaker.

<sup>19</sup> Lee'a a shaa huɗe umele zlaɓe adaliye, a yan egdzere zhele ge uṅkwahire ge Yakubu.

<sup>20</sup> A ba Lee'a : Dadaamiya a magiyaa shagerire yaikke. Kina wá, zhele-aaruwa de nja antara ya aɗaba ya yan egdzara zaala uṅkwahe kalkale na. A fete zhera á egdze ṅanna Jabulaun.

<sup>21</sup> Am iga à una ṅanna, a yehe zlaɓe adaliye egdzere palle, une ṅanna wá, egdzere mukse, a fete zhera-aara Dina.

<sup>22</sup> Daaci Dadaamiya a yehamme Rahiilu, lyavaalya yeka-aara, a naba vante yá.

<sup>23</sup> Rahiilu a shaa huɗe, a ya egdzere zhele, a ba ṅane : Yawwa! Lyivarlye Dadaamiya-aaruwa dzaka á emnde na.

<sup>24</sup> A fete zhera á egdze ṅanna Yusufu. A ba ṅane zlaɓe adaliye : Tasle á ga Yaakadada-aaruwa, umele keni viteva ba estuwa.

### *Tá zlerma tara Laban an Yakubu am dagave-aatare*

<sup>25</sup> Yaaya Rahiilu, a ya Yusufu wá, a ba Yakubu á elvan ge Laban : Kina wá, ḅeliyaɓela yá eptsa á dem ekse-aaruwa, á dem larde-aaruwa.

<sup>26</sup> Viteva ṅwasha-aha-aaruwa, antara egdzara-aha-aaruwa na ya magaa slera aɗaba itare na, yá dá á dem ekse-aaruwa. Aɗaba ba ka keni diyakdiya slera na ya magakanaa ya baɗemme.

<sup>27</sup> A ṅwanante ge Laban, a ba ṅane : Ba estuwa, amá tasle á ṅa zivarze. Aɗaba ya de naha wá, ta biyaa barka na ya shanaa ya áza Dadaamiya na wá, ya shanaa aɗaba ka.

<sup>28</sup> Naba tsanaatse ka nazena ni ká kataná ka ge mbera á ṅa na, yá emmága baɗemme.

<sup>29</sup> A ba Yakubu a elvan ge ṅane : Diyakdiya slera na ya magakanaa ya baɗemme. Ma nja dabba-aha á ṅa na ya se beyanaa ya am erva á ṅa, antara dabba-aha á ṅa kina keni diyakdiya baɗemme ma ?

<sup>30</sup> Abi yá sawa ya á sem mba á ṅa dabb-aha á ṅa ndza ba cekwaanɗuɗi ? Ba sanemsa ya á sem huɗe á há ṅa, farfe dabba-aha á ṅa jipu Yaakadada



garge barka. Kwaye kina baaka zlakte-aara. Watse yá magá vaatara kena naza ire-aaruwa?

<sup>31</sup> A ba Laban: Ekka wá, ndindaha ka ba nazena ká kata yá biyaka yá na baaka lambe á ña. Ká kata yá biyaka wányara?

A ba Yakubu : Kaà biyika ba uwe keni ðekðeki. Amaà ankwá naàzu yaà ndakndaha : Maàki eksakarekse una ñanna waà, yaà duwa zlafe aà de piya dabbahaña, yaà fateru hyema ba seke werre.

<sup>32</sup> Vatena yaà dedde am dagave aà waldahaña peraatte, ba kelaa kyawe na ni ugjaara viyauviyawe jili gergere seke ubele antara ugje indale ira kyawe danñwe, bademme yaà elle aà segashe. Am nawaha keni ba estuwa, nawe na ni ugjaara ugje ubela antara ugje indale, bademme yaà elle aà segashe, mberaarua una ñanna ge iya.

<sup>33</sup> Daaci kaà se zhara jiriraaruwa maàkuralla, ma watse kaà se zhara mberaarua. Ba maàki ka se berenaa am naàzahaaruwa ni gafka viyawe, gafka ugje indale, gafka danñwe waà, ma kyawe, ma nawe keni ya ba nayle.

<sup>34</sup> A ba Laban: Una waà, shagera, magamimaàga aà ba ate una ñanna.

<sup>35</sup> Amaà ba vacite ñanna, Laban a fantau ge ellaara usalaha antarañ jifa na ni ugjaara an mayaha ba seke gwambara antara viyauviyawe. Am mama aà nawaha keni ba estuwa, a dzerse viyauviyawe antara una ñguraslasle seke ubela antara jili na an usha an dzayye ira kyawe na danñwe gyegweniyye na. A dzerse jiliyaha ñanna bademme maa, a naba puwateremhe am erva ge egdzaraara.

<sup>36</sup> Daaci a naba tegaa dagavaatare deydey shula aà vaha keye. Yakubu waà, ñane ankwá aà piya ba jugena aà waldaha aà Laban.

<sup>37</sup> Daaci duwa aà Yakubu, a naba ðatsevaa ervaha aà nafa anwasla gergere keye, nafaha ñanna keni gergere keye. A faya iga ate nafaha na, tate na ni an faya na gevge dzayye telle, an mayaha nafaha bademme.

<sup>38</sup> Daaci a naba puwem nafaha na am kyaale. Taà ankwá a ezhzhara dabbaha maà taà se sha yawe. Adaba sarte a ðala ate ñwashaha keni ba una ñanna ge dabbaha.

<sup>39</sup> Ba taà ðala ñwashahaatare dabbaha na aà katafke aà nafaha na waà, ta naba fantau ge ya egdzere jili gergere, umele seke ba gwambara, umele ñgweraslasle seke ubela, umele keni mbazlaukmbazlaukkwe.

<sup>40</sup> Yakubu a naba dzerse dabbaha na an mayaha antara una danñwe na bademme am dabbaha aà Laban, a puwateraa an iraara. Yakubu a maganaa estuwa waldaha ge iraara, maslaaka una ñanna antara naàza aà Laban.

<sup>41</sup> Ba kelaa maà taà ankwá ðala dabbaha na taà an ñasla na ate ñwashaha waà, Yakubu aà puwaterem nafahaara ñanna am kyaale, daaci taà ezhzhara dabbaha na.

<sup>42</sup> Ama maà taà ankwá ðala gampaha ate ñwashaha waà, aà manka una ñanna. A ganve estuwa Yakubu dabbaha na taà an ñasla na bademme taà aatuge ñane, amaà gampaha waà, taà aatuge Laban.

<sup>43</sup> A gevaa estuwa Yakubu sleberba an tsaka ire. Kyawaha antara nawahaara gevge kwakya jipu. An navaha antara kwatenaha kwakya, ezlegwamaha antara ezzenwahaara keni baaka zlaktaara.

## 31

*Yakubu ankwá aà zhagade aà dem lardaara*

<sup>1</sup> Yaw, cenancena Yakubu elva na taà anjwa aà tsakana egdzara aà Laban ate nane. Adaba ta bantsa itare: Yakubu zauze nalmane aà eddenjere bademme, berbiraara na, bademme a ganaa aà ba an nalmane aà eddenjere.

<sup>2</sup> Yakubu aà zhara elva nanna waà, Laban aà fanuka hyema seke werre.

<sup>3</sup> Daaci a ba Yaakadada aà elvan ge Yakubu: Naba eptseptsa aà dem lardaana, aà dem tate na ni ta yakaa aàtekwa na, iya yaà anjwa antara ka.

<sup>4</sup> Yakubu a naba belaterve we ge njwashahaara, tara Rahiilu an Lee'a, geni a sarsawa aà sezenaara am kaamba, am taàte na aàtekwa an waldahaara.

<sup>5</sup> Saremsa, a ba nane aà elvan ge itare: Yaà anjwa aà ezhzhara kina na waà, eddekure aà fiyuka hyema seke werre. Amaà duksa palle waà, Dadaamiya na ni anjwa aà d'abana edderwa na anjwa antara ya.

<sup>6</sup> Abi ba kure keni diyakurdiya slera na ya magannaa ya ge eddekure? Ya maganaa slera an ndzedaarua bademme.

<sup>7</sup> Amaà eddekure a naba magiyaa zlerma an tsaka ire. Ser kelaawa anjwa fatsiyaa naàza zlayaarua. Amaà Dadaamiya waà, velaaka barama geni aà shisha kelaadire nanna.

<sup>8</sup> Ndasendahe ba nane, a ba nane: Ba kelaa dabba na ngweraslasle na aàtu ge ekka, naàza zlayaana una nanna, bademme aà dabbaha ta fantau ge yaà ngweraslasle. Maà banba nane ba kelaa dabba na an mayaha naàzaana, bademme aà dabbaha taà yaà egdzere an mayaha.

<sup>9</sup> A sananse ba Dadaamiya dabbaha am erva ge eddekure, a vite ge iya.

<sup>10</sup> Vacite umele ya naba shaa shene, naàwa naàzu ya nanaa ya am shenaarua: Am sarte a saa dabbaha, taà anjwa jarammeje aàtirpalle waà, usalaha antara zhel kyawaha taà anjwa d'ala njwashaha waà, bademme ba jili gergere. Umelahaara an maya, emnde umele keni taà ngweraslaslaha, umelahaatare keni taà danjwe ba gyeguniye.

<sup>11</sup> A naba d'afaha malika aà Dadaamiya am shena nanna : Yakubu! Ya nutehe : A ba iya na'am.

<sup>12</sup> A ba nane : Kanteka icaana, ezhzhara, kaà anjwa nanna emtu usalaha antara zhel kyawaha ta anjwa d'ala njwasha bademe jili gergere, umele an mayaha, umele ngweraslasle, umele keni danjwe na? Una nanna bademme na waà, adaba ya nanna naàzu na a magakta Laban.

<sup>13</sup> Ba iya una ya Dadaamiya ya marakaa iraarua am Baytila, tate na ka tsaa naàkwa, ka ganve waye ate iraara, ka tsakse naàzu am ervaund'ana aà katafkaarua na. Kina waà, tsetse ezlala am larde na, eptseptse aà dem lardaana, aà dem tate na ta yakaa aàtekwa na.

<sup>14</sup> Daaci ta nwanante ge tara Rahiilu antara Lee'a, a ba itare taà elvan ge nane: njere waà, baaka dzaanjere am nalmane aà eddenjere, na baaka am emnde a za warataara keni.

<sup>15</sup> Eddenjere aà zharanjer na ba seke wayvaha am hufe aà haara mazlaara, a valanjerwa ba nane an ervaara, zauze nalmane am njere bademme.

<sup>16</sup> Nalmane na ni a sansaa ba Dadaamiya an ervaara am erva aà eddenjere waà, naàzaanjere una nanna antara egdzaraanjere. Ekka waà, emmaàga ba naàzena ni a ndaaka Dadaamiya na bademme.

### *Anjwa aà zhagada Yakubu aàtu ge Laban*

<sup>17</sup> Daaci yalla, a ba Yakubu, anjwa aà maga niya a zlala, a puwete egdzaraara antara njwashahaara ate iga a ezlegwamaha.

<sup>18</sup> A jemaa waldahaara bademme antara kazlaŋaara umele na a ganaa am Paddan Aram ŋanna bademme, aŋkwa aà eptsaa dem larde aà Kanaana, aàdeza eddeŋaara Isiyaaku.

<sup>19</sup> Am sarte ŋanna maa, Laban baaka am mba, a de ica ugje ate kyawahaara. Daaci Rahiilu a naba ilu helaha aà eddeŋaara, a zlalehe an ŋane.

<sup>20</sup> A magannaa estuwa Yakubu baakire aà jirire ge Laban, adaba mbedanuka dekiŋdeki a naba zlala.

<sup>21</sup> A halese kazlaŋaara bademme, a naba zhagade, a de ebzu guwa yaikke, daaci ba zlalaara aà dem huŋe aà wa Giliyat.

<sup>22</sup> Hare keye kalkale lauktu ni aà cenancena Laban ganakini baaka zhagadaazhagade Yakubu.

<sup>23</sup> ŋane keni a naba jemaa egdzar mamahaŋaara, daaci ta daa aà daba Yakubu na. Haraatare vuye kalkale lauktu ni de sharnaasha am huŋe aà wa a Gile`at.

<sup>24</sup> Amaa an vayiya vacite ŋanna waà, Dadaamiya a naba maranaa iraara ge Laban am shene. Laban ŋanna waà, zhel Arama. A ba Dadaamiya aà elvan ge ŋane: Effa hyema ate iraaŋa, belanemka dekiŋdeki ge Yakubu, ma shagerire, ma shagerkire keni.

<sup>25</sup> Laban a de beye Yakubu maganaamaga beraara an kacakaca am huŋe aà wa Giliyat, ŋane keni a magaa naaatare antara egdzar mamahaŋaara aà ba ate ire aà wa Gile`at ŋanna.

<sup>26</sup> Daaci Laban a ndavanuhe ge Yakubu, a ba ŋane aà elvan ge ŋane: Labara ka magiya baakire aà jirire na? Kaà zhagade an egdzaraaruwa ba seke ka sluwatervaa an ndzedaaŋa am wava!

<sup>27</sup> Labara kaà zlala an ila ndakika dekiŋdeki na? Kina ma andze ka ndindaha waà, aabi ma andze ŋaà puwakse an gaŋka antara gadzavera antara lahe am ekte ge ekka, ma ŋaà puwakse an higa yaikke.

<sup>28</sup> Kina ba ge magatera ajamimashifa ge egdzaraaruwa antara eggyahaaruwa keni piyakitepiya na waà, shagera emtu? Ekka waà, baaka henkalaŋa.

<sup>29</sup> Yaà dzegwaàndzegwa magakura kelaadire. Amaa an vayiya ba vatena na a naba mariya iraara Dadaamiya aà eddeŋa, a ba ŋane: Effa hyema ate iraaŋa, maganaanka ba uwe keni ge Yakubu.

<sup>30</sup> Duksa palle waà, diyandiya geni baaka iraaŋa am kataykatay na mazlaara, zlalakzlala aà dem mba aà eddeŋa. Ama labara zlaŋe ka ilu helahaaruwa?

<sup>31</sup> A ŋwanante ge Yakubu, a ba ŋane: Iya ya kurken watse kaà halivuwe egdzaraaŋa. Adaba una ŋanna jija lyawa jipu.

<sup>32</sup> Elva aà helahaŋa maa, maaki shakaansa aàza emndaaruwa waà, eddaara a njeka an shifa dekiŋdeki. Kwaye kazlaŋa, naba eppakya aà katafke aà emnde bademme. Yakubu diyaaka geni a iluwa Rahiilu helaha na.

<sup>33</sup> Laban a naba demhe am bere aà Yakubu, a demhe am bere aà Lee`a, a demde am bere aà kwatenaha buwa na, a pakyaa kazlaŋaatare bademme, amaà shanka dekiŋdeki. Am iga aà una ŋanna maa, a demhe am bere aà Rahiilu keni.

<sup>34</sup> A halantaa ba Rahiilu ŋanna tsa helaha na amaà Laban a pakyaa beraara, shanka dekiŋdeki, adaba a puweme am serde aà ezlegwamaara, a naba njetaa aatekwa.

<sup>35</sup> A ba Rahiilu aà elvan ge eddeŋaara: Taslaaŋa a jaŋka ervaunŋe eddayaaruwa yaà tsa tseteka aakatafkaŋa, adaba aŋkwa aà hyiya lyuwa

bara ervaanjere njwasha. baaka tatu zharemka Laban ice à dem hudaara, amaà shanka helahaara na.

<sup>36</sup> Jaaja ervaunje an tsaka ire Yakubu, a naba fantau ge dagala an Laban, a ba njane à elvan ge njane: Azara haypaaruwa? Ya gaku haypara kaà d'abid'aba estuwa na?

<sup>37</sup> Kina ka pakyaa kazlanaaruwa bademme na ka beya emtu duksaana ba palle keni am hudaara? Maàki shakansha waà, shebeka d'ekid'eki. Kwaye emndaana, naàwa emndaaruwa keni, taà kyaminaàkya shairiya ge miya ma buwa na.

<sup>38</sup> Kina waà, aàbi magamaga yawe kulbuwa kalkale yaà am mbaana. Ma nawaana, ma kyawaana keni puwanaaka egdzere ser palle. Ser palle keni zanuka zhel kyawaana dey d'ekid'eki.

<sup>39</sup> Dete ba una a cebana naàza kaambaha na, ya sakanaasa emtu? aàbi nasaraaruwa ba ge iya? Antara ba una a iluwa nayle, una ma ta iluwa an vaciya, ma ta iluwa an vayiya keni bademe ka fiyar ba ge iya sey yaà eppela.

<sup>40</sup> Nja àà kara àà vaciya na, àà pesha ba iya ya vaha deppe aàtekwa. An vayiya keni yaà haàre àà ba ate lailaidire. Haàre, ate icaruwa baaka d'ekid'eki, ma taà paànaà estara emnde hare keni diyanka ya.

<sup>41</sup> Kina waà, yawe kulbuwa kalkale ya magaa slera am mbaana. Yawe kelaawa jufadaara waà, ya magakaa slera ge sheba egdzaraana buwa. Yawe un'kwahe waà, ya magakaa slera àà dabba. Ama ekka ser kelaawa kaà an'kwa àà fatsiya mberaaruwa.

<sup>42</sup> Ma andze baaka Dadaamiya àà eggyerwa Ibrahiima antara iya, Dadaamiya na ni àà ukkuva edderwa Isiyaaku jipu na, aàbi kina ma andze ngyakisengye am mbaana àà ba an erva dey. Amaà Dadaamiya nanna palasaaruwa antara zladaruwa am slera na bademme, daaci a se dema njane am dagavaamiya àà waya.

### *Mela am dagave àà tara Yakubu an Laban*

<sup>43</sup> A njwete ge Laban, a ba njane àà elvan ge Yakubu: Ay waà, aàbi egdzar njwasha na egdzaraaruwa ba ge iya, egdzaraatare na keni eggyahaaruwa ba ge iya, dete ba dabbaha na antara naàzena kaà an'kwa àà zharana ka bademme na aàbi bademme ba naàzaaruwa? An'kwa naàzu yaà dzegwana ya magaterte ge egdzaraaruwa antara eggyahaaruwa emtu?

<sup>44</sup> Ekka waà, ngwed'amingwed'a namaana am dagavaamiya. njere na buwa na waà, baaka dagalaanjere a cenarancena emnde seydiraanjere.

<sup>45</sup> Yakubu a naba eksante naàkwa a dzebehe am tate njanna nded'ede, una njanna gevge nakwa àà yeha Dadaamiya.

<sup>46</sup> Am igaara, a ba njane àà elvan ge emnde aara: Halawaarhala nakwaha umele. Emndaara ta naba halar nakwaha umele teremme. Daaci ta njehe ate nakwaha njanna, ta zuhe atekwa.

<sup>47</sup> Laban a feta zhera àà tate njanna: Yaigar Sahaduta, amaana : Dikele àà seydire. Yakubu keni a fete zhera àà Galait.

<sup>48</sup> A ba Laban : Vatena waà, dikele àà nakwaha na naàwa njane naà waà, gevge seydire am dagavaamiya, iya antara ka. Adaba una njanna taà d'aha tate na an Galait.

<sup>49</sup> Ta naba fete zhera àà tate njanna zlafe adaliye: Mispa. Amaana: Tate àà ufa. Adaba a ba Laban: Miya antara ka waà, ma kyamikya aàhuna keni sey ba Yaakadada una a de gevge sle ufa dagavaamiya.

<sup>50</sup> Maàki ka de fa zladfa ate egdzaraaruwa, ma ka de gaterar njwasha umele keni diyeddiye geni sledagavaamiya ba Dadaamiya an iraara, urimagweka.

<sup>51</sup> A ba Laban zlafe adaliye a elvan ge Yakubu: Ezhzhara ba dikele àà nakwaha na antara nakwa àà yeha Dadaamiya na naàwa njane an dzeba na.

<sup>52</sup> Dikele a nakwaha na antara nakwa àà yeha na an dzebe na, bukerde gevge seyda am dagavaamiya antara ka. Iya keni yaà ebzeka naàkwaha na àà dem dalbaana ge magakte kelaadire, ekka keni kaà ebzeka naàkwaha na àà sem dalbaaruwa dekiideki.

<sup>53</sup> Miya antara ka waà, a`aa àà hyephye ba Dadaamiya a tara Ibrahiima antara Nakaur am dagavaamiya. Mazlaara Yakubu a naba zanu wada an Dadaamiya na a kuvanaa eddenaara Isiyaaku jipu na.

<sup>54</sup> Am iga àà una njanna maa, a magaa sadaka ate ire àà wa njanna, a naba detaa sleriyahaara ta zu dafa àà sadake na. Zaruze maa, ta naba hare ate ire àà wa njanna.

## 32

### *Yakubu anjwa àà maga niya a de ja ire an Isuwa*

<sup>1</sup> Makurallaara a tsetehe ge Laban an enlyawabere, a magatera ààjamimashifa ge egdzaraara antara eggyahaanaara, a gaterar barka. Am iga àà una njanna, a naba eksetaa baramaara, a eptsa àà sem eksaara.

<sup>2</sup> Daaci Yakubu keni a naba fanu ge baramaara, ta de ja ire antara malikaha àà Dadaamiya taà sezenaara.

<sup>3</sup> A puwete ice ate itare waà, a ba njane: Kay! tate na waà, slede a je ire antara Dadaamiya atekwa! Daaci a fete zhere àà tate njanna Makanayim.

<sup>4</sup> Am iga àà una njanna maa, Yakubu a bele emnde a bela aàkatafkaara, aàdeza egdze a emmenaara Isuwa am kwara àà Se`ir am haha àà Aidaum.

<sup>5</sup> Lauktu àà belaterbela, a ba njane àà elvan ge itare: Naàwa naàzu kwa de ndahan ge Isuwa: A ba slesleraanja Yakubu waà, ndza ya am mba àà Laban. Bademme a shekwashewaarua àà shula na ya njaa a ba am mbaara.

<sup>6</sup> Ganega rezege kwakya, yaà an slaha antara ezzenwaha antara kyawaha antara naàwaha, yaà an naàvaha antara kwatenaha. Yaà anjwa àà bela emnde a belaarua aàdekatafkaana na edda waà, geni taà de balakse labare, kaà lyiyiya àà ba an higa.

<sup>7</sup> Eptsareptsa emnde a bela na aàseza Yakubu, a ba itare taà elvan ge njane: Sanjerasa aàsawa aàza egdze a emmena Isuwa, njane keni anjwa àà sawa an emndaara àà sezena, anjwa àà sawa an zaala dermeke ufade.

<sup>8</sup> Daaci jaaja lyawa Yakubu waà, gazlaagazla ba jipu na. A naba tegese emndaara, kyawahaara, naàwahaara, slahaara, ezlegwamahaara, gergere buwa. Daaci, emnde na keni taà maga shula an iraatare, emnde na keni taà anjwa àà maga shula an iraatare.

<sup>9</sup> Adaba a ba sawariyaara: Maàki Isuwa daterarde ge emnde na zlaterazle, taà de jauje emnde na.

<sup>10</sup> Am iga àà una njanna maa, Yakubu a magaa maduwa, a ba njane am maduwaara: Yaakadada, Dadaamiya àà eggyerwa Ibrahiima, Dadaamiya àà edderwa Isiyaaku, ka binaa ba ka eptseptsa àà dem lardaana, àà dem tate na ni ta yakaa aàtekwa na, iya yaà anjwa antara ka.

<sup>11</sup> Hyanepka ba naàzara keni geni yaà shansha bademme, shagerire na ni ka beshiyaa ka an ervaunjaana palle na. Adaba slesleraanja a segashe, a ebzu guwa àà Urdun waà, ba zadaara palle am erva, baaka duksa umele.



Ama kina waà, kwaye nane nà an tega gergere buwa, ma emndara keni taà maga shula an iraatare.

<sup>12</sup> Taslaana Yaakadadaaruwa, lyilya ba ka aatuge egdze a emmerwa Isuwa. Adaba jija lyawa jipu aatuge nane, geni a se cebanjerka bademme antara nwashaha antara egdzara.

<sup>13</sup> Adaba ndza keni ka binaa ba ka an iraanja, a ba ka: Yaà anjwa antara ka ma vaatara keni. Ya yaakteya watse baaka kezlakula aà egdzaraanja, taà de gev ba seke shili na am guwa na.

<sup>14</sup> Daaci Yakubu a hare aà ba am tate nanna. Am bademme a naàzena anjwa am rezegaara maa, a naba dzerse una ni watse aà vante ge Isuwa egdze a emmenjaara na.

<sup>15</sup> A dzerse mama aà nawaha dermeke buwa antara njifaha kulbuwa, mamaha aà kyawaha dermeke buwa antara zhel kyawe kulbawa,

<sup>16</sup> ezlegwamaha kul ufade, taà an egdzara zlaaba adaliye am ekte taà sha uba, mama aà slaha kul ufade antara kawaha kelaawa, uàmaha aà ezzenja kulbuwa ira bidalaha kelaawa.

<sup>17</sup> Daaci a naba vaterte doksaha nanna ge emnde a sleraara, ma waraatare keni an walde aà duksa palle. A ba nane aà elvan ge itare: Naba zlalauzlala kure aà katafkaarua, watse yaà dabakura aà katalliya. Amaà waà, zlalauka atirpalle, ma walde a uwe keni aà ba an iraaara.

<sup>18</sup> A ba nane aà elvan ge slesleraara na ni zunjwe nane na: Maàki kwa ja ire antara egdze a emmerwa Isuwa waà, maàki a ndavakundave ware eddaanja? kaà deme? aàza ware walde na? maàki a ndavaku ndavaha nanna waà,

<sup>19</sup> naba ndanndaha: Nazaà aà slesleranja Yakubu, a ba nane dawananda ge zanwaaruwa Isuwa. Ba nane an iraaara keni anjwa aà sawa am iga.

<sup>20</sup> Ga buwiraatare keni a banaa ba una nanna, ge keyiraatare keni ba estuwa. Bademme a emnde na ta daa waldaha na a vaterte ba elva palle. A ba nane aà elvan ge itare: Kwaà de bana ba una kure ge zanwaaruwa Isuwa, maà de jakurja ire.

<sup>21</sup> Naba ndawanndaha a ba kure : Ba Yakubu an iraaara keni anjwa aà sawa aàkataliya. Yakubu nane, a ba nane am ervaunjaara: Yaà ekhyanakhya ervaunje ge Isuwa an kazlana nanna ta danse aà katafkaarua na waà, daaci watse aà lyiyiya aà ba an higa.

<sup>22</sup> Daaci ta naba danse kazlana zunjwe aà katafkaara, ama nane waà, vacite nanna zlaaba a hare aà ba am tate nanna.

### *Yakubu anjwa aà slakala an eddawni diyaaka*

<sup>23</sup> An vayiya waà, a tsetehe ge Yakubu, a tsaterte nwashahaara buwa, kwatenahaatare buwa antara egdzaara kelaawa jumtekwe, a naba ebzu guwa aà Yabauk an itare aà dehuwara.

<sup>24</sup> Am iga aà una nanna a naba se jema naàzu am rezegaara bademme, a ebzu guwa an nane.

<sup>25</sup> Yakubu a juwaa ba nane mazlaara. A naba semhe ge ura umele, ta hare pacaa a slakala, a kyateraare adaga.

<sup>26</sup> Nanna eddaara aà danuka ge Yakubu an slakala maa, a naba tafanu ja ge Yakubu ate egdanazlaara, a gurdese am egdanazla palle.

<sup>27</sup> A ba nane aà elvan ge Yakubu : beliyabela anjwa aà wera ekse. A ba Yakubu : Yaà belakaaka dekideki sey maà gagiyarge barka.

<sup>28</sup> A ba nane aà elvan ge Yakubu : Ware zheraanja? A nwanante, a ba nane : Yakubu.



<sup>29</sup> A ba nane à elvan ge Yakubu: Mazlaara waà taà d'ehan̄ka an Yakubu, zharaan̄a Iserayiila, adaba ka slakala an Dadaamiya, ka slakala an emndimagwaha bademme, ka ganaa ba ka ndzed̄a.

<sup>30</sup> A ndavanuhe ge Yakubu, a ba nane : Ndindaha kwa zharaan̄a keni? A eptsana jawapa, a ba nane: Labara kaà ndava zharaan̄a? Am iga a una nanna a gar barka ge Yakubu.

<sup>31</sup> A ba Yakubu : Ya naa Dadaamiya an icaaruwa parakke degey! Aley yaà à ba an shifa! Adaba una nanna, a fete zhera à tate nanna Paniyail. Amaana: Wafke à Dadaamiya.

<sup>32</sup> Sesse vaciya am haha waà, Yakubu keni yanseye Paniyail. An̄kwa à zlala waà, à tsagad̄a, adaba à wana egdan̄azlaara na.

<sup>33</sup> Adaba una nanna, sem ba kina kini Iserayiilaha ta zeka hyuwa à egdan̄azla, adaba Iserayiila a shaa ververe ate tate nanna shanaasha perda.

### 33

#### *Yakubu à de ja ire antara Isuwa*

<sup>1</sup> A kante ice Yakubu waà, à zhara ba an̄kwa à sawa Isuwa an emndaara, zaala dermeke ufad̄e na. A naba tegese egdzaraara gergere keye ate tara Lee`a antara Rahiilu ira kwatenaha buwa na.

<sup>2</sup> Kwatenaha na antara egdzaraatare waà, a puwetera à katafke, a dabatera Lee`a an egdzaraara, lauktu ta dabatera tara Rahiilu antara Yusufa à kataliyaatare.

<sup>3</sup> Amaà nane an iraara waà, à katafkaatare bademme. Ser vuye à kezla ugje am aha lauktu à daada à de katafke à egdze a emman̄aara na.

<sup>4</sup> Isuwa ba a puwete ice ate Yakubu waà, zhagade àdezejaara, takwalle a de n̄ema am uksuwe, daaci ma waraatare keni à vante ba kyuwa, taà kyuwa à ba an yawe à kyuwa.

<sup>5</sup> A kante icaara Isuwa waà, à zhara ba egdzara antara n̄washa. A ndavanu ge Yakubu: Emndara kena taà antara ka na? A eptsanaa jawapa, a ba nane: Egdzara na a vantaa Dadaamiya ge waladiyaana.

<sup>6</sup> Ta gapteha ge kwatenaha antara egdzaraatare, ta kezle ugje am aha.

<sup>7</sup> Lee`a keni a gaptehe, taà an egdzaraara, itare keni ta kezle ugje am aha. Am igaatare bademme, ta gaptehe ge tara Rahiilu an Yusufa, itare keni ta kezle ugje am aha.

<sup>8</sup> A ba Isuwa à elvan ge Yakubu: Kaà kata danme ka waldaha à duksa gergere na n̄a ja ire ate barama a sawa na? A n̄wanante, a ba nane: Ya belanaa àdeza zanwaaruwa geni a zivarze.

<sup>9</sup> A ba Isuwa: Naba nanaana ka egdze a emmerwa ani iya keni baaka zlake à nalmanaaruwa.

<sup>10</sup> A ba Yakubu : Estuweka d'ekideki. Maàki ba zakivarze waà, taslaana lyevalya kazlana na am ervaaruwa. Adaba yaà an̄kwa à zharakzhara ate wafkaana waà, seke ba ka Dadaamiya, lyakivalya an ervaun̄daana palle.

<sup>11</sup> Naba lyevalya kazlana na taslaana, a vaktaa ba ervaun̄daaruwa. baaka lambaaruwa ate nalmane, adaba Dadaamiya giyarge barka am duksa bademme. Yakubu an̄kwa à magana tasle jipu ge Isuwa ganakini sey ba à lyevalya, daaci a naba lyevahe.

<sup>12</sup> Am iga à una nanna maa, a ba Isuwa: Magaumaga niya mindalawa. Iya waà , yaà dakurda àkatafke.

<sup>13</sup> Amaà a ba Yakubu aà elvan ge ñane : Ambarkaana, ba ka keni diyakdiya zlazlafa jipu tsufa egdzara. Iyau nawaha antara kyawaha antara slaha na taà an egdzara am ekte na keni sey a yaà datera an enjkale. Ba maàki yaà datera an ndzedfa waà, una ba vaha palle taà ruwa.

<sup>14</sup> Ekka waà, naba ezlala aà katafke aambarkaana, anjwa aà daakfaba waladiyaana aà kataliya. Iya waà, yaà zlala an enjkale deydey aà zlala aà dabbaha na taà aà katafkaarua na antara egdzara na taà aàzerwa na, watse yaà de shakasha am Se`ir.

<sup>15</sup> A ba Isuwa : Aley keni sey yaà yaterya emndaaruwa umele aàzena kwaà zlala kerde. A nwanante ge Yakubu, a ba ñane: Labara? Iya ba maàki zakivarze lyakivalya waà, hyahya ba una ñanna ge iya.

<sup>16</sup> Ba vacite ñanna, Isuwa a eptsehe aà sem Se`ir, a saa aà dfaba ba baramaara zlafe adaliye.

<sup>17</sup> Amaà Yakubu waà, tsaara am tate ñanna waà, kwaye a zlala aà dem Sukaut. Daaduwa aahuwa, a de ndere bere, a magateraa beraha ge dabbahaara keni. Adaba una ñanna a fete zhere aà tate ñanna Sukaut. Amaana: Beraha.

<sup>18</sup> Eptsapta Yakubu aà sawa am Padan Aram, a tsekwe ba lapilayye am Sikaim am kwara aà Kanaana. Daaci a magaa haara ate iga aà ekse.

<sup>19</sup> A naba shekweve egdze a sledaara am erva aà emnde aà Hamaur, eddawni ni a tsekwe zuñwe am Sikain ñanna. A shekweve slede ñanna an gursa dermeke, daaci a maga beraha aàtekwa an kacakaca.

<sup>20</sup> Am iga aà una ñanna maa, a ndere tate a fanaa sadake atekwa ge Dadaamiya am tate ñanna, a fete zhara: Dadaamiya Saksage waà, Dadaamiya aà Iserayiila.

## 34

### *Ta fem Dina am zherwe, pelarsepele egdzar mamahaana*

<sup>1</sup> Vacite umele, Dina aà Yakubu, egdzere mukse a yanaa an Lee`a, a de zhara ukfahaana egdzar ñwasha na taà am ekse ñanna.

<sup>2</sup> De nanna Sikaim egdze aà Hamaur, slekse keni ba ñane, a naba eksevahe ge egdze ñanna a ba an ndzedfa, a dana aà ba aà dem bere, a de badzanve, a fem egdzena am zherwe.

<sup>3</sup> Amaà waà, wayetewaye jipu an Dina egdze aà Yakubu na baaka buwaara. Adaba una ñanna baaka nazu magaaka geni aà ekhyannakhya ervaunde ge gyaale.

<sup>4</sup> A ba ñane aà elvan ge eddenaara: Sey kaà giga gyaale ñanna.

<sup>5</sup> Cenancena Yakubu ganakini faremfa egdzaara Dina am zherwe, amaà a dfu ba waara ndahaaka elva. Adaba egdzaraara egdzar zaala ta baaka am mba, taà anjwa aà piya am kaamba, sey maà saraasa.

<sup>6</sup> Daaci a naba sawhe ge Hamaur eddarge Sikaim ñanna aàseza Yakubu eddarge Dina ganakini aà ndaha elva antara ñane.

<sup>7</sup> Am sarte ñanna maa, egdzara aà Yakubu egdzar zaala na keni saraasa am piya na. Ba ta cenaa lamare na waà, jaterja emtanjire ma waraatare keni ba seke aà segashe shifa am ñane. Adaba Sikaim maganaamaga naazu zlayeka dfekideki, a naba eksevaa egdze aà Yakubu a ganve mukse. Jeba una ñanna aà magaaveka am Iserayiila dfekideki.

<sup>8</sup> A ba Hamaur aà elvan ge itare : Egdzaaruwa wayatewaye an egdzaakure baaka buwaara. Taslawaaakure vawanteva a gegga.

<sup>9</sup> Naba gawamiyevge shawlaha. Vawanjerteva egdzaraakure ña gaterga ge egdzaraanere, ñaà vakurte egdzara ñere kwaà gater ge egdzaraakure.

<sup>10</sup> Naba njawaminji. Ba sledge na kwa katana kure na nya icakuru ba tate njanna. Kwaà tsakalaakure, kwaà sheta nalmane kwakya.

<sup>11</sup> A sawhe ge Sikaim an iraara, a ba nane aà elvan ge eddarge gyaale antara egdzar mamahañara ge gyaale: A maideheka ervaunñaakure dekideki naba yawiyarye, ba nazena kwa fiyare a kure na, yaà emmaga bademme.

<sup>12</sup> Magauka shaige dekideki, naba belawiyarbele. Ma kwa ndava wanyara naàza shebe keni antara una baaka am shebe ba dey na, yaà emmaga bademme maà ba kwaà viteva kure muksaarua.

<sup>13</sup> Egdzara aà Yakubu ta njwaterante ge tara Sikaim an eddenaara an nama ate we adaba ta fem egdze a emmetare Dina am zherwe na.

<sup>14</sup> A ba itare taà elvan ge itare : nere nya tsa vanteka nere egdze a emmenere ge zhel na belaaka am shedkwe na, adaba nya de geva an epsawa jipu.

<sup>15-16</sup> Daaci nya tsa maganaaka ate una kwaà katana kure na, sey maà gakurevge estuwa waà, nya vakurteve egdzaraanere kwaà naba gaterga, nere keni nya naba ga egdzaraakure taà gev njwashahaanere, mi naba njaamiya aatirpalle debiye, mi gev ba jeba palle.

<sup>17</sup> Amaà maà eksakurarka elvaanere na waà, nere nya tedesetede egdze a emmenere, nya zlalaanere.

<sup>18</sup> Elva njanna lyavaalya ervaunña aà tara Hamaur antara egdzaara Sikaim.

<sup>19</sup> Dawale njanna de paaka hare an elva njanna dekideki, adaba wayaawaya jipu an gyaale egdze aà Yakubu na. Am hude aà haà aà eddenaara keni nane an daradza jipu.

<sup>20</sup> Daaci tara Hamaur an egdzaara Sikaim ta naba dem jahava aà eksaatare ate we aà walkame an elva na. A ba itare taà elvan ge zlamakelaawa :

<sup>21</sup> Emnde na waà, aà duwa elvaamiya, naba yawaterya a njarinja am lardaamiya, a magarmaga tsakalaatare. Sledge an kwa aà hyamiyarhye. Mi naba ga egdzaraatare mi gaterve njwashahaamiya, mi vaterteva egdzaraamiya ge itare keni, taà naba gaterga.

<sup>22</sup> Amaà, lauktu taà eksar gev palle antara miya, mi gev ba jeba palle antara itare na waà, sey maàki aàze miya keni zaala bademme taà demda am shedekwe ba seke itare.

<sup>23</sup> Maàki eksamiyarekse abi bademme a waldahaatare antara dabahaatare umele ira kazlañatare umele bademme na aà de gev ba naàzaamiya? Naba eksawamiyarekse, a sarsawa mi se njaamiya aatirpalle.

<sup>24</sup> Daaci bademme a emnde na taà an kwa am jahava njanna ate we aà walkame na eksararekse elva aà tara Hamaur an egdzaara na, zaala bademe darenda am shedekwe.

<sup>25</sup> Am hare ge keyire am iga a dem shedekwaatare waà, zaala bademme taà aà zlava adaba zladaara. Daaci duwa aà egdzara aà Yakubu buwa, tara Simaun antara Laiwi egdzar mamahañara ge Dina, ta naba halem katsarkar am erva, ta daterarhe an naàza erva, ta cebaa zaala bademme.

<sup>26</sup> Tara Hamaur an egdzaara Sikaim keni taà an ceba bukerde. Am iga aà una njanna ta tedese egdze a emmetare am mba aà Sikaim ba ezlalaatare.

<sup>27</sup> Ta naba sawhe zlafe adaliye ge egdzara aà Yakubu umele maa, ta naba daterarhe ge emnde na taà am emtsa na, ta zu ekse bademme adaba zherwe na ta fem egdze a emmetare am hudaara.

<sup>28</sup> Kyawaha, eslslaha, ezzenwaha antara kazlaŋa umele am huŋe àà ekse antara ba una zlaŋe am fe, bademme halarsehale.

<sup>29</sup> Dete ba emndimagwaha, egdzara mesheshe antara ŋwasha ira kazlaŋa na am berahaatare, halarsehale rezege àà ekse ŋanna bademme, zlarzlala an ŋane.

<sup>30</sup> A ba Yakubu àà elvan ge egdzaraara, tara Simaun antara Laiwi : Kwaye fakurimfa am dzama ire yaike. Adaba tsakurantetse ervaunŋe a emnde a haha na bademme aàsete ya. Amaana: Emnde a Kanaana antara Pairisiyaha. Naàwa watse itare taà de jemaa yaatare, taà se gweyargwe, emndaaruwa keni taà cekwa vayvaya. Kay! una waà, àà de juka haaruwa ŋekideki.

<sup>31</sup> Ta ŋwanante ge tara Simaun an Laiwi, a ba itare: Egdze a emmenjere ba ge ŋere taà ganve seke mukse zaware waà, zlauzle ba baaka elvan emtu?

## 35

### *Dadaamiya a gar barka ge Yakubu am Baytila*

<sup>1</sup> Daaci a ba Dadaamiya àà elvan ge Yakubu: Tsetstse aàhuna, ezlzlala àà dem Baytila, de njanaanja iraaŋa aàhuwa. De nderinndera tate àà fiya sadake ge iya ya Dadaamiya na ya marakaa iraruwa, am sarte na ka zhagade aàtuge egdza a emmenja Isuwa na.

<sup>2</sup> Daaci a ba Yakubu àà elvan ge emndaara bademme, emnde na taà am huŋe àà haara antara emnde na taà aàzenaara bademme: Sawansese helaha àà emnde a jeba umele na am dagavaakure, barawaabara irakure cufedŋe, mbadawaambada kazlaŋa keni ba tsefanŋesefanŋe.

<sup>3</sup> Magaumimaga niya watse mi maga shula àà dem Baytila, yaà de nderana tate àà fana sadeke aàtekwa ge Dadaamiya aàhuwa. Dadaamiya na ni a meliwa am sarte a zlada, anŋkwa antara ya ma yaà deme keni bademme na.

<sup>4</sup> Daaci ta naba janme helaha àà emnde a jeba ŋanna ndza anŋkwa am ervaatare na bademme antara naàza hyemahaatare, ta naba vante ge Yakubu, ŋane a naba heŋfante ge ekte àà nafa umele am Sikaim, nafa ŋanna yaikke jipu.

<sup>5</sup> Mazlaara ba tsaatare am tate ŋanna, ta naba kezla. Duwa àà Dadaamiya maa, a naba faterem lyawa yaikke am vuwa ge emnde a eksaha àà haha ŋanna bademme, baaka ura a dateraa wava ge egdzara àà Yakubu an eddetare ŋekideki.

<sup>6-7</sup> Daaci a daa estuwa Yakubu antara emnde na taà aàzenaara bademme àà dem Lairuz am haha àà Kanaana, Baytila ŋaara ba tate ŋanna. A de nderan tate àà fana sadake aàtekwa ge Dadaamiya, a fete zhera àà tate ŋanna: Dadaamiya àà Baytila. Adaba Dadaamiya a maranaa irara am tate ŋanna am sarte àà zhagadaara aàtuge egdze a emmenjaara Isuwa.

<sup>8</sup> Cekwaanŋudi waà, emtsamtsa Daibaura slefanu uba ge Raibaika. Ta heŋfanaa àà dem ahaara ge Baytila ŋanna, am ekte àà nafa umele anŋkwa, nafa ŋanna an ndzedŋa jipu. Ta fete zhera àà nafa ŋanna: Nafa àà kyuwa ura.

<sup>9</sup> Am sarte na saasa Yakubu am Paddan Aram, Dadaamiya a naba maranaa irara, a gar barka.

<sup>10</sup> A ba Dadaamiya àà elvan ge ŋane: Kina waà, zheraanja Yakubu, amaà àà salikataliya na waà, taà de ŋahaka an Yakubu ka mazlaara, zheraanja Iserayiila. Daaci Dadaamiya a fete zheraara Iserayiila.

<sup>11</sup> A ba Dadaamiya à elvan ge ñane zlaɓe adaliye: Ba iya una ya Dadaamiya, hakuma bademme à ba am erwaarua. Gevge eddarge nalgaha kwakya, vanakteva ya. Egdzaraanja taà de ya lardaha gergere, sleksaha gergere kwakya taà de segashe am emndaanja.

<sup>12</sup> Haha na ndza ya vante ge Ibrahiima antara Isiyaaku na waà, yaà vakte ge ekka antara egdzaraanja am igaanja, à de gev ba hahaatare.

<sup>13</sup> Am iga una ñanna, a zlalehe ge Dadaamiya, a yaa Yakubu am tate ñanna a ndahan elva na.

<sup>14</sup> Yakubu a naba dzeɓaa nakwa à yeha Dadaamiya am tate ñanna, a kete egdze a mbazla aàtekwa sadakaara ge Dadaamiya, a kete antara egdze a waye ate nakwa ñanna.

<sup>15</sup> Daaci Yakubu a fete zhera à tate ñanna Baytila.

### *Yaà Bainjamain an emtsa à Rahiilu*

<sup>16</sup> Ta naba tse zlaɓe adaliye, ta kezla am Baytila. Itare keni a yaterar ba cekwaanjudi sharanaasha ekse à Aifrata, tsekwanfetsekwe hude à yaà ge Rahiilu, a naba ye egdzere zhele, amaà a yaa am palasa.

<sup>17</sup> Am Rahiilu a yaà am zladfa jipu, a ba mukse na ankwaa a eyya na à elvan ge ñane: A wanja lyawa, shakansha egdzere zhele adaliye.

<sup>18</sup> Amaà a yaa ba cekwaanjudi à kata emtsa Rahiilu. Adaba ndza a kata segashe shifa am ñane, a fete zhera à egdze ñanna Bain Auni, amaana: Egdze a palasaaruwa. Amaà eddarge egdzere waà, a fete zhera a Bainjamain, amaana: Egdze a nadafa.

<sup>19-20</sup> Emtsamtsa Rahiilu, ta hedfehe ate barama à Aifrata. Ba tate ñanna una taà dahana an Baytilaama kina. Yakubu a naba dzeɓaa nakwa à dzama Rahiilu ate irekhyaara. Sem vatena keni zlaɓe ankwaa nakwa à dzama Rahiilu ñanna.

<sup>21</sup> Iserayiila a naba tse aàhuwa, kwaye a de magaa berahaara an kacakaca am iga à bere sladfe na taà dahana an Migdal Aidair na.

### *Egdzara à Yakubu kelaawa ju buwa*

<sup>22</sup> Am sarte na taà am larde ñanna maa, Rubain a naba katu Bilha palle à ñwashaha à eddenaara, cenancena eddenaara.

Yakubu, ñane ndza an egdzara kelaawa ju buwa egdzar zaala.

<sup>23</sup> Egdzara à Lee`a tara Rubain, ñane egdzere zunjwire, an Simaun an Laiwi an Yahuuda an Isakar ira Jabulaun.

<sup>24</sup> Egdzara à Rahiilu, tara Yusufa taà an Bainjamain.

<sup>25</sup> Egdzara à Bilha kwatena à Rahiilu, tara Dan taà an Naiftalim.

<sup>26</sup> Egdzara à Jilpa kwatena à Lee`a, tara Gada taà an Asair. Kwaye ñane egdzara à Yakubu a yayanaa am Paddan Aram.

### *Emtsà à Isiyaaku*

<sup>27</sup> Daada Yakubu aàtevege eddenaara Isiyaaku am Mamre, am Kiriya Arba. Kina waà, Haiburun zhera à tate ñanna, tate na ni ta nja aàtekwa tara Ibrahiima antara Isiyaaku.

<sup>28</sup> Iva à Isiyaaku a magaa dermeke an kul tise am sarte na à emtsa.

<sup>29</sup> Ndza gevge emgyegwe a zhele kurcumme, a jesaa an je am iraara nja an shifa. A daahe à deza eggyahaara am faya. Ta hedfana ba egdzaraara, tara Isuwa antara Yakubu.

## 36

### *Labare à Isuwa an eggyahaara*



<sup>1</sup> Naàwa una waà, labare àà kergema àà emnde àà Isuwa. Aidaum keni ba ñane.

<sup>2</sup> Isuwa a ge ñwashahaara, bademme ba egdzara àà emnde a Kanaana. Naàwa ñwashahaara ñanna: Ada egdze àà Hailaun, ñane ura Haiti; Auhaulibama egdze àà Ana a Jibaiyaun, ñane keni ura Haiwi,

<sup>3</sup> antara Basmat egdze àà Isma`ilu, egdze a emmeñaara ge Naibayaut.

<sup>4</sup> Ada a yan Ailifas ge Isuwa. Basmat a yan Raiwail.

<sup>5</sup> Auhaulibama, ñane keni a yan Yai`us antara Ya`alaam ira Kaura. Kwaye ñane egdzara àà Isuwa na a yayateraa am haha àà Kanaana.

<sup>6</sup> Isuwa a naba kezla atevege egdze a emmeñaara, Yakubu, kwaye a zlala àà dem haha umele yiyiye jipu an ñane. A naba kezla an ñwashahaara, egdzaraara, emnde na taà am huđe àà haara antara dabbahaara ira naàzena am rezegaara a ganaa am haha àà Kanaana bademme.

<sup>7</sup> Kezla àà Isuwa aàtevege Yakubu na waà, adaba kwakya nalmanaatare, kaamba cekwa ge tate àà piya waldahaatare. Dzegwaranka nja am tate palle, adaba taà an waldaha kwakya jipu.

<sup>8</sup> Daaci Isuwa kwaye a de njaara am huđe àà wa àà Se`ir. Isuwa na waà, ba Aidaum.

<sup>9</sup> Nawa emnde na waà, wulfaha àà Isuwa, eggyetare ge Aidaumiyaha, am huđe àà wa a Se`ir.

<sup>10</sup> Nawaà zhera àà egdzara àà Isuwa, egdzar zaala: Ailifas, egdze àà Ada, Raiwail egdze àà Basmat.

<sup>11</sup> Naàwa emnde na keni egdzara àà Ailifas: Tara Taiman, an Aumar, an Jaifau, an Gatam ira Kainas.

<sup>12</sup> Ankwa zlađe Timna, ñane keni ba mukse àà Ailifas a eksanta aàkataliya, ñane keni a yan Amalaik. Kwaye ñane eggyahañaara ge Isuwa, egdzara àà egdzara àà muksaara Ada.

<sup>13</sup> Nawa emnde na keni egdzara àà Raiwail: tara Nakat, an Sairak, an Samma ira Misa. Kwaye ñane eggyahañaara umele ge Isuwa, egdzara àà egdze a muksaara Basmat.

<sup>14</sup> Auhaulibama egdze a Ana, eggyeñaara ge Jibaiyaun keni maa, a yayan tara Ye`us, an Ya`alaam ira Kaura ge Isuwa.

<sup>15</sup> Nawa sleksaha àà emnde àà Isuwa: Sleksu Taiman, an Aumar, an Saifau, an Kainas,

<sup>16</sup> an Kaura, an Gatam ira Amalaik. Kwaye ñane sleksaha àà Ailifas am haha àà Aidaum. Ailifas ñanna waà, egdzere zunñwiraatare ge tara Isuwa antara muksaara Ada.

<sup>17</sup> Nawa emnde na keni eggyahaatare ge tara Isuwa an muksaara Basmat, egdzara àà egdzaatare Raiwail: Sleksu Nakat, an Sairak, an Samma ira Misa. Itare sleksaha àà emnde àà Raiwail am haha àà aidaum.

<sup>18</sup> Nawa eggyahaatare ge tara Isuwa antara muksaara Auhaulibama: Tara sleksu Ye`us, an Ya`alaam ira Kaura. Itare keni ndza ta sleksaha àà emnde àà Auhaulibama, zhera a mukse àà Isuwa egdze àà Ana.

<sup>19</sup> Itare bademme na, ta ba wulfaha àà Isuwa ndza ta sleksaha àà emnde a hahaatare am Aidaum. Aidaum na keni ba zhera àà Isuwa ñanna.

<sup>20</sup> Naàwa egdzara àà Se`ir eggyetare ge Hauriyaha emnde a nja am haha ñanna zunñwe: Lautan, Saubal, Jibaiyaun, Ana,

<sup>21</sup> Disaun, Aijair ira Disan. Kwaye ñane sleksaha àà hauriyaha emnde a Se`ir am haha àà Aidaum.

<sup>22</sup> Naàwa egdzara àà Lautan keni : tara Hauri antara Hemam. Ankwa egdze a emmeñaara mukse ge Lautan ñanna keni, zheraara Timna.



<sup>23</sup> Nawa emnde na keni egdzara à Saubal: Aluwam, Manakat, Aibal, Saifau ira Aunam.

<sup>24</sup> Naàwa egdzara à Jibaiyaun: Tara Aya an Ana. Ba Ana na ndza a shaa yawaha an mbera am kaamba am sarte na a piya ezzenwaha à eddenaara na.

<sup>25</sup> Naàwa emnde na waà, egdzara à Ana: Disaun nane egdzere zhele, taà an Auhaulibama nane waà, egdzere mukse.

<sup>26</sup> Nawa emnde na keni egdzara à Disaun: Tara Haindan, an Aisban, an Yaituran ira Kairan.

<sup>27</sup> Naàwa una keni egdzere à Aijair: Bilhan, Ja`awan ira Akan.

<sup>28</sup> Naàwa emnde na keni egdzara à Disan: Us, an Aaran.

<sup>29</sup> Naàwa sleksaha à Hauriyaha: Lautan, Saubal, Jibauyaun, Ana,

<sup>30</sup> Disaun Aijair ira Disan. Kwaye nane sleksaha à Hauriyaha ate jebaha gergere am haha à Se`ir.

### *Sleksaha à larde à Aidaum*

<sup>31</sup> Naàwa emnde na ni ndza ta sleksaha sadafde am haha à Aidaum, lauktu ta jesarje sleksaha am Iserayiila:

<sup>32</sup> Baila egdze à Bai`aur nane ndza slekse à Aidaum. Zhera à eksaara Daimhaba.

<sup>33</sup> Emtsamtsa Baila maa, a demaa Yaubaba egdze à Sairak am sledaara. Yaubaba, nane ura ekse à Bausra.

<sup>34</sup> Emtsamtsa sleksu Yaubaba, a demaa Hausam am sledaara. Hausam nane ura larde à Taimani.

<sup>35</sup> Emtsamtsa Husam maa, Hadaadu egdze à Baidada a demaa am sledaara. Ba Hadaadu na ndza a ga ndzedfa arge emnde a Madiyan am larde à Mau`ab na. Zhera à eksaara Awit.

<sup>36</sup> Emtsamtsa Hadaadu, a demaa Samla ura ekse à Masraika am sledaara.

<sup>37</sup> Emtsamtsa Samla, a demaa Sawulu ura ekse à Raikaubaut ate we à haye am sleksire.

<sup>38</sup> Emtsamtsa Sawulu, a demaa Ba`al Hanan egdze à Akkaur am sledaara.

<sup>39</sup> De emtsamtsa Ba`al Hanan egdze à Akkaur, a demaa Hadar am sledaara. Zhera à eksaara ge nane keni Pa`u. Zhera à muksaara Maihaitabaiyail, egdze à Maitiraida, eggyenaara ge Maijahat.

<sup>40</sup> Naàwa una keni zheraha à emnde na ndza ta sleksaha am emnde à Isuwa, ma waraatare keni ndza slekse am jebaara, an kwaraara: Sleksu Timna, Aluwa, Yaitait,

<sup>41</sup> Auhaulibama, Aila, Pinaun,

<sup>42</sup> Kainas, Taiman, Mipsaara,

<sup>43</sup> Magdiyail ira Iram. Kwaye nane emnde na ndza ta sleksaha am Aidaum, ma waraatare keni ndza à ba an sledaara, à ba an kwaraara. Kwaye nane nja à emnde à Isuwa, eggyetare ba nane ge emnde à Aidaum.

## 37

### *Labara à Yusufu antara egdzara à mamahaara.*

<sup>1</sup> Daaci Yakubu njaanja am haha à Kanaana, am tate na ni ndza a nja àatekwa eddenaara na.

<sup>2</sup> Naàwa labare à egdzara à Yakubu nanna. Am sarte nanna maa, Yusufu magaamaga egdze à yawe kelaawa ju vuye. nane antara egdzara à eddenaara egdzara à Bilha antara egdzara à Jilpa nwashaha à eddenaara, taà anjka a piya nawaha antara kyawaha à eddetare. Mbate

Yusufa na waà, elva a mandzawe na taà anƙwa àà tsakana egdzara àà eddenaara am tate àà piya na waà, bademme àà se balananse ge eddenaara.

<sup>3</sup> Iserayiila keni a wayete ba Yusufa nanna kwakyaara am egdzaraara, adaba nane egdze a emgyegwiraara. Daaci a naba dzebana nanjyuwe na ni an daradza jipu naa.

<sup>4</sup> De diyareddiye egdzara mamahaɗaara geni nane shansha welawire ààza eddetare, ervaunɗaatare a naba yaa Yusufa na. Mele baaka ura àà bana elva emtake am dagavaatare mazlaara.

<sup>5</sup> Vacite umele maa, Yusufa a naba shaa shene, a ndahaterhe shenaara nanna ge egdzar mamahaɗaara na. Itare ta farhe zlaɓe adaliye ge yaa Yusufa na am ervaunɗaatare.

<sup>6</sup> Adaba nawa naàzu a baterna nane, a nanaa am shenaara. A ba nane àà elvan ge itare: Cenausena naàwa yaà ndakur shenaaruwa:

<sup>7</sup> Ma de ica hiya am fe waà, ma ngwadɗaa dabakwahaara waà, naàzaaruwa waà tsatsa ba darayye am dagave àà naàzahaakure, amaà naàzahaakure waà, ta jantaave ge nazaaruwa na, taà anƙwa àà kezlan ugje bademme.

<sup>8</sup> Ta ndavanuhe ge egdzara mamahaɗaara na, a ba itare taà elvan ge nane: Manaa watse kaà gev sleksaanjere kaà de maga sleksiraanɗa ate njere emtu? Gevge waà, ba zhara Yusufa keni wayarka mazlaara. Adaba shena antara elvaara na a ndaaterse na.

<sup>9</sup> Am iga àà una nanna zlaɓe adaliye, Yusufa a naba shaa shene umele, a naba ndaterhe ge egdzar mamahaɗaara nanna zlaɓe adaliye, a ba nane: Naàwa yaà anƙwa àà ndakur shenaaruwa ya shanaa ya: Am shenaaruwa waà, ta kezli ugje tara vaciya, tre antara terlyakwaha kelaawa jemtekwe.

<sup>10</sup> A naba ndaterhe parakke ge tara eddenaara keni antara egdzar mamahaɗaara. A valarhe ge eddenaara, a ba nane àà elvan ge nane: Shenara nane ka shanaa ka! Amaana watse njaà de kezlakek ugje, emmena, egdzar mamaha a nja antara ba iya an iraaruuwa njaà de kezlakek ugje ge ekka emtu?

<sup>11</sup> Egdzar mamahaɗaara bademme tsarantetse shelha a dete nane, amaà eddenaara waà, elva na seska am iraraa ɗekidɗeki.

### *Ta velu Yusufa àà dem Misera*

<sup>12</sup> Vacite umele maa, egdzar mamahaɗaara ge Yusufa ta de piya nawaha antara kyawaha àà eddetare am Sikaim.

<sup>13</sup> A ba eddetare àà elvan ge Yusufu : Abi egdzar mamaha a nja ta de piya am Sikaim, sawa nawa yaà belakbela àà dezetare. Ane, àà ba egdze na.

<sup>14</sup> Daaci a ba Yakubu àà elvan ge nane: Edduwa de zharinaazhara egdzar mamaha a nja antara dabbaha, taà a ba anƙwa he, kaà siya labare. A belanaa àà da am ɗambake àà Haiburun, àà dem Sikaim.

<sup>15</sup> Daaci Yusufa anƙwa àà ja ɗaba am kaamba àà Sikaim, de jarje ire antara ura umele, a ba eddaara àà elvan ge nane: Kaà tataya uwe ka?

<sup>16</sup> A ba Yusufa : Yaà anƙwa àà tataya egdzar mamahaaruwa taà anƙwa àà piya. Taslaanɗa ndindaha tate na taà aatekwa.

<sup>17</sup> Daaci a ba eddaara : Ta baaka aàhuna, zlarzlala. Adaba ya cenancena waà, ta bantsa itare: Mi zlalawa àà dem Dautan. Daaci zhagade ge Yusufa, anƙwa àà bakaterbaka, kwaye a de shaterte am Dautan.

<sup>18</sup> Kerten naranna itare ba zlafe yiye an itare emtsaade. Lauktu aà daada Yusufa aàzetare waà, ngwadarananngwada itare am dagavaatare geni sey taà kefanaakeda shifaara.

<sup>19</sup> A ba itare am dagavaatare: Kwaye ankwaa aà sawa edda aà shene na.

<sup>20</sup> Sawmbare gwaumiyargwe, jaumija shifaara, mi eblyanme am suwa, daaci mi de ba a zuwa naàza kaamba. Maà ezhzhara kwa maà watse aà gevge shenaara nanna.

<sup>21</sup> Cenatercena Ruubain maa, a naba magaa niya a njelese shifa aà Yusufa, a ba nane aà elvan ge itare: Jaumika shifaara.

<sup>22</sup> A farhe zlafe adaliye, a ba nane : Jaumika shifaara taslawaaakure. Arge una nanna waà, ambane eblyawanmeblye am suwa kwaye nane am kaamba aahuwa. Amaà shifaara waà, gejauka. Niyaara ge nane waà, geni aà fertanaaferta aatuge itare, a daada aà deza eddenaara.

<sup>23</sup> Ba demdaara ge Yusufa aà deza egdzar mamahaara nanna maa, ta naba eksevahe, ta tsekwanse am nangyuwaara na an daradza jipu na,

<sup>24</sup> ta eksante iraara, ta naba elbyanme am suwa. Amaà am suwa nanna waà, baaka yawe am hudaara welasewele ba dekideki.

<sup>25</sup> Daaci de njarinja am aha reppe ge za egdze a duksa. Estuwa ta kante ice waà, taà zhara ba emnde, ta vayye jipu, taà ankwaa aà sawa. Emnde nanna waà, emnde aà Isemayiila ta tsete am Gile at, taà maga shula aà dem Misera. Taà an naàzasaha gergere ate iga aà ezlegwamahaatare, taà dana aà dem Misera nanna. Umele yawyawaara, umele naavawe aà se emtake jipu, umele keni slalwe aà duksa aà se emtake keni.

<sup>26</sup> A ba Yahuuda aà elvan ge egdzar mamahaara : Maàki jamija kwa kina egdze a emmemiya ba ge miya, mi shebanve emtsaara waà, mi sha uwe miya am hudaara?

<sup>27</sup> Sawmbare mi velateruvele ge emnde aà Isemayiilu na. Gejaumika shifaara. Adaba ma estara keni ba egdze a emmemiya, vuwaamiya ba ge miya. Ta naba cenanvahe ge egdzar mamahaara.

<sup>28</sup> Taà ankwaa aà degashe emnde a tsakala, emnde a Madiyan maa, ta naba tefese Yusufa am suwa na, ta velateruhe ge emnde aà Isemayiilu nanna aà maga gursa kulbuwa. Daaci itare ta danhe Yusufa na aà dem larde a Misera.

<sup>29</sup> Eptsa aà Ruubain aà dem suwa na de beyeka Yusufa am hudaara. A naba tataa nangyuwaara ate vuwa,

<sup>30</sup> a eptsehe a deza egdzar mamahaara na, a ba nane aà elvan ge itare : Digiya baaka egdze na kina mu yaà magana estara ?

<sup>31</sup> Ta naba eksevaa usale, ta icantiye, ta hanme nangyuwe aà Yusufa am uzhaara.

<sup>32</sup> Daci ta naba bela ura an nane, aà saà, a sanan ge eddetare, a sanaa labare na, a ba elvaatare taà elvan ge eddetare: Naàwa naàzena na shanaa nere am kaamba. Zharanaazhara ba shagera mu, nangyuwe aà egdzaana emtu nane ka he ?

<sup>33</sup> Yakubu a naba disehe, a ba nane: Una nangyuwe aà egdzaaruwa, yaà! baaka egdze na zauze naàza kaamba. Dzaadzaadzae dabba a kaamba Yusufaaruwa.

<sup>34</sup> Daaci a naba dzadzaa nangyuwe ate vuwa, a tsekweme am emgywe a buhwaha, a fantau ge kyuwa egdzaara hare wanyarwanyara.

<sup>35</sup> Egdzaraara bademme, egdzar zaala antara egdzar njwasha taà ankwaa aà de gan use, amaà kwalekwale ba dekideki, aà ekhyeka ervaunfaara. A bantsaa nane: yaà de beya estuwa egdzaaruwa am faya keni, yaà yanka kyuwa dekideki. A fantauhe zlafe adaliye ge kyuwa egdzaara.

<sup>36</sup> Amaà Yusufa waà, de velaruvele emnde a Maadiyan am Misera. Ta de velanu ge Pautifar nakawa yaikke, eddawna ni fetarfe sleksu Firawna an nane, male aà sawjiyaha na taà ufa nane.

## 38

### *Labara aà tara Yahuuda an Tamar*

<sup>1</sup> Am sarte nanna maa, Yahuuda a naba yaa egdzar mamahaara waà, ba zlalaara aà dem Adulam, a de tsekwaam am mba a ura umele zharaara Hira.

<sup>2</sup> Yahuuda a naa gyaale ahuwa, zhara aà gyaale nanna Su`a, egdze aà emnde a Kanaana. Daaci a naba gehe a ganve muksaara.

<sup>3</sup> Mukse na a shaa huđe, a ye egdzere zhele. Yahuuda a fete zhara aà egdzere Air.

<sup>4</sup> A shaa huđe umele, a ye egdzere zhele adaliye, a fete zhara aà Aunan.

<sup>5</sup> A shaa huđe umele zlabe adaliye, a ye ba una nanna, a fete aà Saila. Amaà taà yaà Saila waà, Yahuuda am Kaijip.

<sup>6</sup> Yahuuda a eksanante gyaale ge Air, egdzere zunjwirraara. Zhara aà gyaale nanna Tamar.

<sup>7</sup> Amaà Air egdze aà Yahuuda nanna waà, slemandzawe jipu am ice aà Yaakadada. Adaba una nanna a kedanaahe ge Yaakadada.

<sup>8</sup> A ba Yahuuda aà elvan ge Aunan: Naba melsemele mukse aà maleja na ngwedangweda nika, fanefa wakiiya ge egdze a emmeja.

<sup>9</sup> Daaci diyaadiya Aunan geni maà shanansha egdzere waà, egdze nanna aà tsaa gevka egdzaara ge nane. Adaba una nanna, ba kelaa maà jarammeje antara mukse aà egdze a emmejaara nanna waà, maà aà sawa yawe aà vuwara waà, aà puwana aà ba aà dem haha. Adaba wayaaka fana wakiiya ge egdze a emmejaara na.

<sup>10</sup> Nazena a maganaa nane nanna keni maàndzawe jipu am ice aà Yaakadada, a jehe ge Yaakadada nane keni ba shifaara.

<sup>11</sup> A ba Yahuuda aà elvan ge shawlaara Tamar : Ezlzlala, de njinja am mba aà eddeja ba seke mukse wegyege dem sarte na maà Sailaaruwa gevge zhele. Ane, a ba Tamar, a naba de nja am mba aà eddejaara na. Mbate a banaa una nanna Yahuuda na waà, adaba aà ba sla aà iraara, a emtseka Saila keni seke egdzar mamahaara.

<sup>12</sup> Haraahare ba ngaa am iga a una nanna maa, a naba emtsehe ge egdze aà Su`a mukse aà Yahuuda. Am iga a mandzawe nanna, Yahuuda a dem Timna, ta zlala antara uraara Hira, ura Adulam, a deza emnde a datsa uàgje ate kyawahaara.

<sup>13</sup> Cenancena Tamar ganakini anjwa aà sawa shawlaara Yahuuda, aà dem Timna, aà de ica uàgje ate kyawahaara.

<sup>14</sup> A naba tsekwe am nangyuwe aà mukse na a kedaa zhelaara, a eksataa laafaya a puwerhe, a yan ba cekwaangwedfei wafkaara agashe a de njehe ate we aà walkame aà ekse aà Ainayim ate barama a dem Timna. Adaba a naa Saila waltewala amaà nane gevka muksaara, Saila gevge tsa zhele.

<sup>15</sup> De damda Yahuuda aàzejaara, nane a kurken ba mukse zaware adaba a yan ba cekwaangudi wafkaara a gashe.

<sup>16</sup> A naba cikante aà duhe aà dezejaara. A ba nane aà elvan ge nane: Wayanakwaya ge kaà hyiyanveyhe wederaaruwa. Diseka nane dekideki ganakini una nanna sawlaara. Ane, a ba Tamar, amaà kaà vite uwe?

<sup>17</sup> A eptsanaa jawapa, a ba nane aà elvan ge nane : Watse yaà bela ura aàsezeja an usale aà sawa am waldaaruwa. Shagera, aà ba Tamar, amaà

waà, sey kaà tsekwinaatsekwa dukse umele, dem sarte na maà samsa usale na.

<sup>18</sup> A ba Yahuuda aà elvan ge ñane: Kaà kata yaà tsekwaka uwe? A ba mukse na : Kaà tsekwia daàmshaana na zheraana an puwa atekwa na antara zawaana bademme ira zadaan na am erva na. Kwalaaka Yahuuda, a naba vante. Mazlaara a de hyananve wederaara, a naba shaa huđe mukse na an ñane.

<sup>19</sup> Mazlaara a tsetehe ge Tamar, ba ezlzlalaara, a de puwanve laafaya na, a tsekweme am nanjyuwe aà mukse mandzawe adaliye.

<sup>20</sup> Yahuuda a de bela usale na ate erva an uraara, ura Adulam na geni ñane aà sanan ge Tamar, aà lyanvalya kazlaana na a tsekwanna ñane ge mukse ñanna, amaà se beyeka uraara mukse na.

<sup>21</sup> AÀ enndava aàza emnde a ekse, a ba ñane: Ama mukse zaware na ndza aà nja ate barama aà Enayim na? Emnde ta eptsanaa jawapa: baaka mukse zaware aàhuna.

<sup>22</sup> A eptsehe aàdeza Yahuuda, a ba ñane : Shananka ya mukse na. Emnde a ekse keni ta biyaa baaka mukse zaware aàhuna.

<sup>23</sup> A ba Yahuuda : Naba yanya a ñanaana ñane kazlaana ñanna, famika iraamiya aà dem zherwe ba dey. Aàbi ya ebbela ñane usale ñanna, shakanka aà ba an sha.

<sup>24</sup> Tere keye am iga aà una ñanna waà, ta sanaa labare ge Yahuuda, a ba itare taà elvan ge ñane: Naàwa shawlaana Tamar a magaa gwardzire, a naba shaa huđe am zawarire. A ba Yahuuda : A daransede aàdete iga aà ekse, a deraraadera an kara.

<sup>25</sup> Am sarte na taà ankwaa aà danda Tamar aàdete iga a ekse, a naba bela ura an duksaha na aà deza shawlaara Yahuuda, a ba ñane aà elvan ge ñane : Una kazlaana aà eddawa ni a lyyam huđe na. Taslaana zharanaazhara ba shagera mu daàmshen na antara zawaara ira zhera na ate damshe ñanna mu naàza ware? Antara zade na zade aà ware?

<sup>26</sup> Yahuuda diyeddiye kazlaana, a ba ñane: Slejirire ba ñane arge iya. Afaba vananteka ge egdzaaruwa Saila geni aà gevge muksaara. Ba ser palle keni zlavareka kerde seke tara zhele an mukse.

<sup>27</sup> Hyephye sarte a yaara waà, huđe aà Tamar ñanna mbate wulhaha.

<sup>28</sup> Egdzere palle a velese ervaara, mukse sleya Tamar na a ñanaahe, a ngudante sluzhe kyanne atekwa, a ba ñane: A segasha ñane zunne.

<sup>29</sup> Amaà a naba danmehe ervaara adaliye, a segashe egdze a emmenaara zunne arge ñane. A ba sleyaà Tamar: Kay! takaata ka barama. Ta fete zheraara: Te.

<sup>30</sup> Am igaara, a sawa una an sluzhe kyanne ate erva na, ñane ta fete zheraara Jaara.

## 39

### *Labare aà Yusufa an mudze aà Pautifar*

<sup>1</sup> Emnde aà Isemayiilu daranda Yusufa aà dem larde aà Misera, ta de velanu ge ura Misera umele zheraara Pautifar. Zhel ñanna keni nakawa yaikke, ñane male aà emnde a ufa sleksu Firawna.

<sup>2</sup> Amaà ankwaa Yaakadada antara Yusufa. Naàzena ni a maganaa ñane, baaka gavkaara, ankwaa aà njaara lanne am huđe aà haà aà zanwaara ura Misera.

<sup>3</sup> Ba zanwaara keni diyeddiye ganakini ankwaa Yaakadada antara ñane. Yaakadada ankwaa aà gaà barka am slera aà Yusufa.



<sup>4</sup> Adaba una nanna, Pautifar hayanhaya Yusufu jipu, a naba vante slera na ni baaka argina defekideki na, a fanem hude aà haara antara naàzena am rezegaara bademme am erva ge Yusufu.

<sup>5</sup> Fantau am sarte nanna Pautifar a fanem haara, an naàzena am rezegaara bademme am erva ge Yusufu na waà, Yaakadada garge barka an tsaka ire ga haà zhel Misera nanna adaba barka Yusufu. Barka aà Yaakadada waà, shansha zhel nanna aà setarge naàzena am ervaara bademme, arge una am mba antara una an fe keni bademme.

<sup>6</sup> Adaba una nanna, Pautifar a fanem naàzu am rezegaara bademme am erva ge Yusufu, nane sey aà zhara ba una aà fana aà dem mbuwaara palle.

Yusufu nanna maa, dawale, garlaka zlahe adaliye, an zariyire keni baaka arge nane.

<sup>7</sup> Haraare cekwaangudi waà, damda ice aà mukse aà edda haà am Yusufu. A ba nane aà elvan ge Yusufu : Sawa nja zlava kerde seke tara zhele an mukse.

<sup>8</sup> Amaà kwalefkwale Yusufu, a ba nane aà elvan ge mukse aà zanwaara: Una aà tsa gevka defekideki. Zanwaaruwa a fiyem haara bademme am erva, nane sey aà zhara ba una aà fana aà dem mbuwaara palle, bademme a naàzena am rezegaara aà ba am ervaaruwa,

<sup>9</sup> ura aà jiyuje am hude aà haà na keni baaka, hakuma bademme aà ba am ervaaruwa, aabi baaka naàzu a piyitaa zanwaaruwa am hude aà ha na defekideki maàki ekka ka, adaba ka muksaara? Yaà magana estara haypa saksage na an Dadaamiya?

<sup>10</sup> Amaà mukse na yanka ndahan elva a maàme defekideki ge Yusufu, una ba kelaazare kwalarkwale Yusufu ge zlava antara nane seke tara zhele an mukse na, ba ge nja aàzenaara keni.

<sup>11</sup> Vacite umele maa, damda Yusufu am hude aà haà, emnde a haà keni ba ura palle, ta baaka defekideki.

<sup>12</sup> Mukse na a naba eksevaa Yusufu ate zane, a ba nane aà elvan ge nane: Sey kaà zlaviyuzlave. Yusufu a naba yanaa zane nanna am erva, a zhagadaa iraara aàsegashe.

<sup>13</sup> A ezhzhara mukse na Yusufu a yanaa zane am erva, zhagadaazhagade iraara waà,

<sup>14</sup> a naba defetaa emnde a haà, a ba nane aà elvan ge itare: Zharauzhara palasa na aà magina eddemiya na. A naba saa zhel emnde aà Ibrahiima na aà sem hude aà haà, naàwa a se diyar ge iya sey ba nja nja kerde aàbina, hula ge iya aà ba an ndzedfa lauktu a yihe.

<sup>15</sup> AÀ ezhzhara ya kante kwara, yaà hula aà ba an ndzedfa waà, a naba zhagadaa iraara aàdegashe, naàwa a yaa zanaara aà puwa aàtevege iya.

<sup>16</sup> A naba shebanve zane aà Yusufu na, saasa eddetare, a se marananhe.

<sup>17</sup> A tsakanse elva nanna, a ba nane: Naàwa nave, zhel emnde aà Ibrahiima na ka sanjerta ka na a naba se diyar ge iya a se nyamalinyamala.

<sup>18</sup> Ya naba kante kwara ya, ya fu hula, lauktu a zhagadaa iraara aàdegashe, naàwa a yaa zanaara aàtevege iya.

<sup>19</sup> Zanwe aà Yusufu ba a cenaa elva nanna am mbuwe aà muksaara geni a nyamalinyamala na waà, a naba mberte ge ervaunfaara waà, ba seke kara ndza.

<sup>20</sup> A naba eksevaa Yusufu, a elbyanme am dangay, baira ta de ngwedfana aà ba am tate na ni taà an ngwada dangayaha aà slekse aàtekwa na. Daaci a njaara Yusufu am dangay.

<sup>21</sup> A ba am dangay nanna keni anjkwaa Yaakadada antara Yusufu. A maganaa ngurna, male aà dangay nanna de hayanhaya Yusufu jipu.



<sup>22</sup> ɲane keni a de fanem dangayaha umele bademme am erva ge Yusufa. Sleraha na ta magana am dangay na bademme à ba am ervaara.

<sup>23</sup> Baaka lambaara dekideki ge male à dangay ate slera na a fanem am erva ge Yusufa na. Adaba anƙwa Yaakadada antara ɲane, slera na anƙwa à magana ɲane bademme an barka.

## 40

### *Yusufa anƙwa à palatera mana à shenahaatare ge dangayaha*

<sup>1</sup> Haraare cekwaanƙudi am iga à labare ɲanna maa, male à emnde a magana naàza sha antara male à gyan naàza zaha ge sleksu Firawna, garuge haypa an zanwaatare.

<sup>2</sup> Jaaja ervaunde slekse ate emnde a sleraara ɲanna,

<sup>3</sup> a naba puwateremhe am dangay. Am dangay ɲanna maa, ta ngwadateraa am tate na ni atekwa Yusufa na.

<sup>4</sup> Daaci male à dangayaha a puwaterem am erva ge Yusufa, de hararaahare àahuwa cekwaanƙudi.

<sup>5</sup> An vayiya vacite umele, male à emnde a maganaa naàze sha antara male à emnde a gyan naàza za ge slekse sharansha shene bukerdaatare à ba am dangay ɲanna. Shenahaatare ɲanna waà, ma naàza à waraatare keni anƙwa manaara.

<sup>6</sup> Samsa Yusufa àsezetare an enlya waà, à zharaterzhara ma ware keni baaka higaatare dekideki.

<sup>7</sup> A ba ɲane à elvan ge itare: Labara parakparakeka fekaakure vatena?

<sup>8</sup> Ta eptsanaa jawapa, a ba itare: An vayiya vatena, ma waraajere keni shansha shene, amaà baaka ura àhuna ge palanera maana à shenahaajere. A ba Yusufa : Estuwa ka, maanaha à duksa waà, à ba àza Dadaamiya, naba ndaawindaha!

<sup>9</sup> Male à emnde a maga naàza sha a naba ndahanhe shenaara ge Yusufa, a ba ɲane: Am shenaaruwa, ya naa mama à nafa à inabauhi à katafkaaruwa,

<sup>10</sup> ervaha keye atekwa. Ya naa ba yaaya nafa na, a magaa ukbene, kerten egdzere ndacebare atekwa, an naha kyanje.

<sup>11</sup> Naàza sha duksa à sleksu Firawna keni à ba am ervaaruwa, ya tsakevaa egdzar a inabauhi na, ya beca yawaara, ya vante ge slekse.

<sup>12</sup> A ba Yusufa à elvan ge ɲane : Naàwa maana à shenaaja: ervaha à nafa à inabauhi keye na waà, à mara hare keye.

<sup>13</sup> Am hare keye, watse à ndavakndava sleksu Firawna, à de eptsaka à dem sleraaja, kaà de vanta ka naàza sha am erva ba seke una ndza na.

<sup>14</sup> Amaà taslaaja viyiyaaka. Maà shakansha hairire waà, yehiteyeha àkatafke à slekse magiyanmaga shagerire sisese am bere na.

<sup>15</sup> Adaba àsawa am haha à emnde a Ibrahiima keni ta siyan à ba an ndzedà beresse. Naàwa àhuna keni baaka nazu ya guwaa ya ta ngudfiyaa adaba ɲane na.

<sup>16</sup> Male à emnde a gya naàza za gergere am mba à slekse cenancena ganakini Yusufa palannaapala maana à shenaara shagera ge male emnde a maga naàza sha am mba à sleksu Firawna. A ba ɲane à elvan ge Yusufa : Iya keni naàwa shenaaruwa: Am shenaaruwa waà, yaà an kedayaha gergere keye an nyaaja am iraruwa.

<sup>17</sup> Am kedayaha ɲanna waà, am una adetire caikcaike na waà, anƙwa naàza zaha à sleksu Firawna gergere am hudfaara. Amaà ta naba halese ge yiyaha à ba am iraruwa ɲanna.

<sup>18</sup> A ba Yusufu aà elvan ge ñane: Naàwa maana aà shenaana ekka keni: Kedayaha ñanna keye na waà, amaana hare keye.

<sup>19</sup> Am hare keye watse aà dahaka slekse, amaà taà de zlenjelaka ate nafa, taà de zaka ba kuyaha.

<sup>20</sup> Am hare ge keyire waà, sleksu Firawna a magaa munri, a jema nakawahaara bademme ge za munri na. Daaci ta sanaa male aà emnde magana naàza sha antara male aà emnde aà maganaa naàza za gergere na, a tsatsateraa aakatafke aà emnde a maàga sleraara bademme.

<sup>21</sup> A eptsa male aà emnde a maganaa naàza sha aà dem sledaara geni aà vanta ñane naàza sha am erva ba seke una werre na.

<sup>22</sup> Amaà male aà emnde a maganaa naàza zaha na waà, a naba ndaasse elvaara ate ñane geni a zlenjarzlenjela. Daada aà ba ate una a ndahanaa Yusufu na kalkale.

<sup>23</sup> Amaà male aà emnde a maganaa naàza sha ge slekse na dzamaaka Yusufu dekideki, a naba viyanaahe.

## 41

### *Yusufu anjwa aà palana maana aà shenaara ge sleksu Firawna*

<sup>1</sup> Magaamaga yawe buwa am iga a una ñanna waà, Sleksu Firawna a naba shaa shene. Am shenaara ñanna waà, ñane aà tse ate we aà haye,

<sup>2</sup> a naa ba saresse eslaha vuye, zariyiraatare keni ba ka duhe, taà an ñasla zlafe adaliye, taà anjwa aà za masa ate we aà haye na.

<sup>3</sup> A ba am haye ñanna, ta sessehe zlafe adaliye ge eslaha umele vuye, emnde ñanna waà, ta shagerkaha ba vayvaya, taà an unba zlafe adaliye. Ta de tsahe aàza emnde na ta segasha itare zunjwe am haye na.

<sup>4</sup> Eslaha na ta shagerkaha, taà an unba zlafe adaliye na, ta naba zu eslaha na ni ta zariyaha, taà an ñasla zlafe adaliye na. Daaci a tsetehe ge Firawna am hare.

<sup>5</sup> A pu hare adaliye, a naba shaa shene umele ge buwire. Am shenaara ñanna, a naa iraha aà nalkame vuye, an naha shagera, sadadde zlafe adaliye, ate naàzambakara palle.

<sup>6</sup> Aà ba ate nazambakara ñanna, a sesehe ge iraha aà nalkame umele vuye waà, baaka egdzere atekwa shakwatarshakwatere, an ula zlafe adaliye, a welansaa effeya, adaba kwakya effeya aà sawa am gedi.

<sup>7</sup> Iraha aà nalkame na baaka egdzere atekwa shakwatarshakwatere na ta naba ndandu iraha aà nalkame na an naba shagera, sadadde zlafe aà adaliye na. A tsetehe ge sleksu Firawna am hare waà, mbate ba shene.

<sup>8</sup> Werawera ekse waà, jaaja enjale aà sleksu Firawna. A naba dante emnde a maga namsulkwaha antara emnde a ilmu na taà am Misera bademme. Daaci a tsakaterse zlalava a shenahaara, amaà baaka ura a dzegwandzegwa palanna maana aà shenaha ñanna dekideki.

<sup>9</sup> De cenancena male aà emnde a maganaa naàza sha ge slekse, a ba ñane aà elvan ge Firawna: Ambarka aà slekse, vatena waà, sey yaà yeheteyeha haypaha na ndza ya maganaa ya na bademme.

<sup>10</sup> Anjwa am sarte umele, ndza jakja ervaunje jipu ate emnde a sleraana buwa, ate ñere antara male aà emnde magakaa naàza za. Ka naba puwanjeremhe am dangay, ña za dangay aà ñere am bere na ni aà ufana ba male aà emnde a ufa dangayaha ñanna an iraara.

<sup>11</sup> Vacite umele an vayiya, ña naba shaa shene ma waraanjere keni. Ma shene aà ware keni an maanaara ba ge iraara.

12 Ay am dangay nanna maa, anƙwa ura, zhel emnde à Ibrahi-ima, nane nave à male à sawjiyaha à ufa dangay nanna. n̄ tsakanse shenahaan̄ere ge nane, a palañeraa maanahaara bademme, ma waraan̄ere keni an maana à shenaara.

13 Ba jirire gevge à ba ate una a palañerna nane, dzalevka ðekideki. Adaba naàwa iya, ka naba eptsiyaa à sem sledaaruwa adaliye aàmbarƙaana, amaà male à emnde a magakaa naàza za waà, ka ndaase elvaana, ta zlejelehe.

14 Daaci a ba sleksu Firawna a sairiyansa Yusufa. Kerten̄ saransese Yusufa am dangay na. A sehese ire, a barevhe, a tsekweme am nangyuwe umele a naba deza slekse na.

15 A ba sleksu Firawna à elvan ge Yusufa: Ya hare am shene, amaà baaka ura dzegwandzegwa paliya maana à shenaaruwa nanna. Ya cenancena geni ekka kaà dzegwandzegwa pala maana à shene maà ndarakndaha zlalavaara. Ya ðahaka adaba una nanna.

16 A nwanante ge Yusufa, a ba nane à elvan ge sleksu Firawna: Iya ka aàmbarƙaana. Aà de vakta ba Dadaamiya jawapa na ni kaà hayanhaya na.

17 Daaci a ba sleksu Firawna à elvan ge Yusufa: Am shenaaruwa, ba seke yaà ate we à haye,

18 ya naa ba eslaha vuye, zariyiraatare ba ka ðuhe, taà an n̄asla adaliye, ta segashe am guwa nanna, taà anƙwa à za masa ate we à guwa.

19 Am iga à emnde nanna maa, ta ðabateremhe ge eslaha umele vuye, ta segashe à ba am haye nanna, ta shagerkaha ðekideki, taà an un̄ba zlaɓe adaliye. Nananka eslaha shagerkaha seka una nanna am haha à Misera bademme.

20 Amaà slaha nanna shagerkaha na, ta naba zu slaha na ta segashe zun̄n̄we am guwa, zariyaha, taà an n̄asla jipu na vuye bademme.

21 Aley, am iga à ba ta zu emnde na taà an n̄asla dakedar dakedare nanna keni, ðekideki kaà tsa banka ni ta zuwa itare. Adaba ba kelaa n̄jaatare nanna ta shagerkaha na, taà an un̄ba zlaɓe adaliye na. Am iga à una nanna, tsanetse am hare.

22 Ya shaa shene umele zlaɓe adaliye, ya naa iraha à nalkame vuye, an naha shagera, sadadde zlaɓe adaliye ate nazambakara palle.

23 A ba ate nazambakara nanna, a naba sesehe ge iraha à nalkame umele vuye waà, baaka egdzere atekwa sakwatarsakwatare ba dey, an ula zlaɓe adaliye, a welansa effeya, adaba kwakya effeya à sawa am gedfi.

24 Iraha à nalkame na baaka egdzere aatekwa na, ta naba ndandu iraha à nalkame vuye na an naha shagera, sadadde zlaɓe adaliye na. Ya ndaterhe zlalava à shenahaaruwa nanna ge emnde a maga namsulkwe, amaà baaka ura dzegwandzegwa paliyaa maanaara ðekideki.

25 A nwanante ge Yusufa, a ba nane à elvan ge sleksu Firawna: Shenahaana na waà, maanaara ba palle aàmbarƙaana. Dadaamiya anƙwa à ngyekwakaa naazu watse à magana nane aàkatafke.

26 Eslaha vuye na ta zariyaha, taà an n̄asla zlaɓe adaliye na waà, amaana yawe vuye, iraha à nalkame vuye na an naha shagera, sadadde zlaɓe adaliye na keni ba yawe vuye nanna. Shenaha nanna ba duksa palle.

27 Eslaha vuye na ta sawa aàkataliya, ta shagerkaha, taà an un̄ba zlaɓe adaliye na keni maa, amaana yawe vuye. Iraha à nalkame vuye na baaka egdzere atekwa, ðekideki, mele keni an ula zlaɓe adaliye, a welansaa effeya na a sawa am gedfi na keni maa, ba yawe vuye nanna zlaɓe adaliye. Watse anƙwa waya am yawe vuye.

<sup>28</sup> Daaci ba seke una ya ndakndaha na aàmbarkaaṅa waà, Dadaamiya aṅkwa àà ndak nazena watse àà magana ṅane ààkatafke.

<sup>29</sup> Am ivaha vuye na àà de sawa na waà, watse baaka zlakta àà naàza za am haha àà Misera bademme.

<sup>30</sup> Amaà am iga àà una ṅanna waà, àà de sawa waya yaikke àà sem larde àà Misera bademme, una ṅanna keni yawe vuye zlaḅe adaliye. Watse emnde taà de zlanazle ndzedfa àà larde.

<sup>31</sup> Ivaha na ndza baaka zlakta àà naàza za am hudaara na taà de viyanaaviya emnde bademme. Adaba waya ṅanna watse zlazlada jipu.

<sup>32</sup> Elva àà shenahaṅa ṅanna, buwa àà ba aàtekwa aàtekwa na maa, amaana: Dadaamiya njantenja aàzeṅaara, watse a shekwaaka mazlaara.

<sup>33</sup> Ambarkaṅa, naàzena kaà magana ka kina waà, naba tatayevaataṅa ura, vanteva hakuma ate larde àà Misera bademme, amaà waà sey edda àà eṅkale, aṅkwa ilmu aàzeṅaara na.

<sup>34</sup> Farfe zlaḅe adaliye ge kezlakula àà emnde a ufa larde, taà de jahana itare naàza za am larde a Misera bademme. Am duksa ilyeḅe, itare taà de eksa palle. Taà de magan ba estuwa am yawe vuye na ni watse aṅkwa naàza za na.

<sup>35</sup> A jaranmejahe naàza sa am huḅe àà Misera bademme am iyaha na watse aṅkwa naàza za am hudaara na. Amaà waà, an hakuma na kaà de vaterta ka. A jaranmejahe naàza za am eksaha bademme, watse taà ṅaà emnde an ṅane, a faranufe hyema ba ṅaa.

<sup>36</sup> Daaci watse aṅkwa naàza za am larde àà Misera ge zana am waya àà iva vuye na. Daaci estuwa, waya ṅanna àà de zlanaka ndzedfa àà larde bademme.

#### *A gevaa estuwa Yusufa waziri am Misera*

<sup>37</sup> Elva ṅanna hayanhaya Firawna antara emndaara bademme.

<sup>38</sup> A ba Firawna àà elvan ge emndaara: Maà de sha ware mazlaara seke dawale na nawa ṅane na, ura aṅkwa Sheḅekwe àà Dadaamiya antara ṅane?

<sup>39</sup> Daaci a ba ṅane àà elvan ge Yusufa: Tsante àà ba am sarte na ni Dadaamiya a kwarakse duksa ṅanna waà, ba ka ṅanna. ṅaà shanka edda àà eṅkale umele an ilmu seke ekka.

<sup>40</sup> Ka eddaara ba ka. Huḅe àà haaruwa antara lardaaruwa bademme àà ba am ervaṅa kina. Sey taà ḅaba ba nazena ka ndaasa ka. baaka ura umele arge ekka ḅekidēki, yaà jakuwa àà ba an kurshi àà sleksire palle.

<sup>41</sup> A fanarhe zlaḅe adaliye, a ba ṅane àà elvan ge Yusufa: Kwaye vanakteva hakuma ate larde àà Misera bademme.

<sup>42</sup> Daaci a naba seḅaa jade ate ervaara, a fante ate erva ge Yusufa, a tsekwanme am zane leḅeḅire ba ka ḅuhe, a ṅuḅanem naberasha àà dindar am mbiye.

<sup>43</sup> Daaci a naba njanme am darkwaara àà teḅana belsa. Darkwa ṅanna waà, naàza àà sledaba àà slekse. Daaci hula ge emnde a ḅaba Firawna àà katafke àà Yusufa na, a ba itare am hulaatare: Baraàma, baraàma, baraàma! A vante estuwa Firawna hakuma ge Yusufa am larde àà Misera bademme, ṅane a gev wanziriyaara.

<sup>44</sup> A ba ṅane zlaḅe adaliye àà elvan ge Yusufa: Ma ware eddaara keni, a gejeka seraara, a gejeka vuwaara ḅekidēki ge maga duksa am larde a Misera bademme, maàki ndakseka ka elva. Ya ndahanaa ya Firawna una!

<sup>45</sup> A eptsanante zhera ge Yusufa, a fete zheraara Jafnat Panaiyak. A eksanante gyaale zheraara Asnat, egdze àà Pautifaira, liman am ekse àà

Aun. Mazlaara a naba degashe. Yusufa, a jem d̄aba am haha à Misera bademme.

<sup>46</sup> Yusufa magaamaga iva kul keye kalkale am sarte na à dem slera à ngumna à Misera bademme.

<sup>47</sup> Am ivaha vuye n̄anna waà, haha magaamaga jipu duksa bademme.

<sup>48</sup> Yusufa a janme naàza za an tsaka ire am Misera am ivaha vuye n̄anna. A janme naàza za n̄anna am eksaha gergere kwakya. Ekse na maà fafa Yusufa geni à jaha naàza za am hudaara, emnde a makwata na taà herda am kwara n̄anna taà jaha naàza za na aàdehuwa bademme.

<sup>49</sup> Daaci Yusufa a jemaa naàza za baaka zlaktaara, ba seke shili na am guwa na. yaranye ba d̄ekideki tataya kezlakulaara, adaba à kezlaveka kwakya jipu.

<sup>50</sup> Lauktu ni à sawa waya n̄anna waà, Yusufa yaya egdzara buwa, egdzar zaala. A yanaa an Asnat egdze à Pautifaira liman am Aun.

<sup>51</sup> Yusufa a fete zhera à egdzaara ge zun̄wire: Manasa. Adaba a bantsa n̄ane: Dadaamiya viyinaaviya zladahaaruwa bademme antara tega na ta naba tegañeraahe antara haà edderwa na.

<sup>52</sup> Egdzaara ge buwire, a fete zheraa: Afrayim. Adaba a bantsa n̄ane zlaɓe adaliye: Dadaamiya a vite ya am larde na ni a siyaa palasa à sem hudaara.

<sup>53</sup> Daaci emnde ta magaa yawe vuye am emtakire am haha à Misera bademme mazlaara a naba zluhe ge emtakire n̄anna.

<sup>54</sup> Am iga à una n̄anna maa, a de semhe ge waya yaikke waà, yawe vuye emnde taà à ba am waya n̄anna ba seke una a ndahaanaa Yusufa na. Waya maganaamaga hukumaara am duniya bademme, amaà am Misera waà, an̄kwa naàza za.

<sup>55</sup> Am sarte na n̄ateraŋa waya emnde am larde à Misera, ta daa kyuwaatare à deza Firawna. Amaà a ba n̄ane à elvan ge itare: Zlauzlaala à deza Yusufa, magaumaga nazena a fakurara n̄ane bademme.

<sup>56</sup> Am jetaaveje larde bademme baaka tata na ni baaka waya am hudaara, Yusufa a naba werante magazaŋaha, a fantau ge velateru naàza za ge emnde a Misera bademme, adaba waya n̄anna jauje ge ndzed̄a à emnde.

<sup>57</sup> Gevge waà, taà an̄kwa à sawa, emnde à sawa am lardaha gergere kwakya, taà se shekwa hiya àza Yusufa am larde a Misera. Adaba waya n̄anna an̄kwa à magatera palasa jipu ge emnde ma am lardara keni.

## 42

### *Egdzar mamahaŋaara ge Yusufa ta se shekwa hiya am Misera*

<sup>1</sup> Daaci cenancena Yakubu ganakini an̄kwa naàza za am larde à Misera. A ba n̄ane à elvan ge egdzaraara : Labara kwaà geya aàzharava à dem ice am ice, aàzara paydaara?

<sup>2</sup> Nawa ya cenancena ganakini an̄kwa naàza za am larde a Misera waà, daumbare de shekwawamiyepshekwe, a cebamika waya ba dey.

<sup>3</sup> Daaci daredde egdzar mamahaŋaara ge Yusufa, ta kelaawa, taà de shekwa naàza za am larde a Misera na.

<sup>4</sup> Amaà Bainjamaiŋ pale à egdzar mamahaŋaara ge Yusufa n̄anna waà, belaterteka eddetare, adaba a bantsa n̄ane: A de shanka lamare umele aàhuwa.

<sup>5</sup> A sawa estuwa, lauktu ta sawhe ge egdzara à Iserayiila antara emnde a Kanaana umele ge se shekwa naàza za am Misera, adaba an̄kwa waya am Kanaana.



<sup>6</sup> Ay, am Misera na, hakuma bademme aà ba am erva aà Yusufu. Aà velaterwa ba nane naàza za nanna ma ge emnde a lardara keni. Saremsa egdzar mamahaara aà se katafkaara, ta naba kezlan ugje wafkaatare ba teppe ate haha.

<sup>7</sup> A zharateraahe waà, a naba diyatereddiye, amaà waà, mbedateruka geni nane egdze a emmetare. A naba marateraa yaikkire, a ba nane aà elvan ge itare aà valaha: Kwa sawa ame kure? Ta eptsanaa jawapa emnde na, a ba itare: na sawa am Kanaana, na se shekwa naàza za.

<sup>8</sup> Yusufu diyeddiye egdzar mamahaara, amaà itare waà, diyarseka Yusufu dekideki.

<sup>9</sup> Daaci Yusufu a naba yehete shenaha na ndza a shanaa nane aà dete itare na, a ba nane aà elvan ge itare: Baira deme kure kwa kelaadaha ta belakura an bela, kwa se zhara larde, kwaà kata dise tate na ni baaka payda aà emnde atekwa na.

<sup>10</sup> Ta eptsanaa jawapa, a ba itare: Estuweka aambarkaana. Naavahaana ta se shekwa ba naàza za.

<sup>11</sup> A ba itare zlafe adaliye: nere bademme na ba egdzara aà zhel palle, na emnde a jirire, na kelaadaha ka dekideki.

<sup>12</sup> A ba Yusufu aà elvan ge itare: Eksanarka ya elvaakure na dekideki, kwa se zhara ba larde, kwa kata dise tate na tsafsafe na.

<sup>13</sup> Ta nwanante, a ba itare: Ba jirire, nere na ba egdzara aà zhel palle am Kanaana aambarkaana. na navahaana ndza na kelaawa ju buwa ate eddenere, gaajiyaanere waà, an kwa am mba antara eddenere, amaà pallaanere waà, nane a keda werre.

<sup>14</sup> A ba Yusufu aà elvan ge itare: Aabi ya ndakurndaha ya, kure waà, baaka shaigaara dekideki ta belakura aà ba an bela, kwa se zhara ba larde.

<sup>15</sup> Ba maaki kwa kelaadaha ka tsawe waà, mi ezhzhara kwa: Yaà zakuru ba wada an shifa aà sleksu Firawna, kure kwaà deska aahunu dekideki maà samka gaajiyaakure na.

<sup>16</sup> A ezlzlala pallaakure emnde umele waà, sey kwaà demda am bere aahunu, yaà zhara, tara kwa emnde a jirire an kwa emnde a fida keni. Ay ka waà, kwaye Firawna an shifaara maaki kwa kelaadaha ka.

<sup>17</sup> A naba puwateremhe am dangay bademmaatare, hare keye taà am bere na.

<sup>18</sup> Am hare ge keyire nanna waà, a ba Yusufu aà elvan ge itare: Iya keni aà wiwa lyawa atuge Dadaamiya. Maà wayakurwaya an shifaakure waà, naàwa nazu kwa de magana kure:

<sup>19</sup> Maaki ba kwa emnde a jirire waà, yawanya pallaakure am dangay aahunu, amaà kure emnde umele waà, dawanda naàza za aà dem mba, adaba an kwa waya am mbaakure.

<sup>20</sup> Ama waà, sey kwaà siya gaajiyaakure na kwa yanaa am mba na, geni yaà diyeddiye jiriraakure, a kedeka shifaakure keni. Daaci ta naba ekserhe.

<sup>21</sup> Am dagavaatare waà, ta fantau ge tsaka elva, a ba itare: Una waà, baaka shaigaara dekideki aà janera ba haypa yaikke na na guwaa an egdze a emmemiya na. Adaba na nanna palasa na a maganaa nane, a nalaneru zezarziye, amaà zaneranvaareka dekideki. Daaci kwaye palasa nanna a eptsamiyar ge miya vatena.

<sup>22</sup> A ba Rubain aà elvan ge itare : Aabi ndza ya ndakundaha a ba iya magauka jeba haypa saksage na an egdzere, amaà cenakurka. Kwaye Dadaamiya an kwa aà ndavamiyu uzhaara vatena.

<sup>23</sup> Itare diyarka ðekidëki ganakini ankwaa àà cenancena Yusufu elva na taà ankwaa àà tsakana itare na, adaba ankwaa turjuman am dagavaatare.

<sup>24</sup> A eptsaterve iga Yusufu, a zlalëhe aàzetare waà, a de kyuwa. Am igaara, a naba eptsaa aàsezetare, a se mbedateru elvaara, a eksevaa pallaatare zharaara Simaun, a naba puwete zawa ate nane àà ba ate icaatare, a beleme am dangay.

<sup>25</sup> A naba ndaase elvaara Yusufu, geni a varaterteva naàza za am kayawahaatare, a puwaraterempuwa antara shunguwahaatare am kayawahaatare, a varaterteva antara kazlana àà waya ge maga shulaatare an nane. Ta magateraa una nanna bademme.

<sup>26</sup> Mazlaara egdzar mamahaara ta puwete kazlanaatare ate iga àà ezzenwahaatare, ba ezlalaatare.

<sup>27</sup> Magaamaga vayiya de tsekwardsekwa am tate umele maa, pallaatare a pelaa kayawara, àà kata vante naàza za ge ezzenwara waà, a beya shungu àà nalkame na àà ba ate waara.

<sup>28</sup> A ba nane àà elvan ge egdzar mamahaara : Shungu àà eptsari-naptsa nazaaruwa, nawa nane ya beyanaa ate we àà kayawa. Maà a de nezlaa ge ervaundatare waà, palle a nazu ta ndahana itare baaka. A ba itare: Aàzara kena naàzena ankwaa àà magamita Dadaamiya na?

<sup>29</sup> Saraasa am lardaatare am Kanaana, ta tsakanse nazena a shatersha na bademme ge eddetare Yakubu.

<sup>30</sup> A ba itare taà elvan ge eddetare: Edda àà larde nanna banjeranka elva a hairire ðekidëki. A bantsa nane ta belanera an bela na kelaadaha, na de zhara larde.

<sup>31</sup> A ba nere naà elvan ge nane : nere na kelaadaha ka, na ba emnde a jirire.

<sup>32</sup> Ndza na kelaawa ju buwa ate eddenere, pallaanere kedakeda, amaà gaajiyaanere waà, ankwaa am mba antara eddenere am Kanaana.

<sup>33</sup> Amaà a ba zhel nanna àà elvan ge nere: Naàwa nazena ya de diyeddiye aàtekwa tara kwa emnde a jirire an kwa emnde a fida keni: yawanya pallaakure aàzerwa aàhuna, emnde umelaakure waà, a daranda jahwana àà dem mba, adaba ankwaa waya am mbaakure.

<sup>34</sup> Zlauzlala àà daà, amaà sawiyansa kudere kure na kwa yanaa am mba na. Yaà de diyeddiye àà ba ate una nanna geni kwa emnde a jirire. Am iga a una nanna, yaà de belakura egdze a emmekure na aàzerwa na, kwaà tsakalaakure am lardaaruwa ba seke una kwaà katana kure.

<sup>35</sup> Ta tsekwa kayawahaatare ate iga àà ezzenwaha waà, ta ber shunguwahaatare bademme am kayawaha na. Itare, eddetare, bademme ta nanna shunguwaha na. Bademmaatare naterana lyawa.

<sup>36</sup> Ba wera waara ge Yakubu eddetare, a ba nane àà elvan ge itare : Aàzara kwa! Bademme kwaà kediyakada egdzara! Yusufu keni baaka, nawa Simaun keni saaka zlafe adaliye, kwaà kata daà Bainjamain adaliye? Una waà, zlazlada ba ge iya.

<sup>37</sup> A ba Ruubain àà elvan ge eddetare: Fiyemfa Bainjamain am erva ge iya. Ba maàki sanakanaaka waà, kwaye egdzaraaruwa buwa, cebateraceba am kelaara.

<sup>38</sup> Amaà a ba Yakubu: ðekidëki àà ðabakurka egdzaraaruwa mazlaara, adaba diyandiya baaka egdze a emmenaara an shifa. Yaà zhara ba nane nanna mazlaara, maà de shansha lamare umele zlafe adaliye ate barama a shula waà, ya emgyegwe a zhele seke una telle ire, àà zliyaka ervaundë àà ba àà da faya emtu?

## 43

### *Ta dan estuwa Bainjamain á de katafke á Yusufa*

<sup>1</sup> Waya ankwa á far he maga hakuma-aara am haha á Kanaana.

<sup>2</sup> Emnde á Yakubu zlaranaazle nalkame na ta de sana am Misera na catta. A ba eddetare: Sey ba kwá eptsa á dem Misera na, de shekwawamiyepshekwe naza za cekwa.

<sup>3</sup> A ba Yahuuda: Estuweka Edda. Zhel ɲanna a ndaɲerndaha ba parakke, a ba ɲane: A puwanteka ice-aaruwa ate kure áhuna mazle-aara, máki sakuriyanka egdze a emmekure na kwa yanaa am mba na.

<sup>4</sup> Daaci máki ká yanya egdze a emmeɲere na á zlala antara nere wá, ɲá de shekwa naza za na adaliye.

<sup>5</sup> Amá má ká ɓeleka egdze a emmeɲere ge zlala antara ɲere wá, ɲá gejeka sera á ɲere mazle-aara. Adába a ndahaɲera an shebeka zhel ɲanna, amá ba parakke. A ba ɲane, a puwameka ice-aaruwa ate kure mazle-aara má sakurka antara egdze a emmekure na am mba na.

<sup>6</sup> A be Iserayiila á elvan ge itare: Labara ɗemme kwa magite jeba una, há ni kwa naba banan ge zhel ɲanna ganakini aɲkwa egdze a emmekure umele am mba na?

<sup>7</sup> Ta eptsanaa jawapa, a ba itare: A ndavaɲerwa ɲane elva-aha gergere ate ɲere antara jeba á ɲere. A ba ɲane á elvan ge ɲere: Aɲkwahe eddekure an shifa? Aɲkwahe egdze a emmekure umele am iga? Daaci ɲere keni ɲa vante ba jawapa-aha á ndava-aha-aara. Tamaɲerka ɗekideki watse á baɲera sawansa egdze a emmekure ɲanna.

<sup>8</sup> A ba Yahuuda á elvan ge eddetare Iserayiila: Belitebela egdze ɲanna ge iya, ɲá tse kerɗe, ɲá zlala kerɗe, máki ekka an ire á ɲa antara ɲere ira eggye-aha á ɲa mi kata ɲa an shifa adaliye.

<sup>9</sup> Eksanaarekse ya shafa á egdze qanna ate ire-aaruwa. Má sanaaka an ɲane, se fanakemka am erva wá, a gevge haypa saksage ya guwa ya an ka.

<sup>10</sup> Sane kwakya mi keɗanaamiya. Ma andze keɗaminaaka sarte wá, ɓaaka shaige-aara ma ser buwa keni ma saɲeraasa kina.

<sup>11</sup> A ba eddetare Iserayiila á elvan ge itare: Máki ba estuwa wá, shagera. Dawananda kashi-aha á larde á miya ge zhel ɲanna, jawanmejahe kazlaɲa shagera shagera na ɓaaka argina ɗekideki am larde á miya na: egdze a kajiji antara navawe-aha na á se emtake na antara ɗagwala á naza se antara naza se yawe yawe-aara antara nama ira egdzar nafa emtake emtake na an ula shagera na, dawananda.

<sup>12</sup> Iyau, viyawanaaka shuɲgu-aha na kwa beranaa am kayawa-aha á kure na. Una ɲanna a viyaterare á ba an viya. eksawantekse shuɲgu umele keni am erva.

<sup>13</sup> Naba eksawanteksa egdze a emmekure, eptsauptsa ádeza zhel ɲanna.

<sup>14</sup> Dadaamiya na slekse ba ɲane palle na, an sleksire-aara á de magana ba ɲane slera-aara am ervaunɗe á zhel ɲanna, lauktu á de zakurvara ɲane, á de puwakura egdzara mama-aha a kure, tara Bainjamain antara Simaun na kwa yanaa áhuwa na, naza-aaruwa ge iya wá, ba dey. Má banba ɲane a jaruka egdzara ázeɲa, ba tá juka ɲanna.

<sup>15</sup> Daaci egdzara á Yukubu ta janme kazlaɲa-aha na, ta eksetaa shuɲgu an saga antara egdze e emmetare Bainjamain, ta zlala an ɲane á dem Misera, ta de katafke á Yusufa.

<sup>16</sup> Yusufa ba a puweie ice ate Balɲjamain am dagave á egdzara mama-aha-ɲara umele wá, á ba ɲane á elvan ge male á emnde a slera-aara: Daterda emnde na á dem ɓere, de vaterteva sleɗe, eksevaksá dabba palle

ganvege naza d'ale, magawanaamaga naza za an saga, watse emnde tá za d'afa ázerwa an vacatire.

<sup>17</sup> Ane, a be zhel na, a daa emnde na suuwe á dem mba á Yusufa, a de vaterte slede, a magaa nazena a bannaa Yusufa na bademme.

<sup>18</sup> Amá am sente na tá datera á dem mba á Yusufa na wá, bademme damda lyawa am vuwa-aatare. Adaba ta bamsa itare : Tá de damiya á dem bere adaba shungu na mi beranaa miya am kayawa-aha na. Tá de damiyere an ja am here, tá de magamiya palasa antara ba ezzenwa-aha á miya keni, watse baaka ura á sesse, tá de gamivege nave-aha-aatare vatena.

<sup>19</sup> Adaba una nanna, ta naba mbed'fanu elva-aatare ge male á slera á Yusufa na ate we á wakiya,

<sup>20</sup> a ba itare tá elvan ge nane: Ankwa elva á nere ámbarka á na. Nere na wá, werre keni ndza na sawa, na se shekwa naza za á ba áhuna.

<sup>21</sup> Am eptsa á nere á dá wá, na de tsekwa am ekse umele ganerarga vayiya wá, ma ware á nere keni a beye shungu ate we á kayawa-aara, ba kelaa á shungu á nalkame nanna bademme. Shungu nanna ankwa saneransa ba nere an sera á nere.

<sup>22</sup> Una ná shekwa naza za umele an nane keni ankwa bademme. Una nanna najipu, ma a puwanermaa ware shungu nanna am kayawa-aha á nere keni diyanerka.

<sup>23</sup> Male na a eptsateraa jawapa, a ba nane á elvan ge itare: A wakurka lyawa dekideki, una nanna slera á Dadaamiya á kure. Dadaamiya á eddekure. A puwakurmaa ba nane nalmane nanna am kayawa-aha á kure. Shungu-aha á kure ndza samsa á sem erva-aaruwa. Daaci a sanse Simaun ásezetare,

<sup>24</sup> a daterhe á dem hude á há á Yusufa, a sateraa yawe ge bara sera-aha-aatare, a vaterte masa ge ezzenwa-aha-aatare.

<sup>25</sup> Itare ta tsatsaa kazlana na ta sanaa kashi-aara ge Yusufa na, daaci tá ankwa ufa sa-aara an vacitire, adaba ta cenaa watse tá za d'afa antara nane.

<sup>26</sup> Saasa Yusufa, ta kezle ugje ákatafke-aara reppe, ta vante kashi á larde-aatare na.

<sup>27</sup> Nane keni a ndavateru lapiyire á vuwa-aatare antara lapiyire á eddetare. A ba nane á elvan ge itare: Awara emgyegwe a eddekure na ndza kwa ndinda na? A be ankwa nane? Zlabe á ba an shifa?

<sup>28</sup> Ta nwanante, a ba itare: Náve á na eddenere ba lapilayye, zlabe á ba an shifa. Tá ambera á kezzlan ugje reppe am aha.

<sup>29</sup> A zharaterzhara Yusufa, a naa Bainjamain egdze a emmenjara emmetare palle, a ndavateruhe, a ba nane: Una gaaji á kure na ndza kwa biyaa elva-aara na emtu? A ba itare: Ba nane. A ba nene á elvan ge Bainjamain: A tsufaktsufa Dadaamiya, egdze-aaruwa.

<sup>30</sup> Ba a ndaase una nanna wá, antara ba zlala-aara, adaba ankwa á sawa yawe á kyuwa-aara, Zhagade-aara, a de kyuwa am bere-aara, adaba haraare tegava-aatare antara egdze a emmenjara nanna.

<sup>31</sup> Am iga á una nanna, a baraa ice, a naba sessehe, a sherse ice, a ba nane á elvan ge emnde-aara: Vawanjerteva naza za.

<sup>32</sup> Saranmesa d'afa wá, ta vante naza-aara ba nane palle, egdzara mama-aha-nara keni tá an ire-aatare, emnde a Misera na ta se za d'afa ázenjara na kenl tá an ire-aatare. Adaba emnde a Misera tá zeka d'afa átirpalle antara emnde a Ibrahiima. Una harem ge itare.

<sup>33</sup> Egdzara mama-aha-ɲara ge Yusufa ta njehe an dɔbava an dɔbava ákatabke-aara. Ta fantau ate makaaji á eddetare, dete gaaji-aatare. Tá maga ba najipu-aara, tá ámbera á ndaha elva an ice am dagave-aatare.

<sup>34</sup> Yusufa a sateranhe dɔfa na ni anƙwa á zena ɲane á katabke-aara na ge egdzara mama-aha-ɲara. Amá wá, yaikke ba una a vante ga Bainjamaiɲ na arge una a vaterte ge egdzara mama-aha-ɲara umele, naza-aatare na sey ilyebe-aara lauktu á hyephye seke naza á Bainjamaiɲ. Má a de semhe ge higa-aatare bademme wá, ba ka duhe. Ta sharhe zlaɓe adaliye, a jese an je am ne-aatare.

## 44

### *Kwap á Yusufa ta janaa an lipela*

<sup>1</sup> A ba Yusufa á elvan ge male á emnde a maganaa slera: Vaterteva nalkame ge dawale-aha na, a naatenaha kayawa-aha-aatare ba shagera má ba tá dzegwandzewa danada-aara. Shunƙu-aha-aatare keni fateremfa am kayawa-aha aatare ate we-aara.

<sup>2</sup> Eksameksa kwap-aaruwa, kwap na ta janaa an lipela na, fananufe ge we á kayawa á gaaji-aatare na antara shunƙu na a se shekwa nalkame an ɲane bademme. Zhel na a magaternaahé á ba me una a bannaa Yusufa na.

<sup>3</sup> Werawera ekse wá, ta naba vaterte baráma a dá ge egdzara á Yakubu, ta da-aatare an ezzenwa-aha-aatare.

<sup>4</sup> Ba degashe-aatare am huɗe á ekse, zlarvaazlala ba cekwaanƙuɗi wá, a ba Yusufa á elvan ge male á emnde a maga slera am huɗe á ha-aara: Ezzlala watsewatse dɔbaterdɔbaba emnde na. Máki shakateraasha, bateranba wá, labara tá pela shagerire an shagerkire?

<sup>5</sup> Naba ndaterndaha, labara kwa ilu kwap á zanwa-aaruwa ta janaa an lipela, á sha duksa keni an ɲane, á naha keni á ba an ɲane? Maga á kure na wá, mandzawe jipu.

<sup>6</sup> Zhagade ge male á emnde a slera-aara na, a de shateraahe, a tsakaterse elva ɲanna.

<sup>7</sup> A ba egdzara á Yakubu: Labara zlaɓe eddaye ká sanse jeba elva na am mbuwe? Ba ser palle keni slarka nave aha á na ɲe maga jeba une degiya!

<sup>8</sup> Nawa shunƙu na ɲa de beranea am kayawa-aha á ɲere, saɲerakansa kwaye am Kanaana. A sawa estara zlaɓe na se ila lipela antara dindar am mba á zanwe á ɲa?

<sup>9</sup> Kwaye kazlaɲa á ɲere, naba eppakya. Eddawna ka shaa duksa á kure am kazlaɲa-aara, njeka an shifa dɛkidɛki, ɲere emnde umele keni gaɲervege nave-aha á ɲa.

<sup>10</sup> Shagera, a bá maie na, amá wá, sey ba eddawna má ya ber duksa ɲanna am kazlaɲa-aara una á gev nave-aaruwa. Kure emnde umele wá, á shakuraaka dɛkidɛki.

<sup>11</sup> Kertej tsekwarnatsekwa kayawa-aha-aatare á dem aha, ma ware keni a werante naza-aara.

<sup>12</sup> Male na a fantau ge pakya kazlaɲa-aatare, a fantau ate makaaji-aatare dete gaaji. A shaa kwap á zanwe-aara am kazlana á Bainjamaiɲ.

<sup>13</sup> Ge jaterja emtaɲkire wá, ta tataa nanƙyuwe ate vuwa-aatare bademme. Daaci ta naba eptsá á sem huɗe á ekse an nalkame na ate iga á ezzenwa-aha bademme.

<sup>14</sup> Yahuuda antara egdzara mama-aha-ɲara ta se demhe am huɗe á há á Yusufa, ta se ber nane keni zlaɓe zlalaaka. Reppe ta kezzlan ugje am aha ákatabke-aara.



<sup>15</sup> A ba Yusufu á elvan ge itare: Slera á kure una ka? Diyaweddiye ganakini iya kwá ankwá á zharizhara na wá, ya ura an diya. Ya an hakuma ge dise nazena ni a de magava bademme.

<sup>16</sup> A nwaname ge Yahuuda, a ba nane á elvan ge nane: Baaka nazu ná ndahana ntere ámbarka á na. Ná ndaha tara uwe antara uwe? Na ndaha uwe geni ná sha jirire an nane na? Nere, na emnde a haypa, a balesaa ba Dadaamiya an ire-aara kaypa á nave-aha á na. Eddawna ta ber duksa á na am kazlana aara na, antara ntere bademme, na ba nave-aha á na ámbarka á na.

<sup>17</sup> Lálálá, estuweka, a ba Yusufu, ba eddawna ta ber kwap-aaruwa am kazlana-aara na wá, á gevge ba nane nave aaruwa. Amá kure emnde umele wá, á shakuraka, zlauzlala á dá, ádeza eddekure an hairire.

### *Yahuuda a yan estuwa shifa-aara adaba Bainjamain*

<sup>18</sup> Daaci Yahuuda a naba ganaptehe ge Yusufu, a ba nane á elvan ge nana: Tasle á na ámbarka á na, nave á na á shansha baráma ge ndakse elva-aara pane emtu? Adaba ekka kwa ba kalkale antara Firawna. Tasle á na, a janjka ervaunde.

<sup>19</sup> Ambarka á na ndza ka ndavaterwa ba ka kahe ge nave-aha á na, a ba ka a elvan ge itare: Ankwáhe eddekure, bi egdze a emmekure umele am mba?

<sup>20</sup> Na eptsakaa jawapa, a ba ntere ankwá emgyegwe a eddenere antara kuderenere a yanaa am emgyegwire, ndza ta buwa ate emmetare amá kefakeda malenara, a yaa ba nane pane, wayaawaya eddenara jipu

<sup>21</sup> Ambarka á na, a ba ka á elvan ge nave-aha á na: Sawiyansa egdze a emmekure nanna yá se nanaana an ice-aaruwa.

<sup>22</sup> Abi ndza na ndakndaha sera-aara ámbarka á na, geni egdze nanna wá, tá pakyaveka an eddenara. Má de baaka nane wá, á dedde shifa am eddenara.

<sup>23</sup> Amá a ba ka á elvan ge nave-aha á na: Máki sakuremka an kuderekure nanna wá, a puwanteka ice-aaruwa ate kure áhuna.

<sup>24</sup> Danjeraada maa, na de mbedanu elva á na na ge eddenere ambarka á na.

<sup>25</sup> Á ba eddenere : Eptsauptsa zlafe adaliye á dem Misera, de shekwawamiyepshewe nalkame cekwaanjudi.

<sup>26</sup> A ba ntere ná elvan ge eddenere: Martapa a ntere he? Máki ná duwa antara kuderenere Bainjamain wá, una ná duwa. Adaba máki danjeranka kuderenere na wá, ná dzegwanka de katafke á zhel nanna dekideki.

<sup>27</sup> A ba nave á na eddenere á elvan ge ntere: Ba kure keni diyakurdiya ya shaa ba egdzara buwa an mukse-aaruwa.

<sup>28</sup> Pane á egdzara nanna a keda warre. Ya tamaa a jaa ba naza á kaamba adaba sem vaatena puwanteka ice-aaruwa at nane.

<sup>29</sup> Kina máki zlakurzlala zlafe adaliye an egdze a emmenara na, máki de shansha zlafe adaliye lamare umele wá, á de jija ervaunde á ba a da faya, adaba ganevge emgyegwe a zhele, zlauzle ndzedá-aaruwa.

<sup>30</sup> Daci kina na ámbarka á na wá, yá dzegwanka eptsá ádeza waladi á na edderwa, má baaka egdze na am dagave á ntere. Adaba edderwa wayaawaya jipu an egdze na, baaka pakyava-aatare dekideki.

<sup>31</sup> Máki danjeraada ni nánka egdze na am dagave á ntere wá, ba lette shifa am nane. Máki de gevge estuwa, ba ntere nave-aha na ka emtu na ja eddenere á ba á da faya an ervaunde, emgyegwe a zhele telle ire?

<sup>32</sup> Ambarka á ña, iya wá, yananya ya shifa-aaruwa adaba egdze na. Asawa am mba, a ba iya yá elvan ge edderwa: Máki sanakanaaka egdze na wá, daaci haypa yaikke ya guwaa an ka, haypa saksage ká yiyarka d'ekid'eki.

<sup>33</sup> Adaba una ñanna, tasle á ña, belanaabela egdze na a zlarzlala á dá antara egdzara mama-aha-aaruwa, Nawa iya givege nave á ña am kefa-aara.

<sup>34</sup> Yá dá ni, yá yá egdze na am iga? Yá de duwa estara á de katafke á edderwa? A nananka an ice-aaruwa d'ekid'eki palasa na ni á de magana edderwa na.

## 45

### *Yusufa á maratera ire-aara ge egdzara mama-aha-nara*

<sup>1</sup> Am iga á una ñanna maa, nja á emnde na ta jantaave ge ñane na, aley Yusufa dzegwanka ña ervaunde-aara. A kante kwara, a ba ñane: A dardede emnde bademne á degashe. Ba palle ura jauka ázenjara am sarte na ni anjwa á maratera ire-aara ge egdzara mama-aha-ñara na.

<sup>2</sup> Emtsaade wá, a fantau ge kyuwa á ba an ka kwara, haa cenanancena emnde a Misera. Dete ba emnde a há á Firawna keni cenanancena una.

<sup>3</sup> Daaci a ba ñane á elvan ge egdzara mama-aha-ñara: Degiye una ba iya Yusufa. Zlabe anjwa edderwa an shifa? Palle á ura dzegwandzegwa eptsanaa jawapa baaka am egdzara mama-aha-ñara na. Adaba bademme-aatare tá anjwa á gyagya ba seke maagara á katafke-aara.

<sup>4</sup> A ba ñane á elvan ge itare: Gawaptega ásezerwa! Ta ganaptehe. A be ñane á elvan ge itare: Ba iya una ya Yusufa, egdze a emmekure na ni kwa naba veluhe á dem Misera na.

<sup>5</sup> Amá kina wá, a wesheka ire á kure, hyawanaaka lyuwa ge ire á kure geni ña magan ge uwe una. Duksa nanna wá, a siyaa ba Dadaamiya ásehuna zunñwe arge kure, geni yá lyelya shifa á kure.

<sup>6</sup> Kina magaamaga yawe buwa waya am larde, amá a yaa yawe ilyeße zlabe adaliya baaka herdá, baaka duksa na ni tá de sana emnde á sem mba.

<sup>7</sup> Dadaamiya a bela iya zunñwe ákatafke á kure á sem larde na wá. ba geni a lyelye shifa á kure, a zluka wulfe á kure ba d'ekid'eki am duniya na. Lyakurselye an tsaka ire.

<sup>8</sup> Duksa palle wá, kwa beliyaa kure ka asehuna, amá á beliyaa ba Dadaamiya an ire-aara. A give male yaikke an tsaka ire am kwara á Firawna bademme. Há á Firawna antara haha á Misera bademme á ba am erva-aaruwa.

<sup>9</sup> Kina wá, eptsaweptsá watsewatse á dá, de ndawanndaha ge edderwa: a ba egdze á ña Yusufa wá, Dadaamiya givege ura yaikke, haha á Misera bademme á ba am erva-aaruwa, sawa ásezerwa, shekwaaka d'ekid'eki.

<sup>10</sup> Nawa kwá se nja ba herzhe an iya am haha á Gausan antara egdzara á ña antara eggye-aha á ña, kyawe-aha á ña, nawe-aha á ña, badamme a nazena am rezege á ña.

<sup>11</sup> Yá se geleka ba iya, adaba zlabe waya a yaa yawe ilyeße. Yá se vakte naza za á ña antara huße á ña bademme antara ba dabba-aha á kure keni bademme.

<sup>12</sup> A farhe zlabe adaliye, a be ñane á elvan ge itare: Abi kwá anjwa á nanna ba kure keni an ice á kure? Baaka d'eme seke ekka Bainjamainj. Kina wá, diyakurreddiye geni iya Yusufa una yá anjwa ndakur elva na.

<sup>13</sup> Zlauzlala kwa mazle-aara, de ndawanndaha ge edda ngahire na ni ya shanaa iya am haha á Misera bademme na. Tsakawansetseke nazena ni

kwa nanaa kure am nja-aaruwa bademme. Sawiyansa irice-aara ásehuna shekwawaaka dekodeki.

<sup>14</sup> Am iga a una ñanna, takwalle a ñañem Bainjamainj am uksuwe, bukerde— aatare farantaufe ge kyuwa.

<sup>15</sup> Zlaruzle antara Bainjamainj, a fantau ge ñaña egdzara mama-aha-ñara umele á dem uksuwe ma ware-aazare keni, ámbera á kyuwa. Lauktu egdzara mama-aha-ñara na sharansha ndzedá ge ndaha elva antara ñane.

<sup>16</sup> Daaci daada Iabare ñanna á dem huđe á há á Firawna, ta anjwa á enndaha emnde bademme geni saremma egdzara mama-aha-ñara ge Yusufa, tá anjwa am ekse na. Lyavaalya ervaunde á Firawna elva ñanna antara nakwa-aha-aara keni bademme.

<sup>17</sup> A dfante Yusufa, a ba ñane á elvan ge ñane: Ndaterndaha ge egdzara mama-aha a ña na wá, a halarantehala nalkame ate iga á ezzenjwa-ana-aatare, a eptsareptsá á dem larde-aamra am Kanaana.

<sup>18</sup> Eptsá-aatare á dem Kanaana wá, ba ge de sa eddetare anlara há-aatare bademme. Asarsawa ásezerwa áhuna. Asarsawa, yá se vaterte sleđe na ni baaka argina dekideki am haha á Misera bademme na, tá se zana itare nampire á haha na, una shagera-aara ba jipu na.

<sup>19</sup> Ndaterndaha zlađe adaliye elva na: Ya ndasaa iya, vanaterteva baráma, geni a halarantehala darkwa-aha am Misera áhuna ge sá ñwasha-aha-aatare antara egdzara-aatare ira eddetare am huđe-aara, a sarsawa bademme.

<sup>20</sup> A waterka kazlaña-aatare dekideki am ice. Adaba tá se ber umele jauje ba ge una ñanna am Misera ahuna.

<sup>21</sup> Ane, a ba egdzara á Iserayiila, ta eksarhe maga nazena ta ndaternda na.

Yusufa a naba vaterte darkwa-aha á tedana belsa ate una a ndahana Firawna, a vaterte antara naza la na tá maga shula an ñane.

<sup>22</sup> Yusufa a vaterte amara zane-aha palpale ge egdzara mama-aha-ñara ge mbadese vuwa an ñane. Amá ge Bainjamainj wá, a vante amara gursa dermeke keye, ámasla an zane-aha ilyebe.

<sup>23</sup> Kazlaña na a vaterte, ta danan ge eddenjara kenu ge ire aara: a velaante bidale á ezzenjwa kelaawa ge eddenjara, ezzenjwa-aha ñanna bademme tá á ba an duksa ate iga, kazlaña ngelaama ngelaama na am Misera na antara úmá ezzenjwa kelaawa tá an naza za ate iga: nalkame, depainj antara jeba a naza za-aha umele gergere ge shula á eddanjara má watse á kezzla na.

<sup>24</sup> Am iga a una ñanna, a vaterte baráma a dá ge egdzara mama-aha-ñara. Amá a facer magiya, a ba ñane á elvan ge itare: Dagalauka degiya ate baráma!

<sup>25</sup> Daaci ba tse-aatare ge egdzara á Yakubu am Misera na, ta da-aatare ádeza eddetare am !arde á Kanaana.

<sup>26</sup> Ba daada-aatare wá, a ba itare tá elvan ge eddetare: Anjwa Yusufa á ba an shifa-aara. Baira male yaikke ba ñane am larde a Misera bademme. Amá ba seke tá ndaha elva keni diyaaka eddetare na, adaba fetarka an itare.

<sup>27</sup> Egdzara-aara na ta tsakanse eiva-aha á Yusufa bademme, a nanhe an ice-aara darkwa-aha na á tedana belsa, a belanaa Yusufa ge da ñane am huđe-aara na, lauktu a fetuwa am una ñanna maga slera am eddetare.

<sup>28</sup> A naba kame kwara Iserayiila, a ba ñane: Hyaahyawa! Fawarka elva umele mazle-aara, an shifa Yusufa-aaruwa. Sey yá duwa, yá de puwetepuwe ice-aawwa ate nane lauktu yá emtsa.

## 46

### *A kezlese estuwa Yakubu antara emnde-aara bademme á dem Misera*

<sup>1</sup> A naba kezzla Iserayiila an nazena am rezega-aara bademme. De tsekwaatsekwa am ekse á Birsaba maa, a vante sadake á dabba ge Dadaamiya á eddenjara Isiyaaku.

<sup>2</sup> Dadaamiya a naba ndahan elva an vayiya nanna am shene. A naba eddaha: Yakubu, Yakubu. A nutehe: Na am á bina.

<sup>3</sup> A be Dadaamuya á elvan ge njane: Ba iya Dadaamiya, Dadaamiya na a dabanana eddenja na. A wanjka lyawa deki deki ge dem Misera. Adaba yá de yáterteya emnde á njá áhuwa, tá de gev nalga yaikke.

<sup>4</sup> Yá daka ba iya an ire-aaruwa á dem Misera, watse yá saterasa zlafe adaliye emnde á njá á sem tata na. Má watse zlauzle hairire á njá maa, á de hedakanuwa Yusufa an erva-aara ice á njá.

<sup>5</sup> Daaci a naba tsa Yakubu am Birsaba, Iserayiila keni ba njane. Egdzara-aara ta eksame njane antara egdzara-aatare antara njwasha-aha-aatare, ta halateraa am darkwa-aha na á tefana belsa a vatertaa Firawna ge datera am hufe-aara na.

<sup>6</sup> A naba kezzla Yakubu antara emnde-aara bademme á dem Misera. Dabba-aha-aatare antara nalmane-aatare umele na ta ganaa am haha á Kanaana bademme.

<sup>7</sup> A kezlese estuwa Yakubu á dem Misera antara emnde-aara bademme, egdzara-aara zaala antara njwasha Ira eggye-aha-njara bademme.

<sup>8</sup> Nawa zhera á egdzara á Iserayiila na ta sem Misera, amaana Yakubu an egdzara-aara: Egdze a walire á Yakubu wá, Ruubain.

<sup>9</sup> Nawa egdzara á Ruubain: Hanauk, Fallu, Haisrunu ira Karmi.

<sup>10</sup> Nawa Simaun amara egdzara-aara : Yainuyail, Yamain, Auhada, Yakin. Jaukar ira Sawulu. Sawulu wá, a yanaa an egdze á emnde a Kanaana.

<sup>11</sup> Nawa una Laiwi antara egdzara-aara: Gairsaun, Kahat ira Mairari.

<sup>12</sup> Nawa una Yahuuda antara egdzara-aara: tara Air antara Aunan antara Saila amara Farais ira Jara. Amá tara Air antara Aunan wá, ta matsaa am haha á Kanaana. Farais njane ndza an egdzara buwa, tara Haisruna an Hamul.

<sup>13</sup> Nawa una Isakar antara egdzara-aara: Taula, Puwa, Yauba ira Simraun.

<sup>14</sup> Nawa Jabulaun amara egdzara-aara: Sairait antara Ailaun ira Yaklaiyail.

<sup>15</sup> Kwaye njane egdzara á Yakubu na a yanaa an Lee'a am Paddan-Aram. Anjka zlafe egdze a emmetare mukse, zhera-aara Dina. Emnde á Yakubu na a yateraa an Lee'a bademme, a magaa kulkeye ju keye.

<sup>16</sup> Nawa emnde na keni tara Gada antara egdzara-aara: Tara Jaiflyaun antara Haggi amara Suni antara Aisbaun antara Airi amara Araudi ira Arah.

<sup>17</sup> Nawa Asair amara egdzara-aara: Yimna, Yisuwa, Yisuwi, Bairiya ira Sairak egdze a emmetare mukse. Iyau, Bairiya a ye Baibair antara Malkiyail.

<sup>18</sup> Kwaya njane egdzara á Yakubu na a yanaa an Jilpa, kwatena na a vanta Laban ge egdze-aara Lee'a. itare keni ta kelaawa ju unjkahe.

<sup>19</sup> Rahiilu mukse á Yakubu, njane keni a yayan egdzara buwa, tara Yusufa antara Bainjamaij.

<sup>20</sup> Yusufa a ye tara Manasa amara Afrayim. A yateraa am haha á Misera, an mukse-aara Asnat, egdze á Pautifaira liman am Aun.

<sup>21</sup> Nawa una keni Bainjamain̄ antara egdzara-aara: Baila, Baikair, Asbail, Gaira, Na'aman, Aiki, Raus, Muppim ira Arda.

<sup>22</sup> Kwaya ñane egdzara á Yakubu na a yanaa an Rahiilu, ta kelaawa ju ufade.

<sup>23</sup> Tara Dan, tá an egdzeaara Husim.

<sup>24</sup> Nawa Naiftalim antara egdzara-aara: Yaksayail antara Yaijair ira Silaim.

<sup>25</sup> Kwaye ñane egdzara á Yakubu na a yanaa an Bilha, kwatena na a vanta Laban ge egdze-aara Rahiilu, ta vuye.

<sup>26</sup> Emnde á Yakubu na ta sem Misera bademme, ta kul un̄kwahe ju un̄kwahe, baaka ñwasha-aha á egdzara-aara am huđe-aara.

<sup>27</sup> Iyau, antara egdzara á Yusufa buwa na a de yateraa am Misera na maa, emnde á Yakubu bademme ta magaa kul vuye am haha á Misera.

<sup>28</sup> Am sarte na zlađe tá duwa maa, Yakubu a naba bela Yahuuda ákatafke-aara, a belanaa ádeza Yusufa geni a se yainuye am kwara á Gausan. De tsekwaatsekwa Yakubu am tate ñanna antara emnde-aara bademme.

<sup>29</sup> Yusufa keni a naba duhe á de yainu ge edden̄ara am Gausan na, an darkwa-aara á tefana belsa. Má a de puwete ice ate edden̄ara wá, ázarekwa! Takwalle a takwalem edden̄ara na am uksuwe, á kyuwa an yawe á kyuwa na wá, ba ka duhe, haa a shekwaaha.

<sup>30</sup> Ba wera we-aara ge Iserayiila, a ba ñane á elvan ge Yusufa: Kina wá, ma emtsanemtsa keni ba zlauzle mazle-aara, adaba zlađe ká an̄kwa an shifa, ya nakna an ice-aaruwa.

<sup>31</sup> Am iga á una ñanna bademme maa, a ba Yusufa á elvan ge egdzara mama-aha-ñara antara huđe á há á edden̄ara, a ba ñane á elvan ge itare bademme-aatare: Kina wá, yá de mbedanumbede ge Firawna, a ba iya á elvan ge ñane: Egdzara mama-aha-aaruwa antara huđe á há á edderwa na ndza tá am haha á Kanaana na bademme saremsa ásezerwa.

<sup>32</sup> Yá de ndandaha antara slera á kure bademme, geni kwa emnde a gela dabba-aha, sakuremsa antara dabba-aha á kure bademme, nawe-aha, kyawe-aha, essla-aha antara nalmane á kure umele, sakuremsa an kazlaña á kure bademme.

<sup>33</sup> Máki a dakurdaha Firawna. a ndavakuruhe, ázara slera á kure wá,

<sup>34</sup> bawananba a ba kure: Ambarka á ña, nave-aha á ña ta emnde a gela dabba-aha. Kwaye am egdzarire sem vatena slera á ñere ba piya, ña an̄kwa á maga ba slera á eggye-aha ñere. Estuwa wá, watse tá vakurte kwara á Gausan ge sle|đe á nja á kure. Adaba emnde a Misera tá higarka ge emnde a gela dabba-aha, ma nawe-aha, ma kyawe-aha keni.

## 47

<sup>1</sup> Daaci ba zlala-aara ge Yusufa na ádeza Firawna, a danaa labare, a ba ñane: Ambarka á ña, degiya saremsa tara edderwa antara egdzara mama-aha-aaruwa bademme. Saremsa antara nawe-aha-aatare, kyawe-aha-aatare, esla-aha-aatare antara nalmane-aha-aatare umele bademme, saremsa á sawa am haha á Kanaana. Nawa ta tsekwaam kwara á Gausan.

<sup>2</sup> Daaci a daa emnde ilyeđe am egdzara mama-aha-ñara na á de katafke á Firawna.

<sup>3</sup> Firawna a ndavateru elva ge egdzara mama-aha-ñara ge Yusufa na, a ba ñane: Azara slera á kure? Ta eptsanaa jawapa. a ba itare: Ña emnde a piya ámbarka á ña. Njá an̄kwa á maga ba slera á eggye-aha á ñere.



<sup>4</sup> A ba itare zlaɓe adaliye tá elvan ge Firawna: Anƙwa waya yaikke an tsaka ire am Kanaana ámbarka á ɗa. Ba tate á piya dabba-aha keni tá shanka nave-aha á ɗa mazIe-aara. Adaba una ɗanna nawa saɗeremsa, ɗa wayve-aha am iarde á ɗa. Ká yanerya emtu ámbarka ɗa njinja am Gausan?

<sup>5</sup> A ba Firawna á elvan ge Yusufu: Samsa eddeɗa na ni a yakaa ba ɗane na antara egdzara mama-aha a ɗa asetevge ekka.

<sup>6</sup> Kwaye Iarde á Misera baɗemme á katafke á ɗa, zharaternaazhara sleɗe ɗgelaama na baaka argena ɗekiɗeki na, njatersaanja am huɗe-aara. Tá naba njiinja am Gausan ɗanna keni baaka lambe-aarare. Ma tá anƙwa emnde na diyardrya slera ɗanna be shagera am dagave-aatare maa, ká naba gatervege male-aha arge sum-aha-aaruwa baɗemme.

<sup>7</sup> Am iga a una ɗanna maa, Yusufu a daa eddeɗara keni á de katafke á Firawna, a de marananhe. Yakubu a gar barka ge sleksu Firawna.

<sup>8</sup> Firawna a ndavanu ge Yakubu: Yawe á ɗa wanyara kina baɗemme?

<sup>9</sup> Yakubu a eptsanaa jawapa, a ba ɗane: Yawe-aaruwa dermeke an kulkeye, ya ba seke wayve am duniya na. Ya nanna zlada-aha gergere am nja-aaruwa baɗemme Aley keni iva-aaruwa kwakya ba naza eggye-aha-aaruwa zlaɓe adaliye.

<sup>10</sup> Daaci Yakubu a gan barka zlaɓe adaliye ge Firawna, lauktu a sessehe ázeɗara.

<sup>11</sup> Daaci Yusufu a de vaterte sleɗe ge rara eddeɗara antara egdzara mama-aha-ɗara. A de vaterte sleɗe na ni baaka argena ɗekiɗeki na am haha á Misera baɗemme, ba seke una a ndahanaa Firawna. Kwara ɗanna Ramsais, sleɗe-aatare una ɗanna.

<sup>12</sup> Yusufu a vante zlaɓe adaliye ge eddeɗata antara egdzara mama-aha-ɗara nazu ta ezza. A vaterte ate keziakula á emnde-aha-aatare, ba kelaa nazu á fa erva am mbuwe na.

#### *A kwuranaa estuwa Yusufu Iarde a Misera*

<sup>13</sup> Waya na, yaikke an ndzedaãara. Baaka naza za ɗekiɗeki am duniya, emnde a Misera antara emnde a Kanaana baɗemme tá anƙwa á maga ba palasa ge waya.

<sup>14</sup> Shuɗgu na ndza am erva á emnde Misera antara emnde a Kanaana baɗemme damda am erva á Yusufu, shakwarepshakwe nalkame an ɗane. ɗane keni maa, a daa shuɗgu na á dem mba á Firawna.

<sup>15</sup> Am zlauzle shuɗgu am erva á emnde baɗemme am Kanaana antara am Misera, ta naba sawa emnde a Misera á se katafke á Yusufu, a ba itare tá elvan ge nane: A waɗera waya. Ba ká zharanjerzhara ɗá emtsa adaba baaka shungu á ɗere emtu?

<sup>16</sup> A ba Yusufu á elvan ge itare: Má baaka shuɗgu, sawansa dabba-aha á kure lauktu yá vakurte nalkame. Sawansa dabba-aha á kure kwa mbeɗana an ɗane.

<sup>17</sup> Daaci ta fantau ge hala dabba-aha á sawa. Belsa-aha, ezzeɗwa-aha, esla-aha, kyawe-aha antara nawe-aha baɗemme tá anƙwa á sanansa ge Yusufu na. Ate iva ɗanna wá, ta ivaa, á za ɗafa á ba an dabba-aha-aatare.

<sup>18</sup> Ta yivetehe, saliye á shifa-aara keni ta sawhe zlaɓe adaliye áseza Yusufu, a ba itare tá elvan ge ɗane: Ambarka á ɗa, ba ka keni diyakdiya sunƙu á ɗere baaka, kwaye ba dabba-aha á ɗere keni baaka zlauzle gevge atuge ekka. Baaka duksa na ɗá sawa an ɗane mazla-aara, máki vuwa á ɗere ka. A yanerar ba fahe antara vuwa a ɗere kina.

<sup>19</sup> Ha! kwá zharanera á ba an ice á nǎ emtsemtsa ge waya, fahe-aha a nere á de gev kaamba ba dey emtu ambarka á nǎ? Naba vawanerteva naza za, shekwawanershekwe nere antara fahe-aha á nere bademme, nǎ gevge nave-ah á Firawna. Naba vawanerteva wulfe, geni nǎ shansha nazu nǎ nǎ shifa á nere an nane, fahe-aha á nere keni kedaaka.

<sup>20</sup> Daaci Yusufa a shekwanve haha á Misera bademme ge sleksu Firawna, adaba waya nanna jauje ge ndzedá á emnde bademme. Emnde a Misera bademme valaruvala fahe-aha-aatare. A magava estuwa, lauktu haha á Misera bademme a gev ba naza á Firawna halal.

<sup>21</sup> A gaterve estuwa Yusufa emnde a Misera bademme nave-aha á Firawna, an tate pane ka.

<sup>22</sup> Sey ba fahe á liman-aha palle una shekwaaka, adaba ankwá shairiya a puwetaa Firawna ate fahe á liman-aha. Daaci ta zanaa ba itare fahe-aha-aatare na a vatertaa Firawna, itare wá, velarka fahe-aha-aatare dekideki.

<sup>23</sup> A be Yusufa á elvan ge emnde bademme: Kina wá, shekwanakurepshekwe. Kure ire á kure antara fahe-aha á kure kwá atuge Firawna. Nawa yá vakurte wulfe, de jauja am fahe-aha á kure bademme.

<sup>24</sup> Amá am ice duksa ma gyegakuragyega wá, am duksa ilyebe, ilyabire na wá, kwá vante ge Firawna. Ufade na wá, una nanna naza á kure. Wulfe á kure watse kwa jana am shifa antara naza za á kure antara egdzara á kure ira emnde na tá am huđe á há a kure bademme.

<sup>25</sup> Tá nwanante ge emnde bademme, a ba itare: Hyahya ndzedá á kure ámbarka á na, lyakuraneraalya. Ura-ara keni ká fanerwa ba ka tsawe hyema wá, eksanerarekse nǎ nave-aha á Firawna.

<sup>26</sup> Daaci Yusufa a naba tsaa shairiya ge larde á Misera bademme, a ba shairiya nanna: Am duksa ilyebe ilyebire naza á Firawna. Sem vatena keni ta tsaa á ba ate una nanna. Sey ba fahe á liman-aha palle una gevka atuge Firawna na.

### *Namaana na a vantaa Yakubu ge Yusufa*

<sup>27</sup> Daaci njarinja Iserayiila-aha am haha á Misera, am kwara á Gausan. Sharansha sleđe-aatare, tá ankwá á huya á ba an ndzedá, yanrteye jipu.

<sup>28</sup> Yawe á Yakubu am Misera, yawe kelaawa ju vuye. Am lauktu na a emtsa Yakubu wá, iva-aara deremke an ku! ufadđe ju vuye.

<sup>29</sup> Am sarte na diyeddiye Yakubu am vuwa geni herzhe emtsa-aara, a naba dante egdza-aara Yusufa, a ba nane á elvan ge nane: Má ba jirire hayakihaya wá, magiyanmaga shaigerire antara jirire, hedfika am Misera áhuna dekidfekki. Nawa fiyemfa erva á nǎ am dagave á sera-aha-aaruwa, ziyuze wada,

<sup>30</sup> ma emtsanemtsa eksiteksa yaka am Misera áhuna, de zlaviyazlava am irekhya á eggye-aha-aaruwa. A eptsanaa jawapa Yusufa, a ba nane: Yá de magan ba seke una ka binaa ka na edda.

<sup>31</sup> A ba Yakubu: Sey má zakiyuze wadfa. A naba zanu wadfa na Yusufa. Am iga a una nanna maa, Iserayiila a naba gaavehe ate ire á egdera-aara, ankwa á slafa we-aara.

## 48

### *Yakubu a gaterar barka ge tara Aifrayim antara Manassa*

<sup>1</sup> Am iga á una nanna wá, ta danaa labare ge Yusufa, geni lapika eddenjara. Yusufa keni a eksetaa egdzara-aara buwa, tara Aifrayim antara Manassa, ta duwa kerđe.

<sup>2</sup> Ta de mbedanuhe ge Yakubu geni samsa egdze a ɲa Yusufu, anƙwa ágashe a sawa ásezeɲa. A naba magaa dzaɲdzanɲire, zlahhe a tsetehe, a njehe ate egdera-aara.

<sup>3</sup> Damda Yusufu maa, a ba Yakubu á elvan ge ɲane: Dadaamiya Slekse a naba mariya ire-aara ge iya am Luus am haha á Kanaana, a giyar barka.

<sup>4</sup> A ba ɲane á elvan ge iya: Yá gakvege ura kwakya jeba-aara jipu, haha na keni yá de vaterte ge emnde á ɲa, á de gev naza-aatare dem ba ge deƙideƙi.

<sup>5</sup> Daaci a ba ɲane zlaɓe adaliye á elvan ge Yusufu: Egdzara á ɲa buwa na ka yateraa am haha á Misera áhuna, tara Aifrayim antara Manassa, ba lauktu yá semsa ya ásezeɲa keni itare tá an ya na wá, itare ta ba kalkale antara Ruubain antara Simaun-aaruwa.

<sup>6</sup> Amá emnde na ka yateraa am iga-atara na wá, emnde ɲanna wá, egdzara á ɲa. Tá an dza warata-aatare adaba emnde buwa na.

<sup>7</sup> Adaba am sarte na ya átira sa am Paddan-Aram, a yaɲerar ba cekwaanɲudi herzhanɲerameherzhe Aifrata wá, a naba emtsiyarhe ge Rahiilu emmeɲa. Daaci ya naba hedehe emmeɲa am baráma Aifrata ɲanna, am haha á Kanaana. Aifrata ɲanna wá, tá dɗahana an Baytilaama kina.

<sup>8</sup> A ba am sane ɲanna maa, Iserayiila a naa egdzara á Yusufu, a ba ɲane: Una mu egdzara á ware?

<sup>9</sup> Yusufu a ɲwanáne ge eddeɲara, a ba ɲane: Egdzara-aaruwa na a vitaa Dadaamiya am Mtsera áhuna. A be eddeɲara: Satersa áse katafke-aaruwa, yá gaterar barka.

<sup>10</sup> Am sane ɲanna, Iserayiila gevge emgyegwe an tsaka ire, gulaagula ndzedá á ice-aara jipu, á nanka ɲgelaama. Daaci Yusufu a daterhe egdzara-aara na ádekatéfke-aara, a halateremhe am huviye, a ɲateraahe takwalle.

<sup>11</sup> Daaci a ba ɲane á elvan ge Yusufu: Ndza a tamanaa ware ganakini watse yá puwete ice-aaruwa ate ka mazle-aara. Amá vatena na wá, a naba jamimehe zlaɓe adaliye ge Dadaamiya antara ba egdzara á ɲa keni ya natema.

<sup>12</sup> Daaci Yusufu a tsekwaterahe egdzara-aara na ate sera-aha a eddeɲara na, a kesle ugje am haha, wafke-aara ba teppe ate haha.

<sup>13</sup> Am iga a una ɲanna maa, a halaterte ge Yusufu egdzara na bukerde-aatare ákatafke á Iserayiila. Aifrayim a eksanaa an naɗafa-aara am nazlaɓa á Iserayiila, Manassa a eksanaa an nazlaɓa-aara am naɗafa á Iserayiila. A gante egdzara na ádezeɲara.

<sup>14</sup> Iserayiila a pelese erva á naɗafa-aara a fanem am ire ge Aifrayim, amá wá, kudere nane. Nazlaɓa-aara keni a fanem am ire ge Manassa. diyaadiya tsa geni male ba ɲane.

<sup>15</sup> Daaci a fantau ge gan barka-aara ge Yusufu, a ba ɲane: Yá anƙwa á ɲala Dadaamiya na ndza tá ákatafke-aara tara eggyerwa Ibrahiima antara edderwa Isiyaaku, Dadaamiya na ni a tsufete shifa-aaruwa sem vatena na,

<sup>16</sup> antara Malika na a tsufite am emtanƙire baɗemme na, geni a gaterar barka ge egdzara na. Adaba barka-aatare, a kedeka zhera-aaruwa antara zhera á eggyerwa Ibrahiima ira zhera á edderwa Isiyaaku. A yaiterteya Dadaamiya, a hyairemhye am larde baɗemme.

<sup>17</sup> Am sarte na Yusufu a naa eddeɲara a fanem naɗafa-aara am ire ge Aifrayim ɲane higaaka deƙideƙi. A de ɲaa erva á eddeɲara na ganakini a janaaja am ire ge Aifrayim na, á fanemfa am ire ge Manassa.

<sup>18</sup> A ba ɲane á elvan ge eddeɲara: Estuwa ka edda! Nawa male una, fanemfa nadafa á ɲa am ire ge ɲane.

<sup>19</sup> Amá a naba kwalefhe ge eddeɲara, a be ɲane á elvan ge ɲane: Diyandiya egdze-aaruwa, diyandiya baɗemme. ɲane keni watse á de gev ura male, á de gev eddarge nalga yaikke. Amá wá, á de januje kudereɲara. A de januje kudereɲara an yaikkire, ɲane á de gev eddarge nalga-aha kwakya.

<sup>20</sup> Vacite ɲanna a gaterar barka, a ba ɲane am e!va-aara: Iserayiila-aha baɗemme tá de ga barka an zhera á ɲa. Ta de ba: A gagvege Dadaamiya sake tara Aifrayim antara Manassa. A ganve estuwa Aifrayim male arge Manassa.

<sup>21</sup> Am iga a una ɲanna maa, a ba ɲane á elvan ge Yusufa: naza-aaruwa zlauzle mazle-aara, yá de haraaka kwakya. Amá a tsufakurtsa Dadaamiya, a eptsakuraptsa zlaɓe adaliya á dem haha á eggye-aha á kure.

<sup>22</sup> Am haha ɲanna wá, ya vakte kwara á Sikaím ge ekka. Una ɲanna tá shanka egdzara mama-aha á ɲa umele. Baaka arge tate ɲanna ɗekideki am haha ɲanna baɗemme. Ndza ya Iyiyanaa am erwa á Amauri-aha an katsakar amara gurma-aaruwa.

## 49

### *Yakubu ankwa á gaterar barka ge egdzara-aura kelaawa ju buwa*

<sup>1</sup> Yakubu a ɗetaa egdzara-aara baɗemme, a ba ɲane á elvan ge itare: Sawmbare baɗemme jawammeje ázerwa, Nawa yá ɓalakurse nazu watse á magava ate kure á katafke.

<sup>2</sup> Jawammeje, cenaucena nazu yá bakuma ya ba shagera, kwa egdzara-aaruwa ya Yakubu. Cenaucena nazu yá ndaakura ya, ya eddekure Iserayiila:

<sup>3</sup> Ekka Ruubain wá, ka makaji-aaruwa, ka hakuma-aaruwa ba ka arge egdzara mama-aha á ɲa baɗemme, aɗaba ka ndzedá-aaruwa zuɲɲwe ba ka am sarte na yá an ndzedá á dawalire-aaruwa baɗemme.

<sup>4</sup> Ká puwa sem aha seke ba yawe, ama wá, ká tsa iceka ire. Aɗaba ekka ka naba magiya nazena zlayeka ge iya, kwa naba nja amara palle á ɲwasha-aha-aaruwa.

<sup>5</sup> Tara Simaun amara egdze a emmeoara Laiwi, itare ye-aatare pane, ta emnde a garɗa.

<sup>6</sup> Yanaaya erwaɲɗe-aaruwa sawari-aatare, á ekseka ire-aaruwa dem jahava-aatare ɗekideki. Am ica erwaɲɗe-aatare, ta ceɓa shifa á zaala kwakya. An sunu-aatare ta badzanve shifa á dalau-aha kwakya.

<sup>7</sup> A nyainyainvenyainye Dadaamiya erwaɲɗe-aatare ɲanna, aɗaba kwakya kelaadire am huɗe-aara, baaka zevarzire ázetare. Yá de tegese egdzara-aatare gergere kwakya am haha á Yakubu, yá de zaɗaxarvezáɗe an palpale am dagave á Iserayiila-aha.

<sup>8</sup> Ekka Yahuuda maa, ekka wá, egdzara mama-aha a ɲa baɗemme tá de gala ba zhera á ɲa. Ká de gateraga ba ka an erwa á ɲa kelaade-aha á ɲa é katafke á na. Dete ba egdzara mama-aha a ɲa keni, tá de gana ba itare ire á katafke á na ge ekka.

<sup>9</sup> Ekka Yahuuda-aaruwa wá, ka egdze-aamwa. Ka ba seke ervare na ni a sa am tate a tsagwaɗa dabba a kaamba, hyanhya hyuwa na. Ka egdze-aaruwa ge iya! Má kezlakkezla ugje am haha seke áza ervare zlavakzlava, seke ba mukse á ervare, ware edda-aara á de egjekja ge tsantetse na?

<sup>10</sup> Zade á sleksire wá, á degasheka am huđe á ha á Yahuuda đekideki, hakuma á de nja á ba am erva á emnde-aara, dem sarte na ma samsa edda á zade ɲanna an jirire, eddawna m larde bademme á de fansarfe na.

<sup>11</sup> ɲane watse a se ɲguda ezzeɲwa-aara an egdzere am inabauhi. Watse a reva kacakaca-aara an mbazla á egdze a inabauhi, zane-aara watse a revana an yawe á egdze a inabauhi ɲanna.

<sup>12</sup> Ice-aha-aara á de nja á ba an deva kyanɲe ge mbazla á inabauhi, sera-aha-aara á de geva dzayye telle adaba ufa.

<sup>13</sup> Jabulaun maa, ɲane á de nja ate we á haye, tate á tsekwa pare á yawe-aha. Nakwe á haha-aara ge ɲane á de shanaasha Sidaun.

<sup>14</sup> Isakar wá, ɲane ezzeɲwa na ni ndzendzedá jipu na, á zlava am dale-aha.

<sup>15</sup> Be a naa tate ɲanna emtake ge puwansepuwe am huđe-aara, haha ɲanna keni snagera jipu wá, a naba gaa nahyapaihyape-aara, ge sepa gwatame, a ganve ire-aara nave.

<sup>16</sup> Dan maa, ɲana wá, á de kwaratera ba ɲane emnde-aara ba seke jeba-aha umele am Iserayiila.

<sup>17</sup> Dan, ɲane á garava an zahe na á zlava ate baráma, seke ba pushe na ni á zlava ate we á unɲule, a waa belse ate sera, a naba kezletaare ge eddawna ate iga a belsa ɲanna, an iga an iga, á sete haha na.

<sup>18</sup> Saksage-aaruwa, yá anɲwa á fetare ate ka geni watse ká lyilyire.

<sup>19</sup> Gada maa, watse tá gwargwe emnde a za baráma, amá waíse á bakatera ba ɲane, tá de enzla ba zlahhe.

<sup>20</sup> Amba á Asair wá, watse baaka zlakta á đafa đekideki. Haha ɲanna a de gedeta emnde, watse ta ba seke slekse-aha.

<sup>21</sup> Naiftalim maa, ɲane á garava an kaamba na ni gelgela jipu, zara-aha na ta am huđe á kaamba ɲanna ta zariya-aha jipu na.

<sup>22</sup> Yusufa keni maa, ɲana á garava an nafa na ni an dzeɓa ate we á haye, a ya egdzere shagera, á vala erva-aha-aara átarge riya bademme na.

<sup>23</sup> Kelaade-aha-aara tá naba kata elva-aara, ta naba danaa wava ta puwa gurme ate ɲane,

<sup>24</sup> amá ɲane tsatse degdege an gurme-aara, erva-aara á gyaigyaika đekideki, adaba anɲwa á melanumele suni na ɲane palaha á Iserayiila na, Dadaamiya Slekse na anɲwa á kezlan ugje Yakubu.

<sup>25</sup> A melakumele Dadaamiya na anɲwa á fansarfe eddeɲa na. A vakteva Dadaamiya Slekse barka na á hyana ɲane am yawe á sawa am huđe á samaya antara barka na am yawe na á segashe am huđe á haha na, antara barka na ni á vaterte ya ge ɲwasha na, amara ufa na ta fateru ge egdzera.

<sup>26</sup> Barka-aha na á vakta eddeɲa wá, jauje ge barka-aha na am huđe á wa-aha sadadde na a zleka na antara am egdzar wa-aha bademme. A tsekwanaatsekwa Dadaamiya barka-aha ɲanna á setarge ekka Yusufa, ekka na jakateruje ge egdzar mama-aha a ɲa bademme an malire na.

<sup>27</sup> Bainjamainj wá, ɲane á garave an indale na á ceɓa dabba-aha. An enlya, á za dabba-aha na á cebanaa ɲane, an icawaya á tega nazena a shanaa ɲane.

<sup>28</sup> Kwaya ɲane emnde na watse tá gev jeba-aha á Iserayiila kelaawa ju buwa. Eddetare a tsakaterse elva-aha ɲanna, a gaterar barka. Barka ɲanna maa, a gater an palpale, ma ware-aatare keni á ba an barka-aara.



<sup>29</sup> Am iga á una ñanna baðemme, Yakubu a ndaterse elva na ge egdzara-aara, a ba ñane: Má emtsanemtsa ya, zlalanzlala ádeza eggy-aha-aaruwa wá, kwa de hedíya am hwalakwa na am fahe á Aifruna ura Haiti.

<sup>30</sup> am Makpaila, á dam gedi-aara ge Mamre na. Hwalakwa ñanna, kwaye ndza a shekwanaa Ibrahiima antara fahe ñanna baðemme ge heða emtsa am huðe-aara.

<sup>31</sup> Tara Ibrahiima ñanna antara mukse-aara Saraatu, tara Isiyaaku antara mukse-aara Raibaika, baðemme ta heðatera á ba am tate ñanna, ira Lee'a keni, ya heðanaa ba iya an erva-aaruwa á ba am tate ñanna.

<sup>32</sup> Fahe ñanna antara hwalakwa na am huðe-aara na baðemme an shekwa, ta shekwanaa am erva á Haiti-aha.

<sup>33</sup> Zlauzle am tsakatera elva na Yakubu ge egdzara-aara, tejelemme a zlavehe ate egdera-aara, haaffe a puwese shifa wá, ßaaka zlaazlala ádeza eggye-aha-ñara á faya.

## 50

### *Nawa ta kyuwanaa estuwa Yakubu*

<sup>1</sup> Daaci a duhe ge Yusufa á ba ate watsewatsire, a de mbadar ge eddeñara na, ámbera á kyuwa á dem ice-aara.

<sup>2</sup> Daaci a ba ñane á elvan ge dauktar-aha-aara: Tsatsawanaatsatse vuwa á edderwa ba shagera an waye. Dauktar-aha na ta naba tsatsaa vuwa á Iserayiila an waye-aha antara nazase-aha gergere.

<sup>3</sup> Ate nade-aatare, hare kul ufaðe dauktar-aha na tá tsatsa ba emtsa na an waye-aha antara nazase-aha gergere geni a sefka. Hare kul vuye kalkale emnde a Misera tá ankwá á kyuwa Yakubu.

<sup>4</sup> Am sarte na zlauzla sarte a kyuwa Yakubu, a ba Yusufa á elvan ge waziri-aha á Firawna: Taslawa á kure, máki ßashakurißasha wá, ndawanndaa ge Firawna:

<sup>5</sup> Am sarte na zlaðe an shifa edderwa, a ba ñane sey ká de hedíya am Kanaana. Sey ká ziyuze waða máki watse ká emmaga. Ya naba zanu waða ñanna. Daaci kina wá, a viteva baráma, yá de heðehe edderwa am hwalakwa na ni a tsatsanaa ba ñane kashi-aara am haha á Kanaana, lauktu watse yá sa.

<sup>6</sup> A be Firawna á elvan ge Yusufa: Ezzlala de hehedá eddeña ate una ni a ndaaka ñane na.

<sup>7</sup> Daaci a tsetehe ge Yusufa, ankwá á dá eddeñara na, á de heðana am Kanaana. Ta daa á dabana waziri-aha á Firawna antara male-aha na tá am mba-aara antara male-aha á haha á Misera baðemme.

<sup>8</sup> Tá ankwá emnde á Yusufa nanna baðemme am itare antara egdzara mama-aha-ñara baðemme ira emnde na tá am huðe á há eddetare ñanna baðemme, jauka ura am kwara á Gausan ðekidfeke, sey ta yaa ba egdzara antara dabba-aha.

<sup>9</sup> Kwakya emnde a ßelsa antara emnde na tá an darkwa á teðana ßelsa, kwakya nalga na a daa puwa emtsa á Yakubu.

<sup>10</sup> Daraada am laare Ataada am tate á weðiñe-aha á emnde á ekse ñanna ate iga a guwa Urdun á dem gifde-aara, ta naba fantau ge kyuwa Yakubu áhuwa á ba an ka kwara. Hare vuye kalkale Yusufa ankwá á kyuwa eddeñara áhuwa.

<sup>11</sup> Tá ankwá á zharaterzhara emnde a Kanaana na tá am laare Ataada ñanna, a ba itare am dagave-aatare: Kay! zlazlaða kyuwa ura á emnde a Misera. Aðaba una ñanna, ta fete zhera á tare ñanna á katafke á Urdun: Awil-Miserayim. Amaana: kyuwa á ura á emnde a Misera.

<sup>12</sup> Egdzara á Yakubu magarananmaga ge eddetare ba seke una a katanaa nane a ndaternda na.

<sup>13</sup> Ta naba daa emtsa-aara á dam larde á Kanaana, ta de hedfana am hwalakwa am fahe am Makpaila, fahe na ni ndza a shekwanaa Ibrahiima werre am erva á Aifruna ura Haiti, á dem gedí á Mamre.

<sup>14</sup> Hedareheda eddenara maa, Yusufa a naba eptsasem Misera, nane, egdzara mama-aha-ñara ira emnde na ta daa adabaterdfaba á de hedfa eddenara na bademme.

### *Yusufa a ekhyateraa estuwa ervaunđe ge egdzara mama-aha-ñara*

<sup>15</sup> Am iga a emtsa á eddetare, a ba egdzara mama-aha-ñara ge Yusufa am dagave-aatare: Kina wá, eddemiya ßaaka, emtsamtsa. Má banba Yusufa sey á pelsepele ate miya kelaadire na ndza mi maganta miya na wá, mi magana estara?

<sup>16</sup> Daaci ta naba ßela ura á deza Yusufa an labare na, a ba itare tá elvan ge nane: Nawa elva na a ndaañera eddena am sarte na zlaße an shifa geni watse ñá mbedakumbede,

<sup>17</sup> a ba nane wá, naba zatervarze ge egdzara mama-aha á ña, yateraarya kelaadire na ni ndza ta magaktaa itare na bademme. Daaci a be egdzara á Yakubu, tá elvan ge egdze a emmetare Yusufa: Kina wá, tasle á ña yanjeraarye egdze a emmaye. Adaba kelaadire na ni ndza ña magakta ñere na ba jire wá, naza tsaleka. Naba yanjeraarye, adaba ñere keni né ankwá á daba ba Dadaamiya na ni ndza a dabanana eddena na. Ba a cenaa una ñanna Yusufa wá, a naba fantau ge kyuwa á ba an yawe á kyuwa.

<sup>18</sup> Am iga a una ñanna, ta duhe ba itare an ire-aatare egdzara mama-aha-ñara na, reppe ta de kezle ugje á katafke-aara, a ba itare tá elvan ge nane: Nawa ñere ña nave-aha á ña ámbarka á ña.

<sup>19</sup> Amá a ba Yusufa á elvan ge itare: A wakurka lyawa ðekideki, iya ganafka Dadaamiya.

<sup>20</sup> Ukkure wá, ndza kwa kwamaa magite kelaadire. Amá Dadaamiya a kwamaa eptsante kelaadire ñanna, a ganve hairire ge enzlese emnde kwakya, ba kure keni kwa ankwá á nanna an ice á kure vatena.

<sup>21</sup> Adaba una ñanna, a gazleka ervaunđe á kure ðekideki, yá fakurufe hyema antara ñwasha-aha á kure ira egdzara á kure bademme.

Yusufa a ekhyateraa estuwa ervaunđe, lauktu ta shetaa higa.

### *Emtsá á Yusufa am Misera*

<sup>22</sup> Daaci Yusufa a nja am Misera antara huđe á há á eddenara bademme. Yawe á Yusufa bademme a magaa dermeke an kelaawa.

<sup>23</sup> Yusufa nanna egdzara á egdze-aara Aifrayim dem eggye buwa. Emnde á Manasse maa, eggye-aha-ñara ge buwire, egdzara á Makir a gelateraa ba nane, ta walete á ba am huvuye-aara.

<sup>24</sup> Am sarte na herzhe watse á emtsa Yusufa, a ba nane á elvan ge egdzara mama-aha-ñara: Iya wá, ya ßaaka am dza á kure mazle-aara, amá Dadaamiya ankwá antara kure ma vaatere keni. Á de tsakurta ba nane am larde na, á de dakura á dem larde na ni a baa watse á vaterte ge tara Ibrahiima antara Isiyaaku ira Yakubu, a zateru ba wadfa-aara na.

<sup>25</sup> A be nane zlaße adaliye: Má tsekwaatsekwa Dadaamiya zakurvarze ge kure wá, taslawá á kure yawanka hyaihye-aaruwa áhuna, dawanda am erva bademme. A faterar za wadfa, a ba nane: Zawiyuze wadfa ma watse kwá emmaga. Ta zanu wada na.

<sup>26</sup> Á emtsa Yusufu am Misera wá, yawe-aara dermeke an kelaawa. Ta tsekwanme emtsa-aara am nazase, ta zlavanaahe am nakwati á nákwá am Misera ɲanna.

## Labare á higa na a puwetaa MATA

*\*Kergema á eggye-aha-ɲara ge Yaisu \*Almasiihu  
(Luka 3:23-38)*

<sup>1</sup> Náwa \*kergema á eggye-aha-ɲara ge Yaisu \*Almasiihu. Ɗane ta yanaa am emnde á \*Dawuda. \*Dawuda keni wulfe á Ibrahimia.

<sup>2</sup> Ibrahimia a yese Isiyaaku, Isiyaaku a yese Yakubu, Yakubu a yese Yahuda antara egdzara a mama-aha-ɲara.

<sup>3</sup> Yahuda a yese tara Farais, antara Jara, a yateraa an Tamar. Daaci Farais a yese Haisruna, Haisruna a yese Aram,

<sup>4</sup> Aram a yese Aminadabu, Aminadabu a yese Nasanu, Nasanu a yese Salmuna,

<sup>5</sup> Salmuna a yese Bauyais, a yanaa an Rahab. Bauyais a yese Aubaid, a yanaa an Rut, Aubaid a yese Yaisa,

<sup>6</sup> Yaisa a yese \*Dawuda, ba ɲane una gevge slekse na. \*Dawuda a yese Suleymanu, a yanaa an mukse na ndza mukse á Uriya na.

<sup>7</sup> Suleymanu a yese Raubawam, Raubawam a yese Abiya, Abiya a yese Asa,

<sup>8</sup> Asa a yese Yusafat, Yusafat a yese Yauram, Yauram a yese Ujiya,

<sup>9</sup> Ujiya a yese Yauwatam, Yauwatam a yese Akas, Akas a yese Haijaikiya,

<sup>10</sup> Haijaikiya a yese Manasa, Manasa a yese Amaus, Amaus a yese Yusiya,

<sup>11</sup> Yusiya a yese Yaihukiya antara egdzara a mama-aha-ɲara am sarte na ta kyaa emnde a \*Iserayiila á dem \*Babila na.

<sup>12</sup> Am iga á una ɲanna maa, Yaikuniya a yese Salatiyail, Salatiyail a yese Jauraubabila,

<sup>13</sup> Jauraubabila a yese Abihuda, Abihuda a yese Ailiyakim, Ailiyakim a yese Ajaura,

<sup>14</sup> Ajaura a yese Sadauka, Sadauka a yese Akim, Akim a yese Ailihuda,

<sup>15</sup> Ailihuda a yese Ailiyajaaru, Ailiyajaaru a yese Mattan, Mattan a yese Yakubu,

<sup>16</sup> Yakubu a yese Yusufa zhele á Maari na a yaa Yaisu na tá dahaná an \*Almasiihu.

<sup>17</sup> Daaci kezlakula á jeba-aha ɲanna, a fetuwe áte Ibrahimia sem zamane á \*Dawuda, á maga jeba kelaawa ju ufafe. Fantau áte \*Dawuda sem zamane na ta kyaa emnde a \*Iserayiila á dem \*Babila, jeba kelaawa ju ufafe. Tsante am zamane ɲanna, sem sarte na ta yaa Yaisu \*Almasiihu keni, jeba kelaawa ju ufafe.

*Laukta á ya Yaisu \*Almasiihu  
(Luka 2:1-7)*

<sup>18</sup> Náwa a sawa estuwa lauhta ta yese Yaisu \*Almasiihu. Emmeɲara Maari wá, á shebaná ba Yusufa. Ba lauhtu á danaada Yusufa á dem mbaaara keni, kertenj Maari lyemlye huɗe an hákuma á Shedekwe Cufedɗe.

<sup>19</sup> Daaci zhele-aara Yusufa maa, ɲane dzayye ervaunde-aara, wayeteka ɗekideki ganakini á balaná áza emnde, á kátá yanya á ba an nasherire.

<sup>20</sup> Daaci ba ɲane keni átira dzama una ɲanna, a naba jesaarhe ge malika á Yaakadada á katafke-aara am shene, a ba ɲane á elvan ge ɲane: «Yusufa egdza á \*Dawuda, a wanjka lyáwá ge gá mukse á ɲa Maari. Adaba egdze na am huɗe-aara na wá, a lyanmá ba Shedekwe Cufedɗe an hákuma-aara.

<sup>21</sup> Á de yá egdzere zhele, ká de faná zhera á Yaisu, adaba á de lya emnde-aara am haypa-aha-aatare.»

<sup>22</sup> Bademme á una nanna, ankwa á magava á ba áte una ndza a ndahanaa Yaakadada á kya an we á nabi na kalkale. Adaba a ba nane:

<sup>23</sup> «Náwa watse á shá huđe gyaale na zlađe diyaaka zhele na, á de yá egdzere zhele, zhera-aara wá, tá de dfahaná an Aimanuwail.» Zhera nanna wá, á kátá ba: Dadaamiya ankwa antara miya.

<sup>24</sup> Daaci tsetsa Yusufa am háre, a magán ba seke una a bannaa malika á Yaakadada na. A naba gá Maari ge mukse-aarire.

<sup>25</sup> Amá Yusufa njaaka antara Maari dfekideki seke tara zhele an mukse, dem sarte na a yese egdze-aara egdzere zhele na. Daaci Yusufa a fete zhera á egdzere Yaisu.

## 2

### *Emnde a ilmu ta se zhara Yaisu á sa am gedí*

<sup>1</sup> Am sarte na yareya Yaisu am Baytilama, am kwara á Yahudiya, am zamane á \*Hirudus, ta naba semhe ge emnde a ilmu á sem Urusaliima, ta sawa á sa am gedí.

<sup>2</sup> A ba emnde a ilmu nanna: «Áma nane slekse á Yahudiya-aha na ta yán ba herzhe na? Adaba naneránna terlyakwa-aara á sa am gedí. Adaba una nanna na se kezlan ugje.»

<sup>3</sup> Ba a cenaa una nanna sleksu \*Hirudus, ba palle a názu á enndaha keni baaka. Bademme á emnde a Urusaliima diyarka názena tá ndahaná itare.

<sup>4</sup> Daaci sleksu \*Hirudus a naba jatermaare ge male-aha á \*liman-aha, antara malum-aha na tá am larde-aara bademme, a ndavateruhe elva, a ba nane á elvan ge itare: «Ate una am wakita á Dadaamiya mu, ta baa watse tá yáná áma nane \*Almasiihu?»

<sup>5</sup> Ta nwanante, a ba itare: «Am Baytilama, am kwára á Yahudiya. Adaba a bá nabi á Dadaamiya áte elva nanna:

<sup>6</sup> “Ekka Baytilama am kwára á Yahudiya wá, gakefka cekwa am ekse-aha na tá am Yahudiya dfekideki. Adaba watse á jesaare am ka slekse yaikke na watse á náná nane larde-aaruwa \*Iserayiila.” »

<sup>7</sup> Daaci sleksu \*Hirudus a naba dante emnde a ilmu na an nasherire, ta shanuwa itare jirire á sarte na ni a jesaara terlyakwa átekwa na.

<sup>8</sup> A belaa ba itare nanna zlađe adaliye slekse á dem Baytilama, a ba nane á elvan ge itare: «Dawmbare, de tatayawtátaya egdze nanna ba shagera. Máki shakuránsha wá, sawmbare mbedawiyumbede labare, iya keni yá de kezlan ugje.»

<sup>9</sup> Daaci cenarvaacena emnde a ilmu elva na a baternaa slekse, lauktu ta zlala. Am sarte na tá ankwa á zlala maa, tá zhára ba terlyakwa na ndza ta zharanaa á sawa am gedí na, ankwa á zlala á katafke-aatare. Ba daada terlyakwa nanna arge sleđe na ni ankwa egdzere átekwa na wá, a naba tsaahé mazla-aara.

<sup>10</sup> Ba ta naa terlyakwa na tsaatse, ta naba higete an ervaunđe-aatare bademme.

<sup>11</sup> Daaci ta naba demhe á dem bere, ta de beraa egdzere ánwaslire, antara Maari emmenara, daaci ta kezlaa ugje am haha, ta kezlanaa ugje na ge egdze nanna. Ta palaa kazlanaa-aatare, ta vante sadake á dindar, antara dfagwala á názase, umele keni yawyawe-aara am kudera ge egdze nanna.



<sup>12</sup> Am iga á una ñanna maa, Dadaamiya a naba fatermaa am vuwa ge emnde a ilmu na am shene, ganakini a eptsarka á deza \*Hirudus mazla-aara. Daaci ta naba eksetaa baráma-aatare umele, ta naba dá-aatare á dem larde-aatare.

*Yusufa á zhagade an egdzere á dem Misera*

<sup>13</sup> Am sarte na daraada emnde a ilmu, a naba tsekwehe ge malika á Yaakadada á deza Yusufa am shene, a ba ñane á elvan ge ñane: «Tsetse ba kina an egdzere ira emmenjara, ezzlala á dem Misera dem sarte na watse yá bakaná ya ganakini sawa á sá. Adaba watse \*Hirudus á tataya egdzere ge já shifa-aara.»

<sup>14</sup> Daaci a naba tsetehe ge Yusufa á ba an vayiya ñanna an egdzere, ira emmenjara, a naba zlala an itare á dem Misera.

<sup>15</sup> Ta de njaa am Misera dem sarte á kedfa \*Hirudus. Una ñanna a magava ba kalkale antara názena ndza a balanaa Yaakadada á kya an we á nabia-aara. Adaba a ba ñane: «Egdza-aaruwa wá, watse yá dfahaná á sa am Misera.»

*A ba sleksu \*Hirudus a cebarceba egdzar zála*

<sup>16</sup> Am nanna sleksu \*Hirudus ganakini emnde a ilmu magarka áte una a katanaa ñane, a naba jehe ge ervaunđe, a ba ñane, a cebarceba egdzar zála bademme am Baytilama, antara am kwára á ekse-aatare bademme. A ba ñane, a cebarceba egdzara na zlahe sharnaaka yawe bubuwa na, antara ba emnde na sharnaasha yawe bubuwa keni bademme. Ba kelaa egdzara na ta yateraa am sarte na ni a jesaara terlyakwa áte una ta se kwaransaa emnde a ilmu na a jaruka an shifa dfekideki.

<sup>17</sup> Daaci una a gevaa ba názena ndza a balanaa nabi Yairaimiya werre na. A ba ñane:

<sup>18</sup> «Njaanja hula am Rama, anjka kyuwa antara dfakwa á ba an ká kwára. Rashail anjka á kyuwa egdzara-aara, wayaaka tá ekhyaná ervaunđe dfekideki, adaba ta baaka egdzara-aara an shifa.»

*Eptsa an egdzere á sa am Misera*

<sup>19</sup> Am sarte na emtsamtsa sleksu \*Hirudus, a naba tsekwe ge malika á Yaakadada á de katafke á Yusufa am Misera am shene.

<sup>20</sup> A ba ñane á elvan ge ñane: «Ettsetse, eptsepts a an egdzere antara emmenjara á dem \*Iserayiila. Adaba emnde na ndza tá kátá shifa á egdzere na tá baaka an shifa mazla-aara.»

<sup>21</sup> Daaci a naba tsetehe ge Yusufa antara egdzere ira emmenjara, ta naba sá-aatare á sem \*Iserayiila.

<sup>22</sup> Amá cenáncena Yusufa ganakini Arkilawus egdza á sleksu \*Hirudus demda am sleksire á eddenjara, ge kwára larde á Yahudiya, jaaja lyawa ge de njá am larde ñanna mazla-aara. Am jaaja lyawa ñanna, Dadaamiya a naba kwaranse názena á maganá ñane am shene.

<sup>23</sup> Daaci a maganaa á ba áte una ñanna lauktu a de nja am Nasarátu am kwára á Galili na. Una ñanna, gevge á ba áte una ta ndahanaa nabi-aha werre. A ba itare: «Watse tá dfahaná an ura Nasarátu.»

### 3

*Waazu á Yuhanna slemaga baptisma  
(Mark. 1:1-8; Luka 3:1-18; Yuh. 1:19-28)*

<sup>1</sup> Shekwaashekwa duniya maa, a naba jesaarehe ge Yuhanna slemaga baptisma, a fantau ge bálá waazu am kaamba a Yahudiya.

<sup>2</sup> A ba ɲane am waazu-aara: «Magaumága tuba, aɗaba herzhapteherzhe sarte na ni emnde tá ɲjá am \*kwára á Dadaamiya.»

<sup>3</sup> Yuhanna ɲanna wá, nabi Aisaya ndza a enndahá elva-aara, a ba ɲane: «Aɲkwa ura á bala elva am kaamba, a ba edda-aara: Tsatsawanaat-satse unɲule ge Yaakadada, tsawanaatse baráma-aara, a gevge ba ndedde.»

<sup>4</sup> Am sarte ɲanna wá, Yuhanna ndza a tsekwa nanɲyuwe na ta hanaa an úgje á ezlegwame, ndza á ɲgudá ba gwagwa. Náza za-aara keni maa, á za ba iwe, antara nama.

<sup>5</sup> Daaci emnde a Urusaliima, antara emnde na tá am kwára á Yahudiya baɗemme, antara emnde a ekse-aha na ta herherzhe an guwa á Urdun na baɗemme ta sesehe, ta sezeɲara.

<sup>6</sup> Emnde ɲanna ta naba sanse haypa-aha-aatare, ta magaa tuba. Daaci Yuhanna keni a naba baraterve am guwa á Urdun.

<sup>7</sup> Am nanna Yuhanna ganakini tá aɲkwa á sawa \*Farisa-aha, antara \*Saduki-aha ásezeɲara kwakya, tá se ndavanu baptisma, a ba ɲane á elvan ge itare: «Egdzara á kelaade-aha na, a bakurnaa ware ganakini magaumága tuba, watse kwá de enɲlesenɲle am názena á de magaterná Dadaamiya ge emnde na tá aɲkwa am ervaunɲe-aara na?»

<sup>8</sup> Magaumága kure názena ni tá diyeddiye átekwa ganakini kure wá, yakuránya mága á kure werre, magakurnaamaga tuba.

<sup>9</sup> Bawánka mazla-aara am ire á kure ganakini miya wá, ma egdzara á Ibrahimia miyenne, ázara lámbe á miya. Yá bakurá ba jirire: Ba nákwá-aha na náwa ɲane na keni, Dadaamiya an hákuma á gaterve egdzara á Ibrahimia.

<sup>10</sup> Ba kina keni á ba an tsatsa zlaugba ge ɗatsa náfa-aha na ni tá yeka egdzere na. Daaci baɗemme á náfa na ni á yeka egdzere emtake na wá, tá icese antara uksuwe-aara baɗemme, tá epshupshe an kára.

<sup>11</sup> Yá aɲkwa bakurá ba jirire: iya wá, yá aɲkwa á magakurá baptisma an yawe wá, ba ge mara tuba á kure, ganakini magakuraamaga tuba. Amá aɲkwa ura á sawa am iga-aaruwa, ba kina keni aɲkwa á ba am dagave á kure wá, ɲane watse á magakurá baptisma an Shedekwe Cudedde, antara an kára. Edda-aara ɲanna wá, an hákuma ba ɲane arge iya, ba ge slesadanse kimake am sera keni hyanefka ya ɗekideki.

<sup>12</sup> ɲane wá, aɲkwa á sawa an kazlaɲa a fáhá duksa-aara am erva, á se fahese hiya-aara am hyaihye. Daaci watse á puweme hiya am kuvere-aara, amá hyaihye wá, watse á fante kára na á emtseka ɗekideki na.»

*Baptisma á Yaisu \*Almasiihu*  
(Mark. 1:9-11; Luka 3:21-22)

<sup>13</sup> Daaci am sarte ɲanna maa, a naba tsetehe ge Yaisu á sa am Galili, a seza Yuhanna áte we á guwa á Urdun, a se ndavanu baptisma ge Yuhanna.

<sup>14</sup> Amá á kátá maɲka Yuhanna. A ba ɲane á elvan ge ɲane: «Iya maa, yá kátá ká maginá ka baptisma ni, ká se ndaviwa ka baptisma ge iya?»

<sup>15</sup> A ba Yaisu á elvan ge ɲane: «Eksaareksa ka á ba an higa. Aɗaba baráma-aara ba estuwa, lauktu mi maganaamaga názena á kataná Dadaamiya.»

Daaci a naba eksaarhe ge Yuhanna,

<sup>16</sup> a maganaa baptisma. Sessa Yaisu am yawe wá, a naba wertehe ge samaya wá, Yaisu á zhara ba aɲkwa á tsekwa Shedekwe á Dadaamiya á setarge ɲane ba seke takala, a se tsekwa áte ɲane.

<sup>17</sup> Cekwaangudí wá, tá cená kwárá á sa am samaya, a ba ñane: «Ba ñane una Egdza-aaruwa, wayanwaya jipu, bademme á higa-aaruwa á ba áte ñane.»

## 4

### *Náwa a badanaa estuwa Shaitaine Yaisu (Mark. 1:12-13; Luka 4:1-13)*

<sup>1</sup> Am iga á una ñanna maa, Shedekwe á Dadaamiya a naba daa Yaisu á dem kaamba ganakini á de badaná Shaitaine.

<sup>2</sup> Yaisu a de magaa háre kul ufade am ndera áhuwa, vayi vaciyeka zawka duksa. Am iga á una ñanna maa, a naba ñanaahe ge waya mazla-aara.

<sup>3</sup> Daaci a duhe ge slekeda emnde ádezenjara, a ba ñane á elvan ge ñane: «Máki ka ba \*Egdza á Dadaamiya wá, bateránba ge nákwá-aha na a nyarefnye dafa ká ezza.»

<sup>4</sup> A ñwanante ge Yaisu, a ba ñane á elvan ge ñane: «Ankwa an puwa am wakita á Dadaamiya, a ba ñane: “Ura á njá an shifa adaba dafeka palle, amá á fanemá elva-aha na a ndahesaa Dadaamiya bademme na shifa am vuwa.” »

<sup>5</sup> Shaitaine a naba zlala antara ñane á dem huđe á berni cuđedde, ta de daltaa antara ñane áte ire á \*mashidi yaikke,

<sup>6</sup> a ba ñane á elvan ge ñane: «Máki ka ba \*Egdza á Dadaamiya wá, naba mbedanaambeda ire á ña á dem áhá. Adaba ankwa an puwa am wakita á Dadaamiya, a ba ñane: “Dadaamiya á de puwa malika-aha-aara, tá de cuwáká á ba am erva, ganakini ká janvaarka ma ba ge sera á ña keni áte nákwá.” »

<sup>7</sup> Una keni a naba ñwanante ge Yaisu, a ba ñane á elvan ge ñane: «Ankwa an puwa zlađe adaliye am wakita á Dadaamiya, a ba ñane: “Badeka Yaakadada, Dadaamiya á ña dekideki.” »

<sup>8</sup> Shaitaine a dánhe zlađe adaliye á dete ire á wa umele ankwa, wa ñanna sladde jipu, a maranaa yaikkire na ankwa am huđe á duniya na bademme, antara ngahire-aara bademme á sáhuwa.

<sup>9</sup> Daaci a ba ñane á elvan ge Yaisu: «Máki kezlakiyaakezla ugje, ká ñala ázerwa wá, yá vakteva duksa-aha ñanna ka nanaa ka na bademme.»

<sup>10</sup> A ba Yaisu á elvan ge ñane: «Ekka wá, ka Shaitaine ezzlálá áhuna. Ankwa an puwa am wakita á Dadaamiya, a ba ñane: “Sey ká kezlan ugje ba ge Yaakadada, Dadaamiya á ña palle, ká ñala á ba ázenjara palle.” »

<sup>11</sup> Mazla-aara a yanhe ge Shaitaine áte una ñanna. Am sarte ñanna maa, ta semhe ge malika-aha á Dadaamiya, ta se maganaa slera.

### *Zuñwire á slera á Yaisu am kwárá á Galili (Mark. 1:14-15; Luka 4:14-15)*

<sup>12</sup> Cenancena Yaisu ganakini ngudarenguda Yuhanna am dangay maa, a naba tsetehe áhuwa, a dem Galili.

<sup>13</sup> Njaaka ñane am Nasarátu na mazla-aara, kwaye a de nja am Kafarnahum. Ekse ñanna áte we á guwa á Galili ñanna. Kafarnahum ñanna wá, áte nákwá á kwárá á Jabulaun antara kwárá á Naiftalim.

<sup>14</sup> An una ñanna wá, gevge elva na ndza a ndahanaa nabi Aisaya werre na. Adaba a ba ñane:

<sup>15</sup> «Am kwárá á tara Jabulaun antara Naiftalim, antara ekse-aha na tá am ndañjire á háye á Galili na bademme, an ekse-aha na tá á katafke á Urdun, ira am Galili á emnde na garevka Yahudiya-aha na,

<sup>16</sup> bademme á emnde na ni tá am tabedammire na, tá de nanna parakkire yaikke. Emnde nanna tá njá am slede tabedamme jipu, shifa-aatare ba paihyhye na, watse á shateraasha parakkire yaikke.»

<sup>17</sup> A fantau á ba am sarte nanna Yaisu ge bálá waazu. A ba nane á elvan ge emnde: «Magaumága tuba. Adaba samsa sarte á njá am \*kwára á Dadaamiya.»

*Pukura-aha á Yaisu zunḡwe ta ufade*

*(Mark. 1:16-20; Luka 5:1-11)*

<sup>18</sup> Daaci Yaisu a d̄aba we á guwa á Galili wá, a naa egdzar mama buwa, tara Simaun, nane una tá d̄ahaná an Piyer, tá an egdza emmenjara Andarawus. Tá an̄kwa á puwa narre-aatare á dem yawe, adaba itare ta emnde a sluwa kelfe.

<sup>19</sup> Daaci a naba d̄aterd̄áhá Yaisu: «Sawmbare d̄abawid̄ába, yá gakurvege emnde a jaha emnde á sem sera-aaruwa, ba seke má tá jahava kelfe-aha á dem narre á kure,» a ba nane á elvan ge itare.

<sup>20</sup> Ba watsewatse ta naba puwanve narre-aatare á ba áhuwa, ta d̄aba Yaisu.

<sup>21</sup> Ta zlalete ba cekwaangud̄i á de katafke wá, Yaisu a naa egdzar mama umele ádaliye ta buwa, egdzara á Jaibaidaiyus, tara Yakuba, tá an egdza emmenjara Yuhanna. Antara ba eddetare keni an̄kwa ázetare, tá am paare á yawe, tá an̄kwa á tsatsa narre-aatare. Daaci a naba d̄aterd̄áhá Yaisu itare keni.

<sup>22</sup> Ba watsewatse, itare keni ta naba yaa paare, antara eddetare áhuwa, itare, ta d̄aba Yaisu.

*Yaisu an̄kwa á magaterá waazu ge emnde,*

*á mbatermbe am lapikere keni*

*(Luka 6:17-19)*

<sup>23</sup> Daaci Yaisu a jem d̄ába am kwara á Galili bademme, a magateraa waazu ge Yahudiya-aha am mashidi-aha-aatare. Waazu nanna wá, waazu á labare á higa, ganakini emnde tá njá á ba am \*kwára á Dadaamiya mazla-aara. Emnde na ta lapika-aha, antara nguryekwe-aha, a mbateraahe bademme.

<sup>24</sup> Daaci ta hyanme labare-aara am slede bademme am larde á Siriya. Bademme á emnde na ni an̄kwa á magaterá palasa lapikere gergere, ta sateraa áseza Yaisu. Emnde na á wáterá tauraurau, emnde na tá an shaitaine, antara emnde a nguryekwe, bademme á emnde na ni ta lapika-aha na, a mbateraahe.

<sup>25</sup> Kwakya nalga na a d̄aba Yaisu. Emnde na ta sawa á sá am Galili, emnde umele ta sawa á sá am ekse na tá d̄ahaná an ekse kelaawa na, antara emnde na ta sawa á sá am Urusaliima antara Yahudiya bademme, ira emnde a ekse-aha na tá á katafke á Urdun na bademme ta d̄aba Yaisu.

## 5

*Waazu áte ire á wa*

*(Luka 6:20-23)*

<sup>1</sup> Yaisu nanna nalga á emnde nanna maa, a d̄alete áte wa, a de njehe. Ta d̄abem ge pukura-aha, ta duhe ádezenjara.

<sup>2</sup> Daaci a fantau ge tsakateraa elva áhuwa, a ba nane á elvan ge itare:

*Higa jirire*

*(Luka 6:20-23)*

- 3 «Higa yaikke ge emnde na ni diyardiya ba itare keni am ire-aatare ganakini hyarepka ba názara keni áza Dadaamiya. Adaba tá de njá antara Dadaamiya am yaikkire-aara.
- 4 Higa yaikke ge emnde na tá an yawe á kyuwa am ice kina, adaba watse Dadaamiya á de halaterse yawe á kyuwa am ice.
- 5 Higa yaikke ge emnde na tá ankwá á maga kemaarire, adaba tá de shá slede na a ba Dadaamiya watse á vaterteva na.
- 6 Higa yaikke ge emnde na tá an wedera á mága jirire á Dadaamiya jipu, adaba Dadaamiya á vaterteva ge itare keni názena á kataná ervaunđe-aatare.
- 7 Higa yaikke ge emnde a mága zevarzire, adaba Dadaamiya á de zatervaareze ge itare keni.
- 8 Higa yaikke ge emnde na an bára ervaunđe-aatare, adaba watse tá nanna Dadaamiya á ba an ice-aatare.
- 9 Higa yaikke ge emnde na ni tá melaterá itare emnde a dágala, adaba tá de dáhaterá an egdzara á Dadaamiya.
- 10 Higa yaikke ge emnde a shá zlada adaba ta magaa názena á kataná Dadaamiya, adaba watse tá de njá antara Dadaamiya am yaikkire-aara.
- 11 Higa yaikke ge kure má tá ankwá á zlazlakurzlázle emnde, má tá fákurá áte ngudiyire, tá ankwá á tsaka elva a mándzawe áte kure adaba kwa emnde-aaruwa.
- 12 Máki tá ankwá á magakurte una-aha nanna wá, higa yaikke ge kure, jákurja gedá. Adaba ladá á kure kwakya jipu am samaya. Nabi-aha werre keni ndza ta magaterán ba estuwa.»

*Ekkure kwa ba seke elleŋa, antara parakkire  
(Mark. 9:50; Luka 14:34-35)*

13 «Ba názena ni á magaterná elleŋa ge emnde am duniya na wá, ba kure una kwa elleŋa ge duniya. Amá máki elleŋa nanna baaka dandanjire-aara mazla-aara mu, tá maganá uwe, ganakini á gevge dandane zlaŋe ádaliye? Baaka pute dekideki. Máki estuwa, baaka nampire-aara, sey ba tá eppuwa á degashe, tá payaná emnde an sera.

14 «Zlaŋe ádaliye, ba kure una kwa parakkire ge duniya, kwa ba seke berni na ni áte ire á gávaye, ma á sawa áme keni tá zhará ba nane na.

15 Zlaŋe ádaliye, kwa ba seke kára á fanus. Máki mbarantembe kára á fanus wá, tá unmbarka tasa, sey tá zlenjelaná áte tate-aara, ganakini á maraterá parakkire ge emnde na tá am huđe á bere nanna bademme.

16 Ba duksa palle ge kure keni. Kwa parakkire á duniya. Marawateránmára parakkire á kure ge emnde bademme. A naránna emnde shagerire na kwá maganá kure, lauktu tá de gálá Eddekure Dadaamiya am samaya.»

*Názu á kwaratersá Yaisu ge emnde áte \*tawraitá*

17 «Bawánka am ire á kure, ganakini ya se mbedaa shairiya-aha á Dadaamiya na a sanaa Muusa na, bi ya se mbedaa elva-aha na ta kwaratersaa nabi-aha werre ge emnde. Amá ya se palateraa ba jirire á duksa-aha nanna ge emnde, ya se ganvege.

18 Yá ndaakur ba jirire: Baaka duksa na á shekwaashekwa seke tara samaya antara haha. Amá tá zlauzle itare; ba egdza elva cekwaangudí keni á eblyantaaveka ge názu am \*tawraitá, sey má gevge bademme.

19 Yá bakurná adaba una nanna: Ma ware una a epsawaa ba egdza duksa am shairiya-aha á Dadaamiya, bi a kwaraterse epsawa shairiya á



Dadaamiya ge emnde, á de gevá kataliya ba ñane am \*kwára á Dadaamiya. Amá edda una ni anƙwa á fansaarfe ge shairiya-aha á Dadaamiya, ámbera á kwaraterse ge emnde geni a faransaarefe keni na wá, watse male ba ñane am \*kwára á Dadaamiya.

<sup>20</sup> Yá bakurá ba jirire: Kwá demka am zlanña á Dadaamiya ðekidëki, máki jakurateruka ge malum-aha, antara \*Farisa-aha an mága názena á kataná Dadaamiya.»

*Názu á kwaratersá Yaisu ge emnde áte elva a ica ervaunđe*

<sup>21</sup> «Kwa cenán vateneka ganakini a ba Dadaamiya á elvan ge eggë-aha: “Jauka shifa. Ma a janaa ware shifa keni á de ñezleka am shairiya.”

<sup>22</sup> Amá iya wá, yá bakurá ba jirire: Ma a ñanaa ware egdza emmeñara am ervaunđe keni, á dem shairiya. Ma a bannaa ware ge egdza emmeñara “Baaka enƙale á ña”, edda-aara á dem shairiya yaikke. Ma a bannaa ware ge ura “Ká an shaitaine”, edda-aara á dem kára á jahanama.

<sup>23</sup> Adaba una ñanna, máki ka sanaa sadake á ña ge Dadaamiya, amá á ba á katafke á Dadaamiya ñanna wá, ka naba yehete ganakini anƙwa duksa ka maganta ka ge egdza emmeña wá,

<sup>24</sup> naba yanya sadake á ña ñanna á ba áhuwa, de melawemela emtsaafë antara egdza emmeña, lauktu ká se vante sadake á ña ge Dadaamiya.

<sup>25</sup> «Máki anƙwa sledágala á ña watse á dáka á dem shairiya wá, edduwa ba watsewatse ádezeñara, de melawemele arge una ni á de fakem am erva ge narkali-aha. Narkali-aha, itare tá de fakem am erva ge sawji-aha, sawji-aha tá dáka á ba á dem danğay.

<sup>26</sup> Yá baká ba jirire: Watse baaka segashe á ña áhuwa ðekidëki, ma a juwa ba shishi-aara keni, sey má pelaksepele baðemme.»

*Názu á kwaratersá Yaisu ge emnde áte elva a gwardzire*

<sup>27</sup> «Kwa cenán vateneka, ganakini a ba wakita á Dadaamiya: “Mañka gwardzire.”

<sup>28</sup> Amá iya wá, yá bakurá ba jirire: Ma ware una a zharaa mukse, wayetewáyá am ervaunđe-aara, maganaamaga gwardzire an mukse ñanna am ervaunđe-aara.

<sup>29</sup> Daaci má anƙwa á mbedáká á dem haypa ice á naðafa á ña wá, naba sansese ice ñanna, eblyanveblye yiyiye an ka. Ambáne ká keðá ba duksa palle áte vuwa á ña, arge una ni iricaña baðemme ká dem kára á jahanáma na.

<sup>30</sup> Zlabe ádalije, má anƙwa á mbedáká á dem haypa erva a naðafa á ña wá, naba icica erva ñanna, eblyanvebelye yiyiye an ka. Ambáne ká keðá ba ubiya palle áte ka, arge una ni iricaña baðemme ká dem kára á jahanáma na.»

*Názu á kwaratersá Yaisu ge emnde áte elva a ica nika*

*(Mat. 19:8-9; Mark. 10:11-12; Luka 16:18)*

<sup>31</sup> «Anƙwa an puwa am wakita á Dadaamiya ganakini má zhele á ica nika an mukse-aara wá, sey á vante nalmesheri á ica nika ñanna am erva ge mukse, ganakini a belanaa ba ñane.

<sup>32</sup> Amá iya wá, yá bakurá ba jirire: Ma ware una a belaa mukse-aara, wallá a eksevaa am gwardzireka, uweka, máki mukse na de gaaga zhele umele wa, a eblyanmaa ba ñane am gwardzire. Ma a ganaa ware mukse na a segashe am mbá á zhele keni, a magaa ba gwardzire.»

*Názu á kwaratersá Yaisu ge emnde áte elva a za waða*

<sup>33</sup> «Kwa cenán vateneka ganakini a ba Dadaamiya á elvan ge eggje-aha: “Zawka waða á fida, zawza ba waða á jirire á katafke á Dadaamiya.”

<sup>34</sup> Amá iya wá, yá bakurá ba jirire: Zawka waða ðekideki ma an uwe keni. Ma an samaya keni zawka waða. Adaba una ñanna tate á njá á Dadaamiya an sleksire-aara.

<sup>35</sup> Ma an haha keni zawka waða. Adaba haha tate á puwa sera á Dadaamiya. Ma an Urusaliima keni zawka waða. Adaba anjwa Slekse yaikke am berni ñanna.

<sup>36</sup> Ma á ba an ire á kure keni zawka waða ðekideki. Adaba kure, ba úgje á ire á kure palle keni kwá taa maganaaka, ma kuliya, ma úgje danjwe keni.

<sup>37</sup> Elva á kure ge kure wá, a tsatse á ba áte duksa palle. Ma “a'aa” keni, ba a'aa. Máki “ane” á bá kure keni, ba ane. Máki jauje am una ñanna wá, ba slera á Shaitaine.»

*Elva a eptsanna haypa ge ura*  
(Luka 6:29-30)

<sup>38</sup> «Zlafe á daliye, kwa cenán vateneka ganakini a ba wakita á Dadaamiya: “Ma a kyannaa ware ice ge ura, ñane keni tá kyanaakya ba ice ñanna; ma slare keni, tá mbadaava á ba an slare ñanna.”

<sup>39</sup> Amá iya wá, yá bakurá ba jirire: eptsawannaaka mandzawire ge ura. Má edda-aara a tedaku babárva am ekte a hyema á nadafa wá, naba eptsananteptsá náza á názlaaba keni.

<sup>40</sup> Ma a ndavakuwaa ware ðanciki á ña ge dáka á dem shairiya keni, naba yanánya, a lyevaalya antara ba zane keni.

<sup>41</sup> Ma a fakaara ware sepa gwatama an ndzedá ba kilaumaiter palle keni, naba danánda ma kilaumaiter buwa keni.

<sup>42</sup> Má ura a ndavaku duksa wá, naba vanteva. Edda una a de ndava gema keni yanveka.»

*Wayauwáyá an kelaade-aha á kure*  
(Luka 6:27-28, 32-36)

<sup>43</sup> «Zlafe á daliye, kwa cenán vateneka ganakini a ba wakita á Dadaamiya: “Ewwaya an sleriya á ña, amá edda una ni ñane kelaade á ña wá, ka keni yanaaya.”

<sup>44</sup> Amá iya wá, yá bakurá ba jirire: Wayauwáyá an kelaade-aha á kure, magaumága maduwa arge emnde na ni tá fá zlaða áte kure ba dey na.

<sup>45</sup> Magaumága una ñanna, lauktu kwá geva egdzara á Eddekure na am samaya na á ba an jirire. Adaba ñane wá, anjwa á maraterá vaciya-aara ge emnde a mága kemaarire, antara emnde a mága mandzawire bademme; á hyaterá yawe ge emnde na an bara ervaunðe-aatare, antara ge emnde na danjwa huðe-aatare bademme.

<sup>46</sup> Máki kwá wáyá ba emnde na ni itare keni wayarakurwáyá wá, baaka laða á kure áza Dadaamiya. Adaba ba emnde á ñezla keni tá anjwa á magán ba estuwa.

<sup>47</sup> Zlafe á daliye, má kwá gater use ba ge egdzar mama-aha á kure, kwá jaterwa an uwe kena ge emnde umele? Adaba ba emnde na ðabarka Dadaamiya keni, tá anjwa á magán ba estuwa.

<sup>48</sup> Adaba una ñanna, a eksakuraareka enjwale ðekideki, gawevge ba seke Eddekure na am samaya na.»

## 6

*Elva á melateru ge talaga-aha*

<sup>1</sup> «Máki kwá kátá mága duksa adaba Dadaamiya wá, magauka áte ice á emnde ganakini a naranna. Máki kwá kátá zleba á emnde wá, nube á kure ba una nanna, kwá shánka lafa áza Eddekure na am samaya na mazla-aara.

<sup>2</sup> Daaci máki ká kátá melanu ge talaga wá, baleka an bálá. Amaana: manka áte ice á emnde geni a naranna. Magauka jeba á duksa na ndza ta maganaa fida-aha na am mashidi, antara áte we á layye-aha, ganakini a galaratergála emnde na. Yá bakurá ba jirire: Jeba á emnde nanna, lafa-aatare ba una nanna, baaka umele.

<sup>3</sup> Amá ekka wá, máki ká kátá vante sadake á nja ge ura wá, emmága an nasherire. Ba názlaba á nja keni a diseka názena á maganá nadafa á nja.

<sup>4</sup> Emmága maggwire á nja á ba an nasherire. Eddeja Dadaamiya wá, baaka názu á nanka njane. Daaci á de vakteva ba njane lafa-aara.»

### *Nazu á kwaratersá Yaisu ge emnde*

#### *áte elva a mága maduwa (Luka 11:2-4)*

<sup>5</sup> Má kwá anjwa maga maduwa wá, gawufka seke emnde a fida. Itare wá, wayarwaya maga maduwa am tate a tse am mashidi ira áte we á layye-aha, geni a naraterna emnde. Yá bakurá ba jirire: lafa-aatare ba una nanna ge jeba emnde nanna.

<sup>6</sup> Amá ekka wá, má ká kátá mága maduwa wá, demde am bere á nja, hefanuhede ge we á bere á nja; daaci enjala Eddeja na njane anjwa am tata nasherire á nja nanna. Eddeja na njane anjwa á zhara názena ka maganaa an nasherire na, a de vakteva lafa-aara.

<sup>7</sup> Má kwá anjwa maga maduwa wá, kwakyawanveka elva-aha ba dey seke una tá maganá emnde na dabarka Dadaamiya. Itare tá kurken má tá tsaka elva-aha kwakya wá, watse Dadaamiya á cenatervarcene.

<sup>8</sup> Kumauka garava-aatare dekideki, adaba Eddekure Dadaamiya njane diyaadiya wedera á kure ba lauktu kwá de ndavana ázenara keni.

<sup>9</sup> Daaci náwa kwá maga maduwa á kure estuwa: Eddejere am samaya, ekka wá, ka cudede. Emmága dalila á nja ganakini emnde bademme a farfa zherwe áte ka.

<sup>10</sup> Sawa an sleksire á nja. A gevge namaari á nja am duniya keni, ba seke una am samaya na.

<sup>11</sup> Vanjerteva náza za a hyanjerhye vatena.

<sup>12</sup> Yanjeraarye haypa-aha á nere, ba seke una nere keni nja yateraare ge emnde a haypa an nere.

<sup>13</sup> Danjeremka am bada á Shaitaine, fertaneraaferta átuge haypa. ((Adaba ekka, sleksire á nja anjwa. Ká an hakuma, ká an demdemire dem ba ge dekideki. \*Aamin.))

<sup>14</sup> «Adaba má kure kwá anjwa yateraare haypa-aatare ge emnde a haypa an kure wá, Eddekure na am samaya na keni á yakuraarye ge kure keni.

<sup>15</sup> Amá má kwá yateraareka ge emnde wá, Eddekure na am samaya na keni, á yakuraareka ge kure keni.»

#### *Elva a tsufa ndera*

<sup>16</sup> «Má kwá anjwa tsufa ndera wá, eptsawanteka njá á kure ba seke kwá am zlafa, seke una tá maganá emnde a fida na tá kwashante feka-aatare, geni a naranna emnde ganakini tá am nderire na. Yá anjwa bakurá ba jirire: jeba á emnde nanna lafa-aatare ba una nanna.

<sup>17</sup> Amá ekka wá, má ká am ndera wá, baraabare ica á ña ba tseɗañe, tsatsanaatsatse ba shagera úgje am ire á ña,

<sup>18</sup> lauktu tá de diseka emnde geni ká am nderire. Sey ba Eddenja na ma am tate a nasherire keni ñane anƙwa na palle una diyaadiya. Daaci Eddenja na ñane anƙwa a nanna názu ká maganá ka an nasherire na, á de vakteva laɗa-aara.»

*Berbire na am samaya*  
(Luka 12:33-34)

<sup>19</sup> «Jahauka nalmane á kure á ba am duniya na, aɗaba á naba badzanvebadze weshege-aha antara viya. Neyle-aha keni tá kyaba bere-aha a emnde, tá ila kazlaja am huɗe-aara.

<sup>20</sup> Ekkure wá, jahaujaha nalmane á kure á ba am samaya, ma weshege-aha, ma viya, ma neyle-aha keni, baaka názu á de badzená áhuwa.

<sup>21</sup> Aɗaba am tate na ni átekwa nalmane á ña wá, ire á ña keni á ba am tate ñanna.»

*Parakkire na áte vuwa*  
(Luka 11:32-36)

<sup>22</sup> «Ice wá, ñane ba seke kára á fanus ge vuwa. Má lapiya ice á ña wá, baɗemme á vuwa á ña ba parakke.

<sup>23</sup> Amá má shagerka ice á ña wá, vuwa á ña baɗemme á ba am tabeɗammire. Daaci má parakkire na am ka na gevge ɗañwe wá, á tsaame tabeɗammire na ká tse am huɗe-aara!»

*Slera á Dadaamiya bi slera á nalmane*  
(Luka 16:13; 12:22-31)

<sup>24</sup> «Baaka ura á dzegwándzegwa magaterá slera ge zanwe-aha buwa átirpalle. Ba bi á de wayete ba palle, á maganá slera shagera, á de yá palle, á mañka slera-aara. Kwá dzegwánka magaterá átirpalle tara slera á Dadaamiya antara tataya nalmane.»

*Dzamauka ire an kazlaja á duniya*  
(Luka 12:22-31)

<sup>25</sup> «Yá bakurná aɗaba una ñanna, geni dzamauka ire an duksa na kwá de zaná kure, bi duksa na kwá de shaná kure, bi názena kwá de tsekwaná áte vuwa á kure. Yaikke ba shifa ka arge náza zuze emtu? Yaikke ba vuwa ka arge zane emtu?

<sup>26</sup> Zharauzhárá á ba áte yiye-aha á samaya, tá ja duksa ka, tá icananá á dem mba ka, tá halaná á dem kuvere ka, amá Eddekure na am samaya na á gelatergela. Kwá jateruka ba kwakya ge yiye-aha emtu?

<sup>27</sup> Ware am kure una á dzegwandzegwa slaɗva shifa-aara ba cek-waangudí keni an dzama ire na á maganá ñane?

<sup>28</sup> Ay labara kwá dzama ire á zane ge tsekwana áte vuwa á kure? Zharauzhárá áte ugbene-aha am kaamba, tá maga slera ka, tá há zane ka, uwe ka,

<sup>29</sup> amá yá ndaakur ba jirire ba Suleymanu an kwakyire á nalmane-aara keni, ndza tsekwaremeka am zane na ni zariya ba seke zariyire á palle á ugbene-aha ñanna keni.

<sup>30</sup> Má másá na anƙwa vatená, makuralla kerten faraterufe ge kára maa, Dadaamiya á tsekwateremtsekwa am ugbene-aha zariya, sakwa kure emtu, máki cekwire á fetarfire ka?

<sup>31</sup> «Aɗaba una maa, dzamauka ire ɗekideki geni watse njá de za uwe? Bi njá de sha uwe? Bi njá de tsekwa uwe?

<sup>32</sup> Sey ba emnde na d̄abarka Dadaamiya na una tá njá á ba dzama kazlaŋa ŋanna. Ekkure wá, diyaadiya Eddekure na am samaya na ganakini kwá an wedera á duksa-aha ŋanna keni.

<sup>33</sup> Zunŋwe wá, tatayautataya kure ba njá am kwara á Dadaamiya, antara mága jirire-aara, daaci Dadaamiya á de vakurteva duksa-aha umele keni.

<sup>34</sup> Dzamauka ire áte duksa á makuralla. Nane keni á de sakurá ba dzama ire-aara tsekemme. Adaba ba kelaa hare á bere á ba an dzama ire-aara.»

## 7

### *Habazauka sera á emnde (Luka 6:37-38, 41-43)*

<sup>1</sup> «Habazauka sera á emnde, kure keni, á de zakurvaarze Dadaamiya am shairiya.

<sup>2</sup> Adaba ba shairiya na kwá maganá á dete emnde na wá, Dadaamiya keni á de magakurá á ba áte una ŋanna. Baɗemme á názena kwá magaterná kure ge emnde na wá, Dadaamiya keni á de magakurná á ba áte una ŋanna ge kure keni.

<sup>3</sup> Labara ŋane ge ekka ká zhárá esseɓa na am ice á egdza emmeŋa, amá ká tapanaaka slalbe sladɗe na am ice á ŋa ge ekka?

<sup>4</sup> Ká dzegwaná estara banán ge egdza emmeŋa: “Sansa yá sakansese esseɓa am ice”, amá ekka ká an slalbe sladɗe am ice á ŋa?

<sup>5</sup> Egdza á fida na, sansese emtsaade slalbe sladɗe na am ice á ŋa na, ká nanna ice á ŋa parakke, lauktu ká de sananse esseɓa am ice ge egdza emmeŋa.

<sup>6</sup> «Vawaterteka duksa cufedɗe ge kere-aha, kuvaukuva geni a ept-sarakuraareka, a ceɓarakuraaka; velyawanveka náza hyema á kure á katafke á nabezhe-aha geni a payeraaka an sera.»

### *Ndavaundáva, tatayautataya, d̄auɗaha á dem mba (Luka 11:9-10)*

<sup>7</sup> «Naba ndavaundáva tá de vakurteva; tatayautataya, kwá de shansha; d̄auɗaha emnde a há tá se werakurantewera wakyiya.

<sup>8</sup> Adaba ma a ndavanaa ware keni, sey á shansha. Ma a tatayanaa ware keni, sey á shansha. Ma a janaa ware wakyiya keni, tá weranantewere.

<sup>9</sup> An̄kwa ura am kure, má egdza-aara á ndavanu d̄afa, ŋane á vante nákwá emtu?

<sup>10</sup> Bi má a ndavanu kelfe, ŋane á vanta zahe?

<sup>11</sup> Kwa mandzawe-aha tsa, amá diyakurdiya vaterte duksa shagera ge egdzara á kure. Sakwa Eddekure na am samaya na emtu? Nane á jauje ge emnde baɗemme an vante duksa shagera ge emnde na tá ndavaná ázeŋara.

<sup>12</sup> «Názu kwá kataná kure áza emnde baɗemme, kure keni magawateránmaga ba estuwa ge emnde. Adaba una ŋanna jirire á názena a belateraare \*tawraita á Muusa ge emnde, ira názena am wakita á nabiaha.»

### *Wakyiya becce (Luka 13:24)*

<sup>13</sup> «Dawemde á kya wakyiya becce. Adaba wakyiya na gatatte antara baráma yaikke wá, á da ura á dem keɗa, aley emnde kwakya tá d̄aba ba una ŋanna.

<sup>14</sup> Amá á kya wakyiya becca, antara un̄jule shairre wá, á dá ura á dem tate á shifa, emnde na tá d̄aba una ŋanna ta cekwa.»



*Nafa wá, tá diyeddiye á ba áte egdza-aara*  
(Luka 6:43-44; 13:25-27)

<sup>15</sup> «Tsufautsufa ire á kure áza nabi-aha fida. Má tá sawa á sezekure, tá ganve ire-aatare ba seke kyawe-aha, amá am huđe-aatare wá, ta ba seke indale-aha na mandzawe-aha na.

<sup>16</sup> Kwá de diyatersediye áte názena á de maraná slera-aatare. Tá ñazlevaaka egdzara á nderza áte dake, bi egdzara á gwayafa áte zaza.

<sup>17</sup> Nafa na shagera na, á yá egdzere emtake, nafa na shagerka na, á yá egdzere keni emtaŋka.

<sup>18</sup> Nafa shagera á taa yeka egdzere emtaŋka; nafa na shagerka keni á taa yeka egdzere emtake.

<sup>19</sup> Baďemme á nafa na á yeka egdzere emtake na, a icarsice, a epsharapsha an kára.

<sup>20</sup> Una keni ba duksa palle: Kwá de diyatersediye nabi-aha fida ñanna áte slera-aatare.»

*Diyanakurka ya đekideki*  
(Luka 13:25-27)

<sup>21</sup> «Diyaweddiye una ba shagera: Baďemme á emnde na tá biya: Yaakadada, Yaakadada na ka una watse tá shá dem zlanna am samaya. Sey edda una á maga názena á kataná Edderwa na aŋkwa am samaya na.

<sup>22</sup> Vacite ñanna, emnde kwakya tá de biya: Yaakadada, Yaakadada, ñere keni ndza ña magaa slera á nabiyire an zhera á ña; ndza ña ñgyanse jini-aha am ura an zhera á ña; ndza ña magaa najipu-aha gergere an zhera á ña.

<sup>23</sup> Daaci ge emnde ñanna watse yá baterá: Ndza diyanakurka ya đekideki. Gawiyapteka zlalauzlálá, kure kwa emnde a maga haypa.»

*Bere-aha gergere buwa*  
(Luka 6:46-49)

<sup>24</sup> «Daaci ma a cenanaa ware elva-aaruwa ñanna, a maganaahe áte una ñanna, ñane á garava an zhele slenjkale, a nderaa bere-aara, a yese haha, á de faná ekte áte palaha.

<sup>25</sup> A hyehe ge yawe yaikke, a sawhe ge yawe á kela, a se eblyetaa áte bere ñanna, effeya keni á vata á ba an ndzedá, aley bere ñanna mbedáaka, adaba ta nderanaa áte palaha.

<sup>26</sup> Amá ma ware una a cenvaahé elva-aaruwa ñanna, maganaaka áte una ñanna maa, ñane á gáráva an zhele uce, a naba nderaa bere-aara áte shiili.

<sup>27</sup> A hyehe ge yawe yaikke, a sawhe ge yawe á kela, a se eblyetaa áte bere ñanna, effeya keni á vata á ba an ndzedá, daaci a mbedanaahe reppe.»

*Hákuma á Yaisu ge kwaranse duksa ge ura*

<sup>28</sup> Am sarte na Yaisu zlauzle am ndaha elva-aha ñanna, baďemme á zlamaha tá maga ba najipu-aara,

<sup>29</sup> adaba kwaraterseka seke náza á malum-aha á \*tawraitá, ñane a kwaraterse á ba an hákuma.

## 8

*Yaisu a mbanaahe slederve*  
(Mark. 1:40-45; Luka 5:12-16)

<sup>1</sup> Tsekwaatsekwa Yaisu á sá áte ire á wa, kwakya nalga na a daa đaba ñane.

<sup>2</sup> A semhe ge ura á wana derve, a kezlaa ugje á katafke-aara, a ba ñane á elvan ge ñane: «Yaakadada, ekka wá, má wayak-waya ka dzegwándzegwa givege ba metedde vuwa-aaruwa.»

<sup>3</sup> Yaisu a naba pelse erva-aara, a fete áte slederve na, a ba ñane á elvan ge ñane: «Wayanwáyá ká mbembe, ba metedde vuwa á ña.» Ba seke ndaha miya na, a naba mbehe ge slederve ñanna metedde.

<sup>4</sup> Daaci a ba Yaisu á elvan ge ñane: «Eccena ba shagera: Balananseka ma ge ware keni dekideki. Názena ká de maganá ka wá, de maranánmárá ire á ña ge \*liman, vanteva sadake na ndza a ndahanaa Muusa na, ká maraterná an una ñanna ge emnde ge mbakmbire.»

### *Náwa a mbanaa estuwa*

#### *Yaisu nave á male á sawji-aha á Rauma (Luka 7:1-10)*

<sup>5</sup> Daaci damda Yaisu á dem Kafarnahum. A demhe ge male á sawji-aha á Rauma á dezeńara, a de ñalan geni a melanumele.

<sup>6</sup> A ba ñane á elvan ge ñane: «Yaakadada, ankwá nave-aaruwa á zlava am mba, lapika ba zlazlafa, matsamatsa ubiya-aha áte ñane, á shá zlada jipu.»

<sup>7</sup> A ba Yaisu á elvan ge ñane: «Yá ankwá duwa, yá de mbanaambe.»

<sup>8</sup> A ñutehe zlađe ádaliye ge male á sawji-aha á Rauma na, a ba ñane á elvan ge Yaisu: «Malum, hyanefka dekideki geni ká sem huđe á ha-aaruwa. Ndaasendahe ka ba elva á ña palle, á mbembe nave-aaruwa.

<sup>9</sup> Adaba iya keni, ya ba edda á hákuma; male-aha-aaruwa keni tá ankwá. Iya, ya male á sawji-aha. Má ya banán ge palle-aatare: Ezzlala á dem tatu estuwa, ba á zlala. Má ya dāha palle-aatare ba á sawa. Má ya banán ge nave-aaruwa palle: Emmága una, sey ba á emmága.»

<sup>10</sup> Ba cenancena Yaisu elva-aara ñanna wá, á maga ba najipu-aara. Daaci a ba ñane á elvan ge emnde na tá ankwá á dāba ñane na: «Yá bakurá ba jirire: á ba am \*Iserayiila keni, shananka ura an fetarfire estuwa.

<sup>11</sup> Yá ankwá bakuranba: Emnde kwakya una tá de sawa á sá á ba am gedfi, antara á sá á ba am yala, tá de zá emtakire áza Ibrahimia, Isiyaaku, ira Yakubu am zlanna am samaya.

<sup>12</sup> Amá emnde na ma andze náza-aatare zlanna á Dadaamiya wá, itare tá de puwaterpuwa á dem tabedammire ágashe, tá de kyuwa ambera tá kerda slare-aatare ge zlada.»

<sup>13</sup> Daaci, a ba Yaisu á elvan ge male á sawji-aha na: «Ezzlala á dem mba á ña, a gevge áte una ka fetaare átekwa na.» Kertenj a naba mbehe ge nave á male á sawji-aha na á ba am sarte ñanna.

#### *Yaisu a mbaa lapika-aha kwakya (Mark. 1:29-34; Luka 4:38-41)*

<sup>14</sup> Am iga-aara maa, Yaisu a dem mba á Piyer, a de bera shawle á Piyer mukse á zlava, á wáná zlagzlagi.

<sup>15</sup> Yaisu ba a de fete erva-aara áte mukse na, daaci a naba yanhe ge zlagzlagi, a tsetehe, a maganaa slera-aha.

<sup>16</sup> Herzhe mangaripu maa, ta sanaa emnde na tá an shaitaine na kwakya. A naba ngyanse jini-aha ñanna am itare an elva-aara, a mbaa emnde na tá áte lapikere na bademme.

<sup>17</sup> Estuwa ganvege názena ndza a ndasaa nabi Aisaya, a ba ñane: «Ba ñane an ire-aara a lyamivaare lipire á miya ira lapikere á miya bademme.»

*Emnde na wayarwaya d'aba Yaisu  
(Luka 9:57-62)*

<sup>18</sup> Yaisu nanna kwakyire á nalga na átevge ñane, daaci a ba ñane á elvan ge pukura-aha-aara: «Ebzaumibza haye ádehuwa-aara.»

<sup>19</sup> A ganaptehe ge malum á \*tawraitu umele, a ba ñane á elvan ge Yaisu: «Malum, yá d'abakd'aba ma ka deme keni.»

<sup>20</sup> A ñwanante ge Yaisu, a ba ñane á elvan ge ñane: «Mbayka-aha tá an evege-aha-aatare; yiye-aha keni tá an bere-aha-aatare. Amá iya \*Ura á emnde bademme wá, ba tate na yá zlavanaazlava shifa-aaruwa keni baaka.»

<sup>21</sup> A ba ura umele zlafe ádalije am dagave á emnde a d'aba ñane, á elvan ge ñane: «Yaakadada, viteva barama yá de hedeheda emtsaade edderwa.»

<sup>22</sup> A ñwanantehe ge Yaisu, a ba ñane á elvan ge ñane: «Sawa, d'abid'aba, yaterya emtsa-aha, a hedard'aba emtsa-aha-aatare.»

*Yaisu a ekhyaa válale  
(Mark. 4:35-41; Luka 8:22-25)*

<sup>23</sup> Yaisu a de demhe am paare á yawe, pukura-aha-aara keni ta naba d'abemhe.

<sup>24</sup> A naba tsetehe ge válale yaikke arge haye ñanna. Yawe na a fatsana effeya na a nduhe paare, amá Yaisu á pá ba hare-aara.

<sup>25</sup> Ta de tsantehe ge pukura-aha-aara, tá ámbera edd'aha: «Yaakadada, lyamilye degiya má baaka.»

<sup>26</sup> A ñwutehe, a ba ñane á elvan ge itare: «Labara á wakurwa lyawa estuwa? Ekkure wá, cekwa fetarfire á kure!» Daaci a naba tsetehe, a valataraarhe ge tara effeya antara haye. Ba seke ndaha miya na, a tsaahere tseriyye ba seke ndza gejaaka duksa.

<sup>27</sup> Emnde bademme tá maga ba najipu, a ba itare: «Ware ñane jeba á zhele na, dete ba effeya antara haye keni tá fansarefe na?»

*A mbateraa estuwa Yaisu emnde buwa tá an shaitaine  
(Mark. 5:1-20; Luka 8:26-39)*

<sup>28</sup> Am sarte na icaransice haye tara Yaisu, daraada á dete iga a guwa am haha á Gadaraina-aha maa, ba tsekwa-aatare am paare wá, tá de ja ba ire antara emnde buwa tá an shaitaine, tá segashe am irekhya-aha, ta zlazlada-aha jipu, tá an kuva áza emnde, ura á taa deseka á kya unjule ñanna.

<sup>29</sup> A ba itare á ba an ka kwara: «\*Egdza á Dadaamiya, ázara am dagave á ñere antara ekka? Zlafe ba laukte-aara keni samka kertenj ka se fa zlada áte ñere emtu?»

<sup>30</sup> Ay, áhuwa ñanna maa, anjwa walda á nabezhe yaikke, tá anjwa piya.

<sup>31</sup> Jini-aha na ta naba ñala Yaisu a ba itare: «Má ká ngyanerngye wá, vanjerteva barama njá de njá am walda á nabezhe-aha na.»

<sup>32</sup> «Dawmbare», a ba Yaisu á elvan ge jini-aha na. Daaci ta sesehe am emnde na, ta de demhe am walda á nabezhe-aha na. Ta naba zlerdaa zhagade ge nabezhe-aha na daga á sate egdza wa ñanna, ta se valyeme am haye, a ndateruhe ge haye bademme.

<sup>33</sup> Zhagade á dem ekse ge suni-aha á nabezhe na, ta de balaterse labare ñanna ge emnde, antara názena ta shanaa emnde buwa na ndza tá an shaitaine na bademme.

<sup>34</sup> Daaci emnde a ekse bademme saresse, tá se yainu ge Yaisu. Ba puwartepuwa ice áte ñane maa, ta ñalanaa á ba an ñála geni a dedde am larde-aatare ba d'ekid'eki.

## 9

### *Yaisu a mbaa ura an matsa ubiya-aha-aara*

*(Mark. 2:1-12; Luka 5:17-26)*

<sup>1</sup> Yaisu a demhe am paare á yawe tá antara pukura-aha-aara, a icese haye, a saahe á sem ekse-aara.

<sup>2</sup> Daaci ta sanaa ura lapika an matsa ubiya-aha-aara, tá sá sepaná áte egdera. Am Yaisu nanna fetarfire-aatare, a ba ñane á elvan ge edda una lapika na: «A gazleka ervaunđe á ña egdza-aaruwa, adaba an bára haypa-aha á ña.»

<sup>3</sup> Daaci tá anƙwa malum-aha á \*tawraita áhuwa, a ba itare am ervaunđe-aatare: «Kwaye zhele na anƙwa á lyiya slede á Dadaamiya.»

<sup>4</sup> Kerten Yaisu diyeddiye názu tá dzamaná itare, a ba ñane: «Labara kwa dzamete elva kelaadire estuwa am ervaunđe á kure?»

<sup>5</sup> Ázara una tsaftsafé jauje ge baná: An bára haypa-aha á ña, bi baná: Tsettse ezzlala an sera á ña?

<sup>6</sup> Iya wá, yá kátá kwá diyeddiye geni iya \*Ura á emnde bademme, yá an hákuma ge yateraare haypa ge emnde am duniya na.» Daaci, a ba ñane á elvan ge edda una an matsa ubiya-aha-aara na: «Tsettse, ezzlala á da.»

<sup>7</sup> A naba tsetehe, a zlalehe á dem mba-aara.

<sup>8</sup> Amá nalga á emnde na tá áhuwa na naranna una ñanna, bademme gazlargazla, ta fantau ge gálá Dadaamiya, adaba hákuma ñanna a vante ge urimagwe na.

### *Náwa ndza a danta estuwa Yaisu Mata*

*(Mark. 2:13-17; Luka 5:27-32)*

<sup>9</sup> Daaci Yaisu a tsetehe áhuwa, anƙwa á zlala áte barama; átira zlala, a naa zhele umele zhara-aara Mata, á njá am bere á hadama. A ba Yaisu á elvan ge ñane: «Tsettse sawa dabiɗaba.» A naba tsetehe, a dábete Yaisu.

<sup>10</sup> Am iga-aara maa, tara Yaisu tá anƙwa za dafa antara pukura-aha-aara am mba á Mata ñanna, ta naba semhe ge \*emnde a jaha hadama, antara emnde a haypa umele kwakya, ta se nja átirpalle antara Yaisu.

<sup>11</sup> \*Farisa-aha ba naranna una ñanna maa, a ba itare tá elvan ge pukura-aha á Yaisu: «Labara malum á kure á za dafa antara emnde a jaha hadama ira emnde a mága ser haypa?»

<sup>12</sup> De cenatercena Yaisu, a ba ñane á elvan ge itare: «Emnde na lapiya vuwa-aatare wá, baaka wedere-aatare áza dauktar, sey ba emnde na lapika vuwa-aatare una tá deza dauktar.

<sup>13</sup> Zlalauzlala, de tsahautsaha názena am huɗe á wakita á Dadaamiya, a ba ñane: Názena yá kataná ya kwakya wá, baira zevarzire, sadake á dabba-ka. Adaba iya wá, sanká ya á se tataya emnde na tá am jirire, ya se tataya ba emnde a haypa.»

### *Ndává áza Yaisu arge tsufa ndera*

*(Mark. 2:18-22; Luka 5:33-39)*

<sup>14</sup> Ta se ndavanuhe ge pukura-aha á Yuhanna slemaga baptisma, a ba itare: «Ñere antara \*Farisa-aha, ña eksa ndera, labara pukura-aha á ña tá ekseka ndera ɗekideki na?»

<sup>15</sup> Daaci a ñwaterante ge Yaisu, a ba ñane á elvan ge itare: «Emnde na tá dáhaterá á sem larusa keni, kwa kurken tá dzegwándzegwa tsufa ndera emtu, am sarte na tá áza zhele á larusa? Tá dzegwánka ɗekideki. Amá anƙwa á sawa sarte umele wá, watse tá pakyava antara zhele á larusa. Am sarte ñanna wá, itare keni, watse tá tsufá ndera.

<sup>16</sup> «Baaka ura a venya emgyegwe a nangyuwe an baukta áŋwaslire, adaba una áŋwaslire na á de teda una emgyegwe na, daaci á de ette ba kwakya zlaŋe adaliye.

<sup>17</sup> «Zlaŋe adaliye, tá puweka mbazla áŋwaslire á dem emgyegwe a \*kanyakanya-aha. Adaba máki naavenahe, á tata kanyakanya-aha na. Daaci á puwa mbazla á dem haha, kanyakanya-aha keni badzavbadze. Sey tá puwa mbazla áŋwaslire á dem \*kanyakanya keni áŋwaslire lauktu baaka una á de badza am huŋe-aara.»

### *Labare á egdza á male á*

#### *Yahudiya-aha an mukse na a gejante nangyuwe á Yaisu (Mark. 5:21-43; Luka 8:40-56)*

<sup>18</sup> Ba Yaisu anŋkwa á baterá elva-aha ŋanna, a semhe ge palle á male á Yahudiya-aha, a naba kezlaa ugje á katafke-aara, a ba ŋane á elvan ge ŋane: «Emtsamtsa egdza-aaruwa mukse ba kinamina na, amá naba sawa fetefa erva á ŋa áte ŋane, á de shifeteshifa.»

<sup>19</sup> A naba tsetehe ge Yaisu, ta dábemhe antara pukura-aha-aara.

<sup>20</sup> Anŋkwa mukse, á maga yawe kelaawa ju buwa, á maga ba palase áte lapikere á kela uzhe, a naba ganaptehe ge Yaisu á kya iga, a fete erva-aara áte we á nangyuwe-aara.

<sup>21</sup> Adaba ndza a slaslan ba estuwa am ervaunŋe-aara, a ba ŋane: «Ma shanansha ya fete ba erva-aaruwa áte nangyuwe-aara keni, ya mbembe.»

<sup>22</sup> A eptsapte ge Yaisu, a zharanaahe, a ba ŋane á elvan ge ŋane: «Mbakaambe fetarfire á ŋa egdza-aaruwa. A gazleka ervaunŋe á ŋa dƣekidƣeki.» A ba am sarte ŋanna a naba mbehe ge mukse na.

<sup>23</sup> Daaci damda Yaisu á dem mba a male á Yahudiya-aha, a de bera jahava a emnde kwakya tá kyuwa, emnde umele keni tá ferta derma.

<sup>24</sup> Daaci a ba ŋane a elvan ge itare: «Dawedde áhuna adaba egdzere an emtseka, á pá ba hare.» Ta naba puwar dzáká, agira tá epsawepsawa.

<sup>25</sup> Daredda emnde á degashe maa, a demhe ge Yaisu á dem bere ŋanna, a de ŋanaa ba erva ge egdze na, daaci a naba tsetehe.

<sup>26</sup> Ta naba hyanme labare ŋanna am larde ŋanna bademme.

### *Yaisu a mbaa wulfe-aha ta buwa*

<sup>27</sup> Tsettsa Yaisu áhuwa zlazlálá, ta naba dábemhe ge wulfe-aha umele ta buwa, tá ámbera edƣaha an ka kwara: «Ambarka á ŋa Yaisu \*Egdza á Dawuda zanervaarze.»

<sup>28</sup> De demda Yaisu am bere, ta demhe ge wulfe-aha ŋanna keni ádezenara, a ndavateruhe ge Yaisu: «Fakurtarefa geni yá dzegwándzegwa vakurtá ice emtu?» Ta naba ŋwanantehe: «Ane, fanertarefe Yaakadada.»

<sup>29</sup> Daaci Yaisu a semtateraa ice, a ba ŋane: «A gevge áte una kwá fetaara kure átekwa.»

<sup>30</sup> A naba werte ge ice-aatare. Yaisu a fantau ge giyatergiya, a ba ŋane á elvan ge itare: «Fawfa hyema ba shagera: a cenanka ura umele dƣekidƣeki.»

<sup>31</sup> Aley itare ba zlala-aatare, tá de baŋese labare á Yaisu am larde ŋanna bademme.

### *Yaisu a mbaa ura an jini*

<sup>32</sup> Am sarte na tá átire á zlala, ta naba sanaa ura an shaitaine ge Yaisu, ba elva keni á taa ndaaseka dƣekidƣeki.



<sup>33</sup> Ba Yaisu ngyansengye jini na am nane maa, uce na a naba fantau ge ndaha elva. Daaci nalga á emnde na bademme ta fantau ge mága najipu, ta bantsa itare: «Ndza nanjeranka jeba una am \*Iserayiila d'ekid'eki.»

<sup>34</sup> Amá ta bantsa \*Farisa-aha: «A vanta ba male á shaitaine-aha hákuma nanna ge ngyanse jini am ura.»

### *Yaisu an'kwa á zanvarze ge nalga á emnde*

<sup>35</sup> Yaisu jemje d'aba am berni-aha antara am ekse-aha bademme, á kwaraterse duksa ge emnde am mashidi-aha-aatare, a balateraa labare á higa, labare á dem \*kwára á Dadaamiya, ámbera á mbatermbe am lapikere gergere, ira názena a badza ura bademme.

<sup>36</sup> Am Yaisu a zharanaahe nalga á emnde na, daaci a naba zatervaarehe, adaba kud'arevkude, zlauzle ndzed'a-aatare. Ta ba seke kyawe-aha na baaka suni am ekte ge itare.

<sup>37</sup> Daaci, a ba nane á elvan ge pukura-aha-aara: «Kwakya hiya áte fe, amá cekwa emnde a eh'alá-aara á dem mba.

<sup>38</sup> Adaba una nanna, n'alaun'ala Edda á fe, geni á farfe ge bela emnde á dem fe-aara.»

## 10

### *Yaisu a belaa pukura-aha-aara kelaawa ju buwa (Mark. 3:13-19; Luka 6:12-26)*

<sup>1</sup> Yaisu a d'etaa pukura-aha-aara kelaawa ju buwa, daaci a vaterte hákuma ge ngyanse jini-aha am ura, tá mba emnde am lapikere gergere antara emnde na tá an badza bademme.

<sup>2</sup> Náwa itare zhera-aha a emnde a bela kelaawa ju buwa nanna: Zun'jwe wá, ba Simaun, nane una ta d'ahanaa an Piyer, tá antara egdza emmen'ara Andere; egdzara á Jaibaidaiyus buwa tara Yakuba an Yuhanna,

<sup>3</sup> Filip, Bartaulauma, Taumas, Mata nane una slejaha hadama, Yakuba egdza á Halfa, Tadawus,

<sup>4</sup> Simaun na wayaaka tá kwarátera emnde umele na, ira Yahuda Iskariyaut edda una a velu Yaisu áza kelaade-aha-aara na.

<sup>5</sup> Yaisu á bela pukura-aha-aara kelaawa ju buwa nanna, a ba nane á elvan ge itare: «Daumbareka á dem tate á emnde a jeba umele, daumbareka á dem ekse-aha á emnde a \*Samariya keni.

<sup>6</sup> Daumbare kure á ba deza Iserayiila-aha, itare tá ba seke kyawe-aha na ta keda an keda na.

<sup>7</sup> Daumbare an waazu, bawateranba: Sarte á njá am \*kwára á Dadaamiya herzhapteherzhe.

<sup>8</sup> Daaci mbaumbe lapika-aha, tsautse emnde am emtsa, mbaumbe emnde na á waterá derve, ngyaungye jini-aha am emnde keni bademme. Hákuma nanna kwá shan ba dey, kure keni magawateránmaga ba dey ge emnde.

<sup>9</sup> Daumbareka an dindar, bi lipela, ma shungu keni am lyiba-aha á kure.

<sup>10</sup> Eksauka nambela á kashi am erva ge mága shula á kure, ma nangyuwe buwa keni áte ura palle. Halauka kimake, ma zade keni am erva, adaba edda á slera wa, zlayánzlaya geni á lyevalya d'áfa keni.

<sup>11</sup> Má dakuremde am berni, bi am ekse, tatayautataya ba edda una an'kwa higa-aara ge lyyakurlyiya na, njawinja á ba am mba-aara, dem sarte á zlala á kure áhuwa.

<sup>12</sup> Má kwá an'kwa dem mba á ura, bawateránba emtsaade ge emnde á há nanna: A vakurteva Dadaamiya hairire!

<sup>13</sup> Daaci má lyarakurvalye emnde a há ɲanna tá shansha hairire na. Amá má lyiyarakurka, tá shanka hairire ɲanna.

<sup>14</sup> Má dakuremde am mbá á emnde, bi am ekse na lyiyarakurka emnde, bi cenarka elva á kure wá, dawedde am ekse-aatare, papawaapape berbere na áte sera á kure.

<sup>15</sup> Yá bakurá ba jirire: Vaci shairiya wá, watse ɲgulme ba shairiya na ta magaterán ge emnde a \*Saudauma antara emnde a \*Gaumaura na, arge názá á emnde a ekse ɲanna.»

*Zladá-aha na watse á sawa na  
(Mark. 13:9-13; Luka 21:12-17)*

<sup>16</sup> «Cenauca: Náwa yá belakurbela wá, kwa ba seke kyáwe-aha am dágave á indale-aha. Amá gawuvge yaimyaim-aha ba seke záhe, gawuvge emnde a kamaare ba seke zalke-aha.

<sup>17</sup> Faufa hyema áte ire á kure, adaba watse tá dakurá á de katafke á shairiya, tá de slerpákurá an já am mashidi-aha-aatare.

<sup>18</sup> Watse tá dákurá á de katafke á male-aha á duniya, tá de dákurá á de katafke á slekse-aha adaba zhera-aaruwa. Estuwa, kure keni kwá de ndaasendahe seydire áte iya á katafke-aatare antara áza emnde a jeba umele keni.

<sup>19</sup> Amá, má darákurda wá, dzamauka ire á názena kwá de ndaaná kure, bi geni kwá de ndaaná estara. Adaba á ba am sarte ɲanna wá, watse á semsa elva-aha na kwá de ndaaná kure á sem ire-aha á kure.

<sup>20</sup> Adaba kwá de ndaaná kure-ka, á de ndaaná ba Shedefkwe á Eddekure elva-aha ɲanna am kure.

<sup>21</sup> «Am sarte ɲanna maa, emnde umele tá de vatertá ba itare an erva-aatare egdzar mama-aha-aatare ge emnde, geni a de cebarateraceba. Dada-aha keni tá de vatertá ba itare egdzara-aatare ge emnde, geni a de cebarateraceba. Egdzara umele keni, tá de daterar ge dada-aha-aatare antara mama-aha-aatare, tá de ceba ba shifa-aatare.

<sup>22</sup> Emnde bademme watse tá dá ba kelaadire ádete kure adaba zhera-aaruwa, amá edda una má tsaatse shagera dem halavuwa-aara wá, ɲane á lyelye shifa-aara.

<sup>23</sup> Amá am ekse na má tá fá zladá áte kure, zhagadawzhagade á dem ekse umele, adaba uwe, una yá bakurá ba jirire: yá de semsa ya ba estuwa, ya \*Ura á emnde bademme, kwá de zланаaka ja daba am berni-aha á \*Iserayiila bademme.

<sup>24</sup> «Baaka pukura na ni á januje ge málum-aara an malire; baaka walaadí na á januje ge zanuwe-aara an malire.

<sup>25</sup> Á juka am, ma waletewala pukura, ɲane keni á gevge seke malum-aara, ma walaadí keni á juka am á gevge seke zanuwe-aara. Má edda á há maa, tá dahaná an \*Bailjaibul ni, sákwa emnde na tá am huđe á há ɲanna emtu?»

*Kuvaukuva ba Dadaamiya palle  
(Luka 12:2-9)*

<sup>26</sup> «Adaba una ɲanna, kuvauka urimagwe dekideki. Adaba baaka duksa na an shebe kina, á de shebaaveshebe mazla-aara. Baaka duksa na ni nasherire kina, tá de diseka emnde.

<sup>27</sup> Názu yá bakurná ya an shebe na, de balausebale ba parakke. Una tá ndaakurse á dem hyema an nasherire na keni, de balaubala á ba an ká kwárá á dem huđe á ekse.

<sup>28</sup> Kuvawaterka emnde na tá dzegwándzegwa cebakurceba ba shifa á kure am duniya na. Itare tá dzegwánka mága duksa áte shifa a

dem zlanna. Kure wá, kuvaukuva ba edda una ni ñane an hákuma ge cefakurcefa kina, an hákuma ge dakurá á dem kára á jahanama keni.

<sup>29</sup> Njedu-aha buwa tá velan ba ge kwáfa palle-ka emtu? Amá ba palle á njedu-aha ñanna keni á taa kedéka ba estuwa, sey má a wayetaa Eddekure na am samaya na.

<sup>30</sup> Ba duksa palle ge kure keni: Ba úgje á ire á kure keni an kezla bademme áza Dadaamiya.

<sup>31</sup> Adaba una ñanna gazlauka defekideki, kwá an dárádza ba kure arge njedu-aha ñanna ma wanyara keni.»

*Yaa Yaisu bi ndaase parakke geni ba ñane una Yaakadada  
(Luka 12:8-9)*

<sup>32</sup> «Ma ware una shebaaka, a enndaha ba parakke á katafke á emnde ganakini ya Yaakadada-aara wá, iya keni yá de enndaha ba parakke á katafke á Edderwa am samaya geni ñane ura-aaruwire.

<sup>33</sup> Amá edda una yiyaaya á katafke á emnde wá, iya keni yá de yanaaya á katafke á Edderwa am samaya.»

*Hairire-ka amá kelaadire  
(Luka 12:51-53; 14:26-27)*

<sup>34</sup> «Slaslauka geni iya ya saa hairire á sem duniya. Sanka an hairire á sem duniya, amá ya saa ba kelaadire.

<sup>35</sup> Sawa-aaruwa wá, ya se wesha tara egdzere an dada, tara egdzere mukse an emmenjara, ira tara egdzere mukse antara shawle-aara mukse.

<sup>36</sup> Ba emnde a há-aatare una tá de gev kelaade-aha-aara.

<sup>37</sup> «Ma ware una a hayaa ba eddenjara bi a hayaa emmenjara arge iya, ñane wa, hyafka sledfabidaba.

<sup>38</sup> Ma ware una eksanteka dzangala-aara emtsaade ge dabadaba an ñane, ñane wá, hyafka sledfabidabi.

<sup>39</sup> Ma ware una á kátá ñezlese shifa-aara na, edda-aara á kedanaakeda, amá edda una a kedaa shifa-aara adaba iya, ñane á ñezlesenjezle.»

*Elva a sha lafa  
(Mark. 9:41; Luka 10:16)*

<sup>40</sup> «Ma a lyakurvaa ware keni, edda-aara a lyevaa ba iya. Edda una lyivaalye, a lyevaa ba edda una a belibela na.

<sup>41</sup> Ma ware una a lyevaa nabi á Dadaamiya áfaba ñane nabi á Dadaamiya, ñane keni á de shansha lafa á nabiyire. Edda una a lyevaa ura jirire áfaba ñane slejirire, ñane keni á de shá lafa á slejirire.

<sup>42</sup> Yá bakurá ba jirire: Ma ware una a vante ba yáwe lailaidfe ge cekwa á pukura-aha-aaruwa, áfaba ñane pukura-aaruwa, á shansha lafa-aara.»

## 11

*Emnde a bela á Yuhanna ádeza Yaisu  
(Luka 7:18-35)*

<sup>1</sup> Am Yaisu zlauzle á tsakaterá elva ñanna ge pukura-aha-aara kelaawa ju buwa maa, a naba tsetehe áhuwa mazla-aara, ge de kwaraterse elva antara ge balatera waazu ge emnde am ekse-aha á larde ñanna.

<sup>2</sup> Am sarte ñanna maa, Yuhanna slemaga baptisma am dangay. Ba cenancena labáre á slera na anjwa á maganá Yaisu \*Almasiihu na, daaci a belanve emnde umele am pukura-aha-aara,

<sup>3</sup> geni tá de ndavanundave estuwa: «Ba ekka edda una diyanerdiya ganakini watse á sáwa na emtu? Una ka ura umele, sey nǎ tsákwá hyema ádaliye he?»

<sup>4</sup> A nǎwaterantehe ge Yaisu, a ba nǎne á elvan ge itare: «De bawanánba kure názena á cenaná hyema á kure, antara názena kwá zheraná á ba an ice á kure na ge Yuhanna nǎnna.

<sup>5</sup> Bawanánba ganakini wulfe-aha tá anǎkwa nanna ice-aatare, emnde a dere tá anǎkwa zlala ba lanǎe, emnde a derve garevge ba metedmetedfe, makwaya-aha tá anǎkwa cenánceña, emnde na ndza emtsaremtsa keni tsarettse, talage-aha keni maa, cenarvaacena waazu á labare á higa.

<sup>6</sup> Barka ge edda una má kezlanveka fetarfire-aara áte iya na.»

<sup>7</sup> Am sarte na tá anǎkwa zlalá pukura-aha á Yuhanna maa, Yaisu a fantau ge ndahater elva á Yuhanna ge zlamáha, a ba nǎne á elvan ge itare: «Ndza kwa de zhárá uwe kure am kaamba? Ndza kwa de zhárá masa-aha na á gejaná effeya na emtu? Una nǎnna-ka dekideki.

<sup>8</sup> Ay ndza kwa de zhárá uwe? Ndza kwa de zhárá ura am zane zariya emtu? Náwa emnde a tsekwa zane zariya keni tá á ba am mba á slekse-aha.

<sup>9</sup> Ay ndza kwa de zhárá uwe? Ndza kwa de zhárá nabi á Dadaamiya ka emtu? Una ba jirire, á tsáka á ba an nabi keni.

<sup>10</sup> Adaba ba Yuhanna una wakita á Dadaamiya anǎkwa á ndaha elva-aara a ba nǎne:

“Náwa yá bela slebela-aaruwa á katafke á nǎ, ge tsatsaká baráma, á ba Dadaamiya.”

<sup>11</sup> Yá ndaakur ba jirire: am emndimagwaha na tá yaterá ba nǎwásha, baaka ura á jauje ge Yuhanna slemaga baptisma an malire. Aley edda una cekwa ba nǎne am emnde na tá am \*kwara á Dadaamiya wá, nǎne á jauje ge Yuhanna an malire.

<sup>12</sup> Kwaye a fantuwa estuwa Yuhanna slemaga baptisma ge bala waazu, sem vatena, kwara á Dadaamiya á shá ba zladá áza kelaade-aha, tá kátá ba ta berduhe daaci tá kwaraná itare.

<sup>13</sup> Adaba bademme á nabi-aha, antara \*tawraitá á Muusa ta magaa nabiyire-aatare áte kwara á Dadaamiya. Itare wá, halarvuhale á ba áte Yuhanna.

<sup>14</sup> Má kwá cena náza-aaruwa wá, \*Ailiya na Dadaamiya a balese werre am wakita-aara ganakini watse á sawa na, ba nǎne Yuhanna nǎnna.

<sup>15</sup> Edda una anǎkwa hyema-aara ge cena duksa, a cenvaacena elva na ya bakurna ya na ba shagera.

<sup>16</sup> «Yá sláterá an ware kwa emnde a zamáne na? Yá sláterá an egdzara na tá beđa ba nara áte we á layye am huđe á ekse, a ba emnde umele, tá elvan ge emnde umele-aatare:

<sup>17</sup> Nǎ fertakurte derma á ga gusa, shekelakurka; nǎ tsakakurte dákwa keni, kyuwakurka.

<sup>18</sup> Haá! Samsa Yuhanna, nǎne zaaka duksa-aha umele, shaaka mbazla, nǎne wá, an shaitaine deme ákyiye!

<sup>19</sup> De samsa \*Ura á emnde bademme, nǎne wá, anǎkwa ezza, anǎkwa essha keni, ta bantsa: Kwaye zhele na slera-aara ba huđe, nǎne deme wá, ura á emnde a nǎzla antara emnde na tá maga ba haypa na ákyiye! Amá ilmu á Dadaamiya wá, anǎkwa á máráva jirire-aara am slera na anǎkwa á maganá nǎne.»

*Zladá árge eksa-aha na ta kwaleve mága tuba  
(Luka 10:13-15)*

<sup>20</sup> Daaci Yaisu a naba valateraarhe ge emnde a ekse-aha na ndza a magaa najipu-aha kwakya am huđe-aara, aley magarka tuba đekideki na. A ba ɲane áte ekse-aha ɲanna:

<sup>21</sup> «Degiya watse zlađa arge ekka, ekka Kaurajin; zlađa arge ekka, ekka Baytisayda. Ađaba najipu-aha na ya maganaa am kure na wá, ma andze am Tirus antara Sidaun wá, ma andze tsakwaremšakwa emnde a ekse-aha ɲanna am buhwa-aha, ma andze daremde am kelpa á kára ge marese tuba-aatare.

<sup>22</sup> Ađaba una ɲanna, yá bakurá ba jirire: Vaci shairiya wá, watse ɲgulme ba shairiya na ta magaterán ge tara Tirus antara Sidaun na arge názá á kure.

<sup>23</sup> Ekka keni Kafarnahum, ka kurken watse á kakteka Dadaamiya, á dakaada á dem samaya emtu? Baaka đekideki! Watse á gakaage á dem jahanama. Ađaba najipu-aha na ya maganaa am ka na wá, una ɲanna ma andze am \*Saudauma wá, sem vatena keni ekse ɲanna ma ba nja-aara.

<sup>24</sup> Ađaba una ɲanna, yá baká ba jirire: Vaci shairiya wá, watse ɲgulme ba zlađa na Dadaamiya á de faná áte emnde a \*Saudauma na arge názá á ɲa.»

*Sawmbare ásezerwa kwá shansha puwansepuwe*  
(Luka 10:21-22)

<sup>25</sup> Am sarte ɲanna, a eksante elva ge Yaisu, a ba ɲane: «Eddaye-aaruwa, ka Edda á samaya antara haha ba ka palle. Yá aɲkwa slafak we-aaruwa kwakya, ađaba ka sateransa ka ge egdzara mesheshe názu ka shebatervuwe ge emnde a diya, antara emnde a eɲkale.

<sup>26</sup> Ba estuwa Edderwa, una namaari á ɲa ganakini a gevge ba estuwa.

<sup>27</sup> «Edderwa a fime duksa bađemme am erva ge iya. Diyaweddiye ganakini baaka ura á diyeddiye \*Egdza á Dadaamiya máki Edeɲara ɲanna-ka. Dada keni, baaka ura á diyeddiye máki Egdza-aara-ka palle, antara emnde na a wayaterántaa Egdza-aara ge marateránmara.

<sup>28</sup> «Kwa emnde na kudakurefkude ge sapa gwatama demđeme na, sawmbare bađemme ásezerwa, yá lyakurvárelya kwá puwánsepuwe.

<sup>29</sup> Naba fawisarefe, tsahautsaha duksa ázerwa, ađaba ya ura maggwe, ya slekemaare. Ba jirire geni kwá shansha puwansepuwe ge ire á kure.

<sup>30</sup> Ađaba duksa na yá de fakuraara iya, á de magakuránmaga emtakire, gwatame na yá de fakuraara iya keni, zlazlađa-ka essepa-aara đekideki.»

## 12

*Ba Yaisu una edda á kwaskwe á puwansepuwe*  
(Mark. 2:23-28; Luka 6:1-5)

<sup>1</sup> Daaci shekwaashekwa cekwaangudī, vacite umele an kwaskwe á puwansepuwe Yaisu a degashe am dágave á fe-aha á hiya, á wáterá waya ge pukura-aha-aara maa, ta naba kezleve ire á hiya na, ta zuhe.

<sup>2</sup> Ba naráterna \*Farisa-aha maa, a ba itare tá elvan ge Yaisu: «Ezzhara pukura-aha á ɲa tá maga názu piyatepiya shairiya á miya an vaci puwansepuwe.»

<sup>3</sup> A naba ɲwaterantehe ge Yaisu, a ba ɲane á elvan ge itare: «Ekkure ndaakurseka názu ndza a maganaa \*Dawuda am sarte na irice-aara antara emnde-aara bađemme ɲateraaɲa waya na emtu?

<sup>4</sup> Duwa-aatare á dem mashidi wá, ta de zuhe tapiske na ta fán ge slera á Dadaamiya na. Baráma á zuze-aara keni belarateránka tsa. Una á ndaaná shairiya á miya wá, sey tá zana ba \*liman-aha palle.



<sup>5</sup> Emtu ndaakurseka am \*tawraita, ganakini \*liman-aha wá, ma vaci puwansepuwe keni, itare tá diya ba mága slera am mashidi emtu? Adaba una nanna, itare ma tsufarteka una am \*tawraita keni, baaka haypa áte itare.

<sup>6</sup> Ay degiya, anƙwa názu jauje ba ge mashidi keni an yaikkire áhuna.

<sup>7</sup> Á ndahaná wakita á Dadaamiya, a ba nane: Maggwire una yá kataná iya sadake á dabba-ka, á bina. Ma andze diyakurdiya una nanna wá, ma andze kwá faterarka shairiya ge emnde na baaka haypa-aatare na.

<sup>8</sup> Ya ndahanaa áƙaba uwe una, adaba ba iya \*Ura á emnde baƙemme una ya edda á vaci puwansepuwe nanna.»

*Zhele an emtsa erva-aara  
(Mark. 3:1-6; Luka 6:6-11)*

<sup>9</sup> Tsetsa Yaisu áhuwa, a de demhe am mashidi-aha-aatare umele.

<sup>10</sup> Am mashidi nanna wá, anƙwa zhele an emtsa erva-aara. Emnde na tá am huƙe á bere nanna itare tá tsagwaƙa ba Yaisu, má watse á maganaamaga duksa na áte unƙule-aara-ka, lauktu ma ta puwar elva. Ta ndavanuhe áƙaba ba una nanna, a ba itare: «\*Tawraita á naba vamiteva baráma geni mí mbanaambe ura an vaci puwansepuwe emtu?»

<sup>11</sup> A nƙwaterantehe ge Yaisu, a ba nane á elvan ge itare: «Máki a eblyemaa kyawe á kure á dem evege sladƙe an kwaskwe á puwansepuwe, kyawe á edda-aara keni palla ba nane, á zlála-ka á de sansese emtu?»

<sup>12</sup> Sakwa ura emtu? Una ba jirire ganakini yaikke ba ura arge kyawe. Daaci estuwa, \*tawraita á vante baráma á mága slera á maggwire ge ura an vaci puwansepuwe.»

<sup>13</sup> Daaci a ba Yaisu á elvan ge zhele na an emtsa erva-aara na: «Pelansepele erva á nana». A naba pelanse, erva-aara gevge ba lanƙe ba seke umele.

<sup>14</sup> Mázle-aara ba zlála ge \*Farisa-aha ta de maga sawari-aatare geni tá maganá estara, lauktu tá keƙanaakeƙa shifa á Yaisu.

*Sleslera na Dadaamiya a eksese nane*

<sup>15</sup> De diyeddiye Yaisu sawari-aatare nanna maa, a naba yaa tate nanna, a naba zlála á dem tate umele. Dikele á emnde estuwa ta daa ƙaba nane. A mbateraaha emnde na ta lapika-aha na baƙemme.

<sup>16</sup> Amá a giyateraaha á ba an ndzeƙa geni a de balateranseka labáre-aara ge emnde, ma ware nane keni.

<sup>17</sup> Estuwa jiranvejire nane elva na ndza a balanaa nabi Aisaya, á ba nane:

<sup>18</sup> «A bantsa Dadaamiya:

Nawa una sleslera-aaruwa ya eksesaa ya, nane edda una a wayanaa ervaunƙe-aaruwa, yá higa jipu áte nane. Watse yá se tsekwaná áte nane Shedekwe-aaruwa, á de balaterá nane ge nalga-aha baƙemme, geni watse yá kya shairiya-aatare baƙemme.

<sup>19</sup> Nane, tá de mbaƙeƙa we antara ura ƙeƙiƙeƙi, á de feka hula, baaka ura á de cenancena kwara-aara á dem zhegela áte we á layye-aha.

<sup>20</sup> Nane wá, ma edda una ba seke názbakara na an dzala keni, nane á keƙleka ƙeƙiƙeƙi. Ma ba seke kára á názbakara na herzhe á emtsa keni, nane á emtsanaaka ƙeƙiƙeƙi. Á de magán ba estuwa sey má ganvege jirire á Dadaamiya am dagave á emndimagwaha.

<sup>21</sup> Baƙemme á nalga-aha, watse tá fete tama-aatare á ba áte nane palle.»

*Jawapa a vatertaa Yaisu ge \*Farisa-aha  
(Mark. 3:20-30; Luka 11:14-23)*

<sup>22</sup> Daaci ta sanaa zhele an jini ge Yaisu, jini na ganvege zhele ɲanna wulfe, ganvege uce. Amá Yaisu a naba mbanaahe zhele ɲanna, aɲkwa á nanna íce-aara, á ndaha elva ba laɲɲe zlaɓe ádaliye.

<sup>23</sup> Emnde baɗemme tá aɲkwa maga ba najipu-aara, a ba itare: «Watse ba ɲane una wulfe á sleksu \*Dawuda, ɲá aɲkwa ufufa na ka?»

<sup>24</sup> Amá am sarte na cenaratercena \*Farisa-aha, a ba itare: «Zhele ɲanna, a shaa hakuma á ba áza male-aatare á shaitaine-aha, zhera-aara \*Bailjaibul, ge ɲgya jini-aha am emnde.»

<sup>25</sup> Amá kertenɲ diyeddiye Yaisu názu am ire-aatare, daaci a ba ɲane á elvan ge itare: «Estuweka. Baɗemme á sleksire, máki tarapsete emnde gergere buwa am kwara ɲanna, tá aɲkwa dagala am dagave-aatare wá, sleksire ɲanna ba badzavbadze. Ma berni-ara, bi ma huɗe á há-ara keni, máki emnde na tá am huɗe-aara garevka palle, tá aɲkwa dagala am dagave-aatare wá, ba badzavbadze.

<sup>26</sup> Daaci máki shaitaine á ɲgya jini-aha-aara ba ge ɲane wá, á wava áte ire-aara ba ge ɲane, á zlala estara kena kwara-aara á de katafke?

<sup>27</sup> Náwa kwa bantsa kure, a vitaa ba \*Bailjaibul hakuma ge ɲgya jini-aha am ura. Máki estuwa wá, a vatertaa ware kena hakuma á ɲgya jini-aha am ura ge emnde á kure? Tá kyaná ba emnde á kure shairiya-aara, geni baaka jirire am elva á kure.

<sup>28</sup> Yá ndaakur ba jirire: Yá aɲkwa ɲgya jini-aha á ba an hákuma na a vitaa Shedekwe á Dadaamiya. Amaana wá, samsa ba Dadaamiya an sleksire-aara aseze kure.»

<sup>29</sup> Yaisu aɲkwa á slá Shaitaine an slendzedá, a ba ɲane á elvan ge itare: «Á dzegwaná estara ura de za há á slendzedá máki eksevaaka slendzedá ɲanna emtsaade, a puwanse erva á kataliya, lauktu á za há-aara baɗemme?»

<sup>30</sup> «Daaci ma ware una baaka an ya keni, ɲane kelaade-aaruwa. Ma ware una á meliyuka ge jáhá emnde na, ɲane slezadaterzaɗa.

<sup>31</sup> Adaba una ɲanna maa, yá aɲkwa ndaakur ba jirire: Á naba yateraareye Dadaamiya ge emnde ma haypa-ara keni, antara elva-aha mandzawe na tá valyaná itare baɗemme. Amá edda una a ndaase elva mandzawe áte Shedekwe Cufedɗe wa, baaka yanarye ɗekideki.

<sup>32</sup> Máki ura a ndaase elva mandzawe áte \*Ura á emnde baɗemme wá, á naba yanarye Dadaamiya haypa-aara. Amá edda una, má a ndaase elva mandzawe áte Shedekwe Cufedɗe wá, baaka yanarye ge ɲane ɗekideki, ma am zamane na, ma am zamane na á de sawa na keni.»

*Bademme á nafa-aha ta diyaterse á ba áte egdzara-aatare  
(Luka 6:43-45)*

<sup>33</sup> «Egdza á nafa na emtake, sey tá shaná áte nafa na shagera. Tá shanka egdza á nafa emtake áte nafa laake. Ma nafa-ara keni tá diyeddiye á ba áte egdza-aara.

<sup>34</sup> Kure, elva-aha á kure á ja shifa seke wenye á zahe, kwá taa ndaaseka duksa shagera adaba kwa mandzawe-aha. We á ura wá, á ndaha ba názu jauje am ervaunɗe á edda-aara.

<sup>35</sup> Slekemaare, á sa arge shagerire á názena an ndaka am ervaunɗe-aara, á sanse ba názena emtake na. Slemanzawe maa, á sa arge shagerkire á názena an ndaka am ervaunɗe-aara, á sanse ba názena emtaɲka ɗekideki na.

<sup>36</sup> Yá ndaakur ba jirire: Vacite na Dadaamiya á de kya shairiya á duniya baɗemme wá, emnde baɗemme tá de shansha elva-aha laakire na tá aɲkwa tsakaná itare na baɗemme.

<sup>37</sup> Adaba ma ware keni tá de kyanaa shairiya á ba áte elva na anƙwa á tsakaná ñane baɗemme na, ma edda-aara áte jirire, ma áte fida keni.»

*Najipu na a marsaa Dadaamiya áte Yaunas  
(Mark. 8:11-12; Luka 11:29-32)*

<sup>38</sup> Daaci a ba emnde umele am malum-aha á \*tawrait, antara \*Farisa-aha, tá elvan ge Yaisu: «Malum, ñá kátá ká marañerá najipu palle, ñá diyeddiye átekwa máki a belakaa ba Dadaamiya.»

<sup>39</sup> A ñwete ge Yaisu, a ba ñane á elvan ge itare: «Amá emnde a zamane na wa, ta mandzawe-aha váyya, varanteka ervaunɗe-aha-aatare ge Dadaamiya. Itare tá anƙwa ndava najipu ge diyise átekwa, máki a beliyya ba Dadaamiya, amá tá shanka ɗekiɗeki. Hyaahya ba najipu na a marsaa Dadaamiya áte nabi Yaunas na.

<sup>40</sup> Ba seke una Yaunas a magaa váha keye, vayiya keni keye, am huɗe á kelfe na wá, iya \*Ura á emnde baɗemme keni yá de gá váha keye vayiya keni keye am irekhya ba estuwa.

<sup>41</sup> Vaci shairiya wá, emnde a \*Niniwe tá de mbedateraambedá emnde a zamane na. Adaba itare, am sarte na cenarácena waazu a Yaunas, magarnaamaga tuba. Amá náwa anƙwa edda una jauje ge Yaunas kina, kure kwá mañka tuba.

<sup>42</sup> Zlaɓe ádaliye, vaci shairiya wá, anƙwa slekse mukse, ñane keni watse á mbedateraambedá emnde a zamane na. Adaba ñane kwaye ndza a tsetaa am pute, a se cena waazu á Suleymanu sle-ilmu jipu. Amá náwa anƙwa edda una jauje ge Suleymanu kina, kure kwá ceneka.»

*Eptsa á jini á dem urimagwe  
(Luka 11:24-26)*

<sup>43</sup> «Má sesse jini am ura wá, á de ja ɗaba á ba am kaamba, ge tataya tate á puwansepuwe. Máki shanka wá,

<sup>44</sup> á bánba jini ñanna: Ambane yá eptsa á dem bere-aaruwa na ya segashe am huɗe-aara na. Má eptsapta wá, á de bera ba bere an hyaɗa, an tsatse tseɗañje, amá baaka ura am kwa.

<sup>45</sup> Daaci á zlála-aara, á de ɗaha jini-aha umele na jaruje ba ge ñane an mandzawire na vuye, tá sawa, tá se njá am huɗe-aara. Am iga-aara wá, edda-aara á gev ambane ba una ndza am zuñwire na. Náza emnde a zamane mandzawe na keni, watse ba estuwa.»

*Tara emmenara antara egdzar mama-aha-ñara ge Yaisu  
(Mark. 3:31-35; Luka 8:19-21)*

<sup>46</sup> Yaisu anƙwa á ndaater waazu ge emnde am bere wá, ta semhe ge tara emmenara antara egdzar mama-aha-ñara wá, ta tsatsehe ágashe, tá kátá tá ndaha elva antara ñane.

<sup>47</sup> Daaci ura umele a de mbedanuhe ge Yaisu, geni tá anƙwa ndavaná tara emmenara, tá antara egdzar mama-aha-ñara ágashe.

<sup>48</sup> Yaisu á ñwanante ge edda-aara, a ba ñane: «Ware ñane emmerwa ge iya? Emnde-ara ñane egdzar mama-aha-aaruwa ge iya?»

<sup>49</sup> Daaci á mara pukura-aha-aara an erva, a ba ñane: «Náwa tara emmerwa antara egdzar mama-aha-aaruwa tá áhuna.

<sup>50</sup> Ma ware una anƙwa á maga názu á kataná Edderwa am samaya, edda-aara egdza emmerwa zhele, bi egdza emmerwa mukse, bi emmerwa.»

## 13

### *Naraje an slepuwa wulfe*

*(Mark. 4:1-9; Luka 8:4-8)*

<sup>1</sup> Vacite ɲanna wá, Yaisu a tseta á ba am mba, a de nja áte we á haye geni á kwaraterse elva ge emnde.

<sup>2</sup> Daaci emnde kwakya se jarammeje ázeɲara, ɲane a naba njema am paare áte ire á haye; emnde wá, bademme tá á ba am haha áte we á haye ɲanna.

<sup>3</sup> A kwaraterse duksa kwakya an naraje-aha, a ba ɲane á elvan ge itare:

<sup>4</sup> «Sesse zhele umele ge de puwa nalkame am fe-aara. Am sarte na aɲkwa á puwa nalkame ɲanna, wulfe-aha umele a de valyaa áte unɲule, ta se tsakantehe ge yiye-aha.

<sup>5</sup> Wulfe-aha umele, a de valyaa áte cacera, cekwa haha, a naba sesehe á ba áte watsewatsire adaba cekwa haha.

<sup>6</sup> Amá de sesse vaciya an kára wá, deraadera áɗaba baaka slalwe ɲgelama.

<sup>7</sup> Wulfe-aha umele zlaɓe adaliye, a valyemaa am dake, a waltaa am dake, a becante ge dake.

<sup>8</sup> Amá wulfe-aha umele wá, a puwaa á ba am haha shagera, a magaa ire shagera. Ekte-aha umele, ta yayaa egdzara deremke deremke; ekte-aha umele ta yayaa egdzara kul unɲwahe kul unɲwahe, ekte-aha umele zlaɓe adaliye ta yayaa kul keye kul keye.»

<sup>9</sup> Daaci a ba ɲane á elvan ge itare: «Edda una máki aɲkwa hyema-aara wá, a cenevaacena!»

### *Labára naraje-aha?*

*(Mark. 4:10-12; Luka 8:9-10)*

<sup>10</sup> Am iga á una ɲanna maa, ta naba sawa pukura-aha áseza Yaisu, a ba itare tá elvan ge ɲane: «Labára ká ndater elva ge emnde an naraje-aha?»

<sup>11</sup> A ɲwaterante, a ba ɲane: «Kure wá, vararakurteva barama geni kwá diyeddiye nasherire na am \*kwara á Dadaamiya, amá itare sharanka una ɲanna.

<sup>12</sup> Adaba edda una aɲkwa ázeɲara wá, tá de fanaarfe á de jauje á ba áte ɲane. Amá edda una an erva dey wá, ba egdza una ázeɲara na keni, watse tá de lyanvulye.

<sup>13</sup> Adaba una ɲanna, yá ndater elva an naraje. Adaba ma tá aɲkwa ezzhárá deme keni tá nánka; tá effa deme hyema keni, tá cenánka duksa dɛkideki, á duka á dem hyema-aatare.

<sup>14</sup> Estuwa, názena ndza a ndahanaa Dadaamiya á kya an we á nabi Aisaya na gevge jirire-aara. Adaba a ba ɲane:

Kwá aɲkwa eccena an hyema-aha á kure, amá kwá cenanka ba názara keni. Kwá aɲkwa ezzhara an ice-aha á kure, amá kwá nanka duksa.

<sup>15</sup> Adaba degdega ire á emnde ɲanna. An vanya hyema-aha-aatare, geni a demka elva-aaruwa á demkwa. An háɗá ice-aha-aatare, geni a naránka duksa-aaruwa an ɲane. Adaba ire-aatare degdege jipu, tá sawka á sem sera-aaruwa, geni yá se mbateraambe, a ba Dadaamiya.

<sup>16</sup> Amá kure wá, higa yaikke ge kure, adaba ice-aha á kure aɲkwa á nanna duksa-aha á Dadaamiya, hyema-aha á kure aɲkwa cenancena.

<sup>17</sup> Yá bakurá ba jirire: Kwakya nabi-aha antara emnde á Dadaamiya umele ta kátá puwete ba ice-aatare áte názena kwá aɲkwa zharaná kure kina, amá naranka. Ndza ta kátá cena názena kwá aɲkwa cenaná kure kina, amá cenaranka.»

*Maana á naraje an slepuwa wulfe*  
(Mark. 4:13-20; Luka 8:11-15)

<sup>18</sup> «Cenaucena ba shagera náwa yá anƙwa ndaakur maana á naraje an slepuwa wulfe na.

<sup>19</sup> Emnde umele, tá cenvá elva áte \*kwara á Dadaamiya, amá á duka á dem ire-aatare. Daaci á sawa zhele mándzawe, á se eksese elva ɲanna am vuwa-aatare. Itare wá, ta ba seke unɲule.

<sup>20</sup> Emnde umele ta ba seke cacera. Itare, má cenarvaacena elva áte kwara á Dadaamiya wá, kertenj tá lyiyaná á ba an higa.

<sup>21</sup> Amá tá vanteka slede ge elva á Dadaamiya am vuwa-aatare. Daaci má jerje lámare umele bi zlaɗa aɗaba elva á Dadaamiya na wá, tá ya fetarfire-aatare ba watsewatse.

<sup>22</sup> Emnde umele zlaɓe ádaliye wá, ta ba seke dake. Tá lyevalya tsa elva á Dadaamiya, amá wá, á dem dáɗave á dzama á ire-aha á duksa á duniya gergergre, antara wáyá á nalmane á duniya kwakya. Á ɓecanta ba una ɲanna elva á Dadaamiya na am itare na, á maɲka nampire ɗekideki.

<sup>23</sup> Amá emnde umele wá, ta ba seke haha na slede shagera na. Itare, má cenarvaacena elva á Dadaamiya wá, á duwa á dem ire-aatare ba shagera. Elva á Dadaamiya á sha slede am itare, itare tá maga nampire. Emnde umele kwakya nampire-aatare; emnde umele nampire-aatare ba deydey. Emnde umele zlaɓe adaliye, nampire-aatare ba cekwa.»

*Naraje an ezleha am dagave á hiya*

<sup>24</sup> Daaci a bateraa naraje umele zlaɓe ádaliye, a ba ɲane á elvan ge itare: «Náwa názu á garava an \*kwara á Dadaamiya. Anƙwa ura umele a ica faha-aara, a de jem hiya.

<sup>25</sup> Vacite umele an vayiya maa, duwa kelaade-aara, a naba de janem wulfe á ezleha am hiya-aara ɲanna, a naba zlala.

<sup>26</sup> Am sarte na waltewala hiya a sanse ire maa, ezleha-aha keni sesse.

<sup>27</sup> Daaci duwa á emnde a slera á edda á fe ɲanna á deɓɓara, a ba itare tá elvan ge ɲane: Ambarka á ɲa male! Ábi ka jaa ba wulfe á jirire am faha á ɲa? Labara kwakya ezleha am hiya á ɲa?

<sup>28</sup> A ɲwaterante, a ba ɲane: A maganaa ba kelaade-aaruwa lámare na. A ba emnde a slera tá elvan ge ɲane: Eksakaarekse emtu ɲá de ica ezleha-aha ɲanna baɗemme á dem áhá?

<sup>29</sup> Yawanya, a ba ɲane á elvan ge itare, aɗaba watse kwá icesice antara hiya shagera.

<sup>30</sup> Yawanya baɗemme á narnáhá; má narvenahe, hyephye sarte á ica hiya wá, watse yá bateranba ya ge emnde a ica hiya geni a icarsice emtsaade ezleha-aha, a jaranmejahe am tate palle, a epsharupsha an kára, lauktu tá haliya hiya-aaruwa á dem kuvere.»

*Naraje an wulfe á pilli*  
(Mark. 4:30-32; Luka 13:18-19)

<sup>31</sup> Yaisu a bateraa naraje umele zlaɓe ádaliye, a ba ɲane á elvan ge itare: «\*Kwara á Dadaamiya wá, ba seke mága á wulfe á pilli, a eksante ge ura umele, a de beleme am haha am fe-aara.

<sup>32</sup> Cekwa ba ɲane am wulfe-aha á duksa, amá má de sesse, waltewala wá, hyema-aha-aara jauje ge hyema á duksa-aha umele an prempremire, gevge mama á nafa, haa yiye-aha tá maga bere-aha-aatare áte erva-aha-aara.»



*Naraje an shahi á makala*  
(Luka 13:20-21)

<sup>33</sup> Yaisu a bateraa naraje umele zlafe ádaliye, a ba ñane á elvan ge itare: «\*Kwara á Dadaamiya wá, ñane ba seke mága á shahi á makala. Á eksevákxa mukse ba cekwaanḡudi, á puwante ge ukpa tasa keye an wasla, amá á tsantetse shahi á makala na ukpa na baðemme.»

*A maganaa estuwa Yaisu slera an naraje-aha*  
(Mark. 4:33-34)

<sup>34</sup> Yaisu a kwaraterse elva-aha ñanna baðemme na an naraje-aha gergergre, baaka názu a baterna ñane baaka naraje am huðe-aara.

<sup>35</sup> An una ñanna wá, maganaamaga názena ndza a ndaanaa nabi Aisaya am nabiyire-aara na, a ba ñane:

«Watse yá bateranba elva-aha-aaruwa ge emnde an naraje-aha.» A ba ñane zlafe ádaliye: «Duksa-aha na ndza an shebe kwaye am fakte á duniya keni, watse yá ndaatersendahe.»

*Maana á naraje an ezleha am hiya*

<sup>36</sup> Am sarte na Yaisu puwaterapuwa emnde, ñane keni a de demhe am bere. Ta duhe ge pukura-aha-aara á dezeńara, a ba itare tá elvan ge ñane: «Palañernaapala maana á naraje an ezleha am hiya na.»

<sup>37</sup> Daaci a ba ñane á elvan ge itare: «Sleja wulfe wá, ba iya ya \*Ura á emnde baðemme.

<sup>38</sup> Fe wá, duniya. Hiya keni maa, emnde na watse tá dem \*kwara á Dadaamiya. Ezleha maa, emnde na tá átuge zhel mándzawe.

<sup>39</sup> Kelaade na a de jem ezleha ñanna am hiya, Shaitaine. Sarte á ica hiya, amaana halavuwa á duniya. Emnde á ica hiya, malika-aha á Dadaamiya. Kwaye ñane maana á naraje ñanna.

<sup>40</sup> Ba seke una ta icese ezleha am hiya, ta de peshanaa an kára na wá, am halavuwa á duniya keni watse ba estuwa.

<sup>41</sup> Iya \*Ura á emnde baðemme, watse yá puwa malika-aha-aaruwa á sawa, tá se dzerese emnde a emtaḡkire á hala antara emnde na tá vaterte ektapaare ge emnde na am kwara-aaruwa.

<sup>42</sup> Malika-aha tá de puwaterem am kára á jahanama, tá de kyuwa am kára ñanna, tá de kerða slare am kára.

<sup>43</sup> Amá emnde na tá aḡkwa fansarfe ge Dadaamiya wá, itare tá de gev ba seke vaciya an wulwulire am zlanna á Eddetare Dadaamiya. Edda una aḡkwa hyema-aara a cenvaacena elva ñanna.»

*Naraje an nalmane an heða am fe, antara náza hyema*

<sup>44</sup> «\*Kwara á Dadaamiya wá, á garava an nalmane na an heða am fe, de shansha ura umele, a shebanvehe zlafe ádaliye, á higa jipu. A de vala názu am erva-aara baðemme geni sey á shekwepshekwe fe na.

<sup>45</sup> «Zlafe ádaliye, kwara á Dadaamiya á garava an sletsakala, á tataya ba náza hyema na shagera na.

<sup>46</sup> Má shansha palle, una shagera jipu zlazlada gane-aara na, á valuvale názena am erva-aara baðemme, á de shekwa náza hyema ñanna.»

*Naraje an narre á sluwa kelfe*

<sup>47</sup> «Zlafe ádaliye, \*kwara á Dadaamiya á garava an narre na tá puwana emnde a sluwa kelfe á dem haye, tá duwa jili á kelfe-aha gergergre á dem huðe-aara.

<sup>48</sup> Má naatena, tá tedese ásegashe, tá dzera kelfe shagera shagera á dem ilila-aha-aatare, una baaka nampire-aara na ta puwanvehe.

<sup>49</sup> Am halavuwa á duniya keni watse á magava ba estuwa. Watse tá sawa malika-aha, tá se lateraale emnde na shagera hala-aatare, antara emnde na shagerka hala-aatare.

<sup>50</sup> Daaci emnde na shagerka hala-aatare na maa, watse tá puwaterá á dem kára á jahanáma, tá de kyuwa, tá de kerda slare am kára nanna.»

*Naraje an edda una emgyegwe a duksa antara una anwaslire keni anjwa am mba-aara*

<sup>51</sup> Am iga á naraje-aha nanna maa, Yaisu a ndavateru ge pukura-aha-aara, a ba nane á elvan ge itare: «Cenakurancena una-aha nanna bademme?» «Cenanerancena», a ba pukura-aha tá elvan ge nane.

<sup>52</sup> Daaci a ba nane á elvan ge itare: «Máki estuwa, ma ware una malum á \*tawraitá na anjwa fansarfe ge Slekse yaikke am samaya na, nane á garava an edda á há na emgyegwe a duksa keni, sey tá shaná á ba am mba-aara, duksa anwaslire keni á ba am mba-aara na.»

*Emnde a Nasarátu fartareka áte Yaisu*

*(Mark. 6:1-6; Luka 4:16-30)*

<sup>53</sup> Zlauzle Yaisu am tsakaterse naraje-aha nanna maa, á tsetehe am tate nanna,

<sup>54</sup> a zlalehe á dem ekse na a waletaa am huđe-aara na. A de fantau ge kwaraterse duksa ge emnde am \*mashidi á Yahudiya-aha. Emnde na tá áhuwa bademme tá maga ba najipu-aara geni a shanaa áme ilmu-aara nanna, a vantaa ware hakuma á mága najipu-aha-aara nanna.

<sup>55</sup> Ta bantsa itare wá: «Ábi ba nane una egdza á slega nafa na? Ba nane kahe una zhera á emmenjara Maari na? Ábi ba nane una egdza emmetare ge tara Yakuba, antara Yusufu antara Simaun ira Yahuda?

<sup>56</sup> Ábi egdzar mama-aha-njara njwasha keni tá anjwa á ba am dagave á miya áhuna? A shanaa áme kena nane hakuma estuwa?»

<sup>57</sup> A piyatertaa ba una nanna ge fetaare áte nane, baaka umele.

Daaci a ba Yaisu á elvan ge itare: «Ma áme keni emnde tá fa zherwe áte nabi á Dadaamiya, amá am ekse-aara wá, tá feka zherwe áte nane.»

<sup>58</sup> Daaci Yaisu a magaa najipu-aha ba cekwaanjudi áhuwa, adaba tá fetareka emnde áte nane.

## 14

*Elva a emtsa á Yuhanna slemaga baptisma*

*(Mark. 6:14-29; Luka 3:19-20; 9:7-9)*

<sup>1</sup> Daaci am sarte nanna cenancena sleksu \*Hirudus labare á Yaisu. Hirudus nanna wá, nane slekse á kwara á Galili.

<sup>2</sup> A ba nane á elvan ge emnde-aara: «Una degiya ba Yuhanna slemaga baptisma. A tsetaa ba nane am faya. Adaba una nanna an hákuma á mága najipu-aha gergere.»

<sup>3</sup> A bateraa una nanna adaba ndza a ndahanaa ba nane nanna geni a eksarvaksá Yuhanna. Daaci ta naba eksevaahé, ta puwete zawa áte nane, ta de belema am dangay. A njudanaa adaba uwe Hirudus Yuhanna, adaba Hirudus nanna a eksantaave Hirudiya ge egdza emmenjara Filip.

<sup>4</sup> Amá anjwa á ndandaha Yuhanna, geni a eksantaave mukse ge egdza emmenjara na wá, una nanna zlayeka dekideki.

<sup>5</sup> Ndza Hirudus á kátá kedá shifa á Yuhanna á ba am sarte nanna, amá a kuva emnde a ekse, adaba bademme á Yahudiya-aha fartarefe an Yuhanna, geni nane nabi á Dadaamiya.

<sup>6</sup> Daaci shekwaashekwa cekwaangudfi wá, samsa sarte á ya Hirudus, a magaa egdza munri. Duwa á egdza á Hirudiyá mukse, a de shekelaterante ge emnde na a d'ahateraa Hirudus á sem munri-aara. Una nanna hayanhaya jipu sleksu Hirudus.

<sup>7</sup> A naba zanu ba waɗa ge gyaale nanna, geni ma a ndavanu uwe keni sey á vanteva.

<sup>8</sup> Ba zlala ge gyaale na, a de ndava sawari áza emmeɗara emtsaade. Zlarauzle am sawari antara emmeɗara maa, sawa-aara áseza sleksu Hirudus, a ba nane á elvan ge nane: «Iya wá, yá kata ká vite ire á Yuhanna slemaga baptisma am kwatame.»

<sup>9</sup> Una nanna namaari-aareka d'ekideki ge sleksu Hirudus, amá am a zanuwa ba nane waɗa ge gyaale nanna á katafke á emnde-aara baɗemme, a naba eksaare. Daaci a ba nane: A varanteva ba názena a ndavana nane.

<sup>10</sup> Daaci a naba bela ura á de ica ire á Yuhanna slemaga baptisma am dangay.

<sup>11</sup> Ta de icaa ire áte Yuhanna am dangay wá, tá sanhe am kwatame, ta se vante ge gyaale nanna, nane keni a zlala an ire na á deza emmeɗara.

<sup>12</sup> Saremsa pukura-aha-aara ge Yuhanna, ta se eksante emtsa-aara, ta de hedehe, ta naba de mbedfanu labare ge Yaisu.

*Yaisu a zateru duksa ge zála debu ilyebe  
(Mark. 6:30-44; Luka 9:10-17; Yuh. 6:1-14)*

<sup>13</sup> Cenancena Yaisu labare á emtsa á Yuhanna, ta naba tsetehe am tate nanna, ta dema am paare á yawe, ta zlala á dem tate na ta baaka emnde átekwa na. Cenarancena emnde am huɗe á ekse geni zlazlala Yaisu maa, baɗemme á emnde sariesse am eksa-aha-aatare, ta d'abem Yaisu an sera, ta d'aba ba we á haye, we á haye.

<sup>14</sup> De sessa Yaisu am paare maa, á zhára ba dikele á emnde tá kela ádezeɗara, a naba zatervaare, a mbateraare emnde na ta lapika-aha am dagave-aatare.

<sup>15</sup> Eblyabelya vaciya maa, ta duhe ge pukura-aha-aara á dezeɗara, a ba itare tá elvan ge nane: «Baaka vaciya mazla-aara, tate na keni kaamba, ambane puwataapuwa emnde na, a zlarzlala á dem ekse-aha, tá de shakwanu náza za ge shifa-aha-aatare.»

<sup>16</sup> A ba Yaisu á elvan ge itare: «Ma zlalarka keni ba kalle, vawaterteva ba kure názu tá zuze.»

<sup>17</sup> Amá ta nwanante a ba itare: «Baaka duksa ázeɗere, sey ba depain ilyebe, antara kelfe buwa, baaka umele.»

<sup>18</sup> «Sawansa una nanna ásezerwa», a ba Yaisu.

<sup>19</sup> Daaci a ba nane á elvan ge emnde: «Njawinja baɗemme áte masa na.» Nane a halante depain ilyebe, antara kelfe buwa na, a kante ice á dem samaya, a slafanaa we-aara ge Dadaamiya, daaci a kwacaa depain-aha na, a tegateraa ge pukura-aha, geni tá vaterta ge emnde.

<sup>20</sup> Baɗemme á emnde, ma ware keni a zuhe á ba áte huɗe-aara, aley jauje zlaɓe ádaliye. Pukura-aha ta halante jugena-aara nanna wára kelaawa ju buwa.

<sup>21</sup> Kezлакula á emnde a zá náza zá nanna wá, tá maga zála debu ilyebe, baaka nwashá antara egdzara am huɗe-aara.

*Yaisu á zlála an sera áte ire á haye  
(Mark. 6:45-52; Yuh. 6:15-21)*

<sup>22</sup> Shekwaraaka ñekideki am iga á za depaiñ ñanna, a ba Yaisu á elvan ge pukura-aha-aara: «Dawemda am paare, dawedde kure zuññwe á katafke-aaruwa, ebzaubze guwa á kya erwa. Iya wá, yá puwateraapuwa emtsaade emnde.»

<sup>23</sup> Puwateraapuwa emnde maa, a naba ñaleme am egdza wa ba ñane palle, ge de maga maduwa. Dem vayiya ba shagera, ba ñane palle áte wa ñanna.

<sup>24</sup> Am sarte ñanna wá, paare na pukura-aha tá am huñe-aara na, zlazlala yiyiye. Amá anñkwa á maganá palasa vadza á yawe áhuwa, adaba a se yateruwa válale, á berhaterá á sem iga.

<sup>25</sup> An ireñlya wá, a duhe ge Yaisu de shateraasha pukura-aha-aara na áte ire á haye, amá á zlala á ba an sera-aara áte ire á haye ñanna.

<sup>26</sup> Ba naranna pukura-aha-aara ñane anñkwa á zlala áte yawe na wá, gazlargazla jipu, ta naba fu hula ge lyawa, adaba itare ta kurken shaitaine á yawe.

<sup>27</sup> Kerten a ndaater elva Yaisu: «Gazlauka degiya una ba iya, a wakurka lyawa», a ba ñane á elvan ge itare.

<sup>28</sup> A ñwanante ge Piyer, a ba ñane á elvan ge ñane: «Máki ba jirire una ba ka Yaakadada wá, ndaasendahe elva á ña palle, geni yá duwa á dezeńja áte yawe ba seke náza á ña.»

<sup>29</sup> «Sawa!» a ba Yaisu á elvan ge ñane. A naba tsekwese am paare na ge Piyer, a fantau ge zlala áte yawe á deza Yaisu.

<sup>30</sup> Amá ba a fantau ge zhára mága á effeya wá, a ja ge lyawa, a fantau ge ñgye á dem yawe. Daaci a naba fu hula: «Yaakadada-aaruwa lyilya!»

<sup>31</sup> Kerten a velante erwa-aara Yaisu, a de ñanaahe, a ba ñane á elvan ge ñane: «Degiya jeba á cekwire á fetarfire na! Labara ka magaa shaige?»

<sup>32</sup> Daaci ta ñalema am paare bukerñe-aatare. Tseriyye a naba ñuhe ge válale keni.

<sup>33</sup> Pukura-aha bañemme ta kezlan ugje ge Yaisu am paare ñanna. A ba itare tá elvan ge ñane: «Ekka wá, ka \*Egdza á Dadaamiya ba jirire.»

### *Yaisu a mbaa lapika-aha am Gainazarait (Mark. 6:53-56)*

<sup>34</sup> Ba ebzarubze haye, daaci daraada am haha á Gainazarait.

<sup>35</sup> Emnde a ekse na ta de tsekwa am huñe-aara na diyareddiye Yaisu, daaci duwa-aatare ge itare ta hyenme labare-aara am haha-aatare bañemme, ta naba sanaa emnde na ta lapika-aha na bañemme ge Yaisu.

<sup>36</sup> Ta ndavanuhe geni a vaterteva baráma ge emnde na lapika vuwa-aatare na, tá fafetefafa ba erwa-aha-aatare á ba áte we á nanñyuwe-aara keni. Daaci emnde na ta fafete erwa-aha-aatare áte nanñyuwe á Yaisu bañemme mbarembe.

## 15

### *Elva a nañe á eggie-aha werre (Mark. 7:1-13)*

<sup>1</sup> Am iga á una ñanna maa, ta semhe ge \*Farisa-aha antara malum-aha á \*tawraitá á sa am huñe á Urusaliima, ta se ndavanu elva ge Yaisu, a ba itare:

<sup>2</sup> «Labara pukura-aha á ña tá mañka názu ta kwaramisaa eggie-aha á miya? Adaba ña anñkwa zharaterzhara tá bareka erwa ge za náza za áte nañe á emnde a nadina.»

<sup>3</sup> A n̄waterante ge Yaisu, a ba n̄ane á elvan ge itare: «Ekkure maa, labara kure keni kwá an̄kwa cuḁa názu a ndaasa Dadaamiya, an tsaha na kwa jansaara ba kure?»

<sup>4</sup> Adaba a ba Dadaamiya, dematervedeme tara eddeḁa an emmeḁa. Ma a ndahesaa ware elva mándzawe áte eddeḁara, bi áte emmeḁara keni, sey tá ejja ba shifa-aara.

<sup>5</sup> Amá kwa bantsa kure wá: Máki ndakansendahe ge eddeḁa, bi ge emmeḁa, geni nalmane na ma andze yá melakumele an n̄ane na wá, an̄kwa fanefa tsekemme, watse yá danán ge Dadaamiya.

<sup>6</sup> Máki ndakansendahe estuwa wá, ka baaka an wedera melanu ge eddeḁa, ma emmeḁa keni mazle-aara. An jeba á tsaha á kure n̄anna, kezlakuranveka názena a ndaasaa Dadaamiya emtu? Kezlakuranvekezele ba parakke!

<sup>7</sup> Egdzara á fida-aha, tá demka am huḁe á kure ḁekidfeke. Sesse jirire á názena ndza a ndahanaa Aisaya am nabiyire-aara na. Ndza a ndahanaa á ba áte kure. Adaba a ba n̄ane:

<sup>8</sup> «A bantsa Dadaamiya wá: Emnde na wá, tá an̄kwa á galiyá á ba áte we, am ervaunḁe-aatare ta yiyiye an ya.

<sup>9</sup> Tá an̄kwa jáháva deme am sera-aaruwa, amá una n̄anna ba dey. Adaba itare tá ndáhá ba naḁe-aha á emndimagwaha, ta ganve ba seke elva-aaruwa.» »

### *Kazlaḁa na á badza ura an Dadaamiya*

*(Mark. 7:14-23)*

<sup>10</sup> Daaci a ba Yaisu á elvan ge emnde bademme: «Sawmbare, cenauvaa-cena elva na ba shagera:

<sup>11</sup> Názu á badza ura wá, á badzaná názu á fana edda-aara á demmbuweka, á badzaná ba názu á segashe am mbuwe á edda-aara.»

<sup>12</sup> Ta duhe ge pukura-aha-aara á dezeḁara, a ba itare tá elvan ge n̄ane: «Diyakdiya emtu ganakini an̄kwa á waterwa elva á n̄a na am ervaunḁe ge \*Farisa-aha?»

<sup>13</sup> A ba Yaisu: «Bademme á wulfe na a janaa Edderwa na am samaya na ka tsawe, watse tá ebbeta á degashe.

<sup>14</sup> Yawaterya seke itare, ábi ta wulfe-aha tá táḁá wulfe-aha seke itare. Máki wulfe á táḁá ukfeḁara wulfe, ba bukerḁire-aatare tá de puwa á dem evege.»

<sup>15</sup> A ba Piyer á elvan ge n̄ane: «Palan̄eraapala maana á naraje na n̄a cenvaacena.»

<sup>16</sup> «Ba kure keni kwaasau kwá cenanka?»

<sup>17</sup> Bademme á názena á dem mbuwe á urimagwe, a tsekwa á ba á dem huḁe, amá á degashe zlaḁe adaliye am n̄ane; una n̄anna ni diyakurka?

<sup>18</sup> Amá názu á segashe am mbuwe á ura wá, kwaye a fantau á sawa am ervaunḁe, á badzaná ba una n̄anna edda-aara.

<sup>19</sup> Adaba kwakya dzama ire mandzawe na á segashe am ervaunḁe á ura. Á berhaná ba una n̄anna á de ja shifa, antara mága gwardzire, antara dakarire, an neylire, fidire, ira sanse elva yaiyaihe.

<sup>20</sup> A badzaná ba jeba á duksa-aha n̄anna ura. Adaba zu duksa an erva na baraaka áte naḁe á emnde a nadina wá, una n̄anna á badzeka ura.»

### *Mukse á emnde a jeba umele fetarfe áte Yaisu*

*(Mark. 7:24-30)*

<sup>21</sup> Am iga á una n̄anna maa, a tsetehe ge Yaisu am tate n̄anna, kwaye a zlala á dem haha á Tirus antara Sidaun.



<sup>22</sup> Anƙwa mukse Kanani umele á njá am haha ɲanna, a sawhe á seza Yaisu, a ba ɲane á elvan ge ɲane á ba an ka kwara: «Edda-aaruwa! Ura jeba á \*Dawuda! Tasle á ɲa zivarze! Adaba anƙwa egdza-aaruwa mukse an shaitaine, anƙwa á maga ba palasa.»

<sup>23</sup> Amá mbedanareka Yaisu ba elva palle keni. Mukse na keni yanka dɓabaterdaba. Ta naba duhe ge pukura-aha-aara á deɲɲara, a ba itare tá elvan ge ɲane: «Ndandaha seke elva palle ge mukse na a ezzlala mazle-aara, adaba anƙwa á hulamitehula ba dey.»

<sup>24</sup> A ɲwaterante ge Yaisu, a ba ɲane á elvan ge itare: «Iya wá, belarika ge emnde umele, ta beli ba ge emnde a \*Iserayiila, adaba itare ta ba seke kyawe-aha na, ta keɗa an keɗa na.»

<sup>25</sup> Amá cenaaka mukse na, a naba se ɲanta sera ge Yaisu: «Tasle á ɲa meliyumele edderwa», a ba ɲane á elvan ge Yaisu.

<sup>26</sup> A ɲwanante ge Yaisu, a ba elva-aara á elvan ge mukse na: «Haleta dɓafa á egdzara, puwateranve ge kere-aha wá, zlayeka dɓekidɓeki.»

<sup>27</sup> «Ba estuwa», a ba mukse na, «amá ma kere-aha keni tá wazaná ba itare kwaca á dɓafa na á valya á sawa am erva á dada-aha-aatare na.»

<sup>28</sup> A ba Yaisu: «Ekka mukse na, kwakya fetarfire á ɲa. Názena ká kataná ká ɲanna wá, a gevge á ba áte una ɲanna.» A naba mbehe ge egdza á mukse ɲanna á ba am sarte ɲanna.

#### *Yaisu a mbataraahe emnde na ta lapika-aha*

<sup>29</sup> Am iga á una ɲanna maa, a tsetehe ge Yaisu am tate ɲanna, a dɓaba we á haye á Galili, a de dɓaleta áte egdza wa umele, a de njehe áte egdza wa ɲanna.

<sup>30</sup> Nalga á emnde kwakya ta dɓabem Yaisu á dete wa ɲanna, ta danaa antara emnde a dere, antara wulfe-aha antara ɲguryekwe-aha, an uce-aha, antara lapika-aha umele gergere kwakya, ta de puwateraa am sera á Yaisu, a mbataraahe baɗemme.

<sup>31</sup> Emnde na ndza ta uce-aha tá anƙwa ndaha elva ba laɲɲe; emnde na ndza ta ɲguryekwe-aha mbarembe; emnde na ndza ta dere-aha tá anƙwa zlala ba laɲɲe; emnde na ndza ta wulfe-aha keni tá anƙwa nanna ice-aha-aatare baɗemme. Baɗemme á emnde na ta naa una ɲanna, tá maga ba najipu-aara. Daaci baɗemme ta fantau ge gálá Dadaamiya á emnde a \*Iserayiila.

#### *Yaisu a zateru duksa ge zála debu ufadɓe (Mark. 8:1-10)*

<sup>32</sup> Am iga á una ɲanna maa, Yaisu a dɓetaa pukura-aha-aara, a ba ɲane á elvan ge itare: «Emnde na tá wiwa am ice ge iya, adaba hare keye vatena tá á ba ázerwa, názu tá ezza keni baaka. Wayanka yá puwateraapuwa ba estuwa tá an waya am huɗe, a de mbaɗateraaka waya áte barama a da.»

<sup>33</sup> A ba pukura-aha tá elvan ge ɲane: «Mí de shaná áme kena náza zá am kaamba na ni haa á hyater ge emnde kwakya estuwa?»

<sup>34</sup> «Anƙwa wanyara depaiɲ ázekure?» a ba Yaisu á elvan ge itare. A ba itare: «Anƙwa depaiɲ vuye, antara egdza kelfe-aha cekwaanɲuɗi.»

<sup>35</sup> Daaci «ɲjawinja am haha,» á ba Yaisu á elvan ge emnde baɗemme.

<sup>36</sup> ɲane a halante depaiɲ-aha vuye antara egdza kelfe na, a slafanaa we-aara ge Dadaamiya, a kwaca ahe, daaci a naba tegateraa ge pukura-aha-aara, itare ta tegateraa ge emnde.

<sup>37</sup> Ma ware-aatare keni a zuhe á ba áte huɗe-aara, ta yanaa ba itare náza zá. Pukura-aha ta jemaa jugena-aara ilila vuye.

<sup>38</sup> Kezлакula á emnde na ta za náza za nanna, tá maga zála debu ufadé, baaka nwashá antara egdzara am hufe-aara.

<sup>39</sup> Daaci Yaisu a puwaa emnde. Am iga-aara maa, a dema am paare, a zlala á dem haha á Magadan.

## 16

*\*Farisa-aha antara \*Saduki-aha tá ndava nalaama áza Yaisu  
(Mark. 8:11-13; Luka 12:54-56)*

<sup>1</sup> Ta sawhe ge \*Farisa-aha, antara \*Saduki-aha áseza Yaisu, ta se tsagwadana áte elva, a ba itare tá elvan ge nane: «Máki a belakaa ba Dadaamiya wá, marañeranmara najipu palle geni ná diyeddiye átekwa.»

<sup>2</sup> A nwaterante ge Yaisu, a ba nane á elvan ge itare: «Ábi kure máki hyaahya yawe kwakya dem eblya vaciya, kwá ba: Makuralla wá, watse ba lanje slede.

<sup>3</sup> An enlya-waabere keni, má kwa nanna danjwe ekte á samaya, á ngya vaciya á ba am hufe-aara, kwá ba: Watse á maga yawe vatena. Iyau, nalaama-aha na anjwa á magava áte samaya wá, bademme diyakurdiya; duksa-aha na anjwa á marakurná Dadaamiya am zamane na wá, diyakurka!

<sup>4</sup> Kure emnde na kwá am zamane na, kwa mándzawe-aha jipu, vakuranteka ervaunde á kure dekideki ge Dadaamiya. Kure kwá ndava najipu! Ba palle keni kwá nanka mazle-aara, hyaahya ba una kwá anjwa ndaaná áte Yaunas werre na.» Ba a ndaaterse una, a naba yaterhe, a zlala-aara.

*Shahi á makala á \*Farisa-aha antara \*Saduki-aha  
(Mark. 8:14-21)*

<sup>5</sup> Am sarte na tá anjwa zlala, tá átira degashe am haye á dete iga á guwa, pukura-aha ta naba viyaa depainj, slaslarka ekseksa-aara.

<sup>6</sup> Daaci a ba Yaisu á elvan ge itare: «Faufa hyema ba shagera, tsufautsufa ire á kure átuge shahi á makala á \*Farisa-aha antara \*Saduki-aha.»

<sup>7</sup> Am cenaranka pukura-aha názu a ndahanaa nane, a ba itare am dagave-aatare: «Yaisu a ndaha una nanna adaba mi viyaa depainj na.»

<sup>8</sup> Carare cenancena Yaisu elva na tá anjwa ndahaná itare am dagave-aatare, a ba nane á elvan ge itare: «Labara kwá tsala elva a baakire á depainj am dagave á kure? Kure degiya baaka fetarfire á kure dekideki!

<sup>9</sup> Sem ba kina keni aley zlafe ba kwá cenanka? Kwá yeheteka á ba áte depainj ilyebe na ya kwacateraa ya ge emnde debu ilyebe na emtu? Kwá yeheteka á ba áte kezlakula wára-aha na kwa nahetaa an jugena-aara na emtu?

<sup>10</sup> Zlafe adaliye kwá yeheteka áte depainj vuye na ya kazlateranvaa ya ge emnde debu ufadé antara kezlakula á ilila-aha na kwa nahete an jugena-aara na emtu?

<sup>11</sup> Labara kwá lanaaka ganakini ya ndaakur elva á depainj ka? Iya wá, ya bakuraa, tsufautsufa ire á kure ba shagera atuge shahi á makala na á segashe am \*Farisa-aha antara \*Saduki-aha.»

<sup>12</sup> Daaci sharantaushe pukura-aha mazle-aara geni Yaisu ndahaaka elva a shahi á makala na tá puwaná am depainj; nane a ndaha ba elva a názu tá kwaratersa \*Farisa-aha antara \*Saduki-aha ge emnde.

*A ndaasa Piyer ganakini ba Yaisu una \*Almasiihu na  
(Mark. 8:27-30; Luka 9:18-21)*

<sup>13</sup> Am iga á una ñanna maa, Yaisu a zlalehe antara pukura-aha-aara á dem Kaysariya á Filip. A de ndavateru ge pukura-aha-aara áhuwa, a ba ñane á elvan ge itare: «Iya \*Ura á emnde bademme mu, emnde ta baa ya ware?»

<sup>14</sup> Ta ñwanante, a ba itare: «Ta bantsa emnde umele ka Yuhanna slemaga baptilama; a baa emnde umele, ka \*Ailiya; a baa emnde umele zlaɓe adaliye ka Yairaimiya, bi ka ba nabi umele.»

<sup>15</sup> «Ay, kure ma, kwá ba ya ware?»

<sup>16</sup> A ñwanante ge Simaun Piyer: «Ba ka una ka \*Almasiihu, ka \*Egdza á Dadaamiya na á fa shifa am ura na.»

<sup>17</sup> Daaci a ba Yaisu á elvan ge ñane: «Simaun egdza á Yaunas, ekka wá, shakansha barka kwakya, adaba jirire na ka cenaana áza urimagwe ka, a vaktaa ba Edderwa na am samaya na an ire-aara.

<sup>18</sup> Yá ndak ba jirire Piyer: Ábi zhera á ña ñanna wá, amaana palaha. Yá faná áte palaha ñanna emnde na tá fetaare áte ya na bademme. Ma emtsa keni á de dateruka ðekideki.

<sup>19</sup> Yá fakem egdza a tsekweram á wera \*kwara á Dadaamiya am erva ge ekka. Ma ka piyetaa uwe ge emnde am duniya na keni, am samaya keni tá á ba áte una ñanna. Ma ka yateraa baráma á uwe ge emnde keni, am samaya keni tá á ba áte una ñanna.»

<sup>20</sup> Am iga á una ñanna maa, a tedaterte hyema ge pukura-aha-aara, geni a ndaranka ge ura umele ðekideki, ganakini \*Almasiihu ñanna ba ñane.

*Yaisu a sanse elva a emtsa-aara, antara tsetse-aara am faya  
(Mark. 8:31-9:1; Luka 9:22-27)*

<sup>21</sup> Yaisu a fantau am sarte ñanna ge ndaaterse elva á ire-aara ge pukura-aha-aara, a ba ñane á elvan ge itare: «Sey ba yá duwa á dem Urusaliima. Tá de magiya palasa kwakya male-aha á larde, antara male-aha á \*liman-aha, ira malum-aha á \*tawraita. Tá de zlanazle shifa-aaruwa bademme, amá am hare ge keyire wá, watse yá sesse zlaɓe adaliye an shifa.»

<sup>22</sup> A naba ðahese ge Piyer ba itare ta buwa antara Yaisu, a ba ñane á elvan ge ñane: «A piyetepiya Dadaamiya jeba una, a gevka ðeme jeba una áte ka Yaakadada-aaruwa!»

<sup>23</sup> Amá Yaisu a eptanaa ge Piyer, a ba ñane á elvan ge ñane: «Giyapteka ðekideki, ekka, ka Shaitaine, ká kátá mbediya á dem haypa. Adaba názena ká dzamaná ka na jarammeka antara náza á Dadaamiya, náza á ña na ba názu tá dzamaná emndimagwaha.»

<sup>24</sup> Daaci a ba ñane á elvan ge pukura-aha-aara bademme: «Máki edda-aara wayaawaya ðaba ya wá, a dzameka shifa-aara ðekideki, a eksanteksa dzangala-aara, á ðabidaba an ñane.

<sup>25</sup> Adaba máki edda-aara á tataya lya shifa-aara wá, á de keðanaakeda. Amá edda una a keðaa shifa-aara adaba ya, á de shansha zlaɓe adaliye.

<sup>26</sup> Ma edda-aara a zu emtakire á duniya na bademme keni, máki keðanaakeda shifa-aara wá, ázara nampire-aara ge ñane? A de maganánka duksa ðekideki. Adaba baaka duksa na urimagwe á de vara shifa-aara an ñane.

<sup>27</sup> Ya \*Ura á emnde bademme wá, watse yá sawa antara malika-aha-aaruwa, an sleksire á Edderwa. Watse yá se pelaterse ge emnde bademme, ma ware keni yá se pelansa á ba áte názena ndza a maganaa ñane.»

<sup>28</sup> A ba ñane zlaɓe adaliye: «Yá ndaakur ba jirire: a ba am dagave á kure na keni, tá anƙwa emnde na ni tá de emtseka ba estuwa, sey má naranna sawa-aaruwa ya \*Ura á emnde bademme, má watse yá sawa am sleksire yaikke.»

# 17

## *Eptsaptepsa Yaisu a gev umele* (Mark. 9:2-13; Luka 9:28-36)

<sup>1</sup> A magaa hare unkwahere am iga á una nanna maa, Yaisu a detaa tara Piyer, antara Yakuba, ira Yuhanna egdza emmenara ge Yakuba nanna, a dateraa áte ire á wa umele sladde ba itare-itare áhuwa.

<sup>2</sup> Daraada ahuwa maa, a naba eptsavte ge Yaisu am ice-aatare wá, gevge umele ba seke nane ka mazle-aara. Feke-aara ankwá á mba wulwulire ba seke vaciya, nanjyuwe-aara gevge dzayye ba telle, ankwá mbe ba seke parakkire.

<sup>3</sup> Daaci pukura-aha na tá zhára ba emndu werre, tara Muusa antara \*Ailiya, tá ankwá ndaha elva antara Yaisu.

<sup>4</sup> A ba Piyer á elvan ge Yaisu: «Yaakadada-aaruwa, una shagera jipu ntere keni ná ankwá áhuna na. Má wayak-wayá wá, yá maganaamaga dzadzawe-aha keye, palle náza á na, palle náza á Muusa, palle keni náza á Ailiya.»

<sup>5</sup> Zlabe ba elva nanna keni ndaaseka Piyer wá, a naba tsekwatere ge kumba. Ankwá kwara á ndaha elva am kumba nanna. A ba edda-aara: «Una na wa, Egdza-aaruwa! Bademme á higa-aaruwa á ba áte nane. Cenausena názena á bakurná nane.»

<sup>6</sup> Cenarancena pukura-aha na kwara nanna maa, jaterja lyawa bademme, reppe ta kazlaa ugje am haha bademme.

<sup>7</sup> A gapte ge Yaisu á dezetare, a de gejatertehe: «Naba tsawetse. A wakurka lyawa,» a ba nane á elvan ge itare.

<sup>8</sup> Ta kante ire wá, ta naa ba Yaisu palle baaka ura umele ázenara.

<sup>9</sup> Am sarte na tá átira tsekwa á sa áte ire á wa nanna maa, a ba Yaisu á elvan ge itare: «Ma ge ware keni ndaawanka názena kwa nanaa kure na dekideki, dem sarte na má tsanetsa ya, ya \*Ura á emnde bademme am faya.»

<sup>10</sup> Zlauzle elva-aara, ta naba ndavanuhe ge pukura-aha na, a ba itare tá elvan ge nane: «Máki estuwa, labara tá bantsa malum-aha á \*tawraitá geni watse á semse emtsaade Ailiya ádaliye na?»

<sup>11</sup> A nwaterante ge Yaisu: «Una ba jire-aatare, ba seke una ta ndahanaa itare nanna, á eptsá Ailiya emtsaade, á se tsatsanaatsatsa nane duksa bademme.

<sup>12</sup> Amá wá, yá ndaakur ba jirire: Ailiya wá, ndza eptsapta á sawa, diyarseka ba emnde, ta naba maga hakuma-aatare áte nane. Ya \*Ura á emnde bademme keni tá de magiyán ba estuwa.»

<sup>13</sup> Daaci diyareddiye pukura-aha mazle-aara ganakini á ndaater elva a Yuhanna slemaga baptisma.

## *Yaisu ngyansengye jini am egdzere* (Mark. 9:14-29; Luka 9:37-43)

<sup>14</sup> Tsekwaretsekwa á sa áte ire á wá, ta se bera jahava á emnde. A duhe ge zhele umele, a de kezla ugje am sera á Yaisu,

<sup>15</sup> a ba nane á elvan ge nane: «Yaakadada-aaruwa, tasle á na zanvareze seke ge egdza-aaruwa, ankwá á maganá palasa tauraurau, ser kwakya á valyaná á dem kára, antara á dem yawe.

<sup>16</sup> Ya saterán ge pukura-aha á na, amá dzegwaránka mbanaamba.»

<sup>17</sup> Ba wera we-aara ge Yaisu, a ba ɲane á elvan ge itare: «Amá kure emnde a zamane na wá, baaka fetarfire á kure ɔekideki, kwa mandzawehaha jipu! Watse yá njá antara kure dem laukte-ara? Yá fakurá ervaunɔe dem sarte-ara estuwa? Sawiyansa kwa kure egdze ɲanna ge iya!»

<sup>18</sup> Daaci Yaisu a valaarhe á ba an ndzedá ge jini na am vuwa á egdze ɲanna, a ɲgyansehe, kertenj a naba mbehe ge egdzere á ba am sarte ɲanna.

<sup>19</sup> Am iga á una ɲanna maa, ta duhe ge pukura-aha-aara á ba an niya ge ndavanu una ɲanna, a ba itare tá elvan ge ɲane: «Labara dzegwanjeranka ɲere ɲgyesaa jini ɲanna?»

<sup>20</sup> A ɲwaterante ge Yaisu, a ba ɲane á elvan ge itare: «A maganaa cekwire á fetarfire á kure. Yá ndaakur ba jirire: Máki anjwa fetarfire á kure cekwaanɔudi, ma ba seke wulfe á pilli keni, kwá bananba ge wa na: Tsetse áhuna, ezzlala ádehuwa, ba jirire á tsettse, á zlala, baaka názu á jakurviyaaje ɔekideki. ((

<sup>21</sup> Amá keni, jeba á jini na, sey tá ɲgyanse an maduwa, antara tsufa ndera.»))

*Yaisu á sanse ge buwire elva a emtsa-aara antara tsetse-aara am faya (Mark. 9:30-32; Luka 9:43-45)*

<sup>22</sup> Vacite umele jaremmeje pukura-aha am Galili, a ba Yaisu á elvan ge itare: «Iya \*Ura á emnde baɔemme wá, watse ta fime am erva ge emnde.

<sup>23</sup> Emnde ɲanna tá de jija. Amá am hare ge keyire wá, watse yá tsetse am faya.» Ba cenarancena una ɲanna pukura-aha maa, daremda am dzama ire yaikke.

*Elva a puwa hadama á mashidi*

<sup>24</sup> Am sarte na daremda tara Yaisu antara pukura-aha-aara á dem Kafarnahum, ta duhe ge emnde a jaha hadama á mashidi á deza Piyer, ta de ndavanuhe, a ba itare: «Malum á kure na ɲane á puweka hadama á mashidi emtu?»

<sup>25</sup> A ɲwaterante ge Piyer: «Á eppuwa», a ba ɲane á elvan ge itare.

Daaci am sarte na Piyer anjwa á dem bere, Yaisu a ndavanu elva, a ba ɲane á elvan ge ɲane: «Ndindaha mu, emnde-ara una tá puwaná hadama antara náza ɲezla ge slekse á larde? Egdzara á larde emtu, wayve-aha he?»

<sup>26</sup> A ɲutehe ge Piyer: «Tá puwaná ba wayve-aha», a ba ɲane. A ba Yaisu: «Daaci estuwa tá puweka egdzara á larde.

<sup>27</sup> Aley keni wá, mi zladaterveka ervaunɔe ge emnde ɲanna. Daaci edduwa áte we á haye, de puwumpuwa narre á ɲa á dem haye, kelfe na ká de eksaná ka zunɲwe na wá, naba werura we-aara, watse ká shansha shunɲu am mbuwe á kelfe ɲanna, á hyephye ge puwa hadama á miya antara ka, naba vaterteva.»

## 18

*Ware male am kwara á Dadaamiya? (Mark. 9:33-37; Luka 9:46-48)*

<sup>1</sup> A ba am sarte ɲanna, ta duhe ge pukura-aha á deza Yaisu, ta de ndavanuhe, a ba itare: «Am \*kwara á Dadaamiya mu, ware una male arge emnde umele?»

<sup>2</sup> Ge vaterte jawapa, Yaisu a ɔante egdzere, a tsanaahe á katafke-aatare,

<sup>3</sup> daaci a ba ɲane á elvan ge itare: «Yá ndaakur ba jirire: Máki eptsakurapteka, gakurevka ba seke egdzara mesheshe, kwá demka am kwara á Dadaamiya ɔekideki.



<sup>4</sup> Ura male am kwara á Dadaamiya wá, ba edda una má ganaaga ire-aara, a ganve ire-aara ba seke egdze na náwa ñane na.

<sup>5</sup> Ma ware una a lyevaa egdzere seke una adaba elva-aaruwa, edda-aara a lyevaa ba iya an ire-aaruwa.»

*Kazlaja na á mbedfa ura á dem haypa*  
(Mark. 9:42-48; Luka 17:1-2)

<sup>6</sup> Am iga á una ñanna maa, a ba ñane: «Má edda-aara mbedfanaambefá palle á egdzara ñanna ta fetaare áte iya na á dem haypa, ámbane tá ñgudanemnguda nákwá á ha hiya am mbiye, tá eblyanma am haye á emtsa, ñgulme ba una ñanna ge edda-aara.

<sup>7</sup> Kay! Palase á duniya na, adaba kwakya názena á puwa emnde á dem haypa, baaka janaaje-aara defekideki. Amá laruwa ge edda una emnde tá puwa á dem haypa adaba ñane na.

<sup>8</sup> «Máki erva á ña, bi sera á ña ankwá á dáká á dem haypa wá, naba icica áte ka, eblyanveblye yiyiye an ka. Ámbane ká dem tate á shifa na á zleka na an erva palle bi an sera palle, arge una ká njá an ubiya-aha á ña bademme, amá ká dem kára náza ba ge defekideki na.

<sup>9</sup> Máki ice á ña á dáká á dem haypa wá, sansese ice ñanna, eblyanveblye yiyiye an ka. Ámbane ká dem tate á shifa na á zleka defekideki na an feke palle, arge una ká njá an ice-aha á ña bukerde, amá ká dem kára na baaka emtsa-aara dem ba ge defekideki na.»

*Naraje an kyawe na ndza kedaakeda, sharánsha*  
(Luka 15:3-7)

<sup>10</sup> «Tsufautsufa ire á kure ba shagera, epsawanaaka ba ura palle keni am egdzara ñanna. Yá ndaakur ba jirire: Malika-aha-aatare tá ba tsatse á katafke á Edderwa am samaya. ((

<sup>11</sup> Adaba iya \*Ura á emnde bademme wá, ya se ñezla una kedaakeda na.))

<sup>12</sup> Máki ura an kyawe-aha-aara deremke, amá kedaakeda kyawe palle am kaamba, á yanka kyawe-aha kul maselmana ju maselmana na áte wa, ñane á tsekwa á de tataya una kedaakeda na emtu? Emtu ázara a ba kure?

<sup>13</sup> Yá ndaakur ba jirire, má de shánsha wá, á higetehiga ervaunde-aara jipu á ba arge kyawe-aha kul maselmana ju maselmana na tá ankwá na keni.

<sup>14</sup> Eddekure na am samaya na keni ba estuwa. Ñane wayaaka defekideki ganakini á keda ba palle-aatare keni am egdzara-aara ñanna.»

*Elva áte egdza emmeña má a gu haypa an ka*

<sup>15</sup> «Máki egdza emmeña gawge haypa an ka wá, de ndandaha ba kure kwa buwa antara ñane. Má cenakvaarcene, tsakanmartse ge egdza emmeña.

<sup>16</sup> Amá máki yanaaya elva á ña wá, ká se tatayevá ura palle, bi emnde buwa, lauktu kwá duwa zlafe adaliye antara itare, geni a gevge á ba áte una a ndahanaa wakita á Dadaamiya, a ba ñane: Ma ugje-ara keni a tsaatse á ba áte seyde á emnde buwa bi keye na.

<sup>17</sup> Amá máki cenaaka náza-aatare zlafe adaliye wá, naba bateranba ge emnde a fetarfe am jahava. Má cenaaka náza á aiklaisiya wá, a gevge ba seke ura á jeba umele, ba seke edda ñezla mazle-aara á katafke á ña.»

*Má kwa yanaa kure ura, am samaya keni tá de yanya*

<sup>18</sup> Am iga á una ñanna maa, a ba ñane: «Yá bakurá ba jirire: Ma kwa piyetaa uwe am duniya na keni, am samaya keni tá á ba áte una ñanna.

Ma kwa yateraa baráma á uwe keni, am samaya keni tá á ba áte una nanna.

<sup>19</sup> «Yá ndaakurndaha zlafe ádaliye: Má emnde buwa am dagave á kure ta ngudaa ye-aatare palle ge ndava duksa am maduwa, á vaterteva Edderwa na am samaya na duksa nanna.

<sup>20</sup> Adaba am tatu ta jamme emnde buwa bi keye am zhera-aaruwa, iya yá anj kwa am dagave-aatare.»

*Naraje an sleslera na kwalevkwale yanaare haypa ge ura*

*(Luka 17:4)*

<sup>21</sup> Daaci a tsetehe ge Piyer damme á deza Yaisu ge ndavanundave, a ba nane á elvan ge nane: «Yaakadada, yá yanaare haypa ser wanyara ge egdza emmerwa, máki nane á far ba mága haypa an ya? Dem ser vuye emtu?»

<sup>22</sup> «A'aa ser vuyeka, ser kul vuye kul vuye ser vuye», a ba Yaisu.

<sup>23</sup> Am iga á una nanna a ba nane: «Náwa gáráva á názu á magavá am \*kwara á Dadaamiya: Anj kwa slekse umele, a d'etaa emnde a slera-aara geni tá vante lisaafi á nalmane-aara bademme.

<sup>24</sup> Demde am lisaafi wá, jesarje edda á gema-aara á d'aban ge nalmane kwakya jipu, ta eksanvaahé.

<sup>25</sup> Edda-aara nanna ba náza-aara keni baaka ge pelese gema na. Daaci a ba zanwe-aara: Eksauvaksa irice-aara velawuyele. Velawuwele mukse-aara, antara egdzara-aara, ira názu am huđe á há-aara bademme, ge pela gema-aaruwa an nane.

<sup>26</sup> Daaci a duhe ge zhel nanna á deza edda á gema, a de kezlaa ugje á katafke-aara, a ba nane: Tasle á n'a fifa ervaunđe ambarka á n'a, yá eppela bademme.

<sup>27</sup> Ura male na a naba zanvaarehe, a yanaa gema nanna bademme, a belanaahe.

<sup>28</sup> «Amá nane ba segashe-aara, a se ja ba ire antara ukfenjara, ndza tá am slera palle, nane keni a d'aban ge egdza gema wá, a naba nanaahe am kwara: Sey ká pelisepele duksa-aaruwa, a ba nane á elvan ge ukfenjara na.

<sup>29</sup> Ukfenjara a kezlanaa ugje, a ba nane: Tasle á n'a fifa ervaunđe yá pelaksepele bademme!

<sup>30</sup> Amá faaka ervaunđe d'ekideki, a de ngudehe am dangay, sey máki pelesepele duksa-aara bademme.

<sup>31</sup> «Ba ta naa una nanna emnde umele na ndza tá am slera kerđe na wá, tá geja ba ire. Tá de balanse labara nanna bademme ge zanwe-aatare.

<sup>32</sup> Daaci zanwe a naba belaa emnde-aara, ta de d'anante, a ba nane á elvan ge nane: Ekka wá, ka slemándzawe ba jire. Ekka ni ya naba yakaare gema-aaruwa bademme adaba slapala á n'a;

<sup>33</sup> Abi zlaya ka keni ma ká zanvaareze estuwa ge ukfenja?

<sup>34</sup> Jaaja ervaunđe zanwe-aara. A ba nane: A daránda á dem dangay, nane keni sey má pelesepele gema-aaruwa bademme.»

<sup>35</sup> Am iga á una nanna maa, a far una Yaisu: «Edderwa na am samaya na keni, á de magakurán ba estuwa ge kure keni, má kwá yateraareka an ervaunđe á kure palle ge emnde a magakuraa haypa.»

## 19

*Elva á Yaisu áte elva a ica nika*

*(Mark. 10:1-12)*

<sup>1</sup> Yaisu zlanazle elva-aara, a naba tsetehe am Galili, a zlala á dem haha á Yahudiya áte iga a guwa á Urdun.

<sup>2</sup> Emnde kwakya ta d'abemhe áduwa, emnde umele tá an emnde-aha-aatare ta lapika-aha. Yaisu a de mbateraahe.

<sup>3</sup> Daaci ta duhe ge \*Farisa-aha umele ádeza Yaisu, ta de tsagwadanaa áte elva. Ta de ndavanuhe, a ba itare tá elvan ge ñane: «Vantevahe \*tawraita baráma ge zhele geni á belánaabelá mukse-aara adaba dalila á ma uwe keni?»

<sup>4</sup> A ñwaterantehe, a ba ñane: «Ndaakurseka názu am wakita á Dadaamiya emtu? Am fakta wá, Dadaamiya a nderaterhe tara zhele an mukse.»

<sup>5</sup> Daaci a ba ñane: «Adaba una ñanna, zhele á yá tara eddenjara antara emmenjara, tá mázláva an mukse-aara; itare ta buwa ñanna, tá gevge ba vuwa palle.

<sup>6</sup> Estuwa, ta buweka mázle-aara, tá geva ba vuwa palle. Daaci názena ni a janmaa Dadaamiya wá, a icanveka urimagwe.»

<sup>7</sup> \*Farisa-aha ñara ta ndavanuhe: «Labara a bantsa Muusa zhele á vante nalmesheri á ica nika ge mukse, máki ba estuwa?»

<sup>8</sup> A ñwaterante ge Yaisu, a ba ñane á elvan ge itare: «Muusa a vakurte baráma a pakyava antara ñwasha-aha á kure na wá, adaba degdegire á ire á kure. Am fakta wá, ndza estuweka dekideki.

<sup>9</sup> Yá ndaakur ba jirire: Ma ware una a belaa mukse-aara, wallá a ekseva am gwardzire, a de gaa umele, a magaa ba gwardzire.»

<sup>10</sup> A ba pukura-aha-aara tá elvan ge ñane: «Máki elva á tara zhele an mukse gevge estuwa wá, ambane emnde tá yanya elva á nika ba dekideki.»

<sup>11</sup> A ñwaterante ge Yaisu, a ba ñane á elvan ge itare: «Emnde bademme ka una tá dzegwándzegwa eksar elva ñanna, sey ba emnde na Dadaamiya a vaterte hákuma á nja estuwa.

<sup>12</sup> Ankwa dalila-aha gergere na ni á piyante gá mukse bi de gá zhele ge ura: Ura umele wá, ta yanaa á ba an ñane, vuwa-aara ba estuwa, elva á nika á taa gevka ge ñane. Náza á emnde umele, ta halatertaave ba emndimagwaha. Emnde umele zlafe ádaliye, ta yaa nika adaba \*kwara á Dadaamiya. Kwaye ñane tsáha ñanna, edda una á dzegwándzegwa na, a eksanteksa.»

*Yaisu á gaterar barka ge egdzara  
(Mark. 10:13-16; Luka 18:15-17)*

<sup>13</sup> Emnde kwakya ta sanaa egdzara ge Yaisu, ganakini á puwaterar erva a barka-aara, antara á magaterar maduwa, amá pukura-aha ta naba valateraarhe ge emnde a saa egdzara ñanna.

<sup>14</sup> Daaci, a ba Yaisu á elvan ge itare: «Piyawaterteka, yawaterya a sarsawa egdzara ásezerwa, adaba \*kwara á Dadaamiya náza á emnde na má garevge ba seke itare.»

<sup>15</sup> Daaci a puwateraarhe erva a barka-aara áte ire-aha-aatare, a tsetehe am tate ñanna, a zlalehe.

*Sleberba a se ndava sera á shifa áza Yaisu  
(Mark. 10:17-31; Luka 18:18-30)*

<sup>16</sup> A sawhe ge dawale umele áseza Yaisu, a ba ñane: «Malum, shagera slera-ara yá maganaamaga, lauktu yá sha shifa na á zleka na?»

<sup>17</sup> A ba Yaisu, á elvan ge ñane: «Labara ka ndaviyu elva áte duksa na shagera? Baaka ura shagera dekideki sey ba ura palle. Máki wayak-wáyá ká daada á dem tate á shifa na á zleka na wá, ñanaanja shairiya-aha á Dadaamiya.»

<sup>18</sup> A ba ɲane á elvan ge Yaisu: «Ura-ara-aha-aara ge shairiya-aha?» A ba Yaisu á elvan ge ɲane: «Una a ba: Jeka shifa, maɲka gwardzire, ileka, maɲka seydire á fida áte ura,

<sup>19</sup> ɗematervedeme tara eddeɲa an emmeɲa, ira ewwáyá sleriya á ɲa ba seke ire á ɲa. Kwaye ɲane shairiya-aha ɲanna.»

<sup>20</sup> A ba dawale ɲanna á elvan ge Yaisu: «Una ɲannaanɲa baɗemme. A juwa uwe umele?»

<sup>21</sup> A ba Yaisu á elvan ge ɲane: «Máki ká kátá gev edda una hyephye am duksa baɗemme wá, de valuvále názu am rezege á ɲa baɗemme, tegatertega shuɲgu-aara ge taláge-aha. Ekka watse ká shánsa láɗá-aara am samaya, daaci sawa ɗabidába.»

<sup>22</sup> Ba a cenaa una ɲanna dawale ɲanna maa, a da á ba an dzámá ire, aɗaba nalmane-aara kwakya jipu.

<sup>23</sup> Daaci a ba Yaisu á elvan ge pukura-aha-aara: «Yá bakurá ba jirire: Zlazlaɗa jipu ganakini ura berba á demda á dem \*kwara á Dadaamiya.

<sup>24</sup> Yá ndaakurndáhá zlaɓe ádaliye: Náwa zlazlaɗa ganakini á dedde nazlegwame am fiye á lipere, amá zlazlaɗa ba náza á sleberba zlaɓe adaliye ge dem kwara á Dadaamiya.»

<sup>25</sup> Ba ta cenaa una ɲanna pukura-aha wá, tá geja ba ire. A ba itare: «Máki ba estuwa wá, baaka ura á ɲezlesenjzle ɗekideki.»

<sup>26</sup> A zharateraahé ge Yaisu, a ba ɲane á elvan ge itare. «Áza emnde wá, una á taa gevka, amá Dadaamiya wá, baaka názu á janviya ge ɲane.»

<sup>27</sup> Piyer a eksetaa elva, a ba ɲane á elvan ge ɲane: «Kwaye ɲere, yanɲeranya duksa baɗemme, náwa ɲá ɗaba ba ka na mu, watse á geva estara náza á ɲere?»

<sup>28</sup> A ba Yaisu á elvan ge itare: «Yá ndaakur ba jirire: Am sarte na má watse se njaniinja ya, iya \*Ura á emnde baɗemme am kurshi á sleksire-aaruwa am duniya na watse á de sawa aɲwaslire na, am sarte ɲanna wá, kure emnde kelaawa ju buwa na kwá aɲkwa ɗabidába na keni, watse kwá sha kurshi á yaikkire kelaawa ju buwa áte kure, kwá de njá am kurshi-aha ɲanna ge kya shairiya á Iserayiila-aha jeba kelaawa ju buwa.

<sup>29</sup> Ma ware una a yaa eddeɲara, bi emmeɲara, bi egdzar mama-aha-ɲara zála an ɲwásha, bi egdzara-aara, bi fe-aara, bi a yaa huɗe á há-aatare baɗemme aɗaba iya, á de shánsa una-aha ɲanna huɗe deremke ira shifa na á zleka na.

<sup>30</sup> Amá emnde kwakya ta emnde a zuɲɲwa ba itare kina, tá de gev emnde a kataliya. Emnde kwakya tá am kataliya kina, watse tá gev emnde a katafka ba itare.»

## 20

### *Naraje an emnde a mága bariyama am fe*

<sup>1</sup> «Am \*kwara á Dadaamiya wá, náwa tá gáráva an labáre na náwa ɲane na: Aɲkwa edda á há a degashe an enjya werre ge de hálá emnde bariyama á dem fe á náfa-aara.

<sup>2</sup> Daaci mbera-aatare maa, ta zluwa á ba áte gane na ndza tá vaterteva ba kelaazare na; gane ɲanna suley suley áte váha. Daaci a naba daterhe á dem fe-aara.

<sup>3</sup> A sesehe zlaɓe ádaliye am saa maselmana maa, á zhára ba emnde umele áte we á kwaskwe, baaka slera-aatare.

<sup>4</sup> A ba ɲane á elvan ge itare: “Kure keni daumbare á dem fe-aaruwa, watse yá vakurta názena deydey á slera á kure.”

<sup>5</sup> Tá naba duhe. Edda á fe nanna a sesehe zlaþe ádaliye an vacitire keni, a magán ba estuwa. An lásar keni a magán ba seke una nanna.

<sup>6</sup> Herzhe watse emnde tá maga niya sá am fe maa, a sesehe ge edda á fe nanna, á zhárá ba emnde umele zlaþe ádaliye tá áte we á kwaskwe, a ba nane á elvan ge itare: “Labára kwa váha á njá áhuna, þaaka názena kwa maganaa kure?”

<sup>7</sup> Tá nwanante, a ba itare: “Aðaba þaaka ura a ndavaņerndáva.” A ba nane á elvan ge itare: “Kure keni naba saumbare á sem fe-aaruwa, magaumaga slera.”

<sup>8</sup> «Eblyablya vaciya maa, a ba edda á fe á elvan ge male á emnde a slera-aara: “Daterdáhá, tegatertega mbera-aha-aatare, ká fantau áte emnde na ta duwa á kataliya, ká zláná áte emnde na ta duwa itare zunņwe á dem slera.”

<sup>9</sup> Ta duhe ge emnde na ta de fantau ge slera herzhe á eblya vaciya na, baðemme-aatare ta sha suley palpale.

<sup>10</sup> Am iga-aatare, ta duhe ge emnde na ta fantuwa itare zunņwe ge slera na. Itare ta kurken watse an saga náza-aatare, amá itare keni ta vaterte ba suley palpale nanna.

<sup>11</sup> Ta lyevaahé, amá jaterja ervaunðe áte edda á fe nanna.

<sup>12</sup> A ba itare tá elvan ge edda á fe: “Náwa emnde na ta se geјante slera ba cekwaņgudí ni, ka biyateraa shunņgu kalkale antara náza á nјere na nja váha deppe á maga slera áte zlaða á vaciya na!”

<sup>13</sup> Amá edda á fe a nwanante ge palle-aatare, a ba nane á elvan ge nane: “Ba palle a zlerma na ya magakanaa ya þaaka ura-aaruwa. Ha! Ndza zlamiyuka am gane geni suley palle áte váha emtu?”

<sup>14</sup> Lyevaalya suley á nja, jinaaja. Iyá yá kátá vanteva ge edda una a fantau á kataliya na keni ba seke názá á nja.

<sup>15</sup> Emtu aņkwa slepiyite mága slera an shunņgu-aaruwa áte una yá kataná iya emtu? Emtu ká shelha aðaba ya maganaa shagerire ge ura emtu?” »

<sup>16</sup> Yaisu zlauzle am tsáká elva-aara, a farhe zlaþe ádaliye, a ba nane: «Emnde na tá am kataliya kina, tá de gev emnde a katafke. Emnde na tá á katafke kina, tá de gev emnde a kataliya.»

*Yaisu aņkwa á sanse ge keyire elva a emtsa-aara antara tsetse-aara am faya*

*(Mark. 10:32-34; Luka 18:31-34)*

<sup>17</sup> Aņkwa á dem Urusaliima Yaisu wá, a dætaa pukura-aha-aara kelaawa ju buwa. Tá átira a zlalá, a ba nane á elvan ge itare:

<sup>18</sup> «Duwa á miya á dem Urusaliima kina na wá, iya \*Ura á emnde baðemme tá de eksivaksa, tá de vite ge male-aha á \*liman-aha, antara malum-aha á \*tawraita. Tá de ndahaná itare geni a jareja shifa-aaruwa.

<sup>19</sup> Daaci tá de fime am erva ge emnde na þaaka nadina-aatare, tá de zlazlisá itare, tá de jiya itare, tá de zlenjeliya itare áte dzanņgala. Amá am hare ge keyire wá, watse yá tsetse am fáyá.»

*Ndáva á emmarge tara Yakuba an Yuhanna*

*(Mark. 10:35-45)*

<sup>20</sup> Duwa á emmarge egdzara á Jaibaidaiyus, ta duwa antara ba egdzara-aara nanna á de katafke á Yaisu, a kezlaa ugje á katafke-aara, a ndavanuhe máki á shansha njalá ázenjara.

<sup>21</sup> «Ká kátá uwe ka emmaaye,» a ba Yaisu á elvan ge nane. A nwanante, a ba nane á elvan ge Yaisu: «Máki dakemda am sleksire á nja wá, yá kátá



palle á egdzara-aaruwa na á de shá njá am nađafa á ɲa, palle keni á de shá njá am názlaba á ɲa.»

<sup>22</sup> A ɲwanante ge Yaisu, a ba ɲane á elvan ge itare: «Ábi diyakurka wedere á kure na ma andze kwá ndava ɲane na. Kina wá, watse kwá dzegwándzegwa emtu sha zlađa áte náza-aaruwa na watse yá essha na?» Tá ɲwanante: «Ŋá dzegwándzegwa,» a ba itare.

<sup>23</sup> «Zlađa-aaruwa wá, ba jire watse kwá de essha, amá elva a de njá am nađafa-aaruwa antara am názlaba-aaruwa wá, am erva-aaruweka una ɲanna. Tá aɲkwa emnde na a dzeratersaa Edderwa ge de njá am sleđe-aha ɲanna.»

<sup>24</sup> De cenarácena pukura-aha umele na jaruje kelaawa na labáre ɲanna, a naba jaterhe ge ervaunde áte egdzar mama-aha buwa ɲanna.

<sup>25</sup> A đatertehe ge Yaisu, a ba ɲane á elvan ge itare: «Náwa diyakurdiya ganakini slekse-aha á larde wá, itare tá aɲkwa á kwára larde-aha-aatare an mára hákuma áte emnde. Male-aha á ekse keni tá aɲkwa á mára hákuma-aatare am ekse.

<sup>26</sup> Amá jeba á una ɲanna wá, a gevka am dagave á kure. Ma ware una á kátá gev male keni, arge una ɲanna wá, a gevge ba seke walaadi á kure.

<sup>27</sup> Ma ware una á kátá gev slekatafke á kure keni, a gevge ba seke náve á kure. Malire wá, ba una ɲanna am ice á Dadaamiya.

<sup>28</sup> Ba iya \*Ura á emnde bađemme keni, sanká geni tá se magiya emnde slera, amá iya una ya se magateraa slera ge emnde, ya se yá shifa-aaruwa geni yá lyelye emnde ba kwakya.»

### *Wulfe-aha buwa sharánsha ice áza Yaisu*

*(Mark. 10:46-52; Luka 18:35-43)*

<sup>29</sup> Segashe-aatare am ekse á Yairikau maa, emnde kwakya ta daa đaba Yaisu.

<sup>30</sup> Tá aɲkwa wulfe-aha buwa tá á njanja áte we á unjule, cenarácena aɲkwa á degashe Yaisu, ta naba kante kwára: «Yaakadada, \*Egdza á Dawuda, tasle á ɲa zaɲervareze,» a ba itare.

<sup>31</sup> Ta valateraarehe ge emnde, ta bateraa a đaruđe, amá itare ta farhe zlađe adaliye á ba an hula, a ba itare: «Yaakadada, Egdza á Dawuda, zaɲervareze.»

<sup>32</sup> A tsaahé ge Yaisu, a đaterte á dezeńara, a ba ɲane á elvan ge itare: «Kwá kátá yá magakurá estara kina?»

<sup>33</sup> Ta ɲwanante, a ba itare: «Ŋá kátá ba ɲá nanna ice á ɲere Yaakadada.»

<sup>34</sup> Yaisu a zatervaarehe, a semtateraa ice-aha-aatare. Ba seke ndaha á miya na emnde buwa na sharansha ice-aha-aatare, ta đabete Yaisu.

## 21

### *Yaisu á dem huđe á Urusaliima*

*(Mark. 11:1-11; Luka 19:28-40; Yuh. 12:12-19)*

<sup>1</sup> Daraada am ekse á Baytifaji áte vuwa á Wa Anyaranyara, zlauzle herzharanteherzhe Urusaliima maa, Yaisu a belaa pukura-aha-aara buwa á de katafke.

<sup>2</sup> A ba ɲane á elvan ge itare: «Dawmbare á dem ekse na kwaye á katafke á miya na wá, ba kertenj kwá de bera úmá á ezzenjwa an ɲgudá, tá antara egdza-aara wá, pelawaapele, sawiyansa.

<sup>3</sup> Máki a ndaakur elva ura umele wá, bawanánba ge edda-aara geni a ndavanaa Yaakadada, á de yakuránya, kwá sánsa.»

<sup>4</sup> Á magava una ɲanna, geni a gevge elva na aɲkwa a ndahesaa nabi na, a ba ɲane:

<sup>5</sup> «Bawateránba ge emnde a berni á \*Siyauna wá: Kwáye anƙwa á sawa slekse á kure á sem ekse á kure an kemaarire, anƙwa á sawa áte úmá á ezzenwa ira egdza-aara.»

<sup>6</sup> Daaci ta naba zlala pukura-aha na, ta de magán ba seke una a baternaa Yaisu.

<sup>7</sup> Ta sanmehe úmá á ezzenwa na antara egdza-aara áseza Yaisu, ta ndakaa zane-aha-aatare áte ezzenwa-aha ɲanna lauktu a njetaa Yaisu átekwa.

<sup>8</sup> Kwakya nánga, emnde umele ta pelanse zane-aha-aatare áte baráma, emnde umele ta ɗatsaa hyema á debina, ta pelanse áte baráma ɲanna.

<sup>9</sup> Daaci ma emnde na tá á zlala á katafke á Yaisu, ma emnde na tá am iga-aara keni baɗemme-aatare tá leva ba hula, a ba itare: «A vanteva Dadaamiya ɗemɗemire ge \*Egdza á Dawuda, a ganga barka ge edda una á sawa am zhera á Yaakadada na, Slekse ba Dadaamiya palle am samaya.»

<sup>10</sup> Am sarte na Yaisu anƙwa á dem huɗe á Urusaliima maa, emnde baɗemme am huɗe á berni ɲanna, tá anƙwa á ndava geni ware ɲane zhele ɲanna. Baɗemme á huɗe á ekse ba hayakhayake.

<sup>11</sup> Ta ɲwaterante ge dikele á emnde na tá dá ɗaba Yaisu na, geni una nabi Yaisu ura Nasarátu am haha á Galili.

*Slera á Yaisu am \*mashidi yaikke*

*(Mark. 11:15-19; Luka 19:45-48; Yuh. 2:13-22)*

<sup>12</sup> Duwa á Yaisu á dem \*mashidi yaikke, a de beraa emnde a válá kazlaɲa, antara emnde a shákwá kazlaɲa am mashidi, a naba ɲgyaterse. A zaɗanve tabel-aha á emnde a peteke, antara kurshi-aha á emnde a válá takala masar baɗemme.

<sup>13</sup> Am iga á una ɲanna maa, a ba ɲane á elvan ge itare: «Anƙwa an puwa am wakita á Dadaamiya, a ba Dadaamiya: Bere-aaruwa wá, tá ɗaháná an bere á maduwa. Amá kure kwa ganve hwalakwa á nabera-aha.»

<sup>14</sup> Tá anƙwa wulfe-aha antara emnde a dere, ta semhe áseza Yaisu á ba am mashidi ɲanna, a naba mbateraahé.

<sup>15</sup> Ba ta naa slera á najipu na a maganaa Yaisu na male-aha á \*liman-aha antara malum-aha á \*tawraitá wá, a naba jaterhe ge ervaunɗe. Aɗaba antara ba egdzara keni tá anƙwa á hula á ba dem zhegela, a ba itare: «A vanteva Dadaamiya ɗemɗemire ge \*Egdza á Dawuda.»

<sup>16</sup> A ba male-aha ɲanna, tá elvan ge Yaisu: «Ka cenáncena názena tá ndahaná itare ka?» «Ane, ya cenáncena», a ba Yaisu. «Kure ndaakursekahe názena am wakita á Dadaamiya, a ba ɲane: Shakánsha gálá am mbuwe á egdzara saɗaɗɗe, antara egdzara na tá áte erva na emtu?»

<sup>17</sup> Mázla-aara, ba zlala-aara ázetare, a desehe am huɗe á berni baɗemme. Kwaye a zlálá á dem Baytaniya, a de háre áhuwa.

*Yaisu a nyainyainve mama á nabugda*

*(Mark. 11:12-14, 20-24)*

<sup>18</sup> Mákuralla-aara anƙwa á sá Yaisu á sem huɗe á berni maa, ɲanaaɲa waya.

<sup>19</sup> Daaci a naa mama á nabugda áte we á unɲule, a duhe á dem ekte á nabugda ɲanna, shánka egdzere átekwa, jauwa ba hyema. A ndahese elva-aara áte nabugda ɲanna, a ba ɲane: «Egdzere áte ka wá, gaɗɗiru tá nánka.» Kertenj welasewele nabugda na baɗemme.

<sup>20</sup> Tá maga ba najipu pukura-aha am ta naa una ɲanna. Ta ndavanu ge Yaisu geni a sawa estara welasewele nabugda na shekwaaka ɗekiɗeki.

<sup>21</sup> A ɲwaterante ge Yaisu, a ba ɲane á elvan ge itare: «Yá ndaakur ba jirire: Máki fakurtaarefe á ba an jirire, magakurka shaige, anyya una náwa

ya maganta iya ge nabugda na ka, ma kwa banán ba ge wa na: Tsetse áhuna de mbedanaambedá ire á ña á dem háye keni, sey á magaavemage.

<sup>22</sup> Máki anƙwa fetarfire á kure wá, ma kwa ñála uwe keni kwá shánshá.»

### *A vantaaware hákuma ge Yaisu?*

<sup>23</sup> Yaisu a duhe á dem mashidi, a de fantau ge kwaraterse duksa ge emnde. Ta duhe ge male-aha á \*liman-aha, antara male-aha á Yahudiya-aha á dezeńara, a ba itare tá elvan ge ñane: «Ka shanaa áme hákuma á mága duksa-aha na? Emtu a vaktaa ware baráma-aara?»

<sup>24</sup> A ñwaterante ge Yaisu, a ba ñane á elvan ge itare: «Iya keni yá ndavakurundave, máki vakuriteva jawápa wá, yá ndaakurse tate na ni ya shaa hákuma átekwa.»

<sup>25</sup> Daaci a ba ñane á elvan ge itare: «A belanaa ware Yuhanna ge se magaterá baptisma ge emnde? Dadaamiya emtu, emndimagwaha he?» Ta fantau ge ndahanaa am dágave-aatare emtsaafé: «Má mi banaa a belanaa Dadaamiya, watse á bamiya: labára fakurtaareka an ñane?»

<sup>26</sup> Má mi baa, ta belanaa ba emndimagwaha, sey mí kuwa emnde keni, adaba emnde bademme fartarfe ganakini Yuhanna nabi á Dadaamiya.»

<sup>27</sup> Adaba una ñanna, «Diyañerka», a ba itare tá elvan ge Yaisu. A ba Yaisu: «Iya keni yá ndaakurka náza-aaruwa ma ya shaa hákuma á mága duksa-aaruwa áza ware keni.»

### *Naraje an egdzara buwa*

<sup>28</sup> Yaisu a fateraarehe zlaɓe ádaliye ge elva an naraje na. A ba ñane á elvan ge itare: «Anƙwa ura an egdzara buwa. A de banaa ge una male na: Vatena ká de maga slera am fe.

<sup>29</sup> A ñwanante ge egdzere: Yá duka, á bina. A dzamanaahe wá, am iga-aara a naba duhe.

<sup>30</sup> Daaci duwa á dada á deza palle na keni, a de banaa ba elva ñanna. Ñane wa: Ane, yá duwa edda, á bina, amá wá, daaka.

<sup>31</sup> Ate kure mu, ura-ara am egdzara ñanna una a magaa názena a katanaa eddeñara?» «Ba egdze na ta ndaan ge ñane zunñwe na,» a ba itare. Daaci a ba Yaisu á elvan ge itare: «Yá ndaakur ba jirire: Watse tá daada ba emnde á ñezla antara zaware-aha zunñwe á dem zlanna á Dadaamiya arge kure.

<sup>32</sup> Adaba sámša Yuhanna, a kwarakurse baráma a jirire, fakurtaareka an ñane. Amá emnde a ñezla, antara zaware-aha wá, fartaarefe an ñane. A ba am sarte na nakuránna duksa ñanna zlauzle keni, aley eptsakurka am tuba geni kwá fetaraarfe an ñane.»

### *Naraje an emnde a mándzawe ta yateraa fe am erva (Mark. 12:1-12; Luka 20:9-19)*

<sup>33</sup> «Cenaucena naraje umele zlaɓe ádaliye,» a ba Yaisu: «Ndza anƙwa edda á há umele, a dzeɓaa náfa á inabauhi am fe-aara, a jantaave an dala, a magaa tate á beca egdza á náfa, ira bere á edda á ufa fe ñanna, daaci a yateraa fe ñanna bademme am erva ge emnde a slera, ñane a daa shula.

<sup>34</sup> Samsa sarte a tsaka inabauhi maa, edda á fe na a belaa emnde a slera-aara umele áseza emnde na a yateraa fe am erva, geni tá lyanvaalya dza á inabauhi-aara.

<sup>35</sup> Amá náwa názu ta magatertaa itare: Ta sluwatervaahe bademme á emnde na a belateraa edda á fe na, ta hyanhe ge palle-aatare an ja, buwire-aatare ta ja shifa-aara ba dekiɓeki, keyire-aatare ta dzagese an nákwá.

<sup>36</sup> Edda á fe na a naba belaa emnde a slera-aara umele jauje ba ge una am zunḡwire na, amá emnde a mága slera am fe ta de magateraa ba názena ta magaterete ge emnde zunḡwe.

<sup>37</sup> Mazla-aara wá, edda á fe na a belateraa egdza-aara ba ge ḡane. A ba ḡane: Egdza-aaruwa ba ge iya na wá, sey tá de fa zherwe áte ḡane.

<sup>38</sup> Amá ba ta puwete ice áte ḡane emnde a mága slera am fe wá, a ba itare am dágave-aatare: Yawwaa, kwaye samsa edda una watse á zaná ḡane waráta á fe á miya na. Gwawamiyargwe, jaumija ba shifa-aara, fe-aara ḡanna watse á gev ba náza á miya.

<sup>39</sup> Daaci má ta eksevaahe, ta danse áte iga a dala á fe ḡanna, ta naba ja shifa-aara.»

<sup>40</sup> A ndavateruhe ge Yaisu, a ba ḡane á elvan ge itare: «Má samsa edda á fe na mu, watse á magaterá uwe ge emnde a mága slera am fe na?»

<sup>41</sup> Ta ḡwanante, a ba itare: «Watse á zatervaareka d'ekid'eki ge emnde a mándzawe ḡanna, sey watse á cebaterceba, watse á yaterá inabauhi-aara am erva ge emnde na ni watse tá vante dza á inabauhi-aara an unḡule-aara na.»

<sup>42</sup> A ba Yaisu á elvan ge itare zlaḡe ádaliye: «Anḡkwa naraje am wakita á Dadaamiya, a ba ḡane:

“Ba nákwá ḡanna ta eblyanvaa emnde a nyáḡa bere na una, a eksantehe ge Dadaamiya, a ganve nákwá na á ḡáná ḡane ndzedá á bere ḡanna bademme. Kwaye ḡane názena a maganaa Yaakadada, shagera ge miya, máki namiyanna duksa ḡanna.” Ábi ndaakursende naraje ḡanna.»

<sup>43</sup> A ba Yaisu á elvan ge itare zlaḡe ádaliye: «Yá ndaakur ba jirire, una keni watse ba estuwa ḡanna. Watse Dadaamiya á de sanse hákuma á maga slera-aara am erva á kure, á de vaterte ge emnde a jeba umele na tá de fansaarefe na.

<sup>44</sup> Nákwá ḡanna wá, ma ware una a mbedehe átekwa keni, sey á kezlevkezele am tate umele. Edda una a eblyaara nákwá ḡanna ge ḡane, á hánaahe edda-aara á ganvege ba seke haha.»

<sup>45</sup> Ba ta cenaa naraje-aha á Yaisu na, male-aha á \*liman-aha antara \*Farisa-aha wá, ta naba diyeddiye geni á ndahaná áte itare.

<sup>46</sup> Ta naba tátaya pute á ekseksa-aara, amá á waterwa lyawa átuge jáháva á emnde na, adaba emnde bademme njarantenje Yaisu, geni ḡane nabi á Dadaamiya.

## 22

### *Naraje an muḡri á larusa* (Luka 14:15-24)

<sup>1</sup> Yaisu anḡkwa á vaterte sera á elva á ba an naraje zlaḡe ádaliye, a ba ḡane á elvan ge itare:

<sup>2</sup> «Náwa názu á gárává an dem zlanna á Dadaamiya: Anḡkwa slekse, a magaa muḡri á larusa, a ganaa gyaale ge egdza-aara.

<sup>3</sup> Daaci a belaa walaadi-aha-aara, tá de d'ante emnde na ni tá se za d'afa á larusire na, amá emnde ḡanna kwalarevkwále sarka.

<sup>4</sup> A belaa emnde umele zlaḡe ádaliye an nara-aara, a ba ḡane: Bawateranba ge emnde na ya ndavateraa ya na wá: Cebanceba dalau-aha-aaruwa, antara dabba-aha-aaruwa umele na ni tá an ḡasla jipu na, an tsatsa duksa bademme, sawmbare á sem muḡri á larusa!

<sup>5</sup> Amá emnde na ta d'ahateraa á dem muñri ñanna faranuka hyema ge una ñanna d'ekid'eki, ta zlalehe á dem tate á wedere-aha-aatare. Ura umele a dem fe-aara, umele a dem tsakala-aara,

<sup>6</sup> emnde umele ta sluva emnde a bela á slekse ñanna, ta magateraa palása, ta cebaa shifa-aatare.

<sup>7</sup> Daaci jaaja ervaun'ge slekse maa, a naba bela sawji-aha-aara geni tá de cebá emnde a ceba shifa ñanna, ta zu ekse-aatare bad'emme an k'ará.

<sup>8</sup> Daaci a ba slekse á elvan ge emnde a slera-aara umele: Muñri á larusa wá, an gya, amá emnde na ndza ya d'aterd'aha na wá, tá fuka mázla-aara.

<sup>9</sup> Naba zlalauzlala á dete we á wálkame-aha, ma kwa shaa emnde-ara keni d'awaterd'áhá, a se zaruze.

<sup>10</sup> Duwa-aatare á dete we á wálkame-aha, bad'emme á emnde na ta de shateraa itare na, ta saterhe bad'emme, emnde a jirire, an emnde a mándzawe bad'emme, a se nahete ge hu'fe á há an nalga.

<sup>11</sup> «A tsete ge slekse, a de zh'ará emnde na a d'ahateraa ñane maa, a naa ba ura, tsekwámka am nan'gyuwe á dem larusa.

<sup>12</sup> A ba ñane á elvan ge ñane: Ura-aaruwa, ka shanaa estara ka baráma á sehuna tsekwakemka am nan'gyuwe á larusa na? Palle á elva na a ndahanaa zhel na baaka.

<sup>13</sup> Daaci a ba slekse á elvan ge kwakwane-aha-aara: Puwawanempuwa zawa am mbiye ge zhel na, takwasawutakwasa ba shagera erva-aha antara sera-aha-aara bad'emme, de eblyawanmeblye á dem tate na tabed'amme jipu na ágáshe, a kyuwa kwa áhuwa, a ekker'da slare-aara.»

<sup>14</sup> Ge zla elva-aara Yaisu, a ba ñane: «Kwakya emnde na á d'aháterá Dadaamiya, amá á dzerese ba cekwa am hu'fe-aara.»

*Elva a hadáma ge male á larde á Rauma*

*(Mark. 12:13-17; Luka 20:20-26)*

<sup>15</sup> Daaci duwa á \*Farisa-aha, ta de magaa sawari-aatare geni sey tá eksevaksa Yaisu áte elva.

<sup>16</sup> Am iga á sawari-aatare ñanna maa, ta naba bela pukura-aha-aatare umele antara emnde á \*Hirudus á deza Yaisu, geni tá de ndavanu elva na. A ba itare: «Malum, diyañerdiya geni ekka wá, ka slejirire, ka slekwaraterse jirire á Dadaamiya ge emnde áte una á kataná ñane, baaka lámbe á ña áte ñgahire á urimagwe na tá ndahaná emnde na.

<sup>17</sup> Daaci náwa ñá ndava ázeña wá, ndañerndaha názena ka disaa ka. Am \*tawraitá á miya mu, an'kwa emtu baráma á puwaná hadáma ge male á larde á Rauma, baaka he?»

<sup>18</sup> Amá kerten' diyeddiye Yaisu mándzawire na ta kwamanaa itare bad'emme. A ba ñane á elvan ge itare: «Kwa emnde a fida, labára kwá tsagwaditsagwada?»

<sup>19</sup> Marawiyánm'ará emtsaade shun'gu na tá puwa hadáma an ñane na.» Ta maranaa suley palle.

<sup>20</sup> A ba ñane á elvan ge itare: «Nderáva á ware una áte shun'gu na? Ira zh'era na mu, zh'era á ware?»

<sup>21</sup> Ta ñwanante, a ba itare: «Náza á male á larde á Rauma.» A ba Yaisu á elvan ge itare: «Daaci má estuwa wá, puwawanpuwa ge male á larde názu zlaya-aara, ge Dadaamiya keni názu zlaya-aara.»

<sup>22</sup> Tá maga ba najipu á jawapa na ta cenanaa itare na. Daaci ta yaa Yaisu, ba zlala-aatare.

*Ndava áza Yaisu áte tse á emnde am faya*

*(Mark. 12:18-27; Luka 20:27-40)*



<sup>23</sup> Ba vacite ɲanna zlaɓe ádaliye maa, ta naba sem ge \*Saduki-aha áseza Yaisu. Ba itare emnde na ta bantsa itare, baaka tse á emnde am faya na. Ta se ndavanu elva, a ba itare:

<sup>24</sup> «Malum, a ba Muusa, máki emtsamtsa zhele yanka egdzere wá, a melesemele egdza emmenjara mukse-aara geni á yaná egdzara ge egdza emmenjara na kedfaakeda na.

<sup>25</sup> Iyau, ndza tá anƙwa dawalaa vuye ázenjere ta egdzar mama, duwa á makaji-aatare, a gaa gyaale, áma a naba kedfehe, a yaa mukse na baaka egdzere.

<sup>26</sup> A melese ge sledaba-aara, ɲane keni a kedfehe, a yaa mukse na baaka egdzere. Keyire-aatare keni ba estuwa, itare vuye na bademme ta gaa ba mukse ɲanna, bademme zlaruzle yaránka egdzere ba palle keni.

<sup>27</sup> Am iga-aatare bademme, a kedfehe ge mukse ɲanna keni.

<sup>28</sup> Vaci tse á emnde am faya mu, watse átuge ware palle mukse na? Adaba itare vuye na ndza mukse-aatare ba ɲane palle!»

<sup>29</sup> A ɲwaterante ge Yaisu, a ba ɲane á elvan ge itare: «Kure jakuraaveje áte baráma a jirire, adaba diyakurka názu am wakita á Dadaamiya, diyakurka ndzedá á Dadaamiya keni dƙideki.

<sup>30</sup> Má tsaretse emnde a faya wá, baaka gá mukse, ma ɲwasha keni baaka de gá zhele. Emnde bademme tá de njá ba seke malika-aha am samaya.

<sup>31</sup> Tse á emnde am faya keni maa, kure ndaakurseka názu a bakurnaa Dadaamiya áte elva ɲanna emtu? Adaba a ba ɲane áte eggye-aha á kure werre:

<sup>32</sup> Ba iya una ya Dadaamiya á Ibrahimia, ya Dadaamiya á Isiyaaku, ya Dadaamiya á Yakubu. Daaci máki estuwa wá, tá á ba an shifa-aatare emndu werre. Adaba Dadaamiya wá, ɲane Dadaamiya á emnde na tá an shifa, Dadaamiya á emnde na ni tá an emtseka.»

<sup>33</sup> Bademme á dikele á emnde na ta cenaa jawapa-aara na tá maga ba najipu-aara.

### *Yaikka ura-ara am shairiya-aha á Dadaamiya?*

*(Mark. 12:28-34; Luka 10:25-28)*

<sup>34</sup> Cenarácena \*Farisa-aha geni jawapa á Yaisu katevaaka ye ge \*Saduki-aha maa, ta naba jamme átirpalle.

<sup>35</sup> Anƙwa ura palle am dágave-aatare wá, ɲane malum á \*tawraitá, a magaa niya-aara geni á de tsagwadá Yaisu áte elva. A ba ɲane á elvan ge Yaisu:

<sup>36</sup> «Malum yaikke, yaikka ura-ara am shairiya-aha á Dadaamiya bademme?»

<sup>37</sup> A ɲwanante ge Yaisu, a ba ɲane á elvan ge ɲane: «Ewwáya Yaakadada Dadaamiya á ɲa an ervaunƙe á ɲa bademme, an shifa á ɲa bademme, an enƙale á ɲa bademme.

<sup>38</sup> Yaikke ba una ɲanna am shairiya-aha á Dadaamiya, dɛmɛme zlaɓe adaliye.

<sup>39</sup> Náwa buwire-aara na ni tá gáráva na: Ewwáya sleriya á ɲa ba seke ire á ɲa.

<sup>40</sup> Am \*tawraitá á Muusa antara názu ndza ta kwaratersaa nábi-aha umele ge emnde, yaikke-aara ba shairiya-aha buwa na.»

### *\*Almasihu á tsaaka an wulfe á \*Dawuda*

*(Mark. 12:35-37; Luka 20:41-44)*

<sup>41</sup> Am tá anƙwa \*Farisa-aha jarammeje átirpalle maa, Yaisu a ndavateru elva na, a ba ɲane á elvan ge itare:

<sup>42</sup> «Kure mu, kwá slanve uwe ge \*Almasiihu? Kwá ba wulfe á ware?» Ta nwanante a ba itare: «Wulfe á \*Dawuda.»

<sup>43</sup> A ba Yaisu á elvan ge itare: «Ay estara kena Dawuda keni ndza á dáháná an Yaakadada na? Adaba a ba Dawuda an hákuma á Shedfekwe Cufedfe:

<sup>44</sup> “A ba Yaakadada á elvan ge Yaakadada-aaruwa: Njinja am nadafaa-aaruwa, dem sarte na má ganatervege kelaade-aha á ña tate á puwa sera á ña.”

<sup>45</sup> Máki ndza a dantaa Dawuda Almasiihu an Yaakadada, á sawa estara kena zlafe adaliye ni á gev wulfe-aara na?»

<sup>46</sup> Ba palle keni jerka edda una ni á nwanantenwa. A fantau á ba am sarte ñanna, baaka ura á kwamaha de ndavanu elva mázla-aara.

## 23

*Yaisu ankwá á gíyá emnde geni a farfa hyema áte ire-aatare áza malum-aha á \*tawraitá antara \*Farisa-aha (Mark. 12:38-39; Luka 11:43, 46; 20:45-46)*

<sup>1</sup> Daaci a ba Yaisu á elvan ge jáháva antara pukura-aha:

<sup>2</sup> «Malum-aha á \*tawraitá antara \*Farisa-aha wá, slera-aatare tá kwaraterse názu a ndahanaa tawraitá á Muusa ge emnde ákyiye.

<sup>3</sup> Daaci fawatersaarefe, magaumága názena tá bakurná itare bademme. Amá wá, magauka názena tá maganá itare na dekideki. Adaba názu tá kwaraterse ge emnde na, itare tá manka áte una ñanna.

<sup>4</sup> Tá faterar gwatame demdeme ge emnde, amá itare ba gulanda-aatare keni tá feka átekwa dekideki ge melaterumele.

<sup>5</sup> Bademme á názena tá maganá itare, tá magán ba geni a zhararaterzhára emnde. Estuwa, tá puwa nayya-aha, tá dzebemá am duksa ba seke laya, tá ngudaná áte wafke-aha-aatare antara áte erva-aha-aatare, ira tá saganve jeba á puwa-aha umele ankwá áte zane-aha-aatare.

<sup>6</sup> Ma am munri-ara keni itare tá kátá ba sledfe na ni an dárádza jipu na. Am mashidi keni sledfe-aatare sey á jauje ge náza á emnde bademme, ma ware keni á náterna.

<sup>7</sup> Tá kátá emnde tá dáháterá an “malum”, tá gater use an ga ire am dágave á zlamaha.

<sup>8</sup> Amá kure wá, vawaterteka baráma ge emnde geni tá dáhákurá an malum-aha, adaba bademme á kure kwa ba egdzar mama, ankwá Malum á kure ba palle.

<sup>9</sup> Dahauka ura áte duniya na an dada dekideki, adaba Eddekure ba palle ankwá am samaya.

<sup>10</sup> A daharakurka an male dekideki, adaba ankwá Male á kure ba palle, ba ñane una \*Almasiihu.

<sup>11</sup> Ma male ware am dágave á kure keni, a gevge waladí á kure.

<sup>12</sup> Ma ware una a kantaa ba ñane ire-aara na, sey tá de gánaaga. Áma edda una ni a gaa ire-aara wá, tá de kananteka.»

*Yaisu á balaterse zladá á malum-aha á \*tawraitá an \*Farisa-aha (Mark. 12:40; Luka 11:39-42, 44, 52; 20:47)*

<sup>13</sup> «Watse zladá ge kure malum-aha á \*tawraitá antara \*Farisa-aha, kure kwa emnde a fida! Watse zladá ge kure adaba kwá piyaterante dem \*kwára á Dadaamiya ge emnde. Kure keni dakuremka, emnde na tá kátá demda na keni kwa piyaterante.

((

14 «Watse zlaɗa ge kure malum-aha á tawraitá antara Farisa-aha, kure kwa emnde a fida! Kwá lyatervuwe duksa-aatare ge wegyegwar ɲwasha, daaci kwá slaɗanve maduwa-aha á kure geni tá fakura áte emnde a jirire. Aɗaba una ɲanna, zlaɗa á kure á de jauje ge náza á emnde baɗemme.))

15 «Watse zlaɗa ge kure malum-aha á tawraitá antara Farisa-aha, kwa emnde a fida! Watse zlaɗa ge kure, aɗaba kwá aɲkwa ja ɗaba am larde-aha antara áte ire á haye-aha baɗemme, geni kwá shansha ura palle á gevge am dza á kure ge ɗaba nadina á kure. Má shakuránsha kení, kwá ganve edda-aara dza á kára, á jakuruuje ba ge kure ma ser buwa kení.

16 «Watse zlaɗa ge kure malum-aha, wulfe na ni kwá táɗá wulfe-aha. Aɗaba a ba kure: Má ura zauze waɗa an \*mashidi yaikke, baaka názu á maganmága, sey máki a zu waɗa án dindar na am mashidi na lauktu á eɗɗaba waɗa-aara.

17 Kure wá, kwa uce-aha ba jire, kwa wulfe-aha! Yaikke ura-ara ɲane am duksa-aha ɲanna? Amaana yaikke dindar na am mashidi emtu? Tá eksetá mashidi wá, tá ganve dindar cuɗeɗe an ɲane emtu?

18 Kwa bántsa kure zlaɓe ádaliye wá: Má ura a zu waɗa an názu tá fa sadake átekwa wá, baaka názu á maganmága ɗekideki. Amá máki edda-aara a zu waɗa an sadake na átekwa na wá, á eɗɗaba waɗa-aara ɲanna.

19 Kure wá, kwa wulfe-aha! Yaikke ura-ara ɲane am duksa-aha ɲanna? Amaana yaikke sadake arge duksa na tá faná átekwa na emtu? Emtu yaikke duksa na tá fa sadake átekwa, á ganvá ɲane sadake ɲanna cuɗeɗe na he?

20 Yá ndaakur ba jirire, máki edda-aara zauze waɗa an duksa na tá faná sadake ge Dadaamiya átekwa na wá, edda-aara a zu waɗa an duksa ɲanna ira sadake na átekwa na kení.

21 Edda una má zauze waɗa an \*mashidi yaikke, a zu waɗa an mashidi ka palle. A zu waɗa an Dadaamiya na am mashidi ɲanna kení.

22 Edda una a zu waɗa an samaya, a zu waɗa an kurshi á sleksire á Dadaamiya, ira Dadaamiya na á njá am kurshi ɲanna kení.

23 «Watse zlaɗa ge kure, malum-aha á \*tawraitá antara \*Farisa-aha, aɗaba kwa emnde a fida! Dále-aha seke tara ɗale á minti, antara timba ira makshaksha wá, kwá aɲkwa vante luser-aara ge Dadaamiya. Amá duksa yaikke na á kwaratersa \*tawraitá ge emnde seke tara jirire, antara magwire, ira dzayyire á ervaunɗe wá, kwá maɲka. Mbate kení ma andze kwá maganá á ba antara una-aha ɲanna, baaka una kwá yanseye.

24 Kure kení kwa wulfe-aha, kwá taɗa wulfe-aha seke kure. Kwá yemese ugjanja am yáwe á kure, amá ezlegwame wá, yemakurka, kwá shaná á ba antara ɲane.

25 «Watse zlaɗa ge kure malum-aha á tawraitá an Farisa-aha, aɗaba kwa emnde a fida! Kwá bára iga á náza sha duksa antara tasa-aha á za duksa á kure, amá an naha tara neylire, antara shagerkire am huɗe-aara.

26 Ekkure Farisa-aha wá, kwa wulfe-aha! Barawábára emtsaade huɗe á tasa-aha á kure, iga-aara watse á gevge tseɗaɲe.

27 «Watse zlaɗa ge kure malum-aha á tawraitá antara Farisa-aha, kwa emnde a fida! Kure kwa ba seke irekhye-aha na an bára an duksa dzayye, zariya am ice á emnde, amá am huɗe-aara wá, an naha ba se á emtsa, an weshege-aha gergere.

28 Kure kení kwa ba seke una ɲanna. Ágáshe wá, kwa emnde a jirire áza emnde, amá kwakya fida antara mándzawire am kure.»

*Malum-aha á \*tawraitá an \*Farisa-aha tá de ñezleka am shairiya  
(Luka 11:47-51)*

<sup>29</sup> «Watse zlaɗa ge kure malum-aha á \*tawraitá antara \*Farisa-aha, aɗaba kwa emnde a fida! Kwá aɗkwa nderá irekhya á nabi-aha geni hayakuránháya slera á eggye-aha á kure, kwá aɗkwa caɗa irekhya á emnde na ndza ta magaa jirire á Dadaamiya,

<sup>30</sup> aley wá, a ba kure: Ma andze ñá aɗkwa am zamane á eggye-aha á ñere wá, ma ñá melateruka ge ceɓa shifa á nabi-aha.

<sup>31</sup> Ba kure keni diyakurdiya am ire á kure geni kwa wulfe-aha á emnde na ndza ta ceɓaa shifa á nabi-aha.

<sup>32</sup> Naba magaumaɗa slera á kure yawánka, zlawanaazle slera á eggye-aha á kure.

<sup>33</sup> «Kwa havale-aha, kwa egdzara á pushe ba jire! Una ni kwá de ñezla am shairiya, kwá duka á dem kára á jahanáma, a ba kure? Kwá ñezleka ɗekideki.

<sup>34</sup> Aɗaba una ñanna yá ndaakur ba jirire, cenaucena elva na: Watse yá belakurá nabi-aha, antara emnde a eɗkale, ira malum-aha, amá emnde umele-aatare watse kwá ceɓa shifa-aatare, emnde umele watse kwá zleɗeláterá áte dzangala, emnde umele watse kwá slerpáterá an ja am mashidi-aha á kure, watse kwá de tatayatertátaya am ekse-aha baɗemme.

<sup>35</sup> Daaci baɗemme á uzhe á emnde cuɗeɗɗe na ndza ta cebateraa am duniya na, kwaye emtsa á Habila, sem emtsa á Zakariya baɗemme á ba am mbiye á kure. Zakariya na wá, yá ndahá elva á Zakariya egdza á Barakiya na ndza kwa janaa am dagave á tara bere cuɗeɗɗe antara duksa na tá faná sadake ge Dadaamiya átekwa na.

<sup>36</sup> Una yá ndaakur ba jirire: Baɗemme á uzhe á emnde ñanna á ba am mbiye á emnde a zamáne na!»

*Elva á Yaisu áte Urusaliima  
(Luka 13:34-35)*

<sup>37</sup> «Urusaliima, Urusaliima, ekka ka ceɓaa nabi-aha, ka ceɓaa emnde na a belateraa Dadaamiya an nákwá! Ser kwakya una yá kátá jema emnde á ña ásezerwa, ba seke náza á mama á ukkula, máki a jemaa egdzara-aara á dem ekta á zlabake-aara. Amá kwalakeɗkwale.

<sup>38</sup> Kina wá, yanakaaya, ká de gev ba kaamba!

<sup>39</sup> Yá ndaakur ba jirire: Kwá puweteka ice á kure áte iya mazla-aara, dem sarte na ni watse kwá bánba ba kure an we á kure ganakini a ganga Dadaamiya barka ge edda una a sawa an zhera á Yaakadada na!»

## 24

*Yaisu á ndáhá elva a mbeɗa \*mashidi yaikke  
(Mark. 13:1-2; Luka 21:5-6)*

<sup>1</sup> Daaci sessa Yaisu am \*mashidi yaikke, aɗkwa á zlála maa, ta duhe ge pukura-aha-aara á dezeńara, a ba itare tá elvan ge ñane: «Ezzhara emtsaade jeba á nderáwa á mashidi na.»

<sup>2</sup> Daaci a ba Yaisu á elvan ge itare: «Yá ndaakur ba jirire: Una ñanna kwá zharaná kure baɗemme na, watse á mbeɗa baɗemme, ba nákwá palle keni watse á jauka áte ukfeɗara nákwá.»

*Zlaɗa-aha na watse á magava lauktu á zla duniya  
(Mark. 13:3-13; Luka 21:7-19)*

<sup>3</sup> De njaanja Yaisu áte ire á Wa Anyaranyara, ta duhe ge pukura-aha-aara á ba an niya á dezeńara, ta de ndavanuhe, a ba itare tá elvan ge

ɲane: «Ndanerndaha watse á magava am sarte-ara una ɲanna? Watse ɲá dise áte uwe ganakini herzha sawa á ɲa, an zle á duniya?»

<sup>4</sup> A ɲwaterante ge Yaisu, a ba ɲane: «Kure wá, faufa ba hyema, a se keɗarakuraaka emnde umele.

<sup>5</sup> Adaba watse kwakya emnde na tá de sawa an zhera-aaruwa, ma ware keni á se ba: Ba iya una ya \*Almasiihu. Daaci tá se keɗa emnde kwakya.

<sup>6</sup> Watse kwá cenáncena labare á wáwa-aha am larde-aha na ba herherzhe an kure, antara am larde-aha na yiyiye an kure, amá gazlauka ɗekideki. Sey á de magava una-aha ɲanna, amá zlaɓe zle á duniya ka emtsaade.

<sup>7</sup> Watse larde umele á de darge larde umele an wáwa. Emnde á slekse umele, tá de darge kwára á slekse umele an wáwa. Waya antara gejava á haha á de magava am tate-aha gergere.

<sup>8</sup> Baɗemme á una-aha ɲanna, zlaɓe ba fakta á zlaɗa emtsaade, ba seke náza á mukse na fanantaufe zlaɗa á yá.

<sup>9</sup> «Watse tá sluwakursluwa, tá vakurte ge emnde tá magakurá palasa, tá de ceɓa shifa á kure. Emnde baɗemme tá de dá ba kelaadire ádete kure aɗaba zhera-aaruwa.

<sup>10</sup> Emnde kwakya tá de yá fetaare áte ya mazla-aara am sarte ɲanna, tá de maga ba kelaadire, antara dugune am dagave-aatare.

<sup>11</sup> Tá de jesaareje nabi-aha fida kwakya, tá de keɗa emnde kwakya.

<sup>12</sup> Watse á kwakyeɗa ba shagerkire am dagave á emnde. Watse kwakya emnde na á de gula wáyáwa-aatare.

<sup>13</sup> Amá edda una tsaatse shagera dem halavuwa-aara wá, á lyelye shifa-aara.

<sup>14</sup> Á hyemhya labare á higa, elva a sem \*kwara á Dadaamiya, am huɗe á duniya baɗemme, watse tá maganaamaga seydire am larde-aha baɗemme, lauktu á sawa zle á duniya.»

*Zlaɗa na baaka kalle-aara na  
(Mark. 13:14-23; Luka 21:20-24)*

<sup>15</sup> «Watse kwá náanna duksa na ni tá ɗahána an shagerkire emtaɲka ɗekideki na am tate á cuɗeɗe. Nabi Daniyail wá, ndza a enndaha elva-aara werre. Ma a ndaasa ware elva-aaruwa na keni, a cenevaacena elva ɲanna ba shagera.

<sup>16</sup> Vacite na ni má nakuranna duksa ɲanna wá, watse kyaakya ge emnde na tá am Yahudiya, tá zlerda zhagade á dem huɗe á wa.

<sup>17</sup> Edda una áte ire á bere keni, a tsuɲka á dem huɗe á bere ge hálá kazlaɲa-aara.

<sup>18</sup> Edda una am fe keni, a eptseka á sá ge se hálá nanɲyuwe-aara.

<sup>19</sup> «Watse á tsaame kwa zlaɗa á ɲwasha na watse tá á huɗe am sarte ɲanna, antara ɲwasha na tá an egdzara áte erva na!

<sup>20</sup> ɲalaunála Dadaamiya ganakini zhagade á kure a gevka am sarte á ekhye, bi an kwaskwe á puwansepuwe!

<sup>21</sup> Adaba watse kwakya jipu zlaɗa am sarte ɲanna. Ta nderaa estuwa duniya, sem vatena, jerka jeba á zlaɗa ɲanna ɗekideki. Á de jesarka keni zlaɗa na ni ta kalle an una ɲanna.

<sup>22</sup> Ma andze gulanaaka Dadaamiya hare-aha á zlaɗa ɲanna wá, ma andze á jauka ura an shifa ba palle keni. Amá a naba gulanaahe ge Dadaamiya aɗaba emnde na a dzeratersaa ɲane.

<sup>23</sup> «Daaci am sarte ɲanna, ma a bakurnaa ware: Nawa aɲkwa \*Almasiihu áhuna, bi kwaya aɲkwa áhuwa, lyiyauka elva ɲanna ɗekideki.



<sup>24</sup> Adaba watse tá jesareje almasiihu-aha fida, antara nabi-aha fida am sarte ñanna. Watse tá maga nalaama-aha antara najipu-aha gergere kwakya, geni ambane tá kefateraakeda emnde na ni a dzeratersaa Dadaamiya áte enkale.

<sup>25</sup> Cenawáncena! Náwa fanakuremfa ya am vuwa zlauzle.

<sup>26</sup> «Daaci ma tá bakurá: Kwaye ankwá \*Almasiihu am kaamba keni, kure daumbareka. Ma tá bakurá: Náwa ñane, a shebevaa ire-aara áhuna keni, fautaareka an elva-aatare dekideki.

<sup>27</sup> Adaba ba seke mága á kárá á ráde á sawa am samaya, á fantau am gedí dem pute keni ba ñane na wá, watse sawa á \*Ura á emnde bademme keni ba estuwa.

<sup>28</sup> Adaba am tate na ni ankwá lipa átekwa, zaatate-aha keni tá jaháva á ba ádehuwa.»

*Sawa á \*Ura á emnde bademme  
(Mark. 13:24-27; Luka 21:25-28)*

<sup>29</sup> «Kertenj am iga á zlada ñanna maa, vaciya á de gevge danñwe bademme, tere keni á de máreka parakkire-aara, terlyakwa-aha keni watse tá geda á sem áhá, bademme á ndzedá á názena áte samaya á de gejavtegeje ba ñarñare slede.

<sup>30</sup> Daaci tá de zhárá ba nalaama á \*Ura á emnde bademme á sawa am samaya. Bademme á emnde na tá am duniya na tá de kyuwa, daaci tá zhárá ba iya Ura á emnde bademme yá ankwá á sawa áte kumba, yá sawa an hákuma yaikke antara demdemire.

<sup>31</sup> Tá de fertanteferta derkwákwá yaikke, daaci yá de bela malika-aha-aaruwa á dem karáfke-aha á duniya ufade kerde, geni tá jatermaare ge emnde na ya dzeratersaa ya na bademme.»

*Gáráva an nabugda má yaaya hyema anwaslire  
(Mark. 13:28-31; Luka 21:29-33)*

<sup>32</sup> «Diyaweddiye á ba áte mama á nabugda. Máki kwa nanna gedaageda hyema átekwa, yaaya umele anwaslire wá, diyakurdiya ganakini herzhavteherzhe madare.

<sup>33</sup> Una keni ba duksa palle. Máki ankwá á magava duksa-aha ñanna wá, diyaweddiye ganakini iya keni yá ba áte we á sera mazla-aara ge sawa.

<sup>34</sup> Yá ndaakur ba jirire: Emnde a zamane na tá de zlauka ba estuwa, sey máki naránna duksa-aha ñanna.

<sup>35</sup> Tara samaya an haha wá, tá naba kedá, tá zlauzle. Amá elva-aaruwa wá, á kedeka dekideki, sey má gevge.»

*Sarte á zle á duniya wá, diyaa ba Dadaamiya palle  
(Mark. 13:32-37; Luka 17:26-30, 34-36)*

<sup>36</sup> «Elva á hárá á bere, antara sarte ñanna wá, baaka slediya-aara dekideki. Ma malika-aha am samaya, ba iya \*Egdza á Dadaamiya keni diyanka, sey diyaa ba Dadaamiya palle ñane Dada.

<sup>37</sup> Ba názena ndza a magava am zamane á \*Nuhu na wá, watse ba seke una ñanna kalkale má watse yá sawa iya ya \*Ura á emnde bademme.

<sup>38</sup> Am sarte na zlafe samka yáwe á kedá duniya wá, slera á emnde ndza ba tátaya emtakire á duniya; tá ezza, tá essha, tá gá larusa, tá vaterte gyaale-aha-aatare ge zála, a semaa estuwa kwaskwe na a demaa Nuhu á dem paare-aara, tá maga ba una.

<sup>39</sup> A se kefateraahé ba estuwa yawe á kedá duniya, farka hyema dekideki. Má watse yá de sawa iya ya Ura á emnde bademme keni, á de magava ba estuwa.

<sup>40</sup> Watse yá se bera emnde buwa am fe, watse yá eksa palle, palle-aatare yá yánya.

<sup>41</sup> Nwasha buwa tá há hiya, yá eksa palle, yá yá palle.

<sup>42</sup> Adaba una nanna, njawinja á ba am niya á kure. Adaba diyakurka sarte na ni á de sawa Yaakadada á kure átekwa na.

<sup>43</sup> Ankwa duksa palle, diyaweddiye ba shagera: Máki diyaadiya edda á há sarte na ni watse á sawa neyle átekwa na wá, á peka háre d'ekideki, adaba wayaaka á demda neyle á dem huđe á há-aara.

<sup>44</sup> Kure keni ba estuwa. Sarte na ni watse iya \*Ura á emnde bademme yá de sawa átekwa na wá, diyakurka. Daaci njawinja á ba am niya á kure.»

*Sleslera na dzayye ervaunđe-aara, an una danjwe ervaunđe-aara  
(Luka 12:41-48)*

<sup>45</sup> «Sleslera-ara nane dzayye ervaunđe-aara, slenkale zlađe adaliye na? Ba edda una ni má zanwe-aatare a yanaa huđe á há-aara bademme am erva ge nane, á vatertá nane náza za ge emnde na tá am huđe á há nanna bademme, á vatertá an laukte-aara na.

<sup>46</sup> Yá ndaakur ba jirire, watse higa yaikke ge sleslera nanna, máki zanwe-aara a se beranaa á ba am slera-aara.

<sup>47</sup> Rezege-aara bademme keni á naba fanemfe am erva zanwe-aara ge sleslera nanna.

<sup>48</sup> Amá máki danjwe ervaunđe á sleslera nanna wá, á naba bánba am ervaunđe-aara ganakini labára á saaka zanwe-aaruwa watsewatse.

<sup>49</sup> Daaci á fantau ge magateraa palasa an ja ge emnde a slera umele, á zá názu am huđe á há, á essha antara emnde a mbazla umele.

<sup>50</sup> Daaci má á sa zanwe á sleslera nanna wá, á sa á ba an kwaskwe na ni tamaaka nane d'ekideki, á sa am sarte na ni diyaaka nane d'ekideki na.

<sup>51</sup> Palasa na á se magante zanwe-aara ge sleslera nanna wá, náza enndaaka. Ba emtanjire na ni á se puwa emnde a fida á demkwa na wá, nane keni á ba am huđe-aara. Á de kyuwa-aara am tate nanna, á de kerda ba sláre ge zlađa.»

## 25

*Naraje an gyaale-aha kelaawa*

<sup>1</sup> «Daaci dem zlaná á Dadaamiya wá, watse á gáráva an labare á gyaale-aha ta kelaawa, ta tsetehe an kára á fanus-aha-aatare am erva, ta de yainu ge edda á larusa.

<sup>2</sup> Emnde ilyebe am gyaale-aha nanna baaka enkale-aatare d'ekideki. Ilyebe-aatare keni, ta emnde a enkale jipu.

<sup>3</sup> Duwa á gyaale-aha na baaka enkale-aatare na maa, ta haletaa ba kára-aha á fanus-aatare, amá magarka kaashi á kanandzir.

<sup>4</sup> Amá gyaale-aha na tá an enkale na wá, ta haletaa kára á fanus-aha-aatare, ira kwalaba-aha-aatare kanandzir am huđe-aara.

<sup>5</sup> Saaka edda á larusa nanna watsewatse maa, a naba cebaterhe ge háre. Gyaale-aha kelaawa na bademme parupe háre.

<sup>6</sup> «Am huđe á vayiya wá, tá cena ba hula: Náwa samsa edda á larusa! Sawesse ásezenjara, a ba itare.

<sup>7</sup> Daaci gyaale-aha kelaawa na bademme tsaretse am háre na, tá fantau ge mba kára á fanus-aha-aatare.

<sup>8</sup> Daaci: Kawanjeruke kanandzir-aha á kure na, náwa á emtsa kára-aha á njere, a ba emnde na baaka enkale-aatare na, tá elvan ge emnde a enkale.

<sup>9</sup> Ta n̄waterante ge emnde a en̄kale, a ba itare tá elvan ge itare: N̄ere n̄á velka! Watse á hyamiyarka antara kure, dawmbare ádeza emnde a válá kanandzir.

<sup>10</sup> Ba zlarzlálá itare á de shekwa kanandzir na, a semhe ge edda á larusa keni. Gyaale-aha ilyebe na ndza tá am niya-aatare na daremda á dem bere á ga nika antara edda á larusa n̄anna, ta hefetaa bere an tsekweram.

<sup>11</sup> Shekwaashekwa wá, saremsa gyaale-aha umele na keni. Ta ketaa kwara: Edda! Edda, weran̄erantewera bere, a ba itare.

<sup>12</sup> Amá a n̄waterante ge edda á larusa, a ba n̄ane á elvan ge itare: Yá ndaakur ba jirire: Diyanakurka ya dfekidfeki, ma kwa emnde-ara keni.»

<sup>13</sup> Ge zla elva-aara Yaisu, a ba n̄ane á elvan ge itare: «Ma vaatara keni, njawinja á ba am niya á kure, adaba diyakurka kwaskwe n̄anna, diyakurka sarte n̄anna.»

### *Naraje an emnde a slera ta keye*

<sup>14</sup> «Adaliye dem zlan̄na á Dadaamiya wá, á gáráva an zhel umele a daa shula. Lauktu á zlálá, a dfetaa emnde a slera-aara, a tegateraa nalmane-aara.

<sup>15</sup> A vante jekka deremke ilyebe ge slezuññwe-aatare. Ge buwire-aatare, a vante jekka deremke buwa. Ge keyire-aatare, a vante jekka deremke. Ma ware keni a vante ba deydey á ndzedá-aara, daaci ba zlálá-aara ge n̄ane.

<sup>16</sup> Duwa edda una a shaa jekka deremke ilyebe, kerten̄ a de mbedá erva an n̄ane, a shetaa riba jekka deremke ilyebe.

<sup>17</sup> Edda una ta vante jekka deremke buwa na keni, a de magán ba estuwa, n̄ane keni a shetaa riba jekka deremke buwa.

<sup>18</sup> Amá edda una ta vante jekka deremke na wá, n̄ane a de yese evege am haha, a hefem nalmane á zanwe-aara am huđe-aara.

<sup>19</sup> «Shekwaashekwa wá, a naba saahe ge zanwe á emnde a slera n̄anna, a daterte ge zhárá lisaafi á slera na ta maganaa itare.

<sup>20</sup> A sawhe ge edda una ndza ta vante jekka deremke ilyebe na, a ba n̄ane á elvan ge zanwe-aara: Ndza ka vite jekka deremke ilyebe, náwa ya shante riba jekka deremke ilyebe.

<sup>21</sup> Shagera, a ba zanwe-aara á elvan ge n̄ane: Ka sleslera á jirire, dzayye huđe á n̄a. Ka magaa slera an duksa na cekwa dárádza-aara an ervaun̄de á n̄a palle; kazlan̄a na kwakya dárádza-aara keni sey yá fakemfa am erva. Sawa mí higa antara ya.

<sup>22</sup> A semhe ge edda una ndza a vante jekka deremke buwa, a ba n̄ane á elvan ge zanwe-aara: Ndza ka vite jekka deremke buwa, náwa ya shante riba keni jekka deremke buwa.

<sup>23</sup> Shagera, a ba zanwe-aara á elvan ge n̄ane: Ká sleslera á jirire, dzayye ervaun̄de á n̄a. Ka magaa slera an duksa na cekwa dárádza-aara an ervaun̄de á n̄a palle; kazlan̄a na kwakya dárádza-aara keni sey yá fakemfa am erva. Sawa mí higa antara ya.

<sup>24</sup> «Am iga-aatare bademme maa, a semhe ge edda una ndza ta vante jekka deremke palle na keni áseza zanwe. A ba n̄ane á elvan ge n̄ane: Ambarka á n̄a male, diyandiya ganakini ka slemándzawe, ma jan̄ka ba wulfe á duksa á n̄a keni, ká hálá ba duksa; ma teganjka ba duksa á n̄a keni ká jáha ba duksa.

<sup>25</sup> Iya jiija lyawa, ndza ya hefem shun̄gu á n̄a am haha, náwa n̄ane duksa á n̄a.

<sup>26</sup> A nwanante ge zanwe, a ba nane á elvan ge nane: Ka sleslera mándzawe, ka masefe! Diyakdiya ganakini ya slemándzawe, á ba ka? Ma janeka ba wulfe á duksa-aaruwa keni yá hála ba duksa; ma teganka ba duksa-aaruwa keni yá jahá ba duksa, á ba ka?

<sup>27</sup> Máki ba estuwa wá, ma andze ka de puweme nalmáne-aaruwa am ban kwa, daaci ma ya se lyiya nalmáne-aaruwa an yawe.

<sup>28</sup> Daaci lyauvaalya jekke deremke na ázeṅara na, a ba nane á elvan ge emnde na tá tsatse ázeṅara, vawanteva ge edda una an jekka deremke ilyebe, riba keni estuwa na.

<sup>29</sup> Adaba edda una an kwa ázeṅara wá, tá de fanaarefe, tá de saganan-vesage ba kwakya. Amá edda una shanteka deki deki wá, ba una cekwa am erva-aara na keni, tá de lyevaalya am erva-aara.

<sup>30</sup> Ngudi na baaka námpire-aara deki deki nanna maa, naba dawansede á degashe, de eblyawanmeblye á dem tate na ni tabedamme jipu na, á de kyuwa-aara am huđe-aara, á de kerda ba sláre ge zlada.»

### *Shairiya á emnde vaci tsa faya*

<sup>31</sup> «Má watse samsa \*Ura á emnde bademme am sleksire antara malika-aha-aara bademme wá, a se njema am kurshi á sleksire-aara.

<sup>32</sup> Daaci bademme á emnde na tá am huđe á duniya tá de jammeje á katafke-aara, á de láterá nane emnde bademme, ba seke náza suni má á lesa kyáwe-aha, á saterse am dagave á náwe-aha.

<sup>33</sup> Kyawe-aha wá, watse á puwáterá am nadafa-aara, nawe-aha keni am nazlaba-aara.

<sup>34</sup> Náwa elva na á de baterná slekse ge emnde na tá am nadafa-aara: Kure emnde na Edderwa a gakur barka-aara na, sawmbare á sem yaikkire na ta tsatsakuran ge kure kwaye am fakta á duniya.

<sup>35</sup> Adaba am sarte na a wiwa waya, kure kwa vite náza za; a wiwa ndera, kwa vite názu yá shushe; ndza ya wayve, kwa lyivaaha á dem mba á kure.

<sup>36</sup> Am sarte na yá an ukhyiye dey, kwa tsekwime am nangyuwe; ndza ya lapika, zakurivaareze; ndza yá am dangay, kwa duwa á de zharizhara.

<sup>37</sup> Daaci watse tá nwanantenwa emnde a jirire na á ndaater elva na: Ndza na nák vaatara á wáká waya, lauktu na vakte náza za na Yaakadada? Na nák áme á wáká ndera, na vakte yawe?

<sup>38</sup> Na nák vaatara ka wayve am ekse á ntere, na lyiyáká am mba á ntere? Bi ká an ukhyiye dey na tsekwakeme am nangyuwe?

<sup>39</sup> Na nák vaatara lapika, bi ká am dangay, na de zharakzhára?

<sup>40</sup> Watse á nwaterantenwa slekse: Náwá yá sakuransese jirire-aara: Ba kelaa má kwa magateraa una-aha nanna ge egdzar mama-aha-aaruwa na cekwa ndzedá-aatare na wá, kwa magiyán ba ge iya.

<sup>41</sup> «Am iga á una nanna maa, náwa názu watse á baterná slekse ge emnde na tá am názlaba-aara: Jawinaaja ázerwa, kure emnde na nyainyaikurvenyainye Dadaamiya, zlalauzlalawa á dem kára na baaka emtsa-aara deki deki, ta tsatsanna ge Shaitaine antara malika-aha-aara na!

<sup>42</sup> Adaba ndza a wiyaa waye, kure vakuriteka náza za; ndza a wiyaa ndera, vakuriteka yawe;

<sup>43</sup> ndza ya wayve, lyiyakurika á dem mba á kure; ndza yá an ukhyiye dey, vakuriteka nangyuwe; ndza ya lapika, ndza yá am dangay, dakurka á de zharizhára.

<sup>44</sup> Daaci watse tá nwanantenwa itare keni: Ndza na nák vaatara á wáká waya antara ndera, bi ka wayve, bi ká an ukhyiye dey, melanjerakuka na

Yaakadada? Ndza ŋa nak vaatara ká lapika, bi ká am danɔay, danɔerka á de zharakzhára?

<sup>45</sup> Watse á ŋwaterantenwa slekse: Náwa yá sakuransese jirire-aara: Ba kelaá má kwalakurekwala magateraa una-aha ŋanna ge emnde na cekwa ndzedá-aatare na, magakuriyanka ba ge iya.

<sup>46</sup> Daaci itare, watse tá dáterá á de magaterá palasa na á zleka dekiɔeki na. Amá emnde a jirire wá, tá de shá shifa na á zleka na.»

## 26

*Male-aha tá am sawari á eksá Yaisu*  
(Mark. 14:1-2; Luka 22:1-2; Yuh. 11:45-53)

<sup>1</sup> Zlanaazle Yaisu tsáká elva-aara maa, a ba ŋane á elvan ge pukura-aha-aara:

<sup>2</sup> «Diyakurdiya munri á \*Paska wá, a juwaa ba háre buwa. Iya \*Ura á emnde baɔemme wá, watse tá eksiva á ba am munri ŋanna, tá de zleneliyá áte dzanɔala.»

<sup>3</sup> De jarammeje male-aha á \*liman-aha, antara male-aha á Yahudiya-aha á ba am sarte ŋanna am mba Kayafas ŋane male á \*liman-aha baɔemme.

<sup>4</sup> Daaci ta njantaa átirpalle geni tá eksevaksa Yaisu an nasherire, tá keɔánaakeda shifa-aara.

<sup>5</sup> A ba itare am dáɔave-aatare: «Magaumika una ŋanna vaci munri, geni a tsaranteka emnde elva.»

*Mukse na a puwar waye ge Yaisu*  
(Mark. 14:3-9; Yuh. 12:1-8)

<sup>6</sup> Am sarte na Yaisu am Baytaniya na wá, a dem mbá á Simaun umele ndza á waná derve,

<sup>7</sup> a demhe ge mukse umele an kuderá á waye-aara, á se emtake, kwakya gane-aara, a de puwar waye ŋanna ge Yaisu áte ire-aara am sarte na anɔkwa á za ɔafa.

<sup>8</sup> Ba ta naa una ŋanna pukura-aha, a naba jaterhe ge ervaunɔɔe, a ba itare: «Azara shagerire-aara jeba á bádza duksa na?

<sup>9</sup> Ambane ka ma ta velu waye ŋanna, ma tá sha shunɔu kwakya an ŋane, daaci ma tá tegater ge taláɔa-aha!»

<sup>10</sup> De cenánkena Yaisu elva na tá weshaná itare, a ba ŋane á elvan ge itare: «Labára kwá hyaná lyuwa ge mukse na? Názena a maginaa ŋane na shagera jipu.

<sup>11</sup> Adaba uwe, taláɔa-aha wá, ma vaatara keni watse tá anɔkwa átevege kure, amá iya wá, watse ya baaka átevege kure.

<sup>12</sup> ŋane wá, waye na a puwiyaare ŋane na wá, tsatsiyaatsatse ge beliya am évege.

<sup>13</sup> Yá ndaakur ba jirire: Am huɔe á duniya baɔemme, baɔemme á tate na ni tá de bálá labare á higa átekwa na wá, tá de ndaha názena ni a maganaa mukse na keni, tá de viyanaaka.»

*Yahuda anɔkwa á vela Yaisu*  
(Mark. 14:10-11; Luka 22:3-6)

<sup>14</sup> Daaci anɔkwa palle á pukura-aha kelaawa ju buwa, zhera-aara Yahuda Iskariyaud, a tsete duwa-aara á deza male-aha á \*liman-aha,

<sup>15</sup> a ba ŋane á elvan ge itare: «Kwá vite uwe yá magakuránmaga ya pute na ni á demda Yaisu am erva á kure?» Ta naba kezlanáa shunɔu kul keye, cappe ta puwanem am erva.

<sup>16</sup> A fantau á ba am sarte ŋanna Yahuda ge tataya faterem Yaisu am erva ge emnde na á ba an keski.



*Yaisu arge masane á \*Paska antara pukura-aha-aara  
(Mark. 14:12-21; Luka 22:7-14, 21-23; Yuh. 13:21-30)*

<sup>17</sup> Am váha zunḡwire na tá za muḡri na baaka shahi á makalá am huḡe-aara na, duwa á pukura-aha, ta de ndavanu ge Yaisu, a ba itare: «Ká kátá ḡá de tsatsaká ḡafa á \*Paska am tate-ara?»

<sup>18</sup> A ḡute ge Yaisu, a ba ḡane á elvan ge itare: «Dawmbare á dem mba á manya am huḡe á ekse, de bawanánba wá: a ba malum wá, hyephye sarte-aaruwa yá kátá za muḡri á Paska antara pukura-aha-aaruwa am mba á ḡa.»

<sup>19</sup> Pukura-aha ta magaa názena a baternaa Yaisu na, daaci ta tsatsaa muḡri á Paska.

<sup>20</sup> Am iga a maḡaripu maa, Yaisu antara pukura-aha-aara ta nja arge masane.

<sup>21</sup> A ba ḡane á elvan ge itare arge masane ḡanna wa: «Náwa yá ndaakur elva, yá ndaakur ba jirire: Watse á veliya ba palle á kure.»

<sup>22</sup> Daaci, baḡemme á pukura-aha jáviya ba tá kyuwa, ta fantau ge ndavanu an palpale, ma ware keni ba: «Iya ka ndza Yaakadada?»

<sup>23</sup> A ḡute ge Yaisu, a ba ḡane: «Edda una ni erva á ḡere antara ḡane am tása na wá, watse á veliya ba ḡane.

<sup>24</sup> Iya \*Ura á emnde baḡemme wá, baaka pekya-aara sey ba yá emtsa. Ate una ta puwete am wakita á Dadaamiya áte iya wá, ba estuwa. Amá watse zlaḡa jipu ge edda una ni á de veliyá ḡane, ambane ma yareka.»

<sup>25</sup> Yahuda wá, á de velaná ba ḡane keni, a eksetaa elva, a ba ḡane: «Iya ka ndza Yaakadada?» A ḡwanante ge Yaisu: «Ba estuwa.»

*Masane cuḡeḡe  
(Mark. 14:22-26; Luka 22:15-20; 1 Kaur. 11:23-25)*

<sup>26</sup> Am sarte na tá aḡkwa za masane maa, Yaisu a eksetaa ḡafa, a slafanaa we-aara ge Dadaamiya, a kezlanve ḡafa na, daaci a vaterte ge pukura-aha-aara. «Nawmbare zawuze,» a ba ḡane, «una ḡanna vuwa-aaruwa.»

<sup>27</sup> Am iga á una ḡanna maa, a eksante feka, a slafanaa we-aara ge Dadaamiya, a vaterte: «Shawushe», a ba ḡane á elvan ge itare.

<sup>28</sup> «Aḡaba una ḡanna uzhe-aaruwa; a puva aḡaba emnde kwakya, geni emnde kwakya a sharánsha gabera á haypa-aha-aatare, Dadaamiya á ḡḡuḡaterá an una ḡanna namána ge emnde.

<sup>29</sup> Yá ndaakur ba jirire: Am sali kataliya na wá, yá dalika á shá yawe á egdza á náfa antara kure mázla-aara, sey watse mí de shá ba una aḡwaslire am zlanna á Edderwa.»

<sup>30</sup> Am iga á una ḡanna maa, ta eksante lahe á gálá Dadaamiya, ba tse-aatare, ta zlala áḡete ire á Wa Anyaranyara.

*A ba Yaisu watse á yiyaaya Piyer  
(Mark. 14:27-31; Luka 22:31-34; Yuh. 13:36-38)*

<sup>31</sup> Daaci a ba Yaisu á elvan ge pukura-aha-aara: «An vayiya vatena wá, baḡemme á kure na watse kwá yiyaaya. Aḡaba aḡkwa an puwa am wakita á Dadaamiya, a ba ḡane: Watse yá ejja suni, baḡemme á kyawe-aha am walda tá de kya.

<sup>32</sup> Amá má watse tsanetse am faya wá, watse yá daada ba iya zunḡwe arge kure á dem Galili.»

<sup>33</sup> A ḡwanante ge Piyer, a ba ḡane á elvan ge ḡane: «Ma yarakaaya emnde umele keni, iya wá, yá yakaaka ḡekideki.»

<sup>34</sup> A ḡwanante ge Yaisu: «Yá ndak ba jirire, an vayiya ba vatena na, lauktu á kyuwa tsákálá, watse ká bánba ka ser keye geni diyakikire.»

<sup>35</sup> A ba Piyer: «Yá ndaaka una ðekidèki. Ma emtsa antara ka keni ba yá emtsa.» Baðemme á pukura-aha umele keni ta ndahán ba estuwa.

*Yaisu am Gaicaimane*  
(Mark. 14:32-42; Luka 22:39-46)

<sup>36</sup> Daaci daada Yaisu antara pukura-aha-aara á dem tate na tá ðahaná an Gaicaimane na. A ba ñane á elvan ge pukura-aha: «Náwa njawinja áhuna, iya kwaye yá de maga maduwa áhuwa.»

<sup>37</sup> A eksetaa tara Piyer, antara egdzara á Jaibaidaiyus buwa, ta duwa antara ñane. Fantaufe wá, á tápá emtañkire, á tápá ba zlaða na ni an tsaka ire na am erwaunðe-aara.

<sup>38</sup> Daaci a ba ñane á elvan ge itare: «Baaka zlaða na ni yá tapánka na am erwaunðe-aaruwa, yá tápá zlaða á emtsa. Naba njawinja áhuna, pauka háre ðekidèki, sheraumishera ice ba shagera.»

<sup>39</sup> A zlahe yiyiye cekwaanḡuði an itare, a de kezlaa ugje am haha, wafke-aara ba teppe áte haha, a magaa maduwa. A ba ñane am maduwa-aara: «Eddaye-aaruwa, máki á gevge wá, tasle á ña jinaaja zlaða na ba yiyiye an ya. Amá wá, áte una yá wayaná ya ka, áte una ka wayetaa ka.»

<sup>40</sup> Daaci ba tse-aara wá, a seza pukura-aha keye na, amá a se berater tá am háre. A ba ñane á elvan ge Piyer: «Dzegwakuránka njá an ice ba saa palle keni degey?»

<sup>41</sup> Pauka háre! Magaumaga maduwa geni a badakuruka shaitaine. Ire á urimagwe wá, wayaawáya jipu mága fesaarfire, amá baaka payða á vuwa.»

<sup>42</sup> A daliye zlaðe ádaliye ge buwire, a de magaa maduwa-aara, a ba ñane: «Eddaye-aaruwa, mákini á taa jaaveka zlaða ñanna áte ya na, sey ba yá shushe wá, a gevge ba namaari á ña.»

<sup>43</sup> Eptsa-aara zlaðe ádaliye á seza pukura-aha-aara, a se berater tá á ba am háre. Dzegwaránka basha háre ðekidèki.

<sup>44</sup> A daliye zlaðe ádaliye á dem tate á maduwa-aara, a de magaa ba kelaa maduwa-aara ñanna ge keyire.

<sup>45</sup> Zlauzle wá, a eptsehe zlaðe ádaliye á seza pukura-aha-aara na. A ba ñane á elvan ge itare: «Kure kwá pá ba háre á kure, kwá anḡkwa puwansepuwe shifa á kure ka? Ay degiya, iya \*Ura á emnde baðemme, hyephye sarte-aaruwa. Kwaye tá de fime am erwa ge emnde a haypa.

<sup>46</sup> Tsawetse! Kwaye samsa edda una ni a veliyaa ñane na, mí de yainuye.»

*Ta eksevaa estuwa Yaisu*  
(Mark. 14:43-50; Luka 22:47-53; Yuh. 18:3-12)

<sup>47</sup> Ba elva ñanna keni zlaðe zlaanaaka Yaisu wá, tá zhára ba sesse Yahuda palle á pukura-aha kelaawa ju buwa. Emnde kwakya tá sá ðaba Yahuda ñanna, tá an katsákar-aha, antara zade-aha ceppe am erwa. Ta belateraa male-aha á \*liman-aha, antara male-aha á Yahudiya-aha.

<sup>48</sup> Yahuda na a veluwa ñane Yaisu na maa, kwaratersekwara nalaama á ngyekwaterá Yaisu ge dikele á emnde ñanna. A ba ñane á elvan ge itare: «Ba máki kwa niina yá anḡkwa gan use ge ura ni, seke anḡkwa urire á ñere an edda-aara wá, edda una kwá tatayaná kure na ba ñane, naba eksauváksa.»

<sup>49</sup> Ba watsewatse wá, a duhe ge Yahuda ñanna á deza Yaisu: «Use malum», a ba ñane á elvan ge ñane, daaci á gan use an erwaunðe-aara palle agire.

<sup>50</sup> A nwanante ge Yaisu, a ba nane: «A gevge názena ka se maganaa ka na ura-aaruwa.» Daaci yálla á ba emnde na, erva am mbiye ge Yaisu, ta naba eksevaahé.

<sup>51</sup> Ura palle am emnde á Yaisu, a naba tedese masalam-aara nane keni, a wa sleslera á male á \*liman-aha, a icanaa hyema palle.

<sup>52</sup> «Femfa masalám á nja am bere-aara», a ba Yaisu á elvan ge nane. «Adaba emnde na tá teda masalam, itare keni watse tá kedaterá á ba an masalám.

<sup>53</sup> Diyanka ka yá dzegwándzegwa dfaa Edderwa ge se meliyumele, ba seke ndáhámina ká zhára ba malika-aha á wáva á tsaaka an debu kelaawa ju buwa emtu?

<sup>54</sup> Amá watse á geva estara kena názena á ndaaná wakita á Dadaamiya na? Adaba áte una am wakita wá, sey á gevge ba estuwa.»

<sup>55</sup> Daaci a ba Yaisu á elvan ge dikele á emnde nanna bademme: «Kwá se eksiyá an masalam-aha, antara zade-aha am erva na mu, ya neyle emtu? Ábi kelaazare yá njá á ba am mashidi, yá anka kwaraterse elva á Dadaamiya ge emnde, labára eksakurika?

<sup>56</sup> Amá diyaweddiye geni bademme á mága nanna wá, ba geni a gevge elva-aha na ni ta ndahanaa nabi-aha anka am wakita á Dadaamiya na.» Daaci kyaakya zhagade ge pukura-aha bademme, ta naba yánhe.

*Yaisu á katafke á \*kendekyiya yaikke*

*(Mark. 14:53-65; Luka 22:54-55, 63-71; Yuh. 18:13-14, 19-24)*

<sup>57</sup> Daaci emnde na ta eksevaa Yaisu na, ta dan ba suuwe á dem mba á Kayafas nane male á \*liman-aha. Mbate kerten jarammeje malum-aha á \*tawraitá, antara male-aha á ekse katakappe am mba á male nanna.

<sup>58</sup> Piyer wá, a daa dfaa Yaisu á dehuwa, amá wá, gaterápteka dfekefeki. A de demhe á ba á dem riya-aara, a de njehe am dagave á emnde a ufa mashidi, ge zhara lámare nanna, ma watse á zla estara keni.

<sup>59</sup> Male-aha á \*liman-aha antara emnde a \*kendekyiya na bademme farantaufe ge tataya ba ni ma a ndarsende emnde umele elva an dzála áte Yaisu, ma ba fida keni, lauktu ma tá bá nanaa shairiya á emtsa.

<sup>60</sup> Kwakya tsa emnde na ta de datsanve fida ge Yaisu, amá baaka názu ta eksanaa áte nane. Am iga-aara, saremsa emnde umele ta buwa wá,

<sup>61</sup> a ba itare: «Zhel na degi a bantsa nane: Yá dzegwándzegwa mbedánaambeda \*mashidi á Dadaamiya yaikke na. Yá nderaalindere am hare keye, á bina.»

<sup>62</sup> Hattse a tsete ge male á \*liman-aha na, a ba nane á elvan ge Yaisu: «Ká ndaka elva dfekefeki ka? Tá ndáhá uwe nane áte ka emnde na?»

<sup>63</sup> Amá a dfu ba we-aara Yaisu. Daaci a ba male á liman-aha na á elvan ge nane: «Yá ndavaku una an zhera á Dadaamiya edda á shifa, ndindaha ba jirire ba ka una ka \*Almasiihu, ka \*Egdza á Dadaamiya na emtu?»

<sup>64</sup> A nwanante ge Yaisu, «Ba estuwa,» a ba nane á elvan ge nane. «Amá wá, á katafke cekwaan gudí watse kwá niina ya \*Ura á emnde bademme yá njá am nadafa á Saksage na Slekse ba nane na, watse kwá niina zlafe adaliye, má watse yá sawa áte kumba á samaya.»

<sup>65</sup> Daaci male á liman-aha na a naba dzadzanve zane áte vuwa-aara, a ba nane: «A ganve ire-aara kalle an Dadaamiya.» A ba nane á elvan ge emnde: «Baaka wedere á miya an seyde-aha mazla-aara. Ábi cenakurácena an hyema á kure názena a ndahanaa nane.

<sup>66</sup> Emtu estara á bá kure?», a ba nane á elvan ge emnde a \*kendekyiya. A ba emnde: «Una ba haypa-aara, a njeka an shifa dfekefeki.»

<sup>67</sup> Daaci ta naba kyefanem nyaihe am ice, ta vavante defekwa, emnde umele ta vavante babárva,

<sup>68</sup> a ba itare tá elvan ge ñane: «\*Almasiihu, diyeddiye mu a jakaa ware.»

*A ba Piyer ñane diyaaka Yaisu defekiki*

(Mark. 14:66-72; Luka 22:56-62, 63-71; Yuh. 18:15-18, 25-27)

<sup>69</sup> Am sarte ñanna wá, Piyer anƙwa á njá am dagela am huđe á riya á male á \*liman-aha. Daaci a sesehe ge kwatena á male á liman-aha maa, a ba ñane á elvan ge Piyer: «Ka keni ka ura á Yaisu zhel emnde a Galili na.»

<sup>70</sup> Amá eksarka Piyer defekiki, a ba ñane á elvan ge kwatena ñanna á katafke á emnde bademme: «Ma ká ndaha elva á uwe keni diyanka ya defekiki.»

<sup>71</sup> A tsete ge ñane anƙwa á dete wakyyiya, sesse kwatenaha umele daduwa á dezeńára. Ba a puwete ice áte ñane wá, a ba ñane á elvan ge emnde: «Degiya una keni ba ura á Yaisu zhel emnde a Nasarátu na!»

<sup>72</sup> Piyer a naba kwaleve zlađe ádaliye, a ba ñane: «Náwa wadfa-aaruwa máki diyandiya dawale ñanna. Ba jirire diyanka dawale ñanna.»

<sup>73</sup> Cekwaanƙudí am iga á una ñanna maa, ta gapte ge emnde na tá anƙwa áhuwa á deza Piyer, a ba itare tá elvan ge ñane: «Ba jirire ka keni ka ba palle-aatare, adaba á ba áte nara á ña keni diyarakdiya emnde, diyardiya tate na ka sawa átekwa na.»

<sup>74</sup> Daaci Piyer a fantau ge za wadfa-aha, a ba ñane: «Náwa Dadaamiya diyanka dawale ñanna defekiki.» Á ba am sarte ñanna wá, tsáksákwalikwaa, á ba tsákálá.

<sup>75</sup> Daaci Piyer a naba yehete elva na ndza a bannaa Yaisu, a ba ñane: Lauktu á kyuwa tsákálá wá, ká de bánba ka ser keye ge diyakikire na. Mazla-aara ba segáshe-aara, a de kyuwa á ba an yawe á kyuwa.

## 27

*Daránda Yaisu á de katafke á sleksu \*Pilaatu*

(Mark. 15:1; Luka 23:1-2; Yuh. 18:28-32)

<sup>1</sup> Weráwera ekse an enlya werre wá, bademme á male-aha á \*liman-aha, antara male-aha á ekse njarantenja mazle-aara ganakini sey tá ejja shifa á Yaisu.

<sup>2</sup> Ta naba puwete záwa áte ñane, ta danán ge sleksu \*Pilaatu, ñane slekse yaikke am kwara ñanna, a fanaa ngumna a Rauma.

*Emtsa á Yahuda*

(Sler. emnde 1:18-19)

<sup>3</sup> Yahuda na a velanaa ñane Yaisu na nanna ganakini ngudarnƙudá Yaisu am shairiya maa, a deme am tuba, a naba sateraa shunƙu-aatare kul keye na ndza ta vantaá áte Yaisu na ge male-aha á \*liman-aha, antara male-aha á ekse.

<sup>4</sup> A ba ñane á elvan ge itare: «Yá an haypa ba iya, adaba ya velu ura cufedde geni tá ejja shifa-aara.» A ba itare tá elvan ge ñane: «Ázara lámbe á ñere áte una ñanna? Una á shá ba ka.»

<sup>5</sup> Yahuda a naba puwateranve shunƙu am \*mashidi yaikke, a de zlenelaa ire-aara áte záwa.

<sup>6</sup> Daaci male-aha á liman-aha ta halante suley na. Amá á bá itare: «An piya am \*tawraitá ganakini mi puwante suley na ge suley á slera á Dadaamiya, adaba gane á shifa á ura.»

<sup>7</sup> Daaci ta magaa sawari am dagave-aatare, geni tá shekwevshekwe fe á slendera gahe umele an ñane, ge hedfa wayve-aha am huđe-aara, ta naba shekweve.

<sup>8</sup> Adaba una ñanna, sem vatena tá dáhá fe ñanna an fe á uzhe.

<sup>9</sup> Daaci gevge názena ndza a ndahanaa nabi Yairaimiya, a ba ñane: «Halarantehálá suley kul keye na egdzara á \*Iserayiila, ta ges gane-aara átekwa na,

<sup>10</sup> daaci ta shekweve fe á slendera gahe an ñane, ba seke una a binaa Yaakadada na.»

*Sleksu \*Pilaatu anƙwa á ndavanu elva ge Yaisu  
(Mark. 15:2-5; Luka 23:3-5; Yuh. 18:33-38)*

<sup>11</sup> Tsarnaatse Yaisu á katafke á slekse yaikke, a ndavanuwa ñane elva ge Yaisu, a ba ñane á elvan ge ñane: «Ba ka una ka slekse á Yahudiya-aha na emtu?» A ñwanante ge Yaisu, «Ba estuwa», a ba ñane á elvan ge ñane.

<sup>12</sup> Am iga á una ñanna maa, male-aha á \*liman-aha, antara male-aha á larde, tá anƙwa datsanve elva wá, Yaisu a naba dƙu we-aara mazla-aara.

<sup>13</sup> Daaci a ba slekse á elvan ge ñane: «Ká cenánka elva na tá tsakaná áte ka na emtu? Labára ká ndaaka elva?»

<sup>14</sup> Amá Yaisu a dƙu ba we-aara, kamákamá ndahaaka elva. Haa slekse a magaa najipu kwakya.

*Njarantenja am shairiya ge ja shifa á Yaisu  
(Mark. 15:6-15; Luka 23:13-25; Yuh. 18:39-19:16)*

<sup>15</sup> Ba kelaa má samsa munri á \*Paska wá, slekse anƙwa á belaterá dangay palle, edda una tá kataná itare na ge emnde a ekse.

<sup>16</sup> Ay am sarte ñanna maa, ndza anƙwa slemanzawe umele am dangay, zhara-aara Yaisu Barabas.

<sup>17</sup> Daaci á bá slekse á elvan ge jáháva: «Am dágave á tara Yaisu Barabas, antara Yaisu na tá dahaná an \*Almasiihu na mu, kwá kátá yá belakurá ware?»

<sup>18</sup> Diyaadiya tsa ganakini ta danaa Yaisu adaba ba shelha baaka elva umele.

<sup>19</sup> Am sarte na sleksu \*Pilaatu anƙwa á kya shairiya á Yaisu na ma, mukse-aara a naba belanvaa ura, a ba ñane á elvan ge ñane: «Maganánka ba uwe keni ge zhel ñanna dƙidƙeki, baaka haypa-aara. Adaba vatena ya hare á ba am palasa á shene adaba ñane.»

<sup>20</sup> Amá a ba male-aha á \*liman-aha, antara male á ekse tá elvan ge jáháva: «Bawánba kure geni a belarakurnaabelá ba Barabas, a jareja Yaisu.»

<sup>21</sup> Slekse a ndavateruhe zlaƙe adaliye, a ba ñane á elvan ge itare: «Kwá kátá yá belakurá ware am emnde buwa ñanna?» Ta vante jawapa, á ba itare: «Belanernaabelá ba Barabas.»

<sup>22</sup> A ba ñane á elvan ge itare: «Yá maganá uwe ge Yaisu na tá dahaná an Almasiihu na?» Bademme-aatare ta ñwanante, a ba itare tá elvan ge ñane: «Zleñezleñela áte dzanƙala!»

<sup>23</sup> A ba sleksu Pilaatu á elvan ge itare: «A gu uwe estuwa?» Amá itare ta far hula á ba an ndzedá, a ba itare: «Zleñezleñela áte dzanƙala!»

<sup>24</sup> Am nanna sleksu Pilaatu baaka názu á maganá ñane, emnde tá far ba hula maa, a kevaa yawe, a baraa erva-aara á katafke á emnde, a ba ñane á elvan ge itare: «Shifa á zhel na kwá de jáná kure na, haypa-aara á shika dƙidƙeki, á shá ba kure.»



<sup>25</sup> Bademme á jáháva a nwanante, a ba itare tá elvan ge nane: «Una á shakaaka, haypa á ja shifa á zhel na á ba am mbiye á nere antara egdzara á nere.»

<sup>26</sup> Daaci sleksu Pilaatu a naba belateraa Barabas, amá Yaisu wá, ta zu an ja, lauktu ta de zlenjelaná áte dzaŋgala.

*Sawji-aha tá aŋkwa á epsawa Yaisu  
(Mark. 15:16-20; Yuh. 19:2-3)*

<sup>27</sup> Daaci ta naba danhe ge sawji-aha á sleksu \*Pilaatu Yaisu na á dem huđe á há á slekse, ta de jamme ge sawji-aha bademme, tá á ba arge nane.

<sup>28</sup> Ta naba tsekwanse am nanɣyuwe-aara, ta tsekwanme am dira haŋɣe.

<sup>29</sup> Am iga á una nanna maa, ta nderse dake, ta fadanse ire an nane ágire \*ɗaŋkaula, ta fanem zade am naɗafa-aara. Mazla-aara ta gyanu rume ágire tá epsawupsawa, a ba itare tá elvan ge nane: «Aska á ɲa, slekse á Yahudiya-aha!»

<sup>30</sup> Ta naba kyefanem nyaihe am ice. Ta lyevaa zade na am erva-aara, geni tá jáná an nane am ire.

<sup>31</sup> Zlaruzle am maganaa palasa, ta tsekwanse am dira haŋɣe na, ta tsekwanme am náza-aara, lauktu ta dáná á dem tate na ta zlenjelanaa áte dzaŋgala.

*Náwa ta zlenjelanaa estuwa Yaisu áte dzaŋgala  
(Mark. 15:21-32; Luka 23:26-43; Yuh. 19:17-27)*

<sup>32</sup> Am sarte na daransede, ta de jaa ire antara ura Siraine umele zhera-aara Simaun, ta naba hyarhe ganakini á sepá dzaŋgala á Yaisu.

<sup>33</sup> Daraada am tate nanna tá ɗaháná an Gaulgauta na, amaana: Tate á feka á ire maa,

<sup>34</sup> ta de fanu mbazla ge Yaisu áhuwa. Mbazla nanna keni aŋkwa duksa yaiyaihe am huđe-aara. Amá ba a tapanaahe ge Yaisu mbazla na wá, a naba kwalve, shaaka ɗekideki.

<sup>35</sup> Daaci ta naba tsakwanse am kazlaŋa-aara, ta zlenjelehe áte dzaŋgala, ta tegaa kazlaŋa-aara am dagave-aatare. Ge tega kazlaŋa-aara na wá, ta maga njeri am dagave-aatare, ganakini a sesse edda una ni á zaná nane ma uwe keni.

<sup>36</sup> Daaci ta njehe á ba áhuwa nanna ge ufufa-aara.

<sup>37</sup> Ta puwete názena ta bantsa itare tá jáná aɗaba nane na áte naláwa, ta fetehe átire ge nane. Náwa názena ni ta puwetaa itare: «Ba nane una Yaisu, slekse á Yahudiya-aha.»

<sup>38</sup> Tá aŋkwa neyle-aha buwa ta zlenjelater átirpalle antara Yaisu áte dzaŋgala-aha-aatare. Palle ta zlenjelanaa am naɗafa, palle keni am názlaba.

<sup>39</sup> Emnde a degáshe am tate nanna tá geja ba ire, tá ámbera ezzlazole.

<sup>40</sup> A ba itare tá elvan ge nane: «Ábi ka bántsa ka ká naba mbedanaambedá \*mashidi yaikke na, á ba am hare keye ká nderendere umele á ba ka? Labara ká taa ɲezlanaaka ba ka ire á ɲa? Máki ka ba \*Egdza á Dadaamiya, tsekwanaatsekwa kwa ire á ɲa áte dzaŋgala na!»

<sup>41</sup> Male-aha á \*liman-aha, antara malum-aha á \*tawraita, ira male-aha á ekse bademme ta fantau ge epsawa Yaisu. Ta bántsa itare wá:

<sup>42</sup> «Iyau, á dzegwándzegwa ɲezla emnde umele, ire-aara wá, á taa ɲezlanaaka! Ábi nane slekse á Iserayiila-aha? A tsekwanaatsekwa kwa ire-aara áte dzaŋgala na? Máki tsekwaatsekwa wá, bademme mi fetarfe áte nane.

<sup>43</sup> A bántsa nane a fetaare an Dadaamiya, nane \*Egdza á Dadaamiya, mi ezzhara kwa kina má watse á sawa Dadaamiya nanna á se melanumele!»

<sup>44</sup> Neyle-aha buwa na ta zlenjelaterhe áte dzangala antara Yaisu na, itare keni ta zlazlese Yaisu ba seke male-aha nanna.

*Náwa ndza a emtsaa estuwa Yaisu  
(Mark. 15:33-41; Luka 23:44-49; Yuh. 19:28-30)*

<sup>45</sup> Daaci a tsekwa ge tabedammire an vacitire am hude á duniya bademme, dem lásar emnde ta á ba am tabedammire nanna.

<sup>46</sup> Á maga saa keye wá, Yaisu a ketaa kwára á ba an ndzedá: «Aili! Aili! Laima sabaktani?» Amaana wá: «Dadaamiya-aaruwa labára yakiyaaya? Dadaamiya-aaruwa labára yakiyaaya?»

<sup>47</sup> Á bá emnde umele am emnde na tá ankwa á tsaatse áhuwa: «Zhel na degiya á daha nabi \*Ailiya.»

<sup>48</sup> Palle-aatare a tedante zhagade, a de eksetaa sausau, a ngudetaa áte zade, a femhe am mbazla umele dānđāne ba estuwa, daaci a kante, a fante áte we ge Yaisu geni a shushe.

<sup>49</sup> Amá a ba emnde umele-aatare: «Tsawaatse emtsaade, mi ezzhara má watse á semsa Ailiya nanna á se melanumele.»

<sup>50</sup> Yaisu a fu hula zlađe ádalije, mazla-aara a naba zlu ge shifa-aara.

<sup>51</sup> Am sarte nanna maa, ankwa kacekaca á dzegwa am \*mashidi yaikke wá, a naba tamme kalkale, a fantau á sawa átire sem áhá. Haha keni ankwa á gajava, palaha-aha tateptate ba baley baleye.

<sup>52</sup> Irekhya-aha keni kertenj tá an wara, emnde á Dadaamiya na ndza matsarematsa na kwakya tsaretse am faya.

<sup>53</sup> Emnde na ta tsetaa am faya nanna wá, am sarte na tsetaa Yaisu am faya na, daremda á dem berni cudedde, emnde kwakya naráterna.

<sup>54</sup> Sawji-aha na a sáteraa ngumna a Rauma, antara male-aatare bademme tá ankwa ufa Yaisu na. Ba ta naa gejava á haha antara názena magaaavemaga bademme na wá, dámdá lyawa am itare jipu. A ba itare: «Zhel na egdza á Dadaamiya ba jire.»

<sup>55</sup> Tá ankwa nwashá keni kwakya am tate nanna. Ta tsaáhe yiyiye, ta zhara názena ni ankwa á magava na. Nwashá nanna kwaye ta saa á dāba Yaisu á sawa am kwara á Galili ge maganaa slera.

<sup>56</sup> Tá ankwa tara Maari mukse á emnde a Magdala, antara Maari emmetare ge tara Yakuba an Yusufa, ira emmarge egdzara á Jaibaidaiyus, am dagave á nwashá nanna.

*Faremfá Yaisu am irekhya  
(Mark. 15:42-47; Luka 23:50-56; Yuh. 19:38-42)*

<sup>57</sup> Herzhe watse á belya vaciya wá, a naba semhe ge sleberba umele ura á ekse á Arimatiya zhara-aara Yusufa. Nane keni fetarfe áte Yaisu.

<sup>58</sup> A duhe ge Yusufa nanna á deza sleksu \*Pilaatu, a de ndavanu baráma á eksa emtsa á Yaisu. Daaci a ba slekse a varanteva.

<sup>59</sup> Duwa á Yusufa, a eksante emtsa na, a de fademe am kalpakane anwaslire tsefanje, jeba á kalpakane nanna ba lefedde.

<sup>60</sup> Daaci a de zlavanaahe am irekhya-aara halál na a yese am cacera, zlađe ba unñule á zlauzle-aara ge yá irekhya nanna. Daaci a berhanu palame yaikke ge we á irekhya nanna, lauktu a zlala.

<sup>61</sup> Amá tara Maari mukse á emnde a Magdala, antara Maari umele na wá, itare zlalarka, ta naba njehe, wafke-aatare ba ndanje á deza irekhya na.

*Sawji-aha tá anƙwa ufa irekhya á Yaisu*

<sup>62</sup> Makuralla-aara, amaana kwaskwe á puwansepuwe wá, ta naba tsetehe ge male-aha á \*liman-aha antara \*Farisa-aha ta deza sleksu \*Pilaatu.

<sup>63</sup> A ba itare tá elvan ge ɲane: «Ambarka á ɲa, yehanerteyeha názena a ndahanaa slefida ɲanna am sarte na zlaɓe an shifa. A bantsa ɲane, watse á tsetse am faya am hare-aara ge keyire am evege.

<sup>64</sup> Ambane ká ɓela emnde tá de ufa irekhya-aara am hare keye ɲanna. A de tedarseka pukura-aha-aara, daaci watse tá baterán ge emnde geni tsetse am faya. Daaci fidire-aatare ɲanna á de jauje ge una werre.»

<sup>65</sup> A ba edda á hákuma á elvan ge itare: «Kwaye sawji-aha ɲanna, dawmbare, de magaumaága názena kwa dzegwanaa kure ge ufufa-aara.»

<sup>66</sup> Daaci ba zlála-aatare, ta de vanyaa we á irekhya ba shagera, ta fafete damshe á ɲgumna, ta ɓazlaa sawji-aha ge ufufa-aara.

## 28

*Yaisu tsetse am faya*

*(Mark. 16:1-10; Luka 24:1-12; Yuh. 20:1-10)*

<sup>1</sup> Dedde kwaskwe á puwansepuwe, an enɲya werre ge laade wá, daremda tara Maari mukse á emnde a Magdala, antara Maari umele na ta de zhara irekhya na.

<sup>2</sup> Ba watsewatse shekwaraaka ɗekidɗeki wá, baɗemme á haha á gyagya á ba an ndzedá, a tsekwaá ge malika á Yaakadada á sawa am samaya, a berhanvuwe palame na ge we á irekhya maa, a njetaa átekwa.

<sup>3</sup> Malika na á mbá wulwulire ba seke kára á ráde. Nanɲyuwe-aara dzayye telle jauje ba ge sluzhe keni.

<sup>4</sup> Naranna emnde a ufa irekhya na wá, ba gyaagya keni tá gyagyeteka mazla-aara ge lyawa, garevge ba seke ɓaaka shifa am itare ɗekidɗeki.

<sup>5</sup> Amá ɲwasha na wá, a ba malika ɲanna á elvan ge itare: «A wakurka lyawa ɗekidɗeki, aɗaba diyandiya kwa se tataya Yaisu na ta zlenjelaá áte dzanɲala na.

<sup>6</sup> Amá ɲane ɓaaka áhuna mazla-aara, tsetse am faya ba seke una ndza a enndaha na. Sawmbare nawanaana tate na ndza á zlava átekwa.

<sup>7</sup> Kina wá, dawmbare ba watsewatse, de mbedawaterumbede labare ge pukura-aha geni ɓaaka, tsetse. Baira watse á daada ba ɲane zunɲwe arge kure á dem Galili. Kwá de nanaana áhuwa. Una ya bakurnaa ba iya.»

<sup>8</sup> Daaci ba zlála-aatare ge ɲwasha na áte we á irekhya, ta zlálaa á ba á zhagade ge daterá labare na ge pukura-aha á Yaisu. Tá zlála na wá, ervaunɗe-aatare ba seke nama, an wesha an lyawa zlaɓe ádaliye.

<sup>9</sup> Cekwaanɲuɗi wá, Yaisu a se yaiterwa á ba an ye ge ɲwasha na: «A vakurteva Dadaamiya hairire», á bá ɲane á elvan ge itare. Zhagade ge ɲwasha na ádezeɲara, ta kezlan ugje, ta ɲante sera, tá anƙwa á eggala.

<sup>10</sup> A ba Yaisu á elvan ge itare: «A wakurka lyawa ɗekidɗeki. De bawateranba ge egdzar mama-aha-aaruwa, a darɗuwa á dem Galili, tá de niina áhuwa.»

*Názu watse tá ndahaná sawji-aha á ufa irekhya*

<sup>11</sup> Zlaɓe tá á ba átira zlala emtsaáde ɲwasha na wá, sawji-aha á ufa irekhya na keni, emnde umele-aatare zlarzlala á dem huɗe á ekse, ta de mbedateru labare ge male-aha á \*liman-aha.

<sup>12</sup> Male-aha á liman-aha ta magaa sawari am dagave-aatare antara male-aha á ekse maa, ta vaterte shunɲu camballe ge sawji-aha na.

<sup>13</sup> A ba itare ta elvan ge itare: «Bawanba geni tá se tefesaa ba pukura-aha-aara an vayiya am sarte na ñere ñá am hare.

<sup>14</sup> Ma a cenanaa ba edda á hákuma keni, diyañerdiya ñere názena ni ñá de ndahaná ñere, ba názara keni á shakuraaka ðekideki.»

<sup>15</sup> Daaci sawji-aha ta naba lyevaa shunngu na, ta maganaa áte una ni ta ndaaterndaa na. Ta naba hyanme fida ñanna am dagave á Yahudiya-aha baðemme, sem vatena ta tsaa á ba áte una itare.

*Yaisu a marateraa ire-aara ge pukura-aha-aara*

*(Mark. 16:14-18; Luka 24:36-49; Yuh. 20:19-23; Sler. emnde 1:6-8)*

<sup>16</sup> Daaci zlarzlala pukura-aha kelaawa jemtekwe keredde á dem Galili, ta deba áte egdza wa na ndza a baternaa Yaisu na.

<sup>17</sup> Ba ta puwete ice áte ñane, ta kezlan ugje, tá ankwá á eggala. Amá emnde umele-aatare ta magaa shaige ganakini ñane ka.

<sup>18</sup> Samsa Yaisu á sezetare ba herezhzhe, a ba ñane á elvan ge itare: «Baðemme á hákuma ta fimaa á ba am erva-aaruwa, ma am samaya, ma am duniya keni.

<sup>19</sup> Daaci naba dawmbare ma á dem larde-ara keni baðemme, ma emnde-ara keni gawatervege emnde-aaruwa, magawateránmaga baptisma an zhera á Edderwa, an zhera á Egdza-aara, an zhera á Shedefwe Cudedde.

<sup>20</sup> Kwarawatersekwere maga fesarfire am názena ya fakuraara ya baðemme. Diyaweddiye ganakini iya antara kure wá, yá ankwá antara kure ma vaatara keni, dem halawuwa á duniya.»

## Labare á higa na a puwetaa MARKUS

### *Waazu á Yuhanna slemaga baptisma*

*(Mat. 3:1-12; Luka 3:1-18; Yuh. 1:19-28)*

<sup>1</sup> Náwa a fantuwa estuwa labare á higa, elva a Yaisu \*Almasiihu \*Egdza á Dadaamiya:

<sup>2</sup> Anƙwa an puwa am wakita á nabi Aisaya, a ba Dadaamiya:

«Náwa yá bela slebela-aaruwa á katafke á ƙa, á tsatsakaná ƙane baráma.

<sup>3</sup> Zlaƙe ádaliye a ba ƙane: Anƙwa ura á ɓálá elva am kaamba, a ba edda-aara: Tsatsawanaatsatse unƙule ge Yaakadada, tsawanaatse baráma-aara a gevge ba ndeɗɗe.»

<sup>4</sup> Am iga a una ƙanna maa, a naba semhe ge Yuhanna slemaga baptisma á sem kaamba, ba seke una a ndaana nabi ƙanna, a fantau ge balaterá waazu ge emnde, a ba ƙane á elvan ge itare: «Magaumága tuba, lyauvaalya baptisma, á yakuraarye Dadaamiya haypa-aha á kure.»

<sup>5</sup> Daaci sariesse emnde a Urusaliima ba kwakya, antara emnde na tá am kwará á Yahudiya gergere bademme, ta seza Yuhanna ge cena waazu-aara, daaci ta naba sanse haypa-aha-aatare, ƙane keni maa, a magateraa baptisma am guwa á Urdun.

<sup>6</sup> Nanɗyuwe na a tsekwanaa Yuhanna wá, ta hanaa am úgje á ezlegwame, ndza á nguda ba gwagwa. Náza za-aara keni maa, á za ba iwe, antara nama.

<sup>7</sup> A baa ƙane am waazu-aara: «Anƙwa á sawa ura am iga-aaruwa wá, edda-aara ƙanna an hakuma ba ƙane arge iya, ba ge saɗanse kimake am sera keni hyanefka ya ɗekiɗeki.

<sup>8</sup> Iya, yá anƙwa á magakurá baptisma an yawe, amá ƙane wá, á se magakurá baptisma an Sheɗekwe Cuɗeɗɗe.»

### *Baptisma á Yaisu*

*(Mat. 3:13-17; Luka 3:21-22)*

<sup>9</sup> Á ba am hare-aha ƙanna maa, a naba semhe ge Yaisu á sa am Nasarátu am kwará á Galili, Yuhanna a se baranve am guwa á Urdun.

<sup>10</sup> Am sarte na sessa Yaisu am yawe, a naa wertehe ge samaya, anƙwa á tsekwa Sheɗekwe Cuɗeɗɗe á setarge ƙane ba seke takala.

<sup>11</sup> Cekwaangudi wá, tá cená ba ye á sawa am samaya ƙanna, a ba edda-aara á elvan ge ƙane: «Ba ekka una ka Egdza-aaruwa wayanak-wáyá jipu, bademme a higa-aaruwa á ba áte ka.»

### *Shaitaine anƙwa á bada Yaisu*

*(Mat. 4:1-11; Luka 4:1-13)*

<sup>12</sup> Cekwaangudi am iga á una ƙanna wá, Sheɗekwe á Dadaamiya á naba daa Yaisu á dem kaamba.

<sup>13</sup> Hare kul ufade á njá á ba am dagave á dabba-aha am kaamba, a de badanaa Shaitaine am hare kul ufade ƙanna. Ta magannaa ba malika-aha slera am kaamba ƙanna.

### *Pukura-aha á Yaisu zunɗwe ta ufade*

*(Mat. 4:12-22; Luka 4:14-15; 5:1-11)*



<sup>14</sup> Ngudarn̄guda Yuhanna am dangay maa, am iga-aara daduwa Yaisu keni á dem kwára á Galili, a de fantau ge balaterá labáre á higa na ni a belanaa Dadaamiya ge emnde.

<sup>15</sup> A ba n̄ane á elvan ge itare: «Kina wá, hyefhye sarte na ni a tsanaa Dadaamiya, samsa sarte á n̄ja am kwára-aara, magaumága tuba, lyauvalya labáre á higa.»

<sup>16</sup> A gapte ge Yaisu cekwaan̄gudi a d̄ába we á haye á Galili wá, a naa egdzar mama buwa, tara Simaun, tá an egdza emmen̄jara Andere. Tá an̄kwa á puwa narre-aatare á dem yawe ad̄aba itare ta emnde a sluwá kelfe.

<sup>17</sup> Daaci a naba d̄aterd̄áhá Yaisu: «Sawmbare d̄abawid̄ába, yá gakurvege emnde a jaha emnde á sem sera-aaruwa, ba seke una ni má tá jahava kelfe-aha á dem narre na,» a ba n̄ane á elvan ge itare.

<sup>18</sup> Ba watsewatse, ta naba puwanve narre-aatare á ba áhuwa n̄anna, ta d̄ába Yaisu.

<sup>19</sup> Ta gapte ba cekwaan̄gudi á de katafke wá, Yaisu a naa egdzara á Jaibaidaiyus, tara Yakuba tá an egdza emmen̄jara Yuhanna tá am paare á yawe, tá an̄kwa á tsatsa narre-aatare.

<sup>20</sup> Daaci a naba d̄aterd̄áha Yaisu itare keni, ta naba yaa eddetare Jaibaidaiyus am paare áhuwa antara emnde a slera-aara, itare ta d̄ába Yaisu.

*Yaisu n̄gyainsen̄gye shaitaine am ura  
(Luka 4:31-37)*

<sup>21</sup> Am iga á una n̄anna maa, Yaisu antara pukura-aha-aara n̄anna ta zlala á dem huđe á Kafarnahum. Samsa kwaskwe á puwansepuwe a naba dem \*mashidi á Yahudiya-aha, a de kwaraterse elva á Dadaamiya.

<sup>22</sup> Itare ta mága ba najipu-aara, ad̄aba n̄ane kwaraterseka seke náza á malum-aha á \*tawraitá, amá edda á elva n̄anna ba n̄ane, á kwaraterse á ba an hákuma.

<sup>23</sup> Vacite n̄anna maa, ndza an̄kwa ura an shaitaine am vuwa-aara am jáháva-aatare,

<sup>24</sup> a naba fu hula zhel n̄anna, a ba n̄ane a elvan ge Yaisu am hula-aara: «Ekka Yaisu ura Nasarátu na mu, ká kátá uwe ka ázen̄ere? Niya á n̄a ka se ked̄an̄kerked̄a emtu? Iya diyanakdiya ganakini ka Ura Cud̄ed̄de na belakaa Dadaamiya na.»

<sup>25</sup> Yaisu a naba valarhe ge shaitaine n̄anna, a ba n̄ane á elvan ge n̄ane: «Dud̄e we á n̄a, sesse am zhel na ba kina!»

<sup>26</sup> Daaci a naba slakalapte ge shaitaine am zhel na, a fu hula an ndzed̄a-aara bad̄emme, a sesehe am n̄ane.

<sup>27</sup> Bad̄emme á emnde tá maga ba najipu-aara. A ba itare am d̄ágave-aatare: «Ázara kena jeba una? Ba vaci palle keni cen̄an̄eránka jeba á tsaha na, nan̄eránka keni jeba á hákuma na ni, ura ba a ndanse elva ge shaitaine am ura ni, a naba sesehe!»

<sup>28</sup> Kerten̄ hyaranmehye labare á Yaisu am kwára á Galili bad̄emme.

*Yaisu a m̄bateraahe emnde kwakya am lapikere gergere  
(Mat. 8:14-17; Luka 4:38-41)*

<sup>29</sup> Ba segashe-aatare am mashidi wá, Yaisu a d̄aba tara Simaun antara Andere á dem m̄ba-aatare, ta d̄abaterd̄ába tara Yakuba antara Yuhanna keni á dehuwa.

<sup>30</sup> Duwa-aatare maa, ta de beraa shawle á Piyer mukse, á ba á zlava, á wáná zlagzlagi. Daaci ba demda á Yaisu, ta naba m̄bed̄anuhe.

<sup>31</sup> A duhe ge Yaisu á dezeńara, a de ɲanaa ba erva, a tsantehe, a naba mbehe, a fantau ge magateraa kashi.

<sup>32</sup> Eblyabelya vaciya, herzha máŋgaripu maa, emnde ta saa emnde-aha-aatare na lapika vuwa-aatare, antara emnde na tá an shaitaine na baɓemme áseza Yaisu.

<sup>33</sup> Baɓemme á emnde a huɗe á ekse saresse, ta se jamme áte we á wakyiya ɲanna.

<sup>34</sup> Yaisu a mbataraahe emnde kwakya am lapikere-aha-aatare gergere, a ɲgyanse shaitaine-aha kwakya am emnde. Vaterteka baráma ɗekideki ge shaitaine-aha ɲanna ge ndaase elva, aɗaba itare diyardiya Yaisu ma ware ɲane keni.

*Yaisu aɲkwa á ja ɗaba an waazu  
(Luka 4:42-44)*

<sup>35</sup> Mákurálla-aara wá, a sesehe ge Yaisu á ba an ireɲlya, a zlalehe á dem kaamba yiyiye an ekse ba shagera, a de maga maduwa áhuwa.

<sup>36</sup> Daaci ta naba ɗabemhe ge tara Simaun antara emnde na ni tá ba kerɗe, ta de tataya tate na átekwa.

<sup>37</sup> De sharánsha maa, a ba itare tá elvan ge ɲane: «Degiya emnde baɓemme tá aɲkwa á tatayaktátaya jipu!»

<sup>38</sup> Amá a ɲwaterante, a ba ɲane á elvan ge itare: «Mi zlálawa á miya á dem ekse-aha na herherzhe, yá de magaterá waazu ge emnde a ekse-aha ɲanna keni, aɗaba a siyaa ba una ɲanna.»

<sup>39</sup> Mázla-aara ba zlálá-aatare, ta fantau ge já ɗaba am kwára á Galili baɓemme, aɲkwa á magaterá waazu ge Yahudiya-aha am mashidi-aha-aatare, aɲkwa á ɲgya shaitaine-aha keni am vuwa á emnde.

*Yaisu mbanaambe slederve  
(Mat. 8:1-4; Luka 5:12-16)*

<sup>40</sup> A semhe ge slederve umele, a se kezlaa ugje á katafke-aara, a fantau ge ɲala ázeńara, a ba ɲane á elvan ge ɲane: «Má wayak-wayá wá, ká dzegwándzegwa givege ba metedɗe vuwa-aaruwa.»

<sup>41</sup> Daaci Yaisu a naba zanvaarhe, a pelse erva-aara, a de fete áte ɲane, a ba ɲane á elvan ge ɲane: «Wayanwáyá ká mbembe, ba metedɗe vuwa á ɲa.»

<sup>42</sup> Ba seke ndaha á miya na, a naba mbehe ge slederve ɲanna metedɗe.

<sup>43</sup> Amá lauktu á belanaabela wá, a teɗanánte hyema ba shagera,

<sup>44</sup> a ba ɲane á elvan ge ɲane: «Balananseka ma ge ware keni ɗekideki. Názena ká de maganaaka wá, de maranánmára ire á ɲa ge \*liman, vanteva sadake á ɲa ge Dadaamiya áte una a ndanaa Muusa ge seydire á ɲa á katafke á emnde baɓemme ganakini mbakmbe.»

<sup>45</sup> Amá ɲane, ba zlala-aara wá, a de balse labare ɲanna áza emnde baɓemme. Aɗaba una ɲanna Yaisu dzegwánka marse ire-aara áza emnde mazla-aara, sey á njá á ba am kaamba yiyiye an ekse, tá duwa ba emnde ádezeńara, á sawa am tate-aha gergere.

## 2

*Yaisu a mbaa ura an matsa ubiya-aara  
(Mat. 9:1-8; Luka 5:17-26)*

<sup>1</sup> Haraahare cekwaanɗuɗi wá, a naba eptsehe ge Yaisu, á sem huɗe á Kafarnahum, cenarancena emnde ganakini saasa, aɲkwa am mba.

<sup>2</sup> Daaci kwakya nalga a se jamme am huɗe á ha ɲanna, sete we á wakyyi keni baaka sleɗe ɗekiɗeki ge kwakyyire á emnde. Daaci Yaisu a fantau ge ndater elva á Dadaamiya.

<sup>3</sup> Á ba am sarte ɲanna maa, ta semhe ge emnde umele, ta sanaa ura an matsa ubiya-aara, ta saa sepanaa emnde ufaɗe am dagave-aatare.

<sup>4</sup> Amá dzegwaránka dáná á de katafke á Yaisu aɗaba kwakyyire á nalga. Daaci ta naba ɗalte áte ire á dzuguru, ta naba weraa ire á dzuguru ɲanna am ndaɲɲire á tate na ni átekwa Yaisu, ta velem zhel na antara egdera-aara baɗemme.

<sup>5</sup> Náanna Yaisu fetarfire á emnde ɲanna maa, a ba ɲane á elvan ge edda una lapika na: «An bárá haypa-aha á ɲa baɗemme egdza-aaruwa.»

<sup>6</sup> Áy, tá aɲkwa malum-aha á \*tawraita umele á njanja am tate ɲanna. Malum-aha ɲanna ta fantau ge dzamanaa am erwaunɗe-aatare, a ba itare:

<sup>7</sup> «Kwaye zhel na aɲkwa á lyiya sleɗe á Dadaamiya. Ware edda una á dzegwándzegwa yanár haypa ge ura máki Dadaamiya ka palle?»

<sup>8</sup> Kerteɲ a naba diyeddiya Yaisu názena tá aɲkwa á dzamaná itare, a ba ɲane á elvan ge itare: «Labára kwa dzamete una am erwaunɗe á kure?»

<sup>9</sup> Ázara una tsaftsafe jauje ge banán ge edda una lapika vuwa-aara: An bárá haypa-aha á ɲa, bi baná: Tsettse, eksanteksa egdera á ɲa, ezzlala an sera á ɲa?

<sup>10</sup> Iya wá, yá kátá kwá diyeddiye geni iya \*Ura á emnde baɗemme yá an hákuma ge yateraare haypa ge emnde am duniya na.» Daaci a ba ɲane á elvan ge edda una an matsa ubiya-aara na:

<sup>11</sup> «Ya ndaa ba ekka, tsettse, eksanteksa egdera á ɲa, ezzlala á da.»

<sup>12</sup> Kerteɲ tsettse zhele na á katafke-aatare baɗemme, a eksante egdera-aara, a naba zlalá. Baɗemmire-aatare tá maga ba najipu-aara, a ba itare: «Ba ser palle keni ndza naɲeránka jeba á una ɗekiɗeki.» Daaci ta fantau ge gala Dadaamiya.

*Náwa ndza a ɗantaa estuwa Yaisu Laiwi  
(Mat. 9:9-13; Luka 5:27-32)*

<sup>13</sup> Yaisu a naba eptsa áɗaliye áɗete we á haye á Galili. Kwakya nalga ta duhe ádezeɲara, daaci a fantau ge ndater elva á Dadaamiya.

<sup>14</sup> Am iga á tsetse-aara áhuwa, a naa egdza á Halfa á njá am bere á hadáma, zhara-aara Laiwi, a ba ɲane á elvan ge ɲane: «Tsettse, sawa, ɗabiɗába.» A naba tsa Laiwi, a ɗába Yaisu.

<sup>15</sup> Am iga-aara maa, tara Yaisu tá aɲkwa za ɗafa antara pukura-aha-aara am mba á Laiwi ɲanna, ta naba záná átirpalle antara \*emnde a jaha hadáma ira emnde a haypa umele, aɗaba kwakya jeba á emnde ɲanna ta daa ɗaba Yaisu.

<sup>16</sup> Tá aɲkwa \*Farisa-aha umele, ta malum-aha á \*tawraita, ta naa Yaisu aɲkwa za ɗafa antara emnde a jaha hadáma ira emnde a maga haypa gergere. A ba itare tá elvan ge pukura-aha-aara: «Labára á za ɗafa antara jeba á emnde ɲanna?»

<sup>17</sup> De cenatercena Yaisu, a ba ɲane á elvan ge itare: «Emnde na lapiya vuwa-aatare wá, baaka wedere-aatare áza dauktar, sey ba emnde na lapika vuwa-aatare una tá deza dauktar. Daaci ba duksa palle ge iya keni. Sanka ya á se tataya emnde na tá am jirire, ya se tataya ba emnde a haypa.»

*Ndává áza Yaisu arge tsufa ndera  
(Mat. 9:14-17; Luka 5:33-39)*

<sup>18</sup> Vacite umele maa, pukura-aha á Yuhanna antara \*Farisa-aha tá aɲkwa tsufá ndera, amá pukura-aha á Yaisu tsufarka. Daaci ta naba duhe ge

emnde umele, ta ndavanu ge Yaisu, a ba itare tá elvan ge ñane: «Labára pukura-aha á ña tá ekseka ndera?»

<sup>19</sup> Daaci a ñwaterante ge Yaisu, a ba ñane á elvan ge itare: «Emnde na tá ðahaterá á sem larusa keni, kwa kurken tá dzegwándzegwa tsufa ndera emtu, am sarte na tá áza zhele á larusa? Am sarte na ni anjwa zhele á larusa am dagave-aatare wá, tá dzegwánka tsufa ndera ðekideki.

<sup>20</sup> Amá anjwa á sawa sarte umele wá, watse tá pakyava antara zhele á larusa. Am sarte ñanna wá, itare keni, watse tá tsufá ndera.

<sup>21</sup> «Baaka ura a venya emgyegwe a nanjyuwe an baukta áñwaslire, adaba máki á venyaná an una áñwaslire, una áñwaslire na á teða emgyegwe a nanjyuwe na, daaci á farfe te-aara.

<sup>22</sup> «Zlafe ádalije, tá puweka mbazla áñwaslire á dem emgyegwe a \*kanyakanya-aha. Adaba máki tsetse mbazla, á tatanvetate kanyakanya-aha na. Daaci á puwa mbazla á dem haha, kanyakanya keni badzafbadze. Daaci máki mbazla áñwaslire wá, sey tá puwaná á dem kanyakanya-aha na áñwaslire.»

### *Ba Yaisu una edda á vaci puwansepuwe*

*(Mat. 12:1-8; Luka 6:1-5)*

<sup>23</sup> Vacite umele an kwaskwe á puwansepuwe, a degashe Yaisu antara pukura-aha-aara praatte am dagave á fe-aha á hiya maa, pukura-aha-aara ta naba fantau ge kázla ire á hiya na.

<sup>24</sup> A ba \*Farisa-aha tá elvan ge Yaisu: «Labára pukura-aha á ña tá maga duksa na an piya vaci puwansepuwe?»

<sup>25</sup> A naba ñwaterantehe ge Yaisu, a ba ñane á elvan ge itare: «Ekkure ndaakurseka názu ndza a maganaa \*Dawuda am sarte na irice-aara antara emnde-aara bademme ñateraana waya, tá an wedere á náza za ba jipu na emtu?»

<sup>26</sup> Duwa-aatare á dem mashidi wá, Dawuda ñanna a naba eksante tapiske na ta fan ge slera á Dadaamiya na, ta naba zuhe antara emnde-aara. Amá shairiya á Dadaamiya wá, a vaterte barama ba ge \*liman-aha palle za tapiske ñanna. A mágava una ñanna am zamane á Abiyatar ñane male á liman-aha.»

<sup>27</sup> A ba Yaisu á elvan ge itare zlafe ádalije: «Á maganá ba kwaskwe á puwansepuwe nampire ge urimagwe. Urimagweka una á maganá nampire ge kwaskwe á puwansepuwe.

<sup>28</sup> Daaci ba \*Ura á emnde bademme una edda á vaci puwansepuwe.»

## 3

### *Zhele an emtsa erva-aara*

*(Mat. 12:9-14; Luka 6:6-11)*

<sup>1</sup> Vacite umele maa, Yaisu a daliye zlafe ádalije á dem mashidi, a de bera ura an emtsa erva-aara vacite ñanna.

<sup>2</sup> Am mashidi ñanna maa, tá anjwa emnde na tá tsagwafá ba Yaisu, ta fantau ge zhárá Yaisu an enjale-aatare bademme, má watse á mbanaambe ura an kwaskwe á puwansepuwe, lauktu ma tá puwar elva adaba una ñanna.

<sup>3</sup> Amá Yaisu a naba banán ge zhele na an emtsa erva-aara na: «Naba tsettse, tsaatse á katafke á emnde bademme.»

<sup>4</sup> Daaci a naba ndavateru ge emnde bademme, a ba ñane á elvan ge itare: «A vamite baráma á mága uwe \*tawraitá an kwaskwe á puwansepuwe?»

Mága maggwire emtu, mandzawire he? Lya ura emtu, keða ura he?» Ta naba heðu we-aatare njwarka.

<sup>5</sup> Jaaja ervaunðe á Yaisu, a zharateraahe, degdegire á ire á emnde nanna wantewa jipu. Daaci a ba nane á elvan ge zhele na: «Pelansepele erva á na.» A naba pelanse, erva-aara gevge ba lanje ba seke erva-aara werre.

<sup>6</sup> Mazla-aara ba zlalá á degashe ge \*Farisa-aha, ta de magaa sawari-aatare antara emnde á \*Hirudus, geni tá maganá estara, lauktu tá keðanaakeda shifa á Yaisu.

### *Nalga na áseza Yaisu áte we á haye*

<sup>7</sup> Daaci ba zlalá ge Yaisu antara pukura-aha-aara á dete we á haye á Galili. Kwakya nalga na ta dabanaa ádehuwa. Emnde nanna ta segashe am kwara á Galili, emnde umele ta sawa á sa am huðe á Urusaliima,

<sup>8</sup> antara am kwara á Yahudiya bademme, antara á sa am kwara á Idumaya, antara á sa á katafke á guwa á Urdun, ira á sa am kwara á Tirus antara Sidaun. Emnde nanna bademme ta se á ba áza Yaisu adaba cenarácena labare-aara.

<sup>9</sup> Daaci a ba Yaisu á elvan ge pukura-aha-aara, tatayauwivaatataya egdza paare á yawe, geni a becariteka emnde.

<sup>10</sup> Adaba nane slemba emnde, daaci emnde na lapika vuwa-aatare na kwakya ta berdavuwa ásezenara, geni tá fetefa erva-aatare áte nane.

<sup>11</sup> Emnde na tá an shaitaine, ba ta puwete ice-aatare áte nane maa, reppe ta naba mbeða am sera-aara, ta ámbera hula, a ba itare am hula-aatare: «Ba ekka una ka \*Egdza á Dadaamiya.»

<sup>12</sup> Amá a naba valaterarhe ge Yaisu á ba an ndzedá geni a ndaharka elva áte nane ðekideki, ma ware nane keni.

### *Yaisu anjwa á dzera pukura-aha-aara kelaawa ju buwa (Mat. 10:1-4; Luka 6:12-16)*

<sup>13</sup> Am iga á una nanna maa, Yaisu a dætaa emnde na a wayateraa nane, ta dála emnde nanna antara nane áte egdza wa.

<sup>14</sup> Ate wa nanna maa, a de dzerese emnde kelaawa ju buwa am itare, a dæateraa an emnde a bela. A dzeraterse ganakini tá nja antara nane ba kelaazare, á belaterá á de balaterá labare á higa ge emnde.

<sup>15</sup> Daaci a vaterte hákuma á ngya jini-aha am ura.

<sup>16</sup> Náwa zhera-aha á emnde a bela nanna: Simaun nane una Yaisu a fante zhera á Piyer,

<sup>17</sup> tara Yakuba tá an egdza emmejara Yuhanna itare ta egdzara á Jaibaidaiyus, Yaisu a faterte zhera á Bauwanairgais, amaana: hula á samaya, adaba itare ta emnde a ica ervaunðe watsewatse;

<sup>18</sup> Andere, Filip, Bartaulauma, Mata, Taumas, Yakuba á Halfa, Tadawus, Simaun na wayaaka tá kwaráterá emnde umele na,

<sup>19</sup> ira Yahuda Iskariyaut edda una a velu Yaisu áza kelaade-aha-aara na.

### *Emnde á Yaisu ta kurken an shaitaine Yaisu*

<sup>20</sup> Saasa Yaisu maa, se jarammejahe emnde zlaðe adaliye, ba sarte á zu duksa keni sharánka tara Yaisu an pukura-aha-aara.

<sup>21</sup> Am sarte na cenarácena emnde a há-aatare, a ba itare: «Una wá, hairireka mazla-aara.» Daaci ta naba duhe geni tá tedesetede am dagave-aatare.

### *Tara Yaisu tá taa njeka antara Shaitaine (Mat. 12:22-32; Luka 11:14-23; 12:10)*



<sup>22</sup> Tá ankwá malum-aha á \*tawraitá am emnde nanna ta sawa á sa am huđe á Urusaliima, ta bantsa itare: «Ankwá \*Bailjaibul slekse á shaitaine-aha am nane.» Emnde umele keni ta ndahán ba estuwa, a ba itare: «A vanta ba slekse á shaitaine-aha nanna hákuma ge ngyesaa shaitaine am ura na.»

<sup>23</sup> Daaci Yaisu a daterte bademme á dezeńara, a vaterte elva an naraje, a ba nane á elvan ge itare: «Á sáwá estara ni Shaitaine á báká ire-aara na?»

<sup>24</sup> Am kwára á slekse palle, máki emnde tegarsetege gergere buwa wá, á zlaleka hákuma mazla-aara.

<sup>25</sup> Zlađe adaliye, am huđe á há palle, máki tegarsetege emnde gergere buwa, huđe á há nanna á zlaleka mazla-aara.

<sup>26</sup> Ba duksa palle ge Shaitaine keni. Má gevge ni Shaitaine a teganse ire-aara buwa am kwára-aara wá, hákuma-aara á duka á de katafke, ma vaatara keni á zle.»

<sup>27</sup> Yaisu ankwá á sla Shaitaine an slendzedá, a ba nane á elvan ge itare: «Baaka ura á dzegwándzegwa zá há á slendzedá, máki eksevaaka emtsaade slendzedá a puwanse erva ákataliya, lauktu nane á zá há-aara bademme.

<sup>28</sup> «Diyaweddiye una ba shagera: Bademme á haypa-aha na tá maganá emnde, antara elva a mándzawe na tá valyaná itare áte Dadaamiya na, á yateraareya Dadaamiya bademme.

<sup>29</sup> Amá edda una ni a ndaase elva a mándzawe áte Shedekwe Cufedde wá, baaka yanarye ge nane dekideki. Adaba haypa-aara nanna náza ba ge dekideki.»

<sup>30</sup> A bateraa una Yaisu na wá, adaba ta bantsa emnde umele-aatare: An shaitaine.

*Tara emmenjara antara egdzar mama-aha-njara ge Yaisu  
(Mat. 12:46-50; Luka 8:19-21)*

<sup>31</sup> Am iga a una nanna maa, ta semhe ge tara emmenjara, antara egdzar mama-aha á njara, ta tsaahé á ba ágashe, ta belaa ura, ta de dante.

<sup>32</sup> Am sarte nanna kwakya emnde ázenjara, amá ta naba ndahanhe, a ba itare: «Tá ankwá á ndaváká tara emmenja, antara egdzar mama-aha-njara ágashe.»

<sup>33</sup> A njwaterante, a ba nane á elvan ge itare: «Ware nane emmerwa ge iya? Emnde-ara itare egdzar mama-aha-aaruwa ge iya?»

<sup>34</sup> Daaci a zharaa emnde na tá ázenjara, a ba nane á elvan ge emnde bademme: «Náwa tara emmerwa antara egdzar mama-aha-aaruwa tá áhuna.

<sup>35</sup> Má ware una á maga názu á kataná Dadaamiya, egdza emmerwa ba nane, emmerwa ba nane.»

## 4

*Naraje an slepuwa wulfe  
(Mat. 13:1-9; Luka 8:4-8)*

<sup>1</sup> Yaisu a daliye zlađe á de kwaraterse elva á Dadaamiya ge emnde áte we á haye á Galili. Kwakya nalga á emnde a jemaa á katafke-aara. Adaba una nanna, a njema am paare, nane áte ire á haye; emnde wá, bademme tá á ba am haha áte we á haye nanna.

<sup>2</sup> A kwaraterse duksa kwakya an naraje-aha, a ba nane á elvan ge itare:

<sup>3</sup> «Cenawancena, náwa yá bakurá elva: Sesse zhele umele ge de puwa nalkame am fe-aara.

<sup>4</sup> Am sarte na anƙwa á puwa nalkame ɲanna, wulfe-aha umele a de valyaa áte unɲule, ta se tsakantehe ge yiye-aha.

<sup>5</sup> Wulfe-aha umele, a de valyaa áte cacera, cekwa haha, a naba sese á ba áte watsewatsire adaba cekwa haha.

<sup>6</sup> Amá de sesse vaciya an kára-aara wá, deraadera adaba baaka slalwe ngelama.

<sup>7</sup> Wulfe-aha umele zlaɓe adaliye, a valyemaa am dake, a waltaa am dake, a becante ge dake, magaaka ire.

<sup>8</sup> Amá wulfe-aha umele wá, a puwaa á ba am haha shagera, a sesehe ba shagera, a waltaa an unɲule-aara, a magaa ire. Ekte-aha umele, ta yayaa egdzara kul keye kul keye, ekte-aha umele ta yayaa kul unƙwahe kul unƙwahe, ekte-aha umele zlaɓe adaliye ta yayaa deremke deremke.»

<sup>9</sup> Daaci a ba ɲane á elvan ge itare: «Edda una máki anƙwa hyema-aara, a cenevaacena!»

### *Labára naraje-aha?*

*(Mat. 13:10-17; Luka 8:9-10)*

<sup>10</sup> Am sarte na baaka dikele á emnde ázeɲara, ta juwa ba emnde umele-aatare antara pukura-aha kelaawa ju buwa, ta naba ndavanu maana á naraje-aha-aara.

<sup>11</sup> A ɲwaterante, a ba ɲane: «Kure wá, vararakurteva baráma geni kwá diyeddiye nasherire na am \*kwara á Dadaamiya, amá emnde umele wá, ma yá ndaterndáhá keni sey á ba an naraje.

<sup>12</sup> Estuwa, ma tá anƙwa á zharaná á ba an ice-aatare keni, tá diseka dƙideki; ma tá anƙwa á cenaná á ba an hyema-aatare keni, tá ceneseka dƙideki. Adaba itare, baaka wedere-aatare an dƙaba Dadaamiya. Ayka wá, ma andze á naba yateraarye Dadaamiya!»

### *Maana á naraje an slepuwa wulfe*

*(Mat. 13:18-23; Luka 8:11-15)*

<sup>13</sup> Daaci a ba Yaisu á elvan ge itare: «Kina cenakuránka naraje na? Máki cenakuránka una, kwá de cenaná estara kena naraje-aha umele na?

<sup>14</sup> Náwa maana á naraje ɲanna. Slepua wulfe ɲanna wá, á puwa ba elva á Dadaamiya.

<sup>15</sup> Emnde umele, itare ta ba seke unɲule. Tá cenvaacena elva á Dadaamiya, amá kerten á sawa shaitaine, á tsakse elva ɲanna am itare.

<sup>16</sup> Emnde umele itare ta ba seke cacera. Má cenarácena elva á Dadaamiya, kerten tá lyiyaná á ba an higa.

<sup>17</sup> Amá tá vanteka sledɓe ge elva á Dadaamiya ɲanna am itare. Daaci má jerje lámare umele bi zladá adaba elva ɲanna wá, tá yá fetarfire-aatare ba watsewatse.

<sup>18</sup> Emnde umele zlaɓe adaliye, itare ta ba seke dake. Tá lyevalya tsa elva á Dadaamiya,

<sup>19</sup> amá wá, á dem dagave á dzama á ire an kazlaɲa á duniya, antara waya á nalmane kwakya, ira waya á duksa-aha umele gergere am duniya na. Á becanta ba una ɲanna elva á Dadaamiya na am itare, á maɲka nampire dƙideki.

<sup>20</sup> Amá emnde umele wá, itare ta ba seke haha na sledɓe shagera na. Tá cenevaacena elva á Dadaamiya, tá lyiyaná an ervaunɗe-aatare palle, elva ɲanna á maga nampire am itare. Emnde umele anƙwa nampire-aatare cekwa, emnde umele nampire-aatare deydey, amá emnde umele wá, kwakya nampire-aatare.»

*Naraje an kára á fanus*  
(Luka 8:16-18)

<sup>21</sup> Yaisu a farhe zlafe ádaliye ge tsakaterá elva, a ba ñane á elvan ge itare: «Ware edda una máki a mbante kára á fanus, á fáná am ekte á egdera, bi á unjbar tasa? Baaka ðekideki, sey tá zlenelaná á ba áte tate-aara.

<sup>22</sup> Daaci diyaweddiye ganakini baðemme á názena an shebe kina, watse á sesse ásegashe. Baðemme á názena nasherire kina, watse tá diyeddiya emnde baðemme.

<sup>23</sup> Edda una, máki anjwa hyema-aara, a cenevaacena.»

<sup>24</sup> Zlafe ádaliye a ba ñane, á elvan ge itare: «Faufa hyema am názena kwá cenaná kure baðemme na. Adaba baðemme á názena kwá magaterná kure ge emnde na wá, Dadaamiya keni á de magakurná á ba áte una ñanna ge kure keni. Baira á de januje ñane am una kure kwá magaterán ge emnde.

<sup>25</sup> Edda una máki anjwa ázenara na wá, watse tá de fanaarfe zlafe adaliye ge ñane. Amá edda una an erva dey wá, ba egdza una ázenara na keni, tá de lyanvulye.»

*Naraje an wulfe á wálá á ba an ire-aara*

<sup>26</sup> Yaisu a farhe zlafe ádaliye, a ba ñane á elvan ge itare: «Náwa názu á gáráva an názena á magava am \*kwara á Dadaamiya: Duwa á ura umele, a puwaa wulfe am fe-aara.

<sup>27</sup> Daaci ñane á pá ba hare-aara, á kezla ba hare á bere, amá wulfe ámbera á ba segashe, anjwa á wala, baaka názu a disaa ñane am huðe-aara ðekideki.

<sup>28</sup> Baðemme, á maganá ba haha slera. A sanse wulfe, a walante, a magaa ire, haa a nanve.

<sup>29</sup> Má welasewele, edda fe a duwa á ba an náza wa masa-aara, a de icica, adaba hyephye sarte.»

*Naraje an wulfe á pilli*

(Mat. 13:31-32, 34; Luka 13:18-19)

<sup>30</sup> A ba Yaisu á elvan ge itare zlafe ádaliye: «Mí slaterá an uwe \*kwara á Dadaamiya? Mí shateru an naraje-ara ge emnde?

<sup>31</sup> Kwara á Dadaamiya wá, á gáráva an wulfe á pilli. Ñane wá, cekwa ba ñane am wulfe-aha baðemme.

<sup>32</sup> Amá má jaremje am haha, sesse wá, á wala jipu, haa á jauje ba ge duksa-aha umele an wala, á vala erva, yiye-aha tá njá am shedekwe-aara, tá maga bere-aatare keni átekwa.»

<sup>33</sup> Yaisu a kwaraterse estuwa elva ge emnde an naraje-aha áte una tá cenáncena.

<sup>34</sup> Baðemme á elva-aara a kwaraterse á ba an naraje. Amá ge pukura-aha-aara, am sarte na baaka emnde ázetare wá, a palateraa sera-aara baðemme.

*Yaisu a ekhyaa válale*

(Mat. 8:23-27; Luka 8:22-25)

<sup>35</sup> Ba vacite ñanna herzha manjaripu wá, a ba Yaisu á elvan ge pukura-aha-aara: «Ebzaumibze haye ádehuwa-aara.»

<sup>36</sup> Daaci ba tse-aatare, ta yaa emnde am tate ñanna. Pukura-aha ta daa Yaisu am paare na a njemaa ñane am huðe-aara, amá paare-aha umele keni ndza anjwa áhuwa.

<sup>37</sup> Cekwaanjudi wá, a naba tsete ge válale yaikke átire á haye ñanna, a maganaa ñane vádza á haye á ba an ndzedá haa a nante paare an yawe.

<sup>38</sup> Yaisu nane á zlava áte kataliya á paare, a belete ire-aara áte náza bela ire, á pá ba hare-aara. Duwa á pukura-aha-aara, ta tsante am hare na, a ba itare tá elvan ge nane: «Malum, mí keda ni baaka lambe á nja?»

<sup>39</sup> Ba tsetse-aara, a naba valarhe ge válale na, a ba nane á elvan ge haye: «Tsaatse ba tseriyye.» Daaci a naba tsahe ge válale, tseriyye slede ba seke ndza magaaveka duksa.

<sup>40</sup> Am iga á una nanna maa, a ba Yaisu á elvan ge pukura-aha-aara: «Labára kwá maga lyawa estuwa? Baaka fetarfire á kure áte ya emtu?»

<sup>41</sup> Daaci jaterja lyawa jipu, a ba itare am dagave-aatare: «Ware kena nane una ni dete ba effeya antara haye keni tá fansarfe na?»

## 5

### *A mbanaa estuwa Yaisu ura an shaitaine* (Mat. 8:28-34; Luka 8:26-39)

<sup>1</sup> Am sarte na icaransice haye nanna maa, daraada áte iga a guwa nanna. Tate nanna wá, am kwara á Gairasaine-aha.

<sup>2</sup> Ba a tsekwese ge Yaisu am paare wá, a naba sesehe ge zhele umele am dagave á irekhya-aha, a se yainu á ba an ye ge Yaisu.

<sup>3</sup> Zhele nanna wá, an jini am ire, á njá á ba am dagave á irekhya-aha. Baaka ura á dzegwándzegwa tákwasa nane, ma an tsavaytsavaye keni.

<sup>4</sup> Adaba ser kwakya tá puwante sasala áte sera, tá tákwasaná erva an tsavaytsavaye, amá a bataahe bademme. Baaka ura á dzegwándzegwa njá zhel nanna dekideki.

<sup>5</sup> Vayi vacika á já á ba dába am dagave á irekhya-aha antara áte ire á wa-aha, ámbera á hula, á tata vuwa-aara an nákwá.

<sup>6</sup> Am sarte na ni a naa Yaisu, a se yainuye na wá, a sawa á ba an zhagade, kreppe a se mbedehe am sera-aara,

<sup>7</sup> a fu hula an ndzedá-aara bademme, a ba nane am hula-aara á elvan ge Yaisu: «Ekka Yaisu \*Egdza á Dadaamiya Slekse, ázara am dagave á miya? Yá ndaaka adaba Dadaamiya, tasle á nja, fiyemka am zlada!»

<sup>8</sup> A ndanaa adaba uwe una nanna, adaba a ndaase elva-aara Yaisu, a ba nane: «Ekka shaitaine, sesse am zhel na!»

<sup>9</sup> Daaci Yaisu a ndavanu zhara-aara ge zhele nanna, a nwanante, a ba nane: «Zhara-aaruwa wá, Dikele á Emnde, adaba nja vayye.»

<sup>10</sup> Zhele nanna a fantau ge kyuwanfe ge Yaisu geni a yaterya jini-aha nanna, a njarinja á ba am kwara nanna.

<sup>11</sup> Am tate nanna maa, ndza ankwá walda á nabezhe yaikke, tá piyá áte egdza wa maa,

<sup>12</sup> jini-aha nanna ta fantau ge njala Yaisu, a ba itare tá elvan ge nane: «Tasla á nja, vanjerteva ka baráma, njá de njá am nabezhe-aha na.»

<sup>13</sup> Yaisu a naba vaterte baráma nanna. Mazla-aara ta naba sesehe ge jini-aha am zhel na, ta dem nabezhe-aha nanna. Nabezhe-aha nanna á maga debu buwa, amá ta naba zlerdaa zhagade a sate egdza wa nanna, ta puwamme am haye, a ndateruhe ge haye bademme.

<sup>14</sup> Daaci zhagade ge suni-aha á nabezhe nanna, ta dateraa labáre ge emnde a makwata antara emnde a huđe á ekse bademme. Daaci estuwa nalga tá kelá á dem tate nanna ge de zhára názena magaavmáge.

<sup>15</sup> Daraada áza Yaisu, tá zhára ba zhel na ndza an jini-aha am nane na á njá, an enkale-aara ba lanje, a tsekweme am nanjyuwe ba seke emnde. Amá itare, bademme ta fantau ge mága lyawa.

<sup>16</sup> Daaci emnde na ni ta naana á ba an ice-aatare mága ñanna baɗemme na, ta fantau ge tsakaterse sera-aara baɗemme, geni a shanaa estara ire-aara zhel ñanna, antara keɗa á nabezhe-aha na.

<sup>17</sup> Amá itare, ta ñala Yaisu geni a dedde am larde-aatare ba ɗekiɗeki.

<sup>18</sup> Estuwa Yaisu a naba ɗalme am paare á yawe, amá zhele na shansha ire-aara na a ndavanu ge Yaisu, geni ñane keni a eɗɗaba.

<sup>19</sup> Amá eksarka Yaisu. A ba ñane á elvan ge ñane: «Eptseptsá á dem mba á kure, de vaterteva sera á názena a magakanaa Yaakadada na, antara zevarzire-aara na a zakvaara ñane na baɗemme ge emnde á kure.»

<sup>20</sup> Daaci ba zlála á zhele ñanna, a de fantau ge ɓala labare-aara am kwara na tá ɗahaná an Ekse Kelaawa na. Baɗemme á emnde na ta cenaa labare-aara na tá maga najipu.

*Labáre á egdza á Yayrus an mukse na a gejante nanɗyuwe á Yaisu  
(Mat. 9:18-26; Luka 8:40-56)*

<sup>21</sup> A eptsehe zlaɓe áɗaliye ge Yaisu, a icanse haye ásete we-aara, ta se jamme ge nalga a emnde kwakya zlaɓe áɗaliye ázeɗara.

<sup>22</sup> A semhe ge palle á male-aha am mashidi, zhera-aara Yayrus, a se kezlaa ugje am sera á Yaisu,

<sup>23</sup> a fantau ge ñala ázeɗara, a ba ñane á elvan ge ñane: «Tasla á ña, sawa fetefa erva á ña áte egdza-aaruwa mukse lapika, aɗaba herzhe á degashe shifa am ñane. Má dakemda ka wá, á emtseka mazla-aara, sey á mbembe.»

<sup>24</sup> Daaci Yaisu a naba duhe antara ñane, kwakya emnde ta daa á ɗabaná ádehuwa, tá ámbera eɓɓeca áte baráma.

<sup>25</sup> Ndza anɗkwa mukse am dagave á emnde ñanna, yawe kelaawa ju buwa á maga ba palasa á kela á uzhe.

<sup>26</sup> Kwakya zlaɗa na a shanaa mukse ñanna áza dauktar-aha. A keɗaa nalmane-aara baɗemme, aley shanka ngulmire ɗekiɗeki, sey ba á farfe.

<sup>27-28</sup> De cenáncena mukse ñanna labáre á Yaisu maa, a ba ñane: «Una wá, ma ya de fete erva-aaruwa á ba áte nanɗyuwe-aara keni, yá mbembe.» Daaci a naba duhe á ba am dagave á emnde ñanna, a de fete erva-aara áte nanɗyuwe á Yaisu á kya iga.

<sup>29</sup> Kertenj a naba icevhe ge kela á uzhe-aara ñanna, ba ñane keni tapanaatápá am vuwa-aara ganakini mbaambe.

<sup>30</sup> Á ba am sarte ñanna a naba tapanaahe ge Yaisu keni am vuwa-aara ganakini sessa ndzeɗa am ñane, mbanaambe ura. A naba eptsavte am dagave á nalga ñanna, a ba ñane á elvan ge itare: «A gejantaa ware nanɗyuwe-aaruwa?»

<sup>31</sup> Ta ñwanante ge pukura-aha-aara, a ba itare: «Ká zhára dikele á emnde ñanna tá becakɓeca na ni, a gejaktaa ware, a ba ka?»

<sup>32</sup> Amá a zharateraahe ge Yaisu, ge dise edda una a magaa una ñanna.

<sup>33</sup> Daaci gazlaagazla mukse na, aɗaba tapanaatapa názu a gev am vuwa-aara. Daaci a sawhe ámbera á gyagya ba seke maagara, a se kezlaa ugje am sera á Yaisu, a ndanse jirire-aara baɗemme.

<sup>34</sup> A ba Yaisu á elvan ge ñane: «Mbakaambe fetarfire á ña egdza-aaruwa, ezlálá á ba an hairire, de njinja ba layye.»

<sup>35</sup> Yaisu zlaɓe á ba an elva áte we, ta semhe ge emnde á sawa am mba á Yayrus male am mashidi, a ba itare tá elvan ge Yayrus: «Baaka egdzere. Yanya malum mazla-aara.»

<sup>36</sup> Amá Yaisu fanuka hyema ge elva-aatare. A ba ñane á elvan ge Yayrus: «A wanɗa lyawa ɗekiɗeki, naba fetarfe ka.»



<sup>37</sup> Daaci a duhe, amá velaaka baráma d'ekid'eki ganakini tá d'abaná emnde ádehuwa, sey ta d'abanaa ba tara Piyer, Yakuba, ira Yuhanna egdza emmenjara ge Yakuba njanna.

<sup>38</sup> Daraada am mba á Yayrus maa, ta de beraa emnde kwakya tá maga ba emtanjire. Emnde umele tá kyuwa, emnde umele tá tsáka d'ákwa.

<sup>39</sup> A demhe ge Yaisu á dem huđe á há, a ba njane á elvan ge emnde: «Labára kwá maga emtanjire, kwá kyuwa estuwa? Egdzere emtsaaka, á pá ba háre.»

<sup>40</sup> Amá ta naba puwar dzáká, ágire tá epsawepsawa. Daaci Yaisu a naba bakaterse ásegashe bademme, a yaa ba tara emmenjara antara eddenjara ge egdzere, ira pukura-aha-aara keye na, ta demhe antara njane á dem bere na á zlava am huđe-aara egdze na.

<sup>41</sup> Daaci njane a de njanaa ba erva ge egdze na, a ba njane á elvan ge njane: «Talita kuma», amaana: «Egdzere, ya bakanaa ba iya tsettse.»

<sup>42</sup> Ba seke ndáhá á miya na tsetsa egdze na. Egdze njanna, yawe kelaawa ju buwa. Daaci bademme tá maga ba najipu-aara.

<sup>43</sup> Amá Yaisu a fater magiya kwakya, geni a balarka d'ekid'eki. Am iga á una njanna, a ba njane á elvan ge itare: «Vawanteva náza za ge egdzere.»

## 6

### *Emnde a Nasarátu fartareka áte Yaisu*

*(Mat. 13:53-58; Luka 4:16-30)*

<sup>1</sup> Daaci a tsete ge Yaisu áhuwa, a zlala á dem ekse na ni a waletaa am huđe-aara na. Pukura-aha-aara keni ta duwa á ba antara njane.

<sup>2</sup> Samsa kwaskwe á puwansepuwe maa, ta naba dem mashidi, a de kwaraterse elva á Dadaamiya ge emnde. Emnde kwakya jarammeje am mashidi njanna. Am sarte na cenarvaacena elva-aara, ta mága najipu kwakya áte njane, a ba itare: «A de mbese áme elva na estuwa? A shanaa áme njane ilmu na? Ázara kwa ba najipu-aha na á maganá njane na!

<sup>3</sup> Ábi ba njane una slega nafa egdza á Maari na? Egdza emmetare ge tara Yakuba antara Yauseys, Yahuda, ira Simaun. Egdzar mama-aha-njara njwasha keni ta ba am dagave á miya.» A piyatertaa ba una njanna ge fetare áte njane, baaka umele.

<sup>4</sup> Daaci a ba Yaisu á elvan ge itare: «Ma áme keni emnde tá fa zherwe áte nabi á Dadaamiya, amá am huđe á há-aatare, antara vara-aha-aara, ira emnde a ekse-aara bademme wá, tá feka zherwe áte njane.»

<sup>5</sup> Daaci magaaka najipu-aha kwakya am ekse njanna, sey ba una a puwaterar erva ge emnde umele-aatare, a mbateraaha.

<sup>6</sup> Yaisu á maga ba najipu-aara adaba baakire á fetarfire á emnde a ekse njanna.

Am iga á una njanna maa, a naba tse am ekse njanna, a zlálá á dem ekse-aha na herherzhe na, a de kwaraterse elva á Dadaamiya ge emnde a ekse-aha njanna.

### *Yaisu a bela pukura-aha-aara kelaawa ju buwa*

*(Mat. 10:5-15; Luka 9:1-6)*

<sup>7</sup> Vacite umele maa, a jatermaare ge pukura-aha-aara am tate palle, a vaterte hákuma áte shaitaine-aha, lauktu a fantau ge belaterbela bubuwa.

<sup>8</sup> Lauktu a belaterbela wá, a fater bariya, a ba njane á elvan ge itare: «Eksauka ba uwe keni am erva, sey ba zade á kure palle. Magauka kashi á náza za, ma shunngu keni am lyiba.

<sup>9</sup> Fawaumfa kimake am sera, amá dawánka zane bubuwa.»

<sup>10</sup> A ba ñane á elvan ge itare zlaɓe ádaliye: «Máki dakuremda am ekse wá, njawinja á ba am mba na máki lyarakurvaalya am huɗe-aara na, dem sarte á zláá á kure am ekse ñanna.

<sup>11</sup> Má lyiyarakurka emnde, bi cenarka elva á kure wá, dawedde am ekse-aatare, papawaapape berbere na áte sera á kure. Magawateránmaga una ñanna, watse tá disá ba itare antara Dadaamiya.»

<sup>12</sup> Daaci ba zláá ge pukura-aha, tá de belaterá elva á Dadaamiya ge emnde geni a magarmága tuba.

<sup>13</sup> Ta ñgyesaa jini-aha kwakya am emnde; emnde na lapika vuwa-aatare keni, ta gaterve waye an zhera á Dadaamiya, mbarateraambe baɗemme.

*Elva a emtsa á Yuhanna slemaga baptisma  
(Mat. 14:1-12; Luka 9:7-9)*

<sup>14</sup> A cenanaa estuwa sleksu \*Hirudus labare á Yaisu aɗaba baɗemme á emnde tá ndáhá ba ñane. Ta bantsa emnde umele: «A tsetaa ba Yuhanna slemaga baptisma am faya. Aɗaba una ñanna an hákuma á mága najipu-aha gergere.»

<sup>15</sup> Amá a ba emnde umele: «Una Yuhanna ka, nabi \*Ailiya werre.» A ba emnde umele zlaɓe ádaliye: «Una ba nabi umele tsekemme, amá ñane keni ba nabi á Dadaamiya ba seke nabi-aha werre.»

<sup>16</sup> De cenáncena sleksu Hirudus gajawe-aatare maa, a ba ñane: «Una ba Yuhanna slemaga baptisma. Ndza icanaayica ire áte ñane, amá a tsetaa ba ñane ñanna am faya!»

<sup>17</sup> A bateraa una ñanna aɗaba ndza a ndahanaa ba ñane ñanna geni a eksarvaksá Yuhanna. Daaci ta naba eksevaahé, ta puwete zawa áte ñane, ta de ɓelema am dangay. A ñgudanaa aɗaba uwe Hirudus Yuhanna; aɗaba Hirudus ñanna a eksantaave Hirudiya ge egdza emmeɗara Filip.

<sup>18</sup> Amá aɗkwa á ndandaha Yuhanna, geni a eksantaave mukse ge egdza emmeɗara na wá, una ñanna zlayeka ɗekidɗeki.

<sup>19</sup> Aɗaba una ñanna Hirudiya wayaaka zhára Yuhanna an shifa ɗekidɗeki, ɓaaka ba pute-aara ge já shifa-aara.

<sup>20</sup> Aɗaba Hirudus wá, ñane á kuvá Yuhanna jipu, wayaaka á geja shifa-aara, aɗaba diyaadiya ganakini Yuhanna ura á Dadaamiya, ura jirire. Ba kelaa máki Yuhanna aɗkwa á baná elva ge sleksu Hirudus wá, á taa weranteka ba we-aara keni, amá wayaawáyá tsa eccena-aara.

<sup>21</sup> Vacite umele maa, shansha Hirudiya baráma á já Yuhanna. Samsa sarte á ya sleksu Hirudus, a naba gyaá muɗri, daaci a naba ɗante galipa-aha-aara, antara male-aha á sawji-aha ira male-aha umele am kwara á Galili.

<sup>22</sup> Duwa á gyaale á Hirudiya, a de shekelaterante ge male-aha na a ɗahateraa slekse na. Hayaranháyá jipu tara slekse an emnde-aara baɗemme. A naba banánba slekse ge gyaale ñanna, a ba ñane: «Ma ká kátá uwe keni, naba ndaviyundave, yá vakteva.»

<sup>23</sup> A naba zanu waɗa-aara, geni ma a ndavanu uwe keni, sey a vanteva, una ma kyalma á rezege-aara keni, sey á vanteva.

<sup>24</sup> Daaci ba degashe-aara ge gyaale na, a deza emmeɗara, ge ndavanu názena ni á se ndavanu ge slekse na. Amá a ba emmeɗara: «De enndava ka a varakteva ba ire á Yuhanna slemaga baptisma.»

<sup>25</sup> Kerteɗ a semhe áseza slekse, a ba ñane á elvan ge ñane: «Yá kátá ká vite ire á Yuhanna slemaga baptisma am kwatame.»

<sup>26</sup> Una ɲanna namaari-aareka ɗekideki, amá dzegwánka kwalarkwale aɗaba waɗa na a zanuwa ɲane á katafke á emnde-aara na.

<sup>27</sup> Daaci a naba bela sawji á dem dangay, ge de sá ire á Yuhanna na. Ba zlalá á sawji na, á dem dangay na, a de ica ire áte Yuhanna,

<sup>28</sup> a sanán ge gyaale ɲanna am kwatame. Duwa á gyaale ɲanna, a de vante ge emmeɲara.

<sup>29</sup> Daada labare ádeza pukura-aha-aara, ta naba sawhe, ta eksante emtsa-aara, ta de heɗehe.

*Yaisu a zateru duksa ge zála debu ilyebe  
(Mat. 14:13-21; Luka 9:10-17; Yuh. 6:1-14)*

<sup>30</sup> Saraasa emnde a bela á Yaisu, ta se ndahanhe baɗemme á názena ta maganaa itare antara názena ta kwaraterse ge emnde.

<sup>31</sup> Emnde keni ba tá sawa emnde na, tá zlalá emnde na, baaka ica-aatare ɗekideki áza tara Yaisu antara pukura-aha-aara. Ba sarte á za náza za keni ta shanka ɗekideki. Daaci a ba Yaisu á elvan ge itare, «Máki estuwa wá, mi zlalawa á dem tate na ta baaka emnde na, kwá de puwansepuwe cekwaanɗuɗi.»

<sup>32</sup> Daaci ta naba deme am paare, ba zlalá-aatare á dem tate na ta baaka emnde átekwa, ba itare an ire-aatare.

<sup>33</sup> Amá naraterna emnde kwakya am sarte na tá zlalá na, daaci ta naba diyatersediye, ta ɗabateremhe an sera. Emnde umele keni saresse am ekse-aha gergere, ta ɗabateremhe an sera. Baira ta dema ba itare zuɲɲwe arge tara Yaisu an pukura-aha-aara.

<sup>34</sup> De sessa Yaisu am paare maa, á zhárá ba dikele á emnde tá kela ádezeɲara. Á zharaterzhara wá, a naba zatervaarhe, aɗaba ta ba seke kyawe-aha na baaka suni am ekte ge itare na. Daaci a fantau ge kwaraterse duksa kwakya áte Dadaamiya.

<sup>35</sup> Eblyabelya vaci maa, ta duhe ge pukura-aha-aara ádezeɲara, a ba itare tá elvan ge ɲane: «Degey baaka vaciya mazla-aara, tate na keni kaamba.

<sup>36</sup> Ambane puwateraapuwa emnde na, a zlarzlala á dem ekse-aha antara egdzar makwata-aha na herherzhe áhuna, tá de shakwanu náza za ge we-aatare.»

<sup>37</sup> A ɲwaterante ge Yaisu, a ba ɲane: «Vawaterteva ba kure náza za!» A ba pukura-aha tá elvan ge ɲane: «Ká kátá ɲá de shekwatérá náza za jekka deremke wanyara, lauktu á hyater ge emnde na?»

<sup>38</sup> A ndavateru ge Yaisu, a ba ɲane á elvan ge itare: «Kwá an depaiɲ wanyara ázekure? De zharawazhara wára?» Ta de zharanaahe, a ba itare tá elvan ge ɲane: «Depaiɲ á ɲere aɲkwa ilyebe ámasla an kelfe buwa.»

<sup>39</sup> Mazla-aara a ba Yaisu á elvan ge pukura-aha-aara: «Njawateraanja emnde áte masa an slala an slala.»

<sup>40</sup> Daaci ta naba njateraaha emnde deremke deremke, am slala-aha umele kul ilyebe kul ilyebe.

<sup>41</sup> Zlaurle una ɲanna maa, Yaisu a naba halante depaiɲ ilyebe, antara kelfe buwa na, a kante ice á dem samaya, a slafanaa we-aara ge Dadaamiya. Daaci a kwacaa depaiɲ-aha na, a tegateraa ge pukura-aha, geni tá vatertá itare ge emnde. Am iga á una ɲanna a tegateraa kelfe-aha na keni.

<sup>42</sup> Baɗemme á emnde, ma ware keni a zuhe á ba áte huɗe-aara náza zá na, aley jauje zlaɓe áɗaliye.

<sup>43</sup> Pukura-aha ta halante jugena á depaiɲ antara kelfe ɲanna wárá kelaawa ju buwa.

<sup>44</sup> Kezlakula á emnde a zá náza zá ɲanna wá, tá maga zála debu ilyebe.

*Yaisu á zláá an sera áte ire á haye*  
(*Mat. 14:22-33; Yuh. 6:15-21*)

<sup>45</sup> Shekwaraaka d'ekideki am iga á una nanna, a ba Yaisu á elvan ge pukura-aha-aara: «Dawemda am paare, dawedde kure zunḡwe á katafke-aaruwa, ebzaubze guwa á kya erwa. Iya wá, yá puwateraapuwa emtsaade emnde.»

<sup>46</sup> Puwateraapuwa emnde maa, a naba d'alete áte egdza wa, a de maga maduwa.

<sup>47</sup> Zhedaazheda ice, gevge vayi maa, zlarz'áá pukura-aha an paare á dem dagave á haye ba shagera, amá Yaisu wá, á ba áte wa nanna ba nane palle.

<sup>48</sup> Á zh'ará pukura-aha-aara á sawa áte wa nanna wá, tá baka paare an z'ada jipu, á magaterá palasa effeya á eptsaterá á dem iga. An iren'lya wá, a duhe ge Yaisu de shateraasha pukura-aha-aara na áte ire á haye, nane á z'áá á ba an sera-aara áte ire á haye nanna. Amá a de magaa ba seke á k'atá yaterseye.

<sup>49</sup> Ba naranna pukura-aha-aara an'kwa á z'áá an sera-aara áte ire á yawe na wá, ta naba fu hula, ad'aba itare ta kurken shaitaine á yawe.

<sup>50</sup> Itare bademme ba seke á degáshe shifa am itare ge lyawa. Daaci kerten' a ndahater elva Yaisu: «Gazlauka, degiya una ba iya!»

<sup>51</sup> Daaci a naba d'aleme am paare á dezetare wá, tseriyiye a naba tsaahge effeya na. Tá geja ba ire pukura-aha-aara, tá maga najipu.

<sup>52</sup> Ad'aba degdege ire-aatare jipu, cenar'anka itare najipu na a maganaa an depain' na.

*Yaisu a mbaa lapika-aha am Gainaizarait*  
(*Mat. 14:34-36*)

<sup>53</sup> Ba ebzarubze haye wá, tá am haha á Gainaizarait, daaci ta ngudaa paare-aatare áte we á guwa.

<sup>54</sup> Ba segashe-aatare am paare wá, emnde ta naba dise Yaisu.

<sup>55</sup> Daaci ba zhagade-aatare á dem ekse-aha-aatare, ta de sanaa emnde-aha-aatare na ni á waterá vuwa-aatare áte egdera-aha-aatare. Ma a dem tate-ara Yaisu keni, tá maga ba una emnde.

<sup>56</sup> Bademme á tate na ni a de tsekwaá átekwa Yaisu, ma a de tsekwaá am berni, ma áte makwata, ma am egdza ekse bademme, emnde ta sanaa emnde-aha-aatare na ni lapika vuwa-aatare, ta fanaa á katafke-aara am dagave á emnde bademme, ta n'laterun'ale geni tá fetefa erva-aha-aatare á ba áte we á nan'gyuwe-aara keni. Daaci bademme á emnde na ni ta fete erva-aatare áte nane mbarembe.

## 7

*Elva a nade á eggye-aha werre*  
(*Mat. 15:1-9*)

<sup>1</sup> Am iga á una nanna maa, \*Farisa-aha antara malum-aha á \*tawraitamele ta sawa am Urusaliima ta se jamme áza Yaisu.

<sup>2</sup> Amá ta naa pukura-aha umele ta naba zu d'afa an erva a liya, bararaaka emtsaade áte una ta kwaratersaa am nadina-aatare.

<sup>3</sup> Ad'aba Farisa-aha antara Yahudiya-aha-aatare bademme wá, tá zeka d'afa an erva a liya d'ekideki, sey tá bara erva-aatare ba shagera emtsaade. Estuwa tá an'kwa maga duksa á eggye-aha-aatare an en'kale-aatare bademme.

<sup>4</sup> Ma ta saa á ba am kwaskwe keni, tá zeka dafa d'ekid'eki, máki tsakaraaka yawe. Ankwa zlafe kwakya nafe á eggye-aha-aatare na tá fansaare itare, ba seke bara tasa-aha-aatare, antara gahe-aha-aatare, ira kazlaŋa na ta janaa an verzhagane bademme á ba an tsufa ázetare.

<sup>5</sup> Adaba una ŋanna, ta duwa Farisa-aha antara malum-aha á tawraitá á deza Yaisu, ta de ndavanundave, a ba itare: «Labára pukura-aha á ŋa tá fansarka ge názena ta kwaranersaa eggye-aha a ŋere, tá naba zá dafa an erva a liya na?»

<sup>6</sup> A ŋwaterante ge Yaisu, a ba ŋane: «Una wá, ba jire á Aisaya, adaba ndza maganaamaga ŋane nabiyire áte kure kwa emnde na. Ankwa an puwa am wakita á Dadaamiya, a ba ŋane:

Emnde na wá, tá ankwa á galiya á ba áte we, am ervaun'fe-aatare ta yiyiye an ya.

<sup>7</sup> Tá ankwa jáháva deme am sera-aaruwa, amá una ŋanna ba dey. Adaba itare tá ndáhá ba nafe-aha á emndimagwaha, ta ganve ba seke elva-aaruwa.»

<sup>8</sup> Daaci a eksante elva-aara zlafe ádaliye Yaisu, a ba ŋane á elvan ge itare: «Kure kwa yaa shairiya á Dadaamiya, kwá ankwa fansar ge nafe-aha á emndimagwaha.»

<sup>9</sup> A ba ŋane á elvan ge itare zlafe ádaliye: «Diyakurdiya eptsanve iga ge shairiya á Dadaamiya, geni kwá ganvege nafe-aha á emndimagwaha.

<sup>10</sup> Ábi a enndaha Muusa, a ba ŋane: Dematervedeme tara emmeŋa an eddeŋa. Ma ware una a ndaase elva yayiaihe áte eddeŋara bi áte emmeŋara, edda-aara a njeka an shifa d'ekid'eki.

<sup>11</sup> Amá kwa bantsa kure, ma edda-aara á kátá melanu ge eddeŋara bi ge emmeŋara keni, máki ndasendahe edda-aara ganakini ankwa duksa ma andze yá melaku an ŋane, amá ya fan ge slera á Dadaamiya wá,

<sup>12</sup> daaci baaka wedera á edda-aara ge melanu ge eddeŋara bi ge emmeŋara mazla-aara. Estuwa á ba elva á kure.

<sup>13</sup> An una ŋanna wá, kwa ganve elva á Dadaamiya ba seke duksa dey, kwa tsaa áte nafe-aha á eggye-aha á kure. Kwakya jeba á duksa-aha ŋanna kwá maganá kure.»

### *Kazlaŋa na á badza ura an Dadaamiya*

*(Mat. 15:10-20)*

<sup>14</sup> Am iga á una ŋanna maa, a ba Yaisu á elvan ge emnde bademme: «Sawmbare, cenauvaacena elva na ba shagera.

<sup>15</sup> Nazu á badza ura an Dadaamiya wá, názena á faná edda-aara á demmbuweka, á badzená názena á segashe am mbuwe á edda-aara.» ((

<sup>16</sup> Edda una máki ankwa hyema-aara, a cenevaacena.))

<sup>17</sup> Am sarte na yaterya Yaisu emnde, a de deme am bere maa, pukura-aha ta de ndavanu maana á naraje ŋanna.

<sup>18</sup> A ŋwaterante, a ba ŋane: «Iyau, kure keni kwaasau zlafe shakuranka enkale-aara, cenakuranka? Diyakurka ganakini baaka názu á duwa ádagashe á dem mbuwe á urimagwe, á badzaterá an Dadaamiya emtu?

<sup>19</sup> Adaba una ŋanna á duka á dem ervaun'fe, amá á dem hu'fe, á segashe zlafe ádaliye am edda-aara.» An elva-aara ŋanna wá, ganvege náza za bademme ba halal.

<sup>20</sup> A ba ŋane á elvan ge itare zlafe ádaliye: «Ba názena ni á segashe am mbuwe á edda-aara una á badzaterá an Dadaamiya.

<sup>21</sup> Adaba kwakya shagerkire á hala na á segashe am ervaun'fe á ura. Á berhaná ba una ŋanna á de maga dakarire, neylire, á de já shifa,



<sup>22</sup> á de maga gwardzire, á dem waya duksa á ura, á de maga mandzawire, á de zlerma ura, á de maga ngudiyire, á dem shelha, á dem zá vuwa á ura, á dem gálá ire, ira á dem wucire.

<sup>23</sup> Daaci bademme á duksa-aha ñanna, á segashe á ba am ervaunđe á urimagwe, á badzaterá ba una ñanna an Dadaamiya-aara.»

*Mukse á emnde a jeba umele fetarfe áte Yaisu  
(Mat. 15:21-28)*

<sup>24</sup> Tsetsa Yaisu áhuwa, kwaye a zlálá á dem ekse-aha na herherzhe an berni á Tirus. A de demhe am bere, wayaaka tá diyeddiya emnde, amá dzegwanka shebe.

<sup>25</sup> Anƙwa mukse umele an shaitaine egdza-aara, egdzere mukse maa, ba a cenaa labare á Yaisu wá, a naba duhe ádezeñara, a de kezlanaa ugje,

<sup>26</sup> a fantau ge ñala Yaisu geni a ñgyainsenɣye shaitaine ñanna am egdza-aara. Mukse ñanna wá, mukse á Yahudiya ka, ñane mukse á Yunaniñkau am emnde á Siraufiniki.

<sup>27</sup> Daaci a ba Yaisu á elvan ge ñane: «Yaterya a zaruze emtsaade egdzara dafa. Haleta dafa á egdzara, puwateranve ge kere-aha wá, una zlayeka dekideki.»

<sup>28</sup> «Ba estuwa,» a ba mukse na, «amá ma kere-aha keni tá wazaná ba itare kwaca á dafa na á valya á sawa am erva á egdzara.»

<sup>29</sup> A lyevaa ge Yaisu, a ba ñane á elvan ge ñane: «Ŋwakenwa shagera. Naba zlálá á da, baaka shaitaine am egdza á ña mazla-aara.»

<sup>30</sup> Daaci a naba da-aara mukse na, a de bera egdza-aara, á zlava áte egdera ba lapilayye, baaka shaitaine am ñane.

*Yaisu a mbanaahe makwaya na elva keni a ndaaseka an unñule-aara*

<sup>31</sup> Am iga á una ñanna maa, a tsete ge Yaisu am Tirus, a zlálá á dem Sidaun. Tsante am Sidaun maa, a segashe am kwara á tate na tá dahaná an Ekse Kelaawa na praatte, ge sete we á haye á Galili.

<sup>32</sup> Ahuwa maa, ta sanaa makwaya umele zhele, á taa ndaaseka elva an unñule-aara keni. Daaci ta ñala Yaisu ganakini á puwar erva-aara, á mbanaambe.

<sup>33</sup> Daaci Yaisu a sanse zhel ñanna am dagave á emnde, a de tsanaahe ba ñane palle, a shabanem gulanda-aha-aara am hyema, a kyefaa nyaihe-aara, a gante áte nara,

<sup>34</sup> a kante ice á dem zhegela, a puwese shifa á ba an ndzedá; «Aifata,» a ba ñane á elvan ge zhel ñanna. Amaana: A wartewára hyema-aha á ña.

<sup>35</sup> Ba seke ndaha á miya na kerten wartewára hyema-aha-aara, a werte ge we-aara keni, a fantau ge ndaha elva á ba an unñule-aara.

<sup>36</sup> Amá Yaisu a fater magiya kwakya geni a ndaaranka ma ge ware keni. Amá ba seke una ñane a fater magiya kwakya na wá, itare keni ta de balse labare ñanna kwakya áza emnde.

<sup>37</sup> Daaci bademme á emnde tá maga ba dikere-aara, a ba itare am dagave-aatare: «Bademme á názena a maganaa ñane na ba shagera! Antara ba makwaya-aha keni á vaterte hyema degey! Wuce-aha keni á weraterta we, tá ndaha elva ba lanje!»

## 8

*Yaisu a zateru duksa ge emnde debu ufade  
(Mat. 15:32-39)*

<sup>1</sup> Am sarte ɲanna maa, ta semhe ge emnde umele zlaɓe ádaliye ta kwakya jipu, ta se jamme áza Yaisu. Am ɓaaka náza za áza emnde ɲanna, Yaisu a ɗetaa pukura-aha-aara, a ba ɲane á elvan ge itare:

<sup>2</sup> «Emnde na tá wiwa am ice ge iya, aɗaba hare keye vatena tá á ba ázerwa, názu á ezza keni ɓaaka.

<sup>3</sup> Máki puwanateraapuwa ba estuwa, ɓaaka názu ta zuwaa itare wá, á de cebateraaceɓa waya áte baráma. Aɗaba emnde umele-aatare, ta sawa á sa am tatu yiyye.»

<sup>4</sup> Ta ɲwanante ge pukura-aha, a ba itare: «Á de shaná áme kena ura náza zá am kaamba na ni á hyater ge emnde na?»

<sup>5</sup> «Aɲkwa wanyara depaiɲ ázekure?» a ba Yaisu á elvan ge itare. Ta ɲwanante, a ba itare: «Íá an depaiɲ vuye.»

<sup>6</sup> Daaci: «Njawinja am haha,» a ba Yaisu á elvan ge emnde baɗemme. ɲane a halante depaiɲ-aha vuye na, a slafanaa we-aara ge Dadaamiya, a kwacaáhe, daaci a naba tegateraa ge pukura-aha-aara, geni tá vatertá itare ge emnde. Daaci pukura-aha ta tegateraa depaiɲ na ge emnde.

<sup>7</sup> Ndza aɲkwa egdza kelfe-aatare zlaɓe ádaliye. Yaisu a slafanaa we-aara ge Dadaamiya arge kelfe ɲanna keni, daaci a tegateraa ge pukura-aha-aara, geni tá vatertá kelfe ɲanna keni ge emnde.

<sup>8</sup> Baɗemme-aatare, ma ware keni a zuwa á ba áte huɗe-aara, ta yanaa ba itare náza zá. Pukura-aha ta halante jugena-aara kenday vuye.

<sup>9</sup> Emnde ɲanna keni ta vayye tsa, tá maga debu ufáɗe.

Am iga una ɲanna maa, Yaisu a naba puwateraahe,

<sup>10</sup> ɲane a demhe am paare antara pukura-aha-aara, kwaye ta zlala á dem kwara á Dalmanuta.

*\*Farisa-aha tá ndava najipu áza Yaisu ge dise ɲane átekwa  
(Mat. 16:1-4)*

<sup>11</sup> Ta duhe ge \*Farisa-aha ádeza Yaisu wá, a dateraa ba gajawe, ta de tsagwadanaa áte elva. A ba itare tá elvan ge ɲane: «Máki a ɓelakaa ba Dadaamiya wá, maraɲeranmárá najipu palle geni ɲá diyeddiye átekwa.»

<sup>12</sup> Daaci Yaisu a puwese shifa á ba an ndzedá, a ba ɲane: «Labára ɲane emnde a zamane na tá tataya ba najipu na? Yá ndaakur ba jirire, ɓaaka najipu na ni tá marateranmárá mazla-aara.»

<sup>13</sup> Mazla-aara ba tse-aara áhuwa, a deme am paare, a eptsehe zlaɓe ádaliye ásete we á guwa á sehuna-aara.

*Shahi á makala á \*Farisa-aha antara \*Hirudus  
(Mat. 16:5-12)*

<sup>14</sup> Am tse-aatare ɲanna maa, pukura-aha ta naba viyaa náza zá, tá á ba an depaiɲ palle ázetare.

<sup>15</sup> Hyemhye am ndáhá elva a Yaisu an naraje an shahi á makala maa, a fater magiya, a ba ɲane á elvan ge itare: «Degiya faufa hyema, tsufautsufa ire á kure átuge shahi á makala á \*Farisa-aha, antara \*Hirudus!»

<sup>16</sup> A ba pukura-aha am dagave-aatare: «A ndaha una Malum, aɗaba ɲa viyaa depaiɲ.»

<sup>17</sup> Diyeddiye Yaisu názena tá ndahaná itare, a ba ɲane á elvan ge itare: «Labára kwa bantsa kure, aɗaba kwa viyaa depaiɲ? Kwaasau zlaɓe diyakurka, ba egdza a una ni kwá taa cenvaaka? Kwaasau zlaɓe shakuránka enjkale?»

<sup>18</sup> Kwá á ba an ice á kure ni, aley kwá nanka? Kwá á ba an hyema á kure ni, kwá cenánka? Yehauteyeha

<sup>19</sup> á ba áte depainj ilyebe na ya kwacanaa ya, ta zanaa emnde debu ilyebe na. Kwa halante jugena-aara wára wanyara?» Ta nwanante: «Wára ilyebe,» a ba itare.

<sup>20</sup> A ba Yaisu á elvan ge itare: «Depainj vuye na ya kwacanaa ya, ta zanaa emnde debu ufade na mu, kwa halante jugena-aara keday wanyara?» Ta nwanante: «Keday vuye,» a ba itare.

<sup>21</sup> Daaci a ba Yaisu á elvan ge itare: «Aley ni kwaasau zlafe diyakurka?»

*Yaisu a mbaa ura wulfe am Baytisayda*

<sup>22</sup> Se tsekwartsekwa am Baytisayda, ta se yainu á ba an ye ge Yaisu emnde, ta sanaa ura wulfe, a ba itare tá elvan ge nane: «Puwetepuwa erva á na áte zhel na tasla á na, geni a mbembe.»

<sup>23</sup> Yaisu a naba ná zhel nanna áte erva, a danse á dete iga a ekse. Daraada áhuwa maa, a de kyefaa nyaihe-aara, a gante áte ice-aha ge zhel na, a ba nane á elvan ge nane: «Ká ankwá nanna emtu?»

<sup>24</sup> A kante ice-aara wulfe na, a ba nane: «Yá ankwá nanna emnde tá ankwá zlála, amá ta ba seke nafa-aha.»

<sup>25</sup> Daaci a puwanem erva-aha-aara zlafe ádaliye am ice, mazla-aara a naba ngyaingyesaa ice-aara zhel na, a mbehe á ba áte una nanna, ankwá á nanna ba lanje.

<sup>26</sup> Mazla-aara a belanaahe ge Yaisu, a ba nane á elvan ge nane: «Ezzlála á da, eptseka á dem huđe á ekse na mazla-aara.»

*A ndaasa Piyer ganakini ba Yaisu una \*Almasiihu na  
(Mat. 16:13-20; Luka 9:18-21)*

<sup>27</sup> Am iga á una nanna maa, a naba tsetehe ge Yaisu antara pukura-aha-aara, kwaye ta zlála á dem ekse-aha na am kwara á Kaysariya á Filip. Tá áte baráma á zlála maa, a ndavateru ge Yaisu, a ba nane á elvan ge itare: «Ta baa uwe emnde áte iya, ta baa iya ware?»

<sup>28</sup> Ta nwanante, a ba itare: «Emnde umele wá, ta baa ka Yuhanna slemaga baptisma. A baa emnde umele, ka nabi \*Ailiya werre. A baa emnde umele zlafe adaliye, ka ba nabi umele tsekemme.»

<sup>29</sup> A ba Yaisu á elvan ge itare: «Ay kure ma, kwá ba, ya ware kena?» A nwanante ge Piyer, a ba nane: «Ba ka una ka \*Almasiihu na.»

<sup>30</sup> Daaci a fater magiya Yaisu, a ba nane á elvan ge itare: «Ndahawanka ge ura umele mazla-aara.»

*Yaisu a sanse elva a emtsa-aara, antara tsetse-aara am faya  
(Mat. 16:21-28; Luka 9:22-27)*

<sup>31</sup> Am iga á una nanna maa, Yaisu a fantau ge vaterte sera á elva ge pukura-aha-aara. A ba nane á elvan ge itare: «Iya \*Ura á emnde bademme wá, baaka pekya-aara, sey yá shushe zladfa kwakya. Male-aha á larde, antara male-aha á \*liman-aha, ira malum-aha á \*tawraita, tá de yiyaaya, watse tá zlanazle shifa-aaruwa bademme, amá am hare buwa ge keyire wá, watse yá tsetse am faya.»

<sup>32</sup> A ndaterse una nanna ba parakke, shebaaka. A naba dfahese ge Piyer ba itare ta buwa antara Yaisu, a de maganaa gajawe áte elva nanna.

<sup>33</sup> Amá a naba eptsavte ge Yaisu áseza pukura-aha umele, a fantau ge valar ge Piyer, a ba nane á elvan ge nane: «Jinaaja ekka ka Shaitaine. Adaba názena ká dzamaná ka na jarammeka antara náza á Dadaamiya, náza á na ba názu tá dzamaná emndimagwaha.»

<sup>34</sup> Mazla-aara Yaisu a dante pukura-aha-aara antara emnde bademme, a ba nane á elvan ge itare: «Máki edda-aara wayaawáyá daba ya wá, a

dzameka shifa-aara d'ekid'eki. A eksanteksa dzangala-aara, a d'abid'ába an ñane.

<sup>35</sup> Adaba máki edda-aara á tataya lya shifa-aara wá, á de kedanaakeda. Amá edda una a kedaa shifa-aara adaba iya, antara adaba labare á higa wá, á de shansha zlahe adaliye.

<sup>36</sup> Ma edda-aara a zu emtakire á duniya na bademme keni wá, ázara námpire-aara ge ñane máki kedanaakeda shifa na á katafke na?

<sup>37</sup> Emtu watse an'kwa názu ura á de várá shifa-aara an ñane emtu? Baaka d'ekid'eki.

<sup>38</sup> Am zamane na wá, emnde eptsaranveptsa iga ge Dadaamiya, wayarka fetaara áte ñane. Ay degiya, ma ware una a magaa zherwe am dágáve-aatare ge baa ura-aaruwire, bi ge ndahater elva-aaruwa wá, iya \*Ura á emnde bademme keni, watse á wiyá zherwe ge baa ñane ura-aaruwire, má watse yá sawa an malika-aha cud'ed'ed'e, an yaikkire á Edderwa.»

## 9

<sup>1</sup> Yaisu a farhe zlahe adaliye ge ndaaterndaha, a ba ñane á elvan ge itare: «Yá ndaakur ba jirire, á ba am dagave á kure na keni, tá an'kwa emnde na ni watse tá emtseka ba estuwa, sey máki naránna an ice-aatare Dadaamiya á jáhá emnde á dem kwara-aara an hákuma-aara.»

### *Eptsaptepetsa Yaisu a gev umele (Mat. 17:1-13; Luka 9:28-36)*

<sup>2</sup> A magaa hare un'kwahe am iga á una ñanna maa, Yaisu a d'etaa tara Piyer antara Yakuba ira Yuhanna, a dateraa áte ire á wa umele slad'ed'e, ba itare itare áhuwa. Daraada áhuwa maa, a naba eptsavte ge Yaisu am ice-aatare wá, gevge umele ba seke ñane ka mazla-aara.

<sup>3</sup> Nan'gyuwe-aara gevge dzayye ba telle, tellire-aara an tsaka ire. Nan'gyuwe-aara ñanna wulwule jipu.

<sup>4</sup> Daaci pukura-aha na tá zhárá ba emndu werre, tara \*Ailiya antara Muusa, tá an'kwa ndaha elva antara Yaisu.

<sup>5</sup> A ba Piyer á elvan ge Yaisu: «Malum, ñere keni njá an'kwa áhuna na wá, shagera jipu. Kina wá, njá magakurá dzadzawe-aha keye, palle náza á ña, palle náza á Muusa, palle keni náza á Ailiya.»

<sup>6</sup> A ndaase elva ñanna ba estuwa, amá diyaaka názena á ndahaná ñane. Adaba itare pukura-aha keye ñanna gazlargazla jipu.

<sup>7</sup> Cekwaan'gudi wá, a naba tsekwateraarhe ge kumba. Daaci tá cená ba kwara am kumba ñanna. A ba edda-aara: «Una náwa ñane na wá, Egdza-aaruwa na ya wayetaa ya. Cenancena názena á bakurná ñane.»

<sup>8</sup> Estuwa ta kante ice wá, ta naa ba Yaisu palle, baaka ura umele ázeñara.

<sup>9</sup> Am sarte na tá átira tsekwa á sa áte ire á wa ñanna maa, Yaisu a fater magiya, a ba ñane á elvan ge itare: «Ndawanka názena kwa naaná kure na ma ge ware keni, a njinja á ba am hu'de á kure dem sarte na tsetsa \*Ura á emnde bademme am faya.»

<sup>10</sup> Faransarfe am elva ñanna, amá a ba itare am dagave-aatare: «Uwe ñane tsete am faya na a ndahanaa ñane na?»

<sup>11</sup> Adaba una ñanna, ta de ndavanu ge Yaisu, a ba itare: «Labára tá bantsa malum-aha á \*tawrait, sey máki eptsaptsa nabi \*Ailiya emtsaade?»

<sup>12</sup> A ñwaterante, a ba ñane: «Una ba jire-aatare, ba seke una ta ndahanaa itare ñanna, á eptsa Ailiya emtsaade, á se tsatsanaatsatsa ñane duksa bademme. A ba iya wá, labára a ba wakita á Dadaamiya, watse á

shushe zladfa kwakya \*Ura á emnde bademme, watse tá epsawanaapsawa emnde?

<sup>13</sup> Ay degiya wá, ya ndaakur ba jirire, ndza eptsaptsa Ailiya á sawa, amá emnde ta naba magaa hakuma-aatare áte nane. Una nanna daada á ba áte una á ndaaná wakita á Dadaamiya.»

*Yaisu ngyansengye jini am egdzere  
(Mat. 17:14-21; Luka 9:37-43a)*

<sup>14</sup> Am sarte na saraasa maa, ta se bera emnde kwakya antara malum-aha á \*tawraita áza pukura-aha umele na. Tá ankwá gajawe malum-aha á tawraita antara pukura-aha na am dagave-aatare.

<sup>15</sup> Bademme á emnde na, ba ta naa Yaisu wá, tá maga ba najipu-aara. Ba zhagade ádezenara, ta de yainuye an use.

<sup>16</sup> A ba Yaisu á elvan ge pukura-aha-aara: «Kwa gajawe arge uwe kure antara emnde na?»

<sup>17</sup> A nwete ge ura palle am dagave á emnde, a ba nane: «Malum, ya sakaa egdza-aaruwa egdzere zhele, adaba ankwá jini am nane, á piyante ndaha elva.

<sup>18</sup> Jini-aara nanna, ma a tsete am tate-ara keni, sey ba á velyanaavelya á dem haha, á kela ugbalyaiye, á kerda slare, á wulesewule vuwa-aara kangelanje. Ya nala pukura-aha á na ganakini tá ngyansengye jini nanna am nane, amá dzegwaranka.»

<sup>19</sup> Ba wera we-aara ge Yaisu, a ba nane á elvan ge itare: «Amá kure emnde a zamane na wá, baaka fetarfire á kure d'ekideki! Watse yá njá antara kure dem laukte-ara? Yá fakurá ervaunje dem sarte-ara estuwa? Sawiyansa kwa kure egdze nanna ge iya!»

<sup>20</sup> Daaci ta naba saa egdzere ásezenara. Ba a puwete ice-aara áte Yaisu jini na am egdza nanna wá, a naba fantau ge slakala am egdzere, a velyaa egdze na am ire, á tabara egdze na am haha, á kela ugbalyaiye am mbuwe-aara.

<sup>21</sup> Yaisu a ndavanu ge eddenara, a ba nane: «A fanantau am sarte-ara?» A ba eddenara: «A fanantau daga am sarte na zlafe egdzere cekwa.

<sup>22</sup> Ba kelaa ma tsetse jini-aara nanna wá, sey ba á maganánmaga palasa. Am sarte umele á eblyanme am kára, am sarte umele á eblyanme am yawe, á kátá ba já shifa á egdzere. Daaci máki ká dzegwándzegwa wá, tasla á na zanervarze, melanjerumele.»

<sup>23</sup> A nwanante ge Yaisu, a ba nane á elvan ge nane: «Máki yá dzegwándzegwa emtu, a ba ka? Áza edda una ni ankwá fetarfire-aara wá, baaka názena ni á gevka na.»

<sup>24</sup> Kertenj nwatenjwa eddarge egdzere, a ba an ká kwara a ba nane: «Fantarfe, amá á hyepka fetarfire-aaruwa, tasla á na meliyumele am hude-aara.»

<sup>25</sup> Daaci Yaisu á zhára ba tá ankwá kela emnde ásezetare, a naba valarhe ge jini nanna, a ba nane: «Ekka jini na ká piyante ndaha elva ge ura, ká ganve ura makwaya na, ya bakanaa ba iya, sesse am egdze na, ezslálá, salika á sem nane d'ekideki.»

<sup>26</sup> A naba fu hula jini na am egdzere, a slakalme am egdzere, a naba sesehe am nane. Amá ba seke baaka shifa am nane, haa ta bantsa emnde umele: «Baaka, emtsamtsa egdze na.»

<sup>27</sup> Amá Yaisu a nanaahe áte erva, a tsante, a naba tsaahé ge egdzere an sera-aara.



<sup>28</sup> Am sarte na daraada, ta juwa ba itare antara pukura-aha-aara maa, ta naba ndavanuhe ge pukura-aha, a ba itare tá elvan ge ñane: «Labara dzegwanjeranka ñere ñgyesaa jini ñanna?»

<sup>29</sup> A ñwaterante ge Yaisu, a ba ñane á elvan ge itare: «Jeba á jini na wá, sey tá ñgyansá an maduwa.»

*Yaisu ankwá á sanse ge buwire elva a emtsa-aara antara tsetse-aara am faya*

*(Mat. 17:22-23; Luka 9:43b-45)*

<sup>30</sup> Daaci tsaretse am tate ñanna, ba zlalá-aatare á dem tate umele, ta degashe am huđe á Galili praatte. Am sarte ñanna wá, ndza wayaaka Yaisu tá diyeddiye emnde tate na tá átekwa.

<sup>31</sup> Adaba ankwá á vaterte sera á elva-aha ge pukura-aha-aara. A ba ñane á elvan ge pukura-aha-aara: «Iya \*Ura á emnde bademme wá, watse tá fime am erva ge emnde, tá de já shifa-aaruwa. Amá am hare ge keyire wá, watse yá tsetse am faya.»

<sup>32</sup> Ba palle cenaranka pukura-aha elva-aara ñanna. Amá ge ndavanu elva-aha keni, a wateraa lyawa.

*Gajawe á pukura-aha arge yaikkire*

*(Mat. 18:1-5; Luka 9:46-48)*

<sup>33</sup> Am iga á una ñanna maa, daraada am Kafarnahum. Am sarte na tá am bere, a ba Yaisu á elvan ge emnde-aara bademme: «Ndza kwa gajawe arge uwe kure áte barama?»

<sup>34</sup> Amá ta heđu ba we-aatare, baaka ura á ndaha elva. Adaba ndza ta gajawe arge yaikkire, geni watse mala ware am dagave-aatare.

<sup>35</sup> Daaci a njehe ge Yaisu áte tate a njá, a detaa pukura-aha-aara kelaawa ju buwa, a ba ñane á elvan ge itare: «Ma ware una á kátá gev slekatafke á kure keni, á ganvege ire-aara ba seke ñane slekataliya á emnde bademme, antara walaadi á emnde bademme.»

<sup>36</sup> Am iga á una ñanna maa, a eksante egdzere, a se tsanaahe á katafke-aatare am huviye-aara ge ñane, daaci a ba ñane á elvan ge itare:

<sup>37</sup> «Ma ware una a lyevaa egdzere seke una adaba elva-aaruwa, edda-aara a lyevaa ba iya an ire-aaruwa. Edda una a lyevaa iya maa, a lyevaa iya ka palle, a lyevaa ba edda una a belibela na an ire-aara.»

*Edda una dagalaaka ásete miya, ura á miya ba ñane*

*(Luka 9:49-50)*

<sup>38</sup> A ba Yuhanna á elvan ge Yaisu: «Malum, ñere wá, ña naa ura umele á ñgyá jini-aha am emnde an zhera á ña, amá ña naba piyante, adaba ñane palle á miya ka.»

<sup>39</sup> A ba Yaisu: «A'aa, piyawanteka. Adaba baaka ura a magaa najipu an zhera-aaruwa ni, am iga-aara á valya elva áte iya.

<sup>40</sup> Adaba máki edda-aara dagalaaka tsawe ásete miya wá, ura á miya ba ñane.

<sup>41</sup> Yá ndaakur ba jirire, ma edda-aara a vakurte ba yawe á essha keni, máki a vakurtaa adaba zhera-aaruwa geni kwa emnde á \*Almasiihu wá, edda-aara á de shansha lafa-aara.»

*Haypa wá, náza a gwágweseka*

*(Mat. 18:6-9; Luka 17:1-2)*

<sup>42</sup> Zlabe adaliye, a ba ñane á elvan ge itare: «Má edda-aara mbedanaambeda palle á egdzara ñanna ta fetaare áte iya na á dem haypa

wá, ámbane tá nguđanem nákwá á há hiya am mbiye, tá eblyanma am haye, á emtsa, ngulma ba una ɲanna ge edda-aara.

<sup>43</sup> «Máki erva á ɲa aɲkwa á dáká á dem haypa wá, naba icica áte ka, eblyanveblye ba yiyiye. Ámbane ká dem tate á shifa na á zleka na an erva palle, arge una ká njá an erva-aha á ɲa bukerde, amá ká dem kára á jahanama, kára na á emtseka dekiđeki na. ((

<sup>44</sup> Jahanama ɲanna wá, ma weshege-aara, ma kára-aara keni, á emtseka dekiđeki.))

<sup>45</sup> Máki sera á ɲa aɲkwa á dáká á dem haypa wá, naba icica áte ka, eblyanveblye ba yiyiye. Ámbane ká dem tate á shifa na á zleka na an ser palle, arge una ká njá an sera-aha á ɲa bukerde, amá tá de eblyaká á dem kára á jahanama na. ((

<sup>46</sup> Jahanama ɲanna wá, ma weshege-aara, ma kára-aara keni, á emtseka dekiđeki.))

<sup>47</sup> Zlađe áđaliye, máki ice á ɲa aɲkwa á dáká á dem haypa wá, naba sansese ice ɲanna. Ámbane ká dem zlanma á Dadaamiya an feke palle, arge una ká njá an ice-aha á ɲa bukerde, amá tá de eblyaká á dem kára á jahanama na.

<sup>48</sup> Jahanama ɲanna wá, ma weshege-aara, ma kára-aara keni, á emtseka dekiđeki.

<sup>49</sup> «Diyaweddiye geni, ma ware keni, á de maraná ba kára názu am edda-aara, ma emtake, ma emtaɲka keni, ba seke náza ellenja á maraná ɲane emtakire á dale.

<sup>50</sup> Ellenja wá, duksa ɲgelama. Amá máki ellenja ɲanna baaka đanđanire-aara mazla-aara mu, tá maganá uwe ganakini á gevge đanđanje zlađe áđaliye? Baaka pute dekiđeki. Adaba una ɲanna, marausemare duksa ɲgelama am kure, njawinja an hairire am dagave á kure.»

## 10

*Elva á Yaisu áte elva a ica nika*  
(*Mat. 19:1-12; Luka 16:18*)

<sup>1</sup> A naba tsete ge Yaisu am tate ɲanna, a zlalá á dem kwara á Yahudiya. Am Yahudiya, a de ebzu guwa á Urdun. Áhuwa keni de jarammeje emnde kwakya ázeɲara, a fantau ge kwaraterse elva á Dadaamiya, adaba ɲane nja-aara ba estuwa.

<sup>2</sup> Am sarte ɲanna maa, ta duhe ge \*Farisa-aha umele ádezeɲara, ta de ndavanu elva geni tá tsagwadáná átekwá. A ba itare tá elvan ge ɲane: «Vantevahe \*tawraitá barama ge zhele geni á belanaabela mukse-aara?»

<sup>3</sup> Ge vaterte jawápa maa, Yaisu keni a ndavaterundave, a ba ɲane á elvan ge itare: «A bakuraa uwe Muusa áte una ɲanna?»

<sup>4</sup> A ba itare: «Muusa wá, a yaa barama geni zhele ɲanna á puwanante nalmesheri á ica nika ge mukse, á vanteva am erva.»

<sup>5</sup> Daaci a ba Yaisu á elvan ge itare: «Muusa a puwakurte una ɲanna adaba ba degdegire á ire á kure.

<sup>6</sup> Amá áte una am fakte wá, estuweka. Am fakta, am sarte na Dadaamiya a nderaa duksa bademme wá, “a nderaterhe tara zhele an mukse”.

<sup>7</sup> “Adaba una ɲanna zhele á ya tara eddeɲara an emmeɲara, tá njá antara mukse-aara.

<sup>8</sup> Itare ta buwa ɲanna, tá gevge ba vuwa palle.” Estuwa, ta buweka mazla-aara, tá geva ba vuwa palle.

<sup>9</sup> Daaci názena ni a janmaa Dadaamiya wá, a icanveka urimagwe.»

<sup>10</sup> Am sarte na tá am bere antara pukura-aha-aara maa, ta naba ndavanu ge pukura-aha á ba áte elva ñanna zlaɓe ádaliye.

<sup>11</sup> A ba ñane á elvan ge itare: «Ma ware una zhele, máki a belaa mukse-aara, a de gaa umele, a magaa ba gwardzire, guge haypa an mukse-aara na a belanaa ñane.

<sup>12</sup> Ba duksa palle ge mukse keni. Máki a segashe am mba á zhele-aara, a de gaa umele, a magaa ba gwardzire.»

*Yaisu a gaterar barka ge egdzara  
(Mat. 19:13-15; Luka 18:15-17)*

<sup>13</sup> Emnde kwakya ta sanaa egdzara ge Yaisu geni á puwaterar erva a barka-aara, amá pukura-aha ta naba valaterarhe ge emnde a sá egdzara ñanna.

<sup>14</sup> Amá náterna Yaisu wá, a naba jehe ge ervaunɗe, a ba ñane á elvan ge pukura-aha: «Piyawaterteka, yawáterya, a sarsawa egdzara ásezerwa, aɗaba \*kwará á Dadaamiya náza á emnde na má garevge ba seke itare.

<sup>15</sup> Yá ndaakur ba jirire: Ma ware edda-aara keni, máki lyevaaka dem kwará á Dadaamiya ba seke náza á egdzere wá, ñane á taa demka ɗekiɗeki.»

<sup>16</sup> Am iga á una ñanna, a naba lyevaa egdzara á dem erva-aara, a puwaterar erva, a gaterar barka.

*Sleberba a se ndava sera á shifa áza Yaisu  
(Mat. 19:16-20; Luka 18:18-30)*

<sup>17</sup> Dedde Yaisu áte barama, aɱkwa á zlála maa, a duhe ge zhele umele ádezenara á ba an zhagade, a de kezlaa ugje am sera-aara, a ba ñane á elvan ge ñane: «Malum, diyandiya ganakini ka ura mággwe. Naba ndindaha, yá maga tara uwe antara uwe, lauktu yá shá shifa na á zleka na?»

<sup>18</sup> A ñwanante ge Yaisu, a ba ñane: «Labára ká ɗahiyá an ura mággwe? Baaka ura mággwe, máki Dadaamiya ka palle.

<sup>19</sup> Ábi diyakdiya shairiya-aha á Dadaamiya na a ba ñane: Jeka shifa, maɱka gwardzire, ileka, maɱka seydire á fida áte ura, zlermekka duksa á ura, ɗematerveɗeme tara eddeɱa an emmeɱa. Ábi diyakdiya una-aha ñanna baɗemme.»

<sup>20</sup> A ñwete, a ba ñane: «Una ñanna kwaye á sawa am egdzarire-aaruwa keni ñanaaɱa.»

<sup>21</sup> A belanu ice á Yaisu, wayetewayaya jipu am ervaunɗe-aara, a ba ñane á elvan ge ñane: «Máki estuwa wá, a yakar ba duksa palle. De valuvale názu am rezegge á ña baɗemme, tegatertega shunngu-aara ge talage-aha, ekka watse ká shánsha laɗa-aara am samaya. Daaci sawa ɗabiɗaba.»

<sup>22</sup> Ba a cenaa una ñanna wá, puwaapuwa vuwa-aara, ba eptsaa iga-aara, a zlála an dzámá ire campaukkwe, aɗaba nalmane-aara kwakya jipu.

<sup>23</sup> Daaci Yaisu a zharaa pukura-aha-aara, a ba ñane á elvan ge itare: «Kay! Zlazlaɗa jipu geni tá demda emnde a berba am \*kwara á Dadaamiya.»

<sup>24</sup> Palle á názu tá ndahaná pukura-aha baaka, elva ñanna jauje ge ndzeɗa-aatare. Amá ñane a faterarhe zlaɓe ádaliye, a ba ñane: «Una yá ndaakur ba jirire, zlazlaɗa jipu ganakini tá demda emnde á dem kwara á Dadaamiya.

<sup>25</sup> Náwa zlazlaɗa ganakini á dedde názlegwame am biye á lipere, amá zlazlaɗa ba náza á sleberba zlaɓe ádaliye ge dem kwara á Dadaamiya.»

<sup>26</sup> Ba ta cenaa una ɲanna pukura-aha wá, tá geja ba ire. A ba itare: «Máki ba estuwa wá, baaka ura á ɲezlesenɟle ɖekideki.»

<sup>27</sup> A zharateraahe ge Yaisu, a ba ɲane á elvan ge itare: «Áza emnde wá, una taa gevka, amá Dadaamiya wá, baaka názu dzegwanka ɲane.»

<sup>28</sup> Piyer a eksetaa elva, a ba ɲane á elvan ge ɲane: «Kwaye ɲere, yanɛranya duksa baɖemme, ɲá ɖaba ba ka.»

<sup>29</sup> A ɲwete ge Yaisu, a ba ɲane á elvan ge itare baɖemme: «Yá ndaakur ba jirire, ma ware una a yaa há-aara, bi egdzar mama-aha-ɲara zala an ɲwasha, bi emmeɲara, bi eddeɲara, bi egdzara-aara, bi fe-aara, máki a yanaa aɖaba zhera-aaruwa antara aɖaba labare á higa wá,

<sup>30</sup> ba jirire á de shansha zlaɓe ádaliye una-aha ɲanna baɖemme ma huɖe deremke keni; ma bere, ma egdzar mama-aha-ɲara zala an ɲwasha, ma emmeɲara, ma egdzara-aara, ma fe-aha. Baɖemme á de shansha zlaɓe ádaliye á ba am duniya na. Amá wá, zlaɖa keni á shushe. Á katafke á de shá shifa na á zleka na.

<sup>31</sup> Amá emnde kwakya ta zuɲɲwa ba itare kina, tá de gev emnde a kataliya. Emnde kwakya tá am kataliya kina, watse tá gev emnde a katafka ba itare.»

*Yaisu aɲkwa á sanse ge keyire elva a emtsa-aara antara tsetse-aara am faya*

*(Mat. 20:17-19; Luka 18:31-34)*

<sup>32</sup> Tara Yaisu antara pukura-aha-aara tá áte barama á ɖala á dem Urusaliima. Yaisu wá, ɲane á katafke, pukura-aha-aara tá aɲkwa ɖabaná á kataliya, ta yiyiye cekwaanɲuɖi antara ɲane. Pukura-aha-aara tá á ba an lyawa am vuwa. Dikele á emnde na tá ɖabaterɖaba na keni, tá á ba an lyawa ɲanna. Yaisu a ɖante pukura-aha-aara zlaɓe ádaliye ádezeɲara, a ndaateraahe zlaɓe ádaliye názena watse á de shá ɲane,

<sup>33</sup> a ba ɲane á elvan ge itare: «Duwa á miya á dem Urusaliima kina na wá, iya \*Ura á emnde baɖemme tá de eksivaksa, tá de vite ge male-aha á \*liman-aha antara malum-aha á \*tawraita. Tá de ndahaná itare geni a jareja shifa-aaruwa. Daaci tá de fime am erva ge emnde na baaka nadina-aatare,

<sup>34</sup> tá de zlazlisá itare, tá de kyafiyar itare nyaihe, tá de ziyá itare an ja, tá de janá itare shifa-aaruwa. Amá am hare ge keyire wá, watse yá tsetse am faya.»

*Ndáva á tara Yakuba antara Yuhanna*

*(Mat. 20:20-28)*

<sup>35</sup> Am iga á una ɲanna maa, ta duhe ge egdzara á Jaibaidaiyus, tara Yakuba an Yuhanna, ádeza Yaisu. A ba itare tá elvan ge ɲane: «Malum, náwa ɲa se ɲala ázeɲa, máki ɲá shansha barama-aara.»

<sup>36</sup> A ɲwaterante ge Yaisu, a ba ɲane á elvan ge itare: «Kwá kátá uwe kure ázerwa?»

<sup>37</sup> A ba itare: «Máki á ɓashaɲerɓasha ervaunɖe á ɲa wá, má watse de njakiinja am yaikkire á ɲa wá, ɲá kátá palle á ɲere á de njá am naɖafa á ɲa, palle á ɲere keni á de njá am názlaba á ɲa.»

<sup>38</sup> A ɲwaterante ge Yaisu, a ba ɲane: «Ábi diyakurka wedere á kure na ma andze kwá ndava ɲane na. Kina wá, watse kwá dzegwándzegwa emtu sha zlaɖa áte náza-aaruwa na watse yá essha na? Zlaɓe ádaliye, watse kwá dzegwándzegwa emtu sepá názena watse yá sepaná ya am vuwa-aaruwa na?»

<sup>39</sup> Ta naba nwanante: «Ŋá dzegwándzegwa,» a ba itare. A nwaterante ge Yaisu: «Shagera,» a ba nane á elvan ge itare: «Watse kwá de shá zladá á ba áte náza-aaruwa, watse kwá de sepá názena yá de sepaná ya am vuwa á kure.

<sup>40</sup> Amá elva a de njá am nadafa-aaruwa antara názlaba-aaruwa wá, am erva-aaruweka una nanna. Sledfe-aha nanna náza emnde na ni Dadaamiya a tsatsaterán ge itare.»

<sup>41</sup> De cenarácena una nanna pukura-aha umele kelaawa na maa, ta naba ica ervaunđe áte tara Yakuba antara Yuhanna.

<sup>42</sup> Cenácena Yaisu, a d̄aaterte bad̄emme-aatare ádezeɲara, a ba nane á elvan ge itare: «Náwa diyakurdiya ganakini emnde na ta slekse-aha á larde ba itare am duniya na wá, tá aɲkwa á kwára larde-aha-aatare an mára hákuma áte emnde. Male-aha á ekse keni, tá aɲkwa á mára hákuma-aatare am ekse.

<sup>43</sup> Amá jeba á una nanna wá, a gevka am dagave á kure. Ma ware una á kátá gev male keni, arge una nanna wá, a gevge ba seke walaadfi á kure.

<sup>44</sup> Ma ware una á kátá gev slekatafke á kure keni, a gevge ba seke nave á kure. Malira ba una nanna am ice á Dadaamiya.

<sup>45</sup> Adaba ba iya \*Ura á emnde bad̄emme keni, sanká geni tá se magina emnde slera, amá iya una ya se magateraa slera ge emnde, ya se yá shifa-aaruwa, geni yá lyelye emnde ba kwakya.»

*Yaisu a vante ice ge Bartimawus  
(Mat. 20:29-34; Luka 18:35-43)*

<sup>46</sup> Mazla-aara maa, daraada am Yairikau. Am sarte na tá aɲkwa á zlála am ekse nanna tara Yaisu antara pukura-aha-aara maa, kwakya emnde na ta d̄abaterd̄aba. Aɲkwa ura wulfe zhera-aara Bartimawus egdza á Timawus, a njehe áte baráma na tá aɲkwa d̄abaná itare na, ge nala áza emnde.

<sup>47</sup> Am sarte na cenácena ganakini ba Yaisu ura Nasarátu una á degashe na, a fantau ge d̄aha Yaisu á ba an ká kwara, a ba nane: «Yaisu \*Egdza á Dawuda, tasla á n̄a zivarze.»

<sup>48</sup> Kwakya emnde na ta valarhe, ta banaa a d̄ufe, amá nane a far ká kwara, a ba nane: «Egdza á Dawuda, tasla á n̄a zivarze.»

<sup>49</sup> Daaci a tsaahē ge Yaisu, a ba nane: «Daud̄aha, á sawa.» Ta de d̄ante wulfe na, a ba itare tá elvan ge nane: «Ehhiga kwa mazla-aara, kwaye á d̄akd̄aha, sawa ásezeɲara.»

<sup>50</sup> A naba tsetehe á ba áte watsewatsire, a puwanve kacekaca-aara, a duhe á ba an zhagade.

<sup>51</sup> Daada áza Yaisu, a ba Yaisu á elvan ge nane: «Ká kátá yá magaká estara kina?» A nwanante ge wulfe, a ba nane: «Yá kátá ba ice, malum-aaruwa.»

<sup>52</sup> A ba Yaisu á elvan ge nane: «Naba zlála á da, mbakaambe fetarfire á n̄a.» Ba seke ndaha á miya na, shansha ice-aara, a d̄abete Yaisu.

## 11

*Yaisu á dem huđe á Urusaliima  
(Mat. 21:1-11; Luka 19:28-40; Yuh. 12:12-19)*

<sup>1</sup> Herzharanteherzhe Urusaliima am dalbe á ekse-aha buwa tara Baytifaji antara Baytaniya, tá áte vuwa á Wa Anyaranyara maa, Yaisu a belaa pukura-aha-aara buwa á de katafke.



<sup>2</sup> A ba ɲane á elvan ge itare: «Dawmbare á dem ekse na kwaye á katafke á miya na wá, ba tara demda á kure wá, kwá de bera egdza á ezzenwa an ɲgudá, zlaɓe ɲateka ura áte iga-aara, naba pelawaapele, sawiyansa.

<sup>3</sup> Máki ura a bakuraa, kwá maga uwe kure, bawanamba ge edda-aara geni a ndavanaa Yaakadada, watse á eptsakurnaptsa zlaɓe ádaliye.»

<sup>4</sup> Mazla-aara ta naba zlala, ta de bera ezzenwa áte ɲgudá áte wakyiya á ura herzhe an we á baráma, ta naba eppela.

<sup>5</sup> Ta ndavateru ge emnde na tá áhuwa, a ba itare: «Labára kwá pelá ezzenwa na?»

<sup>6</sup> Ta ɲwaterantehe, ta bateraa elva na a ndaateraa Yaisu na, daaci ta naba yaterhe ge emnde ɲanna, ta sawa an ɲane.

<sup>7</sup> Ta sanaa ezzenwa na ge Yaisu, ta ndakete kacekaca-aha-aatare áte iga á ezzenwa ɲanna, lauktu a ɲjetaa Yaisu átekwa.

<sup>8</sup> Emnde kwakya ta pelanse kacekaca-aha-aatare áte baráma, emnde umele ta datsaa hyema á debina am fe, itare keni ta se pelanse.

<sup>9</sup> Daaci ma emnde na tá á katafke á Yaisu, ma emnde na tá am iga-aara keni, baɗemme-aatare tá leva ba hula, a ba itare: «Dadaamiya wá, Slekse. A ganga barka ge edda una á sawa an zherá á Yaakadada na.

<sup>10</sup> A famfe Dadaamiya barka am kwára á wulfe á eggyemiya \*Dawuda na watse mí njá am huɗe-aara na. Dadaamiya am samaya wá, Sleksa ba ɲane palle.»

<sup>11</sup> Daaci a dem ge Yaisu á dem huɗe á Urusaliima, a zlalá ba suuwe á dem \*mashidi yaikke. De zharanaazhara názu am mashidi maa, ba segashe-aara, ta naba eptsá á dem Baytaniya antara pukura-aha-aara, aɗaba aɲkwa á sawa vayiya.

*Yaisu a nyainyainve mama á nabugda*  
(Mat. 21:18-19)

<sup>12</sup> Makuralla-aara maa, ta naba segashe am Baytaniya, tá aɲkwa á eptsá zlaɓe ádaliye. Ate baráma maa, ɲanaaɲa waya Yaisu.

<sup>13</sup> A naa mama á nabugda an hyema átekwa yiyiye cekwaɲgudí an itare, a naba duhe geni ámbane aɲkwa egdzere átekwa. Duwa-aara á dem ekte á nabugda ɲanna, amá shanka ba náza keni átekwa, sey a jauwa ba hyema, aɗaba sarte a yá á nabugdeka.

<sup>14</sup> Daaci a ndaase elva-aara áte nabugda ɲanna, a ba ɲane: «Ekka wá, gaɗɗiru tá náka egdzere áte ka mazla-aara.» Cenarancena pukura-aha una ɲanna baɗemme.

*Slera á Yaisu am \*mashidi yaikke*  
(Mat. 21:12-17; Luka 19:45-48; Yuh. 2:13-22)

<sup>15</sup> Am sarte na daraada am Urusaliima maa, Yaisu a de á ba am \*mashidi yaikke. Daduwa á dem mashidi maa, a de beraa emnde a válá kazlaɲa antara emnde a shekwa-aara am huɗe-aara, a naba ɲgyaterse ásegashe. A zaɗanve tabel-aha á emnde a peteke, antara kurshi-aha á emnde a válá takala masar.

<sup>16</sup> A piyaterterte ge emnde a degashe an kazlaɲa am huɗe á mashidi, ge dáná á dem tate umele.

<sup>17</sup> Daaci a fantau ge kwaraterse názu am wakita á Dadaamiya, a ba ɲane: «Aɲkwa an puwa am wakita á Dadaamiya, a ba Dadaamiya: Bere-aaruwa wá, tá dahaná an bere á mága maduwa á emnde baɗemme. Amá kure, kwa ganve hwalakwa á nabera-aha.»

<sup>18</sup> Ba ta cenaa una ɲanna male-aha á \*liman-aha antara malum-aha á \*tawraitá wá, mazla-aara ta naba fantau ge mága pute-aatare ge keɗa shifa

á Yaisu. Damda lyawa am itare, adaba bademme á emnde hayaranhaya jipu elva na a kwaratersaa nane.

<sup>19</sup> Eblyablya vaci maa, ba degashe Yaisu am hufe á berni antara pukura-aha-aara bademme.

*Tá shaná estara emnde duksa na tá yekaná áza Dadaamiya*  
(Mat. 21:20-22)

<sup>20</sup> Makuralla-aara an enlyawaabere maa, ta naba eptsehe zlafe adaliye, tá sem berni. Am sarte na tá áte baráma á sawa maa, ta naa nabugda na welasewele antara uksuwe-aara bademme.

<sup>21</sup> A naba yehete ge Piyaer elva na a ndaasa Yaisu áte nabugda nanna. Daaci a ba nane á elvan ge nane: «Malum, ezzhárá emtsaade, nabugda na ka nyainyaivaa ka áwaya na, emtsamtsa bademme.»

<sup>22</sup> Daaci a ba Yaisu á elvan ge pukura-aha-aara bademme: «Yá ndaakur ba jirire, máki fakurtarfe an Dadaamiya wá,

<sup>23</sup> ma kwa banán ba ge wa na náwa nane na: Tsetse áhuna, de eblyemembye am haye keni, á naba gevge. Máki magakurka shaige, fakurtaarfe á ba an jirire geni názena kwá ndavaná kure á de gevge wá, ba á gevge nanna adaba kure.

<sup>24</sup> Adaba una nanna yá ndaakur ba jirire, máki kwá yeká duksa wá, fawtarfe ba seke shakuránsha duksa nanna zlauzle, sey ba kwá shansha.

<sup>25</sup> Daaci máki kwá ankwá á maga maduwa, amá diyakurdiya ganakini ankwá slehaypa an kure wá, naba yawanarye, Eddekure na am samaya na á de yakuraarye ge kure keni. ((

<sup>26</sup> Amá má kure kwá yateraarka ge emnde wá, Eddekure na am samaya na, á yakuraarka ge kure keni.))

*A vantaa ware hákuma ge Yaisu?*  
(Mat. 21:23-27; Luka 20:1-8)

<sup>27</sup> Saremsa zlafe adaliye á sem Urusaliima maa, ta naba dem \*mashidi yaikke. Yaisu ankwá á jadaba am mashidi nanna, ta naba duhe ge male-aha á \*liman-aha antara malum-aha á \*tawraitá ira male-aha á larde ádeza Yaisu,

<sup>28</sup> ta de ndavanu elva, a ba itare: «Ka shanaa áme hákuma á mága duksa-aha na? Emtu a vaktáa ware baráma-aara?»

<sup>29</sup> A nwaterante ge Yaisu, a ba nane: «Iya keni, yá ndavakurundave duksa palle. Máki vakuriteva jawápa wá, iya keni yá ndaakurse tate na ni ya shaa hákuma átekwa.»

<sup>30</sup> Daaci a ba nane á elvan ge itare: «A belanaa ware Yuhanna ge se magaterá baptisma ge emnde? Dadaamiya emtu, emndimagwaha he? Vawiteva jawápa.»

<sup>31</sup> Ta fantau ge ndahanaa am dagave-aatare emtsaade: «Má mi banaa a belanaa Dadaamiya, watse á bamiya: Labára fakurtaareka an nane?

<sup>32</sup> Má mi banaa ta belanaa ba emndimagwaha keni, zlazladá zlafe.» Ta kuva emnde jipu adaba bademme á emnde fartarfe ganakini Yuhanna nabi á Dadaamiya.

<sup>33</sup> Adaba una nanna, «Diyañerka», a ba itare tá elvan ge Yaisu. A ba Yaisu á elvan ge itare: «Iya keni yá ndaakurka náza-aaruwa ma ya shaa hákuma á mága duksa-aaruwa áza ware keni.»

## 12

*Naraje an emnde a mándzawe ta yateraa fe am erva*  
(Mat. 21:33-46; Luka 20:9-19)

<sup>1</sup> Am iga a una nanna maa, Yaisu a vaterte elva an naraje na. A ba nane á elvan ge itare: «Ankwa ura umele a ica fe-aara, a dzebaa náfá á inabauhi am hufe-aara, a jantaave an dala, a magaa tate á beca egdza a náfá, ira bere á edda á ufa fe nanna, daaci a yateraa fe nanna bademme am erva ge emnde a slera, nane a daa shula.

<sup>2</sup> Samsa sarte á egdza a náfá maa, a naba belaa palle á emnde a slera-aara áseza emnde na a yateraa fe am erva na, geni á se lyanvaalya dzaanara am egdzara á náfá na.

<sup>3</sup> Amá itare, ta naba eksevaa sleslera nanna, ta zuhe an já, ta belanaahe an erva dey.

<sup>4</sup> Edda á fe a naba belaa sleslera-aara umele. Nane keni ta se zlazlese, ta kyanmaarhe.

<sup>5</sup> Edda á fe na a naba belaa sleslera-aara zlafe ádaliye. Nane wá, ta se jaa ba shifa-aara. Kwaye nane názena ta magaterte ge emnde a slera á edda á fe. Umele ta shanu ba zlaða, umele ta jaa ba shifa-aara.

<sup>6</sup> A jauwa ba ura palle áza edda á fe ge ebbela-aara, egdza-aara ba ge nane wayaawáyá jipu na. Am iga-aara a belaa ba nane. A ba nane: “Egdza-aaruwa ba ge iya na wá, sey tá de fá zherwe áte nane.”

<sup>7</sup> De samsa egdza-aara nanna maa, a ba emnde a kwara fe am dagave-aatare: Yawwaa, kwaye samsa edda una watse á zaná nane waráta á fe á miya na. Gwawamiyargwe, jaumiya shifa-aara, fe-aara nanna á de gev ba náza á miya.

<sup>8</sup> Daaci ta eksevaa egdza-aara nanna, ta naba jaa shifa-aara, ta de eblyanve áte iga á dala.»

<sup>9</sup> Daaci a ndavateru ge Yaisu, a ba nane á elvan ge itare: «Kina wá, watse á magaterá uwe edda á fe ge emnde a kwara fe nanna? Ay degiya watse á se ceba emnde nanna bademme, á faterem fe-aara am erva ge emnde umele.

<sup>10</sup> Ankwa naraje am wakita á Dadaamiya, a ba nane: Ba nákwá nanna ta eblyanvaa emnde a nyáña bere na una, a eksantehe ge Dadaamiya, a ganve nákwá na á náná nane ndzedá á bere nanna bademme.

<sup>11</sup> Kwaye nane názena a maganaa Yaakadada, shagera ge miya, máki namiyanna duksa nanna.

Ábi ndaakursende naraje nanna.»

<sup>12</sup> Male-aha á Yahudiya-aha tá kátá eksa Yaisu á ba am sarte nanna, adaba diyardiya ganakini á bálá nákwá nanna á ba áte itare. Amá a wateraa lyawa átuge emnde, daaci ba tse-aatare, ta naba zlálá, ta yanhe.

*Elva á hadáma ge male á larde á Rauma  
(Mat. 22:15-22; Luka 20:20-26)*

<sup>13</sup> Daaci ta de magaa sawari-aatare, ta belanve \*Farisa-aha antara emnde á sleksu \*Hirudus, ge de ndavanu elva tá tsagwadáná an nane.

<sup>14</sup> Ta duhe ge emnde nanna, a ba itare tá elvan ge Yaisu: «Malum, diyajerdiya geni ekka wá, ka slejirire, baaka lambe á na átuge ice á emnde, baaka lambe á na áte ngahire á urimagwe keni. Ka, ká kwaraterse ba unñule á Dadaamiya ge emnde. Ndaanerna ba jirire, am \*tawraita á miya mu, ankwa emtu baráma á puwaná hadáma ge male á larde á Rauma, baaka he? Buweka dekideki, ná eppuwa emtu, ná puweka he?»

<sup>15</sup> Amá diyaadiya Yaisu názena a satersa na. Daaci a ba nane á elvan ge itare: «Labára kwá tsagwadítságwadá? Sawiyansa shunngu yá nanaana.»

<sup>16</sup> Ta naba de sanaa shungu na. A ba Yaisu á elvan ge itare: «Nderáva á ware una áte shungu na? Ira zhera na, zhera á ware?» Ta nwanante, a ba itare: «Náza á male á larde á Rauma.»

<sup>17</sup> A ba Yaisu á elvan ge itare: «Daaci má estuwa wá, puwawanpuwa ge male á larde názu zlaya-aara, ge Dadaamiya keni názu zlaya-aara.» Baɗemme-aatare tá maga ba najipu á jawapa-aara nanna.

*Ndava áza Yaisu áte tse á emnde am faya*  
(Mat. 22:23-33; Luka 20:27-40)

<sup>18</sup> Daaci ta duhe ge \*Saduki-aha keni ádeza Yaisu. Ba itare emnde na tá bantsa itare, baaka tse á emnde am faya na. Ta se ndavanu elva, a ba itare:

<sup>19</sup> «Malum, anƙwa a puwamitaa Muusa, a ba nane: má keɗaakeda egdza emmenara ge ura, a yaa mukse baaka egdzere wá, a melesemele egdza emmenara ge zhele-aara mukse nanna, a fanfa wulfe ge egdza emmenara na keɗaakeda na.

<sup>20</sup> Iyau, ndza tá anƙwa dawalaa vuye ta egdzar mama, duwa á makaji-aatare, a gaa gyaale, amá a naba keɗehe, a yaa mukse na, baaka egdzere.

<sup>21</sup> Daaci a naba melese ge sledába-aara mukse na, nane keni a naba keɗehe, a yaa mukse na baaka egdzere. A melese ge keyire-aatare keni, nane keni ba lahe nanna.

<sup>22</sup> Itare vuye na ta gaa ba mukse nanna palle, amá baaka ura a yaa egdzere an nane, lauktu á keɗá. Am iga-aatare, a keɗa ge mukse na keni.

<sup>23</sup> Vaci tse á emnde am faya mu, watse átuge ware mukse na palle? Aɗaba itare vuye na ndza mukse-aatare ba nane palle!»

<sup>24</sup> A nwaterante ge Yaisu, a ba nane á elvan ge itare: «Kure jakuraaveje áte baráma a jirire. A jakuraa uwe áte barama? Aɗaba diyakurka názu am wakita á Dadaamiya, diyakurka ndzedá á Dadaamiya keni ɗekiɗeki.

<sup>25</sup> Aɗaba máki tsarettse emnde am faya wá, baaka gá mukse, ma nwashwa keni baaka de gá zhele mazla-aara. Emnde baɗemme tá de njá ba seke malika-aha am samaya.

<sup>26</sup> Elva a tse á emnde am faya maa, ndaakurseka názena a puwetaa Muusa áte elva a dake emtu? Aɗaba a ba Dadaamiya á elvan ge Muusa áte eggye-aha á kure werre wá: Ba iya una ya Dadaamiya á Ibrahim, ya Dadaamiya á Isiyaaku, ya Dadaamiya á Yakubu.

<sup>27</sup> Daaci máki estuwa wá, tá á ba an shifa-aatare emndu werre. Aɗaba Dadaamiya wá, nane Dadaamiya á emnde na tá an shifa, Dadaamiya á emnde na ni tá an emtseka. Daaci diyaweddiye ganakini jakuraaveje ba jirire.»

*Yaikka ura-ara am shairiya-aha á Dadaamiya?*  
(Mat. 22:34-40; Luka 10:25-28)

<sup>28</sup> Anƙwa malum á \*tawraitu umele, a cenanaa á ba an hyema-aara názena ta ndaana tara Yaisu antara \*Saduki-aha maa, nane a nanna ganakini nwaterterɗwa Yaisu shagera. Daaci nane keni a naba duhe an ndava-aara ádezenara, a ba nane á elvan ge nane: «Yaikka ura-ara am shairiya-aha á Dadaamiya baɗemme?»

<sup>29</sup> A nwanante ge Yaisu, a ba nane á elvan ge nane: «Eccena kwa, náwa yá ndakndaha: Cenevaacena elva na ba shagera \*Iserayiila! Yaakadada Dadaamiya á miya wá, ba nane palle una Yaakadada.

<sup>30</sup> Ewwáya Yaakadada Dadaamiya á nana ervaunɗe á nana baɗemme, an shifa á nana baɗemme, an enƙale á nana baɗemme, ira an ndzedá á nana baɗemme.

<sup>31</sup> Eccena zlaḅe á daliye náwa buwire-aara: Ewwáya sleriya á ña ba seke ire á ña. Baaka una á ju ge una-aha ñanna.»

<sup>32</sup> A ba malum á tawraita na á elvan ge Yaisu: «Una wá, ñwaktenwa shagera, malum. Elva á ña na ba kalkale-aara. Yaakadada wá, ba ñane palle una Dadaamiya, baaka umele.

<sup>33</sup> Shagera ba urimagwe á wáyá Dadaamiya-aara an ervaunḁe-aara baḁemme, an eñkale-aara baḁemme, an ndzedá-aara baḁemme, ira á wáyá sleriya-aara ba seke ire-aara. Yaikka ba una ñanna arge sadake á dabba-aha, antara sadake á duksa-aha umele na tá vante ge Dadaamiya.»

<sup>34</sup> Nanna Yaisu ganakini a ñwanante á ba an unḁule-aara, a ba ñane á elvan ge ñane: «Ekka wá, a yakar ba kapáka palle ge dem \*kwara á Dadaamiya.»

Am iga á una ñanna, baaka ura a kwamaa ndavanu elva mazla-aara.

*\*Almasiihu á tsaaka an wulfe á \*Dawuda*

*(Mat. 22:41-46; Luka 20:41-44)*

<sup>35</sup> Daaci Yaisu aḁkwa á kwaraterse elva á Dadaamiya ge emnde am \*mashidi yaikke maa, a naba ndavateruhe, a ba ñane: «Ta bantsa malum-aha á \*tawraita \*Almasiihu wulfe á \*Dawuda mu, a sawa estara?»

<sup>36</sup> Adaba ndza a banba Dawuda an hákuma á Shedekwe Cudedde, a ba ñane:

A ba Yaakadada á elvan ge Yaakadada-aaruwa: Njinja am naḁafa-aaruwa, dem sarte na má ganatervege kelaade-aha á ña tate á puwa sera á ña.

<sup>37</sup> Dawuda an ire-aara a ḁahanaa an Yaakadada. Ay á sawa estara kena ni á gev wulfe-aara na?»

Bademme á dikele á emnde ñanna, ta cenanova á ba an higa.

*Yaisu aḁkwa á gíyá emnde geni a farfa hyema áte ire-aatare áza malum-aha á \*tawraita*

*(Mat. 23:1-36; Luka 20:45-47)*

<sup>38</sup> Daaci am sarte na aḁkwa á vaterte sera á elva-aha, a ba ñane á elvan ge itare: «Faufa hyema am ire á kure áza malum-aha á \*tawraita. Adaba itare ta emnde a waya marava am zane sadadde, tá kátá emnde tá gater use an ga ire am dagave á zlamaha.

<sup>39</sup> Am mashidi keni maa, tá kátá ba sledde na átire ge náza á emnde baḁemme na. Ma am muḁri keni, itare sey tá de kátá ba sledde na ni an dárádza jipu na.

<sup>40</sup> Emnde a za ñwasha wegyege áte há keni ba itare. Daaci tá slaḁanve maduwa-aatare ákatafke á emnde wá, geni ta emnde a jirire ágire. Itare zlaḁa-aatare á de jauje ge náza á emnde baḁemme vaci shairiya.»

*Sadake á nasherire na a fanaa wegyege a mukse*

*(Luka 21:1-4)*

<sup>41</sup> Daaci a njehe ge Yaisu herzhe an nakwati na tá puwa sadake á nasherire á dem huḁe-aara na, á zhára emnde tá aḁkwa puwa sadake á dem nakwati na. Á zhára dikele á emnde a berba, tá puwa sadake-aatare wá, sadake-aatare kwakya jipu.

<sup>42</sup> Am iga-aatare maa, a tsetehe ge wegyege a mukse umele ñane taláge, a de puwum kwaḁa-aara buwa.

<sup>43</sup> Daaci Yaisu a ḁante pukura-aha-aara, a ba ñane á elvan ge itare: «Yá ndaakur ba jirire: Wegyege a mukse na kwaya ñane talage ba jipu na wá, ñane a puwum názá-aara, jauje ge náza á emnde baḁemme.



<sup>44</sup> Adaba itare wá, kwakya nalmane-aatare ta saa ba cekwa-aara ge sadake á nasherire. Amá mukse na wá, ñane talage. Baaka tsa umele, amá a naba saa názu am rezege-aara bademme.»

## 13

*Yaisu á ndáhá elva a mbedá \*mashidi yaikke*

*(Mat. 24:1-2; Luka 21:5-6)*

<sup>1</sup> Saresse am \*mashidi yaikke maa, a ba pukura-aara umele á elvan ge ñane: «Malum ezzhara emtsaafé jeba á nderáva á mashidi na, yaikkire-aara antara zariyire á nákwá-aha-aara na bademme.»

<sup>2</sup> A ñwanante ge Yaisu, a ba ñane á elvan ge ñane: «Ká nanna una ñanna bademme na wá, watse á mbedá bademme, ba nákwá palle keni watse á jauka áte ukfeñara nákwá.»

*Zladá-aha na watse á magava lauktu á zla duniya*

*(Mat. 24:3-14; Luka 21:7-19)*

<sup>3</sup> De njaanja Yaisu áte ire á Wa Anyaranyara am ndaññire á \*mashidi yaikke. Pukura-aha-aara tara Piyer an Yakuba, Yuhanna ira Andere, itare wá, tá añkwa ázeñara. Ta ndavanuhe ge pukura-aha-aara ñanna, a ba itare tá elvan ge ñane:

<sup>4</sup> «Ndañerndaha watse á magava am sarte-ara una ñanna? Watse ñá dise áte uwe ganakini herzhe á magava duksa-aha ñanna?»

<sup>5</sup> Daaci a ba Yaisu á elvan ge itare: «Kure wá, faufa ba hyema, a se kefarakuraaka emnde umele.

<sup>6</sup> Adaba watse kwakya emnde na tá de sawa an zhera-aaruwa, ma ware keni á se ba: Ya ñane ba iya. Daaci tá se kefa emnde kwakya.

<sup>7</sup> Watse kwá cenáncena labare á wáva-aha am larde-aha na ba herherzhe an kure, antara am larde-aha na yiyiye an kure, amá gazlauka dekideki. Sey á magaavemage una-aha ñanna, amá zlafe zle á duniya ka emtsaafé.

<sup>8</sup> Watse larde umele á de darge larde umele an wáva. Emnde á slekse umele, tá de darge kwara á slekse umele an wáva. Á de gejava haha am tate-aha gergere, á de demda waya am larde-aha gergere. Una-aha ñanna wá, zlafe ba fakta á zladá emtsaafé, ba seke náza á mukse na fanantaufe zladá á ya.

<sup>9</sup> «Amá kure wá, faufa hyema ba shagera áte ire á kure. Adaba watse tá dákurá á de katafke á shairiya, tá de slerpákurá an ja am mashidi-aha-aatare. Watse tá de tsákurá á katafke á male-aha á duniya, tá de tsákurá á katafke á slekse-aha adaba zhera-aaruwa. Estuwa, kure keni kwá de ndaasendahe seydire áte iya á katafke-aatare.

<sup>10</sup> Amá wá, sey máki cenaráncena emnde labare á higa am jeba-aha á emnde na tá am duniya bademme, lauktu á zla duniya.

<sup>11</sup> Am sarte na ni watse tá dákurá á de katafke á shairiya na wá, dzamauka ire á názena kwá de ndaaná kure, de ndaundaha ba názena ni á de semsa á sem ire á kure am tate ñanna. Adaba una ñanna elva á kure ka, á de vakurta ba Shedekwe Cufedfe.

<sup>12</sup> Am sarte ñanna maa, emnde umele tá de vaterta ba itare an erva-aatare egdzar mama-aha-aatare ge emnde, geni a de cebarateraceba. Dada-aha keni tá de vaterta ba itare egdzara-aatare ge emnde, geni a de cebarateraceba. Egdzara umele keni tá de daterar ge dada-aha-aatare antara mama-aha-aatare, tá de ceba ba shifa-aatare.

13 Emnde bademme tá de dá ba kelaadire ádete kure adaba zhera-aaruwa. Amá edda una tsaatse shagera dem halavuwaa-aara wá, á lyelye shifa-aara.»

*Zladá na baaka kalle-aara na*  
(Mat. 24:15-28; Luka 21:20-24)

14 «Watse kwá nanna duksa na ni tá dahaná an shagerkire emtan̄ka d̄ekideki na am tate na zlaya-aara ka. (Ma a ndaasa ware elva-aaruwa na keni, a cenevaacena elva n̄anna ba shagera). Vacite na ni má nakuranna duksa n̄anna wá, watse kyaakya ge emnde na tá am Yahudiya, tá zlerda zhagade á dem huđe á wa.

15 Edda una áte ire á bere keni, a tsun̄ka á dem huđe á bere ge hálá kazlan̄a-aara.

16 Edda una am fe keni, a eptseka á sá ge se hálá nan̄gyuwe-aara.

17 Watse á tsaame kwa zladá á n̄washa na watse tá á huđe am sarte n̄anna, antara n̄washa na tá an egdzara áte erva na!

18 N̄alaun̄ála Dadaamiya ganakini a gevka lámare n̄anna am sarte á ekhye.

19 Adaba watse kwakya jipu zladá am sarte n̄anna. Ta nderaa estuwa duniya daga am fakta sem vatena, jerka jeba á zladá n̄anna d̄ekideki. Á de jerka keni zladá na ni ta kalle an una n̄anna.

20 Ma andze gulanaaka Dadaamiya hare-aha á zladá n̄anna wá, ma andze á jauka ura an shifa ba palle keni. Amá a naba gulanaahe ge Dadaamiya adaba emnde na a dzeratersaa n̄ane tá átuge n̄ane na.

21 «Daaci am sarte n̄anna, ma a bakurnaa ware: Náwa an̄kwa \*Almasihu áhuna, bi kwaye an̄kwa áhuwa, liyauka elva n̄anna d̄ekideki.

22 Adaba watse tá jesaareje almasihu-aha fida, antara nabi-aha fida am sarte n̄anna. Watse tá maga nalaama-aha antara najipu-aha gergere, geni ambane tá k̄efateraakedá emnde na ni a dzeratersaa Dadaamiya na áte en̄kale.

23 Kure wá, faufa hyema ba shagera, adaba fanakuremfa am vuwa zlauzle.»

*Sawa á \*Ura á emnde bademme*  
(Mat. 24:29-31; Luka 21:25-28)

24 «Am iga a hare-aha á zladá n̄anna maa, vaciya á de gevge dan̄we bademme, tere keni á de máreka parakkire-aara,

25 terlyakwa-aha keni watse tá geda á sem áhá, bademme á ndzedá á názena áte samaya á de gejavtegeje ba n̄an̄are slede.

26 Daaci watse tá zhárá ba iya \*Ura á emnde bademme yá an̄kwa á sawa áte kumba, yá sawa an hákuma yaikke antara d̄emd̄emire.

27 Watse yá bela malika-aha-aaruwa á dem karáfke-aha á duniya ufađe kerde, tá jatermaare ge emnde na ya dzeratersaa ya na á sawa am tate-aha bademme.»

*Gáráva an nabugda, má yaaya hyema an̄waslire*  
(Mat. 24:32-35; Luka 21:29-33)

28 «Diyaweddiye á ba áte mama á nabugda. Máki kwa nanna gedaageda hyema átekwa, yaaya umele an̄waslire wá, diyakurdiya ganakini herzhavteherzhe madare.

29 Una keni ba duksa palle. Máki an̄kwa á magava duksa-aha n̄anna wá, diyaweddiye ganakini iya keni yá á ba áte we á sera mazla-aara ge sawa.

30 Yá ndaakur ba jirire: emnde a zamane na tá de zlauka ba estuwa, sey máki naranna duksa-aha n̄anna.

<sup>31</sup> Tara samaya an haha wá, tá nabe kedfa, tá zlauzle. Amá elva-aaruwa wá, á kedfeka dekideki, sey má gevge.»

*Sarte á zle á duniya wá, diyaa ba Dadaamiya palle*  
(Mat. 24:36-44)

<sup>32</sup> «Amá elva á hárá á bere, antara sarte nanna wá, baaka slediya-aara dekideki. Ma malika-aha am samaya, ba \*Egdza á Dadaamiya keni diyaa, sey diyaa ba Dadaamiya palle nane Dada.

<sup>33</sup> Daaci faufa hyema, pauka hare, adaba diyakurka sarte nanna.

<sup>34</sup> Una nanna watse á magava ba seke náza á edda á há, má á daa shula. Lauktu á zlalá, á faterem huđe á há-aara am erva ge emnde a slera-aara, ma ware keni á far slera na á de maganá nane, á vante sawari ge slewufa á wakiya, geni a peka hare dekideki.

<sup>35</sup> Daaci ba duksa palle ge kure keni. Pauka hare, tsakwautsakwa hyema, adaba diyakurka sarte na ni á de sá edda á há átekwa na. Bi watse á sá an mangaripu, bi an huđe á vayiya, bi an irenlya, bi an enlya.

<sup>36</sup> Máki saasa am beressire wá, a se berakurka kwá am hare.

<sup>37</sup> Elva nanna ya bakurnaa iya na wá, ge emnde bademme. Daaci bademmire á kure, pauka hare, tsakwautsakwa hyema!»

## 14

*Male-aha tá am sawari á eksá Yaisu*  
(Mat. 26:1-5; Luka 22:1-2; Yuh. 11:45-53)

<sup>1</sup> A juwaa ba hare buwa tá maga munri á \*Paska antara munri á depain na baaka shahi á makala am huđe-aara na. Am sarte nanna maa, male-aha á \*liman-aha, antara malum-aha á \*tawraitá, tá ankwá tatayaná á ba an ndzedá dabari ganakini tá eksevaksa Yaisu á ba an nasherire, tá kedanaakeda shifa-aara.

<sup>2</sup> A ba itare am dagave-aatare: «Magaumika una vaci munri, geni a tsaranteka emnde elva.»

*Mukse na a puwar waye ge Yaisu*  
(Mat. 26:6-13; Yuh. 12:1-8)

<sup>3</sup> Am sarte na Yaisu am Baytaniya maa, a dem mbá á Simaun umele ndza á waná derve. Tá arge dafa maa, a duhe ge mukse umele an kuderá á waye umele tá dahaná an nardisa, á se emtake, kwakya gane-aara keni. Daaci mukse na a naba kezlanvuhe ge we á kuderá á waye nanna, a puwanem waye na am ire ge Yaisu.

<sup>4</sup> Emnde na tá ankwá áhuwa nanna wá, emnde umele-aatare a naba jaterhe ge ervaunđe, a ba itare am dagave-aatare: «Azara nampire-aara kina ta badzanve waye na?»

<sup>5</sup> Ábi ma andze tá naba veluvelé ma gursa deremke keni, daaci ma tá naba tegatertega ge talaga-aha.» Daaci ta fantau ge far haypa ge mukse na.

<sup>6</sup> Amá a ba Yaisu á elvan ge itare: «Weshawananteka ire ge mukse na. Labára kwá hyainá lyuwa? Názena a maginaa nane na shagera jipu.

<sup>7</sup> Adaba talaga-aha wá, ma vaatara keni watse tá á ba átevege kure. Ba kelaa má kwá kátá magaterá shagerire, watse ba kwá emmaga. Amá iya wá, watse ya baaka átevege kure.

<sup>8</sup> Mukse na wá, nane maginaamaga názena ni a dzegwanaa nane. A puwiyar waye na wá, tsatsiyaatsatse zlauzle ge beliya am evege.

<sup>9</sup> Yá ndaakur ba jirire, am huđe á duniya bademme, bademme á tate na ni tá de bálá labare á higa átekwa na wá, tá de ndaha názena ni a maganaa mukse na keni, tá de viyanaaka.»

*Yahuda ankwá á vela Yaisu*  
(*Mat. 26:14-16; Luka 22:3-6*)

<sup>10</sup> Am iga a una nanna maa, a naba tsetehe ge Yahuda Iskariyaut, nane keni ba palle á pukura-aha kelaawa ju buwa. A duhe ge nane ádeza male-aha á \*liman-aha, a de bateraa á kátá velateru Yaisu.

<sup>11</sup> Higa ge male-aha na, a ba itare tá elvan ge nane: «Watse ná vakte nalmane.» Daga á ba am sarte nanna, Yahuda a fantau ge tataya faterem Yaisu am erva-aatare.

*Yaisu arge masane á \*Paska antara pukura-aha-aara*  
(*Mat. 26:17-25; Luka 22:7-14, 21-23; Yuh. 13:21-30*)

<sup>12</sup> Am váha zunɲwire na ni tá zá muɲri na baaka shahi á makala am huđe-aara na wá, tá cebán ba vacite nanna egdza kyawe á \*Paska. Ta ndavanu ge pukura-aha-aara, a ba itare tá elvan ge nane: «Ká kátá njá de tsatsakaná áme dafa á Paska?»

<sup>13</sup> Daaci Yaisu a eksetaa emnde buwa am pukura-aha-aara, a belateraa á de katafke. A ba nane á elvan ge itare: «Dawmbare á dem huđe á ekse, kwá de já ire antara zhele á sepa yawe am hwama wá, dabaudfaba á dem mba na á duwa nane.

<sup>14</sup> De bawanánba ge edda á há wá, a ba Malum: Áma bere na njá de zá dafa á Paska am huđe-aara antara pukura-aha-aaruwa?

<sup>15</sup> Daaci nane á de marakurá bere yaikke átire ge bere an tsatsa kazlana am huđe-aara bademme, kwá de tsatsamiya dafa á muɲri am huđe-aara.»

<sup>16</sup> Daaci ba zlalá ge pukura-aha na á dem huđe á ekse, tá de bera duksa ba seke una a baternaa Yaisu na. Ta tsatsaa dafa á muɲri am bere nanna.

<sup>17</sup> Am iga a mangaripu maa, daada Yaisu antara pukura-aha-aara.

<sup>18</sup> Am sarte na tá ankwá á zá masane, a ba Yaisu á elvan ge itare: «Yá ndaakur ba jirire, watse á veliya ba palle á kure, kwa emnde na náwa má zá dafa átirpalle na.»

<sup>19</sup> Daaci bademme á pukura-aha jáviya ba tá kyuwa. Ta fantau ge ndavanu an palpale, ma ware keni á baná ba: «Iya ka ndza Yaakadada?»

<sup>20</sup> A nwaterante ge Yaisu, a ba nane á elvan ge itare: «Watse á veliya ba palle á kure, kwa pukura-aha kelaawa ju buwa na náwa má zá dafa am tása palle na.

<sup>21</sup> Iya \*Ura á emnde bademme wá, baaka pekya-aara, sey ba yá emtsa. Áte una ta puwete am wakita á Dadaamiya áte ya wá, ba estuwa. Amá watse zladá jipu ge edda una ni á de veliyá nane, ambane ma yareka.»

*Masane Cufedde*  
(*Mat. 26:26-30; Luka 22:14-20; 1 Kaur. 11:23-25*)

<sup>22</sup> Am sarte na tá ankwá zá masane maa, Yaisu a eksetaa dafa, a slafanaa we-aara ge Dadaamiya, a kezlanve dafa na, daaci a vaterte ge pukura-aha-aara. A ba nane á elvan ge itare: «Nawmbare, lyauvalya. Una na wá, vuwa-aaruwa.»

<sup>23</sup> Am iga a una nanna maa, a eksante feka, a slafanaa we-aara ge Dadaamiya, a vaterte, itare bademme sharushe. Am sarte na tá ankwá eshá, a ba nane á elvan ge itare:

<sup>24</sup> «Una nanna uzhe-aaruwa a puvaa afaba emnde kwakya, Dadaamiya á ngudaterá an una nanna namána ge emnde.

<sup>25</sup> Yá ndaakur ba jirire, am sali kataliya na wá, yá dalika á shá yawe á egdza a náfa mazla-aara, sey watse yá de shá ba una áŋwaslire am zlanna á Dadaamiya.»

<sup>26</sup> Am iga á una ɲanna maa, ta eksante láhe á gálá Dadaamiya, ba tse-aatare, ta zlála ádetete ire á Wa Anyaranyará.

*A ba Yaisu watse á yiyaaya Piyer*

*(Mat. 26:31-35; Luka 22:31-34; Yuh. 13:36-38)*

<sup>27</sup> Daaci a ba Yaisu á elvan ge pukura-aha-aara: «Bademme á kure na watse kwá yiyaaya. Adaba anƙwa an puwa am wakita á Dadaamiya, a ba ɲane: “Watse yá ejja suni, bademme á kyawe-aha tá de zadɛvzadɛ.”

<sup>28</sup> Amá má watse tsanetse am faya wá, watse yá daada ba iya zunɲwe arge kure á dem Galili.»

<sup>29</sup> A ba Piyer á elvan ge ɲane: «Ma yarakaaya emnde umele keni, iya wá, yá taa yakaaka deƙideƙi.»

<sup>30</sup> A ɲwanante ge Yaisu, a ba ɲane á elvan ge ɲane: «Yá ndak ba jirire, an vayiya ba vatena na, lauktu á kyuwetekyuwa tsákálá ge buwire wá, watse ká banba ka ser keye geni diyakikire.»

<sup>31</sup> Amá a farhe zlaɓe ádaliye Piyer, a ba ɲane: «Yá ndaaka una deƙideƙi. Ma á eksa shifa keni, emtsa á miya ba buwa.» Pukura-aha umele keni bademme ta ndaha ba una.

*Yaisu am Gaicaimane*

*(Mat. 26:36-46; Luka 22:39-46)*

<sup>32</sup> Am iga á una ɲanna maa, daraada am tate umele tá dahaná an Gaicaimane. A ba ɲane á elvan ge pukura-aha-aara: «Njawanja áhuna, kwaye iya yá de maga maduwa áhuwa.»

<sup>33</sup> A eksetaa tara Piyer an Yakuba ira Yuhanna, á zlála antara itare á dem tate ɲanna. Daaci a fantau ge tápa emtanƙire, antara zlaɗa na ni an tsaka ire na am ervaunɗe-aara.

<sup>34</sup> Daaci a ba ɲane á elvan ge itare: «Baaka zlaɗa na ni yá tapanka am ervaunɗe-aaruwa na, yá tápa zlaɗa á emtsa. Naba njawanja áhuna, pauka hare deƙideƙi, sherauseshere ice ba shagera.»

<sup>35</sup> A zlalehe yiyye cekwaanɗuɗi an itare, a de kezlaa ugje am haha, a magaa maduwa, a ɲala Dadaamiya geni máki á gevge wá, a sawka zlaɗa ɲanna ásete ɲane.

<sup>36</sup> A ba ɲane: «Eddaye-aaruwa, baaka názu á gevka ázeɲa. Tasle á ɲa, jinaaja zlaɗa na ásete iya na. Amá wá, a gevge ba namaari á ɲa arge náza-aaruwa.»

<sup>37</sup> Daaci ba tse-aara wá, a seza pukura-aha keye na, amá a se berater tá am hare. A ba ɲane á elvan ge Piyer: «Simaun, ka ɲara ka pa hare? Dzegwakanka njá an ice ba saa palle keni degey?

<sup>38</sup> Pauka hare! Magaumaga maduwa geni a badakuruka shaitaine. Adaba ire á urimagwe wá, wayaawáya jipu mága fesaarfire, amá baaka payɗa á vuwa.»

<sup>39</sup> A zlalehe zlaɓe ádaliye, a de magaa ba maduwa-aara ɲanna.

<sup>40</sup> Eptsa-aara zlaɓe ádaliye áseza pukura-aha-aara, a se berater tá á ba am hare. Dzegwaránka basha háre deƙideƙi. Daaci ta ba haslakke ba estuwa, baaka názu tá ɲwananta itare.

<sup>41</sup> Am sarte na a eptsa ge keyire, a ba ɲane á elvan ge itare: «Kure kwá pá ba hare á kure, kwá anƙwa á puwansepuwe shifa á kure ka? Ay degiya hyaahya pa hare ɲanna, iya \*Úra á emnde bademme, hyephye sarte-aaruwa. Kwaye tá de fime am erva ge emnde a haypa.



<sup>42</sup> Tsawetse, kwaye samsa edda una ni a veliyaa nane na, mí de yainuye!»

*Ta eksevaa estuwa Yaisu*

(*Mat. 26:47-56; Luka 22:47-53; Yuh. 18:3-12*)

<sup>43</sup> Ba elva nanna keni zlabé zланаака Yaisu wá, kertenj tá zhárá ba sesse Yahuda palle á pukura-aha kelaawa ju buwa. Emnde kwakya tá sá d̄aba Yahuda nanna, tá an katsákar-aha, antara zade-aha ceppe am erva. Ta belateraa male-aha á \*liman-aha, antara malum-aha á \*tawraita, ira male-aha á Yahudiya-aha.

<sup>44</sup> Yahuda na a veluwa nane Yaisu na maa, kwaratersekware zlauzle nalaama á ngyekwaterá Yaisu ge dikele á emnde nanna. A ba nane á elvan ge itare: «Ba máki kwa niina yá an̄kwa gan use ge ura ni, seke an̄kwa urire á n̄ere an edda-aara wá, edda una kwá tatayaná kure na ba nane, naba eksauváksa, n̄awanaaŋa ba shagera, má kwá danda na belawanaaka.»

<sup>45</sup> Ba samsa Yahuda nanna wá, a naba duhe suuwe ádeza Yaisu wá, «Use Malum,» a ba nane, á gan use an ervaun̄de-aara palle ágire.

<sup>46</sup> Daaci yalla á ba emnde na, erva am mbiye ge Yaisu, ta naba eksevaahe.

<sup>47</sup> Ay, palle á emnde á Yaisu a naba tedese masalam-aara am bere, a waa sleslera á male á \*liman-aha, a icanaa hyema palle.

<sup>48</sup> A ba Yaisu á elvan ge emnde na ta se eksa nane: «Kwá se eksiyá an masalam-aha, antara zade-aha am erva na mu, ya neyle emtu?»

<sup>49</sup> Ábi kelaazare yá njá á ba am dagave á kure am mashidi, yá an̄kwa kwaraterse elva á Dadaamiya ge emnde, labára eksakurika? Amá diyaweddiye geni una nanna a gev ba geni, a gevge názena á ndaaná wakita á Dadaamiya.»

<sup>50</sup> Daaci kyaakya zhagade ge pukura-aha baɗemme, ta naba yánhe.

<sup>51</sup> An̄kwa dawale umele a d̄aba Yaisu maa, nane a duwá á ba an gwad̄au-aara áte vuwa. Ta ekseksa nane keni,

<sup>52</sup> amá a naba yateraa gwad̄au am erva, ba zhagade-aara an ukhyiye dey.

*Yaisu á katafke á \*kendekyiya yaikke*

(*Mat. 26:57-68; Luka 22:54-55, 63-71; Yuh. 18:13-14, 19-24*)

<sup>53</sup> Daaci ta naba daa Yaisu na á dem mba á male á male-aha á \*liman-aha baɗemme. Kertenj jarammeje male-aha á liman-aha, antara male-aha á larde, ira malum-aha á \*tawraita baɗemme am mba á liman nanna.

<sup>54</sup> Piyer wá, a daa d̄aba Yaisu ádehuwa, amá wá, gaterápteka d̄ekideki. A de demhe á ba á dem riya á liman nanna. Áhuwa maa, a de demhe am dagave á emnde a ufa mashidi, tá an̄kwa cena kárá, a njehe.

<sup>55</sup> Male-aha á liman-aha antara emnde a \*kendekyiya na baɗemme farantaufe ge tataya emnde ge mága seydire áte Yaisu, ma ba fida keni, lauktu ma tá bá nanaaŋa shairiya á emtsa.

<sup>56</sup> Kwakya tsa emnde na ta de d̄atsanve fida ge Yaisu, amá baaka názu ta eksanaa áte nane.

<sup>57</sup> Daaci ta tsetehe ge emnde umele, ta de magaa seydire á fida na áte Yaisu, a ba itare:

<sup>58</sup> «Zhel na degey ndza n̄a cenáncena am mbuwe-aara a ba nane: Yá naba mbedánaambeda \*mashidi yaikke na ta nderanaa emndimagwaha na, yá nderaalindere á ba am hare keye, á duka erva á urimagwe á dem huɗe-aara, á bina.»

<sup>59</sup> Aley, ba itare keni jammeka elva-aatare am seydire-aatare.

<sup>60</sup> Daaci a tsete ge liman yaikke na á katafke á emnde bademme, a ba ñane á elvan ge Yaisu: «Ká ndaaka elva ðekideki ka? Tá ndáhá uwe ñane áte ka emnde na?»

<sup>61</sup> Amá ñwaaka Yaisu, a ðu ba we-aara. A ndavanuhe zlafe ádaliye ge liman na, a ba ñane: «Ba ekka una ka \*Almasiihu, Egdza á Saksage na emtu?»

<sup>62</sup> A ñwanante ge Yaisu, a ba ñane: «Ane, ya ñane ba ya. Amá bademmire á kure na, watse kwá niina zlafe ádaliye iya \*Ura á emnde bademme, yá njá am naðafa á Saksage na Sleksa ba ñane na. Zlafe ádaliye watse kwá niina yá sawa am kumba á samaya.»

<sup>63</sup> Ba a ndaase una Yaisu wá, liman yaikke na a naba dzadzanve zane áte vuwa-aara. A ba ñane: «Una wá, ña baaka an wedere á seyde umele mazla-aara.

<sup>64</sup> Ábi kwa cenanaa á ba an hyema á kure, a ganve ire-aara kalle an Dadaamiya. Ázara a ba elva á kure?» A ba itare bademme-aatare, «Una wá, ñanaaṅa shairiya, a njeka an shifa ðekideki.»

<sup>65</sup> Daaci emnde umele ta fantau ge kyefanem nyaihe am ice ge Yaisu, ta faðanse ice an kacekaca, ta vavante ðeðekwa, a ba itare tá elvan ge ñane: «Diyeddiye emnde na ta jakja na.» Ta eksante emnde a ufa mashidi, ta vavante babarva itare keni.

### *A ba Piyer ñane diyaaka Yaisu ðekideki*

*(Mat. 26:69-75; Luka 22:56-62; Yuh. 18:15-18, 25-27)*

<sup>66</sup> Amá Piyer wá, zlafe ba nja-aara am áhá-aara, am huðe á há ñanna. Daaci a duhe ge palle á kwatena-aha á \*liman ñanna ádezetare,

<sup>67</sup> a naa Piyer á cená kára, a zharaa Piyer ba shagera, a ba ñane: «Ábi ka keni ka ba ura á Yaisu ñanna, ura Nasarátu na?»

<sup>68</sup> Amá eksarka Piyer ðekideki, a ba ñane á elvan ge ñane: «Ma ká ndaha elva á uwe keni, diyanka ya ðekideki. Elva á ña na á duka á dem ire-aaruwa.» Daaci a naba tsetehe am tate ñanna, a zlala ásete wakyiya. Tsaktsakwalikwaa, á ba tsákálá keni.

<sup>69</sup> Cekwaangudí wá, kwatena na nanna Piyer zlafe ádaliye, a ba ñane á elvan ge emnde: «Degiya zhel na kwaya ñane na keni, ba palle-aatare.»

<sup>70</sup> Amá Piyer ba eksarka ñanna. Shekwaashekwa cekwaangudí a ba emnde na tá áhuwa, tá elvan ge Piyer: «Baaka shaige-aara ðekideki, ka keni ka ba palle-aatare. Aðaba ekka keni, ka ura Galili.»

<sup>71</sup> Amá Piyer a fantau ge za waða-aha, a ba ñane: «Náwa Dadaamiya diyanka dawale ñanna ðekideki.»

<sup>72</sup> Ba ñane keni zawze waða wá, tsaktsakwalikwaa, á ba tsákálá ge buwire. Daaci a naba yehete názena a ndaana Yaisu. Aðaba a bananba Yaisu: «Lauktu á kyuwetekiya tsákálá ge buwire wá, ká de banba ka ser keye geni diyakikire.» Daaci a naba fantau ge kyuwa.

## 15

### *Daránda Yaisu á de katafke á sleksu \*Pilaatu*

*(Mat. 27:1-2, 11-14; Luka 23:1-5; Yuh. 18:28-38)*

<sup>1</sup> Daaci makuralla-aara á ba an enlya-waabere, ta naba jamme ge male-aha á \*liman-aha, antara male-aha á larde, malum-aha á \*tawraitu ira male-aha umele na tá njá am \*kendekiya na bademme. Ta puwete zawa áte Yaisu, ta dáná ádeza sleksu \*Pilaatu.

<sup>2</sup> A ndavanu ge slekse, a ba ñane: «Ba ka una ka slekse á Yahudiya-aha tá enndá na?» A ñwanante ge Yaisu: «Ba estuwa,» a ba ñane á elvan ge ñane.

<sup>3</sup> Male-aha á liman-aha ta fantau ge datsanve fida kwakya ge Yaisu.

<sup>4</sup> Daaci a ba sleksu Pilaatu á elvan ge ñane: «Ká cenánka elva na tá tsakaná itare áte ka na emtu? Labára ká ndaaka elva?»

<sup>5</sup> Amá Yaisu dúwa ba we-aara, ndahaaka elva mazla-aara, haa Pilaatu á maga najipu-aara.

*Sleksu \*Pilaatu a magaa názena tá kataná emnde-aara  
(Mat. 27:15-26; Luka 23:13-25; Yuh. 18:39-19:16)*

<sup>6</sup> Ba kelaa má samsa munri á \*Paska maa, mbarsemba emnde a ekse, slekse á belaterá dangay palle, edda una tá kataná itare.

<sup>7</sup> Ay am sarte ñanna maa, ndza ankwá dawale umele, zhera-aara Barabas an nguda am dangay. Ta halateraa antara emnde umele, ta magaa fitenire, haa ta naba ja shifa am fitenire ñanna.

<sup>8</sup> Daaci ta naba d'álá emnde a ekse ádeza sleksu \*Pilaatu, ta de ndavanu názena ni mbarsembe ba kelaa iva na.

<sup>9</sup> A ba sleksu Pilaatu á elvan ge itare: «Wayakurwáyá emtu an slekse á Yahudiya-aha, yá belakurnaabela?»

<sup>10</sup> Diyaadiya tsa ganakini male-aha á \*liman-aha ta danaa Yaisu adaba ba shelha, baaka elva umele.

<sup>11</sup> Amá male-aha á liman-aha ta naba fantau ge gaa ervaunđe á emnde. Adaba una ñanna ta bantsa itare: «Belanernaabela ba Barabas.»

<sup>12</sup> A ndavateruhe zlabé adaliye ge slekse, a ba ñane á elvan ge itare: «Ay yá maganá uwe ge edda una kwá d'ahaná an slekse á Yahudiya-aha na?»

<sup>13</sup> Ta ñwanante á ba an ká kwara á dem zhegela, a ba itare: «Zlejelezlejelela áte dzangala!»

<sup>14</sup> A ba slekse á elvan ge itare: «A gu uwe estuwa?» Amá itare ta far hula á ba an ndzedá, a ba itare: «Zlejelezlejelela!»

<sup>15</sup> Am slekse á kátá higerterehiga emnde, a naba belateraa Barabas. Amá Yaisu wá, ta zu an já, lauktu tá de zlejelaná áte dzangala.

*Sawji-aha tá ankwá á epsawa Yaisu  
(Mat. 27:27-31; Yuh. 19:2-3)*

<sup>16</sup> Daaci ta naba tedante ge sawji-aha á dem huđe á há á sleksu \*Pilaatu, ta de jemmaa sawji-aha bademme ásetarge ñane.

<sup>17</sup> Ta tsekwanme am dira hanje, ta nderse dake, ta fadanse ire an ñane agire \*danjkaula.

<sup>18</sup> Mazla-aara ta fantau ge gyanu rume agire, a ba itare: «Aska á ña, slekse á Yahudiya-aha.»

<sup>19</sup> Ta naba tadfanu zade am ire, ta kyafanem nyaihe am ice, ta kezlaa ugje á katafke-aara, tá fá daradza áte ñane agire.

<sup>20</sup> Zlaruzle am epsawepsawa maa, ta tsakwanse am dira na, ta tsekwanme am nanjyuwe-aara. Daaci ta danse á dem tate na tá de zlejelaná átekwa na.

*Náwa ta zlejelanaa estuwa Yaisu áte dzangala  
(Mat. 27:32-44; Luka 23:26-43; Yuh. 19:17-27)*

<sup>21</sup> Tá ankwá danda maa, ta naba jaa ire antara ura Siraine umele, zhera-aara Simaun, eddetare ge tara Alaikzandere antara Rufus, ñane átira sa á sawa am makwata. Daaci sawji-aha na ta naba hyarhe ge sepala dzangala á Yaisu.

<sup>22</sup> Ta danhe Yaisu na á dem tate na tá d'ahaná an Gaulgauta na, amaana: Tate á feka á ire.

<sup>23</sup> Áhuwa ñanna maa, ta kátá fanu mbazla ge Yaisu. Mbazla ñanna keni ankwá duksa yaiyaihe am huđe-aara ge gulanna zlaďa, amá Yaisu shaaka.

<sup>24</sup> Mazla-aara ta naba zlejelehe áte dzaŋgala. Itare ta tegaa kazlaŋa-aara am dagave-aatare. Ge tega kazlaŋa-aara na wá, ta maga njeri am dagave-aatare, ganakini a sesse edda una ni á zaná ñane ma uwe keni.

<sup>25</sup> Am sarte na ta zlejelanaa áte dzaŋgala ñanna wá, ta zlejelanaa am saa maselmana á enlya.

<sup>26</sup> Ta naba puwete dalila á já shifa-aara an ire ge ñane, a ba itare: «Ŋane una slekse á Yahudiya-aha.»

<sup>27</sup> Tá ankwá neyle-aha buwa ta zlejelateraa átirpalle antara Yaisu áte dzaŋgala-aha-aatare. Palle ta zlejelanaa am naďafa-aara, palle keni am nazlaďa-aara. ((

<sup>28</sup> A gevaa estuwa názena ni a ndaana wakita á Dadaamiya. Ad'aba a ba wakita á Dadaamiya: «Ŋane keni ta femhe am kezlakula á emnde a mága haypa.»))

<sup>29</sup> Emnde a degáshe am tate ñanna tá geja ba ire, tá ámbera ezzlazle. A ba itare tá elvan ge ñane: «Há! ba ka una! Ábi ka bantsa ka: Ká naba mbed'anaambeda \*mashidi yaikke na, á ba am hare keye ká nderendere umele, á ba ka?

<sup>30</sup> Labára ká taa ñezlanaaka ba ka ire á ña? Tsekwanaatsekwa kwa ire á ña áte dzaŋgala na!»

<sup>31</sup> Male-aha á \*liman-aha, antara malum-aha á \*tawraitá keni, ta epsawse ba estuwa. A ba itare am dagave-aatare: «Iyau, á dzegwándzegwa ñezla emnde umele; ire-aara wá, á taa ñezlanaaka!

<sup>32</sup> Ábi ñane \*Almasiihu, slekse á \*Iserayiila keni ba ñane. A tsekwanaatsekwa ire-aara áte dzaŋgala wá, baďemme mí fetarfe áte ñane.» Antara ba emnde na ta zlejelateraa antara Yaisu na keni, ta ezzlazle.

*Náwa ndza a emtsaa estuwa Yaisu  
(Mat. 27:45-56; Luka 23:44-49; Yuh. 19:28-30)*

<sup>33</sup> An vacitire wá, a naba tsekwa ge tabed'ammire ásetarge duniya baďemme, dem lásar emnde tá á ba am tabed'ammire ñanna.

<sup>34</sup> Am saa keye wá, Yaisu a ketaa kwára á ba an ndzed'a: «Aili! Aili! Laima sabaktani?» Amaana wá: «Dadaamiya-aaruwa labára yakiyaaya? Dadaamiya-aaruwa labára yakiyaaya?»

<sup>35</sup> Á bá emnde umele am emnde na tá ankwá á tsatse áhuwa: «Á d'aha nabi \*Ailiya degiya ñane.»

<sup>36</sup> Palle-aatare a naba ted'ante zhagade, a de eksetaa sausau, a ngud'etaa áte zade, a femhe am mbazla umele d'and'ane ba estuwa, daaci a kante, a fantaa áte we ge Yaisu geni a shushe. Daaci a ba ñane: «Zharaumizhárá emtsaade, má watse á semsa \*Ailiya ñanna á se tsekwanaatsekwa.»

<sup>37</sup> Amá Yaisu a fu hula á ba an ndzed'a, mazla-aara á dese ge shifa am ñane.

<sup>38</sup> Am sarte ñanna maa, ankwá kacekaca á dzegwa am \*mashidi yaikke wá, a naba tamme kalkale, a fantau á sawa átire sem áhá.

<sup>39</sup> Male á sawji-aha á Rauma na ankwá áhuwa, á njá am ndaŋpire á wafke á Yaisu, nanna emtsa a Yaisu maa, a ba ñane: «Zhel na wá, egdza á Dadaamiya ba jire.»

<sup>40</sup> Nwasha umele keni ndza tá ankwá áhuwa. Ta tsaahé yiyiye, lauktu ta zhara názena ni ankwá á magava na. Tá ankwá tara Maari mukse á

emnde a Magdala, an Salaume, ira Maari emmetare ge tara Yakuba cekwa antara Yauseys.

<sup>41</sup> Nwasha nanna wá, daga am Galili tá anƙwa d̄aba Yaisu, tá anƙwa melanumele. Tá anƙwa zlaƙe ádaliye n̄washa umele am tate nanna, itare keni ta saa á d̄aba ba Yaisu.

### *Heda á Yaisu*

(*Mat. 27:57-61; Luka 23:50-56; Yuh. 19:38-42*)

<sup>42</sup> Vacite nanna maa, vaci mága niya, adaba makuralla-aara kwaskwe á puwansepuwe. Herzhe á belya vaci wá,

<sup>43</sup> a semhe ge Yusufa ura Arimatiya. Yusufa nane wá, ura male am \*kendekyiya yaikke. Am ervaunƙe-aara nane keni anƙwa á ufa ba zamane á njá am \*kwara á Dadaamiya. Daaci nane a naba sherse ice, a duhe ádeza sleksu \*Pilaatu, a de ndavanu baráma á eksa emtsa á Yaisu.

<sup>44</sup> Cenáncena sleksu Pilaatu ganakini kerten emtsamtsa Yaisu, a mága ba najipu-aara. Adaba una nanna a belaa we, ta de dahanante male á sawji-aha. A se ndavanuhe, a ba nane: «Emts-aara shekwaashekwa emtu?»

<sup>45</sup> Am sarte na cenáncena jirire-aara áza male á sawji-aha na, a naba vante baráma ge Yusufa.

<sup>46</sup> Daaci Yusufa a de shekuve kalpakane, jeba á kalpakane nanna ba lefedde, a se tsekwa emtsa á Yaisu áte dzaŋgala, a de fademe am kalpakane na. Daaci a de feme am evege ta yese am cacera, a berhanu palame yaikke ge we á evege nanna.

<sup>47</sup> Amá tara Maari mukse á emnde a Magdala, antara Maari emmenjara ge Yauseys wá, itare ndza tá á ba áhuwa, ta ezzhara am sarte na tá hedá Yaisu nanna.

## 16

### *Yaisu tsetse am faya*

(*Mat. 28:1-8; Luka 24:1-12; Yuh. 20:1-10*)

<sup>1</sup> Dedde kwaskwe á puwansepuwe maa, tara Maari mukse á emnde a Magdala, antara Maari emmenjara ge Yakuba, ira Salaume, ta de shekuve waye-aatare á se emtake, ta fehe, geni watse tá de wecar ge emtsa á Yaisu.

<sup>2</sup> An enjlya werre ge laade, lauktu á sessa vaci wá, daraada itare ádete irekhya.

<sup>3</sup> Am sarte na tá átira duwa, a ba itare am dagave-aatare: «Kina mu, watse á berhamiyanvuwa ware dada palame na ge we á evege?»

<sup>4</sup> Amá daraada wá, ta de beraa ba an berha dada palame nanna áte we á evege.

<sup>5</sup> Ta naba duhe á dem huƙe-aara wá, ta de beraa ba dawale á njá am nadafa, am nanjyuwe dzayye. A naba jaterhe ge lyawa n̄washa na.

<sup>6</sup> «A wakurka lyawa,» a ba dawale nanna á elvan ge itare. «Adaba kwa se tataya Yaisu ura Nasarátu na ta zlenelanaa áte dzaŋgala na. Nane baaka áhuna, tsetse am faya. Náwa tate na ndza á zlava nane átekwa na.

<sup>7</sup> Kina wá, kure wá, zlauzlálá, dawateranda labáre ge pukura-aha-aara, Piyer keni á ba am itare. Baira deme watse á daada ba Yaisu nanna zunjwe arge kure, á dem Galili. Kwá de nanaana áhuwa, ba seke una ndza bakurnaa nane.»

<sup>8</sup> Daaci ba segashe-aatare am irekhya na wá, ta tedante zhagade emtsaade ge lyawa, tá gyagya ba seke maagara, palle á ura á baná elva ge ura baaka am itare, adaba gazlargazla jipu.



*UNA DIYARKA EMNDE JIRIRE-AARA, MÁKI A PUWETAA BA MARKUS:*

*Yaisu a maranse ire-aara ge Maari mukse á emnde a Magdala  
(Mat. 28:9-10; Yuh. 20:11-18)*

<sup>9</sup> Am sarte na tsetsa Yaisu am faya, an enlya werre ge laade na wá, a maranse ire-aara ge Maari mukse á emnde a Magdala zunṅwe. Mukse ṅanna wá, ndza ṅgyansengye Yaisu jini-aha vuye am ṅane.

<sup>10</sup> A de balatersaa ṅane labáre á tse á Yaisu am faya ge emnde na ta dǎba ṅane. A de berater bademme tá á ba am emtaṅkire, tá kyuwa.

<sup>11</sup> Anṅwa á bateranba dǎme mukse na ganakini tsetsa Yaisu am faya, a naana á ba an ice-aara, aley fartarka.

*Yaisu a maraterse ire-aara ge emnde-aara umele ta buwa  
(Luka 24:13-35)*

<sup>12</sup> Am iga á una ṅanna maa, Yaisu a marateraa ire-aara ge emnde buwa-aatare, tá áte baráma dete makwata, amá a nyanve ire-aara seke ṅane ka.

<sup>13</sup> Ta daahe, ta de balaterse labáre-aara ge emnde-aatare umele, aley ba fartarka ṅanna.

*Yaisu a marateraa ira-aara ge pukura-aha-aara kelaawa jemtekwe  
(Mat. 28:16-20; Luka 24:36-49; Yuh. 20:19-23; Sler. emnde 1:6-8)*

<sup>14</sup> Shekwaashekwa zlaḅe ádaliye maa, Yaisu a de marateraa ire-aara ge pukura-aha-aara kelaawa jemtekwe tá arge dǎfa. A naba velateraahe adǎba baakire á fetarfire antara degdegire á ire na ta maganaa itare na. Adǎba fartarka an emnde na ta naa ṅane á ba an ice-aatare am iga a tsetse-aara am faya.

<sup>15</sup> Daaci a ba ṅane á elvan ge itare: «Zlauzlálá á dem huḁe á duniya bademme, dawateranda labáre á higa na ge emnde bademme.

<sup>16</sup> Ma a fetaara ware, lyevaalya baptisma, á lyelye shifa-aara. Edda una má fetarka wá, á de ṅezleka am shairiya á Dadaamiya.

<sup>17</sup> Náwa najipu-aha na watse tá naana emnde, tá maganá emnde a fetarfe. Watse tá ṅgya jini-aha am ura an zhera-aaruwa. Watse tá ndáhá elva áṅwaslire na ni ba itare keni diyarka na.

<sup>18</sup> Watse tá puwaterar erva ge emnde na ta lapika-aha, tá de mbembe. Zlaḅe ádaliye, ma ta halante zahe am erva, ma ta shu daldalkwanu keni, baaka nazu á magateránmaga duksa-aha ṅanna.»

*Zlálá á Yaisu á dem samaya  
(Luka 24:50-53; Sler. emnde 1:9-11)*

<sup>19</sup> Am sarte na ni zlauzle á tsakaterá elva Yaakadada Yaisu ge pukura-aha-aara maa, a naba kapte á dem samaya, anṅwa á njá am naǎfafa á Dadaamiya.

<sup>20</sup> Pukura-aha-aara keni, ta naba kyaa á de bálá labáre á higa am huḁe á duniya bademme. Ndza anṅwa Yaakadada an itare am slera-aatare. A maratersaa ṅane ge emnde geni waazu-aatare jirire, adǎba a magaa najipu-aha gergere á kyá erva an itare.

## Labare á higa na a puwetaa LUKA

### *Elva zunḡwe na a ndaana Luka ge Tiyaufilus*

<sup>1</sup> Áska á ḡa Tiyaufilus,

Emnde kwakya puwartepuwa labáre á názena a magava am dagave á miya.

<sup>2</sup> Ta puwete názena ḡa cenanaa áza emnde na ta naana an ice-aatare duksa ḡanna daga á ba am fakta-aara. Emnde ḡanna wá, Dadaamiya a faterar slera á balaterá labáre ḡanna ge emnde bademme.

<sup>3</sup> Adaba una ḡanna, iya keni ya fantau ge pakya sera-aara daga fakta-aara dem halavuwa-aara, hayananhaya jipu am mbarka á ḡa. Una ḡanna yá anḡwa puwakte ge ekka keni názena ya shanaa ya na bademme, yá puwakte á ba áte una ya cenanaa ya na kalkale.

<sup>4</sup> Bademme á una yá magán ba geni ekka keni ka diyeddiye jirire á elva ḡanna ta ndakndaa na.

### *Malika a saa labáre geni watse tá yá Yuhanna slemaga baptisma*

<sup>5</sup> Am zamane na ni ndza sleksa \*Hirudus am Yahudiya maa, ndza anḡwa \*liman umele zhera-aara Zakariya, ḡane palle á liman-aha na male-aatare liman Abiya. Zhera á mukse-aara Ailizabait, ḡane wulfe á \*Haruna male á liman-aha werre.

<sup>6</sup> Bukerde-aatare antara mukse-aara ta emnde a jirire á katafke á Dadaamiya, ta emnde a fansaare ge shairiya-aha á Yaakadada bademme.

<sup>7</sup> Amá egdzere wá, sharánka ba palle keni, adaba Ailizabait dziire. Am sarte ḡanna wá, bukerde-aatare garevge emgyegwar emnde.

<sup>8</sup> Vacite umele maa, Zakariya anḡwa á maga slera á limanire-aara á katafke á Dadaamiya, adaba daada áte itare liman-aha á Abiya bademme.

<sup>9</sup> Ge tega slera-aatare am dagave-aatare liman-aha maa, mbarsembe maga njeri. Daaci vacite ḡanna maa, daada áte ḡane ganakini á de dīzaná ḡane kajijji am mashidi á Yaakadada.

<sup>10</sup> Am sarte á dīza kajijji ḡanna maa, bademme á emnde tá maga maduwa á ba ágashe.

<sup>11</sup> Daaci a naba jesaarhe ge malika á Yaakadada á katafke á Zakariya, a tsaahé áte vuwa á duksa na tá dīza kajijji átekwa na, am nadafa-aara.

<sup>12</sup> Ba a puwete ice áte ḡane Zakariya wá, a naba gazlehe, baaka názu á ndaana ḡane.

<sup>13</sup> Amá a ba malika á elvan ge ḡane: «Zakariya, a wanḡa lyawa. Adaba Dadaamiya lyevaalya maduwa á ḡa. Mukse á ḡa Ailizabait á de yaka egdzere zhele, watse ká fá zhera-aara Yuhanna.

<sup>14</sup> Watse á gev higa yaikke ge ekka. Emnde kwakya tá de higateghiga adaba egdze ḡanna.

<sup>15</sup> Adaba áza Yaakadada wá, watse ura male ba ḡane am emnde. ḡane wá, watse á sheka mbazla antara názu á já enḡkale á ura bademme. ḡane watse an naha ba Shedekwe Cufedde am ḡane daga á sawa am huḡe á emmenjara.

<sup>16</sup> Watse á jatermaara ḡane ge \*Iserayiila-aha kwakya á sem sera á Yaakadada Dadaamiya-aatare.

<sup>17</sup> Watse á sawa ñane á katafke á Yaakadada, hala-aara antara hákuma-aara watse ba kalkale antara náza á nabi \*Ailiya werre. Á se jemá ñane ye á dada-aha antara egdzara-aatare. Emnde na tá fansaareka ge Dadaamiya keni, á se tsatermaara ñane. Á se tsatsaná ñane emnde ge ufa Yaakadada.»

<sup>18</sup> Amá a ba Zakariya á elvan ge malika: «Yá dise áte uwe ganakini una ñanna á de gevge? Adaba ñere antara mukse-aaruwa bademme ña emgyegwar emnde.»

<sup>19</sup> Daaci a ñwanante ge malika, a ba ñane á elvan ge ñane: «Iya wá, ya malika \*Jeberilla. Ya tsetaa á katafke á Dadaamiya, ya sleslera-aara. A beliyaa ba ñane ganakini yá saká labáre á higa na.

<sup>20</sup> Amá faktarka an iya. Ay degiya watse á gevge ba jirire, má hyephye laukte-aara. Adaba faktarka ñanna wá, ká gevge uce, ká taa ndaaseka elva d'ekid'eki, dem sarte na má gevge duksa ñanna.»

<sup>21</sup> Am sarte ñanna maa, bademme á emnde tá ufa ba Zakariya ágashe, tá maga ba najipu á shekwaashekwa-aara am mashidi.

<sup>22</sup> De sesse maa, dzegwánka ndaater elva d'ekid'eki, a ngyakwateraa elva-aara á ba an erva. Ta dise áte una ñanna emnde ganakini an'kwa názu a naaná ñane am mashidi.

<sup>23</sup> Am sarte na zlauzle slera á limanire á Zakariya maa, a naba dahe á dem mba-aara.

<sup>24</sup> De haraare cekwaangudí am mba maa, mukse-aara Ailizabait a naba shaa huđe. Amá a esshebe, tere ilyebe á sheba ba ñane. A ba ñane am ervaunde-aara:

<sup>25</sup> «Kina wá, siisessa Yaakadada am zherwe am dagave á emnde.»

### *Malika a saa labáre geni watse tá yá Yaisu*

<sup>26</sup> Ailizabait an huđe á tere un'kwahe maa, Dadaamiya a naba belaa malika \*Jeberilla á dem ekse á Nasarátu am kwara á Galili.

<sup>27</sup> A belanaa ádeza gyaale umele, á shebaná dawale na zhera-aara Yusufa na. Yusufa ñanna wá, ñane wulfe á sleksu \*Dawuda. Zhera á gyaale na a shebanaa ñane Maari.

<sup>28</sup> Daaci a demhe ge malika na ádeza gyaale ñanna, a de gan use-aara, a ba ñane: «Use gyaale. Ekka wá, Dadaamiya Yaakadada magakánmaga ngurna, an'kwa ñane antara ka.»

<sup>29</sup> Amá use-aara ñanna weshanantewesha ire ge Maari, a ba ñane am ervaunde-aara: «Ázara kena jeba á ga use na?»

<sup>30</sup> A ba malika á elvan ge ñane: «A wan'ka lyawa Maari. Adaba Dadaamiya magakánmaga ngurna.

<sup>31</sup> Kina wá, watse ká shá huđe, ká de yá egdzere zhele, ká de faná zhera á Yaisu.

<sup>32</sup> Watse ura male, \*Egdza á Dadaamiya Slekse. Watse Dadaamiya á vante sleksire ba seke náza á eggyenara \*Dawuda werre.

<sup>33</sup> Á de kwaraná ñane larde á \*Iserayiila dem ba ge d'ekid'eki. Sleksire-aara á de tseka d'ekid'eki.»

<sup>34</sup> A ba Maari á elvan ge malika: «Á de magava estara una ñanna? Adaba iya, ya ba gyaale.»

<sup>35</sup> A ñwanante ge malika, a ba ñane á elvan ge ñane: «Watse á sawa Shedekwe Cufed'ede á setarge ekka, á de maganá ba Dadaamiya Slekse hákuma-aara am ka. Adaba una ñanna, egdze na ká de yaná ka na wá, watse cufed'ede, ñane \*Egdza á Dadaamiya.

<sup>36</sup> Vareŋa Ailizabait keni á huđe á egdzere zhele, gevge emgyegwe á mukse tsa. Ndza dziire tsa, amá a shaa huđe tere unƙwahe vatena.

<sup>37</sup> Adaba baaka názu á janviya ge Dadaamiya.»

<sup>38</sup> Daaci a ba Maari: «Iya ya kwatena á Dadaamiya. A giyanvege Dadaamiya á ba áte una ka ndaana ka.»

### *Maari á dem mba á vareŋara Ailizabait*

<sup>39</sup> Á ba am sarte ŋanna maa, ba watsewatse a naba tsetehe ge Maari, a naba zlala á ba an hadzala, á dem mba á vareŋara Ailizabait am ekse umele am huđe á wa a Yahudiya.

<sup>40</sup> Daaduwa, á de demhe am mba á Zakariya, a de gan use ge Ailizabait.

<sup>41</sup> Am sarte na cenancena Ailizabait use-aara, egdzere am huđe-aara a naba fantau ge fatsava. A nahetaa á ba am sarte ŋanna Ailizabait an Shefekwe Cufedde,

<sup>42</sup> a ba ŋane á ba an ká kwara: «Dadaamiya a gakar barka ba ge ekka am dagave á ŋwasha bademme. Barka-aara a njinja am egdze na am ekka na.

<sup>43</sup> Ya hyep ware ha ni emmenara ge Yaakadada-aaruwa á sem mba-aaruwa na?

<sup>44</sup> Ya ndaana adaba uwe una? Adaba am sarte na ya cenaa ga use á ŋa na wá, egdzere a naba fantau ge shekela am huđe-aaruwa á higa.

<sup>45</sup> Higa yaikke ge ekka, adaba faktarfe am ervaunde á ŋa ganakini názena ta balaksebele na á de ganvege Yaakadada bademme.»

### *Maari á gálá Yaakadada*

<sup>46</sup> Daaci a ba Maari:

«Yá gálá Yaakadada Dadaamiya an ervaunde-aaruwa bademme.

<sup>47</sup> Á higa ervaunde-aaruwa kwakya áte ŋane Slelya shifa-aaruwa.

<sup>48</sup> Adaba ŋane á zhára ba iya ya kwátana-aara na hyainepka ba uwe keni. Daga ba kina keni tá anƙwa á banba emndimagwaha, tá de banba zlaƙe adaliye ma vaatara keni, geni yá an barka á Dadaamiya am vuwa.

<sup>49</sup> Adaba Dadaamiya na Sleksa ba ŋane palle na a magiyaa duksa yaikke. Ŋane wá, zhera-aara cufedde.

<sup>50</sup> Á de zatervaara ba ŋane zlaƙe adaliye ge emnde na tá an lyawa-aara am ervaunde dem eggye-aha.

<sup>51</sup> Maganaamaga ŋane slera yaikke an ndzedá á erva-aara, a zadánve emnde a mága kuravire,

<sup>52</sup> a tsekwaá slekse-aha áte sleksire, a vaterte daradza ge talaga-aha.

<sup>53</sup> A gater barka kwakya ge emnde na peteke erva-aatare, amá a puwaa emnde a berba an erva-aatare ilyebe.

<sup>54</sup> A tsaterme am iga ge emnde a slera-aara Iserayiila-aha. Adaba viyanaaka magaterá shagerire-aara ge emnde-aara,

<sup>55</sup> áte una ndza a banán ge eggyemiya Ibrahimia, ganakini watse á maganán ge ŋane dem eggye-aha-ŋara bademme na.»

<sup>56</sup> Á hyephye tere keye a maganaa Maari am mba á Ailizabait, lauktu a zlala á dem mba-aara.

### *Yuhanna slemaga baptisma am sarte na yarseye áŋwaslire*

<sup>57</sup> Am iga a una ŋanna maa, a naba hyephye ge sarte á Ailizabait, daaci a naba yaa egdzere zhele.

<sup>58</sup> Am sarte na cenarácena vara-aha-ṅara antara emnde a slala-aatare, ganakini Dadaamiya a magateraa shagerire kwakya, ta naba sawa, ta se higa antara itare.

<sup>59</sup> Am hare ge tiisire maa, ta naba eptsehe zlaḃe ádaliye ge se bela egdzere am shedekwe, antara ge fá zhera. Itare tá kátá fá Zakariya cepen á eddeṅara,

<sup>60</sup> amá a ba emmarge egdzere: «Estuweka, zhera-aara Yuhanna.»

<sup>61</sup> Amá a ba itare tá elvan ge ṅane: «Ábi ba palle á ura tá dahaná an zhera na keni, baaka am emnde á ṅa.»

<sup>62</sup> Daaci ta ndavanu ge eddarge egdzere, ta ṅgyakwanaa an ṅgyakwa, geni á kátá faná zhera-ara ge egdza-aara.

<sup>63</sup> Daaci Zakariya a ndavateru naláwa, ta vante, a puwete: «Zhera-aara Yuhanna,» a ba ṅane. Baḃemme á emnde tá maga ba najipu-aara.

<sup>64</sup> Ba a puwete zhera ṅanna wá, kertenṅ a naba pelehe ge nara-aara keni, a fantau ge ndaha elva, á gala Dadaamiya á ba an ká kwara.

<sup>65</sup> Daaci baḃemme á emnde a slala-aatare, ta farhe zlaḃe ádaliye ge mága lyawa á Dadaamiya am ervaunḃe-aatare, ta hyanme labáre ṅanna am huḃe á wa a Yahudiya baḃemme.

<sup>66</sup> Baḃemme á emnde na ta cenaa labáre ṅanna, ta fantau ge dzamaná am ire-aatare geni watse á gev ware egdze ṅanna á de katafke. Amá ba jirire ndza anṅkwa hákuma á Yaakadada antara egdze ṅanna.

### *Zakariya á gálá Dadaamiya am nabiyire-aara*

<sup>67</sup> Ba vaci fá zhera ṅanna maa, Zakariya eddarge egdzere a naba nahete an Shedekwe Cuḃeḃe, a fantau ge mága nabiyire, a ba ṅane:

<sup>68</sup> «Yaakadada Dadaamiya á \*Iserayiila-aha wá, baaka kalle-aara. Adaba a tsaterme am iga ge emnde-aara, anṅkwa ṅezlaterṅezla,

<sup>69</sup> a naba jansaare ge slelya ura an hákuma jipu am dagave á wulfe-aha á sleslera-aara \*Dawuda.

<sup>70</sup> Maganaamaga názena ndza a ndaase á kya an we á nabi-aha-aara werre.

<sup>71</sup> Adaba ndza a ndaase werre ganakini watse á ṅezlamiṅezla am erva á kelaade-aha, baaka názu tá de eksaná itare áte miya ḃekideki.

<sup>72</sup> Ndza a baterán ge eggye-aha á miya ganakini watse á zatervarze dem eggyeggye, á de viyanaaka namana-aara ḃekideki. Una ṅanna á maganá ṅane kina.

<sup>73</sup> Adaba ndza a zanu ba waḃa-aara Dadaamiya ge eggyemiya Ibrahimia,

<sup>74</sup> ganakini watse á ṅezlemiyaanṅezla am erva á kelaade-aha á miya, á de gamive emnde a slera-aara na ni tá an higa an ervaunḃe,

<sup>75</sup> ta emnde cuḃeḃe, ta emnde a jirire á katafke-aara ma vaatara keni.

<sup>76</sup> «Ay ekka wá, egdza-aaruwa, ká de gev nabi á Dadaamiya Slekse. Adaba ká de zlálá ka á katafke á Yaakadada, ká de tsatsanaa ka baráma-aara.

<sup>77</sup> Watse ká fateremá ka am vuwa ge emnde-aara ganakini á se lyaterá ṅane, á se yateraare haypa-aha-aatare baḃemme.

<sup>78</sup> Adaba kwakya wayavire antara maggwire á Dadaamiya. Á de maraminá ba ṅane parakkire-aara á sawa am samaya,

<sup>79</sup> ge maraterá parakkire ge emnde na tá am tabeḃammire, tá kuva emtsa na; antara ge kwaramise zlálá áte baráma á hairire.»

<sup>80</sup> Daaci a walte ge Yuhanna, farfe enṅkale-aara keni ba kwakya, a fantau ge de njá am kaamba, dem sarte na ni a marse ire-aara á katafke á Iserayiila-aha-aatare baḃemme, ganakini ṅane sleslera á Dadaamiya.



## 2

### *Yaisu am sarte na yarseye áŋwaslire (Mat. 1:18-25)*

<sup>1</sup> Á ba am sarte ɲanna yaireya Yuhanna na maa, jerje elva á sawa áza male á haha á Rauma bademme, zhera-aara Agustus, geni sey tá já jembel á emnde na tá am kwara-aara bademme.

<sup>2</sup> Já jembel á emnde ɲanna wá, zuɲɲwire-aara ba una ɲanna. Am sarte ɲanna maa, ndza Kiriniyus una slekse yaikke am haha á Siriya.

<sup>3</sup> Daaci bademme á emnde, ma ware keni a zlala, á de puwa zhera-aara á ba am ekse-aara.

<sup>4</sup> Yusufa keni maa, a naba tsetehe am Nasarátu am kwara á Galili, a zlala á dem Baytilama ekse á sleksu \*Dawuda werre am kwara á Yahudiya. Adaba ɲane wulfe á Dawuda ɲanna.

<sup>5</sup> Daaci ta zlala antara Maari na á shebaná ɲane lyemlye huđe na, geni ta de puwa zhera-aatare itare keni.

<sup>6</sup> Am sarte na tá am Baytilama ɲanna maa, a naba hyephe ge sarte á Maari,

<sup>7</sup> a yaa egdzere zhele, egdzere zuɲɲwire-aara. A yanaa á ba am bere á dabba-aha, adaba baaka sledfe am bere á wayve-aha ge kwakyire á nalga. Daaci a fademe am baukta, a zlavanaahe am náza za duksa á dabba-aha.

### *Jesaarje malika á Dadaamiya á katafke á suni-aha*

<sup>8</sup> Am ekse ɲanna maa, tá aɲkwa suni-aha wá, itare tá njá á ba am kaamba-aatare. An vayi wá, tá hare á ba tsákwá hyema áte walda-aha-aatare.

<sup>9</sup> An vayi vacite ɲanna maa, a naba jesaarhe ge malika á Yaakadada á katafke-aatare, Yaakadada a naba maraa parakkire-aara an tsaka ire ásete itare wá, jaterja lyawa jipu.

<sup>10</sup> Amá: «A wakurka lyawa,» a ba malika na á elvan ge itare. «Adaba ya sakuraa labáre á higa, á de gev higa yaikke ge emnde bademme.

<sup>11</sup> Aɲkwa yarakuraaya Slelya ura á ba an vayi na, am ekse á \*Dawuda. Egdze ɲanna wá, ba ɲane una \*Almasiihu, Yaakadada.

<sup>12</sup> Náwa názena ni kwá de dise egdze ɲanna átekwa: watse kwá de berá egdzere áŋwaslire an fadfa am baukta, á zlava am náza za duksa á dabba-aha.»

<sup>13</sup> Am iga á una ɲanna maa, kerten, jarsaarje dikele á malika-aha umele á sawa am samaya, ta se jamme antara ɲane, ta fantau ge gala Dadaamiya, a ba itare:

<sup>14</sup> «Daradza wá, á zlayán ba ge Dadaamiya palle am samaya. A tsekwa hairire-aara á sem duniya, á sem emnde na ni a wayateraa ɲane.»

### *Suni-aha ta dem Baytilama*

<sup>15</sup> Am sarte na yaraterya malika-aha, zlarzlálá á dem samaya maa, a ba suni-aha am dagave-aatare: «Mi zlalawa á dem Baytilama, mí de zhara názena a jesaara áhuwa, a baminaa Yaakadada na.»

<sup>16</sup> Daaci ta naba tsetehe, ta zlala á ba an hadzala, ta de beraa Maari antara Yusufa, ira egdzere áŋwaslire á zlava am náza za duksa á dabba-aha.

<sup>17</sup> Zhararaazhára egdzere maa, ta tsakse názena ni a baterna malika áte egdze ɲanna bademme.

<sup>18</sup> Bademme á emnde na ta cenaa názena ta tsakatersaa suni-aha na, tá maga ba najipu.

<sup>19</sup> Maari wá, ɲane cenáncena elva ɲanna bademme, ɲanaaɲa am ire-aara, aɲkwa á eddzama am ervaunđe-aara.

<sup>20</sup> Am iga a una nanna maa, ta naba eptsa-aatare suni-aha na á dem tate-aatare. Tá ankwá gálá Dadaamiya am yaikkire-aara átira zlala. Ta galanaa adaba názena ta naana itare, antara názena ta cenanaa itare na bademme, adaba ta de beraa duksa na a baterna malika na bademme.

*Daranánda Yaisu ge Yaakadada á dem \*mashidi yaikke*

<sup>21</sup> Am hare ge tiisire maa, hyephye sarte ge bela egdzere am shedekwe. Ta fete zhera keni ba vacite nanna. Ta fete zhera á Yaisu. Una zhera na ni a ndaana malika, ba hude-aara keni zlabé shanka emmenjara na.

<sup>22</sup> Hyephye sarte á bara Maari maa, ta naba zlala á de maga názena a ndaana \*tawraitá á Muusa áte mukse na a yaa egdzere, geni a gevge cufedde zlabé adaliye. Daaci ta duhe, ta dáná antara egdzere á de katafke á Yaakadada am \*mashidi yaikke am Urusaliima, geni átuge nane.

<sup>23</sup> Adaba ankwá an puwa am wakita á Dadaamiya, geni bademme á egdzere zhele na egdza walire na wá, á wálá átuge Yaakadada.

<sup>24</sup> Ta vanta antara sadake-aatare ge Yaakadada áte una a ndaana tawraitá-aara, a ba nane: «Tá fá takala-aha buwa bi takala-aha á masar buwa.»

<sup>25</sup> Ay, am sarte nanna maa, ndza ankwá zhele umele am Urusaliima, zhera-aara Simaun. Zhele nanna slefa-zherwe áte Dadaamiya jipu, ura mággwe. Nane á ufa ba edda una ni watse á se lyaterá nane \*Iserayiila-aha bademme na. Ankwá Shedekwe Cufedde keni antara nane.

<sup>26</sup> A ndandaha Shedekwe nanna, geni nane á emtseka dekideki, máki nánka \*Almasiihu Slebela á Yaakadada.

<sup>27</sup> Ay, vacite nanna maa, a naba banánba Shedekwe Cufedde, geni a ezzlala zlabé adaliye á dem \*mashidi yaikke. Am sarte na ni tara emmenjara antara eddenjara ge Yaisu, ta daa Yaisu á dem mashidi ge de maganaa názena a ndaana \*tawraitá na wá, ta de beraa ba Simaun nanna.

<sup>28</sup> Simaun a de lyevaa egdze na am erva-aara, a naba slafanaa we-aara ge Dadaamiya, a ba nane:

<sup>29</sup> «Yaakadada-aaruwa, kina wá, gevge názena ndza ka binaa ka na. Yanya a emtsemtsa sleslera á nana á ba an hairire.

<sup>30</sup> Adaba puwantepuwa ice-aaruwa áte edda una ni ka belanaa ka ge se lya emnde.

<sup>31</sup> Ya nanna unjule á lya na ka tsatsateraa ka ge nalgaadama bademme.

<sup>32</sup> Una wá, nane parakkire na ni á de marakse am ice á emnde a duniya bademme, tá de diyaksediye. Á de gev daradza yaikke ge emnde á nana Iserayiila-aha keni.»

*Simaun á tsaká elva a nabiyire*

<sup>33</sup> Tara emmenjara antara eddenjara ge Yaisu, tá maga ba najipu á elva na á tsakaná Simaun áte egdza-aatare na.

<sup>34</sup> Simaun a naba gater barka. Am iga á una nanna, a ba nane á elvan ge Maari: «Egdze na náwa nane na wá, á de maratarná nane Dadaamiya ge emnde, amá tá de liyeka emnde. Dadaamiya a eksese nane, ganakini nane á gev náza vaterte ektápaare ge emnde kwakya am \*Iserayiila-aha. Á ba am Iserayiila-aha nanna zlabé adaliye, emnde kwakya tá de shá yaikkire, á de katerteka Dadaamiya adaba nane.

<sup>35</sup> Estuwa, á se marsá nane ásegashe názena tá slaslaná emnde am ervaunde-aatare bademme. Ekka emmenjara keni maa, baaka zlada na ni watse ká tapánka ka am ervaunde á nana.»

*Hanna nabi mukse*

<sup>36</sup> Ndza anƙwa mukse umele nabi, zhera-aara Hanna, ɲane egdza á Fanuyail. Fanuyail ɲane wulfe á Asair werre. Hanna ɲanna gevge emgyegwe a mukse kurcumme. Am gyaalire-aara, ndza ta magaa ba yawe vuye antara zhele-aara na a sanse am mba á eddenjara, daaci a naba keɗeɗe ge zhele-aara.

<sup>37</sup> Am iga á una ɲanna wá, gaaka zhele umele mazla-aara, a ɲja ba wegyegye a mukse. Vayi vacika a maganaa ba slera ge Dadaamiya, á eksa ndera, á ɲala ba Dadaamiya-aara am mashidi. Daaci am sarte ɲanna ta daa Yaisu á dem mashidi na wá, mukse ɲanna shanaasha yawe kul tiise ju ufade.

<sup>38</sup> A gateraptehe ge emnde a há á Yaisu. ɲane keni a slafanaa we-aara ge Dadaamiya. Daaci a fantau ge baterá elva-aara ge emnde na tá ufa ba sarte na ni Dadaamiya á se lya Urusaliima na.

*Eptsareptsá emnde a há á Yaisu á dem Nasarátu.*

<sup>39</sup> Am sarte na zlarinaazle emnde a há á Yaisu mága názena a ndaana \*tawraitá á Yaakadada maa, ta naba da-aatare an egdzere á dem ekse-aatare am Nasarátu am ƙwara á Galili.

<sup>40</sup> Egdze ɲanna anƙwa á farfe an wala, antara an dzaɲɲaɲire. Egdze ɲanna an enƙale jipu, an barka á Dadaamiya am vuwa.

*Yaisu egdza yawe kelaawa ju buwa am \*mashidi yaikke*

<sup>41</sup> Ba kelaá sakanderi emnde a há á Yaisu tá de maga muɲri á \*Paska am Urusaliima.

<sup>42</sup> Ate iva na Yaisu shanaasha yawe kelaawa ju buwa, ta duwa antara ba ɲane.

<sup>43</sup> Zlaurza muɲri wá, ta naba da-aatare, amá ta yaa egdzere am Urusaliima, itare diyarka.

<sup>44</sup> Ta kurken ɲane keni á ba anƙwa am dagave á emnde na ta saa kerɗe. Lauktu tá diyeddiye wá, varváha deppe á zlala. Am iga á una ɲanna, ta fantau ge tatayanaa áza emnde-aatare ge itare, antara áza emnde a diyava-aatare baɗemme,

<sup>45</sup> amá sharánka. Daaci ba eptsá-aatare zlaɓe ádaliye á dem Urusaliima.

<sup>46</sup> Am hare ge keyire lauktu ta de shanaa am \*mashidi yaikke, á njá am dagave á malum-aha, anƙwa á cenatercena, ámbera á ndavateru elva-aha.

<sup>47</sup> Baɗemme á emnde na tá cená názena a ndaana ɲane, tá maga ba najipu áte ɲane. Adaba kwakya enƙale-aara, jawapa-aha-aara á ba an unɲule-aara.

<sup>48</sup> Ba ta puwete ice-aatare áte ɲane tara emmeɲara an eddenjara wá, tá maga ba najipu-aara. A ba emmeɲara á elvan ge ɲane: «Labára ka maganeraa una, egdza-aaruwa? ɲere antara eddenja, daɲeremda am dzama ire yaikke adaba ka, njá ámbera tatayaktataya kinekinaka.»

<sup>49</sup> A ɲwaterante, a ba ɲane á elvan ge itare: «Kwá tatayiyá adaba uwe? Diyakurka ganakini zlaya-aaruwa ge njá am bere á Edderwa emtu?»

<sup>50</sup> Amá cenaránka názu am elva-aara ɲanna dekiɗeki.

<sup>51</sup> Daaci a naba saa antara itare á sem Nasarátu. A fatersaarfe jipu. Amá emmeɲara wá, ba palle keni elva-aha ɲanna keɗarka dekiɗeki, baɗemme á ba am ire-aara.

<sup>52</sup> Daaci anƙwa farfa Yaisu an wala, antara an enƙale. Hayanhaya Dadaamiya egdze ɲanna, emnde keni hayaránhaya baɗemme.

### 3

#### *Waazu á Yuhanna slemaga baptisma*

*(Mat. 3:1-12; Mark. 1:1-8; Yuh. 1:19-28)*

<sup>1</sup> Haraare áte iva na mala Tibairiyus am haha á Rauma, shanaasha yawe kelaawa jiilyebe am malire-aara wá, ndza sleksa Pauntiyus \*Pilaatu am kwara á Yahudiya, \*Hirudus slekse am kwara á Galili, egdza emmenjara Filip á kwará Ituriya antara Tarakaunitisa, Lisaniyus slekse am kwara á Abilain.

<sup>2</sup> Male-aha á \*liman-aha wá, tara Hanas antara Kayafas.

Am laukte njanna maa, Dadaamiya a naba banaa elva-aara ge Yuhanna egdza á Zakariya am kaamba.

<sup>3</sup> Daaci Yuhanna a naba fantau ge ja daba an waazu am ekse-aha na herherzhe an guwa á Urdun na bademme, a ba njane á elvan ge emnde: «Magaumága tuba, lyauvaalya baptisma, á yakuraarye Dadaamiya haypa-aha á kure.»

<sup>4</sup> Estuwa wá, názena a puwetaa nabi Aisaya na gevge. Adaba a ba njane: «Ankwa ura á bala elva am kaamba, a ba edda-aara: Tsatsawanaatsatse unjule ge Yaakadada, tsawanaatse baráma-aara ba ndedde.

<sup>5</sup> Bademme á dambake-aha watse á gevge ba kalkale, Wa-aha antara gavaye-aha bademme watse baaka, Kwaana-aha á baráma keni watse á njeka, bademme watse ba tsekke. Bademme á baráma na an badza na, á de gevá an memiya áte kalkalire.

<sup>6</sup> Bademme á emnde watse tá nanna unjule a lya na ni a tateraa Dadaamiya.»

<sup>7</sup> Daaci kwakya emnde ta kelaa ádeza Yuhanna am kaamba njanna, ganakini á magateránmaga baptisma. Amá a ba njane á elvan ge itare: «Egdzara á kelaade-aha na, a bakurnaa ware ganakini magaumága tuba, watse kwá de enjlesenjle am názena á de magaterná Dadaamiya ge emnde na tá ankwa am ervaunje-aara na?

<sup>8</sup> Magaumága kure názena ni tá diyeddiye átekwa ganakini kure wá, yakuránya mága á kure werre, magakurnaamaga tuba. Bawánka mazla-aara am ire á kure ganakini miya wá, mi egdzara á Ibrahimia miyenne, ázara lámbe á miya. Yá bakurá ba jirire: ba nákwá-aha na náwa njane na keni, Dadaamiya an hákuma á gaterve egdzara á Ibrahimia.

<sup>9</sup> Ba kina keni á ba an tsatsa zlaugba ge datsa náfá-aha na ni tá yeka egdzere na. Daaci bademme a náfá na ni á yeka egdzere emtake na wá, tá icese antara uksuwe-aara bademme, tá epshupshe an kára.»

<sup>10</sup> Ba ta cenaa una njanna dikele á emnde njanna maa, ta naba ndavanuhe ge Yuhanna, a ba itare tá elvan ge njane: «Ay wá, njá maganá estara kina?»

<sup>11</sup> A ba Yuhanna á elvan ge itare: «Edda una ankwa nanjyuwe-aara buwa, a vanteva palle ge edda una baaka náza-aara. Edda una ankwa náza za ázejjara keni, a emmága ba estuwa.»

<sup>12</sup> Ta sawhe ge \*emnde a jaha hadáma keni ásezejjara, geni á magaterá baptisma. A ba itare tá elvan ge njane: «Malum, njere keni njá maganá estara?»

<sup>13</sup> A njwaterante, a ba njane: «Fawaterarka biya názena ndahaaka shairiya á njgumna ge emnde.»

<sup>14</sup> Ta ganaptehe ge sawji-aha keni, a ba itare: «Njere maa, njá maganá estara?» A ba njane á elvan ge itare: «Liyiyauka duksa á ura ba dey an ndzedá na, puwauka emnde áte lámán am fida ba dey, amá pakaupaka ba dafa á kure.»

<sup>15</sup> Baɗemme á emnde tá anƙwa ufáná á ba an niya-aatare labáre, geni watse \*Almasiihu ɗara ba ɗane.

<sup>16</sup> Daaci a ba Yuhanna á elvan ge itare baɗemme: «Iya wá, yá magakurá bapɗisma á ba an yawe, amá anƙwa á sawa ura umele am iga-aaruwa wá, an hákuma ba ɗane arge iya. Ba ge slesadanse kimake am sera keni hyanefka ya ɗekideki. ɗane wá, á se magakurá bapɗisma an Shedekwe Cufedɗe antara an kára.

<sup>17</sup> Anƙwa á sawa an kazlaɗa a fáhá duksa-aara keni am erva, á se faheɗe hiya-aara am hyaihye. Daaci watse á puweme hiya am kuvere-aara, amá hyaihye wá, watse á fante kára na á emtseka ɗekideki na.»

<sup>18</sup> Yuhanna a faterem ndzedá am vuwa an elva-aha gergere kwakya, a balaterse á ba am una ɗanna labáre á higa keni ge emnde ɗanna.

<sup>19</sup> Ay, á ba am sarte ɗanna maa, Yuhanna a naba valaarhe ge sleksu \*Hirudus, adaba a eksantaava Hirudiya ge egdza emmenara Filip, antara adaba haypa-aha umele gergere a guwaa ɗane.

<sup>20</sup> Aley, Hirudus a naba farhe zlaɗe adaliye ge haypa-aha-aara, a naba ɗgudaa Yuhanna am danɗay.

### *Bapɗisma á Yaisu*

*(Mat. 3:13-17; Mark. 1:9-11)*

<sup>21</sup> Amá am sarte na zlaɗe damka Yuhanna am zawa maa, emnde baɗemme sharánsha bara ázenara. Yaisu keni a duhe, a de barevhe ɗane keni. Am sarte ɗanna maa, Yaisu a mága maduwa. ɗane á maga maduwa na wá, a naba werthehe ge samaya wá,

<sup>22</sup> tá zhára ba anƙwa á tsekwa Shedekwe Cufedɗe ásetarge ɗane ba seke takala, á zharava ba parakke. Cekwaanɗuɗi wá, tá cená ba kwára á ura á sawa am samaya, a ba edda-aara: «Ba ekka una ka Egdza-aaruwa, baɗemme a higa-aaruwa á ba áte ka.»

### *\*Kergema á eggye-aha-ɗara ge Yaisu*

*(Mat. 1:1-17)*

<sup>23</sup> Am sarte na Yaisu anƙwa á fantau ge mága slera-aara wá, á maga egdza yawe kul keye. Ate emnde wá, ɗane egdza á ba Yusufa. Yusufa keni maa, ɗane egdza á Haili.

<sup>24</sup> Haili ɗane egdza á Mattat, Mattat ɗane egdza á Laiwi, Laiwi ɗane egdza á Mailiki, Mailiki ɗane egdza á Yaana, Yaana ɗane egdza á Yusufa,

<sup>25</sup> Yusufa ɗane egdza á Mattatias, Mattatias ɗane egdza á Amais, Amais ɗane egdza á Nahum, Nahum ɗane egdza á Haisli, Haisli ɗane egdza á Nagay,

<sup>26</sup> Nagay ɗane egdza á Mata, Mata ɗane egdza á Mattatias, Mattatias ɗane egdza á Saimayna, Saimayna ɗane egdza á Yausaike, Yausaike ɗane egdza á Yauda,

<sup>27</sup> Yauda ɗane egdza á Yauwánan, Yauwánan ɗane egdza á Raisa, Raisa ɗane egdza á Zauraubabila, Zauraubabila ɗane egdza á Salatiyail, Salatiyail ɗane egdza á Nairi,

<sup>28</sup> Nairi ɗane egdza á Mailiki, Mailiki ɗane egdza á Addi, Addi ɗane egdza á Kausam, Kausam ɗane egdza á Ailmadam, Ailmadam ɗane egdza á Airi,

<sup>29</sup> Airi ɗane egdza á Yaisu, Yaisu ɗane egdza á Ailiyaijair, Ailiyaijair ɗane egdza á Yaurim, Yaurim ɗane egdza á Mattat, Mattat ɗane egdza á Laiwi,

<sup>30</sup> Laiwi ɗane egdza á Simaun, Simaun ɗane egdza á Yahuda, Yahuda ɗane egdza á Yusufa, Yusufa ɗane egdza á Yaunam, Yaunam ɗane egdza á Ailiyakim,



<sup>31</sup> Ailiyakim ɲane egdza á Mailiya, Mailiya ɲane egdza á Menna, Menna ɲane egdza á Mattata, Mattata ɲane egdza á Naatan, Naatan ɲane egdza á \*Dawuda,

<sup>32</sup> \*Dawuda ɲane egdza á Yaisa, Yaisa ɲane egdza á Aubet, Aubet ɲane egdza á Bauwas, Bauwas ɲane egdza á Sala, Sala ɲane egdza á Naasunu,

<sup>33</sup> Naasunu ɲane egdza á Aminadabu, Aminadabu ɲane egdza á Admin, Admin ɲane egdza á Arni, Arni ɲane egdza á Haisruna, Haisruna ɲane egdza á Farais, Farais ɲane egdza á Yahuda,

<sup>34</sup> Yahuda ɲane egdza á Yakubu, Yakubu ɲane egdza á Isiyaaku, Isiyaaku ɲane egdza á Ibrahimia, Ibrahimia ɲane egdza á Tara, Tara ɲane egdza á Nakaur,

<sup>35</sup> Nakaur ɲane egdza á Saruku, Saruku ɲane egdza á Ragaw, Ragaw ɲane egdza á Falaik, Falaik ɲane egdza á Aibair, Aibair ɲane egdza á Sala,

<sup>36</sup> Sala ɲane egdza á Kayinam, Kayinam ɲane egdza á Arfasada, Arfasada ɲane egdza á Saim, Saim ɲane egdza á \*Nuhu, Nuhu ɲane egdza á Lamaik,

<sup>37</sup> Lamaik ɲane egdza á Matusala, Matusala ɲane egdza á Anuhu, Anuhu ɲane egdza á Yaratu, Yaratu ɲane egdza á Malaliyail, Malaliyail ɲane egdza á Kayinam,

<sup>38</sup> Kayinam ɲane egdza á Ainaus, Ainaus ɲane egdza á Saitu, Saitu ɲane egdza á Naadama, Naadama wá, ɲane egdza á ba Dadaamiya.

## 4

### *Náwa a badanaa estuwa Shaitaine Yaisu* (*Mat. 4:1-11; Mark. 1:12-13*)

<sup>1</sup> Yaisu naatenaha an Shedekwe Cufedde. Ba tse-aara am Urdun maa, Shedekwe Cufedde a naba daa ɲane á dem kaamba.

<sup>2</sup> Hare kul ufaɗe aɲkwa á badaná Shaitaine am kaamba ɲanna. Am hare-aha ɲanna wá, zawka ba uwe keni dekiɗeki. Am iga á hare-aha ɲanna wá, a naba ɲanaahe ge waya.

<sup>3</sup> A ba Shaitaine á elvan ge ɲane: «Máki ka ba \*Egdza á Dadaamiya wá, ndaanda ge nákwá na a nyefnye ɗafa, ká ezza.»

<sup>4</sup> Amá a ba Yaisu á elvan ge ɲane: «Aɲkwa an puwa am wakita á Dadaamiya, a ba ɲane: “Ura á njá an shifa aɗaba ɗafeka palle.” »

<sup>5</sup> Daaci Shaitaine a ɗaltaa antara ɲane ádetire ba ɲгаа, a maranaa yaikkire na am huɗe á duniya na baɗemme á ba am dupalle,

<sup>6</sup> a ba ɲane á elvan ge ɲane: «Baɗemme á yaikkire na am duniya antara ɲgahire-aara na, ya vakteva. Aɗaba baɗemme á una-aha ɲanna ta fime am erva ba ge iya, yá dzegwándzegwa vante ge edda una ni yá kataná ya.

<sup>7</sup> Daaci máki kezlakiyaakezla ugje wá, baɗemme á una ɲanna ba náza á ɲa.»

<sup>8</sup> A ɲwanante ge Yaisu, a ba ɲane á elvan ge ɲane: «Aɲkwa an puwa am wakita á Dadaamiya, a ba ɲane: “Sey ká kezlan ugje ba ge Yaakadada, Dadaamiya á ɲa palle, ká ɲala á ba ázeɲara palle.” »

<sup>9</sup> Shaitaine a naba zlala antara ɲane á dem huɗe á Urusaliima, ta de ɗaltaa antara ɲane áte ire á \*mashidi yaikke. A ba ɲane á elvan ge ɲane: «Máki ka ba \*Egdza á Dadaamiya wá, naba mbeɗanaambeɗa ire á ɲa á dem áhá.

<sup>10</sup> Aɗaba aɲkwa an puwa am wakita á Dadaamiya, a ba ɲane: “Dadaamiya á de puwa malika-aha-aara, tá de faku hyema.”

<sup>11</sup> Aɲkwa zlaɓe am tate umele, a ba ɲane: “Tá de cuwáká á ba am erva-aatare, ganakini ká janvaarka ma ba ge sera á ɲa keni áte nákwá.” »

<sup>12</sup> Yaisu a nwanante zlafe ádaliye, a ba nane á elvan ge nane: «Ankwa an puwa am wakita á Dadaamiya, a ba nane: “Badeka Yaakadada, Dadaamiya á na dekideki.” »

<sup>13</sup> Shaitaine nanna zlauzle pute-aara ge bada Yaisu maa, a naba yanhe kwa mazla-aara, ba zlala-aara, sey vacite umele.

*Yaisu a fantau ge slera-aara am Galili  
(Mat. 4:12-17; Mark. 1:14-15)*

<sup>14</sup> Am iga á una nanna maa, Yaisu a naba saa á sem huđe á Galili, an hákuma á Shedekwe Cudedde kwakya am nane. Daaci emnde ta fantau ge ndaha elva-aara am kwára á Galili bademme.

<sup>15</sup> A fantau ge kwaraterse duksa ge emnde am mashidi-aha gergere, a gev ura an daradza áza emnde bademme.

*Emnde a Nasarátu yarnaaya Yaisu  
(Mat. 13:53-58; Mark. 6:1-6)*

<sup>16</sup> Daaci saasa Yaisu á sem Nasarátu ekse na a waltaa am huđe-aara. Vaci puwansepuwe maa, a naba dem mashidi, ba seke una á magán ba kelaazare. Daaci á naba tsetehe am mashidi nanna, geni á kátá ndaha wakita á Dadaamiya.

<sup>17</sup> Daaci ta naba vante wakita á nabi Aisaya. A naba palanse wakita na, a werante ba tate na ni ankwa an puwa átekwa, a ba nane:

<sup>18</sup> «Ankwa Shedekwe á Dadaamiya antara ya. A eksisaa ba Dadaamiya, geni yá saterá labáre á higa ge talaga-aha. A beliyaa ba nane ge saterá labáre ge dangay-aha, geni watse tá shansha ire-aatare. Ge wulfe-aha keni, geni watse tá shansha ice-aha-aatare. A beliyaa nane, geni yá se satersá ya emnde na ni tá maga palasa am erva á emnde.

<sup>19</sup> A beli geni yá se bala iva na Yaakadada á de magaterá ngurna ge emnde átekwa na.»

<sup>20</sup> Ndaasendaha maa, a fafante wakita na, a vante ge edda una am erva-aara wakita nanna, daaci a njehe. Bademme á emnde na tá am huđe á mashidi, tá zhára ba nane.

<sup>21</sup> A fantau ge ndaater elva, a ba nane á elvan ge itare: «Elva na kwa cenanaa kure, ya ndaase am wakita na wá, gevge vatena á ba am sarte na kwa cenanaa kure na.»

<sup>22</sup> Bademmire-aatare ta fantau ge zleba Yaisu, tá maga ba najipu áte shagerire á elva na a ndaasaa nane, a ba itare: «Há! Ábi ba nane egdza á Yusuf na?»

<sup>23</sup> A ba Yaisu á elvan ge itare: «Ndawisendahe naraje na. Diyandiya ganakini á jakurviyaaka: “Dauktar, mbanaamba ba ka ire á na.” Adaba watse kwá banba ganakini názena na cenáncena ka maganaa am Kafarnahum na wá, maganaamaga am ekse á miya keni.»

<sup>24</sup> Daaci a fahe zlafe ádaliye, a ba nane á elvan ge itare: «Yá ndaakur ba jirire, baaka nabi na ni emnde ta faa zherwe áte nane am ekse-aara ba ge nane.

<sup>25</sup> Náwa yá ndaakurnda kwa: am zamane á nabi \*Ailiya wá, diyakurdiya ganakini ndza kwakya njwasha weggye am dagave á Iserayiila-aha. Amá am sarte na yawe keye an kyalma hyaaka yawe dekideki, samsa waya yaikke na wá,

<sup>26</sup> Dadaamiya belaaka Ailiya ma á dem mba á ware-aatare keni am njwasha nanna. Kwaye a belanaa á dem mba á weggye a mukse umele á njá am Saraipta am kwara á Sidaun.

<sup>27</sup> Am zamane á nabi Ailisa keni maa, ndza kwakya emnde a derve am \*Iserayiila. Amá ba palle-aatare keni mbanaaka Ailisa dekideki, sey ba Naaman palle nane ura Siriya.»

<sup>28</sup> Bademire-aatare am huđe á mashidi nanna, watertuwa jipu elva nanna ta cenanaa itare na.

<sup>29</sup> Daaci ta naba eksevaahe, ta danse ádete iga a ekse, ta de dalte áte ire á wa á ekse-aatare antara nane, tá kátá hanvaare á sawa áte ire á wa nanna.

<sup>30</sup> Amá a naba dese am dagave-aatare selaakke, a zlalhe shifa-aara.

### *Yaisu ngyainsengye jini am ura*

*(Mark. 1:21-28)*

<sup>31</sup> Am iga a una nanna maa, Yaisu a zlala á dem Kafarnahum á ba am Galili nanna. An kwaskwe á puwansepuwe wá, a de kwaraterse elva á Dadaamiya ge emnde am mashidi.

<sup>32</sup> Bademme á emnde ta maga najipu áte tsaha-aara, adaba ankwá hákuma am huđe-aara.

<sup>33</sup> Am mashidi nanna maa, ndza ankwá ura an jini am ire, a naba fu hula á ba an ndzedá, a ba nane:

<sup>34</sup> «Ekka Yaisu ura Nasarátu na mu, ká kátá uwe ka ázenere? Niya á na ka se kedanekerka emtu? Iya diyanakdiya ganakini ka Ura Cudedde, ka slebela á Dadaamiya.»

<sup>35</sup> Yaisu a naba valarhe ge jini nanna, a ba nane á elvan ge nane: «Dude we á na, sesse am zhel na ba kinamina!» Daaci jini na a naba mbedaa zhel na am dagave á emnde, a sessehe am nane, maganáka ba uwe keni.

<sup>36</sup> Bademme á emnde tá maga ba najipu-aara. A ba itare am dagave-aatare: «Ázara kena jeba á hákuma na am elva-aara na? Ma valar ba ge jini keni, sey á sesse degey!»

<sup>37</sup> Daaci hyaranmehye labáre á Yaisu am kwara nanna bademme, ma am tate-ara keni tá ndaha ba nane.

### *Yaisu a mbateraahe emnde kwakya*

*(Mat. 8:14-17; Mark. 1:29-34)*

<sup>38</sup> Daaci ba segashe á Yaisu am mashidi nanna wá, a zlala ba suuwe á dem mba á Simaun. A de beraa shawle á Simaun mukse á zlava, á wáná zlagzlagi, zlagzlagi nanna an ndzedá. Daaci ta ndavanu ge Yaisu ganakini a mbanaambe.

<sup>39</sup> A duhe ge Yaisu ádeza mukse na, a de tsarhe, a naba valarhe ge zlagzlagi na. A naba yanhe ge zlagzlagi mazla-aara. Hattse a tsete ge mukse na, a fantau ge magateraa kashi.

<sup>40</sup> Eblyablya vaciya maa, emnde kwakya ta saa emnde-aha-aatare na á waterá vuwa bademme áseza Yaisu. Á waterá lapikere gergere kwakya. Daaci Yaisu a puwaterar erva-aara, a mbateraahe bademme.

<sup>41</sup> Vacite nanna wá, kwakya jini-aha saresse am emnde, tá ámbera hula, ta bantsa itare tá elvan ge Yaisu: «Ekka wá, ka \*Egdza á Dadaamiya.» Amá Yaisu a naba valaterarhe á ba an ndzedá, a piyaterterte ba dekideki ge ndaha elva, adaba itare diyardiya ganakini \*Almasiihu na ba nane.

### *Zlaya ganakini emnde a ekse-aha umele keni tá cenancena waazu*

*(Mark. 1:35-39)*

<sup>42</sup> Makuralla-aara ba kyaakya ádaga wá, a naba sesse ge Yaisu am huđe á ekse, a zlala á dem kaamba yiyye an ekse ba shagera. Bademme á emnde

ta fantau ge tataya nane. De sharansha, wayarka ɔ́kideki á yaterya Yaisu á dem tate umele.

<sup>43</sup> Amá a ba Yaisu á elvan ge itare: «Una zlaya ganakini yá dateránda labáre á higa, elva a njá am kwara á Dadaamiya ge emnde a ekse-aha umele keni. Adaba ta beliyaa adaba ba una nanna.»

<sup>44</sup> Daaci ba zlala-aara, a de bálá waazu am mashidi-aha gergere am kwara á Yahudiya.

## 5

### *Pukura-aha á Yaisu zunɔ́we* (*Mat. 4:18-22; Mark. 1:16-20*)

<sup>1</sup> Vacite umele Yaisu ádete we á haye á \*Gainaizarait. Kwakya emnde ta kelaa ádezenara ge cenaa elva á Dadaamiya, ta de beleme am dagave.

<sup>2</sup> Daaci Yaisu a naa paare á yawe-aha buwa, ta tsekwesaa emnde a sluwa kelfe am huɔ́e-aara, tá anɔ́kwa bára narre-aha-aatare.

<sup>3</sup> Paare-aha nanna wá, palle náza á Simaun. Daaci Yaisu a ɔ́alme am náza á Simaun nanna, a ba nane á elvan ge nane: «Sawa gitega emtsaade á dem dagave á yawe cekwaangudi.» Daaci Yaisu a njehe am paare nanna átire á haye, a fantau ge kwaraterse elva á Dadaamiya ge emnde.

<sup>4</sup> Am sarte na zlauzle elva-aara, a ba nane á elvan ge Simaun: «Kwaye gantega paare á dem tate na sladɔ́da yawe-aara na, sluwau sluwa kelfe antara emnde á kure.»

<sup>5</sup> Amá a ba Simaun á elvan ge nane: «Adaba ka ndaanaaka ka wá, degey na hare ba paɔ́ɔ́e á maga slera am tate nanna, má shaɔ́eranka duksa ɔ́kideki, Malum.»

<sup>6</sup> Daaci ta naba de puwa narre-aatare á dem tate nanna, ta sluwevaa kelfe kwakya jipu, haa a fantau ge bátá narre-aatare.

<sup>7</sup> Daaci ta fantau ge ɔ́aha emnde-aatare tá am paare umele an erva, ge se melaterumele. Ta sem ge emnde nanna, a naate ge paare-aha-aatare bukerɔ́e an kelfe, haa paare-aha-aatare ta fantau ge nɔ́gya á dem yawe.

<sup>8</sup> Ba a naa una nanna Simaun Piyer wá, a se nantaa sera ge Yaisu, a ba nane á elvan ge nane: «Yaakadada-aaruwa, zlaya á na ka ɔ́kideki ganakini mí njá kerɔ́e an iya, adaba iya ya slehaypa.»

<sup>9</sup> Ge jirire wá, tara Simaun antara emnde na tá am paare kerɔ́e, tá maga ba najipu-aara, adaba ta sluwevaa kelfe nanna kwakya jipu.

<sup>10</sup> Ba duksa palle ge egdzara á Jaibaidaiyus tara Yakuba antara Yuhanna na tá maga slera átirpalle antara Simaun nanna. Amá: «A wanka lyawa,» a ba Yaisu á elvan ge Simaun. «Á fantau ba vatena na, gakevge slejaha emnde á sem sera-aaruwa mazla-aara, ba seke kelfe na ká sluwana ká na.»

<sup>11</sup> Daaci ta fantau ge sawa an paare-aha-aatare ásete we-aara ge haye, ta se yanhe baɔ́emme, itare ta ɔ́aba Yaisu.

### *Yaisu mbanaambe slederve* (*Mat. 8:1-4; Mark. 1:40-45*)

<sup>12</sup> Daada Yaisu á dem huɔ́e á ekse, a naba duhe ge zhele umele badzanvebadza derve ádezenara, a kezlaa ugje á katafke-aara, a ba nane á elvan ge nane: «Yaakadada, ekka wá, má wayak-wáyá ká dzegwándzegwa givege ba metedɔ́e vuwa-aaruwa.»

<sup>13</sup> Yaisu a naba pelse erva-aara, a fete áte slederve na, a ba nane á elvan ge nane: «Wayanwáyá ká mbembe.» Ba seke ndáhá á miya na a naba mbehe ge slederve metedɔ́e.

<sup>14</sup> Yaisu a fan magiya, a ba ɲane á elvan ge ɲane: «Ndaananka ma ge ware keni degiya! De maranánmára ka ba ire á ɲa ge \*liman, vanteva sadake á ɲa áte una a ndaana \*tawrait a Muusa, a diyareddiya emnde ganakini mbakmbire.»

<sup>15</sup> Aley labáre á Yaisu anƙwa á far ba de katafke am dagave á emnde. Kwakya nalga á emnde na tá kelá ásezeɲara ba kelaazare, ge se cená elva-aara antara ganakini á mbateraambe.

<sup>16</sup> Yaisu keni a yaterya ba kelaazare, a zlala á dem kaamba, a de maga maduwa áhuwa.

*Yaisu a mbaa ura an matsa ubiya-aara*

*(Mat. 9:1-8; Mark. 2:1-12)*

<sup>17</sup> Vacite umele, Yaisu anƙwa á kwaraterse elva á Dadaamiya ge emnde, tá anƙwa \*Farisa-aha antara malum-aha á \*tawrait keni ázeɲara. Emnde ɲanna, emnde umele-aatare ta ba emnde a Galili, emnde umele ta sawa á sa am huɗe á Urusaliima, emnde umele ta sawa á sa am ekse-aha umele á ba am kwara á Yahudiya ɲanna. Anƙwa hákuma á Yaakadada ázeɲara ge mba emnde an ɲane.

<sup>18</sup> Daaci ta semhe ge emnde umele, an ura-aatare an matsa ubiya áte ɲane baɗemme, ta saa á sepaná antara egdera-aara baɗemme. Ta tataya baráma a dáná á de katafke á Yaisu,

<sup>19</sup> amá jaterviyaaaja aɗaba kwakya nalga á emnde. Daaci itare ta naba ɗalte áte ire á dzuguru, ta werante, ta naba velemhe ura-aatare antara egdera-aara baɗemme á de katafke á Yaisu am dagave á emnde.

<sup>20</sup> Nanna Yaisu fetarfire á emnde ɲanna maa, a ba ɲane á elvan ge ɲguryekwe na: «An bára haypa-aha á ɲa baɗemme, ura-aaruwa.»

<sup>21</sup> Daaci farantaufe malum-aha á \*tawrait antara \*Farisa-aha na ge dzama duksa umele, a ba itare am ervaunɗe-aatare: «Ware kena ɲane zhel na á lyiya sleɗe á Dadaamiya na? Anƙwa ura á dzegwándzegwa yanar haypa ge ura emtu, máki Dadaamiya ka palle?»

<sup>22</sup> Amá kertenɗi yaadiya Yaisu názena tá anƙwa dzamaná itare. A ba ɲane á elvan ge itare: «Labára kwa dzamete una am ervaunɗe á kure?»

<sup>23</sup> Ázara una tsaftsafe jauje ge baná: An bára haypa-aha á ɲa, bi baná: Tsettse, ezzlala an sera á ɲa?

<sup>24</sup> Iya wá, yá kátá kwá diyeddiye geni iya \*Ura á emnde baɗemme yá an hákuma ge yateraare haypa ge emnde am duniya na.» Daaci a ba ɲane á elvan ge edda una an matsa ubiya-aara na: «Ya ndaa ba ekka, tsettse, eksanteksa egdera á ɲa, ezzlala á da.»

<sup>25</sup> Hattse a naba tset ge zhel na á katafke á emnde baɗemme, a eksante egdera na ta sanaa áte ɲane na, a naba da-aara, á gálá Dadaamiya átira zlala.

<sup>26</sup> Emnde baɗemme tá maga ba najipu-aara, ta fantau ge mága lyawa á Dadaamiya am ervaunɗe, a ba itare am dagave-aatare: «Vatena wá, namiyanna duksa!»

*Náwa ndza a ɗantaa estuwa Yaisu Laiwi*

*(Mat. 9:9-13; Mark. 2:13-17)*

<sup>27</sup> Am iga a una ɲanna maa, Yaisu a degashe á de ja ɗaba, a naa palle á \*emnde a jaha hadáma umele, zhera-aara Laiwi, anƙwa á njá am bere á hadáma ɲanna. A naba eɗɗaha Yaisu, a ba ɲane á elvan ge ɲane: «Tsettse, sawa, ɗabidɗaba.»

<sup>28</sup> A naba tsetehe ge Laiwi, a yaa duksa baɗemme, ɲane a ɗaba Yaisu.



<sup>29</sup> Daaci Laiwi a danhe á dem mba-aara, a de magaa náza za kwakya. Emnde a jaha hadáma umele antara emnde umele, ta kwakya una ta za dfafa átirpalle antara Yaisu.

<sup>30</sup> Daaci a naba tsekwaa ge higa á \*Farisa-aha antara malum-aha-aatare na tá anjwa áhuwa na bademme, ta fantau ge wesha elva, a ba itare tá elvan ge pukura-aha á Yaisu: «Labára kwá zá duksa átirpalle antara \*emnde a jaha hadáma ira emnde a mága haypa gergere na?»

<sup>31</sup> A njwaterante ge Yaisu, a ba njane á elvan ge itare: «Emnde na lapiya vuwa-aatare wá, baaka wedere-aatare áza dauktar, sey ba emnde na lapika vuwa-aatare una tá deza dauktar.

<sup>32</sup> Daaci ba duksa palle ge iya keni. Sanka ya á se tataya emnde na tá am jirire, ya se tataya ba emnde a haypa, geni tá maga tuba.»

### *Ndava áza Yaisu arge tsufa ndera*

*(Mat. 9:14-17; Mark. 2:18-22)*

<sup>33</sup> Ta duhe ge emnde umele ádeza Yaisu, ta de ndavanu elva. A ba itare tá elvan ge njane: «Pukura-aha á Yuhanna, antara pukura-aha á \*Farisa-aha wá, baaka sarte na ni eksarka ndera na, tá ámbera maga maduwa keni bademme. Labára pukura-aha á njane, itare tá zá ba duksa, tá shá ba yawe-aatare na?»

<sup>34</sup> Daaci a njwaterante ge Yaisu, a ba njane á elvan ge itare: «Emnde na tá dahaterá á sem larusa keni, tá dzegwándzegwa lyaterar tsufa ndera emtu, am sarte na tá áza zhele á larusa? Tá dzegwánka dekideki.

<sup>35</sup> Amá anjwa á sawa sarte umele wá, watse tá pakyava antara zhele á larusa. Am sarte njanna wá, itare keni watse tá tsufa ndera.»

<sup>36</sup> Yaisu a vaterte naraje na keni. A ba njane á elvan ge itare: «Baaka ura á tanve baukta anjwaslire, ge de venya emgyegwe a kacakaca an njane. Máki estuwa, a badzanve una anjwaslire, antara emgyegwe-aara keni tá maslaveka.

<sup>37</sup> «Zlabe adaliye, mbazla anjwaslire wá, tá puweka á dem emgyegwe a \*kanyakanya-aha. Adaba máki naavena mbazla wá, á tatanvetate kanyakanya-aha na. Daaci á puwa mbazla á dem haha, kanyakanya keni badzafbadze.

<sup>38</sup> Daaci máki mbazla anjwaslire wá, sey tá puwaná á dem kanyakanya keni á ba anjwaslire.

<sup>39</sup> Daaci máki edda-aara shaushe mbazla na naavenahe wá, baaka wedere-aara an una zlabe tsatka na. Adaba ta bantsa wá: Emtake ba una naavenahe.»

## 6

### *Ba Yaisu una edda á kwaskwe á puwansepuwe*

*(Mat. 12:1-8; Mark. 2:23-28)*

<sup>1</sup> Vacite umele an kwaskwe á puwansepuwe wá, Yaisu a degashe am dagave á fe-aha á hiya praatte antara pukura-aha-aara. Duwa á pukura-aha maa, ta naba kazleva hiya, tá anjwa ezza.

<sup>2</sup> A ba \*Farisa-aha umele tá elvan ge itare: «Labára kwá maga duksa na an piya an kwaskwe á puwansepuwe?»

<sup>3</sup> A naba njwaterantehe ge Yaisu, a ba njane á elvan ge itare: «Ekkure ndaakurseka názu ndza a maganaa \*Dawuda am sarte na irice-aara antara emnde-aara bademme njateraaja waya na emtu?

<sup>4</sup> Duwa-aatare á dem mashidi wá, Dawuda njanna a naba eksante tapiske na ta fán ge slera á Dadaamiya na, ta naba zuhe antara emnde-aara. Amá

shairiya á Dadaamiya wá, a vaterte baráma á za tapiske ñanna ba ge \*liman-aha palle.»

<sup>5</sup> Daaci a ba Yaisu á elvan ge itare zlaɓe ádaliye: «Ba ya \*Ura á emnde baɗemme una, ya edda á vaci puwansepuwe ñanna.»

*Zhele an emtsa erva-aara  
(Mat. 12:9-14; Mark. 3:1-6)*

<sup>6</sup> An vaci puwansepuwe umele zlaɓe ádaliye, Yaisu a dem mashidi, a de kwaraterse elva á Dadaamiya ge emnde. Vacite ñanna maa, ndza anƙwa zhele umele an emtsa erva naɗafa-aara am mashidi ñanna.

<sup>7</sup> Malum-aha á \*tawraita antara \*Farisa-aha wá, itare tá tsagwada ba Yaisu. Ta fantau ge zhára Yaisu an enƙale-aatare baɗemme, má watse á mbanaambe ura an kwaskwe á puwansepuwe. Adaba itare, tá kátá ba názena tá eksená átekwa, lauktu ma tá puwar elva.

<sup>8</sup> Amá Yaisu diyaadiya huɗe-aatare baɗemme. A ba ñane á elvan ge edda una an emtsa erva-aara na: «Naba tsettse, tsaatse á katafke á emnde áhuna.» Hattse a naba tsetehe ge zhel na, a tsaahé.

<sup>9</sup> Daaci Yaisu a naba ndavateru ge emnde baɗemme, a ba ñane á elvan ge itare: «Anƙwa ndáva-aaruwa ázekure. A vamite baráma á mága uwe \*tawraita an kwaskwe á puwansepuwe? Mága maggwire emtu, mandzawire he? Lya ura emtu, keɗa ura he?»

<sup>10</sup> Daaci a zharateraahe, a ba ñane á elvan ge zhel na: «Pelansepele erva á ña.» A naba pelansehe, erva-aara gevge ba lanje ba seke erva-aara werre.

<sup>11</sup> Amá emnde ñanna wá, a naba jaterhe ge ervaunɗe, ta fantau ge ndaha názena ni watse tá magante ge Yaisu am dagave-aatare.

*Yaisu anƙwa á dzera emnde a bela  
(Mat. 10:1-4; Mark. 3:13-19)*

<sup>12</sup> Am sarte ñanna maa, Yaisu a ɗaltaa áte ire á wa, a de magaa maduwa. A hare panje an ice, á maga ba maduwa áza Dadaamiya.

<sup>13</sup> An enjlya-waabere wá, a naba ɗante pukura-aha-aara baɗemme, a dzerse emnde kelaawa ju buwa am itare, a ba ñane: «Kure wá, kwa emnde a bela.»

<sup>14</sup> Náwa zhera-aha á emnde a bela ñanna: Simaun, ñane una Yaisu a fante zhera á Piyer, antara egdza emmejara Andere, Yakuba ta antara Yuhanna, Filip, Bartaulauma,

<sup>15</sup> Mata, Taumas, Yakuba á Halfa, Simaun na tá ɗahaná an edda una wayaaka tá kwarátera emnde na,

<sup>16</sup> Yahuda á Yakuba, ira Yahuda Iskariyaut edda una a velu Yaisu áza kelaade-aha-aara na.

*Yaisu anƙwa á magaterá waazu ge emnde, á mbatermbe am lapikere keni  
(Mat. 4:23-25)*

<sup>17</sup> Am iga a una ñanna maa, a naba tsekwese á sem vaada antara itare, ta se beraa emnde a ɗaba ñane kwakya am tate ñanna. Tá anƙwa zlaɓe ádaliye nalga emnde ta kwakya jipu ázetare. Emnde umele-aatare ta sawa á sa am huɗe á Urusaliima, emnde umele ta sawa á ba á sa am kwara á Yahudiya ñanna, emnde umele zlaɓe ádaliye kwaye ta sawa á sa am Tirus antara Sidaun, ekse-aha ñanna tá áte we á haye yaikke.

<sup>18</sup> Dalila á sawa á emnde ñanna baɗemme na wá, ta se cena waazu ázeñara antara ganakini á mbateraambe. Emnde na ndza á magaterá palasa shaitaine am dagave-aatare keni, baɗemme mbarmbe mazla-aara.

<sup>19</sup> Vacite ɲanna wá, ma ware keni ndza á berdava ádeza Yaisu, ganakini á fetefa erva-aara áte ɲane, adaba anƙwa hákuma á mbatermbe ázenjara, mbateraambe bademmire-aatare.

*Higa jirire bi zlaɗa jirire*

(Mat. 5:1-12)

- <sup>20</sup> Yaisu a zharaa pukura-aha-aara, a ba ɲane á elvan ge itare:  
«Higa yaikke ge kure talage-aha, adaba watse kwá de njá antara Dadaamiya am yaikkire-aara.
- <sup>21</sup> Higa yaikke ge kure emnde na á wakurá waya kina, adaba watse á juwa á ba áte kure duksa.  
Higa yaikke ge kure emnde na kwá an yawe á kyuwa am ice kina, adaba watse kwá dzaktedzáká.
- <sup>22</sup> Higa yaikke ge kure máki emnde tá fakurá áte kelaadire, yarakuraaya, tá anƙwa peshakurá an zlazle, tá anƙwa epsawakurepsawa.  
Higa yaikke ge kure, má tá magakurá una-aha ɲanna adaba iya \*Ura á emnde bademme.
- <sup>23</sup> Ma ta magakurte una vaatara keni, naba higauhiga, a gevge geɗa ázekure. Adaba laɗa á kure kwakya jipu am samaya. Adaba eggye-aha-aatare keni ndza ta magaterán ba estuwa ge nabi-aha werre.
- <sup>24</sup> «Amá watse zlaɗa yaikke ge kure kwa emnde a berba adaba zakuruze emtakire á kure.
- <sup>25</sup> Watse zlaɗa yaikke ge kure kwa emnde na an emtsa waya á kure kina, adaba anƙwa waya yaikke á katafke á kure.  
Watse zlaɗa yaikke ge kure kwa emnde na kwá anƙwa dzáká kina, adaba anƙwa emtanƙire á katafke á kure, watse kwá kyuwetekyuwa.
- <sup>26</sup> Watse zlaɗa ge kure, máki emnde bademme tá anƙwa zlebakurzleba kina, adaba eggye-aha-aatare keni ndza ta magaterán ba estuwa ge nabi-aha fida werre.»

*Wayauwáyá an kelaade-aha á kure keni*

(Mat. 5:38-48; 7:12a)

- <sup>27</sup> «Ya ndaa ba kure kwa emnde na kwá anƙwa cená elva-aaruwa: Wayauwáyá an kelaade-aha á kure, magawateránmaga shagerire.
- <sup>28</sup> Gawaterga barka ge emnde na tá nyainyaikurnyainye, ɲalawateruɲale Dadaamiya ge emnde na tá magakurá palasa.
- <sup>29</sup> Má ura a tedaku babárva am ekte a hyema wá, eptsananteptsá dalbe umele keni. Má edda-aara a lyevaa zane á ɲa an ndzedá wá, piyananteka a dánda antara ba ɗanciki keni.
- <sup>30</sup> Ma a ndavakuwa ware duksa keni, yainanveka. Má edda-aara a lyevaa duksa á ɲa an ndzedá, ndaveka ka, naba yanánya a zuze.
- <sup>31</sup> Daaci bademme á názena ni kwá kátá tá magakurná emnde ge kure na wá, kure keni magawateránmaga ge emnde umele.
- <sup>32</sup> «Máki kwá waya ba emnde na ni itare keni wayarakurwáyá wá, á de galákurá ware kena? Adaba emnde a haypa keni tá waya ba emnde-aatare.
- <sup>33</sup> Máki kwá magaterá shagerire ba ge emnde na ni itare keni tá anƙwa magakurá shagerire wá, á de galákurá ware kena? Adaba emnde a haypa keni, tá maga ba una ɲanna.
- <sup>34</sup> Zlaɓe ádaliye, máki kwá vaterte duksa á kure ba ge emnde na ni diyakurdiya watse tá eptsakurnaaptsa wá, á de galákurá ware kena? Adaba emnde a haypa keni, tá vaterte duksa-aatare ba ge emnde a haypa seke itare, adaba diyardiya watse tá shálishé duksa-aatare.

<sup>35</sup> Amá wá, estuweka. Wayanwáyá an kelaade-aha á kure, magawateránmaga shagerire. Vawaterteva duksa á kure ge emnde, tamawka duksa umele am iga-aara. Kure, watse kwá shá ladá kwakya, watse kwá gev egdzara á Dadaamiya Slekse. Adaba nane wá, á magaterá maggwire ge emnde na tá banka ususe antara ge emnde a mandzawe keni bademme.

<sup>36</sup> Gawevege emnde a maggwe ba seke Eddekure.»

*Habazauka sera á emnde*  
(Mat. 7:1-5)

<sup>37</sup> «Habazauka sera á emnde, kure keni, á de zakurvarze Dadaamiya am shairiya. Mbedawka emnde, kure keni Dadaamiya á de mbedakurka am shairiya. Yawateraarye ge emnde, kure keni, á yakuraarye Dadaamiya.

<sup>38</sup> Vawaterteva duksa á kure ge emnde, kure keni á yakuraaka Dadaamiya. Tá de ndakakuranta á ba an ndaka ge we á erwaunde á kure. Adaba bademme á názena kwá magaterná kure ge emnde na wá, Dadaamiya keni á de magakurná á ba áte una nanna ge kure keni.»

<sup>39</sup> Yaisu a vaterte naraje na zlahe ádaliye, a ba nane á elvan ge itare: «Ankwa wulfe á dzegwándzegwa tada ukfenjara wulfe emtu? Ábi tá de puwa á dem evege ba bukerde-aatare.

<sup>40</sup> Á ba ankwa pukura ni á januje ge malum-aara an malire? Baaka d'ekideki, sey máki ndaasendahe laya-aara ba shagera, lauktu á shá malire seke malum-aara.

<sup>41</sup> «Labára nane ge ekka ká zhára esseba na am ice á egdza emmeja, amá ká tapanaaka slalbe sladde na am ice á na ge ekka?

<sup>42</sup> Ká dzegwaná estara banán ge egdza emmeja: “Sansa yá sakansese esseba am ice egdza emmaaye,” amá ekka ka an slalbe sladde am ice á na? Egdza a fida na, sansese emtsaade slalbe sladde na am ice á na, ká nanna ice á na parakke, lauktu ká de sananse esseba am ice ge egdza emmeja.»

*Náfá wá, ta diyeddiye á ba áte egdza-aara*  
(Mat. 7:16-20; 12:33-35)

<sup>43</sup> «Náfá shagera wá, á yeká egdzere emtanja. Náfá laake keni, á yeka egdzere emtake.

<sup>44</sup> Zlahe ádaliye ma náfá-ara keni ta diyeddiye á ba áte egdza-aara. Adaba tá tsakavaaka anyaranyara áte zaza, tá tsakavaaka nderza áte dake.

<sup>45</sup> Ba duksa palle ge emndimagwaha keni. Slekemaare, á sa arge shagerire á názena an ndaka am erwaunde-aara, á sanse ba názena emtake na. Slemanzawe maa, á sa arge shagerkire á názena an ndaka am erwaunde-aara, á sanse ba názena emtanja d'ekideki na. Adaba ba názena ni jauje am erwaunde á edda-aara na wá, am mbuwe-aara keni á sanse ba nane.»

*Bere-aha gergere buwa*  
(Mat. 7:24-27)

<sup>46</sup> «Labára kwá dahiya an Yaakadada, Yaakadada, amá kwá manja názena yá bakurná ya?

<sup>47</sup> Cenaucena, náwa yá marakurá garava á edda una á maga názena á se cenaná ázerwa bademme.

<sup>48</sup> Ura estuwa, nane á garava an zhel slenkale, a nderaa bere-aara shagera. A yese emtsaade ba shagera, lauktu a fanaa ekte áte palaha. A sawhe ge yawe a kela, a se eblyete áte bere nanna á ba an ndeda, amá baaka názu a eksanaa áte nane, adaba an ndera shagera.

<sup>49</sup> Amá edda una ni á de maŋka názena á se cenaná ázerwa wá, ɲane á garava an edda una ni a fanaa ekte ge bere-aara á ba áte haha ba estuwa. De samsa yawe á kela, a se eblyete áte bere ɲanna wá, a naba mbedfanaahe reppe.»

## 7

### *Náwa a mbanaa estuwa Yaisu nave á male á sawji-aha á Rauma (Mat. 8:5-13)*

<sup>1</sup> Am sarte na zланаazle Yaisu tsakaterá elva-aara ge emnde, a naba zlala á dem Kafarnahum.

<sup>2</sup> Am Kafarnahum ɲanna maa, aɲkwa male á sawji-aha á Rauma umele, lapika nave-aara na ni ɲane wayaawaya jipu na. Herzhe á degashe shifa am ɲane.

<sup>3</sup> Cenáncena male ɲanna labáre á Yaisu maa, a naba bela male-aha á Yahudiya-aha umele ádezenara, geni a se mbanaambe nave-aara lapika na.

<sup>4</sup> Daraada emnde ɲanna áza Yaisu, ta fantau ge ɲala Yaisu an ervaunɗe-aatare palle. A ba itare tá elvan ge ɲane: «Zhele ɲanna wá, á zlayanzlaya ganakini ká de mbanaambe ura-aara ɲanna.

<sup>5</sup> Adaba zhel ɲanna keni, aɲkwa á ɲámiyá an ervaunɗe-aara palle. Bá mashidi á ɲere keni, a nderanaa ba ɲane an nalmane-aara.»

<sup>6</sup> Daaci a naba duhe ge Yaisu antara itare.

Ba herzharanteherzhe há wá, ta naba ja ire antara slakate-aha á male á sawji-aha na a belateraa ɲane áseza Yaisu. A ba ɲane: «Malum, shunɲuleka ɗekideki ge se mba-aaruwa. Adaba hyanefka geni ka sem huɗe á há-aaruwa.

<sup>7</sup> Adaba ba una ɲanna danka ba iya an ire-aaruwa á de katafke á ɲa. Ndaasendaha ka ba elva á ɲa palle, á mbemmbe nave-aaruwa.

<sup>8</sup> Adaba iya keni, ya ba edda á hákuma; male-aha-aaruwa keni tá aɲkwa. Iya, ya male á sawji-aha. Má ya banán ge palle-aatare: Ezzlala á dem tatu estuwa, ba á zlala. Má yá ɗaha palle-aatare, ba á sawa. Má ya banán ge nave-aaruwa palle: Emmága una, sey ba á emmága.»

<sup>9</sup> Cenáncena Yaisu elva á zhel ɲanna wá, á maga ba najipu-aara. Daaci a naba eptsavte ádeza nalga á emnde na tá aɲkwa ɗaba ɲane na, a ba ɲane á elvan ge itare: «Kwa cenáncena emtu? Á ba am \*Iserayiila keni shanáńka ura an fetarfire seke zhel ɲanna.»

<sup>10</sup> Daaci ta naba eptsa-aatare ge emnde a bela á male á sawji-aha na, ta de beraa nave á ura-aatare na lapiya ba layye.

### *Yaisu a tsante egdze á wegyegye a mukse ndza an emtsa*

<sup>11</sup> Am iga a una ɲanna maa, Yaisu a zlala á dem ekse na ta ɗahaná an Nayin. Ta ɗabanaa pukura-aha-aara antara emnde kwakya ádehuwa.

<sup>12</sup> Daraada áte we á wakyiya á ekse maa, ta de jaa ba ire antara emnde kwakya tá sá sepa emtsa, tá daná á dem evege. Emtsa ɲanna wá, egdzere zhele palle á ba ɲane ge emmeɲara. Emmeɲara keni wegyegye a mukse.

<sup>13</sup> Yaakadada, ba a belanu ice ge mukse ɲanna wá, a naba zanvaarhe. A ba ɲane á elvan ge ɲane: «Naba ɗuɗe kyuweka.»

<sup>14</sup> Daaci a naba duhe ádeza emnde a sepa emtsa na, a de fete erva-aara áte leba na tá sepa emtsa átekwa na, ta naba tsaaha ge emnde a sepa emtsa na. A ba Yaisu: «Egdze a dawale, ya bakanaa ba iya, naba tsettse!»

<sup>15</sup> A naba tsete ge emtsa na, a njihe, a fantau ge ndaha elva. Daaci: «Kwaye egdza á ɲa,» a ba Yaisu á elvan ge emmeɲara.



<sup>16</sup> Baɗemme á emnde tá maga ba najipu-aara, tá an lyawa á Dadaamiya am ervaunɗe-aatare. Ta fantau ge gálá Dadaamiya, a ba itare: «Kina wá, shamiyánsha nabi yaikke. A tsekwaa ba Dadaamiya an ire-aara a se tsaterme am iga ge emnde-aara.»

<sup>17</sup> Cenarácena labare á názena a maganaa Yaisu am kwara á Yahudiya baɗemme dem ekse-aha na tá átakwe antara Yahudiya ɗanna.

*Emnde a bela á Yuhanna ádeza Yaisu  
(Mat. 11:2-19)*

<sup>18</sup> Daaci Yuhanna maa, de ndaaranndáhá pukura-aha-aara názena a maganaa Yaakadada na baɗemme. A naba ɗete emnde buwa am pukura-aha-aara,

<sup>19</sup> a belaterhe ádezenjara, geni tá de ndavanundave elva na: «Ba ekka edda una diyanɗerdiya ganakini watse á sawa na emtu? Una ka ura umele, sey ɗá tsákwá hyema ádaliye he?»

<sup>20</sup> Daraada áza Yaisu, a ba itare tá elvan ge ɗane: «A belanɗeraa Yuhanna slemaga baptisma, ge se ndavakundave: Ba ekka edda una diyanɗerdiya ganakini watse á sawa na emtu? Una ka ura umele, sey ɗá tsákwá hyema adaliye he?»

<sup>21</sup> Ay, á ba am sarte ɗanna maa, Yaisu a mbateraahé emnde kwakya am lapikere keni gergere kwakya, a ngyesaa shaitaine-aha am vuwa á emnde kwakya, a vaterte ice ge wulfe-aha kwakya.

<sup>22</sup> Daaci a vaterte jawápa ge emnde na a belateraa Yuhanna na, a ba ɗane á elvan ge itare: «De bawanánba kure ba názena a cenanaa hyema á kure, antara názena kwa zharanaa á ba an ice á kure na ge Yuhanna ɗanna. Bawanánba ganakini wulfe-aha sharánsha ice, emnde a dere sharánsha sera-aha-aatare, tá anɗkwa zlala ba lanɗe, emnde a derve mbarembe ba metmette, makwaya-aha sharánsha hyema-aha-aatare, emnde na ndza emtsaremtsa keni tsatertetse, talage-aha keni maa, cenarvaacena labáre á higa.

<sup>23</sup> Barka ge edda una má kezlanveka fetarfire-aara áte iya na.»

<sup>24</sup> Am sarte na zlarzlala emnde a bela á Yuhanna maa, Yaisu a fantau ge ndaater elva á Yuhanna ge emnde, a ba ɗane á elvan ge itare: «Ndza kwa de zhárá uwe kure am kaamba? Ndza kwa de zhárá masa-aha na á gejaná effeya na emtu? Una ɗanna ka ɗekideki.

<sup>25</sup> Ay, ndza kwa de zhárá uwe? Ndza kwa de zhárá ura am zane zariya emtu? Náwa emnde a tsakwa zane zariya, emnde a za duniya keni, tá á ba am mba á slekse-aha.

<sup>26</sup> Ay, ndza kwa de zhárá uwe? Ndza kwa de zhárá nabi á Dadaamiya ka emtu? Una ba jirire, á tsaaka á ba an nabi keni.

<sup>27</sup> Adaba ba Yuhanna una wakita á Dadaamiya anɗkwa ndaha elva-aara, a ba ɗane:

“Náwa yá bela slebela-aaruwa á katafke á ɗa, ge tsatsaka baráma, a ba Dadaamiya.”

<sup>28</sup> Una ya ndaakuraa ba iya: am emndimagwaha na tá yaterá ba ɗwasha na, baaka ura á jauje ge Yuhanna an malire. Aley, edda una cekwa ba ɗane am emnde na tá am \*kwara á Dadaamiya wá, ɗane á jauje ge Yuhanna an malire.»

<sup>29</sup> Daaci baɗemme á dikele á emnde ɗanna antara \*emnde a jaha hadáma na tá anɗkwa am dagave-aatare, cenarvaacena waazu á Yaisu ba shagera, adaba itare wá, ndza ta cenaa waazu áza Yuhanna, fartarfe

ganakini una ɲanna elva á Dadaamiya ba jirire, lyarvaalya baptisma ázeɲara.

<sup>30</sup> Amá \*Farisa-aha antara malum-aha á \*tawraita wá, itare cenarka Yuhanna, yarnaaya názena a bashateraa Dadaamiya, eksararka baptisma á Yuhanna.

<sup>31</sup> A ba Yaisu zlaɓe ádaliye: «Yá sláterá an ware kwa emnde a zamáne na? Tá garava an uwe?»

<sup>32</sup> Ta ba seke egdzara na tá beɗa ba nara áte we á layye am huɗe á ekse, a ba emnde umele tá elvan ge emnde umele-aatare: Ɗa fertakurte derma á ga gusa, shekelakurka; ɲa tsakakurte ɗákwa keni, kyuwakurka, a ba itare na.

<sup>33</sup> Haá! Samsa Yuhanna, ɲane shanka za ɗafa, shaaka mbazla, ɲane wá, an shaitaine ɗeme ákyiye!

<sup>34</sup> De samsa \*Ura á emnde baɗemme, ɲane wá, aɲkwa ezza, aɲkwa essha keni, ta bantsa: kwaye zhel na slera-aara ba huɗe, ɲane ɗeme wá, ura á emnde a ɲezla, antara emnde na tá maga ba haypa na akyiye.

<sup>35</sup> Amá ilmu á Dadaamiya wá, aɲkwa á máráva jirire-aara ba parakke áza emnde-aara.»

#### *Názena a maganaa Yaisu am huɗe á há á Simaun ura Farisa*

<sup>36</sup> Aɲkwa ura \*Farisa umele, zhara-aara Simaun, a ɗaha Yaisu ge de za ɗafa am mba-aara. A naba duhe ge Yaisu, á dem mba á zhel ɲanna, tá aɲkwa zá ɗafa na.

<sup>37</sup> Ay, am ekse ɲanna maa, aɲkwa mukse zaware umele, cenáncena ganakini aɲkwa Yaisu am mba á Simaun. Daaci a naba sawhe ge mukse ɲanna an kuderá á waye-aara am erva, se-aara emtake jipu.

<sup>38</sup> Ba semsa-aara wá, a se fantau ba ge kyuwa am sera á Yaisu, a baranaa sera ge Yaisu an yawe á kyuwa, a mesanaahe an úgje á ire-aara. A ɲante sera ge Yaisu, a gante waye-aara ɲanna áte sera-aara.

<sup>39</sup> Aɲkwa á ezzhara ura Farisa na a ɗahanaa ɲane Yaisu, a ba ɲane am ervaunɗe-aara: «Zhel na, ma andze nabi á Dadaamiya á ba an jirire wá, ma andze a naba diyeddiye mukse na a nyamala ɲane na, antara názena á maganá ɲane baɗemme. Aɗaba kwakya haypa na á maganá ɲane.»

<sup>40</sup> Daaci a ba Yaisu: «Simaun, aɲkwa názu yá bakaná ya.» «Naba ndaha, malum,» a ba Simaun á elvan ge ɲane.

<sup>41</sup> A ba Yaisu á elvan ge ɲane: «Aɲkwa emnde buwa á ɗabaterá ba ura palle áte gema. Palle-aatare a ɗabán ge gursa deremke buwa. Palle wá, a ɗabán ge gursa kul buwa.

<sup>42</sup> Ay, bukerɗe-aatare baaka edda una á dzegwándzegwa pelese gema na. Daaci edda á gema a naba yateraarhe gema ɲanna bukerɗe-aatare. Ate ka mu, ware am itare á waya edda á gema-aatare na kwakya?»

<sup>43</sup> A ɲwanante ge Simaun, a ba ɲane: «Yá tama, á wayaná ba edda una ndza kwakya gema-aara áte ɲane na.» «Ba jire á ɲa,» a ba Yaisu á elvan ge ɲane.

<sup>44</sup> Daaci a eptsavte ádeza mukse na, a ba ɲane á elvan ge Simaun: «Mukse na wá, ya sem ba estuwa á sem huɗe á há á ɲa, vakiteka yawe á bara sera, a bariyaa ba ɲane sera-aaruwa an yawe á kyuwa-aara, a mesinaahe an úgje á ire-aara.

<sup>45</sup> Lyakivaaka an unɲule-aara am huɗe á há á ɲa, amá mukse na, daga ya sem ba estuwa, sem kina keni, a ɲitaa ba sera.

<sup>46</sup> Gakifka waye áte ire-aaruwa, amá mukse na wá, a give waye-aara áte sera-aha-aaruwa.

<sup>47</sup> Adaba una ḡanna yá baká ba jirire: kwakyire á wayavire-aara na ni a wayitaa an ḡane na wá, tá diyeddiye á ba áte una ḡanna, ganakini an bára haypa-aha-aara, ma a kwakyaava estara keni.»

<sup>48</sup> Daaci a ba ḡane á elvan ge mukse na: «An bára haypa-aha á ḡa.»

<sup>49</sup> Emnde na tá arge dafa kerde na, ta fantau ge dzamanaa am ervaunđe-aatare: «Ware kena ḡane zhel na ni á yanaara ḡane haypa ge ura na?»

<sup>50</sup> Amá a ba Yaisu á elvan ge mukse na: «Lyakaalya fetarfire á ḡa, ezzlala á ba an hairire.»

## 8

### *Nwasha na ta da á daba Yaisu na*

<sup>1</sup> Am iga á una ḡanna maa, Yaisu a fantau ge ja daba am berni-aha antara am makwata-aha gergere, anƙwa á magaterá waazu ge emnde, á balaterá labáre á higa, elva a njá am \*kwara á Dadaamiya. Pukura-aha kelaawa ju buwa na wá, tá á ba antara ḡane.

<sup>2</sup> Tá anƙwa zlaɓe ḡwasha-aha umele, a ḡezlatersaa Yaisu am erva á shaitaine, a mbateraaha am lapikere gergere, itare keni ta daba Yaisu am jadaba ḡanna. Náwa zhera á ḡwasha ḡanna: Maari mukse na tá dahaná an Maari á Magdala na, ḡane una Yaisu a ḡgyesaa jini-aha vuye am ḡane,

<sup>3</sup> Yuwanna, mukse á Huja nakawa am kwara á sleksu \*Hirudus, Suzanna, ira ḡwasha umele na tá anƙwa melanu ge Yaisu antara pukura-aha-aara an nalmane-aatare na.

### *Naraje an slepuwa wulfe*

(Mat. 13:1-9; Mark. 4:1-9)

<sup>4</sup> Ta se jamme ge emnde kwakya áza Yaisu, ta sawa am ekse-aha gergere. Yaisu a fantau ge vaterte elva á Dadaamiya an naraje na. A ba ḡane á elvan ge itare:

<sup>5</sup> «A sesehe ge sleherda umele an wulfe á nalkame-aara, á de puwaná am fe-aara. Am sarte na anƙwa á eppuwa maa, wulfe-aha umele a de valyaa áte unḡule. Ta payanaahe ge emnde an sera, ta tsekante ge yiye-aha.

<sup>6</sup> Wulfe-aha umele a de valyaa áte cacera, a sesehe ba watsewatse, amá shekwaraaka emtsa, adaba baaka narase.

<sup>7</sup> Wulfe-aha umele zlaɓe ádaliye, a de valyaa am dake. Ta wala antara dake, a becante ge dake.

<sup>8</sup> Amá wulfe-aha umele wá, a puwaa á ba am haha shagera. A sesehe ge nalkame ḡanna, a magaa ire. Ba kelaa ekte a yaa egdzere deremke.» A farhe zlaɓe ádaliye ge Yaisu, a ba ḡane á elvan ge itare: «Edda una máki anƙwa hyema-aara, a cenevaacena!»

### *Labára naraje-aha?*

(Mat. 13:10-17; Mark. 4:10-12)

<sup>9</sup> Am iga á una ḡanna maa, ta de ndavanuhe ge pukura-aha-aara maana á naraje ḡanna.

<sup>10</sup> A ba Yaisu á elvan ge itare: «Kure wá, vararakurteva baráma geni kwá diyeddiye nasherire na am \*kwara á Dadaamiya. Amá ge emnde umele wá, sey yá vaterte á ba an naraje, geni ma tá anƙwa á zharaná á ba an ice-aatare keni, tá diseke, ma tá effa deme hyema keni, tá cenanka.»

### *Maana á naraje an slepuwa wulfe*

(Mat. 13:18-23; Mark. 4:13-20)

<sup>11</sup> «Náwa maana á naraje ḡanna: Wulfe wá, una ḡanna elva á Dadaamiya.

<sup>12</sup> Daaci emnde umele, itare ta ba seke unjule. Ta cenevaacena elva á Dadaamiya, á sawa shaitaine, á tsakse elva nanna am itare na, á piyaterterge fetarfe geni a sharánka shifa-aatare.

<sup>13</sup> Emnde umele, ta ba seke cacera. Tá cenevaacena waazu, tá lyiyaná á ba an higa, amá tá vanteka slede am vuwa-aatare. Tá fetarfe cekwaangudí, amá má samsa zladá wá, kertenj tá yanya.

<sup>14</sup> Emnde umele zlafe á daliye, itare ta ba seke há á dake. Tá cenevaacena tsa elva á Dadaamiya á ba an unjule-aara, amá wá, tá yanka dzama á ire an kazlaja á duniya, antara tataya berbire, ira tataya emtakire á duniya na. Á becantá ba una nanna elva á Dadaamiya na am itare na, á sanseka ire defideki.

<sup>15</sup> Amá emnde umele wá, itare ta ba seke haha na slede shagera na. Má cenarancena elva á Dadaamiya wá, tá naná á ba an ervaunde-aatare palle, an shagerire á ervaunde. Tá farvaunde, tá maga nampire.»

### *Naraje an kára á fanus*

*(Mark. 4:21-25)*

<sup>16</sup> «Baaka ura, máki mbantembe kára á fanus-aara ni, á unjubar darau bi á faná am ekte á egdera. Estuweka. Kára á fanus wá, tá zlejelaná á ba áte tate-aara, lauktu emnde na tá dem huđe á bere nanna, tá nanna ice parakke.

<sup>17</sup> Daaci bademme á názena an shebe kina, watse á sesse, tá nanna emnde bademme. Názena nasherire kina keni maa, bademme watse á marapsemare, watse tá diyeddiye emnde bademme.

<sup>18</sup> «Adaba una nanna maa, faufa hyema áte cená duksa á kure! Adaba edda una, máki anjwa ázenara na wá, watse tá de fanaarfe zlafe á daliye ge nane. Amá edda una an erva dey wá, ba cekwa-aara na á tamaná nane am erva-aara ma keni tá de lyanvulye.»

### *Tara emmenjara antara egdzar mama-aha-njara ge Yaisu*

*(Mat. 12:46-50; Mark. 3:31-35)*

<sup>19</sup> Am iga á una nanna maa, ta semhe ge tara emmenjara antara egdzar mama-aha-njara ge Yaisu ta sezenara, amá sharánka jammeje adaba kwakyire á nalga.

<sup>20</sup> Ta belanve we ge Yaisu, a ba itare: «Náwa tá anjwa ndavaká tara emmenja antara egdzar mama-aha-njara á gashe.»

<sup>21</sup> Amá a ba Yaisu á elvan ge emnde bademme: «Emmerwa antara egdzar mama-aha-aaruwa wá, ba emnde na tá anjwa cená elva á Dadaamiya, tá anjwa fansarfe na.»

### *Yaisu a ekhyaa válale*

*(Mat. 8:23-27; Mark. 4:35-41)*

<sup>22</sup> Vacite umele maa, tara Yaisu antara pukura-aha-aara ta demhe am paare á yawe. A ba Yaisu á elvan ge itare: «Ebzaumibza haye ádehuwa-aara.» Daaci ta naba zlála.

<sup>23</sup> Tá anjwa zlála maa, Yaisu a naba pu hare. Cekwaangudí wá, a naba tsete ge válale átire á haye nanna, a naba nante paare na an yawe. Daaci bademme-aatare, shifa-aatare a gev ba paihyhye.

<sup>24</sup> Ta de tsante Yaisu am hare na, a ba itare: «Malum, malum, degiya ma baaka!» Tsetsa Yaisu, a naba valarhe ge válale na, a valarhe ge vadza á yawe keni, tseriyye ba seke ndza baaka duksa.

<sup>25</sup> Daaci a ba njane ge pukura-aha-aara: «Áma fetarfire á kure ge kure?» Amá itare, tá maga ba najipu-aara, jaterja lyawa keni jipu. A ba itare am

dagave-aatare. «Ware kena nane una ni á ndaater elva ge tara válale an yawe keni, tá eccena na?»

*A mbanaa estuwa Yaisu ura an shaitaine*  
(*Mat. 8:28-34; Mark. 5:1-20*)

<sup>26</sup> Am sarte na icaransice haye tara Yaisu, daraada á dete iga a guwa am haha á Gairasaine-aha. Tate nanna wá, wafke-aara ba ndañje á sem Galili.

<sup>27</sup> Ba a sesehe ge Yaisu am paare wá, a se yainu á ba an ye zhele umele, nane keni ba ura huđe á ekse. Zhele nanna haraare an shaitaine. Wayaaka an nangyuwe, wayaaka an bere keni, sey á njá á ba am irekhye-aha.

<sup>28</sup> Ba pute ice-aara áte Yaisu wá, a naba fu hula áseza Yaisu na, a se mbedaa am sera-aara, a ba nane á elvan ge nane á ba an ka kwara: «Ekka Yaisu \*Egdza á Dadaamiya Slekse, ázara am dagave á miya? Tasle á nja, fiyemka am zlada!»

<sup>29</sup> A ndaana adaba uwe una, adaba Yaisu a banaa elva ge shaitaine am nane, a ba nane: «Sesse am zhel na!»

Shaitaine-aara nanna wá, maganánmaga palasa ser kwakya. Ser kwakya tá puwanem sera am sasala, tá puwante tsavaytsavaye áte erva, amá á ebbátá bademme, shaitaine nanna á daná á ba dem kaamba.

<sup>30</sup> Yaisu a ndavanu zhera-aara ge zhel nanna, a ba nane: «Zhera-aaruwa wá, Dikele á Emnde.» A ndaha una nanna, adaba kwakya jini-aha am nane.

<sup>31</sup> Jini-aha nanna ta fantau ge njala Yaisu, a ba itare: «Tasle á nja, ma ká ngyanngya am nane keni, danjerka á dem evege sladde na baaka halavuwa-aara na.»

<sup>32</sup> Ay, am tate nanna maa, ndza anjwa walda á nabezhe yaikke, tá piyá áte egdza wa. Jini-aha nanna ta njala baráma áza Yaisu, geni tá dem nabezhe-aha nanna. Yaisu a naba vaterte baráma.

<sup>33</sup> Daaci jini-aha na ta naba segashe am zhel nanna, ta deme am nabezhe-aha nanna, daaci bademme á walda kyaakya ásate egdza wa nanna, valyaremvalye á dem haye, a ndateruhe ge haye bademme.

<sup>34</sup> Suni-aha á nabezhe-aha nanna, tá zhára duksa nanna wá, kyaakya zhagade ge itare keni, ta dateraa labáre ge emnde am huđe á ekse antara áte makwata bademme.

<sup>35</sup> Daaci estuwa nalga tá kelá á dem tate nanna, tá de zhára názena magavmage na. Darduwa ádehuwa maa, ta de beraa zhel na ta segashe jini-aha am nane na, á njá am sera á Yaisu, an tsekwa am nangyuwe ba seke emnde, an enjale-aara ba lanje. Amá itare, bademme ta fantau ge mága lyawa.

<sup>36</sup> Daaci emnde na ni ta naana á ba an ice-aatare mága nanna bademme na, ta fantau ge palateraa sera-aara ge emnde, geni a shanaa estara zhele nanna ire-aara.

<sup>37</sup> Aley a ba emnde a haha á Gairasaine nanna bademme tá elvan ge Yaisu: «Tasle á nja, ezslálá am larde á nje.» Adaba bademme-aatare damda lyawa am itare. Daaci Yaisu a naba deme am paare á yawe, anjwa á zlala.

<sup>38</sup> Amá zhele na shansha ire-aara na, a njala baráma áza Yaisu, geni nane keni á dabaterdaba. Amá a naba eptsanaahe ge Yaisu, a ba nane á elvan ge nane:

<sup>39</sup> «Eptsepsa á dem mba á kure, de bateránba názena a magakanaa Dadaamiya bademme na.» Daaci ba zlálá á zhele nanna á dá, a de hyanme názena a maganaa Yaisu na am huđe á ekse bademme.



*Labáre á egdza á Yayrus an mukse na a gejante nanjyuwe á Yaisu  
(Mat. 9:18-26; Mark. 5:21-43)*

<sup>40</sup> A eptsehe zlaɓe ádaliye ge Yaisu, a icanse haye ásete we-aara maa, a se tsekwaa á ba am dagave á nalga, ta se lyiɓa ɓane.

<sup>41</sup> A semhe ge ura male, zhera-aara Yayrus, ɓane palle á male-aha am mashidi. A se kezlaa ugje am sera á Yaisu, a fantau ge ɓalaná á dem mba-aara,

<sup>42</sup> aɗaba aɓkwa egdza-aara mukse palle ba ɓane, á maga yawe kelaawa ju buwa, herzhe á degashe shifa am ɓane.

Tá átire á zlála maa, emnde ta fantau ge beca Yaisu.

<sup>43</sup> Ay, aɓkwa mukse umele am dagave á emnde ɓanna, yawe kelaawa ju buwa á maga ba palasa á kela á uzhe. A keɗaa nalmane-aara baɗemme áza dauktar-aha, amá baaka edda una mbanaambe.

<sup>44</sup> Daaci mukse ɓanna a naba ganaptehe ge Yaisu á kya iga, a fete erva-aara áte we á nanjyuwe á Yaisu. Kerten a naba icevhe ge kela á uzhe-aara ɓanna.

<sup>45</sup> «A gejita ware?» a ba Yaisu. Baɗemme á emnde, ma ware keni ba iya ka. Daaci a ba Piyer á elvan ge ɓane: «Malum! Ká zhára nalga ɓanna ká am dáɗave-aatare, tá becakbeca na ni a gejaktaa ware, a ba ka?»

<sup>46</sup> Amá a ba Yaisu: «Aɓkwa ura a gejitegeje. Aɗaba tapannaatápá sessa ndzedá am iya.»

<sup>47</sup> Nanna mukse na ganakini á taa shebevka maa, a naba marse ire-aara á katafke á Yaisu ámbera á gyagya, a kezlaa ugje am sera-aara, a ndaanhe á katafke á emnde baɗemme dalila na a de gejaken nanjyuwe á Yaisu na, antara ganakini a naba mbehe á ba am sarte ɓanna.

<sup>48</sup> Daaci a ba Yaisu á elvan ge ɓane: «Mbakaambe fetarfire á ɓa egdza-aaruwa, ezzlála á ba an hairire.»

<sup>49</sup> Zlaɓe á ba an elva ɓanna Yaisu áte we maa, a naba semhe ge ura á sawa am mba á Yayrus male am mashidi na, a ba ɓane á elvan ge Yayrus: «Baaka egdzere. Yanya malum mazla-aara.»

<sup>50</sup> Amá cenáncena Yaisu názena á ndaana ɓane. A ba Yaisu á elvan ge Yayrus: «A wanɓa lyawa, naba fetarfe ka, á mbembe egdza á ɓa.»

<sup>51</sup> Daraada á dem mba ɓanna maa, a piyaterterte ge emnde baɗemme ge dem bere na á zlava egdzere am huɗe-aara. Sey a yateraa baráma ba ge tara Piyer, Yuhanna, Yakuba ira tara emmeɓara antara eddeɓara ge egdzere.

<sup>52</sup> Baɗemme á emnde na tá am huɗe á há ɓanna, tá kyuwa egdze na, tá tsaka dákwá. Amá a ba Yaisu á elvan ge itare: «Kyuwauka, an emtseka egdzere, á pá ba háre.»

<sup>53</sup> Amá itare ta zhára Yaisu ba seke wuce, aɗaba diyardiya itare, ganakini baaka shifa am egdzere.

<sup>54</sup> Amá Yaisu a de ɓanaa ba erva ge egdze na, a ba ɓane á ba an ka kwara: «Naba tsettse egdza-aaruwa.»

<sup>55</sup> A naba shifete ge egdze na, tsekwadɗe a naba tsetehe. Daaci a ba Yaisu: «Vawanteva náza za, a zuze.»

<sup>56</sup> Tara emmeɓara an eddeɓara tá maga ba najipu-aara. Amá Yaisu a fater magiya, geni a ndaaranka ma ba ge ware keni.

## 9

*Yaisu a belaa pukura-aha-aara kelaawa ju buwa  
(Mat. 10:5-15; Mark. 6:7-13)*

<sup>1</sup> Vacite umele maa, Yaisu a jatermaare ge pukura-aha-aara kelaawa ju buwa, a vaterte hákuma áte jini-aha bademme, antara hákuma á mba emnde áte lapikere.

<sup>2</sup> Daaci a naba belaterbela, á de balaterá labáre ge emnde, elva a njá am \*kwara á Dadaamiya mazla-aara, antara ganakini a mbarmbe emnde na tá áte lapikere.

<sup>3</sup> A ba ñane á elvan ge itare: «Eksauka ma uwe keni am erva ge mága shula an ñane, ma zade, ma kashi á náza za, ba nambela keni eksauka. Zlabe adaliye dawanka nangyuwe bubuwa áte kure, ma shungu am lyiba keni.

<sup>4</sup> Bademme á há na, máki lyarakurvaalye am hufde-aara wá, njawinja á ba am mba ñanna, dem sarte á zlalá á kure am ekse ñanna.

<sup>5</sup> Am tate na máki lyarakurka emnde wá, zlalauzlalá am ekse-aatare, papawateraapape berbere á haha-aatare áte sera á kure. Magawateránmaga una ñanna, watse tá disá ba itare antara Dadaamiya.»

<sup>6</sup> Daaci ba zlalá-aatare ge pukura-aha, ta zlalá á de bala labáre á higa am ekse-aha gergere, emnde na lapika vuwa-aatare keni ta mbateraahé am tate na ta demaa itare bademme.

*Labáre á Yaisu weshanantewesha ire ge \*Hirudus  
(Mat. 14:1-12; Mark. 6:14-29)*

<sup>7</sup> Am sarte ñanna maa, cenáncena sleksu \*Hirudus názena tá maganá itare bademme na. Amá ba palle á názu á ndaana ñane baaka. Adaba ta bantsa emnde umele: «Tsettse Yuhanna slemaga bapisma am faya.»

<sup>8</sup> A ba emnde umele: «Una Yuhanna ka, nabi \*Ailiya werre.» A ba emnde umele zlabe adaliye: «A tsetaa ba nabi umele tsekemme am faya.»

<sup>9</sup> Amá a ba sleksu Hirudus: «Ábi ndza icaniica ire áte Yuhanna. A jesaara ware zlabe adaliye yá cená labáre-aara na?» Daga á ba am sarte ñanna, Hirudus á kátá naa wafke á Yaisu.

*Yaisu a zateru duksa ge zála debu ilyebe  
(Mat. 14:13-21; Mark. 6:30-44; Yuh. 6:1-14)*

<sup>10</sup> Saraasa emnde a bela ñara, ta se ndahanhe názena ni ta maganaa itare bademme ge Yaisu. Daaci a ba Yaisu á elvan ge itare: «Sawmbare mi zlaláwa á dem tate umele.» Ta naba zlalá á dem ekse ñanna tá dahaná an Baytisayda na, ba itare an ire-aatare.

<sup>11</sup> Amá kerten cenaráncena emnde, ta naba dabateremhe á dem tate ñanna. De lyatervaalye Yaisu, a vaterte waazu, elva a njá am \*kwara á Dadaamiya; emnde na lapika vuwa-aatare keni a mbateraahé.

<sup>12</sup> Eblyablya vaciya maa, ta ganaptehe ge pukura-aha-aara kelaawa ju buwa, a ba itare tá elvan ge ñane: «Puwateraapuwa nalga á emnde na mazla-aara, a zlarzlala á dem ekse-aha antara egdzar makwata-aha na herherzhe an tate na, geni tá shansha názu tá zanu ge we-aatare, antara tate na tá zlava shifa-aatare átekwa. Adaba tate na kaamba, mi yiyiye an ekse.»

<sup>13</sup> Amá a ba Yaisu á elvan ge itare: «Vawaterteva ba kure náza za.» Ta ñwanante, a ba itare: «Ázenjere ba depain ilyebe ámasla an kelfe buwa. Emtu ká kátá ná de shekwaterve náza za ge nalga na emtu?»

<sup>14</sup> Emnde ñanna wá, tá maga zála debu ilyebe. A ba Yaisu á elvan ge pukura-aha-aara: «Naba njanjawateraananja kure emnde kul ilyebe, kul ilyebe.»

<sup>15</sup> «Ane,» a ba pukura-aha, ta nabe maganaahe.

<sup>16</sup> Daaci Yaisu a halante depain̄ ilyeḅe, antara kelfe buwa na, a kante ice á dem samaya, a slafanaa we-aara ge Dadaamiya. Daaci a kwacaa depain̄-aha na, a tegateraa ge pukura-aha, geni tá vaterta itare ge nalga ḡanna.

<sup>17</sup> Baḁemme á emnde, ma ware keni a zuhe á ba áte huḁe-aara náza zá na, aley jauje zlaḅe ádaliye. Pukura-aha ta halante jugena-aara wára kelaawa ju buwa.

*A ndaasa Piyer ganakini ba Yaisu una \*Almasiihu na  
(Mat. 16:13-19; Mark. 8:27-29)*

<sup>18</sup> Vacite umele am maduwa Yaisu ba ḡane palle, ta duhe ge pukura-aha-aara ádezeḡara. A de ndavateru elva, a ba ḡane á elvan ge itare: «Emnde mu, ta baa uwe áte iya, ta baa ya ware?»

<sup>19</sup> Ta ḡwanante, a ba itare: «Emnde umele wá, ta baa ka Yuhanna slemaga baptisma. A baa emnde umele, ka nabi \*Ailiya werre. A baa emnde umele zlaḅe adaliye, ka ba nabi umele tsekemme, a tsetaa ba palle á nabi-aha werre am faya.»

<sup>20</sup> A ba Yaisu á elvan ge itare: «Ay kure maa, kwá ba ya ware kena?» A ḡwanante ge Piyer, a ba ḡane: «Ba ka una ka \*Almasiihu, ka sawa áza Dadaamiya.»

<sup>21</sup> Amá Yaisu a fater magiya kwakya, geni a ndaaranka ma ge ware keni.

*Yaisu a sanse elva a emtsa-aara, antara tsetse-aara am faya  
(Mat. 16:20-28; Mark. 8:30-9:1)*

<sup>22</sup> Daaci a ba ḡane á elvan ge itare: «Iya \*Ura á emnde baḁemme wá, ḁaaka pekyaa-aara, sey yá shushe zlaḁa kwakya. Male-aha á larde, antara male-aha á \*liman-aha, ira malum-aha á \*tawraita, tá de yiyaaya, watse tá de zlanazle shifa-aaruwa baḁemme. Amá am háre ge keyire wá, watse yá sesse zlaḅe ádaliye á ba an shifa.»

<sup>23</sup> Daaci a ba ḡane á elvan ge emnde baḁemme: «Máki edda-aara wayaawáyá ḁaba ya wá, a dzameka shifa-aara ḁekid̄eki. Ma vaatara keni a eksanteksa dzanḡala-aara, a ḁabid̄aba an ḡane.

<sup>24</sup> Adaba máki edda-aara á tataya lya shifa-aara wá, á de keḁanaaked̄a. Amá edda una a keḁaa shifa-aara ad̄aba iya wá, á de shansha zlaḅe ádaliye.

<sup>25</sup> Ma edda-aara a zu emtakire á duniya na baḁemme keni wá, ázara nampire-aara ge ḡane, máki keḁanaaked̄a ire-aara, á de shanka shifa na á katafke na?

<sup>26</sup> Ay degiya, ma ware una a magaa zherwe ge baa ḡane ura-aaruwire, bi ge ndaater elva-aaruwa ge emnde wá, iya \*Ura á emnde baḁemme keni, watse á wiyá zherwe ge baa ḡane ura-aaruwire, má watse yá sawa an yaikkire á Edderwa, antara yaikkire-aaruwa, ira yaikkire á malika-aha cuḁeḁe.

<sup>27</sup> Yá ndaakur ba jirire, á ba am dagave á kure na keni, tá an̄kwa emnde na ni watse tá emtseka ba estuwa, sey máki naránna an ice-aatare Dadaamiya á jáhá emnde á dem kwara-aara.»

*Eptsaptepsa Yaisu a gev umele  
(Mat. 17:1-8; Mark. 9:2-8)*

<sup>28</sup> Á maga háre tiise am iga á elva-aara ḡanna maa, Yaisu a ḁante tara Piyer, antara Yuhanna, ira Yakuba, a ḁálá ádete ire á wa antara itare, ge de maga maduwa.

<sup>29</sup> Am sarte na ɲane á maga maduwa áhuwa ɲanna maa, a naba eptsavte ge wafke-aara, nanɲgyuwe-aara keni gevge dzayye ba telle ámbera á maga wulwulire.

<sup>30</sup> Cekwaanɲuɲi wá, tá zhárá ba zála buwa, tá ndaha elva antara Yaisu. Emnde buwa ɲanna wá, tara Muusa antara \*Ailiya nabi-aha werre.

<sup>31</sup> Ta jesaare ba estuwa an yaikkire á Dadaamiya. Tá anɲkwa ndaha elva antara Yaisu áte emtsa-aara na watse á de emtsa am Urusaliima, ge zlaa slera-aara baɲemme.

<sup>32</sup> Tara Piyer wá, ndza tá am háre, am sarte na Yaisu anɲkwa á maga maduwa na. Ta tsete am háre á ba am sarte á sawa á emnde ɲanna. Daaci ta nanna itare yaikkire á Yaisu antara emnde buwa ɲanna ta sezeɲara na.

<sup>33</sup> Tá kátá zláá emnde na maa, a ba Piyer á elvan ge Yaisu, «Malum, ɲere keni ɲá anɲkwa áhuna na wá, shagera jipu. Kina wá, ɲá magakurá dzadzawe-aha keye, palle náza á ɲa, palle náza á Muusa, palle keni náza á Ailiya.» A ndaase elva ɲanna ba estuwa, amá diyaaka názena á ndaaná ɲane.

<sup>34</sup> Ba ɲane á ndáhá una ɲanna wá, tabeɲamme a tsekwatarhe ge kumba baɲemme-aatare. Daaci a naba jater ge lyawa pukura-aha na aɲaba kumba ɲanna.

<sup>35</sup> Cekwaanɲuɲi wá, tá cená ba kwara á sawa am kumba ɲanna, a ba edda-aara: «Una náwa ɲane na wá, Egdza-aaruwa ya ɲelaa ba ɲane. Cenaucena názena á bakurná ɲane.»

<sup>36</sup> Am iga á kwara ɲanna maa, ta naa ba Yaisu palle mazla-aara, ta baaka emnde na.

Amá elva ɲanna a njaa á ba am huɲe-aatare, ɲalarka emtsaade pukura-aha na ɲekideki.

*Yaisu ɲɲansenɲɲe jini am egdzere*

*(Mat. 17:14-18; Mark. 9:14-27)*

<sup>37</sup> Makuralla-aara maa, ta naba tsekwese á sawa áte ire á wa na. Emnde kwakya ta de yainu ge Yaisu.

<sup>38</sup> Am dagave á nalga ɲanna wá, anɲkwa ura lapika egdza-aara, palle ba ɲane, a naba ɲaha Yaisu á ba an ka kwara: «Malum, malum, tasle á ɲa, zharinaazhárá egdza-aaruwa na!

<sup>39</sup> Á maganá palase shaitaine jipu. Ba kelaa máki tsekwawvetsekwe wá, á hula egdzere, á velyanaavelye am áhá, á kelá ugbalyailye. Sey á magannaamaga palasa lauktu á yanya.

<sup>40</sup> Ya saterán ge pukura-aha á ɲa, amá dzegwaránka ɲɲanse jini ɲanna am egdzere.»

<sup>41</sup> A ba Yaisu á elvan ge itare: «Amá kure emnde a zamane na wá, baaka fetarfire á kure ɲekideki, kwa mandzawe-aha jipu! Há! Watse yá njá antara kure, yá fakurá ervaunɲe dem laukte-ara estuwa? Siyansa kwa ka egdze á ɲa ɲanna ge iya.»

<sup>42</sup> Anɲkwa á sawa egdze ɲanna áseza Yaisu maa, a naba velyanaahe ge jini ɲanna am ire, anɲkwa á maganá palase am áhá. Amá Yaisu a naba valarhe ge jini ɲanna, a mbanaahe egdze na, «Kwaye egdza á ɲa,» a ba ɲane á elvan ge eddeɲara.

<sup>43</sup> Baɲemme á emnde tá maga ba najipu áte hákuma na a maganaa Dadaamiya an sleksire-aara.

*Yaisu anɲkwa á sanse ge buwire elva a emtsa-aara antara tsetse-aara am faya*

*(Mat. 17:22-23; Mark. 9:30-32)*

Am zlaɓe emnde baɗemme tá maga ba najipu áte názena á maganá ɲane baɗemme na, a ba ɲane á elvan ge pukura-aha-aara:

<sup>44</sup> «Náwa yá bakurá elva wá, a deseka elva ɲanna am ire á kure: Iya \*Ura á emnde baɗemme wá, watse tá fime am erva ge emnde.»

<sup>45</sup> Amá ba palle á názu ta cenanaa pukura-aha am elva ɲanna baaka. An sheɓe maana á elva ɲanna ge itare, geni a cenaránka baɗemme. Ndavanu ge Yaisu keni, a waterwa lyawa.

*Gajawe á pukura-aha arge yaikkire*

(Mat. 18:1-5; Mark. 9:33-37)

<sup>46</sup> Farantaufe pukura-aha ge mága gajawe am dagave-aatare, geni watse mala ware am itare.

<sup>47</sup> Kertenɗiyye Yaisu názena tá anɗkwa á dzamaná itare. Daaci a eksante egdzere, a tsanaahe átevge ɲane,

<sup>48</sup> a ba ɲane á elvan ge itare: «Ma ware una a lyevaa egdze na aɗaba iya, edda-aara a lyevaa ba iya an ire-aaruwa. Edda una lyivaalye, edda-aara a lyevaa ba slebelibela an ire-aara. Edda una a gev ba seke cekwa ba ɲane am dagave á kure wá, mala ba ɲane am kure.»

*Edda una dagalaaka ádete kure, ura á miya ba ɲane*

(Mark. 9:38-40)

<sup>49</sup> A eksante elva Yuhanna, a ba ɲane á elvan ge ɲane: «Malum, ɲere wá, ɲa naa ura umele á ɲgyá jini-aha am emnde an zhera á ɲa, amá ɲa naba piyante, aɗaba ɲane ura á miya ka.»

<sup>50</sup> A ba Yaisu, «A'aa, piyawanteka. Aɗaba máki edda-aara dagalaaka tsuwe ádete kure wá, ura á miya ba ɲane.»

*Anɗkwa ekse palle am \*Samariya lyiyaaka Yaisu*

<sup>51</sup> Náanna Yaisu ganakini herzhapteherzhe sarte á zlála-aara á dem samaya maa, a naba magaa niya-aara ganakini sey á zlála á dem Urusaliima mazla-aara.

<sup>52</sup> Tá anɗkwa zlála maa, herzharanteherzhe ekse umele am kwára á \*Samariya, a belaa pukura-aha-aara á katafke ge tsatsaná sleɗe.

<sup>53</sup> Amá lyiyarka emnde a ekse ɲanna, aɗaba ɲane átira dem Urusaliima.

<sup>54</sup> Daaci a ba tara Yakuba an Yuhanna tá elvan ge ɲane: «Yaakadada, wayak-wayá emtu ɲá dáhá kára á sa am samaya á se zlateraazle?»

<sup>55</sup> Amá a eptsavte ge Yaisu ádezetare, a naba valaterarhe.

<sup>56</sup> Daaci ta naba zlála-aatare á dem ekse umele.

*Emnde na wayarwáyá ɗaba Yaisu*

(Mat. 8:19-22)

<sup>57</sup> Tá á ba átira zlala ɲanna maa, a naba semhe ge ura umele, a ba ɲane á elvan ge Yaisu: «Yá ɗabakɗaba ma ka deme keni.»

<sup>58</sup> A ɲwanante ge Yaisu, a ba ɲane á elvan ge ɲane: «Mbayka-aha tá an evege-aha-aatare, yiye-aha keni tá an bere-aha-aatare, amá iya \*Ura á emnde baɗemme wá, ba tate na yá zlavanaazlava shifa-aaruwa átekwa keni baaka.»

<sup>59</sup> Ura umele zlaɓe ádaliye maa, a ba Yaisu á elvan ge ɲane: «Sawa, ɗabidɗaba.» Amá a ba ɲane á elvan ge Yaisu: «Yaakadada, viteva baráma yá de hedehedɗa emtsaade edderwa.»

<sup>60</sup> Amá a ba Yaisu á elvan ge ɲane: «Yaterya emtsa-aha, a hedɗarhedɗa emtsa-aha-aatare. Ekka wá, ezzlala á de balaterá waazu ge emnde, elva a njá am \*kwara á Dadaamiya mazla-aara.»



<sup>61</sup> A ba ura umele zlaɓe ádaliye ge keyire, «Yá dɓabakɓaba, Malum, amá wá, viteva emtsaade baráma yá de magaterá á jamimá shifa ge emnde a há á ɓere.»

<sup>62</sup> A ba Yaisu á elvan ge ɓane: «Ma ware una a gaave áte weza, ámbera á zhára ice á dem iga wá, ɓaaka nampire á edda-aara am kwara á Dadaamiya.»

## 10

### *Yaisu a belaa pukura-aha-aara kul vuye ju buwa*

<sup>1</sup> Am iga á una ɓanna maa, Yaakadada a dzerse pukura-aha umele emnde kul vuye ju buwa, a belaterbela hubuwa. A belateraa á dem berni-aha antara makwata-aha na watse á duwa ɓane ádemkwa na baɗemme.

<sup>2</sup> Lauktu tá zláá, a ba ɓane á elvan ge itare: «Kwakya hiya áte fe, amá cekwa emnde a ehháa-aara á dem mba. Aɗaba una ɓanna, ɓalaunjala Edda á fe, geni á farfe ge bela emnde, á dem fe-aara.

<sup>3</sup> Zlalauzláá, náwa ya belakurbela wá, kwa ba seke egdzar kyawe-aha am dagave á indale-aha.

<sup>4</sup> Eksawka partamami am erva, ma nambela á kashi keni. Ba kimake keni, dawánka. Tsatsauka áte baráma ge ga use áte emnde.

<sup>5</sup> Ma kwa de tsekwa am mba á ware keni, bawateránba emtsaade ge emnde a há ɓanna: A vakurteva Dadaamiya hairire.

<sup>6</sup> Máki aɓkwa edda una an barka am vuwa am huɗe á há ɓanna wá, hairire á kure á de tsekwa áte ɓane. Máki ɓaaka wá, á eptsá hairire á kure á ba ásezekure zlaɓe ádaliye.

<sup>7</sup> Am huɗe á há na, máki lyarakurvaalye wá, njawinja á ba am mba ɓanna, dem sarte á zlaa á kure, mbaɗauka há á emnde. Naba zauza, shausha názena ni ta fanaa itare á katafke á kure. Aɗaba sleslera wá, zlayánzláyá mbera-aara.

<sup>8</sup> Máki dakuremda am ekse, lyarakurvaalye emnde wá, zauze názena ni ta fanaa itare á katafke á kure baɗemme.

<sup>9</sup> Mbawmbe emnde-aatare na ni lapika vuwa-aatare na. Bawateránba ge emnde a ekse ɓanna ganakini itare wá, a hyatermaa ba Dadaamiya ge njá am kwara-aara.

<sup>10</sup> Amá am ekse na máki lyiyarakurka emnde ɓanna wá, tsawaatse áte we á layye am huɗe á ekse ɓanna, bawateránba ge emnde ɓanna:

<sup>11</sup> Ba berbere á haha á kure na áte sera á ɓere keni, náwa ɓa papakuraapape duksa á kure. Ay degiya, diyaweddiye ganakini a hyakurmaa ba Dadaamiya ge njá am kwara-aara, kwa yanaa ba kure.»

<sup>12</sup> A farhe zlaɓe ádaliye ge Yaisu: «Yá ndaakur ba jirire, vaci shairiya wá, watse ɓgulme ba shairiya na ta magaterán ge emnde a \*Saudauma arge náza á emnde a ekse ɓanna.»

### *Zlaɗa arge ekse-aha na ta kwalve mága tuba (Mat. 11:20-24)*

<sup>13</sup> «Watse zlaɗa ge kure emnde a Kaurajin, antara emnde a Baytisayda. Aɗaba najipu-aha na ya maganaa iya am ekse-aha á kure na wá, ma andze am Tirus antara Sidaun wá, ma andze tsakwaremɓakwa emnde a ekse-aha ɓanna am buhwa-aha, ma andze daremda am kelpa á kára ge marese tuba-aatare.

<sup>14</sup> Aɗaba una ɓanna, vaci shairiya wá, watse ɓgulme ba shairiya na ta magaterán ge tara Tirus antara Sidaun na arge náza á kure.

<sup>15</sup> Kina wá, yá elvan ge kure emnde a Kafarnahum. Kwa kurken watse á kakurteka Dadaamiya, watse kwá daada á dem samaya emtu? Baaka kwá daaka dekideki! Watse á gakuraage á dem jahanáma.»

<sup>16</sup> Daaci a ba ñane á elvan ge pukura-aha-aara: «Kure wá, edda una a cena elva á kure, a cena ba elva-aaruwa. Edda una cenaaka elva á kure, cenaaka ba elva-aaruwa. Ay degiya, edda una a yaa ya wá, a yaa ba edda una a belibeli na.»

*Sarassa pukura-aha kul vuye ju buwa*

<sup>17</sup> Haraare maa, saraasa pukura-aha kul vuye ju buwa na á ba an higa. A ba itare tá elvan ge Yaisu: «Yaakadada á ñere, ba jini-aha keni farañersarfe, am sarte na ña bateraa elva an zhera á ña.»

<sup>18</sup> A ba Yaisu á elvan ge itare: «Ba estuwa. Ndza ya nanna Shaitaine am sarte na á eblya á sá am samaya, ba seke mága á kára a rade.

<sup>19</sup> Vanakurteva hákuma ge kure, ganakini kwá payanaapaya zahe antara herdza-aha an sera-aha á kure, kwá ñgerdfanañgerdfa kelaade á kure, ma ñane slehá kuma keni, baaka názu kwá kuaná kure dekideki am duniya na.

<sup>20</sup> Amá wá, higa á kure a tseka á ba áte hákuma na kwa shanaa kure áte jini-aha; higauhiga adaba zhera-aha á kure añkwa an puwa am samaya.»

*Yaisu añkwa á higar ge názena a maganaa Dadaamiya  
(Mat. 11:25-27; 13:16-17)*

<sup>21</sup> Yaisu a naba shaa higa yaikke am sarte ñanna, á sawa áza Shedekwe Cudedde, a ba ñane: «Eddaye-aaruwa, ka Edda á samaya antara haha ba ka palle. Yá añkwa slafak we-aaruwa kwakya, adaba ka sateransa ka ge egdzara mesheshe názu ka shebatervuwe ge emnde a diya, antara emnde a enkale. Ba estuwa, Edderwa, una namaari á ña ganakini a gevge ba estuwa.

<sup>22</sup> «Edderwa a fime duksa bademme am erva ge iya. Diyaweddiye ganakini baaka ura á diyeddiye \*Egdza á Dadaamiya, máki Eddenjara ñanna ka palle. Dada keni, baaka ura á diyeddiye, máki Egdza-aara ka palle, antara emnde na a wayaterantaa Egdza-aara ge marateránmara.»

<sup>23</sup> Daaci a eptsapte ádeza pukura-aha-aara, a ndaater elva na ba ge itare palle, a ba ñane: «Higa yaikke ge kure, kwa emnde na kwá añkwa zharaná an ice á kure duksa-aha ñanna.

<sup>24</sup> Yá ndaakur ba jirire, ndza kwakya nabi-aha antara slekse-aha sadadde tá kátá puwete ice-aatare áte duksa na kwá zharaná kure kina, amá sharánka. Ndza tá kátá cenvaacena duksa na kwá cenaná kure kina, amá sharánka keni.»

*Naraje an maggwire á ura \*Samariya*

<sup>25</sup> A tsete ge malum á \*tawraitu umele, a de tsagwada Yaisu áte elva, a ba ñane á elvan ge ñane: «Malum, yá maga uwe kina lauktu yá shá shifa na á zleka na?»

<sup>26</sup> A ñwanante ge Yaisu, a ba ñane á elvan ge ñane: «Ka beraa uwe ka am tawraitu? Ká cenaná estara ka, máki ká enndaha?»

<sup>27</sup> A ba ñane: «A ba tawraitu wá: Ewwáya Yaakadada Dadaamiya á ña an ervaunde á ña bademme, an shifa á ña bademme, an ndzedá á ña bademme, ira an enkale á ña bademme. A ba ñane zlahe adaliye: Ewwáya sleriya á ña ba seke ire á ña.»

<sup>28</sup> A ba Yaisu á elvan ge ñane: «Iwaktenjwa shagera. Maganaamaga una ñanna, ká shansha shifa.»

<sup>29</sup> Amá malum ñanna á kátá shaná dalila ge ire-aara wá, a ba ñane á elvan ge Yaisu: «Ware ñanna sleriya-aaruwa ñanna?»

<sup>30</sup> A ñwanante ge Yaisu, a ba ñane á elvan ge ñane: «Ankwa ura, a tsete am Urusaliima, á tsekwa á dem Yairikau maa, a de velyeme am dagave á emnde a za baráma, ta tsakwanse am nanjyuwe-aara, ta hyanhe an já, ta yán ba ge emtsa.

<sup>31</sup> Á ba am sarte ñanna maa, a tsete ge \*liman umele, ñane keni a dába ba baráma ñanna. Ba a naa zhele na á belá wá, a naba cikante, a yanaa baráma.

<sup>32</sup> Adaliye a semhe ge ura \*Laiwiñkau am tate ñanna. Ñane keni, ba a naa zhele ñanna, a naba cikante, a yanaa baráma.

<sup>33</sup> Amá daaduwa ura \*Samariya umele á dem tate ñanna átira mága shula-aara wá, ba a naa zhele na wá, a naba zanvaarhe,

<sup>34</sup> a duhe á ba ádezenara. Ñane a naba baranaa wige-aha na an mbazla-aara ankwá, a gananu waye, daaci a fadanaahe an gabaga. A eksante zhele ñanna, a njante áte ezzenwa-aara, a dáná á dem bere á tsekwa wayve-aha, a de fanu hyema áhuwa.

<sup>35</sup> Makuralla-aara maa, a sanse gursa-aara, a vante ge edda á tate á tsekwa wayve-aha ñanna, a ba ñane á elvan ge ñane: Náwa lyevaalya una, watse yá eptsá zlafe ádaliye á ba kya una. Naba fanufe hyema ge zhel na, ma ka kedfaa uwe keni, yá se eppela bademme.»

<sup>36</sup> Daaci a ba Yaisu á elvan ge malum á \*tawraitá na: «Ate ka mu, ware una ura á zhele na a de velyeme am dagave á neyle-aha na?»

<sup>37</sup> A ba ñane: «Ura-aara ba edda una a zanvaarze na.» Daaci a ba Yaisu á elvan ge ñane: «Ezzlálá, ekka keni de emmága ba seke una ñanna.»

### *Yaisu am mba á tara Marta an Maari*

<sup>38</sup> Yaisu átira mága shula antara pukura-aha-aara. De sharnaasha ekse umele, ankwá mukse zhera-aara Marta, a tsekwateraa am mba-aara.

<sup>39</sup> Ankwá egdza emmenara mukse ge Marta ñanna, zhera-aara Maari, ñane a njehe am haha áza Yaisu, á cená elva na á tsakaná ñane.

<sup>40</sup> Amá Marta wá, ñane ankwá á shunñula ba slera-aha umele am bere a gya dafa. Daaci a naba seza Yaakadada, a ba ñane á elvan ge ñane: «Labára baaka lambe á ña áte iya, yá shunñula ba iya palle an slera-aha á mba na? Banánba seke ge egdza emmerwa na a se meliyumele.»

<sup>41</sup> Amá a ñwanante ge Yaakadada, a ba ñane: «Marta, Marta, ekka ká hyaná lyuwa ge ire á ña an slera-aha ba dey,

<sup>42</sup> una ñanna ka, una dúksa yaikke. Maari wá, ñane a eksese dúksa yaikke na tá taa lyevaaka am erva-aara d'ekid'eki na.»

## 11

### *Mága maduwa na a kwaratersaa Yaisu ge pukura-aha-aara (Mat. 6:9-13; 7:7-11)*

<sup>1</sup> Vacite umele am tate umele maa, Yaisu a magaa maduwa. Am iga á una ñanna, a ba pukura-aha-aara tá elvan ge ñane: «Yaakadada, kwaranjersekwere ge ñere keni mága maduwa ñanna, seke una a kwaratersaa Yuhanna ge pukura-aha-aara na.»

<sup>2</sup> A ba Yaisu á elvan ge itare: «Máki kwá maga maduwa wá, bawánba a ba kure:

Eddenjere Saksage, ekka wá, ka cufed'ed'e. Emmága dalila á ña ganakini emnde bademme a farfa zherwe áte ka. Sawa an sleksire á ña.

<sup>3</sup> Vanjerteva náza za a hyenjerhya ma vaatara keni.

<sup>4</sup> Yanjeraarye haypa-aha á ñere, adaba ñere keni ñá anƙwa yateraare ge emnde a haypa an ñere bademme. Danjeremka am bada á shaitaine.»

<sup>5</sup> Yaisu a fateraarhe zlaɓe ádaliye, a ba ñane: «Máki palle á kure a shaa wayve an huɗe á vayiya, baaka názena á faná á katafke-aara wá, sey ba a de mba á sleriya-aara, á de baná: Vawiteva ukpa,

<sup>6</sup> adaba ya shaa wayve, baaka názena yá fáná á katafke-aara.

<sup>7</sup> Bi á ñwanantenwa sleriya-aara ñanna á sawa am huɗe á bere, a ba ñane: Weshiyanteka ire! An zleɗa bere, ñere ñá pá háre antara yalla-aha-aaruwa. Njá taa tseteka mazla-aara ge vakte ukpa. Amá ñane wá, a maɗka ervaunɗe.

<sup>8</sup> Yá ndaakur ba jirire, ma tsarka ge vante ukpa ñanna adaba urire-aatare keni wá, sey tá tsetse tá vanteva geni á hyateraaka lyuwa mazla-aara.

<sup>9</sup> Názu yá bakurná iya wá, naba ndavaundava, tá de vakurteva. Tatayau-tataya, kwá de shansha. Daufaha emnde a há, tá se werakurantewera wakyiya.

<sup>10</sup> Adaba ma a ndavanaa ware keni, sey á shansha. Ma a tatayanaa ware keni, sey a shansha. Ma a janaa ware wakyiya keni, tá weranantewera.

<sup>11</sup> Emtu ware dada am kure, má egdza-aara a ndavanu nabuhwa, ñane á vante zahe?

<sup>12</sup> Bi máki egdzere a ndavanu slaya, á vanteva emtu herdza?

<sup>13</sup> Kwa mandzawe-aha tsa, amá diyakurdiya vaterte duksa shagera ge egdzara á kure. Sakwa Eddekure na am samaya na emtu? Ñane wá, ma a ndavanaa ware Sheɗekwe Cudɗɗe ázeɗara keni, sey ba á shansha.»

*Tara Yaisu tá taa njeka antara Shaitaine  
(Mat. 12:22-30; Mark. 3:20-27)*

<sup>14</sup> Vacite umele maa, Yaisu anƙwa á ñgya jini am ura, jini ñanna a piyanante ge ndaha elva. Ngyansengye Yaisu jini ñanna wá, zhele ñanna a fantau ge ndaha elva ba lanje. Bademme á emnde tá maga ba najipu-aara.

<sup>15</sup> Amá ta bantsa emnde umele wá: «A vantaa ba \*Bailjaibul slekse á shaitaine-aha hákuma á ñgya jini-aha ñanna.»

<sup>16</sup> Emnde umele zlaɓe ádaliye, ta de tsagwadfa Yaisu áte elva wá, a ba itare tá elvan ge ñane: «Máki a belakaa ba Dadaamiya wá, marañeránmárá najipu palle, ganakini ñá diyeddiye átekwa.»

<sup>17</sup> Amá kerten diyeddiye Yaisu názu ta sawa an ñane am ire. Daaci a ba ñane á elvan ge itare: «Bademme á sleksire, máki tarapsete emnde gergere buwa am kwara ñanna, tá anƙwa dagala am dagave-aatare wá, sleksire ñanna ba badzavbadze, ba bere-aha-aatare keni tá kyabanaakyaɓa bademme.

<sup>18</sup> Ba duksa palle ge Shaitaine keni. Máki gevge ni á wava ba ñane áte ire-aara wá, á zlála estara kwara-aara á de katafke? Adaba kwa bantsa kure, a vitaa ba slekse á shaitaine-aha hákuma áte jini-aha.

<sup>19</sup> Máki estuwa wá, a vatertaa ware kena hákuma á ñgya jini-aha am ura ge emnde á kure? Tá kyaná ba emnde á kure shairiya-aara, geni baaka jirire am elva á kure.

<sup>20</sup> Yá ndaakur ba jirire, yá anƙwa ñgya jini-aha á ba an hákuma na a vitaa Sheɗekwe á Dadaamiya. Amaana wá, samsa ba Dadaamiya an sleksire-aara ásezekure.»

<sup>21</sup> Yaisu anƙwa á slá Shaitaine an slendzedfa, a ba ñane á elvan ge itare: «Máki ñgwadapsengwade slendzedfa, anƙwa á ufa há-aara wá, baaka názu á geja kazlaɗa na am huɗe á há ñanna.

<sup>22</sup> Amá má daaduwa edda una jauje ge ɲane an ndzedá wá, ba náza a erva-aara keni á lyanvulye bademme, á halesehale kazlaɲa-aara bademme, tá de zaná antara emnde-aatare.

<sup>23</sup> «Daaci ma ware una baaka an ya keni, ɲane kelaade-aaruwa. Ma ware una á meliyuka ge jáhá emnde na, ɲane ba slezadaterzaɗa.»

*Eptsá á jini á dem urimagwe*  
(Mat. 12:43-45)

<sup>24</sup> «Má sesse jini am ura wá, á de ja ɗaba á ba am kaamba, ge tataya puwansepuwe. Máki shanka wá, á bánba jini ɲanna, ambane yá eptsá á dem bere-aaruwa na ya segashe am huɗe-aara na.

<sup>25</sup> Má eptsapta wá, á de berá ba bere an hyaɗa, an tsatse tseɗaɲe.

<sup>26</sup> Daaci á zlála-aara, á de ɗaha jini-aha umele na jaruje ba ge ɲane an mandzawire na vuye, tá sawa, tá se njá am huɗe-aara. Am iga-aara wá, edda-aara á gev ambane ba una ndza am zuɲɲwire na.»

*Higa jirire*

<sup>27</sup> Ba zlauzle Yaisu am tsáká elva ɲanna wá, a ba mukse umele á ba am nalga ɲanna á elvan ge ɲane á ba an ka kwara: «Mukse na ni a sepakaa am huɗe-aara, a faku uba-aara na wá, higa yaikke ge ɲane!»

<sup>28</sup> Amá a ba Yaisu á elvan ge ɲane: «Higa yaikke wá, ba náza á emnde na tá cená elva á Dadaamiya, tá aɲkwa emmága na.»

*Najipu na a marsaa Dadaamiya áte Yaunas*  
(Mat. 12:38-42)

<sup>29</sup> Am tá aɲkwa far ba jáhá ge emnde áseza Yaisu, a ba ɲane á elvan ge itare: «Amá emnde a zamane na wá, ta mandzawe-aha váyya! Itare tá aɲkwa ndava ba najipu ge diyise átekwa, máki a beliyaa ba Dadaamiya, amá tá shanka ɗekideki, hyaahya ba una tá aɲkwa ndaaná áte Yaunas werre na.

<sup>30</sup> Aɗaba ba seke una ni Dadaamiya a marse hákuma-aara am Yaunas werre á katafke a emnde a \*Niniwe na wá, watse ba duksa palle am \*Ura á emnde bademme keni á katafke á emnde a zamane na.

<sup>31</sup> Vaci shairiya wá, aɲkwa slekse mukse, watse a mbedateraambedá emnde a zamane na. Aɗaba ɲane kwaye ndza a tseta am pute, a se cena waazu á Suleymanu sle-ilmu jipu. Amá náwa aɲkwa edda una jauje ge Suleymanu kina, kure kwá ceneka.

<sup>32</sup> Zlaɓe ádaliye, vaci shairiya wá, emnde a \*Niniwe keni tá de mbedateraambedá emnde a zamane na. Aɗaba itare, am sarte na cenarácena waazu á Yaunas wá, magarnaamaga tuba. Amá náwa aɲkwa edda una jauje ge Yaunas kina, kure kwá maɲka tuba.»

*Parakkire na áte vuwa*  
(Mat. 5:15; 6:22-23)

<sup>33</sup> «Baaka ura, máki mbantembe kára á fanus-aara ni, á shebanve am ice á duksa umele, bi á uɲmbar darau. Estuweka. Kára á fanus wá, tá zleɲelaná á ba áte tate-aara, lauktu emnde na tá dem huɗe á bere ɲanna, tá nanna ice parakke.

<sup>34</sup> Ice á ɲa wá, ba seke kára á fanus ge vuwa á ɲa. Má lapiya ice á ɲa wá, bademme á vuwa á ɲa ba parakke. Amá má shagerka ice á ɲa wá, vuwa á ɲa bademme á ba am tabedammire.

<sup>35</sup> Aɗaba una ɲanna maa, sey ká fá hyema ba shagera, ganakini parakkire na am ka na, a nyefka tabedammire.



<sup>36</sup> Daaci máki baɗemme á vuwa á ña ká á ba am parakkire, ɓaaka tate na am tabeɗammire wá, ɓaaka tate na ni ká nanka keni áte ka, ba seke kára á fanus anƙwa á maraká parakkire-aara.»

*Yaisu a balaterse zlaɗa-aatare ge \*Farisa-aha antara malum-aha á \*tawrait*

(*Mat. 23:1-36; Mark. 12:38-40*)

<sup>37</sup> Am sarte na zlauzle Yaisu am tsáká elva-aara maa, a naba ɗante ge ura \*Farisa umele, ge de zá ɗafa am mba-aara. A naba duhe ge Yaisu, á de zá ɗafa na.

<sup>38</sup> Á maga ba najipu ura Farisa na áte Yaisu, aɗaba a naa Yaisu baraaka erva lauktu á zá ɗafa.

<sup>39</sup> Amá a ba Yaisu á elvan ge ñane: «Kwaye kwa mága á kure \*Farisa-aha: Kwá bára iga á náza sha duksa antara tasa-aha á za duksa á kure, amá am huɗe á kure wá, kwa neyle-aha an tsaka ire, kwa emnde a mandzawe ba kure.

<sup>40</sup> Amá kwa uce-aha degiya kure! Máki a nderanaa Dadaamiya iga á duksa, huɗe-aara wá, a nderanaa ñane ka emtu?

<sup>41</sup> Kure wá, vawartereva kure ba náza za ge talaga-aha antara názu tá shushe, kure kwá gev ba emnde cuɗeɗe, ma am uwe keni.

<sup>42</sup> «Watse zlaɗa ge kure Farisa-aha, aɗaba ɗále-aha, tara ɗále á minti antara daugdza ira ɗále-aha umele wá, kwá anƙwa vante luser-aara ge Dadaamiya. Amá tara jirire antara wayavire áte Dadaamiya wá, kwá maganá an iga a erva. Mbate keni ma andze kwá maganá á ba antara una-aha ñanna, ɓaaka una kwá yanseye.

<sup>43</sup> «Watse zlaɗa ge kure Farisa-aha, aɗaba kwá kátá ba sleɗe na ni átire ge náza á emnde baɗemme na am mashidi, kwá kátá emnde tá gaku use an ga ire am dagave á zlamaha.

<sup>44</sup> Watse zlaɗa ge kure! Aɗaba kwa ba seke irekhya-aha na diyarka emnde, tá naba zlála átekwa na.»

<sup>45</sup> Daaci a ba malum á \*tawrait umele á elvan ge ñane: «Malum, názena ká tsakaná ka na wá, ká zlazlañerá antara ba ñere.»

<sup>46</sup> «Ba estuwa,» a ba Yaisu, «Watse zlaɗa ge kure keni, kwa malum-aha á tawrait! Aɗaba kwá faterar gwatame ɗemɗeme, amá kure wá, á ba an gulanda á kure keni kwá melateruka ge sepa gwatame ñanna.

<sup>47</sup> Watse zlaɗa ge kure, aɗaba kwá anƙwa nderaná kure irekhya á nabi-aha werre na ta cebanaa eggye-aha á kure.

<sup>48</sup> Kwá anƙwa maraná an una ñanna, ganakini hayakuranhaya slera á eggye-aha á kure. Ta cebanaa itare nabi-aha á Dadaamiya, kwá tsatsaná kure irekhya-aha-aatare.

<sup>49</sup> Aɗaba una ñanna, a ba Dadaamiya Edda á ilmu: Watse yá bela nabi-aha-aaruwa, antara emnde a bela-aaruwa, amá watse tá de cebá emnde umele-aatare, emnde umele wá, tá de shateru ba zlaɗa.

<sup>50</sup> Daaci baɗemme á uzhe á nabi-aha na ndza ta cebateraa an ceɓa daga am fakte á duniya na, á ba am mbiye á emnde a zamane na.

<sup>51</sup> Daga emtsa á Habila, sem emtsa á Zakariya baɗemme. Zakariya na wá, yá ndahá elva á Zakariya na ndza ta janaa am dagave á tara bere cuɗeɗe antara duksa na tá faná sadake ge Dadaamiya átekwa na. Una yá ndaakur ba jirire: Baɗemme á uzhe á emnde ñanna á ba am mbiye á emnde a zamane na.

<sup>52</sup> «Watse zlaɗa ge kure, malum-aha á \*tawrait! Aɗaba kwa lyeava egdza a tsekweram á wera tate á shá diya, kure keni kwá duka á dem huɗe-aara; emnde na tá kátá demda na keni, kwa piyaterante.»

<sup>53</sup> Sessa Yaisu am tate ɲanna, aɲkwa á zɲálá maa, malum-aha á tawraita antara Farisa-aha, ta ɗabanaa an elva gergere, ta ndavanu elva-aha gergere kwakya,

<sup>54</sup> ge tsagwadanaa an ɲane.

## 12

*Fá hyema am baakire á jirire na tá maganá \*Farisa-aha*  
(Mat. 10:26-27)

<sup>1</sup> Am sarte ɲanna maa, jammeje nalga áza Yaisu wá, ma debu wanyara keni ta hyephye, tá zɲálá á ba áte sera-aatare. Ba wera we-aara zuɲɲwe wá, a ndaater ba ge pukura-aha-aara emtsaade, a ba ɲane á elvan ge itare: «Tzufantsufa ire á kure átuge shahi á makala á \*Farisa-aha. Amaana wá, baakire á jirire na tá maganá itare.

<sup>2</sup> Adaba baaka duksa na an shebe kina, á de shebaaveshebe mazla-aara. Baaka duksa na ni nasherire kina, tá de diseka emnde.

<sup>3</sup> Yá bakurná adaba una ɲanna, baɗemme á názena ni kwá ndaaná kure an shebe kina, tá de cenáncena emnde ba parakke. Názena kwá ndaaná kure kina á dem hyema antara ura umele keni, watse tá cenáncena emnde baɗemme, ba seke ta balanaa an bala á dem huɗe á ekse.»

*Kuvaukuva ba Dadaamiya palle*  
(Mat. 10:28-31)

<sup>4</sup> «Ya ndaa ba kure emnde-aaruwa: kuvauka emndimagwaha na ma ta ceɓaa ba shifa á kure keni, baaka názu tá maganá itare áte kure mazla-aara na.

<sup>5</sup> Edda una kwá kuaná kure wá, edda una ni an hákuma á já shifa am duniya na, zlaɓe ádaliye an hákuma á dakurá á dem kára á jahanama. Názu yá bakurná iya wá, kuvaukuva ba ɲane palle.

<sup>6</sup> «Njedu-aha ilyeɓe tá velan ba ge kwaɓa buwa ka emtu? Amá baaka una a viyanaa Dadaamiya ba palle-aatare keni.

<sup>7</sup> Ba duksa palle ge kure keni. Ba úgje á ire á kure keni an kezla baɗemme áza Dadaamiya. Gazlawka ɗekideki, kwá an daradza ba kure arge njedu-aha ɲanna, ma wanyara keni.»

*Yaa Yaisu bi ndaase parakke geni ba ɲane una Yaakadada*  
(Mat. 10:32-33; 12:32; 10:19-20)

<sup>8</sup> «Una yá bakurná ba iya; ma ware una shebaaka, a enndaha ba parakke á katafke á emnde, ganakini ya Yaakadada-aara wá, iya \*Ura á emnde baɗemme keni, yá de enndaha ba parakke á katafke á malika-aha á Dadaamiya, ganakini ɲane ura-aaruwire.

<sup>9</sup> Amá edda una yiyaaya á katafke á emnde wá, iya keni yá de yanaaya edda-aara á katafke á malika-aha á Dadaamiya.

<sup>10</sup> «Máki ura a ndaase elva mandzawe áte \*Ura á emnde baɗemme wá, á naba yanarye Dadaamiya haypa-aara. Amá edda una, má a ndaase elva mandzawe áte Sheɗekwe Cuɗeɗe wá, baaka yanarye ge ɲane ɗekideki.

<sup>11</sup> «Má watse darákurda á de katafke á shairiya wá, ma ta dákurá á de katafke á male-aha am mashidi, ma ta dákurá á de katafke á male-aha á ekse, ma ta dákurá á de katafke á slekse-aha keni, a wakurka lyawa ɗekideki. Dzamauka ire á názena kwá de ndaaná kure, ge lyá ire á kure.

<sup>12</sup> Adaba á de bakuranba Sheɗekwe Cuɗeɗe á ba am sarte ɲanna názena kwá ndaaná kure.»

*Naraje an sleberba na uce*

<sup>13</sup> Á ba ura umele á elvan ge Yaisu, á ba am jahava wá, «Malum, ndaandaa seke ge egdza emmerwa a tejaneransetege waráta á eddenjere na.»

<sup>14</sup> A ba Yaisu á elvan ge ñane: «Ya ndaa ba ka ura-aaruwa, a givaa ware narkali á kure bi sletegakurá waráta ge kure?»

<sup>15</sup> Daaci a ba ñane á elvan ge emnde bademme: «Faufa hyema ba shagera am elva a gaa nalmane. Adaba emtakire á njá wá, tá shaná an nalmane ka, una ma edda-aara a shaa nalmane ba seke uwe keni.»

<sup>16</sup> Daaci a vaterte naraje na, a ba ñane á elvan ge itare: «Ankwa sleberba umele kwakya fe-aha-aara, a herdaa hiya kwakya.

<sup>17</sup> A ba ñane am ervaunde-aara: Kina mu, yá de puwaná áme hiya-aaruwa na, adaba baaka slede mazla-aara.

<sup>18</sup> A ba ñane: Názena yá de maganá ya kina wá, sey yá kyábá kuvereha-aaruwa na, yá nderá una sadadde, lauktu yá gyega hiya-aaruwa na á dem huđe-aara, antara duksa-aha-aaruwa umele bademme.

<sup>19</sup> Estuwa wá, yá banba am ire-aaruwa, ganakini baaka lambe-aaruwa, baaka zlakta á nalmane-aaruwa, ma yawe wanyara keni yá zá ba ñane. Yá naba banánba ge ire-aaruwa, ganakini gedaktegeda mazla-aara, naba ezza, essha, baaka lambe á ña.

<sup>20</sup> Amá a ba Dadaamiya á elvan ge ñane: Ekka ka uce! Á ba an vayiya na, yá dándá shifa á ña. Daaci bademme á nalmane ñanna ka jahanán ge ire á ña na wá, watse á zaná ware?»

<sup>21</sup> Yaisu a far elva na, a ba ñane á elvan ge itare: «Ba duksa palle ge edda una ni á jahaná nalmane ba ge ire-aara, amá am ice á Dadaamiya wá, talage ba dey.»

### *Dzamauka ire an kazlaja á duniya*

*(Mat. 6:25-34)*

<sup>22</sup> Daaci a ba ñane á elvan ge pukura-aha-aara: «Yá bakurná adaba ba una ñanna: Dzamauka ire an názena kwá de zaná kure, bi kazlaja na kwá de tsekwaná áte vuwa á kure.

<sup>23</sup> Adaba yaikka ba shifa arge náza za, yaikka ba vuwa arge nangyuwe.

<sup>24</sup> Zharauzhára á ba áte zalke-aha. Wallá tá já duksa ka, tá icáná á dem bere ka, tá an tate á sheba duksa ka, tá an kuvere ka, uwe ka, á gelátera ba Dadaamiya. Yaikka ba kure ka arge yiye-aha ñanna emtu, a jakurma uwe?

<sup>25</sup> Ware am kure, á dzegwándzegwa sladva shifa-aara ba cekwaangudi keni an dzámá ire na á maganá ñane?

<sup>26</sup> Máki diyakurdiya ganakini baaka názu kwa dzegwanaa kure ba una cekwa keni wá, kwá dzamán ge uwe ire á umele?

<sup>27</sup> Zharauzhára zlađe adaliye áte ugbene-aha áte másá, tá maga slera ka, tá há zane ka, uwe ka. Amá yá ndaakur ba jirire, ba Suleymanu an kwakyire á nalmáne-aara na keni ndza tsekwámka am zane na ni zariya, ba seke zariyire á palle á ugbene-aha ñanna keni.

<sup>28</sup> Másá na bá náanna emnde vatena ankwa am kaamba, amá makuralla tá fanu ge kára ni, Dadaamiya á tsekwaneme á ba an tsekwa am ugbene-aha, sakwa kure emtu, máki cekwire á fetarfire ka?

<sup>29</sup> Dzamauka ire á názena ni kwá de zaná kure, antara názena kwá de shaná kure dekideki.

<sup>30</sup> Sey ba emnde a duniya na dabarka Dadaamiya na una tá njá á ba dzámá duksa-aha ñanna. Amá kure wá, magauka una ñanna. Diyaadiya Eddekure ganakini kwá an wedere á duksa-aha ñanna keni.

<sup>31</sup> Kure wá, duksa zunḡwe na kwá maganá kure wá, tatayautátaya kure ba njá am \*kwára á Dadaamiya, á de vakurteva ḡane duksa-aha umele na keni.»

*Berbire na am samaya*  
(Mat. 6:19-21)

<sup>32</sup> «Kure walda cekwa, a wakurka iyawa ḡekidēki. Adaba Dadaamiya a wayakurante de njá am zlanḡa-aara ge kure an ervaunḡe-aara palle.

<sup>33</sup> Naba valawuvála kazlaḡa á kure baḡemme, tegawatertega shunḡu-aara ge talage-aha. Magawanánmaga partamami na baaka bádza-aara ḡekidēki na ge ire á kure, jahawanánjáhá nalmáne na á iceka ḡekidēki na ge ire á kure am samaya. Adaba am samaya wá, ma neyle, ma weshege keni, baaka una ni á shanaasha ḡekidēki.

<sup>34</sup> Adaba am tate na ni átekwa nalmáne á ḡa wá, ire á ḡa keni á ba am tate ḡanna.»

*Walaadi-aha na ni tá tsákwá ba hyema na*

<sup>35</sup> «ḡgwadawápsenḡwáḡe ba shagera, njawinja á ba am niya ge mága slera á kure, kára á fanus á kure a njinja á ba an mbe.

<sup>36</sup> Walaadi-aha, má dedde zánwe-aatare á dem tate á larusa wá, itare tá tsákwá ba hyema, geni ma a saa am laukte-ara keni, má janteja paare á bere wá, tá se weranantewera ba watsewatse. Daaci kure keni gawevege ba seke itare.

<sup>37</sup> Yá ndaakur ba jirire: Watse higa yaikke ge emnde na má a se berateraa zanwe-aatare, tá á ba am niya-aatare na. Watse á tsekwemtsekwa ba ḡane am kazlaḡa á tega ḡafa, watse á vatertá ba ḡane an erva-aara sleḡe antara náza za.

<sup>38</sup> Ma a saa an huḡe á vayiya, ma a saa dedde am huḡe á vayiya keni, máki a se berater tá tsákwá ba hyema wá, jaterja geḡa ge emnde ḡanna.

<sup>39</sup> Anḡwa duksa palle, diyaweddiye ba shagera: Máki diyaadiya edda á há sarte na ni watse á sawa neyle átekwa na wá, á yánka ni á demda neyle am mba-aara ḡekidēki.

<sup>40</sup> Kure keni ba estuwa, sarte na ni watse iya \*Ura á emnde baḡemme yá de sawa átekwa na wá, diyakurka. Daaci njawinja á ba am niya á kure.»

*Sleslera na dzayye ervaunḡe-aara, an una danḡwe ervaunḡe-aara*  
(Mat. 24:45-51)

<sup>41</sup> Daaci a ba Piyer á elvan ge ḡane: «Yaakadada! Naraje na ká ndaaná á ba áte ḡere emtu, áte emnde baḡemme he?»

<sup>42</sup> A ḡwanante ge Yaakadada, a ba ḡane á elvan ge ḡane: «Sleslera-ara ḡane dzayye ervaunḡe-aara, slenḡkale zlaḡe ádaliye na? Ba edda una ni má zanwe-aara a yanaa huḡe á há-aara baḡemme am erva ge ḡane, á vatertá ḡane náza za ge emnde na tá am huḡe á há ḡanna baḡemme, á vatertá an laukte-ara na.

<sup>43</sup> Higa yaikke ge sleslera ḡanna, máki zánwe-aara a se beranaa á ba am slera-aara.

<sup>44</sup> Yá bakurá ba jirire: Rezege-aara baḡemme keni á fanemfe am erva zánwe-aara ge sleslera estuwa.

<sup>45</sup> Amá máki bánba sleslera ḡanna am ervaunḡe-aara ganakini labára shekwaashekwa zánwe-aaruwa; kwaye ya keni yá maga názena á kataná ire-aaruwa. Daaci a fantau ge magatera palase an já ge emnde a slera á zánwe-aara am huḡe á há, an zála ka, an ḡwásha ka, a fantau ge zá názu am huḡe á há, á shá ba mbazla-aara haa á danse am enḡkale wá,

<sup>46</sup> zánwe á sleslera ñanna keni á saasa á ba am sarte na ñane tsakwaaka hyema ñekideki, tamaaka ñekideki na. Palase na á se maganná zánwe-aara ñanna wá, náza enndaaka. Ñane keni á de gev ba seke kelaade-aha-aara umele.

<sup>47</sup> «Zlafe ádaliye, sleslera na diyaadiya názena á kataná zánwe-aara, amá baaka lambe-aara magaaka, ñane wá, watse á shá já ba kwakya áza zánwe-aara.

<sup>48</sup> Amá sleslera na diyaaka názena á kataná zánwe-aara, a naba magaa názena wayaaka ervaunde á zánwe-aara, ñane keni á shansha já, amá ba cekwa. Edda una máki ta vante kwakya, ta de ndavanundave keni ba kwakya. Edda una máki kwakya názu ta fanem am erva ge ñane, tá de ndavanundave keni ba kwakya.»

*Yaisu wá, a saa hairire ka*  
(Mat. 10:34-36)

<sup>49</sup> «Iya wá, ya saa ba kára á sem duniya. Duksa na yá kataná ya kina wá, a mbetembe kára ñanna ba kinamina.

<sup>50</sup> Amá wá, anƙwa bapƙtisma-aaruwa umele, sey magiyánmaga emt-saade. Yá dzámá ba ire-aara kina, dem sarte na máki magariyánmaga na.

<sup>51</sup> Emtu sawa-aaruwa á sem duniya na, kwa kurken ya saa hairire ñane? Baaka ñekideki. Iya, ya se tega ba ye á emnde.

<sup>52</sup> Á de katafke cekwaanƙuđi wá, watse emnde ilyebe tá am mba palle, á de tega ye-aatare gergere buwa, emnde keye tá arge emnde buwa, emnde buwa tá dagala an emnde keye.

<sup>53</sup> Tá de gyaaveka tara dada an egdza-aara; tara mama keni tá de gyaaveka an gyaale-aara; tara shawle mukse, tá de gyaaveka antara eggyenara.»

*Dise nalaama-aha á názena á de magava*  
(Mat. 16:2-3)

<sup>54</sup> Daaci a ba Yaisu zlafe ádaliye á elvan ge nalga ñanna: «Ábi kure máki kwa nánná tsettsa kumba am ekte á samaya á kya gedí, kwá bá: Watse á hyá yawe na ba kina. Ba jirire á magava á ba áte una ñanna.

<sup>55</sup> Zlafe ádaliye, máki kwa nánná ice á effeya á sawa á sá am pute keni, kwá bá: Watse á sawa ñgudeffire ba watsewatse. Ba jirire á magava á ba áte una ñanna.

<sup>56</sup> Há! Iyau, nalaama-aha na anƙwa á magava áte samaya an una á magava áte haha wá, diyakurdiya sera-aara bađemme. Duksa-aha na anƙwa á marakurná Dadaamiya am zamane na wá, diyakurka! Kure degiya baaka jirire á kure ñekideki.»

*Melawemele an sledágala á ña ba watsewatse*  
(Mat. 5:25-26)

<sup>57</sup> «Labára kwá taa diseƙa ba kure an ire á kure duksa na ni watse an unƙule-aara na?

<sup>58</sup> Máki anƙwa sledágala á ña watse á dáká á dem shairiya wá, edduwa ba watsewatse ádezenara, de melawemele á ba am dagave á kure, a ñarakteka am shairiya. Adába máki dakemda am erva á narkali-aha wá, itare tá de fakem am erva ge sawji-aha, sawji-aha tá dáká á ba á dem dangay.

<sup>59</sup> Yá baká ba jirire: Ma a juwaa ba kwaƙa-aara keni, ká seska áhuwa ñekideki, máki pelakseka bađemme.»



## 13

### *Ba bi mága tuba, bi shá emtsa*

<sup>1</sup> Á ba am sarte ñanna maa, ta naba duhe ge emnde umele ádeza Yaisu, ta de banaa labáre á emnde a Galili na a cebateraa \*Pilaatu ta átire a vante sadake á dabba ge Dadaamiya na.

<sup>2</sup> A ñwaterante ge Yaisu a ba ñane á elvan ge itare: «Emnde ñanna ta cebateraa estuwa na wá, kwa kurken ta emnde a haypa ba itare arge emnde a Galili baɗemme emtu?»

<sup>3</sup> Estuweka ɗekideki, una ya ndaakura ba iya. Máki magakurka tuba, kure keni baɗemme watse kwá emtsa ba seke itare.

<sup>4</sup> Emtu emnde kelaawa ju tiise na a mbedateraar dzagwawáye am Silauwam baɗemme emtsaremtsa na wá, ta emnde a haypa ba itare arge emnde a Urusaliima baɗemme emtu?»

<sup>5</sup> Estuweka ɗekideki, una ya ndaakura ba iya. Máki magakurka tuba wá, kure keni watse kwá emtsa ba seke itare.»

### *Naraje an nabugda na á yeka egdzere*

<sup>6</sup> Am iga á una ñanna maa, Yaisu a bateraa naraje na, a ba ñane á elvan ge itare: «Ankwa ura an mama á nabugda am fe-aara, amá á yeka nabugda ñanna. Á duwa á de tataya egdzere átekwa keni, á shánka ɗekideki.

<sup>7</sup> Daaci a ba edda á fe ñanna á elvan ge edda una ankwa á maganá slera am fe ñanna: Icesice náfá na kwaye ñane na baɗemme ádegashe. Náwa yawe keye vatena ni, yá sawa keni ba yá shánka egdzere átekwa, labáre á badziyá fe ba dey?»

<sup>8</sup> Amá a ba sleslera-aara á elvan ge ñane: Ányya emtsaade vátena zánwe-aaruwa. Yá magantemága kyála, yá puwante nargwa,

<sup>9</sup> ámbáne watse á yá egdzere am shifa. Máki yaaka zlaɓe ádaliye wá, lauktu watse mí icesice.»

### *Yaisu mbanaambe mukse a badzanvaa shaitaine an kwaskwe á puwansepuwe*

<sup>10</sup> An kwaskwe á puwansepuwe umele maa, Yaisu ankwa á kwaraterse elva á Dadaamiya ge emnde am mashidi.

<sup>11</sup> Ay ankwa mukse am mashidi ñanna wá, mukse ñanna an jini am ñane, badzanvebadze jini ñanna, yawe kelaawa ju tiise á taa tsemka mukse na ndeɗɗe am zhegela.

<sup>12</sup> Náanna Yaisu mukse na wá, a naba ɗante. A ba Yaisu á elvan ge ñane: «Mbákmbe emmerdzagwale. Ka ba layye mazla-aara.»

<sup>13</sup> Ba a ndaase una ñanna, a puwar erva a barka-aara, ndeɗɗe a naba tsetehe ge mukse na, a fantau ba ge gálá Dadaamiya.

<sup>14</sup> Amá a naba jehe ge ervaunɗe edda una ñane male am mashidi ñanna, a fantau ge tsaketera elva ge emnde baɗemme, a ba ñane á elvan ge itare: «Diyakurdiya ankwa háre unkwahé ge mága slera-aha á kure. Máki kwá kátá lapiyire wá, a mbarakuraambe am háre-aha ñanna, amá an kwaskwe á puwansepuwe ka.»

<sup>15</sup> A naba ñwanante ge Yaakadada, a ba ñane á elvan ge ñane: «Amá kure wá, ɓaaka jirire á kure ɗekideki. Ábi kure kwá ankwa belá esla-aha á kure, antara ezzenwa-aha á kure an kwaskwe á puwansepuwe, kwá de fateru yawe?»

<sup>16</sup> Ay labára kena mukse na ñane keni ba wulfe á Ibrahima miyenne, tá taa pelanaaka an kwaskwe á puwansepuwe na? Yawe kelaawa ju tiise vátena a nguɗanaa Shaitaine ma.»

<sup>17</sup> Elva á Yaisu nanna faterarfe zherwe kwakya ge emnde na lyarefka mbe á mukse nanna. Amá emnde bademme wá, ma ware keni ervaunđe-aara ba seke nama. Tá higa arge slera-aha á jirire na a maganaa Yaisu na bademme.

*Naraje an wulfe á pilli*

(Mat. 13:31-32; Mark. 4:30-32)

<sup>18</sup> A ba Yaisu á elvan ge itare zlafe á daliye: «Ba seke estara nane \*kwará á Dadaamiya? Yá slaterá an uwe kina?

<sup>19</sup> Kwará á Dadaamiya wá, nane ba seke mága á wulfe á pilli, ura umele a eksante, a de beleme am haha am fe-aara. A sesehe, a naba waletе ba nafa, haa yiye-aha ta magaa bere-aatare áte erva-aara.»

*Naraje an shahi á makala*

(Mat. 13:33)

<sup>20</sup> Yaisu a bateraa naraje umele zlafe á daliye, a ba nane á elvan ge itare: «Yá sláná an uwe zlafe á daliye \*kwara á Dadaamiya?

<sup>21</sup> Kwara á Dadaamiya wá, nane ba seke mága á shahi á makala. Á eksevaakse mukse ba cekwaanğudı, á puwante ge ukpa tasa keye an wasla, amá á tsantetse shahi á makala na ukpa na bademme.»

*We á bere becce*

(Mat. 7:13-14, 21-23)

<sup>22</sup> Yaisu ankwá á maga shula á dem Urusaliima. Am shula-aara nanna maa, ankwá á tsatse am berni-aha gergere antara am makwata-aha gergere, ankwá á kwaraterse elva á Dadaamiya ge emnde.

<sup>23</sup> A duhe ura umele ádezenjara, a ba nane á elvan ge nane: «Malum, ba jirire watse ba cekwa emnde na tá lyelye shifa-aatare na emtu?» A nwanante ge Yaisu, a ba nane á elvan ge nane:

<sup>24</sup> «Naba dawemde á kya we á bere becce. Yá bakurá ba jirire, kwakya emnde na tá kátá demde na, amá watse tá dzegwánka.

<sup>25</sup> «Má watse tsetse edda á há, a zlenje bere-aara an tsekweram ni, zlafe kure kwa tsatse á ba gashe wá, ma kwa fantau ge já we á bere, kwá dáhá: Yaakadada, Yaakadada, weranjerantewera bere keni, á de lyevka mazla-aara. Á de bakurá: Ma kwa emnde-ara keni, diyanakurka ya. Zlalauzlálá.

<sup>26</sup> Watse kwá baná: Degiya ba nere emnde na ndza mi zaa duksa ba kerde, mi shaa yawe á miya keni ba kerde, ka kwaranjerse elva á Dadaamiya áte we á layye-aha am ekse á nere na.

<sup>27</sup> Názu á de nwakurantá nane wá, á de bakurá ba: Ma kwa emnde-ara keni, diyanakurka ya. Bademmire á kure, kwa emnde a mága haypa, a nanákurka áhuna dfekideki, zlalauzlálá á dem tate á kure!

<sup>28</sup> Daaci kwá de kyuwá á kure áhuwa, kwá de kerdá slare ge zladá. Amá kwá zhára tara Ibrahimia antara Isiyaaku an Yakubu ira nabi-aha bademme tá am zlanna á Dadaamiya. Amá kure wá, puwarakurvepuwe ádegashe.

<sup>29</sup> Watse emnde tá kela á sawa am gedı, á sawa am yala, á sawa am pute, ira á sawa am manem bademme, tá de zá emtakire am zlanna á Dadaamiya.

<sup>30</sup> Ay degiya, emnde na tá á kataliya itare kina, emnde umele-aatare watse ta emnde a katafke ba itare. Emnde na tá á katafke itare kina keni maa, emnde umele-aatare tá de gevá am kataliya á emnde.»

*Elva á Yaisu áte Urusaliima*

(Mat. 23:37-39)

<sup>31</sup> Ba vacite nanna zlaɓe ádaliye maa, ta duhe ge \*Farisa-aha umele ádeza Yaisu, a ba itare tá elvan ge nane: «Ezzlálá, dándá ire á nà áhuna, adaba anƙwa á tsagwadafaktsagwada sleksu \*Hirudus á já shifa á nà ba dƙidƙeki.»

<sup>32</sup> A nwaterante ge Yaisu, a ba nane: «De bawanánba ge maskwata á kure nanna wá, iya baaka lambe-aaruwa, náwa yá maga ba slera-aaruwa. Yá anƙwa ngyá jini-aha am emnde, yá anƙwa mbá emnde na lapika vuwa-aatare, zlaɓe kwakya slera-aaruwa, vatena, makuralla, dem wergekse, lauktu yá zlanazle.

<sup>33</sup> Amá vatena, antara makuralla, dem wergekse na wá, zlaɓe yá maga ba slera-aaruwa emtsaade am shula-aaruwa ge dem Urusaliima. Adaba á zlayánka ge nabi á Dadaamiya ganakini tá janá ágashe, sey am Urusaliima.

<sup>34</sup> «Urusaliima, Urusaliima, ekka ka ceɓaa nabi-aha, ka ceɓaa emnde na a belateraa Dadaamiya an nákwá! Ser kwakya una yá kátá jema emnde á nà ásezerwa ba seke náza á mama á ukkula, máki á jaha egdzara-aara á dem ekte á zlabake-aara. Amá kwalakefkwale.

<sup>35</sup> Kina wá, yanakuraaya mazla-aara. Yá ndaakur ba jirire, kwá puweteka ice á kure áte iya mazla-aara, dem sarte na ni watse kwá bánba ba kure an we á kure ganakini, a gangá Dadaamiya barka ge edda una a sawa an zhera á Yaakadada na.»

## 14

### *Yaisu mbanaambe ura an kwaskwe á puwansepuwe*

<sup>1</sup> An vaci puwansepuwe umele maa, dfaarantedaha Yaisu am mba á palle á male-aha á \*Farisa-aha ge de zá dafa. Bademme á emnde na ta dfaaterte am mba á male nanna tá fá ba hyema áte Yaisu.

<sup>2</sup> Ay anƙwa ura lapika, vuwa-aara bademme an sháfá maa, a njehe á ba á katafke á Yaisu.

<sup>3</sup> Daaci a ba Yaisu á elvan ge malum-aha á \*tawraita, antara \*Farisa-aha na tá anƙwa áhuwa: «Am tawraita mu, anƙwa emtu baráma ge mba ura lapika an kwaskwe á puwansepuwe, emtu an piya he?»

<sup>4</sup> Amá nwaranarka dƙidƙeki, ta du ba we-aatare. Mazla-aara Yaisu a naba nanaahe zhel na, a mbanaahe, a belanaahe, «Ezzlálá á nà,» a ba nane á elvan ge nane.

<sup>5</sup> A ba nane á elvan ge itare: «Kina kure, máki mbedemmeda egdza á kure, bi esla á kure am suwa an kwaskwe á puwansepuwe, kwá zhagadeka emtu á de sansese?»

<sup>6</sup> Dzegwaránka vante jawápa dƙidƙeki.

### *Tá dzeganá estara slede, tá daana estara emnde*

<sup>7</sup> Daaci nána Yaisu ganakini emnde na ta dfaateraa á de zá dafa nanna, ma ware keni á dzera ba slede na á kataná nane ge njá am huɗe-aara. A naba vaterte naraje na ge itare bademme, a ba nane á elvan ge itare:

<sup>8</sup> «Máki dfaarkedáhá á dem munri á larusire wá, de njeka am slede na ni an dárádza arge slede-aha umele na dƙidƙeki. Adaba diyanƙa ámbane dfaarantedáhá ura male jauje ge ekka an dárádza,

<sup>9</sup> daaci edda una a dfaakurdáhá na á de baká: Tsettse, yanánya slede nanna ge male. Daaci ká de tse an zherwe, á dem slede na baaka dárádza-aara dƙidƙeki na.

<sup>10</sup> Arge una nanna wá, máki dfaarkedáhá á dem jeba á tate nanna wá, de njinja ka á ba am slede na ni baaka dárádza-aara dƙidƙeki na. Má samsa edda una a dfaakɗaa na, á se baká: Labára ura-aaruwa! Sawa náwa

njinja am una. A se vakte sledfe na an dárádza jipu na. Daaci una nanna á gev dárádza palle ge ekka á katafke á emnde na kwá zá dafa kerde.

<sup>11</sup> Adaba ma ware una a kantaa ba nane ire-aara na, tá de ganaage edda-aara. Amá edda una ni a gaa ire-aara wá, tá de kananteka.»

<sup>12</sup> Am iga á una nanna maa, a ba nane á elvan ge edda una a dfaaná á dem mba-aara nanna: «Máki ká dáhá emnde ge se zá dafa am mbá á nã, bi ge se zá masane am mbá á nã wá, dfaaterka emnde na ni watse tá dzegwándzegwa dfaakterdáhá ka keni, tá de pelaksepele na. Ma slakate-aha á nã, ma egdzar mama-aha a nã, ma vara-aha a nã, ma emnde a riya á nã keni, máki ba ta emnde a berba, dfaheka jeba á emnde nanna dfekideki.

<sup>13</sup> Máki ka magaa muñri á nã wá, dfaaterdáhá ka ba talága-aha, emnde a dere, antara lipa-aha umele, ira wulfe-aha.

<sup>14</sup> Dfaaterdáhá ka ba jeba á emnde nanna, watse ká higetehiga, adaba itare tá dzegwánka pelaksepele duksa á nã. Daaci á de pelaksá ba Dadaamiya, vacite na má tsatertetse emnde a mága shagerire am faya.»

*Naraje an muñri yaikke a gyanaa ura male*

*(Mat. 22:1-10)*

<sup>15</sup> Ura umele am dágave á emnde a zá dafa antara Yaisu na, ba a cenaa una nanna wá, a ba nane á elvan ge Yaisu: «Edda una watse á de zá una am zlanna á Dadaamiya na, watse higa yaikke ge nane ka?»

<sup>16</sup> Yaisu a vante naraje na, a ba nane á elvan ge nane: «Ankwa ura male a gyaa muñri yaikke am mba-aara, a dftaa emnde keni ba kwakya ge de zá muñri nanna.

<sup>17</sup> Hyephye laukte a zá dafa á muñri nanna maa, a naba belaa slebela-aara, a ba nane: De bateranba ge emnde-aaruwa na a sarsawa, duksa bademme an tsatse mazla-aara.

<sup>18</sup> Amá bademme á emnde na a dfaateraa nane nanna, ma ware keni a fantau ba ge slápala, geni á taa daaka. A ba zunñwire-aatare: Ya shekuve fe añwaslire, yá de ezzhárá. Adaba una nanna yá taa daaka. De banánba: Tasle-aara, a yiyaarye.

<sup>19</sup> A ba ura umele: Iya ya shakuve esla-aha kelaawa, yá de salatersála. Adaba una nanna yá taa daaka na. De banánba: Ba tásle-aara a yiyaarye.

<sup>20</sup> A ba ura umele zlafe á dalye á elvan ge slebela na: Iya wá, yá an larusa am bere, zlafe ba unñule a gaa gyaale-aaruwa nanna, yá taa daaka ya. De banánba ba estuwa.

<sup>21</sup> Daaci slebela na ba eptsa-aara á dá, a danaa nara-aatare ge zánwe-aara. Amá jaaja ervaunde edda á há jipu. A ba nane á elvan ge slebela-aara: Ezzlálá ba watsewatse á dem huđe a ekse, de ejja dába áte we á layye-aha, ma ka bera talaga-aha-ara, ma ka bera emnde a dere antara lipa-aha-ara, ira wulfe-aha, dfaaterdáhá bademme ásehuna.

<sup>22</sup> Cekwaangudí wá, eptsapta slebela na áseza zánwe-aara, a ba nane á elvan ge nane: Bademme magannaamaga názena ka ndaaná ka, amá zlafe ba nja sledfe-aha na baaka emnde am huđe-aara. Shagera, a ba zánwe.

<sup>23</sup> A ba zánwe á elvan ge nane: Ezzlálá á dete mákwáta-aha, de eddába we á baráma, we á baráma, antara unñule-aha, ma ka shaa ware keni naba sánza á ba an ndzedfa, geni a naatená huđe á há-aaruwa bademme.

<sup>24</sup> Amá emnde na ya dfaaterdáhá, kwalarevkwale na wá, ba palle-aatare keni á fuka dafa-aaruwa mazla-aara. Elva-aaruwa una ge iya.»

*Tá gevá estara pukura-aha á Yaisu*

*(Mat. 10:37-38)*

<sup>25</sup> Kwakya nalga á emnde, ta daa d'aba Yaisu. Amá a eptsavte ge Yaisu ádezeta, a ba ñane á elvan ge itare:

<sup>26</sup> «Iya wá, baaka ura á dzegwándzegwa d'abid'aba, máki edda-aara yánka dzámá eddenjara, emmenjara, mukse-aara, egdzara-aara, egdzar mama-aha-ñara zála antara ñwásha, ira ire-aara ba ge ñane.

<sup>27</sup> Ma ware una eksanteka dzangala-aara ge d'abid'aba, edda-aara á taa gevka pukura-aaruwa.

<sup>28</sup> Ankwa duksa palle, cenawáncena ba shagera. Baaka ura á fantau ge nderá dzagwawaye, máki zlauka am lasáfi-aara ba shagera.

<sup>29</sup> Edda-aara, má magaaka una ñanna wá, á naba fantaufe, amá á taa zланаaka bademme. Daaci bademme á emnde na tá zhára slera-aara ñanna, tá dzáká ba ñane.

<sup>30</sup> Tá de bánba emnde geni, máki ba baaka nalmane-aara mu, a fantau ge uwe ba d'ekid'eki.

<sup>31</sup> «Ba duksa palle ge slekse á larde keni. Máki tá wava an ukfenjara wá, sey a puwa sawari am ire-aara emtsaade ba shagera, máki á dzegwándzegwa de wava an emnde-aara debu kelaawa na, antara slekse na á siyanuye an emnde debu kul buwa.

<sup>32</sup> Máki a nanna watse á dzegwánka wá, ba zlafe kelaade-aara yiyiye an ñane wá, á puwa emnde-aara ádezenjara, ge ndavanundave názena á kataná ñane, lauktu tá emtsanámtsa wava ñanna.

<sup>33</sup> Ba duksa palle ge kure keni. Baaka ura á dzegwándzegwa gev pukura-aaruwa, máki yánka bademme á duksa na am dalbe-aara.»

### *Elleña na baaka nampire-aara mazla-aara*

*(Mat. 5:13; Mark. 9:50)*

<sup>34</sup> «Elleña wá, duksa ñgelama. Amá máki elleña ñanna baaka d'andanjire-aara mazla-aara mu, tá maganá uwe, ganakini á gevge d'andane zlafe adaliye? Baaka pute d'ekid'eki.

<sup>35</sup> Máki estuwa, baaka nampire-aara mazla-aara. Ge nyanve nargwa zlafe adaliye an ñane keni, á gevka; ge danaa á ba dem fe keni, baaka nampire-aara, sey tá puwanve á ba degashe. Edda una máki ankwa hyema-aara wá, a cenevaacena!»

## 15

### *Naraje an kyawe na ndza ked'akeda, sharánsha*

*(Mat. 18:12-14)*

<sup>1</sup> Kwakya emnde a mága haypa antara \*emnde a jáhá hadáma se jarammeje áza Yaisu, tá ankwa cená elva ázenjara.

<sup>2</sup> A naba jaterhe ge ervaunje \*Farisa-aha antara malum-aha á \*tawraita, a ba itare am dagave-aatare: «Labára ñane ge zhele na á lyiya emnde a haypa, á zá dafa antara itare?»

<sup>3</sup> Yaisu a vaterte naraje na, a ba ñane á elvan ge itare:

<sup>4</sup> «Ware am kure, má a ked'aa palle am kyawe-aha-aara deremke, á yánka kyawe-aha kul maselmana ju maselmana na, á de tatayá palle na ked'akeda na emtsaade?

<sup>5</sup> Máki shánsha, á eksante á ba an higa áte ye-aara, á sá an ñane.

<sup>6</sup> Máki saasa maa, á d'áhá slakate-aha-aara antara emnde a riya-aara, tá se higa átirpalle, ad'aba a bateraa labáre á higa, a shaa kyawe-aara na ndza ked'akeda na.»

<sup>7</sup> Daaci a ba ñane á elvan ge itare: «Una keni ba duksa palle. Yá ndaakur ba jirire, am samaya wá, kwakya ba higa na arge slehaypa palle na a



eptsanve iga ge haypa-aha-aara, arge emnde kul maselmana ju maselmana, ta bantsa itare, ta emnde jirire, baaka wedere-aatare an mága tuba na.»

*Naraje an gursa na ndza keƙaakeƙa, sharánsha*

<sup>8</sup> «Zlabe ádaliye, mukse máki an gursa-aara kelaawa, amá a eblyantaave palle á ba am bere-aara, á mbanteka kára á ba am sarte ɲanna, á ettátaya ba shagera, á hyaƙese bere ɲanna baƙemme sey má shánsha?

<sup>9</sup> Máki shánsha wá, slakate-aha-aara antara emnde a riya-aara sey tá cenáncena baƙemme, tá se higa átirpalle, aƙaba a bateraa labare á higa, a shaa gursa-aara na ndza keƙaakeƙa na.

<sup>10</sup> Una keni ba duksa palle. Yá ndaakur ba jirire: málíka-aha á Dadaamiya tá higa jipu, máki slehaypa palle a eptsanve iga ge haypa-aha-aara.»

*Naraje an egdzere ndza keƙaakeƙa, sharánsha*

<sup>11</sup> Yaisu a fateraare naraje umele zlabe ádaliye, a ba ɲane á elvan ge itare: «Aɲkwa ura an egdzara buwa zála.

<sup>12</sup> A ba kudere á elvan ge eddetare wá: Názena ni ma andze ɲá záná am warata am iga á ɲa na wá, iya yá kátá náza-aaruwa ba kina eddaaye. Ane, á ba eddetare. A naba ƙaaterete, a tegateraa nalmáne na.

<sup>13</sup> «Am iga á una ɲanna maa, kudere na a gaa ba hare cekwaangudí wá, a naba jimaa kazlaɲa-aara, umele a valuhe a puwem shungu-aara am lyiba, puwwe a naba zlálá á dem duniya-aara. Daaduwa áhuwa maa, a de keƙaa nalmáne-aara na a shanaa áza eddeɲara na baƙemme, am ƙákarire ba dey.

<sup>14</sup> Ba ɲane keni pacanvepáƙe nalmáne-aara baƙemme cátte zlauzle duksa am erva-aara wá, samsa waya yaikke á sem larde ɲanna keni. Palle á názu á eksáná áte erva baaka mazla-aara.

<sup>15</sup> Daaci á tataya slera mazla-aara. A ba palle á emnde a ekse ɲanna á elvan ge ɲane: Aɲkwa slera á piya nabezhe-aha am mba-aaruwa, má ká emmága. Wayanwáyá, a ba ɲane; a naba duhe.

<sup>16</sup> Aɲkwa ice-aara am shayawe á duksa-aha na tá vante ganakini á dateran ge nabezhe-aha, amá varanteka baráma á zuze-aara.

<sup>17</sup> «Daaci a fantau ge shá eɲkale áte nja-aara ɲanna, a ba ɲane: Emnde na tá maga slera am mba á edderwa ni tá yáná ba itare ƙafa ni, iya ni á jiija waya áhuna!

<sup>18</sup> Ambane yá tsetse, yá eptsá á dá. Yá de banánba ge edderwa ganakini ya ganu ge ɲaneka palle haypa na, amá ya gu haypa an Dadaamiya.

<sup>19</sup> Am nja-aaruwa kina na wá, ba geni tá ƙaƙiyá an egdza á ɲa keni zlayeka mazla-aara, hyainefka. Naba givege ka, a ganevge ba seke emnde a slera á ɲa umele am huƙe á há á ɲa.

<sup>20</sup> Mazla-aara a naba tse, a saa á se mba á eddeɲara na.

«Am sarte na saasa herzhanteherzhe há á eddeɲará, daga ba zlabe yiyiye, a naba diyeddiye eddeɲará, a naba zanvaarehe, hattse a naba tsetehe, a de yainuye, tákwálle a de ɲanaahe an erva buwa, á higa arge ɲane.

<sup>21</sup> Daaci: Eddaaye, a ba egdza-aara á elvan ge ɲane, haypa-aaruwa wá, ya gaku ge ekka ka palle, haypa yaikke ya guwa an Dadaamiya. Hyaneƙa mazla-aara ganakini yá gev egdza á ɲa ádaliye.

<sup>22</sup> Amá ba hyema keni fanuka eddeɲara na ge názena aɲkwa tsakaná ɲane. A ba ɲane á elvan ge emnde na tá maga slera am mba-aara: Dawmbare watsewatse á dem bere, de sawansa záne zariya, antara

kimake, ira jade palle, sawmbare an nane, tsekwawanemtsekwa am kazlaja.

<sup>23</sup> Dawmbare, de sawansa dalau na mi gelanaa á ba an niya na, icawantice watsewatse, una munri yaikke, higaumihiga.

<sup>24</sup> Adaba egdza-aaruwa na náwa nane na wá, ndza ba seke a emtsa an emtsa, nane kina wá, ba seke a tsete am faya. Ndza kedaakeda ba dekideki, amá kwaya nane jesaarje. Daaci ta fantau ge mága munri-aara, higa yaikke am huđe á há-aara bademme.

<sup>25</sup> «Amá am sarte nanna wá, makaji á edda á há nanna baaka am mba, a dem kaamba. Ankwa á sá maa, á cená ba gusa am mba-aatare, njaanja ganja tá shekela emnde.

<sup>26</sup> A naba daase palle á emnde na tá maga slera am mba-aatare, a ndavanu elva, a ba nane: A jaara uwe am mbá á miya?

<sup>27</sup> A ba walaadi-aatare nanna á elvan ge nane: Saasa egdza emmeja, eddenja a icante dalau na mi gelanaa á ba an niya na, adaba a shaa egdza-aara ba lapilayye.

<sup>28</sup> Mazla-aara a naba icaa ervaunde makaji á edda á há nanna, a kwaleve ge dem mbá nanna ba dekideki. Daaci a segashe ba eddenjara an ire-aara, a se slapalana á dem mba.

<sup>29</sup> Amá a ba nane á elvan ge eddenjara: Edda, iya náwa yawe wanyarwanyara yá magaká ba slera, ba ser palle keni yannaaka elva á na ni, aley ba ser palle keni vakiteka ba egdza a nawe keni, ganakini ná zuze antara slekate-aha-aaruwa ni.

<sup>30</sup> Gevge saasa egdza á na, nane wá, a de kedakaa nalmáne á na bademme áte záware-aha ba dey ni, aley ka se icanante dalau na mi gelanaa á ba an niya na adaliye!

<sup>31</sup> Ba estuwa egdza-aaruwa, a ba eddetare; Ekka wá, ba jire ba ademe keni dakeska dekideki. Ay degiya, bademme á názena am huđe á há na ba náza á na.

<sup>32</sup> Duksa palle wá, shagera ba mi maganaamaga munri, mi higa. Adaba egdza emmeja nanna wá, ndza ba seke a emtsa an emtsa, kina nane gevge ba seke a tsete am faya. Ndza ba seke a kedaa an keda am kaamba, náwa shanánsha zlađe adaliye.»

## 16

### *Sleslera na diyaadiya fanu hyema ge ire-aara*

<sup>1</sup> A ba Yaisu á elvan ge pukura-aha-aara: «Ankwa sleberba umele, an sleslera-aara a yanaa duksa kwakya am erva. Ta naba sem ge emnde umele áseza sleberba nanna, a ba itare tá elvan ge nane: Degiya sleslera á na na ankwa á badzaká nalmane kwakya.

<sup>2</sup> Daaci a naba dante sleslera-aara nanna ádezenjara. A ba nane á elvan ge nane: Ázara kena ká maganá ka ta se ndindaha na? Máki estuwa wá, viteva lasafi á slera á na, ká njeka am slera-aaruwa mazla-aara.

<sup>3</sup> «Daaci a ba sleslera nanna am ervaunde-aara: Kina mu, watse yá maga tara uwe antara uwe kena? Adaba baaka shaige-aara, á ngyingye zanwe-aaruwa am slera. De herda keni yá dzegwánka mazla-aara, njála keni zherwe.

<sup>4</sup> A ba nane: Kina wá, diyandiya názena yá maganá ya, ma ta sise am slera keni, watse tá lyiyilyiya emnde am mba-aatare.

<sup>5</sup> «Daaci a naba fantau ge d'áhá emnde na zanwe-aara á d'abater gema an palpale. A ndavanu ge edda una a sawa nane zuññwe: Wanyara gema á zanwe-aaruwa áte ka? a ba nane á elvan ge nane.

<sup>6</sup> A nwanante, a ba nane: Waye gaunḡaun mawya deremke buwa. A ba sleslera na á elvan ge nane: Njinja, puwetepuwa áhuna gaunḡaun deremke, daaci ba seke pelaksepele gaunḡaun deremke.

<sup>7</sup> A d'ante ura umele zlaḡe, a ba nane á elvan ge nane: Wanyara gema á zanwe-aaruwa áte ka? A nwanante, a ba nane: Nalkame buhwa deremke iyeḡe. A ba sleslera á elvan ge nane keni: Sawa, náwa puwetepuwa áhuna buhwa deremke ufad'e, daaci ba seke pelaksepele buhwa deremke ufad'e.

<sup>8</sup> «Daaci zanwe a fantau ge g'álá sleslera-aara nanna. Diyaadiya tsa ganakini magaaka jirire am slera-aara, amá a galanaa adaba diyaadiya fanu hyema ge ire-aara á de katafke. Adaba emnde a duniya na wá, itare diyardiya fanu hyema ge ire-aatare jaruje ba ge emnde na tá am parakkire keni.»

<sup>9</sup> Daaci Yaisu a farhe zlaḡe adaliye, a ba nane á elvan ge itare: «Názu yá bakurná ya wá, magaumaḡa urire an emnde an nalmane á duniya na. Daaci am sarte na má watse zlauzle am erva á kure wá, tá de lyiyakurlyiya am tate na ni á zleka d'ekideki na.

<sup>10</sup> Ma ware una a magaa jirire am duksa na cekwa, am duksa yaikke keni estuwa. Amá edda una a magaaka jirire am duksa cekwa wá, am duksa yaikke keni á maga ba baakire á jirire nanna.

<sup>11</sup> Adaba una nanna, máki magakurka slera an nalmane á duniya na an unḡule-aara mu, á de vakurta ware nalmane á jirire?

<sup>12</sup> Zlaḡe adaliye, máki magakurka an unḡule-aara áte nalmane á emnde mu, á de vakurta ware náza á ire á kure?

<sup>13</sup> «Baaka ura á dzegwándzegwa magaterá slera ge zanwe-aha buwa átirpalle. Ba bi á de wayete ba palle, á maganá slera shagera, á de yá palle, á mañka slera-aara. Kwá dzegwánka magaterá átirpalle tara slera á Dadaamiya antara tataya nalmane.»

### *Magiya áte duksa gergere*

*(Mat. 11:12-13; 5:31-32; Mark. 10:11-12)*

<sup>14</sup> \*Farisa-aha, emnde a waya nalmane na, ba ta cenaa elva nanna wá, ta naba puwar dzáká ge Yaisu ágire tá epsawepsawa.

<sup>15</sup> A ba Yaisu á elvan ge itare: «Kure, kwá ganve ire á kure ba seke kwa emnde a jirire, amá Dadaamiya diyaadiya ervaunḡe á kure. Adaba duksa na emnde tá zharán ge yaikkire wá, hyapka ba názara keni áza Dadaamiya.

<sup>16</sup> «Ndza á faterá ba \*tawraitá á Muusa, antara wakita á nabi-aha emnde áte baráma á Dadaamiya. Una nanna shekwaashekwa sem zamáne á Yuhanna slemaga baptisma. Ta fantau á ba am sarte nanna emnde ge cená labare á higa, elva a njá á ba am \*kwará á Dadaamiya. Daaci ma ware keni á wava an ndzedá-aara bademme, ganakini á demda nane keni am kwara nanna.

<sup>17</sup> Amá wá, á eblyantaaveka ba egdza duksa keni ge názu am \*tawraitá. Butu ba kedá á tara samaya an haha arge kedá a egdza duksa ba cekwaanḡudí am tawraitá.

<sup>18</sup> «Ma ware una a belaa mukse-aara, a gaa umele, a magaa ba gwardzire. Edda una a gaa mukse na a segashe am mba á zhele, nane keni a magaa ba gwardzire.»

### *Naraje an sleberba an Laajarus*

<sup>19</sup> «Ndza anƙwa sleberba umele, á tsekwa ba zane na ni lefedfe jipu, kwakya gane-aara na. Ma vaatara keni am mba-aara tá gyeka duksa laake, nane á zá ba emtakire am mba-aara.

<sup>20</sup> Anƙwa zlafe talage umele zhera-aara Laajarus, bademme á vuwa-aara ba wige maa, a de zlavehe áte we á wakyiya á sleberba na.

<sup>21</sup> Nane wá, ice-aara ndza am kwácá á dafa na á valya á sawa am erva á sleberba na, ganakini á wazantewaza. Amá itare ta naba fanarhe ge zladá, kere-aha ta se emtakanaa wige-aha-aara na.

<sup>22</sup> Am iga á una nanna maa, a naba emtsehe ge Laajarus, eksaranteksa malika-aha shifa-aara, ta dáná ádeza Ibrahimia am samaya. Sleberba nanna nane keni a naba emtsehe, hedareheda.

<sup>23</sup> Amá sleberba nanna anƙwa á maga palasa an tsáká ire am faya. A kante ice am zladá-aara nanna wá, á zhárá ba Ibrahimia antara Laajarus ázeɗara, ta yiyiye jipu an nane.

<sup>24</sup> A fu hula á ba an ndzedá, a ba nane: Eddaaye Ibrahimia! Tasle á na zivarze! Ebbela Laajarus, a de femfa ba we á gulanda-aara keni am yawe, a se ekhyinaakhya nara, yá am zladá degiya am kára na!

<sup>25</sup> A nwanante ge Ibrahimia, a ba nane: Egdza-aaruwa, una wá, baaka kwa mazla-aara. Ká dzamteka ka á ba áte emtakire na ka zanaa ka am duniya, Laajarus a shu zladá kwakya na! Kina wá, anƙwa á puwansepuwe nane mazla-aara, ka keni ba ká shá zladá á na.

<sup>26</sup> Baira dеме, anƙwa evege sladfe am dágave á miya, ma emnde á nere una tá kátá dezekure keni, tá dzegwánka; ma emnde á kure tá kátá sezeɗere keni tá dzegwánka.

<sup>27</sup> A ba zhel nanna ndza sleberba na á elvan ge Ibrahimia: Máki estuwa wá, ba baaka elva-aara. Amá yá dalide zlafe ádaliye ge njalakɗála eddaaye, tasle á na, ebbela seke Laajarus á dem mba á edderwa am duniya,

<sup>28</sup> tá anƙwa egdzar mama-aha-aaruwa ilyebe zála, a de fateremfa am vuwa, ganakini a saremká itare keni á sem tate á zladá nanna yá am huđe-aara na.

<sup>29</sup> A ba Ibrahimia á elvan ge nane: Egdzar mama-aha-na wá, anƙwa \*tawraitá á Muusa antara wakita á nabi-aha umele tá ndaater waazu ge emnde am huđe-aara wá, itare keni a cenarcena.

<sup>30</sup> Amá a ba zhel nanna: Una á hyepka eddaaye Ibrahimia. Amá máki a tsete ura am faya ni a de beraterbera wá, tá eptsanteptsá nja-aatare mazla-aara.

<sup>31</sup> A ba Ibrahimia á elvan ge nane: Máki ba tá ceneka elva á tara Muusa antara nabi-aha umele wá, ma a tsetaa ba ura am faya lauktu a de ndaaterndáhá keni, tá de maga ba una nanna.»

## 17

*Elva á vantá ektápaare antara yanaare haypa ge ura  
(Mat. 18:6-7, 21-22; Mark. 9:42)*

<sup>1</sup> A ba Yaisu á elvan ge pukura-aha-aara wá: «Ganakini a magarka emnde haypa dƙideki wá, baaka dabari-aara dƙideki. Amá zladá ge edda una ni á vatertá nane ektápaare ge emnde á dem haypa nanna.

<sup>2</sup> Ambane ba ta nguɗanem nákwá á há hiya am mbiye ge edda-aara, ta puwaterme am haye, arge una ni á vante ektápaare ba ge palle á egdzara keni.

<sup>3</sup> Faufa hyema áte ire á kure! Máki a gaku haypa egdza emmeɗa wá, naba duwa, de ndaandáhá ba shagera. Máki yá dalika á bina wá, naba yanarya.

<sup>4</sup> Ma a gaku haypa ser vuye á ba áte váha palle keni, máki ba kela haypa ni á se slapala wá, ka keni ba ká yanarya.»

*Fetarfire seke ice á pilli á hyephye*

<sup>5</sup> A ba emnde a ðela tá elvan ge Yaakadada: «Shagera ba ká fanjaraarfe ge fetarfire á ñere.»

<sup>6</sup> A ñwaterante ge Yaakadada, a ba ñane á elvan ge itare: «Máki hyephye fetarfire á kure ba seke ice á pilli palle wá, ma kwa banán ba ge mama á nafa na kwaye ñane na: Beteseðete ire á ña, de tsaatse am haye keni, sey á zlála nafa ñanna.»

*Walaadfi-aha wá, ta ba walaadfi-aha*

<sup>7</sup> A ba ñane á elvan ge itare: «Zharauzhára á ba áte slera á walaadfi: Ware am dagave á kure an walaadfi-aara? Máki walaadfi á ña a de maga slera am fe, bi a de piya, má saasa, ká banánba emtu, sawa zuze duksa?»

<sup>8</sup> Ábi ká banánka. Ekka ká baná: Mbadfanaambadfa kazlaña á ña watsewatse, gyigya masane, siyansa. Máki zanuze ya, lauktu ká de zá náza á ña.

<sup>9</sup> Ábi ðaaka ura á slafaná we ge walaadfi adaba fesarfire na a maganaa ñane.

<sup>10</sup> Ba duksa palle ge kure keni. Máki magakurnaamaga názena a fakuraara Dadaamiya wá, diyaweddiye am ire á kure ganakini kwa magaa ba slera á kure, kwa walaadfi-aha.»

*Emnde a derve kelaawa a mbateraa Yaisu átirpalle*

<sup>11</sup> Zlaðe Yaisu a ba átire á mága shula ge dem Urusaliima na. Kina wá, daada átakwe á tara Galili antara \*Samariya.

<sup>12</sup> Ate nakwe á kwara-aha ñanna maa, anjwa ekse, ba Yaisu keni á kátá dem ekse ñanna, ta se ica ba wafke-aara emnde a derve ta kelaawa, amá ta tsaahé ba yiyiye an we á baráma.

<sup>13</sup> Bademmire-aatare ta fu hula á ba an ndzedá ge d'aha Yaisu. A ba itare: «Ambarkaana Yaisu, tasla á ña, zanjervarze.»

<sup>14</sup> Daaci a tsaahé ge Yaisu, a zharateraahe, a ba ñane á elvan ge itare: «Zlauzlála, de marawateránmára ire á kure ge \*liman-aha.» Ba ta eptsa iga, tá anjwa zlála wá, ta naba mbehe bademmire-aatare.

<sup>15</sup> Anjwa palle am dagave-aatare, ba a ðelanu ice ge vuwa-aara, nanna ganakini mbaambe wá, a naba eptsa áseza Yaisu ámbéna á gála Dadaamiya á ba an ka kwara.

<sup>16</sup> A se kezlanaa ugje ge Yaisu, wafke-aara ba teppe áte haha, anjwa á slafaná we an ervaunðe-aara palle. Zhele ñanna wá, ura \*Samariya.

<sup>17</sup> Daaci a ba Yaisu á elvan ge emnde: «Ábi bademmire-aatare ta kelaawa na, mbarembe. Labára kena a sawa ba ñane palle?»

<sup>18</sup> Emnde maselmana na, ba palle-aatare keni dzamarka se slafanaa we ge Dadaamiya, sey be wayve na palle degey?»

<sup>19</sup> Daaci: «Tsettse,» a ba Yaisu á elvan ge ñane, «Ezzlála á da. Mbakaambe fetarfire á ña.»

*Sawa á Dadaamiya an sleksire-aara ge gaterve emnde am kwara-aara (Mat. 24:23-28, 37-41)*

<sup>20</sup> \*Farisa-aha ta ndavanu elva ge Yaisu, a ba itare tá elvan ge ñane: «Watse á sawa vaatara Dadaamiya an sleksire-aara, ge gamive á ba am kwara-aara palle na?» A ñwaterante ge Yaisu, a ba ñane: «Njá am \*kwara á Dadaamiya wá, tá nanka an ice.»



<sup>21</sup> Tá bakanka keni: Náwa tate na wá, á kwaraná ba Dadaamiya, bi: Kwaye tate na keni, á kwaraná ba Dadaamiya. Diyaweddiye ganakini kwárá á Dadaamiya ñanna anƙwa á ba am dagave á kure.»

<sup>22</sup> Daaci a ba ñane á elvan ge pukura-aha-aara: «Anƙwa á sawa sarte na ni watse kwá kumetekuma hare-aha na ya \*Ura á emnde baɗemme yá anƙwa antara kure na, amá ba palle keni watse kwá shánka mazla-aara.

<sup>23</sup> Watse tá bakuránba emnde ganakini degiya samsa kwaye ñane anƙwa áhuwa, bi watse tá bakurá: Náwa ñane anƙwa áhuna. Amá kure cenauka, daumbarka ɗekidɗeki.

<sup>24</sup> Adaba má watse yá sawa ya, iya Ura á emnde baɗemme wá, watse tá niina emnde ba parakke. Ba seke mága á kárá á rade á fantau am dalbe palle ge ekte á samaya, dem dalbe umele keni tá nanna emnde na wá, sawa-aaruwa keni watse ba estuwa.

<sup>25</sup> Amá wá, sey yá shushu zlaɗa ba kwakya emtsaade, tá de yiyaaya emnde a zamáne na.

<sup>26</sup> Ba názena ni ndza ta maganaa emnde am zamane á \*Nuhu na wá, am sarte na watse yá eptseya iya Ura á emnde baɗemme keni, watse emnde tá maga ba una ñanna.

<sup>27</sup> Am zamane á Nuhu wá, slera á emnde ndza ba shunɗula náza za, náza sha, ga larusa, vaterte gyaale-aha-aatare ge zála. A demaa estuwa Nuhu am paare á yawe, a tsekwa ge yawe á keɗa duniya, a keɗateraahɗe baɗemme.

<sup>28</sup> Am zamane á \*Ludu keni ndza a magava ba estuwa. Emnde tá shunɗula ba náza zá, antara náza sha, tá shakwa kazlaɗa, emnde umele tá evvala, tá herɗa duksa á dem bere, tá ndera bere-aha baɗemme.

<sup>29</sup> Amá vacite na ni sassa Ludu am \*Saudauma wá, Dadaamiya a naba hyateraahɗe kárá an wesha an \*baraudau á sawa am samaya, a keɗateraahɗe baɗemme.

<sup>30</sup> Má watse herzhe yá eptsa ya iya Ura á emnde baɗemme keni, watse emnde tá maga ba una ñanna.

<sup>31</sup> «Vacite ñanna wá, edda una ma a beranaa áte ire á bere keni, a tsunƙa á dem huɗe-aara ge hálá kazlaɗa-aara. Ba duksa palle ge edda una a beranaa am fe, ñane keni a eptseka á sem mba.

<sup>32</sup> Diyaweddiye á ba áte mukse á \*Ludu.

<sup>33</sup> Edda una a tataya ñezla shifa-aara, watse á keɗanaakeɗa. Edda una tatayaaka ñezla shifa-aara, ñane á shansha shifa-aara.

<sup>34</sup> Yá ndaakur ba jirire, am hare ñanna wá, watse emnde buwa tá zlava áte egdera palle, palle watse yá eksanteksa, yá de yá palle.

<sup>35</sup> Nwásha buwa tá há hiya átirpalle, yá de eksa palle, yá yá palle. ((

<sup>36</sup> Watse yá bera emnde buwa am fe, yá de eksa palle, yá ya palle.))

<sup>37</sup> Daaci ta naba ndavanuhe ge pukura-aha-aara, a ba itare tá elvan ge ñane: «Watse á magava áme una ñanna Yaakadada?» A ñwaterante, a ba ñane: «A ba am tate na ni anƙwa lipa, zaatate-aha tá jaháva á ba ádehuwa.»

## 18

### *Naraje an mukse wegyege tá an narkali*

<sup>1</sup> Am iga a una ñanna maa, Yaisu a bateraa naraje na, ge batera a magarmaga maduwa ba kelaazare, a yaranka ɗekidɗeki.

<sup>2</sup> A ba ñane á elvan ge itare: «Anƙwa narkali am ekse umele, baaka ura á kuaná ñane ɗekidɗeki, ba Dadaamiya keni ñane á kuveka ɗekidɗeki.

<sup>3</sup> Ay anƙwa zlaɓe mukse wegyege á ba am ekse ɲanna, ba ke-laazare áseza narkali na, á se bana: Náwa dagalanɲerevdagale an ura, maranánmárá jirire-aaruwa ge sledagala-aaruwa.

<sup>4</sup> Am zunɲwire wá, narkali na eksarka emtsaade elva á mukse na ɗekideki. Amá de shekwaashekwa á yanka mukse na wá, a ba ɲane am ervaunɗe-aara: Baaka ura yá kuaná ya ɗekideki, ba Dadaamiya keni yá kuveka ya ice-aara,

<sup>5</sup> amá mukse na wá, ambane yá maranánmárá jirire-aara ge sledágala-aara ɲanna, adaba á se weshita ire kwakya.»

<sup>6</sup> A eksetaa elva-aara zlaɓe ádaliye Yaakadada, a ba ɲane á elvan ge itare: «Mándzawe narkali na, kwá cenanceneka názu a ndaana ɲane?

<sup>7</sup> Daaci Dadaamiya wá, emnde na ni a dzertertaa ɲane, vayi vacika tá ázeɲará na wá, ɲane á shekwaaka ɗekideki ge marse jirire-aatare.

<sup>8</sup> Yá ndaakur ba jirire: Á marse jirire-aatare ba watsewatse. Amá má watse yá sawa ya, iya \*Ura á emnde baɗemme, watse ba yá se bera emnde na tá an fetarfire am duniya na?»

### *Naraje an slejaha hadáma, antara ura Farisa*

<sup>9</sup> Daaci Yaisu a bateraa naraje na zlaɓe ádaliye, á ndaaná áte emnde na tá zhara ire-aatare ta emnde a jirire ba itare, tá epsawa emnde umele na.

<sup>10</sup> A ba ɲane á elvan ge itare: «Zála buwa ta de maga maduwa am \*mashidi yaikke. Palle ura \*Farisa, palle na slejaha hadáma.

<sup>11</sup> A tsetehe ge ura Farisa, a tsaahé, a magaa maduwa am ervaunɗe-aara, a ba ɲane: Yaakadada Dadaamiya-aaruwa, ya slafaká we-aaruwa kwakya, adaba ɲa gergere antara emnde umele. Adaba itare ta neyle-aha, ta mándzawe-aha, ta emnde a mága gwardzire. Ususe kwakya adaba ɲa gergere an slejaha hadáma na náwa ɲane na.

<sup>12</sup> Iya, ba kelaa maka yá eksa ndera ser buwa, yá anƙwa á sakanse luser am názena yá shaná ya baɗemme.

<sup>13</sup> Slejaha hadáma na keni, a tsaahé yiyiye an ɲane, amá ɲane wá, ba ketaa ire-aara ge zhara samaya keni magaaka ɲane. Daaci a puwanu erva ge ervaunɗe, a magaa maduwa-aara, a ba ɲane: Yaakadada Dadaamiya-aaruwa, tasle á ɲa zivarze, iya ya slehaypa.»

<sup>14</sup> Daaci a ba Yaisu á elvan ge itare: «Yá ndaakur ba jirire: Tá dá wá, a shanaa ba zhel ɲanna mele an Dadaamiya arge ura Farisa na. Adaba ma ware una a kantaa ba ɲane ire-aara na, sey tá de gánaaga. Amá edda una ni a gaa ire-aara wá, tá de kananteka.»

### *Yaisu á gaterar barka ge egdzara*

*(Mat. 19:13-15; Mark. 10:13-16)*

<sup>15</sup> Duwa á emnde, ta sanaa egdzara ge Yaisu antara ba egdzara mesheshe keni, geni á puwaterar \*erva a barka, amá naráterna pukura-aha emnde a saa egdzara ɲanna wá, ta naba valaterarhe.

<sup>16</sup> Amá a ba Yaisu á elvan ge itare: «Piyawaterteka, yawaterya a sarsawa egdzara ásezerwa, adaba \*kwára á Dadaamiya náza á emnde na má garevge ba seke itare.

<sup>17</sup> Yá ndaakur ba jirire: Ma ware edda-aara keni máki lyevaaka dem kwára á Dadaamiya ba seke náza á egdzere wá, á taa demka ɗekideki.»

### *Sleberba a se ndava sera á shifa áza Yaisu*

*(Mat. 19:16-30; Mark. 10:17-31)*

<sup>18</sup> A tsetehe ge palle á male-aha á Yahudiya-aha, a de ndavanu ge Yaisu, a ba ɲane á elvan ge ɲane: «Malum, diyandiya ganakini ka ura mággwe.

Naba ndindaha, yá maga tara uwe antara uwe, lauktu yá shá shifa na á zleka na?»

<sup>19</sup> A nwanante ge Yaisu, a ba nane á elvan ge nane: «Labára ká dahiya an ura mággwe? Baaka ura mággwe máki Dadaamiya-ka palle.

<sup>20</sup> Ábi diyakdiya shairiya-aha á Dadaamiya na a ba nane: Maṅka gwardzire, jeka shifa, ileka, maṅka seydire á fida áte ura, dematervedeme tara eddeṅa an emmeṅa.»

<sup>21</sup> A nwanante ge zhel ṅanna, a ba nane á elvan ge Yaisu: «Una ṅanna ṅannaṅa baḍemme daga am egdzarire-aaruwa.»

<sup>22</sup> A ba Yaisu á elvan ge nane: «Una wá, a yakar ba duksa palle: De valuvale názu am rezege á ṅa baḍemme, tegatertega shunḅu-aara ge taláge-aha, ekka watse ká shánsha laḍa-aara am samaya. Daaci sawa ḍabidḍaba.»

<sup>23</sup> Ba a cenaa una ṅanna zhel ṅanna wá, a fantau ge dzama ire an tsaka ire, aḍaba nalmane-aara kwakya jipu.

<sup>24</sup> Nanna Yaisu ganakini am dzámá ire zhel na, a ba nane á elvan ge emnde: «Zlazlaḍa jipu ganakini tá demda emnde a berba á dem \*kwára á Dadaamiya.

<sup>25</sup> Náwa zlazlaḍa ganakini á dedde názlegwame am biye á lipere, amá zlazlaḍa ba náza á sleberba zlaḅe ádaliye ge dem kwára á Dadaamiya.»

<sup>26</sup> A ba emnde na ta cenanaa an hyema-aatare elva ṅanna: «Máki ba estuwa wá, baaka ura á ṅezlesenḅle ḍekideki.»

<sup>27</sup> A ba Yaisu á elvan ge itare: «Názu á taa gevka ḍekideki áza emnde na wá, áza Dadaamiya ba keski.»

<sup>28</sup> Daaci a ba Piyer á elvan ge nane: «Amá ṅere wá, yaṅeranya duksa baḍemme, ganakini ṅá ḍaba ba ka palle.»

<sup>29</sup> A ba Yaisu á elvan ge itare baḍemme: «Yá ndaakur ba jirire: Ma ware una a yaa há-aara, bi mukse-aara, bi egdzar mama-aha-ṅara, bi tara eddeṅara an emmeṅara, bi a yaa egdzara-aara, aḍaba \*kwára á Dadaamiya wá,

<sup>30</sup> kina keni á shansha baḍemme á jauje ba ge una ṅanna, á katafke keni á de sha shifa na á zleka na.»

*Yaisu aṅkwa á sanse ge keyire elva a emtsa-aara antara tsetse-aara am faya*

*(Mat. 20:17-19; Mark. 10:32-34)*

<sup>31</sup> Daaci Yaisu a ḍante pukura-aha-aara kelaawa ju buwa, a ba nane á elvan ge itare: «Duwa á miya á dem Urusaliima kina na wá, názena ta puwetaa nabi-aha áte iya \*Ura á emnde baḍemme na baḍemme á de gevge.

<sup>32</sup> Aḍaba tá de eksivaksa, tá de vite ge emnde na baaka nadina-aatare, tá de epsawisa itare, tá de zlazlisezlazle, tá de kyefiyem nyaihe am ice,

<sup>33</sup> tá de ziyuze an ja. Am iga a una ṅanna maa, tá de zliyaazle shifa-aaruwa ba ḍekideki. Amá am hare ge keyire wá, watse yá tsetse am fáya.»

<sup>34</sup> Amá palle a názu ta cenanaa pukura-aha na am elva ṅanna baaka ḍekideki. Ázetare wá, maana á elva ṅanna seska ḍekideki, cenaranka elva na a ndaateraa Yaisu na.

*Ura wulfe shansha ice áza Yaisu*

*(Mat. 20:29-34; Mark. 10:46-52)*

<sup>35</sup> Yaisu herzhanteherzhe Yairikau maa, aṅkwa ura wulfe umele á njá áte we á baráma, aṅkwa á ṅala.

<sup>36</sup> Daaci wulfe na á cena ba tá anƙwa á degashe emnde. A naba enndáva: «A jaara uwe?» a ba ɲane.

<sup>37</sup> A ba emnde: «Una anƙwa á degashe Yaisu ura Nasarátu.»

<sup>38</sup> A naba kante kwára ge ɲane: «Yaisu \*Egdza á Dawuda, tasle á ɲa zivarze.»

<sup>39</sup> Ta naba valarhe ge emnde a katafke ganakini a dufe, amá ɲane a far ká kwára á ba a dem zhegela: «\*Egdza á Dawuda! Tasle á ɲa zivarze.»

<sup>40</sup> Daaci a tsaahé ge Yaisu, a ba ɲane: «Sawansa ásehuna.» Daada wulfe ɲanna á katafke á Yaisu, a ndavanu ge Yaisu, a ba ɲane:

<sup>41</sup> «Ká kátá yá magaká estara kina?» A ɲwanante ge wulfe na, a ba ɲane: «Yá kátá ba ice malum-aaruwa.»

<sup>42</sup> A ba Yaisu: «A wertewera ice á ɲa, mbakaambe fetarfire á ɲa.»

<sup>43</sup> Ba seke ndaha á miya na a naba werte ge ice-aara, a dába Yaisu, ámbera á gala Dadaamiya. Baɗemme á emnde na ta naaná an ice-aatare, itare keni ta fantau ge gálá Dadaamiya.

## 19

### *Tara Yaisu antara Jakayus*

<sup>1</sup> Daaci damda Yaisu am huɗe á Yairikau maa, a degáshe am huɗe á ekse praatte.

<sup>2</sup> Am ekse ɲanna maa, anƙwa ura zhera-aara Jakayus, ɲane male á shunƙu á hadáma, sleberba jipu.

<sup>3</sup> A ekkata jipu ganakini á puwetepuwa ice-aara áte Yaisu, ware ɲane Yaisu ɲanna. Amá dzegwanká adaba ɲane paihyhye vayvaya am emnde.

<sup>4</sup> Daaci ba zhagade-aara á de katafke, a de daleme am mama á zlemnda, geni watse á nanna má á degashe. Adaba anƙwa á daba ba tate ɲanna Yaisu.

<sup>5</sup> Ba damda Yaisu am tate ɲanna maa, a naba kante ice á dem nafa na, a ba ɲane á elvan ge Jakayus: «Tsekwesetsekwe watsewatse Jakayus. Vatena na wá, sey yá de háre á ba am mba á ɲa.»

<sup>6</sup> A tsekwe ge Jakayus ba watsewatse, a se lyevaa Yaisu á ba an higa, ge daná á dem mba-aara.

<sup>7</sup> Baɗemme á emnde na tá anƙwa á zharaterzhára na, anƙwa á waterwa am ervaunɗe. Ta bantsa itare: «Ezzhárá ka, á de hare am mba á slehaypa.»

<sup>8</sup> Amá a tsaahé ge Jakayus, a ba ɲane á elvan ge Yaakadada: «Yaakadada-aaruwa, sey yá tegartertega kyalma á nalmane-aaruwa ge talage-aha. Máki anƙwa edda una ndza ya lyevaa duksa-aara ba dey wá, yá de eptsannaapetsa huɗe ufaɗe.»

<sup>9</sup> A ba Yaisu á elvan ge ɲane: «Vatena wá, huɗe á há á ɲa shánsha shifa, ka keni ka ba eggyenara ge Ibrahimia.

<sup>10</sup> Adaba sawa-aaruwa ge iya ya \*Ura á emnde baɗemme wá, ya se tataya ba edda una an keɗa na, geni yá lyelye edda-aara.»

### *Naraje an gursa ge tsakala an ɲane*

*(Mat. 25:14-30)*

<sup>11</sup> Ge emnde na ta zluwa á cena elva ɲanna, Yaisu a bateraa naraje na zlaɓe ádaliye. Adaba herzharentherzhe Urusaliima ba ɲga, njarantenja emnde ganakini herzhe segashe-aatare mazla-aara am erva á emnde, Dadaamiya á de faterá slekse yaikke tá njá am kwara-aara.

<sup>12</sup> Daaci a ba ɲane am naraje-aara: «Anƙwa egdza á ura male a naba tsete, a zlala á dem larde yiyiye, a de tatayanvaa sleksire ge ire-aara, á de eptsá ádaliye.

<sup>13</sup> Lauktu á zlala maa, a dante emnde a slera-aara kelaawa, a vaterte gursa kelaawa: Tsakalautsákala an nane, a ba nane á elvan ge itare, dem sarte na má sanaasa ya.

<sup>14</sup> Amá emnde a jeba-aara wayarka an nane. Zlazlala nane wá, ta naba belante emnde, a ba itare: Wayanjerka nere, á se kwaránerá zhel na.

<sup>15</sup> «Amá de shánsha sleksire nanna, mazla-aara a naba saahe á sem larde-aara. Am sarte na saasa maa, a belaa we, ta danante emnde a slera-aara na ndza a vaterte gursa kelaawa ge mbedarva an nane na, geni á zhara riba á ma ware-aatare keni.

<sup>16</sup> A semhe ge slezunjwire-aatare, a ba nane: Náwa názena ya shanaa an nalmane na ndza ka vitaa ka zanwe, ya shante riba huđe kelaawa.

<sup>17</sup> A ba slekse yaikke a elvan ge nane: Shagera jipu, ka sleslera á jirire. Adaba dzayyire á huđe á na am duksa cekwa, yá gakvege male arge berni kelaawa.

<sup>18</sup> A semhe ge buwire-aatare, a ba nane: Náwa názena ya shanaa an nalmane na ndza ka vitaa ka zanwe, ya shante riba huđe ilyebe.

<sup>19</sup> A ba slekse yaikke á elvan ge nane keni: Ekka, yá gakvege male arge berni ilyebe.

<sup>20</sup> «A de semhe ge umele wá, a ba nane: Náwa názena ndza ka vitaa ka zanwe, ndza ya fademe am bagwadza, ya shebanve.

<sup>21</sup> Jiija lyawa, adaba diyandiya am ire-aaruwa ganakini ka mandzawe; ma fanjka ba duksa á na keni, ká shánsha; janjka ba wulfe á duksa á na keni, ká hala ba duksa á juwa á ba áte ka.

<sup>22</sup> A ba slekse á elvan ge nane: Ba elva á na na keni hyaahya, nakaana shairiya. Mbate ka ngudi, ka sleslereka. Diyakdiya ganakini ya mándzawe á ba ka? Ma faneka ba duksa-aaruwa keni yá shánsha; janeka ba wulfe á duksa-aaruwa keni yá hala ba duksa á juwa á ba áte ya, á ba ka?

<sup>23</sup> Máki ba estuwa wá, labára de puwanjka nalmane-aaruwa am ban, ma yá se lyiyaná an riba?

<sup>24</sup> «Daaci a ba nane á elvan ge emnde na tá á tsaatse ázenara na: Lyauvaalya shungu na ázenara na, fawanarfe ge edda una a shante riba huđe kelaawa na.

<sup>25</sup> A ba itare tá elvan ge nane: Yaakadada, degi ázenara keni anjka deme gursa nanna?

<sup>26</sup> A nwaterante a ba nane á elvan ge itare: Yá ndaakur ba jirire: Tá fanaare ba ge edda una anjka ázenara na. Amá edda una shanteka dekideki wá, ba una cekwa am erva-aara na keni, tá de lyanvulye.

<sup>27</sup> Kelaade-aha-aaruwa na wayarka yá gev slekse arge itare na keni maa, sawatersa ba watsewatse, datsawatertedatsa á ba á katafke-aaruwa.»

*Yaisu á dem huđe á Urusaliima*  
(Mat. 21:1-11; Mark. 11:1-11; Yuh. 12:12-19)

<sup>28</sup> Zluzle á tsaka elva nanna Yaisu maa, ba zlala-aara zunjwe ákatafke á emnde ge dem Urusaliima.

<sup>29</sup> Herzhantehertzhe Baytifaji antara Baytaniya, daraada áte vuwa á wa na tá dháná an Wa Anyaranyara na wá, a belaa emnde buwa am pukura-aha-aara, a ba nane á elvan ge itare:

<sup>30</sup> «Dawmbare á dem ekse na kwaye nane á katafke na wá, watse kwá de bera egdza á ezzenwa an ngudá, ba ser palle keni zlađe njateka ura átekwa wá, naba pelawaapele sawansa.

<sup>31</sup> Máki ura a bakuraa: Kwá pelaná á deme? bawanánba ge edda-aara: Á kataná Yaakadada.»



<sup>32</sup> Daaci ba zlala-aatare ge emnde a bela na, bademme ta de berán ba seke una a baternaa Yaisu na.

<sup>33</sup> Am sarte na tá anƙwa pela ezzenwa na wá, a ba dada-aha-aara: «Kwá pelaná á deme?» a ba itare, tá elvan ge itare.

<sup>34</sup> Ta nwaterante, a ba itare: «Á kataná Yaakadada.»

<sup>35</sup> Mazla-aara ta naba saa ezzenwa na áseza Yaisu, ta se ndakaa zane-aha-aatare áte iga á ezzenwa nanna, lauktu ta njetaa Yaisu átekwa.

<sup>36</sup> Fantaufa Yaisu ge zlala maa, emnde umele ta pelanse zane-aha-aatare áte baráma, a zlalá nane átekwa.

<sup>37</sup> Am sarte na herzhanteherzhe Urusaliima maa, tá áte baráma a tsekwa á sawa áte Wa Anyaranyara na wá, higartehiga pukura-aha jipu, ta fantau ge gálá Dadaamiya á ba an ká kwará, tá galaná adaba najipu-aha na ta naana itare bademme na.

<sup>38</sup> Ta bantsa itare: «A ganga Dadaamiya barka ge slekse yaikke na kwaya nane á sawa am zhera á Yaakadada na. Ma ba hairire wá, anƙwa am samaya; yaikkire wá, á zlayán ba ge Dadaamiya palle.»

<sup>39</sup> Tá anƙwa \*Farisa-aha umele am dikele á emnde nanna maa, a ba itare tá elvan ge Yaisu: «Malum! Bateránba ge pukura-aha á na a darude.»

<sup>40</sup> A nwaterante ge Yaisu, a ba nane á elvan ge itare: «Ma ta duwa ba itare keni, nakwá-aha na tá fantaufa á ba an ka kwara, una yá ndaakur ba jirire.»

### *Yaisu á kyuwa Urusaliima*

<sup>41</sup> Yaisu herzhanteherzhe berni ba nga maa, ba a puwete ice-aara áte berni wá, a fantau ge kyuwa berni na,

<sup>42</sup> a ba nane: «Ekka keni ma ká diyeddiye seke ba názena ni ma andze á vakte hairire vacite nanna! Amá am kinire na wá, an shebe atuge ice á na, ká taa diseka mazla-aara.

<sup>43</sup> Amá diyeddiye ganakini anƙwa á sawa hare-aha umele, watse tá jaktaaveje kelaade-aha á na á de jauje ge ndzedá á na, ká de gevge an beca jipu.

<sup>44</sup> Watse tá keƙakurkeƙa ba ƙeƙiƙeƙi antara emnde á na. Ka berni, amá watse ba nákwá palle keni tá de nánka áte ukfeɲara nákwá, bademme watse tá ngerƙakɲgerƙa, adaba diyakseka sarte na ni a sawa Dadaamiya a se melakumele.»

### *Slera á Yaisu am \*mashidi yaikke*

*(Mat. 21:12-17; Mark. 11:15-19; Yuh. 2:13-22)*

<sup>45</sup> Duwa á Yaisu á dem \*mashidi yaikke, a de fantau ba ngya emnde a tsakala á segashe,

<sup>46</sup> a ba nane á elvan ge itare: «Anƙwa an puwa am wakita á Dadaamiya, a ba Dadaamiya: Bere-aaruwa wá, ba bere á mága maduwa, amá kure kwa ganve hwalakwa á nabera-aha.»

<sup>47</sup> Daaci Yaisu a fantau ge kwaraterse elva á Dadaamiya ge emnde am huƙe-aara ba kelaazare. Male-aha á \*liman-aha antara malum-aha á \*tawrait, ira male-aha á ekse ta tátaya ja shifa á Yaisu,

<sup>48</sup> amá baaka dabari-aatare ge ekseksa-aara, adaba bademme á emnde tá cena ba názena anƙwa á kwaratersá nane na an enƙale-aatare bademme.

## 20

### *A vantaa ware hákuma ge Yaisu?*

*(Mat. 21:23-27; Mark. 11:27-33)*

<sup>1</sup> Vacite umele, Yaisu anƙwa á kwaraterse elva á Dadaamiya ge emnde am \*mashidi yaikke, anƙwa á balaterá antara labare á higa maa, ta naba duhe ge male-aha á \*liman-aha antara malum-aha á \*tawraita, ira male-aha á ekse ádezenara.

<sup>2</sup> A ba male-aha ɲanna tá elvan ge ɲane: «Banjeránba tate na ni ka shaa hákuma á mága duksa-aha na átekwa. Emtu a vaktaa ware baráma-aara?»

<sup>3</sup> A ɲwaterante ge Yaisu, a ba ɲane a elvan ge itare: «Iya keni, yá ndavakurundave duksa palle, vawiteva jawapa.»

<sup>4</sup> Daaci a ba ɲane á elvan ge itare: «A belanaa ware Yuhanna ge magatera baptisma ge emnde? Dadaamiya emtu, emndimagwaha he?»

<sup>5</sup> Ta fantau ge ndaha elva ɲanna am dagave-aatare emtsaáde, a ba itare: «Má mi banaa a belanaa Dadaamiya, watse á bamiyá labára fakurtaareka an ɲane.

<sup>6</sup> Máki mi baa ta belanaa ba emndimagwaha, baɗemme á emnde tá de yámika an nákwá, tá de ceɓamiceba, aɗaba emnde baɗemme fartarfe ganakini Yuhanna nabi á Dadaamiya.»

<sup>7</sup> Daaci ta ɲwanante ge Yaisu, a ba itare: «Ma a belanaa ware keni diyajerka ɲere.»

<sup>8</sup> A ba Yaisu: «Iya keni yá ndaakurka náza-aaruwa, ma ya shaa hákuma á mága duksa-aaruwa áza ware keni.»

*Naraje an emnde a mándzawe ta yateraa fe am erva  
(Mat. 21:33-46; Mark. 12:1-12)*

<sup>9</sup> Am iga a una ɲanna maa, Yaisu a fantau ge ndaater elva an naraje na ge zlamaakelaawa, a ba ɲane: «Anƙwa ura a dzeɓaa nafa á inabauhi am fe-aara, a yateraa fe ɲanna am erva ge emnde a slera, ɲane a naba zlala á da shula, á de shekwaashekwa áhuwa jipu.

<sup>10</sup> Samsa sarte á tsáká inabauhi maa, a naba bela sleslera-aara á deza emnde na a yateraa fe am erva na, geni a lyanvaalya dza á inabauhi-aara. Amá emnde na a yateraa fe am erva ɲanna ta hyanhe an ja ge slebela-aara ɲanna, ta belanaahe an erva-aara dey.

<sup>11</sup> Edda á fe na a naba bela sleslera-aara umele, ɲane keni ta de zlazlese, ta hyanhe an ja, ta belanaahe an erva-aara ilyeɓe.

<sup>12</sup> A naba bela umele zlaɓe ádaliye ge keyire. ɲane deme ta gyegese, vuwa-aara baɗemme ba wige, ta tedese á degashe.

<sup>13</sup> Daaci, a ba edda á fe ɲanna: Yá maganá estara kena? A ba ɲane: Kina wá, yá ba egdza-aaruwa. Egdza-aaruwa wayanwáya jipu na wá, ámbane tá de fa zherwe áte ɲane.

<sup>14</sup> Amá ba ta puwete ice-aatare áte ɲane emnde a mága slera am fe na wá, a ba itare am dagave-aatare: Yawwaa, kwaye samsa edda una watse á záná ɲane waráta á fe á miya na. Eksaumivaksa, jaumija shifa-aara, daaci fe ɲanna á de gev ba náza á miya.

<sup>15</sup> Daaci ta naba eksevaahé, ta danse ádegashe, ta de jehe shifa-aara.»  
A ndavateruhe ge Yaisu, a ba ɲane á elvan ge itare: «Má samsa edda á fe na mu, watse á magaterá uwe ge emnde a mága slera am fe na?»

<sup>16</sup> Ay degiya, má watse samsa edda á fe ɲanna wá, á se kedanaakeda shifa a emnde a mága slera am fe ɲanna baɗemme, á yaterá fe am erva ba ge emnde umele.» A ba emnde baɗemme: «A janaaja Dadaamiya una ɲanna!»

<sup>17</sup> A zharateraahe emtsaáde ge Yaisu, a ba ɲane á elvan ge itare: «Anƙwa an puwa am wakita á Dadaamiya, a ba ɲane:

Ba nákwá ñanna ta eblyanvaa emnde a nyáña bere na una, a eksantehe ge Dadaamiya, a ganve nákwá na á ñáná ñane ndzedá á bere ñanna bademme.

Una ñanna mu, á kata ba uwe kena, a ba kure?

<sup>18</sup> «Edda una má a mbedfaa áte nákwá ñanna, sey á kezlevkezle edda-aara am tate umele. Sakwa edda una má a eblyara ñanna ge ñane, sey á hánaahe edda-aara ba ñgerdekdeke.»

<sup>19</sup> Malum-aha á \*tawraitá antara male-aha á \*Farisa-aha ta naba diyeddiye ganakini Yaisu a ndaha naraje ñanna á ba áte itare. Daaci ta kátá eksa Yaisu á ba am sarte ñanna, amá ta kuva ba zlamaakelaawa.

*Elva a hadáma ge male á larde á Rauma*

(Mat. 22:15-22; Mark. 12:13-17)

<sup>20</sup> Mazla-aara maa, ta fantau ge tsagwadá Yaisu á ba am sarte ñanna, ta belanvaa emnde-aatare; emnde ñanna ta ganve ire-aatare ba seke ta emnde a jirire, daaci ta danaa ndáva ge Yaisu, ágire tá tsagwadá elva a mandzawe am mbuwe-aara, lauktu ma tá eksaná átekwa, ma tá dateránda ge emnde a ñgumna.

<sup>21</sup> Daaci ta ndavanuhe, a ba itare tá elvan ge ñane: «Malum, diyañerdiya ganakini ekka wá, bademme á názena ká ndaaná ka, antara názena ká kwaratersá ka ge emnde bademme ba jirire. Má ká kwaraterse duksa ge emnde, diyañerdiya ganakini ká ndaha ba tsekkire-aara ge elva, an namaari á Dadaamiya.

<sup>22</sup> Ndaañernda ba jirire, am \*tawraitá á miya mu, anjkwá emtu baráma á puwaná hadáma ge male á larde á Rauma, baaka he?»

<sup>23</sup> Amá kerten diyeddiye Yaisu yaimyaimire na tá anjkwá á maganá itare bademme, a ba ñane, a elvan ge itare:

<sup>24</sup> «Marawiyánmárá emtsaadé suley palle yá nanaana.» Ta maranánhe. A ba ñane á elvan ge itare: «Nderáva á ware una áte shungu na? Ira zhera na mu zhera á ware?» Ta ñwanante, a ba itare: «Náza á male á larde á Rauma.»

<sup>25</sup> A ba Yaisu á elvan ge itare: «Máki estuwa wá, puwawanpuwa ge male á larde názu zlaya-aara, ge Dadaamiya keni názu zlaya-aara.»

<sup>26</sup> Ta ettságwadá á katafke á emnde bademme, amá baaka sharanka názu tá eksaná átekwa, ta yaa á maga ba najipu á jawapa na a vatertaa ñane, daaci ta dú ba we-aatare.

*Ndava áza Yaisu áte tse á emnde am faya*

(Mat. 22:23-33; Mark. 12:18-27)

<sup>27</sup> Ta naba semhe ge \*Saduki-aha umele áseza Yaisu. Ba itare emnde na ta bantsa itare, baaka tse á emnde am faya dekideki na. Ta se ndavanu elva ge Yaisu, a ba itare:

<sup>28</sup> «Malum, anjkwá a puwamitaa Muusa, a ba ñane: Máki kedáakedá zhele yanka egdzere wá, a melesemele egdza emmenjara mukse-aara, geni á yana egdzara ge egdza emmenjara na kedáakedá na.

<sup>29</sup> Iyau, ndza tá anjkwá dawalaa vuye ta egdzar mama, duwa á makaji-aatare, a gaa gyaale, amá a naba kedéhe, a yaa mukse na, baaka egdzere.

<sup>30</sup> A melese ge sledába-aara, ñane keni a emtsehe, a yaa mukse na baaka egdzere. Keyire-aatare keni ba estuwa.

<sup>31</sup> Itare vuye na bademme ta gaa ba mukse ñanna, amá bademme zlaruzle, yaránka egdzere ba palle keni.

<sup>32</sup> Am iga-aatare bademme, a emtsehe ge mukse ñanna keni.

<sup>33</sup> Vaci tse á emnde am faya mu, watse átuge ware palle mukse na? Adaba itare ta vuye na ndza mukse-aatare ba nane palle!»

<sup>34</sup> A nwaterante ge Yaisu, a ba nane á elvan ge itare: «Am duniya na wá, zála antara nwasherá tá ankwá á gaava am dagave-aatare.

<sup>35</sup> Amá am duniya na watse á sawa á katafke na wá, ma zála, ma nwasherá keni, emnde na ni hyairephye ge tsete am faya, se njá am hude-aara wá, watse baaka elva á nika mazla-aara.

<sup>36</sup> Adaba watse baaka emtsa mazla-aara, tá de gev ba seke malika-aha á Dadaamiya. Itare ta ba egdzara á Dadaamiya, adaba ta tsete am faya.

<sup>37</sup> Muusa wá, ndaasende ba parakke ganakini watse tá tsete emnde a faya an shifa. Ankwá an puwa am wakita á Dadaamiya, am tate na á ndaaná áte dake na, a ba nane áte eggye-aha á kure werre: Yaakadada, Dadaamiya á Ibrahimá, Dadaamiya á Isiyaaku, Dadaamiya á Yakuba.

<sup>38</sup> Daaci máki estuwa wá, tá á ba an shifa-aatare emndu werre. Adaba Dadaamiya wá, nane Dadaamiya á emnde na tá an shifa, Dadaamiya á emnde na ni tá an emtseka. Bademme á emnde a shifa tá an shifa ba ge nane.»

<sup>39</sup> A ba emnde umele am malum-aha á \*tawraitá: «Elva á na na ka ndaase ba tsekke malum.»

<sup>40</sup> Gazlaregazla mazla-aara, baaka ura a ndavanu elva am iga a una nanna.

*\*Almasiihu á tsaaka an wulfe á \*Dawuda  
(Mat. 22:41-46; Mark. 12:35-37)*

<sup>41</sup> Yaisu a ndavateru elva ge itare, a ba nane: «Estara nane ta bantsa emnde ni \*Almasiihu wulfe á \*Dawuda na?

<sup>42</sup> Dawuda an ire-aara keni a dahaná an Yaakadada, ankwá am Jabura, a ba nane:

A ba Yaakadada á elvan ge Yaakadada-aaruwa: Njinja am nadafa-aaruwa,

<sup>43</sup> dem sarte na má ganatervege kelaade-aha á na tate á puwa sera á na.

<sup>44</sup> Ha! Dawuda an ire-aara a dahaná an Yaakadada \*Almasiihu. Áy á sawa estara kena ni á gev wulfe-aara na?»

*Yaisu ankwá á gíyá pukura-aha geni a farfa hyema áte ire-aatare áza malum-aha á \*tawraitá  
(Mat. 23:1-36; Mark. 12:38-40)*

<sup>45</sup> A ba Yaisu á elvan ge pukura-aha-aara á dem hyema á emnde bademme:

<sup>46</sup> «Faufa hyema am ire á kure áza malum-aha á \*tawraitá. Adaba itare ta emnde a wáyá marava am záne sadafde, tá kata emnde ta gater use an ga ire am dagave á zlamaha. Am mashidi keni maa, tá kátá ba slede na átire ge náza a emnde bademme na. Ma am munri keni itare sey tá de kátá ba slede na ni an dárádza jipu na.

<sup>47</sup> Emnde a zá nwasherá wegyege áte há keni ba itare. Daaci tá sadanve maduwa-aatare ákatafke á emnde wá, geni ta emnde a jirire ágire. Itare zlada-aatare á de jauje ge náza á emnde bademme vaci shairiya.»

## 21

*Sadake á nasherire na a fanaa wegyege a mukse  
(Mark. 12:41-44)*

<sup>1</sup> A kante ice-aara Yaisu, á zhárá emnde a berba tá puwa sadake á nashirire á dem nakwati á jáhá sadake am \*mashidi yaikke.

<sup>2</sup> A naa wegyege a mukse umele ɲane baaka duksa-aara, a puwum kwaɓa buwa ɲane keni.

<sup>3</sup> Daaci a ba Yaisu: «Yá ndaakur ba jirire: Wegyege a mukse na kwaya ɲane, taláge ba jipu na wá, ɲane a puwum náza-aara jateruje ge emnde baɗemme.

<sup>4</sup> Aɗaba uwe, itare wá, aɲkwa nalmane-aatare, ta saa ba cekwa-aara ge mága sadake an ɲane. Amá mukse na wá, ɲane talage. Baaka tsa umele, amá a naba se puwumhe názu am erva-aara baɗemme.»

*Yaisu á ndáhá elva a mbeɗa \*mashidi yaikke*

*(Mat. 24:1-2; Mark. 13:1-2)*

<sup>5</sup> Emnde umele tá aɲkwa á ndaha elva á \*mashidi yaikke am dagave-aatare, geni mashidi ɲanna wá, an ndera. Nákwá-aha-aara, antara kazlaɲa na ta sanaa sadake-aara ge Dadaamiya, ta caɗaa mashidi ɲanna an ɲane na, zariya jipu. Amá a ba Yaisu á elvan ge itare:

<sup>6</sup> «Aɲkwa á sawa sarte na ni watse ba nákwá palle keni á jauka áte ukfejara nákwá, watse baɗemme á mbeɗa á dem áhá kwá ezzhara na.»

*Zlaɗa-aha na watse á magava lauktu á zla duniya*

*(Mat. 24:3-14; Mark. 13:3-13)*

<sup>7</sup> Ta naba ndavanuhe, a ba itare: «Watse á magava am sarte-ara una ɲanna? Watse ɲá dise áte uwe ganakini herzhe á magava duksa ɲanna?»

<sup>8</sup> A ba Yaisu: «Faufa kure ba hyema a se keɗarakuraaka emnde umele. Aɗaba watse kwakya emnde na tá de sawa an zhera-aaruwa, ma ware-aatare keni á se ba: Ba iya una ya \*Almasiihu, hyephye laukte á miya mazla-aara. Amá kure wá, ɗabawaterka ɗekideki.

<sup>9</sup> Má kwa cenaa labare á wáwa-aha, á dagala ervaunɗe á male-aha gergere wá, kure gazlauka ɗekideki, aɗaba watse á de magava ba una-aha ɲanna zunɲwe, amá zlaɓe zle á duniya áte una ɲanna-ka emtsaɗe.»

<sup>10</sup> A farhe zlaɓe áɗaliye, a ba ɲane: «Watse kwá cená ba darda larde umele ge larde umele an wáwa. Emnde á slekse umele dararde ge kwára á slekse umele an wáwa.

<sup>11</sup> Á de gejawa haha an ndzeɗa jipu am tate-aha gergere; watse á magava masiba-aha, antara waya am tate-aha gergere. Watse tá nanna emnde najipu-aha antara nalaama-aha saɗaɗɗe á sáwa am samaya.

<sup>12</sup> «Amá lauktu ni á magava duksa-aha ɲanna wá, kure watse tá sluwakursluwa, watse tá magakuránmaga palasa; watse tá de tsákurá am shairiya am mashidi-aha gergere, tá de dákurá á dem danɲay. Watse tá de tsákurá á katafke á slekse-aha gergere, antara male-aha á larde gergere aɗaba zhera-aaruwa.

<sup>13</sup> Daaci watse á vakurta ba una ɲanna baráma ge kure, mága seydire an zhera-aaruwa á katafke-aatare.

<sup>14</sup> Duksa palle viyawanaaka wá: Dzamauka ire á názena watse kwá ndaaná kure ge ɲezla ire á kure an ɲane.

<sup>15</sup> Aɗaba watse yá vakurtá ba iya an ire-aaruwa enjkale antara elva na kwá de ndaaná kure, tá de dzegwánka kelaade-aha á kure vakurte jawapa, tá de dzegwánka mbeɗakurmbeɗe ɗekideki.

<sup>16</sup> Náwa ba dada-aha a kure antara mama-aha a kure, egdzar mama-aha a kure, vara-aha a kure, antara slakate-aha á kure keni, tá de vakurte ge emnde, tá de ceɓa shifa á emnde umele am kure.

<sup>17</sup> Emnde baɗemme watse tá dá ba kelaadire áɗete kure aɗaba zhera-aaruwa.

<sup>18</sup> Amá wá, ba úgje ire á kure palle á keɗeka.



<sup>19</sup> Kure wá, tsawaatse ba shagera. Máki tsakuraatse shagera wá, kwá ñezlesenze.»

*Zlaɗa na baaka kalle-aara na  
(Mat. 24:15-21; Mark. 13:14-19)*

<sup>20</sup> «Máki kwa nanna jarantaaveje kelaade-aha ge Urusaliima an wáwa wá, diyaweddiye geni herzha keɗa-aara.

<sup>21</sup> Daaci watse tá zhagada emnde na tá am Yahudiya am sarte ñanna á dem huɗe á wa. Emnde na tá am huɗe á Urusaliima keni, watse tá kyá á dete mákwátá. Emnde a mákwátá wá, a sarka á sem Urusaliima ɗekideki.

<sup>22</sup> Adaba hare-aha ñanna baɗemme ba hare-aha á zlaɗa, geni a gevge názena am wakita á Dadaamiya baɗemme.

<sup>23</sup> Kay! Watse á tsaame kwa zlaɗa á ñwasha na watse tá á huɗe, antara ñwasha na tá an egdzara áte erva am sarte ñanna! Adaba watse kwakya jipu zlaɗa am hare-aha ñanna. Watse á marateránmára Dadaamiya ge emnde a larde ñanna, geni tá aɲkwa am ervaunɗe-aarire.

<sup>24</sup> Watse tá ceɓa shifa-aatare an masalam; emnde umele-aatare watse tá sluwatersluwa, tá dáterá an shifa á dem larde-aha umele; watse tá lyevaalya emnde na baaka nadina-aatare Urusaliima, tá de ganvege ba seke berbere, dem sarte na má zlauzle náza-aatare ge itare keni.»

*Sawa á \*Ura á emnde baɗemme  
(Mat. 24:29-31; Mark. 13:24-27)*

<sup>25</sup> «Watse tá nanna emnde nalaama áte vaciya, áte tere, áte terlyakwa-aha keni baɗemme. Ate haha keni watse ba ire keni tá de kanteka emnde am larde-aha gergere ge lyawa. Adaba watse á vadza haye-aha á ba an ndzeɗa, watse kwakya hula-aara.

<sup>26</sup> Watse kwakya emnde na á de ceɓatera ba lyawa, adaba tá de dzámá názena watse á setarge emnde am duniya na kwakya. Adaba baɗemme á ndzeɗa á názena áte samaya á de gejavtegeje ba ñarñare sleɗe.

<sup>27</sup> Am sarte ñanna wá, tá de zhára ba iya \*Ura á emnde baɗemme yá aɲkwa á sawa áte kumba, yá sawa an hákuma yaikke antara ɗemɗemire.

<sup>28</sup> Ba máki kwa nanna aɲkwa á magava duksa-aha ñanna wá, pauka hare mazla-aara, tsakwautsákwa hyema á dem samaya, adaba herzhe kwá ñezla mazla-aara.»

*Gáraɓa an nabugda, má yaaya hyema aɲwaslire  
(Mat. 24:32-35; Mark. 13:28-31)*

<sup>29</sup> Am iga a una ñanna maa, Yaisu a bateraa naraje maa, a ba ñane á elvan ge itare: «Diyaweddiye á ba áte mama á nabugda antara nafa-aha umele.

<sup>30</sup> Máki kwa nanna puwaapuwa hyema áte nafa, yaaya umele aɲwaslire wá, diyakurdiya ganakini herzhavteherzhe madare mazla-aara.

<sup>31</sup> Una ñanna keni ba estuwa. Ba máki kwa nanna aɲkwa á magava duksa-aha ñanna wá, diyaweddiye ganakini herzhavteherzhe dem zlanna á Dadaamiya.

<sup>32</sup> Yá ndaakur ba jirire, tá de zlauka emnde a zamane na ba estuwa, sey má naránna gevge duksa-aha ñanna.

<sup>33</sup> Tara samaya an haha wá, tá naba keɗa, tá zlauzle. Amá elva-aaruwa wá, á keɗeka ɗekideki, sey má gevge.»

*Pauka hare, magaumaɓa maduwa*

<sup>34</sup> «Faufa hyema am ire á kure! Gawevka emnde a dakarire antara emnde a mbazla. Dzamauka ire an kazlaŋa á duniya. Máki estuwa, á se berakurbera háre-aha ŋanna ba estuwa, kwa baaka am niya.

<sup>35</sup> Adaba watse á setarge duniya bademme ba seke narre, baaka ura á geya ágashe d'ekideki.

<sup>36</sup> Adaba una ŋanna, pauka háre, magaumága maduwa ma am laukte-ara keni, lauktu kwá de shá ndzedá ge ŋezla átuge duksa-aha ŋanna bademme watse á setarge emnde na, watse á wakurka zherwe ge tse ákatafke-aaruwa ya \*Ura á emnde bademme keni.»

<sup>37</sup> Ba kelaa vaha, Yaisu á kwaraterse elva á Dadaamiya ge emnde am \*mashidi yaikke. Amá an vayiya wá, á de hare áte ire á wa na tá d'ahaná an Wa Anyaranyara na.

<sup>38</sup> Ba enlyá-waabere wá, kertenj tsekwaasetsekwe, bademme á emnde tá de cena elva ázenjara am \*mashidi yaikke.

## 22

### *Male-aha tá am sawari á eksá Yaisu (Mat. 26:1-5; Mark. 14:1-2; Yuh. 11:45-53)*

<sup>1</sup> Herzhapteherzhe vayvaya muŋri á depaiŋ na baaka shahi á makala am huđe-aara, muŋri na tá d'ahaná an \*Paska na.

<sup>2</sup> Am sarte ŋanna maa, de jaremmeje male-aha á \*liman-aha antara malum-aha á \*tawraitá, ta tátaya pute a kedá shifa á Yaisu ba d'ekideki. Ta magaa estuwa, adaba á wateraa lyawa á ba átuge emnde a ekse.

### *Yahuda anjwa á vela Yaisu (Mat. 26:14-16; Mark. 14:10-11)*

<sup>3</sup> Daaci de demda Shaitaine am Yahuda, an Iskariyaut keni tá d'aha ba ŋane, ŋane ŋanna palle á pukura-aha kelaawa ju buwa.

<sup>4</sup> A duhe ge Yahuda ŋanna ádeza male-aha á \*liman-aha antara male-aha á emnde á ufa \*mashidi yaikke, ta de magaa sawari kerdé, geni á de faterem estara Yaisu am erva á ba an keski.

<sup>5</sup> Daaci higa ge male-aha na, a ba itare una wá, «Ŋá vakte shunġu.»

<sup>6</sup> A eksarhe ge Yahuda. Am iga a una ŋanna maa, a fantau ba ge tátaya dabari á faterem Yaisu na am erva salaakke, a diyarseka emnde d'ekideki.

### *Ta tsatsanaa masane á \*Paska ge Yaisu (Mat. 26:17-25; Mark. 14:12-21; Yuh. 13:21-30)*

<sup>7</sup> Gyaregya muŋri á depaiŋ na tá puweka shahi á makala am huđe-aara na, vaci ica egdza kyawe á \*Paska wá,

<sup>8</sup> Yaisu a naba bela tara Piyer tá an Yuhanna, a ba ŋane á elvan ge itare: «Dawmbare, de tsatsaumiyaatsatse d'afa á Paska, mí de ezza.»

<sup>9</sup> Ta ndavanu ge pukura-aha na, a ba itare: «Ká kata ŋá de tsatsakaná áme?»

<sup>10</sup> A ŋwaterante, a ba ŋane á elvan ge itare: «Máki dakuremda am huđe á berni wá, kwá de puwa ba ja ire antara zhele á sepa yawe am hwama, naba d'abaudaba á dem mba na á demkwa ŋane.

<sup>11</sup> Máki dakuremda maa, bawanánba ge edda á há ŋanna: A ba malum wá: Áma bere na yá de zá d'afa á Paska am huđe-aara antara pukura-aha-aaruwa?

<sup>12</sup> Daaci á de marakurá bere yaikke átire ge bere, an tsatsa kazlaŋa am huđe-aara. Kwá tsatsamiya d'afa á muŋri am huđe-aara.»

<sup>13</sup> Mazla-aara ba zlálá ge pukura-aha na, tá de bera duksa bademme ba seke una a baternaa Yaisu na. Daaci ta tsatsaa d'afa á Paska am bere ŋanna.

*Masane cufedde**(Mat. 26:26-30; Mark. 14:22-26; 1 Kaur. 11:23-25)*

<sup>14</sup>Hyephye laukte-aara maa, anƙwa á njá arge masane na antara pukura-aha-aara,

<sup>15</sup>a ba ɲane á elvan ge itare: «Una názu ya katanaa ya an ervaunɗe-aaruwa baɗemme, geni yá zuze ɗafa á \*Paska na antara kure, lauktu yá de shá zlaɗa-aaruwa.

<sup>16</sup>Adaba zá Paska ɲanna wá, yá ndaakur ba jirire, halevuhale ba vatena náza-aaruwa, sey mí de zá ba una am zlanna á Dadaamiya, má sessa maana-aara baɗemme parakke.»

<sup>17</sup>Daaci a eksante feka, a slafan we-aara ge Dadaamiya, a ba ɲane á elvan ge itare: «Nawmbare shawushe baɗemme á kure.

<sup>18</sup>Adaba iya wá, yá ndaakur ba jirire, halevuhale á ba áte una ge iya, geni yá eksanteksa feka yá fetefa áte we-aaruwa. A juwaa ba á sarte na ni emnde tá de njá am \*kwara á Dadaamiya átekwa na.»

<sup>19</sup>Am iga a una ɲanna maa, a eksante ɗafa, a slafan we-aara ge Dadaamiya, a kezlanve, a ba ɲane á elvan ge itare: «Una na wá, vuwa-aaruwa, ((yá yanya shifa-aaruwa adaba kure. Magaumága una ma vaatara keni, geni kwá dzamidzámá an ɲane.»

<sup>20</sup>Am iga a náza za keni a magán ba estuwa, a eksante feka, a ba ɲane á elvan ge itare: «Una uzhe-aaruwa a puvaá adaba kure, Dadaamiya á ngudaterá namána ge emnde an ɲane.))

<sup>21</sup>«Amá náwa edda una ni á veliyá ɲane mí zá ɗafa ba kerɗe.

<sup>22</sup>Iya \*Ura á emnde baɗemme wá, sey ba yá emtsa baaka pekyaa-aara, adaba a tsanaa ba estuwa Dadaamiya. Amá palase ge edda una ni á veliyá ɲane.»

<sup>23</sup>Daaci pukura-aha ta fantau ge ndáva am dagave-aatare, geni á maganá ware una ɲanna.

*Ware una á de gev male á miya baɗemme*

<sup>24</sup>Njaanja gajawe am dagave á pukura-aha, tá kátá dise edda una ni tá zhára ɲane ba seke male-aatare baɗemme.

<sup>25</sup>A ba Yaisu á elvan ge itare: «Slekse-aha á larde, tá anƙwa á mára sleksire-aatare áte larde-aha, baɗemme á emnde a hákuma tá kátá emnde tá baterá shagera slera-aatare.

<sup>26</sup>Amá kure wá, estuweka. Edda una gevge male am dagave á kure, a gevge cekwa á kure ba ɲane. Slekatafke á kure, a gevge sleslera á kure ba ɲane.

<sup>27</sup>Am dagave á tara edda una á se beraná á ba am tate á njá ɗafa, antara walaadi mu, málá ware am itare? Ábi málá ba edda una á se beraná á ba am tate á njá náza za na? Amá iya, nja-aaruwa am dagave á kure wá, ya ba seke walaadi.

<sup>28</sup>«Kure wá, kwa emnde na ni kwá anƙwa antara ya ba kelaazare, kwá anƙwa antara ya am sarte-aha na a badiyaa shaitaine baɗemme.

<sup>29</sup>Ba seke una ni a vite yaikkire ge iya Edderwa na wá, iya keni vanakurteva ge kure.

<sup>30</sup>Watse kwá de njá antara ya am yaikkire-aaruwa, mí de záná átirpalle duksa, mí de sháná átirpalle. Kwá de njá am kurshi-aha á yaikkire ge kya shairiya á Iserayiila-aha jeba kelaawa ju buwa.»

*A ba Yaisu watse á yiyaaya Piyer**(Mat. 26:31-35; Mark. 14:27-31; Yuh. 13:36-38)*

<sup>31</sup> «Simaun! Simaun!» a ba Yaakadada á dáhá Simaun, a ba nane á elvan ge nane: «Kwaye shansha baráma Shaitaine ganakini á maganá an kure ba seke hiya na tá anƙwa eggyege na.

<sup>32</sup> Amá ya magaa maduwa adaba ka, geni a kezlevka fetarfire á na bademme. Am sarte na má watse eptsakeptsá á sem sera-aaruwa wá, fateremfa ndzedá am vuwa ge egdzar mama-aha á na.»

<sup>33</sup> A ba Piyer á elvan ge nane: «Yaakadada, iya wá, ma tá damiyá á dem dangay keni, tá dami ba buwa; ma tá ceba shifa á miya keni, sey mi ba buwa.»

<sup>34</sup> A ba Yaisu á elvan ge nane: «Yá ndak ba jirire Piyer: Ba vatena na lauktu á kyuwa tsákálá wá, watse ká bánba ka ser keye ganakini diyakikire.»

*Yaisu á ndaha elva á partamami, nambela á káshi ira masalam*

<sup>35</sup> Am iga a una nanna maa, a ba Yaisu á elvan ge itare: «Am sarte na ya belakurbela, ma shungu, ma kashi ba kimake keni dakuránka na mu, anƙwa názu kwa kumanaa kure emtu?» Ta nwanante, a ba itare: «Baaka názu na kumanaa nje deƙideƙi.»

<sup>36</sup> A ba nane á elvan ge itare: «Kina wá, estuweka mazla-aara. Edda una ni anƙwa shungu-aara, a eksanteksa; edda una anƙwa kashi-aara keni, a eksanteksa; edda una má baaka masalam-aara, a veluvelu nanɣyuwe-aara, a shekwepshekwe.

<sup>37</sup> Ya bakurnaa adaba uwe, shagera ba á gevge názena a ndaanaa wakita á Dadaamiya áte ya na mazla-aara. Adaba a ba wakita á Dadaamiya: «Nane faremfa am emnde a mága haypa.» Daaci daada áte una nanna kina geni á gevge.»

<sup>38</sup> A ba pukura-aha tá elvan ge nane: «Yaakadada náwa anƙwa masalam buwa.» A nwaterante, a ba nane: «Hyaahya ba una nanna.»

*Yaisu am Gaicaimane  
(Mat. 26:36-46; Mark. 14:32-42)*

<sup>39</sup> Ba segashe-aara ge Yaisu wá, a zlala á ba áte Wa Anyaranyara na mbasmba nane na, ta dabemhe ge pukura-aha-aara keni.

<sup>40</sup> Daraada áhuwa maa, a ba nane á elvan ge itare: «[Jalaunjalá Dadaamiya geni a badakuruka shaitaine.»

<sup>41</sup> Daaci a gapsehe ba yiyiye an itare, á hyephye velya nákwá palle, a de kezlaa ugje, a magaa maduwa-aara, a ba nane:

<sup>42</sup> «Tasle á na Eddaye-aaruwa jinaaja zladá na a shika, máki wayakiyantewaya. Amá a gevka áte náza-aaruwa, a gevge á ba áte náza á na.» ((

<sup>43</sup> Daaci a naba jesarhe ge malika á Dadaamiya á sawa am samaya, a se fanem ndzedá am vuwa.

<sup>44</sup> Ge kwakyire á dzama ire na a shaa nane na wá, a magaa maduwa an ndzedá-aara bademme, haa a ses ge ngudeffire cuuwe áte vuwa-aara, á tádá á dete haha tak, tak, take ba seke uzhe.))

<sup>45</sup> Zlanaazle maduwa-aara mazla-aara, a naba tsetehe a seza pukura-aha-aara maa, a se berater tá am háre, adaba haraare ta taa puka hare, tá am dzamá ire yaikke.

<sup>46</sup> A tsaterterte, a ba nane á elvan ge itare: «Labára kwá pá háre? Pauka háre; magaumága maduwa geni a badakuruka shaitaine.»

*Ta eksevaa estuwa Yaisu  
(Mat. 26:47-56; Mark. 14:43-50; Yuh. 18:3-11)*

<sup>47</sup> Ba elva nanna keni zlaɓe zlanaaka Yaisu wá, saressa emnde ta ba kwakya, Yahuda palle á pukura-aha kelaawa ju buwa á katafke-aatare.

Daaci a duhe ge Yahuda ɲanna suuwe ádeza Yaisu, a de ɲanaahe takwalle, á gan use an ervaunde-aara palle ágire.

<sup>48</sup> A ba Yaisu á elvan ge ɲane: «Yahuda, ká se gi use ganakini ká fiyá an una ɲanna emtu á dem erva á emnde, iya \*Ura á emnde bademme?»

<sup>49</sup> Emnde tá antara Yaisu tá zhára mága ɲanna wá, watse zlazladá jipu. Daaci a ba itare tá elvan ge Yaisu: «Yaakadada, ɲere keni ɲá naba waterwá emtu an masalam-aha á ɲere?»

<sup>50</sup> Kerten velesevele erva palle-aatare, a naba wa sleslera á male á \*liman-aha, a icanaa hyema a nadafa.

<sup>51</sup> Amá a ba Yaisu á elvan ge itare: «Yawánya, magauka una.» A de semtanaa hyema-aara ɲanna ge zhel na, a mbanaahe.

<sup>52</sup> Daaci a ba Yaisu á elvan ge male-aha á \*liman-aha, antara male-aha á emnde a ufa \*mashidi yaikke, ira male-aha á ekse na ta se eksa ɲane na, a ba ɲane á elvan ge itare: «Kwá se eksiya an masalam-aha, antara zade am erva na mu, ya neyle emtu?»

<sup>53</sup> Ábi kelaazare yá á ba ázekure am mashidi yaikke, eksakurika dekideki? Daaci sarte na wá, sarte á kure, sarte á tabedammire ge marse hákuma-aara.»

*A ba Piyer ɲane diyaaka Yaisu dekideki*

*(Mat. 26:57-58, 69-75; Mark. 14:53-54, 66-72; Yuh. 18:12-18, 25-27)*

<sup>54</sup> Daaci ta naba eksevaa Yaisu na, ta dan ba suuwe á dem mba á male á male-aha á \*liman-aha bademme. Piyer wá, a daa daba Yaisu ádehuwa, amá wá, gaterápteka dekideki.

<sup>55</sup> Mbarantembe kára am huđe á riya á male á liman-aha na, jarantaaveje emnde ge kára na maa, Piyer keni a de njeme am dagave-aatare.

<sup>56</sup> Daaci á ezzhárá kwátana umele Piyer na, á njá átuge kára, á ezzhárá, a ba ɲane: «Degi zhel na keni ba ura á Yaisu ɲanna.»

<sup>57</sup> Amá eksarka Piyer, a ba ɲane: «Diyanka ya zhel ɲanna emmaye-aaruwa.»

<sup>58</sup> Cekwaangudí wá, a nanhe zlađe adaliye ge ura umele, a ba ɲane á elvan ge ɲane: «Ka keni ka ba palle á emnde ɲanna.» A ɲwanante ge Piyer, a ba ɲane: «Iya ɲane ka ya, eddaye-aaruwa.»

<sup>59</sup> Shekwaashekwa á maga saa palle wá, a ba ura umele zlađe adaliye á ba an ndzedá: «Baaka shaige-aara dekideki, dawale na keni ba ura á zhel ɲanna. Adaba ɲane keni ba ura Galili ɲanna.»

<sup>60</sup> Amá a ɲwanante ge Piyer, a ba ɲane: «Naba ennda seke elva á ɲa ma ká ndaha uwe keni.» Ba elva-aara keni zlađe zланаaka Piyer, tsáksákwálikwaa á ba tsakala.

<sup>61</sup> A eptsavte ge Yaakadada, a zharaa Piyer ba yamme, daaci Piyer a naba yehete názena a bannaa Yaakadada, a ba ɲane: Vatena lauktu á kyuwa tsákálá, ká de bánba ka ser keye ge diyakikire na.

<sup>62</sup> Mazla-aara a naba sesehe ge Piyer ásegashe, a se fantau ge kyuwa á ba an yawe á kyuwa.

*Ta zlazlese Yaisu, ta zuhe an ja*

*(Mat. 26:67-68; Mark. 14:65)*

<sup>63</sup> Daaci emnde na tá ufa Yaisu na ta naba zlazlese, ta zuhe an ja.

<sup>64</sup> Ta fadanse ice, ta vavante dedekwa, am iga-aara ta ndavanundave ganakini a jakaa ware, diyeddiye edda-aara.

<sup>65</sup> Ta epsawse Yaisu an tsáká elva-aha gergere ádete ɲane.

*Yaisu á katafke á \*kendekyiya yaikke*

*(Mat. 26:59-66; Mark. 14:55-64; Yuh. 18:19-24)*



<sup>66</sup> Ba a werehe ge ekse, an enlyya werre wá, jarammeje male-aha á Yahudiya-aha bademme; amaana male-aha á \*liman-aha, antara malum-aha á \*tawraita. Ta saa Yaisu á sem jahava-aatare.

<sup>67</sup> Daaci ta ndavanuhe ge Yaisu a ba itare: «Ba ka una ka \*Almasiihu na emtu? Naba ndaanjernda.» A njwaterante ge Yaisu a ba njane: «Má yá ndaakurnda, kure kwá fetarka.

<sup>68</sup> Ma ya ndavakuru elva keni, kwá de viteka jawapa.

<sup>69</sup> Duksa palle wá, a juwa ba keski mazla-aara, iya \*Ura á emnde bademme yá zlala á de njá am nadafa á Dadaamiya na Sleksa ba njane na.»

<sup>70</sup> A ba itare bademme tá elvan ge Yaisu: «Ekka mu, ka \*Egdza á Dadaamiya emtu estara?» A njwaterante ge Yaisu a ba njane: «Ba seke diyakurdiya, ba estuwa.»

<sup>71</sup> A ba itare am dagave-aatare: «Ázara wedere á miya am seyde-aha mazla-aara, ábi cenamiyáncena názena a ndaanaa njane.»

## 23

### *Daránda Yaisu á de katafke á sleksu \*Pilaatu* (*Mat. 27:1-2, 11-14; Mark. 15:1-5; Yuh. 18:28-38*)

<sup>1</sup> Daaci ta tsetehe bademme-aatare am \*kendekyiya njanna, ta daa Yaisu na á de katafke á sleksu \*Pilaatu.

<sup>2</sup> Daraada ákatafke á slekse maa, ta de fantau ge ica sera á Yaisu á ba áhuwa. Ta banán ge slekse: «Náwa zhel na á wesha larde á miya. A bantsa njane, a varanteka hadáma ge male á larde á Rauma dekidfeki. A bantsa njane zlafe: Ba iya una ya \*Almasiihu, ya slekse yaikke.»

<sup>3</sup> A ndavanuhe ge sleksu Pilaatu: «Ba ka una slekse á Yahudiya-aha na emtu?» A njwanante ge Yaisu: «Ba estuwa.»

<sup>4</sup> A ba Pilaatu á elvan ge male-aha á \*liman-aha antara dikele á emnde njanna bademme: «Shanáka ya haypa áte zhel na dammaru ge záná an shairiya.»

<sup>5</sup> Amá itare ta farhe zlafe ádaliye á ba an ndzedá, a ba itare: «Degey an názena á kwaratersa njane ge emnde na á tsante fitenire am larde á miya! Kwaye ndza a fantau á ba am Galili, amá a se hyanme am Yahudiya bademme, se ba áhuna keni samsa an njane!»

### *Daránda Yaisu á de katafke á sleksu \*Hirudus*

<sup>6</sup> Sleksu \*Pilaatu ba a cenaa ta tsalante Galili am huđe-aara na wa, a fantau ge ndáva tate na ni a sawa Yaisu átekwa, a ba njane: «Zhel njanna ura Galili emtu?»

<sup>7</sup> Am sarte na diyeddiye ganakini Yaisu a sawa á sa am tate na á kwaraná sleksu \*Hirudus, a naba belanaa ádezenjara. Adaba am hare-aha njanna Hirudus keni á ba am huđe á Urusaliima.

<sup>8</sup> Sleksu Hirudus a higa jipu am sarte na a puwete ice-aara áte Yaisu. Adaba haraare á cená ba labare-aara, haraare á kumá ba njane, geni watse á nanna najipu ázenjara.

<sup>9</sup> Daaci a ndavanu elva-aha gergere, amá njwanárka Yaisu dekidfeki.

<sup>10</sup> Tá anjwa male-aha á \*liman-aha, antara malum-aha á \*tawraita áhuwa maa, ta fantau ge ica sera á Yaisu á ba an ndzedá.

<sup>11</sup> Mazla-aara sleksu Hirudus antara sawji-aha-aara ta fantau ge valyanse elva a epsawa ge Yaisu, ta epsawse ba njga, ta tsekwanme am zane zariya jipu, ta naba eptsanaahe ádeza sleksu Pilaatu.

<sup>12</sup> Garevge slakate-aha ba vacite nanna tara Hirudus an Pilaatu, adaba ndza ta emnde a dagala.

*Njarantenja am shairiya ge ja shifa á Yaisu*  
(*Mat. 27:15-26; Mark. 15:6-15; Yuh. 18:39-19:16*)

<sup>13</sup> Sleksu \*Pilaatu a jemaa male-aha á \*liman-aha, antara male-aha á ekse ira emnde a ekse bademme,

<sup>14</sup> a ba nane á elvan ge itare: «Náwa kwa siyaa zhel na, a ba kure á wesha larde, amá ya ndavanu elva-aha nanna á ba akatafke á kure, shanáka haypa-aara áte una kwa se puwar ugje kure ganakini á nanaana shairiya.

<sup>15</sup> \*Hirudus keni shanka haypa na a guwaa zhel na ganakini á nanaana shairiya. Adaba una nanna a eptsanaahe zlafe adaliye ásezemiya. Estuwa, ba baaka haypa na a guwaa nane hyephye ja shifa-aara.

<sup>16</sup> Adaba una nanna, yá zuze á ba an ja, daaci yá belanaabela.»

((  
<sup>17</sup> Am mbarsembe emnde ba kelaa muñri á \*Paska sey slekse á belaterá dangay palle maa,))

<sup>18</sup> bademme-aatare ta jar ye ge Yaisu, a ba itare tá elvan ge Pilaatu á ba an ka kwára: «Ejja zhel na a njeka an shifa defideki, belanjernaabela Barabas.»

<sup>19</sup> Barabas wá, ta ngudanaa adaba fitenire umele ta tsante am hufe á ekse antara elva á shifa.

<sup>20</sup> Sleksu Pilaatu wá, nane á kátá bela Yaisu. Adaba una nanna, a se mbedateruhe zlafe adaliye elva-aara ge emnde a ekse.

<sup>21</sup> Amá ta nwanante á ba an hula: Zlenjelezlenjela áte dzangala, zlenjelezlenjela áte dzangala, zlenjelezlenjela áte dzangala, bademme-aatare ba estuwa.

<sup>22</sup> A ndaaterhe zlafe adaliye sleksu Pilaatu ge keyire: «Labára nane ge kure? A gu uwe nane zhel na diyanka ya na? Iya wá, diyanka ya haypa na a guwaa nane, hyephye ja shifa-aara na. Yá zuze á ba an ja, yá belanaabela.»

<sup>23</sup> Amá itare tsaraatse degdege á ba áte náza-aatare, ta farhe zlafe adaliye ge hula geni a zlenjarzlenjela Yaisu. Daaci jeje am ire á Pilaatu, ta ganaa ba itare ndzedá.

<sup>24</sup> Mazla-aara a naba eksarhe geni a gevge názena tá kataná itare nanna.

<sup>25</sup> Daaci a naba belateraa edda una ta danaa adaba fitenire á dem dangay, antara elva á shifa na, a vaterte Yaisu geni tá de maga názena tá kataná itare áte nane.

*Náwa ta zlenjelanaa estuwa Yaisu áte dzangala*  
(*Mat. 27:32-44; Mark. 15:21-32; Yuh. 19:17-27*)

<sup>26</sup> Tá ankwá á dándá Yaisu maa, de jarja ire antara ura Siraine umele zhera-aara Simaun átire sa á sawa am makwata maa, ta naba eksevaahe, ta far sepa dzangala á ba an ndzedá, á daba Yaisu an nane.

<sup>27</sup> Estuwa dikele á emnde a ekse ta daa daba Yaisu na antara nwasha. Nwasha na wá, tá ámbera kyuwa, tá tsaka dákwa.

<sup>28</sup> Amá a eptsavte ge Yaisu, a ba nane á elvan ge nwasha nanna: «Kure nwasha-aha á emnde a Urusaliima, kyuwawika iya, amá kyuwaukyuwa ire á kure antara egdzara á kure.

<sup>29</sup> Adaba ankwá á sawa hare-aha na ni tá de bánba emnde: Sharánsha ire-aatare nwasha dziire antara nwasha na zlafe faranuka uba-aatare ge egdzere, ira nwasha na tá yeka mazla-aara na.

<sup>30</sup> Am sarte ɲanna maa, tá de bateranba emnde ge wa-aha sadafde: Mbedawanerarmbede. Tá de bateranba ge egdzar wa-aha: Shebawanerveshebe taslawá á kure!

<sup>31</sup> Adaba má ta magante una ge nafa áɲwáslá, watse átsáme kena náza á náfá na an ula?»

<sup>32</sup> Á ba am sarte ɲanna maa, tá aɲkwa emnde a bádza slede ta buwa, ta daterhe antara Yaisu, ta de cebatera átirpalle.

<sup>33</sup> Daraada am tate ɲanna tá dahaná an Feka á Ire na maa, ta naba zlenelaa Yaisu, antara emnde a bádza slede ɲanna áte dzaɲgala-aha-aatare, palle am nadafa-aara, palle keni am názlaba-aara.

<sup>34</sup> Amá a ba Yaisu: «Eddaye-aaruwa, naba yateraarye haypa-aatare, adaba diyarka.» Itare ta tegaa kazlaɲa á Yaisu am dagave-aatare. Ge ettega-aara wá, ta maga njeri ganakiní a sesse edda una ni á zaná ɲane ma uwe keni.

<sup>35</sup> Emnde bademme tá á ba á tsatse, tá ezzhara. A ba male-aha á Yahudiya-aha ágire tá epsawepsawa: «Ábi ɲane a lyese emnde umele? A lyelye kwa ire-aara keni, má ba ɲane una \*Almasiihu a eksesaa Dadaamiya.»

<sup>36</sup> Sawji-aha keni ta ganaptehe, ta de valyananse elva a nyainye, ta maranaa mbazla dɲɲɲɲɲɲ tá kátá fanufe.

<sup>37</sup> A ba itare tá elvan ge ɲane: «Ábi ka bantsa ka, ka slekse á Yahudiya-aha, lyelye kwa ba ka ire á ɲa!»

<sup>38</sup> Náwa názu ta puwetaa itare áte naláwa, ta fetehe áte dzaɲgala átire ge Yaisu: «Ba ɲane una slekse á Yahudiya-aha.»

<sup>39</sup> Emnde a badza slede na ta zlenelateraa antara Yaisu na, palle-aatare a naba zlazlese Yaisu, a ba ɲane: «Gakefka \*Almasiihu mazla-aara emtu? Lyelye kwa ire á ɲa, lyanerlye ɲere keni.»

<sup>40</sup> Amá a naba valarhe ge palle na, a ba ɲane: «Ekka wá, labára á wanƙa lyawa átuge Dadaamiya? Ká keni ká á ba am zlada ɲanna tsa.

<sup>41</sup> Miya antara ka wá, á jamiya ba haypa á miya. Názena tá magamiyán ge miya ba deydey á názena mi maganaa miya keni. Amá ɲane mu, a gu uwe, ábi baaka?»

<sup>42</sup> Daaci a ba ɲane á elvan ge Yaisu: «Tasle á ɲa iya wá, vacitu watse ká de sawa an yaikkire á ɲa na, ba tasle á ɲa yehiteyeha iya keni.»

<sup>43</sup> A ɲwanante ge Yaisu, a ba ɲane á elvan ge ɲane: «Yá baka ba jirire: Ba vatena na, mí dá ba buwa á dem zlanna á Dadaamiya.»

*Náwa ndza a emtsaa estuwa Yaisu  
(Mat. 27:45-56; Mark. 15:33-41; Yuh. 19:28-30)*

<sup>44-45</sup> Am sarte ɲanna wá, á maga vacitire. Amá má a de tsekwaá ge tabedammire wá, duniya bademme baaka vaciya, dem saa keye ba estuwa. Kacekaca á dzegwa na am \*mashidi yaikke keni, a naba tamme kalkale am dagave.

<sup>46</sup> Daaci Yaisu a naba kante kwára á ba an ndzedá, a ba ɲane: «Eddaye-aaruwa, fanakemfa shifa-aaruwa am erva ge ekka.» Ba a ndaase una ɲanna, mazla-aara a naba emtsehe.

<sup>47</sup> Male á sawji á Rauma, ba a naa duksa ɲanna magaavemage na wá, a fantau dise jirire á Dadaamiya, a ba ɲane: «Zhel na wá, ba jirire baaka haypa-aara.»

<sup>48</sup> Bademme á nalga á emnde na ndza a sateraa ba se zhára ice na, ta daa á ɲaɲa ba ervaunɲe adaba názena ta naana itare na.

<sup>49</sup> Slakate-aha á Yaisu, antara njwasha na kwaye ta d'abanaa á sawa am kwára á Galili na, ta tsaahé yiyiye an itare, lauktu ta zhara názena anjwa á magava na.

*Faremfa Yaisu am irekhya*

(*Mat. 27:57-61; Mark. 15:42-47; Yuh. 19:38-42*)

<sup>50-51</sup> Daaci ndza anjwa ura umele zhara-aara Yusufa, nane ura Arimatiya am Yahudiya. Zhel nanna wá, ura jirire, dzayya hufe-aara, anjwa á ufa zamane na ni emnde tá de njá á ba am \*kwara á Dadaamiya na. Nane keni ura male am \*kendekiyi yaikke, amá enjale-aara d'abaaka názena tá anjwa á slaslaná emnde umele, antara názena ta maganaa itare am sarte nanna.

<sup>52</sup> Daaci a duhe ge nane á deza sleksu \*Pilaatu, a de ndavanu baráma á eksa emtsa á Yaisu.

<sup>53</sup> A se tsekwa emtsa na áte dzangala, a fademe am kalpakane anjwaslire, jeba á kalpakane nanna ba lefedde. Daaci a de zlavanaahe am irekhya ta yese am cacera, ba ser palle keni zlafe zlavaranaaka emtsa am hufe-aara.

<sup>54</sup> Vacite nanna wá, ge zlema, herzhe á fantaufe kwaskwe á puwansepuwe.

<sup>55</sup> Nwasha na ta saa á d'aba Yaisu kwaye á sawa am kwara á Galili na wá, ta d'aba Yusufa á dem tate á heda Yaisu na, ta de zharanaahe irekhya-aara antara zlava-aara am irekhya.

<sup>56</sup> Mazla-aara ba zlala-aatare á dá, ta de tsatsaa waye-aha-aatare, antara náza se-aatare, ganakini watse tá de wecar ge Yaisu.

Vaci puwansepuwa maa, ta puwansehe emtsaade áte una am \*tawraita.

## 24

*Yaisu tsetse am faya*

(*Mat. 28:1-10; Mark. 16:1-8; Yuh. 20:1-10*)

<sup>1</sup> Werre an enjya-waabere ge laade wá, ta duhe ge njwasha nanna ádete irekhya á Yaisu an waye-aha na ta tsatsanaa itare na.

<sup>2</sup> Amá ta de beraa irekhya á ba an wácene, an tambara páláme yiyiye an we-aara.

<sup>3</sup> Ta demhe am irekhya na, amá sharánka Yaakadada Yaisu d'ekideki.

<sup>4</sup> Daaci palle a názu tá ndaaná itare baaka d'ekideki. Ba itare tá átira mága najipu nanna, ta naba jesarhe ge zála buwa ákatarfke-aatare ba estuwa, ta tsekweme am nanjyuwe na á maga wulwulire jipu na.

<sup>5</sup> Jaterja lyawa njwasha na, ta puweme erva am ice. A ba emnde nanna tá elvan ge itare: «Labára kwá se tataya edda una an shifa am dagave á emnde a faya?»

<sup>6</sup> Nane baaka áhuna tsetse, anjwa an shifa-aara ádaliye. Elva na a bakurnaa nane am haha á Galili na dedde am ire á kure emtu?

<sup>7</sup> Ad'aba ndza a ndaakurnda, a ba nane: Iya \*Ura á emnde bademme wá, watse tá vite ge emnde a mága haypa, tá de zleneliya áte dzangala. Amá am hare ge keyire wá, watse yá tsetse am faya.»

<sup>8</sup> Daaci saasa elva-aha na ndza a baterna Yaisu na bademme á sem ire-aatare.

<sup>9</sup> Mazla-aara ba zlálá-aatare áte we á irekhya, tá dateraa labáre ge pukura-aha-aara kelaawa jemtekwe, antara emnde-aara umele bademme.

<sup>10</sup> Náwa zhara á njwasha na ta dateraa labáre ge pukura-aha nanna: Maari mukse á emnde a Magdala, Yauwanna, Maari emmarge Yakuba, ira njwasha umele na ndza ta kerdé, bademme ta daa ba labáre nanna.

<sup>11</sup> Amá pukura-aha eksaranteka elva á ñwasha na seke elva a jirire, fartarka an itare dekideki.

<sup>12</sup> Piyer wá, ñane a naba tsetehe á ba am sarte ñanna, zhagade-aara á dete we á irekhya na, a de zharaa ice á dem huđe-aara, a de beraa ba kalpakane. Daaci ba eptsa-aara á da, á maga ba najipu-aara.

*Ate baráma a dem Aimawus  
(Mark. 16:12-13)*

<sup>13</sup> Ba vacite ñanna maa, ta tsetehe ge pukura-aha buwa, ta dem ekse umele tá dñaná an Aimawus, dagave-aatare an Urusaliima á maga kilaumaiter kelaawa jemtekwe.

<sup>14</sup> Daaci tá ańkwa á ndaha názena a magava áte Yaisu am hare-aha ñanna am dagave-aatare.

<sup>15</sup> Zlađe itare keni tá ndaha ba elva ñanna am dagave-aatare maa, ba Yaisu an ire-aara a duhe ádezetaře, ańkwa á zlalá antara itare áte baráma.

<sup>16</sup> Tá zhárá ba ura, amá ańkwa názu a piyaterťe ge diyeddiye-aara.

<sup>17</sup> Daaci a ba Yaisu á elvan ge itare: «Kwá ndaha elva uwe kure áte baráma na?» Ta tsaahē wá, puwaapuwa vuwa-aatare.

<sup>18</sup> A naba ñwanante ge palle-aatare zhēra-aara Kiliyaupas, a ba ñane á elvan ge ñane: «Ka wayve am Urusaliima, zlađe cenakánka názena a magava am hare-aha na ka?»

<sup>19</sup> A ba ñane á elvan ge itare: «A jaara uwe?»

Ta ñwanante, a ba itare tá elvan ge ñane: «Názena a magava áte Yaisu ura Nasarátu na cenakánka? Ñane nabi á Dadaamiya, an hákuma jipu am slera-aara á katafke á Dadaamiya, ańkwa hákuma á ndaha elva á katafke á emnde áženárá.

<sup>20</sup> Amá male-aha á \*liman-aha á miya, antara male-aha á Yahudiya-aha á miya, ta naba jar ye, ta de faterem am erva ge emnde a duniya, ganakini sey ta maganaa shairiya á shifa, daaci ta naba zlejelehe áte dzańgala.

<sup>21</sup> Bademme ndza ña tamán geni á de lyaná ba ñane larde á \*Iserayiila. Amá kwaye ñane názena a magava áte ñane, hare keyire-aara vatena.

<sup>22</sup> Zlađe ádalīye maa, jarańerja eńkale ñwásha umele tá á ba áženere. Adaba ta duhe ge itare an eńlya-waabere ba vatena á dete we á irekhya-aara wá,

<sup>23</sup> de berareka am irekhya. Mazla-aara ta naba saa, ta se mbedañeru labáre, a ba itare: Ta naba jesarhe ge malika-aha á katafke á ñere ba estuwa, ta bantsa malika-aha ñanna tsetse am faya.

<sup>24</sup> Ta duhe ge emnde umele á ñere á dete we á irekhya ñanna, ta de bera ba seke una ta ndaanaa ñwasha ñanna. Ñane wá, itare keni naránka.»

<sup>25</sup> Daaci a ba Yaisu á elvan ge itare: «Kure wá, baaka eńkale á kure dekideki, mbate elva-aha na ta balanaa nabi-aha na bademme daaka á dem ire á kure, fakurtarka.

<sup>26</sup> Diyakurka dekideki ganakini sey \*Almasiihu á shushe zladā-aha ñanna, lauktu á dem yaikkire-aara? Ndza cenakuránka una?»

<sup>27</sup> Daaci a palateraa názu á ndaana wakita á Dadaamiya á dete ñane bademme. A fantau am wakita-aha na a puwetaa Muusa, date una ta puwetaa nabi-aha umele bademme.

<sup>28</sup> Herzharanteherzhe ekse na tá demkwa na maa, Yaisu a magaa ba seke ñane wá, zlađe zlauka shula-aara.

<sup>29</sup> Daaci ta fantau ge ñañanaa ázetare, a ba itare: «Gevge mangaripu mazla-aara Malum, vayiya ge de katafke, naba hare áženere.» «Ane,» á bina, a naba duhe antara itare.



<sup>30</sup> Njarinja arge masane maa, a eksante dafa am erva, a slafanaa we-aara ge Dadaamiya, a kezlanve dafa na, a vaterte ge itare.

<sup>31</sup> Mazla-aara a naba werte ge ice-aatare, diyareddiye ge njanire, amá naránka njane mazla-aara.

<sup>32</sup> A ba itare am dagave-aatare: «Kay, ázara kena emtakire á ervaunđe á miya am sarte na á palamiya názu am wakita á Dadaamiya áte baráma a sawa na. Higa eksanteka ervaunđe á miya ba seke kára emtu?»

<sup>33</sup> Ta naba eptsehe a ba am sarte njanna á sem Urusaliima, ta se beraa pukura-aha kelaawa jemtekwe na jarammeje antara emnde a nja-aatare.

<sup>34</sup> Ta anƙwa ndaha elva a Yaakadada am dagave-aatare, a ba itare: «Ba jirire tsetse Yaakadada am faya, adaba a maranaa ire-aara ge Simaun.»

<sup>35</sup> Itare keni ta ndaaterhe labára-aatare áte baráma, ta ndaaterhe geni diyareddiye Yaisu am sarte na a kezlanve dafa, a vaterte na.

*Yaisu a marateraa ire-aara ge pukura-aha-aara*

*(Mat. 28:16-20; Mark. 16:14-18; Yuh. 20:19-23; Sler. emnde 1:6-8)*

<sup>36</sup> Itare keni zlaƙe tá ndaha ba njane, ta naa ba Yaisu á tse am dagave-aatare, «A vakurteva Dadaamiya hairire,» a ba njane á elvan ge itare.

<sup>37</sup> Má de gazlargazla wá, jaterja lyawa jipu, adaba itare tá kurken náza nye.

<sup>38</sup> Daaci a ba Yaisu á elvan ge itare: «Labára kwá maga lyawa estuwa? Labára kwá maga shaige estuwa am ervaunđe á kure?»

<sup>39</sup> Ábi una ba iya? Nawanaana erva-aha-aaruwa antara sera-aha-aaruwa. Fautefa erva á kure áte iya, tapawiyaatapa ba shagera. Adaba náza nye wá, njane baaka vuwa-aara. An hyuweka, an hyaihyeka.»

<sup>40</sup> Á baterá una njanna wá, ámbera á maraterá erva-aara, antara sera-aha-aara bademme.

<sup>41</sup> Aley zlaƙe fartarka emtsaade. Adaba ge kwakyire á higa wá, tá geyá mága ba najipu áte njane. A naba ndavateruhe, a ba njane á elvan ge itare: «Anƙwa emtu náza za ázekure áhuna?»

<sup>42</sup> Ta vante hyuwa á kelfe an tedá shagera.

<sup>43</sup> A lyevaahé, a naba zuhe á ba á katafke-aatare.

<sup>44</sup> Am iga a una njanna maa, a ba njane á elvan ge itare: «Am sarte na ndza yá á ba an shifa-aaruwa am dagave á kure keni, ndza ya ndaakurnda bademme, a ba iya: Bademme á názena á tsakaná \*tawraitá á Muusa áte iya, antara una am wakita á nabi-aha umele, ira una ta puwete am jabura, ndza ya ndaakurnda geni bademme sey watse á gevge.»

<sup>45</sup> Daaci a naba vaterte enƙale ganakini tá cenevaacena názena á ndaaná wakita á Dadaamiya.

<sup>46</sup> A ba njane á elvan ge itare: «Náwa názena an puwa am wakita á Dadaamiya: Sey máki shushe \*Almasiihu zladá, emtsamtsa. Am hare ge keyire á de tsetse am faya.

<sup>47</sup> Sey tá magateránmaga waazu ge nalgaadama bademme an zhera-aara, geni a magarmága tuba, Dadaamiya á yaterarye haypa-aha-aatare. Tá fantau am Urusaliima.

<sup>48</sup> Daaci ba kure una kwa seyde-aha á elva-aha njanna.

<sup>49</sup> Iya wá, yá de belakurá názena a ba Edderwa watse á vakurteva na á sawa. Amá wá, njawinja á ba am huđe á berni áhuna, dem sarte na má tsekwatsekwa hákuma á Dadaamiya njanna á sawa am samaya, á setarge kure.»

*Zlálá á Yaisu á dem samaya*

*(Mark. 16:19-20; Sler. emnde 1:9-11)*

<sup>50</sup> Am iga a una ɲanna maa, Yaisu a daterse am huɗe á ekse, kwaye a dateraa á dem Baytaniya. Daraada áhuwa maa, a ketaa erva-aha-aara a gaterar barka.

<sup>51</sup> Am sarte na a gaterar barka ɲanna wá, ámbera á tegava an itare, a zlálá á dem samaya.

<sup>52</sup> Itare ta fantau ge kazlan ugje á ba am tate ɲanna, lauktu ta eptsa á sem Urusaliima, ervaunɗe-aatare emtake jipu.

<sup>53</sup> Ba kelaazare icaranseka dem \*mashidi yaikke, tá de gálá Dadaamiya am mashidi-aara.

## Labare á higa na a puwetaa YUHANNA

### *Yaisu \*Almasiihu ñane elva á Dadaamiya*

<sup>1</sup> Kwaye am fakta, ba lauktu Dadaamiya á nderá duksa keni, edda una tá ðahaná an elva á Dadaamiya na ndza anƙwa tsawe. Elva ñanna ndza ta ba kerde an Dadaamiya, elva ñanna Dadaamiya.

<sup>2</sup> Daaci elva ñanna wá, kwaye am fakta ta ba kerde an Dadaamiya.

<sup>3</sup> Baðemme á duksa, Dadaamiya a nderanaa áte erva an ñane. Baaka názena ni ta nderanaa áte erva an ñane ka.

<sup>4</sup> Elva ñanna wá, á vatertá ba ñane shifa ge emnde. Shifa ñanna maa, anƙwa á vaterte parakkire á jirire ge emnde.

<sup>5</sup> Parakkire ñanna anƙwa á mbe am tabeðammire, amá dzegwánka tabeðammire ganakini á emtsanaametsa.

### *Elva áte Yuhanna slemaga baptisma*

<sup>6</sup> Anƙwa ura ndza a belanaa Dadaamiya werre, zhera-aara Yuhanna.

<sup>7</sup> Sawa-aara ge ñane wá, ndza a sawa ge balateraa elva á parakkire ñanna ge emnde, ganakini a fartarfe emnde áte parakkire ñanna.

<sup>8</sup> Ñane-ka una parakkire ñanna; ñane wá, á maga ba seydire á elva á parakkire ñanna.

<sup>9</sup> Parakkire ñanna wá, parakkire á jirire, a semhe á sem huðe á duniya wá, anƙwa á mbe am dágave á emnde baðemme, á maraterá parakkire á jirire.

<sup>10</sup> Edda una ni tá ðahaná an elva á Dadaamiya na wá, ndza á ba am huðe á duniya. Ba duniya na keni Dadaamiya a nderanaa á ba áte erva an ñane, amá duniya diseka ñane ðekideki.

<sup>11</sup> Ñane a sem larde-aara ba ge ñane, amá emnde-aara ñanna liyiyarka.

<sup>12</sup> Aley keni wá, tá anƙwa emnde na ni ta lyevaa ñane, fartarfe áte ñane. Ge emnde ñanna wá, a naba vaterte barama á gev egdzara á Dadaamiya.

<sup>13</sup> Garevka egdzara á Dadaamiya áte una tá yaná emndimagwaha am duniya na, amá Dadaamiya a vaterta shifa anwaslire, geni tá gevge egdzara-aara.

<sup>14</sup> Elva á Dadaamiya gevge urimagwe, a se nja á ba am dágave á miya, huðe-aara palle áte emnde, ura jirire an tsaka ire, namiyánna yaikkire-aara, yaikkire na ni a vantaa Eddeñara ge ñane, Egdza-aara palle ba ñane na.

<sup>15</sup> Am sarte na a puwete ice-aara áte ñane Yuhanna, a naba kante kwára, a ba ñane á elvan ge emnde: «Náwa edda una ndza ya bakuraa elva-aara, á ba iya: Anƙwa á sawa ura am iga-aaruwa, amá á jiyuje ñane an ñgahire na. Aðaba kwaye zlaðe yarika ya, amá ñane anƙwa.»

<sup>16</sup> Aðaba ñane a hyephe a jauka, a gamiyar barka an tsaka ire ge miya baðemme.

<sup>17</sup> Dadaamiya a sateraa \*tawraita ge emnde á kya erva an Muusa, amá tara ñgurna-aara antara jirire-aara baðemme wá, a sanaa á ba áte erva an Yaisu \*Almasiihu.

<sup>18</sup> Baaka ura ndza nanna Dadaamiya ðekideki, amá Egdza-aara na palle ba ñane, ta ba palle an Dadaamiya na, a se maratarsaa ñane Dadaamiya ge emnde.

*Seydire á Yuhanna slemaga baptisma  
(Mat. 3:1-12; Mark. 1:1-8; Luka 3:1-18)*

<sup>19</sup> Vacite umele, male-aha á Yahudiya-aha am Urusaliima ta belaa \*liman-aha antara \*Laiwiŋkau-aha á deza Yuhanna geni tá de ndavanundave ñane mu ware.

<sup>20</sup> Yuhanna kwalaaka, a naba vaterte jawápa: «Iya wá, ya \*Almasiihu-ka», a ba ñane á katafke á emnde bademme.

<sup>21</sup> Ta ndavanuhe: «Ka \*Ailiya werre na emtu?» A ñute ge Yuhanna: «A'aa, ya Ailiya-ka.» «Ka nabi na ñá anƙwa cena elva-aara am wakita á Dadaamiya na emtu?» «Ya ñane ka», a ba ñane zlaŋbe.

<sup>22</sup> «Ay ká ware kena? Ndañerndaha názena ni ñá de mbedateru ge emnde na ta belañerbela na. Ate ka mu, ka ware?»

<sup>23</sup> A ñwaterante ge Yuhanna, a ba ñane: «Iya wá, ya edda una ndza a ndahanaa nabi Aisaya werre, a ba ñane: Anƙwa ura á bálá elva am kaamba, a ba edda-aara: Anƙwa á sawa Yaakadada, tsatsawanaatsatse barama ba ndedde na.»

<sup>24</sup> Emnde na ta belateraa á deza Yuhanna ñanna wá, emnde umele-aatare ta \*Farisa-aha.

<sup>25</sup> Itare ta ndavanuhe ge Yuhanna, a ba itare tá elvan ge ñane: «Labára ká magaterá baptisma ge emnde máki ka Almasiihu-ka, ka Ailiya-ka, ka nabi na á ndahaná wakita á Dadaamiya-ka?»

<sup>26</sup> A ñwaterante ge Yuhanna, a ba ñane: «Iya wá, yá magakurá baptisma á ba an yawe, amá anƙwa ura á de sawa am iga-aaruwa, ba kina keni anƙwa á ba am dágave á kure diyakurka ba kure, ñane wá,

<sup>27</sup> ba ge slesadanse kimake am sera keni lyanefka dekideki.»

<sup>28</sup> Una-aha ñanna a magava am Baytaniya áte iga a guwa á Urdun, tate na Yuhanna á magaterá baptisma ge emnde.

*Yaisu egdza zhel kyawe á sadake á Dadaamiya*

<sup>29</sup> Makuralla-aara, ma ba a puwete ice-aara Yuhanna áte Yaisu, anƙwa á duwa ádezenara wá, a ba ñane: «Kwaye egdza zhel kyawe á sadake á Dadaamiya, á bezaná ñane haypa á duniya bademme.

<sup>30</sup> Ba ñane edda una ndza ya bakuraa elva-aara, a ba iya: Anƙwa á sawa ura am iga-aaruwa, amá á jiyuje ñane an ñgahire, adaba kwaye zlaŋbe yarika ya keni ñane anƙwa na wá, ba ñane.

<sup>31</sup> Ba iya keni ndza diyanka dawale ñanna estuwa, mbate adaba ba ñane una ya se magateraa baptisma an yawe ge emnde geni a diyareddiye emnde a \*Iserayiila ba shagera.»

<sup>32</sup> A ba Yuhanna zlaŋbe adaliye: «Ya nanna Shedekwe Cudedde á tsekwa á sawa am samaya ba seke takala wá, a se tsekwehe áte ñane.

<sup>33</sup> Werre wá, ndza diyanka ganakini ñane ura estuwa, amá ndza a biyánba Dadaamiya na a beli ge se magateraa baptisma an yawe ge emnde na, a ba ñane: Watse ká nanna Shedekwe Cudedde á se tsekwanem am ire ge ura, ura ñanna wá, ba ñane una watse á magaterá baptisma ge emnde an Shedekwe Cudedde na.

<sup>34</sup> Ya nanna una ñanna», a ba Yuhanna, «Adaba una ñanna yá enndáhá ba párákke geni ba ñane una \*Egdza á Dadaamiya.»

*Pukura-aha á Yaisu zunñwe*

<sup>35</sup> Gurgekse-aara keni ba nja-aara am tate ñanna Yuhanna, tá anƙwa emnde buwa am pukura-aha-aara ázenara.

<sup>36</sup> A naa Yaisu anƙwa á degáshe wá, «Kwaye egdza zhel kyawe á sadake á Dadaamiya!» á bina.

<sup>37</sup> Cenaráncena pukura-aha-aara buwa na elva ɲanna, ta naba tse, ta dǎba Yaisu.

<sup>38</sup> A eptsavete ge Yaisu wá, a naa ba tá dǎbaná am iga. A ndavateruhe: «Kwá kátá uwe kure?» Tá ɲwanante a ba itare: «Ká njá áme ká Rabbi?» (amaana malum).

<sup>39</sup> A ɲwaterante ge Yaisu, a ba ɲane: «Sawmbare, nawanaana tate ɲanna.» Daaci ta duhe, ta de zharanaahe tate na á nja Yaisu átekwa ɲanna, ta zlsansau váha ázeɲara. Duwa-aatare ɲanna á maga saa ufade á ice a vaciya.

<sup>40</sup> Pukura-aha buwa na ta cenvaa seydire na a maganaa Yuhanna áte Yaisu, ta dǎba Yaisu na wá, palle-aatare Andere, egdza emmeɲara ge Simaun Piyer.

<sup>41</sup> Am iga a tegava-aatare antara Yaisu wá, Andere ta de ja ire an egdza emmeɲara Simaun zunɲwe. Daaci a mbedanuhe, a ba ɲane: «Ɔere shaɲeránsha \*Almasiihu vatena» (amaana: Edda una a ekseaa Dadaamiya).

<sup>42</sup> Daaci a puwanse á deza Yaisu na. Daremda áza Yaisu, a ba Yaisu á elvan ge ɲane: «Ba ka Simaun egdza á Yuhanna na ka? Mazla-aara wá, zhera á ɲa Kaifas.» Amaana: Piyer. Piyer na wá, palaha.

### *Yaisu á dǎhá tara Filip an Natanayail*

<sup>43</sup> Makuralla-aara tsetse ire á Yaisu ge eptsá á dem kwárá á Galili maa, de jarje ire antara Filip. «Sawa dǎbidǎba», a ba ɲane á elvan ge ɲane.

<sup>44</sup> Filip, ɲane ura Baytisayda, ekse-aatare ba palle antara Andere ira Piyer.

<sup>45</sup> Duwa á Filip, ɲane keni ta de jaa ire antara Natanayail, a mbedanuhe, a ba ɲane á elvan ge ɲane: «Ɔere shaɲeránsha edda una Muusa a puwete elva-aara am \*tawraitá, nabi-aha umele keni ta ndaha elva-aara na. Una ba Yaisu egdza á Yusufa, ura Nasarátu.»

<sup>46</sup> A ba Natanayail á elvan ge ɲane: «Duksa shagera estuwa ni á jesaare á kya Nasarátu Filip?» A ba Filip: «Sawa nanaana ba ka.»

<sup>47</sup> Am sarte na aɲkwa duwa Natanayail ádeza Yaisu, a ba Yaisu: «Náwa ura \*Iserayiila jirire na ni baaka fida am ɲane dekidǎki.»

<sup>48</sup> «Ka diyise áme?» a ba Natanayail á elvan ge ɲane. A ɲwanante ge Yaisu, a ba ɲane: «Ba lauktu á duwa Filip á de dǎkdǎhá am ekte á nabugda na keni, iya yá zhárá ba ka.»

<sup>49</sup> Daaci a ba Natanayail á elvan ge ɲane: «Malum, ekka wá, ka \*Egdza á Dadaamiya, ka Slekse á \*Iserayiila ba jire.»

<sup>50</sup> A ba Yaisu á elvan ge ɲane: «Ká fetare áte ya, adaba ya bakaa ya nákná am sarte na ká am ekte á nabugda na emtu? Duksa na á jauje ba ge una keni, sey watse ká nanna.»

<sup>51</sup> A ba ɲane zlaǎe ádalíye á elvan ge ɲane: «Yá ndak ba jirire: watse kwá nánná degiya samaya an wacene ba wanɲe, daaci malika-aha á Dadaamiya tá dǎlál á dem samaya, tá tsekwa zlaǎe á setarge iya ya \*Ura á emnde bademme.»

## 2

### *Muɲri á larusa am Kana*

<sup>1</sup> Am háre ge keyire am iga a tse-aara, jerje muɲri á larusa am Kana am kwárá á Galili. Aɲkwa emmeɲara ge Yaisu am larusa ɲanna.

<sup>2</sup> Yaisu antara pukura-aha-aara keni dǎraterdǎhá á dem larusa ɲanna.



<sup>3</sup> Daaci ektsateraarektse mbazla maa, a ba Maari á elvan ge Yaisu: «Degiya baaka zlauzle mbazla-aatare.»

<sup>4</sup> Amá a nwanante ge Yaisu a ba nane: «Emma ká kwarisá ka slera-aaruwa emtu? Iya zlafe samka sarte-aaruwa emtsaade.»

<sup>5</sup> Amá duwa á Maari, a ba nane á elvan ge emnde a tega duksa, «Ma a bakuraa uwe keni naba magaumágá.»

<sup>6</sup> Ankwa jeba á gahe á yawe-aha umele am tate nanna, Yahudiya-aha tá bara an nane áte una á kwaratersá nadina-aatare. Gahe-aha nanna wá, palle-aara á ekse yawe deydey hwámá ilyebe.

<sup>7</sup> A ba Yaisu á elvan ge emnde a tega duksa: «Nawantenáhá gahe-aha na an yawe.» Ta naba nante yawe am gahe-aha na an we-aara.

<sup>8</sup> Daaci a ba Yaisu á elvan ge itare: «Kina wá, kawvaaka cekwaanjudi, vawanteva ge male á munri na.» Ta naba kevahe, ta danánhe.

<sup>9</sup> Male á munri nanna a tapaa yawe na a nyev mbazla na, diyaaka tate na ni ta sanaa átekwa. Amá emnde a tega duksa wá, itare diyardiya adaba ta payema ba itare yawe nanna á dem gahe-aha. Daaci male á munri na a dante zhele á larusa,

<sup>10</sup> a ba nane á elvan ge nane: «Emnde tá tegater mbazla na emtake jipu na emtsaade zunjwe ge emnde, má hyaterhya mbazla ge emnde lauktu tá payaterá una ektseváktsa emtakire-aara ni, ekka sem kina keni ka shebanve una emtake jipu na á ba am bere?»

<sup>11</sup> Kwaye nane najipu á Yaisu zunjwe, a maganaa am Kana, am kwará á Galili. A marese estuwa yaikkire-aara, pukura-aha ta fetarehe áte nane.

<sup>12</sup> Am iga a una nanna maa, nane, emmenara, egdzar mama-aha nara, ira pukura-aha-aara, ta zlalá á dem Kafarnahum. De hararaaháre cekwaanjudi áhuwa.

### *Názena a maganaa Yaisu am mashidi*

*(Mat. 21:12-13; Mark. 11:15-17; Luka 19:45-46)*

<sup>13</sup> Herzhapteherzhe munri á Yahudiya-aha na tá dahaná an \*Paska na maa, a naba tsetehe ge Yaisu, a dem Urusaliima ge mága munri nanna.

<sup>14</sup> Daada-aara am Urusaliima wá, a dem \*mashidi yaikke. Duwa-aara, a de bera emnde tá ankwa válá sla-aha, kyawe-aha, antara emnde a válá takala, ira emnde a peteke, tá an tabel-aha-aatare á katafke.

<sup>15</sup> Yaisu a naba kezlante zává, a ganve ba seke kurpe, a ngyaterse antara dabba-aha-aatare na bademme am mashidi na, a naba mbaadaa tabel-aha á emnde a peteke, a puwevhe ge shungu-aha-aatare nanna á dem áhá.

<sup>16</sup> A ba nane á elvan ge emnde a vela takala keni «Jawanaaja áhuna! Labára kwá ganve bere á Edderwa bere á tsakala?»

<sup>17</sup> Pukura-aha-aara tá zhára ba maga-aara na wá, ta naba yehete názu am wakita á Dadaamiya, ankwa an puwa a ba nane: «Dadaamiya-aaruwa, wayantewáyá bere á na an ervaunde-aaruwa bademme, yá taa njeka tsekadde dekideki.»

<sup>18</sup> Am iga a una nanna maa, a ba male-aha á Yahudiya-aha, tá elvan ge nane: «Ká marañerá najipu-ara kina lauktu njá dise átekwa geni a vaktá ba Dadaamiya hákuma á mága una?»

<sup>19</sup> A nwaterante ge Yaisu, a ba nane: «Naba mbedawanaambedá kure mashidi na, yá tsantetse zlafe adaliye am háre keye.»

<sup>20</sup> A ba Yahudiya-aha tá elvan ge nane: «Yawe kul ufafe ju unjwahe tá nderá ba mashidi na náwa nane na ni, ká tsantetse ka am háre keye?»

<sup>21</sup> Mbate nane a ndanaa áte mashidi-ka, nane a ndaha elva a emtsa-aara, antara tse-aara am fáyá.

<sup>22</sup> Am sarte na tsetsa Yaisu am fáyá wá, saasa elva ñanna á sem ire á pukura-aha-aara, ta fetarehe áte názena am wakita á Dadaamiya, antara elva-aha na ndza a ndahanaa ñane bademme.

*Ma ware keni Yaisu diyaadiya huđe-aara*

<sup>23</sup> Am haraare Yaisu am Urusaliima am muñri á \*Paska maa, kwakya najipu-aha na a maganaa ñane, emnde keni kwakya fartarfe áte ñane adaba najipu-aha ñanna.

<sup>24</sup> Amá Yaisu wá, fetareka an itare, adaba ñane diyaadiya názu am ervaunđe-aatare bademme.

<sup>25</sup> Adaba ñane wá, tá banná emndeka elva áte ura, diyaadiya ba ñane názu am huđe á emnde bademme.

### 3

*Tara Yaisu an Nikaudaimus*

<sup>1</sup> Ndza ankwá ura \*Farisa umele zhera-aara Nikaudaimus, palle á male-aha á Yahudiya-aha wá,

<sup>2</sup> a seza Yaisu an vayiya, a se ndava elva ázeñara. «Malum», a ba ñane á elvan ge Yaisu: «Diyañerdiya geni a belakaa Dadaamiya, adaba baaka edda una á dzegwándzegwa mága najipu-aha na ká ankwá maganá ka na, máki baaka Dadaamiya antara ñane.»

<sup>3</sup> A ñwanante ge Yaisu, a ba ñane á elvan ge ñane: «Yá ndak ba jirire: Baaka ura á dem zlanna á Dadaamiya máki yairseka ge buwire.»

<sup>4</sup> A ba Nikaudaimus á elvan ge ñane: «Tá yáná estara kena emgyegwe a zhele, á dzegwándzegwa dem huđe á emmenjara, lauktu tá eyya adaliye emtu?»

<sup>5</sup> A ba Yaisu á elvan ge ñane «Yá ndak ba jirire: Ma ware edda-aara keni á daaka á dem zlanna á Dadaamiya đekideki má yairseka an yawe antara an Shedekwe Cufedđe.

<sup>6</sup> Una tá yáná emnde am duniya na keni ba ge ire-aara. Tate na á yáná Shedekwe Cufedđe keni á yáná ba shedekwe.

<sup>7</sup> Mañka najipu adaba ya bakaa sey tá yakurseye ge buwire.

<sup>8</sup> Effeya wá, ma á dem tate-ara keni ba á vátá. Ká cenáncena mága-aara, amá wá, ma a tsetaa áme keni diyañka, ma á de tse áme keni diyañka. Edda una tá yáná an hákuma á Shedekwe Cufedđe keni ba estuwa.»

<sup>9</sup> A ba Nikaudaimus á elvan ge ñane: «Á magava estara una ñanna?»

<sup>10</sup> A ñwanante ge Yaisu: «Iyau ekka wá, ka malum á \*Iserayiila-aha yaikke keni diyañka una?»

<sup>11</sup> Yá ndak ba jirire, ñere wá, ñá ndakur názena ni diyañerdiya, antara názena ñá nanna, amá kwá ceneka elva á ñere.

<sup>12</sup> Máki yá bakurá elva áte kazlaña á duniya aley cenakurvaaka fakurtaareka áte ya, sakwa kazlaña á samaya emtu?

<sup>13</sup> Ay degiya baaka edda una ndza a dem samaya ba palle keni. Cenausena elva-aaruwa ya \*Ura á emnde bademme na ya sawa am samaya.

<sup>14</sup> «Yeheteyeha názena ndza a maganaa Muusa am kaamba werre: A magaa havale an verzhagane, a zleñelete áte zade, a kante á dem zhegela. Iya \*Ura á emnde bademme keni watse tá de zleñelijá ba estuwa.

<sup>15</sup> Daaci ma a fetare ware áte ya keni á shansha shifa na á zleka na.

<sup>16</sup> Adaba Dadaamiya wayatewáya duniya kwakya. Adaba una ñanna a vante Egdza-aara palle ba ñane. Ma a fetara ware áte Egdza ñanna keni, á keddeka đekideki, á shansha shifa na á zleka na.

<sup>17</sup> Dadaamiya belaaka Egdza-aara á sem duniya geni á se ngwada emnde, amá a belán geni tá n̄zlesen̄zle emnde áte erva an n̄ane.

<sup>18</sup> Edda una fetarfe áte n̄ane wá, baaka shairiya áte n̄ane. Amá edda una má fetareka áte n̄ane wá, ba kina keni n̄ánáña shairiya, adaba fetareka áte \*Egdza á Dadaamiya palle ba n̄ane.

<sup>19</sup> Náwa názena ni watse emnde tá shá ngwada adaba n̄ane: Samsa parakkire á sem duniya, amá emnde a duniya yarnaaya, itare ta hayaa ba tabedammire, adaba shagerka názena tá maganá itare.

<sup>20</sup> Ma ware una á maga duksa shagerka na, wayaaka an parakkire d̄ekid̄eki, a hayaa ba n̄ja am tabedammire, geni a marseka parakkire shagerkire na á maganá n̄ane na.

<sup>21</sup> Amá edda una ni á maga duksa shagera wá, n̄ane á kátá ba parakkire, geni a naránna emnde shagerire-aara antara geni a diyareddiya emnde fesarfire na á maganá ge Dadaamiya.»

### *Ngahire á Yaisu an n̄ázá á Yuhanna slemaga baptisma*

<sup>22</sup> Am iga a una n̄anna maa, a tsetehe ge Yaisu antara pukura-aha, ta dem tate umele á ba am kwárá á Yahudiya n̄anna, hararaare jipu am tate n̄anna, ta magateraa baptisma ge emnde áhuwa.

<sup>23</sup> Yuhanna slemaga baptisma keni an̄kwa á magaterá baptisma ge emnde am ekse á Aynun herzhe an Salim, adaba kwakya yawe am tate n̄anna. Emnde kwakya tá dezejara, á magaterá baptisma.

<sup>24</sup> Adaba zlafe eksarvaaka Yuhanna á dem dangay am sarte n̄anna.

<sup>25</sup> Ay emnde umele am pukura-aha á Yuhanna, tá an̄kwa gajawe antara ura Yahudiya umele arge nade á Yahudiya-aha ge bára, lauktu tá shá cufed̄d̄ire áza Dadaamiya.

<sup>26</sup> Duwa-aatare á deza Yuhanna, «Malum yaikke», a ba itare tá elvan ge n̄ane, «Zhel na ndza á njá ázeña áte iga a guwa á Urdun, ndza ka ban̄eraa elva-aara na, zlafe an̄kwa emtu am ire á n̄a? Kwaye n̄ane keni an̄kwa á magaterá baptisma ge emnde, bad̄emme á emnde tá kela á ba dezejara.»

<sup>27</sup> A ba Yuhanna á elvan ge itare: «Baaka ura á shansha ba n̄ázara keni máki vanteka Dadaamiya.

<sup>28</sup> Náza-aaruwa wá, ba kure keni diyakurdiya. Adaba ya bakurnaa ba iya an we-aaruwa geni iya wá, ya Almasiihu-ka, amá ya slebela á Dadaamiya ge se tsatsanaa baráma ge \*Almasiihu.

<sup>29</sup> Diyakurdiya zhele á larusa wá, edda á mukse ba n̄ane. Náza á slákáte wá, n̄ane ba á njá átevege ura-aara zhele á larusa, á higa jipu ge cena kwárá á ura-aara máki á ndáhá elva. Ba duksa palle ge iya keni. Ya ba seke ura á zhele á larusa, kina ervaun̄de-aaruwa ba seke nama.

<sup>30</sup> Shagera ba á farfe ngahire-aara ge n̄ane, á gulá náza-aaruwa.»

### *Edda una a sawa am samaya*

<sup>31</sup> Edda una a sawa am samaya wá, bad̄emme á duksa á ba am erva-aara. Amá ura á duniya wá, n̄ane ba urimagwe, elva-aara keni á ndaha ba elva á duniya. Amá edda una a sawa am samaya wá, bad̄emme á duksa á ba am erva-aara.

<sup>32</sup> A ndáhá názena ni a nanaa n̄ane, antara názena ni a cenanaa n̄ane, amá baaka ura á cena elva-aara.

<sup>33</sup> Ma ware una a cenvaa elva-aara keni, edda-aara njantenja jirire á Dadaamiya.

<sup>34</sup> Slebela á Dadaamiya wá, á ndáhá ba elva á Dadaamiya, adaba Dadaamiya á vante Shedekwe-aara baaka zlakta-aara.

<sup>35</sup> Dadaamiya wá, wayetewáyá Egdza-aara, bademme á duksa a fanem am erva ba ge ɲane.

<sup>36</sup> Ma a fetaare ware áte \*Egdza á Dadaamiya keni shánsha shifa na á zleka na. Amá edda una fetarka áte ɲane wá, á shanka shifa, á segasheka edda-aara am ervaunɗe á Dadaamiya ɗekidɗeki.

## 4

### *Tara Yaisu an mukse á \*Samariya*

<sup>1</sup> Cenarácena \*Farisa-aha geni Yaisu anɗkwa á magaterá bapɗisma ge emnde kwakya, ma emnde keni vayya ba emnde-aara arge emnde á Yuhanna.

<sup>2</sup> Cenácena Yaisu elva-aatare bademme. Ge jirire wá, Yaisu an ire-aara magannaaka bapɗisma ge ura, tá maganá ba pukura-aha-aara.

<sup>3</sup> A cenaa ba elva á \*Farisa-aha ɲanna Yaisu wá, a naba tsete am kwará á Yahudiya ɲanna bademme, ge eptsa á dem kwará á Galili.

<sup>4</sup> Ge dem Galili ɲanna maa, sey á degáshe am huɗe á \*Samariya praatte.

<sup>5</sup> Daada am ekse umele tá ɗáhána an Sikar am kwará á Samariya maa, anɗkwa fe ndza a vantaa Yakubu ge egdza-aara Yusufa áte iga a ekse ɲanna.

<sup>6</sup> Anɗkwa suwa ndza a yanaa Yakubu werre am fe ɲanna. Daaci a duhe ge Yaisu, a de njehe áte we á suwa ɲanna aɗaba kuɗukkuɗe vuwa-aara ge zlalá. Am sarte ɲanna keni hyephye vacitire.

<sup>7</sup> Ay samsa mukse á emnde a Samariya a se ká yawe maa, «Viteva yawe yá shushe», a ba Yaisu á elvan ge ɲane.

<sup>8</sup> Am sarte ɲanna zlarzlará pukura-aha-aara, ta de shekwa náza za am huɗe á ekse.

<sup>9</sup> A ba mukse na á elvan ge ɲane: «Ká ura a Yahudiya ni, ká ndaviyu yawe ge iya ya mukse a Samariya? Yá vakteva ká essha?» (A ndaa una mukse na wá, aɗaba tá gyaaveka Yahudiya-aha antara Samariya-aha.)

<sup>10</sup> A ba Yaisu á elvan ge ɲane: «Ba diyanɗkire ka wá, ma andze diyakdiya duksa na ni á vaterta Dadaamiya ge emnde, antara edda una náwa á ndavaku yáwe á sha na wá, baira ma ká ndavanuwa ba ka, ma ká shánsha yawe na á fá shifa am ura na.»

<sup>11</sup> A ba mukse na á elvan ge ɲane: «Ká káná an uwe kwa eddaaye? Ganta á ɲa keni baaka, suwa sladɗe vayvaya, ká sháná estara yawe á shifa ɲanna ká ndaná ka na?»

<sup>12</sup> Ekka jakuje ge eggyeɲere Yakubu na a yanɗer suwa na emtu? ɲane, egdzara-aara ira walde-aha-aara bademme ta shaa ba yawe á suwa na!»

<sup>13</sup> A ba Yaisu á elvan ge ɲane: «Bademme á názena á shá yawe á suwa, ndera keni ba á wanwa zlaɓe ádaliye.

<sup>14</sup> Amá edda una a shu yawe na yá vanta ya wá, á wanka ndera mazla-aara. Aɗaba yawe ɲanna yá vantá ya na á de nyev suwa am ɲane, suwa ɲanna á vante shifa na á zleka na ge edda-aara.»

<sup>15</sup> A ba mukse na á elvan ge ɲane: «Viteva ka yawe ɲanna eddaaye, geni a wika ndera mazla-aara, yá shansha ire-aaruwa ge se ka yawe áhuna.»

<sup>16</sup> A ba Yaisu á elvan ge ɲane: «De ɗantedɗaha kwa zhele á ɲa, kwá sawa kerɗe.»

<sup>17</sup> «Baaka zhele-aaruwa», a ba mukse na á elvan ge Yaisu. «Baaka zhele á ɲa a ba ka na wá, ndaksenda jirire», a ba Yaisu á elvan ge ɲane.

<sup>18</sup> «Aɗaba zala-aha á ɲa miyenne ka gateraa ka wá, tá ilyeɓe, amá zhel na ká am mba-aara kina na zhele á ɲa ka. Baaka fida am elva á ɲa na.»

<sup>19</sup> A ba mukse na: «Kina wá, diyandiya ganakini ka nabi eddaaye.

20 Ká cenáncena emtu ndza ba werre keni eggye-aha á ñere ta kezlan ugje ge Dadaamiya á ba áte wa na náwa ñane na, amá á ba kure Yahudiya-aha sey Urusaliima palle una tate á kezlan ugje ge Dadaamiya.»

21 A ba Yaisu á elvan ge ñane: «Náwa yá ndaaka elva emmaaye, eccena ba shagera: Ankwa á sawa sarte umele wá, tate á kezlan ugje ge Dadaamiya watse áte wa na ka palle, am Urusaliima ka palle.

22 Kure Samariya-aha wá, ma kwá kezlan ugje ge ware keni diyakurka. Amá ñere Yahudiya-aha wá, diyañerdiya edda una ni ñá kezlan ugje ñere. Adaba slelya ura á jesaare á ba dagave á Yahudiya-aha.

23 Amá ankwa á sawa sarte umele, ba kina keni samsa sarte ñanna, emnde tá de kezlan ugje ge Dadaamiya na Dada ba ñane na, an hákuma á Shedekwe Cufedfe, tá de kezlan ugje á ba an jirire. Adaba Dadaamiya wá, á kátá emnde na ni tá kezlan ugje áte una ñanna.

24 Dadaamiya wá, Shedekwe, emnde na tá kezlan ugje keni a kezlarankezla an hákuma á Shedekwe Cufedfe, a kezlarankezla á ba an jirire.»

25 A ba mukse na á elvan ge ñane: «Diyandiya watse á sawa \*Almasiihu, watse á se palañernaapálá ñane sera á duksa bademme.»

26 A ba Yaisu á elvan ge ñane: «Ba iya Almasiihu ñanna yá ndaka elva na.»

27 Am sarte ñanna, pukura-aha á Yaisu keni saremsa mazla-aara. Tá maga najipu-aara itare, Yaisu ankwa á nda elva antara mukse na. Amá baaka ura a ndaana elva ge mukse na, geni ká kátá uwe ázenara, baaka edda una a banán ge Yaisu geni a jakurma uwe antara mukse na.

28 Daaci mukse na a naba belaa hwámá-aara áhuwa, a eptsehe á dem huđe á ekse, a ba ñane á elvan ge emnde:

29 «Sawmbare emtsaade, nawanaana zhele umele náwa ñane áhuna, a balise názena ndza ya maganaa ya bademme, watse \*Almasiihu ñara emtu estara?»

30 Estuwa kelá á emnde á sawa am huđe á ekse, tá ankwa deza Yaisu.

31 Am sarte na ni eptsapta mukse na á de dfaha emnde am huđe á ekse, a ba pukura-aha tá elvan ge Yaisu: «Sawa seke zuze egdza náza za malum!»

32 Amá a ñwaterante: «Ankwa náza zá-aaruwa, dafa na ni diyakurka kure na.»

33 A ba pukura-aha am dagave-aatare «Watse ankwa ura a sanaa náza za emtu?»

34 A ba Yaisu á elvan ge itare: «Náza zá-aaruwa ñanna wá, ba fansaare ge edda una a belibela na, antara mága slera na a fiyaara ñane na bademme.»

35 A ba ñane á elvan ge itare zlađe adaliye: «A ba palle á naraje-aha á kure: Zlađe a juwa tere ufađe lauktu tá ica hiya. Amá názena yá bakurná iya wá: Zharawanaazhárá emtsaade fe ba shagera, duksa bademme naavene kyañe, herzhe icica-aara.

36 Edda una á ica hiya wá, á ba ankwa mbera-aara, á jáhá hiya ñanna á dem tate á shifa na á zleka na. Daaci tara sleja hiya antara edda una á icica tá de higa bademme.

37 Ankwa naraje umele zlađe adaliye, a ba ñane: Á janá ura umele, icica keni á icaná ura umele. Naraje ñanna jire.

38 Ya belákuraa á de hala duksa am fe na magakurka slera am huđe-aara dfekideki, ta maganaa ba emnde umele, amá kwá tapaná kure emtakire á slera-aatare.»



<sup>39</sup> Kwakya emnde a \*Samariya na tá am ekse ñanna fartarfe áte Yaisu, adaba elva na a de baternaa mukse ñanna a ba ñane: «A balise názana ndza ya maganaa ya bademme.»

<sup>40</sup> Adaba una ñanna, am sarte na saremsa emnde a Samariya áseza Yaisu, ta enjála geni a haraare ázetáre. A naba eksarhe ge Yaisu, a gaa hare buwa.

<sup>41</sup> Emnde kwakya zlafe ádaliye fartarfe áte ñane, adaba názu ta cenanaa am waazu-aara.

<sup>42</sup> A ba itare tá elvan ge mukse na: «Kina wá, ñá fetaare adaba elva á ña ka palle, ñá fetaare áte ñane adaba ña cenevaa á ba an hyema á ñere elva am mbuwe-aara. Diyanjerdiya ba jirire geni slelya duniya ba ñane.»

### *Yaisu mbanaambe egdza á ura umele*

<sup>43</sup> Yaisu a magaa hare buwa am tate ñanna maa, mazla-aara a naba tse, a zlalá á dem kwará á Galili.

<sup>44</sup> Adaba ba ñane an ire-aara keni a bánba geni nabi á shanka ñgáhire am eksa-aara ba ge ñane.

<sup>45</sup> Amá ba daadá-aara am Galili wá, emnde a Galili ta lyiyanaa á ba an erva buwa, adaba itare keni ta duwa á de maga munri am Urusaliima, daaci naránna itare keni názena a maganaa Yaisu am munri ñanna bademme.

<sup>46</sup> Daaci Yaisu a daliye zlafe ádaliye á dem Kána, ekse na ndza a nyanve yáwe, a ganve mbazla am huđe-aara na. Ay anƙwa ura male, a fanaa ngumna, á njá am Kafarnahum maa, lapika egdza-aara.

<sup>47</sup> Cenáncena ura male na ganakini saasa Yaisu á sa am Yahudiya, anƙwa am Galili, a naba dezeńara: «Tasle á ña d'abidába á dem Kafarnáhum, ká de mbanaambe egdza-aaruwa, shifa a juwa ba cekwa am ñane», a bina.

<sup>48</sup> A ba Yaisu á elvan ge ñane: «Palle ura á fetaare áte ya am dagave á kure na baaka defid'eki, máki nakuránka najipu-aha.»

<sup>49</sup> A ba zhel na: «Mi zlala kwa á dem mba-aaruwa Yaakadada, a zlauka shifa am egdzere!»

<sup>50</sup> «Ezzlalá á dá, baaka duksa áte egdza á ña», a ba Yaisu á elvan ge ñane. Ñane a naba fetaarehe áte elva na a ndaana Yaisu na, a naba dá-aara.

<sup>51</sup> Ñane keni anƙwa á da wá, ta jaa ire antara walaad'i-aha-aara, «Mbaambe egdzere ba lapiya layye», a ba itare tá elvan ge ñane.

<sup>52</sup> A ndavateruhe: «A shánaa am sarte-ara ñgulmire?» A ba itare tá elvan ge ñane: «Deydey zura awaya wá, belanaabelá zlagzlagi.»

<sup>53</sup> Amá eddarge egdzere wá, a naba diyeddiye geni egdzere a mbe á ba am sarte na a bannaa Yaisu ezzlalá á dá, baaka duksa áte egdze á ña na. Daaci ñane antara huđe á há-aara bademme fartarfe áte Yaisu.

<sup>54</sup> Kwaya ñane buwire á najipu na a maganaa Yaisu am kwará á Galili, a maganaa am sarte na saasa á sa am Yahudiya.

## 5

### *Yaisu mbanaambe ura nguryekwe*

<sup>1</sup> Am iga á una ñanna maa, gyaregya munri á nadina am Urusaliima, tá anƙwa duwa Yahudiya-aha. Yaisu keni a duhe.

<sup>2</sup> Urusaliima wá, an bela am dala bademme an wakiya-aha gergere. Anƙwa derve yaikke herzhe an wakiya na tá d'aháná an wakiya á kyawe-aha na. Ta jantaave ge derve ñanna an bere-aha ilyebe. Zhera á derve ñanna Baytijaata an elva á Ibraniƙau-aha.

<sup>3</sup> Daaci baɗemme á ekte á bere-aha ɲanna ba emnde na lapika vuwa-aatare, wulfe-aha, emnde a dere, antara ɲguryekwe-aha. ((Tá ufa gejava á derve ɲanna.

<sup>4</sup> Aɗaba an wapaka, á tsekwa malika á Dadaamiya á sem derve ɲanna, daaci baɗemme á yáwe á gejava. Daaci am iga á gejava á yáwe ɲanna, ma a tsekwemaa ware zunɲwe keni á mbembe edda-aara ma á waná uwe keni.))

<sup>5</sup> Anɲkwa ura umele á ba am dágage-aatare ɲanna, yáwe kul keye ju tiise á ba áte lapikere.

<sup>6</sup> Am sarte na damda Yaisu, á zhárá zhel ɲanna á zlava. Am diyaadiya ganakini haraare lapikere-aara, a naba ndaan elva: «Wayak-wáyá emtu ká mbembe ba lanɲe?», a ba ɲane, á elvan ge ɲane.

<sup>7</sup> A ba zhel na á elvan ge ɲane: «Á eksitá ware-aaruwa kwa á dem derve am iga a gejava á yáwe malum-aaruwa? Ba kelaa má yá wava ge duwa, caare ba damda ura umele zunɲwe arge iya.»

<sup>8</sup> A ba Yaisu á elvan ge ɲane: «Ettse, faɗantefáɗá buce á ɲa, ezzlálá á da.»

<sup>9</sup> Kertenɲ a naba mbehe, a tsetehe, a faɗante buce-aara, anɲkwa á zlálá ba uwe keni á maganka.

Amá vacite ɲanna wá, kwaskwe á puwansepuwe.

<sup>10</sup> Aɗaba una ɲanna, a ba male-aha á Yahudiya-aha tá elvan ge zhel ɲanna: «Vatena kwaskwe á puwansepuwe, an piya am \*tawraita ganakini ká sepa buce á ɲa vatena ge da.»

<sup>11</sup> A ba zhel na á elvan ge itare: «Iya a binaa ba edda una a mbiyaahe na ettse, faɗantefáɗá buce á ɲa, ezzlálá á dá.»

<sup>12</sup> Ta ndavanuhe, a ba itare tá elvan ge ɲane: «Ware ɲane edda una ni a bakaa faɗantefáɗá buce á ɲa, ezzlálá na?»

<sup>13</sup> Zhel na a mbanaa Yaisu na keni, diyaaka edda una ni a mbanaa am lapikere ɲanna. Aɗaba a zlálá watsewatse Yaisu am tate ɲanna, a kuva kwakyire á emnde.

<sup>14</sup> Shekwaashekwa maa, Yaisu a duhe ádeza dawale ɲanna am \*mashidi yaikke. A ba ɲane á elvan ge ɲane: «Kina wá, mbákmbe. Manɲka haypa mazla-aara geni a shaɲka una jauje ge una ɲanna.»

<sup>15</sup> Mazla-aara a naba disehe geni ndza a tsantaa ɲane áte lapikere na, a de ba áza mala-aha á Yahudiya-aha, a ba ɲane á elvan ge itare: «Ndza a mbiyaa ba Yaisu am lapikere-aaruwa.»

<sup>16</sup> Aɗaba una ɲanna, male-aha á Yahudiya-aha ta naba gwarhe ge Yaisu an elva, geni a magán ge uwe una an kwaskwe á puwansepuwe.

<sup>17</sup> Amá a ba Yaisu á elvan ge itare: «Edderwa wá, ma vaatara keni á maga ba slera. Aɗaba una ɲanna, iya sey ba yá emmaga.»

<sup>18</sup> Elva-aara ɲanna a de vaterte ba ɲgwáɗáwa zlaɓe ádaliye geni sey tá janaaja shifa-aara. Aɗaba a ba itare: «Faaka zherwe áte kwaskwe á puwansepuwe-ka palle, a bantsa ɲane, Dadaamiya Eddenɲara, a ganve ire-aara kalkale an Dadaamiya.»

### *Hákuma á \*Ura á emnde baɗemme*

<sup>19</sup> A ba Yaisu á elvan ge itare zlaɓe ádaliye: «Yá ndaakur ba jirire: Baaka názu yá maganá iya an ire-aaruwa ya Egdzere, sey ya naaná á ba áza Edderwa. Baɗemme á názena ni á maganá Dada, Egdzere keni á maga ba ɲane una ɲanna.

<sup>20</sup> Adaba Dada wayawáyá jipu an Egdza-aara. Ankwa á kwaranse názena á maganá nane bademme. Duksa yaikke a jauje ba ge una keni watse á kwaransekware. Á tsaame najipu na watse kwá maganá kure.

<sup>21</sup> Ba seke una ni Edderwa ankwa á tsatertetse emnde na ba seke tá an emtsa, ankwa á vaterte shifa na wá, Egdza-aara keni ba estuwa, a naba vante shifa ge edda una á kataná nane.

<sup>22</sup> Baaka edda una ni á de kyáná Edderwa shairiya-aara. Bademme á shairiya a fanem am erva ge Egdza-aara.

<sup>23</sup> A magaa una geni emnde bademme a farfa zherwe áte Egdza-aara keni, ba seke una tá ankwa fáná áte nane na. Edda una faaka zherwe áte Egdzere wá, faaka á ba áte Eddenara na a belanaa na nane na.

<sup>24</sup> «Yá ndaakur ba jirire: Ma ware una a cenvaa elva-aaruwa, a fetaarehe áte edda una a belibela na, edda-aara shánsha shifa na á zleka na. Baaka shairiya áte edda-aara dekideki, nane dedde am emtsa, daada am tate á shifa na á zleka na.

<sup>25</sup> Yá ndaakur ba jirire: Ankwa á sawa sarte umele, ba kina keni ba seke samsa. Am sarte nanna wá, emnde na ba seke tá an emtsa na watse tá cenáncena kwára á \*Egdza á Dadaamiya. Ma a cenanaa ware kwára-aara keni á gevge an shifa.

<sup>26</sup> Ba seke una ni an hákuma Edderwa ge tsante ura, á gev an shifa na wá, a vante hákuma ge Egdza-aara keni, geni á tsante ura, á ganve an shifa.

<sup>27</sup> A vante hákuma á kyá shairiya ge Egdza-aara keni, adaba Egdza-aara nanna \*Ura á emnde bademme.

<sup>28</sup> Magauka najipu á una nanna dekideki. Adaba ankwa á sawa sarte umele, ba emnde na tá an emtsa, tá am irekhye keni, watse tá cenáncena kwára-aara,

<sup>29</sup> watse tá sesse. Emnde na ni ndza ta magaa shagerire na, watse tá tse ge shaa shifa na á zleka na. Amá emnde na ndza ta magaa shagerkire wá, itare watse tá tse ge dem zlada.»

### *Seyde-aha á Yaisu \*Almasiihu*

<sup>30</sup> A ba Yaisu zlafe ádaliye: «Iya an ire-aaruwa wá, ba uwe keni yá dzegwánka emmága-aara, sey má biyánba Dadaamiya. Daaci shairiya na yá kyáná ya wá, shairiya a jirire. Adaba yá kyáná áte una yá kataná ya-ka, yá kyáná áte una á kataná edda-una a belibela.

<sup>31</sup> Máki ya seyde á ire-aaruwa ba iya, tá dise estara kena emnde jirire-aaruwa?

<sup>32</sup> Amá ankwa ura umele sleseyde-aaruwa nane. Diyandiya seydire na á maganá nane áte ya jirire.

<sup>33</sup> Ndza kwa belaa emnde á deza Yuhanna, nane keni maganaamaga seydire áte edda una ni nane jirire na.

<sup>34</sup> Yá ankwa sá elva á Yuhanna antara seydire-aara á sem ire á kure na wá, ba geni kwá shánsha sawari, kwá lyelya shifa á kure. Iya ya baaka an wedere á seydire na á maganá urimagwe áte ya.

<sup>35</sup> Yuhanna wá, nane ndza ba seke parakkire, ndza á mbe am dágave á kure, ndza kwa higa an nane am sarte cekwaanjudi.

<sup>36</sup> Iya wá, ankwa seydire yaikke áte ya, jauje ge una a maganaa Yuhanna. Slera na a beliyaa Edderwa ge nane, yá ankwa maganá ya na wá, á maganá ba slera-aaruwa nanna seydire áte ya, geni ya slebela á Dadaamiya.

<sup>37</sup> Ba Edderwa ɲanna a belibela na keni maganaamaga seydire-aara áte ya, amá kure cenakuránka kwárá-aara, nakuránka ɲane an ice á kure keni.

<sup>38</sup> Daaci ɲakurnaaka elva-aara am kure, adaba fakurtarka áte Egdza-aara na a belanaa ɲane.

<sup>39</sup> Kwá anƙwa ndá wakita á Dadaamiya, adaba anƙwa am ire á kure geni watse kwá shá shifa na á zleka na. Ay degiya wakita á Dadaamiya ɲanna á ndá ba elva-aaruwa.

<sup>40</sup> Aley kure wayakurka sezerwa ganakini kwá shánsha shifa ba jirire.

<sup>41</sup> «Yá kátá yaikkireka ya áza emnde.

<sup>42</sup> Amá duksa palle wá, am ervaunƙe á kure wá, wayakurka kure an Dadaamiya deƙideƙi.

<sup>43</sup> Iya, ya sawa an elva á Edderwa, liyakurika deƙideƙi, amá má samsa ura umele á ba an ire-aara wá, kwá ellyiya.

<sup>44</sup> Ma ware á kure keni á kátá ba gálá áza emnde, kwá paŋka ni á galákurá ba Dadaamiya palle. Ay una ni, kwá fetaare estara kena áte ya?

<sup>45</sup> Amá bawánka zlaƙe am ervaunƙe á kure, geni watse yá de icakuraare sera áza Edderwa. Edda una watse á de icakuraare sera wá, Muusa na kwa fetaare kure an ɲane na.

<sup>46</sup> Amá ma andze fakurtarfe áte Muusa ba jirire wá, iya keni ma kwá fetarfe áte ya. Adaba názena a puwetaa Muusa na á ndá ba elva-aaruwa.

<sup>47</sup> Am fakurtareka áte názena a puwetaa ɲane, kwá fetaare estara kena áte elva na yá ndaná ya?»

## 6

### *Yaisu a zateru náza zá ge zala debu ilyebe*

*(Mat. 14:13-21; Mark. 6:30-44; Luka 9:10-17)*

<sup>1</sup> Am iga á una ɲanna maa, a tsetehe ge Yaisu, a zlalehe a dete iga a guwa á Galili. Tibariyas keni tá dáhá ba háye na am guwa ɲanna.

<sup>2</sup> Emnde kwakya ta dábemhe á dem tate ɲanna, adaba naránna najipuhaha na a maganaa ɲane, a naba mbateraaha emnde na lapika vuwa-aatare.

<sup>3</sup> Yaisu antara pukura-aha-aara ta dāletaa áte egdza wa, ta de njehe.

<sup>4</sup> Muŋri á Yahudiya-aha na tá dānā an \*Paska na keni herzhavteherzhe.

<sup>5</sup> Yaisu a kante ice wá, á zhárá ba dikele á emnde tá anƙwa deƙera. A ba ɲane á elvan ge Filip: «Mí de sháná áme náza zá na á se hyaterhye ge emnde na?»

<sup>6</sup> A ndán ba ge cena názu am mbuwe á Filip ka wá, ɲane diyaadiya názena ni watse á maganá ɲane.

<sup>7</sup> A ɲwanante ge Filip, a ba ɲane á elvan ge ɲane: «Ma mi shekweve náza zá á gursa deremke keni á hyeteka deƙideƙi áte emnde, máki má kátá ma ware-aatare keni a shánsha cekwa.»

<sup>8</sup> A ba Andere egdza emmeƙara ge Simaun Piyer, palle á pukura-aha-aara, a ba ɲane á elvan ge ɲane:

<sup>9</sup> «Náwa anƙwa egdze umele áhuna an depain ilyebe antara kelfe buwa, amá keni á magaterá uwe kena ge dikele á emnde na?»

<sup>10</sup> Daaci a ba Yaisu á elvan ge pukura-aha-aara: «Bawateránba ge emnde a njarinja bademme áte másá.» Adaba kwakya másá am tate ɲanna shagera ge nja átekwa. Tá naba njehe ge emnde, kezlakula á zála á maga debu ilyebe.

<sup>11</sup> Yaisu a lyevaa depain na, a slafan we-aara ge Dadaamiya, daaci a kazlanve, a tegateraa ge emnde na tá njanja áte másá na. Arge kelfe keni a magán ba estuwa. Bademme á emnde zaruze á ba áte huƙe-aatare.

<sup>12</sup> Hyaterhya ge emnde bademme maa, a ba Yaisu á elvan ge pukura-aha-aara: «Jawanmárje ge jugena-aara na bademme, a badzevka ba palle keni.»

<sup>13</sup> Depaiŋ ilyebe ɲanna á hyaterhe ge emnde, baira jauje. Jarantejáhá jugena-aara, a netaa keday sadafde kelaawa ju buwa.

<sup>14</sup> Naránna emnde najipu na a maganaa Yaisu maa, a ba itare ba parakke: «Zhel na wá, ba jirire ba ɲane nabi na ta bantsa watse á sawa á sem duniya na.»

<sup>15</sup> Daaci diyeddiye Yaisu ganakini watse tá se fáná am sleksire á ba áte laarire, a zlalehe zlaɓe ádaliye á dete ire á egdza wa, ba ɲane palle.

*Yaisu á zlala an sera áte haya.*

*(Mat. 14:22-23; Mark. 6:45-52)*

<sup>16</sup> Eblyabelya vaciya maa, ta tsekwese ge pukura-aha-aara á sawa áte wa, ásete we á haye,

<sup>17</sup> ta demhe am paare á yawe ge dem Kafarnáhum. Gevge vayiya, amá zlaɓe samka Yaisu emtsaade.

<sup>18</sup> A tsetehe ge válale, bademme á haye á vaza.

<sup>19</sup> Bakarvaabáká paare, á maga kilaumaiter ilyebe, ma unƙwahe keni wá, tá zhárá ba Yaisu am iga-aatare, á zlála áte yawe, á dezetare tá am paare na. Daaci bademme-aatare ɲáteráɲa lyawa.

<sup>20</sup> Amá «A wakurka lyawa,» a ba Yaisu á elvan ge itare, «degiya ba iya.»

<sup>21</sup> Ba itare keni varanteve baráma ge dem paare wá, tá zhárá ba tá áte we á guwa am tate na tá kátá demkwa itare na.

*Emnde tá anƙwa a tataya Yaisu*

<sup>22</sup> Mákuralla-aara maa, ba kelaa á emnde na ta geyaa áte iga a guwa na, ta fantau ge tataya Yaisu. Amá diyardiya ganakini ndza baaka paare umele defideki am tate ɲanna, sey ba palle na ta zlalaa pukura-aha an ɲane na. Diyardiya geni damka Yaisu am paare ɲanna.

<sup>23</sup> Daaci ta naba demhe ge paare-aha umele á da am Tibairiyas á ba á dem tate ɲanna Yaakadada a slafanaa we ge Dadaamiya arge náza za, a hyaterhe an ɲane na.

<sup>24</sup> Emnde tá ezzhara wá, ma Yaisu, ma pukura-aha-aara keni bademme ta baaka. Ta naba demhe am paare-aha ɲanna, ta zlála á dem Kafarnahum, ta de zharanaa áhuwa.

*Yaisu dafa na á fá shifa á jirire am ura*

<sup>25</sup> Sawa-aatare wá, ta se bera Yaisu áte we á guwa. Ta ndavanuhe, a ba itare: «Ka sawa vaatara á sehuna Malum?»

<sup>26</sup> A ba Yaisu á elvan ge itare: «Yá ndaakur ba jirire: Kwá tatayiyá adaba ba náza za na ya zukurwa ya, kwa yanaa ba kure na. Cenakuránka ba názara keni am názena yá kátá bakurná ya an najipu-aaruwa.

<sup>27</sup> Shunɲulauka náza za na á shekwaaka bádza na, shunɲulaushunɲula una á badzeka defideki, á vante shifa na á zleka na ge ura. Náza za ɲanna yá vakurta ba iya \*Ura á emnde bademme, yá vakurte an hákuma na a vita Edderwa Dadaamiya.»

<sup>28</sup> Ta ndavanuhe, a ba itare tá elvan ge ɲane: «Ŋá shunɲula slera-ara una á kataná Dadaamiya na?»

<sup>29</sup> A ɲwaterante, a ba ɲane «Náwa slera na á kataná Dadaamiya ázekure: slera á kure wá, ba kwá fetare áte edda una a belanaa ɲane.»

<sup>30</sup> A ba itare tá elvan ge ɲane: «Máki estuwa wá, maraɲeránmárá najipu na ni ɲá diyakse átekwa geni a belakaa Dadaamiya, ɲá nanaana an ice á ɲere, lauktu ɲá faktarfe.



<sup>31</sup> Werre wá, eggye-aha á ñere ndza zaruze mannu am kaamba, anƙwa elva-aara am wakita á Dadaamiya, a ba ñane: A vaterte náza za á sawa am samaya.»

<sup>32</sup> A ba Yaisu á elvan ge itare: «Degiya ba mannu ñanna keni ndza a vakurtaa Muusa ka, amá náwa Edderwa anƙwa á vakurte náza za á jirire á sawa am samaya.

<sup>33</sup> Adaba náza za na ni á vakurta Dadaamiya na wá, ba ñane edda una a sawa am samaya na. Á vanterta ba ñane shifa ge emnde.»

<sup>34</sup> Daaci a ba itare tá elvan ge ñane: «Malum, vanjerteva náza za ñanna ba kelaazare.»

<sup>35</sup> A ba Yaisu á elvan ge itare: «Ba iya una ya dafa na á vante shifa ge ura. Ma ware una a sezerwa, a fetarhe áte ya, á wanka waya antara ndera dƙeƙeƙe.

<sup>36</sup> Ya ndakurndáha tsa, kure keni nakurina tsa, aley fakurtareka áte ya.

<sup>37</sup> Baɗemme á emnde na ni a vitaa Edderwa na watse tá sáwá ázerwa. Ma a semaa ware á sezerwa keni yá banka dƙeƙeƙe.

<sup>38</sup> Adaba sanká á sawa am samaya ge se maga názena yá kataná ya, amá názena á kataná edda una a belibela.

<sup>39</sup> Náwa názena ni á kataná edda una a belibela na: Emnde na ni a vitá ñane na, yá keɗanaaka ba palle keni. Am halavuwa á duniya, yá tsatertetse baɗemme am faya.

<sup>40</sup> Názena á kataná Edderwa wá, baɗemme á emnde na ni ta naa ya Egdza-aara, ta fetarhe áte ya na, tá shansha shifa na á zleka na. Am halavuwa á duniya, yá tsatertetse am faya.»

<sup>41</sup> Daaci farantaufe Yahudiya ge wessa elva áte Yaisu, adaba a bantsa ñane: «Ya náza za na a tsekwa á sawa am samaya.»

<sup>42</sup> Ta bantsa itare: «Abi Yaisu ñara ba ñane, ba ñane una egdza á Yusufa? Diyanerdiya tara eddenjara an emmenjara. Ay ni a ba ñane a sawa am samaya?»

<sup>43</sup> A ba Yaisu á elvan ge itare: «Weshauka elva am dáɗave á kure ba dey.

<sup>44</sup> Baaka ura á dzegwándzegwa ba ñane an ire-aara sezerwa, sey á taɗáná Edderwa na a beliyaa á sem duniya na. Ma ware una a sezerwa keni sey yá tsantetse am faya am halavuwa á duniya.

<sup>45</sup> Anƙwa puwatepuwa nabi-aha, a ba itare: Dadaamiya watse á kwaratersekware ba ñane elva-aara ge emnde. Daaci edda una máki faafa hyema am elva á Edderwa ñanna, lyevaalya wá, ñane á sáwá ásezerwa.

<sup>46</sup> Una á banka ganakini anƙwa ura nanna Dadaamiya. Baaka dƙeƙeƙe. Sey edda una a sawaa am samaya na. Ñane wá, nanna adaba Eddenjara.

<sup>47</sup> «Yá ndaakur ba jirire: Ma a fetaare ware áte ya keni, shánsa shifa na á zleka na.

<sup>48</sup> Ba iya una ya dafa na á fá shifa á jirire am ura na.

<sup>49</sup> Eggye-aha á kure ta zu dafa na tá ɗaná an mannu na am kaamba, aley keni ba emtsaremtsa.

<sup>50</sup> Amá náwa dafa na ni a tsekwa á sawa am samaya, ma a zuwaa ware dafa ñanna keni a emtseka dƙeƙeƙe.

<sup>51</sup> Ba iya una ya dafa ñanna a tsekwa á sawa am samaya, á vante shifa ge ura na. Ma a zuwaa ware dafa ñanna keni á shánsa shifa na á zleka na. Dafa ñanna yá vantá ya na wá, vuwa-aaruwa ba ge iya, yá vanterte ge emnde a duniya baɗemme, ganakini tá shánsa shifa an ñane.»

<sup>52</sup> Elva ñanna a tsante elva yaikke am dáɗave á Yahudiya-aha. A ba itare am dáɗave-aatare: «Á vamite estara vuwa-aara geni mí ezza na?»

<sup>53</sup> A ba Yaisu á elvan ge itare: «Yá ndaakur ba jirire: Máki zakuruka hyuwa á vuwa-aaruwa, shakuruka uzhe-aaruwa, iya \*Ura á emnde bademme, kwa baaka an shifa am kure dekideki.

<sup>54</sup> Edda una á zá hyuwa á vuwa-aaruwa, á shá uzhe-aaruwa keni wá, shánsha shifa na á sleka na, am halavuwa á duniya yá tsantetse edda-aara am faya.

<sup>55</sup> Adaba ba iya una ya dafa á jirire, uzhe-aaruwa keni náza shá á jirire.

<sup>56</sup> Daaci ma ware una ankwá á zá hyuwa á vuwa-aaruwa, ankwá á shá uzhe-aaruwa, edda-aara nanna slenja á ba áte vuwa-aaruwa, iya keni yá ankwá antara nane.

<sup>57</sup> Edderwa na a beliyaa nane na wá, edda á shifa ba nane, a njiyaa ba nane an shifa. Ba duksa palle ge edda una á zá hyuwa á vuwa-aaruwa keni, yá njanaanja edda-aara an shifa.

<sup>58</sup> Una nanna dafa á jirire na ni a tsekwaá á sawa am samaya; gergere antara una ndza ta zanaa egghe-aha á kure am kaamba werre. Itare sharánka shifa a jirire an nane. Amá dafa na yá teganá ya wá, ma a zuwaa ware keni á shá shifa na á zleka na an nane.»

<sup>59</sup> Elva-aha nanna a kwaratersaa Yaisu ge emnde am \*mashidi á Yahudiya-aha am Kafarnahum.

### *Elva na á fá shifa a jirire am ura*

<sup>60</sup> Am iga a elva nanna maa, emnde kwakya á ba am emnde a dafa Yaisu, ta bántsa: Elva na degdege, á dzegwánka ura.

<sup>61</sup> Nánna Yaisu ganakini tá wessa elva emnde a dafa nane am dagave-aatare, a ba nane á elvan ge itare: «Á wákurá ba elva-aaruwa na emtu am ervaunde?

<sup>62</sup> Má watse nakuránna ankwá á zlalá \*Ura á emnde bademme á dem tate na ndza a sawa átekwa mu, watse kwá bá uwe?

<sup>63</sup> Á vantá ba Shedekwe á Dadaamiya shifa ge ura. Slera á emndimag-waha an ndzefa-aatareka una. Daaci elva-aaruwa na yá ankwá á bakurná ya na wá, Shedekwe nara ba nane, shifa nara ba nane.

<sup>64</sup> Amá tá ankwá emnde na fartarka am dágave á kure.» Adaba á ba am fantaufe keni Yaisu diyaadiya emnde na watse tá fetareka na, diyaadiya edda una watse á de vela nane keni.

<sup>65</sup> A farhe zlafe adaliye, a ba nane: «Ya bakurnaa adaba una nanna, a ba iya, baaka ura á dzegwándzegwa ba nane an ire-aara sezerwa, sey máki a tafanaa Edderwa.»

<sup>66</sup> A fantau á ba am sarte nanna, emnde a fetarfe kwakya ta yaa dafa Yaisu, zlalarka antara nane mazla-aara.

<sup>67</sup> A ba Yaisu á elvan ge pukura-aha-aara kelaawa ju buwa: «Kure keni kwá kátá yiya emtu?»

<sup>68</sup> A nwanante ge Simaun Piyer, a ba nane á elvan ge nane: «Yaakadada, ná shá shifa na á zleka na á ba am elva á nja palle, ná de dafa ware umele?

<sup>69</sup> Nere wá, fanertarfe. Adaba diyanerdiya ganakini ba ka una ka sáwá áza Dadaamiya, ka cudedde.»

<sup>70</sup> A ba Yaisu á elvan ge itare: «Kwa emnde kelaawa ju buwa na, ábi ya dzerakursaa ba iya? Ay ankwá ura palle am kure, nane ura á shaitaine.»

<sup>71</sup> Una nanna wá, a ndanaa áte Yahuda egdza á Simaun Iskariyaut. Adaba Yahuda nanna, nane keni ba palle á pukura-aha á Yaisu kelaawa ju buwa tsa, amá a velanaa ba nane Yaisu.

## 7

*Egdzar mama-aha-ɲara ge Yaisu fartareka áte ɲane*

<sup>1</sup> Am iga á una ɲanna maa, Yaisu aɲkwa á já ɗaba á ba am kwára á Galili, wayaaka de nja am Yahudiya mazla-aara, aɗaba Yahudiya-aha tá aɲkwa tsagwaɗa ba ɲane ge ja ba shifa-aara.

<sup>2</sup> Herzhapteherzhe muɲri á Yahudiya-aha na tá ɗahána an muɲri á \*bere á kacakaca maa,

<sup>3</sup> a ba egdzar mama-aha-ɲara tá elvan ge ɲane: «Yánya ɗágave na mazla-aara, tsetse ezzlálá á dem Yahudiya, a de naránna emnde á ɲa na tá áhuwa keni slera á ɲa.

<sup>4</sup> Aɗaba edda una ni á kátá emnde baɗemme tá diyeddiye ɲane wá, á shebeka ire-aara. Ábi ká maga najipu-aha á ba ka? Shagera ba ká de maganaamaga una ɲanna á katafke á nalga á emnde wá, lauktu tá diyaksediye.»

<sup>5</sup> Ba egdzar mama-aha-ɲara keni fartareka áte ɲane ɗekideki.

<sup>6</sup> A ba Yaisu á elvan ge itare: «Náza á kure wá, ma sarte-ara keni baɗemme ba shagera. Iya wá, yá duka á dem muɲri ɲanna, aɗaba zlaɓe samka sarte-aaruwa emtsaade.

<sup>7</sup> Kure wá, emnde a duniya tá dzegwánka fákurá áte kelaadire. Amá iya wá, wayarika emnde a duniya, aɗaba yá mára shagerkire á slera-aatare á segashe.

<sup>8</sup> Ekkure wá, daumbare á dem muɲri. Amá iya wá, yá duka aɗaba zlaɓe samka sarte-aaruwa emtsaade.»

<sup>9</sup> A ndaterse una ɲanna, a njehe am kwára á Galili, ɲane zlalaaka.

*Yaisu am muɲri á \*bere-aha á kacakaca*

<sup>10</sup> Zlarzlálá egdzar mama-aha-ɲara á de zá muɲri ɲanna maa, shebanve ire-aara atuge ice-aatare ɲane keni a duhe á dem muɲri ɲanna, amá wá, marateranka ire-aara ge emnde.

<sup>11</sup> Male-aha á Yahudiya-aha tá aɲkwa tataya ba Yaisu am muɲri ɲanna, tá aɲkwa enndáwa am ɗágave á emnde: «Kwa naaná áme Yaisu?»

<sup>12</sup> Daaci baɗemme á emnde am muɲri ɲanna, tá ndáhá ba elva á Yaisu am ɗágave-aatare an gá kwára. A ba emnde umele: «Yaisu ɲanna wá, ura maggwe.» A ba emnde umele: «Zhel ɲanna slekeɗa emnde.»

<sup>13</sup> Amá baɗemme á una ɲanna tá ndaaná á ba an ila, aɗaba tá kuva a cenaráterka male-aha á Yahudiya-aha.

<sup>14</sup> Amá am ɗagave á muɲri wá, tá zhára ba ɗámda Yaisu á dem \*mashidi yaikke am Urusaliima, aɲkwa á ndater elva ge emnde.

<sup>15</sup> Tá maga ba najipu-aara Yahudiya-aha. Ta bántsa itare: «Zhel na mu a shanaa áme ɲane diya estuwa na, wallá a ndaase laya á malumireka, uweka?»

<sup>16</sup> A ba Yaisu á elvan ge itare: «Elva na yá tsakaná ya na wá, yá ndaaná ya an ire-aaruka, elva-aha ɲanna á sáwá áza Dadaamiya na a belibela na.

<sup>17</sup> Edda una ni á kátá mága názena á kataná Dadaamiya wá, á naba diyeddiye elva-aaruwa na, tara a sawa áza Dadaamiya, an tara yá ndaaná ba iya an ndzeɗa-aaruwa keni.

<sup>18</sup> Edda una ni á ndáhá ba elva á ire-aara, á kataná yaikkire ge ire-aara. Amá edda una á kataná yaikkire ge edda una a belanaa ɲane wá, slejirire ba ɲane, baaka zlerma am ɲane ɗekideki.

<sup>19</sup> Sakuránka Muusa \*tawraitu emtu? Ay ábi ba palle á kure keni baaka edda una ɗabátedɗaba shairiya-aha na am huɗe-aara. Ya gu uwe kena kwá kátá jija na?»

<sup>20</sup> A ba emnde na tá am jáháva, tá elvan ge Yaisu: «Ká an shaitaine emtu? Ware ñane á kátá jagja na?»

<sup>21</sup> A ba Yaisu á elvan ge itare: «Ya magaa ba slera palle an kwaskwe á puwansepuwe, amá bademme á kure kwá maga ba najipu-aara.

<sup>22</sup> A ba Muusa am \*tawraitá wá: Kwá belá egdzere am shedekwe am hare ge tiisire. Ge jirire wá, a fantauwa Muusa ka, ta fantau am eggye-aha á kure werre. Adaba elva á Muusa ñanna wá, kwá anjka belá egdzere am shedekwe ma an kwaskwe á puwansepuwe keni.

<sup>23</sup> Má kwá anjka maga una ñanna an kwaskwe á puwansepuwe geni a badzevka tawraitá á Muusa, sakwa ura lapika vuwa-aara emtu? Labára kwá ica ervaunđe áte ya geni labára ya mbá ura an kwaskwe á puwansepuwe, ura lapika vuwa-aara tsa?

<sup>24</sup> Yawánya mága jeba una. Zharauka kure názena áte iga na, amá magaumága jirire.»

*Watse ba Yaisu una \*Almasiihu na emtu?*

<sup>25</sup> A ba emnde a Urusaliima: «Edda una tá tatayán ge ja ba shifa-aara na ñane ka una?

<sup>26</sup> Anjka á ndá elva-aara ba parakke mazla-aara, baaka ura á piyan-tepiya. Watse diyareddiye male-aha á miya ganakini ba ñane una \*Almasiihu ka?

<sup>27</sup> Amá keni estuweka. Má watse samsa Almasiihu wá, watse baaka ura á diyeddiye tate na a sawa átekwa. Amá náza á zhel na diyamidiya bademme tate na ni á sawa ñane átekwa.»

<sup>28</sup> Am sarte ñanna maa, Yaisu anjka á ndater elva ge emnde am \*mashidi yaikke. A kante kwará, a ba ñane á elvan ge itare: «Kina diyakuridiya emtu ba jirire? Diyakuridiya emtu tate na ya sawa átekwa? Iya wá, sanká ba ya an ire-aaruwa, anjka edda una a belibela, diyakurka ba kure. Edda-aara ñanna ura jirire seke ñane baaka.

<sup>29</sup> Iya wá, diyandiya edda-aara, adaba ya sawa ázenjara, a beliyaa ba ñane.»

<sup>30</sup> Tá kátá ekseksa, amá baaka ura dzegwándzegwa fanve erva, adaba zlafe samka sarte-aara.

<sup>31</sup> Mbate kwakya emnde na fartarefe áte ñane am jáháva ñanna. Ta bantsa itare: «Una ni ta bantsa watse á sawa \*Almasiihu umele, á se maga najipu-aha na á jauje ge náza á zhel na zlafe adaliye?»

*Kwakwane-aha á \*Farisa-aha antara male-aha á \*liman-aha tá de eksa Yaisu*

<sup>32</sup> Cenarácena \*Farisa-aha elva na tá anjka ndaaná emnde áte Yaisu an ila maa, ta naba magaa sawari antara male-aha á \*liman-aha, daaci ta naba puwaa emnde a ufa mashidi á de eksa Yaisu na.

<sup>33</sup> Náanna Yaisu estuwa, a ba ñane á elvan ge emnde: «Iya wá, yá haraaka kwakya ázekure mazla-aara, yá eptsa ádeza edda una a belibela na.

<sup>34</sup> Watse kwá tatayitátaya, amá watse kwá shika, adaba kwá taa daaka á dem tate na yá detekwa ya.»

<sup>35</sup> A ba Yahudiya-aha am dágave-aatare: «Watse á deme kena ñane ni, miya mi taa daaka na? Watse á zlalá ádeza Yahudiya-aha á miya na zlararzlálá á dem dágave á Yunaniñkau-aha na, ge magateraa waazu ge Yunaniñkau-aha ka?

<sup>36</sup> Elva na a bantsa ñane ni, watse kwá tatayitátaya, amá watse kwá shika, adaba kwá taa daaka á dem tate na yá detekwa ya, a ba ñane na mu, á kátá ba uwe ñane?»

*Haye na á vante shifa ge ura*

<sup>37</sup> Daaci kwaskwe na ni á zle muɓri ɓanna átekwa na wá, jauje ge hare-aha umele bademme am muɓri ɓanna. Vacite ɓanna maa, a tsetehe ge Yaisu, a tsaahé am dágave á emnde, a kante kwára ba shagera, a ba ɓane á elvan ge emnde: «Ma á wána ndera ge ware keni a se shushe ázerwa.

<sup>38</sup> Ma a fetaara ware áte ya keni, a jerje háye am edda-aara, háye na ni á vante shifa ge ura á degeza am edda-aara. Una názu a ndaana wakita á Dadaamiya.»

<sup>39</sup> Yaisu á ndá elva a Shedekwe Cudedde na watse tá shána emnde a fetarfe. Am sarte ɓanna zlaɓe sharánka Shedekwe Cudedde emtsaafé, adaba zlaɓe demka Yaisu am yaikkire-aara.

*Bademme an tega ye á emnde áte Yaisu*

<sup>40</sup> Am sarte na cenarvaacena emnde a jáháva elva-aara ɓanna maa, a ba emnde umele-aatare: «Zhel na, ba jirire ba ɓane nabi na ta baa watse á sawa na.»

<sup>41</sup> A ba emnde umele: «\*Almasiihu na ba ɓane.» A ba emnde umele zlaɓe adaliye: «Almasiihu na tá enndá na á jesare am Galili ka.

<sup>42</sup> Adaba a ba wakita á Dadaamiya wá, Almasiihu á de jesare á ba am dágave á emnde a jeba á \*Dawuda, á jesare am Baytilama ekse na ndza á njá amkwa Dawuda ɓanna.»

<sup>43</sup> Bademme á ye á emnde am jáháva gevge gergere am elva a Yaisu ɓanna.

<sup>44</sup> Emnde umele am dágave-aatare tá kátá eksa Yaisu, amá baaka ura dzegwándzegwa fanve erva.

*Male-aha á Yahudiya-aha fartarka áte Yaisu*

<sup>45</sup> Daaci eptsaraapetsa kwakwane-aha á \*Farisa-aha, antara male-aha á \*liman-aha na ba estuwa á dezetare. Ta de ndavateruhe ge emnde na, a ba itare tá elvan ge itare: «Labára sakuránka Yaisu na?»

<sup>46</sup> Tá ɓwaterante ge emnde na, a ba itare: «Kay! Zhel ɓanna ba vaci palle keni cenaréránka ura á ndáhá elva seke ɓane.»

<sup>47</sup> A ba Farisa-aha tá elvan ge itare: «Kure keni watse badakurubade zhel na ka?

<sup>48</sup> Kwa nanna fartarfe male-aha, antara Farisa-aha á ɓere áte ɓane emtu?

<sup>49</sup> Ábi sey tá fetaara ba ɓgudfi-aha áte ɓane, emnde na diyarka \*tawraita d'ekideki, tá an nyainye áza Dadaamiya na.»

<sup>50</sup> Amá ankwá Nikaudaimus na ndza a deza Yaisu an vayiya na am dagave-aatare, ɓane keni ba palle á Farisa-aha na tá áhuwa ɓanna, a ba ɓane á elvan ge itare:

<sup>51</sup> «Ay degiya am tawraitá á miya wá, mi taa ɓgudfeka ura ba estuwa, sey máki cenamivaacena elva am mbuwe-aara antara názena a guwaa ɓane.»

<sup>52</sup> A ba itare tá elvan ge Nikaudaimus: «Ekka keni ka ura á Galili emtu a gá? Eppákyá názu am huɗe á wakita má watse ká shánsha ba palle keni nabi na a jesaare am Galili!»

<sup>53</sup> Am iga á una ɓanna maa, ma ware keni a eksaa ba baráma de mba-aara.

**8***Mukse na ta ekseva am gwardzire*

<sup>1</sup> Yaisu wá, a dete ire á Wa Anyaranyara.



<sup>2</sup> Ba enlyya-waabere wá, a tsekweise, a eptsá á ba dem \*mashidi yaikke suuwe, a de njehe, ta duhe ge emnde ádezenjara, a fantau ge vaterte sera á elva.

<sup>3</sup> Daaci malum-aha á \*tawraita antara \*Farisa-aha ta naba sanaa mukse ta ekseva am gwardzire, ta tsa mukse na á katafke á emnde bademme.

<sup>4</sup> Daaci ta ndavanu elva ge Yaisu: «Malum,» a ba itare, tá elvan ge njane: «Náwa mukse na wá, njá eksevaa am gwardzire.

<sup>5</sup> Názu a banjerna Muusa am \*tawraitá wá, mukse na á maga jeba una wá, ba tá ja shifa-aara an nákwá. Ekka mu ázara á ba elva á njá?»

<sup>6</sup> Ta banaa una ba geni tá tsagwadáná an njane, geni tá shánsha elva na an dzálá am mbuwe-aara. Amá a gaavehe ge Yaisu, anjkwá á puwa áte haha an gulanda-aara.

<sup>7</sup> Am itare yaránka ndáva na, á kante ire Yaisu, a ba njane á elvan ge itare: «Máki anjkwá edda una ndza maganaaka haypa d'ekideki am kure wá, a fantaufe edda-aara zunjwe ge dzega mukse na an nákwá.»

<sup>8</sup> A ndaase una njanna, a gaavehe zlafe ádalije, anjkwá á puwa áte haha an gulanda-aara.

<sup>9</sup> Ba ta cenaa elva njanna wá, ta fantau ge zlalá an palpale, ta fantuwa male zunjwe, a jauwa ba mukse na palle á tse á katafke á Yaisu.

<sup>10</sup> A kante ire Yaisu, a ba njane á elvan ge mukse njanna: «Tá áme emnde na? Baaka edda una dzegwándzegwa ngudaknguda emtu?»

<sup>11</sup> A njwanante ge mukse na, a ba njane: «Baaka degiya malum.» A ba Yaisu á elvan ge njane: «Iya keni yá ngudanjka. Ezzlalá, amá dalika á maga haypa.»))

### *Yaisu wá, parakkire ge duniya*

<sup>12</sup> A ba Yaisu zlafe ádalije á elvan ge emnde: «Ba iya una ya parakkire ge duniya. Ma a d'abiyaa ware keni á shánsha parakkire na á vante shifa ge ura na, edda-aara á zlaleka am tabedammire mazla-aara.»

<sup>13</sup> A ba \*Farisa-aha tá elvan ge njane: «Ká anjkwá á maganá ba ka seydire áte ire á njá na wá, elva á njá njanna jirireka d'ekideki.»

<sup>14</sup> A ba Yaisu á elvan ge itare: «Ma yá maganá ba ya seydire áte ire-aaruwa keni, elva-aaruwa jirire. Ad'aba diyandiya tate na ya sawa átekwa, diyandiya tate na yá zlalá ádetekwa. Amá kure diyakurka ma tate na ni ya sawa átekwa, ma tate na yá zlalá ádetekwa keni.

<sup>15</sup> Kure kwá naba icanve elva áte ura, áte una kwá kataná kure emndimagwaha, amá iya yá ngudeka ura d'ekideki.

<sup>16</sup> Ma ya icanve elva áte ura keni, yá maganá á ba an jirire, ad'aba ganévka an ire-aaruwa am elva njanna, amá anjkwá Edderwa na a belibela na antara ya.

<sup>17</sup> Anjkwá an puwa am \*tawraitá á kure, a ba njane: Máki seyde-aha buwa ta ndaase ba elva palle wá, elva-aatare jirire.

<sup>18</sup> Náwa yá anjkwá maga seydire áte ire-aaruwa. Edderwa na a belibela na keni anjkwá á maga seydire áte ya.»

<sup>19</sup> A ba itare tá elvan ge Yaisu «Áma eddena njanna?» A ba Yaisu á elvan ge itare: «Ba iya keni diyakurika sakwa Edderwa emtu? Ma andze diyakuridiya wá, ma kwá naba diyeddiye Edderwa keni.»

<sup>20</sup> Kwaye njane elva na Yaisu a ndater ge emnde am \*mashidi yaikke, am tate na tá fá sadake á nasherire átekwa na. Baaka ura a piyante elva-aara d'ekideki ad'aba zlafe samka sarte-aara emtsaade.

### *Kwá taa daaka á dem tate na yá detekwa na*

<sup>21</sup> Daaci a ba Yaisu á elvan ge itare zlaḅe ádaliye: «Iya wá, yá zlála, watse kwá tatayitátaya, amá watse kwá shika. Watse kwá emtsa á ba am haypa-aha á kure. Kwá dzegwánka dem tate na yá detekwa ya na.»

<sup>22</sup> A ba Yahudiya-aha am dágave-aatare: «Watse á de já ire-aara ka? Aḁaba a ba ḅane, kwá taa daaka á dem tate na yá detekwa.»

<sup>23</sup> A ba Yaisu á elvan ge itare: «Kure kwa jesaare á ba am duniya na, amá iya wá, ya sawa á sa am samaya. Kure kwa ba emnde a duniya na, amá iya wá, ya ura á duniya-ka.»

<sup>24</sup> Ya bakurnaa aḁaba una ḅanna watse kwá emtsemtsa á ba am haypa-aha á kure. Aḁaba ba jirire watse kwá emtsa á ba am haypa-aha kure máki fakurtaareka ganakini ba iya una Iya.»

<sup>25</sup> A ba itare tá elvan ge ḅane: «Ka ware?» A ḅwaterante, a ba ḅane: «Ya ba edda una kwaye am fantaufe ya ndaakur ba ḅane na.»

<sup>26</sup> Yá an elva kwakya ge ndanaa áte kure, ba jirire kwá taa ḅezleka am elva ḅanna. Amá baḁemme ba jirire. Aḁaba yá ndaakur ba názena ya cenanaa áza edda una a ḅelibela na.»

<sup>27</sup> Cenaránka ḁekideki geni á ndater elva á Edeḅera.

<sup>28</sup> Daaci a ba Yaisu á elvan ge itare: «Vacite na ni kakuranteka \*Ura á emnde baḁemme wá, kwá de dise ba vacite ḅanna, ganakini iya wá, ya ba Iya. Kwá de diyeddiye geni názena yá maganá ya baḁemme na wá, ba iya an ire-aaruwa ka. Ma yá ndáhá uwe keni, yá ndá ba názena a kwarisaa Ederwa.»

<sup>29</sup> Edda una a ḅelibela na aḅkwa antara ya, á yika ya palle ḁekideki, aḁaba ma vaatara keni yá magá ba názena á kataná ḅane.»

<sup>30</sup> Ba Yaisu a ndaase una ḅanna wá, emnde kwakya fartarfe áte ḅane.

### *Emnde a mága haypa ta náve-aha á haypa*

<sup>31</sup> Daaci a ba Yaisu á elvan ge Yahudiya-aha na fartarfe áte ḅane: «Máki tsakuraatse á ba áte elva-aaruwa wá, kwa emnde-aaruwa ba jirire,

<sup>32</sup> kure kwá diyeddiye jirire, jirire á kure á palakuraapálá. Kwá kwaraná ba kure ire á kure.»

<sup>33</sup> A ba itare tá elvan ge Yaisu: «Ázara a ba ka? ḅere ḅa eggye-aha á Ibrahimia miyenne, ba vaci palle keni daḅeremka am erva á ura ni, watse kwá kwaraná ba kure ire á kure, á ba ka?»

<sup>34</sup> A ba Yaisu á elvan ge itare: «Yá ndaakur ba jirire: Ma ware una á magá ba haypa na, edda-aara náve á haypa.»

<sup>35</sup> Náve wá, ma estara keni á gevka ura á huḁe á há ḁekideki. Amá egdzere wá, ma vaatara keni ba ura á huḁe á há ḅanna.

<sup>36</sup> Daaci máki a palakuraa \*Egdza á Dadaamiya am navire á kure wá, shakuránsha ire á kure ba jirire.

<sup>37</sup> Diyandiya degiya ganakini kwa eggye-aha á Ibrahimia. Amá labára kena kwá liyeka elva-aaruwa, kwá aḅkwa á tataya ja shifa-aaruwa na?

<sup>38</sup> Yá ndá ba názena ya naaná áza Ederwa, kure keni kwá magá ba názena a bakurnaa eddekure.»

<sup>39</sup> A ba itare, tá elvan ge Yaisu: «Edeḅere ba Ibrahimia ge ḅere.» A ba Yaisu á elvan ge itare: «Ma andze kwa egdzara á Ibrahimia ba jirire wá, ma kwá maga ba názena ndza a maganaa ḅane.»

<sup>40</sup> Amá náwa yá aḅkwa ndaakur ba jirire názena ya cenanaa ya áza Dadaamiya, aley kure kwá tataya ba já shifa-aaruwa. Ibrahimia wá, ḅane magaaka una ḁekideki.

<sup>41</sup> Kure kwá maga ba slera á eddekure.» A ba itare tá elvan ge ḅane: «ḅere ḅa masagwa-aha ka ḁekideki, Edeḅere ba Dadaamiya palle.»

<sup>42</sup> A ba Yaisu á elvan ge itare: «Ma andze ni kwa egdzara á Dadaamiya ba jirire wá, ma andze kwá wayiwáyá. Adaba iya ya sawa ázenjara ge sezekure na. Sanka ba ya an ire-aaruwa, a beliyaa ba njane, yá njá á ba áte njane áhuna na.

<sup>43</sup> Labára njane á duka elva-aaruwa á dem ire á kure ðekiddeki? Á duka á dem ire á kure adaba kwá dzegwánka cena elva-aaruwa.

<sup>44</sup> Kure wá, eddekure ba Shaitaine. Kwá kátá maga názena á kataná eddekure. Adaba njane sleceba emnde kwaye am fakta, baaka jirire-aara ðekiddeki, adaba baaka jirire am njane. Ndáhá fida wá, duksa-aara ge njane, adaba slera-aara ba fida, njane male á fida.

<sup>45</sup> Amá iya wá, yá ndáhá ba jirire. Adaba una njanna wayakurika.

<sup>46</sup> Emtu ware edda-aara am kure á sansese haypa-aaruwa parakke? Ay má yá ndá ba jirire bademme, labára kwá fetarka áte ya?

<sup>47</sup> Ura á Dadaamiya wá, á cená elva á Dadaamiya. Amá kure kwa emnde á Dadaamiya-ka. Adaba una njanna kwá feka hyema áte elva-aaruwa.»

### *Kwaye zlafe yareka Ibrahima anjwa Yaisu*

<sup>48</sup> A ba Yahudiya-aha tá elvan ge Yaisu: «Ndanjeranka emtu ganakini ka wá, ka ura \*Samariya? Ndza ndanjeranka emtu ganakini ká an jini am ire?»

<sup>49</sup> A ba Yaisu á elvan ge itare: «Yá an shaitaine ka ðekiddeki, yá gálá ba Edderwa, amá kure kwá anjwa epsawipsawa.

<sup>50</sup> Iya wá, ndanka ya ganakini a galarigálá emnde. Amá anjwa edda una a wayiyantaa njane ganakini a galarigálá emnde. Daaci watse á ndaaná ba njane elva á kure.

<sup>51</sup> Yá ndaakur ba jirire: Ma ware una a magaa fesarefire am elva-aaruwa, njane á emtseka ðekiddeki.»

<sup>52</sup> A ba Yahudiya-aha tá elvan ge njane: «Kina wá, diyanjerdiya mazla-aara geni ba jirire ká an jini am ire. Ibrahima emtsametsa, nabi-aha umele keni matsarmatsa, ekka ni má ura á maga fesarefire am elva á nj, á emtseka, á ba ka?

<sup>53</sup> Eggyemiya Ibrahima an ire-aara maa, emtsametsa, jakuje ge njane emtu? Nabi-aha keni emtsaremtsa, ka mu ká zhára ire á nj ka ware?»

<sup>54</sup> A ba Yaisu á elvan ge itare: «Máki yá galaná ba iya ire-aaruwa wá, yaikkire-aaruwa hyepka duksa ðekiddeki. Iya á galiya ba Edderwa. Ba njane edda una kwa bantsa kure Dadaamiya na.

<sup>55</sup> Amá diyakurka njane njanna ðekiddeki. Iya wá, diyandiya. Ma ya bánba diyanka wá, ya slefida seke kure. Diyandiya ba parakke, yá anjwa á fansarefe am elva na á ndaaná njane.

<sup>56</sup> Dadaamiya ndza a banánba ge eggyekure Ibrahima ganakini watse á hyemhye am sarte-aaruwa, a higa jipu arge elva njanna. Am sarte na marannaamará Dadaamiya, ervaunje-aara ndza ba seke nama.»

<sup>57</sup> A ba Yahudiya-aha tá elvan ge njane: «Ba yáwe kul ilyebe keni ká hyefka ni, ka nánna Ibrahima, a ba ka?»

<sup>58</sup> «Yá ndaakur ba jirire,» a ba Yaisu á elvan ge itare: «Kwaye zlafe yareka Ibrahima keni yá anjwa ya.»

<sup>59</sup> Ta naba halem nákwá am erva tá kátá eddzága maa, a naba shebevhe ge Yaisu, a sesehe am mashidi njanna.

## 9

### *Yaisu mbanaambe ura wulfe ta yán ba estuwa*

<sup>1</sup> Daaci anƙwa á degashe Yaisu am tate umele wá, a naa ura wulfe ta yán ba estuwa.

<sup>2</sup> Ta ndavanuhe ge pukura-aha, a ba itare tá elvan ge ɲane: «Malum, ta yanaa aɗaba haypa á ware zhel na wulfe? Haypa á tara eddenjara an emmenjara emtu? Emtu haypa-aara ba ge ɲane he?»

<sup>3</sup> A ɲwaterante ge Yaisu, a ba ɲane á elvan ge itare: «Ta yese wulfe aɗaba haypa-aara ka, tara eddenjara an emmenjara keni haypa-aatare ka. Una a gev ba geni a naránna emnde slera yaikke na á de maganá Dadaamiya áte ɲane.

<sup>4</sup> Am zlaɓe anƙwa tsawe vaciya wá, magaumimága slera á edda una a ɓelibela na. Aɗaba anƙwa á sawa vayiya, ura á dzegwánka mága slera mázla-aara.

<sup>5</sup> Am sarte na zlaɓe yá anƙwa am duniya na wá, ya parakkire ge duniya.»

<sup>6</sup> Ba a ndaase elva ɲanna, mazle-aara a naba kyefaa nyaihe á dem áhá, a wasletaa egdza haha cekwaangudi an nyaihe-aara, a ndabananuhe ge ice á wulfe na,

<sup>7</sup> a ba ɲane á elvan ge ɲane: «Ezzlálá de baraabárá ice á ɲa am derve na tá ɗaná an Silauwam na.» Silauwam ɲanna wá, amaana: slebela. A duhe ge wulfe na, a de baraa ice-aara wá, anƙwa a nanna. Á sá wá, ba lanje ice-aara.

<sup>8</sup> Daaci emnde a slala-aara, antara emnde na ndza ta naa á ɲala na, a ba itare: «Una ni ba wulfe na á ɲala, á njá áhuwa na ka?»

<sup>9</sup> A ba emnde umele; «Ba ɲane». Amá a ba emnde umele: «Una ɲaneka, ba gáráva.» Amá «Una ba iya,» a ba ɲane á elvan ge itare.

<sup>10</sup> Ta ndavanu elva: «A wertaa estara ice á ɲa?» a ba itare tá elvan ge ɲane.

<sup>11</sup> A ɲwaterante, a ba ɲane: «Anƙwa ura zhera-aara Yaisu, a wasletaa haha cekwaangudi, a naba ndabinu ge ice-aaruwa wá, a ba ɲane á elvan ge iya, ezzlálá de baraabárá ice á ɲa am derve á Silauwam. Ya naba duhe á dete we á derve ɲanna, ya baraa ice-aaruwa wá, yá nanna ice.»

<sup>12</sup> «Áma zhel ɲanna?», a ba itare tá elvan ge ɲane. «Diyanka», a ba ɲane á elvan ge itare.

*\*Farisa-aha tá ndavanu elva ge ura wulfe ta yanaa an ɲane*

<sup>13</sup> Daaci ta naba dá zhel na ndza wulfe, amá shánsha ice-aara na ádeza \*Farisa-aha.

<sup>14</sup> Aɗaba háre na ni Yaisu a wasletaa egdza haha, a ndabananuhe ge ice á wulfe na wá, kwaskwe á puwansepuwe.

<sup>15</sup> Aɗaba una ɲanna, Farisa-aha ta ndavanu ge zhel ɲanna, a ba itare tá elvan ge ɲane: «A mágava estara ɲane kina ká anƙwa á nanna ice na?» A ɲwaterante, a ba ɲane: «Ba a wasletaa egdza haha, a ndabinuhe ge ice, ya de baraa ice-aaruwa wá, yá anƙwa á nanna.»

<sup>16</sup> A ba emnde umele am dágave á Farisa-aha: «Ma a maganaa ware una ɲanna keni, a ɓelanaa Dadaamiya ka ɗekideki, aɗaba anƙwa á badza kwaskwe á puwansepuwe.» Amá a ba emnde umele-aatare: «Slehaypa ni á dzegwándzegwa mága najipu-aha na?» Daaci ye-aatare gevge gergere.

<sup>17</sup> \*Farisa-aha ta ndavanu elva zlaɓe áɗaliye ge wulfe na shánsha ice-aara na: «Ekka mu ázara a ba elva á ɲa áte edda una a werakanta ice ɲanna?» A ba ɲane: «Nabi á Dadaamiya.»

<sup>18</sup> Mazla-aara eksararka male-aha á Yahudiya-aha ganakini zhel ɲanna ndza wulfe werre, a shanaa an sha ice. Ta naba ɗetaa tara eddenjara an emmenjara.

<sup>19</sup> Ta se ndavateruhe, a ba itare: «Una ba jirire ba egdza á kure emtu? Ndaundá ba jirire ndza kwa yán ba wulfe emtu? Ay a sawa estara á nanna ice na?»

<sup>20</sup> Ta nwaterante ge tara eddenjara an emmenjara, a ba itare: «Egdzere wá, ba egdza á njere, na yese ba wulfe.

<sup>21</sup> Amá ma a shanaa estara ice keni diyanjerka, ma a vanta ware ice keni diyanjerka. Nane keni egdzere-ka mázla-aara, ndavawanundave ba ge njane, a njwutenjwa ba njane an ire-aara.»

<sup>22</sup> Ta ndaa una tara eddenjara an emmenjara na wá, adaba a wáterá lyáwá átuge male-aha á Yahudiya-aha. Adaba zlaruzle male-aha á Yahudiya-aha am sawari-aatare, geni ma a ndaasa ware Yaisu wá, \*Almasiihu, tá ngyansengye edda-aara am jeba-aatare ba dekideki.

<sup>23</sup> Ta ndaaná adaba una njanna tara eddenjara an emmenjara: Nane keni egdzere-ka mázla-aara, a njwutenjwa ba njane an ire-aara na.

<sup>24</sup> \*Farisa-aha ta dante zhel na ndza wulfe, shánsha ice na ge buwire, a ba itare tá elvan ge njane: «Njere wá, diyanjerdiya ganakini zhel njanna slehaypa. Azara á ba elva á na? Enndá jirire á katafke á Dadaamiya!»

<sup>25</sup> A nwaterante, a ba njane á elvan ge itare: «Iya wá, ma anjwa haypa-aara, ma baaka haypa-aara keni diyanka ya. Duksa palle ya disaa ya wá, ndza ya wulfe, kina wá, yá anjwa á nanna.»

<sup>26</sup> Ta ndavanuhe zlabé adaliye, a ba itare tá elvan ge njane: «A magakaa uwe lauktu a wertehe ge ice á na na?»

<sup>27</sup> A nwaterante, a ba njane: «Ábi ya ndakurndáhá cenakurka. Kwá kátá yá bakurá uwe kena adaliye? Emtu kure keni kwá kátá gev emnde a daba njane?»

<sup>28</sup> Tá zlazlewahe, a ba itare tá elvan ge njane: «Ká sledaba njane ba ka! Njere wá, na emnde a dába Muusa.

<sup>29</sup> Adaba Muusa wá, diyanjerdiya ta ndaa elva an Dadaamiya, amá njane ba tate na á sawa átekwa, diyaa ware?»

<sup>30</sup> A ba zhel na: «Kwaye kwa najipu! Zhel na a weritaa ice na ni diyakurka kure tate na a sawa átekwa?»

<sup>31</sup> Amá wá, diyamidiya slehaypa wá, Dadaamiya á njwanárka dekideki, sey edda una ni á gálá njane, antara á maga namaari-aara.

<sup>32</sup> Kwaye á ba am fakta á duniya keni, vaci palle ndza cenamiyánka ta weranantaa ice ge wulfe na ta yanaa an njane.

<sup>33</sup> Daaci zhel njanna, ma andze a belanaa Dadaamiya ka wá, ma andze á dzegwánka ba mága uwe keni.»

<sup>34</sup> «Ka wá, ka slehaypa kwaye á sawa am huđe á emmeja, ká kwaranjersá ka duksa ge njere emtu?» Daaci ta naba ngyanse á segashe am mashidi.

### *Yaisu á ndáhá elva á wulfire am ervaunje*

<sup>35</sup> Am sarte na cenácena Yaisu ganakini ngyaransengye maa, a naba de tataya tate-aara. De shánsha, a ba njane á elvan ge njane: «Faktarefe áte \*Ura á emnde bademme emtu?»

<sup>36</sup> A njwanante a ba njane: «Njane mu ware njane malum, geni yá fetarfe áte njane?»

<sup>37</sup> A ba Yaisu á elvan ge njane: «Ká zhára ba njane maa, ba edda una á ndaaka elva na.»

<sup>38</sup> «Fanaktarfe Yaakadada», a ba njane á elvan ge njane, a kezlanaa ugje am áhá.



<sup>39</sup> Daaci a ba Yaisu: «Sawa-aaruwa ge iya á sem duniya na wá, ya se lá wulfe-aha geni itare tá shánsha tá nánna duksa. Amá emnde na ta bantsa itare tá nanna na wá, tá gevge wulfe-aha.»

<sup>40</sup> Cenaráncena \*Farisa-aha na tá anƙwa áhuwa na, a ba itare tá elvan ge Yaisu: «Ɗere keni ɲa wulfe-aha emtu?»

<sup>41</sup> A ba Yaisu á elvan ge itare: «Ma andze kwa wulfe-aha wá, ma baaka haypa á kure. Amá kwa bántsa kure anƙwa ice á kure tsawe wá, haypa á kure ba nja-aara.»

## 10

### *Suni shagera an kyawe-aha-aara*

<sup>1</sup> A ba Yaisu á elvan ge itare zlaɓe ádaliye: «Yá ndaakur ba jirire: má ura á dem gargare á kyawe-aha ni, daaka á kya we-aara, a naba tsekweme á kyá ire á riya wá, edda-aara ɲanna neyle, slezá baráma.

<sup>2</sup> Amá edda una ni á duwa á kya we á gargare wá, ba ɲane una suni á kyawe-aha.

<sup>3</sup> Daaci slewera gargare, á weranántewera gargare ge suni, ɲane á dáhá kyawe-aha-aara an zhera an zhera, kyawe-aha tá cenáncena kwára-aara, tá edfaba ásegashe.

<sup>4</sup> Máki saterse ásegashe maa, á dedda ɲane á katafke, tá dábáná kyawe-aha-aara á kataliya, adaba diyardiya kwára-aara.

<sup>5</sup> Amá kyawe-aha tá dabeka edda una diyarka, á wáterá lyáwá átuge ɲane, adaba diyarka kwára-aara.»

<sup>6</sup> Kwaya ɲane naraje na a baternaa Yaisu, amá cenaránka naraje-aara, ma a bateraa elva áte uwe keni.

### *Yaisu suni shagera*

<sup>7</sup> Lauktu a ba Yaisu á elvan ge itare: «Yá ndaakur ba jirire: Ba iya una ya we á gargare á kyawe-aha.

<sup>8</sup> Baɗemme á emnde na ta sawa ákatafke-aaruwa, ta ba neyle-aha, ta emnde a zá baráma. Adaba una ɲanna diyaraterka kyawe-aha, cenarka elva-aatare.

<sup>9</sup> Ba iya una ya we á gargare. Ma ware una á dema á kya ya á dem gargare na, á shánsha ire-aara, á duwa á ba an enƙale-aara, á sesse keni á ba an enƙale-aara, á shánsha náza zá-aara á ba an unɲule-aara.

<sup>10</sup> Neyle wá, á sá ba mága neylire geni á icica, á kedánaakeda. Amá iya wá, ya sawa ganakini kyawe-aha tá shánsha shifa, tá njinja an shifa-aatare lanɲe.

<sup>11</sup> «Ba iya una ya suni shagera. Ya suni shagera na ni yá dzameka shifa-aaruwa dƙidƙi adaba kyawe-aha-aaruwa.

<sup>12</sup> Amá suni na á piyá ba geni a shánsha mbera-aara, ɲane gevka edda á kyawe-aha wá, gevka suni shagera. Máki nanna anƙwa á sawa indale wá, á zhagada ire-aara, daaci á kyateraakya indale kyawe-aha na, á dzadzatervedzadze.

<sup>13</sup> Á zhagada shifa-aara, adaba ɲane baaka lambe-aara áte kyawe-aha. Á dzámá ba mbera-aara palle.

<sup>14</sup> Ba iya una ya suni shagera, diyandiya kyawe-aha-aaruwa, itare keni diyaridiya

<sup>15</sup> ba seke una ni a diyidiya Edderwa, iya keni diyandiya ɲane na. Yá dzameka shifa-aaruwa dƙidƙi adaba kyawe-aha-aaruwa.

<sup>16</sup> Iyau, zlaɓe tá anƙwa kyawe-aha-aaruwa umele ágashe, saremká á sem walde. Shagera ba yá satersa itare keni á sem walde, tá se cena kwára-aaruwa. Tá se njá am walde palle, suni á gev ba palle.

<sup>17</sup> «Wayiwáya jipu Edderwa, aɗaba eksanarekse yá shifa-aaruwa, watse yá shánsha zlaɓe ádaliye.

<sup>18</sup> Iya wá, baaka ura á dzegwándzegwa já shifa-aaruwa, ya eksera ba ya emtsa. Yá naba emtsemtsa, amá ya an hakuma á tse am faya. Yá magán ba seke una a binaa Edderwa.»

<sup>19</sup> Elva-aara ɲanna a tsante elva yaikke zlaɓe ádaliye am dagave á Yahudiya-aha.

<sup>20</sup> Kwakya emnde am dagave-aatare ta baa: «Ura an jini am ire, an wesha ire-aara, kwá cena uwe áte elva-aara?»

<sup>21</sup> A ba emnde umele-aatare: «Una fida, ura an wesha ire-aara wá, á taa ndaaseka elva estuwa. Há! Ura an wesha ire-aara ni á weratertá ice ge wulfe-aha?»

### *Kwalarevkwále Yahudiya-aha ge fetaare áte Yaisu*

<sup>22</sup> Daaci samsa sarte á mága muɲri á wera \*mashidi yaikke am Urusaliima maa, ta naba gyaa muɲri. Sarte ɲanna, sarte á lailaidɗire.

<sup>23</sup> Daaci vacite umele, anƙwa á já ɗaba Yaisu am dzadzáwe á mashidi, am tate na tá ɗaháná an dzadzawe á Suleymanu na maa,

<sup>24</sup> de jarammeje zlaɓe ádaliye Yahudiya-aha á katafke-aara, a ba itare tá elvan ge ɲane: «Máki ba jirire ba ka una ka \*Almasiihu á Dadaamiya wá, ndaɲerndá jirire-aara, geni a shuɲɲuleka ire á ɲere mázle-aara. Kinekinéka ɲá ufa ba una ázeɲa.»

<sup>25</sup> A ɲwaterante ge Yaisu, a ba ɲane á elvan ge itare: «Ábi ya ndaakurndaha fakurtaareka áte ya. Slera na yá anƙwa á maganá ya na wá, yá maganá á ba an hakuma á Edderwa. Una ɲanna á bakurá ba elva ge kure áte ya, ma ya ware keni.

<sup>26</sup> Aley kwá fetareka áte ya, aɗaba kwa kyawe-aha-aaruka.

<sup>27</sup> Kyawe-aha-aaruwa wá, tá cena kwára-aaruwa, tá ɗabidába, iya keni diyanaterdiya.

<sup>28</sup> Yá vaterte shifa na á zleka na, tá emtseka ɗekideki, baaka ura á dzegwándzegwa saterse am erva-aaruwa.

<sup>29</sup> Edderwa na a vite kyawe-aha ɲanna, yaikke ba ɲane arge duksa baɗemme. Baaka ura á dzegwándzegwa sanse kyawe-aha ɲanna am erva á Edderwa.

<sup>30</sup> Iya antara Edderwa ɲa ba palle.»

<sup>31</sup> Daaci Yahudiya-aha ta naba haletaa nákwá zlaɓe ádaliye, tá kátá ejja.

<sup>32</sup> A ba Yaisu á elvan ge itare: «Náwa kwakya slera shagera shagera na ya maganaa ya am dágave á kure an hákuma á Edderwa. Kina kwá kátá jiyá an nákwá aɗaba ura-ara palle?»

<sup>33</sup> A ba Yahudiya-aha ɲanna tá elvan ge ɲane: «Ƴá jáká an nákwá aɗaba shagerire na ka maganaa ka ka. Amá ɲá jáká aɗaba elva mándzawe na ká ndaná ka áte Dadaamiya. Ka keni ka ba urimagwe, amá ka ganve ire á ɲa Dadaamiya.»

<sup>34</sup> A ba Yaisu á elvan ge itare: «Anƙwa an puwa am \*tawraitá á kure, a ba Dadaamiya: Kure kwa dadaamiya-aha.

<sup>35</sup> Diyamidiya názu an puwa am wakita á Dadaamiya wá, baaka ura á ebzebza. Dadaamiya a ɗetaa emnde na ni a vaterte elva-aara ta dadaamiya-aha.

<sup>36</sup> Janateruka ya ge emnde ɲanna emtu, ya na a eksisaa ba Dadaamiya, a beliyaa á sem duniya? Kwa baa yá anƙwa á zlazla Dadaamiya, adaba ya baa: ya \*Egdza á Dadaamiya? Áma ɲane zláze ɲanna?

<sup>37</sup> Máki kwá ezzhárá slera na yá maganá ya slera á Edderwa ka, fautareka áte ya.

<sup>38</sup> Amá máki yá mága ba slera á Edderwa ba jirire wá, ma kwá fetareka áte ya keni, fautarefe kure á ba áte slera-aaruwa ɲanna, geni kwá diyeddiye jirire-aara, ganakini iya antara Edderwa ɲa ba palle.»

<sup>39</sup> Tá kátá ekseksa, amá sharánka zlaɓe ádaliye.

<sup>40</sup> A zlalehe ge Yaisu á dete iga a guwa á Urdun, tate á mága baptisma á Yuhanna, a de njehe áhuwa.

<sup>41</sup> Amá kwakya emnde ta kelaa á dezeńara. Ta bántsa emnde ɲanna am dagave-aatare: «Yuhanna wá, ɓaaka najipu na a maganaa ɲane, amá baɗemme á názena a ndaanaa ɲane áte zhel na baɗemme ba jirire.»

<sup>42</sup> Emnde kwakya fartarfe áte ɲane am tate ɲanna.

## 11

### *Emtsamtsa Laajarus*

<sup>1</sup> Anƙwa zhel emnde a Baytaniya umele zhera-aara Laajarus wá, lapika ba zlazlada. Egdzar mama-aha-ɲara ɲwasha, tara Marta antara Maari keni tá á ba am ekse ɲanna.

<sup>2</sup> Maari ɲanna wá, ba Maari na ndza a puwar náza se áte sera ge Yaakadada, a halanaahe an úgje á ire-aara na. Laajarus lapika na egdza emmenjara ge Maari ɲanna.

<sup>3</sup> Daaci egdzar mama-aha ɲwasha buwa ɲanna, ta naba belanve ura ge Yaisu, a ba itare tá elvan ge ɲane: «Yaakadada, náwa lapika ura á ɲa Laajarus.»

<sup>4</sup> Cenánçena Yaisu labare ɲanna maa, a ba ɲane: «Lapikere á Laajarus á taa jeka shifa-aara. Amá watse tá nanna emnde yaikkire á Dadaamiya, antara yaikkire á Egdza-aara keni, adaba lapikere-aara zhel ɲanna.»

<sup>5</sup> Yaisu wayatertewáyá jipu tara Maari antara Marta ira Laajarus.

<sup>6</sup> Adaba una ɲanna daaka watsewatse am sarte na a cenaa labare á lapikere á Laajarus na. A gaa háre buwa am tate ɲanna, am iga-aara lauktu a tse, a duwa.

<sup>7</sup> Am iga a háre buwa ɲanna maa, a ba ɲane á elvan ge pukura-aha-aara: «Mi zlála, mi eptsá ádaliye á dem Yahudiya.»

<sup>8</sup> A ba pukura-aha-aara tá elvan ge ɲane: «Malum, á ba am háre-aha na tá kátá jakjá Yahudiya-aha á ba an nákwá ni, ká kátá eptsá ádaliye á ba ádehuwa?»

<sup>9</sup> A ba Yaisu á elvan ge itare: «Diyakurdiya emtu ganakini anƙwa saa kelaawa ju buwa am váha palle? Máki ura á zlála an vaciya wá, á jeka ektápaare. Adaba anƙwa parakkire am duniya.

<sup>10</sup> Amá máki edda-aara á zlála an vaciya wá, á naba ejja ektápaare, adaba ɓaaka parakkire am ɲane.»

<sup>11</sup> Am iga á elva-aara ɲanna maa, a ba ɲane zlaɓe ádaliye á elvan ge itare: «Anƙwa á paa háre ura á miya Laajarus, amá yá de tsantetse am háre-aara ɲanna.»

<sup>12</sup> A ba pukura-aha tá elvan ge ɲane: «Yaakadada máki á pupe háre wá, una watse á mbembe.»

<sup>13</sup> Yaisu anƙwa á baterá ɓaaka Laajarus emtsamtsa, pukura-aha ta kurken á ndater ba háre á jirire.

<sup>14</sup> A naba ndaterse ba parakke Yaisu, a ba ñane á elvan ge itare: «Baaka emtsamtsa Laajarus.

<sup>15</sup> Iya wá, yá higa jipu adaba lámare ñanna a shaa Laajarus am iga-aaruwa. Una a magava estuwa na wá, adaba ba kure, geni a farfe zlaɓe adaliye fetarfire á kure áte iya. Daaci tsaumitse, mi zlááwa mi dezeńara.»

<sup>16</sup> A ba Taumas, (Wulhe keni ba zhera-aara,) a ba ñane á elvan ge pukura-aha umele: «Mi keni mi zlalawa, mi de emtsa ba kerde antara ñane.»

### *Ba Yaisu una sletsa emnde am faya*

<sup>17</sup> Lauktu á daada Yaisu á dem Baytaniya maa, a de beraa hedarehe Laajarus zlauzle, háre-aara ufade am evege.

<sup>18</sup> Ekse á Baytaniya ñanna ba herzhe an Urusaliima á maga ba kilaumaiter keye.

<sup>19</sup> Yahudiya-aha kwakya ta sem mba á tara Maari antara Marta, ta se gater use adaba a kedaa egdza emmetare.

<sup>20</sup> Am sarte na cenáncena Marta ganakini sámisa Yaisu maa, a naba tsetehe, a zlala á de yainuye áte baráma a sawa. Maari wá, ñane a nja am mba.

<sup>21</sup> A ba Marta á elvan ge Yaisu: «Yaakadada, ma andze ká ankwá áhuna wá, egdza emmerwa ma andze á emtseka dekiɓeki.

<sup>22</sup> Amá ba kina keni diyandiya ganakini Dadaamiya á yakveka názena ka ndavanuwa ka.»

<sup>23</sup> A ba Yaisu á elvan ge ñane: «Sey á sesse egdza emmeña á ba an shifa-aara.»

<sup>24</sup> «Diyandiya,» a ba Marta. «Diyandiya ganakini watse á tsetse vaci tsa emnde á faya am halavuwa á duniya.»

<sup>25</sup> A ba Yaisu á elvan ge ñane: «Ba iya una ya edda tsa emnde am faya, ba iya una ya slefaterem shifa na á zleka na am vuwa ge emnde. Má ura fetarfe áte ya wá, ma emtsamtsa keni á tsetse á ba an shifa-aara.

<sup>26</sup> Ma ware una an shifa, a fetaare áte ya, á emtseka edda-aara dekiɓeki. Faktarfe emtu áte elva-aaruwa na?»

<sup>27</sup> «Ane fantarfe», á ba Marta, «fantarfe ganakini ba ka una ka \*Almasiihu, ka \*Egdza á Dadaamiya, ba ka edda una diyanjerakdiya ganakini watse ká sawa á sem duniya na.»

### *Sesse yawe á kyuwa ge Yaisu*

<sup>28</sup> Am iga á elva-aara ñanna Marta wá, ba eptsa-aara a detevege egdza emmeñara Maari, a de mbedanuhe an nasherire, a ba ñane á elvan ge ñane: «Samsa Malum ankwá á ndavakndává.»

<sup>29</sup> Ba tara cenáncena, antara ba tsetse-aara ge Maari, a duhe ádezeńara.

<sup>30</sup> Amá zlaɓe samka Yaisu á sem huɓe á ekse emtsaade, zlaɓe á ba am tate ñanna a de yainuwa Marta na.

<sup>31</sup> Tsetsa Maari an hádzala á segashe maa, bademme á Yahudiya-aha na tá njá ázeńara, ta de gater use na keni, tá sa edfaba. Itare ta kurken á de kyuwa áte irekhya.

<sup>32</sup> Dámnda Maari á deza Yaisu, a kezlaa ugje á katafke-aara, a ba ñane á elvan ge ñane: «Yaakadada, ma andze ká ankwá áhuna wá, ma andze á emtseka egdza emmerwa dekiɓeki.»

<sup>33</sup> Daaci Yaisu á zhára ba á kyuwa Maari na, Yahudiya-aha na ta daa edfaba na keni bademme tá ankwá kyuwa. Una ñanna wantewa jipu am ervaunde ge Yaisu.

<sup>34</sup> A naba ndavateruhe, a ba ɲane á elvan ge itare: «Kwa heɗanaa áme ɲane emtsa ɲanna?» «Sawa ɲá marakanaamárá Yaakadada», a ba itare tá elvan ge ɲane.

<sup>35</sup> Daaci sessa yawe á kyuwa ge Yaisu keni.

<sup>36</sup> Daaci a ba Yahudiya-aha: «Kay, zhel na wayawáyá jipu an Laajarus na.»

<sup>37</sup> Amá a ba emnde umele-aatare: «Ábi ba ɲane una a weranante ice ge zhel wulfe na? Ay ábi ma andze á janviyaaka piyeta emtsa á Laajarus keni?»

#### *Yaisu tsantetse Laajarus am faya*

<sup>38</sup> Wantewa zlaɓe ádaliye am ervaunɗe ge Yaisu, a naba duhe á dete irekhya ɲanna. Irekya ɲanna keni, ndza ta yese ba evege ba estuwa am uksuwe á palaha, ta heɗanuhe an palame.

<sup>39</sup> Daaci a ba Yaisu: «Tambarawanvuwetámbara palame ge we á evege.» A ba Marta egdza emmeɲara ge edda una am evege: «Yaakadada, watse á se kwakya degi mazla-aara, aɗaba háre ufade vatena ehheɗa-aara.»

<sup>40</sup> A ba Yaisu á elvan ge ɲane: «Ndza ndaanaɲka a ba iya, máki faktarefe watse ká nanna yaikkire á Dadaamiya?»

<sup>41</sup> Daaci ta naba tambaranvuwe pálame na ge we á evege. A kante ice-aara á dem samaya Yaisu, a ba ɲane: «Yá aɲkwa á slafaká we-aaruwa Edderwa, aɗaba cenakivaarcene.

<sup>42</sup> Diyandiya ganakini ká aɲkwa cenivaarcene ma vaatara keni, amá ya ndaa una aɗaba emnde na náwa itare tá ázerwa na, geni a fartarfe ganakini ka beliyaa ba ka.»

<sup>43</sup> Am iga á maduwa-aara maa, á ba ɲane á ba an ka kwára: «Laajarus, sesse á segashe!»

<sup>44</sup> A sessehe ge Laajarus antara ba kálpákane na ndza ta faɗeme am huɗe-aara na baɗemme. Sera-aha-aara, antara erva-aha-aara, ira ire-aara baɗemme á ba an fáɗá. A ba Yaisu: «Palawanaapále áte ɲane, belawanaabelá.»

#### *Yahudiya-aha tá aɲkwa maga pute a eksa Yaisu (Mat. 26:1-5; Mark. 14:1-12; Luka 22:1-2)*

<sup>45</sup> Dikele á Yahudiya na ta de gater use ge tara Maari na, ba ta naa najipu na ni a maganaa Yaisu na wá, ta naba fetarhe áte ɲane.

<sup>46</sup> Amá á ba am dagave-aatare, emnde umele ta de balaterse názena a maganaa Yaisu na baɗemme ge \*Farisa-aha.

<sup>47</sup> Daaci Farisa-aha, antara male-aha á \*liman-aha ta jemaa emnde a \*kendekyiya yaikke, a ba itare: «Mí magáná estara kina? Náwa zhel na aɲkwa a far ba mága najipu-aha?»

<sup>48</sup> Máki mí zharaná á ba an ice wá, watse baɗemme á emnde tá fetarfe áte zhele na. Daaci watse á tsetse elva yaikke, watse tá demda emnde a Rauma na tá an hakuma na á dem elva ɲanna, watse tá mbeɗanaambeɗa mashidi á miya yaikke na, tá keɗanaakeda larde á miya.»

<sup>49</sup> Daaci a ba Kayafas, ɲane male á \*liman-aha am sarte ɲanna, a ba ɲane á elvan ge itare: «Kure wá, baaka názu kwa disaa kure emtsaade.

<sup>50</sup> Diyakurka ganakini máki jamija shifa-aara ɲane palle á emtsemtsa aɗaba emnde, á shansha ire-aara larde á miya emtu?»

<sup>51</sup> Amá wá, a ndaanaa ɲane an ire-aara ka una ɲanna. Am ba ɲane una a gev male á liman-aha am sarte ɲanna, a maganaa ba Dadaamiya geni á maganaamaga nabiyire áte Yaisu, geni a emtsemtsa Yaisu am kela á Yahudiya-aha baɗemme.



<sup>52</sup> Am kela á Yahudiya-aha ka palle, amá geni á jatermarje ge egdzara á Dadaamiya na tá am huđe á duniya bademme tá gevge palle.

<sup>53</sup> Daaci male-aha á Yahudiya-aha ta magaa sawari á ja shifa á Yaisu ba vacite nanna.

<sup>54</sup> Adaba una nanna Yaisu dalika á jadaba am dagave á Yahudiya-aha áte parakkire. A naba zlalehe á dem ekse umele tá daháná an Aifrayim herzhe an kaamba, ta de nja áhuwa antara pukura-aha-aara.

<sup>55</sup> Herzhevteherzhe munri á Yahudiya-aha na tá daháná an \*Paska na maa, bademme á Yahudiya-aha na tá am ekse-aha umele, tá anjwa jahava á ba á dem huđe á Urusaliima zlađe samka hare-aha á munri emtsaade, geni tá de maga náde á cudedfire ge ire-aatare, lauktu tá za munri.

<sup>56</sup> Am sarte na jarammeje emnde am mashidi wá, ta tátaya Yaisu. A ba itare am dagave-aatare: «Watse á ba á sawa zhel na á sem munri? Emtu estara a ba kure?»

<sup>57</sup> Ta ndanaa adaba uwe estuwa, adaba a ba male-aha á \*liman-aha antara \*Farisa-aha, ma a naanaa ware tate á Yaisu keni, a shebeka, itáre tá de ekseksa.

## 12

### *Maari a puwanante náza se áte sera ge Yaisu (Mat. 26:6-13; Mark. 14:3-9)*

<sup>1</sup> A juwaa ba háre unjwahe tá gyá munri á \*Paska wá, damda Yaisu á dem Baytaniya ekse á Laajarus na a tsante am faya na.

<sup>2</sup> Ta naba gyanaa dafa ge Yaisu am ekse nanna. Tara Yaisu antara Laajarus ira emnde umele tá arge dafa. Marta wá, nane slevaterte dafa nanna antara kazlaŋa-aara bademme.

<sup>3</sup> Daaci duwa á Maari, a naba eksetaa náza se-aara kyalma á liter zlázláda gane-aara jipu. Náza se nanna wá, tá gyaná an nardisa. A naba puwanante áte sera bedbedbede ge Yaisu, a halanaahe an úgje á ire-aara. Daaci bademme á huđe á bere ba se á náza se na.

<sup>4</sup> A ba Yahuda Iskariyaut palle á pukura-aha-aara, edda una watse á de valateru ge Yaisu kelaade-aha keni ba nane nanna, a ba nane:

<sup>5</sup> «Labára kwá maga una? Ma tá veluka náza se zlázláda seke una, ma gursa kul vuye keni, daaci ma tá tegatertega ge talage-aha!»

<sup>6</sup> Ndahaaka una adaba slezatervaare ge talage-aha, amá adaba nane neyle. Á náná nane shunju-aatare, amá anjwa á ilila.

<sup>7</sup> A ba Yaisu: «Weshawananteka ire ge mukse na. Adaba anjwa á maginá nane zunjwe slera a vacite na má watse tá hediheda na.

<sup>8</sup> Talage-aha wá, ma vaatara keni tá á ba ázekure. Amá ya wá, watse ya baaka ázekure.»

### *Male-aha á \*liman-aha tá ngwadá sawari á ja shifa á Laajarus*

<sup>9</sup> Cenarácena Yahudiya-aha ganakini anjwa Yaisu am Baytaniya maa, bademme ta berdava á ba ádehuwa. A dáteraa ba wedere á Yaisu ka palle, ta de zharanaa antara Laajarus na a tsante am faya na.

<sup>10</sup> Daaci male-aha á \*liman-aha ta ngwadaa sawari-aatare geni sey tá kedanaakeda shifa á Laajarus keni.

<sup>11</sup> Adaba Yahudiya-aha kwakya eptsaraterveptsá iga ge itare, ta fetaare áte Yaisu adaba nane.

### *Yaisu á dem huđe á Urusaliima (Mat. 21:1-11; Mark. 11:1-11; Luka 19:28-40)*

12 Makuralla-aara wá, bademme a nalgaadama á jamme am huđe á Urusaliima ta se za muṅri á \*Paska na, cenarácena ganakini aṅkwa á sawa Yaisu á sem huđe á Urusaliima.

13 Bademme-aatare ta naba dātsemaa hyema á debina am erva, daredde á de lyiya Yaisu an ṅane áte barama. A ba itare á ba an ká kwara: «Galaugala Dadaamiya! A gagga Dadaamiya barka ge ekka na ká sawa an zhera á Yaakadada na. A gagga Dadaamiya barka ge ekka, ka slekse á \*Iserayiila.»

14 Am sarte ṅanna, Yaisu shansha ezzeṅwa zlauzle, a njete áte ezzeṅwa ṅanna, gevge á ba áte una á ndahaná wakita á Dadaamiya, a ba ṅane:

15 «Ekkure emnde a berni á \*Siyauna, a wakurka lyawa đekideki, kwaye á sawa slekse á kure áte úma á ezzeṅwa.»

16 Am sarte ṅanna wá, ndza cenaránka emtsaade pukura-aha jirire-aara. Sey am sarte na zlazlálá Yaisu á dem yaikkire-aara, lauktu saasa á sem ire-aatare bademme, geni názena ta maganaa emnde ge Yaisu na ba kalkale antara una a ndaanaa wakita á Dadaamiya áte ṅane.

17 Vacite na Yaisu a dāase Laajarus am irekhya, a tsante am faya na wá, emnde kwakya tá aṅkwa áhuwa. Ta de balatersaa emnde ṅanna ge emnde umele názena ta nanna itare.

18 Adaba una ṅanna emnde bademme ta se yainu ge Yaisu. Adaba cenarácena najipu na a maganaa ṅane.

19 A ba \*Farisa-aha am dagave-aatare: «Zharauzhárá, bademme á emnde tá zhagade á ba á dezejara! zhel na degiya mi danuka?»

### *Yunanīṅkau-aha tá kátá deza Yaisu*

20 Tá aṅkwa Yunanīṅkau-aha umele am dāgave á emnde na ta sem Urusaliima ge se kezlan ugje ge Dadaamiya am muṅri na,

21 ta duhe ge Yunanīṅkau-aha ṅanna á deza Filip, ura Baytisayda am kwárá á Galili, a ba itare tá elvan ge ṅane: «Malum njá kátá deza Yaisu».

22 A tsetehe ge Filip a de mbedanu elva ṅanna ge Andere, daaci bukerde-aatare ta duhe á deza Yaisu, ta ndaanhe.

23 A ba Yaisu á elvan ge itare: «Hyephye sarte a zlálá \*Ura á emnde bademme á dem yaikkire-aara.

24 Yá ndaakur ba jirire: Ice á hiya palle, máki jakemka am haha keđakanaakeda, ma vaatara keni ba ṅane palle ṅanna. Amá máki jakemja am haha keđakanaakeda wá, á yá egdzere kwakya.

25 Daaci ma ware una a wayete shifa-aara keni á de keđanaakeda, amá edda una a yaa shifa-aara am duniya na wá, á shá shifa na á zleka na.

26 Edda una má á kátá magiya slera ge iya wá, sey á đabidába. Daaci tate na ni ya átekwa ya na wá, sleslera-aaruwa keni á de njá á ba áhuwa. Ma ware una á magiya slera ge iya na, Edderwa á gálá ba ṅane.»

### *Yaisu aṅkwa á ndáhá elva a emtsa-aara*

27 A ba Yaisu kina wá: «Yá aṅkwa dzámá ire! Yá baná uwe kina ge Edderwa? Yá baná: Eddaaye, piyetepiya zladá-aaruwa na emtu? Yá ndaaka una đekideki. Adaba a siyaa ba una ṅanna á sem duniya.

28 Arge una ṅanna wá, náwa názena ni yá banán ge Edderwa: Eddaaye, emmága slera á ṅa am emnde geni a diyareddiya yaikkire á ṅa.» Daaci tá cená ba kwárá yaikke á ndáhá elva á sawa am samaya, a ba ṅane: «Maranateránmárá zlauzle yaikkire-aaruwa ge emnde, amá yá marateránmárá zlađe adaliye geni a galarigálá emnde.»

<sup>29</sup> Emnde na tá anƙwa áhuwa cenáráncena kwárá ñanna, amá a ba emnde umele válaha á samaya, a ba emnde umele keni, anƙwa á ndaan elva malika.

<sup>30</sup> Yaisu a ndaterse jirire-aara, a ba ñane á elvan ge itare: «Kwárá ñanna á biyá elva ge iya ka, amá á bakurán ge kure.

<sup>31</sup> Sarte na náwa ñane na wá, á kyaavekye shairiya á duniya na, tá eblyanseblye slekse á duniya na á degashe.

<sup>32</sup> Iya wá, má watse kariteka ya áte haha na, a detire wá, baɗemme á emnde watse yá sátersa ásezerwa.»

<sup>33</sup> Kwaya ñane sera á elva-aara na a pálá jeba á emtsa na ni á de emtsa ñane na an ñane.

<sup>34</sup> Daaci a ba emnde tá elvan ge ñane: «Anƙwa an puwa am \*tawraita ña cenáncena wá, \*Almasiihu wá, á emtseka ɗekideki. Ekka keni a ba ka sey tá kanteka \*Ura á emnde baɗemme á detire. Ware ñane \*Ura á emnde baɗemme ñanna?»

<sup>35</sup> A ñwaterante ge Yaisu, a ba ñane á elvan ge itare: «Kina wá, zlaɓe anƙwa parakkire am dáɗave á kure na wá, dawmbare á ba á de katafke, a se shakurka tabeɗammire. Aɗaba edda una á zlála am tabeɗammire diyaaka ba tate na á detekwa keni.

<sup>36</sup> Aɗaba una ñanna, fautarefe áte parakkire am sarte na ni anƙwa parakkire ázekure, geni kwá gevge emnde a zlála am parakkire.»

#### *Kwalarevkwale Yahudiya-aha ge fetare áte Yaisu*

Ba a ndaase elva-aara Yaisu wá, a naba zlalehe ba yiyye an itare, a de shebevhe duksa-aara.

<sup>37</sup> Yaisu maganaamaga tsa najipu-aha gergere naránna an ice-aatare, aley fartarka ɗekideki áte ñane.

<sup>38</sup> Una ñanna gevge á ba áte una ndza a ndaana nabi Aisaya am nabiyire-aara, a ba ñane:

«Yaakadada, anƙwa ura a fetaare áte waazu á ñere emtu? Yaakadada mu a maraná hákuma-aara ge ware ñane?»

<sup>39</sup> Zlaɓe ádalije, dzegwaránka fetarfe na wá, gevge elva na ndza a ndaana nabi Aisaya am nabiyire-aara, a ba ñane:

<sup>40</sup> «Dadaamiya a haɗateraa ice geni a naránka an ñane, a vaterte degdegire á ire, geni a cenarvaaka elva-aara. Baɗemme á una ñanna wá, ba geni a saremká ásezerwa geni yá mbateraambe.»

<sup>41</sup> Nabi Aisaya a ndaa una ñanna na wá, aɗaba á ba am date keni ñane nanna Yaisu am yaikkire-aara lauktu a magaa nabiyire ñanna áte ñane.

<sup>42</sup> Am una ñanna wá, á ba am dáɗave á male-aha á Yahudiya-aha keni kwakya emnde na fartarfe áte Yaisu, amá ndarseka parakke, aɗaba ta kuva ice á \*Farisa-aha, geni a ñgyaraterseka am jeba á Yahudiyire ba ɗekideki.

<sup>43</sup> Ta hayaa ba ñgáhire na tá sháná áza emnde, arge ñgáhire na á de vatertá Dadaamiya.

#### *Am halavuwa á duniya elva á Yaisu á de mbaɗa emnde am shairiya*

<sup>44</sup> Daaci a kante kwárá á ba an ndzeɗa Yaisu, a ba ñane: «Ma a fetaara ware áte ya keni, a fetaara áte ya palle ka, amá a fetaare áte edda una a ɓelibela na keni.

<sup>45</sup> Ma a niyaa ware keni, edda-aara nánna edda una a ɓelibela na keni.

<sup>46</sup> Sawa-aaruwa á sem duniya na wá, ya parakkire ge duniya, geni ma a fetaara ware áte ya keni, a njeka am tabeɗammire mázla-aara.

<sup>47</sup> Ma a cenanaa ware elva-aaruwa, amá magaaka fesarfíre wá, yá ngudaná ya ka edda-aara. Adaba sanká á se ngwada emnde a duniya, amá ya se lyaterlya.

<sup>48</sup> Ma a yiyaa ware, ma a yanaa ware elva-aaruwa keni, anƙwa názena ni á de mbedá edda-aara am shairiya. Ba elva-aaruwa ɲanna a cenevaa ɲane, amá fetareka na wá, á de mbedaná ba elva ɲanna vaci shairiya.

<sup>49</sup> Adaba elva á ire-aaruwa ka. Bademme á názena yá anƙwa ndaater ge emnde, antara názena ni yá anƙwa kwaraterse ge emnde na wá, bademme ndza a binaa ba Edderwa.

<sup>50</sup> Diyandiya ganakini elva ɲanna a beliya Edderwa an ɲane na wá, á saterá shifa na á zleka na ge emnde. Daaci bademme ya se ndá ba názena ni a binaa Edderwa.»

## 13

### *Yaisu á baraterá sera ge pukura-aha-aara*

<sup>1</sup> Ay, a jauwaa ba háre palle mazla-aara tá gya munri á \*Paska, Yaisu diyaadiya ganakini herzhavteherzhe sarte-aara jipu ge zlala á dem mba á Eddeɲara, á yá duniya. Wayatertewáyá an tsáká ire emnde-aara na ni á yaterá am duniya na.

<sup>2</sup> Daaci, tá arge masane tara Yaisu antara pukura-aha maa, Yahuda egdza á Simaun Iskariyaut wá, fanemfa Shaitaine am ervaunɲe zlauzle, ganakini a veluvele Yaisu.

<sup>3</sup> Yaisu wá, diyaadiya ɲane ganakini ndza a sawa áza Dadaamiya, watse á eptsa zlaɲe ádaliye á deza Dadaamiya. Diyaadiya geni bademme á hákuma á ba am erva-aara.

<sup>4</sup> Daaci a naba tsanvaare ge masane na, a tsekwese am zane-aara, anƙwa patele áhuwa a halante, a ngudese huɲe an ɲane,

<sup>5</sup> a kevaa yawe am tasa, daaci a fantau ge barateraa sera ge pukura-aha-aara, á halateraa yawe áte sera an we á patele na a ngudese huɲe an ɲane na.

<sup>6</sup> Daada áte Simaun Piyer maa, «Lyafka,» a ba ɲane. «Ka ni ka bariya sera ge iya Yaakadada?»

<sup>7</sup> A ɲwanante ge Yaisu, a ba ɲane á elvan ge ɲane: «Názena yá anƙwa maganá ya na diyanƙa emtsaɲe, amá watse ká diyeddiye.»

<sup>8</sup> A ba Piyer: «Baaka, ká báreka sera-aaruwa ɲekidɲeki.» A ba Yaisu á elvan ge ɲane: «Máki baranakaaka sera wá, ba icevice dáɲave á miya antara ka.»

<sup>9</sup> A ba Piyer á elvan ge ɲane: «Yaakadada, máki estuwa wá, serka palle, antara ba erva-aha-aaruwa, antara ire-aaruwa, náwa barivebare.»

<sup>10</sup> A ba Yaisu á elvan ge ɲane: «Máki ura barevbare wá, á bareka mazla-aara adaba tseɲaɲe vuwa-aara. Sey á bára ba sera. Kure wá, tseɲaɲe vuwa á kure. Amá wá, kure bademme ka.»

<sup>11</sup> Edda una ni watse á de vela Yaisu na wá, Yaisu diyaadiya, a ndanaa adaba una ɲanna: Bademme á kureka kwa tseɲaɲe.

<sup>12</sup> Am sarte na zlauzle am baratera sera maa, a tsekweme am zane-aara zlaɲe adaliye, a de njehe am tate á nja-aara, a ba ɲane á elvan ge itare: «Kina diyakurdiya názena ya magakurnaa ya na emtu?»

<sup>13</sup> Náwa kwá ɲahiyá an malum antara Yaakadada. Shagera jipu, una ɲanna ba unɲule-aara. Adaba ba jire ya ba estuwa.

<sup>14</sup> Iya na ya malum antara Yaakadada ni náwa ya barakuraa sera ge kure na wá, daaci kure keni shagera barabará sera-aha á kure am dáɲave á kure.

<sup>15</sup> Iya wá, maranakuránmárá gáráva-aara, geni kure keni kwá de magáná á ba áte una ya magakurnaa ya na.

<sup>16</sup> Náwa yá ndakurndá kwa ádaliye: Ge jirire wá, walaadí á januka ge zánwe-aara, slebela keni á januka ge edda una ni a ebbela na.

<sup>17</sup> Kina wá, cenakuráncena mazla-aara, máki kwa emmága áte una nanna wá, á de jakurja geđa.

<sup>18</sup> «Elva-aaruwa na wá, yá ndaakur ge kure bademme á kure ka. Diyanaterdiya ya emnde-aaruwa na ya dzeratersaa ya. Názena ni an puwa am wakita á Dadaamiya na keni shagera ba a gevge. Adába a ba nane: Palle á emnde na na zu dafa kerde á de gev kelaade-aaruwa.

<sup>19</sup> Ndaanakursendá ya mázla-aara, a njinja am vuwa á kure, geni má sámša duksa nanna wá, kwá diyeddiye geni iya wá, Iya.

<sup>20</sup> Yá ndaakur ba jirire: Ma a lyiyanaa ware slebela-aaruwa keni, edda-aara a lyevaa ba iya. Iyau, edda una a lyevaa ya maa, a lyevaa ba edda una ni a belibela na.»

*Ngyanmengye Shaitaine am ervaunde ge Yahuda  
(Mat. 26:20-25; Mark. 14:17-21; Luka 22:21-23)*

<sup>21</sup> Ba a ndaase una nanna Yaisu wá, mázla-aara damda dzámá ire yaikke á dem nane. A ba nane á elvan ge pukura-aha-aara: «Yá ndaakur ba jirire, watse á veliya ba palle á kure.»

<sup>22</sup> Farantaufe pukura-aha ge zháráva á dem ice am dágave-aatare, diyarka edda una Yaisu á bálá nákwá áte nane na dekideki.

<sup>23</sup> Ankwa pukura palle, nane a nja herzhe an Yaisu, Yaisu a wayete nane kwakya-aara.

<sup>24</sup> Simaun Piyer a maganaa nalaama, geni a ndavanundave: á bálá nákwá áte ware nane.

<sup>25</sup> Pukura nanna a naba ndavanu ge Yaisu an enkale, a ba nane: «Yaakadada, ware nane edda-aara?»

<sup>26</sup> A ba Yaisu á elvan ge nane: «Kwaye watse yá ukcevaukca van gwala yá gar dále wá, edda una má ya fanem am erva na ba nane.»

Daaci Yaisu a naba ukcevaa van gwala na, a gar dále, a vante ge Yahuda egdza á Simaun Iskariyaut.

<sup>27</sup> Ba a lyevaa dafa na Yahuda am erva á Yaisu wá, Shaitaine a naba ngyanme am ervaunde. A ba Yaisu á elvan ge nane: «Ábi ká am niya á na ge slera á na na? Edduwa emmága watsewatse.»

<sup>28</sup> Amá ma a bannaa adaba uwe Yaisu elva nanna ge Yahuda keni, palle á ura diyaadiya baaka dekideki am dágave-aatare nanna.

<sup>29</sup> Adába á náná Yahuda shungu maa, emnde umele-aatare ta kurken Yaisu a banaa de shekwamiveshekwe duksa na mí maga munri an nane, bi a banaa de tegatertega egdza duksa ge talága-aha.

<sup>30</sup> Am sarte na lyevaalya Yahuda van gwala na am erva á Yaisu, antara ba degashe-aara ba watsewatse. Am sarte nanna vayiya.

*Shairiya anwaslire na a vatertaa Yaisu ge emnde-aara*

<sup>31</sup> Sesse Yahuda zlazlálá maa, a ba Yaisu: «Kina wá, á de marápsemará yaikkire á \*Ura á emnde bademme mázla-aara, tá de zharaná áte nane emnde yaikkire á Dadaamiya keni.

<sup>32</sup> Ba seke una ni marápsemará yaikkire á Dadaamiya áte Egdza-aara na wá, Dadaamiya keni á de marateránmárá ba nane an ire-aara yaikkire á Egdza-aara ge emnde. Á de magán ba herzhe na duksa nanna, má watse á dáná á dem samaya.



<sup>33</sup> Daaci, yá haraaka antara kure kwakya mazla-aara egdzara-aaruwa. Kina wá, názena ndza ya ndaater ge Yahudiya-aha na, yá ndakurnda ge kure keni: Watse kwá tatayítataya, amá kwá taa daaka á dem tate na yá detekwa ya na.

<sup>34</sup> Náwa shairiya anwaslire yá vakurte ya: Shairiya nanna wá, mága wáyávire am dágave á kure. Kure keni wayawaavewáye am dágave á kure á ba áte una ya wayakurtaa ya na.

<sup>35</sup> Máki kwá anƙwa wayaavewáye wá, tá naba diyakureddiye emnde a duniya ganakini kure wá, kwa pukura-aha-aaruwa.»

*Piyer á de pelaará we ge Yaisu*

*(Mat. 26:31-35; Mark. 14:27-31; Luka 22:31-34)*

<sup>36</sup> A ndavanu ge Simaun Piyer, a ba nane: «Ká zlála a deme ka Yaakadada?» A nwanante ge Yaisu, a ba nane á elvan ge nane: «Kina zlaƙe ká dzegwánka emtsaade dabiya á dem tate na yá detekwa ya, sey watse ká dabiya á katafke.»

<sup>37</sup> A ba Piyer á elvan ge nane: «Yaakadada labára yá dzegwánka dƙabakƙaba kina? Ya keni yá am niya-aaruwa, yá kátá ya shifa-aaruwa aƙaba ka.»

<sup>38</sup> A ba Yaisu á elvan ge nane: «Ba jirire ká am niya a ya shifa á nƙa aƙaba ya emtu? Yá ndak ba jirire: Vatena lauktu á kyuwa tsákála wá, ká de ndaasendá ka ser keye, diyakika, a ba ka.»

## 14

*Ba Yaisu palle una baráma á deza Dadaamiya*

<sup>1</sup> A ba Yaisu á elvan ge pukura-aha-aara: «A gazleka ervaunde á kure dƙeƙeƙe, fautarfe áte Dadaamiya, fautarfe áte ya keni.

<sup>2</sup> Kwakya slede am huƙe á há á Edderwa. Ma andze baaka wá, ma yá ndakurka. Yá zlála, yá de tsatsakurá slede.

<sup>3</sup> Má tsatsanakuraatsatse slede zlauzle maa, watse yá eptsá, yá se halakurá á dezerwa, geni kure keni kwá de njá á ba am tate na ni yá njá ya átekwa.

<sup>4</sup> Baráma á dem tate na yá detekwa ya wá, diyakurdiya.»

<sup>5</sup> A ba Taumas á elvan ge nane: «Yaakadada, ba tate na ká detekwa nanna keni diyanerka ni, diyanerdiya baráma-aara? Njá dise estara kena?»

<sup>6</sup> A ba Yaisu á elvan ge nane: «Ya baráma nanna ba iya, jirire keni á ba ázerwa palle, shifa keni á ba ázerwa palle. Baaka ura á daada á deza Edderwa á kya baráma umele dƙeƙeƙe, sey máki a se dƙaba ya.

<sup>7</sup> Máki diyakuridiya iya wá, Edderwa keni ba diyakurdiya. Ba kina keni diyakurdiya, kwá anƙwa zhára ba nane.»

<sup>8</sup> A ba Filip á elvan ge nane: «Yaakadada, maraƙeránmára ka ba Eddenja na ge nƙere wá, zlauzle náza á nƙere.»

<sup>9</sup> A ba Yaisu á elvan ge nane: «Kinekinaka yá am dágave á kure ni kwaasau diyakika Filip? Ma a niyaa ware keni, edda-aara a naa ba Edderwa, una ni maraƙeránmára Eddenja, á ba ka?

<sup>10</sup> Emtu faktarka ganakini yá anƙwa am Edderwa, Edderwa keni anƙwa am ya emtu? Baƙemme á názena yá bakurná ya na elva á ire-aaruwa ka, á bina ba Edderwa. Zlaƙe ádalije baƙemme á názena yá maganá ya na keni, á maganá ba nane slera-aara am ya.

<sup>11</sup> Máki ya bakurnaa ba ya: Yá anƙwa am Edderwa, Edderwa keni anƙwa am iya wá, naba fautarfe. Máki una ka maa, fautarfe kure á ba áte slera-aha na yá maganá ya na.

<sup>12</sup> Yá ndaakur ba jirire: Ma a fetaara ware áte ya keni, ba kelaa názena yá maganá ya na, edda-aara keni á emmága. Jauje ba ge una yá anƙwa á maganá ya na keni á de emmága ɲane, adaba yá anƙwa duwa ya ádetevge Edderwa.

<sup>13</sup> Ma kwa yeka uwe an zhera-aaruwa keni yá emmága, geni a naránna emnde yaikkire á Edderwa adaba Egdza-aara.

<sup>14</sup> Máki kwá ɲala duksa an zhera-aaruwa wá, ma uwe keni yá emmága.»

*A ba Yaisu watse á bela Shedekwe Cufedfe á sawa*

<sup>15</sup> A ba Yaisu á elvan ge itare zlaɓe adaliye: «Máki wayakuriwayá wá, magaumága názena yá bakurná ya.

<sup>16</sup> Iya wá, yá de ɲala Edderwa, ganakini á belakurá ura umele, á se melakurwa ɲane. Edda-aara ɲanna wá, Shedekwe na á kwaraterse jirire ge emnde na, á se njá ɲane antara kure ma vaatara keni.

<sup>17</sup> Emnde a duniya wá, itare tá shánka Shedekwe ɲanna defekideki, adaba diyarka Shedekwe ɲanna, tá nánka keni. Amá kure wá, diyakurdiya ɲane adaba á njá antara kure, watse á njá am kure.

<sup>18</sup> Amaana yá yakurka an ire á kure ba seke egdzar tahe-aha, sey yá sawa ásezekure.

<sup>19</sup> Á katafke cekwaanɗuɗi wá, tá de nika emnde a duniya mázle-aara, amá kure wá, watse kwá nina yá á ba an shifa-aaruwa. Adaba una ɲanna, kure keni kwá de shá shifa jirire.

<sup>20</sup> Watse kwá de dise ba vacite ɲanna ganakini ɲere an Edderwa wá, ɲa ba palle. Kure antara ya keni ma ba palle.

<sup>21</sup> «Ma a ɲanaa ware názena ya bakurnaa ya na, anƙwa á emmága, edda una wayiwáyá ba ɲane. ɲere an Edderwa wayaɲerwáyá jipu an edda-aara, yá maranánmára ire-aaruwa ge edda-aara.»

<sup>22</sup> Anƙwa Yahuda umele ɲane Yahuda á Iskariaut ka, a ba ɲane á elvan ge Yaisu: «Yaakadada, á geva estara kena ni, ká de maraɲerá ire á ɲa ba ge ɲere, tá nanƙa emnde a duniya na?»

<sup>23</sup> A ba Yaisu á elvan ge ɲane: «Máki wayitewáyá edda-aara, anƙwa á magá názená yá bakurná ya wá, Edderwa keni á wayetewaya edda-aara. Daaci ɲere an Edderwa ɲá de njá an edda-aara.

<sup>24</sup> Máki wayika edda-aara wá, názena yá anƙwa bakurná ya na keni a maɲka defekideki. Amá a viyakurarka ganakini baɗemme á elva na yá bakurná ya na wá, elva á ire-aaruwa ka, a bina ba Edderwa na ni a belibela na.

<sup>25</sup> Yá anƙwa á bakurná ya elva-aha ɲanna adaba zlaɓe yá anƙwa antara kure emtsaade.

<sup>26</sup> Má zlalanzlálá iya wá, watse Edderwa á belakurá Shedekwe Cufedfe slemelanu ge ura á de sawa an zhera-aaruwa. Má watse samsa ɲane wá, á se kwarakurse duksa baɗemme, á se yehakuranta ɲane názena ya bakurnaa ya na baɗemme.

<sup>27</sup> «Kina wá, yá zlálá, náwa yá yakurá hairire. Hairire-aaruwa ɲanna wá, gergere antara hairire na á vantá duniya ge ura. Yá vakurte ba hairire na yá an ɲane ya am ervaunɗe-aaruwa. Daaci a gazleka ervaunɗe á kure defekideki, dzamauka ire keni.

<sup>28</sup> Ábi kwa cenancena elva-aaruwa, a ba ya ma zlalanzlálá keni watse yá eptsa zlaɓe adaliye ásezekure. Wayakuriwayá tsawe wá, higauhiga áte

zlálá-aaruwa keni, adaba yá anƙwa zlálá á dem mbá á Edderwa, yaikke ba Edderwa arge iya.

<sup>29</sup> Kina wá, fanakuremfa duksa-aha ɲanna am vuwa geni vacitu má de gevge duksa-aha ɲanna wá, kwá de fetarfe áte iya.

<sup>30</sup> Yá ndáka elva kwakya mazla-aara, adaba anƙwa á sawa slekse á duniya na. Amá á kwariyá ɲane ka defideki,

<sup>31</sup> á magava una ɲanna, ba geni a diyareddiye emnde a duniya, ganakini wayanwáyá an Edderwa, yá maganá á ba áte una a binaa ɲane ma uwe keni. Tsawetse mi zláláwa áhuna!»

## 15

### *Anƙwa nafa tá dahaná an inabauhi, ya nafa ɲanna, a ba Yaisu*

<sup>1</sup> A ba Yaisu: «Ba iya una ya mama á inabauhi á jirire, Edderwa wá, ɲane edda á fe á nafa ɲanna.

<sup>2</sup> Daaci bademme á erva-aha na tá áte ya baaka nampire-aatare na, á datsaná á ba á dem áhá edda á fe. Á hyahyalaná antara ba erva-aha shagera shagera na keni cekwa cekwa, geni erva-aha ɲanna tá yá egdzere ɲgeláma.

<sup>3</sup> Daaci kure kina wá, kwá an tsaatse, á tsatsakuraa názena ya kwarakursaa ya bademme na.

<sup>4</sup> Gawevge emnde a nja á ba áte vuwa-aaruwa, iya keni yá njá á ba átevege kure. Erva a nafa máki icaráyica áte mama wá, á taa yeka egdzere mázla-aara. Ba duksa palle ge kure keni, kwá taa maganaaka ba názara keni máki kwa baaka atevege ya.

<sup>5</sup> «Daaci ya mama á nafa ɲanna ba iya, kure kwa erva-aha-aaruwa. Edda una á njá á ba átevege ya, iya keni yá anƙwa átevege ɲane wá, ɲane á magannaamaga námpire ge Dadaamiya. Amá máki kwa baaka átevege iya, ya baaka átevege kure wá, kwá taa maganaaka ba názara keni.

<sup>6</sup> Edda una á njá yiyiye an ya wá, á eblyansebelye Dadaamiya ádegashe, ba seke náza erva á nafa na an ica na. Ta eblyanse á degashe, má welesewele tá fante kára.

<sup>7</sup> Máki kwá nja á ba áte vuwa-aaruwa, elva-aaruwa keni kwá anƙwa emmága wá, naba ndavaundáva názena kwá kataná kure, kwá shánsha.

<sup>8</sup> Máki anƙwa námpire na kwá maganá kure wá, tá de diyakureddiye emnde ganakini kwa pukura-aha-aaruwa ba jirire, tá de dise estuwa yaikkire á Edderwa keni.

<sup>9</sup> Yá keni wayanakurwáya ba seke una a wayitaa Edderwa na. Ma vaatara keni diyaweddiye ganakini wayanakurwayire.

<sup>10</sup> Máki kwá anƙwa á fisarfe am názena yá bakurná ya wá, ma vaatara keni kwá diyeddiye ganakini wayanakurwáyá, ba seke una yá anƙwa á fansaara ya ge Edderwa, ma vaatara keni diyandiya geni wayiwáyá Edderwa.

<sup>11</sup> «Ya sakuranse una na wá, ganakini a naatená higa-aaruwa na ni yá an ɲane na am ervaunđe á kure, geni kure keni á natená ervaunđe á kure an higa ba kalkale antara náza-aaruwa.

<sup>12</sup> Náwa názena yá bakurná ya: Wayawaavewaye am dagave á kure ba seke una ya wayakurtaa ya.

<sup>13</sup> Máki ba mága wayavire wá, baaka arge una ni ura a naba yaa shifa-aara adaba slakate-aha-aara na.

<sup>14</sup> Daaci kwa slakate-aha-aaruwa ba kure máki kwá anƙwa á maga názena yá bakurná ya.

<sup>15</sup> Daaci estuwa wá, yá dfaakurka an walaadi-aha mázla-aara, adaba walaadi diyaaka sawári na am ire á zánwe-aara. Yá dfaakura á ba an slakate-aha-aaruwa, adaba shanakurushe sawari na ya shanaa áza Edderwa na bademme ge kure.

<sup>16</sup> Kwa eksisaa kure ka lauktu ya gev Yaakadada á kure, amá ya dzerakursaa ba ya geni kwá se dabiðfaba. Ya fakuraare slera zlaðe áðaliye, geni kwá maganaamaga nampire na ni saksage na. Daaci ma kwa ndavanu uwe ge Edderwa keni á vakurteva, máki kwá ndavaná an zhera-aaruwa.

<sup>17</sup> Wayawaavewaye am dagave á kure. Ba una názu yá fakuraará ya.»

### *Duniya yanaaya Yaisu antara emnde-aara*

<sup>18</sup> «Máki yarakuraaya emnde a duniya wá, diyaweddiye ganakini ta yaa ba ya zuññwe.

<sup>19</sup> Ma andze kwa emnde a duniya wá, ma tá yákuraaka emnde-aara keni, adaba ma kwa ba palle. Amá kwa emnde a duniyeka, ya dzerakursaa ya, ya sakurse am itare. Adaba una ñanna yarakuraaya na.

<sup>20</sup> Viyawanaaka kure ba elva-aaruwa na: Walaadi wá, á taa januka ge zanwe-aara an yaikkire. Máki ta faa zlaða áte ya wá, watse tá fá zlaða áte kure keni. Máki ta cena elva-aaruwa wá, náza á kure keni watse tá eccena.

<sup>21</sup> Bademme á lámare ñanna wá, tá de magakurte adaba ba zhera-aaruwa, adaba diyarka edda una ni a ðelibela na.

<sup>22</sup> Ma andze sanemka á se ndaternda wá, ma haypa-aatare ka. Amá kina wá, watse ðaaka we-aatare mazla-aara, ba haypa-aatare.

<sup>23</sup> Ma a yiyaa ware keni, a yaa ba Edderwa.

<sup>24</sup> Ma andze magannaaka slera-aha na ndza magaaveka am dagave á emndimagwaha ðekideki na áte ice-aatare wá, ma haypa-aatareka. Amá náwa naranna slera-aaruwa bademme, aley yarañeraaya antara ba Edderwa keni.

<sup>25</sup> Mága-aatare ñanna wá, a gevaa ba názena an puwa am tawraitaaatare. Ankwa an puwa am \*tawraitaa, a ba ñane: Yariyaaya ba dey.»

<sup>26</sup> A ba ñane á elvan ge itare zlaðe áðaliye: «Watse á sawa Slemelakurumele á de vakurtá Edderwa, yá de ðelaná á sawa am mba á ñere máki danaada ya. Slemelakurumele ñanna wá, Shedekwe Cudedde á kwaratersá ñane jirire ge emnde, á se maganá ñane seydire áte ya.

<sup>27</sup> Kure keni watse kwá mága seydire áte ya, adaba ya fantuwa estuwa slera-aaruwa, sem kina ma ba kerdé.»

## 16

<sup>1</sup> «Náwa yá ankwa fakuremfa am vuwa á kure, ganakini a de kezlevka fetarfire á kure áte ya.

<sup>2</sup> Adaba watse tá ñgyakurñgye am jeba á Yahudiya ba ðekideki, kwá duka á dem mashidi. Ankwa á sawa sarte umele wá, ma a janaa ware shifa á kure keni, á de banba am ervaunðe-aara geni á maganá slera shagera ge Dadaamiya.

<sup>3</sup> Una ñanna tá de maganá adaba diyarañerka ma Edderwa, ma iya keni.

<sup>4</sup> Kwaya ñane, fanakuremfa am vuwa á kure zlauzle. Daaci má samsa sarte ñanna wá, watse kwá diyeddiye ganakini ya ndakurnda.»

### *Slera á Shedekwe Cudedde am duniya*

A ba ñane á elvan ge itare: «Ndanakurka una am fantaufe na wá, adaba yá ankwa ba ya an ire-aaruwa am dagave á kure.

<sup>5</sup> Kina wá, ya ndakursende adaba yá anƙwa eptsá á deza edda una á belibela na. Amá baaka ura a ndaviyu elva am dagave á kure áte zlalaaaruwa ɲanna.

<sup>6</sup> Kwá dzámá ire estuwa adaba ya bakuraa yá eptsá ádeza edda una á belibela na emtu?

<sup>7</sup> Amá yá ndaakur ba jirire: Baira ge kure wá, shagera ba yá zlalá ɲanna. Adaba máki zlalanka ya, á sawka Slemelakurumele na keni. Amá máki zlalanzlalá ya wá, yá de belá ɲane, á de sawa ɲane ásezekure.

<sup>8</sup> Má watse samsa ɲane wá, á se weratertá ice ge emnde a duniya áte haypa-aatare, áte jirire-aaruwa antara áte shairiya na á de kyáná Dadaamiya.

<sup>9</sup> Haypa-aatare ɲanna wá, adaba fartareka áte ya.

<sup>10</sup> Ate jirire-aaruwa keni maa, adaba watse kwá nika mazla-aara yá eptsá ádeza Edderwa.

<sup>11</sup> Ate shairiya á Dadaamiya maa, adaba ɲateraana shairiya antara slekse á duniya na bademme.

<sup>12</sup> «Kwakya duksa na yá kátá bakurná ya, amá yá ndakurka adaba zlaɓe kwá dzegwánka.

<sup>13</sup> Daaci má watse samsa Shedekwe Cufedde ɲanna á kwaranse jirire ge ura na wá, watse á se ndakursá ɲane jirire á duksa bademme. A se ndaakur elva á ire-aareka, amá á se ndáhá ba názena ni a cenáncena na, antara duksa na watse á magava á katafke na bademme.

<sup>14</sup> Watse á se mbedakurwa ɲane elva-aaruwa, daaci estuwa emnde bademme watse tá nanna yaikkire-aaruwa.

<sup>15</sup> Bademme á duksa á Edderwa ba náza-aaruwa. Ya bakurnaa adaba una, watse Shedekwe Cufedde á sakurá elva-aaruwa.»

### *Dzama ire á de gev higa yaikke*

<sup>16</sup> A ba Yaisu á elvan ge itare: «Á de katafke cekwaangudí wá, watse kwá nika. Má shekwaashekwa cekwaangudí, watse kwá nina zlaɓe ádaliye.»

<sup>17</sup> Daaci a bá pukura-aha umele am dagave-aatare: «A ba Yaakadada, á de katafke cekwaangudí wá, watse kwá nika. Má shekwaashekwa cekwaangudí wá, watse kwá nina zlaɓe ádaliye. A ba ɲane zlaɓe ádaliye: Yá zlala á dem mbá á Edderwa, watse kwá nika na mu, amaana estara ɲane elva ɲanna?»

<sup>18</sup> A ba itare: «Á de katafke cekwa na á ndaana ɲane na wá, ɲá taa diseka dekideki.»

<sup>19</sup> Amá kertenɗiyeddiye Yaisu ganakini anƙwa ndáva-aatare azenara. Daaci a ba ɲane á elvan ge itare: «Kwá kátá dise elva-ara ɲane kwá anƙwa á ndava am dagave á kure na? Ba elva na ya bakurnaa ya, á bá ya: Á de katafke cekwaangudí watse kwá nika, má shekwaashekwa cekwaangudí, watse kwá nina zlaɓe ádaliye na emtu?

<sup>20</sup> Yá ndaakur ba jirire: Kure wá, watse kwá kyuwa, watse kwá tsákáná á ba antara dákwa. Emnde a duniya wá, watse tá dzaka. Watse kwá dzámá ire kwakya, amá cekwaangudí á de katafke wá, á de gev higa yaikke ge kure.

<sup>21</sup> Ba seke náza á mukse á huɗe, máki herzhe yá-aara wá, sey ba á dzámá ire adaba herzhe zladá-aara. Amá má yaaya wá, á shá higa yaikke, á gev ba seke ndza wanka duksa, adaba yaaya ura.

<sup>22</sup> Watse ba duksa palle ge kure keni, kina wá, kwá anƙwa dzama ire, amá watse yá nakurná zlaɓe ádaliye ba kure ɲanna, kwá higa, watse baaka ura á dzegwándzegwa piya higa ɲanna am kure.



<sup>23</sup> «Má watse samsa sarte ñanna wá, baɗemme á maana á duksa watse á ba bálá ázekure, baaka ura á de ndava elva ázerwa. Yá ndaakur ba jirire: Ma kwa ndava uwe an zhera-aaruwa keni, á vakurteva Edderwa.

<sup>24</sup> Zlaɓe ndavakurka emtsaade ba názara keni an zhera-aaruwa. Ndavaundáva, kwá shánsha duksa na kwá ndavaná kure, geni a natena higa am ervaunɗe á kure.»

### *Yaisu gaaga ndzedá arge duniya*

<sup>25</sup> A ba ñane á elvan ge itare zlaɓe ádaliye: «Sem vatena wá, yá eksa duksa á duniya ganakini yá palakurá sera á elva á Edderwa an ñane. Amá anɗkwa á sawa sarte na ni watse yá ndaakur elva á Edderwa ba parakke.

<sup>26</sup> Má samsa sarte ñanna wá, watse kwá ndavaná ba kure an ire á kure duksa áza Edderwa an zhera-aaruwa. Bawanka ni watse yá yekakurná ba iya duksa.

<sup>27</sup> Adaba Edderwa wayakurtewáyá kure keni. A wayakurte adaba kure wayakuriwaya, fakurtarfe geni ya sawa ázeñara.

<sup>28</sup> Ba jire ya sawa á ba áza Edderwa, ya sem duniya. Kina wá, yá anɗkwa ya duniya, yá eptsa á deza Edderwa.»

<sup>29</sup> A ba pukura-aha-aara: «Yawwaa, una wá, ndaksenda elva párákke, baaka naraje am huɗe-aara ɗekideki.

<sup>30</sup> Kina wá, diyanerdiya ganakini diyakdiya duksa baɗemme, diyakdiya ka názu am ire á ñere, baaka ni ñá ndavaku an ndave emtsaade. Adaba una ñanna diyanerdiya mázla-aara geni ka sawa áza Dadaamiya.»

<sup>31</sup> A ba Yaisu á elvan ge itare: «Diyakurdiya mázla-aara ka?

<sup>32</sup> Amá anɗkwa á sawa sarte umele, ba kina keni samsa wá, baɗemme watse kwá kyivaarkye, ma ware keni watse á zhagade á de cuwa há-aara, watse kwá yiya ba ya palle. Amá ge jirire wá, watse ya palle ka, adaba anɗkwa Edderwa antara ya.

<sup>33</sup> Baɗemme á una ñanna yá anɗkwa fakurem am vuwa na wá, geni a gazleka ervaunɗe á kure ɗekideki, adaba kwa ba palle antara ya. Am duniya na wá, kwá shushe zlaɗa, amá tsawaatse ba shagera, adaba gannaaga ya ndzedá arge duniya.»

## 17

### *Maduwa á Yaisu arge pukura-aha-aara*

<sup>1</sup> Am sarte na zlanazle elva-aara Yaisu, a kante ice á dem samaya, a ba ñane: «Eddaye-aaruwa, kina wá, hyephye sarte mázla-aara. Marateranmárá yaikkire á Egdza á ña ge emnde, geni ya keni ya marateranmárá yaikkire á ña.

<sup>2</sup> Adaba ka vitaa ba ka hákuma áte emnde baɗemme, geni yá vaterte shifa na á zleka na, ge emnde na ka dzeratersaa ka ge se ɗabidɗaba.

<sup>3</sup> Shifa na á zleka ñanna wá, ba ni a diyaraksediya ba shagera, ka Dadaamiya á jirire baaka umele, a diyariyeddiye iya Yaisu \*Almasiihu na ka beliyaa ka.

<sup>4</sup> Maranateránmárá yaikkire á ña ge emnde am duniya, magannaamaga slera na ni ka fiyaara ka.

<sup>5</sup> Daaci kina wá, eptsiyaptsa kwa á dem yaikkire-aaruwa na ndza yá am kwa átevege ekka kwaye zlaɓe nderaaveka duksa ba ɗekideki na.

<sup>6</sup> «Kwaranatersekwere zhera á ña baɗemme ge emnde na ka dzeratersaa ka am duniya, ka vite ge ɗabidɗaba na. Ta emnde á ña ba ge ekka, amá ka puwatermaa am erva-aaruwa. Itare wá, tá anɗkwa cena elva á ña, tá anɗkwa á faksarefe.

<sup>7</sup> Kina wá, itare diyardiya baɗemme ganakini baɗemme á názena ya shanaa ya ázeɗa, a sawa á ba ázeɗa.

<sup>8</sup> Mbedanaterumbede elva á ɗa baɗemme, lyarvaalya an erwaunde-aatare palle, diyardiya ganakini ba jirire ya sawa ázeɗa, fartarefe geni ka beliyaa ba ka.

<sup>9</sup> «Yá aɗkwa ɗaláká aɗaba itare. Yá ɗalák ge duniya baɗemme ka, amá aɗaba emnde na ni ka vite ge ya na. Ta emnde á ɗa ba ge ekka.

<sup>10</sup> Duksa-aaruwa, ba duksa á ɗa. Duksa á ɗa keni ba duksa-aaruwa. Daaci emnde tá zharaná am itare yaikkire-aaruwa.

<sup>11</sup> Iya wá, yá aɗkwa yá duniya, yá eptsá á dezeɗa, amá itare wá, zlaɓe tá njá á ba am duniya na. Edderwa ka cuɗeɗe, yá aɗkwa dá kina á dezeɗa na wá, yá aɗkwa ɗalakɗála geni ká tsufatertsufa an hákuma na ni aɗkwa am zhera á ɗa, zhera á ɗa na ka vite ge iya na, geni itare keni a garevge palle, ba seke una ni miya antara ka ma ba palle na.

<sup>12</sup> Am sarte na yá aɗkwa ya am dagave-aatare wá, tsufanateraatsufa an hákuma na aɗkwa am zhera á ɗa, zhera na ka vite ge ya na. Baaka ura keɗaakeɗa am dagave-aatare, sey ba edda una aɗkwa elva-aara ta puwete am wakita á ɗa na. Gevge ba kalkale antara una a ndaanaa wakita.

<sup>13</sup> Amá kina yá aɗkwa tse, yá zlala á dezeɗa na wá, yá aɗkwa ndaha elva ɗanna antara ka emtsaade, geni ma zlalanzlala keni, a naatenaha erwaunde-aatare an higa ba kalkale antara náza-aaruwa.

<sup>14</sup> Mbedanaterumbeda elva á ɗa, lyarvaalya an erwaunde-aatare palle. Amá wayaraterka emnde a duniya mazla-aara, aɗaba garevge gergere. Ba seke una iya keni ganevka ura á duniya na.

<sup>15</sup> Yá ɗalák ganakini ká satersese am duniya baɗemme ka, amá geni ká tsufatertsufa, a magaterteka emtaɗkire slemáɗzawe.

<sup>16</sup> Ba seke una ni ya ura á duniya ka ya na wá, itare keni ta emnde a duniya ka.

<sup>17</sup> Emmága sleksire á ɗa am erwaunde-aatare, barateraabará an jirire á ɗa. Ba elva á ɗa una jirire ɗanna.

<sup>18</sup> Ba seke una ka beliyaa ka á sawa am samaya, á sem duniya na wá, iya keni yá aɗkwa á belaterbela á dem huɗe á duniya.

<sup>19</sup> Yá aɗkwa vakte ire-aaruwa baɗemme aɗaba itare, geni itare keni tá yaká ire-aatare á ba an jirire.

<sup>20</sup> «Kina wá, yá ɗaláká arge itare ka palle mazla-aara, yá ɗaláká arge emnde na ni watse tá de fetaare áte ya aɗaba waazu-aatare na keni baɗemme.

<sup>21</sup> Yá aɗkwa ɗalakɗála Edderwa, geni baɗemme-aatare ɗanna, ká gatervege ba palle, lauktu tá gevge palle antara miya, ba seke una yá aɗkwa am ka, ka keni ká aɗkwa am ya na. Itare keni a garevge palle, lauktu tá de fetarfe emnde a duniya ganakini ka beliyaa ba ka.

<sup>22</sup> Yaikkire na ni ka vitaa ka ge iya na wá, vanaterteva ya ge itare keni, geni a garevge palle, ba seke una miya antara ka ma ba palle na.

<sup>23</sup> Ba seke una ni ekka ká aɗkwa am ya, iya keni yá aɗkwa am ka na wá, itare keni a garevge ba palle. Á de dise áte una ɗanna duniya ganakini ka beliyaa ba ka, wayakaterwáyá itare keni ba seke una ka wayite ya na.

<sup>24</sup> «Daaci Edderwa, emnde ɗanna ka vitaa ka na wá, yá kátá itare keni tá de njá á ba am tate na yá de njá ya átekwa na, geni a naránna yaikkire na ka vitaa ka. Yaikkire-aaruwa ɗanna wá, aɗaba wayakitewáya kwaye zlaɓe nderaaveka duksa ba ɗekideki na.

<sup>25</sup> Eddaye-aaruwa, ka ura jirire, amá diyaraŋka emnde a duniya, ya diyakŋa ba ya. Emnde ŋanna ka vitaa ka na keni diyardiya ganakini ka beliyaa ba ka.

<sup>26</sup> Kwaranatersekwáre zhera á ŋa ge itare, yá aŋkwa á kwanatersekwáre zlaŋe ádaliye dem katafke keni, ganakini wayava na ka wayitaa ka an ŋane na wá, itare keni tá wayaavewáye á ba áte una ŋanna, iya keni yá njinja am itare.»

## 18

### *Ta eksanaa estuwa Yaisu*

(*Mat. 26:47-56; Mark. 14:43-50; Luka 22:47-53*)

<sup>1</sup> Am sarte na zlanazle Yaisu mága maduwa ŋanna, mazla-aara ta naba zlalá antara pukura-aha-aara á dete iga a egdza guwa na tá dfaaná an Kaidairaun na. Aŋkwa fe áte iga a guwa ŋanna maa, ta demhe am fe ŋanna antara pukura-aha-aara.

<sup>2</sup> Yahuda na a velanaa ŋane Yaisu na wá, ŋane diyaadiya tate ŋanna. Adaba mbaasemba Yaisu ge dem tate ŋanna antara pukura-aha-aara.

<sup>3</sup> Daaci a dateraa Yahuda ŋanna sawji-aha, antara emnde a ufa mashidi na ta belateraa male-aha á \*liman-aha antara \*Farisa-aha na. Daaci dardede, tá an kazlaŋa á wáva-aatare am erva, antara kára á fanus-aha-aatare, ira kára á názbekara.

<sup>4</sup> Yaisu wá, diyaadiya ŋane názu watse á shá ŋane bademme. A tsetehe, a ba ŋane á elvan ge itare: «Kwá aŋkwa tatayá ware kure?»

<sup>5</sup> Ta ŋwanante, a ba itare: «Ijá aŋkwa tatayá ba Yaisu ura Nasarátu.» A ba Yaisu á elvan ge itare: «Ya Yaisu ŋanna ba iya.» Daaci ta tsaahé kwa, antara Yahuda na a velanaa ŋane na á tse á katafke-aatare.

<sup>6</sup> Am sarte na ni ya Yaisu ŋanna ba iya, a ba Yaisu á elvan ge itare na wá, bademme eptsaraapetsa an iganiga, reppe puwaraapuwa á dem áhá bademme.

<sup>7</sup> Yaisu a ndavateruhe zlaŋe ádaliye: «Kwá aŋkwa tatayá ware kure?» Ta ŋwanante, a ba itare: «Ijá aŋkwa á tatayá Yaisu ura Nasarátu.»

<sup>8</sup> A ba Yaisu á elvan ge itare: «Ábi ya ndaakurndaha? Máki kwá aŋkwa á tatayá ba iya wá, yawáterya emnde na a zlarzlalá, ya Yaisu ŋanna ba iya.»

<sup>9</sup> Yaisu a ndaa una ŋanna, geni a gevge á ba áte elva-aara na a banán ge Eddenjara Dadaamiya na, adaba a ba ŋane: «Ba ura palle keni kedfaaka am dagave á emnde na ka vitaa ka.»

<sup>10</sup> Simaun Piyer maa, aŋkwa masalam ázenjara, a naba tefese masalam-aara ŋanna, a waa walaadi á male á \*liman-aha an ŋane, a lanaa hyema á nadafa. Zhera á walaadi ŋanna Malkus.

<sup>11</sup> Amá a ba Yaisu á elvan ge Piyer: «Femfa masalam á ŋa am bere-aara. Ka kurken eksanarka shá zladfa na a fiyaara Edderwa emtu?»

### *Daránda Yaisu á dem mba á Hannas*

<sup>12</sup> Daaci ta naba gwarhe ge sawji-aha antara male-aatare ira Yahudiya-aha emnde a ufa mashidi na, ta naba puwete zawa áte Yaisu.

<sup>13</sup> Zunŋwe wá, ta daa Yaisu á dem mbá á Hannas emtsaade, shawlenjara ge Kayafas male á \*liman-aha am sarte ŋanna.

<sup>14</sup> Ba Kayafas na ndza a baterán ge Yahudiya-aha, a ba ŋane: «Máki jamija shifa-aara ŋane palle, á shansha ire-aara larde á miya na.»

### *A ba Piyer: Ya pukura á Yaisu ka*

(*Mat. 26:69-70; Mark. 14:66-68; Luka 22:55-57*)

<sup>15</sup> Simaun Piyer antara pukura umele wá, ta daa d'aba Yaisu am sarte na eksarvaaksa na. Palle á Piyer nanna wá, male á \*liman-aha diyaadiya nane ba shagera. Adaba una nanna a shaa baráma á d'aba Yaisu á de ba am huđe á há á male á liman-aha.

<sup>16</sup> Amá Piyer wá, a tsaahé áte we á wakyiya. Daaci a naba eptsehe ge pukura palle na diyaadiya male á liman-aha na, ta se ndaave elva antara mukse na á ufa wakyiya na, daaci a dánme Piyer keni á dem huđe á há.

<sup>17</sup> Mukse nanna sle-ufa wakyiya na a se ndavanu ge Piyer, a ba nane á elvan ge nane: «Ábi ka keni ka ba pukura á zhel nanna?» A n'wete ge Piyer, a ba nane: «Iya ka».

<sup>18</sup> Am sarte nanna an'kwa ekhye maa, mbarantembe kára walaadi-aha antara emnde a ufa mashidi, tá an'kwa á cena kára na. Piyer keni a de tsaahé ázetare, tá cena kára na kerde.

*Yaisu á katafke á Hannas male á \*liman-aha werre  
(Mat. 26:59-66; Mark. 14:55-64; Luka 22:66-71)*

<sup>19</sup> Hannas emgyegwe a male á \*liman-aha a ndavanu elva ge Yaisu áte pukura-aha-aara, antara názena a kwaratersaa nane ge emnde.

<sup>20</sup> A n'wanante ge Yaisu, a ba nane á elvan ge nane: «Bademme á elva-aaruwa ya ndahán ba párákke. Ya kwaraterse ge emnde am \*mashidi yaikke, antara am egdzar mashidi-aha. Baaka elva na ya ndaanaa an shebe d'ekideki.

<sup>21</sup> Labara ká ndaviyu elva áte una nanna? Ndavaterundave ba ge emnde na ni a cenanaa hyema-aatare elva am mbuwe-aaruwa, itare diyaadiya názena ya ndaanaa ya.»

<sup>22</sup> Ba a ndaase una nanna Yaisu wá, palle á emnde a ufa mashidi na tá á tsatse áhuwa, a se vante babárva, a ba nane á elvan ge Yaisu: «Tá n'wanante ba estuwa ge male á liman-aha?»

<sup>23</sup> A ba Yaisu á elvan ge nane: «Máki ya ndaanaa an dzálá wá, naba ndan'erndaa tate na ni ya ndaanaa an dzálá na. Amá máki ya ndaanaa á ba áte un'jule-aara wá, labara ká jija?»

<sup>24</sup> Daaci á bá liman Hannas: «Dawánda kwa á dem mba á Kayafas.» Ta daa Yaisu á ba an takwasa nanna á dem mba á Kayafas male á liman-aha.

*Dalide Piyer ge baa nane pukura á Yaisu ka  
(Mat. 26:71-75; Mark. 14:69-72; Luka 22:58-62)*

<sup>25</sup> Am sarte nanna, zlahe Simaun Piyer á ba tse áte we á kára na, á cena kára. Ta ndavanuhe ge emnde a cena kára nanna, a ba itare tá elvan ge nane: «Ka keni ka ba palle á pukura-aha á zhel nanna ka?» A n'wete ge Piyer a ba nane: «Ya pukura-aara ka.»

<sup>26</sup> An'kwa palle á walaadi-aha á male á \*liman-aha, ba egdza emmenjara ge edda una Piyer a icanaa hyema an masalam na, a ba nane á elvan ge Piyer: «Ka ni nananjka antara nane am fe áhuwa na?»

<sup>27</sup> «Aley ba ya pukura-aara ka», a ba Piyer. Ba nane keni ndaasende, tsaktsakwalikwaa a ba tsákálá.

*Yaisu á katafke á sleksu \*Pilaatu  
(Mat. 27:1-2, 11-14; Mark. 15:1-5; Luka 23:1-5)*

<sup>28</sup> An en'lya werre wá, ta danse Yaisu am mbá á Kayafas male á \*liman-aha, ta dánaa á dem mbá á \*Pilaatu slekse yaikke ta fanaa emnde a Rauma. Amá darka Yahudiya-aha á dem huđe á há á slekse nanna, adaba tá an bára cufedde, an'kwa mun'ri á \*Paska á katafke-aatare geni tá shánsha zá mun'ri nanna.

<sup>29</sup> A segashe adaba una nanna sleksu Pilaatu ásezetare ágashe, a ba nane á elvan ge itare: «Kwa se puwaar ugje adaba uwe ge zhel na?»

<sup>30</sup> Ta nwanante ge slekse, a ba itare: «Ma andze baaka názu á maganá nane wá, ma njá sánka á sem mbá á na.»

<sup>31</sup> A ba sleksu Pilaatu á elvan ge itare: «Máki ba estuwa wá, nawmbare dawánda, de kyawkya ba kure shairiya-aara áte una am \*tawraitá á kure.» Ta nwanante ge male-aha á Yahudiya-aha, a ba itare tá elvan ge nane: «Adaba baaka baráma-aara ge ntere, ganakini njá kyá shairiya a keda shifa á ura.»

<sup>32</sup> Mága nanna wá, sesse jirire á elva á Yaisu na a ndaanaa áte emtsaara na. Adaba a ba nane: Watse tá tsitetse áte dzangala.

<sup>33</sup> \*Pilaatu a naba demhe am huđe á há-aara, a daante Yaisu, a de ndavanuhe, a ba nane á elvan ge nane: «Ba ka una ka slekse á Yahudiya-aha na emtu?»

<sup>34</sup> A ba Yaisu á elvan ge nane: «Una ba elva á ire á na emtu, ta se ndaaka emnde he?»

<sup>35</sup> A ba Pilaatu á elvan ge Yaisu: «Iya ya ura Yahudiya emtu? Ábi ta se puwakaare ugje ba emnde á kure antara male-aha á \*liman-aha ázerwa, ka gu uwe ka?»

<sup>36</sup> A nwanante ge Yaisu, a ba nane á elvan ge nane: «Ya slekse, amá kwará-aaruwa wá, am duniya ka. Ma andze tate na yá kwaraná ya am duniya wá, ma tá sawa kwakwane-aha-aaruwa á se waviyuwave, ma tá eksivaaka Yahudiya-aha dekideki. Amá tate na ni yá kwaraná ya na wá, am duniya ka.»

<sup>37</sup> A ba Pilaatu á elvan ge nane: «Máki estuwa wá, ka slekse kwa?» A ba Yaisu á elvan ge nane: «Ba seke ndáhá na. Ya slekse. Dalila á sawa-aaruwa á sem duniya na wá, a siyaa ba se maratera jirire ge emnde. Ta yiyaa adaba ba una nanna. Edda una anjwa jirire ázenara wá, á cená elva-aaruwa keni.»

<sup>38</sup> A ba Pilaatu á elvan ge nane: «Uwe nane jirire nanna?»

Am iga-aara maa, a naba sessehe zlađe adaliye ge Pilaatu nanna áseza Yahudiya-aha na ágashe, a ba nane á elvan ge itare: «Shanáka ya haypa áte zhel na ba palle keni.

<sup>39</sup> Am mbakurseme ganakini ba kelaa sakanderi yá belakurá dangay palle am munri á \*Paska maa, wayakurwáya emtu an slekse á Yahudiya-aha yá belakurnaabela á da?»

<sup>40</sup> Amá a ba itare bademme-aatare tá elvan ge nane á bá an ká kwará: «A'aa nane ka, belanaaka nane. Ntere njá hayá ká belanerá Barabas.» Degiya Barabas nanna sleceba shifa.

## 19

### *Njarantenja am shairiya ge ja shifa á Yaisu*

*(Mat. 27:15-31; Mark. 15:6-20; Luka 23:13-25)*

<sup>1</sup> Daaci a ba slekse á elvan ge sawji-aha-aara: «Dawánda Yaisu, de zawuze an ja.»

<sup>2</sup> Ta dánhe ge sawji-aha Yaisu na, ta de nderse dáke, ta fadanse ire an nane, ákurá \*dankaula, ta tsekwanme am dira kyanje.

<sup>3</sup> Mazla-aara ta tsahe ákatafke-aara, ta gyanu rume: «A vakteva Dadaamiya shifa slekse á Yahudiya-aha!» Daaci ta naba vavante babárva.

<sup>4</sup> Am iga-aara maa, sleksu \*Pilaatu sesse zlađe adaliye áseza zlamaake-laawa, a ba nane á elvan ge itare: «Kwaye yá de sansese zhel nanna



á se katafke á kure, ba palle keni shanáńka ya haypa-aara, ganakini yá ńgudaná adaba ńane.»

<sup>5</sup> Daaci ta sanse Yaisu ásegashe wá, an tsekwa am dira kyanńe, ta fadanse ire an dake. A ba slekse á elvan ge itare: «Kwaya ńane zhel ńanna.»

<sup>6</sup> Aley ba ta puwete ice-aatare áte Yaisu, \*liman-aha antara emnde a ufa mashidi wá, ta kante kwara á ba á dem zhegela, a ba itare tá elvan ge slekse: Zleńelezleńela áte dzańgala. Bademme-aatare tá ndaha ba ńane. «Áy náwmbare de zleńelawzleńela ba kure áte dzańgala ńanna, shanáńka ya haypa na ni yá zleńelaná adaba ńane.»

<sup>7</sup> A ba Yahudiya tá elvan ge ńane: «Máki áte shairiya na am \*tawraitá á ńere wá, á njeka an shifa đekideki, adaba a bantsa ńane: ńane \*Egdza á Dadaamiya.»

<sup>8</sup> Am sarte na cenáńcena sleksu \*Pilaatu, a ba Yaisu ńane Egdza á Dadaamiya na wá, farfe zlańe adaliye gázla-aara.

<sup>9</sup> A eptsehe zlańe adaliye á dem huńe á há, a de ndavanu ge Yaisu, a ba ńane á elvan ge ńane: «Ka ura ekse-ara ka?» Amá ńwanárka Yaisu đekideki.

<sup>10</sup> A ba slekse á elvan ge ńane: «Ká ńweka ndza? Diyakika ganakini yá an hákuma ge belakaabelá, bi ya zleńelakhe áte dzańgala emtu?»

<sup>11</sup> A ba Yaisu á elvan ge slekse: «Hákuma ńanna ká maganá ka áte ya na keni a vaktaa ba Dadaamiya. Ma andze vakteka Dadaamiya wá, ma baaka hákuma á ńa áte ya ba cekwańgudńi keni. Daaci kwakya ba haypa á edda una a se vite ge ekka na arge haypa á ńa.»

<sup>12</sup> A fantau á ba am sarte ńanna slekse, baaka názu magaaka ganakini á belanaabelá Yaisu. Amá ta puwaar hula Yahudiya-aha, a ba itare tá elvan ge ńane am hula-aatare: «Máki belakanaabelá zhel na wá, ka ura á male á larde a Rauma ka đekideki. Adaba ura ni a ganve ire-aara slekse na wá, ńane kelaade á male á haha á Rauma.»

<sup>13</sup> Ba a cenaa elva ńanna sleksu \*Pilaatu wá, a naba sanse Yaisu adaliye, a njema am kurshi á shairiya áte egdza gavaye-aara ta maganaa án nákwá, an elva á Ibranińkau tá đahána an Gabbata.

<sup>14</sup> Am sarte ńanna wá, herzhe á maga vacitire. Ba makuralla-aara una muńri á \*Paska. Daaci a ba sleksu \*Pilaatu á elvan ge Yahudiya-aha: «Náwa slekse á kure».

<sup>15</sup> Amá a ba itare á bá an ká kwara á dem samaya: «A njeka an shifa! A njeka an shifa! Zleńelezleńela áte dzańgala», a ba itare. A ba slekse á elvan ge itare: «Yá já slekse á kure emtu?» A ba male-aha á Yahudiya-aha tá elvan ge ńane: «Baaka slekse á ńere umele arge male á larde á Rauma.»

<sup>16</sup> Daaci slekse a naba yateraa Yaisu, ganakini a de zleńelarzleńela áte dzańgala, ta danhe ge sawji-aha.

### *Zleńelarzleńela Yaisu áte dzańgala*

*(Mat. 27:32-44; Mark. 15:21-32; Luka 23:26-43)*

<sup>17</sup> Daaci daransede Yaisu á dete iga a ekse, a sepanaa ba ńane dzańgala-aara á dem tate na tá đaaná an Gaulgauta an elva a Ibranińkau-aha na, amaana: Tate á delame á ire.

<sup>18</sup> Daraada áhuwa maa, sawji-aha na ta naba zleńela Yaisu áte dzańgala. Ańkwa zala buwa ta zleńelaterhe kerđe. Palle ta zleńelehe áte dzańgala am nadafa á Yaisu, ura palle keni am názlańa, Yaisu am dagave, ma ware keni áte dzańgala ge ire-aara.

<sup>19</sup> Sleksu \*Pilaatu a puwete názena ni ta jaa Yaisu átuge na, a fete áte dzaŋgala. Náwa názena a puwetaa ɲane: Yaisu ura Nasarátu, ɲane slekse á Yahudiya-aha.

<sup>20</sup> Kwakya Yahudiya-aha na de ndarsende puwa ɲanna, adaba yiyiyeka an kevaye an berni. Puwa ɲanna keni ta puwete an elva a Ibraniŋkau, an elva a Yunaniŋkau, ira elva a Rauma.

<sup>21</sup> Amá a ba male-aha á Yahudiya-aha tá elvan ge sleksu Pilaatu: «Puweka slekse á Yahudiya-aha na, puwetepuwa: A bantsa ɲane ya slekse á Yahudiya-aha.»

<sup>22</sup> Amá a ba slekse á elvan ge itare: «Názu puwantepuwa wá, á njá á ba áte una ɲanna.»

<sup>23</sup> Sawji-aha am sarte na zlaruzle am zlejela Yaisu maa, ta tegaa nanɲyuwe-aara am dagave-aatare gergere ufade áte itare. Daaci a juwa zane-aara icarka an ica d'ekid'eki, ta hán ba estuwa.

<sup>24</sup> A ba sawji-aha am dagave-aatare: «Tataumika zane na, magau-mimága njeri, watse á jesarje edda una á zaná ɲane na.» Daaci estuwa, gevge ba seke una an puwa am wakita á Dadaamiya. A ba wakita á Dadaamiya wá: Ta tegaa nanɲyuwe-aaruwa am dagave-aatare, ta magaa njeri áte zane-aaruwa.

<sup>25</sup> Tara emmeɲara antara egdza emmeɲara mukse ge emmeɲara ɲanna, antara Maari mukse á Kaulaupas, ira Maari mukse na am Magdala na, itare tá á tsatse á ba áte vuwa á dzaŋgala na Yaisu átekwa na.

<sup>26</sup> Yaisu a belanu ice ge emmeɲara, tá antara pukura-aara na ni kwakya-aara a wayete ba ɲane na, a ba ɲane á elvan ge emmeɲara: «Emmaaye, dawale ɲanna wá, egdza á ɲa ba ɲane.»

<sup>27</sup> A ba ɲane á elvan ge pukura ɲanna: «Emmeɲa ba ɲane.» Pukura ɲanna a naba eksante Maari á ba am sarte ɲanna, a danaahe á dem mba-aara.

### *Emtsa á Yaisu*

*(Mat. 27:45-56; Mark. 15:33-41; Luka 23:44-49)*

<sup>28</sup> Am iga a una ɲanna maa, am diyaadiya Yaisu ganakini zlauzle slera-aara bademme, a ba ɲane: «Á wiya ndera.» Estuwa gevge názena a ndahanaa wakita á Dadaamiya.

<sup>29</sup> Daaci anƙwa hwámá ta netaa mbazla á egdza nafa am huɗe-aara d'and'ane mbazla ɲanna; duwa á sawji-aha, ta nguɗete jeba á sausau umele áte lálá, ta shebeme am mbazla ɲanna, ta fante áte we ge Yaisu.

<sup>30</sup> Ba a shu una ɲanna Yaisu, a ba ɲane: «Kina wá, zlauzle slera-aaruwa bademme.» Mazla-aara a naba gá ire-aara, a emtsehe.

### *Zhel sawji a waa Yaisu an upa am slerpa*

<sup>31</sup> Vacite ɲanna maa, makuralla-aara kwaskwe á puwansepuwe á Yahudiya-aha, kwaskwe á puwansepuwe ɲanna keni jauje ge kwaskwe á puwansepuwe-aha umele, adaba munri á \*Paska. Adaba una ɲanna waa-yarka male-aha á Yahudiya ganakini kwaskwe á puwansepuwe á se berá emtsa á emnde áte dzaŋgala. A deteraa una ɲanna á deza sleksu \*Pilaatu, geni a kazlaratervekazla emnde na am sera, a tsekwarateraatekwa áte dzaŋgala-aha.

<sup>32</sup> Daaci duwa á sawji-aha, ta de kazlaa emnde buwa na ta zlejelateraa antara Yaisu áte dzaŋgala na am sera.

<sup>33</sup> Amá Yaisu wá, ta beraa baaka shifa am ɲane. Adaba una ɲanna kezlarka sera-aara ge ɲane.

<sup>34</sup> Amá palle á sawji-aha a naba wehe an upa am slerpa wá, kertenj a kelaa uzhe antara yawe ásegashe.

<sup>35</sup> Una a ndaanaa ba edda una a naanaa an ice-aara. Ankwa á maga seydire-aara ganakini ba jirire. Nane wá, diyaadiya ganakini a geva ba estuwa ba jirire, geni kure keni kwá fetarfe.

<sup>36</sup> Una nanna gevge ba kalkale antara una an puwa am wakita: A ba wakita á Dadaamiya wá: Tá de kyaþeka hyahya-aara dfekideki.

<sup>37</sup> Am tate umele zlaþe ádaliye á ba am wakita á Dadaamiya nanna, a ba nane: Watse tá zhára edda una ni ta wanaa an upa na.

### *Zlavarnaazlava Yaisu am irekhya*

*(Mat. 27:57-61; Mark. 15:42-47; Luka 23:50-56)*

<sup>38</sup> Am iga á una nanna maa, ankwa Yusufa umele ura Arimatiya, a de ndavanaa nane barama áza sleksu \*Pilaatu, ganakini á tsekwanaatsekwa emtsa á Yaisu, á dánda. Yusufa nanna wá, fetarfe áte Yaisu, amá ndahaaka parakke adaba á wána lyawa átuge Yahudiya-aha. A duwa nane ádeza slekse, slekse a vante barama. Daaci a de eksantaa nane emtsa á Yaisu.

<sup>39</sup> Nikaudaimus na ndza a deza Yaisu vacite umele an vayiya na keni ankwa áza Yusufa nanna. Nikaudaimus a duwa antara naavawe á nafa umele tá dahaná an Mirt, a weshaterte antara iga a nafa umele tá dahaná an Alauwe á se emtáke, á maga kilau kul keye.

<sup>40</sup> Ta tsekwanaa itare ta buwa nanna emtsa á Yaisu áte dzangala, ta eksante, ta de fademe am kalpakane. Tá effáda nanna wá, ta gete emtsaade naavawe á názase na áte kalpakane, lauktu ta fademe emtsa am huþe-aara, ta magán ba seke una tá maganá Yahudiya-aha má tá hedá ura.

<sup>41</sup> Ankwa fe ba herzhe an tate á zlenela á Yaisu nanna maa, ankwa irekhya anwaslire ndza zlavarnaaka emtsa am huþe-aara dfekideki.

<sup>42</sup> Am makuralla-aara kwaskwe á puwansepuwe-aatare, irekhya keni ankwa ba herzhe na wá, ta naba hedáa Yaisu am huþe-aara, adaba herzhe tá de maga niya á Yahudiya-aha.

## 20

### *Baaka Yaisu am irekhya*

*(Mat. 28:1-8; Mark. 16:1-8; Luka 24:1-12)*

<sup>1</sup> An enlya werre ge laade, zlaþe ba ice keni á zháreka wá, dedde Maari mukse á emnde a Magdala á dete irekhya á Yaisu. Duwa á Maari maa, a de beraa irekya á ba an wacene baaka páláme átuge evege.

<sup>2</sup> Daaci ba eþtsa-aara, a zhágade á deza tara Piyer antara pukura na wayaawáyá Yaisu kwakya na, a ba nane á elvan ge itare: «Degiya tedarsetede Yaakadada am evege, ma ta dánaa á deme keni diyanerka.»

<sup>3</sup> Ta naba duhe ge tara Piyer antara pukura nanna á dete irekhya.

<sup>4</sup> Bukerde-aatare ta dá á ba zhagade. Amá á tedána ba pukura palle na zhágade arge Piyer, daada ba nane zuññwe áte irekhya.

<sup>5</sup> A de zharaa ice á dem irekhya wá, a naa ba kalpákane á puwa ba dey. Amá wá, daaka á dem huþe á irekhya.

<sup>6</sup> Dámnda Piyer keni, nane a naba demhe á ba dem huþe-aara, amá nane keni a de beraa ba kalpakane á puwa.

<sup>7</sup> Amá baukta na ndza ta fadanaa ire an nane na wá, an kazla, á bela á ba an ire-aara.

<sup>8</sup> Daaci a naba demhe ge pukura na ni ndza a deme ba nane zuññwe á dete irekhya na, a zharanaahe, a naba fetarehe ganakini tsetsa Yaakadada.

<sup>9</sup> Se ba am sarte ɲanna keni ndza cenaránka pukura-aha názena a ndahanaa wakita á Dadaamiya áte Yaisu, ganakini watse á tsetse am faya na.

<sup>10</sup> Daaci ta naba dá-aatare ge pukura-aha buwa ɲanna.

*Yaisu a maranse ire-aara ge Maari mukse á emnde a Magdala*  
(Mat. 28:9-10; Mark. 11:9-11)

<sup>11</sup> Am sarte ɲanna wá, eptsapetsa Maari zlaɓe ádaliye á sete we á irekhya. A tsaahé wá, á kyuwa. Duwa-aara á de zharaa ice á dem irekhya wá,

<sup>12</sup> á zhárá ba malika-aha ta buwa, tá am nanɣyuwe dzayye dzayye, tá njanja am tate na ndza ta zlavaa Yaisu na. Palle á malika-aha ɲanna a nja am tate á bela ire, palle keni ám tate á sera.

<sup>13</sup> Daaci ta ndavanu elva malika-aha ɲanna: «Labara ká kyuwa emmaaye?», a ba itare tá elvan ge ɲane. A ɲwaterante, a ba ɲane: «Ya kyuwa Yaakadada-aaruwa, ma ta danaa á deme keni diyanka.»

<sup>14</sup> Ba a ndaase una ɲanna, estuwa a eptsetaa ice wá, á zhárá ba Yaisu á tse, amá wá, diyaaka ganakini una ɲane.

<sup>15</sup> A ba Yaisu á elvan ge ɲane: «Ká kyuwa uwe ka emmaaye? Ká tatayá ware ka?» Maari, ɲane a kurken ba edda una á maga slera am fe. Daaci a ba ɲane á elvan ge ɲane: «Máki ka danaa ka wá, tasle á ɲa biyanba tate-aara eddaaye, yá de eksanteksa.»

<sup>16</sup> «Maari!» a ba Yaisu á elvan ge ɲane. A eptsaptse ge Maari á deɲɲara: «Rabbuni,» a ba ɲane á elvan ge ɲane an elva a Ibraniɲkau, amaana malum-aaruwa.

<sup>17</sup> A ba Yaisu á elvan ge ɲane: «Piyiyanteka, adaba zlaɓe zlalanka emtsaade á dem mba á Edderwa. Amá ezzlala de bateránba ge egdzar mama-aha-aaruwa: Náwa tsanetse, watse yá zlalá á deza Edderwa, kure keni Eddekure ba ɲane, yá deza Dadaamiya-aaruwa, kure keni Dadaamiya á kure ba ɲane.»

<sup>18</sup> Daaci ba ezzlala-aara ge Maari mukse á emnde a Magdala na, a dateraa labare ɲanna ge pukura-aha, a ba ɲane á elvan ge itare: «Ya nanna Yaakadada!» A naba ndaterhe názena ni a bannaa Yaisu na.

*Yaisu á maraterá ire-aara ge pukura-aha-aara*  
(Mat. 28:16-20; Mark. 16:14-18; Luka 24:36-49)

<sup>19</sup> Ba vaci laade ɲanna maa, ta jamme ge pukura-aha am bere, am iga a manɣaripu, ta naba zlanete we á bere-aha bademme an tsekweram adaba lyawa á Yahudiya-aha wá, tá zhárá ba dámda Yaisu, a tsaahé am dagave-aatare. «A vakurteva Dadaamiya hairire,» a ba ɲane á elvan ge itare.

<sup>20</sup> Am iga a elva ɲanna maa, a marateraa erva-aha-aara antara slerpa-aara. Daaci higa ge pukura-aha adaba naranna Yaakadada.

<sup>21</sup> A ba ɲane á elvan ge itare zlaɓe ádaliye: «A vakurteva Dadaamiya hairire. Ba seke una ni a beliyaa Edderwa á sem duniya na wá, iya keni yá anɲkwa belakurbela á dem huɗe á duniya.»

<sup>22</sup> Daaci a naba futateraare effeya an we, a ba ɲane á elvan ge itare: «Kwayaumbare Shedekwe Cudedɗe.

<sup>23</sup> Máki kwa yanaara kure haypa ge ura, Dadaamiya keni yanarye ge edda-aara. Máki yakuranaarka ge edda-aara, Dadaamiya keni yanaarka.»

*Yaisu á maraná ire-aara ge Taumas*

<sup>24</sup> Am sarte na a sawa Yaisu áseza pukura-aha na wá, baaka Taumas palle á pukura-aha, Wulhe keni ba zhera-aara.

<sup>25</sup> Samsa Taumas wá, a ba pukura-aha umele tá elvan ge ñane: «Ñere nanjeránna Yaakadada.» A ba Taumas á elvan ge itare: «Máki nanánka tate á kusa-aha na ta paslanmaa am erwa-aha na á ba an ice-aaruwa, ya fem gulanda-aaruwa, máki fanemka erwa-aaruwa am tate á upa na ta wanaa am slerpa na wá, ya fetareka ya ðekidëki ganakini tsetse am faya na.»

<sup>26</sup> Samsa máka-aara wá, jarammeje zlaþe ádaliye pukura-aha am bere. Vacite ñanna wá, anþkwa Taumas keni am dágive-aatare. Ta zlanþete we á bere-aha an tsekweram, amá tá zhárá ba samsa Yaisu, a tsaathe am dágive-aatare, a ba ñane á elvan ge itare: «A vakurteva Dadaamiya hairire.»

<sup>27</sup> Ba a ndaase una ñanna: «Sawa an gulanda á ña, náwa erwa-aha-aaruwa,» a ba ñane á elvan ge Taumas. «Sánsa erwa á ña, femfa am slerpa-aaruwa keni. Yánya mága shaige mazla-aara, fetarfe á ba an jirire.»

<sup>28</sup> A ba Taumas á elvan ge ñane: «Ka Yaakadada-aaruwa, ka Dadaamiya-aaruwa.»

<sup>29</sup> A ba Yaisu á elvan ge ñane: «Ábi ka fetaara áte ya adaba nakina? Gedá wá, tá sháná emnde na ni natika, amá ta naba fetarfe na.»

### *Názena ni ta puwete wakita na adaba ñane*

<sup>30</sup> Yaisu a magaa najipu-aha gergere kwakya zlaþe ádaliye áza pukura-aha, puwarteka najipu-aha ñanna bademme am wakita na.

<sup>31</sup> Názena ni an puwa am wakita na wá, ta puwete ganakini kwá fetarfe áte Yaisu, geni ba ñane una \*Almasiihu, \*Egdza á Dadaamiya. An fetarfire á kure áte ñane wá, kwá shá shifa adaba ñane.

## 21

### *Yaisu á maraterá ire-aara am Galili ge emnde-aara vuye*

<sup>1</sup> Haraare cekwaanþudí wá, Yaisu a de marateraa ire-aara zlaþe ádaliye ge emnde vuye am pukura-aha-aara. A marateraa ire-aara áte we á haye á Tibairiyas. Náwa a marateraa estuwa ire-aara ñanna.

<sup>2</sup> Vacite ñanna jarammeje pukura-aha na am tate palle, tara Simaun Piyer an Taumas ba ñane una tá dahaná an Wulhe, antara Natanayail ura ekse á Kana am kwára á Galili, an egdzara á Jaibaidaiyus buwa, antara pukura-aha umele buwa.

<sup>3</sup> A ba Simaun Piyer á elvan ge itare: «Iya yá zlala á de sluwa kelfe.» A ba emnde na: «Ñere keni ñá dábakdába.» Daaci ba tse-aatare, ta demhe am paare á yawe. Ta hare paþþe, amá slumarvaaka kelfe ðekidëki.

<sup>4</sup> Anþkwa á wera ekse, palaathe slede maa, a naba jesarhe ge Yaisu áte we á haye, amá diyarseka pukura-aha ðekidëki ganakini ñane.

<sup>5</sup> Yaisu a ndavateruhe elva: «Ba sluwakurvaasluwa kelfe dawalaa?» Ta ñwanante a ba itare: «Ba palle keni shaþeránka duksa.»

<sup>6</sup> A ba Yaisu á elvan ge itare: «Puwawumpuwa narre á kure á dem yawe am dalbe á naðafa á paare, kwá slumaasluwa.» Ta naba puwumhe wá, slumarvaasluwa kelfe kwakya jipu, jaterviyaaje ge teða narre na antara kelfe am huðe-aara, á dem huðe á paare.

<sup>7</sup> A ba pukura na wayaawáya Yaisu kwakya na á elvan ge Simaun Piyer: «Una degiya Yaakadada!» Piyer ba a cenaa: Una degiya Yaakadada na wá, a tsakweme am nanþyuwe-aara, adaba ndza tsekwesetsekwe, daaci a ebzema á dem yawe.

<sup>8</sup> Daaci ta semhe ge pukura-aha umele á se teða kelfe na am narre, ta yiyiyeka ðeme an kevaye an we á haye, á magá ba maiter deremke palle.

<sup>9</sup> Saresse am yawe maa, tá zhárá ba kára an mbe antara kelfe an puwa átekwa, anþkwa depain zlaþe á puwa.



<sup>10</sup> A ba Yaisu á elvan ge itare: «Sawánsa kelfe na kwa sluwanaa kure kina na cekwaanɗudfi.»

<sup>11</sup> Daaci a dɓalemhe ge Simaun Piyer á dem paare, a de tefante we á narre an naha an kelfe-aha saɗaɗɗe am huɗe-aara na á sete haha. Kelfe deremke an kul ilyebe ju keye am narre ɗanna, aley tataaka narre dekiɗeki.

<sup>12</sup> Daaci «Sawmbare zaumiyuze,» a ba Yaisu á elvan ge itare. Amá baaka pukura na a slásla ndavanu elva ganakini ka ware. Adaba baɗemme diyareddiye ganakini Yaakadada.

<sup>13</sup> A gaptehe ge Yaisu, a eksetaa depain, a tegaterhe, a tegateraa kelfe zlaɓe ádaliye.

<sup>14</sup> Ge keyire una, Yaisu aɗkwa á maraterá ire-aara ge pukura-aha-aara, am iga a tsetse-aara am faya.

### *Yaisu aɗkwa á ndaan elva ge Piyer*

<sup>15</sup> Am sarte na zaruze duksa, Yaisu a ndavanu elva ge Simaun Piyer, a ba ɗane á elvan ge ɗane: «Simaun, egdza á Yuhanna, wayakiwáyá emtu ba kwakya jakuje ge emnde na?» A ɗwanante, a ba ɗane: «Wayanak-wáyá Yaakadada, ba ka keni diyakdiya ganakini wayanak-wáyá.» A ba Yaisu á elvan ge ɗane: «Eppiya egdzar kyawe-aha-aaruwa.»

<sup>16</sup> A ndavanuhe zlaɓe ádaliye ge buwire: «Simaun egdza á Yuhanna, wayakiwáyá emtu?» A ba ɗane: «Wayanak-wáyá Yaakadada, ba ka keni diyakdiya ganakini wayanak-wáyá.» A ba Yaisu á elvan ge ɗane: «Faterufe hyema ge kyawe-aha-aaruwa»

<sup>17</sup> A ndavanuhe zlaɓe ádaliye ge keyire: «Simaun egdza á Yuhanna, wayakiwáyá emtu?»

Mazle-aara Simaun Piyer fantaufe ge dzámá ire, adaba ndáva ɗanna a ndavanuwaa Yaisu ge keyire, ganakini wayakiwáyáhe na. A ɗwanante ge Simaun, a ba ɗane á elvan ge ɗane: «Yaakadada, palle á názu diyaɗka ka baaka, ba ka keni diyakdiya ganakini wayanak-wáyá.» A ba Yaisu á elvan ge ɗane: «Eppiya kyawe-aha-aaruwa.»

<sup>18</sup> A ba ɗane á elvan ge ɗane zlaɓe ádaliye: «Yá ndak ba jirire: am sarte na zlaɓe ka dawale wá, ká eksantá ba ka kandá á ɗa, ká ɗgudese huɗe an ɗane, daaci ka zlálá á dem tate á wedere á ɗa. Amá má watse gakevge emgyegwe a zhele wá, watse ká pelanse erva-aha á ɗa ge ura umele, á de takwasáká ɗane, watse á dáká á dem tate na ni wayaɗka na.»

<sup>19</sup> Am huɗe á elva ɗanna wá, Yaisu aɗkwa á bálá jeba á emtsa na ni má watse á emtsa Piyer na. Emnde kwakya tá de gálá Dadaamiya adaba emtsa-aara. Daaci «Sawa dɓabidɓa,» á ba Yaisu á elvan ge ɗane.

### *Elva á Yaisu áte pukura na wayaawaya kwakya na*

<sup>20</sup> Daaci Piyer a zharaa ice á dem iga wá, á zhára ba aɗkwa á dɓaterɗaba pukura na wayaawáyá Yaisu kwakya na am iga. Ba pukura na ndza á njá herzhe átevege Yaisu am sarte na tá aɗkwa arge masane, a ndavanu ge Yaisu a ba ɗane: Watse á veláká ware ɗane Yaakadada na.

<sup>21</sup> Am sarte na nanna Piyer aɗkwa á dɓaterɗaba pukura ɗanna maa, a ndavanu ge Yaisu, a ba ɗane: «Yaakadada, una mu watse á shaná uwe kena ɗane?»

<sup>22</sup> A ɗwanante ge Yaisu, a ba ɗane á elvan ge ɗane: «Ma yá kátá yá se beráná á ba an shifa am eptsa-aaruwa keni, una á shákaaka. Naba dɓabidɓa ka.»

<sup>23</sup> Daaci ta naba hyanme labare-aara am dágave á emnde a fetarfe baɗemme wá, ta bántsa watse á emtseka pukura ɗanna dekiɗeki. Amá

Yaisu ndahaaka una. Názu a bannaa Yaisu ge Piyer wá, a ba ɲane: Ma yá kátá yá se beráná á ba an shifa am eptsa-aaruwa keni, á shákaaka.

<sup>24</sup> Pukura ɲanna Yaisu a ndaha elva-aara na wá, aɲkwa á maganá ba ɲane an ire-aara seydire á labare ɲanna, wakita na keni a puwetaa ba ɲane. Diyaɲerdiya ganakini baɗemme á názena a puwetaa ɲane, baɗemme ba jirire.

*Elva na tá zlá wakita na átekwa*

<sup>25</sup> Kwakya jipu názena ni a maganaa Yaisu ádaliye na. Ma andze ta eppuwa baɗemme am wakita, ba palle keni yaranseka wá, yá tama ma andze á taa ɲanaaka duniya na wakita-aha ɲanna.

## Slera-aha á emnde a bela á Yaisu

### *Watse Edderwa á velakurte Shedekwe Cufedde*

<sup>1</sup> Ámbarka á ña Tiyaufilus: Náwa názu yá puwaktá ya áte elva a Yaisu: Am wakita na ndza ya puwakte zuññwe na keni ndza ya ndakndaha bademme, názu ndza a maganaa ñane, antara názu ndza a kwaratersaa ñane ge emnde, fetaufe á slera-aha-aara,

<sup>2</sup> dem vacite na a eksante ge Dadaamiya á dem samaya. Am sarte na zlafe zlalaaka á dem samaya na wá, a kwaraterse názu watse tá de maganá itare bademme ge emnde a bela-aara. A kwaraterse an hakuma á Shedekwe Cufedde.

<sup>3</sup> A marateraa ire-aara ser kwakya, geni a diyareddiye ba shagera ganakini ñane an shifa ba jirire; háre kul ufafe á kwaraterse elva áte \*kwará á Dadaamiya.

<sup>4</sup> Vacite umele tá arge náza za wá, a ba ñane á elvan ge itare: «Njawinja á ba áhuna am Urusaliima, ufawufa názena a ba Edderwa watse á de vakurteva ya ndakurndaa na.

<sup>5</sup> Adaba Yuhanna wá, ñane a magateraa baptisma ge emnde an yawe, amá kure wá, á de haraaka kwakya watse tá magakurá baptisma an Shedekwe Cufedde.»

### *Zlálá á Yaisu á dem samaya*

<sup>6</sup> Daaci ta jamme ge pukura-aha átevege ñane, ta ndavanuhe: «Watse ká tsatsaná á ba am sarte ñanna emtu sleksire á \*Iserayiila Yaakadada?»

<sup>7</sup> A ñwaterante ge Yaisu, a ba ñane á elvan ge itare: «A tsanaa ba Edderwa palle an hakuma-aara zamane-aha, antara sarte-aha ñanna, slera á kure-ka ge dise una.

<sup>8</sup> Kure wá, watse kwá shá hakuma áza Shedekwe Cufedde na á de vakurtá Dadaamiya na, kwá de maga seydire an zhera-aaruwa am Urusaliima áhuna, am huđe á Yahudiya bademme, am \*Samariya, dem huđe á duniya bademme.»

<sup>9</sup> Ba a ndaase una ñanna Yaisu wá, a naba tsetehe á dem samaya á ba áte ice-aatare, a shebanvehe ge kumba.

<sup>10</sup> Áma itare zlafe tá zhara ba ice á dem samaya. Daaci ta naba jesaarehe ge zala buwa, tá am nanjyuwe dzayye á katafke-aatare ba estuwa,

<sup>11</sup> a ba itare tá elvan ge itare: «Ekkure emnde a Galili na labára kwa tsatsehe estuwa, kwá zhara ice á dem samaya na? Yaisu ñanna kwá zharaná kure a yakurhe na wá, watse á eptsa zlafe ádaliye ba seke una kwá anƙwa zharaná kure á zlala á dem samaya na.»

### *Ta eksetaa ura am kelá á Yahuda*

<sup>12</sup> Daaci ta naba tsekwehe ge pukura-aha áte egdza wa ñanna tá d'aháná an Wa Anyaranyara na, ta naba eptsa-aatare á sem Urusaliima. Wa ñanna yiyiyeka d'ekid'eki, dágave-aatare á jauka am kilaumaiter palle antara Urusaliima.

<sup>13</sup> Ba saraasa am Urusaliima maa, ta d'álá á ba á dem bere-aatare na mbarsembe nja am huđe-aara, bere átire ge bere umele na. Náwa itare zhera-aha-aatare: Piyer, Yuhanna, Yakuba, Andere, Filip, Taumas, Bartaulauma, Mata, Yakuba egdza á Halfa, Simaun na wayaaka tá

kwaráterá emnde umele na, antara Yahuda egdza á Yakuba, itare una ta emnde a bela,

<sup>14</sup> antara tara Maari emmenjara ge Yaisu, ira egdzar mama-aha-ñára ge Yaisu, antara njwasha umele. Emnde ñanna bademme tá anjwa jáháva ba kelaazare, tá anjwa ñala Dadaamiya átirpalle.

<sup>15</sup> Vacite umele maa, jarammeje emnde a fetarfe tá maga deremke an kul buwa wá, a tsetehe ge Piyer, a tsaahé am dágave-aatare,

<sup>16-17</sup> a ba ñane á elvan ge itare: «Ba estuwa egdzar mama-aha-aaruwa, Yahuda, ñane keni ndza ba palle á miya, a maganaa slera ge Dadaamiya á ba am dágave á miya, amá am sarte na emnde tá kátá eksa Yaisu wá, ñane a gev slekatafke-aatare. Elva á Yahuda wá, ndza a enndáhá Shedfekwe Cufedfe á kya \*Dawuda ganakini watse á geva ñane slekatafke á emnde a eksa Yaisu. Daaci shagera ba á sessa jirire-aara,» a ba Piyer.

<sup>18</sup> (Yahuda maa, a de shekweve fe an shunju na ta vanta adaba haypa-aara ñanna, amá a shaa emtsa am fe ñanna. Duwa-aara á dem fe ñanna, a de mbedehe á ba an ndzedá, a naba kyehe ba seke feka, a paceve ge nanje-aara.

<sup>19</sup> Bademme á emnde a Urusaliima diyardiya lámare ñanna. Adaba una ñanna, ta fanaa zhera á Akaidama ge fe ñanna an elva a ekse-aatare, amaana: Fáhe á uzhe.)

<sup>20</sup> Daaci Piyer a eksetaa elva-aara zlahe adaliye, a ba ñane: «Elva á Yahuda wá, anjwa puwartepuwa am jabura, geni sey wulfe-aara á nyefnye ba gela. De ba á katafke keni, baaka ura á fá sera am slede-aara. Anjwa an puwa zlahe adaliye geni sey á demá ba ura umele á dem kela-aara.

<sup>21-22</sup> «A ndahanaa wakita á Dadaamiya tsawe estuwa wá, daaci sey mi shansha ura palle á njá antara miya, mi maga seydire á tse á Yaakadada Yaisu am fáyá kerde. Edda-aara ñanna keni sey mi eksana am dágave á emnde na ni ndza tá anjwa antara miya ba kelaazare, am sarte na má anjwa já daba antara Yaakadada Yaisu am huđe á larde na. Sey edda una ndza anjwa antara miya daga segashe á Yaisu am yawe á baptisma áza Yuhanna, dem sarte a zlalá-aara á dem samaya.» Estuwa a ba Piyer.

<sup>23</sup> Daaci ta tsatsaa zala buwa, tara Yusuf, ñane una a shaa zhera á Barsabas, Yustus keni ba zhera-aara, tá antara Matiyas.

<sup>24</sup> Daaci ta magaa maduwa á deza Dadaamiya, a ba itare: «Yaakadada á miya, ekka wá, diyakdiya názu am huđe á emnde bademme. Adaba una ñanna, marañeránmára edda una ni ka eksesaa ka am emnde buwa na,

<sup>25</sup> ge mága slera na a yanaa Yahuda na. Adaba zlazlalá ñane á dem tate na á zlayán ge ñane.»

<sup>26</sup> Daaci ta puwete zhera-aha-aatare áte nákwá, ta magaa njeri wá, a segasha zhera á Matiyas, ta maslaterve ge emnde a bela, ñane a gevaa kelaawa ju buwire-aatare.

## 2

### *Sawa á Shedfekwe Cufedfe*

<sup>1</sup> Am samsa munri á \*Pantaikausta maa, ta jamme ge emnde a fetarfe bademme am tate palle am munri ñanna.

<sup>2</sup> Daaci cekwaanjudi wá, tá cena ba hula á duksa á sá am samaya ba seke mága á effeya yaikke, hula-aara a se hyema am huđe á bere na tá am huđe-aara na.

<sup>3</sup> Tá zhara ba sessa duksa umele á gáráva an nara á kárá wá, duksa ñanna a tegese gergere kwakya, a tsakwaa áte ire-aha-aatare pálpale bademme.

<sup>4</sup> Ta nahete estuwa an Shedekwe Cufedde, ta fantau ge ndáhá elva an we á ekse gergere, tá ndahaná an hakuma na a vatertaa Shedekwe Cufedde na.

<sup>5</sup> Am sarte ñanna maa, tá anjwa Yahudiya-aha na ta segáshe am larde-aha á duniya bademme, tá njá am Urusaliima, ñarnaaja nadina-aatare á ba an jirire.

<sup>6</sup> Am sarte na cenarácena hula á duksa ñanna maa, ta naba sawa, ta se jamme am tate ñanna. Weshaptewesha enkale-aatare bademme, adaba ma ware-aatare keni á cená emnde a fetarfe na tá ndáhá elva á ba an we á ekse-aara.

<sup>7</sup> Bademme-aatare tá maga ba najipu-aara, diyarka ba názu tá enndáhá keni. A ba itare: «Emnde na tá ndáhá elva na, ábi bademme-aatare ta ba emnde a Galili?»

<sup>8</sup> Ay a sawa estara kena bademmire á miya má anjwa á cenatercena, ma ware á miya keni á cena ba elva na ta yanaa am huđe-aara na?

<sup>9</sup> Miya, náwa emnde umele á miya kwaye ta sawa am haha á Partiya, emnde umele ta sawa am Maidiya, emnde umele ta sawa am Ailamiya, emnde umele ta sawa am Maisaupautamiya, emnde umele ta sawa am Yahudiya, emnde umele ta sawa am Kapadaukiya, emnde umele kwaye ta sawa am Pauntus, antara Aziya,

<sup>10</sup> emnde umele ta sawa am Pirigiya, antara Pamfiliya, emnde umele ta sawa am Misera, antara dalbe palle am haha á Libiya átevege haha á Siraine, emnde umele kwaye ta sawa á sa am larde á Rauma.

<sup>11</sup> Zlabe ádaliye, emnde umele kwaye ta sawa am Kairaita, antara Arabiya. Tá anjwa Yahudiya-aha miyenne, antara emnde na ta deme an de á dem nadina á Yahudiya-aha. Aley ni bademmire á miya mi cena ma ware keni tá anjwa á ndaha slera yaikke na a maganaa Dadaamiya na á ba an we á ekse-aara?»

<sup>12</sup> Najipu ñanna jauje ge ndzedfa-aatare, diyarka ba názu tá enndáhá keni. Ázara kena jeba una, a ba itare am dágave-aatare.

<sup>13</sup> Amá emnde umele-aatare ágire tá epsawa emnde a fetarfe wá, a ba itare a datersaa ba mbazla am enkale.

### *Waazu á Piyer*

<sup>14</sup> Daaci a naba tsetehe ge Piyer antara emnde a bela umele, a fantau ge ndahater elva ge emnde a jahava á ba an ká kwárá, a ba ñane: «Kure Yahudiya-aha, antara emnde umele na tá am huđe á Urusaliima na bademme, fawfa hyema ba shagera, cenawáncena názu yá anjwa á ndakurndaa na:

<sup>15</sup> Emnde na wá, weshateka ire-aatare áte una kwá slaná kure na. Adaba zlabe ba gusere emtsaade.

<sup>16</sup> Una ba jirire á názena ndza a ndahanaa nabi Yauwail, a ba ñane:

<sup>17</sup> A bantsa Dadaamiya: Náwa názu watse á de magava am halavuwa á zamáne-aha: Watse yá hyantehye Shedekwe-aaruwa áte emnde bademme. Egdzara á kure zála, an ñwasha tá de shá wahayu-aha, tá de maga slera á nabiyire, yá de vaterte shene ge emgyegwar zala-aha á kure.

<sup>18</sup> Yá de hyantehye Shedekwe-aaruwa áte náve-aha-aaruwa, antara kwatena-aha-aaruwa keni. Bademme tá de maga nabiyire am sarte-aha ñanna.



- 19 Watse yá maganaamaga najipu-aha na ndza magaaveka ðekideki na am samaya antara áte haha. Watse anjwa tara uzhe, antara kára, ira yire á kára yaikke ba seke kumba.
- 20 Zlafe ádaliye: Vaciya á de gev danjwe, tere keni á de gev kyanje ba seke uzhe. Am iga á una-aha nanna maa, á de sawa kwaskwe yaikke na an dárádza jipu, á sawa Yaakadada átekwa na.
- 21 Daaci ma a ðantaa ware zhera á Yaakadada keni á lyelye shifa-aara. Kwaya nane názena ni a ndahanaa Dadaamiya á kyá Yauwail.»
- 22 Daaci Piyer a eksetaa elva-aara zlafe ádaliye, a ba nane: «Ekkure emnde a \*Iserayiila, cenaucena názu yá bakurná ya na: Yaisu ura Nasarátu na wá, a belanaa ba Dadaamiya á sezekure. Adaba Dadaamiya a magaa nalaama-aha, antara najipu-aha umele gergere á kyá erva an nane am dágave á kure, ba kure keni diyakurdiya bademme.
- 23 Á ba am date keni Dadaamiya a tsanaa ba estuwa. Nane diyaadiya ganakini watse á de fakurme am erva ge kure. Adaba una nanna kwa naba faterem am erva ge emnde a haypa, kwa jaa shifa-aara áte dzanjala.
- 24 Amá a naba nejlese ge Dadaamiya am zlaða á fáya, anjwa an shifa-aara zlafe ádaliye. Adaba baaka hákuma á emtsa ganakini á nanaana.
- 25 Náwa názu a ndahanaa \*Dawuda áte nane:  
Ba kelaazáre yá zhara ba Yaakadada an ice-aaruwa, anjwa á njá am naðafa-aaruwa geni a gazleka ervaunðe-aaruwa ðekideki.
- 26 Adaba una nanna, gedantedeða jipu am ervaunðe-aaruwa, bademme a názena a sansaa we-aaruwa, yá ndahaná á ba an higa. Ma yá an vuwa a laakire na keni, watse yá puwanse á ba an hairire, yá fá táma-aaruwa áte Dadaamiya.
- 27 Adaba ekka Dadaamiya wá, ká eblyanveka shifa-aaruwa ba estuwa am faya, ká yánka á sepse vuwa á sleslera á na ðekideki.
- 28 Ka marisaa ka baráma a dem tate á shifa, ekka ká anjwa antara iya ba kelaazáre, adaba una nanna ervaunðe-aaruwa ba seke nama. Estuwa a ba \*Dawuda.»
- 29 Piyer a eksetaa elva-aara zlafe ádaliye, a ba nane: «Egdzar mama-aha-aaruwa, máki ba eggyemiya \*Dawuda wá, tsawaatse yá ndakurndaha jirire-aara: Nane wá, jaaveje heðarheða, sem vatena keni zlafe anjwa irekhya-aara.
- 30 Nane ndza nabi á Dadaamiya, ndza diyaadiya názu a bannaa Dadaamiya. Dadaamiya a zanu ba waða-aara, a ba nane: Yá de vante sleksire á na ba ge palle á eggye-aha á na, á de geva ba nane slekse am iga á na.
- 31 Á ba am date keni ndza diyaadiya \*Dawuda ganakini á de tsetsa \*Almasiihu am fáya, amaana: Edda una a eksetaa Dadaamiya. A ndahanaa adaba una nanna Dawuda, a ba nane:  
Dadaamiya yánka nane am fáya, safka vuwa-aara ge nane ðekideki.
- 32 Ba Yaisu nanna degiya una tsantetse Dadaamiya am fáya na. Náwa nere na emnde a mága seyðire-aara.
- 33 Nane a ðemanve ge Dadaamiya, a njanaahe am naðafa-aara, a de vante Shedekwe Cufedfe na ndza a bántsa nane watse á de vanteva na. Daaci názu kwá nanaa kure, kwá cenaná kure kina na wá, á maganá ba Shedekwe Cufedfe nanna a shanaa Yaisu na, a hyantaa nane áte nere.
- 34 \*Dawuda an ire-aara wá, nane zlalaaka á dem samaya, amá a ba nane: A ba Yaakadada, Dadaamiya á elvan ge Yaakadada-aaruwa: Njiinja ka am naðafa-aaruwa,

<sup>35</sup> dem sarte na yá gatervege kelaade-aha á ña náza puwa sera á ña.

<sup>36</sup> «Daaci kure emnde a \*Iserayiila wá, bademme á kure diyaweddiye ba shagera ganakini Yaisu ñanna kwa naba zlañelehe áte dzangala na wá, ba ñane una a tsanaa Dadaamiya ge Yaakadadire, ba ñane una \*Almasiihu, edda una a eksesaa ñane.»

<sup>37</sup> Ba cenarácena elva á Piyer ñanna wá, ba palle a enkale-aatare ñaaka ñezlañezla ervaunđe-aatare. Daaci a ba itare tá elvan ge tara Piyer antara emnde a bela umele: «Íjá maganá estara kina egdzar mama-aha-aaruwa?»

<sup>38</sup> A ñwaterante ge Piyer, a ba ñane á elvan ge itare: «Magaumága tuba, a magarakurnaamaga baptisma an zhera á Yaisu \*Almasiihu, geni a yakuraarye Dadaamiya haypa-aha á kure. Daaci Dadaamiya á vakurte Shedekwe-aara Cufedde.

<sup>39</sup> Adaba a ba Dadaamiya á de vakurte duksa ñanna ge kure antara egdzara á kure, á de vaterte ge emnde na ta yiyiye, á de vaterteva ge emnde na ni watse á dahaterá ñane á sezeñára na bademme.»

<sup>40</sup> Piyer a fateraare elva-aha umele gergere kwakya ge tsante enkale-aatare, antara ge faterem ndzedá am vuwa. A ba ñane á elvan ge itare: «Sawansese ire á kure am dágave á emnde a maga mándzawire.»

<sup>41</sup> Vacite ñanna, emnde kwakya lyarvaalya waazu á Piyer fartarfe, magarateraamaga baptisma. Á maga emnde debu keye fartarfe ge emnde a fetarfe.

<sup>42</sup> Ta faa hyema jipu ge cenaa waazu-aha na tá ankwá kwaratersa emnde a bela, ta wáva jipu ge gev palle am duksa bademme áte njá á egdzar mama, antara ge zá dafa-aatare átirpalle, antara geni a icarseka am tate á maduwa dekideki.

### *Njá á emnde a fetarfe.*

<sup>43</sup> Emnde bademme tá geja ba ire, adaba Dadaamiya a magaa najipu-aha gergere kwakya á kya erva an emnde a bela.

<sup>44</sup> Emnde a fetarfe bademme garevge ba palle, názu am erva-aatare keni ba palle.

<sup>45</sup> Tá njá á ba válá kazlaña-aatare, tá sá shungu-aara áseza emnde a bela, tá se teganá am dágave-aatare, ma ware keni ba deydey á wedere-aara.

<sup>46</sup> Tá ankwá jáháva ba kelaazare am \*mashidi yaikke, tá ankwá jáháva am mba-aha-aatare ge zá duksa-aatare átirpalle, tá ankwá za dafa-aatare an higa, ervaunđe-aatare palle.

<sup>47</sup> Tá ankwá á gala Dadaamiya, emnde bademme hayaráterháya. Daaci Yaakadada ankwá á lya emnde umele keni ba kelaazare, ankwá á sagatersága.

## 3

### *Mbaambe zhel ñguryekwe*

<sup>1</sup> Vacite umele an lásar, tara Piyer, antara Yuhanna tá ankwá á dálá á dem \*mashidi yaikke ge de maga maduwa á lásar maa,

<sup>2</sup> ankwá zhel ñguryekwe umele tá yán ba estuwa á sawa am huđe á emmenára, ankwá á njá átuge palle á we-aha á mashidi ñanna, átuge una zhera-aara We á bere Zariya na. Zhel ñanna wá, tá ankwá á dánda emnde-aara ba kelaazáre, á de ñala áza emnde a dem mashidi.

<sup>3</sup> Vacite ñanna maa, ba a naa tara Piyer antara Yuhanna, tá ankwá duwa tá dem mashidi wá, a naba ñalateru sadake.

<sup>4</sup> Tá ezzhárá tara Piyer antara Yuhanna. «Zharanjerzhárá!» a ba Piyer á elvan ge zhel nanna.

<sup>5</sup> A zharaterahe ge nguryekwe na ba shagera. Adaba a kurken watse á shá sadake ázetare.

<sup>6</sup> Daaci a ba Piyer á elvan ge nane: «Ma gursa, ma shungu keni baaka ázerwa dekideki. Amá yá vakte názu a shanaa erva-aaruwa: Yá ndaaka an zhera á Yaisu \*Almasiihu ura Nasarátu, tsetse ezzlala.»

<sup>7</sup> Daaci a naba nanaahe an nadafa-aara, a tsante. Kertenj sharánsha dzanđzanjire sera-aha-aara,

<sup>8</sup> a naba ebzavte á sá am haha, a tsaahé áte sera-aha-aara, a fantau ge zlalá. A dem mashidi antara tara Piyer tá an Yuhanna, á zlalá estuwa, á vaza, ankwá á gálá Dadaamiya.

<sup>9</sup> Emnde bademme naránna ankwá á zlalá, ankwá á gálá Dadaamiya.

<sup>10</sup> Am sarte na diyareddiye ganakini ba nguryekwe na á nala áte we á mashidi na tá dahaná an We á bere Zariya na, bademme tá maga ba dikere, tá geja ba ire áte zhel nanna.

### *Waazu á Piyer am \*mashidi yaikke*

<sup>11</sup> Am zlalaa ka zhel nanna átevege tara Piyer antara Yuhanna, ta duhe á dem dzadzáwe á \*mashidi yaikke nanna ba kerde, am dzadzáwe na tá dahaná an dzadzáwe á Suleymanu na, daaci emnde bademme tá zhagade á ba ásezetare, adaba tá am najipu yaikke.

<sup>12</sup> Ba a naa emnde nanna Piyer, a ba nane á elvan ge itare: «Kure emnde a \*Iserayiila mu, kwá ankwá á maga najipu á uwe kure? Labára kwá zharanjerzhárá estuwa? Kwa kurken zhel na a shaa sera-aara na an ndzedá á nere emtu? Emtu adaba nanernaana nadina á nere emtu?

<sup>13</sup> Una nanna ka dekideki. Ba Dadaamiya na ta kezlan ugje eggye-aha a miya tara Ibrahim, antara Isiyaaku ira Yakubu na, a vanta ba nane demdemire na ge sleslera-aara Yaisu. Amá kure, kwa danaa ba kure á deza male-aha á duniya, kwa yanaa ba kure á katafke á sleksu \*Pilaatu, ndza a bánba tsa nane ganakini á belanaabela.

<sup>14</sup> Kwa yaa ura cudede, ura jirire, kwa nála sleksu Pilaatu ganakini á belakurá sleceba shifa.

<sup>15</sup> Daaci kwa janaa ba kure edda á shifa na, amá tsantetsa Dadaamiya am fáyá, nere na seyde-aha-aara.

<sup>16</sup> Zhel nanna kwá ankwá á zharaná kure diyakurdiya na wá, a vanta ba hakuma na am zhera á Yaisu na ndzedá. Ba fetarfire áte Yaisu una a mbanaahe ba dekideki, kwaya nane á katafke á kure.

<sup>17</sup> «Amá diyandiya ganakini názena kwa maganaa kure antara male-aha á kure áte Yaisu na wá, kwa maganaa adaba diyakurka.

<sup>18</sup> Amá Dadaamiya a magaa ba jirire á názena ni a ndahanaa nane am mbuwe á nabi-aha-aara werre bademme na. Adaba a ba nane, sey \*Almasiihu-aara á shushe zladá.

<sup>19</sup> Sawmbare á sem sera á Dadaamiya, magaumága tuba geni á yakuraarye haypa-aha á kure.

<sup>20</sup> Daaci Yaakadada á vakurteva hairire am ervaunde, á vakurteva Almasiihu na ndza á ba am date keni ndza a eksakurse ba ge kure na. Amaana: Yaisu.

<sup>21</sup> Amá kina wá, zlabé Yaisu \*Almasiihu á njá á ba am samaya emtsaade, dem sarte na Dadaamiya ganvege duksa bademme anwaslire, ba seke una a ndahanaa nane werre á kya an we á nabi-aha-aara cudede na.

<sup>22</sup> Ábi ndza a enndáhá Muusa, a ba nane:

Watse Dadaamiya á belakurá nabi umele ba seke iya, watse á jesaare á ba am dágave á egdzar mama-aha á kure, kwá de cená názena á de bakurná ñane bademme.

<sup>23</sup> Ma ware una cenaaka elva á nabi na, sey tá dansede edda-aara am dágave á emnde á Dadaamiya, tá keƒanaakeda shifa-aara ba ƒekideki.

<sup>24</sup> Nabi-aha umele keni ndza ta enndáha ba seke náza Muusa, bademme ndza ta ndaha ba názena watse á magava am zamane á miya na. Kwaye nabi Samiyail, sem nabi-aha na ta sawa am iga-aara bademme.

<sup>25</sup> Daaci egdzar mama-aha-aaruwa, názu a baternaa Dadaamiya ge nabi-aha ñanna wá, a ndahanaa á ba áte kure. Zlabe ádaliye, am sarte na Dadaamiya anƒkwa á ñgudá namána antara eggyekure Ibrahimia, a ba ñane: Yá de gá barka áte duniya bademme adaba emnde á ña. Amaana: Namána ñanna a magakurán ba ge kure.

<sup>26</sup> Daaci sleslera-aara Yaisu keni, a belakurán ba ge kure emtsaade zunñwe Dadaamiya, geni kwá shá pakyaava antara haypa-aha á kure, á gakuraar barka.»

## 4

### *Tara Piyer antara Yuhanna tá á katafke á shairiya áza male-aha á Yahudiya-aha*

<sup>1</sup> Am sarte na tá anƒkwa á ndahater elva tara Piyer antara Yuhanna ge emnde, saremsa \*liman-aha, antara male-aha á emnde a ufa mashidi, ira \*Saduki-aha ásezetare.

<sup>2</sup> Játerja ervaunƒe jipu adaba emnde a bela tá anƒkwa á kwaraterse duksa ge emnde arge Yaisu, tá anƒkwa á ndaterndáhá geni tsetsa Yaisu am fáyá. Amaana: Tá naba tsetsa emnde a fáyá zlabe ádaliye.

<sup>3</sup> Daaci ta naba sluwatervaahe, ta naba zlenjaterme am danƒgay ge ufa mákurállaa-aara, adaba baaka sarte mázla-aara.

<sup>4</sup> Amá am sarte ñanna wá, kwakya názena fetarfe na am dágave á emnde na cenarvaacena waazu na. Kezlakula á emnde a fetarfe á maga emnde debu ilyebe ba zála.

<sup>5</sup> Mákuralla-aara wá, jarammeje male-aha á Yahudiya-aha, antara emnde a sawari-aha-aatare, ira malum-aha á \*tawraita, bademme jarammeje am huƒe á Urusaliima.

<sup>6</sup> Ta magaa jáháva ñanna antara tara \*liman Annas, ba ñane una male á liman-aha, Kayafas, Yuhanna, Alaikzandere, ira emnde na tá am huƒe á há á Annas bademme.

<sup>7</sup> Daaci ta tsatsaa emnde a bela na á katafke-aatare, ta ndavateru elva, a ba itare: «Kwa mbanaa an hakuma-ara kure ñguryekwe na? Emtu a vakurtaa ware hákuma ñanna?»

<sup>8</sup> Naatená Shedekwe Cufedƒe am Piyer, a ñwaterante, a ba ñane á elvan ge itare: «Ámbarká á kure emnde a sawari, antara male-aha á ekse,

<sup>9</sup> kwa vanjerte ndáva adaba shagerire na ña maganán ge ñguryekwe na ka? Kwa ndavanjerwá ba kure geni ña maganaa estara, a ba kure?

<sup>10</sup> Shagera ba una, daaci sey kure antara emnde a \*Iserayiila bademme kwá diyeddiye geni zhel ñanna náwa á tse á katafke á kure ba lapiya layye na wá, a mbanaa ba zhera á Yaisu ura Nasarátu na. Ba ñane una kwa janaa kure áte dzanƒgala, amá tsantetsa Dadaamiya am fáyá.

<sup>11</sup> Elva na ta puwete am wakita á Dadaamiya, a ba ñane: Nákwá na ta eblyanvaa emnde a nyáña bere, mbate ñane jauje ge nákwá-aha umele bademme na wá, a ndahanaa á ba áte Yaisu ñanna.

<sup>12</sup> Daaci nǎ bakurá ba jirire: Baaka ura am huǎe á duniya na ǎekidǎki, a belanaa Dadaamiya ge se lyamilya, sey ba nane palle.»

<sup>13</sup> Baǎemme á emnde na tá am jáháva nanna, tá maga ba najipu á dzanǎzanǎire á tara Piyer, antara Yuhanna, sakwa diyaratereddiye ganakini baaka ǎarǎdza-aatare, ndarseka láyá kwakya na. Diyareddiye zlaǎe áǎaliye, geni ta emnde na ndza tá áte vuwa á Yaisu.

<sup>14</sup> Palle a názu tá ndahaná itare baaka. Adaba zhel na keni á ba á tse áte vuwa á tara Piyer, antara Yuhanna, ba lapiya layye.

<sup>15</sup> Ta ngyesaa tara Piyer ásegashe, geni tá ndáhá elva nanna zlaǎe adaliye am ǎágave-aatare.

<sup>16</sup> A ba itare am ǎágave-aatare: «Mí magaterá uwe kina ge emnde na? Adaba emnde baǎemme am huǎe á Urusaliima diyareddiye geni najipu nanna á zharaná ba ice á emnde na a mágava á kya erva an itare, mí dzegwánka mága gajawe ǎekidǎki.

<sup>17</sup> Amá geni a duka elva nanna á de katafke wá, sey mi gyatertegye an elva ba shagera, ganakini a ndaranka elva ma ge ware keni an zhera á Yaisu nanna mazla-aara.»

<sup>18</sup> Daaci ta ǎetaa emnde a bela na, ta naba piyaterante, a ba itare tá elvan ge itare: «A cenarǎnka ǎekidǎki kwá kwaraterse elva a Yaisu ge emnde, ba tsála zhera-aara keni am mbuwe á kure.»

<sup>19</sup> Ta nǎwete ge tara Piyer, antara Yuhanna, a ba itare: «Kyawanaakya ba kure elva nanna á katafke á Dadaamiya, má shagera nǎ fakursaare ge kure arge una nǎ fansaare ge Dadaamiya.

<sup>20</sup> Duksa palle, nere wá, nǎ dzegwánka yá ndater názu nǎ naaná an ice á nere, nǎ cenaná an hyema á nere na ge emnde.»

<sup>21</sup> Ta valateraarhe ge emnde a jáháva geni a daralika, daaci ta puwateraahe. Sharánka pute na ni tá zaterá an shairiya adaba nane. Adaba emnde baǎemme tá anǎkwa á gálá ba Dadaamiya adaba duksa nanna magaavemage na.

<sup>22</sup> Zhel nanna ta mbanaa itare na wá, iva-aara jauje am kul uǎǎe.

### *Maduwa á emnde a fetarfe*

<sup>23</sup> Tara Piyer, antara Yuhanna, ba belarateraaǎela wá, ba zlálá-aatare á deza emnde-aatare, ta de tsakaterse elva-aha na ta ndahanaa male-aha á Yahudiya-aha, antara emnde a sawari na baǎemme.

<sup>24</sup> Ba cenarǎncena emnde a fetarfe una nanna, ta fantau ge nǎla Dadaamiya an ervaunǎe-aatare palle, a ba itare: Dadaamiya slekse, ba ka una ka nderaa samaya, antara haha, haye, ira názu am huǎe-aha-aatare baǎemme.

<sup>25</sup> Ka ndahanaa ba ka á kya an we á eggyenere sleslera á nǎ \*Dawuda, a ba nane an hákuma á Shǎǎekwe á nǎ:

Labáre emnde a larde tá ngyainǎyaare ice ba dey? Tá ngudáara ye ge názu baaka sera-aara na.

<sup>26</sup> Labára ngwadǎrǎpsenǎwǎǎá slekse-aha á duniya an fitenire, tá anǎkwa á ngudáara ye male-aha ge Yaakadada, antara Almasiihu-aara, edda una a eksesaa nane.

<sup>27</sup> «Samsa-kwa elva nanna. Adaba jarammeje tara \*Hirudus, antara Pauntiyus \*Pilaatu, antara emnde a larde-aha umele, ira emnde a \*Iserayiila, ganakini tá gwaare ge ura cudeǎǎe, sleslera á nǎ Yaisu na ka eksesaa ka geni nane \*Almasiihu na.

<sup>28</sup> Magarnaamaga itare názu ndza ka tsanaa ka an hákuma á nǎ, ka wayetaa ka zunǎwe na.



29 Ká cenáncena emtu elva na tá ankwá á puwaná itare na Yaakadada? Vanjerteva hákuma á ndáhá elva á ña ge ñere emnde a slera á ña, geni ñá ndaaná á ba an dzanđzanjire, an ñaakire á lyawa.

30 Marsemáre ndzedá á ña, geni a gevge nalaama-aha, antara najipu-aha gergere, a mbarembe emnde na tá áte lapikere an zhera á sleslera á ña Yaisu ura cufedde.»

31 Ba zlaruzle am ñála-aatare áza Dadaamiya wá, a naba gyagete ge slede na ta jamme amkwa na ñarñare, itare bademme na nartenáhá an Shedekwe Cufedde, ta de bálá elva á Dadaamiya á ba an dzanđzanjire.

### *Emnde a fetarfe ta jemaa nalmáne-aatare átirpalle*

32 Jarammeje emnde a fetarfe am enjkale palle, antara ervaunđe palle antara ba nalmáne-aha-aatare keni. Baaka ura á ba: Náwa una nalmáne-aaruwa ba ge iya palle. Názu am erva-aha-aatare bademme gevge ba palle.

33 Emnde a bela ta magaa seydire an hákuma jipu, geni ba jirire tsetsa Yaakadada Yaisu am fáyá. Dadaamiya a gateraar barka an tsaka ire ge emnde a fetarfe bademme.

34 Baaka ura a ektsaara duksa ñekideki am dágave-aatare. Adaba ura umele a velu fe-aara, ura umele a velu há-aara,

35 ta saa shunđu-aara áseza emnde a bela, daaci tá teganá itare, ma ware keni ba deydey á wedere-aara.

36 Ba seke ankwá zhel \*Laiwiñkau umele ta yanaa am Kiprus, zhera-aara Yusufa, emnde a bela ta fante Barnabas, á kátá ba: slefanem ndzedá am vuwa ge ura.

37 Ñane keni ba veluvele fe-aara, a saa shunđu-aara á ba áseza emnde a bela.

## 5

### *Labáre á tara Hananiyas an Safira*

1 Ankwá zhele umele zhera-aara Hananiyas, zhera á mukse-aara Safira. Ñane keni a velu fe-aatare. Amá zlaruzle am ndáhá antara mukse-aara ge ica fida maa,

2 lauktu á dándá shunđu á fe na wá, a naba tegese, a daa ba kyalma-aara á deza emnde a bela. Mukse-aara wá, diyaadiya bademme.

3 Daaci a ba Piyer á elvan ge ñane: «A ñyemaa estara Shaitaine á dem ervaunđe á ña estuwa Hananiyas, ká icaná fida ge Shedekwe Cufedde? Adaba ka icanme kyalma á shunđu á fe na ge ire á ña, ka saa ba kyalma, a ba ka bademme.

4 Ábi am sarte na zlađe velakuka na ndza fe á ña ba ge ekka? Ma náwa velakuvele keni ba shunđu á fe á ña? Ka magán ge uwe una Hananiyas? Fida na wá, ka magañerán ge ñereka palle, amá ge Dadaamiya.»

5 Ba cenáncena una ñanna Hananiyas wá, kreppe a naba mbedehe, antara ba emtsa-aara. Emnde na ta cenaa labáre ñanna bademme dámnda lyawa am itare.

6 Daaci ta sem ge dawalaa, ta fademe emtsa-aara am kalpakane, ta de hedehe.

7 Shekwaashekwa cekwaangudí á maga saa keye wá, a semhe ge mukse-aara keni. Amá an kaltaadá á názu a shaa zhele-aara.

8 A ndavanuhe ge Piyer, a ba ñane: «Kwa velu fe á kure ba ge shunđu na náwa ñane na emtu?» A ñwete: «Ane, ña velu ba ge una ñanna.»

9 A ba Piyer á elvan ge ñane: «Labára ñane ge kure, kwa zluhe am ndáhá antara zhele á ña ge zhára názu am huđe á Shedekwe á Yaakadada

na? Ká cenáncena emtu? Dawalaa ta zluwa á heḑa zhele á ŋa ba kina, tá aŋkwa áte we á bere, ekka keni tá daksede.»

<sup>10</sup> Ba we keni zlaḑe heḑanuka slebela na wá, kreppe a naba mbedeḑe ge mukse á Hananiyas, a emtsehe ŋane keni, ta se faḑese ge dawalaa na, ta de heḑanve ge zhele-aara.

<sup>11</sup> Daaci tá puwanu ba erva ge ervaunḑe emnde a fetarfe baḑemme, antara emnde na ta cenaa labáre ŋanna baḑemme.

### *Najipu-aha na ta maganaa emnde a bela*

<sup>12</sup> Emnde a bela ta magaa nalaama-aha, antara najipu-aha gergere kwakya. Baḑemme á emnde a fetarfe tá aŋkwa á jáháva átirpalle am dzadzawe na tá ḑahána an dzadzawe á Suleymanu na.

<sup>13</sup> Tá aŋkwa á zlebaterzleba tsa, amá ba palle á ura a sherse ice ge dezetare ḑaaka ḑekideki am emnde na fartareka na.

<sup>14</sup> Aley ba kelaa wera á ekse, an zála-ka, an ŋwasha-ka, emnde kwakya tá aŋkwa á fetaare áte Yaakadada, tá se saga emnde a fetarfe.

<sup>15</sup> Emnde kwakya tá dá emnde-aha-aatare á dete we á baráma, tá de zlavaterá áte egdera-aha, antara áte buce-aha, ganakini má á degasha Piyer wá, ma a shátershá ba shedekwe-aara keni emnde umele am itare.

<sup>16</sup> Emnde kwakya ta saa emnde-aha-aatare na ta lipa-aha, emnde umele tá an shaitaine, ta sateraa á sawa am ekse-aha na ta herherzhe an Urusaliima na, baḑemme mbarembe.

### *Zlaḑa na ta shateru ge emnde a bela*

<sup>17</sup> Daaci a naba tsante shelha male á \*limán-aha, antara emnde na tá am ekte ge ŋane, amaana: \*Saduki-aha. Ta tsante shelha áte emnde a bela ge magateraa palasa.

<sup>18</sup> Ta halaterte, ta de puwatermhe am danggay, áte ice á emnde baḑemme.

<sup>19</sup> Amá a naba semhe ge malika á Dadaamiya an vayiya, a werante danggay ŋanna, a sanse emnde a bela, a ba ŋane á elvan ge itare:

<sup>20</sup> «Zlauzlálá! dawmbare á dem \*mashidi yaikke, bawateránba elva á shifa áŋwaslire na ge emnde baḑemme.»

<sup>21</sup> Ane, á ba emnde a bela. Ba werre an enlya-waabere wá, ba zlala-aatare á dem \*mashidi yaikke, ta de kwaraterse elva á Dadaamiya ge emnde.

Cekwaanḑuḑi á ba an enlya ŋanna maa, male á \*liman-aha antara emnde-aara ta ḑante emnde a sawari, antara male-aha á Yahudiya-aha baḑemme, ta magaa jáháva yaikke. Daaci ta belaa sawji-aha-aatare á de sá emnde a bela na am danggay.

<sup>22</sup> Duwa-aatare, de beraraterka emnde a bela na. Sawji-aha á ufa danggay keni tá á ba áhuwa tsa. Daaci ba eptsa-aatare an labáre áseza male-aha na,

<sup>23</sup> a ba itare: «Duwa á ŋere á dem danggay, ŋa de shanaa á ba an zleŋa káŋgeláŋŋe, sawji-aha keni baḑemme tá á ba áhuwa, amá ŋa werante wá, shaŋeránka ŋere ura am huḑe-aara.»

<sup>24</sup> Ba ta cenaa una ŋanna male-aha á \*liman-aha, antara male á emnde a ufa mashidi na wá, ba palle a názu tá ndahaná itare keni ḑaaka. Tá dzámá ta zlalaa estara emnde a bela, antara názu watse á de magava na.

<sup>25</sup> Cekwaanḑuḑi wá, samsa ura, a ba edda-aara á elvan ge itare: «Kwaye emnde na kwa dateraa á dem danggay áwaya na, tá aŋkwa á kwaraterse duksa ge emnde am \*mashidi yaikke.»

<sup>26</sup> A tsetehe ge male á emnde a ufa mashidi, a duhe antara emnde-aara, ta de saa emnde a bela na. Amá ta sateraa á ba an enkale, adaba ta kuva emnde bademme, ganakini a dzagaraterseka an nákwá.

<sup>27</sup> Sarateremsa á se katafke á male-aha nanna, a naba valataraarhe ge male á \*liman-aha ge emnde a bela na.

<sup>28</sup> A ba nane á elvan ge itare: «Ábi nã piyakurtepiya geni ndahauka elva á dawale nanna, ma zhera-aara keni ðekideki am larde na? Kwá maga uwe kena kure kina? Kwa hyanme waazu á kure nanna am huðe á Urusaliima, kwá kátá puwanjerem uzhe á zhel nanna am mbiye á nere ge nere emtu?»

<sup>29</sup> Ta nwete ge tara Piyer, antara emnde a bela umele: «Njere wá, nã fansaare ba ge Dadaamiya arge emnde.

<sup>30</sup> Kure kwa naba zlenjelaa Yaisu áte dzanjala a emtsehe, amá tsantetsa Dadaamiya na ta fansaara eggye-aha a miya werre na am fáyá.

<sup>31</sup> Nane a demanve ge Dadaamiya, kina ankwá am nadafa-aara, a ganve slekse arge emnde bademme, a ganve slelya geni á kwaraterse baráma a tuba ge emnde a \*Iserayiila, geni a yateraareye Dadaamiya haypa-aha-aatare.

<sup>32</sup> Nere, antara Shedekwe Cufedde na Dadaamiya ankwá á vaterte ge emnde na tá ankwá á fansaarefe na, nã seyde-aha á labáre nanna bademme.»

<sup>33</sup> Ba ta cenaa una nanna, a naba jaterhe ge ervaunðe, haa tá kátá ceða shifa á emnde a bela na bademme.

<sup>34</sup> Amá ankwá ura \*Farisa umele am dagave-aatare, zhera-aara \*Gamaliyail, nane malum á \*tawraitá, emnde bademme tá ankwá á fá zherwe áte nane. A tsetehe ge nane, a ba nane: A daratersede emtsaadfe emnde nanna cekwaanjudi.

<sup>35</sup> Daratersede emnde a bela na á degáshe maa, a ba nane á elvan ge emnde am jáháva: «Fawfa hyema am názu watse kwá magaterán ge emnde na egdzar mama-aha-aaruwa.

<sup>36</sup> Yehauteyeha Taiwdas, a naba ganve ire-aara male, ya slendzedá a ba nane, emnde tá hyephye deremke ufaðe ta ðabete nane, amá jarejja. Emnde-aara nanna keni zadaratervezáðe, ba uwe keni cenaránka mázla-aara.

<sup>37</sup> Am iga á Taiwdas keni jesarje Yahuda ura Galili, a jesaare am sarte á ja jembel á emnde. Nane keni ndza ta ðabete ba estuwa emnde, amá ta naba ja nane, emnde-aara nanna keni zadarevzáðe.

<sup>38</sup> Daaci názu yá bakurná ya wá, kina keni naba yawaterya kure a zlarzlálá. Slera-aatare nanna máki ta jansaara ba emnde wá, watse á zlauzle.

<sup>39</sup> Amá máki ba jirire slera-aatare nanna ni a sawa á ba áza Dadaamiya wá, baaka názu kwá eksáná áte itare ðekideki. Amá magaumága enkale. A gevka kwá wava an Dadaamiya.» Daaci bademme á jáháva eksarekse sawari á \*Gamaliyail.

<sup>40</sup> Ta ðahaterte emnde a bela na zlaðe áðaliye, ta zateruhe an ja, a ba itare: «A cenaránka faikke kwá bálá waazu zlaðe áðaliye an zhera á zhel nanna ba ðekideki.» Daaci ta puwateraahe.

<sup>41</sup> Amá ta segáshe á ba an higa emnde a bela am tate á shairiya nanna. Adaba a diyatersaa ba Dadaamiya ganakini hyairephye lauktu a fateraar jeba á zlaða nanna adaba zhera á Yaisu.

<sup>42</sup> Ba kelaazare tá bálá ba waazu am \*mashidi yaikke, antara am mba-aha-aatare, tá ankwá á kwaraterse elva a Yaisu labáre á higa na ge emnde,

geni ba ɲane una \*Almasiihu.

## 6

### *Zála vuye ta dzeraterse ge slera á Dadaamiya*

<sup>1</sup> Haraare cekwaɲgudí tá aɲkwa far ba sága emnde a fetarfe maa, Yahudiya-aha na tá ndáhá elva a Yunaniɲkau na farantaufe ge ica ervaunɲe áte Yahudiya-aha na tá á ba am larde. Ta bántsa itare, ba kelaa má tá tegaterá náza zá ge ɲwasha wegyegye wá, tá fateruka hyema ge emnde-aatare.

<sup>2</sup> Daaci emnde a bela kelaawa ju buwa na ta jemaa emnde a fetarfe baɲemme, a ba itare: «Ganakini ɲere ɲá yá balaterá elva á Dadaamiya ge emnde ni, ɲá shuɲɲula tega náza zá wá, una zlayeka ɲekideki.

<sup>3</sup> Daaci dzerausedzere zála na ni tá an eɲkale na vuye egdzar mama-aha-aaruwa, emnde na ni tá an naha an Sheɲekwe Cudɲɲe am itare na. Daaci ɲá faterem slera ɲanna am erva ge itare.

<sup>4</sup> ɲere wá, ɲá shuɲɲula ba maduwa, antara balaterá elva á Dadaamiya ge emnde.»

<sup>5</sup> Emnde a fetarfe baɲemme hayaránháyá elva ɲanna. Daaci ta dzerse tara Aitiyain, zhel fetarfe an tsaka ire, an naha an Sheɲekwe Cudɲɲe, antara Filip, Pauraukaurus, Nikanaur, Timaun, Parmainas, ira Nikaulawus ɲane ura Antakiya a dema an de am nadina á Yahudiya-aha.

<sup>6</sup> Ta tsatsaa emnde vuye ɲanna á katafke á emnde a bela, ta magaterar maduwa, ta puwaterar antara \*erva a barka.

<sup>7</sup> Ta zlala estuwa emnde á Dadaamiya á de katafke, sagarevsage jipu emnde a fetarfe am huɲe á Urusaliima. \*Liman-aha kwakya eksaraarekse itare keni fetarfire.

### *Male-aha á Yahudiya-aha ta eksevaa Aitiyain*

<sup>8</sup> Aitiyain ɲanna wá, kwakya ɲgurna, antara hákuma na a shanaa ɲane. A magaa nalaama-aha, antara najipu-aha kwakya am dágame á emnde.

<sup>9</sup> Tá aɲkwa Yahudiya-aha na ta sawa am Kiraine, antara am Alaikzanderi am tate ɲanna, itare tá jáháva am mashidi na tá ɲahaná an bere á emnde na sharánsha ire-aatare na. Tá aɲkwa Yahudiya-aha umele zlaɲe ádaliye, ta sawa am Silikiya, antara Aziya; itare baɲemme hayaránka elva á Aitiyain ɲekideki, tá aɲkwa á gan gajawe kwakya.

<sup>10</sup> Amá baaka ura á danude ɲekideki, adaba Sheɲekwe Cudɲɲe aɲkwa á vante eɲkale á ndahá elva.

<sup>11</sup> Adaba una ɲanna ta shekweve emnde umele, ganakini a baránba emnde ɲanna: ɲa cenaa Aitiyain á valya elva yaiyaihe áte Muusa, antara áte Dadaamiya keni.

<sup>12</sup> Ta tsante estuwa ervaunɲe á emnde a ekse, antara male-aha á ekse, ira malum-aha á \*tawraita baɲemme. Ta gwarhe estuwa ge Aitiyain, haa ta dáná á dem shairiya, á katafke á jáháva á male-aha á Yahudiya-aha baɲemme.

<sup>13</sup> Ta naba saa seyde-aha á fida ɲanna, geni tá ɲatsa fida-aatare ɲanna. Ta bántsa itare: «Zhel na ba kelaazare á valya ba elva áte mashidi á Dadaamiya, antara \*tawraita a Muusa.

<sup>14</sup> ɲa cenáncená a ndahanaa á ba an we-aara, a ba ɲane: Yaisu ura Nasarátu na wá, watse á kyaba mashidi na, antara naɲe-aha na a mbamisaa Muusa na keni baɲemme watse á eptsanteptsá.»

<sup>15</sup> Daaci baɲemme á emnde na tá am jáháva na tá puwa ba ice áte Aitiyain. Amá tá zhára wafke-aara wá, ba seke malika á Dadaamiya.

## 7

*Aitiyain anjwa á tsaka elva á katafke á zlamaha*

<sup>1</sup> Daaci male á \*liman-aha a ndavanu elva ge Aitiyain, a ba ɲane: «Názu tá ndahaná itare na ba jire ba estuwa emtu?»

<sup>2</sup> A ɲwete ge Aitiyain, a ba ɲane: «Cenawivaacena emtsaade egdzar mama-aha-aaruwa, antara dada-aha-aaruwa: Dadaamiya slekse, a maranse ire-aara ge eggyemiya Ibrahimá wá, kwaye zlaɓe am Maisaupautamiya, zlaɓe daaka emtsaade á dem Haran.

<sup>3</sup> A ba Dadaamiya á elvan ge ɲane wá: Tsetse am larde á ɲa, sesse am jeba á ɲa baɗemme, ezzlálá á dem larde na watse yá ɲgyekwakanvaa ya.

<sup>4</sup> Daaci Ibrahimá a kezlese am Kaldiya, kwaye a de njaa am Haran. De keɗaakeɗa eddenjara maa, a kezlansehe zlaɓe ádaliye ge Dadaamiya á sem larde na kwá njá kure am huɗe-aara kina na.

<sup>5</sup> Am sarte ɲanna wá, Dadaamiya vanteka sleɗe ge Ibrahimá ba kapáka palle keni am larde na, amá a ba ɲane á elvan ge ɲane: Larde na baɗemme watse yá vakteva vacite umele, kwá de kwaraná ba kure antara egdzara á ɲa. Amá zlaɓe ba egdzere ɲanna keni nánka Ibrahimá ɗekideki.

<sup>6</sup> A ba Dadaamiya á elvan ge ɲane zlaɓe ádaliye wá: Egdzara á ɲa tá de njá emtsaade am erva á emnde, tá de gev nave-aha á emnde, tá de magaterá palasa am iva deremke ufaɗe.

<sup>7</sup> Amá watse yá shaterushe zlaɗa ge emnde a larde ɲanna keni, lauktu watse tá sesse egdzara á ɲa am larde-aatare, tá se kezli ugje am larde na.

<sup>8</sup> Am iga á una a tsakanse una-aha ɲanna Dadaamiya ge Ibrahimá maa, a maganaa namána, a ba ɲane á elvan ge ɲane: Dem shedekwe una á gev nalaama á namána na. De shánsha Ibrahimá Isiyaaku, a ɓelemaa am shedekwe áte háre ge tiisire-aara. Isiyaaku keni a fem Yakubu am shedekwe, Yakubu keni a puwum egdzara-aara eggye-aha a miya kelaawa ju buwa.

<sup>9</sup> «Am iga a una ɲanna maa, eggye-aha a miya ɲanna ta naba velu kuderetare Yusufa á dem Misera aɗaba shelha. Amá ndza anjwa Dadaamiya antara ɲane.

<sup>10</sup> Dadaamiya yánka Yusufa am zlaɗa-aha-aara. Bairá a vante ɲgahire. A vante ilmu á katafke á \*Firawna slekse á larde á Misera, slekse a naba ganve Yusufa male arge larde á Misera baɗemme, male arge emnde na tá am huɗe á há-aara baɗemme.

<sup>11</sup> Daaci a naba sem ge waya yaikke á sem larde á Misera, antara larde á Kanaana maa, emnde baɗemme tá á ba am palasa-aara, haa eggye-aha a miya ɲara tá shánka ba názu tá zuze keni ɗekideki.

<sup>12</sup> Cenáncena Yakubu ganakini anjwa nalkame am Misera, a ɓeláa ba egdzara-aara ɲanna ta duhe ser palle.

<sup>13</sup> Ta daliye ge buwire wá, Yusufa a de maraterse ire-aara, sleksu \*Firawna keni a dise á ba am una ɲanna emnde a jeba á Yusufa.

<sup>14</sup> Daaci Yusufa a naba ɓelaa ura, ta de sanaa eddenjara Yakubu an huɗe á há-aara baɗemme, emnde á Yakubu ta kul vuye jiilyeɓe.

<sup>15</sup> Daaci a naba de nja-aara ge Yakubu am Misera, a emtsaa á ba áhuwa, egdzara-aara keni baɗemme ta matsaa á ba áhuwa.

<sup>16</sup> Amá emtsa á eggye-aha a miya ɲanna wá, baɗemme ta halateraa á ba á dem Sikaim, ta de heɗateraa am irekhya na kwaye ndza a shekwanaa Ibrahimá am erva á egdzara á Hamaur.

<sup>17</sup> «Am sarte na ni herzhe watse á magava duksa na a bannaa Dadaamiya ge Ibrahimá na wá, emnde á miya am Misera tá far ba sága á ba an ndzeɗa.



<sup>18</sup> Daaci faremfa slekse umele anwaslire diyaaka Yusufa dekideki maa,  
<sup>19</sup> slekse nanna a naba eksaterve sawari ge eggye-aha a miya, a naba shateru zlada kwakya, a naba hyateraarhe an ndzedfa, ganakini a puwaranvepuwe egdzara-aatare mesheshe, a njarka an shifa dekideki.

<sup>20</sup> A ba am sarte nanna wá, ta naba yá Muusa keni, egdzere zariya jipu, hayánháyá Dadaamiya. Tere keye kalkale tá ankwá á tsufaná á ba am hufe á há á eddenara,

<sup>21</sup> lauktu ta danse á degashe. Amá de shansha egdze á sleksu \*Firawna, a de gelantaa nane ba seke egdza-aara a yanaa ba nane.

<sup>22</sup> Muusa a waltaa á ba an diya á názena tá maganá emnde a Misera bademme. A gevaa estuwa Muusa edda una an hákuma á ndáhá elva, antara edda á hákuma am slera-aha-aara bademme.

<sup>23</sup> «Muusa shanaasha iva kul ufade lauktu a shaa enjkale á de zhara emnde a jeba-aara. Amaana: Emnde a \*Iserayiila.

<sup>24</sup> Duwa á Muusa maa, a naa zhel emnde a Misera ankwá á já ura jeba-aara. Daaci a naba de gwe, a jehe shifa á zhel nanna.

<sup>25</sup> Nane a kurken watse tá cenáncena emnde a jeba-aara Iserayiila-aha ganakini watse á lyateraalya Dadaamiya á kya erva an nane, tá de shánsha ire-aatare, amá cenaránka emnde na dekideki.

<sup>26</sup> Makuralla-aara zlafe adaliye, a de shaa Iserayiila-aha ta buwa, tá ankwá á dagala. Nane á kátá tegatertega, a ba nane á elvan ge itare: Kay! Dawalaa na? Kure kwa ba egdzar mama keni kwá dagala, a jaara uwe ge kure?

<sup>27</sup> Amá edda una nane ankwá á maganá palasa ge ura, a naba puwan tsekudfa ge Muusa, a ba nane á elvan ge nane: Ka mu a gakvaa ware male arge nere geni ká se kyaná ka shairiya á nere?

<sup>28</sup> Emtu ká kátá jija seke una ka jaa zhel emnde a Misera áwaya na emtu?

<sup>29</sup> Daaci elva nanna ngyámngye am vuwa á Muusa, antara ba kezla-aara am larde nanna ba dekideki, kwaye a zhagade á dem Madiyan, a de yayaa egdzar zála buwa áhuwa.

<sup>30</sup> «Am iga a yawe kul ufade á ba am larde nanna maa, malika á Dadaamiya a maranse ire-aara ge Muusa áte vuwa á wa Sina, a maranse ire-aara am nara á kára á guzla.

<sup>31</sup> Muusa ankwá á maga najipu á duksa nanna, ankwá á ganávtege ge guzla nanna geni á nanaana duksa nanna ba shagera wá, á cená ba kwára á Yaakadada, a ba nane:

<sup>32</sup> Ba iya Dadaamiya na ndza ta kezli ugje eggye-aha a na na, ya Dadaamiya á Ibrahimia, Dadaamiya á Isiyaaku, Dadaamiya á Yakubu. Muusa jaaja lyawa, á gyagya ba seke maagara, kwalevkwála ge zhára ice ádehuwa mázla-aara.

<sup>33</sup> A ba Yaakadada á elvan ge nane: Sadsesáde kimake á na. Adaba tate na ká tsá ka átekwa na tate cufedfe.

<sup>34</sup> Ya nanna zlada na tá shána emnde-aaruwa am Misera, ya cenáncena kyuwa-aatare, ya tsekwa adaba ba una nanna, ya se lyaterlya, sawa yá beláká á dem Misera.

<sup>35</sup> «Daaci egdzar mama-aha-aaruwa, ba Muusa nanna ta ndahanaa itare a gakvaa ware male arge nere, geni ká se kyaná ka shairiya á nere na wá, Dadaamiya a belaa ba nane geni á de gev slekse-aatare, á saterse am erva á emnde. Dadaamiya a magaa slera nanna á kya erva an malika na a maranse ire-aara ge Muusa am kára á guzla na.

<sup>36</sup> A satersaa ba nane emnde a \*Iserayiila am larde a Misera, an mága nalaama-aha, antara najipu-aha gergere, am Misera nanna, antara am

Haye Kyanḡe. Dem yawe kul ufade, ndza slekatafke-aatare ba Muusa ḡanna am kaamba.

<sup>37</sup> Ndza a bateránba Muusa ge emnde a \*Iserayiila, a ba ḡane: Watse Dadaamiya á belakurá nabi umele ba seke iya, watse á belakurá ba ura jeba á kure.

<sup>38</sup> Ba Muusa ḡanna una ndza slekatafke á emnde a Iserayiila am kaamba, ndza ba ḡane una sledágave á eggye-aha a miya werre, antara malika na a banaa elva áte ire á wa Sina na. A Iyamivaa ba ḡane elva á Dadaamiya, elva na á vante shifa ge ura na, lauktu a samiyansa.

<sup>39</sup> «Aley ndza faransaareka eggye-aha a miya ḡekidēki ge Muusa, yarnaaya elva-aara, ta hayaa ba eptsa á dem Misera.

<sup>40</sup> Adaba una ḡanna, a ba itare tá elvan ge \*Haruna: Nderamíndera-ka hele-aha na mí sepaterá á katafke á miya. Adaba diyamika názu a shaa Muusa ḡanna a samise am Misera na.

<sup>41</sup> Daaci ta naba nderaa hele-aatare, á gáráva an egdza a dalau, ta icanaa sadake, ta magaa munḡri, tá higa á katafke á názu ta nderanaa ba itare an erva-aatare.

<sup>42</sup> Amá a naba yaterhe ge Dadaamiya ba ḡekidēki tá anḡwa á kezlan ugje ge hele-aatare, tá anḡwa á kezlater ugje ge terlyakwa-aha áte samaya keni, ba seke una anḡwa ta puwete am wakita á nabi-aha na. Ta puwetaa nabi-aha, a ba Dadaamiya á elvan ge emnde a \*Iserayiila:

Kure Iserayiila-aha: Kina iva kul ufade kwá vite sadake á dabba-aha, antara sadake á duksa-aha umele na, ba jirire kwá vite ba ge iya emtu?

<sup>43</sup> Una ge iya ka ḡekidēki, \*mashidi á kacakaca na kwá sepaná kure ba ge dadaamiya á kure \*Maulaukau, kwá sepá ba dadaamiya á kure Rafan na kwa maganaa ba kure, gáráva á terlyakwa na. Kwaya ḡane hele-aha na kwa nderanaa kure ge kezlater ugje. Adaba una ḡanna yá dakurda á de katafke átsaaka á ba an \*Babila keni.»

<sup>44</sup> Daaci a ba Aitiyain: «Am sarte na tá am kaamba eggye-aha a miya, ndza tá an mashidi á Dadaamiya ta maganaa an kacakaca, ta dise áte una ḡanna ganakini anḡwa Dadaamiya an itare. Ta dzeḡaa mashidi ḡanna a ba áte una a kwaransaa Dadaamiya ge Muusa. Adaba a banánba Dadaamiya ge Muusa geni a emmága á ba áte una a naanaa ḡane.

<sup>45</sup> Dedde zamane-aatare, ta yaterán ge eggye-aha a miya umele. Ndza Zhausuwe slekatafke-aatare. Ta se dema itare an mashidi ḡanna am larde na. Am demda-aatare, Dadaamiya a naba bakese emnde a jeba umele am katafke-aatare. Daaci mashidi á nalba ḡanna a nja estuwa, dem zamane á sleksu \*Dawuda.

<sup>46</sup> Shánsha Dawuda háyá áza Dadaamiya á Yakubu maa, a naba ndavanu ganakini á nderanaa mashidi.

<sup>47</sup> Amá a nderannaa Suleymanu mashidi ḡanna ge Dadaamiya.

<sup>48</sup> Ay degiya Dadaamiya am yaikkire-aara wá, á njeka am bere-aha na ni ta nderanaa ba emndimagwaha. A ba ḡane á kya an we á nabi-aara:

<sup>49</sup> Samaya una tate á nja-aaruwa am sleksire-aaruwa; haha wá, tate á puwa sera-aaruwa. Kwá de nderiya bere-ara kure ge iya? Áme slede na ni yá de puwansá ya am huḡe-aara na?

<sup>50</sup> Ábi duksa-aha ḡanna bademme ya nderanaa ba iya? Estuwa á ba elva a Yaakadada.

<sup>51</sup> «Kure wá, degdege ire á kure ba jire, kwá ceneka elva á Dadaamiya ḡekidēki. Wayakurka cena názu á bakurná Shedekwe Cudeḡde, kwa ba kalkale antara eggye-aha a kure werre na ndza kwalarevkwálá na.

<sup>52</sup> Anƙwa nabi na ni eggye-aha a kure magaranánka palasa emtu? Ta naba cebaa emnde a bela á Dadaamiya ge sateraa labare á slejirire ba ɲane palle na. Ba ɲane una a yanaa ice á kure, jakurja na.

<sup>53</sup> Kure lyakurvaalya \*tawraitá á Dadaamiya na a vakurtaa á kya erva an malika-aha, amá magakurka.»

### *Tá dzaga Aitiyain an nákwá ge ja shifa-aara*

<sup>54</sup> Am sarte na cenarácena una ɲanna male-aha á Yahudiya-aha maa, jaterje ervaunɗe jipu áte Aitiyain, tá zá ba erva-aatare an slare.

<sup>55</sup> Amá Aitiyain, ɲane an naha an Shedekwe Cufedde. Ba a ketaa ice-aara á dem samaya wá, a naa tate na ni á njá átekwa Dadaamiya an sleksire-aara, Yaisu anƙwa á tse am naɗafa á Dadaamiya.

<sup>56</sup> Daaci a ba ɲane: «Cenaucena: Iya wá, yá zhárá ba samaya an wera, yá zhárá ba \*Ura á emnde baɗemme á tse am naɗafa á Dadaamiya.»

<sup>57</sup> Ta naba fu hula á dem zhegela geni a demka elva ɲanna á dem hyema-aatare, ta gwarhe baɗemme-aatare,

<sup>58</sup> ta naba danse á dete iga a ekse, ta de dzaganaa an nákwá áhuwa ge ja shifa-aara. Seyde-aha na ta tsakwese am zane-aha-aatare, ta puwehe a ufateraa dawale umele zhera-aara Sawulu.

<sup>59</sup> Daaci emnde na tá dzaga ɲane an nákwá, amá Aitiyain a magaa maduwa, a ba ɲane: «Yaakadada Yaisu! lyevaalya shifa-aaruwa.»

<sup>60</sup> A kezlaa ugje am haha, a ba ɲane á ba an kaa kwárá: «Yaakadada! Yateraarye haypa na tá anƙwa á maganá itare na.» Ba a ndaase una ɲanna wá, a naba emtsehe.

## 8

### *Sawulu a tsante fitenire áte emnde a fetarfe*

<sup>1</sup> Vacite ɲanna, tsarantetse fitenire yaikke ádete emnde a fetarfe am huɗe á Urusaliima, baɗemme zhagadarzhagade á dete makwata-aha á Yahudiya, antara \*Samariya, sey ta juwaa ba emnde a bela.

<sup>2</sup> Emnde na ɗabartedaba Dadaamiya ta heɗaa emtsa á Aitiyain, kyuwarsekyuwe jipu emtsa-aara.

<sup>3</sup> Sawulu wá, anƙwa á wawa geni á zlanazle emnde a fetarfe baɗemme, á já ɗába sera á wakyiya sera á wakyiya, á halaterá á dem dangay baɗemme an zála-ka an ɲwasha-ka.

### *Labáre á Yaisu daada á dem \*Samariya*

<sup>4</sup> Daaci emnde a fetarfe na zaɗaratervezade na, tá anƙwa á bala ba waazu ma áme keni am tate na ta demaa itare baɗemme.

<sup>5</sup> Filip maa, ɲane a dem berni á \*Samariya, a de fantau ge balatera elva á \*Almasiihu ge emnde áhuwa.

<sup>6</sup> Emnde baɗemme fartefa hyema ge cena elva á Filip, hayaránhaya. Najipu-aha na a maganaa ɲane keni naránna baɗemme.

<sup>7</sup> Jini-aha saresse am emnde kwakya tá ámbera hula, ɲguryekwe-aha antara emnde a dere keni kwakya mbarmbe.

<sup>8</sup> Njaanja higa yaikke ge emnde a berni ɲanna.

<sup>9</sup> Am sarte ɲanna maa, ndza anƙwa zhele umele am \*Samariya ɲanna zhera-aara Simaun, ɲane haraare á maga namselkwe-aara, antara waɗakire, emnde baɗemme tá maga ba najipu áte ɲane, a ganve ire-aara ura ɲгаа.

<sup>10</sup> Emnde bademme, an emnde a ngaanga ka, an talaga-aha ka, baaka ura á ebza elva-aara defekideki. Baránba emnde ganakini hákuma yaikke, hákuma á Dadaamiya na wá, ba zhel nanna.

<sup>11</sup> Baaka ura á ebza elva-aara, adaba haraara anjwa á maga najipu-aha-aara am ice-aatare.

<sup>12</sup> Amá am sarte na dámnda Filip an labare á higa, elva a dem zlanna á Dadaamiya, á kwaraterse antara zhera á Yaisu \*Almasihu na wá, emnde kwakya fartarefe, an zála-ka an njwasha-ka lyarvaalya baptisma.

<sup>13</sup> Ba Simaun nanna keni fetarfe, lyevaalya baptisma. Am ba kelaazare á iceka Simaun átevega Filip maa, á maga ba najipu áte nalaama-aha, antara najipu-aha na anjwa á maganaa Filip na.

<sup>14</sup> Am iga á una nanna maa, cenarácena emnde a bela am Urusaliima ganakini fartarefe emnde a \*Samariya áte elva á Dadaamiya, daaci ta naba bela tara Piyer antara Yuhanna á dezetare.

<sup>15</sup> Daraada tara Piyer antara Yuhanna am Samariya, ta de magaterar maduwa ge emnde a fetarfe na tá áhuwa na, ganakini a vaterteva Dadaamiya Shedekwe Cufedde.

<sup>16</sup> Adaba zlafe ta shaa ba baptisma an zhera á Yaakadada Yaisu, amá zlafe samka Shedekwe Cufedde á sem itare á ba am palle-aatare keni.

<sup>17</sup> Am sarte na ni puwaraterarpuwa erwa-aha-aatare tara Piyer, antara Yuhanna áte ire-aha-aatare na wá, daaci sharánsha Shedekwe Cufedde.

<sup>18</sup> Nanna Simaun ganakini emnde na sharánsha Shedekwe Cufedde adaba erwa na ta puwataare emnde a bela na wá, a naba vaterte shungu ge tara Piyer antara Yuhanna,

<sup>19</sup> a ba nane á elvan ge itare: «Vawiteva hákuma nanna ge iya keni, geni máki ya puwaare erwa-aaruwa ge ura wá, edda-aara keni sey á shánsha Shedekwe Cufedde ba seke una.»

<sup>20</sup> A njwete ge Piyer, a ba nane á elvan ge nane: «A kedakuraakeda Dadaamiya antara shungu á na nanna bademme. Adaba ka kwamaa shekwa názu a vantaa Dadaamiya ge ura an nalmane.

<sup>21</sup> Ekka baaka barama ge ekka, baaka tate á na am slera á nere na defekideki, adaba shagerka erwaunde á na á katafke á Dadaamiya.

<sup>22</sup> Emmága tuba arge haypa na ka maganaa ka, esslápala Dadaamiya ganakini á yakareye jeba á dzáma ire nanna máki á gevge.

<sup>23</sup> Adaba na naa erwaunde á na kelaade, gakevge náve á haypa.»

<sup>24</sup> A ba Simaun á elvan ge tara Piyer, antara Yuhanna: «Taslawa á kure, slapalawislápala áza Yaakadada á kure nanna geni a shika názena kwa ndanaa kure na.»

<sup>25</sup> Tara Piyer, antara Yuhanna ta magaa seydire kwakya, ta balaterse elva á Yaakadada ge emnde. Am iga a una nanna maa, ta naba eptsa-aatare á dem Urusaliima. Átira daa zlafe adaliye, ta balese labáre á higa, elva a Yaisu am ekse-aha á \*Samariya.

### *Tara Filip antara zhel emnde a Aitiyaupiya*

<sup>26</sup> Am iga á una-aha nanna maa, a ba malika á Yaakadada á elvan ge Filip: «Tsetse ezzlala á dem manem, duwa áte emgyegwe a baráma tsekwa á da am Urusaliima ge dem Gaza na.»

<sup>27-28</sup> A naba tsetehe ge Filip, a duhe. Duwa-aara á dem tate nanna wá, ta de puwa ba jaa ire antara ura Aitiyaupiya umele nadima, átira dá. Zhel nanna nakawá yaikke. Nane pataka á sleksu Kandake, mukse na sleksa nane am larde á Aitiyaupiya. Daaci zhel nanna wá, ndza a se kezlan ugje

ge Dadaamiya am Urusaliima. Átira dá ñanna maa, anƙwa á ndahá wakita á nabi Aisaya, á njá am \*darkwa-aara, á tefaná belsa.

<sup>29</sup> «Naba duwa, herzhanteherzhe darkwa ñanna ba shagera,» a ba Shedekwe Cufedde á elvan ge Filip.

<sup>30</sup> Daaci a naba tefante ge Filip an zhágade, a de shanaahe, á cena zhel ñanna á ndaha wakita á nabi Aisaya. «Ká anƙwa á cenáncena emtu jirire á názena ká ndahaná ka na?» a ba Filip á elvan ge ñane.

<sup>31</sup> «Yá cenaná estara jirire-aara máki á paliná ura ka?» Daaci a dante Filip geni a dalemfálá á dezeńara am \*darkwa, á njinja ázeńara.

<sup>32</sup> Náwa názu a ndahesaa ñane am wakita á Aisaya:  
Ñane gevge ba seke zhel kyawe na tá daná á de icica na, ba seke zhel kyawe na tá betá úgje áte ñane keni á kyuweka dfeƙideƙi, ba we-aara keni weraaka.

<sup>33</sup> Ñane wá, garanaaga á dem áhá, magaranánka jirire dfeƙideƙi. Ware dfeƙe á de tsala wulfe-aara am duniya na? Adaba ta ján werre shifa-aara.

<sup>34</sup> Daaci a ba zhel emnde a Aitiyaupiya na á elvan ge Filip: «Palinaapala elva na tásle á ña, á ndaná áte ware nabi á Dadaamiya elva na estuwa? Á ndaná a ba áte ire-aara emtu, á ndaná áte ura umele-he?»

<sup>35</sup> Filip a eksetaa elva, a dzegwanu ba ge elva ñanna am Aisaya na, a balanse labáre á higa, elva a Yaisu.

<sup>36</sup> Ba tá zlalá, tá zlalá, ta de shaa tate á yawe. Daaci a ba zhel emnde a Aitiyaupiya na á elvan ge Filip: «Náwa shamiyansha yawe mu, anƙwa názu á piyite geni ká magiya baptisma emtu?» ((

<sup>37</sup> A ñwete ge Filip: «Máki faktarefe áte Yaisu an ervaunde á ña palle wá, baptisma á ña a naba gevge.» A ñwete ge zhel emnde a Aitiyaupiya na: «Fantarefe ganakini Yaisu \*Almasiihu wá, ñane \*Egdza á Dadaamiya.»))

<sup>38</sup> Daaci tsaatse, a ba ñane á elvan ge sletedaná belsa. Ta naba tsekwese am \*darkwa na tara Filip, antara zhel emnde a Aitiyaupiya ñanna, ta tsekweme am yawe, Filip a naba maganaa baptisma.

<sup>39</sup> Ba segashe-aatare am yawe wá, Shedekwe Cufedde a naba eksante Filip ba estuwa, mele nánka zhel emnde a Aitiyaupiya na mázle-aara. Amá a eksetaa baráma-aara zlaƙe ádaliye an higa yaikke.

<sup>40</sup> Filip keni á zhárá ba á tse am Ajaustus. Daaci ba zlala-aara á dem ekse-aha gergere, anƙwa á balaterá labáre á higa, elva a Yaisu ge emnde, a daa ba estuwa á dem Kaysariya, á maga ba ñane.

## 9

### *Tuba á Sawulu* (22:6-10; 26:12-18)

<sup>1</sup> Am sarte-aha ñanna bademme na maa, Sawulu wá, ñane á mberá ba wáva áte emnde na fartarfe áte Yaakadada Yaisu na, a bantsa ñane sey á zlateraazle bademme. A naba deza male á \*liman-aha,

<sup>2</sup> a de ndavanu nalmesheri á seydire geni á duwa an ñane am erva á dem egdzar mashidi-aha-aatare na tá am Dimaska. Estuwa, máki a de shaa emnde na ta fetaare áte Yaakadada Yaisu, ma zhele, ma mukse keni, á saterá á ba am erva á sem Urusaliima.

<sup>3</sup> Ba a shaa nalmesheri ñanna wá, antara ba zlala-aara. Ba ñane keni herzhanteherzhe berni á Dimaska ñanna wá, a naba tsekwaa ge parakkire yaikke á sa am samaya á sete ñane,

<sup>4</sup> a naba mbedeƙe ge Sawulu á dete haha, daaci á cena ba á dahaná kwara umele: Sawulu, Sawulu, labára ká magiya palasa, á bina.



<sup>5</sup> A ηwete ge Sawulu: «Ka ware ka edda-aaruwa?» A ba kwára ηanna á elvan ge ηane: «Ba iya Yaisu na ká anƙwa á maganá palasa na.

<sup>6</sup> Amá tsetse, edduwa á dem huƙe á ekse, tá de bakánba áhuwa názu ká de maganá ka.»

<sup>7</sup> Emnde na tá am iga á Sawulu ηanna diyarka názu tá ndaná itare ƙeƙeƙe. Tá anƙwa cenáncena kwára á ura, amá itare tá nánka edda-aara ƙeƙeƙe.

<sup>8</sup> Tsetsa Sawulu am haha, a werante ice, amá á nánka. Sey ta ηanaa áte erva, ta taƙanaa an táƙá á dem Dimaska.

<sup>9</sup> Hare keye, ba slerba-aara keni nánka ƙeƙeƙe. Am hare keye ηanna wá, zawka shawka ƙeƙeƙe.

<sup>10</sup> Anƙwa slefatarfe umele am Dimaska ηanna, zhara-aara Hananiyas, a naba marananse ire-aara Yaakadada am wahayu,

<sup>11</sup> a ƙante: Hananiyas. Nam, a ba Hananiyas. A ba Yaakadada á elvan ge ηane: «Tsetse ba kina, eƙƙaba ba baráma na tá ƙaana an baráma ndeƙe na, edduwa á dem mba á Yahuda, ennáwa ura zhara-aara Sawulu ura Tarsus, ηane anƙwa átira mága maduwa kina.

<sup>12</sup> Zhel ηanna a shaa wahayu, am wahayu ηanna maa, anƙwa á zhara ba ura zhara-aara Hananiyas a duhe á deƙera, a de puwaare \*erva a barka ganakini á nanna ice-aara zlaƙe ádaliye.»

<sup>13</sup> A naba ηwete ge Hananiyas, a ba ηane: «Emnde kwakya ta se ƙalise labáre á zhel ηanna degiya Yaakadada. Emtanƙire na a magaterna ηane ge emnde á ηa am Urusaliima keni ndarindaha baƙemme.

<sup>14</sup> Ba sawa-aara ásehuna na keni a sanaa ba una ηanna, ta vanta male-aha á \*liman-aha hákuma á se hálá emnde na tá ηala Dadaamiya an zhara á ηa.»

<sup>15</sup> Amá a ba Yaakadada á elvan ge ηane: «Naba duwa ka. Aƙaba ya eksese zhel ηanna keni ge mága slera-aaruwa, ganakini á de kwaratersa ηane zhara-aaruwa ge emnde a jeba umele, antara slekse-aha-aatare, ira emnde a \*Iserayiila, geni a diyariyeddiye ba shagera.

<sup>16</sup> Yá de marannaamárá zlaƙa-aha na watse á shána ηane aƙaba zhara-aaruwa.»

<sup>17</sup> Daaci a naba zlalá ge Hananiyas, a de demá am huƙe á há ηanna, a de puwar erva a barka-aara ge Sawulu, a ba ηane á elvan ge ηane: «Sawulu egdza emmerwa, a ƙeliyaa ba Yaakadada Yaisu na a marakse ire-aara áte baráma a sawa na, geni ká nána ice á ηa zlaƙe ádaliye, ká shansha Sheƙeƙe Cudeƙe.»

<sup>18</sup> Ba ndah keni zlaƙe ndaaseka Hananiyas wá, ta naba sesehe ge duksa-aha umele am ice á Sawulu ba seke iga a kelfe wá, a fantau ge zhara ice-aara zlaƙe ádaliye. A tsetehe ta maganaa baptisma.

<sup>19</sup> Daaci a zu duksa, shansha ndzeƙa-aara.

### *Sawulu anƙwa á maga waazu am Dimaska*

Sawulu haraare cekwaanƙuƙi áza emnde a fetarfe na tá am Dimaska.

<sup>20</sup> Ba watsewatse, a fantau ge ja ƙaba am mashidi-aha á Yahudiya-aha gergere, ge ƙalá waazu á elva a Yaisu, geni Yaisu wá, \*Egdza á Dadaamiya.

<sup>21</sup> Emnde na tá anƙwa á cena elva-aara na baƙemme tá maga ba najipu. A ba itare: «Ábi una ba zhel na a cebaa emnde a ƙaba Yaisu am Urusaliima na? Ábi ásehuna keni a sanaa ba una ηanna, geni á daterá á ba am zawa ádeza male-aha á \*liman-aha?»

<sup>22</sup> Amá waazu á Sawulu anƙwa á far ba mága slera am emnde. Baaka názu tá maganá Yahudiya-aha na tá am Dimaska na á katafke-aara, aƙaba

aŋkwa á marateránmárá jirire-aara geni ba Yaisu una \*Almasiihu, amaana: Edda una a eksesaa Dadaamiya.

<sup>23</sup> Haraare maa, Yahudiya-aha ta naba demaa am sawari, ta naba njante geni sey tá kecfanaakedfa shifa á Sawulu.

<sup>24</sup> Amá cenáncena ɲane keni názu ta ɲgwadanaa itare áte ɲane bademme. An vayi vacika bademme tá aŋkwa á ufa we á ukvake á berni, tá tsagwada ba ɲane geni sey tá kecfanaakedfa shifa-aara.

<sup>25</sup> Daaci vacite umele an vayiya maa, emnde na tá am iga-aara, ta naba njaneme am keday yaikke, ta naba tsekwanse á kya biye á ukvake á dem iga a ekse.

### *Eptsaptsa Sawulu á dem Urusaliima*

<sup>26</sup> Am sarte ɲanna, eptsaptsa Sawulu á dem Urusaliima. Am eptsaa-wá, a de tataya jammeje antara emnde a fetarfe, amá baaka ura a fanaa vuwa dfekideki, adaba fartareka geni ɲane keni gevge slefetarfe ba jirire.

<sup>27</sup> Amá Barnabas wá, a naba eksante Sawulu ɲanna ádezenara, a puwansaa ɲane ádeza emnde a bela, a de baternaa ɲane ganakini Sawulu nanna Yaakadada áte baráma á dem Dimaska, antara elva na ni a bannaa Yaakadada ge Sawulu bademme. A ndaterhe zlafe ádaliye dzandzanjire na a maganaa Sawulu ge ndater elva a Yaisu ge emnde am huđe á Dimaska.

<sup>28</sup> A fantau á ba am sarte ɲanna nja Sawulu antara emnde a bela, a jaa dfába am huđe á Urusaliima ba seke una á kataná ɲane mazla-aara ge mága waazu an zhera á Yaisu, an baakire á lyawa.

<sup>29</sup> Ádeza Yahudiya-aha na tá ndáhá ba elva a Yunaniŋkau keni a duwa Sawulu an elva a Yaisu, a ndaterndáhá sera-aara ba kwakya, amá itare tá tataya keda shifa-aara.

<sup>30</sup> Cenaráncena egdzar mama-aha-ɲara maa, ta naba danse á dem Kaysariya, ganakini a ezslála á dem Tarsus.

<sup>31</sup> Daaci emnde a fetarfe am haha á Yahudiya, antara Galili, ira \*Samariya njarinja an hairire mázla-aara, tá aŋkwa á far ba mága dzandzanjire am elva á Yaisu, tá aŋkwa á fá zherwe áte Yaakadada, aŋkwa Shedfekwe Cufedde am dagave-aatare, á sagatersaga ba kelaazare.

### *A mbetaa estuwa Aynaiyas*

<sup>32</sup> Am sarte ɲanna maa, Piyer á já ba dfába am tate-aha gergere. Vacite umele maa, a de zhara emnde a fetarfe na tá am Lida.

<sup>33</sup> Duwa-aara á dem ekse ɲanna, a de bera ura umele zhera-aara Aynaiyas, yawe tiise á taa tseteka am haha dfekideki, adaba gevge ɲguryekwe.

<sup>34</sup> Á ba Piyer á elvan ge ɲane: «Mbakaambe Yaisu \*Almasiihu, tsetse, tsatsanaatsatse egdera á ɲa.» Kertenj tsetsa Aynaiyas.

<sup>35</sup> Emnde na tá am Lida ɲanna, antara emnde a Saraun bademme naránna, itare keni ta naba fetarehe áte Yaakadada Yaisu.

### *Tsetsa Tabita am emtsa*

<sup>36</sup> Ndza aŋkwa mukse umele slefetarfe am ekse á Jaupe, zhera-aara Tabita, an elva a Yunaniŋkau wá, Daurkas. Amaana: Zaara. Mukse ɲanna wá, ma vaatara keni ɲane á maga ba slera á maggwire, aŋkwa á melateru ge talaga-aha keni.

<sup>37</sup> Daaci a eksevahe ge lapikere wá, a naba emtsehe. Bararanvebare, ta de zlavanaahe am bere. Bere ɲanna átire ge bere-aha umele.

<sup>38</sup> Dagave á tara Lida antara Jaupe yiyiyeka an kevaaye. Daaci cenaráncena emnde a fetarfe na tá am Jaupe, ganakini aŋkwa Piyer am

Lida. Daaci ta naba belanvaa emnde buwa, ganakini a sawa ba watsewatse tasle-aara.

<sup>39</sup> Ba watsewatse a tsetehe ge Piyer, ta zlala ba kerde antara emnde a de d'aha na. Ba damda Piyer wa, ta dan ba suuwe a dem bere na atire na, Piyer a de beraa wegyege a njwasha bademme ta ankwa a kyuwa emtsa na. Ba ta naa Piyer, ta ankwa a kyuwa asezenara, ta ambera ngyekwana buba antara naza tsekwa-aha umele na ndza a dzebanaa Daurkas am sarte na zlafe a ba an shifa-aara am dagave-aatare.

<sup>40</sup> Daaci Piyer a naba bakese emnde bademme a segashe, a kezlaa ugje, a magaa maduwa, daaci a eptsapte a deza emtsa na, a ba nane: Tabita! tsetse! A naba werante ice-aara Tabita, a tsetehe, a njehe.

<sup>41</sup> Piyer a nanaahe erva, a tsante bademme, daaci a dante wegyege a njwasha na, antara emnde a fetarfe umele, a marateraa Daurkas an shifa-aara.

<sup>42</sup> Labare nanna hyemhye am hufe a Jaupe bademme, emnde ta naba fetarhe ate Yaakadada Yaisu.

<sup>43</sup> Am iga a una nanna maa, Piyer haraare zlafe adaliye am hufe a Jaupe, am mba a slekeda gwagwa umele zhera-aara Simaun.

## 10

### *Kaurnailiyus a d'aha Piyer a dem mba-aara*

<sup>1</sup> Ankwa ura umele am Kaysariya zhera-aara Kaurnailiyus, palle a male-aha a sawji-aha a Rauma na ta d'ahater a an sawji-aha a Italiya na.

<sup>2</sup> Zhel nanna wa, nanaa nadina a Yahudiya-aha an tsaka ire. Nane an lyawa a Dadaamiya jipu, nane antara emnde-aara bademme am hufe a ha-aara ta iceka de nala Dadaamiya. Ankwa a melaterumele jipu ge Yahudiya-aha na ta am baakire.

<sup>3</sup> Vacite umele an naduwar wa, Kaurnailiyus a shaa wahayu a sawa aza Dadaamiya, a naa malika a Dadaamiya samsa ba ngayye asezenara. A ba malika nanna a elvan ge nane: Kaurnailiyus!

<sup>4</sup> A kante ice-aara Kaurnailiyus, a zharaa malika na ambera a gyagya, a ba nane: «A jaara uwe, edda-aaruwa?» A njwete ge malika na, a ba nane a elvan ge nane: «Dadaamiya lyevaalya maduwa a na, hayanhaya slera a maggwire na ka ankwa a magana ka atevege talaga-aha, nane viyakaaka dekideki.

<sup>5</sup> Kina wa, naba ebela emnde a na a dem Jaupe, a de d'arakanteda dawale umele ankwa ahuwa zhera-aara Simaun Piyer.

<sup>6</sup> Zhel nanna ankwa am mba a patuma-aara cepen-aara Simaun slekeda gwagwa, bere-aara ate we a guwa yaikke.»

<sup>7</sup> Ba zlazlala malika na, Kaurnailiyus a naba dante emnde buwa am dagave a emnde na ta magana slera am hufe a ha, antara sawji palle am sawji-aha na ta ufa ha-aara, sawji nanna keni d'abetedaba nadina a Yahudiya-aha ba shagera.

<sup>8</sup> Daaci a bateraa nazu a ndanaa malika na bademme, a naba belaterbela a dem Jaupe na.

<sup>9</sup> Dem makuralla-aara keni ta a ba ate barama. Herzhe a maga vacitire wa, herzharanteherzhe Jaupe. Piyer nanna keni d'altedala ate ire a dzuguru ge maga maduwa.

<sup>10</sup> Am sarte nanna keni nanaa waya Piyer, a kata naza za maza-aara. Am sarte na ni ta ankwa a tsatsana naza za nanna maa, nane shansha wahayu a sawa aza Dadaamiya.

<sup>11</sup> Am wahayu-aara, á zhara ba samaya an wera wanje, ankwá á tsekwa duksa umele ba seke gwadfaú yaikke á sem áhá, an nana we á námbanwa-aha-aara ufade kerde.

<sup>12</sup> Ankwá dabba-aha jeba gergere bademme, antara názu á hulmba am haha jeba gergere bademme, ira yiye-aha jeba gergere bademme am hufe á duksa nanna.

<sup>13</sup> A ba kwara umele á sawa am samaya á elvan ge Piyer: «Tsetse eksevaksá, icantice, ezza.»

<sup>14</sup> Amá a nwete ge Piyer, a ba nane: «A'aa estuweka Yaakadada, adaba ba vaci palle keni zanuka harám, ma lipa keni.»

<sup>15</sup> A ba kwara nanna á elvan ge nane zlafe adaliye: «Zhareka názu a ganvaa Dadaamiya cudede seke lipa.»

<sup>16</sup> Ser keye ankwá á banánba estuwa. Am iga á una nanna, a naba eptsehe ge kazlana nanna adaliye á dem samaya.

<sup>17</sup> Piyer wá, ankwá á dzama ba názena ni á kátá á banná Dadaamiya an wahayu nanna. Daaci emnde a bela á Kurnailiyus keni tá ankwá á tsatse áte we á bercame-aara, tá ankwá á enndava.

<sup>18</sup> Ta kante kwará, a ba itare: «Ankwá ura zhara-aara Simaun Piyer am mba na emtu?»

<sup>19</sup> Piyer am dzama ire keshekke, ankwá á tataya jirire á názena á kátá banánba Dadaamiya an wahayu na, á cená ba tá ankwá á tatayaaká zala keye ágashe, a ba Shedekwe á Dadaamiya á elvan ge nane.

<sup>20</sup> Tsetse ettsekwa, de dabaterdába ba kina, manka gajawe dekideki adaba ya belateraa ba iya, a ba Shedekwe Cudede.

<sup>21</sup> Daaci a tsekwehe ge Piyer, a duhe á deza emnde nanna, a ba nane á elvan ge itare: «Náwa iya, iya edda una kwá ankwá á tatayaná kure, ázara á ba kure?»

<sup>22</sup> Ta nwetehe, a ba itare tá elvan ge nane: «A belaneraa Kurnailiyus male á sawji-aha, ura mággwe, an lyawa á Dadaamiya jipu, ba Yahudiya-aha keni diyardiya. A bannaa ba malika á Dadaamiya ganakini sey á dakdáhá á dem mba-aara, ká de banánba názu ká an nane ge ndanda na.»

<sup>23</sup> Daaci a lyatervaahe ge Piyer á dem bere, a vaterte tate a zlava ge hare.

Mákuralla-aara ta tsetehe, a zlala antara itare. Emnde a fetarfe na tá am Jaupe keni emnde umele ta dabaterdába.

<sup>24</sup> Wergekse-aara lauktu daraada am Kaysariya. Daaci Kurnailiyus a dante emnde-aatare, antara slakate-aha-aara, tá ankwá ufa sawa á Piyer na.

<sup>25</sup> Am sarte na damda Piyer, a se yainu á ba áte we á bercame Kurnailiyus, a kezlanaa ugje ba shagera á katafke-aara.

<sup>26</sup> Amá a tsante ge Piyer, a ba nane á elvan ge nane: «Tsetse, iya keni ya ba urimagwe.»

<sup>27</sup> Piyer á baná ba elva ge Kurnailiyus ta demaa ba estuwa á dem hufe á há. Ta de beraa emnde kwakya jarammeje áhuwa.

<sup>28</sup> A ba nane á elvan ge itare: «Ba kure keni diyakurdiya ganakini ura Yahudiya wá, á belannaaka nadina-aara ge nja antara ura á jeba umele, sakwa ge dem mba-aara. Amá a marisaa ba Dadaamiya geni ma ware keni a zharanka seke lipa.

<sup>29</sup> Adaba una nanna náwa sanemsa adaba dafa á na, maganka gajawe dekideki. Kina wá, wayanwáyá cena pute na ka dahiyaá átugena na.»

<sup>30</sup> A nwete ge Kurnailiyus, a ba nane: «Hare ufadire-aara vatena, vacite nanna yá ankwá á maga maduwa á icavaciya, an zura ba seke una wá, yá

zhárá ba ura á tse á katafke-aaruwa, nangyuwe-aara á maga wulwulire ba seke uwe,

<sup>31</sup> a ba ñane á elvan ge iya: Kaurmailiyus, lyevaalya Dadaamiya maduwa á ña, mela na ká ankwá á melaterwa ka ge talaga-aha na keni viyanaaka.

<sup>32</sup> Kina wá, ebbela emnde á dem Jaupe, a de d'arakanteda Simaun Piye, ankwá am mba á cepen-aara Simaun slekkeda gwagwa, há-aara ankwá áte we á guwa yaikke.

<sup>33</sup> Daaci ba watsewatse ya naba belakvaa emnde á ba am sarte ñanna ge de d'akdaha, ka keni fanka ervaunde, daaci yá slafaká we-aara adaba sawa á ña. Kina wá, bademme á ñere na, ña jamme á katafke á Dadaamiya áhuna ba ge cena názu a fakaara Yaakadada ge enndáhá-aara na.»

### *Waazu á Piye am mba á Kaurmailiyus*

<sup>34</sup> Daaci Piye a eksetaa elva a ba ñane: «Kina wá, diyandiya ganakini ba jirire gergerka emnde áza Dadaamiya.

<sup>35</sup> Emnde bademme, máki ura á njá an lyawa á Dadaamiya, ankwá á maga jirire wá, ma ura a ekse-ara keni á hayánháya Dadaamiya.

<sup>36</sup> Diyakurdiya Dadaamiya a velante elva-aara ge larde á \*Iserayiila, elva ñanna wá, labáre á higa geni emnde tá shánsha hairire an Dadaamiya á kya erva an Yaisu \*Almasihu, ñane Yaakadada á emnde bademme.

<sup>37</sup> Ba kure keni diyakurdiya elva ñanna a fantau am Galili, am sarte na Yuhanna ankwá á balaterá waazu á baptisma ge emnde na; diyakurdiya názu a mágava am huđe á Yahudiya bademme am sarte ñanna.

<sup>38</sup> Ba kure keni diyakurdiya baakire á zlakta á Shedekwe Cudedde na a vanta Dadaamiya ge Yaakadada Yaisu ura Nasarátu, diyakurdiya názu a maganaa Yaisu am larde na, slera á maggwire na a maganaa ñane, a naba mbateraahé emnde na tá an shaitaine, adaba Dadaamiya ankwá antara ñane.

<sup>39</sup> Ñere wá, ña seyde-aha á názena a maganaa ñane am huđe á Yahudiya bademme, antara am Urusaliima na. Ñane maa, ta janaa áte dzangala.

<sup>40</sup> Amá Dadaamiya a tsante am fáya am hare ge keyire. A vante baráma ganakini á marañeránmára ire-aara ge ñere.

<sup>41</sup> A marateraa ire-aara ge emnde bademme-ka, sey ba ge ñere ña emnde na ni a dzerañerse werre Dadaamiya ganakini ña seyde-aha na. Am iga a tsantetse-aara am fáya na wá, ñere zanjeruze, shañerushe antara ñane.

<sup>42</sup> A banerna ba ñane an we-aara ganakini njá ndaterndáhá elva-aara ge emnde bademme, njá maga seydire-aara geni ba ñane edda una a tsanaa Dadaamiya ge mága shairiya á emnde na tá an shifa, antara shairiya á emnde a fáya bademme.

<sup>43</sup> Nabi-aha bademme ndza ta enndáhá elva áte Yaisu, a ba itare: Ma ware una a fetaare áte ñane keni, Dadaamiya á yanárye haypa-aha-aara adaba ñane.»

### *Ma emnde na garevka Yahudiya-aha keni sharánsha Shedekwe Cudedde*

<sup>44</sup> Am sarte na Piye ankwá á maga waazu na wá, tsekwatartsekwa Shedekwe Cudedde ge emnde a cena waazu-aara na bademme.

<sup>45</sup> Yahudiya-aha na ta saa á d'aba Piye, itare fartarefe na, daremda am mága najipu yaikke, geni mbate Dadaamiya á vaterteva Shedekwe Cudedde ge emnde umele keni.

<sup>46</sup> Adaba tá cená ba tá ankwá á ndáhá elva-aha anwaslire, tá ankwá á galá Dadaamiya am yaikkire-aara. Daaci a ba Piye:



<sup>47</sup> «Emnde na keni sharánsha Shedekwe Cudedde ba seke una nà shanaa n̄ere. Kina mu, á piyaterantaa ware ganakini tá magaternaamaga baptisma an yawe?»

<sup>48</sup> Daaci a ba n̄ane, a magarateranmaga baptisma an zhera á Yaisu \*Almasihu. Am iga a una n̄anna maa, itare ta ndáva Piyer, ganakini á haraterveháre cekwaangudí.

## 11

*Piyer an̄kwa á vaterte sera á elva áte Kaurnailiyus ge emnde a fetarfe am Urusaliima*

<sup>1</sup> Cenarácená emnde a bela, antara emnde a fetarfe umele na tá am Yahudiya, ganakini ba emnde a jeba umele keni tá an̄kwa emnde umele lyarvaalya elva á Dadaamiya.

<sup>2</sup> Daaci am sarte na daada Piyer á dem Urusaliima maa, Yahudiya-aha na fartarfe na ta fantau ge hábaza sera á Piyer, a ba itare tá elvan ge n̄ane:

<sup>3</sup> «Ekka ni ka naba dem mba á emnde na ta baaka am shedekwe, ka zu duksa antara itare!»

<sup>4</sup> Daaci Piyer a eksetaa elva, a tsakaterse sera á elva n̄anna bademme an pálpale.

<sup>5</sup> A ba n̄ane á elvan ge itare: «Iya wá, ndza yá am berni á Jaupe. Yá átira mága maduwa wá, ya naba shaa wáháyu. Yá zhárá ba duksa umele yaikke, á tsekwa á sawa am samaya á sezerwa ba herezhzhe. Duksa n̄anna ba seke gwadau, an n̄anja we á namban̄wa-aha-aara ufade kerdé.

<sup>6</sup> Ya fete ice-aaruwa ba yamme ge zhárá názu am huđe-aara wá, an̄kwa dabba-aha á bere, antara dabba-aha á kaamba jeba gergere bademme, názu á hulmba am haha jeba gergere bademme, ira yiye-aha jeba gergere bademme.

<sup>7</sup> Daaci yá cená ba kwárá á biya elva á sawa am samaya: Piyer, tsetse, eksevaksa, icantica, ezza.

<sup>8</sup> Amá ya n̄wanante: A'aa estuweka Yaakadada, adaba ba ser palle keni damka duksa harám, ma lipa keni am mbuwe-aaruwa.

<sup>9</sup> A ba kwárá n̄anna zlađe adaliye á sawa am samaya: Zhareka názu a ganvaa Dadaamiya cudedde seke lipa.

<sup>10</sup> Ser keye an̄kwa á biyánba kwárá n̄anna estuwa. Am iga-aara a naba eptsehe zlađe adaliye ge kazlana n̄anna á dem samaya.

<sup>11</sup> Á ba am sarte n̄anna maa, saremsa zála ufade á sem mba na ya tsekwaam am huđe-aara na, a belateraa zhel emnde a Kaysariya á sezerwa.

<sup>12</sup> A ba Shedekwe á Dadaamiya á elvan ge iya: Ezzlálá antara itare, man̄ka gajawe dekideki. Daaci ya naba tse ya duwa. Egdzar mama-aha a miya na náwa itare ta un̄kwahe na keni, ta naba duhe antara ya á de ba am huđe á há á zhel n̄anna.

<sup>13</sup> A ndan̄erhe sera-aara bademme, geni a tsekwaam malika á Dadaamiya am huđe á há-aara ba ge n̄ane, a ba malika n̄anna, ebbela zála, a de darakantedá Simaun Piyer am Jaupe,

<sup>14</sup> watse á se bakánba n̄ane elva na ni ká lyelye shifa á n̄a an n̄ane, ekka antara huđe á há á n̄a bademme.

<sup>15</sup> Daaci ya naba magateraa waazu. Yá an̄kwa á magaterá waazu wá, a tsekwaam ge Shedekwe Cudedde á setarge itare ba seke una ndza a tsekwamiyar ge miya am zun̄wire na.

<sup>16</sup> Daaci yehanteyeha elva na ndza a ndanaa Yaakadada, a ba n̄ane: Yuhanna wá, a magateraa baptisma ge emnde an yawe, amá kure, tá de magakurá baptisma an Shedekwe Cudedde na.

<sup>17</sup> Daaci estuwa, a vatertaa ba Dadaamiya an ire-aara Shedfekwe Cufedfe, ba seke una ndza a vamite ge miya adaba fetarfire á miya áte Yaakadada Yaisu \*Almasiihu na. Yá dzegwándzegwa piyantaa slera-aara ge Dadaamiya emtu?»

<sup>18</sup> Cenarancena elva nanna, lauktu daralika á hábaza sera á Piyer mazla-aara. Ta fantau ge gálá Dadaamiya, a ba itare: Una wá, ba jirire. A magaternaa ba Dadaamiya pute a maga tuba ge emnde a jeba umele keni, ganakini a sharansha shifa.

### *Emnde a fetarfe na tá am Antakiya*

<sup>19</sup> Am diyakurdiya ba kure keni, ganakini am sarte á ja Aitiyain, ndza anƙwa zladá áte emnde a fetarfe kyarkya á dem ekse-aha gergere, emnde umele-aatare kwaye ta zlalá á dem Finikiya, antara Kiprus, ira Antakiya na wá, itare ta de bálá ba waazu. Amá wá, sey ba ge Yahudiya-aha.

<sup>20</sup> Emnde umele-aatare ge emnde a Kiprus, antara emnde a Siraine, ta naba dem Antakiya. Itare wá, ta de magaterán ge Yahudiya-aha ka palle waazu, antara emnde na garevka Yahudiya-aha keni bademme. Ta de ndaater labáre á higa, elva a Yaakadada Yaisu.

<sup>21</sup> Yaakadada Yaisu maresemáre hákuma-aara am itare. Adaba una nanna, emnde kwakya fartarefe, saremsa á sem sera-aara.

<sup>22</sup> Dámnda labáre-aatare á deza emnde a fetarfe na tá am Urusaliima maa, daaci ta naba bela Barnabas á dem Antakiya nanna.

<sup>23</sup> Duwa-aara, ba nane keni de nanna ganakini Dadaamiya a gaterar barka kwakya ge emnde a fetarfe nanna, higa ge nane keni. A faterem ndzedá am vuwa kwakya geni a njarinja an lya á Dadaamiya, a dzalarka dekiŋeki.

<sup>24</sup> Barnabas nanna wá, ura mággwe, slefetarfe an tsaka ire, an naha an Shedfekwe Cufedfe. Daaci emnde kwakya fartarfe áte Yaakadada.

<sup>25</sup> Am iga a una nanna maa, Barnabas a sem Tarsus ge tataya Sawulu.

<sup>26</sup> Am sarte na shansha, ta saa ba kerde á sem Antakiya. Ta se magaa sakanderi átirpalle, ta kwaraterse duksa kwakya ge emnde a fetarfe. Ta fantau á ba am Antakiya nanna zunŋwe ge dáhá emnde a fetarfe an emnde á \*Almasiihu.

<sup>27</sup> Tá anƙwa nabi-aha umele ta tsete am Urusaliima, ta dem Antakiya am sarte nanna,

<sup>28</sup> a balese ge palle á nabi-aha nanna an hákuma á Shedfekwe Cufedfe, zhera-aara Agabus, a tsetehe, a tsaáhe am dagave á emnde, a ba nane: Anƙwa á sawa waya yaikke á sete duniya bademme. (Ba jirire ndza samsa waya nanna am zamáne á sleksu Kalawdiyus.)

<sup>29</sup> Daaci ta naba ngudáa sawari-aatare emnde a fetarfe, ganakini ma ware keni a faafa názu a dzegwanaa nane, tá de melateru ge emnde a fetarfe na tá am Yahudiya an nane.

<sup>30</sup> Ta naba jemaa sadake nanna, ta belaa tara Barnabas tá antara Sawulu an nane ádeza male-aha á emnde a fetarfe am Yahudiya.

## 12

### *\*Hirudus a ja Yakuba, a belem Piyer am dangay*

<sup>1</sup> Am sarte nanna, fantaufe sleksu \*Hirudus ge shateru zladá ge emnde a fetarfe umele.

<sup>2</sup> A ba nane: A jareja Yakuba egdza emmenjara ge Yuhanna an katsakar, ta naba jehe.

<sup>3</sup> Nanna hayaránháyá Yahudiya-aha maa, a naba eksevaa Piyer keni, am hare-aha á munri á depainj na baaka shahi á makala am huđe-aara na, a de zlenma am dangay.

<sup>4</sup> Am sarte na eksevaksa na wá, a puwaa sawji-aha kelaawa ju unkwahé, ta tegese sawji-aha nanna gergere ufadé ge ufufa-aara. Ate \*Hirudus wá, ma andze á dáná á dem shairiya á katafke á zlamaha má zlauzla munri á \*Paska nanna bademme.

<sup>5</sup> Daaci ba njá á Piyer am dangay na, amá baaka puwansepuwe á emnde a fetarfe defikdefiki ge mága maduwa adaba nane.

### *Malika a sanse Piyer am dangay*

<sup>6</sup> Lauktu á semsa hare na a tsanaa \*Hirudus na wá, á ba an vayiya nanna Piyer á pá ba hare-aara am dágave á sawji-aha buwa, erva-aara palle an ngudá áte sawji na, erva palle keni an ngudá áte una an kaderci bademme. Sawji-aha na tá ufa we á bere á dangay nanna keni tá ankwá bademme.

<sup>7</sup> A naba semhe ge malika á Yaakadada, hyemhya parakkire á Dadaamiya am huđe á dangay nanna bademme. Daaci malika na a de gejante Piyer, a tsante am hare: «Ettse ba watsewatse!» a ba nane á elvan ge nane. A palehe ge tsavaytsavaye áte erva-aha-aara ba estuwa, a puwehe á dem haha bademme.

<sup>8</sup> A ba malika na á elvan ge nane: «Halantehála náza ngudá huđe á na, ngudesengudé huđe, puwempuwa kimake á na am sera.» A naba maganaahe una nanna Piyer. A ba nane á elvan ge nane: «Tsekwemtsekwa am kazlaja á na, sawa mi zlala.»

<sup>9</sup> A tsetehe ge Piyer ba estuwa, ankwá á daba malika na, amá njanteka nane áte jirire názena ankwá á maganá malika na, nane a kurken á ba am wáháyu.

<sup>10</sup> Daaci ba tá sawa, tá sawa, ta yesaa tate á njá á sawji-aha palle, ta yesaa una ge buwire, saremsa áte wákyiya yaikke na an maga an íre miyenne, má sakesse am una nanna ká de ba am huđe á berni na. Saremsa áte wákyiya nanna, a wertaa ba nane an ire-aara, ta naba sesehe á segáshe. Ta zlalete ba cekwaangudí áte barama á dem huđe á berni wá, a medehe ge malika na, a yaa Piyer ba nane palle.

<sup>11</sup> Piyer á nanna mazla-aara názena a maganaa malika, a ba nane: «Kina wá, diyandiya kwa, mbate Yaakadada a bela malika, a se nezlise am hákuma á \*Hirudus, antara lámare na ta yekivaa Yahudiya-aha na bademme.»

<sup>12</sup> Am sarte na shushe Piyer yawe am mága nanna bademme maa, a naba dem mba á Maari emmarge Yuhanna, Markus keni ba zhera-aara, a de beraa emnde kwakya tá ankwá nala Dadaamiya.

<sup>13</sup> Daaci ankwá á já we á bere Piyer am mba á Maari, a sawa gyaale umele zhera-aara Raude, a se cena labare wá,

<sup>14</sup> á cena ba kwará á Piyer. Higetehiga Raude, kelaa ma á werá we á bere nanna wá, nane a eptsaa á dem huđe á bere zlahe adaliye ge ndahater ge emnde umele ganakini ankwá Piyer á tsá ágáshe.

<sup>15</sup> A ba itare tá elvan ge nane: «Ká an shaitaine emtu Raude?» A ba nane á elvan ge itare: «Yá ndaakur ba jirire una fideka.» A ba itare, má estuwa wá, una ba shedekwe-aara.

<sup>16</sup> Amá Piyer yánka já we á bere na. Mázla-aara ta se werante, tá zhára ba irice á Piyer á tse, tá maga ba najipu-aara.

<sup>17</sup> A magateraa nalaama an erva ganakini a ndarka elva. A ndaterhe názena a maganaa Yaakadada ge sanse am danɗay na, a ba ɗane á elvan ge itare: «Mbedawaterumbede ge tara Yakuba, antara egdzar mama-aha a miya umele.» Daaci ba segáshe-aara, a zlalehe á dem tate umele.

<sup>18</sup> Weraawera ekse wá, ba palle a názu tá ndaaná sawji-aha na ta ufaa Piyer na baaka. Názu tá ndaaná itare, ba Piyer na mu a magáná estara?

<sup>19</sup> A ba sleksu \*Hirudus sey a tatayartátaya. Amá sharánká Piyer ɗekideki. A dateraa ndáva-aha ge sawji-aha na, am iga-aara, a ba ɗane, má ba estuwa wá, a cebareceba sawji-aha ɗanna am kelaa-aara. Ba a ndaase una ɗanna, mazla-aara ba zlala-aara á dem Kaysariya, a de shekwaahe áhuwa.

#### *Elva áte emtsa á sleksu \*Hirudus*

<sup>20</sup> A ba am sarte-aha ɗanna maa, ndza anɗkwa ervaunɗe á sleksu \*Hirudus áte emnde a ekse á Tirus, antara emnde a ekse á Sidaun baɗemme. Daaci emnde a ekse-aha ɗanna ta magaa sawari geni tá de slapala áza slekse; ta naba tatayevaa Balastus geni á dáterá ɗane á deza slekse ɗanna. Balastus ɗanna ura male. Huɗe á há á slekse ɗanna baɗemme am erva-aara. Daaci duwa-aatare ádeza sleksu Hirudus, ta de tataya hairire am dágave-aatare. Adaba zuze á emnde a ekse-aha ɗanna baɗemme á segáshe á ba am kwárá á slekse ɗanna.

<sup>21</sup> Daaci sleksu Hirudus a fateraa sarte á já ire-aatare. Samsa sarte ɗanna maa, Hirudus a tsekwemaa am zane á sleksire a njemaa am kurshi á sleksire, a fantau ge ndaater elva.

<sup>22</sup> Amá ta naba ɗwete ge emnde baɗemme á ba an ká kwárá á dem zhegela, a ba itare: Dadaamiya una á ndáhá elva na, urimagweka. Ba a cenaa una ɗanna sleksu Hirudus, a naba shafante ire-aara.

<sup>23</sup> Daaci a se zlavanaahe ge malika á Yaakadada á ba am sarte ɗanna an lapikere, adaba a eksetaa sleɗe á Dadaamiya. A zanse huɗe záhe á huɗe, daaci a naba emtsehe.

<sup>24</sup> Amá elva á Dadaamiya wá, hwiyaahwiya baaka zlakta-aara.

<sup>25</sup> Tara Barnabas antara Sawulu magarnaamaga slera na ta faterarfe, ta belaterbela á dem Urusaliima na, ta saa ba kerɗe antara Yuhanna Markus á sem Antakiya.

## 13

#### *Tá an dzera tara Barnabas antara Sawulu ge dem larde umele*

<sup>1</sup> Am aiklasiya á Antakiya wá, tá anɗkwa nabi-aha, antara emnde a kwaraterse elva á Dadaamiya ge emnde. Náwa zhera-aha-aatare: Barnabas, Simaiyaun, Ura Danɗwe keni ba zhera-aara, Lukiyus, ɗane ura Siraine, Manahun, ɗane slenja á sleksu \*Hirudus, ira Sawulu.

<sup>2</sup> Vacite umele tá am sera á Dadaamiya, tá anɗkwa tsufa ndera wá, a ba Shedekwe Cuɗeɗɗe á elvan ge itare: «Tara Barnabas antara Sawulu wá, yawáterya ge ire-aatare ge mága slera na ya ɗaater ge ɗane na.»

<sup>3</sup> Daaci ta tsufete ndera, ta magaterar maduwa, ta puwaterar \*erva a barka, lauktu ta belaterbela á de maga slera ɗanna.

#### *Slera á tara Barnabas antara Sawulu am Kiprus*

<sup>4</sup> Am a dzeratersaa Shedekwe Cuɗeɗɗe tara Barnabas antara Sawulu ge belaterbela, ba zlala-aatare á dem Sailaiwkiya, ta de dema am paare á yawe áhuwa ge dem Kiprus am dágave á yawe.

<sup>5</sup> Ta de tsekwa am Salami am haha ṅanna, daaci ta de fantau ba ge de fála elva á Dadaamiya am \*mashidi-aha á Yahudiya-aha áhuwa. Yuhanna Markus keni antara ba itare, anḵwa á melaterumele.

<sup>6</sup> Ta jem d'ába praatte am haha á Kiprus ṅanna. Herzhe tá degáshe am haha ṅanna, kwaye ta dem Pafaus am halavuwa-aara. Am Pafaus maa, ta de já ba ire antara zhel Yahudiya umele zhera-aara Bar-Yaisu, slemaga namselkwa, a bantsa ṅane: Ya nabi, mbate fida.

<sup>7</sup> Zhel ṅanna ta emnde a njá antara raizhaun á haha á Kiprus, zhera-aara Saigiyus Paulaus slenḵale jipu. Daaci raizhaun a d'ante tara Barnabas antara Sawulu á dezeńara, ad'aba á kátá cená elva á Dadaamiya.

<sup>8</sup> Amá Ailimas, una zhera á slemaga namselkwe na an elva a Yunaniḵkau-aha, ṅane ekserka duwa á tara Barnabas á deza raizhaun na d'ekideki. Á kátá piyantá fetarfire ba d'ekideki ge raizhaun.

<sup>9</sup> Daaci Sawulu, Paul keni ba zhera-aara, an naha an Shedekwe Cudedde, a ṅyainḡyainse ice,

<sup>10</sup> a ba ṅane á elvan ge zhel ṅanna: «Hey! Zhel shaitaine, a ba ka ka yaimyaime, ká maga ba kemaḡgerire, ka kelaade á jirire bad'emmeke? Ká yainya emtu badza slera á Dadaamiya na?

<sup>11</sup> Náwa Dadaamiya á fakar názu á fakarfe, sey ká gevge wulfe emtsaade cekwaanḡuđi, ká shekwaashekwa ká nánka vaciya an ice á ṅa.» Kertenḡ a naba wulfete ge Ailimas, á tatapaná an nađafa antara názlaḡa bad'emme ge tataya ura á tađaná an erva.

<sup>12</sup> Nanna raizhaun una ṅanna, ṅane a naba fetarehe áte Yaakadada, anḵwa á cená názu tá kwaransekwáre, anḵwa á maga najipu-aara.

### *Tara Paul antara Barnabas am Antakiya, haha á Pisidiya*

<sup>13</sup> Tara Paul yaránya Pafaus, darenda am paare á yawe, zlarzlálá á dem Pairge am haha á Pamfliya. A de yateraa áhuwa Yuhanna Markus, ṅane a eptsaa á dem Urusaliima.

<sup>14</sup> Amá tara Paul wá, ta tsete am Pairge ṅanna, kwaye ta zlálá á dem Antakiya am haha á Pisidiya. An vaci puwansepuwe maa, ta duhe á dem \*mashidi á Yahudiya-aha, ta de njanjehe.

<sup>15</sup> Am sarte na ndarsende \*tawraitá, antara wakita á nabi-aha, male-aha á mashidi ṅanna ta belaterve we ge tara Paul, a ba itare tá elvan ge itare: «Máki anḵwa elva kwá ndaater ge emnde ge vaterte ndzedá an ṅane wá, ndaundáhá kina egdzar mama-aha-aaruwa.»

<sup>16</sup> Daaci a naba tsetehe ge Paul, a magateraa nalaama an erva, a fantau ge ndaater elva, a ba ṅane: «Kure emnde a \*Iserayiila, kure emnde na kwá an lyawa á Dadaamiya bad'emme, cenaucena:

<sup>17</sup> Dadaamiya na mí d'abaná miya emnde a \*Iserayiila na wá, ndza a dzeratersaa ba ṅane eggye-aha a miya werre, kwaye a de gelateraa am haha á emnde, am Misera. Am iga á una ṅanna maa, a saterse am Misera ṅanna an hákuma-aara.

<sup>18</sup> Yawe kul ufáde á fá ba ervaunḡe an itare am kaamba.

<sup>19</sup> Daaci a kedaa jeba gergere vuye antara slekse-aha-aatare bad'emme am Kanaana, a vaterte haha ge emnde-aara Iserayiila-aha.

<sup>20</sup> Bad'emme á una ṅanna wá, shekwaashekwa-aara á maga yawe deremke ufáde an kul ilyeḡe. Am iga-aara maa, Dadaamiya a dzerese emnde umele am itare, a gaterve narkali-aha ge kyá shairiya-aatare. A magán ba estuwa dem zamane á nabi Samiyail.



<sup>21</sup> «Am iga-aara maa, itare ta ndavanu slekse ge Dadaamiya, a vaterte Sawulu egdza á Kis. Nane ura jeba á Bainjamain. A magaa iva kul ufafe am sleksire.

<sup>22</sup> Am iga á yawe kul ufafe wá, Dadaamiya yanaaya Sawulu, a vaterte \*Dawuda ge slekse-aatare. Náwa názu a ndaasa Dadaamiya áte sleksu Dawuda: Ya hayanaa á ba an háyá Dawuda egdza á Yaisa, diyandiya geni á de maganaamaga nane názena yá kataná ya bademme.

<sup>23</sup> Kina wá, Dadaamiya a eksese ura am dágave á eggye-aha á Dawuda nanna, a ganve slelyaterlya itare emnde a \*Iserayiila bademme. Ba seke una ni ndza a bateranba ganakini watse á vaterte ura, slelyaterlya na. Ura nanna wá, Yaisu.

<sup>24</sup> Am sarte na zlafe marseka Yaisu ire-aara parakke áza emnde wá, Yuhanna a magateraa waazu ge emnde a Iserayiila, a ndaterndáhá geni a magarmága tuba, tá magateraamaga baptisma.

<sup>25</sup> Am sarte na herzhe watse á emtsa Yuhanna wá, a naba ndavateruhe, a ba nane: Kwa kurken ya ware nane? Iya wá, ya edda una kwá ufaná kure ka. Nane ankwá á sawa. Ba ge slesafanse kimake am sera keni hyanefka ya dekideki.

<sup>26</sup> «Daaci egdzar mama-aha-aaruwa, kure eggye-aha á Ibrahimia, kure emnde na kwá an iyawa á Dadaamiya bademme na, Dadaamiya a belamiyán ba ge miya labare á Iya ura nanna.

<sup>27</sup> Amá cenaránka emnde a Urusaliima antara male-aha-aatare ganakini ba Yaisu una slelya ura, cenaránka názu ta ndahanaa nabi-aha na. Tá ndáhá ba nane tsa ba kelaa vaci puwansepuwe am mashidi-aha-aatare, aley ta eksevaa Yaisu, ta zuhe an shairiya. Éstuwa, ta maganaahe keni ba itare nanna zlafe adaliye elva a nabi-aha nanna.

<sup>28</sup> Sharánka tsa haypa áte nane hyephye ge já shifa-aara, aley a ba itare tá elvan ge sleksu \*Pilaatu: Sey ká ja ba shifa-aara bademme.

<sup>29</sup> Magaraamaga názu ndza ta ndahanaa nabi-aha áte Yaisu wá, ta tsekwanaahe ge emnde umele áte dzangala nanna, ta de hedehe.

<sup>30</sup> Amá a se tsante ge Dadaamiya am fáyá.

<sup>31</sup> Am hare-aha kwakya una Yaisu ankwá á maraterá ire-aara ge emnde na ndza tá njá á ba antara nane na. Ankwá á maraterá ire-aara kwaye á sa am Galili, dem Urusaliima bademme. Ba emnde nanna una ta seyde-aha-aara. Tá ankwá á ndater elva-aara ge emnde a \*Iserayiila.

<sup>32</sup> Ba ntere na keni, na sakuraa ba labare á higa nanna. Na se bakuraa duksa na ni ndza a baterna Dadaamiya ge eggye-aha a miya ganakini watse á vaterteva na.

<sup>33</sup> A vamite ge miya na ma eggye-aha-aatare na duksa nanna. Adaba a tsante Yaisu am fáyá ba seke una ankwá an puwa am jabura buwa na. A ba nane:

Vatena wá, gakevge egdza-aaruwa, Iya keni ya Eddenja.

<sup>34</sup> Ndza a bánba zlafe adaliye Dadaamiya ganakini watse á tsantetse Yaisu am fáyá, á de sevka vuwa-aara dekideki. A ba nane:

Ba jirire, watse yá gakarge barka-aaruwa ba seke una ndza ya banán ge \*Dawuda ganakini watse yá magannaamaga na.

<sup>35</sup> A ba Dawuda zlafe adaliye am wakita-aara:

Ká yánka á sevse vuwa á sleslera á na dekideki.

<sup>36</sup> Nane wá, a maganaa slera ge Dadaamiya am zamane-aara, amá zlauzla ndzedá-aara, emtsamtsa, ta hedaterve ge eggye-aha-nara. Nane wá, sevse.

<sup>37</sup> Amá edda una tsantetsa Dadaamiya am fáyá na wá, nane sevka vuwa-aara dekideki.

38-39 Daaci egdzar mama-aha-aaruwa, shagera ba kwá cena názena njá ankwá ndakurndá na: Dadaamiya á de yakuraarye haypa-aha á kure wá, sey adaba Yaisu. Ma ware keni má fetarfa edda-aara á ba áte njane wá, Dadaamiya á vanteva jirire. Una názu dzegwánka \*tawraitá magaterán ge emnde.

40 Faufa hyema ba shagera geni a gevka názena ta ndahanaa nabi-aha na áte kure.

41 Adaba a ba wakita á Dadaamiya:

Cenaucena kure emnde na kwá ankwá á epsawa elva á Dadaamiya na, dawemda am mága najipu, geni kecfakurkedíre. Adaba yá de maga názena, ma tá palakurá sera-aara keni, kwá de cenánka dfekideki na am zamane á kure.»

42 Tá degáshe am mashidi njanna tara Paul antara Barnabas wá, ta naba ndavaterndáva geni a sarsawa zlafe ádaliye am maka na á de sawa na keni vaci puwansepuwe, geni tá se vaterveva zlafe ádaliye waazu njanna.

43 Am sarte na tá ankwá kya emnde bademme, kwakya Yahudiya-aha, antara emnde a jeba umele na ta dema an de am nadina á Yahudiya-aha na, ta dába tara Paul zlafe ádaliye. Daaci tara Paul tá an Barnabas ta vaterveva sera á elva-aha kwakya, ta faterem ndzedá am vuwa kwakya geni a gazlarka dfekideki, a tsaraatse á ba áte njurna na ni a magaternaa Yaakadada.

44 Samsa vaci puwansepuwe, saremsa emnde ba kwakya ba seke jarauka am bere dfekideki, bademme ta se cena ba waazu.

45 Ba ta naa dikele á emnde na Yahudiya-aha wá, ta naba fantau ge shelha am ervaunđe-aatare áte emnde njanna. Daaci ba elva na ankwá á ndahaná Paul na keni, ta maganaa gajawe, ta zlazlese antara ba ire-aara.

46 Tara Paul antara Barnabas ta naba sherse ice, a ba itare tá elvan ge itare: «Zlaya geni njá sakurán ge kure emtsaade zunjwe elva á Dadaamiya, amá kwa yanaa ba kure tsawe wá, njere zlalajerzlala á deza emnde a jeba umele. Emtu mándzawe ázekure Dadaamiya ankwá á vakurte shifa anjwaslire na emtu?

47 Cenaucena názu á ndahaná wakita á Dadaamiya; a fanjeraara Yaakadada:

Ya fak geni ká maraterá parakkire-aaruwa ge larde-aha á duniya bademme, ká daterná ka elva a lya shifa, ma ge emnde na tá áme keni bademme.»

48 Ba ta cenaa una njanna emnde na ta Yahudiya-aha ka na wá, higa ge itare. Ta fantau ge gálá Yaakadada adaba elva-aara. Daaci bademme á emnde na ndza tá an dzera áza Dadaamiya ge sha shifa anjwaslire na, garevge emnde a fetarfe.

49 Daaci a hyemaa estuwa elva á Dadaamiya am larde njanna.

50 Amá duwa á Yahudiya-aha wá, ta de tsante ervaunđe á male-aha á berni njanna, antara njwasha njangaha na daremda am nadina á Yahudiya-aha na bademme áte tara Paul antara Barnabas, ta shateru zladá kwakya, ta naba bakaterse am kwara-aatare.

51 Daaci ta naba papaterahe berbere á haha-aatare áte sera-aha-aatare, ta yateraa áte uksuwe, ta naba zlala-aatare á dem Ikauniya.

52 Amá emnde a fetarfe na tá am Antakiya njanna wá, baaka lámbe-aatare, tá an naha an Shedekwe Cufedde, higa-aatare ba kela-aara.

## 14

*Tara Paul antara Barnabas am Ikauniya*

<sup>1</sup> Am sarte na daraada tara Paul antara Barnabas am Ikauniya, áhuwa keni duksa a de magava ba kalkale antara una ta maganaa am Antakiya. Duwa-aatare á dem \*mashidi á Yahudiya-aha, ta de magaa waazu, Yahudiya-aha antara emnde na garevka Yahudiya-aha emnde kwakya fartarfe.

<sup>2</sup> Amá duwa á Yahudiya-aha na fartareka na wá, ta naba tsante ervaunđe á emnde umele na itare keni zlađe fartareka na, geni a darateránda dágala ge tara Paul.

<sup>3</sup> Amá keni hararaaháre jipu am Ikauniya ɲanna, ta kwaraterse elva a Yaakadada á ba an dzaɲɲaɲire ge emnde. Yaakadada keni a vaterte hákuma, ta magaa nalaama-aha, antara najipu-aha gergere kwakya. A maraterse an una ɲanna geni elva na tá aɲkwa á kwaratersá itare ge emnde áte ɲgurna-aara na wá, jirire baɲemme.

<sup>4</sup> Daaci emnde a ekse tegarsetege gergere buwa. Emnde umele tá am dalbe á Yahudiya-aha, emnde umele keni tá am dalbe á emnde a bela.

<sup>5</sup> Daaci Yahudiya-aha, antara male-aha-aatare, ira emnde na garevka Yahudiya-aha, baɲemme ta magaa niya-aatare ge ceɓa emnde buwa na ba ɲekideki an nákwá.

<sup>6</sup> Ba cenaráncena una ɲanna, mazla-aara zhagade ge itare á dem Listira, antara Dairbe, ekse-aha ɲanna am haha á Likauniya, antara ekse-aha umele na am kwara ɲanna baɲemme.

<sup>7</sup> Ta de fantau ge ɓálá labáre á higa, elva a Yaisu \*Almasiihu áhuwa.

*Tara Paul antara Barnabas am Listira, antara Dairbe*

<sup>8</sup> Am Listira maa, ndza aɲkwa ura ɲguryekwe wá, á njá á ba am haha, áɲaba an mátsá sera-aha-aara baɲemme. Ta yese ba estuwa, tsamka am zhegela ɲekideki ge zlala, aɲaba ta yáná an mátsá ubiya ba estuwa.

<sup>9</sup> Vacite umele maa, zhel ɲanna aɲkwa cena waazu á Paul. Slebela ɲanna a zharaa zhel ɲanna wá, a naba diyeddiye ganakini aɲkwa fetarfe á zhel ɲanna ge sha ire-aara.

<sup>10</sup> Daaci a kante kwara-aara á dem zhegela slebela: «Tsetse, tsatse am zhegela,» a ba ɲane á elvan ge ɲane. Hattse a naba tsete ge zhel ɲanna, aɲkwa á zlala.

<sup>11</sup> Naranna dikele á emnde na najipu ɲanna, ta naba fu hula á ba an ndzeɲa, a ba itare an elva a ekse ɲanna, amaana elva a Likauniya: Dadaamiya-aha nyairevnye emnde, náwa itare saremsa ásezeɲere!

<sup>12</sup> Barnabas ta ɲanaa an dadaamiya-aatare Jaiwus, Paul ɲane ta ɲahanaa an dadaamiya-aatare \*Hairmais aɲaba ɲane edda á ndáhá elva.

<sup>13</sup> Hele-aatare ɲanna tá ɲahaná an Jaiwus na wá, ta nderanaa bere áte iga a ekse. Male á hele ɲanna tá ɲahaná an Jaiwus na, a naba saa dalau-aha tá an caɲa an ugbene-aha jili gergere, daaci a se tsateraahe áte we á bere á hele ɲanna. Male á hele, antara emnde baɲemme wayarwáyá tá cebaterá dalau-aha an caɲa na ge tara Paul antara Barnabas.

<sup>14</sup> De cenaráncena una ɲanna emnde a bela na, ta naba dzadzaa zane áte vuwa-aatare, ta duhe á dem dágave-aatare á ba an zhagade, ta kante kwara, a ba itare tá elvan ge itare:

<sup>15</sup> «Ŋa baa ba kure dawalaa na: Kwá magán ge uwe jeba una? Ábi ɲere ɲa emndimagwaha ba seke kure. ɲere ɲa sakuraa labáre á higa geni kwa yánya hele-aha ɲanna, aɲaba ɓaaka nampire-aara. Lyauvalya elva á Dadaamiya á jirire na á fá shifa am ura na. ɲane wá, a nderanaa ɲane samaya, antara haha, antara yawe-aha baɲemme, ira názu am huɲe á duksa-aha ɲanna baɲemme.

<sup>16</sup> Werre wá, Dadaamiya a yaa emnde bademme, ma emnde-ara keni ndza tá daba ba unṅule-aatare.

<sup>17</sup> Ba werre ṅanna keni wá, Dadaamiya ndza anṅkwa á maraterse ire-aara ge emnde an slera á maggwire na anṅkwa á maganá ṅane. Anṅkwa á hyakurá yawe á sá am samaya, á vakurte slak-slakire geni kwá sanaasa duksa-aha á kure an sarte-aara, anṅkwa á zakuru náza za, á vakurte higa am ervaunḡe, bademme ba Dadaamiya.»

<sup>18</sup> Waazu ṅanna bademme demda tsa am hyema-aatare, aley ta piyater-ante ba zlahhe ge kyula emnde a bela na.

<sup>19</sup> Am iga-aara maa, ta sem ge Yahudiya-aha á sa am Antakiya am haha á Pisidiya, antara á sa am ekse á Ikauniya, ta se tsanta itare ervaunḡe á emnde bademme áte Paul. Daaci emnde bademme ta naba gwarhe ge Paul ge dzaganá an nákwá, ta tedese á dem iga a ekse, ta kurken emtsamta.

<sup>20</sup> Amá de jarammejáhá emnde a fetarfe arge ṅane wá, a naba tsetehe, ta dema am huḡe á ekse antara ba ṅane. Makuralla-aara ta naba zlala-aatare antara Barnabas á dem Dairbe.

### *Tara Paul antara Barnabas eptsareptsá á sem Antakiya am Pisidiya*

<sup>21</sup> Tara Paul antara Barnabas magarnaamaga waazu á labáre á higa, elva a Yaisu am ekse á Dairbe, emnde kwakya fartarfe. Am iga-aara maa, ta eptsehe á sem ekse á Listira, antara Ikauniya, lauktu saraasa á sem Antakiya am Pisidiya.

<sup>22</sup> Ta se faterem ndzedá am vuwa kwakya ge emnde a fetarfe am ekse-aha ṅanna. A ba itare tá elvan ge emnde a fetarfe: Sey mi bashubáshe zladá-aha kwakya emtsaade, lauktu mi demda á dem zlanna á Dadaamiya.

<sup>23</sup> Bademme a ekse na ta dema itare, ta de shaa emnde a fetarfe, lauktu tá zlalá wá, tá dzeraterá emnde a sawari á ba am dágave-aatare ṅanna, tá tsufa ndera, tá magaterar maduwa ge emnde ṅanna, daaci tá yaterya am erva a Yaakadada na ta fetaara itare áte ṅane na, itare tá zlalá-aatare.

<sup>24</sup> Ta degashe praatte am haha á Pisidiya, tá magán ba estuwa, daraada á dem haha á Pamfliya.

<sup>25</sup> Ta de ndaterhe elva á Dadaamiya ge emnde am ekse á Pairge, daaci kwaye ta zlala á dem Ataliya.

<sup>26</sup> Tsante áhuwa wá, ta zlalá an paare á yawe á dem Antakiya. Ekse ṅanna wá, ekse na ndza ta yateraa am erva a Yaakadada, geni á magaterá ṅurna á mága slera na a fateraara ṅane na. Slera ṅanna una magarnaamaga, saraasa na.

<sup>27</sup> Saraasa am Antakiya maa, ta se jemaa emnde a fetarfe, ta ndaterhe názena a maganaa Dadaamiya an itare bademme, antara baráma na a weratertaa Dadaamiya ge emnde a jeba umele, ganakini itare keni a fartarfe áte Yaisu.

<sup>28</sup> Njarinja áhuwa ṅanna, hararaaháre jipu áza emnde a fetarfe.

## 15

### *Jáháva yaikke am Urusaliima*

<sup>1</sup> Ta duhe ge emnde umele á da am Yahudiya ta dem Antakiya, ta de kwaraterse elva na ge emnde a fetarfe na tá áhuwa. A ba itare tá elvan ge itare: «Máki dakuremka am shedekwe áte una a ndaanaa \*tawraitá a Muusa wá, kure kwá taa enṅleska ḡekideki.»

<sup>2</sup> Amá eksararka tara Paul antara Barnabas tsáha ṅanna ḡekideki. Daaci njaanja gajawe yaikke am dágave-aatare arge elva ṅanna. Am iga-aara maa, itare bademme ta dema am sawari palle, geni a darduwa tara Paul

antara Barnabas, ira emnde umele á dem Urusaliima a de ndarndáhá elva nanna antara emnde a bela, ira emnde a sawari á aiklaisiya áhuwa.

<sup>3</sup> Daaci ta belateraa estuwa emnde a fetarfe. Am shula-aatare maa, ta kyaa ba huđe á Finikiya, antara huđe á \*Samariya praatte, tá ankwá á ndaater ge emnde a fetarfe átira zlala, geni emnde a jeba umele keni fartarfe áte Dadaamiya. Una nanna a vaterte higa ge emnde a fetarfe bademme.

<sup>4</sup> Daraada am Urusaliima, lyaratervaalya emnde a bela, antara emnde a sawari á aiklaisiya, ira emnde a fetarfe bademme. Daaci tara Paul ta fantau ge ndaater názu a maganaa Dadaamiya an itare bademme.

<sup>5</sup> Amá ta tsetehe ge Yahudiya-aha umele, ta emnde á \*Farisa-aha, fartarfe tsa, amá a ba itare: Emnde a fetarfe na garevka Yahudiya-aha na wá, sey tá puwaterpuwa bademme á dem shedekwe, tá ndaaterndáhá sey tá daba \*tawraitá a Muusa.

<sup>6</sup> Jarammeja emnde a bela, antara emnde a sawari á aiklaisiya, itare ta njar ge ndáhá elva nanna zlađe adaliye.

<sup>7</sup> Shekwaraashekwa arge elva nanna, am iga-aara a tsete ge Piyer, a ba nane á elvan ge itare: «Ya baa ba kure egdzar mama-aha-aaruwa: Ba kure keni diyakurdiya ganakini Dadaamiya a eksise vateneka ge daterá labára á higa ge emnde a jeba umele, geni itare keni a cenarvaacena, a fartarfe.

<sup>8</sup> Am Dadaamiya nane diyaadiya ervaunđe á emnde, a naba vaterte Shedekwe Cudedđe ba seke una a vamite ge miya na wá, ba ganakini lyatervaalyire.

<sup>9</sup> Nane magaaka gergerire dekideki am dágave á miya antara itare, a baraterse ervaunđe adaba fartarfe.

<sup>10</sup> Labára kure kwá faterar gwatame á \*tawraitá na kwaye am eggye-aha a miya, sem zamane á miya keni, ba palle á ura a dzegwándzegwa baaka na? Kwá tataya názu am huđe á Dadaamiya emtu?

<sup>11</sup> Ba miya keni am salikataliya na wá, famitarfe áte Yaakadada Yaisu, geni a lyamisaa á ba adaba ngurna-aara ba seke itare.»

<sup>12</sup> Emnde am jáháva bademme daruđe tseriiye, ta cená ba tara Paul antara Barnabas mazla-aara, tá ndaater nalaama-aha, antara najipu-aha na a maganaa Dadaamiya á kya erva an itare am dágave á emnde a jeba umele.

<sup>13</sup> Zlarnaazle itare elva-aatare bademme, a eksante elva Yakuba, a ba nane á elvan ge emnde: «Cenaucena egdzar mama-aha-aaruwa:

<sup>14</sup> Náwa mi cenáncena a ndaamindáhá Simaun bademme, ganakini Dadaamiya ankwá á fateru hyema ge emnde na garevka Yahudiya-aha kwaye am fantaufe á fetarfire, a dzeresaa ba nane emnde na, geni tá de gev emnde-aara.

<sup>15</sup> Elva nanna wá, tá zláláva antara elva-aha na ndza ta ndaanaa nabi-aha na. Adaba a ba wakita á Dadaamiya:

<sup>16</sup> Am iga á una nanna wá, watse yá sawa, a ba Yaakadada. Yá se tsatsanaatsatse lákwá á há á \*Dawuda na bademme. Ma haraare badza-aara keni, yá se tsatsanaatsatse bademme,

<sup>17</sup> lauktu emnde umele tá de shantaushe ge tate á Yaakadada, ba estuwa ge emnde a larde-aha umele na a dattersaa nane am duniya bademme.

<sup>18</sup> Kwaya nane názu a ndaanaa Yaakadada, edda una a sansaa nane vateneka duksa-aha nanna.»

<sup>19</sup> Daaci a eksante elva-aara adaliye Yakuba, a ba nane: «Áte ya wá, magaumika názena ni watse á vaterte shunŋula ge emnde a jeba umele na ta sem sera á Dadaamiya.



<sup>20</sup> Amá mi puwatertepuwa nalmesheri, mi ndaaterndáhá a zarka hyuwa na ta icanante ge hele, una ñanna harám; a magarka gwardzire, a zarka uzhe, antara ma hyuwa-ara keni má icaaka.

<sup>21</sup> Adaba kwaye am zamane-aha na dedde na emnde tá anjwa á bálá waazu am \*tawraitá a Muusa am ekse-aha gergere, tá anjwa enndáhá ba kelaa vaci puwansepuwe.»

*Nalmesheri na ta belanaa aiklaisiya-aha á Urusaliima á dem Antakiya*

<sup>22</sup> Am iga á una ñanna maa, emnde a bela, antara emnde a sawari á aiklaisiya, ira emnde a fetarfe bademme, njarantenja ganakini tá dzeresdzere emnde am dágave-aatare, tá jatermaare antara tara Paul tá an Barnabas, tá belaterá á dem Antakiya. Daaci ta dzerese tara Yahuda Barsabas antara Silas. Bukerde-aatare ta ba emnde na tá an dárádza áza emnde a fetarfe bademme.

<sup>23</sup> Daaci ta puwete nalmesheri na, ta belaterbela an ñane. A ba itare am nalmesheri ñanna:

«Wakita na ña puwetaa ba ñere emnde a bela, antara emnde a sawari á aiklaisiya, ña egdzar mama-aha a kure, ñá anjwa á gaktur use á ñere ge kure emnde a fetarfe na kwá am Antakiya, am Siriya, antara am Silikiya.

<sup>24</sup> Cenaneráncena ganakini de sharakursha emnde á ñere umele, ta de fakurma am dzámá ire, antara shunñula an elva-aha-aatare, amá ñere wá, baaka we á ñere am hude-aara ta duwa ba itare.

<sup>25</sup> Adaba una ñanna, náwa ña dzerese emnde na ña diyatersaa ñere áte ye á ñere palle, tá anjwa duwa antara tara Paul tá an Barnabas ádeze kure.

<sup>26</sup> Ba tara Paul antara Barnabas na ta yá shifa-aatare bademme ge mága slera á Yaakadada Yaisu \*Almasiihu na.

<sup>27</sup> Kwaye ñá belá tara Yahuda antara Silas ádeze kure, tá de palakurnaapálá itare názena ña puwetaa am nalmesheri á ñere, we-aatare una, we á kure keni una.

<sup>28</sup> Namaari á Shedekwe Cudedde, antara ñere wá, njanerantenja ganakini ñá fakurarka duksa umele, hyaahya ba una náwa ñane na; adaba degdega ba ñane:

<sup>29</sup> Kure wá, zauka hyuwa na má ta icante ge mága hele, zauka uzhe, zauka hyuwa na má icaranteka an ica na, magauka gwardzire keni. Má tsufakurtetsufa ire á kure am una-aha ñanna wá, magakurnaamaga duksa shagera. Á jámimá shifa!»

<sup>30</sup> Daaci ta vaterte nalmesheri na ge emnde na ta dzeratersaa itare na, ta faterte áte baráma á Antakiya. Daraada áhuwa maa, ta de jemaa emnde a fetarfe bademme, ta vaterte nalmesheri ñanna.

<sup>31</sup> Am sarte na ndarsendáhe nalmesheri ñanna, elva ñanna zlavanaa-zlava ervaunđe-aatare, a faterem ndzedá kwakya am vuwa.

<sup>32</sup> Tara Yahuda antara Silas ta kwaraterse elva kwakya, adaba itare an ire-aatare keni ta nabi-aha. Farateremfa ndzedá, antara midalire kwakya am vuwa.

<sup>33</sup> Daaci hararaare cekwa áhuwa. Am sarte na tá sa maa, ta puwatesehe ge egdzar mama-aha-aatare emnde a fetarfe, ta yekateru mága shula an hairire áseza emnde na ta belaterbela na. ((

<sup>34</sup> Amá á njá áhuwa á ba Silas.))

<sup>35</sup> Tara Paul antara Barnabas wá, hararaare am Antakiya ñanna. Itare antara emnde umele ta ba kwakya ta kwaraterse elva a Yaakadada ge emnde, ta magaa waazu baaka zlake-aara.

### *Tegava á tara Paul antara Barnabas*

<sup>36</sup> Haraare cekwaangudi wá, a ba Paul á elvan ge Barnabas: «Ept-samiptsa á dem eksa-aha na mi balese elva á Yaakadada am huđe-aara na, mí de zhára egdzar mama-aha a miya ma ta estara keni.»

<sup>37</sup> Ane, a ba Barnabas, amá ñane wá, á kátá á d'abaterd'ába Yuhanna Markus keni.

<sup>38</sup> Una ñanna eksaaka ire á Paul, adaba ndza yaterya dawale ñanna am Pamfiliya, zланаaka slera ñanna antara itare.

<sup>39</sup> Daaci jammeka elva-aatare. Adaba una ñanna ta naba tegava áhuwa. Barnabas a eksante Markus ñanna antara ñane, ta dema am paare á yawe, kwaye ta zlala á dem Kiprus.

<sup>40</sup> Paul wá, ñane a eksese Silas. Emnde a fetarfe ta yateraa am erva á Yaakadada an maduwa, ganakini á magaternaamaga ñgurna ge mága slera-aara, lauktu ta zlala.

<sup>41</sup> Itare keni ta de kyá huđe á Siriya, antara huđe á Silikiya praatte, ta de faterem ndzedá am vuwa ge emnde a fetarfe áhuwa.

## 16

### *Tara Paul ta eksetaa Timaute ge ja d'aba kerde*

<sup>1</sup> Daaci daraada tara Paul am Dairbe, antara am Listira, ta de bera ura fetarfe umele áhuwa, zhera-aara Timaute, emmenjara mukse Yahudiya slefetarfe. Amá eddenjara wá, ura Yunaniñkau.

<sup>2</sup> Bademme á emnde a fetarfe na tá am Listira, antara Ikauniya, tá zleba ba ñane.

<sup>3</sup> Paul á kátá eksante Timaute ñanna am dágave-aatare tá ja d'aba kerde. Daaci a eksante, amá a belema am shedekwe emtsaade, adaba ice á Yahudiya-aha. Adaba Yahudiya-aha na tá am ekse-aha ñanna bademme diyardiya ganakini Timaute egdza a zhel Yunaniñkau.

<sup>4</sup> Daaci bademme a ekse na má ta demá itare, tá ankwá á ndaater elva na ta tsanaa emnde a bela, antara emnde a sawari á aiklasiya á Urusaliima na, ganakini itare keni a magarmága fesarfire áte elva ñanna.

<sup>5</sup> Adaba una ñanna, emnde a fetarfe bademme sharánsha ndzedá, ma emnde na tá áme keni ba kelaazare tá far ba sága.

### *Paul shansha wahayu am Terauwas*

<sup>6</sup> Am iga a una ñanna maa, tara Paul tá kátá de bálá elva á Dadaamiya am haha á Aziya wá, a naba piyaterfe ge Shedekwe Cudedde. Adaba una ñanna, kwaye ta cikante á dem Firigiya, antara Galatiya.

<sup>7</sup> Tsante áhuwa, tá kátá dem haha á Bitiniya. Ba daraada átevgé Miziya wá, dawmbarka á ba Shedekwe á Yaisu.

<sup>8</sup> Daaci ta desa am Miziya ñanna praatte, kwaye ta dem Terauwas áte we á háye yaikke.

<sup>9</sup> An vayiya wá, shansha wáháyu Paul. Á zhára ba zhel Makiduniya á tse, a ba zhel ñanna á elvan ge ñane: Tásle á ña sawa ásehuna, sawa melanerumele am Makiduniya.

<sup>10</sup> Am iga a wáháyu ñanna wá, ña magaa niya ba watsewatse ge dem Makiduniya ñanna, adaba diyañerdiya ganakini ba jirire á d'aháñerá ba Dadaamiya ge daterá labáre á higa ge emnde na tá am haha ñanna.

### *Lidiya fetarfe áte Yaakadada am Filipi*

<sup>11</sup> Daaci ba tse á ñere am Terauwás, ña demá am paare, kwaye ña de tsekwa am haha á Samautaras am dágave á haye. Makuralla-aara ña tsetehe, ña de tsekwa am ekse á Niyapauli.

<sup>12</sup> Tsante áhuwa wá, ña de tsekwa á ba am Filipi, berni am dalbe á zunñwire am haha á Makiduniya. Una ñanna berni na tá kwaraná emnde a Rauma kwakya-aara am haha á Makiduniya bademme. Harañeraaháre jipu am ekse ñanna.

<sup>13</sup> An vaci puwansepuwe maa, ba zláá á ñere á dete iga a ekse, á dete we á guwa. Adaba ñá an tama ganakini watse ñá de shá tate na tá maga maduwa Yahudiya-aha átekwa. Ba jirire wá, ña de bera jarammeje ñwasha-aha-aatare. Ña njehe ázetare, daaci ña vaterte egdza elva.

<sup>14</sup> Ankwa palle á ñwasha ñanna zhara-aara Lidiya, mukse ñanna á tsakala baukta kyanñe zlazláda gane-aara, kwaye a sawa á sá am Tiyatira. Ñane demda am nadina á Yahudiya-aha. Daaci a fantau ge cena elva na ankwa á ndaná Paul na, Yaakadada a vante enkale geni a cenvaacena ba shagera, a lyevaalya.

<sup>15</sup> Am iga-aara maa, ta maganaa baptisma, ñane antara emnde na tá am huđe á há-aatare bademme. Daaci a ñañerte á dem mbá-aara, a ba ñane: «Máki ba jirire ganevge slefetare áte Yaakadada am ice á kure wá, sawmbare á se mbá-aaruwa.» A fañerarhe ganakini sey ñá daada á dem mba-aara.

### *Tara Paul antara Silas tá am dangay*

<sup>16</sup> Vacite umele ñá áte baráma a dem tate á ñála Dadaamiya wá, ña naba ja ire antara mukse kwatena, an jini am ñane, amá jini-aara ñanna ankwa á baná názena watse á magava á katafke na. Daaci mukse ñanna ankwa á saterá nalmane kwakya ge dada-aha-aara.

<sup>17</sup> A ñañermá am iga mukse ñanna wá, á ñabañerá an hula, á baterán ge emnde, a ba ñane: «Náwa emnde na wá, ta emnde a slera á Dadaamiya na Slekse ba ñane palle na, ta se fákuraa áte baráma na watse kwá lyelya shifa á kure átekwa na.»

<sup>18</sup> Ma háre wanyara keni á magán ba estuwa. Vacite umele naatenáha am ervaunđe á Paul, a eptsavte á deza mukse ñanna, a ba ñane á elvan ge jini na am ñane na: «Yá ndaaka an zhara á Yaisu \*Almasiihu, dedde am mukse na!» Kertenj a naba desehe ge jini na am mukse na.

<sup>19</sup> Naránna dada-aha á kwatena ñanna ganakini tá shánka duksa áte ñane mazla-aara wá, ta naba ebzaterar ge tara Paul antara Silas á ba am dágave á nalga á emnde, ta tadaterá á deza male-aha á duniya.

<sup>20</sup> Emnde a hákuma ñanna wá, ta emnde a Rauma. Ta daterhe á dezetare, a ba itare tá elvan ge itare: «Náwa emnde na itare ta Yahudiya-aha, tá se weshamiya ekse ge miya.

<sup>21</sup> Tá se kwarañerse mága duksa na a piyetaa shairiya á miya emnde a Rauma. Ná dzegwánka ñere dába náde-aatare ge itare.»

<sup>22</sup> Bademme a nalga na ta gwaterar ba ge tara Paul antara Silas. Male-aha á duniya ta dzadzaa zane áte vuwa-aatare. Ta bántsa itare: A zarateruze an ja ba shagera.

<sup>23</sup> Zarateruze an ja, ta daterhe á dem bere á dangay, a ba itare tá elvan ge sle-ufa dangay-aha: Ngwadateraangwada ba shagera.

<sup>24</sup> Ba a cenaa una ñanna sle-ufa dangay, a daterhe á ba á dem huđe-aara am dangay ñanna, a de puwaterem sera am degelambuni.

<sup>25</sup> Á maga huđe á vayiya wá, tara Paul, antara Silas tá anƙwa á maga maduwa, tá bela láhe, tá gálá Dadaamiya. Dangay-aha-aatare tá anƙwa á eccena.

<sup>26</sup> Cekwaangudí wá, njaanja gejava á haha yaikke, antara ba ekte á bere á dangay gajaptegeja ba njanjare. Kerten an wára bere á dangay bademme, tsavaytsavaye na áte erva á dangay-aha palaapala bademme.

<sup>27</sup> Ba tsetse á sle-ufa dangay-aha na am háre wá, á zhára ba we á bere-aha á dangay an wára bademme. Nane a kurken baaka zhagadarzhagade dangay-aha. A naba tedese masalam-aara am bere, á kátá já ire-aara.

<sup>28</sup> Amá a kante kwára an ndzedá-aara bademme Paul, a ba nane á elvan ge nane: «Jeka ira á na ba dey, nje nja anƙwa bademme.»

<sup>29</sup> Daaci sle-ufa dangay-aha nanna anƙwa á tataya kára, zhagade-aara á dem huđe á dangay, a de mbedehe am sera á tara Paul antara Silas, á gyagya vuwa-aara bademme.

<sup>30</sup> Daaci a sanse tara Paul á segáshe, a ba nane á elvan ge itare: «Yá maga uwe kina dawalaa, lauktu yá lyelye shifa-aaruwa?»

<sup>31</sup> Ta nwanante, a ba itare: «Fetarfe áte Yaakadada Yaisu, ká lyelye shifa á na, antara huđe á há á na bademme.»

<sup>32</sup> Ta magateraa waazu elva á Yaakadada, antara emnde na tá am huđe á há-aara bademme.

<sup>33</sup> Á ba an vayiya nanna, sle-ufa dangay-aha nanna a sanse tara Paul á segáshe, a barateraa wige-aha á tate a ja na. Ba watsewate ta naba maganaa baptisma, ta magaternaahe ge emnde na tá am huđe á há-aara keni bademme.

<sup>34</sup> A dálá antara tara Paul á de mba-aara, a de vaterte náza za. Nane, antara emnde-aara bademme tá anƙwa á higa, adaba fartarfe áte Dadaamiya.

<sup>35</sup> Weraawera ekse wá, male-aha á emnde a Rauma ta belaa sawji-aha á deza sle-ufa dangay-aha, geni a yaterya emnde na áwayá na.

<sup>36</sup> Duwa á sle-ufa dangay-aha á deza tara Paul, a ba nane á elvan ge itare: «Náwa male-aha ta belaa emnde geni yá belakuraabelá. Sawesse, zlauzlálá á ba an hairire.»

<sup>37</sup> Amá a ba Paul á elvan ge sawji-aha nanna ta belateraa male-aha na: «Iyau, ta zanjeruhe an ja ba dey áte ice á emnde bademme, nje keni na ba Rauma-aha miyenne wá, daaci ba shairiya á nje keni baaka, tá puwánjerá an ila? Una wá, á taa gevka dekideki. A sarsawa ba itare an ire-aatare, tá se puwanjeraapuwa.»

<sup>38</sup> Daaci sawji-aha na ta de mbedateru elva á tara Paul, antara Silas ge male-aha na. Ba cenarácena ganakini tara Paul keni ta Rauma-aha na wá, gazlaraagazla jipu.

<sup>39</sup> Adaba una nanna, ta tsetehe á ba an sera-aatare, ta duhe ádeza tara Paul, ta de slapala ire-aatare emtsaafé, lauktu ta saterse. A ba itare tá elvan ge itare: «Taslawa á kure, dawedde am ekse á nje.»

<sup>40</sup> Am sarte na saressa tara Paul antara Silas am dangay maa, ta zlala ba suuwe á dem mba á Lidiya emtsaafé. Duwa-aatare, ta de bera egdzar mama-aha-aatare emnde a fetarfe, ta faterem ndzedá am vuwa, lauktu ta yaterya ta zlala.

## 17

### *Tara Paul antara Silas am Taisalauniki*

<sup>1</sup> Ta desa am ekse á Amfipaulis, antara Appaulauniya praatte, lauktu ta dem Taisalauniki. Anƙwa \*mashidi á Yahudiya-aha am ekse nanna.

<sup>2</sup> Am mbasmba vuwa-aara ge Paul, ma áme keni á magán ba estuwa, a dem mashidi ñanna. Maka keye anjwa á duwa ba kelaa vaci puwansepuwe, tá anjwa á ndaha elva a názu am wakita á Dadaamiya antara emnde na tá áhuwa.

<sup>3</sup> Anjwa á palateraa maana-aara Paul, anjwa á ndaaterndáhá bademme geni názu á ndaaná wakita wá, sey \*Almasiihu á shushe zlada, á emtsemsta, lauktu á tsetse am faya. Daaci a ba ñane á elvan ge itare: «Yaisu na yá anjwa á bakurá elva-aara na wá, ñane una Almasiihu.»

<sup>4</sup> Emnde umele am itare lyarvaalya, ta dabete tara Paul, antara Silas. Yunaniñkau-aha na daremda am nadina á Yahudiya-aha na keni, kwakya lyarvaalya, ira ñwasha na anjwa dárádza-aatare na.

<sup>5</sup> Amá Yahudiya-aha wá, jaterja shelha ba kwakya. Daaci ta de jemaa budari-aha á sa am huđe á ekse, ta se tsante elva, emnde bademme saresse am bere am huđe á ekse. Duwa-aatare bademme wá, ta de tataya tara Paul, antara Silas am mba á ura umele zhera-aara Yasaun, ge tadaterá á deza male-aha á ekse áte ice á emnde bademme.

<sup>6</sup> Amá sharáterka tara Paul, antara Silas na, daaci ta tedese Yasaun na, antara emnde a fetarfe umele, ta daterá á deza male-aha á duniya. Ta de icaterar sera á ba an ká kwará áza male-aha na, a ba itare: «Emnde ñanna am duniya bademme baaka tate na de wesharanteka itare elva am huđe-aara, náwa saremsa á sem larde á miya keni!

<sup>7</sup> Amá Yasaun a naba vaterte slede am mba-aara! Bademme-aatare na itare dabarka shairiya-aha á Kaysariya, slekse yaikke na dekideki. Ta bántsa itare: Anjwa slekse umele zlađe adaliye yaikke, zhera-aara Yaisu.»

<sup>8</sup> Elva ñanna a tsante ervaunde á male-aha, antara emnde a ekse bademme.

<sup>9</sup> Daaci male-aha á duniya ta hyaterar ge tara Yasaun, antara emnde a fetarfe umele bademme, ganakini sey tá biyaabiya nalmane am ranna, lauktu tá zlála, dem sarte na má zlauzla elva, lauktu ta puwateraahe.

### *Tara Paul antara Silas tá am Bairiya*

<sup>10</sup> An vayiya wá, emnde a fetarfe ta danse tara Paul, antara Silas na á dem ekse á Bairiya. Daremda tara Paul am Bairiya maa, ta naba dem \*mashidi á Yahudiya-aha.

<sup>11</sup> Shagera ba ervaunde á Yahudiya-aha na tá am Bairiya na, arge Yahudiya-aha na tá am Taisalauniki. Itare lyarvaalya elva na tá anjwa á bateránba tara Paul na, dzamarka elva mándzawe dekideki. Ba kelaa wera á ekse tá habaza ba názu am wakita á Dadaamiya, ge slaterá an waazu á Paul máki ba jirire.

<sup>12</sup> Kwakya ba emnde na fartarfe na am dagave-aatare. Ñwasha-aha á Yunaniñkau-aha na tá an dárádza na, antara Yunaniñkau-aha umele, bademme na fartarfe.

<sup>13</sup> Amá de cenarácena Yahudiya-aha na tá am Taisalauniki geni Paul anjwa á bálá elva á Dadaamiya am Bairiya keni, ta naba sawhe, ta se fantau ge wessa elva, ta tsante ervaunde á emnde.

<sup>14</sup> Daaci emnde a fetarfe ta danse Paul á dete we á háye, amá tara Silas, antara Timaute wá, njarinja am Bairiya.

<sup>15</sup> Emnde na ta daa Paul á dete we á háye na wá, ta zlála ba kerde, ta daa puwanse á dem Ataina. Daaci itare ta naba eptsa-aatare á sem Bairiya. Ta sawa an elva a Paul, ta se mbedateru ge tara Silas antara Timaute. A ba ñane á elvan ge itare: «Sawmbare berawibera ba watsewatse máki á gevge.»

### *Waazu á Paul am berni á Ataina*



<sup>16</sup> Am sarte na Paul anƙwa á ufa tara Silas, antara Timaute am Ataina na wá, wantewa ervaunƙe-aara ba kwakya adaba kwakya á hele-aha na an cepa am ekse ɲanna.

<sup>17</sup> Adaba una ɲanna, anƙwa á ndaha elva ɲanna antara Yahudiya-aha, ira emnde a jeba umele na ta dema am nadina á Yahudiya-aha na am mashidi-aatare. Ma a shá ba emnde-ara keni, ma ta jamme áme emnde keni, á de ndaater ba una ɲanna ba kelaazare.

<sup>18</sup> Tá anƙwa emnde a nadina umele tá dahaná an Aipikauri, umele zlaɓe adaliye tá dahaná an Sitauykau, male-aha-aatare keni tá se maganaa gajawe kwakya ge Paul. A ba emnde umele-aatare: Á ndaha uwe kina slenara na? A ba emnde umele-aatare zlaɓe adaliye: Á ndaha elva á dadaamiya-aha na ta jesaare anƙwaslire na. Ta de ndáhá una na wá, adaba Paul anƙwa á ndaater waazu á elva a Yaisu, antara tse á emnde am faya.

<sup>19</sup> Adaba una ɲanna, ta daa Paul á de katafke á zlamáha áte egdza waatare umele anƙwa tá dáhá an Ariyaupagus. Tate ɲanna wá, tate á kyá shairiya-aatare. A ba itare tá elvan ge ɲane: «Ndaanerndáhá jirire á tsáha á ɲa na ka shanaa ka anƙwaslire.

<sup>20</sup> Adaba názu ɲá anƙwa á cenáná ázeɲa na ɲa wayve-aha-aara, ndza cenaneránka dƙideki. Amá wá, ɲá kátá diyeddiye.»

<sup>21</sup> Emnde a Ataina, antara wayve-aha-aatare bademme wá, itare ta emnde a wáyá cena elva-aha na a jesaara anƙwaslire. Ba tá sá una, tá sá una, tá vaha deppe á ba arge elva.

<sup>22</sup> Daaci a tsahe ge Paul áte Ariyaupagus-aatare ɲanna, a ba ɲane á elvan ge itare: «Ekkure emnde a Ataina, ya nánna wáwa á kure bademme ge mága nadina á kure.

<sup>23</sup> Adaba am sarte na yá anƙwa já daba am ekse á kure, ya nánna tate-aha á mága nadina á kure bademme. Ya nánna áte tate á ica sadake á kure umele, kwa puwetepuwa, a ba kure: Una wá, náza a dadaamiya na zlaɓe diyarka emnde na. Daaci Dadaamiya na ni zlaɓe diyakurka tsa, amá kwá anƙwa eddábá na wá, yá ndaakur elva á Dadaamiya ɲanna.

<sup>24</sup> Anƙwa Dadaamiya a jirire, ba ɲane edda una a nderaa duniya, antara názu am huɗe-aara bademme; ba ɲane una Yaakadada á samaya, antara haha, ɲane á njeka am bere-aha na tá nderaná emndimagwaha.

<sup>25</sup> Tatayaaka ɲane ma uwe keni áza emndimagwaha dƙideki. Adaba á vatertá ba ɲane duksa ge emndimagwaha, á vaterte shifa, antara duksa bademme.

<sup>26</sup> Emnde na tá am duniya bademme a nderateraa ba ɲane, a saterse á ba am ura palle, a njateraa ba ɲane áte haha na. Lauktu á nderá ba emnde ɲanna keni, kerten ndza an datsa sleɗe-aha-aatare, antara zamane-aha-aatare bademme ázeɲara.

<sup>27</sup> Dadaamiya a nderaa emnde wá, ba geni emnde ɲanna bademme, tá puwantá erva ba ge ɲane palle, ámbane watse tá shansha. Ge jirire wá, Dadaamiya ba herzhe an miya bademme.

<sup>28</sup> Adaba anƙwa puwartepuwa am wakita-aara, a ba ɲane: Mi shaa shifa adaba ɲane, gamiyevge emnde adaba ɲane, má anƙwa puwa shifa adaba ɲane. Shagera názena ta ndasaa emnde á kure umele am láhe-aatare na. Ta bántsa itare: ɲere keni ɲa ba egdzara-aara.

<sup>29</sup> «Máki mi egdzara-aara wá, slaslaumika dƙideki mázla-aara ganakini Eddemiya Dadaamiya seke dindar, antara lipela, bi seke nákwá. Adaba duksa-aha ɲanna bademme, tá tsatsaná ba emndimagwaha an enƙale-aatare, daaci tá ganve hele.

<sup>30</sup> Haypa-aha na ndza ta maganaa emndu werre wá, Dadaamiya á ñeka am ervaunđe, adaba am sarte ñanna ndza diyarka. Amá kina wá, ankwá á dáhá emnde bademme geni a yarányá haypa-aha-aatare, a magarmága tuba ázeñara.

<sup>31</sup> Adaba kertenj faafa kwaskwe na ni watse á de kyá shairiya á duniya bademme átekwa na. A eksese edda una ni watse á de kyaná ñane shairiya ñanna á ba an jirire, a tsante edda-aara ñanna am fáyá, ganakini a diyareddiye emnde bademme.»

<sup>32</sup> Am sarte na ni Paul ankwá á ndaater elva a tse am fáyá na wá, emnde umele-aatare ta naba puwar dzáká. Amá á ba emnde umele: «Wayañerwáyá ká ndañerndáhá zlađe adaliye vacite umele keni.»

<sup>33</sup> Daaci a naba sesehe ge Paul am dagave-aatare, a zlalehe.

<sup>34</sup> Amá wá, tá ankwá emnde na ni ta dabete Paul, de fartarfe. Emnde ñanna wá, tara Diyaunisiyus, ñane palle á emnde a kyá shairiya áte Ariyaupagus, antara mukse umele zhera-aara Damaris, ira emnde umele.

## 18

### *Waazu á Paul am Kaurintus*

<sup>1</sup> Am iga-aara maa, a tsete ge Paul am Ataina, kwaye a zlálá á dem Kaurintus.

<sup>2</sup> Ta de puwa ba já ire antara zhel Yahudiya umele zhera-aara Akilas, ta yanaa am haha á Pauntus. Ñane keni zlađe ba unjule a sá-aatare á sa am haha á Italiya tá antara mukse-aara Piriskila. Adaba a bántsa male á larde á Rauma, zhera-aara Kalawdiyus: A nanánka Yahudiya-aha am haha á Rauma dekideki. Am iga a já ire-aatare ñanna maa, a duhe ge Paul á dezeta,

<sup>3</sup> a de berater tá ankwá á maga ba saniya na á maganá ñane. A diya ba njá antara itare, ta magaa slera-aatare átirpalle. Amaana: Bere-aha á kacakaca.

<sup>4</sup> Ba kelaa vaci puwansepuwe, Paul á shateru ba labáre á higa ge Yahudiya-aha, antara Yunaniñkau-aha na tá am nadina á Yahudiya-aha na, geni itare keni a fartarfe.

<sup>5</sup> Amá am sarte na daraada tara Silas, antara Timaute á dem Makiduniya wá, Paul magaaka slera umele mázla-aara, a yaa sarte-aara bademme ba ge bálá waazu, ankwá á ndaaterndáhá jirire-aara bademme ge Yahudiya-aha, ganakini ba Yaisu una \*Almasiihu.

<sup>6</sup> Amá Yahudiya-aha liyarka elva-aara, ta zlazlese antara ba ire-aara keni. Adaba una ñanna, Paul a naba hyadfaa erva-aara áte itare, a ba ñane: «Máki kedakurkedá watse kwá diyeddiya ba kure, á shiyaka ya mazla-aara. Kina wá, yá zlálá á deza emnde a jeba umele.»

<sup>7</sup> A yateraa estuwa Paul, a zlálá á de tataya bere á mága waazu-aara am mba á ura umele zhera-aara Titus Yustus, ñane am nadina á Yahudiya-aha, há-aara ba herzhe an \*mashidi á Yahudiya-aha ñanna.

<sup>8</sup> Kirispus, ñane \*liman na á maga slera am mashidi ñanna, ñane antara huđe á há-aara bademme fartarfe. Emnde a Kaurintus na cenarácena waazu á Paul na, itare keni kwakya fartarfe, magarateraamaga baptisma.

<sup>9</sup> Vacite umele an vayiya wá, Paul a naba shaa wahayu. A ba Yaakadada á elvan ge ñane: «A wanka lyáwá dekideki! Emmága slera á ña, duka dekideki, naba ndaaterndaha.

<sup>10</sup> Baaka ura á de fá erva áte ka dekideki, adaba iya yá ankwá antara ka. Emmága slera, adaba kwakya emnde na tá átuge iya am ekse na.»

<sup>11</sup> Paul a magaa sakanderi an kyalma am Kaurintus, anƙwa á kwaraterse elva á Dadaamiya ge emnde.

<sup>12</sup> Am zamane á sleksu Galiyau ta fanaa emnde a Rauma, ɲane slekse yaikke am kwara á Akaya baɗemme wá, Yahudiya-aha ta naba gwarhe ge Paul, ta daná á dem shairiya.

<sup>13</sup> A ba itare tá elvan ge sleksu Galiyau: Náwa zhel na anƙwa á kwaraterse ɲála Dadaamiya ge emnde, amá gergere antara una am \*tawraita.

<sup>14</sup> Paul keni á kátá ndaha elva, a naba cuvaa ge slekse zuɲɲwe, a ba ɲane á elvan ge Yahudiya-aha ɲanna: «Ma andze a magaa mandzawire, bi haypa umele yaikke wá, ma andze yá cenakurvaacena Yahudiya-aha-aaruwa.

<sup>15</sup> Amá una ba gajawe á kure áte elva-aha, antara zhera-aha, ira tawraita na wá, una ba elva á kure, kyaukya ba kure duksa á kure, iya yá kyeka shairiya á jeba á elva-aha ɲanna.»

<sup>16</sup> Daaci a naba ɲgyaterse á segashe am bere á shairiya.

<sup>17</sup> Ba segashe-aatare wá, ta se ba dar ge Saustainais ba \*liman á Yahudiya-aha-aatare tsa áte ice á emnde baɗemme, á ba am tate á shairiya ɲanna. Amá baaka lámbe á sleksu Galiyau ɗekideki.

### *Eptsa á Paul á sem Antakiya*

<sup>18</sup> Á ba am iga á una ɲanna keni, Paul haraare zlaɓe ádaliye kwakya áza emnde a fetarfe am Kaurintus, lauktu a yaterhe, a zlála. Daaci ta zlála antara tara Akilas, tá antara mukse-aara Piriskila, ta dem Kaiɲkairiya. Paul a de sehese ire áhuwa, aɗaba ndza a maganaa \*waada ge Dadaamiya. Tsante am ekse ɲanna maa, ta dema am paare á yawe, ta zlálá á dem Antakiya am haha á Siriya.

<sup>19</sup> Daraada am Aifaisus wá, Paul a dem \*mashidi á Yahudiya-aha, a de ndaha elva kwakya antara itare, áte názena am wakita á Dadaamiya.

<sup>20</sup> Ta ɲála Paul kwakya áhuwa, ganakini a haraare ázetare, amá kwalevwale Paul.

<sup>21</sup> Daaci a naba yaterhe, amá a ba ɲane á elvan ge itare: «Má wayetewáyá Dadaamiya wá, watse yá eptsa zlaɓe ádaliye áseze kure.» Daaci tsanta am Aifaisus ɲanna wá, Paul a yaa tara Akilas, antara mukse-aara Piriskila áhuwa mazla-aara, ɲane a dema am paare á yawe, a zlálá á de katafke.

<sup>22</sup> De tsekwaatsekwa Paul am Kaysariya, a zlálá á ba á dem Urusaliima emtsaade, ge de gater use ge emnde a fetarfe, lauktu a dem Antakiya.

<sup>23</sup> Shekwaashekwa cekwaɲguɗi maa, a tsetehe zlaɓe ádaliye, a de jem ɗaba praatte am huɗe á Galatiya, antara Firigiya, a de faterem ndzeɗa am vuwa kwakya ge emnde a fetarfe baɗemme.

### *Waazu á Apaulaus am Aifaisus, antara am Kaurintus*

<sup>24</sup> Am sarte ɲanna maa, samsa zhel Yahudiya umele á sawa am Alaikzandriya, á sem Aifaisus, zhera-aara Apaulaus. ɲane an hákuma á ndáha elva jipu, diyaadiya názu am wakita á Dadaamiya keni.

<sup>25</sup> Kwakya diya-aara áte baráma a Yaakadada, vuwa-aara wayaawáyá jipu ndáhá elva á Dadaamiya. Anƙwa á kwaraterse elva ge emnde áte Yaisu á ba an unɲule-aara, amá wá, ɲane a dise ba baptisma na ndza a maganaa Yuhanna.

<sup>26</sup> Daaci anƙwa á maga waazu-aara ba estuwa an baakire á lyawa am \*mashidi á Yahudiya-aha. Vacite umele cenarvaacena waazu-aara tara Akilas, antara mukse-aara Piriskila, ta naba ɗante á dem mba-aatare, ta

de palannahe zlafe ádaliye jirire á elva á Dadaamiya jauje ba ge una a disaa ñane.

<sup>27</sup> Am iga-aara maa, Apaulaus a magaa niya a dem Kaurintus am haha á Akaya. Emnde a fetarfe na tá am Aifaisus ta fanem ndzedá kwakya am vuwa, adaba ta puwaterte nalmesheri ge emnde a fetarfe na tá am Akaya, ta vante am erva ba ge ñane geni a lyarvaalya ba shagera am dágave-aatare. Daada-aara áhuwa maa, Dadaamiya a de maganaa ñgurna, a de melateru kwakya ge emnde a fetarfe.

<sup>28</sup> Adaba a de ndaaterse wakita á Dadaamiya ge Yahudiya-aha, a palaternahe ba shagera ganakini ba Yaisu una \*Almasiihu, a haslateraaha á katafke á emnde bademme, dzegwaránka ba wera we keni.

## 19

### *Waazu á Paul am Aifaisus*

<sup>1</sup> Am sarte na Apaulaus anƙwa am Kaurintus na wá, Paul a jem daba am wa-aha á kwára ñanna praatte, kwaye a de tsekwe á dem Aifaisus. A de shaa emnde a fetarfe umele am Aifaisus ñanna,

<sup>2</sup> a ndavateruhe, a ba ñane á elvan ge itare: «Am sarte na ni fakurtarfe na, shakuránsha emtu Shedekwe Cudedde?» Ta ñwanante, a ba itare: «Ba ganakini anƙwa Shedekwe Cudedde keni diyarnerka ñere.»

<sup>3</sup> A ba Paul á elvan ge itare: «Ndza ta magakuraa jeba á baptisma-ara kena?» A ba itare: «Ñjere ña shaa baptisma na ndza a kwaratersaa Yuhanna ge emnde na.»

<sup>4</sup> A ba Paul á elvan ge itare: «Baptisma á Yuhanna wá, náza á emnde na tá kátá mága tuba arge haypa-aha-aatare. Adaba a ba Yuhanna á elvan ge \*Iserayiila-aha: Fawtarfe á ba áte edda una watse á sawa am iga-aaruwa na. Amaana: Yaisu.»

<sup>5</sup> Cenarvaacena una ñanna, daaci ta lyevaa baptisma an zhera á Yaisu.

<sup>6</sup> Daaci Paul a puwataare \*erva a barka áte ire-aha-aatare, a naba tsekwa ge Shedekwe Cudedde á sete itare. Ta fantau ge ndáhá elva-aha anwaslire, antara mága nabiyire bademme.

<sup>7</sup> Kezlakula á emnde ñanna ta kelaawa ju buwa.

<sup>8</sup> Am huđe á tere keye ñanna, Paul á málá ba sera á dem \*mashidi á Yahudiya-aha ba kelaa kwaskwe á puwansepuwe. Anƙwa á ndaater elva á Dadaamiya á ba an dzandzanire ge emnde, anƙwa á palaterá elva a dem \*kwara á Dadaamiya an hákuma ge emnde na tá á katafke-aara.

<sup>9</sup> Amá emnde ta maganaa degdegire á ire ge Paul, lyiyarka waazu-aara dƙideki, baira ta valyesaa elva na zlayeka dƙideki na áte elva a dába baráma á Yaakadada. Adaba una ñanna, a yáterhe ge Paul, a dzerese emnde na fartarfe na, a zlalá antara itare á dem bere á Tiranus, bere á háya ge ndaha láyá am huđe-aara. Anƙwa á shateru waazu ba kelaazáre am bere ñanna.

<sup>10</sup> Yawe buwa kalkale anƙwa á magán ba estuwa Paul, haa Yahudiya-aha, antara emnde a jeba umele na tá am kwara á Aziya bademme cenarácena elva á Yaakadada.

### *Labáre á egdzara á Sikaiwas, antara ndzedá á Dadaamiya*

<sup>11</sup> Dadaamiya a magaa najipu-aha na ndza magaaveka dƙideki na á kya erva an Paul.

<sup>12</sup> Ta dateraa ba nanɣyuwe na a tsekwemaa Paul, antara nalbuta-aara na á hálá ñgudẽffire an ñane ge emnde na tá lapika-aha, mbarembe

bademme. Emnde na ndza tá an shaitaine keni, saresse shaitaine-aha nanna am vuwa-aatare.

<sup>13</sup> Am sarte nanna maa, tá ankwá Yahudiya-aha umele tá ngyá jini-aha am emnde, tá ankwá á já dfa ma á deme keni. Daaci itare keni ta naba tápá ngyá jini-aha am ura an zhera á Yaisu. A ba itare tá elvan ge jini-aha: «Ŋá ankwá ndaakur an zhera á Yaisu na Paul ankwá á ndáhá elva-aara na: Dawedde.»

<sup>14</sup> Emnde a mága una nanna wá, ba egdzara á limán Sikaiwas, nane male á \*liman-aha. Egdzara-aara nanna ta vuye.

<sup>15</sup> Amá a nwaterante ge jini, a ba nane: «Diyandiya ya Yaisu. Paul keni diyandiya bademme, amá kure mu kwa emnde-ara?»

<sup>16</sup> Zhel na an shaitaine nanna a naba slakalemhe am itare an ndzedfa-aara bademme, jateruje an ndzedfa bademme-aatare, ta nezelese ire-aatare ba zlahhe á segáshe am mba-aara an ukhyiye dey, ta zlalá an ververe kwakya áte vuwa-aatare.

<sup>17</sup> Emnde a Aifaisus bademme, Yahudiya-aha, antara emnde a jeba umele bademme cenarácena labáre nanna, dámda lyawa am vuwa-aatare bademme. Fantau á ba am sarte nanna wá, emnde ta faa zherwe jipu áte zhera á Yaakadada Yaisu.

<sup>18</sup> Emnde a fetarfe kwakya ta magaa tuba á katafke á emnde bademme arge slera á Shaitaine na ndza ta mazlanaa itare am erva-aha-aatare.

<sup>19</sup> Emnde na tá an wakita-aha-aatare na á kwaraterse mága duksa an hákuma á Shaitaine kwakya saransese á segáshe, ta epshehe an kára áte ice á emnde bademme. Ta magaa lisaafi á gáne á wakita-aha nanna wá, gursa debu kul ilyebe.

<sup>20</sup> A zanaa estuwa elva a Yaakadada slede á ba an ndzedfa, emnde bademme naránna ndzedfa á Dadaamiya.

### *Elva yaikke na a tsetaa am Aifaisus*

<sup>21</sup> Am iga á labáre nanna maa, Paul a magaa niya a dem Urusaliima, á kyá huđe á haha á Makiduniya, antara haha á Akaya. A bántsa nane: Máki danaada am Urusaliima wá, sey yá de zhára berni á Rauma keni.

<sup>22</sup> Daaci a belaa emnde a melanumele buwa á katafke-aara, tara Timaute, antara Airastus, ta desaa itare zunḡwe á katafke-aara ge dem Makiduniya. Amá Paul an ire-aara wá, a shekwaahe zlahe adaliye cekwaanḡudí am kwára á Aziya.

<sup>23</sup> Á ba am sarte nanna, tsetsa elva yaikke am Aifaisus áte elva a baráma á Yaakadada.

<sup>24</sup> Ankwá edda egzla umele zhera-aara Daimaitriyus, nane á já egdzar bere-aha an lipela, gárava á bere á dadaamiya á emnde a Aifaisus, tá dáháná an \*Artaimis, ba seke gárava á mukse, a ba itare. Daaci nane antara emnde a slera-aara tá ankwá á shá nalmane kwakya.

<sup>25</sup> A jemaa emnde a slera-aara nanna, antara emnde umele na tá ankwá á maga jeba á saniya nanna bademme, a ba nane á elvan ge itare: «Ya baa ba kure dawalaa: Yá tamaa baaka ura am miya diyaaka ganakini saniya á miya na wá, a gedamitaa ba nane.

<sup>26</sup> Amá ba kure an ire á kure keni zharauzhara emtsaade názena ankwá á maganá zhel nanna tá dáháná an Paul na? A bántsa nane: Duksa-aha na tá jáná ba emndimagwaha an erva-aatare ni tá kezlater ugjehe! Aley ankwá á dzegwardzegwe, adaba emnde kwakya lyarvaalya elva-aara, á tsaaka an emnde a Aifaisus áhuna, amá dem haha á Aziya keni kwakya ba názena lyavaalya elva-aara.



<sup>27</sup> Máki estuwa wá, zhel ñanna á badzamiyanvebadze saniya á miya na. Á tsaaka an una ñanna, ba bere yaikke, bere á dadaamiya á miya \*Artaimis na má anƙwa á kezlan ugje na keni, watse baaka ura á de dƕemedƕema mázla-aara. Ba \*Artaimis an ire-aara na emnde a haha á Aziya, antara duniya bademme, emnde tá anƙwa á kezlan ugje na keni, á de gev duksa ba dey.»

<sup>28</sup> Ba cenarácena elva-aha ñanna wá, mberátembera ervaunƕe-aatare ba seke kárá. Ta kante kwárá á dem zhegela, a ba itare: \*Artaimis á Aifaisus-aha wá, yaikke.

<sup>29</sup> Elva ñanna de gyantegya huƕe á ekse bademme, emnde bademme ta de gwatarar ge tara Gayus, antara Aristarkus egdzara á emnde a Makiduniya na tá anƙwa á puwa Paul am shula-aha-aara na, daaci ta tadáterá á ba an zhagade á dem tate á gwagusa yaikke náza á zlamaakelaawa.

<sup>30</sup> Á kátá dƕabaterdábá Paul, amá ta naba ñanaahe ge emnde a fetarfe.

<sup>31</sup> Emnde umele am slakate-aha-aara na ta male-aha am haha á Aziya keni ta belanve we, a ba itare, ba tasle-aara a duka ñane á dem tate á gusa ñanna.

<sup>32</sup> Jáháva ñanna weshaptewesha jipu. Emnde na tá hula á kya una, emnde umele keni tá hulá náza-aatare á kya una, kwakya ba emnde na ni diyarka názu a daterá ádehuwa dƕekideki.

<sup>33</sup> Daaci anƙwa zhel Yahudiya umele zhera-aara Alaikzanderi am jáháva ñanna, ñane wá, emnde umele ta shanu sera á labáre ñanna bademme, Yahudiya-aha umele tá anƙwa á hyairhye ganakini a mbedaterumbede elva ge zlamaakelaawa. Daaci Alaikzanderi a katerante erva-aha-aara ge emnde bademme, anƙwa á magaterá nalaama ganakini a dƕarude á ndaater elva.

<sup>34</sup> Amá de diyareddiye ganakini ñane keni ba ura Yahudiya, ta fantau ge fa hula á ba an elva palle áte we, a ba itare: \*Artaimis á Aifaisus-aha wá, yaikke! \*Artaimis á Aifaisus-aha wá, yaikke! Á hyephye saa buwa tá anƙwa á ndaha ba una ñanna.

<sup>35</sup> Am iga-aara maa, a ekhyateraaha zlahhe ge ura-aatare male ñane saikeraitair yaikke názá á berni á Aifaisus. A ba ñane á elvan ge itare: «Ya baa ba kure, kure emnde a Aifaisus: Am duniya bademme, diyardiya emnde bademme ganakini anƙwa bere á dadaamiya á miya \*Artaimis yaikke, antara gáráva-aara na a eblyaa á sawa am samaya na am berni á miya am Aifaisus, mí ufaná ba miya.

<sup>36</sup> Ware edda-aara ni á de bá diyaaka na? Magaumága sawari am ire á kure, magauka duksa máki slakurnaaka ba shagera.

<sup>37</sup> Emnde na náwa kwa sateraa á sehuna na, wallá ta ilu duksa am bere cufedƕe á miya na bere á \*Artaimis ka, wallá ta ndaase elva mándzawe áte \*Artaimis á miya ka, uwe ka.

<sup>38</sup> Máki tá anƙwa emnde a dágala á tara Daimaitriyus, antara emnde a slera-aara maa, anƙwa sarte á kya shairiya, male-aha á duniya keni tá anƙwa bademme, tá de puwa ugje-aatare, daaci tá kyaternaakya.

<sup>39</sup> Ma anƙwa ba duksa umele kwá kataná kure keni, dawánda labáre á kure á deza male-aha vaci jáháva, tá de kyakurnaakya ba itare.

<sup>40</sup> Amá náza vatena na wá, ba kina mi shansha elva áza male-aha á miya, watse á jauje ge ndzedá á miya. Tá de bamiya anƙwa dugune á kure ba giraara. Adaba baaka baráma á miya ge mága duksa estuwa dƕekideki. Watse á de kamivá ye ba ge miya.»

Daaci a zlanaahe elva-aara áte una nanna. Am iga-aara maa, a ba nane: Ma ware keni a ezslála á dem mba-aara mazla-aara.

## 20

### *Shula á Paul á dem Makiduniya, antara Akaya*

<sup>1</sup> Am sarte na ekhyaakhya elva nanna maa, Paul a jema emnde a fetarfe, a faterem ndzedá am vuwa kwakya, daaci a magaterá á jámimá shifa, ba zlala-aara ge nane á dem Makiduniya.

<sup>2</sup> A de jem dábá praatte am huđe á haha á Makiduniya nanna, a de ndzedaterfe emnde a fetarfe an waazu-aha gergere, lauktu a zlala á dem haha á Akaya.

<sup>3</sup> A de magaa tere keye am haha á Akaya nanna. Ba nane keni maganaamaga niya a dem Siriya an paare á yawe, á cena ba tá ankwá á eksanvaa sawari Yahudiya-aha ge magante emtanqire. Adaba una nanna, a daba ba tate á sawa-aara nanna zlađe adaliye á kyá Makiduniya.

<sup>4</sup> Ankwá Saupate egdza á Pirus ura Bairiya, nane a duwá antara Paul. Zlađe adaliye, antara tara Aristarkus, antara Saikundus, itare ta emnde a Taisalauniki, antara Gayus nane zhel Dairbe, antara tara Tikikus tá antara Tauraufimus, itare ta emnde a haha á Aziya, ira Timaute.

<sup>5</sup> Emnde nanna bademme ta desaa itare á katafke á ntere, kwaye ta de ufaneraa am Terauwas.

<sup>6</sup> Am iga á munri á depain na baaka shahi á makala am huđe-aara na wá, ntere keni na dema am paare á yawe am Filipi, na dabaterdábá. Na ga hare ilyeđe, lauktu na de shateraaha am Terauwas, na de zu hare maka áhuwa.

### *Paul a hare panje á maga waazu am Terauwas*

<sup>7</sup> Na jamme an icavaciya ge sebde ge za dafa á Yaakadada wá, a ndaanaa Paul elva am jáháva nanna. Am diyaadiya ganakini watse á zlalá má weraawera ekse, mele yánka waazu mazla-aara, dem huđe á vayiya keni á maga ba waazu.

<sup>8</sup> Bere na na jahava am huđe-aara nanna wá, átire ge bere-aha umele, huđe-aara bademme ba kára á fanus-aha.

<sup>9</sup> Ankwá egdza dawale, zhara-aara Aiwitikus, nane a njanu ge we á fainaiter á bere nanna ná am huđe-aara na. Am kwakyafkwakya waazu á Paul, a naba pu hare egdze na jauje ge ndzedá. Daaci a naba mbedehe kwaye á sawa átire á bere ge keyire á sem áhá. Ta de tsante, am emtsamtsa.

<sup>10</sup> A tsekwehe ge Paul, a de unmbare ge egdze nanna, a nananaahe an erva-aha buwa, a ba nane: Gazlauka d'ekideki, á ba an shifa-aara egdzere.

<sup>11</sup> Daaci a eptsehe zlađe adaliye, a dála á dem bere nanna, a de kezlanve dafa, ta zuhe. Am iga a dafa keni yánka ndaater elva d'ekideki dem segáshe á vaciya am haha, lauktu a yaterhe, a zlala.

<sup>12</sup> Egdza dawale na keni ta puwansá á dem mba-aatare á ba an sera-aara, bademme a ervaunđe á emnde ba seke nama adaba nane.

### *Shula á Paul tsanta am Terauwas dem Milaitus*

<sup>13</sup> Am iga á una nanna maa, ntere na dema am paare á yawe, na degáshe ntere zunje á katafke á Paul ge dem Assaus. Adaba a ba nane tsanta áhuna wá, á duwa an sera, á de dema am paare antara ntere á ba am Assaus.

<sup>14</sup> De shaneraasha am Assaus, a de dema am paare antara ntere, na zlalá kerde á dem Mitilaine.

<sup>15</sup> N̄a tsetehe zlaḃe ádaliye áhuwa, makuralla-aara lauktu n̄a de shaa haha á Kiyaus am dágave á haye, n̄a desa am slerpa-aara n̄a vante n̄azlaḃa. Wergekse wá, dan̄eraada am Samaus. Wergekse-aara zlaḃe ádaliye lauktu dan̄eraade am Milaitus.

<sup>16</sup> Amaana: N̄a yesaa Aifaisus am iga, ad̄aba magaaka niya a dem ekse n̄anna, wayaaka á kedanaaked̄a sarte am haha á Aziya. N̄ane á kátá á de maga muṅri á \*Pantaikausta am Urusaliima mákini á gevge.

*Waazu na a vatertaa Paul ge emnde a sawari á aiklaisiya á Aifaisus*

<sup>17</sup> Saṅeraasa am Milaitus wá, Paul a naba belaterve labáre ge emnde a sawari á aiklaisiya á Aifaisus, ganakini a sarsawa ásezeṅara.

<sup>18</sup> Saremsa, a ba n̄ane á elvan ge itare: «Ya semaa estuwa á sem haha á Aziya, kure diyaakurdiya n̄ja-aaruwa bad̄emme am sarte na yá am dágave á kure.

<sup>19</sup> Diyaakurdiya slera na ya magannaa ya ge Yaakadada, ámasla an gá ire-aaruwa am slera n̄anna, antara yawe á kyuwa na ta belimá am ice, emtan̄kire na ta magive Yahudiya-aha na bad̄emme.

<sup>20</sup> Diyaakurdiya ganakini sheḃanakurvuka n̄azena watse emtake áte kure ba palle keni, ndaanakurndáhá bad̄emme, am zlamaakelaawa, antara am mba-aha á kure keni bad̄emme.

<sup>21</sup> Ya ndaaterndáhá ge Yahudiya-aha, antara emnde a jeba umele an ndzed̄a-aaruwa bad̄emme, ganakini a yarányá mága haypa, a sarsawa á sem sera á Dadaamiya, a fartarfe áte Yaakadada Yaisu.

<sup>22</sup> Daaci kina wá, yá an̄kwa dem Urusaliima una laarire áte ya, a binaa Shedekwe Cufed̄de geni sey ba yá duwa. Diyanka n̄azu watse á de magava áte ya áhuwa.

<sup>23</sup> Duksa palle ya disaa ya wá: Ba kelaa má de tsekwantsekwa am ekse wá, an̄kwa á ndindaha Shedekwe Cufed̄de geni an̄kwa á pakaaka dan̄gay, ká de shá zlaḃa am tsavaytsavaye.

<sup>24</sup> Ate ya wá, ma yá an̄kwa an shifa, ma ya ḃaaka an shifa keni ba kálkale. Iya wá, yá kátá ba yá maganaamaga slera na a fiyaara Yaakadada Yaisu na bad̄emme, a jauka d̄ekideki. Amaana: Bálá labáre á higa, elva a ṅgurna na a maganaa Dadaamiya.

<sup>25</sup> «Haranaaháre á bálá waazu á elva a dem \*kwara á Dadaamiya am dágave á kure. Amá kina wá, diyandiya ganakini ba palle á kure keni ḃaaka ura á de puwete ice áte ya mázla-aara.

<sup>26</sup> Yá ndaakur ad̄aba una n̄anna kina vatena: Máki ked̄aaked̄a ura am dágave á kure wá, am mbiye-aaruka.

<sup>27</sup> Ya ndahanaa ad̄aba uwe una, ad̄aba sanakuransese namaari á Dadaamiya bad̄emme ásegashe.

<sup>28</sup> Fawanufe ba kure hyema ge ire á kure, fawanufe hyema ge walda na a fakurmaa Shedekwe Cufed̄de am erva ganakini kwá piyanaa kure na. Fawaterufe hyema ge emnde á Dadaamiya na ba shagera degiya! Ad̄aba a emtsehe ge egdza-aara emtsaade, lauktu ta jesaara emnde n̄anna.

<sup>29</sup> Diyandiya ganakini watse tá sawa emnde na ta ba seke indale-aha na á sem dágave á kure, tá se yakurka d̄ekideki.

<sup>30</sup> Á ba am dágave á kure keni watse tá an̄kwa emnde a báda emnde a fetarfe umele an fida ge d̄abaterd̄ába.

<sup>31</sup> Amá faufa hyema, yehauteyeha geni yawe-aaruwa keye, vayi vacika yá an̄kwa á kwarakursekwáre an yawe á kyuwa am ice, puwananseka d̄ekideki.

<sup>32</sup> «Daaci kina wá, yá anƙwa yakurá am erva á Dadaamiya, á de tsufakurá ba ɲane áte ɲgurna-aara, á de fakurwa ba ɲane hyema an elva-aara. An hákuma ba ɲane ge ndzedakurtendzedá, antara ge vakurte duksa shagera na a fater ge emnde-aara bademme na.

<sup>33</sup> Iya wá, tatayanka duksa á ura deƙidƙeki. Ma shungu, ma dindar, ma zane keni.

<sup>34</sup> Ba kure keni, ábi kwa nanna ya mága slera á ba an erva-aaruwa ge tátaya náza já wedera á ɲere antara emnde na tá ázerwa.

<sup>35</sup> Iya wá, maranakuránmárá am názena ya maganaa ya bademme, geni kure keni magaumága slera ba estuwa, melawaterumele ge emnde na tá taa maganaaka wedera-aha-aatare. Viyawanaaka elva na ndza a ndaanaa Yaakadada á ba an ire-aara, a ba ɲane: Higa kwakya wá, ba náza á edda vante sadake ge ura, arge náza slelyiya sadake.»

<sup>36</sup> Zlanaazle elva-aara Paul, ta kezlaa ugje am haha bademme, ɲane a magaa maduwa.

<sup>37</sup> Bademme-aatare tá kyuwa á ba an yawe á kyuwa, daaci ta ɲaɲanaa erva ge Paul, a ba itare tá elvan ge ɲane: Á jamimá shifa, a dákaada Dadaamiya á ba an hairire.

<sup>38</sup> Anƙwa á waterwa jipu elva na ta cenanaa am mbuwe á Paul, a ba ɲane tá puweteka ice-aatare áte ɲane mázla-aara na. Daaci ta puwanse á dem tate á paare á yawe.

## 21

### *Shula á Paul á dem Urusaliima*

<sup>1</sup> Am iga á tegava á ɲere antara itare maa, ɲa zlala ba suuwe an paare á yawe, kwaye ɲa de tsekwa am Kaus. Makuralla-aara, ɲa de tsekwa am Raudaus. Tsante am Raudaus, ɲa de tsekwa am Patara.

<sup>2</sup> Duwa á ɲere, ɲa de shaa paare na á dem Finikiya, daaci ɲa naba demhe am huƙe-aara.

<sup>3</sup> Daɲeraada átevege haha á Kiprus, ɲa nánna haha ɲanna am názlaɓa á ɲere, ɲere ɲa zlála ba suuwe á dem haha á Siriya, ɲa de tsekwa am Tirus tate á tsekwa kazlaɲa á paare ɲanna.

<sup>4</sup> Na de shaa emnde a fetarfe am ekse ɲanna, daaci ɲa ga hare maka ázetáre. Sheƙeƙwe Cuƙeƙƙe a naba ndaaterhe názena ni watse á de shá Paul am Urusaliima na ge emnde a fetarfe ɲanna, itare keni ta naba mbedanu ge Paul geni a duka mazla-aara.

<sup>5</sup> Amá ba zlauzle hare maka ɲanna wá, ɲa naba tsetehe, ɲá anƙwa á zlála. Daaci itare, antara ɲwasha-aha-aatare, ira egdzara-aatare, bademme ta puwanɲere á dete iga a ekse, áte we á háye, ɲa kezlaa ugje áte we á háye ɲanna, ɲa magaa maduwa átirpalle.

<sup>6</sup> Am iga á maduwa wá, ɲa magaa ájamimá shifa, ɲa ɗaleme am paare, itare keni ta naba da-aatare.

<sup>7</sup> Tsante am Tirus, ɲa de tsekwa am Pautaulaimayi, áhuwa keni lyaraɲervaalya egdzar mama-aha á miya emnde a fetarfe, ɲa váha deppe ázetare.

<sup>8</sup> Makuralla-aara ɲa tsetehe, ɲa de tsekwa am Kaysariya am mba á malum Filip, ɲane palle á emnde vuye na ndza ta dzeraterse am Urusaliima na.

<sup>9</sup> Filip ɲanna wá, an gyaale-aha-aara ufaƙe darka á de gá zhele, tá anƙwa á maga nabiyire.

<sup>10</sup> Am haraɲeraahare cekwaanƙuƙi áhuwa, vacite umele, a naba semhe ge nabi á sa am Yahudiya zhera-aara Agabus.

<sup>11</sup> Samsa áseze ñere wá, a naba lyevaa náza ñgudá huđe á Paul wá, a naba takwasaa sera-aha-aara, antara erva-aha-aara an ñane, a ba ñane: «Náwa názu a ndaanaa Shedekwe Cufedde: Edda á náza ñgudá huđe na keni, tá de takwasán ba estuwa Yahudiya-aha am Urusaliima, tá de belaterma am erva ge emnde a jeba umele.»

<sup>12</sup> Ba ña cenaa una ñanna wá, ba ñere an ire á ñere, antara egdzar mama-aha a ñere na tá am Kaysariya na keni, ña ñantaa ba sera ge Paul, geni a duka á dem Urusaliima na mázla-aara.

<sup>13</sup> Amá a ba ñane á elvan ge ñere: «Labára ñane kwá kyuwa na? Kwá kátá gyaigiyem lyawa am vuwa ge iya emtu? Iya wá, á tsaaka an takwasa, ba emtsa keni yá ankwá átekwa adaba Yaakadada á miya Yaisu.»

<sup>14</sup> Janerviyyaaja eptsanaaptsa-aara. Daaci ndañeranka elva umele mázla-aara, a ba ñere: A gevge ba namaari á Yaakadada.

<sup>15</sup> Harañeraahare cekwaanğudí áhuwa maa, am iga-aara ña naba tse, ña zlála á dem Urusaliima.

<sup>16</sup> Ta daa á puwanerpuwa emnde umele am dágave á egdzar mama-aha a ñere emnde a Kaysariya. Ta ñañerhe ba suuwe á dem mba á Manasaun zhel emnde a Kiprus umele, haraahare am fetarfire, daaci ña nja am mba-aara.

### *Paul am mba á Yakuba*

<sup>17</sup> Dañeraada am Urusaliima maa, lyarañervaalya egdzar mama-aha a ñere emnde a fetarfe á ba an higa.

<sup>18</sup> Makuralla-aara, a naba ñañerhe ge Paul á dem mba á Yakuba, ña de beyaa jarammeje emnde a sawari á aiklaisiya bañemme am mba-aara.

<sup>19</sup> Daaci Paul a gater use, a ndaater názena a ganvaa Dadaamiya bañemme am slera-aara na a maganaa ñane am dágave á emnde a jeba umele na.

<sup>20</sup> Cenarvaacena una ñanna bañemme wá, ta naba gálá Dadaamiya. Am iga-aara maa, a ba itare tá elvan ge Paul: «Ka cenáncena emtu egdza emmaaye? Emnde debu wányara am Yahudiya una fartarfe, amá bañemme-aatare ta tsaa á ba áte \*tawraita a Muusa.

<sup>21</sup> Amá cenaráncena emnde ñanna ta se ndahanaa emnde umele, a ba itare: Ka kwaratersaa ka ge Yahudiya-aha á miya na tá am ekse á emnde, geni a yaránya tawraita, a farka egdzara-aatare am shedekwe, a dábarka nañe-aha á yahudiyire ñekideki.

<sup>22</sup> Mí maganá estara kina? Adaba náwa watse tá cenáncena ganakini sakaasire.

<sup>23</sup> Ekka wá, eccena názena ñá bakaná ñere. Náwa tá ankwá emnde ufade, itare ta maganaa \*waada ge Dadaamiya.

<sup>24</sup> Ankwá á ceka sarte-aatare, herzhe tá de bára, tá de sehá ire wá, ekka keni naba duwa antara itare, de baraabára ire á ña antara itare, biyaabiya názena tá kátá maganá itare ge sehá ire-aatare. Máki magakanaamága una wá, tá de diyeddiye emnde ganakini elva-aha na ta cenáncena tá ankwá ndaaná áte ka na, baaka jirire am huđe-aara ñekideki, mbate ekka keni ká ankwá á daba ba tawraita á Muusa.

<sup>25</sup> Náza á emnde a jeba umele na garevge emnde a fetarfe wá, baaka elva. Adaba ña puwatertepuwa nalmesheri, ña ndaterndaha názu mi njante am sawari á miya, mi bateraa: A zarka hyuwa na má ta icante ge mága hele, a zarka uzhe, a zarka hyuwa na má icaranteka an ica, a magarka gwardzire.»

<sup>26</sup> Daaci makuralla-aara, a naba duhe ge Paul antara emnde ufade ñanna, ta de baraa ire-aatare áte nañe á Yahudiya-aha. Zlaruzle am mága slera á cufeddire ñanna, Paul a de ndaanhe ge \*liman am huđe á mashidi,



a ba ɲane: «Am iga a hare vuye wá, watse ɲá eptsá, ɲá sawa an sadake-aha á ɲere, á se zlauzle slera á bárá á ɲere.»

*Ta eksevaa Paul am mashidi*

<sup>27-28</sup> Ba hare vuye ɲanna keni herzhe á ceka wá, saremsa Yahudiya-aha umele á sawa am haha á Aziya. Itare ba ta puwete ice-aatare áte Paul wá, ta naba fante hula: «Tá áme dawale-aha á \*Iserayiila-aha! Sawmbare! Náwa ɲane zhel na jemje dába am slede bademme, aɲkwa á balaterá waazu-aara ge emnde bademme, a bantsa ɲane ma miya emnde a Iserayiila, ma \*tawraitá á Muusa, ma mashidi á miya yaikke na, bademme baaka nampire-aara deki-deki á bina! Zlafe ádaliye, náwa a naba saa emnde a jeba umele á sem huđe á mashidi, a se badzanve slede cudedde na.» Daaci ta tsante ervaunde á emnde, ta naba eksevaa Paul.

<sup>29</sup> Ta kurken Paul a saa emnde a jeba umele á sem huđe á mashidi na wá, adaba ta naa Tauraufinus zhel emnde a Aifaisus, ta antara Paul am huđe á berni, daaci ta kurken a daa zhel ɲanna á dem mashidi keni.

<sup>30</sup> Labáre ɲanna de gyantegya huđe á berni bademme, emnde ta sawa á ba an zhagade, ta eksevaa Paul, ta tedese am mashidi, ta hadanu ge mashidi ba watsewatse.

<sup>31</sup> Itare tá kátá zlaanaazle shifa am Paul, amá kerten damda labáre á deza male á sawji-aha á Rauma geni weshaptewesha huđe á Urusaliima.

<sup>32</sup> Ba watsewatse, ɲane keni a dante male-aha am sawji-aha, ta naba jemaa sawji-aha ta dem tate á elva ɲanna. Emnde a ekse ba ta naa male á sawji-aha, antara sawji-aha-aara na wá, ta naba yaa ja Paul mázla-aara.

<sup>33</sup> Daaci duwa á male á sawji-aha á deza Paul, a eksevaahe, a ba ɲane á elvan ge sawji-aha: Puwawtepuwa tsavaytsavaye buwa áte ɲane. Lauktu a fantau ge ndáva sera á elva áte zhel ɲanna, a ba ɲane: Zhel ekse-ara ɲane? A gu uwe?

<sup>34</sup> Amá emnde bademme ma ware keni á ndáhá ba náza-aara, ura umele á hula ba dey. Am á cenánka jirire á názena ta janaa átugena na, a ba ɲane á elvan ge sawji-aha: Dawánda á dem dala á kure.

<sup>35</sup> Am sarte na daraada sawji-aha an Paul am tate á dálá á dem dala, ta naba eksante Paul am erva, ta kante á dem zhegela, adaba wáva na tá aɲkwa á dabaterá emnde a ekse an ɲane.

<sup>36</sup> Adaba tá aɲkwa á dabaterá á ba an ndzedá, antara hula, á ba itare: A daaka an shifa!

*Paul aɲkwa á ndáhá jirire á ire-aara*

<sup>37</sup> Herzhe sawji-aha tá dándá Paul á dem huđe á dala-aatare wá, a ba Paul á elvan ge male-aatare an elva a Yunaniɲkau: «Yá shánsha emtu baráma ge ndahak elva cekwaangudí?» A ɲwanante a ba ɲane: «Iyau, diyakdiya elva a Yunaniɲkau?»

<sup>38</sup> Una wá, mbate ka zhel emnde a Misera na jaaja ervaunde, a zhagadaa á dem kaamba antara kwakwáne-aha-aara debu ufade, tá an náza erva-aatare bademme na, una watse ka ɲane ka?»

<sup>39</sup> A ɲwete ge Paul, a ba ɲane á elvan ge ɲane: «Iya ya ba ura Yahudiya miyenne, ta yiya am berni á Tarsus am haha á Silikiya. Ya egdza a berni yaikke. Tasle á ɲa viteva seke baráma, yá ndaaterse elva-aaruwa ge zlamaakelaawa.»

<sup>40</sup> Male á sawji-aha na a naba yanaa baráma. Daaci a tsaahé ge Paul áte tate a dala á dem dala á sawji-aha, a katerante erva ge zlamaakelaawa, a magateraa nalaama ganakini a darufe. Tseriye darufa emnde bademme,

ba seke ndza baaka duksa. Daaci Paul a fantau ge ndaater elva an elva a Ibraniṅkau, amaana: elva a ekse-aara.

## 22

<sup>1</sup> «Ba estuwa egdzar mama-aha-aaruwa, antara dada-aha-aaruwa, cenawivaacena kwa, yá ndaakurndáhá elva-aaruwa palle, kwá cenvaacena jirire-aaruwa.»

<sup>2</sup> Am sarte na tá aṅkwa á cena Paul á ndaater elva an elva á Ibraniṅkau na wá, ta farhe ge mága tsekadfire, baaka ura á geja vuwa dekideki. Daaci a ba Paul:

<sup>3</sup> «Iya, ya ura Yahudiya, ta yiya am Tarsus am haha á Silikiya. Amá ya waltaa á ba am Urusaliima áhuna. Ndza malum-aaruwa \*Gamaliyail ge iya, a kwarisaa ṅane daba \*tawraitá á eggye-aha á miya áte una an puwa. Ndza ya dába Dadaamiya an ndzedá-aaruwa bademme áte una kwá aṅkwa á dabaná kure keni na.

<sup>4</sup> Ndza ya shateru zladá kwakya ge emnde a dába unṅule á Yaisu, ya sluvaa emnde ṅanna an zála-ka an ṅwasha-ka, ya puwateremhe am dangay.

<sup>5</sup> Male á \*liman-aha, antara male-aha á Yahudiya wá, itare diyardiya názena yá aṅkwa á ndaaná ya na bademme, yá ndaakur ba jirire. Ndza ta vitaa ba itare nalmesheri á seydire am erva, ya daterán ge Yahudiya-aha á miya na tá am Dimaska. Adaba una ṅanna ya duwa. Ya duwa ge sluva emnde na tá áte baráma á Yaisu, ge saterá á sem Urusaliima, ma andze tá se kyáná male-aha á Yahudiya-aha shairiya-aatare.»

### *Paul á ndáhá fakte á fetarfire-aara áte Yaakadada (9:1-19; 26:12-18)*

<sup>6</sup> «Am sarte na yá aṅkwa á dem Dimaska ṅanna wá, á maga vacitire wá, a naba tsekwa ge parakkire yaikke á sa am samaya á sete ya,

<sup>7</sup> ya naba mbedehe, yá cena ba kwará á ura aṅkwa á biya elva: Sawulu! Sawulu! Labára ká magiya palasa? a bina.

<sup>8</sup> Ya ndavanuhe: Ka ware ṅane ka Yaakadada? A ṅwiyante, a ba ṅane: Ba iya Yaisu, ya ura Nasarátu una ká aṅkwa á magiya palasa na.

<sup>9</sup> Emnde na tá antara ya na wá, naránna parakkire, amá cenanánka kwará á edda una a biyaa elva na.

<sup>10</sup> Ya naba enndáva: Yá maganá estara kina Yaakadada? A ba Yaakadada á elvan ge iya: Tsetse ezzlálá á dem Dimaska, watse tá de bakánba áhuwa názena a fakaara Dadaamiya bademme.

<sup>11</sup> A naba wulfiyaahe ge parakkire yaikke na a tsekwiyaare á sawa am samaya na, ta tadíya an táda emnde na tá antara ya na á dem Dimaska.

<sup>12</sup> «Aṅkwa ura Yahudiya á miya áhuwa, zhera-aara Hananiyas, ṅane sledaba Dadaamiya an ndzedá-aara bademme, ṅanaaṅa \*tawraitá á miya ba shagera, bademme á Yahudiya-aha na tá am Dimaska hayaránhayá jipu.

<sup>13</sup> A duhe ge ṅane ádezerwa, a de tsiyarhe, a ba ṅane á elvan ge iya: Sawulu egdza emmerwa, a wertewera ice-aha á ṅa. Ba watsewatse a naba werte ge ice-aha-aaruwa, yá nanna ṅane.

<sup>14</sup> A ba Hananiyas ṅanna á elvan ge iya: A saksaa ba Dadaamiya á eggye-aha a miya werre, geni ekka ká nanna edda una slejirire ba ṅane palle na, antara ganakini ekka ká cenvaacena elva á slejirire ṅanna am mbuwe-aara ba ge ṅane, ira ká diyeddiye namaari-aara.

<sup>15</sup> Adaba ká de gev seyde-aara, ká de ndaater názena ka naanaa ka, antara názena ka cenaanaa ka ge emnde.

<sup>16</sup> Ká ufa uwe mázla-aara? Tsetse ká lyevaalya baptisma, enndava Yaisu geni a melakumele, a barakaabará Dadaamiya haypa-aha á ña.»

*Paul anƙwa ndaha elva á duwa-aara á dem dágave á emnde a jeba umele*

<sup>17</sup> «Haraahare wá, ya naba eptsá á sem huđe á Urusaliima. Vacite umele yá am mashidi, yá anƙwa á maga maduwa wá, ya naba shaa wahayu.

<sup>18</sup> Ya naa Yaakadada am wahayu-aaruwa ñanna, a ba ñane á elvan ge iya: Tsetse watsewatse dedde am huđe á Urusaliima na. Adaba emnde a ekse na tá de liyeka seydire na ká de maganá ka áte iya am dágave-aatare.

<sup>19</sup> Ya ñwete, a ba ya á elvan ge ñane: Amá degiya Yaakadada, ba itare keni diyardiya ganakini ndza ya duwa ba ya ñanna á dem mashidi-aha gergere, ya sluwa emnde a fetarfe á ña, ya jaterja, ya dateraa á dem dangay bademme.

<sup>20</sup> Am sarte á ja sleslera á ña Aitiyain keni ndza yá anƙwa, ya hayáterháya jipu emnde a ejja-aara, ya ufanaa ba iya nangyuwe-aha-aatare.

<sup>21</sup> Amá a ba Yaakadada: Edduwa, adaba watse yá belakbelá yiyiye, á dem dágave á emnde na ta Yahudiya-aha-ka na.»

*Paul á katafke á male á sawji-aha*

<sup>22</sup> Emnde bademme ndza tá cená ba Paul dem sarte na a fem elva á emnde na garevka Yahudiya-aha. Amá ba a ndaahese una ñanna wá, ta naba puwar hula, a ba itare: Ura estuwa a njeka an shifa dekideki.

<sup>23</sup> Daaci tá anƙwa á fa hula, tá slatsa erva, ta tsante berbere an dága haha á dem zhegela, ta tsakwese am záne-aha-aatare, ta naba puwanve.

<sup>24</sup> Daaci a ba male á sawji-aha a daránda Paul á dem huđe á dala, a zaruze an ja ba shagera, lauktu watse á ndáhá jirire, labára emnde bademme tá slatsa ba erva áte ñane.

<sup>25</sup> Daaci ta naba puwete zawa áte ñane. Tá kátá ejja wá, a ba Paul á elvan ge zhel sawji ñanna: «Anƙwa baráma á kure ge ja ura Rauma miyenne zlaƙe kyareka shairiya-aara emtu?»

<sup>26</sup> Ba a cenaa una ñanna sawji na, a naba yánhe, duwa-aara á deza male-aatare, a ba ñane á elvan ge ñane: «Ázara á ba sawari á ña áte zhel na, adaba ñane keni ba ura Rauma ba miyenne?»

<sup>27</sup> A naba sawhe ge male á sawji-aha na áseza Paul, a ba ñane á elvan ge ñane: «Ndindáhá ba jirire: Ka ura Rauma ba miyenne emtu?» A ñwete ge Paul, a ba ñane: «Ya ura Rauma ba miyenne.»

<sup>28</sup> A ba male á sawji-aha na á elvan ge Paul: «Iya degiya danedde am nalmane kwakya lauktu náwa ganevge ura Rauma.» A ba Paul á elvan ge ñane: «Iya wá, ta yi ba estuwa ya ba ura Rauma.»

<sup>29</sup> Daaci sawji-aha na ndza ta magaa niya ge ja Paul, geni a ndasendáhe jirire na, ta naba yánhe á ba áte watsewatsire. Ba male-aatare an ire-aara keni jaaja lyawa, adaba diyeddiye ganakini Paul ñanna ñane a puwete záwa áte ñane na ba ura Rauma miyenne.

*Paul á katafke á male-aha á Yahudiya-aha*

<sup>30</sup> Daaci male á sawji-aha na maa, ñane á kátá á diyeddiye jirire á názena ni Yahudiya-aha wayarka an Paul dekideki na. Adaba una ñanna, makuralla-aara wá, a jemaa male-aha á \*liman-aha, antara male-aha á Yahudiya-aha, a pelaa Paul, a sanse á se katafke-aatare.

## 23

<sup>1</sup> Paul a zharaa emnde na tá am jáháva ṅanna ba shagera, daaci a ba ṅane á elvan ge itare: «Egdzar mama-aha-aaruwa, iya wá, diyandiya ganakini sem vatena keni shagera zlááva-aaruwa á katafke á Dadaamiya, ya ba cudfedfe duksa-aaruwa.»

<sup>2</sup> A ba Ananias male á \*liman-aha á elvan ge emnde na ta herzhe an Paul: Jauvaaja áte we-aara ṅanna!

<sup>3</sup> A ba Paul á elvan ge ṅane: «Ekka keni sey á jakvaaja Dadaamiya, egdza á danṅwa huḍe. Ka njehe ganakini ká kyivaara shairiya áte una am \*tawrait, amá ka ebzu tawrait, adaba a ba ka a jarija!»

<sup>4</sup> A ba emnde na ta herzhe an ṅane: «Ká zlazla male á liman-aha á Dadaamiya?»

<sup>5</sup> A ba Paul á elvan ge itare: «Ndza diyanka ganakini male á liman-aha egdzar mama-aha-aaruwa. Adaba a ba wakita á Dadaamiya: Ndaheka elva mandzawe áte male á ekse á kure ḍekidēki.»

<sup>6</sup> Diyaadiya Paul, ganakini emnde tá an tega gergere buwa á ba am jáháva ṅanna. Emnde umele-aatare, ta \*Saduki-aha, emnde umele keni ta \*Farisa-aha. Adaba una ṅanna, a kante kwára á ba an ndzedá, a ba ṅane á elvan ge itare: «Egdzar mama-aha-aaruwa, iya wá, ya Farisa, ta yiya á ba am huḍe-aara. Ta se puwiyar ugje ázekure adaba fetarfire-aaruwa áte elva a tse á emnde am faya.»

<sup>7</sup> Ba ndasendáha ṅane una ṅanna wá, njaanja gajawe yaikke am dágave á Farisa-aha, antara Saduki-aha, kertenṅ an tega ye á emnde gergere buwa am jáháva ṅanna.

<sup>8</sup> Saduki-aha, itare fartareka ḍekidēki áte elva a tse á emnde am faya na. Ma malika-aha, ma shedekwe á uwe keni baaka ḍekidēki. Amá Farisa-aha wá, fartarfe ganakini anṅwa duksa-aha ṅanna bademme.

<sup>9</sup> Am garanvege gajawe-aatare yaikke á ba an ká kwára á dem zhegela, ta naba tsetehe ge emnde umele am malum-aha á \*tawrait na ta Farisa-aha, ta ṅgyaiṅgyesaa ice, a ba itare: «Shaṅeránka ṅere haypa áte zhel na ba palle keni. Watse ba jirire a ndansaa ba shedekwe, bi malika á Dadaamiya elva ka wá, dey ka!»

<sup>10</sup> Tsarantetse gajawe yaikke zlaḅe adaliye, a naba ja ge lyawa male á sawji-aha na geni a dzadzaraaka Paul, a naba belaa sawji-aha-aara, ta tsekwehe á dem jáháva ṅanna, ta de tedese Paul am jáháva, ta ḍalese an ṅane á dem dala-aatare.

<sup>11</sup> An vayiya ba vacite ṅanna wá, Yaakadada a naba maranse ire-aara ge Paul, a ba ṅane á elvan ge ṅane: «Gazleka ḍekidēki! Magakanaamága seydire áte ya am huḍe á Urusaliima áhuna, yá kátá ká de emmága ba estuwa am Rauma keni.»

### *Yahudiya-aha ta puwaa buwe áte shifa á Paul*

<sup>12</sup> An enṅya makuralla-aara wá, Yahudiya-aha umele ta naba zlauhe am ndaha, ta zu ba wadā-aara geni ba uwe keni tá zeka, tá sheka ḍekidēki, sey má jareja shifa á Paul.

<sup>13</sup> Emnde na ta ṅgudāa sawari á una ṅanna ta kul ufade an duksa.

<sup>14</sup> Daaci ba zláá-aatare ádeza male-aha á \*liman-aha, antara male-aha á Yahudiya-aha, a ba itare tá elvan ge itare: «Náwa ṅere ṅa zu ba wadā-aara, ganakini ma uwe keni ṅá feka áte we á ṅere ḍekidēki, sey máki jaṅerja shifa á Paul.

<sup>15</sup> Kina kure wá, belawanvebela ba we ge male á sawji-aha á Rauma, ganakini a sakuransa Paul á se katafke á \*kendekyiya yaikke. Magaumága

ba seke kwá se kya shairiya-aara á ba an jirire, náwa ñere ñá de puwanve buwe, ñá zланаazle shifa-aara, á se cuwakurvaaka kure ðekideki.»

<sup>16</sup> Amá anƙwa egdzere zhele, egdza á egdza emmenara mukse ge Paul, ñane cenáncena lámare ñanna. Daaci ba zlála-aara ge ñane á dem dala á sawji-aha, a de fanem elva ñanna am vuwa ge Paul.

<sup>17</sup> Paul a ðante sawji palle, a ba ñane á elvan ge ñane: «Kwaye danda egdze na ádeza male á kure, adaba anƙwa názu á de ndaná ñane.»

<sup>18</sup> Sawji na a naba puwansehe ge egdze na ádeza male-aatare, a ba ñane á elvan ge ñane: «Anƙwa dangay palle zhera-aara Paul, a bántsa ñane yá saká egdze na, adaba anƙwa názu á se ndakndáha.»

<sup>19</sup> «Ane!» a ba male na, a ñaa egdze ñanna áte erva, a gapse antara ñane ba itare ta buwa, a ba ñane á elvan ge ñane: «Enndáha elva á ña.»

<sup>20</sup> A ba egdze na á elvan ge ñane: «Kwaye Yahudiya-aha zlaruzle am ndáhá, ganakini tá se ndavaku Paul makuralla geni ká dateránda á de katafke á \*kendekiyi á ñere yaikke, tá se magán ba seke watse tá de kya shairiya-aara á ba an jirire am kendekiyi,

<sup>21</sup> amá ceneka ndáva-aatare ðekideki. Adaba emnde kul ufaðe ju duksa tá de puwa buwe áte Paul, ta zu ba waða-aara geni ba uwe keni tá zeka, tá sheka ðekideki, sey má jareja shifa-aara. Kina wá, itare zlaruzle am ndáhá-aatare baðemme, a juwa tá ufa ba jawapa na ká de vatertá ka.»

<sup>22</sup> «Ane!» a ba male á sawji-aha na. «Ezzlála kwa, amá ndanka ma ge ware keni ganakini ka se mbediyumbede.»

### *Male á sawji-aha á daná Paul ge raizhaun*

<sup>23</sup> Am iga á una ñanna maa, a detaa male-aha buwa am sawji-aha, a ba ñane á elvan ge itare: «Jawammeje sawji-aha deremke buwa, emnde a belsa kul vuye, emnde na tá duwa an upa am erva keni deremke buwa. Baðemme á kure ngwadawápsenƙwadé, watse kwá maga shula á dem Kaysariya am saa maselmana á vayiya.

<sup>24</sup> Puwaupuwa belsa-aha na watse kwá dá Paul átekwa ba lapilayye, ba slerba a sera-aara keni a keðeka, sey kwá de fanem am erva ba ge raizhaun, ba ge Failikus an ire-aara.»

<sup>25</sup> Daaci a puwaterte nalmesheri, a vaterte am erva, a ba ñane:

<sup>26</sup> «Ambarka á ña sleksu Failikus: Ba iya Kalawdiyus Lisiyas, yá anƙwa gak use-aaruwa.

<sup>27</sup> Zhel na kwaye tá anƙwa á dakánda na wá, ta eksevaa Yahudiya-aha, tá kátá já ba shifa-aara. Amá de cenánncena ya ganakini ñane keni ba ura Rauma, daaci ya naba duhe antara sawji-aha-aaruwa, ya lyanse am erva-aatare.

<sup>28</sup> Ya kátá dise jirire á názena ni Yahudiya-aha ta yaa zhel ñanna adaba ñane, ya naba danhe á de katafke á male-aha-aatare am \*kendekiyi.

<sup>29</sup> Amá názu ya disaa ya am mága-aatare ñanna wá, hyafka ge ja shifa á zhel na, ma ba ge ngudanaa am dangay keni, adaba ta gajawe á ba arge názu am \*tawrait-aatare.

<sup>30</sup> Amá a sem ge ura a se mbediyuhe wá, a ba ñane: Yahudiya-aha ngudarnaanguda sawari-aatare geni sey máki jareja shifa á Paul. Adaba una ñanna, yá anƙwa bela emnde-aaruwa ba watsewatse tá dakánda zhel ñanna ge ekka. Ya ndaaterndáhá ge kelaade-aha á zhel ñanna geni a de puwarpuwa ugje-aatare ázene arge ñane.»

<sup>31</sup> Daaci sawji-aha wá, itare ta maganaa á ba áte una ta ndaaterndaha na. Ta eksante Paul, á ba an vayiya ñanna, ta danhe emtsaade á dem Antipatris.



<sup>32</sup> Makuralla-aara wá, ta eptsehe ge emnde na tá an sera na, ta yaa sawji-aha na tá áte belsa-aha tá an̄kwa á dándá.

<sup>33</sup> Ba demda-aatare ge sawji-aha na am Kaysariya, ta vante nalmesheri na ge raizhaun̄, ta yaa Paul am erva-aara.

<sup>34</sup> Raizhaun̄ a ndaase nalmesheri na catte, daaci a ndavanu ge Paul, a ba ñane: «Ka ura á haha-ara?» A shantuwa estuwa geni Paul ura haha á Silikiya.

<sup>35</sup> Daaci a ba ñane á elvan ge ñane: «Watse yá kya shairiya á ña má saremsa emnde a dágala á ña.» Daaci a ba ñane á elvan ge sawji-aha: De belawembela Paul am hud̄ga na ndza a nderanaa sleksu \*Hirudus na.

## 24

### *Yahudiya-aha tá an̄kwa á puwar ugje ge Paul*

<sup>1</sup> Am iga á háre ilyeḃe, lauktu a semhe ge Ananiyas male á \*liman-aha á sem Kaysariya. A sawa antara male-aha á Yahudiya-aha, antara Tairtulus, ñane edda una diyaadiya shairiya-aha á ngumna a Rauma ba shagera na. Daaci duwa-aatare á de katafke á Failikus, ta de puwar ugje ge Paul ázeṅara.

<sup>2</sup> Daaci ḃarantedáhá Paul á sawa, Tairtulus ñara a naba fantau ge tsáká elva áte Paul, a ba ñane á elvan ge Failikus: «Ambarka á ña, adaba barka á ña una an̄kwa hairire am larde na; adaba kwakyire á en̄kale á ña am slera-aha, duksa bademme tsemaartse am larde á miya.

<sup>3</sup> Njá an̄kwa á slafaká we á ñere kwakya adaba názena ña shanaa ñere ázeṅa bademme na.

<sup>4</sup> Hyainefka ba názara keni ge tsakakaa elva kwakya á katafke á ña, amá adaba kemaarire á ña wá, tásle á ña cenañervaacena egdza elva á ñere na ba cekwaan̄gudí.

<sup>5</sup> Ñere wá, ña bera zhel na kelaade jipu. Bademme á Yahudiya-aha na tá am huḃe á duniya a weshatertaa ba ñane. Ba ñane ñanna zlaḃe adaliye una male á emnde a dábá náza tsaha á ura Nasarátu.

<sup>6</sup> Zlaḃe adaliye, á kátá á nyamala mashidi á ñere. Mázla-aara wá, ña naba eksevaahē. ((Njá kátá maganá shairiya áte una am \*tawraitá á ñere,

<sup>7</sup> amá a se lyevaahē ge Lisiyas male á sawji-aha á ba an ndzeḃa am erva á ñere.

<sup>8</sup> Daaci a bañerna ba Lisiyas ganakini njá sawa ásezeṅa.)) Máki ká an̄kwa á ndavanundave wá, watse ká diyeddiya ba ka keni, geni ña emnde a jirire ba ñere.»

<sup>9</sup> Yahudiya-aha ta farhe zlaḃe adaliye, a ba itare: Elva na a tsakanaa Tairtulus na, ba palle keni baaka fida am huḃe-aara, bademme ba jirire.

### *Paul an̄kwa á ndáhá elva áte ire-aara á katafke á Failikus*

<sup>10</sup> Daaci a maganaa nalaama ge Paul an erva, geni ñane keni a enndáhá elva-aara. A ba Paul: «Ámbarka á ña, diyandiya ganakini gákga yawe kwakya ka sleshairiya am larde na. Adaba una ñanna, yá higa á ba an higa ge ndakse elva áte ire-aaruwa.

<sup>11</sup> Duwa-aaruwa á dem Urusaliima ya de kezlan ugje ge Dadaamiya wá, máki ká habaza sera-aara, bademme keni á jauka am háre kelaawa ju buwa.

<sup>12</sup> Sharika am gajawe antara ura am \*mashidi yaikke, ma am egdzar \*mashidi-aha á Yahudiya-aha, ma am huḃe á ekse keni ḃekidēki.

<sup>13</sup> Ba emnde ñanna náwa itare na keni tá sanseka názena ni ta yiyaa adaba ñane na.

<sup>14</sup> Názu yá an ñane ge ndakndáhá náwa yá á katafke á ña wá, iya yá ankwá á maganá slera ba ge Dadaamiya na ndza ta d'abanaa eggye-aha á ñere na palle, yá ankwá maganá an unñule áñwaslire na a ba itare una wecire na. Amá ba jirire, iya fantarfe áte názena am \*tawraitá, antara elva á nabi-aha bademme.

<sup>15</sup> Iya keni tamtamire-aaruwa á ba áte názena ni tá ankwá á tamaná itare. Yá an táma geni watse Dadaamiya á tsatertetse emnde am faya, emnde a jirire, antara emnde a mándzawe bademme.

<sup>16</sup> Adaba una ñanna yá ankwá á wava geni a njaninja lapiya á katafke á Dadaamiya, antara á katafke á emnde bademme.

<sup>17</sup> «Am ya magaa yawe kwakya ya baaka am Urusaliima, ya naba saa, ya sawa an shungu ge melateru ge emnde a larde-aaruwa, ya se vante antara sadake-aaruwa ge Dadaamiya.

<sup>18</sup> Náwa názu ya de maganaa ya am mashidi am sarte na ta eksiyeksa ñanna: Emtsaadé wá, iya keni ya dem dágave á emnde na tá ankwá á bárá na. Ndza baaka dikele á emnde ázerwa, baaka hula dekideki.

<sup>19</sup> Amá ndza tá ankwá Yahudiya-aha umele ta sawa á sa am haha á Aziya wá, ma andze tá ndaaka itare máki ankwá duksa mándzawe ta naana itare am mága-aaruwa.

<sup>20</sup> Emtu máki ankwá haypa na ta shanaa itare áte ya am sarte na ta de tsiyaa á katafke á male-aha na, a ndarndaha ba emnde ñanna náwa itare.

<sup>21</sup> Máki elva-aaruwa ba una ya ndaase á ba an ká kwará, a ba ya á elvan ge itare: Kwa tsiyaa am shairiya vatena na wá, adaba fantarfe áte tse á emnde am fáyá baaka duksa umele.»

<sup>22</sup> Am Failikus diyaadiya njá á emnde a fetarfe, a naba daa shairiya ñanna á de katafke, a ba ñane á elvan ge itare: «Sey má samsa Lisiyas male á sawji-aha, lauktu watse yá ica shairiya á kure.»

<sup>23</sup> Daaci a ba ñane á elvan ge male á sawji-aha na Paul am erva-aara na: «Eptsanaaptsa zhel na á dem bere, de fawanufe hyema ba shagera, amá wá, fawarka zlaða, yawáterya slakate-aha-aara, a darduwa á dezeńara, a magaranánmaga nampire.»

### *Waazu á Paul á katafke á Failikus antara Durusilla*

<sup>24</sup> Am iga á hare cekwaangudí maa, samsa Failikus, tá antara mukse-aara Durusilla gyaale á Yahudiya-aha, daaci ta d'ahanante Paul ge cena elva a fetarfire áte Yaisu \*Almasiihu am mbuwe-aara.

<sup>25</sup> Daaci fantaufa Paul ge tsaka elva-aha áte njá am jirire na baaka duksa mándzawe áte edda-aara dekideki, antara elva a kwára vuwa, geni á kwaruwa estara ura vuwa-aara, antara elva a shairiya á emnde na watse á kyaná Dadaamiya am halavuwa á duniya. Amá gazlaagazla Failikus, a ba ñane á elvan ge Paul: «Ezzlala kwa mázla-aara, watse yá d'akdáha zlaße ádaliye vacite umele má shanásha sarte.»

<sup>26</sup> Zlaße ádaliye, Failikus maa, ñane a kurken watse Paul á vante egdza shungu. Adaba una ñanna, máki shekwaashekwa wá, ba á eddáhá ádezeńara tá de shá uya kerde.

<sup>27</sup> Yawe buwa kalkale Paul á ba am danggay, dem sarte na ta naba daa Failikus ñanna, ta saa Paurkiyus Faistus á sem kela-aara. Daaci Failikus a naba yaa Paul am danggay, adaba a kataa háyá áza Yahudiya-aha.

## 25

### *Paul á kátá á kyáná slekse á Rauma shairiya-aara*

<sup>1</sup> Sawa á Faistus á sem haha ñanna keni zlaɓe ba hare keye, amá a naba tsete am Kaysariya, a zlala á dem Urusaliima.

<sup>2</sup> Daaci male-aha á \*liman-aha, antara male-aha á Yahudiya-aha umele ta de puwar ugje ge Paul á katafke-aara keni. Baira a ba itare tá elvan ge Faistus:

<sup>3</sup> «Máki ká bashañeraabasha wá, sañeránsa Paul á sem Urusaliima.» Ta ndavanu estuwa ge slekse na wá, adába zlarauzle am ndaha-aatare, tá kátá ja shifa á Paul áte baráma.

<sup>4</sup> Amá a ñwete ge Faistus, a ba ñane á elvan ge itare: «Paul ankwá am danggay, iya keni yá eptsa ba kina á da.

<sup>5</sup> Máki ankwá haypa na a maganaa zhel ñanna wá, a dɓabaridába male-aha á kure á dem Kaysariya ñanna, tá de puwar ugje-aatare áhuwa.»

<sup>6</sup> Faistus haraahare ázetare am Urusaliima, a magaa hare tiise, ma kelaawa keni á hyephye, lauktu a eptsehe á sem Kaysariya, ta saa á dɓabaná male-aha á Yahudiya-aha ñanna. Makuralla-aara, a de njehe am bere á shairiya, a ndaase elva-aara, ta de sanaa Paul.

<sup>7</sup> Ba ta puwete ice-aatare áte Paul Yahudiya-aha na ta sawa am Urusaliima na wá, ta naba jantaave ge Paul, ta fantau ge tsaka elva-aha na bademme ba ser haypa na áte ñane. Ta icar sera, amá dzegwaránka njante jirire á názena ta tsakanáa itare ñanna dɓekidɓeki.

<sup>8</sup> Amá a tsete ge Paul, a ndaase elva áte ire-aara, a ba ñane: «Iya baaka haypa na ya maganaa ya dɓekidɓeki, ma áte \*tawraitá á Yahudiya-aha, ma áte \*mashidi yaikke, ma áte male á larde á Rauma keni.»

<sup>9</sup> Am Faistus á kátá háyá áza Yahudiya-aha, a ba ñane á elvan ge Paul: «Wayak-wáyá emtu dem Urusaliima geni yá de ica shairiya á ña á ba áhuwa, adába ugje na ta puwakarpuwe na?»

<sup>10</sup> A ñwete ge Paul, a ba ñane á elvan ge ñane: «Náwa iya yá tse am tate á shairiya áte náza á ñgumna a Rauma, yá kátá á icevica shairiya-aaruwa á ba áhuna, ganateruka ya haypa ge Yahudiya-aha ba ka keni diyakdiya bademme.

<sup>11</sup> Ma andze ankwá haypa na ya maganaa ya, hyephye ge ja shifa-aaruwa wá, ma yá kwaleka shifa-aaruwa dɓekidɓeki. Amá am baaka jirire am puwa ugje-aatare na ta se puwiyar ge iya na wá, yá dzegwánka faterem shifa-aaruwa am erva ba estuwa. Tasle á ña dánda shairiya-aaruwa ádeza male á larde á Rauma.»

<sup>12</sup> Daaci Faistus a dɓahaterte male-aha na tá am ekte ge ñane na. Zlaruzle am sawari-aatare, a ñwanante ge Paul, a ba ñane: «Ka ndavanaa ba ka tsawe geni yá dákda ádeza male á larde á Rauma wá, ba tá dákdekwa ádezenara mazla-aara.»

### *Paul á katafke á sleksu Agaripa ta antara Bairnike*

<sup>13</sup> Haraahare cekwaangudí wá, samsa sleksu Agaripa, tá antara Bairnike, ta se gan use ge Faistus.

<sup>14</sup> Am haraahare cekwa áhuwa, Faistus a naba shanu elva a Paul ge sleksu Agaripa, a ba ñane á elvan ge ñane: «Ankwá zhel umele an ñgudá áhuna, kwaye ta eksanaa am zamane á Failikus, amá a yán ba estuwa zlaɓe kyaaveka shairiya-aara.

<sup>15</sup> Am sarte na danemda ya am Urusaliima, ta puwar ugje zlaɓe adaliye male-aha á \*liman-aha, antara male-aha á Yahudiya-aha umele ázerwa, ta biyantsa itare: Sey yá mbedanaambɓɓa am shairiya.

<sup>16</sup> Daaci a ba iya yá elvan ge itare: Am shairiya á emnde a Rauma wá, tá mañka estuwa. Sey tá jatermeje emnde a puwar ugje ge ura, antara edda

una ta puwar ugje na, ɲane keni á shánsha baráma, á ndaasendahe elva áte ire-aara. Má baaka una wá, á taa gevka.

<sup>17</sup> Itare keni ta naba sawa antara ya, iya keni se njanka an elva ɲanna ɔ́kideki; ba makuralla-aara wá, ya naba dem bere á shairiya.

<sup>18</sup> Ta tsetehe ge kelaade-aha á zhel ɲanna, ta ndaase elva-aatare baɔ́emme, mbate ba palle á elva yaikke na a guwaa ɲane keni baaka. Iya wá, ndza ya kurken ankwá elva yaikke a guwaa ɲane.

<sup>19</sup> Tá ga jawe á ba arge elva-aha na am nadina-aatare. Ankwá zlaɔ́e adaliye zhel umele zhera-aara Yaisu ɲane emtsamtsa, a ba Paul tsetse am faya, ankwá an shifa.

<sup>20</sup> Am iya keni diyanka sera á elva-aatare ɲanna, a ba iya yá elvan ge Paul: Ká eksaareksahe dem Urusaliima, tá de kya shairiya á ɲa na áhuwá?

<sup>21</sup> Amá a ba Paul: Tasle á ɲa dánda shairiya-aaruwa ádeza male á larde á Rauma. Daaci a ba iya yá elvan ge emnde-aaruwa: Eptsawanaptsa emtsaade á dem bere. Kina watse yá belaná ádeza male á larde.»

<sup>22</sup> A ba sleksu Agaripa á elvan ge ɲane: «Iya keni yá kátá cenevaacena á ba an hyema-aaruwa elva á zhel ɲanna.» «Watse ká cenevaacena kwa makurálla,» a ba Faistus.

<sup>23</sup> Makuralla-aara wá, njaanja samnawa, emnde tá ankwá á puwa sleksu Agaripa, tá antara Bairnike á dem bere á jáháva, itare wá, tá am dágage á sawji-aha, antara male-aha á larde. Ba demda-aatare wá, a ba Faistus: A saransa Paul. Ta sateranhe.

<sup>24</sup> Daaci a ba Faistus: «Ya ndaa ba kure sleksu Agaripa, antara kure emnde na kwá antara ɲere am huɔ́e á bere na baɔ́emme: Zhel na náwa ɲane á katafke á miya na wá, Yahudiya-aha baɔ́emme ta se puwar ugje ázerwa. Ma áhuna, ma ya dem Urusaliima keni, tá biya ba a njeka zhel ɲanna an shifa.

<sup>25</sup> Amá iya wá, shanáka haypa á zhel na ba palle keni am elva-aha-aatare ɲanna hyefhye ge ja shifa-aara. Iyau, a ndavanaa ba ɲane tsawe geni yá dánda shairiya-aara ádeza male á larde á Rauma wá, kina ya magaa niya ge dáná á dehuwa.

<sup>26</sup> Amá baaka elva a jirire na yá puwante ge male á larde am elva a zhel na. Ya sanaa adaba una ɲanna á se katafke á kure, kwakya-aara ba ka ámbarka á ɲa sleksu Agaripa, geni yá shansha názu yá puwetepuwa má zlamiyuzle am hábaza sera á elva ɲanna.

<sup>27</sup> Adaba eksaaka ire-aaruwa dá dangay, tá de kya shairiya-aara am tate umele ni, jirire á názena ta se puwar ugje adaba ɲane keni, yá taa palanaaka na.»

## 26

### *Paul ankwá á baná jirire-aara ge Agaripa*

<sup>1</sup> A ba sleksu Agaripa á elvan ge Paul: «Kina wá, ká naba ndáhá elva áte ire á ɲa.» Daaci a ketaa erva-aara Paul, a fantau ge ndaha elva áte ire-aara, a ba ɲane:

<sup>2</sup> «Ámbarka á ɲa sleksu Agaripa, vatena wá, yá higa jipu ge ndaase elva áte ire-aaruwa á katafke á ɲa, yá higa ge ndaase názena ni ta puwiyar ugje Yahudiya-aha adaba ɲane na baɔ́emme.

<sup>3</sup> Kwakya-aara wá, ervaunɔ́e-aaruwa á higa adaba ekka diyakdiya naɔ́e-aha á Yahudiya-aha, antara názena á saterá gajawe ge itare baɔ́emme. Adaba una ɲanna, tasle á ɲa fifa ervaunɔ́e, cenivaarcene elva ɲanna.

<sup>4</sup> «Bademme á Yahudiya-aha diyardiya nja-aaruwa, diyardiya nja-aaruwa am egdzarire am dágave á emnde-aaruwa, antara nja-aaruwa am Urusaliima bademme.

<sup>5</sup> Ta diyise werre Yahudiya-aha. Ma andze wayarwáyá wá, ba itare keni ma tá ndaasende nja-aaruwa werre am sarte na yá am dágave á emnde á miya \*Farisa-aha, ndza nannaana nadina á miya an ervaunde-aaruwa palle, janateruje ge Yahudiya-aha umele.

<sup>6</sup> Ta siyaa á sem shairiya na wá, adaba fantarfe áte názena ni Dadaamiya a magateraa waada-aara ge eggye-aha á miya werre, a bántsa nane watse á de vaterteva ge emnde-aara na.

<sup>7</sup> Bademme á emnde á miya jeba-aha gergere kelaawa ju buwa na, tá ankwá á tama ba duksa nanna am ire-aatare. Adaba una nanna, an vayi vacika tá ankwá á kezlan ugje ge Dadaamiya. Ta puwiyar ugje Yahudiya-aha á miya adaba ba tama áte duksa nanna ámbarka á na slekse!

<sup>8</sup> Kure Yahudiya-aha na kwá áhuna na, ábi diyamidiya miya ganakini Dadaamiya á de tsatertetse emnde am faya? Ay labara kena kwá fetarka?

<sup>9</sup> «Werre wá, ba iya an ire-aaruwa keni ndza baaka názu maganka áte emnde a daba Yaisu ura Nasarátu, geni a nyainyairanvenyainye á ba an we-aatare zhera á Yaisu.

<sup>10</sup> Názu ndza ya maganaa ya am Urusaliima ndza ba una. Male-aha á \*liman-aha ta vite hákuma ba ge nane, geni ma ya shateraa áme keni, yá halaterá á ba á dem dangay. Ya ngwadaa emnde a fetarfe kwakya. Má ta kyaterá shairiya á emtsa, yá ba: Yawwaa shagera!

<sup>11</sup> Bademme á tate na ankwá \*mashidi á Yahudiya-aha átekwa, ya de shateru laruwa kwakya am huđe-aara, baaka názu ndza maganateranka geni a puwaranvepuwe fetarfire-aatare. Mbertembera ervaunde-aaruwa wá, dem ekse á emnde keni ya dabateremhe, ya de magateraa palása.»

*Paul ankwá á ndáhá elva a fetarfire-aara  
(9:1-19; 22:6-10)*

<sup>12</sup> «A tsitaa ba una nanna vacite umele ge dem Dimaska, male-aha á \*liman-aha ta naba vite hákuma bademme, antara nalmesheri am erva, geni yá de maga hákuma-aaruwa áhuwa.

<sup>13</sup> Daaci ba ná ankwá á zlalá antara kwakwáne-aha-aaruwa, magaamaga vacitire wá, a naba tsekwanjerarhe ge parakkire umele á sa am samaya wá, jauje ba ge vaciya piyuuwe an wulwulire, a se janertaavehe;

<sup>14</sup> kreppe mbaďanjermbáďa á dem áhá bademme. Daaci yá cena ba kwará á ndahi elva: Sawulu! Sawulu! Labára ká magiyá palasa? An degdegire á ire na ká ankwá á maganá ka na wá, ká ankwá á maganná palasa ba ge ire á na, seke názá á dalau na á shá wáwa áza edda-aara an serawďa.

<sup>15</sup> Ya nwanante: Ka ware nane Yaakadada? Ba iya Yaisu na ká ankwá á maganá palasa na, a ba Yaakadada.

<sup>16</sup> Amá wá, naba tsetse, tsaatse an sera á na. Ya marakaa ire-aaruwa, adaba ya eksakse ganakini ká gevge sleslera-aaruwa. De ndaterndaha bademme geni ka nina vatena. Názu watse yá marakaná á katafke na keni, sey ká ndaterndaha bademme ge emnde.

<sup>17</sup> Yá beláká á dem dágave á Yahudiya-aha, antara emnde a jeba umele, yá lyakselya am zladá-aha na watse tá fáná itare áte ka.

<sup>18</sup> Yá belak geni ká de weratertá ice, ká de satersese am tabedammire, ká saterá á sem parakkire, ká nzelatersá am erva á Shaitaine, ká saterá á sem \*kwará á Dadaamiya. Yá beláká á deza emnde nanna, geni a fartarfe áte



iya, tá shansha bára haypa-aha-aatare, tá shánsha slefe-aatare am dágave á emnde á Dadaamiya.»

*Paul anƙwa á ndáhá elva á slera-aara*

<sup>19</sup> «Adaba una ɲanna, ámbarka á ɲa sleksu Agaripa, ya maganaa fesarfire ge Yaakadada am názena a marinaa ɲane á sá am samaya baɗemme na.

<sup>20</sup> Ya naba fantau ge magateraa waazu ge emnde a Dimaska emtsaɗe, antara ge emnde a Urusaliima, lauktu ya jaa dába am larde á Yahudiya-aha baɗemme, lauktu ya fantau ge dem larde á emnde a jeba umele. Ya ɗaterɗáhá baɗemme geni a sarsawa á sem sera á Dadaamiya, a magarmága tuba arge haypa-aha-aatare. Ya ndaterndáhá geni a magarmága shagerire, ta de disa áte una ɲanna emnde geni magarnaamaga tuba a jirire.

<sup>21</sup> Ta eksiya adaba ba una ɲanna Yahudiya-aha am mashidi, tá kátá já shifa-aaruwa na, baaka umele ɗekideki.

<sup>22</sup> Amá a naba tsufitehe ge Dadaamiya, sem vatena zlaɓe yá á ba an shifa. Tse-aaruwa kina á katafke á zlamaha keni yá ndaater ba una ɲanna, an egdzara-ka, an male-aha-ka. Baaka názu yá ndatera ya ge emnde máki názena ndza a ndahanaa Muusa, antara nabi-aha umele, ta bántsa itare watse á gevge na ka. A ba itare:

<sup>23</sup> Watse \*Almasiihu á shu zlaɗa kwakya, lauktu á emtsa, watse á gev slezuɲɲwe á emnde ge tsete am fáyá, geni á se baterná ɲane ge Yahudiya-aha, antara emnde a jeba umele, geni a saresse am tabeɗammire á sem parakkire.»

*Paul anƙwa á ɗaha sleksu Agaripa á sem fetarfir*

<sup>24</sup> Am Paul anƙwa á ndáhá elva áte ire-aara estuwa, a naba valarhe ge Faistus á ba an ka kwara: «Ká an shaitaine emtu Paul? Kwakyire á diya á ɲa na a gakve an shaitaine ka!»

<sup>25</sup> A ɲwete ge Paul: «Yá an shaitaine ka ya ámbarka á ɲa, yá á ba an enƙale-aaruwa. Elva a jirire una yá anƙwa á ndaaná ya.

<sup>26</sup> Sleksu Agaripa wá, ɲane diyaadiya elva-aha ɲanna baɗemme, baaka názu á keɗanarkeɗe, adaba gavka duksa na ta maganaa an shebe. Adaba una ɲanna, yá anƙwa enndáhá ba parakke á dem hyema-aara.

<sup>27</sup> Faktarfe emtu áte elva á nabi-aha ámbarka á ɲa sleksu Agaripa? Diyandiya ganakini faktarfe áte itare baɗemme.»

<sup>28</sup> A ba sleksu Agaripa á elvan ge Paul: «Ka kurken ká naba givege slefetarfe áte watsewatsire ba estuwa?»

<sup>29</sup> A ba Paul á elvan ge ɲane: «Ma áte watsewatsire, ma á shek-waashekwa keni, iya wá, yá anƙwa á ɲala Dadaamiya, geni ekka palle ka, amá kure emnde na kwá anƙwa á cena elva-aaruwa baɗemme na kwá gevge ba seke iya. Amá a jakurnaaja Dadaamiya zawa na áte ya na.»

<sup>30</sup> Daaci tara slekse antara mukse-aara Bairnike, antara raizhaun, ira emnde na tá antara itare baɗemme tsarettse áhuwa.

<sup>31</sup> Zlarzlálá áhuwa wá, tá anƙwa á ndahaná am dagave-aatare ganakini baaka haypa na a guwaa zhel na hyefhye ge ja shifa-aara, ma ge dáná á dem dangay keni.

<sup>32</sup> A ba sleksu Agaripa á elvan ge Faistus: «Zhel na ma andze ndavaaka da shairiya-aara ádeza male á larde á Rauma wá, ma mi naba belanaabela.»

## 27

### *Tá anƙwa á dánda Paul á dem Rauma*

<sup>1</sup> Am njarantenja geni watse ɲá zɲálá á dem Rauma am haha á Italiya, daaci ta fanem Paul, antara daɲgay-aha umele am erva ge Yuliyus male á sawji-aha na tá dáháterá an emnde na wá, ta sawji-aha á male á Rauma na, watse ɲá zɲálá an paare á yawe.

<sup>2</sup> Daaci ɲa demhe am paare umele a sawa am Adaramitiya, anƙwa á eptsá á da, watse á de tsaatse áte we á haye-aha am ekse-aha gergere am kwara á Aziya. Daaci ɲa zɲala am huɗe-aara, anƙwa Aristarkus antara ɲere, ɲane ura ekse á Taisalauniki am haha á Makiduniya.

<sup>3</sup> Makuralla-aara wá, daɲeraada am Sidaun. Am Yuliyus anƙwa á zanvaarze kwakya ge Paul, a naba vante baráma ge deza slakate-aha-aara am huɗe á ekse, geni tá magannaamaga egdza duksa.

<sup>4</sup> Eptsapta á sawa am huɗe á ekse maa, ɲa demhe zɲaɓe ádaliye am paare, ɲa dábá ba we á haye we á haye, am ice á haha á Kiprus á kya dalbe ɲanna baaka effeya, adaba kwakya effeya am dágave á haye, á berháɲerá á sem kataliya.

<sup>5</sup> Daaci ɲa ebzu haye átevege haha á Silikiya, antara Pamfiliya, daɲeraada am ekse á Mira, am haha á Liziya.

<sup>6</sup> Daaci male á sawji-aha na a naba shaɲeraa paare umele áhuwa, paare ɲanna kwaye a sawa am haha á Alaikzandriya, á dem haha á Italiya. A ba ɲane, daumiyemda am paare na, ɲa demhe.

<sup>7</sup> Amá ɲa zɲálá á ba an enƙale an enƙale, hare wanyara wanyara, lauktu zɲahhe daɲeraada am Kinidus. Piyaɲertepiya effeya mazla-aara ge zɲala am ndaɲɲire, daaci ɲa naba vecaava á dem ice á haha á Kiraita, ɲa desa á kya we á haha ɲanna, tate na tá dahaná an Salmauni na.

<sup>8</sup> Daaci ɲa dábá ba we á haye átevege haha ɲanna, an zɲadá campaukkwe, lauktu daɲeraada am tate umele tá dahaná an tate á tsekwa paare shagera, tate ɲanna herzhe an ekse á Laseyya.

<sup>9</sup> Kedaakeda sarte á ɲere kwakya am shula ɲanna, haa dedde muɲri á bára haypa, zɲaɓe ɲere ɲá á ba áhuwa. Zɲazɲadá jipu ge baka paare am sarte ɲanna, adaba kwakya effeya. Adaba una ɲanna a ba Paul á elvan ge itare:

<sup>10</sup> «Emnde-aaruwa, kina wá, yá zhara shula á miya na watse zɲazɲadá jipu mazla-aara. Paare á miya, antara kazɲaɲa na bademme watse á badza, ba shifa á miya keni bi watse mí shanka.»

<sup>11</sup> Amá male á sawji-aha na cenaaka elva á Paul, ɲane a fetaare á ba áte náza á edda á paare, antara slebaka paare ɲanna.

<sup>12</sup> Emnde kwakya tá kátá zɲala á ba á de katafke, adaba tate á tsekwa paare ɲanna shagerka am sarte á ekhye á vátá effeya kwakya. Ma estara keni máki á gevge wá, tá kátá tá daada am Finike. Finike na wá, tate á tsekwa paare-aha umele am haha á Kiraita ɲanna. Tate ɲanna baɲɲire-aara á zhara á dem manem, á zhara á dem yala keni. Tá kátá de tsekwa áhuwa ɲanna dem sarte na má zɲauzle sarte á ekhye.

### *Valale átire á haye*

<sup>13</sup> Samsa egdza effeya fairfairfaire á sa am manem wá, itare ta kurken zɲauzla mazla-aara, a ba itare: «Shamiyansha názena mí kataná miya.» Daaci ta naba tedese íre na tá tsa paare an ɲane na am haye, ta dábá we á haye á Kiraita ɲanna an enƙale an enƙale.

<sup>14</sup> Cekwaangudí wá, a naba tsekwaa ge daada effeya tá dahaná an effeya á gedi wá, a danjerhe yiyye antara paare á nje á dem dágave á haye. Effeya nanna a tsekwaa á sawa áte ire á wa á Kiraita nanna.

<sup>15</sup> Ta tápa tsanmaartse emnde a baka paare nanna, amá jaterviyaaja, adaba valale nanna an ndzedá jipu. Daaci ta naba yanhe á danjerá effeya antara paare bademme.

<sup>16</sup> Ba ankwá á danjerda effeya nanna wá, na naba de shaa haha umele am dágave á haye, zhera á haha nanna Kawda. Na dem am ice á haha nanna am dalbe na á dem manem, lauktu na shaa ire á nje cekwaangudí. Ta pelaa egdza paare á nezla ire-aatare na an ngudá áte paare yaikke.

<sup>17</sup> Zlahhe ta femhe am paare yaikke geni a kedeka. Daaci ta naba ngwadáa paare yaikke nanna an zawa-aha á jamargaul na tá tsufa paare an nane na. Am sarte nanna wá, diyareddiye ganakini ankwá jáhá shiili á sehuna-aara ge haha á Libiya. Adaba una nanna, jaterja lyawa átuge shiili nanna geni a de nanaaka paare-aatare, daaci ta naba pelaa kacakaca na á ná effeya ge báká paare yawe á ba an ndzedá na, ta tsekwaa náza tsa paare á haye, daaci ta yaa paare ba estuwa, á dáná ba effeya an enjkale.

<sup>18</sup> Amá válale ankwá á far ba sawa á ba an ndzedá. Makuralla-aara wá, ta naba válya kazlana na am paare na á dem haye.

<sup>19</sup> Wergekse, ta halantaa ba itare an erva-aatare emnde a mága slera am paare nanna kazlana na tá tsufa paare an nane, ta puwanve á dem haye.

<sup>20</sup> Hare wányara-wányara puwanjerteka ice á nje áte vaciya, antara terlyakwa-aha adaba válale jauje ge ndzedá, ba shifa á nje keni ndza tamanjerka dekideki.

<sup>21</sup> Haraare estuwa na, aley emnde na tá am paare zaruka ba názara keni. Daaci a tsetehe ge Paul, a ba nane á elvan ge itare: «Ázara kwa jeba una emnde-aaruwa! Ábi ma andze kwa cenaa názá-aaruwa, ma baaka ura á tse am Kiraita dekideki! Daaci ma andze á shamika palasa na, antara nasare yaikke na.

<sup>22</sup> Amá táslawa á kure, gazlauka. Mi kedá ba paare ka wá, ba palle á kure keni á kedeka shifa-aara.

<sup>23</sup> Ya ndahanaa adaba uwe estuwa, adaba Dadaamiya na yá ankwá á maganá slera na a belive malika-aara an vayiya vatena,

<sup>24</sup> a ba nane á elvan ge iya: Paul, gazleka dekideki, ká daada á de katafke á male á larde á Rauma. Dadaamiya a bashakaa shifa á emnde na tá am hude á paare na bademme ge ekka.

<sup>25</sup> Adaba una nanna, gazlauka dawalaa, iya fantarfe an Dadaamiya geni watse á magava á ba áte una a se binaa nane.

<sup>26</sup> Amá wá, watse á dámida válale, á de puwámiyá áte haha umele ankwá am dágave á haye.»

<sup>27</sup> Daaci hare kelaawa ju ufade á dánjerá ba effeya átire á haye nanna tá dahaná an Maiditairaine na. An hude á vayiya wá, emnde a paare ta naba diyeddiye geni na herzhe an haha umele.

<sup>28</sup> Daaci ta naba kuraa sladdíre á yawe nanna an zawa ta ngudete íre átekwa wá, uksuwe kul buwa. Á katafke cekwaangudí ta ekkura adaliye wá, ba uksuwe kelaawa jilyebe.

<sup>29</sup> Gazlargazla jipu geni a berhante effeya na paare á nje ádeté nákwa umele am haye, ta naba puwem zawa-aha na an ngwadá daada íre-aha átekwa ge tsa paare na ufade á dem haye á kya iga-aara, ta ufán ba zlahhe wera á ekse.

<sup>30</sup> Daaci emnde a paare tá kátá ñezla shifa-aatare, ta naba tsekwaá egdza paare á ñezla shifa-aatare na á dem haye, amá ta magán ba seke tá puwa zawa-aha á tsa paare yaikke á kya katafke-aara keni.

<sup>31</sup> Amá a ba Paul á elvan ge male á sawji-aha na, antara sawji-aha-aara: «Máki njarka emnde a paare na á ba am huđe á paare, ba palle á kure keni kwá ñezleka đekideki.»

<sup>32</sup> Daaci duwa á sawji-aha, ta naba icaa zawa na an ñguda egdza paare átekwa na, zlazlálá egdza paare-aatare ñanna á dem dágave á haye.

<sup>33</sup> Herzhe á wera ekse wá, a ba Paul á elvan ge itare bademme: «Náwa hare kelaawa ju ufađe vatena, ba názara keni fakurteka áte we, kwá fá ba ervaunđe, taslawá á kure, sawmbare zawuze egdza duksa.

<sup>34</sup> Zawuze egdza duksa geni kwá shansha ndzedá ge ñezla shifa á kure an ñane. Yá ndaakur ba jirire: Ba úgje á ire á kure palle keni á kedeka.»

<sup>35</sup> Ba a ndahese una ñanna Paul, a eksante đafa, a tsetehe an ñane, a slafanaa we ge Dadaamiya á katafke-aatare bademme, a kezlanve đafa na, a fantau ge ezza.

<sup>36</sup> Daaci bademme-aatare ekhyakhya ervaunđe-aatare, itare keni ta fantau ge ezza-aara.

<sup>37</sup> Kezлакula á emnde na tá am huđe á paare ñanna bademme, ta deremke buwa an kul vuye ju unkwáhe.

<sup>38</sup> De natenáhá huđe-aatare wá, ta fantau ge válya nalkame na am paare na, geni a đemanteka paare.

### *Yawe kyabanaakyábá paare*

<sup>39</sup> Weraawera ekse, amá ma tá áme keni diyarka emnde a paare đekideki. Amá ta naa shiili am tate umele a zuwa yawe, haha á kya una, haha á kya una, daaci a ba itare: «Dawamiyanda paare á miya áte shiili ñanna, a de geyegeya áhuwa má mi dzegwándzegwa.»

<sup>40</sup> Daaci ta naba đatsaa náza tsa paare na, ta yaa íre-aha ñanna am haye, ta palaa zawa áte duksa-aha na tá já kwána an ñane, ta ñguda kacakaca áte wafke-aara geni a demda effeya á dem huđe-aara ge baka paare. Daaci tá ankwá á zlálá á dem tate á shiili na ba suuwe.

<sup>41</sup> Amá ta naba de velyete áte jáhá á shiili am tate á jaja ire á yawe am haye ñanna, adaba gulaagula sladđire á yawe wá, a naba tsahe ge paare am tate ñanna, a ñgyemhe ge we-aara am shiili, sawa á yawe an ndzedá a se kazlanve ukhyiye-aara.

<sup>42</sup> Daaci sawji-aha tá kátá ceba dangay-aha-aatare geni a ñezlareka bi diyardiya wá yawe.

<sup>43</sup> Amá a naba piyaterthe ge male-aatare, adaba ñane wayaaka á emtsa Paul. Daaci ñane a vaterte baráma ge emnde na diyardiya yawe emtsaade zunñwe geni a warwa yawe, a de njarinja áte haha,

<sup>44</sup> lauktu a ba ñane á elvan ge emnde umele: «Ma ware á kure keni a eksanteksa nafa á paare na palle am erva, amá ñawanaaņa ba shagera, đabaudába ba emnde na á dete haha.» Ña segashe estuwa am yawe, ba uwe keni shaņerka đekideki.

## 28

### *Paul am haha á Malta*

<sup>1</sup> Am sessa shifa á ñere am haye ñanna ba layye, daaci ta baņeraa zhera á haha ñanna am dágave á haye ñanna, geni zhera-aara Malta.

<sup>2</sup> Emnde a larde ñanna ta lyaņervahe an ervaunđe-aatare palle. Yawe keni fantaufe ge hya, náwa iya á ba ekhye, amá emnde a ekse ñanna ta

mbanjerante kára yaikke, lauktu ta fantau ge ganer use miyenne áte we á kára nanna.

<sup>3</sup> Duwa á Paul a de halanu ceceme ge kára nanna maa, mbate ankwá záhe na zlazlada jipu na am huđe-aara. Ba a cenaa hureffire á kára na záhe wá, a tsetehe am hare, a naba cuvaa Paul an slare áte erva tanduwalle.

<sup>4</sup> Ba naranna emnde a ekse nanna záhe na an zlejela áte erva á Paul na wá, a ba itare am dágave-aatare: «Baaka shaige-aara đekideki zhel na sleceba shifa á emnde. Adaba una nanna ma nejlaanjezla deme am haye keni, dadaamiya á miya na zhara-aara jirire na á yanka nane keni an shifa.»

<sup>5</sup> Amá Paul a slatsaa záhe na á dem huđe á kára, ba cekwaangudí wanteka đekideki.

<sup>6</sup> Itare ta kurken watse á háhyá erva-aara, bi watse á mbedá á ba am tate nanna á emtsa, amá shekwaraashekwa, baaka názu á maganmága ge Paul đekideki. Ta eptsante elva, a ba itare mbate nane keni dadaamiya.

<sup>7</sup> Ankwá slekse á emnde a larde nanna zhara-aara Publiyus, ankwá sleđe-aara yiyiyeka an tate nanna, a danjerhe ádehuwa, a de vanjerte tate a zláva, na gaa hare keye á ba am mba-aara emtsađe, lauktu na segashe á sem huđe á ekse.

<sup>8</sup> Ankwá eddenara ge sleksu Publiyus nanna lapika, á wáná kemaale, antara puwa huđe na zlazlada jipu na, a duhe ge Paul á de ezzhara. Daada Paul ázenara, a magar maduwa, a puwarhe erva-aha-aara, a naba mbanaahe.

<sup>9</sup> Am iga á una nanna maa, ta naba semhe ge emnde na lapika vuwa-aatare am haha nanna bademme áseza Paul, itare keni a mbateraahé.

<sup>10</sup> Ta vanjerte duksa kwakya ge marese zherwe na ta fanaa itare áte njere. Am sarte na tsanjeretse am haha-aatare watse na dem paare njá zlála keni, ta vanjerte duksa camballe ge mága shula á njere an nane.

#### *Paul daada am Rauma*

<sup>11</sup> Na gaa tere keye zlađe adaliye am iga-aara lauktu na tse, na zlala an paare umele, paare nanna tá đahána an dadaamiya á wulhe-aha, kwaye a sawa á sa am Alaikzandriya. Nane keni a se zu sarte á ekhye á ba am haha nanna am dágave á haye na.

<sup>12</sup> Danjeraada am Sirakus, na de gaa hare keye áhuwa.

<sup>13</sup> Na tsante áhuwa, na đába ba we á haye we á haye, na daahe á dem Rigiyus. Makuralla-aara, a fantau ge egdza effeya á sawa am manem, na daahe á dem Pautiyauli á ba am hare buwa.

<sup>14</sup> Na de shaa emnde a fetarfe am ekse nanna, ta ndavunjeruhe geni njá gá hare maka ázetare. Kwaya nane, na daa estuwa á dem Rauma.

<sup>15</sup> Am sarte na cenarácena egdzar mama-aha a njere na tá am Rauma labáre á njere, ta naba se yaijeruhe am kwaskwe á Appiyus, emnde umele ta se yaijeru am ekse umele tá đahána an Kampemañ keye. Ba a puwete ice-aara áte itare Paul, a naba ekhyehe ge ervaunđe-aara, ususe Dadaamiya á ba nane.

#### *Waazu á Paul am Rauma*

<sup>16</sup> Danjeraada am Rauma maa, ta naba vante baráma ge Paul geni á njá an ire-aara, amá antara sawji palle á ufufa.

<sup>17</sup> Am iga á hare keye maa, Paul a naba đahetaa male-aha á Yahudiyaha na tá am Rauma á dejenara. Jarammeje, a ba nane á elvan ge itare: «Ba estuwa egdzar mama-aha-aaruwa: Ba palle a haypa na ya maganaa ya keni baaka, amá ta naba eksivaahé am Urusaliima, ta vite ge Rauma-aha.



Wallá ya ganu haypa ge jeba, wallá ya gu haypa áte nađe-aha á eggye-aha a miya, ázareka.

<sup>18</sup> Duwa á Rauma-aha maa, ta ndaviyu elva-aha. Am sharánka haypa áte ya hyephe ge keđa shifa-aaruwa, tá kátá beliyaabela.

<sup>19</sup> Amá eksararka Yahudiya-aha dekideki ganakini tá beliyaabela na. Daaci baaka názu yá maganá ya umele, ya naba ndáva geni tá sá shairiya-aaruwa ásehuna, áza male á larde. Sanka ya á se icaterar sera ge emnde a jeba-aaruwa dekideki.

<sup>20</sup> Ya ndavakuraa adaba una nanna, geni yá puwetepuwa ice-aaruwa áte kure. Zawa na kwá zharaná kure áte ya na wá, ya gu duksa umele ka, adaba ba edda una ni \*Iserayiila-aha bademme keni tá anƙwa á tamaha ba nane na.»

<sup>21</sup> A ba male-aha na tá elvan ge Paul: «Njere wá, shaneranƙa njere labáre á nja á sawa am Yahudiya. Ba palle á egdzar mama-aha á miya na a se mbedanjeru elva áte ka geni ka gu duksa keni, nanjeránka njere.

<sup>22</sup> Amá wayanjerwáyá njá cenevaacena názu ká dzamaná ka. Adaba diyanjerdiya ganakini ma áme keni emnde wayaraterka an emnde nanna ká am itare kina na.»

<sup>23</sup> Daaci ta naba faa sarte. Vacite nanna wá, ta sawa á ba an saga, ta vayye jipu, ta se beraa Paul am bere na á njá amkwa. Paul a váha deppe, a fantau an enlya, dem lasar, anƙwa á palaterá ba sera á elva-aha áte elva a njá am \*kwará á Dadaamiya. A palateraa názu a ndahanaa \*tawraita á Muusa, antara názu am wakita á nabi-aha umele áte Yaisu bademme, geni itare keni a lyarvaalya.

<sup>24</sup> Emnde umele-aatare lyarvaalya elva á Paul, amá emnde umele lyiyarka dekideki.

<sup>25</sup> Am diyaadiya Paul ganakini watse tá zlala an gajawe, zlaƙe kyareka emtsaade, a vaterte elva na náwa nane na, a ba nane á elvan ge itare: «Elva na a baternaa Shedekwe Cudede ge eggye-aha a kure á kya an we á nabi Aisaya na wá, a ndaha ba jirire!

<sup>26</sup> A ba Dadaamiya: Duwa de bateránba ge emnde-aaruwa: Tá de eccena ba shagera, amá tá cenevaaka. Tá de ezzhara ba shagera, amá tá nánka.

<sup>27</sup> Adaba degdege ire á emnde nanna, ta vanyaa hyema-aha-aatare geni a demka elva-aaruwa; ta hadaa ice-aha-aatare geni a naránka duksa-aaruwa; tá maga degdegire á ire geni a demka elva-aaruwa á dem ire-aatare, geni a saremka á sem sera-aaruwa yá mbateraambe. Estuwa a ba Dadaamiya.»

<sup>28</sup> Daaci a eksetaa elva-aara zlaƙe adaliye Paul, a ba nane: «Amá wá, diyaweddiye ba shagera ganakini Dadaamiya a belaa labáre á lya emnde ádeza emnde a jeba umele keni. Itare wá, tá de eccena.» ((

<sup>29</sup> Ba a ndahese una nanna Paul wá, ta naba tsetehe ge Yahudiya-aha nanna, ta naba zlala, tá ámbera á gá jawe am dagave-aatare á ba an ndzedá.))

<sup>30</sup> Paul a magaa yawe buwa kalkale am bere á haya na a eksantaa nane, bademme á emnde na tá dezerara keni, á lyiyaaterá á ba am ervaunđe-aara.

<sup>31</sup> A magateraa waazu ge emnde áte elva a njá am \*kwará á Dadaamiya, a kwaraterse elva a Yaakadada Yaisu \*Almasiihu ge emnde á ba an enƙale-aara, gazlaaka dekideki.

## Wakita na a puwatertaa Paul ge emnde a RAUMA

### *Ga use á Paul*

<sup>1</sup> Wakita na yá anƙwa puwaná ba iya Paul, ya sleslera á Yaisu \*Almasiihu. A ɗahite ba Dadaamiya, a give slebela-aara, a fi geni yá balaterá elva-aara ge emnde, amaana labare á higa.

<sup>2</sup> Labare á higa ɗanna wá, Dadaamiya a magamiyaa waada-aara daga werre á kya nabi-aha-aara. Daaci ta puwete ba estuwa am wakita-aara.

<sup>3</sup> Labare á higa ɗanna wá, elva arge Egdza-aara Yaakadada á miya Yaisu \*Almasiihu. Má ge urimagwire wá, ɗane ta yanaa am emnde á sleksu \*Dawuda.

<sup>4</sup> Am sarte na tsetetse am fáyá, Dadaamiya a farehe zlaɓe ádaliye á ba an ndzedá geni ɗane wá, Egdza-aara. Una ɗanna baɗemme ndza an hákuma á Sheɗekwe Cudeɗɗe.

<sup>5</sup> Adaba ba ɗane palle una Dadaamiya a magiyaa ɗgurna ge iya, a naba give slebela-aara ge de balatera elva-aara ge emnde a jeba umele keni baɗemme, geni a fartarfe an ɗane, a faransaarefe keni. Ba estuwa Yaisu \*Almasiihu á de geva án ɗáráɗza.

<sup>6</sup> Kure emnde a Rauma na a dzerakursaa Dadaamiya geni kwa geve emnde á Yaisu \*Almasiihu na keni, kwá am dagave á emnde ɗanna ni Dadaamiya a ɓeli ge itare na.

<sup>7</sup> Daaci yá anƙwa gakur use-aaruwa baɗemme, kwa emnde na á wayakurta Dadaamiya, a ɗahakurte geni kwá nja ba cudeɗɗe átuge ɗane na. Tara Eddemiya Dadaamiya, tá antara Yaakadada Yaisu \*Almasiihu a magarakurnaamaga ɗgurna, a varakurteva hairire.

### *Paul á kátá de zhara emnde a Rauma*

<sup>8</sup> Emtsaade wá, yá anƙwa slafaná we-aaruwa jipu ge Dadaamiya áɗaba kure, yá slafaná we-aaruwa an zhara á Yaisu \*Almasiihu, adaba ma áme keni am duniya baɗemme tá ndaha ba labare á fetarfire á kure áte Yaisu \*Almasiihu.

<sup>9</sup> Ba kelaa má yá anƙwa maga maduwa-aaruwa á deza Dadaamiya, yá anƙwa yehakuryeha keni am huɗe-aara, una yá ndaha ba jirire, Dadaamiya diyaadiya baɗemme. Adaba iya wá, yá maganá slera-aara ge ɓala labare á higa, elva a Egdze-aara ge emnde á ba an ervaunɗe-aaruwa palle.

<sup>10</sup> Ba kelaazare, yanánka ɗala-aaruwa áza Dadaamiya, geni a viteva baráma mázla-aara yá daada á dezekure an namaari-aara.

<sup>11</sup> Wayanwáyá jipu ge yá daada á dezekure, yá dakuránda barka na á vaterta Sheɗekwe Cudeɗɗe ge emnde na, geni kwá gevge emnde a ndzendzedá am fetarfire.

<sup>12</sup> Una ɗanna yá kátá bakura ba geni mi de femfa ndzedá am vuwa á miya ma ge ware á miya keni; yá de fakuremfa ndzedá am vuwa ge kure áɗaba yá slefetarfe an Yaisu \*Almasiihu, kure keni kwá de fiyemfa ndzedá am vuwa an fetarfire á kure.

<sup>13</sup> Egdzar mama-aha-aaruwa, yá kátá kure keni kwá diyeddiye geni ndza ya magaa niya-aaruwa ser kwakya ge dezekure, amá sem vatena sey ba jerje názu á piyitepiya. Waya-aaruwa ge dezekure ɗanna wá, ba geni a

sesse námpire á slera-aaruwa am dagave á kure keni, ba seke una na am dagave á emnde á jeba umele bademme na.

<sup>14</sup> Una wá, slera na a beliyara Dadaamiya ge iya, geni sey yá balaterá waazu á labare á higa ge emnde bademme. Ge emnde na an wera ire-aatare na, antara emnde na weraaka ire-aatare, ge emnde a diya, antara ge emnde na baaka diya-aatare na bademme.

<sup>15</sup> Adaba una nanna, wayanwáya jipu am ervaunđe-aaruwa geni yá de balakursebale ge kure keni kwa emnde á Rauma.

*Ankwa hákuma á Dadaamiya am labare á higa, elva a Yaisu \*Almasiihu*

<sup>16</sup> Iya, emtake ervaunđe-aaruwa jipu ge bala waazu á labare á higa nanna, adaba ankwa hákuma á Dadaamiya am huđe-aara ge lya emnde na fartarfe an nane na bademme. Emtsaade wá, áza Yahudiya-aha, lauktu emnde a jeba umele keni bademme.

<sup>17</sup> Am waazu á labare á higa wá, Dadaamiya ankwa a marateran ge emnde geni nane á vantá estara jirire ge urimagwe á katafke-aara. Ankwa á emmara geni una nanna sey an fetarfire áte Yaisu \*Almasiihu palle, barama umele baaka, ba seke una ni ankwa puwartepuwa am wakita á Dadaamiya, a ba nane: Edda una shansha jirire áza Dadaamiya ádaba fantarfe, ba nane una an shifa á jirire na.

*Emnde bademme tá an haypa*

<sup>18</sup> Dadaamiya am samaya wá, ankwa á emmára ba parakke geni haypa á emnde á wanwa jipu am ervaunđe, adaba ta yaa kezlan ugje ge nane. Nateraanja shairiya emnde bademme adaba tá ankwa kedá jirire á Dadaamiya an emtanƙire na tá ankwa á maganá itare.

<sup>19</sup> Nateraanja shairiya emnde bademme na wá, adaba názu ma andze tá dise Dadaamiya átekwa na ankwa bademme, a maratersaa ba Dadaamiya an ire-aara, ta yanaa ba itare.

<sup>20</sup> Ge jirire wá, baaka ura ndza nanna Dadaamiya an ice ngayye, amá wá, á fantuwe áte sarte na Dadaamiya a nderaa duniya na sem vatená, emnde diyardiya geni Dadaamiya wá, ankwa an sleksire-aara adaba kazlanja na a nderanaa nane na; emnde diyardiya geni nane wá, saksage, ba nane palle una Dadaamiya. Adaba una nanna, tá de dzegwánka banán ge Dadaamiya geni baaka haypa-aatare.

<sup>21</sup> Diyardiya tsa ge ankwa Dadaamiya, aley kezlaranánka ugje, slafaranánka we am duksa áte una zlaya-aatare ge tá maganá una nanna ge Dadaamiya. Ta yá mága una nanna, itare ta eksante ngudiyire am ire-aatare, tá taa diseƙa jirire ƙeƙeƙe, tá an naha an tabedammire bademme am itare.

<sup>22</sup> Ta bantsa itare ta emnde a enƙale, mbate ta uce-aha ba dey.

<sup>23</sup> Zlaya tá kezlaná ugje ge Dadaamiya saksage am sleksire-aara, amá itare tá kezlan ugje ge hele-aha, umele ba garava urimagwe ba dey, umele ba yiye, umele dabba, antara názu á hulmba am áhá.

<sup>24</sup> Adaba una-aha nanna, Dadaamiya a naba yaterhe geni a magarmága shagerƙire nanna á kátána ervaunđe-aatare na, tá ankwa á maga duksa zherwe jipu am dagave-aatare.

<sup>25</sup> Ta yaa jirire á Dadaamiya, ta naba mbedese an fidire. Zlaya ma tá kezlaná ugje ge slendera duksa wá, itare tá kezlaná ugje ge duksa-aha na a nderanaa nane, tá magaterá slera ge duksa-aha nanna. Ay degiya, emnde tá kezlarankezla ugje ba ge nane palle dem ba ge ƙeƙeƙe. \*Aamin.

<sup>26</sup> Dadaamiya a yáteraa adaba una geni a magarmága duksa zherwe nanna á kátáná ervaunđe-aatare nanna. Nwasha yaránya nja antara zála, tá maganá ba itare am dagave-aatare duksa na zherwe jipu zlayeka dekiđeki na.

<sup>27</sup> Zála keni tá magán ba estuwa, ta ya nja antara nwasha, tá cebá ire-aatare an mbagrire, tá zlavanu ba ge ire-aatare ákure muksire, tá ankwá á maga duksa na zherwe jipu na. An una-aha nanna, tá ankwá fáná ba itare ire-aatare á dem shairiya á Dadaamiya, hyarephye ge zatera an shairiya, adaba magarnaaka duksa áte unjule-aara.

<sup>28</sup> Ba seke una itare yarnaaya diya Dadaamiya á jirire wá, Dadaamiya a yateraa adaba una nanna, geni a sharánka enkale ge dzamete duksa áte unjule-aara, a magarmága ba duksa na zlayeka dekiđeki na.

<sup>29</sup> Daaci ervaunđe-aatare nahetenahé an jeba á duksa-aha nanna shagerka na bademme, ba seke: Fa ice am duksa á ura, danjwire á huđe áte ura, mága shelha áte ura, ja shifa á ura, dagala an ura, zlerma ura, mága fitenire, antara mága paysadfa bademme;

<sup>30</sup> tá ankwá á jaja zherwe-aatare ba dey, ta kelaade-aha á Dadaamiya. Itare tá peshá ba emnde an zlazle, tá gálá ire-aatare, tá maga kuravire, tá njá á ba tataya jansaare ge haypa-aha umele anjwaslire, tá fathersaareka dekiđeki ge dada-aha-aatare, antara mama-aha-aatare.

<sup>31</sup> Itare baaka zherwe áte ice-aatare dekiđeki, tá an nara-aha kelawaju, tá emnde ndaha elva bu-buwa. Elva a háyáva baaka ázetare, tá zanvaareka ge ura dekiđeki.

<sup>32</sup> Diyardiya tsa ba jirire geni á bá shairiya á Dadaamiya: Bademme á emnde a mága jeba á duksa-aha nanna tá de shá ba emtsa. Aley itare ta faare ba emmága-aara. Baira tá ankwá zleba emnde na tá ankwá á maga jeba á duksa-aha nanna.

## 2

### *Shairiya a Dadaamiya shairiya á jirire*

<sup>1</sup> Ekka edda una ká ankwá faare shairiya ge emnde na wá, watse ká de dzegwánka bá baaka haypa á nja ma ka ware keni. Adaba ekka, ká ankwá faare shairiya ge emnde, mbate ká keni ká ankwá á maga ba shagerkire nanna. Daaci an una nanna wá, ká ankwá njudfa ba ka ire á nja áza Dadaamiya.

<sup>2</sup> Diyamidiya Dadaamiya wá, nane á maga ba jirire ge njá emnde a mága shagerkire nanna an shairiya.

<sup>3</sup> Ekka edda una ká faare shairiya ge emnde na, ka kurken ekka wá, watse ká de nejla am shairiya á Dadaamiya emtu, ka keni ká ankwá magán ba seke itare nanna tsa?

<sup>4</sup> Emtu ká epsawa maggwire yaikke na a magakanaa Dadaamiya na, a hefanu ba ge we-aara antara ankwá á faká ervaunđe geni ká eptsá am tuba na emtu?

<sup>5</sup> Amá ekka ká ankwá far ba ge degdegire á ire arge eptsá am tuba. An una nanna, ká ankwá faná ba ka ire á nja á dem shairiya vacite na Dadaamiya á de kya shairiya á emnde bademme. Nane wá, á de kyaná á bá áte jirire-aara. Vacite nanna wá, Dadaamiya á de marateránmára ge emndimagwaha geni tá ankwá am ervaunđe-aara.

<sup>6</sup> Watse á de pelatersepele ge emnde bademme áte názena ndza ta maganaa itare na.

<sup>7</sup> Emnde na ndza ta wáwa ge mága maggwire na wá, Dadaamiya á de vaterte shifa na á zleka na, adaba itare ndza tá kátá shá shifa nanna antara haya ira yaikkire á ba azenjara.

<sup>8</sup> Amá emnde na yarnaaya jirire á Dadaamiya, tá fansáreka dekideki, ta eksese mága ba shagerkire na wá, tá anjwa am ervaunje á Dadaamiya, anjwa zladá watse á de faterar ge itare.

<sup>9</sup> Watse bademme á emnde na ta eksese ba shagerkire na, tá de nanna zladá áza Dadaamiya. Watse zunjwe ba Yahudiya-aha, lauktu emnde a jeba umele.

<sup>10</sup> Amá emnde a mága maggwire wá, itare tá de shá háyá, antara yaikkire, ira hairire áza Dadaamiya; watse zunjwe á de vaterte ge Yahudiya-aha, lauktu emnde a jeba umele.

<sup>11</sup> Adaba bademme á emnde ta ba kalkale áza Dadaamiya.

<sup>12</sup> Emnde na ni garevka Yahudiya-aha na, antara tá anjwa á maga haypa an baakire á diya \*tawraita na keni, Dadaamiya á de kedateraakeda áte una diyarka tawraita na. Amá emnde na diyardiya tsa tawraita, aley tá maga ba haypa na wá, Dadaamiya á de kedateraakeda áte una a ndahese am tawraita.

<sup>13</sup> Adaba Dadaamiya á de vanteka jirire ge ura adaba cenancena názu am tawraita, amá sey ma edda-aara anjwa maga názu a ndahesa tawraita.

<sup>14</sup> Má emnde na garevka Yahudiya-aha, diyarka tawraita dekideki, amá tá anjwa á maganá ba itare an ire-aatare názu a ndahesa tawraita wá, ma diyarka ba tawraita a Muusa keni, áte maga-aatare nanna wá, daaci ba seke tá an tawraita am vuwa-aatare.

<sup>15</sup> Ate názena tá anjwa á maraná itare am zlaláva-aatare na wá, ba seke anjwa tawraita am vuwa-aatare a faterma Dadaamiya. Adaba tá anjwa diyeddiye maga-aatare, tara ta magaa shagerire, an shagerkire keni.

<sup>16</sup> Una nanna á de sesse ba parakke vacite na Yaisu \*Almasihu á de kya shairiya á emnde áte una á de banná Dadaamiya na. Bademme á názena am huđe á emnde á de sesse áte parakkire. Labara á higa na yá anjwa balá waazu-aara na keni á ndaha ba una.

*Yahudiya-aha, antara \*tawraita á Muusa*

<sup>17</sup> Ekka, á bá ka, ká ura Yahudiya, ká galá ire áte \*tawraita, ká kuráva áte Dadaamiya,

<sup>18</sup> á bá ka diyakdiya namaari á Dadaamiya, tawraita anjwa ge kwarakse duksa bademme geni ka eksese barama jirire,

<sup>19</sup> ká anjwa zhara ire á na ba seke hyakephye táda ura wulfe, ka ba seke parakkire ge maranaa baráma ge edda una am tabedammire,

<sup>20</sup> ká zhara ire á na ba seke hyakephye kwaraterse duksa ge emnde na diyarka duksa, hyakephye giya emnde na zlađe ta ba seke egdzara mesheshe am elva á Dadaamiya na, á bá ka diyakdiya jirire, diyakdiya duksa bademme adaba diyakdiya tawraita.

<sup>21</sup> Haá! Ekka ká kwaraterse ba ge emnde umele, labára ká kwaranseka ge ire á na keni? Ká magaterá waazu ge emnde geni a yaránya neylire, labára ekka ká ila na?

<sup>22</sup> Ká elván ge emnde yawánya mága gwardzire, labára ekka ká emmága? Á bá ka, ka kelaade á hele, labára zlađe ká ila duksa á hele nanna?

<sup>23</sup> Ekka, ká kuráva áte tawraita, mbate keni ká manjka áte náza á tawraita nanna. An mága á na nanna wá, ká anjwa maganá ba ka geni emnde tá nyanya Dadaamiya.



<sup>24</sup> Anƙwa puwartepuwa ba estuwa am wakita á Dadaamiya, a ba ɲane: Áɗaba ba kure Yahudiya-aha, emnde a jeba umele tá anƙwa nyanya Dadaamiya.

<sup>25</sup> Má kwá maga názu am tawraitá wá, dem shedekwe á kure keni á magakuránmaga nampire. Amá má kwá maɲka názu am tawraitá, una ba seke dakuremka am shedekwe deƙideƙi.

<sup>26</sup> Má edda una daaka am shedekwe, amá ɗabetedaba tawraitá ba shagera, ma baaka am shedekwe keni, Dadaamiya á zhara una ɲanna emtu mázla-aara?

<sup>27</sup> Edda una daaka am shedekwe, amá ma ɗabetedaba názu am tawraitá ba shagera wá, á de fakerfe zherwe ge ekka edda una ta puwakte tawraitá ɲanna ge ekka, amá ɗabaɲka na, una ma ká ba am shedekwe ɲanna keni.

<sup>28</sup> Geva ura Yahudiya áte ice á emnde-ka, una á gakve ura Yahudiya á jirire, una estuweka. Zlabe ádaliye, dem shedekwe keni, á gakve-ka ura á Dadaamiya, una estuweka.

<sup>29</sup> Yahudiyire á jirire wá, edda una ura Yahudiya á sáwá am ervaunɗe, an belá am shedekwe am ervaunɗe-aara an hákuma á Shedekwe Cudedɗe, gevka áɗaba ta puwete estuwa am tawraitá na. Daaci ɲane una Yahudiyire á jirire; ɲane wá, á ufa-ka gálá áza emndimagwaha, á de galáná ba Dadaamiya ɲane.

### 3

<sup>1</sup> Má estuwa wá, Yahudiyire á farka ge duksa emtu? Ma bela ura am shedekwe keni baaka názu á fanaare ge ura emtu?

<sup>2</sup> Duksa wá, á farfe ba kwakya ma am uwe keni. Yá ndahana áɗaba uwe una? Emtsaade wá, Dadaamiya a yateraa elva-aara am erva ba ge Yahudiya-aha.

<sup>3</sup> Ay mi ba uwe kina, má emnde umele-aatare tsaraaka áte elva-aara ɲanna wá, Dadaamiya keni á de eptsante elva áɗaba itare emtu?

<sup>4</sup> Una estuweka deƙideƙi; ma emnde bademme yaránya jirire keni, Dadaamiya wá, á eptseka elva-aara buwa. Anƙwa puwartepuwa am wakita á Dadaamiya, a bá ɲane:

Ekka wá, má ndahaksendahe elva á ɲa, ma ware keni sey a cenancena jirire á ɲa. Má tá kátá eksáká áte elva, shansha ba ka jirire.

<sup>5</sup> Haypa á miya á maraterá jirire á Dadaamiya ge emnde, mi bá uwe kena mázle-aara? Mi bánba geni baaka jirire á Dadaamiya, adaba á fá zlada áte miya emtu? Una wá, ya ndahese áte una ta bántsa emndimagwaha na.

<sup>6</sup> Amá una estuweka deƙideƙi, adaba ma andze baaka jirire á Dadaamiya, watse á de kyáná estara kena ɲane shairiya á emnde?

<sup>7</sup> Zlabe ádaliye má gevge ni baakire á jirire-aaruwa anƙwa á melateru ge dise jirire á Dadaamiya ge emnde, antara anƙwa á vaterte baráma á gálá Dadaamiya ge emnde wá, tá ɲiya áɗaba uwe zlabe mázle-aara ge yá an haypire?

<sup>8</sup> Daaci ta bántsa emnde umele, mbate mága emtaɲkire shagera, geni a sesse jirire á Dadaamiya, á piyaɲerta uwe mazle-aara ge emmága-aara? Baira emnde umele keni ta naba ndahese emtaɲkire áte iya, a bá itare: iya keni ndansendahe estuwa. A njá ɲane á maga uwe, watse á de ndavaterundave Dadaamiya am shairiya.

*Baaka ura an jirire ba palle keni*

<sup>9</sup> Estara á bá kure? ɲere Yahudiya-aha njá jateruje ge emnde umele emtu? Baaka, njá taa jateruka deƙideƙi. Ábi am zunɲwire keni ndza ya

bakuránba geni Yahudiya-aha antara emnde umele bademmire-aatare tá á ba am erva á haypa.

- <sup>10</sup> Adaba anƙwa an puwa am wakita á Dadaamiya, á bá ɲane: Baaka ura an jirire, baaka ba palle keni.
- <sup>11</sup> Baaka edda á enƙale ge cenva jirire, baaka edda una á kátá daba Dadaamiya na.
- <sup>12</sup> Emnde bademme dzalarevdzále áte unɲule á Dadaamiya, bademmire-aatare badzarevbadze. Baaka ura mággwe, baaka ba palle keni.
- <sup>13</sup> Názena á segashe am kwárá-aatare ba seke á segashe se á emtsa am huƙe-aara, we-aatare á ndáhá ba zlerma, názena á segashe am mbuwe-aatare ba seke wenye á záhe.
- <sup>14</sup> We-aatare sey á ndáhá ba elva yaiyaihe, antara elva nyanya ura.
- <sup>15</sup> Sera-aatare tsaftsafe jipu ge de ceba shifa á emnde.
- <sup>16</sup> Ba kelaa tate na tá degashe itare átekwa bademme, sey tá yaterá ba bádza antara emtaɲkire ge emnde.
- <sup>17</sup> Itare diyarka njá lapiya antara emnde deƙideƙi.
- <sup>18</sup> Baaka ma lyáwá á Dadaamiya keni am ervaunɲe-aatare.
- <sup>19</sup> Iyau, ge miya wá, diyamidiya geni bademme a názena á ndahaná \*tawraitá wá, á ndahater ba ge emnde na tá am erva á tawraitá ɲanna. Daaci baaka edda una á de dzegwándzegwa bá baaka haypa-aara ge ɲane. Má estuwa, nálgadama bademme tá de ba am shairiya á Dadaamiya.
- <sup>20</sup> Baaka ura á shá jirire áza Dadaamiya á ba an daba tawraitá. Amá tawraitá wá, á mara ba geni ura á diyeddiye haypa-aara.

### *Unɲule na emnde tá de shá jirire áza Dadaamiya*

<sup>21</sup> Amá kina wá, Dadaamiya anƙwa á maramiyá unɲule na ni watse mí de shá jirire á katafke-aara an ɲane na, baaka elva á dábate \*tawraitá emtsaade am una ɲanna deƙideƙi. Tawraitá á Muusa, antara nabi-aha ndza ta enndaha una ɲanna bademme.

<sup>22</sup> Unɲule na ni watse emnde tá de shá jirire an ɲane áza Dadaamiya na wá, ba fetarfire áte Yaisu \*Almasiihu palle. Una wá, gavka adaba emnde a jeba umele palle, amá ma ge emnde-ara keni, bademme emnde na má fetarfe áte Yaisu Almasiihu na. Adaba emnde bademme ta ba kalkale áza Dadaamiya.

<sup>23</sup> Emnde bademme ta ba emnde a mága haypa, ta yiyiye an parakkire á sleksire á Dadaamiya.

<sup>24</sup> Amá Dadaamiya an maggwire-aara wá, a naba magateraa ɲurna, a vaterte jirire ba dey á kya erva an Yaisu Almasiihu na a lyaterse am haypa na.

<sup>25</sup> Dadaamiya wá, ɲane a tsaá Yaisu Almasiihu, geni á ya shifa-aara ba seke sadake, daaci Dadaamiya á baraterá haypa-aha-aatare an uzhe á Egdze-aara ɲanna ge emnde a fetarfe bademme. A magaa una ɲanna ge maraterá jirire-aara ge emnde. Werre wá, a magaa ba seke diyaaka haypa á emnde, ndza á fá ba ervaunɲe.

<sup>26</sup> Amá kina wá, a wayte maraterán ge emnde geni ɲane wá, edda á jirire, á kátá nja á ba áte jirire-aara ɲanna, á kátá vaterte jirire-aara ɲanna ge emnde na tá anƙwa fetare áte Yaisu na keni.

<sup>27</sup> Má gevge estuwa, anƙwa dalila á gálá ire á miya emtu mazle-aara? Baaka deƙideƙi. Labára baaka? Adaba Dadaamiya vamiteka jirire á katafke-aara ádaba mi dábete \*tawraitá, amá a vamite jirire ádaba famitarfe áte Yaisu \*Almasiihu.

<sup>28</sup> Adaba diyamidiya geni emnde tá shá jirire áza Dadaamiya sey ma fartarfe áte Yaisu Almasiihu, tá taa shánka ádfaba ta dfabete tawraita.

<sup>29</sup> Emtu, Dadaamiya nanna sey ba ge Yahudiya-aha palle, ge emnde umele wá, Dadaamiya-aatare-ka emtu? Una estuweka, itare keni Dadaamiya-aatare ba nane nanna.

<sup>30</sup> Adaba baaka Dadaamiya umele, sey ba palle. Má fartarfe Yahudiya-aha áte Yaisu Almasiihu á vaterteva jirire á katafke-aara. Ge emnde a jeba umele keni ba estuwa nanna; má fartarfe áte Yaisu Almasiihu wá, itare keni á vaterteva jirire á katafke-aara.

<sup>31</sup> Emtu má na ba: Dadaamiya á vaterte jirire ge emnde sey má fartarfe ate Yaisu Almasiihu wá, na ganve tawraita ba seke duksa dey emtu? Estuweka dfekideki. Baira ná ankwá njante tawraita.

## 4

### *Náwa ba seke estara Ibrahimá a shaa jirire áza Dadaamiya*

<sup>1</sup> Dzamawamidzámá áte eggyemiya Ibrahimá, mi ba uwe kina áte nane? Ndza a shaa uwe nane áza Dadaamiya?

<sup>2</sup> Ma andze Ibrahimá shánsha jirire áza Dadaamiya ádfaba shagerire á slera-aara wá, ma andze á gálá ire-aara átekwa. Amá nane ndza shánka dalila á gálá ire-aara á katafke á Dadaamiya.

<sup>3</sup> Ankwá ta puwete ba estuwa am wakita á Dadaamiya, a bá nane: Ibrahimá a fetaare áte Dadaamiya, daaci, ádfaba ba fetarfire-aara nanna, Dadaamiya a vante jirire á katafke-aara.

<sup>4</sup> Diyamidiya geni má ura ankwá á maga slera wá, duksa na tá de vanta am iga á slera nanna gafka dey mázle-aara, una nanna mbera-aara, zlayá-aara.

<sup>5</sup> Una keni ba estuwa: Edda una má dzamaaka de shá jirire áza Dadaamiya á ba an shagerire á slera-aara, amá a fetaare á ba áte Dadaamiya, ge nane wá, Dadaamiya á vanteva jirire ba dey. Adaba Dadaamiya wá, á dzegwándzegwa vanteva jirire ge slehaypa.

<sup>6</sup> \*Dawuda keni ndza a ndahese elva áte edda una a shaa jirire ba dey á katafke á Dadaamiya, a bá nane: Edda-aara nanna wá, gedetegeđa.

<sup>7</sup> Gedartegeđa emnde na Dadaamiya a yateraare emtanjkire-aatare, á zhareka haypa-aha-aatare na.

<sup>8</sup> Gedetegeđa zhele na má Yaakadada Dadaamiya á jaheka haypa-aha-aara na.

<sup>9</sup> Geđa nanna á tsakaná Dawuda na wá, sey tá sháná ba emnde na tá am shedekwe emtu? Una estuweka, antara ba emnde na tá baaka am shedekwe keni bademme. Adaba a bá miya ba kina: Dadaamiya a vante jirire ge Ibrahimá adaba a fetaare áte nane.

<sup>10</sup> Emtu Ibrahimá ndza a shanaa am sarte-ara geva edda á jirire á katafke á Dadaamiya? Am sarte na demda am shedekwe emtu, kwaye am sarte na zlađe daaka am shedekwe he? Ábi kwaye am sarte na zlađe daaka am shedekwe ba dfekideki.

<sup>11</sup> Dem shedekwe na ndza a maganaa Ibrahimá wá, ndza ba nalaama ge marese fetarfire-aara áte Dadaamiya, antara jirire na a shanaa nane am zunjwire á katafke-aara na. Daaci Ibrahimá a geva estuwa dada arge emnde na daremka am shedekwe, amá fartarfe na. Dadaamiya á vaterte jirire á katafke-aara keni, ba seke una ni ndza a vante ge Ibrahimá werre na.

<sup>12</sup> Zlaɓe ádalíye keni ba ɲane una dada arge emnde na tá am sheɗekwe, amá tá anƙwa ɗaba fetarfire á eddemiya Ibrahima na, ɲane a fetaare kwaye zlaɓe daaka dem sheɗekwe na.

### *Sha duksa á Dadaamiya an fetarfire*

<sup>13</sup> Werre wá, Dadaamiya ndza a maganaa \*waada ge Ibrahima, antara wulfe-aha-aara, geni watse á de vaterte duniya baɗemme ba seke warita. Dadaamiya maganáńka waada ɲanna ge Ibrahima áɗaba a ɗabete \*tawraita, amá áɗaba ɲane fetarfe áte ɲane haa a ganve edda á jirire á katafke-aara.

<sup>14</sup> Ma andze Dadaamiya a magateraa waada ɲanna ba ge emnde na ta tsaahé áte tawraita wá, ma andze baaka nampire á fetarfire, antara ba waada na a maganaa Dadaamiya na keni ma andze á gevá ba dey.

<sup>15</sup> Ya ndahanaa áɗaba uwe una: áɗaba tawraita wá, ɲane á maramiya ba ni ervaunɗe jaaja Dadaamiya áte emnde, áɗaba faransárka. Baira am tate na emnde diyarka tawraita ɗekideki na wá, tá dzegwanka maganáńka baakire á fesarfire, áɗaba baaka ahuwa.

<sup>16</sup> Daaci estuwa, \*waada na a maganaa Dadaamiya na wá, a magán ge fetarfire, geni baɗemme á wulfe-aha á Ibrahima tá de shá duksa ɲanna názá ba dey. Amaana: emnde a fetarfe na ta tsaá á ba áte tawraita na, antara emnde umele na itare tá anƙwa ɗaba fetarfire á Ibrahima na keni, baɗemme tá de shansha á ba an jirire. Áɗaba Ibrahima wá, ɲane gevge eddemiya baɗemme.

<sup>17</sup> Anƙwa an puwa am wakita á Dadaamiya ba estuwa, a ba Dadaamiya á elván ge Ibrahima wá: Yá gakvege dada arge emnde a jeba-aha gergere ba kwakya á bina. Daaci Ibrahima a geva estuwa eddemiya baɗemmire á miya á katafke á Dadaamiya, áɗaba a fetaare áte ɲane. Ba Dadaamiya una edda á tsante ura am fáyá, antara edda á ganve duksa na ndza baaka ɗekideki na keni á ba an elva na á segashe am mbuwe-aara na.

<sup>18</sup> Ibrahima wá, ndza gulanaaka ɲane fetarfire-aara ɗekideki. Ma ndza emnde umele ta dzamán ba seke \*waada á Dadaamiya á de gevka mazle-aara keni, Ibrahima gulanaaka ɲane fetarfire antara tama-aara ɗekideki. A gevaa estuwa dada arge emnde a jeba-aha gergere kwakya ba seke una ni ndza a bannaa Dadaamiya, a ba ɲane: Náwa watse egdzara á ɲa tá de kwakyeƙwakye na.

<sup>19</sup> Am sarte ɲanna, iva á Ibrahima á maga deremke. Ma Ibrahima á zhara ire-aara gevge emgyegwe kurcumme, diyaadiya geni mukse-aara Saraatu á taa yeka egdzere mázle-aara keni, aley Ibrahima gulanaaka fetarfire-aara ɗekideki áte názena a bannaa Dadaamiya.

<sup>20</sup> ɲane ndza diyaadiya geni ba jirire, watse á shánsha duksa na a ba Dadaamiya á de vanteva na. ɲane magaaka shaige-aara ɗekideki. Baira fetarfire-aara ɲanna a vante ndzedá kwakya, á gálá ba Dadaamiya duksa-aara.

<sup>21</sup> ɲane ndza njantenja am ervaunɗe-aara geni Dadaamiya an hákuma ge mága názena a maganaa waada-aara na.

<sup>22</sup> Kwaye ɲane dalila na ni Dadaamiya a vante jirire á katafke-aara ge Ibrahima.

<sup>23</sup> Iyau, elva ɲanna keni puwartepuwe am wakita á Dadaamiya, geni Dadaamiya ganvege edda á jirire ákyiye na mu, a halavuwa á ba áte ɲane palle emtu?

<sup>24</sup> Elva ḡanna wá, ta puwete ádfaba miya keni, mi emnde na famitarfe áte edda una ndza a tsante Yaakadada Yaisu am fáya, geni miya keni watse á vamiteva jirire á katafke-aara.

<sup>25</sup> Ḣane a naba tsanaahe ge Dadaamiya, geni á emtsemtsa ádfaba haypa-aha á miya. Am iga á emtsa-aara maa, a tsantehe zlafe ádaliye am faya, geni á vamite an una ḡanna ge miya keni jirire á katafke-aara.

## 5

### *Shamiyansha mela antara Dadaamiya*

<sup>1</sup> Daaci am shamiyánsha jirire á katafke á Dadaamiya, adaba barka á fetarfire á miya áte Yaakadada á miya Yaisu \*Almasiihu, melamimela antara Dadaamiya mazle-aara.

<sup>2</sup> Ba Yaisu ḡanna palle una a weramitaa baráma geni mi shansha ḡurna áza Dadaamiya adaba famitarfe áte ḡane. Kina wá, tsamiyaatse áte ḡurna á Dadaamiya, gedamitegeda jipu, adaba anḡwa tama á miya ge de nja antara Dadaamiya am sleksire-aara.

<sup>3</sup> Gedá á miya zlafe tsaaka áte una ḡanna palle. Una ma anḡwa zladá áte miya keni, gedá á miya ba kela-aara, adaba diyamidiya geni zladá ḡanna á mbamise farvaunḡe.

<sup>4</sup> Má shamiyánsha farvaunḡe, am iga-aara mí de gevege emnde na hyarephye am duksa bademme. Má gamiyevge estuwa, daaci má á ba an tama áte duksa á Dadaamiya.

<sup>5</sup> Tama á miya ḡanna wá, á tekamika defekideki, adaba Shedekwe Cudedde anḡwa á ndahamindaha am ervaunḡe geni Dadaamiya á wayámiwaya kwakya.

<sup>6</sup> Ge jirire wá, werre ndza baaka dabari á miya defekideki. Daaci am iga á una ḡanna, de hyephye sarte na ndza a tsanaa Dadaamiya na, lauktu a naba tsekwehe ge Yaisu \*Almasiihu a emtsehe adaba haypa-aha á emnde bademme.

<sup>7</sup> Zlazladá jipu geni ura á emtsa am kela á ura umele, una ma edda-aara defetedaba jirire bademme keni. Má edda una kwakya maggwire-aara áte emnde wá, ámbane ura umele á naba eksaarekse emtsa am kela-aara.

<sup>8</sup> Amá Yaisu Almasiihu ḡane a naba emtsehe am kela á miya, kwaye zlafe ma emnde a haypa emtsaade. Daaci mi naba diyeddiye áte una ḡanna geni Dadaamiya wayamiwaya ba kwakya.

<sup>9</sup> Adaba emtsamtsa Yaisu Almasiihu am kela á miya wá, daaci mi shaa jirire áza Dadaamiya an uzhe-aara. Kina wá, njamitenja áte jirire-aara, geni watse á de lyamiyalye am názena watse á de magaterta Dadaamiya ge emnde adaba tá anḡwa jána an ervaunḡe.

<sup>10</sup> Werre wá, ndza mi kelaade-aha á Dadaamiya, amá kina wá, baaka duksa am dagave á miya antara ḡane mázla-aara, zlanazle an emtsa á Egdza-aara. Sakwa kina defeme melamimela na wá, njamitenja áte jirire-aara keni geni á de lyamilya ba ge defekideki, adaba tsettse Egdza-aara am fáya.

<sup>11</sup> Aley keni zlafe á tsaaka an una gedá á miya: Gedamitegeda jipu áte Dadaamiya adaba názena a magaminaa ḡane á kya erva an Yaakadada á miya Yaisu Almasiihu, shamiyánsha mela antara ḡane kina.

### *Názu ndza a sanaa Naadama, antara una a sanaa Yaisu \*Almasiihu*

<sup>12</sup> Ndza adaba ba haypa á ura palle una samsa haypa á sem duniya, haypa ḡanna a sateraa emtsa ge emnde. Daaci a hyete estuwa emtsa áte emnde bademme, adaba emnde keni bademme tá maga ba haypa.



<sup>13</sup> Ndza ba lauktu Dadaamiya á tsekwaná \*tawraitá ge nabi Muusa keni, kertenj ndza njánja tsuwe haypa am duniya bademme. Amá am zamáne na ndza zlafe baaka tawraitá, Dadaamiya keni ndza ndavaaka haypa-aha á emnde.

<sup>14</sup> Aley keni wá, kwaye am zamáne á Naadama, sem zamáne á Muusa, emtsa á maga ba sleksire-aara áte emnde bademme. Ma hyepka haypa-aha-aatare ba seke názá Naadama na a kwaleve cena elva á Dadaamiya na keni, emtsa wá, yaterka dekideki.

Nja á Naadama wá, ba gáráva á zhele na ndza a sáwa am iga-aara na.

<sup>15</sup> Amá wá, zala buwa nanna ta gergere jipu. Haypa na ndza a ganaa Naadama wá, náza slanveka dekideki ge yaikkire á ngurna na a velanaa Dadaamiya á sáwa ba dey na. Ba jirire, adaba ba haypa á ura palle una emnde bademme sharánsha emtsa, amá jatermeka duksa an yaikkire á ngurna na á magaterná Dadaamiya ba dey ge emnde bademme. Una keni a maganaa á ba á kya erva an ura palle zlafe adaliye: Ura nanna Yaisu \*Almasiihu.

<sup>16</sup> Duksa na á vantá Dadaamiya ge ura wá, námpire-aara keni ba tsekemme, ká slateraaka antara una ndza a sanaa haypa á ura palle na. Názena a sanaa haypa á ura palle na wá, a saa ba záwa á sem mbiye á emnde bademme á katafke á Dadaamiya. Amá má Dadaamiya magateránmaga ngurna-aara ge emnde wá, ma a kwakyaave estara haypa-aatare keni, nane vaterteva jirire á katafke-aara geni a mbedateraaka shairiya.

<sup>17</sup> Ge jirire wá, adaba ba haypa á ura palle, emnde bademme daremde am erva á emtsa. Una bademme ba lámare á ura palle nanna. Amá ura ge buwire, amaana: Yaisu Almasiihu, nane a naba se magaa pute umele. Adaba barka-aara emnde sharánsha ngurna yaikke áza Dadaamiya, á vaterteva jirire ba dey á katafke-aara. Itare wá, watse tá dem sha sleksire an shifa na á zleka na.

<sup>18</sup> Daaci ba seke una emnde bademme daremda am zává á katafke á Dadaamiya adaba haypa á ura palle na wá, ba estuwa zlafe adaliye una keni: Adaba jirire na a maganaa ura palle, ura nanna Yaisu Almasiihu, emnde bademme sharánsha effeya, a halaterse am zává, a vaterte shifa.

<sup>19</sup> Zlafe adaliye: Ba seke una emnde bademme daremda am erva ge haypa adaba ura palle kwalekwale cena elva á Dadaamiya na wá, ba estuwa zlafe adaliye una keni: Dadaamiya á vaterteva jirire ge emnde bademme adaba fesarfire á ura ge buwire na.

<sup>20</sup> Amá Dadaamiya a naba saa \*tawraitá zlafe adaliye á sem duniya, geni á se kwakypkwakya haypa-aha á emnde. Má kwakya haypa á emnde, Dadaamiya keni á magaterá ngurna kwakya.

<sup>21</sup> Ba seke una ndza a maganaa haypa sleksire-aara áte emnde bademme, á cebaterá an emtsa na wá, ngurna á Dadaamiya keni an hákuma jipu zlafe adaliye ge vaterta jirire ge emnde. Dadaamiya á kátá daterá á dem tata á shifa na á zleka na. Amaana tá de shá sleksire á kya erva an Yaakadada á miya Yaisu Almasiihu.

## 6

*Má an emtsa áza haypa, amá má an shifa áza Yaisu*

<sup>1</sup> Mí bá uwe kina áte jeba á elva nanna? Mí bánba kina ganakini naba magawamimága haypa á miya, geni Dadaamiya keni á de sagamiyan-vesage ngurna-aara emtu?

<sup>2</sup> Estuweka ɔfekideki. Má ge elva á haypa wá, miya má an emtsa. Daaci mí dzegwáná estara kena mága haypa mázle-aara?

<sup>3</sup> Emtu diyakurka geni miya baɔfemmiere á miya, am sarte na tá aŋkwa baramibara am yáwe á bap̄tisma na, miya gamiyevge palle antara Yaisu \*Almasiihu emtu? Diyakurka geni am sarte ŋanna ba seke emtsamimtsa kerɔe antara ŋane emtu?

<sup>4</sup> An bára á miya am yawe á bap̄tisma na wá, emtsamimtsa kerɔe antara ŋane, heɔaramiheɔa kerɔe kení. Daaci ba seke una ndza tsetetse Yaisu Almasiihu am fáya an hákuma á Edeŋara na, ba estuwa shifa á miya kení á eptsaptepts, gamiyevge aŋwaslire am njá á miya baɔfemme.

<sup>5</sup> Daaci má gamiyevge palle antara ŋane estuwa, an emtsa na ba seke názá-aara na, daaci ba jirire, ge tse am fáya kení ma ba palle. Dadaamiya á tsamitetse am fáya ba seke una ndza a tsantaa ŋane.

<sup>6</sup> Diyawamiyeddiye una ba shagera: Am sarte na tá aŋkwa zleŋela Yaisu Almasiihu áte dzaŋgala, cebarateraaceba kerɔe antara shifa a haypire á miya werre na, geni shifa a haypire ŋanna á zlauzle, mí sesse am erva á haypa mázle-aara.

<sup>7</sup> Aɔaba má ura gevge emtsa wá, baaka názu á eksaná haypa áte edda-aara mázle-aara.

<sup>8</sup> Má diyamidiya ge emtsamimtsa kerɔe antara ŋane wá, ge tsete am fáya kení diyamidiya geni mi de tsetse antara ŋane.

<sup>9</sup> Zlabe ádaliye: diyamidiya geni Yaisu Almasiihu wá, ŋane tsetse am fáya, á emtseka mázle-aara, aɔaba á danuka emtsa ge ŋane.

<sup>10</sup> Aɔaba emtsa-aara ŋanna wá, ndza a emtsa áɔaba haypa-aha á emnde, a emtsehe ba ser palle, hyephye ge baɔfemme. Amá shifa na an ŋane kina na wá, atuge Dadaamiya.

<sup>11</sup> Ba duksa palle ge kure kení: Diyaweddiye ba shagera am ire á kure, geni kure wá, kwá an emtsa á katafke á haypa. Amá shifa na kwá an ŋane kina na wá, kwá átuge Dadaamiya, aɔaba kwa ba palle antara Yaisu Almasiihu.

<sup>12</sup> Daaci yawanánka baráma ɔfekideki ge haypa á maga sleksire-aara áte kure, geni sey kwá maga ba shagerkire na á kátáná vuwa á kure na watse á de ba am haha na.

<sup>13</sup> Yawanánka ba kure an ire á kure vuwa á kure ge haypa, geni ubiya-aha á kure á gevge kazlaŋa á mága emtaŋkire. Arge una ŋanna, fawanemfa ire á kure am erva ge Dadaamiya, kwa emnde na ndza kwá an emtsa, tsakuretse am fáya na, geni baɔfemme á ubiya-aha á kure, á gevge kazlaŋa á mága slera á jirire.

<sup>14</sup> Daaci fawanemka ire á kure am erva ge haypa ba dey, aɔaba kure gakurevka am erva á \*tawrait, kure kwa emnde na kwá áte ŋgurna á Dadaamiya.

### *Geva náve á haypa, bi sha jirire áza Dadaamiya*

<sup>15</sup> Ázara á bá kure kina? Mí bánba ganakini miya mi baaka am erva á \*tawrait, má áte ŋgurna á Dadaamiya, naba magaumimága haypa á miya emtu? Estuweka ɔfekideki.

<sup>16</sup> Emtu diyakurka geni má kwa yanaa ba kure ire á kure am erva á ura geni kwá ɔaba ba názá-aara, kure gakurevge náve-aha á edda-aara emtu? Ndza diyakurka estuwa emtu? Daaci má kwa nave-aha á haypa, kwá ɔaba ba názá á haypa, amá ŋane á dákurá á de ceɔakurceba. Amá má kwá ɔaba názá á Dadaamiya, ŋane wá, á de gakurvege emnde a jirire á katafke-aara.

<sup>17</sup> Galaumigála Dadaamiya áǎaba sakuresse am návire á haypa, kwá anƙwa fansárfé ge Dadaamiya, kwá anƙwa lyiya názu tá tsahakurse áte ɲane an ervaunǎde á kure palle.

<sup>18</sup> Kina wá, sakuresse am erva á haypa, gakurevge náve-aha á Dadaamiya geni kwá maga ba jirire mázle-aara.

<sup>19</sup> Yá anƙwa vakurte gera á elva an návire am duniya na wá, áǎaba ba yiyiyire á hyema á kure ge cenva elva áte watsewatsire. Werre, kure ndza kwa yaa ire á kure baǎemme ge mága ba shagerkire, ba kelaazare ndza kwa fare ba ge mága emtanƙire. Una keni magaumaága á ba áte una ɲanna: Yawanánya ire á kure baǎemme ge Dadaamiya, gawuvge náve-aha-aara ge mága ba jirire baǎemme. Estuwa, kwá njinja áte cuǎeǎǎire.

<sup>20</sup> Am sarte na ndza zlaǎe kwá am návire á haypa, kure ndza baaka lámbe á kure áte elva á mága jirire.

<sup>21</sup> Ndza kwa shaa uwe am mága á kure werre ɲanna, kina ba enndaha-aara keni á wakurwa zherwe na? Ábi ndza baaka? Baira ma andze kwá shánsha emtsa am iga á una ɲanna.

<sup>22</sup> Amá kina wá, sakuresse am erva á haypa ɲanna mázle-aara, gakurevge náve-aha á Dadaamiya. Námpire-aara keni shakuránsha jipu, gakurevge emnde cuǎeǎǎe kwá átuge Dadaamiya. Am iga á una ɲanna keni, watse kwá shá shifa na á zleka na.

<sup>23</sup> Áǎaba má ura á maga ba haypa wá, edda-aara á de shá ba emtsa ge mbera-aara. Amá názu á vanta Dadaamiya ba dey ge ura wá, á vanta shifa na á zleka na, má garevge palle antara Yaakadada á miya Yaisu \*Almasiihu.

## 7

### *Gáráva an mukse á zhele*

<sup>1</sup> Ge diyakurkire emtu egdzar mama-aha-aaruwa geni \*tawraitá anƙwa á maga hákuma-aara áte ura sey má zlaǎe edda-aara an shifa? Una elva-aaruwa una yá vakurte ge kure áǎaba kure diyakurdiya názu am tawraitá.

<sup>2</sup> Ba seke mukse á zhele, má zlaǎe zhele á mukse ɲanna an shifa, an piya jipu geni á verɲa mukse ɲanna ge de ga zhele umele. Amá má baaka zhele-aara an shifa wá, daaci á kwaráná ba ɲane ire-aara mázle-aara, á piyanteka tawraitá mázle-aara.

<sup>3</sup> Má gevge ni zlaazlálá mukse ɲanna, de gaaga zhele umele a ya ba zhele-aara an shifa wá, mukse ɲanna maganaamaga gwardzire. Amá má kedaakeda zhele-aara, ma de gaaga zhele umele keni, baaka gwardzire áte ɲane, an piyeka mázle-aara.

<sup>4</sup> Ge kure keni ba estuwa ɲanna egdzar mama-aha-aaruwa, á kwarakurá tawraitá-ka mázle-aara, áǎaba kwá an emtsa á katafke-aara, emtsakuremtsa kerǎe antara Yaisu \*Almasiihu. Daaci kina wá, gakurevge átuge edda una ɲanna ndza emtsamtsa, tsetetse am fáya na. Miya baǎemme keni am njá á miya kina antara kure na wá, mí maga ba duksa shagera na watse an námpire aza Dadaamiya na.

<sup>5</sup> Áǎaba am sarte na ndza mi maga ba názena á katáná ire á miya wá, ndza mi maga ba haypa. Sámsa tawraitá keni a se tsante enƙale á miya zlaǎe ádaliye ge mága ba haypa. Estuwa, ma andze mi shánsha emtsa am iga-aara.

<sup>6</sup> Ndza werre wá, mi ba seke dangay-aha á tawraitá, amá kina shamiyánsha ire á miya ázeɲara. Áǎaba miya má an emtsa á katafke-aara. Daaci kina wá, mí an shifa áɲwaslire, mi dzegwándzegwa magannaamaga

dukasa ge Dadaamiya áte unṅule na á maramiyá Shedekwe-aara na. Gafka áte unṅule werre na ndza á yanaa názu am tawraitá na.

*\*Tawraitá á maraterá ba haypa-aha-aatare ge emnde*

<sup>7</sup> Mi bá uwe kina áte jeba á elva na? Mí banba ganakini an haypa \*tawraitá emtu? Estuweka d'ekid'eki. Aley keni wá, a se balisaa ba tawraitá názena tá d'ahaná an haypa na. Ma andze biyánka shairiya á Dadaamiya: Fe-ka ice am duksa á ura, ma andze yá diseka geni una ṅanna haypa.

<sup>8</sup> Amá ba de diyaneddiye shairiya á Dadaamiya ṅanna, haypa shánsha baráma áte iya mázle-aara, berhiyemberha am fa ice am duksa-aha gergere ba kwakya. Ma andze baaka tawraitá, haypa keni ma á dzegwánka mága kelaadire áte ura.

<sup>9</sup> Werre, am sarte na ndza zlaḅe diyanka tawraitá wá, ndza ya kurken ya ba ura an shifa. Amá ba de diyaneddiye shairiya á Dadaamiya wá, náwa ya keni, á bá haypa, tsetse an shifa,

<sup>10</sup> iya emtsanemtsa. Dadaamiya wá, ṅane a saa tawraitá ge vaterte shifa ge emnde, amá áte názá-aaruwa na wá, a siyaa ba emtsa.

<sup>11</sup> Ya ndahanaa ád'aba uwe una? Ád'aba am sarte na diyaneddiye shairiya á Dadaamiya, haypa keni shánsha baráma áte iya, a jiyaa enkale-aaruwa bademme geni yá farfe ge mága haypa-aha umele. A jiyaa estuwa haypa, amá a ṅgudansaa ba tawraitá huḁe.

<sup>12</sup> Amá tawraitá an ire-aara wá, ṅane cuḁeḁe, shairiya-aha á Dadaamiya na am huḁe-aara bademme cuḁeḁe, bademme ba jirire, bademme shagera.

<sup>13</sup> Daaci duksa shagera estuwa emtu á siya emtsa ge iya? ṅane-ka d'ekid'eki. Iya wá, a jiyaa ba haypa. Ba ád'aba dzegwanánka d'aba shagerire á názena am tawraitá, daaci a naba cavad'itehe ge haypa, a tedese shifa am ya, an duksa shagera ṅanna. Tá dise áte una ṅanna ganakini haypa wá, haypa ba jire. Daaci, ad'aba barka ba tawraitá, haypa maresemáre ire-aara geni ṅane wá, mándzawe ba jire.

*Ura á kátá á maga shagerire, amá á daaka ndzed'a-aara*

<sup>14</sup> Diyamidiya \*tawraitá wá, a sawa áza Dadaamiya, amá iya, ya ba urimagwe, ba seke tá veliwe an vela ge haypa, ganevge náve-aara.

<sup>15</sup> Názena yá maganá iya na wá, ba iya keni cenanseka. Názena yá kátá maganá iya, á daaka ndzed'a-aaruwa, yá maga una wayanka na.

<sup>16</sup> Má ganuge názu wayanka emmága-aara wá, yá dise áte una ṅanna shagerire á tawraitá.

<sup>17</sup> Daaci má estuwa, mándzawire ṅanna yá maganá ba iya an ire-aaruwa-ka, á maganá ba haypa na an'kwa am vuwa-aaruwa na.

<sup>18</sup> Diyandiya ganakini baaka shagerire azeruwa, amaana: ázeruwa urimagwe na. Ád'aba ba jirire geni am ervaunḁe-aaruwa wayanwáyá mága shagerire, amá á daaka ndzed'a-aaruwa.

<sup>19</sup> Shagerire na yá kátá maganá ya wá, á daaka ndzed'a-aaruwa, yá maga ba mándzawire na wayanka na am kela-aara.

<sup>20</sup> Má ganuge názu wayanka emmága-aara na wá, yá dise áte una ṅanna geni yá maganá ba iya an ire-aaruwa-ka, á maganá ba haypa na an'kwa am vuwa-aaruwa na.

<sup>21</sup> Názu yá an'kwa tapaná iya am vuwa-aaruwa wá, má yá kátá maga shagerire, kerten' ba jarje shagerkire á katafke-aaruwa, yá maganaamaga una ṅanna am kela-aara.

<sup>22</sup> Ate una am ervaunđe-aaruwa wá, wayanwáyá yá d̄abeted̄aba tawrait̄a á Dadaamiya ba shagera.

<sup>23</sup> Amá an̄kwa duksa mándzawe am vuwa-aaruwa, ñane wayiyanteka d̄ekid̄eki ganakini yá maganaamaga shagerire na diyandiya am ire-aaruwa. Duksa ñanna a give ba seke yá náve-aara geni sey yá maga ba haypa na am vuwa-aaruwa na, baaka duksa umele.

<sup>24</sup> Kay! yá baaka degiya! An vuwa á haypire-aaruwa na wá, á shisha emtsa! Á lysisá ware-aaruwa?

<sup>25</sup> Dadaamiya wá, an̄kwa, yá slafaná we-aaruwa ba ge ñane palle á kyá erva an Yaakadada á miya Yaisu \*Almasiihu.

Daaci ba seke una ya enndaha na: Iya an ire-aaruwa wá, tsanaatse á ba áte una a ndahesa Dadaamiya am tawrait̄a na. Amá an vuwa a urimagwire-aaruwa na wá, yá an̄kwa maganá áte názá á haypa.

## 8

### *Emnde na tá maga ba názu á kataná Shedekwe Cufed̄de na*

<sup>1</sup> Daaci kina wá, baaka záwá mazla-aara am mbiye á emnde na garevge palle antara Yaisu \*Almasiihu na.

<sup>2</sup> Adaba Shedekwe Cufed̄de na an̄kwa vaterte shifa ge emnde na tá am erva á Yaisu Almasiihu, sisese am erva á haypa, sisese am erva á emtsa.

<sup>3</sup> \*Tawrait̄a wá, ñane dzegwánka halese emnde am erva á haypa, ad̄aba baakire á payda á emndimagwaha ge mága názu a ndavateruwa ñane. Amá wa, Dadaamiya maganaamaga duksa ñanna janviyaaja ge tawrait̄a na. A maganaa estara ñane? A naba bela Egdza-aara á sem duniya, áte nderáva á miya emndimagwaha na má an haypa na, geni á se lyamivaare ñane haypa-aha á miya. Dadaamiya a puwanem estuwa zawa am mbiye ge haypa na am vuwa á emnde na.

<sup>4</sup> Dadaamiya a magaa una ñanna wá, ba geni mí mañka názena á kataná ba ire á miya, amá mí maganaamaga jirire na á ndavaná tawrait̄a na bademme, miya emnde na á kwaramiya Shedekwe Cufed̄de na.

<sup>5</sup> Adaba emnde na tá maga ba názena á kataná ire-aatare na wá, itare tá dzama ba názena á kataná ire-aatare ñanna. Emnde na tá maga ba názena a baterna Shedekwe Cufed̄de, itare tá dzama ba názena á kataná Shedekwe Cufed̄de na.

<sup>6</sup> Daaci emnde na itare tá maga ba názu á kataná ire-aatare, itare tá shánsha emtsa. Amá emnde na tá dzáma ba názu á kataná Shedekwe Cufed̄de, itare tá shá shifa na á zleka na, antara hairire.

<sup>7</sup> Emnde na ni tá dzama ba názena á kataná ire-aatare na wá, itare tá d̄abeka tawrait̄a á Dadaamiya, itare tá dzegwánka d̄aba Dadaamiya d̄ekid̄eki, ta kelaade-aha-aara.

<sup>8</sup> Bademme á emnde na tá njá á maga ba názena á kataná ire-aatare na wá, itare tá shánka háyá áza Dadaamiya d̄ekid̄eki.

<sup>9</sup> Amá kure wá, kwá maganá áte una á kataná ire á kureka, á kwarakurá ba Shedekwe Cufed̄de, ad̄aba an̄kwa Shedekwe ñanna am kure. Má ura baaka an Shedekwe ñanna wá, edda-aara gevka átuge Yaisu Almasiihu.

<sup>10</sup> Ma kwa an emtsa ad̄aba lámare á haypa keni, amá má an̄kwa Yaisu Almasiihu am kure wá, Shedekwe Cufed̄de á vakureteva shifa jirire, ad̄aba kure gakurevge emnde a jirire á katafke á Dadaamiya.

<sup>11</sup> Má an̄kwa Shedekwe á Dadaamiya na ndza a tsetaa Yaisu Almasiihu am faya na am kure wá, una ba jirire ganakini ba ñane zlahe una watse á de femfa shifa am kure keni, an hákuma á Shedekwe-aara an̄kwa am kure na.



<sup>12</sup> Daaci, egdzar mama-aha-aaruwa, má estuwa wá, ba seke má an gema am vuwa geni sey mi maganaamaga názena á kataná Shedekwe Cufedde na, mi maŋka una á kataná ba ire á miya na.

<sup>13</sup> Adaba uwe, má kwá dabaná áte una á kataná ire á kure na, kure kwá de shá ba emtsa. Amá má kwá ganapteka d'ekideki ge kazlaŋa-aha na á kataná vuwa á kure, á kwarakurá ba Shedekwe Cufedde, daaci estuwa wá, kwá shánsha shifa á jirire.

<sup>14</sup> Bademme á emnde na tá dabaná áte una á maraterná Shedekwe Cufedde na wá, itare ta egdzara á Dadaamiya.

<sup>15</sup> Adaba uwe, Shedekwe Cufedde na kwa shanaa kure áza Dadaamiya na, kwa shan geni á eptsakurá ádaliye á dem návire á kure werre-ka, geni kwá njá an lyawa zlaŋe ádaliye-ka, amá kwa shan geni á gakurvege egdzara á Dadaamiya, á vamita ŋane baráma a d'áhá Dadaamiya an dada.

<sup>16</sup> Iyau, aŋkwa á bamiyanba Shedekwe Cufedde ŋanna am ervaunde á miya, geni miya wá, ba jirire ma ba egdzara á Dadaamiya.

<sup>17</sup> Am gamiyevge egdzara-aara estuwa, daaci miya keni má de shánsha dza á miya am duksa shagera na a fater ge emnde-aara na. Ba miya antara Yaisu Almasiihu una má de shánsha duksa ŋanna. Adaba má eksamiyaarekse sha zlaŋa seke ŋane, daaci má shánsha de nja am yaikkire keni antara ŋane.

### *Yaikkire na má ufaná miya áza Dadaamiya*

<sup>18</sup> Una wá, diyandiya ba jirire ganakini zlaŋa na má aŋkwa shaná miya kina wá, hyafka ba názara keni ká slaterka an yaikkire na watse á de vamita Dadaamiya na.

<sup>19</sup> Adaba bademme á duksa-aha na a nderanaa Dadaamiya, tá aŋkwa á tsakwa ba hyema á sarte na má watse Dadaamiya á mara egdzara-aara áte parakkire am sleksire-aara na.

<sup>20</sup> Bademme á duksa-aha na a nderanaa Dadaamiya na wá, garevge ba seke duksa ba dey ázeŋara. Amá namaari-aatare-ka, a fateraare ba Dadaamiya ŋanna adaba haypa á emnde. Aley, duksa-aha ŋanna tá á ba an tama-aatare áte shagerire na watse á de magaterná Dadaamiya.

<sup>21</sup> Elva ŋanna wá, amaana: Bademme á duksa-aha na a nderanaa Dadaamiya na, watse tá shánsha ire-aatare. Adaba watse tá sesse am erva á emtsa, watse tá leŋe-ka mázle-aara, itare keni watse tá shá yaikkire ba seke egdzara á Dadaamiya.

<sup>22</sup> Miya wá, diyamidiya ganakini sem ba vatená keni, bademme á duksa-aha na a nderanaa Dadaamiya na tá aŋkwa basha ba zlaŋa emtsaade. Am ervaunde-aatare tá aŋkwa ŋiya ba seke mukse na am zlaŋa á yá na.

<sup>23</sup> Amá tá ŋiya ba duksa-aha ŋanna-ka palle, antara ba miya. Amá Dadaamiya vamiteva Shedekwe-aara. Shedekwe ŋanna wá, duksa zuŋŋwe am nazena mí de shaná miya ázeŋara bademme. Daaci mí ámbera á ba ŋiya ŋanna am ervaunde á miya, má aŋkwa tsakwa ba hyema á sarte na watse á se halamisehale Dadaamiya náza á ba ge d'ekideki am zlaŋa ŋanna, á gamivege egdzara-aara.

<sup>24</sup> Dadaamiya wá, ŋane a lyamise vatene-ka, amá miya zlaŋe má aŋkwa tamaná á ba an tama emtsaade. Adaba uwe, má ura á nanna názu aŋkwa á tamaná ŋane wá, á tamaná an tameka mazla-aara adaba shansha. Emtu ware edda una zlaŋe á tamaná an tama duksa na am erva-aara ba ge ŋane?

<sup>25</sup> Tama wá, mí fánaa áte duksa na zlaŋe namiyánka emtsaade na. Una wá, mí tsakwa hyema-aara ba shagera, mí farvaunde ba shagera am huŋe-aara.

<sup>26</sup> Daaci estuwa, Sheḏekwe Cufedḏe keni á sáwá á se melamiyumele aḏaba baaka ndzedá á miya ge miya. Miya wá, ba mága maduwa áte unḡule-aara keni diyamika, amá Sheḏekwe Cufedḏe á kyuwanva ba ḡane ge Dadaamiya am kela á miya, á ḡalamiyunḡale ḡane áte una á taa tsakeseka ura na.

<sup>27</sup> Dadaamiya wá, ḡane diyaadiya názu am ervaunḏe á emnde. Daaci ḡane diyaadiya názena á kataná Sheḏekwe Cufedḏe na keni, aḏaba Sheḏekwe Cufedḏe ḡane á ḡalateru ba ge emnde á Dadaamiya, á ḡalateru áte namaari á Dadaamiya.

<sup>28</sup> Daaci má estuwa, diyamidiya ganakini Dadaamiya wá, anḡkwa antara emnde na a dzeratersaa ḡane ma am uwe keni. Itare keni wayarwáyá an Dadaamiya jipu. Ma jebara-aatare keni á zlauzle á ba áte shagerire.

<sup>29</sup> Emnde na Dadaamiya ndza a dzeraterse werre na wá, a ba am werrire ḡanna zlaḡe ádaliye a tsateraahe ganakini watse tá de gáráva antara Egdza-aara, lauktu Egdza-aara á de geva makaji am dágave á egdzara ḡanna baḏemme.

<sup>30</sup> Baḏemme á emnde ḡanna á dzeratersa Dadaamiya werre na, a ḏatersehe baḏemme, a vaterte jirire á katafke-aara, a naba vaterte nja antara ḡane am sleksire-aara.

### *Dadaamiya wayamiwaya baaka halavuwa-aara*

<sup>31</sup> Má Dadaamiya anḡkwa antara miya estuwa, anḡkwa názu mí ndahaná miya zlaḡe ádaliye arge una ḡanna emtu? Ware edda una á dzegwándzegwa geva kelaade á miya mázla-aara?

<sup>32</sup> Dadaamiya, ḡane shebaaka Egdza-aara, amá a naba yananuhe ge emtsa áḏaba miya. Má Dadaamiya á vamite Egdza-aara estuwa, sakwa duksa-aha umele emtu? duksa-aha umele baḏemme keni watse á de vamiteva.

<sup>33</sup> Ware edda una á dzegwándzegwa icateraare sera ge emnde na a dzeraterse Dadaamiya? Baaka ḏekideki, aḏaba ba ḡane an ire-aara una a vaterte jirire na.

<sup>34</sup> Daaci estuwa, anḡkwa ura a dzegwándzegwa mbeḏamimbeḏa am shairiya emtu? Baaka á jerka ḏekideki. Aḏaba Yaisu \*Almasiihu ḡane emtsamtsa áḏaba miya, zlaḡe ádaliye keni tsetetse am fáyá, anḡkwa am naḏafa á Dadaamiya, á ndahaná ḡane elva am kela á miya.

<sup>35</sup> Nja wayáva na á wayámiya Yaisu Almasiihu na, anḡkwa názu á dzegwándzegwa tegamiya an ḡane emtu? Baaka una á jerka ḏekideki. ḡane ba á wayamiwaya. Una ma palasa, ma beccire, ma zlaḏa na tá fáná emnde áte miya, ma waya am huḏe, ma petekkire á erva, ma nasáre na áte ura, una ma duksa na á zlanazle shifa am miya keni á dzegwánka ḏekideki.

<sup>36</sup> Zlaḏa á miya ge miya wá, ba seke una anḡkwa puwartepuwe am wakita á Dadaamiya na, a bá ḡane:

Áḏaba ba ekka Dadaamiya, ḡere ba kelá á váha ba seke tá zlanazle shifa am ḡere, gaḡerevge ba seke kyawe-aha na tá dáterá á de cebaterceba na áza emnde.

<sup>37</sup> Nja una-aha ḡanna baḏemme na, aley miya wá, má vaatara keni sey mi gana ba miya midalire, áḏaba ndzendzedire á edda una wayamiwáyá jipu na.

<sup>38</sup> Una ba jirire diyandiya ganakini baaka ḏekideki duksa na á dzegwándzegwa tegamiya antara Dadaamiya, áḏaba wáyava-aara kwakya jipu áte miya. Una ma má emtsa, ma má ba an shifa á miya layye keni ba duksa palle ázeḡara. Ma malika-aha antara duksa-aha na

am samaya na, ma duksa na anƙwa a magava kina, ma una watse á de magava á katafke na,

<sup>39</sup> ma duksa-aha na tá am zhegela átire, ma una am ekte á samaya keni, am duksa-aha na a nderanaa Dadaamiya baɗemme á jerka ɗekideki una á dzegwándzegwa tegamiya an Dadaamiya, áte wáyáva-aara na á wayámiya ɗane á kya erva an Yaisu Almasiihu na.

## 9

### *Iserayiila-aha jirire na a dzeratersaa Dadaamiya*

<sup>1</sup> Náwa elva-aaruwa na yá bakurná ya, yá ndaakur ba jirire, baaka fida amkwa, aɗaba ya sledaba á Yaisu \*Almasiihu. Ba iya keni an hakuma á Shedekwe Cudɗɗe, diyandiya am ire-aaruwa ganakini ba jirire baaka fida am elva-aaruwa ɗanna ɗekideki. Yá bakurá geni

<sup>2</sup> yá áte paláse an tsaka ire, á wiwa jipu am ervaunɗe-aaruwa baaka ekhye-aara.

<sup>3</sup> Á wiya aɗaba uwe? Áɗaba emnde a jeba-aaruwa diyareka Yaisu Almasiihu ge ɗezla shifa-aatare. Ate iya kina wá, ma seke á naba gevge wá, wayanwaya geni á nyainyivenyainye Dadaamiya am kela-aatare, á mariyánka ɗaba Yaisu Almasiihu ɗanna mazla-aara, mákini itare tá shansha shifa ba jirire.

<sup>4</sup> Itare ta emnde a \*Iserayiila, a dzeratersaa ba Dadaamiya, a gaterve egdzara-aara, ba Dadaamiya ɗanna a marateraa ɗemɗemire-aara ge itare, a magateraa namána, a vaterte \*tawraitá, antara baráma á nja am sera-aara ba kelaazare, am magateraa \*waada ganakini watse á de vaterte duksa; aley, itare eksaranteka ɗekideki.

<sup>5</sup> Itare ta wulfe-aha á Ibrahimá tsa, am yá á vuwa, baira ta ba emnde a jeba antara Yaisu. Yaisu Almasiihu wá, ɗane Dadaamiya, duksa baɗemme á bá am erva-aara. Galaumigálá ba ɗane dem ba ge ɗekideki. \*Aamin.

<sup>6</sup> Dadaamiya eptsanteptsá elva-aara emtu? Una estuweka. Duksa na a ndahese Dadaamiya wá, baaka pekye-aara. Amá Iserayiila-aha kwakya diyarka Yaisu Almasiihu. Estuwa baɗemme-aatare-ka una garevge Iserayiila-aha á jirire.

<sup>7</sup> Zlabe ádaliye, Ibrahimá wá, kwakya wulfe-aha-aara, amá áte una ndza a ndahanaa Dadaamiya wá, baɗemme-aatare-ka ta wulfe-aha-aara ba jirire á katafke á Dadaamiya. Aɗaba a bá Dadaamiya á elvan ge Ibrahimá: Sey ba eggye-aha á Isiyaaku palle una ta wulfe-aha á ɗa ge ekka.

<sup>8</sup> Elva ɗanna wá, amaana: Am wulfe-aha á Ibrahimá baɗemme, tá anƙwa emnde umele-aatare garevka egdzara á Dadaamiya. Sey ba emnde na Dadaamiya a maganaa waada-aara ge Ibrahimá emtsaade lauktu á shatersha na.

<sup>9</sup> Náwa ndza a maganaa estuwa Dadaamiya waada ɗanna ge Ibrahimá: Ndza a banaa: Má watse hyephye sarte-aaruwa, watse yá sawa, Saraatu á de ya egdzere zhele.

<sup>10</sup> Zlabe halavuka áte una ɗanna palle. Raibaika keni ndza a yanaa egdzara wulhe-aha buwa ge eggyemiya Isiyaaku.

<sup>11-12</sup> Á ba am una zlabe yaraterka emtsaade keni kerten mbedanumbede tsawe Dadaamiya ge Raibaika, ganakini watse á malaavemale ba kudere arge male, watse male na á de maganá slera ge kuderenara. Baaka názu ta maganaa itare emtsaade, ma shagerkire ma shagerire keni. Dadaamiya a magaa una ɗanna ge marese ganakini ma vaatara keni ɗane á maga

duksa á bá áte una á kataná ñane. Daaci má á dzera ura keni, á eksese ura-aara á ba áte una á kataná ñane, adaba slera á edda-aara-ka.

<sup>13</sup> Daaci de sesse una ñanna am wakita á Dadaamiya, a bá ñane: Iya ya hayá ba Yakubu, wayanka an Isuwa.

<sup>14</sup> Daaci, mí bá uwe kina áte jeba á elva na? Mí bánba ganakini baaka jirire á Dadaamiya emtu? Una keni estuweka deki deki.

<sup>15</sup> Ábi ndza banánba Dadaamiya ge Muusa, a bá ñane: Iya, yá diya ba magan shagerire ge edda una yá kata maganá shagerire na, yá diya ba zanvaareze ge edda una yá kata zanvaareze, á bina.

<sup>16</sup> Daaci má Dadaamiya ekseseke ura wá, adaba a katanaa edda-aara-ka, adaba slera-aara-ka, amá a wayta ba Dadaamiya maganá shagerire ge edda-aara.

<sup>17</sup> Zlafe adaliye, ankwá puwartepuwa am wakita á Dadaamiya, a bá Dadaamiya á elvan ge sleksu \*Firawna: Ganakveka slekse yaikke ba dey, ya gakve slekse yaikke geni watse yá marese hakuma-aaruwa áte ka, yá hyanmehye zhera-aaruwa am duniya bademme an una ñanna.

<sup>18</sup> Kwaye ñane zlaláva á elva ñanna, geni Dadaamiya á maganá shagerire ge edda una á kataná ñane, á vante degdegire á ire ge ura umele, bademme á magán á ba áte una á kataná ñane.

*Shagerire na á magaterná Dadaamiya ge emnde, antara má jaaja ervaunde*

<sup>19</sup> Ambane ura umele má cenáncena estuwa, á de biyá: Labára Dadaamiya á ña emnde an shairiya adaba shagerkire na tá maganá itare má ba zlauzle á sawa ázenára?

<sup>20</sup> Ya bá ba ka ura-aaruwa: Ka urimagwe keni ká hyep uwe, baira ká gan jáwe ge Dadaamiya? Gahe keni á dzegwándzegwa maganá jáwe ge slendera-aara, á baná: ká nderi ge uwe estuwa emtu?

<sup>21</sup> Slendera á gahe wá, á diya ba emmága názena á kataná ñane an ebbehye-aara. Á bá an ebbehye palle, á naba tegansetege buwa, á nderendera gahe na an daradza na an kyalma-aara, an umele keni á nderendera zhera ba gahe an ñane.

<sup>22</sup> Daaci má Dadaamiya keni á kata magán ba seke náza slendera á gahe, á shákaashá emtu ge ekka? Náwa ñane, á kátá maraterá ervaunde na á ja ñane na, antara kwakyire á hakuma-aara ge emnde. Aley keni wá, zlafe ankwá á ebbasha emtsaade emnde na a nderateraa ñane na, antara ba emtanakire na tá maganá itare na keni, ñane á faterá ba ervaunde. Amá vacite umele wá, emnde ñanna tá de shá ba emtsa.

<sup>23</sup> Ba estuwa ñanna zlafe adaliye, Dadaamiya á kátá maraterá sleksire-aara ge emnde na a magateraa shagerire, a tsatsater kwaye am fantaufe geni watse tá de njá kerde am sleksire-aara.

<sup>24</sup> Emnde ñanna wá, ba miya, a dzeramisaa ñane. A dzeramise á bá am Yahudiya-aha-ka palle, a dzerese am jeba-aha umele keni bademme.

<sup>25</sup> Una wá, ba seke una ankwá a ndahese am wakita-aara a puwetaa nabi Hausiya na, a bá ñane:

Emnde na ndza ta emnde-aaruwa-ka na watse yá gatervege emnde-aaruwa; emnde a jeba na ndza wayanaterka na watse yá gatervege náwiya-aha-aaruwa, a bá ñane.

<sup>26</sup> Ba emnde ñanna ndza ya baterna ba iya am larde-aatare geni ta emnde-aaruwa-ka deki deki na, á bá am larde ñanna watse yá bateránba zlafe adaliye: Ekkure, kwa egdzara-aaruwa ge iya, ya Dadaamiya slefa shifa am emnde.

<sup>27</sup> Anƙwa názu ndza a ɓalesaa nabi Aisaya keni áte Iserayiila-aha, a ba ɓane: Ma Iserayiila-aha yaireya ba kwakya, garevge ba seke shiili na am guwa na keni, aley watse cekwa emnde na tá de ɓezlesenjle na am dagave-aatare, a bá ɓane.

<sup>28</sup> Dadaamiya Yaakadada wá, á haraaka, watse á se emmága názena a ndahasaa ɓane na baɗemme.

<sup>29</sup> Una keni ndza a balesaa ba nabi Aisaya ɓanna zlaɓe ádaliye, a bá ɓane:

Dadaamiya wá, slekse ba ɓane palle. Ma andze dzereseke emnde umele am dagave á egdzara á miya wá, miya keni ma andze mi ɓaaka ba seke tara ekse á \*Saudauma antara \*Gaumaura, ma andze miya keni á shamisha lámare ba seke itare.

*Yaisu \*Almasiihu gevge ba seke nákwá á ceɓa emnde an ektápaare áza Yahudiya-aha*

<sup>30</sup> Estara ɓane zlááva á elva ɓanna? Sera á elva ɓanna wá, náwa estuwa: Emnde a jeba umele itare tatayarka geva emnde a jirire am ice á Dadaamiya ɗekidɗeki. Amá kina wá, ta geva ba itare emnde a jirire áza Dadaamiya, aɗaba fartarfe an ɓane.

<sup>31</sup> Yahudiya-aha maa, itare ta tatayanaa á bá an ndzedá ge zla názena á ndahaná \*tawraitá, ge sha jirire an ɓane áza Dadaamiya, amá dáaka ndzedá-aatare.

<sup>32</sup> Labára daaka ndzedá-aatare? Aɗaba fartareka am ervaunɗe. Itare tá slaslán ba seke watse tá shá jirire áza Dadaamiya, má watse zlarinaazle mága názena á ndahaná tawraitá baɗemme. Daaci a cebateraa estuwa nákwá ɓanna an ektápaare.

<sup>33</sup> Anƙwa puwartepuwa am wakita á Dadaamiya, a bá ɓane: Cenausena baɗemme: Náwa yá ɓelá nákwá palle am larde á \*Siyauna, watse á de ceɓaná ɓane emnde an ektápaare, watse ɓane á geva palaha na tá mbada emnde átekwa na. Amá edda una a fetaare áte ɓane wá, á haslanaaka.

## 10

<sup>1</sup> Egdzar mama-aha-aaruwa, názu yá kataná iya kwakya am ervaunɗe-aaruwa, yá anƙwa ɓalaná áza Dadaamiya wá, yá kátá ba a saremsa Yahudiya-aha á ɓere keni á sem sera á Dadaamiya, tá lyelya shifa-aatare.

<sup>2</sup> Ge jirire wá, yá endáhá ba parakke itare keni tá anƙwa wava ge mága názena á kataná Dadaamiya, amá sharantauka ba emmága-aara.

<sup>3</sup> Am sharantauka ge názena tá maganá emnde ge sha jirire an ɓane aza Dadaamiya, itare ta naba njeta áte slera-aatare ge sha jirire. Daaci an una ɓanna, itare sarka á sem sera á Dadaamiya ge sha jirire.

<sup>4</sup> Am sarte na samsa Yaisu \*Almasiihu, slera á \*tawraitá keni zlauzle mazle-aara. Estuwa, má á fetaare ware áte ɓane keni edda á jirire ba ɓane áza Dadaamiya.

*Ma á fetaare ware áte Yaisu \*Almasiihu keni á lyelye shifa-aara*

<sup>5</sup> Werre wá, ndza a puwetaa nabi Muusa áte elva á sha jirire áza Dadaamiya an názena am \*tawraitá, a bá ɓane: Má ura maganaamaga názena am tawraitá wá, á shansha shifa. Amá wá, a yanseka ba palle keni, á bina.

<sup>6</sup> Amá á ba am wakita á Dadaamiya ɓanna zlaɓe ádaliye, una tá puwete ge sha jirire áza Dadaamiya an fetarfire wá, estuweka. A bá ɓane: Bánka am ervaunɗe á ɓa ganakini ware una watse á kapte á dem samaya na.



Elva ɲanna wá, amaana á kata bá: ware una á de ɗaha Yaisu \*Almasiihu am samaya.

<sup>7</sup> Zlaɓe ádaliye: Bánka am ervaunɗe á ɲa ganakini ware una á duwa á dem faya na. Amaana: a duwa ware á de ɗaha Yaisu Almasiihu na am faya.

<sup>8</sup> Bánka estuwa, aɗaba a ba wakita á Dadaamiya wá: elva á Dadaamiya ba herzhe an ka, yiyiyeka ɗekidɗeki. Elva ɲanna wá, á ba am mbuwe á ɲa keni ndaksendahe, faktarefe am ervaunɗe á ɲa, a bina. Aɗaba elva umeleka, ba elva na má aɲkwa balaterá waazu-aara ge emnde geni a fartarfe áte Dadaamiya na.

<sup>9</sup> Má ndaksendahe an we á ɲa parakke ganakini ba Yaisu una Yaakadada, fakatarfe keni am ervaunɗe á ɲa geni Dadaamiya tsantetse am faya wá, ekka ká ɲezlesenɗle.

<sup>10</sup> Máki famitarefe áte Yaisu Almasiihu a ba an jirire, ira mí ndahaná an we á miya geni Yaisu Almasiihu wá, ɲane Yaakadada, Dadaamiya á vamiteva jirire, á ɲezlamisenɗle.

<sup>11</sup> Aɲkwa á ndahaná wakita á Dadaamiya, a bá ɲane: Ma a fetaare ware áte ɲane keni, á tekanaaka, á bina.

<sup>12</sup> Una ɲanna wá, a ndahanaa áte emnde baɗemme, ma Yahudiya-aha, ma emnde a jeba umele keni, Yaakadada-aatare ba palle, á magaterá shagerire ge emnde na tá ɲala ázeɲara na.

<sup>13</sup> Aɗaba aɲkwa ta puwete ba estuwa am wakita á Dadaamiya, a bá ɲane: Baɗemme á emnde na tá ɲala Yaakadada na, tá ɲezlesenɗle.

<sup>14</sup> Amá elva na wá, bibiya. Tá ɲala estara ázeɲára má fartarka áte ɲane? Ge fetarfe keni, tá fetaara estara kena áte ɲane má cenaránka labáre-aara? Ge cena-aara keni, tá cenáná estara kena má de barateránka emnde umele?

<sup>15</sup> Ge de ndaterndaha ɲanna keni, tá de baterá estara kena má belarka emnde a bala waazu? Ba seke una aɲkwa ta puwete am wakita á Dadaamiya a bá ɲane: Aɲkwa názu shagera seke sawa á emnde a bálá waazu á labáre á higa-he, á bina.

<sup>16</sup> Amá keni wá, ta cekwa emnde na lyarvaalya an ervaunɗe-aatare palle labáre á higa ɲanna, ba seke una a bantsa nabi Aisaya na. A ba ɲane á elvan ge Yaakadada: Yaakadada-aaruwa, tá aɲkwa-he ɗeme emnde na fartarfe áte elva á ɲa na ɲa de balatersebále na, á bina.

<sup>17</sup> Daaci diyaweddiye ba shagera ganakini, lauktu ura á fetarfe wá, á fetaare áte názena a cenanaa ɲane am waazu. Má ura cenáncena waazu keni, á ba aɲkwa ura á balanse elva á Yaisu \*Almasiihu.

<sup>18</sup> Daaci mi bánba ganakini cenaránka emnde a \*Iserayiila waazu á labáre á higa ɲanna emtu? Ba jirire cenaráncena. Am wakita á Dadaamiya keni aɲkwa an puwa, a bá ɲane: Ma áme keni emnde ta cena ba kwara-aatare tá bálá elva á Dadaamiya, labáre-aatare hyemhye am duniya baɗemme.

<sup>19</sup> Una ni ba jirire mi bánba ganakini emnde a Iserayiila diyarka labáre á higa emtu? Ba jirire diyardiya, amá lyiyarka. Emtsaade wá, ndza a bánba nabi Muusa werre, geni a bantsa Dadaamiya:

Aɲkwa názu watse yá maganá ya, kwá de kuma shagerire á njá á emnde na ndza hyarefka ba náza keni na, watse á mbertembera ervaunɗe á kure ba seke kára, aɗaba itare ta emnde na ndza baaka enjkale-aatare na, á bina.

<sup>20</sup> Am iga á una ɲanna, nabi Aisaya keni shebaaka ɗekidɗeki, a ndaha zlaɓe ádaliye geni a bánba Dadaamiya:

Emnde na ndza tatayarika na wá, sharisha, ya marateraa ire-aaruwa ba ge emnde na ndavarika dekideki na, a bá ñane.

<sup>21</sup> Amá a ba ñane áte emnde a Iserayiila wá:

Váha deppe yá anƙwa maraterá erva-aha-aaruwa geni yá ɗaháterá ásezerwa, amá kwalariyarkwale, ta magiya degdegire á ire.

## 11

### *Dadaamiya yanka emnde a \*Iserayiila*

<sup>1</sup> Daaci má estuwa wá, anƙwa ndava-aaruwa zlaɓe ádaliye. Una á bánba ganakini Dadaamiya á yateraaya emnde-aara ñanna emtu? Yateraaka dekideki. Adaba ba iya an ire-aaruwa keni, ya ba ura \*Iserayiila ñanna miyenne, ña emnde a jeba palle antara emnde á Bainjamain, ya ba wulfe á Ibrahimia miyenne.

<sup>2</sup> Dadaamiya yateraaka emnde-aara na á dzeraterse kwáye am fantaufe á duksa baɗemme na. Caamane ábí diyakurdiya názena a ndasaa wakita á Dadaamiya áte nabi \*Ailiya? Am sarte ñanna Ailiya a de kyuwanve ge Dadaamiya geni a valateraarvala ge Iserayiila-aha, a bá ñane á elvan ge ñane:

<sup>3</sup> Yaakadada-aaruwa, baaka cebareceba nabi-aha á ña baɗemme, kyabarnaakyaba tate á faká sadake ge ekka, náwa ya juwá ba iya palle kina ge ɗabakɗába, ba iya ñanna keni tá kata ba jija.

<sup>4</sup> Zlanaazle náza-aara, a naba ñwanánte ge Dadaamiya, a bá ñane: Ka juwa ka palle-ka, yá an zála debu vuye una magarka hele, kezlaranka ugje ge Baal.

<sup>5</sup> Daaci am zamáne á miya kina keni, tá á ba anƙwa Yahudiya á ñere na Dadaamiya a magateraa ñgurna, a dzeratersehe na.

<sup>6</sup> Má kwa cenáncena ganakini Dadaamiya a magateraa ñgurna wá, a dzeraterse adaba shagerire á slera-aatare-ka. Ma andze adaba slera-aatare wá, daaci ñgurna na gafka ñgurna mázle-aara.

<sup>7</sup> Ay á kátá bamiya uwe ñane elva ñanna? Amaana wá: Baɗemme á emnde a Iserayiila-aha-ka una sharánsha názena tá tatayaná itare na. Sey ta shanaa ba emnde cekwa am ɗágave-aatare, ta shanaa ba emnde na a dzeratersaa Dadaamiya na. Emnde umele-aatare wá, ta magaa degdegire á ire.

<sup>8</sup> Una ñanna gevge á bá áte una á ndahaná wakita á Dadaamiya, a bá ñane: Dadaamiya a gaterve ba seke emnde na tá an ice á háre, ice-aatare keni á geva an háɗá, tá nánka an ñane, hyema-aatare keni ba greñje ba estuwa, tá cenánka na. Sem ba vatená keni ta ba estuwa ñanna, á bina.

<sup>9</sup> \*Dawuda keni ndza a nyanyaterve ba estuwa, a bá ñane:

Kwakyire á náza zuze-aatare na a nyaterfenye zlegde na watse á ɗáteráña kappe, tá segasheka dekideki am huɗe-aara na, sey tá mbaɗembaɗa baɗemme, lauktu watse tá tapántápa názena á de magaterná Dadaamiya na.

<sup>10</sup> A garevge wulfe-aha ba uwe keni a naránka dekideki. Sey Dadaamiya á faterarfe zlaɗa ba kelaazare, watse á zlanaazle ndzeɗa am itare baɗemme na.

<sup>11</sup> Anƙwa ndáva-aaruwa zlaɓe ádaliye, a bá iya wá: Am sarte na jaterja ektápaare ge Yahudiya-aha na wá, mbeɗarmbeɗa ba kereppe á dem haha emtu? Estuweka. Sera á elva ñanna náwa estuwa: amaana: Itare garega haypa. Daaci Dadaamiya a yaterehe, a maraterán ge emnde a jeba umele mazle-aara unñule á sha shifa ñanna. A magaa una ñanna, ba ganakini a kumarkuma áza emnde a jeba umele.

<sup>12</sup> Baakire á jirire na ta maganaa Yahudiya-aha na, a sateraa barka ge emnde bademme. Keda-aatare áte unjule á Dadaamiya na ni, a sateraa rezegire estuwa ge emnde. Sakwa má watse eptsareptsa á sem sera-aara deme wá, watse kwakya shagerire na á de magaterná Dadaamiya ge emnde bademme na.

*Paul á fater magiya ge emnde na ta Yahudiya-aha-ka na*

<sup>13</sup> Kina wá, yá elvan ge kure emnde na kwa Yahudiya-aha-ka na: Iya, ganevge slebela á Dadaamiya ásezekure. Yá higa jipu áte slera-aaruwa nanna á fiyaare nane na.

<sup>14</sup> Yá kátá geni tá kumetekuma Yahudiya-aha á ntere námpire na á magaterná slera-aaruwa ge emnde umele na, watse yá lyelya emnde umele am itare kena.

<sup>15</sup> Am sarte na Dadaamiya a yaa Yahudiya-aha na wá, kwakya emnde na melaremele antara Dadaamiya am duniya. Sakwa má watse lyaterválya Dadaamiya ádaliye deme wá, watse kwakya emtakire na tá de shansha emnde bademme na. Ba itare na ndza ba seke tá an emtsa na keni, watse á saasa shifa á sem itare bademme.

<sup>16</sup> Má á bá am dafa palle, takwala zunjwire tá fán tsekemme ge slera á Dadaamiya, daaci dafa nanna bademme keni ba náza á Dadaamiya. Zlafe adaliye, má tara slalwe-aha antara uksuwe á náfa keni ba náza á Dadaamiya wá, daaci erva-aha á náfa nanna keni ba náza á Dadaamiya.

<sup>17</sup> Náwa náfa umele zhera-aara anyaranyara an dzeba am fe á ura, ta naba datsa umele-aha am erva-aha-aara, daaci ta saa erva-aha á umele á sawa am kaamba ba dey, ta se fafanuhe. Erva-aha á náfa na ta sanaa á sawa am kaamba na wá, una nanna á ndahá ba kure emnde na kwa Yahudiya-aha-ka na. Daaci duksa shagera na ndza tá shána ba Yahudiya-aha na wá, kina kure keni kwá shánsha, ba seke una ni erva-aha á náfa tá shá ndzedá-aatare áte tara uksuwe antara slalwe-aha á náfa na.

<sup>18</sup> Adaba una nanna, epsawaterka d'ekideki emnde na ta ba seke erva-aha á náfa na ta datsateraahe áte mama na. Kwá dzegwánka magateraare kurávire d'ekideki, adaba kure keni kwa slalwe-aha-ka, kwa ba erva-aha áte mama náfa, ba erva-aha una tá shá ndzedá áte tara uksuwe, antara slalwe-aha á náfa. Erva-aha tá taa vaterteka ndzedá ge tara uksuwe antara slalwe-aha.

<sup>19</sup> Ámbane á de bánba ura umele ganakini ta datsa erva-aha náfa nanna áte mama na wá, ba geni tá puwa ntere á dem slede-aatare.

<sup>20</sup> Una nanna keni ba jirire, amá wá, itare ta tsekwataraahe áte mama adaba fartareka. Ekka na shakánsha slede na keni ka shanaa adaba faktarefe. Efa hyema ba shagera, manka kurávire. Arge una nanna, njinja á ba an lyawa á Dadaamiya am ervaunde.

<sup>21</sup> Ya ndahanaa adaba uwe una? Adaba má Dadaamiya a magaterá estuwa ge Yahudiya-aha na itare ta ba seke erva-aha nanna á ba an jirire wá, ká kurken ekka wá, watse á yakya emtu má faktareka an jirire?

<sup>22</sup> Diyaweddiye ba shagera ganakini Dadaamiya wá, slemággwe jipu, amá slezlađa zlafe ádaliye: slezlađa jipu áte edda una má á d'abeka unjule-aara na. Ge kure kina wá, slemággwe jipu áte kure, amá sey má kwá ankwá dabaná áte náza-aara. Má baaka una, kure keni watse á tsekwákuraatsekwa ba estuwa.

<sup>23</sup> Náza Yahudiya-aha wá, má yaránya mága degdegire á ire wá, una hyefka duksa ázejara, á eptsateraptsa zlafe ádaliye á sem slede-aatare ba seke una á kataná nane.

<sup>24</sup> Ekkure emnde na kwa Yahudiya-aha-ka na wá, kwa ba seke erva-aha á náfá á mbece na tá se fafanu ge náfá na shagera a dzebanaa ura na. Una duksa na á magaaveka d'ekideki áza emndimagwaha. Má janviyaaka mága duksa estuwa ge Dadaamiya, á de janviya eptsa Yahudiya-aha á sem slede-aatare emtu? Itare ta emnde na á bá am fantaufe keni ta erva-aha á náfá nanna an jirire ba itare!

*Iserayiila-aha bademme watse tá de nezlesenzle*

<sup>25</sup> Egdzar mama-aha-aaruwa, kwa emnde na gakurevka Yahudiya-aha na wá, yá kátá marakuránmára názena ndza nasherire na. Zlabe ádaliye yá kátá kwá maga enkale, bawanka: Ná áte ire ba nere arge Yahudiya-aha. Náwa nasherire nanna: Yahudiya-aha umele ta naba maganaa degdegire á ire ge Dadaamiya, amá wá, geni tá njá ba estuwa dem ba ge d'ekideki-ka. Am sarte na má de fartárfé emnde a jeba umele na a dzeratersaa Dadaamiya am duniya na bademme, itare keni tá de eptsa á sem sera-aara.

<sup>26</sup> Daaci má estuwa wá, \*Iserayiila-aha bademme watse tá nezlesenzle ba seke una á ndahanaa wakita á Dadaamiya na. Am wakita, a bá nane: Watse á jesarje slelya ura am berni á \*Siyauna, á de bezaterá nane haypa-aha-aatare ge emnde á Yakubu.

<sup>27</sup> Zlabe ádaliye, a bá Dadaamiya: Watse yá nguda namána-aaruwa antara itare am sarte na má watse yá yateraare haypa-aha-aatare na.

<sup>28</sup> Má ge cená labáre á higa wá, Yahudiya-aha cenarka d'ekideki, garevge kelaade-aha á Dadaamiya. Una nanna keni á wayakurantá ba Dadaamiya ge kure. Amá má áte dzera emnde-aara na a maganaa nane wá, ta náwiyá-aha ba itare, adaba ndza ta shan werre eggye-aha-aatare áza Dadaamiya.

<sup>29</sup> Adaba má Dadaamiya dzersedzere emnde-aara, a gaterar barka wá, una nanna náza dem ba ge d'ekideki, nane á eptseka elva-aara d'ekideki.

<sup>30</sup> Werre, ndza kwá emnde na fakuransáreka ge Dadaamiya na ba kure. Amá kina adaba degdegire á ire á Yahudiya-aha wá, Dadaamiya á magakurá zezarzure.

<sup>31</sup> Watse ba estuwa ge Yahudiya-aha keni. Kina wá, zlabe itare tá maganá ba degdegire á ire nanna emtsaade ge Dadaamiya, nane keni á magakurá shagerire ba ge kure. Amá wá, á magán ba geni a diyareddiye Yahudiya-aha á nere ganakini hyarephye geni á zatervárze Dadaamiya, a sarsawa á sem sera-aara.

<sup>32</sup> Daaci á belaterná ba Dadaamiya baráma ge emnde bademme geni a faransáreka na. Adaba am iga-aara, á kátá maraterá zezarzure-aara ge emnde bademme.

*Yaikkire á Dadaamiya wá, jauje ge duksa bademme*

<sup>33</sup> Dadaamiya wá, duksa bademme á bá ázenara, slemággwe jipu áte emnde. Baaka ura á diyeddiye enkale-aara, antara diya-aara, ira názena a njeta nane ganakini á emmága na, baaka edda una á dzegwándzegwa pakya sera á názu am ire-aara d'ekideki.

<sup>34</sup> Ba seke una ni ta puwetaa am wakita á Dadaamiya, a bá nane: Ware edda una diyaadiya názena á slaslaná Yaakadada na? Áme edda una á dzegwándzegwa geva slesawari-aara na?

<sup>35</sup> Emtu ankwá edda una ndza a vanta duksa ge Dadaamiya, ankwá á d'abaná áte gema emtu? Ura estuwa á jarka d'ekideki, á bina.

<sup>36</sup> Adaba duksa bademme a nderanaa ba nane. Má uwe keni á naná ba nane, bademme ba náza-aara. Galaumigálá ba nane palle dem ba ge d'ekideki. \*Aamin.

## 12

### *Elva á shifa á edda una átuge Dadaamiya*

<sup>1</sup> Yá ñalákurá adaba una ñanna egdzar mama-aha-aaruwa, geni kwá yaná ire á kure bademme ge Dadaamiya. Shifa á kure a gevge ba seke zhel kyawe na tá icaná sadake-aara ge ñane na. Njawinja an cudeddĩre áte una á kataná ñane. Magaumága á ba áte una ñanna, adaba ñane a zamivarhe, a magamiyaa maggwire kwakya. Uññule á kezlaná ugje ge Dadaamiya an jirire wá, baaka arge una ñanna.

<sup>2</sup> Dabauka mága á emnde a duniya na. Amá yawánya a eptsakurteptsba ba Dadaamiya an hakuma-aara, a vakurteva ba ñane enkale á jirire, kwá gevge ba seke ndza kure-ka. Daaci má gakurevge estuwa, watse kwá naba diyeddiye názena á kátáná ñane keni. Nazena á kátáná ñane na wá, amaana: duksa na shagera na, antara una má hayánháya ñane na, ira duksa na áte uññule-aara na.

<sup>3</sup> Adaba ñgurna na a maginaa Dadaamiya, a naba give slebela-aara na wá, yá naba ndakurndaha iya ma ge ware á kure keni, ganakini ma ware á kure keni a kanteka ba ñane ire-aara an kurávire, amá a tsaatse á bá áte deydey á ndzedá-aara na a vantaa Dadaamiya ge mága slera am fetarfire-aara.

<sup>4</sup> Vuwa á urimagwe wá, ba palle zelette. Amá wá, an ubiya-aha antara duksa-aha gergere kwakya, daaci ma uwe keni slera-aara ba tsekemme am vuwa ñanna.

<sup>5</sup> Njá á miya keni ba estuwa ñanna. Ma kwakya, amá mi ba seke vuwa á ura palle. Bademmire á miya má á ba an másláva an másláva. Adaba gamiyevge palle antara Yaisu \*Almasiihu keni.

<sup>6</sup> Zlabe adaliye, Dadaamiya a magamiyaa ñgurna kwakya, a tegamiyaa hákuma á mága slera-aha keni gergergre bademme. Daaci ma ware á miya keni a emmága slera-aara an hákuma na a vantaa Dadaamiya ge ñane. Daaci edda una a shaa hákuma á mága slera á nabiyire, sey a emmága á ba áte uññule-aara ba seke una a bannaa Dadaamiya na.

<sup>7</sup> Edda una ñane a shaa hákuma á melateru ge emnde, ñane keni a emmága slera-aara. Edda una a shaa hákuma á kwaraterse duksa ge emnde keni, a ñánáña slera-aara.

<sup>8</sup> Edda una a shaa hákuma á faterem ndzedá am vuwa ge emnde áte uññule á Dadaamiya, a emmága. Edda una a shaa hákuma á melateru ge emnde an nalmáne-aara, sey a emmága an ervaunđe-aara palle. Edda una ñane a shaa hákuma á geve slekatafke á emnde keni, a emmága slera-aara an shagerire á ervaunđe. Edda una a shaa hákuma á mága maggwire, ñane keni a emmága á ba an higa.

<sup>9</sup> Wayauka emnde á ba áte we ba dey, amá wayauterwáyá an ervaunđe á kure palle. Fauka vuwa á kure am tata á mága shagerkire dekideki, ma vaatara keni kure magaumága ba shagerire.

<sup>10</sup> Magaumága wáyáva am dágave á kure áte wáyáva á egdza mamire; ma ware á kure keni a effa zherwe áte emnde umele an shagerire á ervaunđe.

<sup>11</sup> Gawuvka emnde á masefe am slera á Yaakadada, amá gawuvge emnde a ndzendzedá am slera ñanna, kwá maganá an ervaunđe á kure palle.

<sup>12</sup> Ma vaatara keni gulawanaaka higa á kure dekideki, adaba kwá ankwá an tama áte duksa á Dadaamiya. Ma am zladá-ara keni, faufa ervaunđe ba shagera, ma vaatara keni gulawanaaka maduwa á kure dekideki.



<sup>13</sup> Melawaterumele ge egdzar mama-aha á kure emnde a fetarfe na tá taa hyanveka ge wedera-aha-aatare na. Lyiyauliyi wayve-aha á kure keni an erva buwa.

<sup>14</sup> Gawaterga barka ge emnde na tá anƙwa fá zlada áte kure, yekawaterarka emtaŋkire deƙideƙi.

<sup>15</sup> Má tá am geƙa emnde, kure keni higauhiga antara itare; má tá an yawe á kyuwa am ice itare, kure naba kyuwaukyuwa antara itare.

<sup>16</sup> Njawinja á ba áte ye palle antara sleriya-aha á kure. Magauka kurávire deƙideƙi, ma slera-ara keni naba magaumaƙa, bawánka ganakini slera na zlaya á ƚere-ka. Zharauka ire á kure ba seke kwa emnde na kwakya diya á kure.

<sup>17</sup> Má ura a magakuraa emtaŋkire, eptsawannaaka an emtaŋkire. Ekkure wá, tatayautátáya mága shagerire na watse emnde baƙemme tá de zlebakurzleba átekwa na.

<sup>18</sup> Ekkure wá, mákini kwá shánsha wá, ma estara keni magaumaƙa názena kwa dzegwanaa kure ganakini kwá njinja an hairire antara emnde baƙemme.

<sup>19</sup> Daaci egdzar mama-aha-aaruwa, kure wá, eptsawaternaaka emtaŋkire na tá magakurná emnde na an emtaŋkire, yawánya, watse á eptsaterná ba Dadaamiya má watse nahetenáhá am ervaunƙe-aara. Adaba anƙwa an puwa am wakita á Dadaamiya ganakini: A bántsa Yaakadada Dadaamiya: Watse yá eptsaternáptsa ba iya emtaŋkire-aatare, yá de peláná ba iya degun-aara.

<sup>20</sup> A bá ƚane zlaƙe ádaliye: Má á wáná waya ge slekeláade á ƚa wá, naba vanteva ka názu á zuze; má á wáná ndera, vanteva názu á shushe. Má ekka magakanaamaga una ƚanna, jakja an lindi zlauzle.

<sup>21</sup> Yawanánka baráma deƙideƙi ganakini emtaŋkire á egga midalire arge kure, amá gawegga ba kure midalire an mága maggwire.

## 13

### *Fawatersarfe ge emnde na tá an hakuma á ngumna*

<sup>1</sup> Sey emnde baƙemme tá fatersaarefe ge emnde na tá an hakuma á ngumna. Adaba baƙemme á emnde á hakuma, a vatertaa ba Dadaamiya hakuma ƚanna, a fanaa ba ƚane ngumna ƚanna.

<sup>2</sup> Daaci ma ware una á maganá garƙa ge edda á hakuma á ngumna keni, edda-aara a ebzu ba elva á Dadaamiya. Emnde a mága una ƚanna tá anƙwa fa ire-aatare á dem zawa.

<sup>3</sup> Má ura á maga ba shagerire, ƚane baaka lambe-aara átuƙe emnde a hakuma. Sey ba emnde a magá shagerkire una tá njá á bá an lyawa átuƙe itare na. Daaci má wayanƙa nja an lyawa átuƙe male-aha á duniya wá, emmága ba shagerire, watse tá hayák-haya.

<sup>4</sup> Adaba itare keni ta emnde a slera á Dadaamiya, tá anƙwa mbakurse ba mága shagerire. Má gakúge emtaŋkire wá, una wá, sey ká kuvaterkuva, adaba hakuma na a vatertaa Dadaamiya na gavka ba dey. Itare keni a tsateraa ba Dadaamiya ganakini tá gevá emnde a slera-aara. Edda una má á maga emtaŋkire wá, itare tá pelansepele an emtaŋkire-aara. Daaci una ƚanna á mara ba duksa na am ervaunƙe á Dadaamiya na.

<sup>5</sup> Adaba una ƚanna, shagera ba kwá fatersarefe ge male-aha á duniya. Una keni, a gevka adaba kwá kuva zlada, amá adaba diyakurdiya am ire á kure ganakini una ƚanna an unƙule-aara.

<sup>6</sup> Hadáma keni kwá puwaná adába ba una nanna. Adába itare emnde a ngumna nanna keni, a bazlateraa ba Dadaamiya geni a magarmága slera nanna áte shagerire.

<sup>7</sup> Vawaterteva ma ge emnde-ara-aatare keni bademme. Adába á belateraa ba ngumna. Vawaterteva hadáma-aatare ge \*emnde a jáhá hadáma; ma emnde a jaha uwe keni, vawaterteva ge emnde a jaha názena a tsanaa ngumna na bademme. Faufa dárádza áte emnde na hyarephye geni kwá fa dárádza áte itare, faufa zherwe áte emnde na máki zlaya-aatare na keni.

### *Wáyávire áte sleriya*

<sup>8</sup> Njawka an gema áte kure d'ekid'eki. Názena á njá áte kure ba seke gema na baaka halavuwa-aara d'ekid'eki na ge kure wá, ba mága wáyávire áte emnde. Máki ura wayawáya an emnde wá, edda-aara maganaamaga názena am shairiya-aha á Dadaamiya na bademme.

<sup>9</sup> A bá shairiya-aha á Dadaamiya wá: Manka gwardzire, jeka shifa, ileka, feka ice á nja am duksa á emnde. Bademme á shairiya-aha nanna náwa itare na, antara ba umele-aha na zlafe tá an'kwa na keni, tá á bá am hufe á shairiya palle na a bá: Ewwáyá sleriya á nja ba seke ire á nja, á bina.

<sup>10</sup> Edda una má wayawáyá an sleriya-aara wá, á maganá nka emtan'kire. Daaci máki wayak-wáya an sleriya á nja wá, ekka magakanáamaga názena á ndahaná shairiya-aha á Dadaamiya na bademme.

### *Tsakwawamitsakwa hyema an'kwa á sawa Yaisu*

<sup>11</sup> Daaci estuwa, wavauwáva ba shagera ge mága una nanna, adába ba kure keni diyakurdiya ganakini zamáne na, zamane á kwá pá hare amkweka. Áza Dadaamiya wá, herzhapteherzhe sarte á lya shifa á miya náza ba ge d'ekid'eki. Seke una am fantaufe á miya ge fetaare áte Yaakadada Yaisu \*Almasiihu na ka mazla-aara.

<sup>12</sup> Kina wá, gevge ba seke má herzhe á wera ekse, á zlalá tabedammire mázle-aara. Daaci halaumiyantehálá kazlaña na mí de wava an nane na am erva, yawamiyánya shagerkire na tá maganá am tabedammire na mázle-aara.

<sup>13</sup> Njauminja áte un'ule-aara ba seke emnde na tá zlála an vaciya na. Faumifa hyema mázle-aara, gaumiyevka emnde a mbazla, bi emnde a mága máme, antara gwardzire, an dágaldagala, an shelha áte ura, ira mága dakarire.

<sup>14</sup> Amá eksawanteksa hala-aha á Yaakadada Yaisu Almasiihu ba seke kazlaña á wáva á kure. Shagerkire na á kataná ervaun'de á kure na, á ba an ire keni dzamauka mázle-aara.

## 14

### *Habazauka sera á emnde*

<sup>1</sup> Má áte elva á wáyávire am dágáve á kure wá, viyawanaaka edda una zlafe gypka am fetarfire na, habazauka sera á názena a fetaara nane am ervaun'de-aara ge shagerire na.

<sup>2</sup> Náwa yá bakurá jeba á elva-aha nanna áte náza za: Ura umele, nane gypgye am fetarfire, diyaadiya ganakini ma uwe keni á diya ba ezza bademme. Daaci nane, baaka názu á yainya, á ezza bademme. Mbate, edda una zlafe gypka am fetarfire na, bademme á hyuwa nane á feka áte we-aara d'ekid'eki.

<sup>3</sup> Daaci edda una baaka názu a yanaa nane na keni, a epsaweka edda una á dzeraná an dzera duksa na. Iyau, edda una nane á zá ba daugdza-aara na keni, a habazeka sera á edda una bademme hyuwa á ezza na. Adaba baaka edda una a yanaa Dadaamiya am itare.

<sup>4</sup> Há! Ábi nane nave á Dadaamiya. Ekka edda una ká habaza sera á náve á ura na, ka hyef ware ka? Ma á maganá áte unṅule-aara nane, ma á maṅka áte unṅule-aara watse á de mbedfa keni, naba yainya ka watse á banánba ba edda-aara ge nane. Nane keni á mbedeka dfeme. Á hyefhye ndzedá á Yaakadada Yaisu \*Almasiihu ge tsanmártse.

<sup>5</sup> Zlabe adaliye, áza ura umele, váha umele jauje ge háre-aha umele bademme. Amá áza ura umele wá, bademme háre-aha ta ba kalkale. Ge jirire wá, shagera ba ma ware keni a diyeddiye ba nane názena am ervaunḡe-aara ge daba barama shagera.

<sup>6</sup> Edda una nane á fá dárádza á ba áte váha palle am háre-aha á bere na keni, á kátá zleba ba Yaakadada an nane, ba seke náza edda una á dzereka na. Iyau, edda una bademme hyuwa á ezza na keni á zleba ba Yaakadada an nane, adaba zuṅṅwe á slafaná we ba ge nane emtsaade. Edda una nane wayaaka zá duksa bademme na keni, nane keni á magán ba ge zleba Yaakadada, á slafaná we-aara ba ge Dadaamiya nane keni adaba názena á záná nane.

<sup>7</sup> Nawa yá bakuranba zlabe adaliye geni, baaka edda una am dagave á miya á njá an shifa ge ire-aara, baaka edda una watse á emtsa ge ire-aara keni. Miya wá, ma má an shifa keni, má an shifa ba ge Yaakadada á miya.

<sup>8</sup> Ma má an emtsa keni, má an emtsa ba ge nane. Daaci ma má á bá an shifa á miya, ma má an emtsa keni, bademme á miya ma ba náza-aha-aara.

<sup>9</sup> Adaba nane ndza a emtsehe, amá tsettse am fáyá geni á gevge Yaakadada á emnde na tá an shifa, antara emnde na tá am fáyá keni bademme.

<sup>10</sup> Ay a dakmá uwe ge ekka, ká habaza sera á egdza emmeṅa na? A dakmá uwe geni ká epsawa egdza emmeṅa na? Ábí watse bademme á miya mí de tse á katafke á Dadaamiya á de kyáná ba nane palle shairiya á miya?

<sup>11</sup> Adaba aṅkwa ndahán ba estuwa wakita á Dadaamiya, a bá nane: Á bántsa Dadaamiya Yaakadada: Bademme á emnde, watse tá se ba am sera-aara, tá se ndahaná ba itare an we-aatare geni ya Dadaamiya ba iya.

<sup>12</sup> Daaci estuwa, ma ware keni watse á de ndahaná ba nane an we-aara á katafke á Dadaamiya názena ndza a maganaa nane na.

### *Maṅka názena á de vanta ektápaare ge egdza emmeṅa*

<sup>13</sup> Daaci má estuwa wá, ma ware keni a yanya hábaza sera á egdza emmeṅara na mázla-aara. Náwa názena kwá de maganá kure arge una ṅanna: Bademme a názena máki watse á vanta ektápaare ge egdza emmekure, watse á mbedfa á dem haypa adaba kure na, magauka duksa ṅanna dēkifeki.

<sup>14</sup> Am gaṅerevge palle an Yaisu \*Almasiihu, diyandiya ba jirire ganakini baaka duksa na gevge haram ba ge ire-aara na. Amá ge edda una nane á zharán ba seke shagerka na wá, má zuze keni á zu ba haram ṅanna ba jire.

<sup>15</sup> Máki ká aṅkwa za duksa na watse á de fanem shunṅula am ervaunḡe ge egdza emmeṅa wá, daaci ekka dzalakevdzala áte baráma á wáyávire á

katafke-aara. Yaisu Almasiihu a naba yá ire-aara, a naba emtsehe adaba egdza emmena nanna, mbedanaaka ka adaba duksa na ká záná á ba á dem huđe na.

<sup>16</sup> Ekka wá, ndavakanundave ge ervaunde á na, amá má diyakdiya ganakini watse tá de wessa elva emnde adaba ekka wá, shagera ba ká yainya.

<sup>17</sup> Adaba am tate na á nja Dadaamiya an sleksire-aara wá, duksa yaikke ba kazlana na á vaterta Shedekwe Cudedde ge emnde na. Kazlana nanna wá: Ba nja an jirire, antara hairire, ira higa. Yaikke ba una-aha nanna arge elva á náza za, antara elva á náza sha.

<sup>18</sup> Edda una máki ankwá á maganá slera ge Yaisu Almasiihu áte una nanna wá, nane shánsha háyá yaikke áza Dadaamiya, ba emnde keni tá de zleba ba nane.

<sup>19</sup> Adaba una nanna, wavaumíwáwa ba shagera ge mága názena watse á samiya ba hairire, watse á dá emnde á Dadaamiya á de katafke na.

<sup>20</sup> Badzanveka ka názena a maganaa Dadaamiya á ba adaba elva á náza za. Náza za wá, diyamidiya ganakini baaka una haram ba ge ire-aara na. Amá máki watse á de magaterá ektápaare ge emnde wá, zlaya á na-ka mázla-aara ba ge faná áte we keni.

<sup>21</sup> Duksa na ká maganá ka wá, máki watse á de vaterte ektápaare ge egdzar mama-aha á na na wá, ma hyuwa, ma mbazla, ma uwe keni, yainya ba dekideki.

<sup>22</sup> Názena ni ka disaa ka am ervaunde á na áte jeba á duksa-aha nanna wá, a njinja á ba am huđe á na, am dagave á kure an Dadaamiya. An barka ba edda una á njá á ba an higa áte názena a maganaa nane.

<sup>23</sup> Amá edda una a naba zu duksa an shaige am ervaunde, nane wá, femfa ire-aara am zává, adaba a gu duksa na baraaka am ire-aara. Bademme á názena á maganá ura, má njanteka ba shagera am ervaunde-aara ganakini gevge halál wá, una nanna haypa.

## 15

### *Elva a mága duksa na watse emtáke áte emnde*

<sup>1</sup> Daaci miya emnde na gyainerebgye am fetarfire na wá, shagera ba mí melaterumele ge emnde na zlebe cekwa ndzedá-aatare na, zharaumika ba ire á miya palle.

<sup>2</sup> Ma ware á miya keni, magaumimága názena watse emtáke áte egdzar mama-aha á miya, watse á dáterá á de katafke am elva á Dadaamiya na.

<sup>3</sup> Ba seke una Yaisu \*Almasiihu, nane ndza zharaaka ire-aara. Ankwá elva-aara am wakita á Dadaamiya, a ba nane: Zlázle na ta zlazláká emnde na a eptsiyaare ge iya, a ba nane.

<sup>4</sup> Bademme á názena ta puwetaa am wakita á Dadaamiya werre na, ndza ta puwete ba ge kwaramise duksa áte nane. Dadaamiya á kátá famiyem ndzedá am vuwa, á kátá kwaramise farvaunde, á weramita estuwa ice áte duksa-aara, geni mi fetefa tama á miya átekwa.

<sup>5</sup> Dadaamiya edda á vanta farvaunde, antara edda á fanem ndzedá am vuwa ge ura, a jakurammeje ye á kure, lauktu ma uwe á kure keni kwá maganá á ba áte názá á Yaisu Almasiihu.

<sup>6</sup> Zlebe adaliye, lauktu bademmire á kure kwá de gálá Dadaamiya Eddenara ge Yaisu Almasiihu an ervaunde á kure palle, kwará á kure keni átirpalle.

*A higarhiga emnde bademme am duniya*

<sup>7</sup> Ba estuwa egdzar mama-aha-aaruwa, ba seke una ni a naba lyakur-vaahē ge Yaisu \*Almasiihu ge kure na wá, kure keni lyiyauliyi emnde an ervaunḡe á kure palle. Magaumága una ḡanna, geni baḡemme á emnde a galargálá Dadaamiya.

<sup>8</sup> Yá ndaakur ba jirire, Yaisu \*Almasiihu wá, ḡane a se melateru ge Yahudiya-aha, geni á maraterá jirire á Dadaamiya, geni ḡane á eptseka elva-aara ḡekideki áte duksa na ndza a ndaater ge eggye-aha-aatare werre, ganakini watse tá shánsha na.

<sup>9</sup> Zlaḡe ádaliye, a sawa geni emnde a jeba umele keni a galargálá Dadaamiya aḡaba zezarzi-aara. Ba seke una aḡkwa ta puwete am wakita á Dadaamiya, a ba ḡane:

Yá de galáká am dáḡave á emnde a lárde-aha á duniya baḡemme, watse yá galakḡálá am láhe-aaruwa.

<sup>10</sup> A ba am wakita á Dadaamiya ḡanna zlaḡe ádaliye, a ba ḡane:

Ekkure emnde a lárde-aha á duniya baḡemme, higauhiga antara emnde a lárde na a eksesaa Dadaamiya na.

<sup>11</sup> Zlaḡe zlauka emtsaḡe, a ba ḡane zlaḡe ádaliye:

Baḡemme á kure kwa emnde a lárde-aha umele, galaugálá Dadaamiya Yaakadada, a jerka ura ḡekideki ni ḡane galaaka na.

<sup>12</sup> Nabi Aisaya keni ndza a enndáhá, a ba ḡane:

Watse a jerje ura am emnde á Yaisa, ḡane á se gev slekse arge emnde a jeba umele keni baḡemme. Baḡemme á emnde a jeba umele keni tá de shá táma á shifa aḡaba ḡane.

<sup>13</sup> Daaci Dadaamiya edda á vante táma ge ura, a vakurteva hairire geni kwá higetehiga am ervaunḡe á kure, aḡaba fetarfire á kure áte ḡane. Daaci estuwa, táma á kure na áte ḡane na keni, watse a gyevgye ba seke duksa-aha ḡanna dámda am erva á kure zlauzle. Á de vakurte jeba á táma ḡanna an hákuma á Shedekwe Cudeḡe.

### *Názena a berha Paul ge puwete elva na*

<sup>14</sup> Egdzar mama-aha-aaruwa, diyandiya ba jirire ganakini shagera ervaunḡe-aha á kure, diyakurdiya unḡule á Dadaamiya baḡemme, hayaikurefhye ge tsanmaaretse ge ire á kure am dagave á kure.

<sup>15</sup> Aley keni wá, á piyiteka duksa geni yá puwakurtepuwa elva-aha umele am wakita-aaruwa ḡanna náwa ḡane na, yá ndaakur elva-aha ḡanna á ba an ndzeḡa, geni yá sanaasa eḡkale-aha á kure áte duksa na ba kure keni diyakurdiya na. Iya ḡanna yá bakurá elva estuwa na keni, a maginaa ba Dadaamiya ḡurna-aara.

<sup>16</sup> ḡurna na a maginaa Dadaamiya na wá, aḡaba a give sleslera á Yaisu \*Almasiihu am dáḡave á emnde na garevka Yahudiya-aha na. ḡannaḡa slera á ba laterá labáre á higa ge emnde na garevka Yahudiya-aha na an ervaunḡe-aaruwa palle ba seke \*liman á Dadaamiya. Yá kátá itare keni shifa-aatare á gevge shagera am ice á Dadaamiya, ba seke sádáke na tá vantá emnde-aara áte namaari-aara, an hákuma á Shedekwe Cudeḡe.

<sup>17</sup> Aḡaba una ḡanna, am nja-aaruwa am erva á Yaisu Almasiihu na wá, geḡantegeḡa jipu am slera á Dadaamiya na yá aḡkwa maganá ya.

<sup>18</sup> Baaka elva na yá ndahaná ya an ndzeḡa-aaruwa baḡemme seke názena a maganaa Yaisu Almasiihu am slera-aaruwa ge sa emnde na garevka Yahudiya-aha á sem sera á Dadaamiya, geni itare keni a faransaarefe. A magaa duksa ḡanna á kya slera-aaruwa, antara elva-aha na a segáshe am mbuwe-aaruwa na.



<sup>19</sup> Shedekwe Cudedde keni marsemare hákuma-aara, ya magaa najipu-aha gergere kwakya, baaka názu ya shebanvaa ya am labare á higa, elva a Yaisu Almasiihu na ya balanaa iya. Ya fantau am Urusaliima, kwaye ya de halavuwa átevege Iliriya.

<sup>20</sup> Wayanwáyá jipu bálá labare á higa, elva a Yaisu Almasiihu am ekse-aha na ndza cenaranka emnde elva-aara deki deki na, arge am ekse-aha na emnde cenarancena zlauzle na, geni a danká á de dzegwanu ge slera á ura umele.

<sup>21</sup> Yá kátá maganá áte una ankwá ta puwete am wakita á Dadaamiya na, a ba nane:

Emnde na ndza barateránka elva áte nane deki deki na, baira watse tá zharanaazhara á ba an ice-aatare. Emnde na ba uwe keni ndza cenaranka áte nane na keni, watse tá cenancena.

### *Paul maganaamaga niya a dem Rauma*

<sup>22</sup> Ser kwakya ndza yá kátá dezekure, amá shanapteka adaba ba una nanna.

<sup>23</sup> Iva wányara-wányara una yá kátá ba dezekure, amá shapteka deki deki, á piyita ba slera-aha. Amá kina wá, zlauzle slera-aaruwa am ekse-aha nanna.

<sup>24</sup> Kina wá, njanantenja mázla-aara geni sey yá dem larde á kure emtsaade, yá de puwansepuwe ázekure, lauktu watse yá zlalá á dem Aispaniya. Daaci má watse yá tse ázekure wá, yá kátá ma kwá meliyumele am shula-aaruwa nanna.

<sup>25</sup> Amá am kinire na wá, zlaube yá eptsa á dem Urusaliima emtsaade, adaba ankwá egdza slera yá de magaterán ge emnde a fetarfe na tá áhuwa.

<sup>26</sup> Slera nanna wá, amaana: Emnde a fetarfe na tá am Makiduniya, antara emnde na tá am Akaya, ta magaa niya á melateru ge emnde a fetarfe na tá am Urusaliima cekwa duksa-aatare na, an názena a shanaa erva-aatare.

<sup>27</sup> Una nanna keni ta shantuwa ba itare an ire-aatare. Ge jirire wá, ta magaa duksa shagera, zlaya jipu. Adaba ndza ta melateruwa ba Yahudiya-aha zunḡwe, lauktu tá shá barka estuwa áza Dadaamiya. Daaci itare keni zlaya ba ta melaterumele an nalmáne na am erva-aatare.

<sup>28</sup> Ba seke una ya ndakurndáha na, máki zlanazle slera á da sadake nanna, má danateránda nalmáne nanna sesse am erva-aaruwa wá, watse yá dedde emtsaade á dezekure, lauktu watse yá meláná á dem Aispaniya.

<sup>29</sup> Ba jirire diyandiya ganakini ma watse danemda ya am dagave á kure, nja na ni watse mí de njá antara kure na wá, Yaisu \*Almasiihu á de gamiyar barka an tsaka ire.

<sup>30</sup> Egdzar mama-aha-aaruwa, yá nalákurá adaba Yaakadada Yaisu Almasiihu, antara adaba wáyavire na a vamitaa Shedekwe Cudedde na, melawiyumele an maduwa-aha á kure, nalauminjálá Dadaamiya an ervaunde á miya palle, yawamiyánka deki deki.

<sup>31</sup> Magaumága una nanna, geni a nezliyaanzla Dadaamiya áza Yahudiya-aha á nere na fartareka áte Yaisu Almasiihu na am Urusaliima, antara geni wedere na á diye á dehuwa na keni a lyarvaalya emnde a fetarfe na tá áhuwa an erva buwa.

<sup>32</sup> Daaci estuwa, má wayetewáyá Dadaamiya wá, yá de shákurá á ba an higa am ervaunde, yá de puwansepuwe am dagave á kure.

<sup>33</sup> Dadaamiya wá, edda á hairire ba nane, a njinja an kure bademme. \*Aamin.

## 16

### *Paul á gater use ge emnde an zhera an zhera*

<sup>1</sup> Náwa yá anƙwa bakurá elva áte egdza emmemiya mukse, zhera-aara Faibe, ɲane egdza emmemiya am elva á Yaisu \*Almasiihu. Yá ndaakurá ba iya una: ɲane sleslera á Dadaamiya jipu am Kainkairiya.

<sup>2</sup> Daaci má daada mukse ɲanna am dágave á kure wá, lyauvaalya an erva buwa áte una ni á lyayáter ge emnde a fetarfe na. Melawanumele am wedere-aha-aara bademme. Adaba ɲane keni á magaterá maggwire ge emnde kwakya, ba iya na keni tapannaatápá maggwire-aara.

<sup>3</sup> Gawaterga use-aaruwa ge tara Piriskila, antara zhele-aara Akilas, itare ta emnde na ndza ɲa magaa slera á Yaisu Almasiihu kerde.

<sup>4</sup> Ndza ta hayaa ba á keɗa shifa-aatare adaba iya. Itare wá, yá zlebáterá ya palleka, bademme á emnde a fetarfe na garevka Yahudiya-aha na tá zleba ba itare.

<sup>5</sup> Yá anƙwa gater use-aaruwa ge emnde a fetarfe na tá jáháva am mba-aatare ge cena waazu na keni bademme. Yá anƙwa gan use-aaruwa ge ura-aaruwa Aipaynaitus, slezuɲɲwe ge fetaare áte Yaisu Almasiihu am haha á Aziya.

<sup>6</sup> Gawanga use-aaruwa ba kwakya ge Maari keni, ɲane mukse na wavaawáva jipu ge melakurumele am slera.

<sup>7</sup> Gawaterga use-aaruwa ge emnde a jeba-aaruwa tara Andaraunikus, antara Yuniyus na ndza ɲgwadaraɲeráɲgwadá am dangay antara itare na. Má ge fetaare áte Yaisu Almasiihu wá, ta emnde a zuɲɲwe ba itare arge iya, ta emnde a belá á Dadaamiya, diyardiya emnde a fetarfe una ɲanna bademme.

<sup>8</sup> Yá anƙwa gan use-aaruwa ge Ampliyatus, ɲane ura-aaruwa jipu, a janermaa ba Yaakadada.

<sup>9</sup> Yá anƙwa gan use-aaruwa ge Urbanus ɲane keni sleslera á Yaisu Almasiihu ba seke miya, ira ura-aaruwa Istaki. Gawaterga use-aaruwa bademme-aatare.

<sup>10</sup> Yá anƙwa gan use-aaruwa ge Apailais, ɲane edda una bashubáshe duksa adaba zhera á Yaisu Almasiihu, marsemáre ba parakke ganakini ɲane fetarfire. Gawaterga use-aaruwa ge tara Aristubul antara emnde a huɗe á há-aara bademme.

<sup>11</sup> Yá anƙwa gan use-aaruwa ge Hirudiyaun, ɲane keni ɲa ba palle, antara emnde na tá am huɗe á há á Narkisu na tá anƙwa ɗaba Yaakadada na keni, gawaterga use-aaruwa bademme.

<sup>12</sup> Yá anƙwa gater use-aaruwa ge egdzar mama-aha á miya ɲwasha, tara Tarifina, antara Tarifusa, ɲwasha na tá anƙwa wava jipu an slera á Yaakadada na, ira Pairsis, ɲane keni ba egdza emmemiya mukse na wayamiwáyá jipu, anƙwa á wava jipu ge maganá slera ge Yaakadada na. Yá anƙwa gan use-aaruwa ba kwakya.

<sup>13</sup> Yá anƙwa gan use-aaruwa ge Rufus, ɲane sleslera á Yaakadada na an diya na, tá antara emmenjara na ya gev ba seke egdza á huɗe-aara na.

<sup>14</sup> Yá anƙwa gater use-aaruwa ge tara Asinƙiritus, an Filigaun, an Hairmais, an Patraubas, an Hairmas, ira egdzar mama-aha á miya emnde a fetarfe na tá antara itare, yá anƙwa gater use-aaruwa bademme-aatare.

<sup>15</sup> Yá anƙwa gater use-aaruwa ge tara Filaulaugus, antara Yuliya, ira Nairiyus tá an egdza emmenjara mukse. Yá anƙwa gater use-aaruwa ge tara Aulimpas, tá antara emnde a ɗaba Dadaamiya na ta kerde na, yá anƙwa gater use-aaruwa bademme-aatare.

<sup>16</sup> Gauga use-aaruwa am dágave á kure an ekhya ervaunđe á egdza mamire. Baďemme á emnde a đaba Yaisu Almasiihu na tá am ekse-aha áhuna tá anƙwa gakur use-aatare ba kwakya.

*Tsufautsufa ire á kure tá anƙwa emnde a mbádá ura*

<sup>17</sup> Yá ndaha ba kure egdzar mama-aha-aaruwa: Tsufautsufa ire á kure ba shagera, ađaba tá anƙwa emnde na tá sá ba náza tega ye á emnde, ta mbađaa egdzar mama-aha-aatare kwakya, itare tá njá á ba maga ba gá jáwe arge elva na kwa tsahesaa kure zlauzle na. Njauka antara jeba á emnde ƚanna đekidėki.

<sup>18</sup> Jeba á emnde ƚanna tá wavanu ba ge ire-aatare, palle á názu tá maganán ge Yaakadada Yaisu \*Almasiihu wá, baaka đekidėki. Tá ekhyaterá kwára lailaidėge ge emnde an elva-aha emtáke emtáke, tá jaterá estuwa enƙale ge emnde na zlađe cekwa diya-aatare na.

<sup>19</sup> Amá ázekure wá, una ƚanna á taa gevka đekidėki. Baďemme á emnde diyardiya fesarefire á kure áte Yaakadada. Ekkure wá, higakuritehiga jipu. Daaci yá kátá á farfe zlađe ádalıye enƙale á kure ge mága maggwıre, weshawanteka an mága kelaadire.

<sup>20</sup> Áza Dadaamiya edda á hairire wá, a juwa ba keskiya mázla-aara ganakini á de ngerđanángerđa Shaitaine, watse kwá de puwa sera á kure áte ƚane.

A magakuránmaga Yaakadada Yaisu Almasiihu ƚurna ge kure baďemme.

<sup>21</sup> Á anƙwa á gakur use-aara Timaute sleslera á Dadaamiya ázerwa. Emnde a jeba-aaruwa tara Lukiyus, antara Yasaun, ira Sausipaterus, itare keni tá anƙwa gakur use-aatare.

<sup>22</sup> Kina wá, iya Tairtiyus na ya gev erva á Paul, yá puwaná ya wakita na keni, yá anƙwa gakur use-aaruwa baďemme á kure an zhera á Yaakadada.

<sup>23</sup> Anƙwa á gakur use-aara patuma-aaruwa Gayus; emnde a fetarfe umele na tá áhuna na keni baďemme tá tsekwa á ba am mba-aara. Tara Airastus patáka á ƚumna am berni na, tá antara egdza emmemiya Kawartus, tá anƙwa á gakur use-aatare itare keni.

((  
<sup>24</sup> A hyantehya Yaakadada Yaisu Almasiihu ƚurna-aara áte kure baďemme á kure. \*Aamin)).

*Elva a gálá Dadaamiya*

<sup>25</sup> Galaumigálá Dadaamiya, edda á hákuma ba ƚane ge ndzedakurte-ndzedá áte una tá ndahaná am labáre á higa na yá anƙwa balaterná iya ge emnde na. Elva ƚanna wá, á maramiya názena ndza a slanaa Dadaamiya werre, ndza nasherire-aara ba ge ƚane palle na. Amaana wá, ndza marateránka Dadaamiya elva ƚanna ge emndimagwaha estuwa.

<sup>26</sup> Amá kina wá, ađaba barka á puwa na ndza ta puwetaa nabi-aha werre áte elva á labare á higa na wá, sesse jirire-aara mázla-aara parakke áza emnde. Gevge á ba áte una ndza a ndahesaa Dadaamiya saksage, a ba ƚane: Emnde a duniya baďemme tá de fetaare á ba áte ƚane, tá de fansare ba ge ƚane palle.

<sup>27</sup> Ba Dadaamiya palle una edda á ilmu; ađaba barka á Yaisu Almasiihu wá, ma vaatara keni galaumigálá ba ƚane palle. \*Aamin.

## Zunḡwire á wakita na a puwatertaa Paul ge emnde a KAURINTUS

### *Ga use á Paul*

<sup>1</sup> Ba iya Paul, a eksisaa ba Dadaamiya áte waya á ervaunḡe-aara geni yá gevge slebela á Yaisu \*Almasiihu, nǎ anḡwa puwakurtá ba ḡere wakita na, nǎ antara egdza emmemiya Saustainais.

<sup>2</sup> Nǎ anḡwa gakur use á ḡere ge kure emnde á Dadaamiya am Kaurintus. Adaba ḡurna na a magakurnaa Yaisu Almasiihu, gakurevge emnde á Dadaamiya, a dǎkurtaa ba ḡane geni kwá gevge cudeḡḡe antara emnde na tá yeka an zhera á Yaakadada Yaisu ma áme keni baḡemme, ba ḡane una Yaakadada ge itare, Yaakadada ge miya baḡemme na.

<sup>3</sup> Tara Eddemiya Dadaamiya, tá antara Yaakadada Yaisu Almasiihu, a magarakurnaamaga ḡurna, a varakurtevá hairire.

### *Slǎfá we á Paul adaba názena a velanaa Dadaamiya á kyá erva an Yaisu \*Almasiihu*

<sup>4</sup> Ba kelaazare, yá yanka slafanaa we-aaruwa ge Dadaamiya adaba kure, adaba ḡurna na a magakurnaa ḡane á kyá erva an Yaisu \*Almasiihu na.

<sup>5</sup> Am nǎ á kure kina gakurevge palle antara Yaisu Almasiihu, gakurevge emnde na ni hyakurevhye am duksa baḡemme áte unḡule-aara. Daaci kina wá, diyakurdiya jirire, hyakurephye kwaraterse jirire ḡanna ge emnde umele keni baḡemme.

<sup>6</sup> Labare á Yaisu Almasiihu njaanja am kure, adaba kwa liyanaa án ervaunḡe á kure palle am sarte na nǎ anḡwa balakursebále na.

<sup>7</sup> Adaba una ḡanna, baaka názu á ektsevuktse ázekure ge dǎba unḡule á Dadaamiya, kwa emnde na ni kwá anḡwa ufa eptsá á Yaisu Almasiihu na.

<sup>8</sup> Ba kelaazare, dete halavuwa á duniya, á de ndzedakurtaa ba ḡane, geni á de mbedakuraaka shairiya vaci sawa á Yaakadada Yaisu Almasiihu.

<sup>9</sup> Dadaamiya a naba dǎkurte, geni kwá gevge palle an Egdza-aara Yaakadada á miya Yaisu Almasiihu. Názena ni a ndaasa ḡane na wá, baḡemme watse á de gevge, adaba Dadaamiya á eptseka elva-aara dǎkideki.

### *Dágala antara tegáva á emnde a fetarfe am Kaurintus*

<sup>10</sup> Egdzar mama-aha-aaruwa, názu yá yekaná iya ázekure an zhera á Yaakadada á miya Yaisu \*Almasiihu wá, a tegevka dágáve á kure, baḡemme á kure nǎwinja á ba áte ye palle, jawammeje am enkale palle, we á kure keni palle.

<sup>11</sup> Yá ndahaná adaba uwe una egdzar mama-aha-aaruwa, adaba ta se ndahiya emnde á Kaulauwe, una ba emnde á kure, geni anḡwa dágala-aha am dágave á kure.

<sup>12</sup> Náwa názena yá kátá bakurná iya: Labára anḡwa tegáva gergere am dágave á kure? Adaba ta bántsa emnde umele am kure: Itare tá dǎba ba iya Paul. A ba emnde umele: ḡere wá, nǎ dǎba Apaulaus. A ba emnde umele zlaḡe adaliye, ḡere keni nǎ dǎba ba Piyer. A ba emnde umele zlaḡe adaliye: ḡere wá, nǎ dǎba \*Almasiihu.

<sup>13</sup> Uwe? Kwá kurken Almasiihu an tega gergere kwakya emtu? Emtu kwa cenáncena wá, iya Paul ta zleḡeliyaa áte dzanḡala, ya emtsehe adaba

kure emtu? Emtu ndza ta magakuraa baptisma na wá, an zhera-aaruwa iya Paul emtu?

<sup>14</sup> Iya wá, yá slafaná we-aaruwa jipu ge Dadaamiya, adaba ndza maganakuránka baptisma ma ge ware á kure keni, má dedde ge tara Kirispus, tá an Gayus njainje-ka.

<sup>15</sup> Daaci ware edda-aara ni, baira á de bá ya magakuraa baptisma an zhera-aaruwa na?

<sup>16</sup> Ane, a viyarka una ndza ya magateraa baptisma ge tara Aitiyain, antara emnde-aara na keni. Am iga a una wá, diyanka máki ndza ya maganaamaga baptisma ge ura umele.

<sup>17</sup> Yaisu Almasiihu belika geni yá se magaterá baptisma ge emnde, a beli ge se bálá elva-aara, labáre á higa ge emnde bademme, wallá yá wesháná an ilmu á duniya-ka, geni a ganveka emtsa á Yaisu áte dzaŋgala seke duksa ba dey.

### *Hákuma antara ilmu á Dadaamiya anjwa am elva á Yaisu*

<sup>18</sup> Áza emnde na tá an keda áte unjule á Dadaamiya wá, má ká ndáhá elva a emtsa á Yaisu \*Almasiihu áte dzaŋgala wá, tá zharák ba seke ká ndáhá elva a uksanwire, amá ázemiya mi emnde na má áte unjule a jirire wá, anjwa hákuma á Dadaamiya am hudé á elva nanna.

<sup>19</sup> Adaba uwe, anjwa an puwa am wakita á Dadaamiya, a ba nane: Emnde na tá an ilmu á duniya, yá de kefaternaakeda ilmu nanna, yá de já enjale á emnde na tá an diya jipu na.

<sup>20</sup> Daaci máki estuwa wá, emnde na tá an ilmu á duniya, áma edda á ilmu mázla-aara? Ma emnde na tá an diya kwakya am wakita, áma edda á diya kwasau? Antara emnde a gá jawe arge njá á zamane na, áma zhera-aatare? Dadaamiya ganvege ilmu á duniya názu baaka námpire-aara.

<sup>21</sup> Dadaamiya a marateraa ilmu-aara ge emnde geni tá diyeddiye nane, ganakini ba nane una Dadaamiya á jirire, amá an ilmu á duniya, emnde diyarseka nane dekideki. Adaba una nanna, Dadaamiya a eksetaa barama umele an elva na mí balaná miya kina, itare tá zharán ba seke elva a uksanwire na, amá Dadaamiya tsaatse áte elva-aara nanna, geni á lyaterlya an nane, emnde na tá fetaare áte nane bademme.

<sup>22</sup> Yahudiya-aha itare tá anjwa ndava naláama, geni tá nanna duksa an ice-aatare emtsaade, lauktu tá fetarfe. Yunaniŋkau-aha maa, itare tá kátá dise Dadaamiya an ilmu á ire-aatare.

<sup>23</sup> Amá miya wá, mí bálá ba elva a Yaisu Almasiihu na ta zlenjelaa áte dzaŋgala na. Ge Yahudiya-aha wá, waazu nanna á jaterja an ervaunje. Am hyema á emnde na garevka Yahudiya-aha keni maa, tá cenán ba seke elva a uksanwire.

<sup>24</sup> Amá áza emnde na a dzeratersaa Dadaamiya geni tá gevge emnde-aara an jirire wá, ma Yahudiya-aha, ma emnde a jeba umele keni, elva nanna gevka duksa dey, diyardiya geni ba jirire anjwa hákuma, antara ilmu á Dadaamiya am Yaisu Almasiihu.

<sup>25</sup> Á ba emnde umele: Názena a maganaa Dadaamiya na wá, una ba uksanwire, mbate jauje ge ilmu-aatare. Itare tá slán ba seke baaka payda á Dadaamiya, mbate baakire á payda nanna jauje ge ndzedfa-aatare.

<sup>26</sup> Egdzar mama-aha-aaruwa, ba kure na a dáhakuraa Dadaamiya ge slera-aara na keni, zharauzhára ba shagera; ge ilmu na ta tsaa átekwa emnde a duniya wá, ábi am kure cekwa emnde a ilmu nanna? Ábi cekwa emnde a hákuma am kure? Cekwa emnde na tá an dárádza keni bademme.



<sup>27</sup> Amá ba emnde na ni emnde a duniya tá zharáter ba seke uksañwa-aha na wá, Dadaamiya a dzeraterse geni tá gev emnde-aara. An una ñanna, a fateraar zherwe jipu ge emnde na tá an ilmu á duniya. A dzerese emnde na baaka paydã-aatare, geni á fateraar zherwe ge emnde a ndzedã.

<sup>28</sup> Dadaamiya a dzerese ba emnde na baaka dárádza-aatare am duniya, emnde tá zharáter ba seke ma ta baaka keni ba kalle na, geni á gatervege emnde na tá an dárádza na.

<sup>29</sup> Dadaamiya a dzerese jeba á emnde ñanna, geni ma ware keni a galeka ire á katafke-aara.

<sup>30</sup> Ba Dadaamiya una a gakurve palle antara Yaisu Almasiihu, ba ñane una a magaa puta, geni Yaisu Almasiihu á gev edda á ilmu á miya. Adaba barka á Yaisu Almasiihu ñanna zlaɓe ádaliye, Dadaamiya a eksamite ge ma emnde a jirire á katafke-aara, a lyamisehe, a gamive emnde-aara.

<sup>31</sup> Adaba una ñanna, gevge ba seke una am wakita á Dadaamiya anƙwa an puwa, a ba Dadaamiya: Má ura á kátá gálá ire wá, a eggálá adaba názena a maganaa Yaakadada.

## 2

### *Paul á bálá elva a emtsa á Yaisu áte dzangala*

<sup>1</sup> Egdzar mama-aha-aaruwa, am duwa-aaruwa á dezekure ge ndakur názena a marañeraa Dadaamiya na wá, ba iya keni ndanakurka elva ñanna an elva na zlazladã tá kátána emnde a duniya na, ndaanakurka an ilmu á duniya keni.

<sup>2</sup> Ba lauktu yá dezekure keni, ndza njanantenja ya geni yá de ndakur ba elva a Yaisu \*Almasiihu, kwakya-aara ba elva a emtsa-aara, yá de farka umele dekideki.

<sup>3</sup> Daaci am una ndza yá am dágave á kure keni, ndza ya tapaa ba baakire á paydã am vuwa-aaruwa, ndza á wiwa lyawa jipu, yá ámbera gyaigya ba seke maagara.

<sup>4</sup> Am sarte na yá anƙwa á kwarakurse duksa áte elva á Dadaamiya na, belanakuremka ilmu á duniya, antara elva-aha na emtake am hyema na geni sey kwá lyevalya, amá a maganaa ba Shedekwe Cudedde slera-aara am kure, an hákuma á Dadaamiya, kwa naba diyeddiye geni elva-aha-aaruwa jirire.

<sup>5</sup> Daaci estuwa, fetarfire á kure a gevka áte ilmu á emndimagwaha, amá a gevge áte slera á Dadaamiya, an hákuma-aara.

### *Ilmu na á vatertá Dadaamiya ge emnde*

<sup>6</sup> Ge jirire wá, ge emnde na gyairebgye am elva á Dadaamiya wá, yá anƙwa kwaraterse ilmu á jirire, amá wá, ilmu á urimagweka, ilmu á male-aha na tá an hákuma am duniya, watse tá de zle na ka.

<sup>7</sup> Ilmu na ni yá anƙwa ndahaná iya na wá, ilmu á Dadaamiya. Una ndza ba nasherire á Dadaamiya, ndza diyarka emndu werre. Amá wá, kwaye zlaɓe am fakta á duksa bademme, kertenj ndza an tsatse ázenara geni watse mí de njá antara ñane am demdemire-aara na á maga wulwulire jipu na.

<sup>8</sup> Ba palle keni baaka ura am male-aha á duniya na una diyaadiya jeba á ilmu ñanna. Ma andze diyardiya wá, ma andze tá jeka Yaakadada áte dzangala. Adaba ba ñane una edda á demdemire ñanna wulwule jipu na.

<sup>9</sup> Dadaamiya a magaa ba seke una anƙwa an puwa am wakita-aara, a ba ñane:

Názena zlaɓe nánka ice á urimagwe, názu zlaɓe cenánka hyema á urimagwe, názena slaslaaka urimagwe ɗekideki na, Dadaamiya a tsatsateraa una ɗanna ge emnde-aara na wayarwáya na.

<sup>10</sup> Amá ge miya wá, Dadaamiya a maramiyaa nasherire á duksa-aha ɗanna á ba an Sheɗekwe Cufedɗe, aɗaba Sheɗekwe Cufedɗe diyaadiya duksa baɗemme, antara ba názu á slaslaná Dadaamiya keni baɗemme.

<sup>11</sup> Ba emndimagwaha keni wá, aɗkwa ura ni á dzegwándzegwa dise názu am huɗe á ura emtu, má edda á vuwa-ka? Ba duksa palle an Dadaamiya keni, sey ba Sheɗekwe á Dadaamiya palle una diyaadiya názu am Dadaamiya.

<sup>12</sup> Amá miya wá, Dadaamiya a naba vamite Sheɗekwe-aara ɗanna diyaadiya názu am ɗane na, Sheɗekwe umeleka. Dadaamiya a vamite Sheɗekwe-aara geni á melamiyumele ge cena názena á vamita ɗane.

<sup>13</sup> Daaci má ɗá aɗkwa á kwaratersa elva ge emnde áte jeba á elva-aha ɗanna wá, ɗá kwaratersa an ilmu na ta mbaɗersa emndimagwahaka, á baɗerna ba Sheɗekwe Cufedɗe ɗanna aɗkwa am ervaunɗe-aatare keni na.

<sup>14</sup> Edda una má ɓaaka Sheɗekwe Cufedɗe am ervaunɗe-aara wá, á dzegwánka lyiya jirire na á baterná Sheɗekwe á Dadaamiya ge emnde. Ba eccena-aara keni á cenánka. Baira am hyema-aara, ɗane á cenán ba seke elva ucire, aɗaba sey ba emnde na tá an Sheɗekwe á Dadaamiya una tá cenáncena duksa-aha ɗanna.

<sup>15</sup> Edda una aɗkwa Sheɗekwe Cufedɗe am ɗane, á diyeddiye duksa baɗemme, tara una jirire, antara una mándzawe keni baɗemme, amá edda una ɓaaka Sheɗekwe Cufedɗe am ɗane wá, á taa diseke názu am edda una an Sheɗekwe Cufedɗe na.

<sup>16</sup> Aɗkwa an puwa am wakita á Dadaamiya, a ba ɗane: Ware edda una diyaadiya názu á slaslaná Yaakadada a bina. Amá miya na má an Sheɗekwe á Dadaamiya na wá, diyamidiya názu á slaná Yaisu \*Almasiihu.

### 3

#### *Nere ɗa ba emnde a slera á Dadaamiya*

<sup>1</sup> Egdzar mama-aha-aaruwa, ge jirire wá, am duwa-aaruwa na ya dezekure na wá, ndza dzegwanánka ndakur elva áte una tá ndahater ge emnde na aɗkwa Sheɗekwe á Dadaamiya am itare na. Ndza ya bakuraa elva ba seke una tá ndaater ge emnde na ni zlaɓe tegaraaveka antara emnde a duniya ɗekideki na, aɗaba ndza kwa ba seke egdzara mesheshe, zlaɓe kwá fantau an fe ge ɗaba Yaisu \*Almasiihu.

<sup>2</sup> Názu ndza ya kwarakursaa iya, ndza ba seke uba na tá fanu ge egdzere aɗwaslire, ndza vanakurteka ɗafa á jirire, aɗaba ndza zlaɓe kwá dzegwánka ezza-aara. Sem ba kina keni ba zlaɓe kwá dzegwánka ɗanna.

<sup>3</sup> Aɗaba zlaɓe njá á kure geraraaveka antara njá á emnde a duniya. Kwakya shelha, antara ɗágala-aha am ɗágave á kure. An jeba á hala á kure ɗanna, kwa ba seke emnde a duniya-ka emtu? Una ba jirire, kwa ba kalkale antara itare.

<sup>4</sup> Am ta bántsa emnde umele am kure: itare ta ɗaba iya Paul, a ba emnde umele, itare tá ɗaba Apaulus, an jeba á mága á kure ɗanna, kwa ba kalkale-ka antara emnde umele am duniya emtu?

<sup>5</sup> Ware Apaulus keni? Iya Paul, ya hyeb ware kena? Bukerɗe á nere ɗa ba emnde a slera á Dadaamiya, a ɓeláɗeraa á sem ɗágave á kure ge fakurá áte barama á Yaisu \*Almasiihu, geni kwá gevge emnde a fetarfe. Ma ware á nere keni á maga ba slera na a faara Dadaamiya na.

<sup>6</sup> Njere, ndza ɲa ba seke emnde a herɗa. Iya, ya dzeɓaa duksa, Apaulaus maa, a fanu yáwe, amá á walantá ba Dadaamiya palle duksa ɲanna.

<sup>7</sup> Daaci ma slejeba duksa, ma slefanu yáwe keni hyarebka duksa, sey ba Dadaamiya palle una átire, aɗaba á walantá ba ɲane duksa na an dzeɓa.

<sup>8</sup> Edda una a dzeɓaa duksa, an slefanu yawe, ta ba kalkale. Dadaamiya á de vaterte ba laɗa-aatare ma ge ware-aatare keni áte názena ndza a maganaa edda-aara.

<sup>9</sup> Njere ɲá maganá ba slera ge Dadaamiya, slera á njere ba darame palle. Kure keni maa, kwa ba seke fahe á Dadaamiya, zlaɓe ádaliye, kwa ba seke bere na a fanaa Dadaamiya.

<sup>10</sup> Iya wá, Dadaamiya a magiyaa ɲurna kwakya ge fantau ge slera-aara am dáɓave á kure. Ndza ya ba seke slefa haha na diyaadiya fa haha ba shagera na, ya fanaa ekte shagera ge bere, daaci emnde umele keni tá de katafke an slera ge ndera bere átekwa. Daaci baɗemme á emnde a ndera bere ɲanna, ma ware-aatare keni a maga eɲkale ba shagera áte slera na á maganá ɲane ge ndera bere ɲanna.

<sup>11</sup> Ekte á bere wá, an fa zlauzle, ba ɲane una Yaisu \*Almasiihu, tá taa farka ekte á bere umele ge ɲane ɗekideki.

<sup>12</sup> Ate ekte á bere ɲanna, emnde umele tá de nderanu an dindar, emnde umele tá de nderanu názá-aatare an lipela, emnde umele tá de nderanu an nákwá na an dárádza jipu na. Emnde umele zlaɓe ádaliye, ma tá de nderanu názá-aatare an hazla, antara názambakará, emnde umele ma tá de maganu an kwatsape.

<sup>13</sup> Vaci tsa fáyá, ma slera á ware keni á de sheɓaaveka mázla-aara. Aɗaba vacite ɲanna wá, Dadaamiya á de maresemáre ma slera á ware keni, á de fanu slera-aha ɲanna ge kára emtsaade. Daaci mí de zhara gergerire á slera-aha á miya baɗemme tara una shagerire, antara una shagerkire keni.

<sup>14</sup> Edda una má kára zaaka tate na ndza a maganaa ɲane wá, Dadaamiya á de vante laɗa-aara.

<sup>15</sup> Amá edda una má kára zawza tate na ndza a nderanaa ɲane, ɲane wá, keɗanaakeda laɗa-aara, shifa-aara wá, á de shansha, amá wá, á de eɲzla ba zlahhe á sa am huɗe á kára.

<sup>16</sup> Diyakurka geni kure wá, kwa ba seke bere á Dadaamiya, á njá Sheɗekwe á Dadaamiya am kure emtu?

<sup>17</sup> Ay degiya, ma a kyaɓanaa ware bere á Dadaamiya ɲanna, Dadaamiya á de keɗenaakeda edda-aara keni. Aɗaba bere ɲanna, bere cuɗedde ge Dadaamiya. Daaci ba kure una kwa bere á Dadaamiya ɲanna.

<sup>18</sup> A darka shaitaine ge ura umele am kure, a de sláná am ervaunɗe-aara geni ɲane gevge edda á ilmu am duniya na. Arge una ɲanna, a ganvege ire-aara ba seke edda una cekwa eɲkale-aara am ice á emnde, daaci á de shá ilmu á jirire.

<sup>19</sup> Ya ndaanaa aɗaba uwe una, ilmu na ta disaa emnde a duniya, una ba ucire am ice á Dadaamiya. Aɲkwa an puwa am wakita á Dadaamiya, a ba ɲane: Á shatertuwa ba Dadaamiya ge emnde a ilmu, am yaimyaimire na tá maganá itare.

<sup>20</sup> Aɲkwa an puwa á ba am wakita á Dadaamiya ɲanna zlaɓe ádaliye, a ba ɲane: Nazu tá sláná emnde a ilmu á duniya wá, ɓaaka nampire-aara áza Yaakadada.

<sup>21</sup> Aɗaba una ɲanna, ma ware edda-aara keni a galeka ire áte ura umele ba dey. Diyaweddiye geni baɗemme á duksa á ba ázekure.

<sup>22</sup> Ma iya Paul, ma Apaulaus, ma Silas, baɗemme á ñere ñá á ba am erva á kure. Ma shifa, ma emtsa, duksa na aɗkwa kina, antara una á de sawa á katafke, baɗemme ba náza á kure.

<sup>23</sup> Amá kure an ire á kure wá, kwa emnde á Yaisu \*Almasiihu, Almasiihu keni ñane názá á Dadaamiya.

## 4

### *Elva a slera á emnde a bela*

<sup>1</sup> Daaci estuwa, diyaweddiye ba shagera geni ñere emnde a bela á Yaisu \*Almasiihu wá, ña ba emnde a slera-aara, Dadaamiya a faɗerar de sateranse nazu ndza diyarka am elva-aara ge emnde.

<sup>2</sup> Diyakurdiya geni názu á kataná zánwe áza sleslera-aara wá, ba dzayyire á ervaunɗe áte slera na a faara ñane.

<sup>3</sup> Ázerwa ge iya wá, baaka lámbe-aaruwa áte názena kwa sliva kure, ma emndimagwaha tá nderita elva-ara ge dise dzayyire á ervaunɗe-aaruwa keni, iya baaka lámbe-aaruwa átekwa. Ba iya an ire-aaruwa keni njananteka ya am ervaunɗe-aaruwa geni dzayye ervaunɗe-aaruwa.

<sup>4</sup> Diyanka ɗekideki, má sem ba kina keni kwasau ba zlaɓe aɗkwa duksa mándzawe am ervaunɗe-aaruwa. Amá yá taa bánka ganakini ya cuɗeɗe baɗemme. Sey á de kyáná ba Yaakadada palle shairiya-aaruwa.

<sup>5</sup> Adaba una ñanna, hadzalauka am elva ɗekideki geni kwá njanta kure názu am huɗe á ura. Amá ufaufa ba náza á Yaakadada Yaisu \*Almasiihu palle. Vacite na má de samsa ñane, baɗemme á názena an shebe kina, antara názena am huɗe á emnde, baɗemme á de sansese. Daaci ma ware keni á de galaná ba Dadaamiya adaba slera-aara, ma ndza a magaa kwakya, ma ndza a magaa ba cekwaanɗuɗi keni.

<sup>6</sup> Ya ndaase elva-aha ñanna estuwa áte ire á ñere antara Apaulaus na wá, ba geni kure keni kwá zharaná áte ñere názena á kátá ndahana elva ñanna. Názena yá kataná iya ázekure wá, ma am uwe keni ɗabauɗába á ba áte una am wakita á Dadaamiya, geni ma ware á kure keni a galeka ire áte ura mázle-aara, a epsaweka ura umele keni.

<sup>7</sup> A gakvaa ware male arge emnde? Ábi baɗemme á názena ka shanaa ka a vaktaa ba Dadaamiya? Ay labára kena ká gálá ire átekwa ba seke ka ganaa ba ekka an ndzeɗa á ña na?

<sup>8</sup> Ekkure, kertenɗ njakurantenja am ervaunɗe á kure geni shakuránsha názena kwa katanaa kure baɗemme, an emtsa waya á kure, gakurevge slekse-aha an ire á kure. Amá ñere wá, estuweka. Wayanwáya geni kwá gevge slekse-aha ba jirire am ice á Dadaamiya, lauktu watse mí de njá átirpalle antara kure am yaikkire-aara.

<sup>9</sup> Ñere emnde a belá á Yaisu \*Almasiihu wá, yá zharán ba seke Dadaamiya a daɗeraa á dem kataliya á emnde ba cakcake, ña ba seke emnde na ñáteraana shairiya a emtsa, tá de ceɓa shifa-aatare áte ice á zlamáha na áza emnde. Am duniya baɗemme ganerevge ba seke názá ezzhara, tá ámbera eddzaka na, antara ba malika-aha keni tá zhara ba ñere.

<sup>10</sup> Ñere ganerevge ba seke uksaɗwa-aha áza emnde adaba zhara á Yaisu Almasiihu, amá kure wá, kwa bánɗsa kure, kwa emnde a enjale adaba kwa náza-aha-aara. Ñere ña emnde na baaka payɗe á ñere, amá kure wá, kwa emnde a ndzeɗa, kwa emnde a dárádza, ñere, ña emnde na baaka ɗemɗemire á ñere.

<sup>11</sup> Se ba am kina keni á cebanjerá ba lámbe, á wánerá ba waya antara ndera, náza tsekwa á n̄ere keni baaka, baaka há á n̄ere keni ge n̄ere.

<sup>12</sup> N̄á maga mbera á n̄ere geni n̄á shansha ba názu n̄á zuze ge we á n̄ere. Má tá zlazlan̄erzláze emnde, n̄ere n̄á gater barka, ma tá fá ba zlad̄a-ara áte n̄ere keni ba n̄á fá ervaun̄de.

<sup>13</sup> Má emnde tá za vuwa á n̄ere, n̄ere n̄á eptsaterá an elva lailaid̄de. N̄ere gan̄erevge ba seke d̄ugje áza emnde, se ba am kina keni tá zharáner ba seke názu tá de puwanve áte d̄ugje.

<sup>14</sup> Ya puwakurte una ge gula higa á kure an n̄ane ka, amá yá vakurte ba sawari-aha-aaruwa, ad̄aba wayanakurwáyá an ervaun̄de-aaruwa palle.

<sup>15</sup> Ma kwa shaa ba emnde debu ge kwarakurse elva á Yaisu \*Almasiihu keni wá, edda una gevge ba seke eddekure am emnde n̄anna wá, sey ba palle. Eddekure n̄anna ba iya. Ad̄aba ndza ya dakurnaa ba iya zun̄hwe elva á Dadaamiya.

<sup>16</sup> Daaci, táslawa á kure, gawevge ba seke iya.

<sup>17</sup> Ad̄aba una n̄anna kina yá bela Timaute ádezekure, á de yehakuranteyeha n̄ane n̄já-aaruwa am elva á Yaisu Almasiihu. Názena á de kwarakursa n̄ane ba palle antara una yá an̄kwa maganá iya am dágave á emnde a fetarfe ma áme keni bad̄emme. Ad̄aba n̄ane gevge ba seke egdza-aaruwa, slewaya-aaruwa, dzayye ervaun̄de-aara áte elva á Yaakadada.

<sup>18</sup> Kwakya emnde tá gálá ire am dágave á kure, itare ta kurken watse yá duka ádezekure ba dekid̄eki.

<sup>19</sup> Amá má wayetewáyá Dadaamiya wá, yá an̄kwa duwa ba herzhe na. Daaci yá de nanna názena ta maganaa itare emnde a gálá ire n̄anna, baaka wedere-aaruwa áte názena ta ndahanaa itare, nampire wá, ba názu ta maganaa itare.

<sup>20</sup> Ya ndahanaa ad̄aba uwe una, ad̄aba Dadaamiya á ganveka sleksire-aara ad̄aba nara á urimagwe, sey má an̄kwa hákuma-aara am edda-aara.

<sup>21</sup> Kwá kátá uwe kure kina ázerwa? Kwá kátá yá duwa an kurpe am erva emtu? Yá duwa an hairire, antara háyáva-he?

## 5

### *Shairiya á emnde a mága gwardzire*

<sup>1</sup> Ma áme keni yá cena tá ndaha ba elva á kure geni kwa emnde a mága gwardzire, ba emnde na d̄abarka Dadaamiya keni tá man̄ka jeba á una n̄anna. Ad̄aba yá cena an̄kwa ura am dágave á kure á zlava an mukse á edden̄ara.

<sup>2</sup> Kelaa ma kwá kyuwa ad̄aba haypa na jesarje am dágave á kure, amá kure kwá gálá ire zlafe ádaliye. Naba n̄gyawansengye edda una a magaa laakire n̄anna am dágave á kure.

<sup>3</sup> Iya wá, baaka irice-aaruwa am dágave á kure, amá am ervaun̄de-aaruwa wá, yá á ba am dágave á kure. Yá bakurá ba jirire: Edda una a magaa duksa estuwa am dágave á kure na, ba kalkale irice-aaruwa keni an̄kwa am dágave á kure, áte náza-aaruwa wá, belanarbelá ya shairiya ge edda-aara zlauzle.

<sup>4</sup> Ya belaar shairiya n̄anna an zhera á Yaakadada Yaisu \*Almasiihu. Náwa názu yá bakurná iya: naba jawammeje am dágave á kure, una ba jirire geni am ervaun̄de-aaruwa iya keni yá á ba am dagave á kure, hákuma á Yaakadada Yaisu \*Almasiihu an̄kwa am dagave á kure.



<sup>5</sup> Daaci ura estuwa, naba yawanánya ge Shaitaine geni a keɗeɗeɗa vuwa-aara, amá á de shá shifa vacite na má watse Yaakadada Yaisu Almasiihu á se kyá shairiya á emnde baɗemme na.

<sup>6</sup> Aley ni kure kwá gálá ba ire na wá, ábi una unɗule-aara-ka. Emtu diyakurka ganakini egdza shahi á makala ba cekwaangudi á naba tsantetse ukpa na an wáslá na baɗemme emtu? Amaana: Egdza haypa ba cekwaangudi, á naba hyemhya am kure baɗemme.

<sup>7</sup> Daaci sawansese emgyegwe a haypa na ba seke shahi á makala na am dágave á kure, daaci kwá gevge emnde cufedɗe duksa á kure. Diyandiya tsa geni Dadaamiya a gakurve vatene-ka emnde cufedɗe, aɗaba Yaisu Almasiihu emtsamtsa aɗaba miya, ɗane gevge ba seke zhel kyawe na tá icaná am muɗri á \*Paska na ge miya.

<sup>8</sup> Daaci zaumiza muɗri á Paska á miya, amá wá, ɓaaka shahi á makala am huɗe-aara. Amaana: magaumika emgyegwe a haypa na ba seke shahi á makala na, amá njauminja cufedɗe, magaumimága jirire.

<sup>9</sup> Am wakita na ndza ya puwakurte zuɗɗwe keni, ndza ya bakuránba geni njauka an emnde a mága gwardzire.

<sup>10</sup> Dzamanka iya áte emnde a mága gwardzire na ta ɓaaka am elva á Yaisu \*Almasiihu, bi emnde a fá ice am duksa á ura, bi neyle-aha, bi emnde a mága hele. Ndanka ya áte emnde a duniya baɗemme, aɗaba ká taa piyeteka una, sey má ká njeka am duniya ba ɗekiɗeki.

<sup>11</sup> Elva-aaruwa ge iya wá, edda una ni aɗkwa á ɗaba Yaisu Almasiihu, mele zlaɓe ádaliye ni á de maga gwardzire, bi á maga wáya á duksa á ura an ervaunɗe-aara baɗemme, bi á de maga hele, bi á pesha emnde an zláze, bi á gev slembazla, bi á ila duksa á emnde na wá, ura estuwa njauka kerɗe, baira ba ge zá duksa keni fauka erva á kure á dem tasa palle antara ɗane.

<sup>12</sup> Shairiya á emnde na fartarka áte Yaisu Almasiihu wá, una slera-aaruka, banakuránka una ɗanna. Ay emnde na tá am kure keni kwá kyeka shairiya-aatare emtu?

<sup>13</sup> Náza emnde na fartareka áte Yaisu Almasiihu wá, á de kyaná ba Dadaamiya an ire-aara shairiya-aatare. Ekkure wá, magaumága ba una am dágave á kure áte una a ndaasa wakita á Dadaamiya, a ba ɗane: Bakaosebáke sleмага duksa mándzawe am dágave á kure na.

## 6

### *Dawánka shairiya á kure á deza emnde a duniya*

<sup>1</sup> A ba iya wá: má tsekwaatsekwa dagala am dágave á kure, kelaa ma kwá dándá á deza emnde á Dadaamiya ni, kure kwá de puwa ugje áza emnde na fartarka áte Yaisu \*Almasiihu ɗekiɗeki na wá, una ni ba shagera?

<sup>2</sup> Diyakurka ganakini aɗkwa á sawa sarte umele, watse tá de kyáná ba emnde á Dadaamiya shairiya á emnde a duniya na baɗemme emtu? Má watse kwá de kyáná kure shairiya á nalgaadama ni, kwá dzegwánka ba egdza shairiya cekwaangudi emtu?

<sup>3</sup> Diyaweddiye una ba shagera: am sarte ɗanna, ba malika-aha á Dadaamiya keni watse mí de kyáná ba miya shairiya-aatare. Máki estuwa, labára mi kyeka shairiya á miya á ba am zamane á miya na keni?

<sup>4</sup> Daaci má jerje lámare á duniya am dágave á kure wá, kwá dándá elva ɗanna á deza emnde a duniya na ɓaaka slera-aatare ɗekiɗeki am aiklaisiya na, geni tá de kyáná itare shairiya á kure emtu?

<sup>5</sup> Jeba á una wá, zherwe jipu. Há! Ba palle keni baaka slenkale am dágave á kure geni á tsanaatse elva am dágave á emnde a fetarfe emtu?

<sup>6</sup> Kwa emnde a fetarfe ni kwá de puwar ugje ge ire á kure áza emnde na fartarka áte Yaisu Almasiihu, una ni ba shagera?

<sup>7</sup> Ge jirire wá, anƙwa haypa á kure baɗemme, ma kwá de puwa ugje ɗanna á ba áza emnde á Dadaamiya keni. Una ɗanna á mará ba tsaftaɗe á kure áte barama á Dadaamiya. Ma ura a magakte kelaadire, ma a ilu duksa á ɗa keni, shagera ba farvaunɗe, arge dá ura á dem shairiya.

<sup>8</sup> Baira ɗeme, kure keni kwá maga ba kelaadire ɗanna tsa am ekte ge emnde umele, kwá anƙwa zlerma duksa-aatare ma gakurevge ba egdzar mama-aha am elva a Yaisu Almasiihu keni.

<sup>9</sup> Diyakurka geni baɗemme á emnde a mága kelaadire tá taa demka á dem zlanna á Dadaamiya emtu? Jawanaaveka ge unɗule a jirire: Emnde a mága dákarire, emnde a kyula hele, emnde a mága gwardzire, an emnde na tá zlava an zála ba seke itare ákurá mukse,

<sup>10</sup> zlaɓe ádaliye neyle-aha, antara emnde a fá ice am duksa á ura, emnde a mbazla, emnde a pesha ura an zláze, ira emnde a za baráma, baɗemme á kelaade-aha ɗanna, itare tá shánka zlanna á Dadaamiya.

<sup>11</sup> Emnde umele á kure, njá-aatare ndza ba estuwa werre. Amá kina wá, aɗaba zhera á Yaakadada Yaisu \*Almasiihu wá, kwá an bara áza Dadaamiya, a gakurve emnde-aara, a gakurve emnde cudeɗe an hákuma á Sheɗekwe-aara.

### *Dadaamiya nderaaka urimagwe ge mága dakarire an vuwa-aara*

<sup>12</sup> Ta bántsa emnde umele á kure: ma mága jeba-ara keni piyaaka, duksa baɗemme gevge ba halál. Una ba estuwa, amá wá, duksa baɗemmeka una watse emtake áte itare. Iya keni yá slaslán ba estuwa geni ma mága jeba-ara keni piyaaka, duksa baɗemme gevge ba halál ge iya, amá wá, yá eksarka ɗekideki gev náve á duksa umele.

<sup>13</sup> Kwa bántsa kure zlaɓe ádaliye: náza za wá, ba ge zana á dem huɗe, huɗe keni ba ge za náza za á demkwa. Una keni ba jire ba estuwa. Ay degiya, vacite umele, tara huɗe antara náza za ɗanna baɗemme tá de keɗa baɗemme. Ay vuwa á urimagwe keni Dadaamiya a nderán ge mága dakarire an ɗane emtu? A'aa estuweka, Dadaamiya a nderami ba ge Yaakadada Yaisu \*Almasiihu, Yaakadada keni ge vuwa á urimagwe, aɗaba á ɗámiya ba ɗane.

<sup>14</sup> Dadaamiya wá, tsantetse Yaakadada Yaisu am faya, á de tsamitetse miya keni an vuwa á miya baɗemme an hákuma-aara.

<sup>15</sup> Diyakurka ganakini vuwa á kure ubiya á Yaisu Almasiihu emtu? Mi dzegwándzegwa tevaa ubiya á Yaisu Almasiihu, mi de jaterme an vuwa á záware emtu? Una á taa gevka dámmaru.

<sup>16</sup> Diyaweddiye ba shagera ganakini má edda-aara a demaa am mukse záware, garevge ba vuwa palle antara ɗane. Una wá, a ndaana wakita á Dadaamiya, a ba ɗane: Emnde buwa ɗanna, tá gev ba vuwa palle.

<sup>17</sup> Ba duksa palle ge edda una a vante ervaunɗe-aara ge Yaakadada keni, ɗane, tá an Yaakadada, tá gev ba palle am shifa-aatare.

<sup>18</sup> Aɗaba una ɗanna, camarauka tate á gwardzire ɗekideki. Nja á haypa na á maganá urimagwe na, baɗemme á taa gevka palle antara vuwa á edda-aara, amá edda una a de magaa gwardzire wá, a maganta ba ɗane kelaadire ge ire-aara.

<sup>19</sup> Diyakurka geni vuwa á kure bere á Shedekwe Cufedde emtu? Shedekwe Cufedde na a vakurtaa Dadaamiya na á njá am kure. Kwá kwaraná kure-ka vuwa á kure.

<sup>20</sup> Dadaamiya a varakurse an duksa na jauje ge ndzedá á urimagwe. Adaba una nanna, an vuwa á kure bademme, magaumága ba názena ni kwá zleba ba Dadaamiya palle an nane.

## 7

### *Elva áte nika*

<sup>1</sup> Nawmbare jawápa á ndáva á kure, ndza kwa puwite áte nalmesheri á kure: Ate iya wá, máki zhele á camareka tate á mukse ba d'ekideki keni ba shagera.

<sup>2</sup> Amá adaba sabaaba á gwardzire wá, ambane ma ware keni á gá mukse palle, mukse keni á de gá zhele geni nane tá njá kerde.

<sup>3</sup> Daaci sey zhele á vante wedere-aara ge mukse-aara, mukse keni á yanveka wedere-aara ge zhele-aara.

<sup>4</sup> Adaba baaka hákuma á mukse arge vuwa-aara, á kwaraná zhele-aara. Ba estuwa ge zhele keni, baaka hákuma á zhele arge vuwa-aara, á kwaraná ba mukse-aara.

<sup>5</sup> Daaci kure, tara zhele an mukse, piyawapteka d'ekideki am dágave á kure, sey má zlakuruzle am ndáhá geni kwá de njá gergere am sarte cekwaangudi, geni kwá yeka áza Dadaamiya. Am iga-aara wá, jawammeje zlafe adaliye geni a mbedakuraaka Shaitaine á dem haypa, adaba cekwire á farvaunde á kure.

<sup>6</sup> Elva na yá ankwá bakurná iya na wá, gevka laarire, yá kátá bakurá ba ni ma ura-ara keni ba shagera ba una a eksesaa edda-aara.

<sup>7</sup> Ate iya wá, yá kátá emnde bademme tá njá ba seke iya. Amá á taa gevka, adaba ma ware keni á ba an názena a wayanantaa Dadaamiya; ge ura umele á vante waya nika, ge umele á vante ndzedá ge nja an ire-aara ba nane palle.

<sup>8</sup> Kina wá, yá elvan ge emnde na zlafe gareka nika na, antara nwashana a kedaa zála-aha-aatare; itare wá, shagera tá njinja ba seke iya.

<sup>9</sup> Amá má kwá taa kwaruka vuwa á kure wá, ambane kwá nguda nika. Ngulme ba una nanna arge njá an mbagerire ba kelaazare.

<sup>10</sup> Ge emnde na tá an nika zlauzle wá, una elva-aaruka, a fakuraara ba Yaakadada, geni mukse, a tegaraaveka d'ekideki an zhele-aara.

<sup>11</sup> Má gevge ni tegaraavetege an zhele-aara wá, sey á njá baaka zhele, bi á se mela antara zhele-aara. Ba estuwa ge zhele keni, a belanaaka mukse-aara d'ekideki.

<sup>12</sup> Náwa una wá, yá ndahater ge jugená á emnde umele: una Yaakadada-ka, yá baterná ba iya: máki ankwá zhele na fetarfe áte Yaisu \*Almasihu, an mukse na fetareka, a belanaaka mukse-aara.

<sup>13</sup> Ba duksa palle ge mukse na fetarfe, máki á mba á zhele na fetareka, má zhel nanna wayaawayá an mukse-aara, a njinja am mba á zhele-aara.

<sup>14</sup> Ya ndahanaa adaba una ka, adaba zhel nanna zlafe fetareka na, nane keni ba gevge cufedde adaba mukse-aara. Mukse keni má zlafe fetareka, nane keni ba gevge cufedde adaba zhele-aara. Má baaka una wá, egdzara-aatare tá gevka cufedde, amá estuweka, egdzara keni ta cufedde-aha.

<sup>15</sup> Amá má gevge ni edda una fetareka na á kátá tegaava an slefatarfe wá, naba vawanteva baráma. Daaci una jauje na, ma mukse, ma zhele keni am iga á lámare nanna, nane gevge ba egdza zhele, adaba Dadaamiya a d'ahakur geni kwá njinja an hairire.

<sup>16</sup> Ekka mukse, diyakdiya ba jirire ganakini ká de lyelya zhele á ña emtu? Ma ka zhele keni, diyakdiya ba jirire ganakini ká de lyelye mukse á ña emtu?

*Ma ware keni a njinja á ba áte njá-aara na a dahanaa Dadaamiya*

<sup>17</sup> Duksa palle wá, ma ware keni a eddaba barama á Dadaamiya áte una á maranná ñane, a tatayeka gev seke ura umele, a tsaatse á ba áte njá-aara ñanna ndza a dantaa Dadaamiya am kwa na. Kwaya ñane názena yá fateraare ya ge aiklaisiya-aha na ma tá áme keni bademme.

<sup>18</sup> Má ura a shaa d'aha á sawa áza Dadaamiya am sarte na an bela am shedekwe, a eptseka elva, a tsaatse á ba áte nja-aara ñanna. Edda una a dantaa Dadaamiya am sarte na zlafe demka am shedekwe keni, a dzameka elva a dem shedekwe mázla-aara.

<sup>19</sup> Ma edda una demka am shedekwe keni, dem shedekweka una duksa, edda una an belá am shedekwe keni, dem shedekwe hyepka ba názara keni. Duksa yaikke wá, sey ba d'aba názu a ndahanaa Dadaamiya.

<sup>20</sup> Daaci ma ware keni, a tsaatse á ba am tate-aara na ndza a dantaa Dadaamiya am kwa ge se d'aba ñane na.

<sup>21</sup> Daha á Dadaamiya a de beráká am návire emtu, geni ká se d'aba ñane? Má estuwa, dzameka ire á návire mázla-aara, amá máki jerje pute umele geni ká gevge egdza zhele wá, una keni ba shagera ge ekka.

<sup>22</sup> Yá ndahaná adaba uwe dzameka ire, adaba má ura am návire, Yaakadada a dante geni á d'aba ñane, edda-aara gevge ba seke egdza zhele áza Dadaamiya. Ba estuwa ge edda una á kwaraná ñane ire-aara am duniya na keni, má a dantaa Dadaamiya geni á d'aba ñane, edda-aara keni gevge náve á Yaisu \*Almasiihu.

<sup>23</sup> Dadaamiya á varakurse an duksa yaikke jauje ge ndzedá á urimagwe, daaci gawevka náve-aha á emnde dekideki.

<sup>24</sup> Estuwa egdzar mama-aha-aaruwa, ma ware á kure keni njawinja á ba am tate na ni ndza a d'akurtaa Dadaamiya átekwa na, njawinja ba estuwa á katafke-aara.

*Elva a emnde na zlafe gareka nika an mukse na a kedaa zhele-aara*

<sup>25</sup> Ate elva a gyaale-aha, antara dawale-aha wá, una wallá ya cunaan áza Yaakadada, wallá uwe, yá vakurte ba sawari-aaruwa. Diyakurdiya geni Yaakadada a magiyaa ngurna, ganevge ura-aara, daaci hyainevhye geni kwá cena názu yá bakurná iya.

<sup>26</sup> Adaba kwakyire á wahála na yá zharaná ya na wá, má ura á njá ba estuwa keni mándzaweka, a ba iya.

<sup>27</sup> Daaci ekka edda una ká an nika á ña zlauzle wá, tatayeka ica nika á ña. Amá ekka edda una zlafe ngudanika nika wá, sleka elva á nika mázla-aara.

<sup>28</sup> Ma ká gá mukse keni mándzaweka, ma gyaale keni máki á de gá zhele haypa-ka, amá duksa palle wá, emnde na garega nika na wá, ankwá wahála ázetare ma vaatara keni. Daaci yá kátá lyakurse á ba am wahála ñanna.

<sup>29</sup> Egdzar mama-aha-aaruwa, názu yá bakurná iya wá, náwa zamáne á miya na á de haraaka kwakya mázla-aara. Daaci kure emnde na kwá an ñwasha keni, magawanaamaga duksa ge Dadaamiya ba seke kwa baaka an ñwasha.

<sup>30</sup> Kure emnde na kwá am laruwa keni, gawevge ba seke ndza shakurka emtanjire; emnde na tá am gedá, a zhararzhára higa-aatare ba seke

hyefka duksa; emnde a shákwa kazlaŋa á duniya keni a garevge ba seke baaka duksa-aatare.

<sup>31</sup> Daaci bademme á názena á maga slera á ba an kazlaŋa á duniya na, fauka ire á kure átekwa, adaba duniya na á de zle.

<sup>32</sup> Wayanka kwá hyá lyuwa an duksa umele dekideki. Edda una gaaka mukse, ñane á fá hyema á ba áte názu á kataná Yaakadada, á kátá maga ba názu á de hayánháya Yaakadada.

<sup>33</sup> Amá edda una an mukse wá, estuweka. Ñane á shunŋula ba kazlaŋa á duniya geni á gedantegefa mukse-aara an ñane, ámbera á dzámá slera á Dadaamiya keni.

<sup>34</sup> Daaci ñane ire-aara gevge bubuwa. Ba duksa palle ge ñwasha keni. Mukse má gaaka zhele ba dekideki, antara una zlaŋe gyaale wá, itare ire-aatare á ba áte namaari á Yaakadada, tá tataya vante ire-aatare, antara ervaunŋe-aatare bademme ge Dadaamiya. Amá mukse á zhele wá, ñane á hyá lyuwa á ba an kazlaŋa á duniya, á kátá á gedante zhele-aara an ñane.

<sup>35</sup> Bademme á elva-aha na, yá tsakán ge piyakurte duksa umeleka, yá kátá ba njá á kure, yá kátá kwá maganaamaga názu zlaya, ira kwá vante ire á kure bademme ge Yaakadada.

<sup>36</sup> Kina wá, mí ndáhá elva á dawale, má tá kátá pákyáva an gyaale na á shebaná ñane. Amá má ervaunŋe-aara ndunde gyaale ñanna, diyeddiye geni ba gyaale ñanna keni á de zlaŋa ervaunŋe-aara kwakya áte una ñanna, ervaunŋe-aara á kátá ba tá ŋgudfa nika an gyaale, daaci baaka haypa am huŋe-aara dekideki, ba á gá gyaale-aara, a piyaraterteka názu njarantenja am ervaunŋe-aatare.

<sup>37</sup> Áma máki egdza dawale njantenja am ervaunŋe-aara geni á pekya ge sheba gyaale mazla-aara, baaka sawari á emnde umele am huŋe-aara, a tapanaa ba ñane am vuwa-aara geni á dzegwándzegwa nja estuwa, á ñanaaŋa vuwa-aara, daaci ma gaaka mukse keni a magaa ba shagera.

<sup>38</sup> Jirire á elva ñanna wá, edda una gaaga mukse keni a magaa duksa shagera, amá átira ba edda una má gaaka mukse na.

<sup>39</sup> Ge mukse á zhele, am sarte na zlaŋe zhele-aara aŋkwa an shifa, an piya ganakini á pakyaava an zhele-aara, á de gá umele, sey má kedáakeda zhele lauktu mukse á gevge egdza zhele; amá keni sey á de gá ba slefatarfe seke ñane.

<sup>40</sup> Amá áte iya wá, á de shá higa kwakya má á njá an há-aara mázla-aara, arge una á de ga zhele umele na. Iya keni yá tama a binaa ba Sheŋekwe á Dadaamiya.

## 8

### *Elva a za názu ta icanante ge hele*

<sup>1</sup> Kina wá, mí habaza elva a hyuwa na tá icanante ge hele na. A ba kure, bademme á miya diyamidiya jirire á elva ñanna, una ba jire. Ay degiya, diya ñanna á dá ura á dem kuraavire, sey ba wayavire palle una á dá emnde a fetarfe á de katafke.

<sup>2</sup> Má bánba edda-aara, iya wá, diyandiya duksa mázle-aara, ñane zlaŋe shanka ñane eŋkale á jirire.

<sup>3</sup> Amá edda una aŋkwa á daba Dadaamiya áte waya á ervaunŋe-aara wá, ñane an diya áza Dadaamiya.

<sup>4</sup> Ate elva a zá názu tá icanante ge hele wá, kwá kátá yá bakurá uwe? Náwa, bademme á miya diyamidiya geni zhera ba hele tá maganá



emnde am duniya na, baaka námpire-aara. Diyamidiya zlaɓe ádaliye geni Dadaamiya wá, buweka sey ba palle.

<sup>5</sup> Gevge wá, duksa-aha na áte samaya, una áte haha, kwakya názu emndimagwaha tá kezlater ugje ba seke dadaamiya. Kwakya duksa-aha na garevge dadaamiya-aha áza emnde umele am duniya. Duksa-aha umele kwakya garevge ba seke Yaakadada-aha arge emnde.

<sup>6</sup> Amá ázemiya wá, baaka Dadaamiya umele sey ba palle, Eddemiya na duksa bademme a nderanaa ba ɲane, shifa á miya, a nderamiya ba ɲane, mi emnde-aara. Yaakadada keni sey ba Yaisu \*Almasiihu palle, Dadaamiya ndza a nderaa duksa bademme áte erva an ɲane; shamiyánsha shifa kina adaba ɲane.

<sup>7</sup> Amá kure, emnde umele á kure zlaɓe diyarka jirire á elva ɲanna, geni baaka námpire á hele ɗekideki na. Daaci má tá anƙwa zá názu ta icanante ge hele wá, kertenj tá fetarfe am ervaunɗe-aatare geni itare keni tá á ba am hele ɲanna. Ya ndahanaa adaba uwe una, adaba emnde ɲanna ndza mbarsembe mága hele ba estuwa, mele zlaɓe ádaliye keni zlaɓe gyarebka am elva á Dadaamiya. Daaci itare ma ta zu vaatara hyuwa ɲanna keni, tá fetarfe á ba an jirire am ervaunɗe-aatare geni ta magaa duksa shagerka.

<sup>8</sup> Má ge jirire wá, á badzámiya náza za-ka an Dadaamiya. Ma zamiyuze keni á sagamika, ma zamika keni baaka názu á gula áte miya.

<sup>9</sup> Ekkure wá, kwá kwaraná kure ire á kure, ge zá názu kwá kataná kure. Amá wá, magaumaga enƙale, geni a mbedeka edda una zlaɓe gyebka am fetarfire na adaba kure.

<sup>10</sup> Amaana: ba seke edda una zlaɓe gyebka am fetarfire na, máki á zhara ka edda una gyakebgye na, ká anƙwa njá am tate á maga hele, ká ámbera zá duksa á hele, daaci fakanemfa ndzedá am vuwa ge ɲane na zlaɓe gyebka am fetarfire na, ge eptsá á dem hele ka emtu?

<sup>11</sup> Daaci diyeddiye ba shagera geni ɲane ɲanna zlaɓe gyebka am fetarfire á eptsá á dem kataliya na wá, adaba ba ka na gyakebgye na. Ay degiya egdza emmeɲa ba ge ekka, Yaisu \*Almasiihu a yaa shifa-aara adaba ɲane.

<sup>12</sup> Má nja á kure ba una wá, kwá anƙwa maga kelaadire áte egdzar mama-aha á kure na zlaɓe gyarebka am fetarfire na; an una ɲanna, kwá anƙwa puwaterpuwa á dem dzámá ire. Diyaweddiye geni kwá magaterán ge egdzar mama-aha á kure-ka palle kelaadire ɲanna, amá kwá maganán ge Yaisu Almasiihu.

<sup>13</sup> Máki watse á mbedá egdza emmerwa adaba názu ya zuwa iya á dem huɗe, ambane yá zeka hyuwa ɲanna, geni a vananteka ektápaare ge egdza emmerwa.

## 9

### *Slera á slebelá an názu á zlayán ge ɲane*

<sup>1</sup> Ba iya na kwá anƙwa zharizhárá na keni wá, ábi yá kwaraná ba iya ire-aaruwa. Emtu ya slebela á Yaisu \*Almasiihu-ka emtu? Ndza nanánka Yaisu Almasiihu an ice-aaruwa ɲgayye emtu? Ekkure na náwa gakurevge emnde a fetarfe na keni barka ba slera na ya magannaa ya ge Yaakadada ka emtu?

<sup>2</sup> Ma hyainefka slebela áza emnde umele keni wá, ázekure wá, hyainefhye. Am njá á kure kina gakurevge palle antara Yaakadada keni á márá ba jawapa ganakini ya slebela á Yaakadada Yaisu Almasiihu, kwa jesaare na keni adaba slera na ya magannaa iya.

<sup>3</sup> Yá de baterá ba una ya ge emnde na tá anƙwa á habaza názu am iya na.

<sup>4</sup> Adɔ́ba slera na ya maganaa ya am dágave á kure na, zlayika ge yá zuze, yá shushe áte kure emtu?

<sup>5</sup> Emtu ta piyite an piya ge iya ga mukse, geni ma andze njá ja dɔ́ba kerde an mukse-aaruwa ge mága slera á Dadaamiya, seke una tá ankwá á maganá tara Piyer, antara emnde a bela umele, an egdzar mama-aha-ɲara ge Yaakadada na emtu?

<sup>6</sup> Emtu kwa dzeranɲerse ba ɲere njainɲe antara Barnabas geni njá gelaná ba ɲere ire á ɲere emtu?

<sup>7</sup> Ndza kwa cenáncena ser palle, geni zhel sawji ankwá á wavanu ge larde ni á gelaná ba ɲane ire-aara? Á ba á jerje sleherɔ́a, á maga slera am fe, amá má magaamaga duksa áte fe wá, á feka áte we-aara? Emtu ankwá suni na á piyá walda ni á sheka uba áte dabba-aha na á piyaná ɲane?

<sup>8</sup> Emtu garáva-aha ɲanna ya tsakese ba názena tá ankwá á slaslaná emndimagwaha emtu? Una, á ba am \*tawraita keni mi ndaha ba una.

<sup>9</sup> Ankwá an puwa am tawraita á Muusa, a ba ɲane: Ngudanaanuka \*japa ge we á dalau na ankwá á maga slera na, á bina. Emtu Dadaamiya a ndahese una á ba áte dalau ba jirire emtu?

<sup>10</sup> Ba jirire, Dadaamiya á tsaka elva-aha ɲanna á ba áte miya. Sleherɔ́a wá, á maga slera-aara an tama. Ba duksa palle ge emnde na tá gyega hiya keni, shagera jipu geni ta fetefa tama áte názu zlaya-aatare ge itare keni.

<sup>11</sup> Ay náwa ɲere ɲa se hyanme elva á Dadaamiya am kure ba seke ta hyanme wulfe am fe. Daaci máki ɲere njá lyiya ba kazlaɲa á duniya na am erva á kure ge zuze á ɲere, una mándzawe emtu?

<sup>12</sup> Má zlaya á emnde umele ge sha náza zuze-aatare am erva á kure, sakwa ɲere emtu? Má áte jirire wá, zlaya á ɲere ge ɲere keni, amá nja ba palása na njá ankwá maganá ɲere na, ba njá farvaunɔ́deka, ndavanɲerka ɲere geni kwá melanɲerumele, njá kuva ba ni a eptsarka emnde na tá se cena labáre á higa, elva á Yaisu \*Almasiihu na.

<sup>13</sup> Diyakurdiya emtu geni emnde na tá maga slera am mashidi, á gelaterá ba názu emnde tá danán ge Dadaamiya á dem mashidi? A ba am mashidi ɲanna zlaɓe ádaliye: Emnde na tá maga slera á ica dabba keni tá á ba an dza-aatare am hyuwa ɲanna? Diyakurka una ɲanna emtu?

<sup>14</sup> Náza á emnde a bálá waazu keni ba estuwa. A ba Yaakadada an we-aara: Náza njá shifa á emnde bálá elva-aaruwa á segashe á ba am slera-aatare.

<sup>15</sup> Jirire tsa, aley keni iya katanka ya názu yá njá shifa-aaruwa an ɲane áte una ɲanna. Ba kina keni, banakuránka una ge kátá duksa ázekure. Una ma yá emtsa keni, ya hayaa ba una ɲanna, arge una tá kedinaakeda názu yá geɔ́a átekwa na.

<sup>16</sup> Yá shánka zleba adɔ́ba yá bálá labáre á higa, elva a Yaisu Almasiihu, una gevge laarire áte iya, má yá báleka, watse laruwa ge iya.

<sup>17</sup> Ma andze ya eksesaa ba iya an ire-aaruwa slera ɲanna wá, ma yá ndava mbera-aaruwa keni. Amá una estuweka, a fiyaara ba Dadaamiya ge iya.

<sup>18</sup> Ay wá, ázara kena mbera-aaruwa ge iya? Mbera-aaruwa ge iya wá, ba yá balaterá elva á Yaisu Almasiihu ba dey ge emnde, yá lyiyeka názu á zlayizláya am slera-aaruwa.

<sup>19</sup> Iya, yá kwaraná ba iya ire-aaruwa, ya náve á ura-ka. Amá ya ganvaa ba iya ire-aaruwa ba seke ya náve á emnde bademme, geni yá sá emnde ba kwakya áseza Yaisu \*Almasiihu deydey á ndzedɔ́a-aaruwa.

<sup>20</sup> Diyandiya tsa ganakini yá kwaraná ba iya ire-aaruwa am názena á ndahaná \*tawraita á Muusa, amá má yá am dágave á Yahudiya-aha wá,

yá njá áte njá á Yahudiyire, geni a fartaarfe itare keni áte Yaisu Almasiihu. Má yá áza emnde na tá ankwá d̄aba náde á Yahudiya-aha bademme áte laarire na, iya keni ba yá ed̄d̄aba antara itare, geni yá gatervege emnde á Yaisu Almasiihu.

<sup>21</sup> Zlābe ádaliye: Má yá am d̄ágave á emnde na diyarka tawraitá á Muusa d̄ekid̄eki na keni maa, yá ganve ire-aaruwa ba seke itare. Una á b̄ánka ni janaaveje áte tawraitá á Dadaamiya, una estuweka, ad̄aba fanansaarfe ge una a ndasaa Yaisu Almasiihu na. Amá yá magán ba geni a shanátersha ge d̄aba Yaisu.

<sup>22</sup> Ba estuwa ṅanna zlābe ádaliye, má yá am d̄ágave á emnde na zlābe gyarebka am fetarfire, iya keni yá ganve ire-aaruwa ba seke itare. Una ma yá am d̄ágave á emnde na nja-aatare estara keni, yá ganve ire-aaruwa ba seke itare, geni yá lyelye emnde umele am itare an jeba á pute-aha ṅanna.

<sup>23</sup> Bademme á una ṅanna, yá magán ba geni a hyemhya elva á Yaisu Almasiihu am slede bademme, geni iya keni yá de shánsha dza lād̄a-aaruwa am hude-aara.

<sup>24</sup> Diyakurdiya emtu geni má emnde tá ankwá degeza zhágade geni á de icáná ware ire, emnde kwakya una tá zhagade, amá sey ba emnde na ta ica ire una tá lyiya duksa? Daaci kure keni wavauwáva ba seke náza-aatare, kwá de shánsha názá á kure keni.

<sup>25</sup> Bademme á emnde na má watse tá de zhagade na wá, ma ware-aatare keni á ettsaha, á sala vuwa-aara ba kelaazare geni a mbesmbe vuwa-aara, lauktu á de icaná ṅane ire vaci lámare. Bademme a wava-aatare ṅanna wá, ba geni tá shánsha zleba á hare palle. Amá miya wá, wavaumiwáva am slera á Dadaamiya geni mí de shánsha \*d̄an̄kaula na á zleka d̄ekid̄eki na.

<sup>26</sup> Ad̄aba una ṅanna, iya wá, yá zhagade á ba á de katafke. Zlābe adaliye, ya ba seke edda una ni ankwá á ja d̄ed̄ekwa na, amá wá, yá jeka á dem kaamba ba dey.

<sup>27</sup> Iya ya ba seke sleja d̄ed̄ekwa, a ba iya na wá, amaana: Yá hereka vuwa-aaruwa d̄ekid̄eki, sey ba yá kwarukware vuwa-aaruwa ma vaatara keni, geni iya edda á balaterán ge emnde vatena, a de velyariseka á degáshe ad̄aba hyainefka.

## 10

### *Gawevka emnde a mága hele zlābe ádaliye*

<sup>1</sup> Egdzar mama-aha-aaruwa, wayanka kwá viyanaaviya názena ndza a shaa eggie-aha a miya werre am sarte na ndza tá antara Muusa. Dadaamiya ndza a shebatervehe bademme-aatare am kumba am sarte na tá átira zlálá; bademme-aatare, baaka una ndza ebzuka Haye Kyan̄ṅe na.

<sup>2</sup> Am zlálá-aatare am kumba, ira degashe-aatare am guwa ṅanna, ndza ba seke magarateraamaga baptisma geni tá gevge emnde á Muusa á ba an jirire.

<sup>3</sup> Itare bademme, ndza baaka una zauka d̄afa na ndza a vatertaa Dadaamiya á sa am samaya na.

<sup>4</sup> Baaka una shauka yawe na ndza a vatertaa ba Dadaamiya an hákuma á Shed̄ekwe-aara á segáshe á sawa am palaha na, bademme-aatare ndza sharushe yawe ṅanna. Palaha na ndza a ṅgyekwateraa Dadaamiya ṅanna wá, ba Yaisu \*Almasiihu. ṅane ndza ankwá antara itare ba kelaazare.

<sup>5</sup> Aley, nja ba una ṅanna bademme na, ndza kwakya emnde am d̄ágave-aatare hayáterka Dadaamiya ad̄aba shagerkire á mága-aatare. Ad̄aba una ṅanna, zateruze duniya á ba am kaamba.

<sup>6</sup> Daaci baɗemme á una ɲanna, á bamiyá ba elva ge miya keni, geni kataumika jeba á hala ɲanna ta maganaa itare werre na.

<sup>7</sup> Gawevka emnde a mága hele zlaɓe ádaliye seke una ndza ta maganaa itare werre, daaci ta puwetehe am wakita á Dadaamiya geni emnde njarinja á katafke á hele, tá aɲkwa ezza, tá ámbera eshsha, daaci ta tsetehe tá shekela á bina.

<sup>8</sup> Magauka gwardzire seke una ndza ta maganaa emnde umele-aatare, daaci ta naba matsehe, emnde debu kul buwa ju keye una ta keɗaa áte váha palle na.

<sup>9</sup> Adaliye, tatayaumika gyá hala á Dadaamiya seke una ndza ta maganaa emnde ɲanna werre, aɗaba una ɲanna a cebateraaha ge záhe na.

<sup>10</sup> Zlaɓe ádaliye, magaumika dugune áte Dadaamiya seke una ndza ta maganaa emnde umele-aatare, daaci a naba keɗateraaha ge Dadaamiya á kya erva an malika na á belaná á de ceɓa emnde na.

<sup>11</sup> Baɗemme á lámare na ndza a shaa itare na wá, ba ge faterem am vuwa ge emnde umele geni itare wá, a magarmága eɲkale. Ta puwete am wakita á Dadaamiya, ge fami magiya ge miya emnde na mi herzhe an kataliya á zamane na.

<sup>12</sup> Daaci faufa hyema ba shagera, sakwa edda una ɲane á tapán ba seke ɲane wá, tsaatse ba shagera na, sey á fa hyema ba shagera geni a mbeɗeka.

<sup>13</sup> Lámare na á badakurá shaitaine an ɲane baɗemme na, ndza a fantau vateneka. Emnde umele keni ndza ta ɓashaa ba una ɲanna. Dadaamiya wá, ɲane dzayye ervaunɗe-aara am názu ndza a ndaase ɲane baɗemme. Á de belanaaka ɗekideki geni á shakursha názu á jauje ge ndzeɗa á kure. Báda á shaitaine wá, á ba aɲkwa, amá ma a shakur vaatara lámare ɲanna keni, Dadaamiya á de vakurte midalire, á de magakurná ba ɲane puta, geni á fertakuraferta an ɲane.

<sup>14</sup> Aɗaba una ɲanna egdzar mama-aha-aaruwa, gawanápteka ɗekideki ge elva á mága hele.

<sup>15</sup> Elva-aaruwa ba una ge kure, wallá kwa egdzara-ka, uweka, lawanaale ba kure elva-aaruwa ɲanna, tara jirire an fida keni.

<sup>16</sup> Slawanaasle á ba áte náza sha na mi gan barka ge Dadaamiya argena má mi za ɗafa á Yaakadada na. Má mi eksante, mi shuhe na wá, gamiyevka palle antara Yaisu \*Almasiihu aɗaba uzhe-aara na ndza a puwanvaa ɲane na emtu? Adaliye, má mi kezlanve ɗafa mi ezza na wá, gamiyevka palle antara Yaisu Almasiihu aɗaba shifa-aara na ndza a yanaa ɲane na emtu?

<sup>17</sup> ɗafa wá, ba ɗagwala palle, amá mi kwakya mi zá ba una ɲanna; amaana: am kwakyire á miya ɲanna wá, gamiyevge ba seke ura palle.

<sup>18</sup> Zharauzhára áte una tá aɲkwa maganá emnde a \*Iserayiila: Tá icanante dabba ge Dadaamiya áte tate-aara seke una a kwaratersaa ɲane, daaci emnde na má zaruze hyuwa ɲanna, baɗemme-aatare garevge emnde á Dadaamiya á ba an jirire.

<sup>19</sup> Kwá á ba á cenáncena ndza názu yá aɲkwa bakurná iya na? Emtu kwá cenán ba seke hyuwa na tá icanante ge hele keni duksa emtu? Ba hele ɲanna ɗeme, duksa á jirire emtu?

<sup>20</sup> Una duksa á jirireka ɗekideki. Arge una ɲanna, názu yá bakurná iya wá: Má emnde na zlaɓe ɗabarka Yaisu \*Almasiihu ta icataa duksa wá, tá vante ge Dadaamiya-ka, amá tá vaterte ge jini-aha. Aɗaba una ɲanna, wayanka kwá gev palle antara jini-aha.

<sup>21</sup> Una á taa gevka ɗekideki, kwá de shá názena ni tá fater ge jini-aha, ádaliye kwá se sha una á katafke á Yaakadada Yaisu Almasiihu. Zlaɓe

ádaliye: Kwá dzegwánka de zá názena tá gyater ge jini-aha, kwá se zá náza á Yaakadada Yaisu Almasiihu keni ba kure.

<sup>22</sup> Má gevge ni mi magán estuwa wá, mi kátá elva á Yaakadada, emtu kwa kurken mí januje an ndzedá emtu?

*Ma am uwe keni magaumága adaba hairire á emnde umele*

<sup>23</sup> A ba emnde umele á kure: Ábi duksa bademme gevge ba halál? Una ba jire-aatare. Amá wá, duksa bademmeka una watse emtake áte miya. Ta bántsa itare: Ankwa baráma á mága ma uwe keni. Ay degiya, duksa na watse á melamiyuka dekideki ge daba Dadaamiya keni ankwa.

<sup>24</sup> Ma ware á kure keni magaumága názena ni watse emtake áte emnde umele, zharauka názu watse emtake ba ge kure palle na.

<sup>25</sup> Bademme á hyuwa-aha na tá ankwa valaná am kwaskwe wá, ma ndza ta icanante ge hele keni ndaveka ka, dzameka ire átekwa dekideki, ká naba esshekwa, ká de ezza duksa á na.

<sup>26</sup> Adaba a ba wakita á Dadaamiya: Haha, antara názu átekwa bademme ba náza á Yaakadada.

<sup>27</sup> Ma a dáhakte vaatara ura á na na zlahe fetareka áte Yaisu ge de za náza za am mba-aara keni, má ba eksakaarekse duwa wá, ndaveka, dzameka ire áte náza za nanna dekideki, ká naba ezza.

<sup>28</sup> Amá má a se balaksehe ge ura umele geni hyuwa nanna ndza ta icanante ge hele wá, naba yanya, zeka mázla-aara, adaba á de sha shunṅula edda una a se balaksehe na.

<sup>29</sup> Ya ndaná adaba uwe una: Yá kuva ba názu watse á de dzamaná nane na. Ekka wá, yá kuva náza á na ka mázla-aara.

Bánka zlahe: Má ba mbate duksa bademme ba halál, ay labára yá zeka adaba edda una a se balisebála na?

<sup>30</sup> Bánka zlahe adaliye, a ba ka: Má ba ganarge maduwa ge náza za-aaruwa an zhera á Dadaamiya, labára tá tsakiyaare elva arge názu ya magar maduwa lauktu yá ezza?

<sup>31</sup> Duksa yaikke na yá bakaná iya wá: ma ka ján vaatara ire an náza za, bi náza essha, ma ká maga ba uwe keni, emmága á ba áte una ni watse emnde bademme tá de zleba Dadaamiya adaba ekka na.

<sup>32</sup> Ma am uwe keni magaumága á ba áte una ni watse kwá de magateránka emtanṅkire ge emnde umele an nane, ma ge Yahudiya-aha, ma ge emnde a fetarfe, ma ge emnde-ara keni egdzara á nálgaadama bademme.

<sup>33</sup> Magaumága á ba áte una yá ankwa á maganá iya na. Am názu yá maganá ya bademme wá, yá ankwa wava geni a gevge áte shagerire, emnde keni tá de hayánhaya. Yá manka názu watse emtake ba ge iya palle na, amá yá maga názu watse emtake áte emnde bademme, geni itare keni a lyarlya shifa-aatare áza Dadaamiya.

## 11

<sup>1</sup> Dabaudába ba sera-aaruwa, ba seke una iya keni yá ankwa daba sera á Yaisu \*Almasiihu na.

*Fáda ire á ṅwasha á katafke á Dadaamiya*

<sup>2</sup> Iya yá zleba ba kure, adaba danseka am ire á kure am názu kwá maganá kure bademme, kwá ankwa maga ba názu ndza ya bakurnaa iya na.

<sup>3</sup> Amá náwa názu yá kátá kwá diyeddiye zlahe adaliye: Yaisu \*Almasiihu wá, ire ba nane arge zala bademme, zhele keni ire ba nane arge mukse, Dadaamiya nane ire arge Yaisu Almasiihu.



<sup>4</sup> Má zhele á ñala áza Dadaamiya, bi ankwá á mbedateru elva na ndza a shanaa ñane áza Dadaamiya ge emnde wá, sey á eksevarekse dzakwa emtsaade. Má magaaka una ñanna wá, a epsawaa Yaisu Almasiihu na ire arge ñane na.

<sup>5</sup> Amá mukse wá, estuweka. Má mukse ankwá á ñala áza Dadaamiya, bi ankwá á mbedateru názu a shanaa ñane áza Dadaamiya ge emnde, an ire dey, ñane keni ankwá á epsawa zhele-aara na ire arge ñane na. Ñane gevge ba seke mukse na a sehese ire na, una zherwe jipu.

<sup>6</sup> Ha! Má mukse ñanna wayaaka fáda ire, labára á icanvaareka, bi á sehesehe úgje ñanna ba dekideki? Ay degiya, una duksa zherwe náza enndaaka. Daaci má estuwa, sey mukse á fadesefade ire-aara.

<sup>7</sup> Amá ge zhele wá, má ankwá á ñala áza Dadaamiya wá, á fádeka ire. Adaba Dadaamiya a nderaa zhele áte ndera-aara ge ñane, zhele á mara yaikkire á Dadaamiya. Amá mukse wá, á mara ba yaikkire á zhele.

<sup>8</sup> Diyamidiya geni Dadaamiya ndza sanseka zhele am vuwa á mukse, amá ndza a sanse ba mukse am vuwa á zhele.

<sup>9</sup> Zlabe adaliye: Dadaamiya ndza nderaaka zhele adaba mukse, amá ndza a nderaa mukse adaba zhele.

<sup>10</sup> Adaba una ñanna, sey ba mukse una á fafa ire-aara, ge marese zherwe na á fáná ñane áte zhele-aara, ira adaba malika-aha keni.

<sup>11</sup> Amá keni ge njá á miya am elva á Yaakadada Yaisu \*Almasiihu wá, ma mukse keni á ba an dárádza-aara ba seke zhele, zhele keni á ba an dárádza-aara, ma ware-aatare keni á hyepka má baaka palle-aatare.

<sup>12</sup> Ba seke una ni Dadaamiya ndza a tedese mukse am vuwa á zhele na wá, kina keni ba mukse una á yá zhele, duksa bademme á maganá ba Dadaamiya slera-aara.

<sup>13</sup> Lawanaale ba kure an ire á kure má shagera geni mukse á sem jáháva ge ñala Dadaamiya an ire dey.

<sup>14</sup> Zhele maa, áte názu mi zharanaa miya á ba am njá á emnde am duniya keni wá, úgje sladde am ire wá, á gev duksa zherwe ge ñane.

<sup>15</sup> Amá má mukse a shaa úgje sladde am ire wá, á fanaare ge dárádza. Adaba Dadaamiya ndza a vanta úgje sladde ba ge mukse ba seke lafaya ge sheba ire-aara an ñane.

<sup>16</sup> Má ankwá ura á kátá gá jáwe arge elva ñanna wá, nává názu yá banná iya ge edda-aara: ma ñere, ma aiklaisiya-aha á Yaisu Almasiihu na tá áme keni, nade á miya ba una baaka umele.

### *Elva a dafa á dzámá Yaakadada*

<sup>17</sup> Am názu yá bakurná iya kina na wá, yá galakurka mázla-aara. Adaba am jáháva á kure á katafke á Yaakadada, kwá maga ba mandzawire, arge mága shagerire ge dákurá á de katafke.

<sup>18</sup> Emtsaade wá, ta bántsa: Ba kelaa má jakurammeje á katafke á Dadaamiya wá, sey ba gergere ye á kure. Una ba iya keni kyalma-aara fantaarefe.

<sup>19</sup> Baira deme, shagera ba kwá tegava ñanna, geni tá sesse emnde na tá ankwá daba Yaisu \*Almasiihu an jirire na.

<sup>20</sup> Má kwá jáháva á kure ñanna wá, kwá zá dafa á Yaakadada ka kure dekideki.

<sup>21</sup> Ya ndahanaa adaba uwe una, adaba ma ware keni á de berda ba dafa-aara ge ñane, daaci á zuze, á shushe á ba áte huđe-aara haa á weshanante ire, amá emnde umele á waterá ba waya.

<sup>22</sup> Má kwá maga ba una, baaka há á kure ge zá dafa á kure ñanna, kwá shá duksa á kure am huđe-aara emtu? Emtu kwá kátá epsawa aiklaisiya á

Dadaamiya emtu? Emtu kwá kátá fateraare zherwe ge talága-aha emtu? Kwá kátá yá bakurá uwe kina? Kwa kurken yá galakurgála emtu arge una? Yá galakurka dfekidfeki.

<sup>23</sup> Náwa duksa na yá kwarakursa iya na wá, iya keni ndza a kwarisaa ba Yaakadada emtsaafé. Lauktu tá velateru Yaakadada Yaisu ge kelaade-aha-aara wá, ba vacite ñanna an vayiya, a eksetaa dáfá,

<sup>24</sup> a slafan we-aara ge Dadaamiya argena, a ba ñane á elvan ge emnde-aara: Una degiya vuwa-aaruwa, yá yanya shifa-aaruwa adaba kure. Kure keni magaumága ba estuwa ganakini kwá dzamidzáma an ñane.

<sup>25</sup> Am iga á masane, a eksetaa náza sha keni, a ba ñane: Una wá, namána anwaslire na watse á de ngudaterá Dadaamiya ge emnde an uzhe-aaruwa. Ma kwa jamme vaatara ge sha jeba á una keni, magaumága ge kwá dzamidzáma an ñane.

<sup>26</sup> Elva á Yaakadada ñanna wá, amaana: ma kwa jamme vaatara ge zá dáfá ñanna, ira sha náza sha ñanna, kwá anjwa bálá elva a emtsa-aara dem sarte na má de saasa ñane.

<sup>27</sup> Adaba una ñanna, ma ware una a zu dáfá á dzámá Yaakadada, a sharhe náza sha-aara an baakire á zherwe, daaci edda-aara gaaga haypa áte Yaakadada antara uzhe-aara.

<sup>28</sup> Daaci ma ware keni sey á zlauzle am hábaza názu am ñane emtsaafé ba shagera, lauktu á ezza, á essha.

<sup>29</sup> Má edda-aara lanaaka ba shagera geni una vuwa á Yaakadada, ma a zuhe, a shuhe keni, a zaare ba shairiya ge ire-aara.

<sup>30</sup> Adaba ba una ñanna, emnde á kure kwakya ta lipa-aha, emnde umele keni garevge lipa-aha baaka ndzedá-aatare, emnde umele deme emtsaremsta.

<sup>31</sup> Amá ma andze mi habazesaa ba miya emtsaafé názu am huđe á miya lauktu mi ezza, mi essha wá, daaci Dadaamiya ma andze á zamika an shairiya mázla-aara.

<sup>32</sup> Ma Yaakadada Dadaamiya á fá zladá áte miya keni geni duksa umeleka, una ba geni á fámiya am enjkale, lauktu á de ñamika am shairiya mázla-aara seke emnde bademme am duniya.

<sup>33</sup> Adaba una ñanna egdzar mama-aha-aaruwa, má kwá jáháva ge zá dáfá á Yaakadada wá, faufa ervaunđe geni a saremsa emnde bademme emtsaafé.

<sup>34</sup> Má anjwa ura á taa bashuka waya, sey á zuze duksa am mba-aara emtsaafé, geni tedawanteka shairiya áte ire á kure am jáhava á kure. Jugena á elva-aha umele wá, watse yá de palakurnaapálá ma danemda ázekure.

## 12

### *Hákuma á mága slera-aha gergere na á vatertá*

#### *Shedekwe Cufedfe ge emnde*

<sup>1</sup> Egdzar mama-aha-aaruwa, kina wá, mí ndáhá elva áte hákuma á mága slera-aha gergere na á vatertá Shedekwe Cufedfe ge emnde na. Yá kátá kwá cenevaacena una ba shagera.

<sup>2</sup> Diyaweddiye geni am sarte na zlafe fakurtareka áte Yaakadada Yaisu \*Almasiihu wá, ndza á tedakura ba Shaitaine an hákuma-aara á de maga hele, názu wallá á ndáhá elva ka.

<sup>3</sup> Adaba una ñanna, yá kata kwá diyeddiye ba shagera: geni má ba jirire anjwa Shedekwe á Dadaamiya am ura ñanna wá, edda-aara á dzegwánka

nyanya Yaisu Almasiihu. Zlabe á dalye: ura ba dey, á taa ndaaseka áte Yaisu Almasiihu geni ba nane una Yaakadada, sey á banná ba Shedekwe Cufedde ge edda-aara.

<sup>4</sup> Ankwa hákuma á maga slera-aha gergere ge emnde, amá á tegaterá ba Shedekwe Cufedde palle.

<sup>5</sup> Ankwa slera-aha gergere á fateraare Yaakadada Yaisu Almasiihu ge emnde-aara, amá tá maganán ba ge Yaakadada palle.

<sup>6</sup> Zlabe á dalye: ankwa hákuma á maga slera-aha gergere, amá ba Dadaamiya palle una á dá slera-aha nanna á de katafke geni a gevge.

<sup>7</sup> Shedekwe Cufedde ankwa máráva am kure an jeba á hákuma-aha nanna, geni kwá magateránmaga námpire ge emnde an nane.

<sup>8</sup> Ge ura umele, Shedekwe Cufedde á vante hákuma á pálá sera á elva-aha an ilmu na a vantaa Dadaamiya. Ge ura umele, Shedekwe nanna á vante hákuma á dise elva shagera ge enndaha.

<sup>9</sup> Ge ura umele, ba Shedekwe nanna, á vante hákuma á fetarfire áte duksa geni a de gevge ba jirire. Ge ura umele, á vante hákuma á mba ura áte lapikere.

<sup>10</sup> Ba Shedekwe nanna palle, ge ura umele á vante hákuma á maga najipu-aha; ge ura umele, á vante slera á nabyire; ge ura umele á vante hákuma á lanaale-aara, tara una jini, an tara Shedekwe Cufedde keni; ge ura umele á vante hákuma á ndáhá elva ánwaslire na ni ba nane keni diyaaka na; ba Shedekwe nanna, á vante hákuma ge ura umele geni á palanaapálá elva nanna.

<sup>11</sup> Bademme á hákuma-aha nanna, ba slera á Shedekwe Cufedde palle, á tegaterá ge emnde-aara bademme áte una á kataná nane.

### *Ubiya-aha kwakya am vuwa palle*

<sup>12</sup> Diyamidiya geni vuwa á urimagwe wá, nane palle ba nane, amá ubiya-aha kwakya, antara duksa-aha gergere ankwa an dzagwa am nane. Ma kwakya ubiya-aha, an duksa-aha nanna am nane keni, zhera-aara ge nane wá, ba vuwa palle. Vuwa á Yaisu \*Almasiihu keni ba estuwa nanna, amaana: aiklaisiya-aara.

<sup>13</sup> Miya bademme á miya, ma Yahudiya-aha, ma emnde a jeba umele, ma náve-aha, ma emnde na tá kwará ire-aatare na, bademme am sarte na magaramiyaamaga baptisma, mi naba jamme, gamiyevge ba palle. Una keni á ba an hákuma á Shedekwe Cufedde nanna palle, ba Shedekwe nanna palle una ankwa am ma ware á miya keni bademme.

<sup>14</sup> Vuwa á urimagwe gevka ba ubiya palle, amá ubiya-aha, an dzágwa á duksa-aha umele kwakya ankwa am nane.

<sup>15</sup> Má bánba sera: Iya wá, yá máslaaveka an vuwa, adaba ganevka erva, una á ba magaavemage emtu, geni á njinja yiyiye áte vuwa?

<sup>16</sup> Má bánba hyema: Iya keni yá máslaaveka an vuwa, adaba ganevka ice, una ba jirire geni nane gevka tate umele áte vuwa emtu?

<sup>17</sup> Ma andze vuwa á urimagwe deme surumme ni ba ice palle wá, ma andze á cenáná an uwe kena duksa? Bi ma andze Dadaamiya a nderaa ba hyema palle geni ura wá, ma andze á sáná an uwe kena duksa?

<sup>18</sup> Amá Dadaamiya nderaaka ura estuwa. Dadaamiya a ndera vuwa á urimagwe wá, an duksa-aha umele gergere bademme an dzagwa am nane, áte una á kataná nane.

<sup>19</sup> Ma andze Dadaamiya a nderaa ba duksa palle am njá á duksa-aha na mí zharaná miya áte vuwa á urimagwe na wá, una ma andze vuweka dekideki.

<sup>20</sup> Amá gevka estuwa; anƙwa ubiya-aha gergere, antara duksa-aha gergere an dzagwa am vuwa á urimagwe, baɗemme á duksa-aha ɲanna, ta jema ba vuwa palle.

<sup>21</sup> Daaci má estuwa, ice á taa banánka ge erva: baaka wedere-aaruwa an ka. Ire keni á dzegwánka baterán ge sera-aha: baaka wedere-aaruwa an kure.

<sup>22</sup> Baira ba egdzar duksa-aha na tá am vuwa á miya, miya mi fateruka hyema geni baaka payɗa-aatare na wá, tá ɲáná ba itare shifa á miya.

<sup>23</sup> Zlabe ádaliye, duksa-aha umele keni tá anƙwa áte vuwa á urimagwe, amá miya mí feka dárádza áte itare, ira duksa-aha umele keni mí maga zherwe-aara jipu, mí njá á ba tsufatertsufa, tá ɲáná ba itare zlabe adaliye shifa á urimagwe.

<sup>24</sup> Duksa-aha na áte vuwa á ura baɗemme, duksa na shagera ge ezzhára-aara, á famika am zherwe, baaka wedere á miya ge etsufa-aara na keni, a nderanaa Dadaamiya ba estuwa áte una ndza a katanaa ɲane. Daaci a naba fa dárádza áte duksa na á fá ura am zherwe na kwakya-aara.

<sup>25</sup> Dadaamiya a naba jema duksa-aha ɲanna am vuwa á urimagwe, wayaaka an tegava-aatare ɗekideki, á kátá tá maga duksa baɗemme átirpalle.

<sup>26</sup> Má anƙwa zlaɗa áte duksa palle am vuwa á ura, vuwa baɗemme á tápá ba zlaɗa ɲanna. Má ubiya palle shansha geɗa, baɗemme á vuwa á eggeɗa.

<sup>27</sup> Daaci ba ekkure na una kwa vuwa á Yaisu \*Almasihu. Ma ware á kure keni ɲane duksa palle áte vuwa ɲanna.

<sup>28</sup> Náwa Dadaamiya á baɗláter estuwa emnde am aiklaisiya-aara: Zunɲwe wá, a dzerese emnde a belá á Yaisu Almasihu. Ge buwire, a dzerese emnde a mága nabiyyire. Ge keyire, a dzerese emnde a kwaratersa duksa ge emnde. Am iga á emnde ɲanna, a dzerese emnde a mága najipu-aha, antara emnde na a vaterte hákuma á mba emnde na ta lapika-aha na. Ge emnde umele, a vaterte hákuma á melateru ge emnde. Ge emnde umele a vaterte hákuma á gev emnde a sawari á aiklaisiya. Ge emnde umele zlabe ádaliye, a vaterte hákuma á ndáhá elva-aha gergere na ni ba itare keni diyarka na.

<sup>29</sup> Am názu kwa cenanaa kure kina na wá, emnde baɗemme ta ba emnde a belá emtu? Emtu emnde baɗemme tá dzegwándzegwa mága nabiyyire emtu? Emtu baɗemme tá dzegwándzegwa mága malumire, bi mága najipu-aha gergere emtu?

<sup>30</sup> Emtu, itare wá, baɗemme ma ware-aatare keni an hákuma á mba ura áte lapikere emtu? Emtu baɗemme-aatare tá an hákuma á ndáhá elva-aha gergere na ni ba itare keni tá cenánka na emtu? Emtu má ndarsendáhe elva áɲwaslire ɲanna wá, ma ware keni á naba palanaapálá emtu?

<sup>31</sup> Názu yá bakurná iya wá, kataukátá ba hákuma-aha na ni an námpire jipu na. Amá wá, yá marakuránmára ba iya ɲanna zlabe ádaliye unɲule á duksa umele na ni jauje ge duksa baɗemme na.

## 13

### *Shá wayavire jauje ge duksa baɗemme*

<sup>1</sup> Ma yá an hákuma á ndaha elva an we á emnde na tá am duniya na baɗemme, antara ba elva á malika-aha keni, máki baaka tsawe ba wáyáviire am iya wá, nara-aaruwa á gev ba dey. Baira yá gev ba seke hula á ganɲa, an nalgaita na baaka sera-aara ɗekideki, á waterwa am hyema ge emnde na.

<sup>2</sup> Una ma Dadaamiya a vite hákuma á nabiyyire keni, ma diyandiya duksa baɗemme, ma ya shaa hákuma á dise nasherire-aha baɗemme, ma ya shaa fetarfire na yá naba tsantetse wa an ɲane keni, má ɓaaka wáyáva am iya wá, hyanevka ba názara keni.

<sup>3</sup> Zlaɓe ádaliye, ma ya tegaterse nalmane-aaruwa baɗemme ge talágá-aha, ma ya yaa shifa-aaruwa baɗemme geni a zariyuze an kára aɗaba fetarfire keni, má yirye mága wáyávire wá, una-aha ɲanna baɗemme na á magiyánka námpire ɗekiɗeki.

<sup>4</sup> Wáyávire wá, á vante farvaunɗe ge ura; wáyávire, á vante maggwire ge ura. Sleyayava á feka ice am duksa á ura; wáyávire á feka ura am kurávire, á feka ura am gálá ire keni.

<sup>5</sup> Wáyávire á maɲka ɓaakire á zherwe. Ura aɲkwa wáyáva-aara wá, á magaterteka emtaɲkire ge emnde, á iceka ervaunɗe watsewatse, á maɲka dugune áte ura.

<sup>6</sup> Ura an wáyáva, á higarka ge mandzawire, amá á higa arge jirire.

<sup>7</sup> Wáyávire, á faná ervaunɗe ge duksa baɗemme. Wáyávire á vante fetarfire á jirire ge ura, á vante tama ge ura; ura aɲkwa wayava-aara á ɲanaaɲa ervaunɗe-aara am duksa baɗemme.

<sup>8</sup> Wáyávire wá, dem ba ge ɗekiɗeki á njá ba kela-aara. Amá tara hákuma á mága nabiyyire, antara hákuma á ndaha elva na ni ba edda-aara keni á cenánka na, ira hákuma á dise ndáhá elva shagera na, baɗemme watse á zlauzle.

<sup>9</sup> Aɗaba kina wá, ma diya á miya, ma nabiyyire á miya keni, baɗemme zlaɓe mí maga ba kyalma-aha-aara.

<sup>10</sup> Amá má de samsa una hyebhye baɗemme na, daaci una kyalma kyalma na baɗemme watse á zlauzle.

<sup>11</sup> Am sarte na zlaɓe ndza ya ba seke egdzere wá, ma yá ndáhá elva, ma yá dzámá duksa, ma fa hyema-aaruwa áte duksa keni, ndza ya magán ba seke egdzere ɲanna. Amá am sarte na ganevge ura wá, yanánya hala á egdzarire mázla-aara.

<sup>12</sup> Am kinire na wá, ma uwe keni zlaɓe mí zhára ba kyalma-aha-aara ba seke má tá zhára duksa am kweteram na á zhareka shagera na. Amá vacite umele wá, watse mí de nanna duksa ɲanna ba tseɗaɲɲe átuwa á ice á miya. Kina wá, ma uwe keni ya dise ba kyalma-aara, amá vacite ɲanna wá, yá de diyeddiye baɗemme, ba seke una a diyisaa Dadaamiya na.

<sup>13</sup> Amá aɲkwa duksa-aha keye wá, ɓaaka zle-aatare ɗekiɗeki: Ba fetarfire, táma, ira wáyávire. Amá yaikke-aatare wá, ba wáyávire.

## 14

### *Hákuma á mága nabiyyire an hakuma á ndáha elva áɲwaslire*

<sup>1</sup> Wavauwáva ba shagera geni kwá gevge emnde a wáyáva, kataukatá hákuma-aha na á vatertaa Sheɗekwe á Dadaamiya ge emnde na keni. Kwakya-aara wá, kataukatá ba hákuma á mága nabiyyire.

<sup>2</sup> Má ura á ndáhá elva áɲwaslire na ni ba ɲane keni á cenánka na wá, á baterán ge emndimagwaha ka, á banán ba ge Dadaamiya an ire-aara, aɗaba ba Dadaamiya palle una á cenáncena. Aɗaba edda una ɲanna keni á ndaha ba nasherire na ni a vantaa Dadaamiya an hákuma á Sheɗekwe Cufedɗe.

<sup>3</sup> Amá edda una ni á maga nabiyyire wá, ɲane á baterán ba ge emndimagwaha geni á magaterá námpire, á faterem ndzedá am vuwa, ira á ekhyaterá ervaunɗe zlaɓe ádaliye.



<sup>4</sup> Daaci edda una an hákuma á ndáhá elva áŋwaslire na ni ba ɲane keni á cenánka na wá, ɲane á vante ndzedá ba ge ire-aara palle am fetarfire-aara. Amá edda una ni á maga nabiyire wá, ɲane á faterem ndzedá am vuwa ge emnde á Dadaamiya bademme am fetarfire-aatare.

<sup>5</sup> Ate iya wá, ma bademme á kure shakuránsha hákuma á ndáha elva na ni ba kure ɲanna keni kwá cenánka na keni ba shagera. Amá una yá kataná ya kwakya-aara wá, ma ware á kure keni á shánsha hákuma á mága slera á nabiyire. Adaba átire ba nabiyire, arge edda una á tsáká elva áŋwaslire na ni ba ɲane ɲanna keni á cenánka na. Sey máki jesarje edda una á pálá elva ɲanna, lauktu á maganá námpire ge aiklaisiya keni.

<sup>6</sup> Egdzar mama-aha-aaruwa, kina má danemda á dezekure, daaci yá de tsakakurse elva-aha, amá cenakuránka dekideki, ázara námpire-aaruwa ge kure? Shagera-aara wá, yá tsakakurse názu ndza a binaa Dadaamiya, bi yá vakurte diya-aha umele am elva á Dadaamiya, bi yá bakurá sera á elva á nabiyire-aaruwa, bi yá kwarakurse elva á Dadaamiya an elva na kwá cenáncena. Má baaka una ɲanna wá, daaci námpire-aaruwa ge kure keni ba baaka.

<sup>7</sup> Kina ba seke kazlaɲa á gá gwesa, seke tara nalgaita, an gadzavera, diyamidiya tsa geni tá ndaaka elva. Amá má edda á fertá nalgaita ɲanna á ferteka an unɲule-aara, má edda gadzavera keni á jeka an unɲule-aara, má tá weshusha ba dey, á cenáná ware sera-aara, antara emtakire á gwesa?

<sup>8</sup> Ge dáhá emnde á dem wáva keni ba estuwa. Má edda á fertá derkwákwá fertaaka náza wáva ba shagera á dem hyema á emnde, ware edda una á de ɲgwádfáva ge dem wáva ba dekideki keni?

<sup>9</sup> Ba duksa palle ge kure keni, má kwá ndáhá elva áŋwaslire na ni ba kure ɲanna keni kwá cenánka na, tá de cenákurá estara kena emnde? Daaci elva á kure kwá ndahaná á dem kaamba ba dey.

<sup>10</sup> Ankwa elva-aha gergere kwakya am duniya, amá bademme á elva-aha, emnde a ndáhá-aara tá cenáncena maana-aha-aara bademme.

<sup>11</sup> Amá má gevge ni ura á biya elva, amá yá cenánka elva-aara dekideki wá, edda-aara gevge ba seke wayve ázerwa, iya keni ya ba seke wayve ázerara.

<sup>12</sup> Daaci ba seke una ni wayakurwáyá jipu an hákuma-aha na ni á vatertá Shedekwe Cudedde ge emnde á Dadaamiya na wá, kwakya-aara kataukátá ba hákuma á mága duksa na ni watse á de melaterumele ge emnde á Dadaamiya am fetarfire-aatare na.

<sup>13</sup> Adaba una ɲanna, edda una an hákuma á ndáhá elva áŋwaslire na ni ba ɲane ɲanna keni á cenánka na wá, sey á ɲala Dadaamiya zlaɲe ádaliye geni á vante hákuma á eppálá-aara keni.

<sup>14</sup> Má yá ankwa maga maduwa an elva áŋwaslire na ni ba iya keni yá cenánka na, am ervaunɲe-aaruwa yá maga ba maduwa á jirire, amá am enkale-aaruwa, baaka duksa dekideki.

<sup>15</sup> Ay yá maganá estara? Sey yá ɲala hákuma á eppálá-aara keni áza Dadaamiya. Estuwa, yá maga maduwa an elva na tá cenáncená emnde na, yá emmága an elva á ekse-aaruwa keni. Ba estuwa ge belá láhe keni, yá beláná an elva na tá cenáncená emnde na, yá ebbela an elva á ekse-aaruwa keni.

<sup>16</sup> Má baaka una, edda una ɲane zlaɲe ba seke wayve na keni, má diyaaka sera á názu ká tsakaná ka am slafawe á ɲa á deza Dadaamiya, adaba elva ɲanna á cenánka ɲane á de ɲuta estara kena \*Aamin?

<sup>17</sup> Ekka wá, ma ká ankwa slafaná we á ɲa á ba an unɲule-aara ge Dadaamiya keni, á melanuka dekideki ge edda una á cenánka na.

<sup>18</sup> Yá anƙwa slafaná we-aaruwa jipu ge Dadaamiya, adaba janakuruuƙe ge kure bademme an ndaha elva anwaslire na ni ba iya keni diyanka na.

<sup>19</sup> Amá má am jáháva á emnde a fetarfe wá, ya hayaa ba ndaase elva buwa, bi keye na tá cenánƙena emnde na, geni yá kwaraterse duksa an nane, arge elva-aha na tá cenánƙa na. Ma ya ndaase elva debu keni á hyefka ba názara keni.

<sup>20</sup> Egdzar mama-aha-aaruwa, gawevka ba seke egdzara mesheshe an enƙale. Má áte elva a haypa wá, gawevge ba seke egdzara mesheshe na zlaƙe ta dzegwánƙa mága haypa na. Amá an enƙale wá, gawevge ba seke zala na hyairefhye na.

<sup>21</sup> Anƙwa puwartepuwa am wakita á Dadaamiya, a ba nane: Yá de bateránba elva-aaruwa ge emnde-aaruwa an elva na tá cenánƙa itare na; watse yá bela wayve-aha, tá de bateraa elva-aaruwa an elva na diyarka itare defikideki na, aley tá de fisaareka á bina.

<sup>22</sup> Daaci estuwa, bateraa elva na tá cenánƙa emnde defikideki na ge emnde, una nanna gevge nalaama ge emnde na kwalarevkwále ge fetaare áte Yaisu \*Almasiihu na, geni itare garevka emnde á Dadaamiya, una ge emnde a fetarfe ka. Amá hákuma á mága nabiyyire wá, una keni nalaama ge emnde na fartarfe na, geni Dadaamiya anƙwa antara itare, una ta baaka emnde u mele amkwa.

<sup>23</sup> Máki seke jarammeje emnde á Dadaamiya am tate palle, daaci itare bademme farantauƙe ge tsaka elva-aha na ni diyarka defikideki, má daremda emnde na zlaƙe gyairebka am fetarfire, antara emnde na zlaƙe fartaareka defikideki na, tá bánƙa emnde na tá an shaitaine emtu?

<sup>24</sup> Amá má am jáháva-aatare ni, bademme tá maga ba nabiyyire, tá bálá waazu na ta cenanaa itare áza Dadaamiya am dáƙave-aatare an elva a ekse-aatare wá, una ma ta demaa ba emnde na zlaƙe gyarebka am fetarfire, an emnde na zlaƙe fartaareka defikideki na keni, ba vacite nanna itare keni tá diyeddiye haypa-aatare adaba názu ta cenanaa an hyema-aatare am jáháva nanna, tá diyeddiye am ervaunƙe-aatare geni nájateraƙa shairiya á Dadaamiya.

<sup>25</sup> Daaci nasherire na am ervaunƙe-aatare bademme á semsa á sem enƙale-aatare, tá demda am sera á Dadaamiya, tá de ganaaga ire-aatare á dem áhá, tá de bánba ganakini ba jirire anƙwa Dadaamiya antara emnde na.

### *Duksa bademme magaumága á ba an enƙale an unjule-aara*

<sup>26</sup> Daaci yá bakurá uwe kina egdzar mama-aha-aaruwa? Názu yá bakurná iya wá: Ma kwa jamme vaatara ge cena elva á Dadaamiya keni, edda una má anƙwa láhe ázeƙara na ba á belá láhe. Iyau, edda una ni anƙwa elva á Dadaamiya ázeƙara ge kwaraterkwára ge emnde na, ba á emmága. Ba estuwa ge edda una an názu ndza a maransaa Dadaamiya am wahayu keni. Adaliye: Edda una an hákuma á ndáhá elva anwaslire na ni ba nane keni á cenánƙa na, nane keni ba á ebbálá, lauktu á dabaná edda una an hákuma á pálá elva anwaslire nanna. Bademme á názu kwá de maganá kure wá, magaumága á ba áte una ni watse á de melaterumele ge emnde á Dadaamiya am fetarfire-aatare na.

<sup>27</sup> Náza á emnde a ndáhá elva-aha na á cenánƙa ura na wá, sey tá ndahaná ba emnde buwa, kwakya-aara a jauka am emnde keye. Zlaƙe adaliye keni, sey tá ndahaná an palpale, á máslá sey á jesarje edda una ni an hákuma á pálá elva-aha-aatare nanna ge eptsepta-aara.

<sup>28</sup> Má gevge ni jesarka edda una an hákuma á palatera elva-aha ñanna ge emnde wá, a kabalarka vuwa-aatare á katafke á jáháva, amá a ndarndáhá á ba am ervaunđe-aatare antara Dadaamiya.

<sup>29</sup> Ba duksa palle ge emnde na tá an hákuma á mága nabiyire keni. Itare keni sey tá ndahaná ba emnde buwa, bi keye, emnde umele tá cenaná á ba an hyema, daaci tá lanaale tara elva ñanna jirire, an fida keni.

<sup>30</sup> Má gevge ni á ba am sarte ñanna, Dadaamiya a naba maranse duksa ge ura umele am dágave-aatare wá, daaci edda una an elva áte we na, sey ba á farvaunđe emtsaafé, á ndasendaha edda una a shaa nabiyire na.

<sup>31</sup> Ábi bademme á kure, ma ware keni kwá de ndasendáhe nabiyire á kure? Amá ndaundaha á ba an palpale, geni kwá cenevaacena duksa am huđe-aara, lauktu kwá de shá ndzedá an ñane am fetarfire á kure.

<sup>32</sup> Emnde na Shedekwe Cufedde a vaterte hákuma á mága nabiyire wá, tá naba kwarukwáre ervaunđe-aatare keni, ma tá kátá dufe keni tá naba dufe.

<sup>33</sup> Ya ndanaa afaba uwe una, afaba Dadaamiya wayaaka wesha elva am dágave á miya, ñane a wayamiyante ba hairire.

Ba seke una ni am aiklaisiya-aha á Dadaamiya bademme, ma áme keni

<sup>34</sup> ñwasha a daranufe ge we-aatare ba tseriye am jáháva á emnde a fetarfe na wá, daaci ñwasha-aha á kure keni a d'abardába á ba áte una ñanna. An piya ge ñwasha, geni tá ndaha elva am jáháva. Sey ñwasha tá ganaaga ire-aatare ba seke una a ndahesa wakita á Dadaamiya na.

<sup>35</sup> Má ankwá názu cenaránka tá kátá enndáva keni maa, a de ndavarndáva áza zála-aha-aatare am mbá. Afaba zherwe geni mukse á ndáhá elva am jáháva á aiklaisiya.

<sup>36</sup> Emtu kwa kurken elva á Dadaamiya ñanna a fantau ázekure zuññwe emtu? Emtu kwa kurken ba kure palle una kwa emnde a cena elva á Dadaamiya ñanna emtu?

<sup>37</sup> Má edda-aara á slaslán ba seke ñane wá, ankwá hákuma á nabiyire ázeñara, ñane shánsha hákuma áza Shedekwe Cufedde wá, sey á diyeddiye edda-aara geni názu yá bakurná iya na keni, a banjerna ba Yaakadada.

<sup>38</sup> Má edda-aara cenaaka, ma ware keni a cenaranvaareka ge edda-aara áte jirire.

<sup>39</sup> Daaci egdzar mama-aha-aaruwa, názu yá bakurná iya kina wá, yá bakurá ba kataukátá mága nabiyire, kataukátá an ervaunđe á kure palle. Amá emnde na tá an hákuma á ndáha elva-aha na tá cenánka emnde, ba itare keni tá cenánka na keni, piyawaterteka, a naba ndarndáha.

<sup>40</sup> Amá, duksa bademme, magaumága á ba an enkale, magaumága an unñule-aara.

## 15

### *Elva a tse á Yaisu \*Almasihu am faya*

<sup>1</sup> Egdzar mama-aha-aaruwa, kina wá, yá kátá yekuranteyeha labáre á higa, elva á Yaisu \*Almasihu na ndza ya balakurse iya na. Kure keni ndza lyakurvaalya, ñakurnaana an ervaunđe á kure palle.

<sup>2</sup> Ba seke una ndza ya ndakurndáhá ñanna wá, á de lyakurá ba elva ñanna má kezlakuranveka fetarfire á kure. Amá máki magakurka áte una ñanna wá, fetarfire á kure na á de gev ba dey.

<sup>3</sup> Emtsaade wá, náwa iya, názu ndza ya cenaana iya, ya bakuránba bademme, geni \*Almasiihu yanya shifa-aara, a lyamivaare haypa ge miya ba seke una ta puwete am wakita á Dadaamiya werre na.

<sup>4</sup> Ta hedehe emtsa-aara, amá am hare ge keyire a naba tsetehe am faya ba seke una a ndahanaa wakita á Dadaamiya na.

<sup>5</sup> Am iga a tse-aara am faya nanna maa, a de marese ire-aara áza Piyer, lauktu a de maraterse ire antara pukura-aha umele ta kelaawa ju buwa.

<sup>6</sup> Am iga a una nanna, a maraterse ire-aara ge emnde-aara tá tsaaka an emnde deremke ilyebe una ta naanaa átirpalle, baira emnde umele-aatare kwakya zlafe tá á ba an shifa-aatare, ma emnde umele zlauzle hairire-aatare keni.

<sup>7</sup> Am iga a una nanna zlafe ádaliye a marese ire-aara áza Yakuba, lauktu a maraterse ire-aara tá antara emnde a bela-aara umele bademme.

<sup>8</sup> Am iga-aatare bademme, a marise ire-aara ge iya keni. Iya vacite nanna, ndza ya ba seke egdze na ta yese áŋwaslire, amá zlafe hyafka sarte-aara na.

<sup>9</sup> Iya wá, ya cekwa ba iya am dágave á emnde a bela á \*Almasiihu. Baira ba ganakini tá dahiya an slebela nanna keni, hyanevka ya d'ekideki, adaba ndza ya shateru zladá kwakya ge emnde a d'aba Almasiihu.

<sup>10</sup> Amá Dadaamiya, am maggwire-aara, a naba magiya ngurna wá, kwaye nane ganevge ura estuwa vatena. Ngurna na a maginaa nane na gavka dey, baira janateruje ge emnde a bela umele bademme an mága slera-aara. Ate jirire wá, una ndzedá-aaruka, a maginaa ba Dadaamiya ngurna ge emmága-aara.

<sup>11</sup> Daaci labáre á higa, elva a Yaisu Almasiihu na, ma ya ndakursaa iya, ma ta ndakursaa emnde a bela umele keni, baaka gergerire-aara, nã balakurá ba duksa palle na kwa fetaara kure am ervaunde á kure na.

### *Elva a tse á emnde am faya*

<sup>12</sup> Náwa yá ankwá balaná am waazu-aaruwa, ganakini Yaisu \*Almasiihu wá, tsetse am faya. Ay a sawa estara zlafe ni, tá bántsa emnde umele am dágave á kure: tá taa tseteka emnde a faya, geni tá gev an shifa adaliye na?

<sup>13</sup> Ma andze jirire geni tá taa tseteka emnde a faya wá, daaci amaana Almasiihu keni ba tseteka am faya.

<sup>14</sup> Ay degiya, ma andze ba jirire geni tseteka Almasiihu am faya wá, daaci waazu á nere na keni ma andze nã maganá á dem kaamba ba dey. Fetarfire á kure áte Yaisu Almasiihu na keni ma andze ba dey.

<sup>15</sup> Ma andze estuwa wá, nere keni ma andze nã emnde a mága fida áte Dadaamiya. Adaba nã bántsa nere: Dadaamiya tsantetse Yaisu Almasiihu am faya. Daaci ma andze baaka tse á emnde am faya wá, Dadaamiya ndza tsanteka nane Yaisu Almasiihu keni am faya.

<sup>16</sup> Ma andze jirire geni tá de tseteka emnde na zlauzle hairire-aatare na am faya wá, Dadaamiya ndza tsanteka nane Almasiihu keni am faya d'ekideki.

<sup>17</sup> Ay ma andze ni tsateka Almasiihu am faya wá, fetarfire á kure áte nane na keni ma andze á de gev ba dey, sem ba kina keni ma zlafe ba nã á kure am haypa-aha á kure.

<sup>18</sup> Zlafe ádaliye: Emnde na ndza ta matsa am zhera á Yaisu Almasiihu na keni, ma ba baaka elva-aatare, ma ba kefarekedá ba d'ekideki.

<sup>19</sup> Má fetarfire á miya na ni ba ge melamiyumele am duniya na zlauzle wá, una wá, emnde bademme ma andze tá zamivaare ba ge miya kwakya-aara.

<sup>20</sup> Amá una ba jirire geni Almasiihu tsetetse am faya, ñane slezuññwe á emnde a faya ge tseta am faya, gev an shifa.

<sup>21</sup> Amaana: ba seke una ndza a sanaa ba urimagwe emtsa á sem duniya na wá, ge tseta am faya keni á fantuwa ba ura zlaɓe ádaliye.

<sup>22</sup> Ba seke una ni egdzara á Naadama tá emtsa ba seke ñane na wá, emnde na tá anƙwa ɗaba Yaisu Almasiihu na keni baɗemme tá de tsetse am faya ba seke ñane.

<sup>23</sup> Amá tseta am faya ñanna wá, ma ura-ara keni á ba an sarte-aara. Almasiihu wá, ñane slezuññwe. Adaliye tá de tsa emnde na ta fetaare áte ñane vacite na má de eptsaptsa ñane.

<sup>24</sup> Am iga a una ñanna maa, Yaisu Almasiihu á de keɗateraakeda jini-aha, antara male-aha-aatare baɗemme, ira emnde na tá an hákuma am duniya na keni baɗemme, lauktu á de yaná sleksire ge Edeɗara Dadaamiya zlaɓe ádaliye. Zlakta á duniya watse á ba áte una ñanna mázla-aara.

<sup>25</sup> Adába sey Almasiihu á njá an hákuma emtsaɗe, dem sarte na ni má Dadaamiya gatervege kelaade-aha-aara tate á puwa sera-aara.

<sup>26</sup> Kelaade na ni watse á de jáná Dadaamiya am iga a kelaade-aha umele baɗemme na wá, ñane emtsa na á ceba emnde na.

<sup>27</sup> A ba wakita á Dadaamiya wá: Dadaamiya a ganve duksa baɗemme á dem sera á Egdza-aara. Ma a ndaase estuwa Dadaamiya am wakita-aara keni, una á bánka ganakini edda a jema duksa á dem sera á Egdza-aara na keni anƙwa am duksa-aha ñanna.

<sup>28</sup> Má duksa baɗemme demda am sera á Egdza-aara maa, daaci ñane ire-aara keni á de dáná á dem sera á Edeɗara na ndza a vante hákuma na. Estuwa, duksa baɗemme á de kwaraná ba Dadaamiya.

<sup>29</sup> Anƙwa elva umele wá, slaslauminaaslasle elva ñanna ba shagera: tá anƙwa emnde umele tá liyaterá baptisma ge emnde na emtsaremtsa na. Ma andze ba jirire geni ɓaaka tse á emnde am faya wá, tá lyaterva ge uwe baptisma á emnde ñanna mázla-aara? Ay má estuwa wá, názu tá maganá itare na watse ba dey kwaye kele?

<sup>30</sup> Ba ñere ire á ñere keni, labára ña naba eksarhe zlaɗa áte ire á ñere estuwa, náwa ba kelaazare njá njá á ba an emtsa am slerpa na?

<sup>31</sup> Egdzar mama-aha-aaruwa, iya wá, ba kelaa wera á ekse, njá-aaruwa ge iya wá, ba watse yá vatevaahe an shifa, ba watse yá haretéhárehe an shifa. Una yá ndakur ba jirire duksa ñanna ba estuwa. A geɗitaa ba njá á kure kina gakurevge emnde á Yaakadada á miya Yaisu \*Almasiihu na.

<sup>32</sup> Wáva yaikke na yá anƙwa maganá iya am Aifaisus áhuna, ba seke yá anƙwa slakala an dabba-aha á kaamba na ni, ma andze ɓaaka tse á emnde am faya una, watse yá de shá uwe kena am wáva-aaruwa ñanna? Una ma andze estuwa wá, ma andze jire á naraje na a ba ñane: zaumiyuze, shaumiyushe ba vatena, aɗaba mákuralla názá á mika na.

<sup>33</sup> Degiya keɗawanaaka ire á kure ba dey, aɗaba mbapse an ura nguɗi wá, á badza enƙale á ura shagera.

<sup>34</sup> Magauka jeba á ɓaakire á enƙale ñanna! Magauka haypa degiya! Ya ndanaa aɗaba uwe una: Aɗaba tá anƙwa emnde na zlaɓe diyarka Dadaamiya na am kure. Yá bakurá una geni ma andze á wakursewe ba zherwe.

### *Elva a vuwa á emnde má tsaretse am faya*

<sup>35</sup> Ámbane anƙwa ura á enndáva geni watse tá tse estara emnde am faya, bi watse á de gevá estara vuwa-aatare?



<sup>36</sup> Ekka edda una ká ndava jeba á ndáva ñanna wá, yá baká ba ka uce! Diyanka wulfe á duksa emtu? Má ka nanna sesse duksa na ndza ka jemaa am haha wá, ba diyakdiya ganakini una ndza ka janaa ka na lebaaleba.

<sup>37</sup> Wulfe na ká de janá ka á dem haha na keni, una ma hiya, ma wulfe á uwe keni, ekka ká de ja ba ice á duksa ñanna á dem haha, ká de ja duksa ñanna surumme an waleka.

<sup>38</sup> Daaci á de maganá ba Dadaamiya slera-aara, ma ge wulfe á uwe keni á vante nderáva-aara ba gergere antara nderáva á wulfe-aha umele, áte una a katanaa ñane.

<sup>39</sup> Zhera ba názu an shifa am vuwa, hyuwa-aha-aatare gergere bademme. Hyuwa á vuwa á urimagwe keni ba giraara, hyuwa á dabba keni ba giraara, hyuwa á yiye keni ba giraara, náza á kelfe keni ba giraara.

<sup>40</sup> Ankwa kazlaja áte samaya, áte haha keni ankwa duksa-aha, amá wulwulire á názu áte samaya keni ba giraara, zariyire á názu áte haha keni ba giraara.

<sup>41</sup> Wulwulire á vaciya, ñane ba giraara. Wulwulire á tere keni ba giraara, náza á terlyakwa keni ba giraara, ba wulwulire á terlyakwa-aha keni ba gergere bademme.

<sup>42</sup> Vaci tse á emnde am faya keni watse ba estuwa. Jeba á vuwa ñanna, watse ba giraara tsekemme. Má hederehedá ura wá, á de ba leba. Amá vuwa na á de vanta Dadaamiya ge tse an ñane á sa am faya na wá, á kedfeka mázla-aara.

<sup>43</sup> Má tá ankwa hedá ura wá, vacite ñanna, zlauzle payda á edda-aara, gevge shagerka am ice á emnde. Amá am sarte na má de tsetetse am faya wá, hákuma-aara keni á de gev umele, an zariyire keni watse ba ka hedu we.

<sup>44</sup> Zlafe adaliye: Má tá hedá ura wá, ta hedaa ba vuwa na á shekwaaka leba na, amá má á de tse edda-aara am faya wá, Dadaamiya á de vante vuwa á samayire. Má diyamidiya ganakini ankwa vuwa a nja am duniya na wá, daaci diyaumiyeddiye keni geni vuwa a de nja am samaya keni watse ankwa ba jirire.

<sup>45</sup> Adaba ankwa an puwa am wakita á Dadaamiya, a ba ñane: Dadaamiya ndza fem shifa am Naadama ura zunñwe, amá Naadama na á de sawa am iga-aara na, amaana: \*Almasiihu, ñane Shedekwe á Dadaamiya, á de vatertá ñane shifa na á zleka na ge emnde.

<sup>46</sup> Kina am zunñwire na wá, emnde tá nánka vuwa a de nja am samaya, amá tá zhára ba vuwa na á shekwaaka leba na emtsaade, lauktu watse tá de ná vuwa á samayire.

<sup>47</sup> Urimagwe zunñwe wá, Dadaamiya ndza a nderanaa an haha, ñane ura á duniya, amá ura buwire na ndza a sawa am iga-aara na wá, ñane ura á samaya.

<sup>48</sup> Daaci emnde bademme am duniya na, ta de eksa ba edda una ñane ura duniya na. Emnde na watse tá de njá am samaya keni, watse tá eksa ba ura samaya.

<sup>49</sup> Kina wá, zlafe mí ba seke edda una ñane ura duniya na emtsaade, amá vacite umele, watse mí de gev seke ura samaya.

<sup>50</sup> Egdzar mama-aha-aaruwa, náwa názu yá kátá bakurná iya: Urimagwe á taa demka á dem zlanna á Dadaamiya an vuwa na mí zharaná miya kina. Vuwa na watse á de leba na, á taa másláveka an una baaka kedá-aara d'ekideki na.

<sup>51</sup> Náwa yá anƙwa sakuranse nasherire umele: Baɗemme á miya ka una watse mí emtsa. Amá wá, baɗemme á miya watse á de eptsapteptsu vuwa-aha á miya.

<sup>52</sup> Vacitu má de fertaranteferta derma á halavuwa á duniya, ba seke ndaha á miya na, ba tara heɗanu ge ice, antara werura-aara, kertenj á eptsapteptsu vuwa-aha á miya baɗemme. Má fertaranteferta derma ɗanna wá, emnde na ndza zlauzle hairire-aatare na baɗemme tá de tsetse an vuwa na baaka leba-aara ɗekideki na. Miya emnde na zlaɓe má an shifa keni vuwa-aha á miya á de eptsapteptsu ba estuwa.

<sup>53</sup> Amaana: Vuwa á miya na náwa ɗane á se máki emtsamimetsa na wá, sey á gevge vuwa na baaka se-aara na emtsaade, lauktu á de njá náza ba ge ɗekideki.

<sup>54</sup> Daaci vuwa á miya na má emtsamtsa ura á sepse na wá, má eptsapteptsu estuwa wá, názu ndza ta puwete am wakita á Dadaamiya na gevge mázla-aara. Adaba a bántsa wakita á Dadaamiya: Garega midalire arge emtsa, keɗaranaakeda ba ɗekideki.

<sup>55</sup> A ba ɗane zlaɓe áɗaliye:

Ekka emtsa, áma upa á ɗa na ká ceɓa emnde an ɗane na? Áma ndzedá á ɗa kina? Zlauzle kwa hákuma á ɗa vatena.

<sup>56</sup> Amá kina wá, haypa-aha á emnde anƙwa ɗuɗanse huɗe ba ge emtsa emtsaade, lauktu á de ceɓaná ɗane emnde. Haypa keni á ɗuɗansa ba \*tawraitu huɗe, lauktu ɗane á de magaterá emtanƙire ge emnde na.

<sup>57</sup> Amá bawamiyánba ususe ge Dadaamiya, adaba midalire na a vamitaa ɗane arge emtsa keni na. A vamite áte erva an Yaakadada Yaisu \*Almasihu.

<sup>58</sup> Daaci adaba ba una ɗanna egɗzar mama-aha-aaruwa, kwa emnde-aaruwa keni ba kure, ma vaatara keni njawinja ba dzaɗɗaɗe, tsawaatse ba shagera, dzalauka ɗekideki, yawánka maganaa slera ge Yaakadada an ervaunɗe á kure palle. Diyakurdiya, slera na kwá anƙwa maganá kure ge Yaakadada na wá, slera á nampire ba ɗane.

## 16

### *Elva a jáhá sadake ge melateru ge aiklaisiya-aha am Urusaliima*

<sup>1</sup> Kina wá, yá anƙwa kwarakurse elva a jáhá sadake ge melateru ge emnde á Dadaamiya am Urusaliima. Ekkure keni magaumaága á ba áte una ndza ya kwaraterse ge aiklaisiya-aha am Galatiya na.

<sup>2</sup> Elva ɗanna wá, amaana ba kelaa má samsa vaci laade wá, ma ware á kure keni sey á sansese shunɗu áte názena ndza a shanaa ɗane, daaci á fá una ɗanna an ire-aara, watse á melateru ge emnde á Dadaamiya an ɗane. Magaumaága una ɗanna, ufauka sey sarte á duwa-aaruwa emtsaade á dezekure.

<sup>3</sup> Má danemda ya á dezekure wá, kwá de dzeratersá ba kure emnde a dá sadake á kure ɗanna á dem Urusaliima. Daaci iya maa, yá de vaterte nalmesheri am erva ge emnde a dánda-aara.

<sup>4</sup> Máki mi nanna zláála wa á elva ɗanna ni, shagera yá duwa ba iya an ire-aaruwa maa, daaci tá de puwisá emnde ɗanna á dem Urusaliima ge da shula ɗanna.

### *Ngwáɗáwa á Paul ge dem slera á Dadaamiya*

<sup>5</sup> Kina wá, zlaɓe yá dem Makiduniya emtsaade, lauktu watse yá dezekure. Adaba yá de kya ba larde ɗanna, lauktu yá daada á dezekure.

<sup>6</sup> Máki danemda ádezekure wá, bi watse yá de shekwaashekwa ba cekwaanɗuɗi, bi watse yá de zlanazle sarte á lailaidɗire baɗemme ázekure. Daaci má watse hyephye sarte a zláá-aaruwa ázekure wá, kwá de meliyumele am shula-aaruwa ge dem tate na watse yá detekwa na baɗemme.

<sup>7</sup> Wayanka yá de gá ba hare cekwa na má danemda ázekure. Má wayetewáya Dadaamiya wá, yá kátá de shekwaashekwa ba shagera ázekure.

<sup>8</sup> Amá kina wá, yá kátá nja am Aifaisus áhuna emtsaafé, dem sarte á muɗri á \*Pantaikausta.

<sup>9</sup> Adaba Dadaamiya a weritaa baráma á slera yaikke áhuna, slera ɗanna keni slera á námpire zlaɓe áɗaliye. Diyandiya tsa ganakini kelaade-aha-aaruwa keni tá á ba ndaaka.

<sup>10</sup> Má dámda Timaute ádezekure, lyauvalya am dáɗave á kure, a njeka an lyawa am dáɗave á kure, adaba ɗane keni sleslera á Yaakadada ba seke iya.

<sup>11</sup> Epsawauka ɗekideki. Baira ɗeme, melawanumele ba shagera geni á maga shula-aara á ba an higa, melawanumele geni a se beribera. Náwa iya, an emnde a fetarfe na tá áhuna, baɗemme ɗá ufa ba sarte a sa-aara.

<sup>12</sup> Amá náza á egdza emmemiya Apaulaus wá, ser kwakya yá ɗalaná á ba an ɗálá, geni a darduwa antara emnde a fetarfe umele ge de tsakurartse, amá zlaɓe eksarka ire-aara emtsaafé ɗekideki. Má watse eksarekse ire-aara lauktu watse á duwa.

*Ga use á Paul antara názu am halawuwa á elva-aha*

<sup>13</sup> Ma vaatara keni puwawanaaka vuwa á kure, tsawátse ba dzanɗzane am elva á Dadaamiya, gazlauka ɗekideki, gawevge ba seke zála na gyarebgye na.

<sup>14</sup> Ma kwá maga ba uwe keni magaumaɗa á ba an wáyáwa.

<sup>15</sup> Egdzar mama-aha-aaruwa, ábi kure diyakurdiya Aitiyain antara emnde a há-aara baɗemme? Diyakurdiya geni ta emnde zunɗwe ba itare am larde á Akaya ge ɗába Yaisu \*Almasiihu? Itare ta vante ire-aatare ge máɗá slera á Dadaamiya am dáɗave á emnde-aara. Daaci egdzar mama-aha-aaruwa, názu yá kataná iya ázekure wá:

<sup>16</sup> Táslawa á kure, cenaucena názu tá bakurná jeba á emnde ɗanna, fawatersaarefe ge itare, antara ge emnde na tá aɗkwa á maga slera ɗanna antara itare na baɗemme.

<sup>17</sup> Yá higa jipu áte sawa á tara Aitiyain, antara Faurtunatus, ira Akaikus na. Adaba am sarte na saremsa ásezerwa na, a naba ekhyehe ge erwaunɗe-aaruwa wá, ba seke ya ná ba kure.

<sup>18</sup> Se ekhyarinakhya erwaunɗe ba lailaidɗe, ba seke una ndza ta ekhyakuraa ge kure na. Diyawatersediye ba shagera jeba á emnde ɗanna, geni itare ɗanna wá, hyairebhye geni kwá fá zherwe áte itare.

<sup>19</sup> Aiklaisiya-aha na tá am larde á Aziya baɗemme tá aɗkwa gakur use-aatare. Tara Akila, tá antara Piriskila, ira emnde a fetarfe na tá jáháwa am mba-aatare baɗemme, tá aɗkwa gakur use-aatare kwakya, adaba njá á kure antara itare na gakurevge ba palle am sera á Yaakadada.

<sup>20</sup> Baɗemme á emnde á Yaisu \*Almasiihu na tá áhuna, tá aɗkwa gakur use-aatare. Gawga use-aha á ɗere am dáɗave á kure baɗemme, áte wáyáwa á egdzar mama.

<sup>21</sup> Náwa una wá, yá aɗkwa puwetá ba iya an erwa-aaruwa mázla-aara: Iya Paul keni yá aɗkwa á gakur use-aaruwa.

<sup>22</sup> Má ura yanaaya Yaakadada, sey á nyainyainvenyainya Dadaamiya edda-aara. «Maranata», amaana: Yaakadada á miya, sawa!

<sup>23</sup> Yaakadada á miya Yaisu \*Almasiihu a magakurnaamaga ngurna.

<sup>24</sup> Wáyáva-aaruwa bademme, yá wayakurá an nane, ekkure emnde na gamiyevge palle am sera á Yaisu Almasiihu na.

## **Buwire á wakita na a puwatertaa Paul ge emnde a KAURINTUS**

### *Ga use á Paul*

<sup>1</sup> Náwa wakita na yá anƙwa á puwetá ba iya Paul, a eksisaa ba Dadaamiya áte namaari-aara, a give sɛbela á Yaisu \*Almasiihu. Njá anƙwa puwaná antara egdza emmemiya Timaute. Njá anƙwa á puwakurte ge kure emnde a fetarfe am Kaurintus, antara emnde a fetarfe na tá am kwárá á Akaya bademme.

<sup>2</sup> A magarakuránmaga tara Eddemiya Dadaamiya, tá antara Yaakadada Yaisu Almasiihu ngurna, a varakurteva hairire.

### *Dadaamiya á ekhyaná ervaunƙe ge ura kwakya am sarte á zlaɗa*

<sup>3</sup> Ususe ge Dadaamiya, Edeɗara ge Yaakadada Yaisu \*Almasiihu. Dadaamiya wá, slemággwe áte emnde, sle-ekhyamiyá ervaunƙe ma vaatara keni.

<sup>4</sup> Njane anƙwa á ekhyamiyá ervaunƙe am zlaɗa-aha á miya bademme. Á magamiyá una njanna, geni miya keni mi ekhyaternaakhya ervaunƙe ge emnde umele, áte una a ekhyaminaa njane ge miya.

<sup>5</sup> Almasiihu wá, ndza shushe zlaɗa kwakya. Njere keni njá anƙwa á shá zlaɗa kina ba seke una ndza a shanaa njane. Daaci Dadaamiya keni anƙwa á ekhyamiyá ervaunƙe ba kwakya, aɗaba gamiyevge palle antara Yaisu Almasiihu.

<sup>6</sup> Ma njere njá anƙwa á shá zlaɗa keni, ba geni kure kwá shánsha ndzedá, a lyakurselye Dadaamiya ma vaatara keni. Zlaɓe adaliye, máki Dadaamiya anƙwa á ekhyanerá ervaunƙe ge njere, ba geni a balaseɓale ervaunƙe á kure, kwá gevge emnde a farvaunƙe ge ɓásha jeba á zlaɗa-aha njanna.

<sup>7</sup> Baaka shaige á njere ɗekideki áte kure, diyanerdiya ganakini baaka mbedá á kure áte barama á Dadaamiya. Nja disaa aɗaba kwa palle antara njere am zlaɗa-aha. Daaci ma ba palle am ndzedá na á vamiɗá Dadaamiya keni.

<sup>8</sup> Daaci egdzar mama-aha-aaruwa, názena ni njá kataná njere wá, njá kátá kwá diyeddiye zlaɗa yaikke na njá shuwaa njere am kwárá á Aziya na. Shaɗerushe zlaɗa an tsáká ire. Ndza tamanerka ɗekideki ganakini watse njá njá an shifa.

<sup>9</sup> Una njá enndaha ba parakke, á ba áte vuwa á njere keni ndza njá tapántápa ganakini watse njá njeka an shifa na. Mbate wá, Dadaamiya a magaa una njanna, ganakini a fanertarka áte ndzedá á njere, amá njá fetarfe á ba áte njane. Aɗaba njane wá, ma emtsaremtsa emnde keni, sletsatertetse ba njane am fáya.

<sup>10</sup> Daaci a lyanersaa ba njane am zlaɗa yaikke njanna á kátá eksá shifa á njere na. De katafke keni á de lyanerá ba njane. Una ba jirire njá fá táma á njere á ba áte njane palle, diyanerdiya geni ma vaatara keni á de lyanerá ba njane.

<sup>11</sup> Amá keni wá, naba melawanerumele an maduwa-aha á kure. Estuwa, emnde kwákya tá de melanerumele an maduwa-aha-aatare. Máki lyevaalya Dadaamiya njála á miya, shamiyánsha barka-aara wá, watse emnde kwákya zlaɓe ádaliye tá de gálá njane aɗaba njere.



*Pekyaapekya Paul ge de Kaurintus*

<sup>12</sup> Náwa una dalila á higa á ñere: Ñere wá, diyañerdiya am ire á ñere ganakini shagera zlááva á ñere, baaka duksa mándzawe áte ñere ðekideki, baaka ðeme seke am dá gave á kure. A vanertaa ba Dadaamiya una ñanna, enkale á emndimagwahaka ðekideki, ba Dadaamiya una a magañeraa ngurna-aara.

<sup>13-14</sup> Daaci am duksa na ñá ankwá puwakurtá ñere baðemme na wá, ñá ankwá ndaakurnda ba parakke áte una kwá dzegwándzegwa eccena-aara na. Aley, sem ba kina keni zlábe kwá cenevaaka elva á ñere shagera. Yá tamaa ákatafke cekwaanḡuḡi wá, watse kwá diyeddiye baðemme geni vaci sawa á Yaakadada Yaisu \*Almasiihu wá, erwaunḡe á kure watse ba seke nama áte ñere, náza á ñere keni watse ba seke nama áte kure.

<sup>15-16</sup> Aḡaba iya wá, ndza baaka shaige-aaruwa ðekideki áte duksa-aha ñanna. Ndza ya kátá ba dezekure emtsaḡe, lauktu ma yá dem Makiduniya. Am tse-aaruwa am Makiduniya keni maa, ma yá eptsa á ba ásezekure ádaliye, ma andze kwá se meliwa ba kure ge mága shula-aaruwa á dem Yahudiya. Estuwa, ma andze yá naba melakurumele ser buwa.

<sup>17</sup> Am sarte na fanakuremfa una ñanna am vuwa, amá maganka na wá, ya ndaaná á ba áte we emtu? Estuweka ðekideki. Emtu am sarte na yá ankwá maga niya-aaruwa, ya magán ba seke náza á emnde a duniya emtu? Ya ndaase «ane» á ba áte we emtu?

<sup>18</sup> Yá ndaakur ba jirire, á katafke á Dadaamiya na á eptseka elva-aara ðekideki na: Ndaanakurka á ba áte we, amá ya ndaana á ba an erwaunḡe-aaruwa palle.

<sup>19</sup> Aḡaba Yaisu \*Almasiihu \*Egdza á Dadaamiya na ña balakuraa elva-aara antara tara Silas an Timaute na wá, ñane á ndaaka elva á ba áte we, ma vaatara keni á ndaa ba jirire.

<sup>20</sup> Baaka shaige-aara ðekideki, ba ñane una a njamiyante názena ni a baa Dadaamiya á de vamiteva na. Ba ñane una \*Aamin á miya á katafke á Dadaamiya, ge gálá zhera á Dadaamiya.

<sup>21</sup> Zlábe ádaliye, a dzeramisaa ba Dadaamiya an ire-aara, ankwá á ndzedamítá ba ñane an ire-aara áte barama á Yaisu Almasiihu.

<sup>22</sup> Arge una ñanna zlábe ádaliye, a vamite Shedekwe Cufedḡe am erwaunḡe. Á maraná an una ñanna ganakini miya wá, ma emnde-aara. Á maraná á ba an una ñanna zlábe ádaliye geni duksa-aha umele na a baa watse á vamiteva na keni, watse mí shansha.

<sup>23</sup> Náwa Dadaamiya, a yiika an shifa máki ya magaa fida. Danka á dem Kaurintus na wá, ba ganakini yá ekhyakurnaakhya, a de zladanakurveka erwaunḡe kwakya.

<sup>24</sup> Tatayañerka ñere hyakuraare áte laarire ganakini sey kwá fetarfe. Aḡaba fetarfire wá, fakurtarfe zlauzle baaka arge una ñanna. Duksa na ñá kataná ñere ázekure wá, ba mága slera átirpalle, ganakini kwá tapanaatápa emtakire-aara.

## 2

<sup>1</sup> Aḡaba una ñanna, eptsanka á ba an niya á dem ekse á kure. Ya naba njante geni yá eptseka ádezekure mázla-aara, geni a de zladanakurveka erwaunḡe ádaliye.

<sup>2</sup> Aḡaba máki ya duwa wá, ba iya an ire-aaruwa keni watse emtañka erwaunḡe-aaruwa. Baaka edda una á de ekhyiyá erwaunḡe, aḡaba kure keni baðemme watse á de zláḡa erwaunḡe á kure.

<sup>3</sup> Adaba una ñanna, ya puwakurtaa ba wakita, arge una ma andze ya duwa ba iya an ire-aaruwa. Ma andze danemda wá, ma andze á de zladá ervaunđe-aaruwa kwakya áte kure. Emnde na ma andze tá de vitá itare higa keni ba kure ñanna. Diyandiya ba jirire ganakini má emtake ervaunđe-aaruwa ge iya wá, kure keni á de higa ervaunđe á kure bademme.

<sup>4</sup> Am sarte na yá anƙwa á puwakurte wakita ñanna wá, ndza yá am dzámá ire jipu, ndza an zladá ervaunđe-aaruwa ba laaklaake, antara ba yáwe á kyuwa am huđe-aara. Bawánka zlaƙe a ba kure, ya kátá ba zladakurve ervaunđe an puwa-aaruwa ñanna. Iya ya kátá kwá diyeddiye geni wayanakurwayire.

*Paul anƙwa á yanaare haypa-aara ge edda á haypa*

<sup>5</sup> Diyandiya ganakini anƙwa slezladáná ervaunđe ge ura am dagave á kure. Amá diyaweddiye ganakini á zladíyán ge iya ka palle, amá ge miya bademme. Amá keni emtaka ba jirire, ge kure bademme ka.

<sup>6</sup> Kwakya ba emnde na ta puwara elva na am kure, daaci yá tamaa hyaahya mázla-aara.

<sup>7</sup> Kina wá, shagera ba kwá yanarye haypa-aara, kwá ekhyannaakhya ervaunđe geni a demka dzámá ire yaikke am ñane, a kedanaaka táma-aara bademme.

<sup>8</sup> Adaba una ñanna, táslawa á kure marawanánmárá ba wáyáva mázla-aara.

<sup>9</sup> Dalila na ni ya puwakurte wakita ñanna wá, yá kátá diyeddiye átekwa, máki zlaƙe kwá á ba an fesarfire á kure áte ya, ge mága názena yá bakurná ya bademme.

<sup>10</sup> Daaci máki kwá anƙwa yanaare haypa-aara ge slehaypa ñanna wá, naba yawanaarye, iya keni yá naba yanaarye haypa-aara. Una hyapka ba názára keni, yá naba yanaarye á katafke á Yaisu \*Almasiihu geni a zlalavzlále njá á kure.

<sup>11</sup> Estuwa a shanka Shaitaine ndzedá arge miya. Adaba diyamidiya názena á kataná ñane bademme.

*Weshetewesha ire á Paul am Terauwas*

<sup>12</sup> Daaci ya naba tse áhuwa, kwáye ya zlálá á dem Terauwas ge de bálá labáre á higa, elva a Yaisu \*Almasiihu áhuwa. Am sarte na danemda maa, ya nána ganakini Yaakadada a weritaa baráma bademme ge bálá elva-aara áhuwa.

<sup>13</sup> Amá wá, maganka, ndza an wesha ire-aaruwa bademme, adaba de beraneka egdza emmemiya Titus. Daaci ya naba magateraa ájamimá shifa ge emnde a fetarfe na tá am Terauwas ñanna, ya naba fanuhe á dem kwárá á Makiduniya.

*Shá midalire adaba barka Yaisu \*Almasiihu*

<sup>14</sup> Amá galaumigálá Dadaamiya, adaba ndzedá na a ganaa Yaisu \*Almasiihu na anƙwa á vamite midalire ba kelaa wera á ekse. A puwamimaa ba ñane am slera-aara ge bálá elva a Yaisu Almasiihu ma áme keni bademme. Daaci waazu á miya gevge ba seke se á kajiji, hyemhye am slede bademme, geni a diyareddiye emnde Yaisu Almasiihu.

<sup>15</sup> Ba jirire ñere wá, ña ba seke se á kajiji na emtake se-aara jipu na, á dízaná Yaisu Almasiihu á katafke á Dadaamiya. Adaba ñere ña emnde a hyanme elva a Yaisu Almasiihu am duniya bademme, áza emnde na tá áte unjule a lya, antara emnde na tá áte unjule a kefa keni bademme.

<sup>16</sup> Áza emnde na tá áte unḡule a lya wá, ḡa emtake jipu, tá shá shifa am elva á ḡere. Amá áza emnde na tá áte unḡule a keda wá, ḡa emtaḡka dḡekidḡeki, elva á ḡere á tḡḡa shifa am itare ba dḡekidḡeki. Ware edda una hyephye ge mága slera ḡanna an ndzḡḡa á ire-aara? Baaka dḡekidḡeki.

<sup>17</sup> ḡere wá, a baḡḡeraa ba Dadaamiya ge mága slera ḡanna. Kwakya emnde tá tsakala an elva á Dadaamiya, amá ḡere wá, gaḡereḡka estuwa. Ná bálá ba elva á Dadaamiya an ervaunḡḡe á ḡere palle á kataḡke-aara, adaba ḡa emnde a slera á Yaisu Almasiihu.

### 3

#### *Maganaa slera ge Dadaamiya áte namána aḡwaslire*

<sup>1</sup> Emtu máki ḡa bakuraa una wá, watse kwá baḡḡerá ḡa maga kurávire ḡará emtu adaliye? ḡere wá, ḡa baaka an wedere á nalmesheri á seydire am erva ganakini kwá de diyaḡersá átekwa. Ge kure keni, ḡa ndavakuruka nalmesheri ḡanna ge dem tate umele an ḡane. Tá maganá ba emnde ḡanna ka wá, ḡere ḡa maḡka, ḡa gergere.

<sup>2</sup> Adaba ba kure una kwa nalmesheri á ḡere, an puwa áte ḡere. Ma ware keni diyaadiya una, tá dzegwándzegwa enndaḡa-aara geni ma ba estuwa antara kure am ervaunḡḡe á miya.

<sup>3</sup> Ba jirire, a puwetaa ba \*Almasiihu an ire-aara wakita ḡanna, a vaḡerte ge ḡere. Amá wakita ḡanna wá, a puwanaa an narkálam ka, a puwanaa an hákuma á Shedḡekwe Cudḡḡḡe á Dadaamiya na ma vaatara keni Dadaamiya ḡanna á ba aḡkwa na. Puwa ḡanna keni a puwetaa áte naláwa-aha á nákwá ka, a puwanaa am ervaunḡḡe á emndimagwaha.

<sup>4</sup> Na ndaanaa adaba uneka, adaba ḡere faḡertarfe an Dadaamiya am duksa bademme, adaba Yaisu Almasiihu.

<sup>5</sup> Diyaḡerdiya am ire á ḡere ganakini ba ḡere an ire á ḡere wá, á daaka ndzḡḡa á ḡere ge mága slera ḡanna, ḡa maganá an ndzḡḡa á Dadaamiya.

<sup>6</sup> A gaḡervaa ba ḡane emnde a slera-aara, geni ḡa bálá namána-aara aḡwaslire na a ḡudaterán ge emnde bademme na. Am namána aḡwaslire ḡanna wá, seke shairiya-aha-aara na ta puwete am \*tawraitá werre ka, á maganá Shedḡekwe Cudḡḡḡe mázla-aara slera. Adaba tawraitá wá, slera-aara ba ceba emnde á kataḡke á Dadaamiya, amá Shedḡekwe Cudḡḡḡe wá, á vaterte shifa ge emnde.

<sup>7</sup> Werre wá, Dadaamiya ndza a puwete shairiya-aha-aara áte nalawa-aha á nákwá, ndza naranna emnde sleksire-aara keni am sarte ḡanna. Dadaamiya a magaa sleksire-aara wá, wafke á Muusa á mbá wulwulire na baaka kalle-aara dḡekidḡeki na. Emnde a \*Iserayiila dzegwaránka zharaná á dem ice dḡekidḡeki. Parakkire ḡanna keni á de shekwaaka tsa. Máki \*tawraitá na slera-aara ba ceba emnde á kataḡke á Dadaamiya ni, Dadaamiya a marse sleksire-aara am huḡḡe-aara estuwa wá,

<sup>8</sup> sákwa máki á maganá Shedḡekwe Cudḡḡḡe slera emtu, ḡane slevaterte shifa ge emnde? Á tsaame sleksire na á de maganá Dadaamiya!

<sup>9</sup> Tawraitá wá, slera-aara ba puwa emnde á dem shairiya. Máki Dadaamiya a marse sleksire-aara estuwa am duksa na á puwa emnde á dem shairiya, sákwa am namána á Dadaamiya aḡwaslire na emnde tá shá jirire am huḡḡe-aara emtu? Á tsaame kena sleksire na aḡkwa á maraná Dadaamiya am huḡḡe-aara na!

<sup>10</sup> Daaci mí naba bánba ganakini duksa na ni ndza Dadaamiya a marse sleksire-aara am huḡḡe-aara werre na wá, sleksire á Dadaamiya werre ḡanna hyepka ba názára keni, má mí sláterá an náza vatena.

<sup>11</sup> Duksa na Dadaamiya a vaterte ge emnde ba ge sarte cekwa, kerten dedde maa, Dadaamiya marsemare sleksire-aara am huɗe-aara, sákwa am una á zleka ɗekideki na emtu? A jatermaa uwe?

<sup>12</sup> Ná anƙwa á enndáhá ba parakke na wá, aɗaba faɗertarfe an duksa ɗanna geni jirire.

<sup>13</sup> Muusa werre wá, ndza a puwem nalbuta am ice, aɗaba anƙwa á gulá sleksire á Dadaamiya áte wafke-aara, daaci wayaaka tá diyeddiye emnde-aara emnde a \*Iserayiila. Amá ɗere wá, ɗa baaka an wedere á mága una ɗanna mazla-aara.

<sup>14</sup> Iserayiila-aha werre wá, ndza cenaranka maana á duksa-aha ɗanna ɗekideki. Ba duksa palle ge egdzara-aatare vatena keni. Máki tá ndaha wakita á namána á Dadaamiya werre na, tá cenánka maana-aara ɗekideki, ba seke an faɗa enƙale-aatare an nalbuta á Muusa werre ɗanna. Aɗaba sey edda una lyevaalya \*Almasiihu, lauktu á sesse enƙale-aara am nalbuta ɗanna.

<sup>15</sup> Ba kina keni má itare tá ndáhá wakita-aha á Muusa werre wá, tá cenánka maana-aha-aara ɗekideki, ba seke an faɗa enƙale-aatare an nalbuta.

<sup>16</sup> Amá anƙwa an puwa am wakita á Dadaamiya, a ba ɗane: «Ma a semaa ware áseza Yaakadada keni, sey á sesse am nalbuta ɗanna.»

<sup>17</sup> Daaci ba estuwa. Aɗaba tara Yaakadada antara Shedekwe Cufedɗe wá, ta ba palle. Daaci am tate na ni anƙwa Shedekwe á Yaakadada wá, emnde ɗanna tá shánsha ire-aatare, á kwaraterka mázla-aara \*tawrait.

<sup>18</sup> Daaci miya kina wá, wafke á miya faɗaaka an nalbuta werre ɗanna, má anƙwa á nanna Yaakadada Yaisu Almasiihu am yaikkire-aara. Daaci ba kelaazare yaikkire á Yaakadada anƙwa á gamive ba seke ɗane. Yaikkire-aara am miya anƙwa á far ba márawa am miya ba kelaazare keni. Kwaya ɗane názena á maganá Shedekwe á Yaakadada am miya.

## 4

### *Baaka payɗa á ɗere ge ɗere amá anƙwa ndzeɗa á Dadaamiya*

<sup>1</sup> A zamivaare ba Dadaamiya lauktu a famiyar slera ɗanna. Aɗaba una ɗanna ɗa ba dzaɗdzaɗe am slera ɗanna.

<sup>2</sup> Diyamidiya miya wá, mí feka erva á miya á dem slera na tá maganá emnde an shebe, duksa á zherwe ba dey na. Mí zlermeká emnde, mí feka fida á dem elva á Dadaamiya keni. Ɗere wá, ɗa vaterte ba jirire á Dadaamiya parakke ge emnde. Názena ni anƙwa á tataya jirire á Dadaamiya wá, ɗane á diyeddiye jirire á ɗere.

<sup>3</sup> Labáre á higa na ɗa sanaa ɗere na, tá cenanka emnde umele ɗekideki, ba seke an fáɗa enƙale-aatare. Amá tá cenánka ba emnde na tá an keɗa na.

<sup>4</sup> Itare wá, anƙwa á piyaterá Shaitaine, ɗane slemándzawe na á kwára duniya na. Á piyaterte ganakini a naránka parakkire yaikke na á maraná elva a Yaisu \*Almasiihu á dete itare. Parakkire ɗanna anƙwa á mára Yaisu Almasiihu am yaikkire-aara. Máki ura a naa ɗane, a naa ba Dadaamiya.

<sup>5</sup> Ná bálá elva á ire á ɗerka, ɗa bálá elva a Yaisu Almasiihu, geni ba ɗane una Yaakadada arge emnde baɗemme. Ɗere wá, ɗa ba emnde a slera á kure ge melakurumele, aɗaba ɗa emnde a ɗába Yaisu.

<sup>6</sup> Werre am fakta wá, a baa Dadaamiya: A gevge parakkire, á mbe am tabeɗammire. Kina keni ba Dadaamiya ɗanna una á mára parakkire-aara á sem ervaunɗe-aha á ɗere. Á maraɗerá yaikkire á Dadaamiya na anƙwa á mbe áte wafke á Almasiihu.

<sup>7</sup> Njere wá, ña ba seke gahe-aha na ta nderanaa an haha, amá wá, ñá an rezegire yaikke na a vanjertaa Dadaamiya na am njere. Tá disá áte una ñanna emnde, ganakini hákuma yaikke na ña shanaa njere ge mága slera á Dadaamiya na wá, hákuma á njereka, náza á Dadaamiya.

<sup>8</sup> Tá anjwa á becañerbeca an zlaɗa-aha gergere, amá zlarañeraaka baɗemme. Ma a weshetaa estara ire á njere keni, ñá á ba an táma á njere am ervaunɗe.

<sup>9</sup> Emnde tá anjwa á shañeru zlaɗa jipu, amá yáñeraaka Dadaamiya. Tá magañerá palása am haha, amá njere ñá emtseka.

<sup>10</sup> Kelaazare emnde tá tataya ba cebá shifa á njere seke una ndza ta jaa Yaisu \*Almasiihu, amá náwa ba nja njere an shifa. Tá diyeddiye á ba áte una ñanna geni Yaisu á ba an shifa-aara.

<sup>11</sup> Njere emnde na zlaɓe ñá an shifa am duniya na wá, ba kelaazare tá tsagwaɗañertsagwaɗa ge cebañerceba, aɗaba ña emnde a ɗába Yaisu Almasiihu. Amá náwa ba njá á njere an shifa, ñá an vuwa a laakire na á shekwaaka na. Tá diyeddiye á ba áte una ñanna geni á ba an shifa-aara Yaisu.

<sup>12</sup> Amaana elva ñanna wá, áte vuwa á njere wá, anjwa á wava ba emtsa, emtsa seke náza á Yaisu. Amá am kure wá, á maga slera ba shifa añwaslire na kwa shanaa ázenjára na.

<sup>13</sup> Anjwa elva am wakita á Dadaamiya, a ba ñane: «Fantarfe áte Dadaamiya. Aɗaba una ñanna yá anjwa á ɓálá elva-aara.» Daaci ba duksa palle ge njere keni, njere keni shañeránsha fetarfire áte Dadaamiya; aɗaba una ñanna ñá anjwa á ɓálá elva-aara.

<sup>14</sup> Diyamidiya ganakini edda una a tsante Yaakadada Yaisu am fáya na wá, watse á tsamitetse miya keni, á kya erva an Yaisu. Baɗemme á miya watse á damiyá á ba átirpalle á de katafke-aara.

<sup>15</sup> Baɗemme á duksa-aha ñanna anjwa á maganá Dadaamiya na wá, á maganá aɗaba ba kure, ge melakurumele, geni emnde kwakya a sharánsha ñgurna-aara. Tá de hwiya estuwa emnde a slafanaa we ge Dadaamiya, emnde a gálá zhera-aara.

### *Baaka lámbe á njere, njere enjkale á njere áte duksa na á zleka na*

<sup>16</sup> Aɗaba una ñanna, ña ba dzañdzane. Diyañerdiya tsa geni anjwa á far ba gulá ndzedá á njere ba kelaazare, amá am ervaunɗe á njere wá, ña emnde dzañdzane jipu. Aɗaba Dadaamiya anjwa á fañerem ndzedá am vuwa.

<sup>17</sup> Zlaɗa wá, ñá anjwa á essha, amá watse á zlauzle. Anjwa yaikkire ñá de sháná njere aɗaba zlaɗa ñanna. Yaikkire ñanna keni watse baaka zle-aara, jauje ge duksa baɗemme. Máki yehañerteyeha una ñanna, ñá zhára zlaɗa á njere kina hyapka ba názára keni.

<sup>18</sup> Aɗaba enjkale á njere áte duksa na á naaná ice ka, amá áte názena á nánka ice á urimagwe. Aɗaba baɗemme á názena á naaná ice á urimagwe watse á zle. Duksa-aha na ni á zleka ɗekideki wá, tá zharaná an ice ka.

## 5

<sup>1</sup> Diyañerdiya ganakini má mbeɗaambeɗa bere á haha á njere na ñá am huɗe-aara kina, amaana vuwa laakire á njere na wá, Dadaamiya á de vanjerte bere umele añwaslire am samaya. Amaana: á de vanjerte vuwa umele am samaya, názá dem ba ge ɗekideki.

<sup>2</sup> Njá á njere am duniya kina na wá, laruwa jipu, ñá kumá ba daa á dem bere á njere añwaslire na am samaya na.



<sup>3</sup> Adaba máki shaŋeránshá tsekwaŋeremtsekwa am vuwa áŋwaslire na wá, shedekwe á ñere á gevka an ukhyiye dey mázla-aara á katafke á Dadaamiya.

<sup>4</sup> Amá am kinire na zlaŋe ná á ba am bere á haha á ñere na wá, ná am zlaŋa an tsáká ire, á vaŋerte ba kyuwa. Tatayaŋerka ñere ganakini ná kátá tsekwe am vuwa a laakire á ñere ñanna ba ðekideki. Estuweka. Ná kátá ma ña tsekwarhe una áŋwaslire, vuwa á samayire na, daaci ma andze á shebanveshebe emgyegwe-aara na ñane á emtsa na.

<sup>5</sup> A tsatsaŋeraa ba Dadaamiya an ire-aara vuwa áŋwaslire ñanna ge ñere. A vaŋerte Shedekwe Cudede na wá, á maraná an una ñanna ganakini duksa na a baa watse á vaŋerteva na wá, ba jirire watse ná shánsha.

<sup>6</sup> Adaba una ñanna, ñere ña ba dzaŋdzane. Máki zlaŋe ná á ba am vuwa laakire na wá, diyaŋerdiya ganakini zlaŋe ña yiyiye an tate na átekwa Yaakadada.

<sup>7</sup> Kina wá, zlaŋe ná nánka emtsaade an ice á ñere. Njá á ñere antara ñane wá, á ba an fetarfire.

<sup>8</sup> Ba jirire baaka shaige á ñere ðekideki. Máki ná shánsha ná tsekwesetsekwe am vuwa laakire na, ná zláá ádeza Yaakadada wá, wayaŋerwáyá jipu.

<sup>9</sup> Duksa palle ná kataná ñere wá, ma zlaŋe ná á ba am duniya na, ma daŋeraada ádezenárá keni, ná maga ba názena á kataná ñane.

<sup>10</sup> Adaba bademme á miya watse mí de katafke á \*Almasiihu am yaikkire-aara, á de kyáná ñane shairiya á slera-aha á miya. Ma ware á miya keni á de pelansá á ba áte názena ndza a maganaa edda-aara am duniya. Edda una a magaa shagerire, á de shá laŋa-aara. Edda una a magaa shagerkire an shagerkire-aara.

### *Dadaamiya á kátá emnde bademme tá melemela an ñane*

<sup>11</sup> Adaba una ñanna, elva a fá zherwe áte Yaakadada wá, ña dise vateneka ñere. Daaci ná aŋkwa á wava ba ge maraterá jirire á ñere ge emnde. Dadaamiya wá, baaka názu diyaaka ñane am erwaunde á ñere. Yá tamá ba kure keni diyakuridiya, má kwá ndáhá jirire á názena kwa disaa kure áte ya.

<sup>12</sup> Emtu watse kwá baŋerá ná gálá ire nárá emtu ádaliye? Una ná gálá ireka, ná kwarakurse ba sera á elva, geni a njeka lambe á kure ðekideki, naba fautarfe an ñere, kwá de shánsha dza sera, kwá de háslaterá ba kure emnde a gálá ire ba dey na. Adaba itare tá zhárá ba iga á duksa, baaka lámbe-aatare áte nja-aatare am erwaunde.

<sup>13</sup> Emtu kure keni kwa ba seke emnde umele, kwá zharáŋer ba seke ná an shaitaine nárá emtu? Máki estuwa wá, ña shaa shaitaine ñanna adaba ba Dadaamiya. Amá ba lápiya ire á ñere. Daaci an enkale á ñere ñanna wá, ná melakuru ba ge kure an ñane.

<sup>14</sup> Dalila á slera á ñere wá, ná maganá adaba wáyávire yaikke na a magaminaa \*Almasiihu na. Ñane a naba yaa ire-aara, a emtsehe adaba emnde bademme. Daaci áza Dadaamiya wá, bademme á emnde emtsaremtsa kerde antara Almasiihu.

<sup>15</sup> Labára Almasiihu a emtsaa adaba emnde bademme? A emtsaa adaba itare, geni ma tá á ba an shifa-aatare keni, tá magán ge ire-aatare ka duksa, tá maganá áte namaari-aatare ka mázla-aara duksa, amá tá maga ba názena á kataná ñane, adaba ñane a emtsaa adaba itare, tsetse am fáya keni adaba itare.

<sup>16</sup> Daaci kina wá, gergerka emnde ázeñere mázla-aara, emnde bademme ta ba kalkale, nǎ zháreka názena ágáshe. Werre wá, ice na ndza nǎ zhára \*Almasiihu an nane na wá, ndza nǎ maga ba slera á emndimagwaha. Amá kina wá, nǎ manka mázla-aara.

<sup>17</sup> Edda-aara máki garevge palle antara Almasiihu wá, nja-aara werre bademme dedde, ma jeba-ara-aara keni gevge áñwaslire bademme.

<sup>18</sup> Bademme á una nǎnna, a maganaa ba Dadaamiya. Nane a belaa Almasiihu, a se melamiyaahe an nane. Daaci a famiyar slera nǎnna ge miya, geni á kátá emnde bademme tá shánsha mele an nane.

<sup>19</sup> Amaana wá: Dadaamiya a belaa Almasiihu á sem duniya, adaba á kátá emnde bademme tá melemele an nane. Á naterka am ervaunǎde mázla-aara adaba haypa-aha-aatare. Daaci a famiyar slera á de balaterá una nǎnna ge emnde bademme, geni ankwá baráma a mela an Dadaamiya.

<sup>20</sup> Daaci nǎre wá, nǎ we á Almasiihu, á dǎhákurá ba Dadaamiya an ire-aara á kya an we á nǎre. Nǎ ankwá á magaterá ba tásle ge emnde adaba barka á Almasiihu, táslawa á kure eksawarekse ganakini kwá melemela an Dadaamiya.

<sup>21</sup> Almasiihu nane maganaaka haypa dekidǎki, amá Dadaamiya a naba far haypa-aha á miya ge nane, ganakini á gamivege miya ma emnde a jirire á katafke-aara, má gamiyevge palle antara Almasiihu.

## 6

### *Slera á slebela á Yaisu \*Almasiihu*

<sup>1</sup> Náwa nǎ ankwá á bakurá elva: Nǎre wá, nǎ emnde na ni Dadaamiya ankwá á maga slera-aara á kyá erva an nǎre. Dadaamiya wá, magakuránmaga nǎgurna. Táslawa á kure, gawanveka nǎgurna á Dadaamiya na seke duksa ba dey.

<sup>2</sup> Ábi bánba Dadaamiya ankwá an puwa am wakita-aara, a baa nane: «Am sarte na hyephye sarte á nǎgurna-aaruwa, ya cenakvaarcene. Am sarte na hyephye sarte-aaruwa ge lya emnde, ya melakumele.» Daaci diyaweddiye ganakini sarte á nǎgurna nǎnna ba una, sarte á lya emnde nǎnna ba una.

<sup>3</sup> Wayanǎerka nǎre vante ektápaare ge ura, wayanǎerka an duksa mándzawe am slera á nǎre dekidǎki.

<sup>4</sup> Názena nǎ kataná nǎre wá, nǎ kátá tá diyannereddiye emnde ganakini nǎ emnde a slera á Dadaamiya. Una názena nǎ maganá nǎre am duksa bademme. Ma nǎ ankwá á shá zlada yaikke, ma nǎ am emtanǎkire, ma kwakya palása na nǎ maganá nǎre keni, ba nǎ farvaunǎde, nǎ ebbásha.

<sup>5</sup> Ja keni hyanǎerhya áza emnde, á dem danǎgay keni darannǎerda, ervaunǎde á zlamaa bademme keni tsarantetse áte nǎre. Máki ba slera wá, wavanǎerwava an nane. Am sarte umele ba háre keni nǎ puka, zu náza za keni baaka dekidǎki.

<sup>6</sup> Nǎ ankwá á marateránmára ba parakke ge emnde ganakini nǎ emnde a slera á Dadaamiya. Diyanǎerdiya jirire á Dadaamiya, nǎ ankwá njá ba cudǎdǎde, nǎ farvaunǎde am duksa bademme, nǎ ankwá á maga kemaarire, Shedǎekwe Cudǎdǎde keni ankwá an nǎre, nǎ ankwá á maga wáyávire an ervaunǎde á nǎre palle,

<sup>7</sup> nǎ ankwá á magaterá waazu á elva a jirire ge emnde, ankwá á vanǎerteva Dadaamiya hákuma-aara. Kazlanǎ á wáva á nǎre ge nǎre wá, ba mága jirire. Ma ge wava keni á ba an nane, ma ge lyá ire á nǎre keni á ba an nane.

<sup>8</sup> Emnde umele tá zlebaŋerzleba, emnde umele tá epsawaŋerepsawa. Emnde umele tá galaŋergálá, emnde umele tá zlazlaŋerzlázle. Emnde umele tá zharáŋer ba seke ŋa emnde a fida, amá ŋa emnde a jirire tsa.

<sup>9</sup> Tá zharáŋer ba seke diyaraŋerka, amá diyaraŋerdiya tsa emnde baɗemme. Emnde tá zharáŋer ba seke irekhya-aha, amá baaka duksa umele áte ŋere, ŋa ba lapilayye. Tá shaŋeru zlaɗa an tsáká ire, amá ŋá emtseka, náwa ba njá á ŋere an shifa.

<sup>10</sup> Emnde tá kátá tsekwanaatsekwa higa á ŋere ba ɗekideki, amá ma vaatara keni ŋere njá á ba an higa á ŋere. Na ba talage-aha am duniya na, amá njá gatervaa ba ŋere emnde, tá gevge emnde a berba an elva á Dadaamiya. Emnde tá zharáŋer ba seke baaka duksa á ŋere, amá baaka názu ektsaŋeraarektse ɗekideki.

<sup>11</sup> Kure emnde a Kaurintus wá, ŋa ndaakurndáhá ba parakke, shebaŋerakurvuweka názu am erwaunɗe á ŋere ɗekideki.

<sup>12</sup> Ŋere wá, njá wayákurá an erwaunɗe á ŋere palle, kwa yaŋeraa ba kure.

<sup>13</sup> Ázerwa wá, kwa ba seke egdzara-aaruwa, iya keni ya ba seke eddekure, yá ndaakur elva. Kure keni shebawaŋervuweka názu am erwaunɗe á kure, wayawaŋerwáyá ba seke una ŋa wayakuraa ŋere.

#### *Faufa hyema, gawevka palle an emnde na fartarka*

<sup>14</sup> Kure wá, gawevka am sawari palle antara emnde na fartarka Yaakadada na, una zlayeka ge kure ɗekideki. Tá másláva estara tara jirire á Dadaamiya an haypa? Tá njá estara tara parakkire, antara tabeɗammire am tate palle?

<sup>15</sup> Á duwa estara elva á tara Yaisu an Shaitaine? Á duwa estara sawari á tara slefetarfe an edda una fetarka?

<sup>16</sup> Tá másláva estara tara mashidi á Dadaamiya antara hele á shaitaine? Yá ndaakur ba jirire: Ba miya una mi mashidi á Dadaamiya na ma vaatara keni ŋane á ba aŋkwa na. Ba seke una a ndaanaa ŋane aŋkwa an puwa am wakita-aara, a baa ŋane:

«Watse yá njá á ba am dágage-aatare, yá njá antara itare.

Yá de gev Dadaamiya-aatare, itare keni tá de gev emnde-aaruwa.

<sup>17</sup> A ndaanaa aɗaba una ŋanna Yaakadada Dadaamiya zlaɓe adaliye, a ba ŋane: Sawesse am dágage-aatare, gawevka palle antara itare, njawinja cuɗeɗe, lauktu yá lyiyakurlyiya;

<sup>18</sup> Yá de gev Eddekure, kure keni zála an ŋwásha baɗemme kwá de gev ba egdzara-aaruwa.

Kwaya ŋane elva á Yaakadada na hákuma baɗemme á ba ázeŋará na.»

## 7

<sup>1</sup> Baɗemme á waada-aha ŋanna a maganaa Dadaamiya na wá, a magamiyán ba ge miya egdzar mama-aha-aaruwa. Aɗaba una ŋanna, barawamiyaabará ire á miya cuɗeɗe. A jerka duksa na ni á badza shifa á miya, antara vuwa á miya ɗekideki am zláláva á miya, aɗaba ma emnde a fa zherwe áte Dadaamiya.

#### *Tara dzámá ire, antara higa á Paul*

<sup>2</sup> A yaŋeraaka erwaunɗe á kure ba dey, aɗaba baaka emtaŋkire na ŋa magakurtaa ŋere ba ge palle á kure keni. Baaka edda una ŋere ŋa maganaa ektápaare am kure ɗekideki, baaka edda una ŋa zlermuwa ŋere ɗekideki am dágage á kure.

<sup>3</sup> Bawánka zlaɓe ganakini ñá kátá fakurar ba zherwe an elva na ñá anƙwa á tsakaná ñere, una ka ðekidɛki. Ba kina keni ya zluwa á ndaakur ba ñane ganakini ña wayakurtaa an ervaunɗe á ñere palle. Baaka názu á pekyamiya an kure ðekidɛki. Una ma zlaɓe ma á ba an shifa á miya, ma zlauzle shifa á miya am duniya na keni.

<sup>4</sup> Baaka shaige-aaruwa áte kure ðekidɛki. Baɗemme á higa-aaruwa á ba áte kure. Baɗemme á zlaɗa na ya shuwaa ya na, aley yá á ba an higa-aaruwa am ervaunɗe.

<sup>5</sup> Zlaɗa wá, ba jirire shaɗerushe. Á ba am Makiduniya keni se shaɗeránka hairire ðekidɛki. Ma á kyá ura-ara keni á sawa ba shunɗula, emnde tá dabanɗerá á ba an elva. Ekhyaaka ervaunɗe á ñere ðekidɛki, ñá dzámá ba ire.

<sup>6</sup> Amá sle-ekhyaterá ervaunɗe ba Dadaamiya ge emnde, máki weshetewesha ire-aatare. Daaci a ekhyaɗeraa ba ñane ervaunɗe an sá á Titus.

<sup>7</sup> Dadaamiya a ekhyaɗeraa ervaunɗe an sá á Titus ka palle, a ekhyaɗeraa ervaunɗe an elva na a melanuwa ñane ge Titus ge tsakanɗersetsake na. Adaba se tsakanɗersetsake Titus ganakini ekhyakurnaakhya ervaunɗe ge ñane keni. Zlaɓe ádaliye, a ndaɗernda ganakini kwá an wedere-aaruwa jipu, dakuremda am nambane arge názena kwa maganaa kure. Kina wá, baɗemme kwa á ba am iga-aaruwa, kwá anƙwa á waviyuwave. Labáre á kure higitehiga jipu zlaɓe ádaliye.

<sup>8</sup> Diyandiya ganakini wakita na ya puwakurtaa ya na, a de vakurte dzámá ire kwakya, amá ba kalle. Yá kátá dem am nambane geni ma yá puwakurteka estuwa, adaba ya nanna ganakini puwanakurempuwa am dzámá ire kwakya.

<sup>9</sup> Amá kina wá, ekhyaakhya ervaunɗe-aaruwa. Yá higa adaba ya puwakurme am dzámá ire ka, amá adaba kwá anƙwa dzámá názena ndza zlalaaka an unɗule-aara na, eptsakureptsa am tuba. Dzámá ire á kure áte namaari á Dadaamiya. Daaci máki estuwa, baaka emtanɗire na ña magakurtaa ñere ðekidɛki.

<sup>10</sup> Máki tá am dzámá ire emnde áte namaari á Dadaamiya wá, dzámá ire ñanna shagera jipu. Adaba jeba á dzámá ire ñanna á dá ura á dem tuba. Daaci estuwa, Dadaamiya á lyelye edda-aara. Amá dzámá ire áte náza á emnde duniya wá, á saná ba emtsa ge ura á katafke á Dadaamiya.

<sup>11</sup> Yá ndaakur ba jirire: Dzámá ire á kure ndza áte una á kataná Dadaamiya. Nawanaana ba kure keni slera na a maganaa Dadaamiya am kure am sarte na kwá am dzámá ire ñanna! Nawanaana wáwa á kure ganakini kwá kátá bára ire á kure am elva ñanna! Nawanaana emtsaade ganakini ba kure keni anƙwa á wakurwá am ervaunɗe mázla-aara! Kwá anƙwa á tapanaatápa emtu lyáwa á kure, antara wedere á kure an iya kina! Nawanaana emtsaade wáwa á kure kina, geni kwá kátá namaari á Dadaamiya! Nawanaana emtsaade shairiya na kwa far ge edda una a magaa shagerkire! Kwa nanna emtu ganakini baaka názu magakurka geni kwa baaka am elva ñanna mázla-aara kwá an bára?

<sup>12</sup> Daaci diyaweddiye ganakini puwanakurteka wakita ñanna adaba edda una a gu haypa, bi adaba edda una ta ganu haypa, una ñanna ka palle. Ya puwakurte ganakini yá yehakuranteyeha baɗemme ákatafke á Dadaamiya, wáyáwa á kure yaikke na kwa wayaɗeraa kure an ervaunɗe á kure palle na.

<sup>13</sup> Adaba una ñanna, kina wá, ekhyakuraɗeraakhya ervaunɗe mázla-aara.

An ekhya ervaunḡe á ñere ba parakke! Názu a ekhyañeraa ervaunḡe zlaḡe ádaliye kwakya-aara wá, Titus a se berañerá an higa yaikke, aḡaba baḡemme á kure fakuranemfa ndzeḡa am vuwa.

<sup>14</sup> Am sarte na yá anḡkwa belaná ádezekure wá, ya zlebakurzleba jipu ázeñará. Kina wá, yá anḡkwa á nanna ganakini zleba ñanna ya zlebakuraa ya na wá, fakuriyemka am zherwe. Baḡemme á elva-aha emtake emtake na ya ndaanaa ya áte kure na gevka fida. Daaci baḡemme á názena ndza ña banán ge Titus áte kure na, jirire.

<sup>15</sup> Ba kelaa má yeheteyeha Titus názena kwa magannaa kure am sarte na a tsekwaá ázekure, kwa lyevaahe am dáḡave á kure, kwa gyaigarhe, kwa fansarfe keni am názena a de bakurnaa ñane baḡemme na wá, higa-aara áte kure á far ba wala ba kelaazare.

<sup>16</sup> Daaci yá higa jipu, aḡaba baaka shaige-aaruwa ḡekideki áte kure ma am uwe keni baḡemme.

## 8

### *Elva á náza melateru ge emnde na tá am baakire*

<sup>1</sup> Egdzar mama-aha-aaruwa, ñá kátá kure keni kwá cenáncena názena ta maganaa emnde a fetarfe am kwará á Makiduniya na. A magaternaa ba Dadaamiya ñgurna á maga duksa ñanna.

<sup>2</sup> Sharushe zlaḡa an tsáká ire, amá baaka názu a eksanaa zlaḡa ñanna áte itare ḡekideki, higa-aatare ba kelaa-aara. Ta talage-aha jipu, amá ta jemaa sadake-aatare ba kwakya.

<sup>3</sup> Yá ndaakur ba jirire: Jaranmejahe ba kwakya, magarnaamaga ba seke ta jahanaa itare ka ḡekideki, hyahya ndzeḡa-aatare. Ndza ta sawa ba itare an ire-aatare ásezeñere,

<sup>4</sup> ta se ndava baráma, ganakini itare keni tá demda am slera á melateru ge emnde a fetarfe na tá am kwará á Yahudiya na.

<sup>5</sup> Emnde ñanna ta magaa názena tamañerka ñere ḡekideki. Emtsaḡe, duksa zuññwe na ta maganaa itare wá, ta gaa ire-aatare ákatafke á Yaakadada, lauktu ta se ganaahe ákatafke á ñere keni. Baḡemme ta maganaa á ba áte namaari á Dadaamiya.

<sup>6</sup> Amá ázekure keni fakurantaufe zlauzle, a dakurnaa Titus sawari-aara. Aḡaba una ñanna maa, ñá anḡkwa á ndavanundave zlaḡe adaliye kina, geni a eptseptsa ádezekure, á de zланаazle slera á jirire na a fantuwa ñane am dáḡave á kure na.

<sup>7</sup> Ate baráma á Dadaamiya wá, kure hayaikurephye am duksa baḡemme. Ma fetarfire á kure, ma ge ndáhá elva á Dadaamiya, ma enḡkale á kure ge dise ndaha elva, ma máḡa dzañdzañire am slera á Dadaamiya keni baḡemme. Wayakurañerwáyá an ervaunḡe á kure palle. Daaci yawánka máḡa slera á jirire ñanna keni, magaumaḡa an ervaunḡe á kure palle.

<sup>8</sup> Názena yá bakurná ya na wá, gevka laarire ganakini sey ba kwá fá sáḡake ñanna. Una yá vakurte ba seydire áte emnde na itare wayarwáyá jipu slera ñanna, itare tá anḡkwa á effá na. An una ñanna wá, yá kátá diyeddiye máki anḡkwa wáyáva á kure áte emnde umele.

<sup>9</sup> Duksa palle wá, kure diyakurdiya ñgurna yaikke na a magakurnaa Yaakadada Yaisu \*Almasiihu. Ñane, baḡemme á duksa á ba am erva-aara, amá a ganve ire-aara talaga aḡaba kure. A magante una ge ire-aara, geni kure kwá gevge emnde a berba áte baráma á Dadaamiya.

<sup>10</sup> Kina wá, yá ndaakurse názena yá slakurvá ya: Mbakyyiwa wá, ndza kwa hayanaa ba kure zuññwe máḡa slera á jirire ñanna, kwa fantuwa ba



kure zlaɓe ádaliye zuŋŋwe ge emmága-aara keni. Kina keni wallá laarire, wallá uwe, shagera ba kwá zlanazle slera ɲanna fakurantaufe zlauzle na.

<sup>11</sup> Daaci yawánka, naba zlawanaazle slera ɲanna an higa, ba seke una kwa fantuwa an ɲane na. Faufa á ba áte názena kwa dzegwanaa kure.

<sup>12</sup> Adaba má kwá vante duksa ge Dadaamiya deydey á ndzeɗa á kure, kwá vante an higa wá, á ellyiya Dadaamiya. Dadaamiya á ndava ba una aɲkwa am erva á kure. ɲane á ndavakuruka názena baaka am erva á kure na.

<sup>13</sup> Bawánka zlaɓe a ba kure: Paul á kátá puwanjerem am zlaɗa á emnde ɲanna, itare tá de shá ire-aatare. Una ɲanna ka ɗekideki. Yá kátá emnde baɗemme tá gevge palle.

<sup>14</sup> Kina wá, aɲkwa duksa ázekure, shagera jipu máki ká vaterteva ge emnde na tá am baakire kina, daaci mákuralla má watse baaka ázekure, amá aɲkwa ázetare, itare keni tá de vakurteva ba estuwa. Máki estuwa, baɗemmire á kure kwa ba palle.

<sup>15</sup> Máki estuwa, gevge á ba áte una aɲkwa an puwa am wakita á Dadaamiya a ba ɲane:

«Emnde na tá hálá ɗáfá á samaya na, halarvaahála kwakya, gevka seke kwakya ba ta zuhe á dem huɗe ɲanna.

Emnde na ta halante ba cekwaanɗuɗi keni, ta yanaa ba itare náza za.»

#### *Titus antara emnde a puwansepuwe*

<sup>16</sup> Ná aɲkwa á slafaná we á ɲere kwakya ge Dadaamiya, adaba a maganaa ba ɲane slera am Titus. ɲannára aɲkwa á wava Titus ba seke ɲere ge melakurumele na.

<sup>17</sup> ɲa ndavanu ganakini a eptseptsá ádezekure, a naba eksarhe. Adaba ndáva á ɲere ka palle, amá ba ɲane an ire-aara keni wayaawáyá ervaunɗe-aara ge eptsá ádezekure, ge de melakurumele zlaɓe ádaliye.

<sup>18</sup> Náwa ɲá aɲkwa á belante egdza emmemiya umele, tá aɲkwa á duwa kerɗe. Egdza emmemiya ɲanna wá, emnde a fetarfe baɗemme tá zleba ba ɲane adaba waazu na aɲkwa á balaná ɲane.

<sup>19</sup> Zlaɓe ádaliye, adaba ta eksesaa emnde a fetarfe, ganakini á ɗabáɲerá ɲane am shula-aha á ɲere, a melaɲerumele ge mága slera á jirire ɲanna. Daaci slera ɲanna á de maga námpire kwakya, emnde kwakya tá de gálá Yaakadada á miya am yaikkire-aara. Tá de dise áte una ɲanna emnde, niya á ɲere ge melateru ge emnde.

<sup>20</sup> Shuɲgu wá, jaɲeranmejaha ba kwakya. Ná aɲkwa á fá hyema keni ba kwakya am slera á shuɲgu ɲanna, geni a tsalaraɲerka emnde adaba shagerkire á mága.

<sup>21</sup> Ná kátá á baraavebára shagerire na ɲá maganá ɲere na á katafke á Yaakadada, amá a baraavebare áza emnde keni.

<sup>22</sup> Náwa ɲá aɲkwa á belaterte egdza emmemiya umele ge emnde buwa ɲanna. ɲane keni maraɲeránmára wáva-aara ser kwakya, ɲa nanna ganakini wayaawáyá an slera á Dadaamiya. Kina ɗeme cenáncena labáre á kure, geni shagera zlaláva á kure wá, aɲkwa á wava jipu ge de melakurumele.

<sup>23</sup> Titus wá, ɲane edda una ɲá aɲkwa á ja ɗábá kerɗe ge mága slera á Dadaamiya am ɗágave á kure. Amá emnde buwa na tá aɲkwa á duwa antara ɲane na wá, ta belateraa emnde a fetarfe baɗemme ádezekure. Emnde kwakya tá aɲkwa gálá \*Almasiihu adaba barka á slera-aatare.

<sup>24</sup> Marawateránmára wáyáva á kure ge emnde ɲanna. Daaci baɗemme á emnde a fetarfe na tá duwa ádzetare ge dezekure na, tá de cenáncena

labáre á kure, tá de dise áte una ɲanna ganakini zleba na ɲa zlebakuraa ɲere na wá, an unɲule-aara.

## 9

### *Dadaamiya a hayaa ba edda una á fáná an higa*

<sup>1</sup> Ate elva a náza melateru ge emnde a fetarfe na tá am Yahudiya wá, baaka ɗeme wedere kwakya ge puwakurte elva ɲanna áte nalmesheri.

<sup>2</sup> Adaba diyandiya ganakini ba kure an ire á kure keni kwá an wedere á melaterumele. Zlebanakuraazleba ya zlauzle áza emnde a fetarfe na tá am Makiduniya, geni emnde a fetarfe na tá am kwára á Akaya wayarwáyá jipu melateru ge emnde a fetarfe na tá am kwára á Yahudiya. Kwaye mbákyiya tá maga ba niya-aara. Daaci wáva á kure a tsante wayava á emnde kwákya am Makiduniya, itare keni kwakya ba názena á kátá melaterumele na.

<sup>3</sup> ɲanɲára yá anɲkwa á bela tara Titus antara egdzar mama-aha a miya umele buwa ádezekure, geni kwá zlauzle am slera á kure baɗemme ge jáha shunɲu ɲanna, lauktu ɲá daada ɲere. Estuwa, zleba na ya zlebakuraa ya ázetare na á gevka fida.

<sup>4</sup> Adaba máki danɲeremda antara emnde a Makiduniya, ɲa de berakur zlaɓe baaka názena kwa maganaa kure wá, watse zherwe ge ɲere, adaba ɲa bateraa baaka shaige á ɲere áte kure. Náza á kure ɗeme wá, náza ndaaka.

<sup>5</sup> Daaci yá puwa sawari am ire-aaruwa wá, a ba ya duksa na wá, shagera ba yá ndavaterundave ge tara Titus antara emnde buwa na, geni a darduwa itare zunɲwe, lauktu watse ɲá ɗabaterá ɲere vacite umele. Yá kátá kwá maganaamaga antara itare duksa á barka na ndza kwa enndaa na, lauktu ɲá daada ɲere. Daaci una ɲanna á de mára názena am ervaunɗe á kure, geni kwa maganaa á ba an kátire á kure duksa á barka ɲanna, gevka laarire.

<sup>6</sup> A ba naraje umele wá: Edda una a herɗante ba cekwaanɲuɗi, á sem mbá keni, á sá ba cekwaanɲuɗi. Edda una a herɗaa kwakya wá, á sem mbá keni, á sá ba kwakya. Viyawanaaka naraje ɲanna ɗekidɗeki.

<sup>7</sup> Magaumága kwa mazla-aara. Ma ware keni a emmága áte una a eksesaa ɲane. Fauka an dzámá ire, a gevka laarire keni. Faufa á ba an higa, adaba Dadaamiya á háyá ba edda una á fáná an higa.

<sup>8</sup> Dadaamiya an hákuma ganakini á kwakyakuranvekwákya duksa baɗemme, á juwá á ba áte kure, kwá hyephye zlaɓe ádaliye ge mága slera á shagerire baɗemme.

<sup>9</sup> Estuwa, kwá gevge áte una anɲkwa an puwa am wakita á Dadaamiya, a ba ɲane:

«Ura mággwe wá, pasakpasakke erva-aara áza talage-aha. Maggwire-aara á zleka ɗekidɗeki.»

<sup>10</sup> Baɗemme á wulfe á duksa na tá jáná emnde á dem haha, á walantá ba Dadaamiya, á vatertá ba ɲane náza za-aatare ge emnde, antara wulfe na tá de jáná am shifa á ayiye keni. Una keni ba duksa palle. Máki kwá maga shagerire an názena am erva á kure wá, kwá de shánsha zlaɓe ádaliye ba kwakya; ma vaatara keni kwá de maganá ba kure zlaɓe ádaliye shagerire, shagerire á kure á de maga nampire kwakya.

<sup>11</sup> Dadaamiya á de gá barka áte názu am erva á kure baɗemme, geni kwá magateránmaga zlaɓe ádaliye shagerire ge emnde, á de katafke. Daaci emnde kwakya tá de gálá Dadaamiya adaba duksa á barka na kwá anɲkwa vatertá kure ge emnde ɲanna á kya erva an ɲere.

<sup>12</sup> Adaba slera á barka ñanna kwá maganá kure na wá, gevka ni sey ba ge zatervaare ge emnde á Dadaamiya, amá emnde kwakya zlafe ádaliye tá de gálá Dadaamiya adaba ñane.

<sup>13</sup> Slera á barka ñanna kwá de maganá kure na wá, á de maraná una ñanna shagerire á ervaunđe á kure, tá de diyakursá áte una ñanna emnde, ganakini lyakurvalya labáre á higa, elva a Yaisu \*Almasiihu na á ba an jirire, kwá anƙwa á fansarfe á ba an jirire. Daaci emnde kwakya tá de gálá Dadaamiya adaba ñane. Zlafe ádaliye, tá de galaná adaba shagerire na kwá de magaterán ge itare, antara ge emnde umele keni bademme na.

<sup>14</sup> Bademme á una ñanna, watse kwá maganá an ndzedá á kure ka, á de magakurná ba Dadaamiya ngurna-aara. Má de sesse shagerire á kure parákke áza emnde wá, tá de hayakurhayá, tá de melakurumele zlafe ádaliye an maduwa.

<sup>15</sup> Amá galaumigálá Dadaamiya adaba duksa yaikke na a vamitaa ñane, baaka názena mí slátera an ñane.

## 10

### *Paul á ndáhá elva a hákuma na a vantaa Dadaamiya*

<sup>1</sup> Kina wá, iya Paul yá kátá ndaakurse elva-aaruwa palle. Kwa bantsa kure: Máki yá am dágave á kure wá, ya tsekadfe, amá máki ya yiyiye an kure wá, ya danđañe. Adaba barka á martaapire, an kemaarire á \*Almasiihu wá,

<sup>2</sup> wayanka yá gev danđañe. Táslawa á kure, yáwánya jeba á mága á kure na. Máki yakuránka wá, má danemda watse baaka hairire am dágave á miya. Iyau, emnde na ta bantsa itare maganka jirire, yá maganá áte slera á duniya na keni maa, diyana ba iya názena yá de maganá an itare.

<sup>3</sup> Ge jirire wá, ña ba emndimagwaha, amá wáva á ñere wá, áte názá á emndimagwaha ka mazla-aara.

<sup>4</sup> Adaba kazlaña á wáva na ñá wava ñere an ñane na wá, gevka kazlaña á wáva á emndimagwaha, á vanertá Dadaamiya kazlaña á wává á ñere. Kazlaña á wáva á ñere an ndzedá jipu, á dzegwándzegwa kyáábá dala yaikke na tá an shabe am huđe-aara kelaade-aha á Dadaamiya. Amaana: ñá naba kezlanvekezle fidire na tá tsakaná emnde ñanna,

<sup>5</sup> antara kurávire na tá maganá itare, tá anƙwa piyaterite dise jirire á Dadaamiya ge emnde na. Njá kátá jemaa enƙale á emnde bademme, ñá gaterve ba seke danđay-aha, geni sey tá fansar ba ge \*Almasiihu palle.

<sup>6</sup> Ba máki ña nanna fesarfire á kure, kwa emnde umele wá, ñere ñá anƙwa átekwa ge giya emnde na baaka fesarfire ázetare deƙideƙi na.

<sup>7</sup> Kure kwá zhára ba iga á duksa. Tá anƙwa emnde umele am dágave á kure, ta bántsa itare ta emnde á \*Almasiihu. A diyareddiye emnde ñanna ba shagera ganakini iya keni ya ba ura á Almasiihu.

<sup>8</sup> Yaakadada a vite hákuma áte kure. Amá a vite hákuma ñanna geni yá zadakurzádá an ñane ka, a vite ge dákurá á de katafke an ñane. Ma ya galante ire-aaruwa kwakya keni, baaka názu á emmága, adaba yá galaná an unñule-aara.

<sup>9</sup> Amá bawánka zlafe a ba kure: Paul á kátá ganjerte ba lyáwa an elva na á tsakaná ñane am wakita-aara na.

<sup>10</sup> Ta bántsa emnde umele á kure áte iya: Máki ya yiyiye an kure yá puwakurte nalmesheri wá, ya tsakakurse ba elva sadadde, antara elva-aha na zlazlada áte emnde na. Amá máki danemda am dágave á kure wá, yá gev ba seke baaka ura, ba seke yá ndaaka elva.

<sup>11</sup> Náwa elva na náj baterná nje ge emnde nanna; a cenarácena ba shagera: Bademme á názena nja puwakurtaa nje na wá, má watse danjeremda am dágave á kure keni, náj de maganá á ba áte una nanna.

<sup>12</sup> Itare ta ganvaa ba itare ire-aatare ta male-aha. Daaci nja gergere an emnde nanna, nje náj sleka ire á nje an itare dekideki. Itare wá, ta fanaa ba itare ire-aatare am malire, daaci tá zhára ire-aatare áte una tá slaslaná itare, daaci ta bantsaa itare ta male-aha. Ta uce-aha degi emnde nanna.

<sup>13</sup> Amá nje wá, náj gáleka nje ire áte názá-aatare na. Gálá ire á nje á tsaatse á ba áte slera na a fanjeraara Dadaamiya ge nje, náj ebzeka nákwede kideki. Slera na a fanjeraara Dadaamiya ge nje wá, náj daada ádezekure an labáre á higa.

<sup>14</sup> Daaci duwa á nje ádezekure na nja dakuraa labáre á higa, elva a \*Almasiihu na wá, ebzanjeruka nákwede á una a kwaranersaa Dadaamiya dekideki.

<sup>15</sup> Daaci estuwa, galanjerka ire áte slera á ura, adaba ebzanjeruka nakwe á una a kwaranersaa Dadaamiya. Náj tama kwá anjwa á wálá ba lapiya am fetarfire, geni a farfe zlafe adaliye slera á nje am dágave á kure. Bademme á una nanna, ebzanjeruka nakwe dekideki.

<sup>16</sup> Má zlanjeruzle ázekure maa, lauktu bi watse náj shá baráma a dá labáre á higa á dem larde na á katafke. Wayanjerka nje gev seke emnde umele, tá gálá ire áte slera á emnde na.

<sup>17</sup> Anjwa an puwa am wakita á Dadaamiya, a ba nane: «Máki ura á kátá gálá ire wá, a eggálá adaba názena a maganaa Yaakadada.»

<sup>18</sup> Adaba emnde na tá galaná ba itare ire-aatare ka una, tá de shá háyá áza Dadaamiya, sey emnde na ni a galateraa nane.

## 11

### *Paul á tsáká elva áte emnde na ta bantsa itare ta emnde a bela*

<sup>1</sup> Kina wá, yá ndaakur elva ba seke ura an shaitaine, amá naba fawifa ervaunde. Ba estuwa, naba fawifa ervaunde.

<sup>2</sup> Yá anjwa á shelha jipu áte kure, ba seke náza á Dadaamiya kalkale. Zlafe adaliye, kure kwa ba seke gyaale, vanakurteva ge \*Almasiihu zlauzle, kwa ba seke gyaale a sheba-aara. Daaci yá kátá kwá njá an enjwale á kure, baaka duksa mándzawe áte kure, dem sarte na ni watse náj jakurmeje na.

<sup>3</sup> Amá yá á ba an lyawa, geni bi watse kwá njeka á ba átuge Almasiihu palle, kwá de wayeka an ervaunde á kure palle, ire á kure á de gev bubuwa áte nane. Amá yehauteyeha Hawwa, nane keni ndza a baduwa záhe ba estuwa an yaimyaimire antara fida-aara.

<sup>4</sup> Yá an lyawa ba párákke áte kure. Adaba kure, ba a duhe ge ura ádezekure wallá slebela á Yaisu ka, uwe ka, waazu-aara áte nane keni gergere tsa antara una kwa cenanaa ázenere, shedeke na nane á maga slera an nane keni gergere antara una kwa shanaa kure, aley kwa naba vante baráma ge ura estuwa. Shagera slera á kure!

<sup>5</sup> Ay degiya, emnde nanna ta bantsa itare ta emnde a bela baaka arge itare nanna wá, diyandiya ganakini baaka názu ta jiwa an nane.

<sup>6</sup> Ambáne mbanka ndáhá elva emtake emtake. Amá diya wá, yá ankwá an ñane. Ba kure keni diyakurdiya diya-aaruwa, ya marakuránmárá ser kwakya am duksa bademme.

<sup>7</sup> Am sarte na yá am dagave á kure, yá ankwá á balakurá labare á higa elva á Dadaamiya, ya magán ba dey, ndavanka duksa á kure ðekideki. Ya naba gulaa ire-aaruwa, ya kakurte kure, geni kwá wálá an unñule-aara. Emtu badzanevbadze emtu?

<sup>8</sup> Am sarte na yá ankwá á maga slera am dágave á kure, kwaye ndza ta veliyantaa emnde á Dadaamiya á sawa am tate umele shungu. Una ñanna gevge ba seke ya zlaa ndzedá á emnde umele, mela wá, ya melakuru ge kure.

<sup>9</sup> Am sarte na yá ankwá á maga slera am dágave á kure, ma yá an wedere á shungu keni, ndavanka ya duksa á kure, kwaye ndza ta sinaa emnde á Dadaamiya na tá am kwárá á Makiduniya náza a já wedere-aaruwa. Hyanakuraaka ya lyuwa ðekideki an wedere á ire-aaruwa. De katafke keni yá hyakuraaka ya lyuwa.

<sup>10</sup> Yá ndaakur adaba jirire á \*Almasiihu na am iya na: Una ñanna názu yá gálá ire átekwa. Am hude á Akaya bademme, baaka ura á dzegwándzegwa piyitepiya.

<sup>11</sup> Emtu máki yá tsáká elva estuwa wá, wayanakurkire emtu? Una ka ðekideki. Diyaadiya Dadaamiya ganakini wayanakurwáyire.

<sup>12</sup> De katafke keni yá lyyeka ya duksa á kure, ganakini a sharánka názena ni tá gálá ire átekwa emnde na ta bántsa itare ta emnde a bela, slera á ñere ba palle, mbate fida na.

<sup>13</sup> Emnde ñanna ta emnde a bela á Yaisu \*Almasiihu ka ðekideki. Itare ta emnde a zlerma, amá tá mareka jirire á slera-aatare, ta ganve ire-aatare ba seke ta emnde a bela.

<sup>14</sup> Magauka najipu-aara. Adaba ba Shaitaine an ire-aara keni ankwá á magán ba estuwa, á ganve ire-aara ba seke malika á Dadaamiya.

<sup>15</sup> Daaci una keni najipu ka. Emnde a slera-aara keni tá naba ganvege ire-aatare ba seke ta emnde a slera á Dadaamiya á jirire. Amá am halavuwa á duniya wá, názena tá ankwá á maganá itare na bademme watse tá de ebbera.

### *Paul á gálá ire an zlaða-aha-aara*

<sup>16</sup> Yá enndáhá zlaðe adaliye elva-aaruwa ñanna ba seke ura an shaitaine na, amá wá, zharawika seke yá an shaitaine ba jire. Iya keni zharawizhárá á ba an ice, yá galantegálá ire-aaruwa, seke una kwá ankwá á zharáterá á ba an ice emnde umele na.

<sup>17</sup> Ge jirire wá, una namaari á Yaakadada ka. Ba daaci am gálá ire-aaruwa ñanna wá, ganevge ba seke yá an shaitaine.

<sup>18</sup> Yá zhárá ba emnde kwakya tá ankwá á maganá á ba áte slera á duniya, tá gálá ire an ñane na wá, daaci iya keni shagera yá galantegálá ire-aaruwa.

<sup>19</sup> Há! kwa bántsa kure kwa emnde a enkale tsa, aley kwá zharaterá á ba an ice emnde ñanna tá an shaitaine na, baaka lámbe á kure!

<sup>20</sup> Tá ankwá á gakurve ba seke náve-aha-aatare, tá zákurá áte há, tá ankwá á zlermakurzlerma, tá ankwá á fakurar uksañwire, tá ankwá á magakurá palasa keni, aley kwá ndaaka elva!

<sup>21</sup> Mbate ñere na ña gakurmarge na, a magañeraa ba baakire á hákuma á ñere ndza! Yawañerarye kwaye baakire á hákuma á ñere ñanna.

Kina wá, yá ndaa elva ba seke yá an shaitaine: Ma edda-aara á gálá ire an uwe keni, iya keni yá naba gálá ire an duksa ñanna.



<sup>22</sup> Ta bántsa itare ta emnde á Ibrahimia; ay degiya, iya keni ya ba palle á emnde á Ibrahimia. Ta bántsa itare wá, ta Iserayiila-aha; iya keni ya ba ura \*Iserayiila. Ta bantsa itare, ta eggye-aha á Ibrahimia; iya keni ya ba palle á eggye-aha á Ibrahimia.

<sup>23</sup> Ta bántsa itare, ta emnde a slera á \*Almasiihu, amá janateruje ya. Unjule-aara ka tsa ndáhá una nanna, amá ba waya-aara. Ba parakke janateruje an wáva am slera á Almasiihu. Iya wá, ser kwakya tá ngudinguda jauje ge itare; ser kwakya tá ziya an já; ser kwakya una shifa-aaruwa á ferta ba zlahhe na.

<sup>24</sup> Ser ilyebe Yahudiya-aha tá ziya an já, kurpe kul keye ju maselmane, kul keye ju maselmane.

<sup>25</sup> Ser keye tá ziya emnde a Rauma an zade; ser keye á puwánerá paare á dem háye; ankwá ser palle, ya vaha, ya háre am huđe á háye; ankwá ser palle, tá kátá já shifa-aaruwa emnde an nákwá.

<sup>26</sup> Zlabe ádalije, am shula-aha-aaruwa, ser kwakya á magiyá palasa yawe á guwa, shanusha zladá kwakya am erva á emnde a zá baráma, shanushe zladá kwakya áza emnde a jeba umele, áza emnde a jeba-aaruwa keni ba estuwa. Magariyánmaga palasa am berni-aha, antara áte makwata-aha gergere, shanushe zladá kwakya átira háye keni. Tá ankwá zlabe emnde na ta bantsa itare ta egdzar mama-aha á miya am fetarfire, amá ba fida. Ázetare keni shanushe zladá kwakya.

<sup>27</sup> Máki ba wáva an slera nanna wá, ya wáva. Shanushé zladá an tsáká ire. Am sarte umele ba háre keni, yá taa puka dekideki. Am sarte umele, ma dafa, ma yawe keni, ádeteka áte we-aaruwa dekideki, yá nja-aaruwa ba estuwa. Am sarte umele ba sarte ge zu ba duksa nanna keni baaka. Shanushé wahála á lailaidfire keni kwakya, antara zladá á baakire á kacekaca áte vuwa.

<sup>28</sup> Zladá-aha-aaruwa umele keni zlabe ankwá ba kwakya, amá yá tsanika mazla-aara. Duksa palle yá ankwá á shunjunaná ya wá, yá shunjula ba emnde a fetarfe, ma vaatara keni yá dzámá ba itare.

<sup>29</sup> Máki yá zhára tsafsafe ndzedá á palle-aatare, yá tapán ba seke áte ya. Sakwa máki mbedfaambefá palle-aatare á dem haypa wá, á wiwa jipu ba seke áte ya.

<sup>30</sup> Daaci máki yá gálá ire wá, yá galaná áte názena ni á mára baakire á payda-aaruwa.

<sup>31</sup> Dadaamiya Eddenjara ge Yaakadada Yaisu wá, diyaadiya jirire-aaruwa bademme. Galaumigálá ba nane ma vaatara keni.

<sup>32</sup> Ankwá zlabe ádalije zladá palle ya nanaa ya am Dimaska am sarte na yá áhuwa: Am sarte nanna wá, ndza á kwaraná Araitas larde-aatare. Slekse yaikke na a fanaa Araitas am Dimaska, a naba bazlaa sawji-aha áte we á wakiya-aha á ukvake ge tsagwaditságwada.

<sup>33</sup> Amá ta naba njimhe am ílila emnde a fetarfe, ta ngudite áte zává-aha, daaci ta naba velise á kya biye á ukvake á sete iga a ekse. Ta fertiyaa estuwa emnde a fetarfe átuge slekse á larde nanna.

## 12

### *Paul á gálá ire áte názena a marannaa Dadaamiya*

<sup>1</sup> Ura-ara keni ba yá eggálá tsawe ire nanna wá, zlabe yá ankwá átekwa, ma shagerka gálá ire keni. Kina wá, yá ndaha elva a názena a marinaa Dadaamiya, antara wahayu-aha na ya shanaa ya bademme.

<sup>2</sup> Anƙwa slefatarfe umele ya disaa iya wá, ndza dándá Dadaamiya á dem mba-aara am samaya. Una yá ndaaná á ba áte ire-aaruwa. Yawe kelaawa ju ufade vatena a mágava duksa ɲanna. Una ma am shene, ma ba jirire keni, diyaa ba Dadaamiya palle.

<sup>3</sup> Yá enndáhá zlaɓe ádaliye: Edda-aara ɲanna ndza dándá Dadaamiya á dem zlanna-aara. Una ma am shene, ma ba jirire keni, diyaa ba Dadaamiya palle.

<sup>4</sup> Anƙwa elva-aha ya cenanaa am zlanna, amá á ndaaveka an elva á emndimagwaha ɗekideki. Zlaɓe ádaliye ba enndáhá-aara keni an piya.

<sup>5</sup> Daaci mákí yá gálá ire wá, yá galaná áte jeba á iya ɲanna. Máki áte ire-aaruwa na náwa iya na wá, yá gáleka ire ɗekideki. Má uneka maa, yá gálá ire-aaruwa áte názena á mára ɓaakire á payɗa-aaruwa.

<sup>6</sup> Má wayanwáyá wá, ba iya na náwa ɲane na keni, á jeviyaaka názena ni yá galantegálá ire-aaruwa átekwa. Yá gevka seke ura an shaitaine, aɗaba yá de gáleka ire am fida ba dey. Amá yá maɲka una, yá kuva a kariteka emnde kwakya aɗaba gálá ire na ta cenanaa itare am mbuwe-aaruwa. Amá yá kátá emnde tá fá zherwe áte ya aɗaba názena ta nanaa itare am nja-aaruwa, antara jirire na ta cenanaa ázerwa baɗemme.

<sup>7</sup> Ma andze yá naba demda am kuravire yaikke aɗaba názena ya nanaa ya am mba á Dadaamiya. Amá Dadaamiya a naba magaa pute á kya erva an Shaitaine wá, ya shaa lapikere umele wá, ba seke tá wawiya á ba an sera am vuwa, á wiwa jipu. Ba kelaa má tsetse lapikere-aaruwa ɲanna wá, yá maga ba palasa. Aɗaba una ɲanna, ɓaaka kurávire ázerwa.

<sup>8</sup> Ya magaa maduwa ser keye ádeza Yaakadada, geni a halisehále lapikere ɲanna am vuwa,

<sup>9</sup> amá a ɲwiyante, a ba ɲane: «Yá magaká ɲgurna ba ge ebbásha-aara. Aɗaba má ɓaaka payɗa á ura, hákuma-aaruwa á márava kwakya am edda-aara.» Daaci kina wá, emtake ervaunɗe-aaruwa jipu, yá gálá ire áte ɓaakire á payɗa-aaruwa, a njinja ba hákuma á Yaakadada am ya.

<sup>10</sup> Aɗaba una ɲanna, am ɓaakire á payɗa-aaruwa ɲanna, amá ervaunɗe-aaruwa ba seke nama. Ma tá zlazlízlaɓle emnde, ma tá fá zlaɗa-ara áte ya, ma a shiyaa lámare-ara, ma yá maga palasa á uwe keni, ɓaaka lambe-aaruwa ɗekideki. Diyandiya ganakini a shiyaa zlaɗa ɲanna aɗaba zhera á \*Almasiihu. Aɗaba am sarte na ni ɓaaka ndzeɗa am ya ɗekideki na wá, yá shá ndzeɗa á jirire keni á ba am sarte ɲanna.

<sup>11</sup> Ya tsakese elva ba seke ura an shaitaine, amá kwa maganaa ba kure. Aɗaba ma andze kwá maganá kure seydire áte ya, tara hyainephe ura, an hyainepka ura keni. Ma hyainepka ura keni wá, jaɲerammeke an male-aha á kure ɲanna ta bantsa itare ta emnde a ɓela na.

<sup>12</sup> Aɗaba uwe, am sarte na yá am ekse á kure wá, ndza fanefa ervaunɗe jipu, Dadaamiya keni maganaamaga najipu-aha gergere á kya erva an ya, marsemare ba parákke ganakini ya sleɓela á ba an jirire.

<sup>13</sup> Emtu anƙwa shagerire na ya magaterán ge emnde umele, kwalanevkwále ge magakurán ge kure emtu? Baaka ɗekideki, kure keni yanakuraaka ya. Duksa palle maganka ázekure wá, fanakurarka pelá mbera-aaruwa. Daaci yá an badza ba iya, yawiyarye haypa-aaruwa!

*Paul á dzámá emnde a fetarfe na tá am Kaurintus*

<sup>14</sup> Kina wá, magannaamága niya a dezekure ge keyire. Amá wá, yá de fakurarka pelá mbera-aaruwa. Tatayanka ya shunngu á kure, iya yá kátá ervaunɗe á kure. Egdzara wá, tá gelaná itare ka emnde a há, amá tá gelaterá emnde a há itare.

<sup>15</sup> Iya wá, yá wawakuruwave an ndzedá-aaruwa bademme; ma ya kedaa nalmane-aaruwa antara ire-aaruwa bademme adaba kure keni ba emtake. Emtu watse kwá gulanaagulá wáyáva á kure áte iya adaba wayanakurwáyá kwakya emtu?

<sup>16</sup> Náwa bademmire á miya diyamidiya ganakini ndavanakuruka mbera-aaruwa. Ay labára zlafe, ta bantsa emnde umele á kure: Sleyaimyaime Paul, a zu shungu á miya á ba an zlerma.

<sup>17</sup> Ya zlermakuraa estara? Ta de zlermakuraa emnde na ya belateraa ya ádezekure na emtu? Puwaupuwa sawari am ire á kure ba shagera.

<sup>18</sup> Tara Titus tá antara egdza emmemiya umele na ba kure keni diyakurdiya, ya belateraa ya ádezekure na wá, ta de zlermuwa itare duksa á kure emtu? Tamanka una defideki. Nere antara Titus wá, ña ba palle am slera á ñere, enkale á ñere keni ba palle.

<sup>19</sup> Bawánka zlafe a ba kure, ñá kátá lya ire á ñere an elva na ñá tsakaná ñere kinekinaka na. Ña emnde á \*Almasihu wá, estuweka. Elva na ñá tsakaná ákatafke á Dadaamiya. An elva ñanna ñá tsakaná ñere bademme na wá, ñá kátá ba farfe á kure am elva á Dadaamiya, egdzar mama-aha-aaruwa.

<sup>20</sup> Lyawa-aaruwa kina wá, yá kuva ba ni bi watse yá de berakurka áte una yá kataná ya. Daaci kure keni kwá de hayiika am nja-aaruwa. Á njeka ervaunde-aaruwa, yá dzámá bi watse yá de berakurá am dagaldagala, kwá ankwá á shelha am dagave á kure, kwá ankwá á maga ervaunde, gergere ye á kure bademme, kwá ankwá á zlazlava, kwá ankwá á za vuwa á emnde, kwá ankwá á maga kuráviere, bademme á duksa á ba an wessa.

<sup>21</sup> Yá an lyawa jipu, yá kuva bi má danduwa ádezekure, kwá de fiyemfa am zherwe yaikke á katafke á Dadaamiya-aaruwa. Yá an lyawa jipu, yá dzámá bi watse yá bera emnde á kure kwakya mbadarmbádá á dem haypa, amá eptsarka am tuba, zlafe tá maga ba názu zlayeka defideki, tá maga ba dákárire, antara zawarire-aatare. Máki ya de berakur estuwa wá, watse yá kyua jipu.

## 13

### *Elva-aha na á zle átekwa*

<sup>1</sup> Náwa watse yá duwa ge keyire á dezekure. Ba seke una ni ankwá an puwa am wakita á Dadaamiya, «geni shairiya á ura, sey tá kyáná áte seydire á emnde, cekwa-aara seyde-aha buwa bi keye na wá,» emnde na tá yánka mága mándzawire na keni, mí de kya shairiya-aatare á ba áte una ñanna.

<sup>2</sup> Am sarte na ya dezekure ge buwire keni, ndza ya fater elva-aaruwa palle ge emnde ñanna kwásau yaránka maga haypa na, ya ndaater ge emnde umele keni bademme. Kina ya yiyiye an kure keni, yá ankwá á ndaakurndáhá zlafe adaliye ba parakke: Má watse danemda ya wá, watse baaka zatervaare ge emnde ñanna defideki.

<sup>3</sup> A ba kure keni, kwá kátá dise \*Almasihu, máki á maga slera am elva-aaruwa, watse kwá nanna degiya! Nane wá, gavka ura cekwa payda-aara. Ba kure keni diyakurdiya hákuma-aara na á maganá ñane am kure.

<sup>4</sup> Am sarte na ta zlenjelanaa áte dzangala wá, ba jirire ndza baaka payda-aara. Amá an hákuma á Dadaamiya wá, á ba an shifa-aara. Ay degiya, ñere antara ñane ganerevge ba palle. Daaci ñere an ire á ñere wá, baaka payda á ñere. Amá ma watse daneremda ádezekure wá, watse kwá de nanna hákuma á Dadaamiya an ñere, am slera na ñá de maganá ñere am

dágave á kure. Adaba ganerevka an ire á ñere, anƙwa Almasiihu antara ñere.

<sup>5</sup> Amá njawinja emtsaafé kure am áhá, habazauhábaza názu am zlálava á kure, diyaweddiye máki ba jirire kwá á ba am fetarfire. Ge jirire wá, baaka shaige-aara, diyakurdiya ganakini anƙwa \*Almasiihu am kure. Sey máki anƙwa názu a mbedakuraa áte baráma-aara.

<sup>6</sup> Amá keni yá tama á de jakurviyaaka, kwá de ba eddiya ganakini ñere ña emnde a bela á jirire.

<sup>7</sup> Amá ñere wá, ña baaka an wedere á marakurá názena ma andze kwá diyañersá átekwa ganakini ña emnde a bela á jirire. Názena ñá yekaná ñere áza Dadaamiya wá, yawánya mága mandzawire bademme. Ma shañeránka ñere mazla-aara marakurá názena ma andze kwá diyañerse átekwa keni, baaka lambe á ñere. Ñere ñá kátá ba kwá maga shagerire.

<sup>8</sup> Adaba ñá taa yanaaka jirire, ñere keni ñá maga ba slera á jirire ñanna.

<sup>9</sup> Máki hyakurephya kure emnde am elva á Dadaamiya wá, ma marápseka hákuma á ñere mazla-aara keni, ñere ñá higa ba jipu. Daaci ñála á ñere kina áza Dadaamiya wá, a gakurvege emnde na ni baaka duksa mándzawe áte itare defideki na.

<sup>10</sup> Wakita ñanna yá anƙwa á puwakurtá ya kina, ya yiyiye an kure na wá, ba geni kwá eptsepta am tuba, daaci yá de valakurarka mázla-aara. Hákuma wá, viteva Dadaamiya áte kure. Amá wá, a vite hákuma ñanna ge zadakurzáfeka, a vite ge dákurá á de katafke an ñane.

#### *Halavuwa á elva an gá use*

<sup>11</sup> Daaci a jamima shifa kwa egdzar mama-aha-aaruwa. Wavauwáva, gawansege duksa mándzawe am zlálava á kure bademme. Yawanaaka elva-aaruwa na, a deska am ire á kure. Njawinja á ba áte ye palle, magauka názena á de sakurá dágala na. Daaci á de yakuraaka Dadaamiya na edda á wáyáva ba ñane palle, á vatertá ba ñane hairire ge emnde na.

<sup>12</sup> Gauga use-aaruwa ba shagera am dágave á kure, kwa emnde á Dadaamiya bademme. Bademme á emnde a fetarfe na tá áhuna keni, tá anƙwa á gakur use-aatare.

<sup>13</sup> A melakurumela Dadaamiya, ganakini kwá shánsha ñgurna á Yaakadada Yaisu \*Almasiihu ma vaatara keni, kwá shánsha wáyáva na a wayamiyaa Dadaamiya an ñane na am kure. A janmeje Shedekwe Cufedfe ye á kure bademme.

## Wakita na a puwatertaa Paul ge emnde a GALATIYA

### *Ga use á Paul*

<sup>1</sup> Náwa wakita na yá anƙwa puwetá ba iya Paul ya slebela á Yaisu \*Almasiihu. A givaa urimagweka slebela ɲanna, a beliyaa urimagweka, a beliyaa ba Yaisu an ire-aara tá antara Eddenjara Dadaamiya na a tsante am faya na.

<sup>2</sup> Iya, ɲá antara emnde a fetarfe na tá áhuna bademme, ɲá anƙwa á gaku use á ɲere ge kure kwa emnde a fetarfe na kwá am larde á Galatiya bademme.

<sup>3</sup> A magarakuránmaga tara Eddemiya Dadaamiya antara Yaakadada Yaisu Almasiihu ɲgurna, a varakurteva hairire.

<sup>4</sup> Yaisu Almasiihu a yaa ba shifa-aara ge enzlamise miya am haypa-ahamiya, geni a shanka adaliye duniya laakire na hakuma áte miya mazla-aara. A maganaahe á ba áte una á kataná Eddemiya Dadaamiya.

<sup>5</sup> Galaumigálá Dadaamiya dem ba ge ɗekideki. \*Aamin.

### *Baaka labare á higa umele sey ba palle na*

<sup>6</sup> Yá maga ba najipu áte kure, adaba Dadaamiya a magakuraa ɲgurna á kya erva an Yaisu \*Almasiihu, a gakuve emnde-aara, aley kerten eptsakuranveptsá iga, kwa cenvaa labare á higa umele.

<sup>7</sup> Amá baaka labare á higa umele sey ba palle ɲanna ya balakursebale na. Ya ndanaa adaba uwe una, adaba tá anƙwa weshakurweshá emnde umele, tá kátá eptsante labare á higa, elva a Yaisu Almasiihu na.

<sup>8</sup> Amá ma a de balakursaa ware labare á higa umele arge una ɲa dakurnaa ɲere na wá, ma ba ɲere ɲanna, ma malika a sawa am samaya keni, a nyainyainvenyainye Dadaamiya edda-aara.

<sup>9</sup> Ndza keni ya ndakurndaha. Kina keni yá ndakurndaha zlaɓe adaliye: ma ware una a de balakurse labare á higa umele, gergere antara una kwa cenanaa kure, a nyainyainvenyainye Dadaamiya edda-aara.

<sup>10</sup> Emtu kwa kurken yá tsáká una ganakini a zlebarizleba emnde emtu? Iya yá kátá á zlebiyá ba Dadaamiya. Emtu kwa kurken yá kátá haya áza emnde emtu? Máki yá kátá haya áza emnde zlaɓe adaliye wá, yá taa gevka waladí á Yaisu Almasiihu.

### *Náwa a gevaa estuwa Paul slebela á Yaisu \*Almasiihu*

<sup>11</sup> Egdzar mama-aha-aaruwa, wayanwaya ge kwa diyeddiye ganakini labare á higa na ya balakursaa iya na wá, elva ɲanna elva á urimagweka.

<sup>12</sup> Adaba a binaa urimagweka elva ɲanna, a kwarisaa urimagweka, a binaa ba Yaisu an ire-aara.

<sup>13</sup> Ábi kwa cenánjena nja-aaruwa werre am sarte na ya tse á ba áte nadina á ɲere Yahudiya-aha. Am sarte ɲanna ndza ya shateru zladá kwakya ge emnde a fetarfe. Baaka názu ndza maganka ganakini yá keɗanaakeda elva ɲanna ba ɗekideki.

<sup>14</sup> Am jeba-aaruwa ndza ya jateruwa ba iya ge ukfe-aha-aaruwa umele ge mága názena am nadina á ɲere. Dabantedaba naɗe-aha na ta kwarajersaa eggye-aha á ɲere an ervaunde-aaruwa palle.

<sup>15</sup> Dadaamiya a eksise vateneka, a eksise kwaye zlaɓe yarika, a magiya ɲgurna, a naba ɗahite geni yá gevge sleslera-aara. Samsa sarte na a wayetaa ɲane maa,



<sup>16</sup> a naba marise Egdza-aara geni yá balaterá labare-aara ge emnde na ta baaka am nadina á Yahudiya-aha. Am sarte na a marise Egdza-aara nanna, danka ya ma ádeza ware keni ge ndava sawari.

<sup>17</sup> Ma á dem Urusaliima keni danka ya dekiđeki ge de ndava sawari áza emnde na ta gevaa itare zunḡwe emnde a bela á Yaisu \*Almasiihu. Ya naba tse am Dimaska nanna, ya naba zlala á dem haha á Arabiya. Daaci ya eptsehe zlađe adaliye á dem Dimaska.

<sup>18</sup> Ya magaa yawe keye kalkale, lauktu ya dem Urusaliima, ya de mbapse antara Piyer, ya magaa ba maka buwa ázeḡara.

<sup>19</sup> Amá puwanteka ice-aaruwa dekiđeki áte emnde a bela umele, sey ya naa ba Yakuba egdza emmeḡara ge Yaakadada.

<sup>20</sup> Náwa Dadaamiya, icanka fida am názena yá bakurná ya na ba palle keni.

<sup>21</sup> Am tsa-aaruwa am Urusaliima, kwaye ya zlala á dem haha á Siriya, antara haha á Silikiya.

<sup>22</sup> Am sarte nanna maa, zlađe diyarika emnde a fetarfe na tá am kwara á Yahudiya.

<sup>23</sup> Sey ta cenaa ba labare-aaruwa áza emnde a fetarfe umele. Ta bantsa emnde nanna: Edda-una ndza a shaḡeru zlađa werre na wá, eptsaptepsa. Kina wá, ḡane keni á aḡkwa bala labare á higa na ndza a kátá keđanaakeđa ba dekiđeki na.

<sup>24</sup> Daaci ta fantau ge gálá Dadaamiya adaba slera-aaruwa.

## 2

### *Zunḡwire á jammeje á Paul antara emnde a bela umele*

<sup>1</sup> Daaci ya magaa yawe kelaawa ju ufađe ágashe nanna, ya naba epts adaliye á dem Urusaliima, ḡa saa antara Barnabas, aḡkwa Titus ázeḡere.

<sup>2</sup> Epts-aaruwa nanna keni, ndza a marisaa ba Dadaamiya geni sey yá epts. Am saasa á ḡere nanna wá, ḡa magaa jahava sey ba ḡere antara male-aha á emnde a fetarfe. Daaci ya palaterse sera á labare á higa na ya balateraa ya ge emnde na ta baaka am nadina á ḡere Yahudiya-aha. Adaba má jammeka elva á ḡere antara itare, bademme á slera-aaruwa na ya maganaa ya werre, antara una ya maganaa am sarte nanna, ma andze a gev ba dey.

<sup>3</sup> Titus na ḡa jaa daba kerđe na wá, ḡane ura Yunaniḡkau, amá hyarareka ganakini sey ba laari á demda am shedekwe, á gevge emtsaade ura Yahudiya.

<sup>4</sup> Mbatu wá, tá aḡkwa emnde na ta bantsa itare ta emnde a fetarfe, mbate fida na, am jahava á ḡere nanna. Ta bantsa itare wá: Sey a demda emtsaade am shedekwe. Emnde nanna wá, ta saḡerte á ba an ila ge se gya gyada á ḡere. Adaba ḡa kwaraná ba ḡere ire á ḡere áte názena am nadina á ḡere Yahudiya-aha, adaba barka á Yaisu \*Almasiihu. Daaci tá kátá eptsarera á dem \*tawraita nanna zlađe adaliye.

<sup>5</sup> Amá ḡere eksaḡeraareka elva-aatare dekiđeki ba cekwaangudfi keni. Wayaḡerka tá badzanvebadze labare á higa na, adaba nanna elva a jirire, geni kure keni kwá cenvaacena jirire nanna, kwá tsaatse átekwa.

<sup>6</sup> Amá emnde na ta male-aha ba itare am emnde a fetarfe na wá, ma ta male-aha, ma ta male-aha ka keni, ba duksa palle ázerwa. Adaba Dadaamiya wá, ḡane á zhareka ice á ura. Am sarte na ya palateraa labare á higa na ya balateraa ge emnde na wá, male-aha nanna ndaharika geni yananseye elva am waazu-aaruwa.

<sup>7</sup> Baira ta naba diyeddiye ganakini a fiyaara ba Dadaamiya slera á de balaterá labare á higa ñanna ge emnde na ta baaka am nadina á ñere Yahudiya-aha. Ba seke una a far ge Piyer ge de balateran ge Yahudiya-aha.

<sup>8</sup> Ta naba lansaule geni ba Dadaamiya na a vantaa hakuma ge Piyer, a belanaa á dem Yahudiya-aha na wá, ba duksa palle ge iya keni, a beliyaa ba ñane á dem dagave á emnde na garevka Yahudiya-aha.

<sup>9</sup> Daaci ba tara Yakuba antara Piyer ira Yuhanna una, ta male-aha á emnde a fetarfe ñanna, naranna itare geni ba jirire a fiyaara ba Dadaamiya slera ñanna. Ta naba vite erva, ta vante ge Barnabas keni, jammeje elva á ñere áte una ñanna. Daaci ña zluhe am sawari geni ñere, ñá de balaterá labare á higa ge emnde na garevka Yahudiya-aha, itare tá de balaterán ge Yahudiya-aha.

<sup>10</sup> Elva palle ta banerna itare wá, a ba itare: Viyawateraaka talage-aha á miya áhuna. Una ñanna, duksa na ni yá maganá ya keni an ndzedfa-aaruwa baðemme.

### *Paul a valaare ge Piyer á katafke á zlamaha*

<sup>11</sup> Haraare am iga á una ñanna maa, samsa Piyer á sem Antakiya, ya naba valaarehe á katafke á zlamaha, aɗaba magaaka duksa an unñule-aara.

<sup>12</sup> Aɗaba am zunñwire wá, ta zaa ɗafa ba kerɗe an emnde na ta baaka am nadina á ñere. Am sarte ñanna maa, Yakuba a belaa emnde á dezeńere. Ba saremsa emnde ñanna wá, mele Piyer zaaka ɗafa antara ñere mazla-aara. Aɗaba a wanaa lyawa átuge itare. Aɗaba itare ñarnaanja nadina á ñere an tsaka ire.

<sup>13</sup> Yahudiya-aha umele na fartarfe na keni, garevge an dzama ire bubuwa ba seke Piyer. Ba Barnabas an ire-aara keni gazlaagazla, a magan ba seke náza-aatare.

<sup>14</sup> Ba ya nanna dzalaranvedzale jirire á labare á higa, a ba iya, yá elvan ge Piyer á katafke-aatare baðemme: Ekka, ka ura Yahudiya, amá ka sem ba estuwa ásehuna, ka ganve ire á ña ba seke ka ura Yahudiya ka, njanɗa áte njá á Yahudiyire. Máki ba estuwa, ká dzegwaná estara hyaterar ge emnde umele geni a njarinja áte njá á Yahudiyire?

### *Emnde baðemme tá enzlese á ba an fetarfire*

<sup>15</sup> Ñere wá, ña Yahudiya-aha miyenne. Ña emnde na baaka nadina-aatare, ña ɗahaterá an emnde a haypa na ka.

<sup>16</sup> Amá diyañerdiya ganakini ura á shánka jirire áza Dadaamiya an ɗaba \*tawraitá, sey an fetarfire áte Yaisu \*Almasiihu. Ba ñere keni, ña fetaare á ba áte ñane, lauktu ña shaa jirire áza Dadaamiya. Ña shanaa aɗaba ña ɗabete tawraiteka. Baaka ura á shá jirire aɗaba á ɗabete tawraitá.

<sup>17</sup> Daaci kina wá, ñá anɗkwa shá jirire á ñere áza Dadaamiya an fetarfire áte Yaisu Almasiihu. An una ñanna wá, ñere keni ñá an haypa ba seke emnde baðemme. Máki estuwa wá, amaana a sepuwanermaa ba Yaisu Almasiihu emtu am haypa ñanna? Estuweka ɗekideki.

<sup>18</sup> Amá má ya eptsarhe zlaɓe ádaliye, yá habaza názena ya eptsanve iga wá, yá maga duksa laake á katafke á Dadaamiya.

<sup>19</sup> Máki áte elva á tawraitá wá, iya ba seke yá an emtsa ázenara. Una keni a jiyaa ba tawraitá ñanna, geni yá shá shifa umele ge ɗaba Dadaamiya. Am sarte na ta zlenelaa Yaisu áte dzanɗala, gevge ba seke ta cebaañer kerɗe antara ya.

<sup>20</sup> Shifa na yá an ñane kina na wá, shifa-aaruweka, yá njá an shifa á Yaisu Almasiihu. An shifa na yá njá an ñane am duniya na wá, yá njá

an fetarfire áte \*Egdza á Dadaamiya. A wayitaa ba ñane, haa a naba yaa shifa-aara adaba iya.

<sup>21</sup> Iya wá, ya taa yanaaka ñurna á Dadaamiya, geni sey yá daba ba tawraita. Adaba ma andze tá naba shansha emnde jirire áza Dadaamiya an daba tawraita wá, daaci emtsa á Yaisu Almasihu na ma andze á gev ba dey.

### 3

#### *Daba \*tawraita bi fetarfire áte Yaisu \*Almasihu*

<sup>1</sup> Kure emnde a Galatiya wá, baaka enkale á kure. A kedakuraa ware estuwa? Ya palakurnaa tsa sera-aara bademme geni a emtsa estara Yaisu \*Almasihu áte dzaŋgala.

<sup>2</sup> Ndava-aaruwa ba palle ázekure, vawiteva jawapa! Dadaamiya a vakurte Shedekwe Cufedde; kwa shaa Shedekwe ñanna adaba kwa dabete \*tawraita emtu? Emtu adaba kwa cenaa labare á higa, kwa fetaare an ervaunde á kure palle he?

<sup>3</sup> A kedakuraa uwe estuwa áte enkale? Am fantaufe wá, kwa tsaá á ba áte hakuma á Shedekwe Cufedde, amá kina wá, kwá kátá zlnaazle an ndzedá á ire á kure emtu?

<sup>4</sup> Kwakya názena a maganaa Dadaamiya an sleksire-aara am dagave á kure, bademme á una-aha ñanna á gev ba dey emtu? Tamanka ganakini una ñanna á gev ba dey.

<sup>5</sup> Dadaamiya a vakurte Shedekwe Cufedde, a magaa najipu-aha kwakya am dagave á kure. A magaa una-aha ñanna adaba kwa dabete tawraita emtu? Emtu adaba kwa cenaa labare á higa, kwa fetaare an ervaunde á kure palle he?

<sup>6</sup> Yahauteyeha názena a ndanaa wakita á Dadaamiya áte Ibrahim, a ba ñane: Ibrahim a fetaare áte Dadaamiya. Adaba una ñanna a shaa jirire áza Dadaamiya.

<sup>7</sup> Daaci diyaweddiye geni, bademme á emnde na fartarfe áte Dadaamiya á ba an jirire, ba itare una ta wulfe-aha á Ibrahim.

<sup>8</sup> Ndza a ndaase vateneka Dadaamiya názena a ganvaa ñane kina. A ba ñane am wakita-aara wá, ba emnde na garevka Yahudiya keni, tá de fetarfe áte ñane. Adaba fetarfire-aatare ñanna wá, á de gatervege emnde a jirire á katafke-aara. Adaba una ñanna, a ndanse labare á higa ñanna ge Ibrahim emtsaade, a ba ñane á elvan ge ñane: Yá de ga barka áte nalgaadama bademme adaba ka.

<sup>9</sup> Ibrahim a fetaare áte Dadaamiya, daaci Dadaamiya a gan barka. Diyaweddiye ganakini bademme á emnde na ta fetaare áte Dadaamiya, Dadaamiya á de gater barka ge itare keni.

<sup>10</sup> Adaba bademme á emnde na ta tsaá á ba áte \*tawraita, geni tá shá jirire an ñane áza Dadaamiya na wá, bademme tá an nyainye áza Dadaamiya. Adaba ankwá an puwa am wakita á Dadaamiya, a ba ñane: Edda una maganaaka názena á ndaaná tawraita na bademme wá, an nyainye áza Dadaamiya.

<sup>11</sup> Baaka shaige-aara, diyamidiya ganakini baaka ura á shá jirire áza Dadaamiya an daba tawraita. Adaba ankwá an puwa am wakita á Dadaamiya, a ba ñane: Edda una a shaa jirire áza Dadaamiya an fetarfire wá, ba ñane una an shifa a jirire.

<sup>12</sup> Tara d̄aba tawrait̄a an fetarfire wá, tá maslaaveka. An̄kwa an puwa am wakita á Dadaamiya, a ba ɲane: Edda una a tsaa á ba áte mága názena am tawrait̄a wá, shifa keni á shaná á ba an tawrait̄a ɲanna.

<sup>13</sup> Amaana wá, má an nyainye áza Dadaamiya, ad̄aba dzegwamiyánka mága názena a ndahanaa tawrait̄a na bad̄emme. Amá \*Almasiihu a se lyamivaare nyainye ɲanna ge miya, a demaa ɲane am slede á miya. Ta puwete ba estuwa am wakita á Dadaamiya, geni máki zlenjelarzlenjela ura áte nafa wá, amaana an nyainye edda-aara.

<sup>14</sup> Yaisu Almasiihu a magaa una ɲanna wá, geni barka na a ba Dadaamiya á elvan ge Ibrahim̄a á de gater ge nalgaadama bad̄emme na wá, á gevge á kya erva an ɲane. Zlabe ad̄aliye a magaa una ɲanna geni mí shá Shedefkwe Cufed̄de na a ba Dadaamiya á de vamiteva má famitaarfe na.

### *\*Tawrait̄a á badzeka namána á Dadaamiya*

<sup>15</sup> Egdzar mama-aha-aaruwa, cenausena, náwa yá palakurá elva an garava á názena mí maganá miya emndimagwaha. Máki njarinja emnde buwa am haha, ta ɲgud̄aa namána wá, baaka slepekyateraapekya, baaka slefateraarfe keni.

<sup>16</sup> Ba duksa palle an namána á Dadaamiya keni. Werre wá, Dadaamiya a maganaa \*waada ge Ibrahim̄a. Waada ɲanna a maganan ge ɲane antara wulfe-aara. Ad̄aba a ba ɲane: Watse yá gan barka ge nalgaadama bad̄emme á kya erva an wulfe á ɲa. Ndahaaka wakita á Dadaamiya: á kya erva an wulfe-aha á ɲa, amá a baa: wulfe á ɲa. Wulfe-aara ɲanna wá, ba Yaisu \*Almasiihu.

<sup>17</sup> Náwa názena yá kátá bakurná ya: Duksa zun̄ɲwe wá, Dadaamiya a maganaa waada ge Ibrahim̄a. A magaa yawe deremke ufāde an kul keye, lauktu a vaterte \*tawrait̄a ge Yahudiya-aha. Aley keni tawrait̄a ɲanna á badzeka názena Dadaamiya a maganaa waada-aara ge Ibrahim̄a werre. Tawrait̄a á pekyeka namána á Dadaamiya d̄ekid̄eki, á pekyeka názena a magateraa waada-aara ge emnde keni.

<sup>18</sup> Amá ma andze vaterteva Dadaamiya ge emnde názena a magateraa waada-aara na ad̄aba ta d̄abete tawrait̄a wá, daaci ma a gevka ad̄aba namána mazla-aara. Amá Dadaamiya a gan barka ge Ibrahim̄a, ad̄aba a ɲgud̄anaa namána-aara.

<sup>19</sup> Máki estuwa, ázara dalila á \*tawrait̄a ɲanna ba d̄ekid̄eki? Dalila á tawrait̄a ɲanna a fateraara Dadaamiya ge emnde arge názena a magateraa waada-aara na wá, ba ge maraterá haypa-aha-aatare parakke. Dadaamiya a vaterte tawrait̄a ɲanna ba ge sarte cekwaan̄gud̄i ge emnde. Ba ge ufa wulfe á Ibrahim̄a na a ɲgud̄ateraara namána ge emnde bad̄emme á kya erva an ɲane na. Ba samsa ɲane wá, baaka hakuma á tawrait̄a mazla-aara. Tawrait̄a wá, Dadaamiya ndza a belaa ba malika-aha an ɲane, ge saterán ge emnde. Amá ndza an̄kwa sledagave á emnde antara malika-aha ɲanna.

<sup>20</sup> Deme keni wá, sledagave wá, á tseme am dagave á emnde buwa. Amá am sarte na Dadaamiya a maganaa \*waada ge Ibrahim̄a wá, ba ɲane antara Dadaamiya, baaka sledagave-aatare.

### *Ázara dalila á \*tawrait̄a*

<sup>21</sup> Una ɲanna á bánba ganakini tara \*tawrait̄a tá gyaaveka an namána á Dadaamiya emtu? Estuweka d̄ekid̄eki. Ad̄aba ma andze a dzegwándzegwa tawrait̄a vaterte shifa ge emnde wá, ma andze a

dzegwándzegwa vaterte jirire keni á katafke á Dadaamiya. Amá baaka una áza tawraitá.

<sup>22</sup> Baira deme a ba wakita á Dadaamiya wá, bademme á emnde a duniya tá á ba am erva á haypa. Estuwa ankwá á vaterte názena a magateraa waada-aara na ge emnde adaba fetarfire áte Yaisu \*Almasiihu. Á vaterte adaba fetarfire-aatare.

<sup>23</sup> Amá am sarte na ndza zlafe baaka barama ge emnde geni tá fetarfe áte Yaisu wá, ndza a kwaramiyaa ba tawraitá, dem sarte na Dadaamiya a weramitaa barama á fetarfire.

<sup>24</sup> Una ba estuwa, ndza a giyamiyaa ba tawraitá sem sarte na samsa Yaisu Almasiihu. Daaci shamiyánsha jirire áza Dadaamiya adaba famitarfe.

<sup>25</sup> Daaci kina wá, sarte á fetarfire áte Yaisu Almasiihu; á giyamiyá tawraitá ka mazla-aara.

<sup>26</sup> Bademmire á kure kwa ba egdzara á Dadaamiya adaba gakurevge palle antara Yaisu Almasiihu an fetarfire á kure áte nane.

<sup>27</sup> Bademmire á kure kwa emnde na magarakuránmaga baptisma an zhera á Yaisu Almasiihu na wá, kina wá, kwa de eksa ba Yaisu Almasiihu an ire-aara.

<sup>28</sup> Mazla-aara wá, baaka gergerire am dagave á Yahudiya-aha antara emnde a jeba umele bademme. Baaka gergerire am dagave á nave-aha antara emnde na tá kwaraná itare ire-aatare. Baaka gergerire am dagave á zhele an mukse. Bademme á kure kwa ba palle adaba kwa emnde a Yaisu Almasiihu.

<sup>29</sup> Zlafe adaliye máki kure gakurevge kwa emnde á Yaisu Almasiihu wá, daaci kure keni kwa wulfe-aha á Ibrahimá. Daaci kwá de shaná ba kure názena Dadaamiya a maganaa waada-aara ge Ibrahimá antara wulfe-aha aara na.

## 4

<sup>1</sup> Amaana elva nanna wá, egdzere wá, á de zaná ba nane tsa waráta á há á eddenjara bademme, amá am sarte na zlafe egdzere wá, tá kwaraná ba emnde ba seke nave.

<sup>2</sup> Am sarte na zlafe egdzere wá, tá fanuwa ba emnde hyema, tá giyaná ba itare, á cená ba náza-aatare, dem sarte na má banba eddenjara nane keni hyephye ura.

<sup>3</sup> Ba duksa palle ge miya keni. Am sarte na zlafe ma ba seke egdzara wá, ndza tá kwarámiya ba jini-aha á shaitaine.

<sup>4</sup> Daada áte sarte na a tsanaa Dadaamiya, a naba belaa Egdza-aara á sem duniya, a se yanaa ba mukse, ta yanaa á ba am \*tawraitá nanna,

<sup>5</sup> geni a varsevare emnde na á kwaraterá tawraitá, á gamivege egdzara á Dadaamiya.

<sup>6</sup> Kure wá, kwa ba egdzara á Dadaamiya. Adaba una nanna a vakurte Shedekwe á Egdza-aara ankwá am kure. Máki kwá dāha Dadaamiya an Dada á dāha ba Shedekwe-aara nanna á kyá an we á kure.

<sup>7</sup> Bademmire á kure kwa nave-aha ka mazla-aara, kwa egdzara á Dadaamiya. Máki kwa egdzara-aara wá, bademme á názena am hufe á há-aara ba náza á kure.

### *Názena á kataná Paul áza emnde a fetarfe*

<sup>8</sup> Werre am sarte na diyakurka Dadaamiya wá, ndza kwa nave-aha á dadaamiya-aha á fida gergere kwakya.

<sup>9</sup> Amá kina wá, diyakurdiya Dadaamiya á jirire, baira deme kwá an diya áza Dadaamiya. Kwá eptsaná estara zlafe adaliye ire á kure ádeza



jini-aha á laakire ñanna, ßaaka nampire-aatare na? Labara kwá kátá gev nave-aha-aatare zlaße ádaliye?

<sup>10</sup> Ya ndaanaa adaba uwe una? Adaba kure kwá dzámá ba munri-aha, hare-aha á umele, tere-aha á umele, lauktu-aha á umele, ira sakanderi-aha baðemme.

<sup>11</sup> Yá dzámá ire jipu, yá kuvá geni slera-aaruwa na ya maganaa ya am dagave á kure na a gevka dey.

<sup>12</sup> Ate elva á \*tawraitá wá, taslawá á kure gawevge ba seke iya, egdzar mama-aha-aaruwa. Adaba iya, ya ura Yahudiya, amá ganevge ba seke kure. Sem vatena keni zlaße ßaaka emtanjire na kwa magitaa kure ðekidfeki.

<sup>13</sup> Diyakurdiya ba kure keni zunñwire á labare á higa na ya de vakurtaa ya wá, ndza a ñiyaa ba lapikere am ekse á kure, lauktu ya magakuraa waazu ñanna.

<sup>14</sup> Ge jirire wá, ndza shakurushe zlaða arge iya am lapikere-aaruwa ñanna. Amá yakurika, zharakurika seke ura dey. Baira ðeme lyakurivalya ba seke ya malika á Dadaamiya, ba seke ya Yaisu \*Almasiihu an ire-aara.

<sup>15</sup> Am sarte ñanna wá, ndza kwakya higa á kure. A jaara uwe an higa á kure kina? Am sarte ñanna wá, diyandiya geni ma andze kwá dzegwándzegwa wá, ba ice á kure keni, ma kwá sansese, kwá viteva.

<sup>16</sup> Kina wá, kwá eksiya áte kelaadire mazla-aara, adaba ya bakuraa jirire emtu?

<sup>17</sup> Diyandiya ganakini tá anjwa emnde na tá badakurbada geni kwá ðaba ba itare an enjale á kure baðemme, amá ganakini kwá shá shifa ka. Tá kátá ba tegakuraahe an ya zlauzle.

<sup>18</sup> Máki an unñule-aara wá, shagera jipu geni tá wayavewaya emnde am dagave-aatare. Amá iya keni, a yiyaaka ervaunðe á kure, ma yá anjwa am dagave á kure, ma ya ßaaka am dagave á kure keni.

<sup>19</sup> Iya wá, zlaße yá shá ba zlaða adaba kure egdzara-aaruwa. Ya ba seke mukse na am zlaða á ya egdzere. Lauktu á zlauzle zlaða-aaruwa wá, sey má njánja Yaisu \*Almasiihu am kure ba shagera.

<sup>20</sup> Kina wá, ervaunðe-aaruwa á kátá ma ba ya am dagave á kure, lauktu ma yá shantaushe ge názena yá bakurná ya. Adaba kina na wá, an wेषha ire-aaruwa jipu.

### *Tara Hajara an Saraatu ta garava-aha á namána gergere buwa*

<sup>21</sup> Ekkure emnde na kwa bantsa kure kwá kátá á kwarakurá \*tawraitá na, cenakuránka názena a ndahanaa tawraitá emtu? Vawiteva emtsaadfe jawapa?

<sup>22</sup> Anjwa an puwa am wakita á Dadaamiya wá, a ba ñane wá, Ibrahimá ndza a shaa egdzara buwa. Egdzere palle a yanaa an kwatena, palle-aara a yanaa an mukse-aara.

<sup>23</sup> Egdza á kwatena na wá, ta yan ba seke emnde baðemme. Amá mukse-aara wá, a yan estuweka náza-aara. Dadaamiya ndza a maganaa \*waadaaara ge Ibrahimá geni watse á shá egdze ñanna.

<sup>24</sup> Anjwa názu á baminá elva ñanna. Nwasha buwa ñanna, tara Hajara an Saraatu na keni, tá maramiyá namána-aha gergere buwa a ngudanaa Dadaamiya. Hajara wá, ñane kwatena, á maramiyá namána na a ngudanaa Dadaamiya áte ire á wa Sina. Ñane a yayaa egdzara-aara am navire.

<sup>25</sup> Adaba Hajara wá, ñane gevge ba seke wa Sina am haha Arabiya. Adaliye ñane gevge ba seke berni á Urusaliima vatena. Adaba baðemme á emnde na tá am huðe-aara, ta ba nave-aha á tawraitá.

<sup>26</sup> Mukse á há wá, ñane gevge ba seke Urusaliima á jirire na am samaya na. Á kwaraná ba ñane ire-aara, ñane una emmemiya ge miya.

<sup>27</sup> Adaba anjwa an puwa am wakita á Dadaamiya, a ba ñane: Ekka mukse dziire na yanjka egdzere defekiki, tapakanaaka zladá á yá egdzere defekiki na, kina wá, ehiga an ervaunđe á ña bademme. Adaba mukse á keliya wá, tá hwiya ba egdzara-aara arge egdzara á mukse á nawiya.

<sup>28</sup> Adaba una ñanna kure keni yarakursiye ge buwire, gakurevge ba egdzara á Dadaamiya egdzar mama-aha-aaruwa. Adaba a tsanaa ba estuwa Dadaamiya am waada-aara. Werre keni ndza a maganaa waada-aara ba estuwa ge Ibrahimia geni á de shá Isiyaaku.

<sup>29</sup> Am zamana á Ibrahimia werre ñanna wá, egdze na a yanaa Hajara ba seke náza á emnde bademme na, a faa zladá áte egdze na a yanaa Saraatu an hakuma á Shefekwe Cufedde na. Am dagave á miya vatena keni ba duksa palle.

<sup>30</sup> Amá ázara a ba wakita á Dadaamiya? A ba ñane: Ngyainsengye mukse á kwatena na, a ezalála an egdza-aara. Adaba egdza á kwatena á taa fetka erva-aara áte waráta á eddenjara, sey á záná ba egdza á mukse á há.

<sup>31</sup> Adaba una ñanna egdzar mama-aha-aaruwa, miya wá, ma egdzara á mukse á kwatena ka, ma egdzara á mukse á há na a kwaranaa ba ñane ire-aara na.

## 5

### *Eptsauka á dem navire defekiki, kwaraukwara ba kure ire á kure*

<sup>1</sup> Yaisu \*Almasiihu a enzlamise am \*tawraitá wá, geni mí kwaraná ba miya ire á miya. Adaba una ñanna, tsawaatse ba shagera, a eptsarakuraaka zlahe adaliye á dem navire.

<sup>2</sup> Náwa názu yá bakurná iya Paul: Máki eksakuraarekse geni tá puwakurá á dem shefekwe wá, baaka názena kwá shaná kure am elva á Yaisu Almasiihu defekiki.

<sup>3</sup> Náwa yá ndakurndá, ma a de demá ware á kure am shefekwe ñanna keni, famfa ire-aara am laarire, sey a maganaamaga edda-aara názu am tawraitá bademme.

<sup>4</sup> Kure emnde na kwa bantsa kure, kwá shá jirire áza Dadaamiya an daba tawraitá na wá, tegakurevtege antara Yaisu Almasiihu, eptsakuranveptsá iga ge ñgurna á Dadaamiya.

<sup>5</sup> Amá ñere wá, fanjertefa tama á ñere áte Dadaamiya ganakini watse á vanjerte jirire adaba fanjertarfe, adaba duksa umeleka. Una názena ñá ufáná ñere an ndzedá na á vanjerte Shefekwe Cufedde.

<sup>6</sup> Máki gamiyevge palle antara Yaisu Almasiihu wá, ma damiyemda am shefekwe, ma damiyemka keni ba duksa palle. Duksa yaikke wá, ba fetarfire. Amá wá, a naranna emnde fetarfire á miya. Una ñanna slera á wayavire.

<sup>7</sup> Am zunjwire ndza shagera zlaláva á kure. Á, salikataliya na wá, shagerka zlaláva á kure. A piyakurtaa ware ge mága jirire?

<sup>8</sup> Edda-aara ba fida-aara, a belanaa Dadaamiya na a dakurdaha na ka.

<sup>9</sup> Una ba jire, egdza shahi á makala ba cekwaangudi á tsantetse ukpa na an wasla bademme.

<sup>10</sup> Adaba barka á Yaakadada wá, fantarfe an kure á ba an jirire, geni á de geraavka elva á miya. Amá edda una anjwa á weshakurweshá ñanna wá, ma ware edda-aara keni, á de ñezleka am shairiya á Dadaamiya.

<sup>11</sup> Egdzar mama-aha-aaruwa, iya wá, ya yán vateneka balaterá elva a dem shedekwe ge emnde, geni tá shá jirire an ñane áza Dadaamiya. Ma andze yá bálá ba una ñanna sem vatena wá, ma tá feka Yahudiya-aha zladá áte ya mazla-aara. Daaci elva a emtsa á Yaisu \*Almasiihu áte dzaṅgala na keni, ma andze á taa yanaaka ervaunḡe-aatare.

<sup>12</sup> Emnde ñanna tá weshakurweshá na wá, a datsaraadátsá kwa náza-aatare baḡemme, a garevge naḡima-aha.

<sup>13</sup> Daaci egdzar mama-aha-aaruwa, kure wá, a ḡahakurtaa ba Dadaamiya, geni kwá kwaraná ba kure ire á kure. Am kwara ire á kure ñanna maa, magauka názena á kataná ire á kure baḡemme. Arge una ñanna wá, ma ware keni a maganánmaga duksa ge ura an wayavire.

<sup>14</sup> Adaba shairiya-aha-aara baḡemme jammeje am shairiya palle, a ba ñane: Ewwáya sleriya á ña ba seke ire á ña.

<sup>15</sup> Amá má kwá dagala am dagave á kure, kwá wawa vuwa á kure an slare ba seke dabba-aha á kaamba wá, faufa kwa hyema, keḡawanaaka shifa á kure baḡemme.

### *Yawanya a tedakurteda ba Shedekwe Cudedḡe*

<sup>16</sup> Názena yá bakurná iya na wá, yawanya a tedakurteda ba Shedekwe Cudedḡe. Magauka názena ni á kataná ba ire á kure.

<sup>17</sup> Adaba názena á kataná ire á urimagwe wá, tá gyaaveka antara náza á Shedekwe Cudedḡe. Názena á kataná Shedekwe Cudedḡe keni tá gyaaveka antara una á kataná ire á urimagwe. Duksa-aha buwa ñanna wá, tá jammeka ḡekideki. Daaci kwá taa maganaaka názena ni á kataná ba ire á kure.

<sup>18</sup> Daaci má á tefaaakurá Shedekwe Cudedḡe wá, kwa baaka am erva á \*tawraitá mazla-aara.

<sup>19</sup> Baḡemme á názena á kataná ire á urimagwe á ba áte parakkire. Duksa-aha ñanna ba tara gwardzire, dakarire, zawarire,

<sup>20</sup> kyula hele, mága namselkwa, mága kelaadire, dagala, shelha, ica ervaunḡe, gardire, tega ye á emnde, antara mága gergerire am dagave á emnde.

<sup>21</sup> Zlaḡe áḡaliye, danḡwire antara gev slembazla ira mága slakwatsire. Anḡwa zlaḡe áḡaliye jeba á duksa-aha ñanna kwakya á kataná ire á urimagwe. Ba seke una ya ndakurndaha na, yá fakuremfe zlaḡe áḡaliye am vuwa, baḡemme á emnde na tá maga ba jeba á duksa-aha ñanna, tá shánka á dem zlaná á Dadaamiya ḡekideki.

<sup>22</sup> Amá nampire á slerá á Shedekwe Cudedḡe wá, tara wayavire, higa, hairire, farvaunḡe, zevarzire, magḡwire, dzayyire á ervaunḡe,

<sup>23</sup> kemaarire ira tá kwarukware vuwa-aatare. Baḡemme á duksa-aha ñanna wá, piyaaka shairiya á Dadaamiya.

<sup>24</sup> Emnde á Yaisu \*Almasiihu wá, cebaarceḡa sunu-aatare baḡemme áte dzaṅgala, baaka am itare mazla-aara.

<sup>25</sup> Ba Shedekwe Cudedḡe una slevamite shifa. Daaci yaumiyányá á taḡamitáḡa ba ñane palle.

<sup>26</sup> Yaumiyányá gálá ire, tatayaumika dagala an emnde, shelaumika keni.

## 6

### *Melawanumele ge ire á kure ge sepa gwatama-aha á kure*

<sup>1</sup> Ya ndaa ba kure egdzar mama-aha-aaruwa, máki kwá nanna dza-levdzale palle á kure á dem haypa wá, kure na kwá an Shedekwe á Dadaamiya na wá, naba melawanumele, eptsawanaaptsa zlaḡe áḡaliye

ásete barama. Amá wá, magauka an ervaunđe. Daaci ma ware á kure keni, a effa hyema geni a demka ñane keni á dem huđe-aara.

<sup>2</sup> Melawanumele ge ire á kure ge sepa gwatama-aha á kure. Má kwá anƙwa maga una ñanna wá, kwá anƙwa maga názena a fakuraara Yaisu \*Almasiihu am shairiya-aara.

<sup>3</sup> Má ura anƙwa slaslaná am ervaunđe-aara ganakini ñane hyephye am duksa, mbate keni hyepka ba názara keni, an una ñanna á kefaná ba ñane ire-aara.

<sup>4</sup> Daaci ma ware keni a zharanaazhárá názu am zlaláva-aara, máki shagera slera-aara, a vante higa ba ge ñane, amá adaba a jateru ge emnde umeleka.

<sup>5</sup> Adaba ma ware keni á ba an názena a faraa Dadaamiya ge ñane.

<sup>6</sup> Edda una á tsaha elva á Dadaamiya wá, a tegansetege názu am erva-aara bademme, a vanteva ge malum-aara keni.

<sup>7</sup> Diyaweddiye ba shagera geni ura á dzegwánka á zlerma Dadaamiya. Bademme á názena ni a jema edda-aara am haha, á de shá ba una ñanna.

<sup>8</sup> Edda una á maga ba názena á kataná ire-aara, á de shá ba emtsa. Amá edda una á maga ba názena á kataná Shedekwe á Dadaamiya wá, ñane á de shá shifa na á zleka na.

<sup>9</sup> Yaumiyanƙa mága maggwire. Adaba má samsa laukte-aara, zlaƙe yamiyanƙa wá, mí de shánsha nampire-aara.

<sup>10</sup> Adaba una ñanna, vacitu má njaanja slera á mága maggwire á katafke á miya wá, magaumimága una ñanna áte emnde bademme. Baaka deme seke emnde na fartarfe.

#### *Halavuwa á elva*

<sup>11</sup> Náwa una wá, yá anƙwa puwetá ba iya an erva-aaruwa, yá anƙwa puwan ba yaikyaike.

<sup>12</sup> Emnde na tá kátá hyakuraare á ba áte laarire, geni sey kwá demda am shedekwe na wá, tá kátá haya á ba áza emnde. Una ñanna tá magan ba geni a shaterka zlaƙa má tá maga waazu áte emtsa á Yaisu \*Almasiihu áte dzaŋgala.

<sup>13</sup> Adaba ba emnde na tá am shedekwe ñanna keni, ñarnaaka názena am \*tawrait bademme. Tá kátá puwakurá am shedekwe, ba geni tá gálá ire an kure, adaba kwá anƙwa dábaterdába.

<sup>14</sup> Amá iya wá, yá galaná á ba áte emtsa á Yaisu Almasiihu palle ire-aaruwa. Adaba emtsa-aara áte dzaŋgala ñanna wá, kazlaŋa á duniya gevge ba seke emtsa á katafke-aaruwa, iya keni, ganevge ba seke emtsa á katafke á kazlaŋa á duniya.

<sup>15</sup> Adaba áte barama á Yaisu Almasiihu wá, ma damda edda-aara am shedekwe, ma damka keni, ba duksa palle. Duksa yaikke wá, ba gev ura áŋwaslire.

<sup>16</sup> Bademme á emnde na ni tá njá á ba áte una ñanna wá, ba itare una ta emnde á Dadaamiya an jirire. Dadaamiya a zatervarze, a vaterteva hairire.

<sup>17</sup> Fetu vatena, edda-aara a siyanka fitenire na mazla-aara. Adaba ververe-aha na áte iya na wá, á maraná ba una ñanna ganakini iya wá, ganevge ya náza á Yaisu.

<sup>18</sup> Egdzar mama-aha-aaruwa, a magakuránmaga Yaakadada Yaisu Almasiihu ñgurna-aara ge kure bademme. \*Aamin.

## Wakita na a puwatertaa Paul ge emnde a AIFAISUS

### *Ga use á Paul*

<sup>1</sup> Náwa wakita na yá anƙwa puwetá bá iya Paul, a eksisaa ba Dadaamiya geni yá gevge slebela á Yaisu \*Almasiihu, yá anƙwa gakur use ge kure emnde á Dadaamiya am Aifaisus, ge kure emnde na ɲakurnaana elva á Yaisu Almasiihu an ervaunɗe á kure palle na.

<sup>2</sup> Tara Eddemiya Dadaamiya tá antara Yaisu Almasiihu, a magarakturamaga ɲurna, a varakurteva hairire.

### *Barka na á gaterá Dadaamiya ge emnde na garevge*

#### *palle antara Yaisu \*Almasiihu*

<sup>3</sup> Galaumigála Dadaamiya Eddenara ge Yaakadada Yaisu \*Almasiihu, adaba a gamiyar barka am duksa bademme á sá am samaya, adaba gamiyevge palle antara Yaisu Almasiihu.

<sup>4</sup> Dadaamiya ndza a dzeramise werre, kwaye zlaɓe ba duniya keni zlaɓe nderaaka emtsaade, geni mí de geva emnde cufedde, mí de gev palle antara Yaisu Almasiihu, watse baaka duksa mandzawe áte miya á katafke-aara.

<sup>5</sup> Adaba wayamiwayire, Dadaamiya a dzeramise werre geni á de gamive egdzara-aara á kya erva an Yaisu Almasiihu. A maganaa á ba áte namaari-aara.

<sup>6</sup> Daaci galaumigala Dadaamiya adaba kwakyire á ɲurna na a magaminaa ɲane ba dey á kya erva an Egdza-aara na a wayanaa ɲane na.

<sup>7</sup> Adaba emtsa á Egdza-aara, Dadaamiya a naba lyamisehe, a yamiyaare haypa-aha á miya. Á maraminá an una ɲanna kwakyire á ɲurna-aara na á magamiyan ge miya.

<sup>8</sup> Dadaamiya a magamiyaa ɲurna kwakya ge miya á bá iya na wá, adaba a vamite ilmu, a gamive emnde a enkale geni mí diyeddiye názena á kátá maganá ɲane na.

<sup>9</sup> A maramise nasherire á duksa na anƙwa á slaslaná ɲane kwaye kinekinaka, a njante geni á de maganá á kya erva an Yaisu Almasiihu na.

<sup>10</sup> Duksa na á kátá maganá ɲane na wá, amaana á de jemá duksa bademme, una am samaya, antara una áte haha bademme, á de yaná am erva á Yaisu Almasiihu. Daaci á de geva ɲane slekse arge duksa-aha ɲanna bademme má samsa laukte-aara.

<sup>11</sup> Dadaamiya anƙwa á maga duksa bademme áte una ndza a slaslanaa ɲane, a njante ganakini á de emmága na. Daaci a naba dzeramise kwaye kinekinaka geni watse á de gamive emnde-aara á kya erva an Yaisu \*Almasiihu, á de vamite dza á miya keni am duksa shagera na watse á de vaterte ge emnde-aara na.

<sup>12</sup> Daaci ɲere Yahudiya-aha na ɲa emnde zunɲwe ge fetaare áte Yaisu Almasiihu na wá, galaumigála Dadaamiya adaba una ɲanna bademme na.

<sup>13</sup> Ba estuwa ge kure keni. Am sarte na cenakurancena elva a jirire, elva a Yaisu Almasiihu na Dadaamiya a lyakurse an ɲane na, kwa naba fetarehe áte Yaisu Almasiihu. Daaci adaba gakurevge palle antara Yaisu Almasiihu, Dadaamiya a naba fete damshe-aara áte kure, amaana Shedekwe Cufedde na a ba Dadaamiya á de vamiteva na.



<sup>14</sup> Dadaamiya a vamite Shedekwe Cufedfe nanna wá, ba seke namána. Una nanna ba seydire geni duksa shagera na a ba nane á de vaterteva ge emnde-aara na keni watse mí shansha bademme. Watse mí shá una nanna má lyamiselye náza ba ge dekideki na. Daaci galaumigála Dadaamiya am yaikkire-aara.

*Paul á nhalateru ilmu antara diya ge emnde a fetarfe*

<sup>15</sup> Adaba una-aha nanna egdzar mama-aha-aaruwa, yá ankwá slafaná we-aaruwa kwakya ge Dadaamiya ádaba kure. Adaba cenanácena labare á kure ganakini shagera fetarfire á kure áte Yaakadada á miya Yaisu \*Almasiihu, cenanácena zlafe ádaliye ganakini wayakurwáyá an emnde á Dadaamiya kwakya.

<sup>16</sup> Ma vaatara keni yá ankwá slafaná ba we-aaruwa ge Dadaamiya ádaba kure, yá ankwá yehakuryeha jipu am maduwa-aha-aaruwa.

<sup>17</sup> Yá ankwá nala Dadaamiya Saksage, Dadaamiya á Yaakadada Yaisu Almasiihu na, geni á gakurvege emnde a ilmu, á marakuránmárá ire-aara an pute na kwá de diyeddiye nane ba shagera na.

<sup>18</sup> Zlafe ádaliye yá ankwá nalan ganakini á werakurta ice áte duksa-aha na a dhakur ge nane na, antara geni kwa diyeddiye ganakini duksa-aha nanna jauje ge duksa bademme, a fakúr ge kure, antara emnde-aara umele bademme.

<sup>19</sup> Zlafe ádaliye: Yá kátá kwá diyeddiye hákuma yaikke na jauje ge duksa bademme ankwá á maga slera ám miya emnde-aara na. Hákuma nanna wá, ba una ndza a magaa slera yaikke am Yaisu Almasiihu,

<sup>20</sup> am sarte na a tsantaa Dadaamiya am fáyá, a danaa á dem nadafa-aara am samaya na.

<sup>21</sup> Am samaya nanna wá, Yaisu Almasiihu de gevge slekse á malika-aha, antara male-aha-aatare, antara duksa-aha na tá án hákuma am samaya bademme. Ba nane palle una átire ge emnde bademme, una ma edda-aara a shaa eksle-ara keni. Ba nane palle una á kwára emnde am duniya na, antara am duniya na watse á de sáwá na keni bademme.

<sup>22</sup> Dadaamiya a fanem duksa bademme am erva ge nane. Zlafe ádaliye: a ganve slekse arge aiklaisiya-aara.

<sup>23</sup> Aiklaisiya wá, nane vuwa á Yaisu Almasiihu. Bademme á duksa na am Yaisu Almasiihu, ankwá am aiklaisiya. Yaisu Almasiihu wá, ma am tate-ara keni, nane ankwá bademme.

## 2

*Tseta am emtsa geva an shifa*

<sup>1</sup> Werre wá, ndza kwa ba seke emtsa á katafke á Dadaamiya adaba shagerkire an haypa-aha na kwa maganaa kure.

<sup>2</sup> Ma am zlalava á kure keni, ndza kwa ba palle antara emnde umele am duniya. Ndza kwa daba ba male á jini-aha na an hakuma am zhegela na. Á maganá ba nane slera-aara am emnde na tá fansareka ge Dadaamiya dekideki na.

<sup>3</sup> Werre wá, ba miya keni ndza mi ba seke emnde nanna, ndza mi maga ba názena á kataná ire á miya ge vuwa á miya. Adaba una nanna, miya keni ma andze mí de shá zladá kwakya áza Dadaamiya ba seke emnde a haypa umele.

<sup>4</sup> Amá gafka estuwa, adaba Dadaamiya wayamiwaya kwakya, daaci a naba zamivarehe.

<sup>5</sup> Ma ndza mi ba seke emtsa am ice-aara ádaba haypa keni, adaba wayava-aara áte miya na wá, a naba shifamite átirpalle antara Yaisu \*Almasiihu. Daaci kina wá, lyakurlya shifa á kure adaba ngurna á Dadaamiya.

<sup>6</sup> Adaba gamiyevge palle antara Yaisu Almasiihu na wá, Dadaamiya a naba tsamite átirpalle antara nane, kwaye a damiyaa á dem samaya, geni mí de njá am yaikkire áhuwa antara Yaisu Almasiihu.

<sup>7</sup> Dadaamiya a naba magamiyaa shagerire estuwa á kya erva an Yaisu Almasiihu na wá, geni ma vaatara keni á maraterná an una nanna ge emnde bademme ngurna yaikke na jauje ge duksa bademme na.

<sup>8</sup> Ba jirire Dadaamiya a lyakurse adaba slera á kure-ka, nane a lyakurse ádaba ngurna-aara. Una duksa dey na a vakurtaa nane adaba kwa fetare áte nane.

<sup>9</sup> Adaba slera á kure-ka, una defekideki, una ba ngurna-aara, geni ma ware edda-aara keni a galeka ire ba dey.

<sup>10</sup> Dadaamiya wá, a nderamihe, a vamite shifa ánwaslire á kya erva an Yaisu Almasiihu geni mí maga ba duksa na shagera na. Shagerire nanna keni, a tsatsaminaa ba nane kwaye am fakta.

*Am erva á Yaisu \*Almasiihu gamiyevge ba jeba palle*

<sup>11</sup> Adaba una nanna, yehauteyeha ba shagera geni kwaye am fantaufe, am jeba á kure bademme ndza kwa ba emnde na baaka nadina á kure. Yahudiya-aha itare ta emnde na tá am shedfekwe, ndza tá zharakur ba seke duksa ba dey adaba kwa baaka am shedfekwe. Amá una ba duksa na tá maganá ba emnde áte vuwa-aatare.

<sup>12</sup> Yehauteyeha zlafe adaliye ganakini am sarte nanna, kure ndza diyakurka elva a \*Almasiihu defekideki, ndza kwa baaka am kezlakula á \*Iserayiila-aha. Dadaamiya a ngudateraa namána-aha ge emnde-aara Iserayiila-aha, amá kure ndza kwa baaka am huđe-aara, ndza baaka tama á kure áte duksa á Dadaamiya defekideki, kure keni kwa ba emnde tsa am duniya na, aley ndza diyakurka Dadaamiya.

<sup>13</sup> Werre, ndza kwa yiyiye an Dadaamiya. Amá kina wá, kwa herzhe an Dadaamiya adaba gakurevge palle antara Yaisu Almasiihu na nane a naba yaa shifa-aara áte dzaŋgala adaba kure na.

<sup>14</sup> Shamiyansha hairire am dagave á miya antara kure kina keni, adaba ba gamiyevge emnde-aara. Werre wá, ndza ankwá tegava am dagave á Yahudiya-aha antara emnde na baaka nadina-aatare, amá nane a naba se magaa pute geni mí gevge ba palle. A janaahe ge nane dugune na ndza ba seke riya am dagave á miya na an emtsa-aara áte dzaŋgala.

<sup>15</sup> Shairiya á Yahudiya-aha na a ba nane: Sey ká maga una bi maŋka una na, a bezanaahe ge nane, geni á jaterme Yahudiya-aha antara emnde a jeba umele na baaka nadina-aatare na átirpalle. Ba seke una garevge palle am elva-aara na wá, daaci baaka gergerire-aatare mazla-aara, garevge ba palle, jeba ánwaslire. A feme estuwa hairire am dagave á miya.

<sup>16</sup> An emtsa-aara áte dzaŋgala nanna wá, Yaisu \*Almasiihu a naba janaahe dugune na ndza am dagave á jeba-aha gergere nanna, a magaa pute geni tá gevge ba jeba palle. Zlafe adaliye: a slapalateraahe bademme-aatare áza Dadaamiya.

<sup>17</sup> Sawa-aara á sem duniya na wá, a se bala ba elva a hairire, geni kure emnde na baaka nadina á kure, ndza diyakurka Dadaamiya na, antara nane Yahudiya-aha na diyanyerdiya Dadaamiya na, bademmire á miya mí shansha hairire nanna.

<sup>18</sup> Adaba nane, nere antara kure bademme á miya shamiyánsha baráma á deza Eddemiya Dadaamiya an hákuma á Shedekwe Cudedde. Ba Shedekwe Cudedde palle una slemelamiyumele bademmire á miya.

<sup>19</sup> Máki ba estuwa wá, kwa wayve-aha-ka mazla-aara, bi kwa emnde na ndza kwa sáwá an sawa, amá gakurevge ba emnde a larde miyenne, kwa emnde á Dadaamiya ba miyenne, kwa ba palle antara emnde umele na tá am huđe á há-aara na.

<sup>20</sup> Nabi-aha antara emnde a bela Yaisu \*Almasiihu ta fantau ge slera nanna ba seke má tá faná ekte ge bere. Daaci kure wá, kwa ba seke nakwa-aha am dagave á nakwa-aha á nyaña bere nanna. Yaisu Almasiihu an ire-aara wá, nane nakwa na á njá ndzedá á bere nanna bademme.

<sup>21</sup> Adaba barka-aara, bademme á bere á njá ba degdege, ámberá ankwá á wálá, geni á gevge bere cudedde na watse á njá Dadaamiya am huđe-aara na.

<sup>22</sup> Ba seke una ni kure gakurevge palle antara Yaisu Almasiihu na wá, kure keni gakurevge dalbe palle am bere nanna. Kure antara emnde umele, bademmire á kure wá, gakurevge ba seke bere nanna á nja Shedekwe á Dadaamiya am huđe-aara na.

### 3

#### *Slera na a faara Dadaamiya ge Paul*

<sup>1</sup> Adaba ba una nanna, yá ankwá maga maduwa arge kure. Iya Paul yá am dangay kina, adaba ba slera á Yaisu \*Almasiihu nanna, ya maganaa am dagave á kure kwa emnde na baaka nadina á kure.

<sup>2</sup> Diyandiya ba jirire ganakini cenakurancena slera na a fiyaare Dadaamiya am dagave á kure, ba nane nanna zlađe adaliye una a magiyaa ngurna geni yá maganaamaga slera nanna.

<sup>3</sup> Dadaamiya a naba marise názena am ire-aara, ba kinamina na keni ya zluwa á puwakurte ba nane cekwaanjudi.

<sup>4</sup> Má kwá ankwá ndaha egdza elva-aaruwa nanna ya puwakurtaa ya ba kina na wá, watse kwá naba diyeddiye átekwa ganakini diyandiya ya názena an shebe am elva a Yaisu \*Almasiihu na bademme.

<sup>5</sup> Am zamane-aha na dedde na wá, Dadaamiya ndza marateranka nasherire nanna ge emndimagwaha. Amá am salikataliya na wá, a naba magaa pute geni Shedekwe-aara Cudedde á maratersemare duksa nanna ba parakke ge nabi-aha-aara antara ge emnde a bela-aara.

<sup>6</sup> Nawa nane nasherire nanna: Dadaamiya a fateraa duksa shagera ge Yahudiya-aha geni á de geva átuge itare. Amá kina wá, kure emnde na ndza kwa baaka am nadina na keni, kwá ba am huđe-aara, ankwá dza á kure. Kure, antara Yahudiya-aha gakurevge ba emnde a jeba palle mázla-aara. Daaci duksa na á ba Dadaamiya á de vaterteva ge Yahudiya-aha na wá, ge kure keni á de vakurteva. Bademme á duksa nanna wá, ba nampire á elva á Yaisu Almasiihu. Kwaya nane nasherire nanna.

<sup>7</sup> Ganevge sleslera á Dadaamiya kina ge balatera labáre á higa, elva a Yaisu \*Almasiihu ge emnde keni, una ndzedá-aaruwa-ka, ba hákuma á Dadaamiya. Ba nane una a magiyaa ngurna á una nanna.

<sup>8</sup> Yá á kataliya ba iya am emnde á Dadaamiya bademme, aley Dadaamiya a naba magiyaa ngurna ba ge iya nanna keni, a give slebalatera rezegire na á zleka dekideki na ge emnde na baaka nadina-aatare. Rezegire nanna wá, a sanaa Yaisu Almasiihu, jauje ge diya á emnde bademme.

<sup>9</sup> Zlađe adaliye maa, a magiyaa ngurna á palaterná názu a slaslanaa nane am ire-aara na ge emnde bademme. Ba nane Dadaamiya na a

nderanaa ɲane duksa baɗemme una ndza a shebanve duksa ɲanna kwaye am fakta á duksa baɗemme.

<sup>10</sup> Amá kina wá, Dadaamiya maresemáre duksa ɲanna am aiklaisiya-aara, geni tá nanna malika-aha na tá am samaya, antara male-aha-aatare baɗemme, lauktu tá de diyeddiye geni ilmu á Dadaamiya wá, aɲkwa gergere ba kwakya baaka zlakta-aara.

<sup>11</sup> Daaci Dadaamiya a maganaa á ba áte una ndza a njantaa ɲane kwaye am fakta geni watse á de emmága na. Baɗemme á una ɲanna a maganaa á ba á kya erva an Yaakadada Yaisu Almasiihu.

<sup>12</sup> Ba áɗaba famitarefe áte Yaisu Almasiihu, gamiyevge palle antara ɲane na wá, daaci shamiyánsha barama á deza Dadaamiya an baakire á lyawa.

<sup>13</sup> Aɗaba una ɲanna, gazlauka ɗekidɗeki áɗaba zlaɗa na yá aɲkwa shaná ya áɗaba kure na, táslawa á kure. Baira una ɲanna aɲkwa á melakurumele ge kure.

### *Háyáva na á wayámiyá Yaisu \*Almasiihu an ɲane*

<sup>14</sup> Aɗaba una ɲanna, yá aɲkwa kezlan ugje ge Eddemiya Dadaamiya, yá maga maduwa arge kure.

<sup>15</sup> Baɗemme á emnde-aara na tá am samaya na, antara emnde na tá am duniya, tá á ba an dada-aha-aatare. Baɗemme tá njá á ba áte ndzedá á Eddemiya Dadaamiya palle.

<sup>16</sup> Yá aɲkwa ɲala áza Dadaamiya geni á ndzedakurtendzedá ba ɲane an hákuma á Shedekwe-aara, geni kwá gevge emnde a ndzendzedá áte unɲule-aara. Á magakurá una ɲanna áte yaikkire-aara ge ɲane.

<sup>17</sup> Yá aɲkwa ɲala ázeɲara geni a ɲjiinja Yaisu \*Almasiihu am kure, áɗaba fetarfire á kure áte ɲane. Zlaɓe áɗaliye yá yekakuru wayavire, geni kwá wayaavewáye á ba an jirire am dagave á kure. Má kwá aɲkwa wayaavewáya am dagave á kure wá, kwá de gevge emnde ndzendzedá áte unɲule-aara. Estuwa kwá tsaatse degdege ba seke náfa na má dámda slalwe-aara ba shagera á dem haha na.

<sup>18</sup> Daaci antara emnde a fetarfe umele átirpalle wá, kwá dzegwándzegwa eccena-aara ba shagera, geni Yaisu Almasiihu wá, aɲkwa á wayamiwáyá á ba an jirire. Una ma kwá ɗálá á detire, ma kwá tsekwá á dem áhá, ma kwá deme keni, kwá de bera wáyáva á Yaisu Almasiihu wá, á ba aɲkwa ba estuwa.

<sup>19</sup> Yá aɲkwa ɲala Dadaamiya zlaɓe áɗaliye: geni kwá diyeddiye wáyáva á Yaisu Almasiihu na jauje ge diya á emnde baɗemme na. Má shakuransha una ɲanna wá, názena an ɲane Dadaamiya wá, am kure keni ba una ɲanna.

<sup>20</sup> Dadaamiya wá, baaka názu á janviyaaja ge ɲane. Baira ɲane á januje am duksa na mí ndavanuwá miya, antara una mí slaslaná miya na. Baɗemme á una ɲanna á maganá á ba an hákuma-aara na aɲkwa á maga slera am miya na. Galaumigálá ba ɲane palle.

<sup>21</sup> Ma vaatara keni dem ba ge ɗekidɗeki, yaikkire ba názá-aara palle am aiklaisiya-aara, aɗaba Yaisu Almasiihu. \*Aamin.

## 4

### *Geva vuwa palle*

<sup>1</sup> Daaci, yá aɲkwa ɲalákurá ba iya Paul, ya dangay áɗaba slera á Yaisu \*Almasiihu, taslawá á kure: ɗabaudaba unɲule á jirire áte una a ɗahakuraa Dadaamiya ge ɲane na.

<sup>2</sup> Ma vaatara keni gauga ire á kure á katafke á emnde umele, gawevge emnde a kemaare, gawevge emnde a farvaunđe, ma uwe keni naba bashaubasha am dagave á kure, kwá ámbera á wayaavewaye ba kelaazare.

<sup>3</sup> Wavauwáva an ervaunđe á kure palle, geni a tegevka ye á kure na a jakurmaare Shedekwe Cudedđe, a vakurtaa antara hairire na. Ma vaatara keni njawinja á ba áte una nanna.

<sup>4</sup> Aiklaisiya wá, nane gevge ba seke vuwa á Yaisu Almasiihu, daaci baaka vuwa umele sey ba palle nanna. Shedekwe Cudedđe keni sey ba palle, tama á miya áte duksa na a dahamiyaa Dadaamiya ge nane na keni ba palle.

<sup>5</sup> Yaakadada palle, fetarfire palle, baptisma keni baaka umele sey ba palle,

<sup>6</sup> Dadaamiya palle, ba nane una Dada arge emnde bademme, á kwaraná nane duksa bademme, anƙwa am tate-aha bademme, am dagave á emnde bademme.

<sup>7</sup> Yaisu \*Almasiihu a naba magamiyaa ngurna bademmire á miya, a tegaamiyaa hakuma á mága slera-aha gergere, ma ge ware á miya keni bademme.

<sup>8</sup> Anƙwa an puwa am wakita á Dadaamiya, a ba nane:

Am sarte na nane gaaga ndzedá arge kelaade-aha-aara na wá, a naba sluwatervaahe, daaci a naba kapte an itare á detire. Á sáwá áhuwa maa, a dzerese emnde a slera-aara, a tegateraa hákuma á mága slera-aha gergere.

<sup>9</sup> Elva na a ba nane: a kapte á detire na mu, á kátá bá uwe nane? Elva nanna wá, á kátá bá: ndza a tsekweise á sem duniya áhuna emtsaafé.

<sup>10</sup> Daaci edda una ndza a tsekweise á sem duniya na wá, ba Yaisu Almasiihu. Ba nane nanna zlaƙe ádaliye una a kapte á detire ge samaya geni á jemá duksa bademme, ma una am tate-ara keni, á kwaraná ba nane palle.

<sup>11</sup> Daaci a tegateraa slera-aha ge emnde-aara, ma ware keni á ba an slera-aara. Emnde umele a gaterve emnde a ƙela, ge emnde umele a vaterte slera á nabiyire, ge emnde umele a vaterte slera á ƙala waazu ma am tate-ara keni bademme, ge emnde umele a vaterte slera á malumire, ge emnde umele zlaƙe ádaliye a vaterte hákuma á kwaraterse wakita á Dadaamiya ge emnde.

<sup>12</sup> A ƙazlaa emnde nanna bademme geni tá fatermá itare ndzedá am vuwa ge emnde a fetarfe am slera-aatare, geni aiklaisiya na gevge ba seke vuwa á Yaisu \*Almasiihu na, á far wálá ba kelaazare.

<sup>13</sup> Daaci miya bademmire á miya mí de gev ba palle, fetarfire á miya palle, diya á miya áte \*Egdza á Dadaamiya na ba palle. Daaci mí de gevge emnde na gyamiyebgye am fetarfire, mí de gev ba kalkale antara Yaisu Almasiihu an ire-aara.

<sup>14</sup> Má gamiyevge estuwa, enƙale á miya á de gevka seke náza á egdzara mesheshe mazla-aara. Daaci tá de dzegwánka zlermamizlerma emnde a fida an yaimyaimire-aatare, tá de dzegwánka jamiyaa áte unƙule á jirire an tsaha fida.

<sup>15</sup> Miya wá, magaumimága ba jirire am dagave á miya, wayaumiyaavewáye an ervaunđe á miya palle, lauktu mí de far an wálá am duksa bademme, mí de gevge kalkale-aara ge Yaisu Almasiihu na nane ire á aiklaisiya na.

<sup>16</sup> Ba nane una a jatermaare ge emnde-aara a gaterve palle, áte ye palle, ba seke una vuwa á urimagwe: ubiya-aha antara duksa-aha umele tá an



dzagwa átirpalle na. Daaci, má vuwa ɲanna ba lapilayye, duksa-aha na tá am ɲane tá maga ba slera wá, vuwa bademme á wálá ba shagera. Ba duksa palle ge emnde a fetarfe keni: má tá aɲkwa wayaavewáye ba shagera wá, á wálá aiklaisiya.

*Shifa áɲwaslire na mi shanaa áza Yaisu \*Almasiihu*

<sup>17</sup> Adaba una ɲanna, náwa názu yá ndahakurá ya an zhera á Yaakadada: táslawa á kure, dawalika mágá názena tá maganá emnde na baaka nadina-aatare na. Adaba itare tá dzama ba názena ni baaka nampire-aara dekiɲeki na.

<sup>18</sup> Tá taa cenevaaka jirire dekiɲeki, tá shanka shifa áɲwaslire na a vatertaa Dadaamiya ge emnde na, adaba degdegire á ire na tá maganá itare, baaka duksa na ta disaa itare áte unɲule á Dadaamiya.

<sup>19</sup> Itare baaka zherwe-aatare dekiɲeki. Názena tá kataná itare an ervaunde-aatare bademme wá, sey ba dakarire, antara duksa zherwe bademme.

<sup>20</sup> Amá ekkure wá, kwa tsahese une-ka áza Yaisu \*Almasiihu.

<sup>21</sup> Ekkure emnde na gakurevge palle antara ɲane na wá, ba jirire cenakurancena elva-aara. Ekkure wá, kwararakursekware jirire na a saminaa ɲane na.

<sup>22</sup> Daaci ekkure wá, eptsawaneptse iga ba dekiɲeki ge duksa-aha ɲanna shagereka ndza kwa maganaa kure werre na. Adaba am njá á kure werre ɲanna, ndza a jakuraa enkale ba duksa-aha mandzawe na a katanaa ervaunde á kure na, a keɲakuraa ba ɲane.

<sup>23</sup> Amá yawánya a mbedakursembeda Dadaamiya ervaunde á kure bademme, á gakurvege áɲwaslire, kwá gevge ba seke ndza kure-ka.

<sup>24</sup> Daaci gawuvge áɲwaslire am ervaunde á kure bademme áte una a mbedakursaa Dadaamiya, geni kure keni kwá gevge ba seke ɲane ám njá á kure bademme. Ba jirire, jeba á nja ɲanna wá, cuɲeɲe, wayaawáya Dadaamiya.

<sup>25</sup> Adaba una ɲanna, yawánya fida mazla-aara. Ma ware á miya keni a enndaha ba jirire áza ukfeɲara, adaba gamiyevge palle, mi ubiya-aha á vuwa á ura palle.

<sup>26</sup> Ma jákurja ervaunde ba jipu keni, magauka haypa am huɲe-aara. Zlaɲe ádaliye: a belyakuraareka vaciya kwásau zlaɲe kwá maga ba ervaunde ɲanna.

<sup>27</sup> Yawanánka baráma ge Shaitaine dekiɲeki.

<sup>28</sup> Ma edda una neyle keni, a yánya mazla-aara. Arge una ɲanna ambane ɲane keni a emmága slera á jirire, geni ɲane keni á vaterte duksa ge emnde na tá aɲkwa zatervaare emnde.

<sup>29</sup> Valyauka elva yaiyaihe am mbuwe á kure, ndahaundaha ba elva á námpire, elva na emnde tá de shá ndzeɲa an ɲane, tá wálá an ɲane áte unɲule á Dadaamiya na.

<sup>30</sup> Becawanteka Shedekwe Cuɲeɲe na aɲkwa am ervaunde á kure na. Shedekwe Cuɲeɲe ɲanna, ɲane gevge ba seke damshe á Dadaamiya áte kure geni kwa emnde-aarire. Daaci vacite umele watse á lyamiselye náza dem ba ge dekiɲeki.

<sup>31</sup> Daaci duksa mándzawe, sawansese am ervaunde á kure bademme: ma dugune, ma ica ervaunde, ma zláza ura, ma dágala, ma danɲwire, sawansese jeba á duksa-aha ɲanna bademme am ervaunde á kure.

<sup>32</sup> Kure wá, magaumága ba shagerire á ervaunde am dágave á kure, magaumága kamaarire, yawanáreye haypa ge ura am dágave á kure, ba

seke una Dadaamiya a yakuraare haypa ge kure áǎaba Yaisu \*Almasiihu na.

## 5

### *Zlálá ám parakkire*

<sup>1</sup> Ekkure wá, kwa egdzara á Dadaamiya, a wayákuraa ñane. Adaba una ñanna, dabaudaba ba sera-aara am názena kwá maganá kure bademme.

<sup>2</sup> Am duksa na kwá de maganá kure bademme wá, yawánka wáyávire, ba seke una a wayámitaa Yaisu \*Almasiihu ge miya, a naba yaa shifa-aara sadake ge Dadaamiya adaba miya na wá, a magaa duksa na a katanaa Dadaamiya.

<sup>3</sup> Kure wá, kwa emnde á Dadaamiya. Adaba una ñanna, duksa ba seke gwardzire, fa ice am duksa á ura, antara jeba á duksa-aha ñanna shagerka d'ekideki na, ba ettsála-aara keni zlayeka d'ekideki am dagave á kure.

<sup>4</sup> Zlabe adaliye elva-aha na á maga zherwe, antara elva-aha na baaka sera-aara d'ekideki na, ira elva-aha na á de waterwá am erwaunde ge emnde na bademme, una-aha ñanna zlayeka am dagave á kure. Arge una-aha ñanna wá, slafawanánsrafe ba we á kure ge Dadaamiya adaba duksa na a magakurnaa ñane na.

<sup>5</sup> Diyaweddiye una ba shagera: emnde a maga gwardzire, bi jeba á duksa-aha ñanna shagerka d'ekideki na, antara fa ice am duksa á ura, baira una ñanna ba kalkale antara mága hele, emnde a mága duksa-aha ñanna wá, ba palle-aatare keni á shanka dem zlaná á tara Yaisu \*Almasiihu an Dadaamiya.

<sup>6</sup> A kefarakuraaka emnde ba dey an elva-aha na baaka nampire-aara d'ekideki na. Adaba ba una-aha ñanna, an zladá erwaunde á Dadaamiya jipu áte emnde a maganaa gardire bademme.

<sup>7</sup> Daaci a jakurmeka duksa antara jeba á emnde ñanna d'ekideki.

<sup>8</sup> Werre wá, ndza kwá am tabedammire. Amá kina wá, kwá am parakkire adaba gakurevge palle antara Yaakadada. Daaci kure keni magaumága ba duksa na ni tá maganá emnde na tá am parakkire na.

<sup>9</sup> Adaba parakkire wá, ñane á sá ba shagerire antara maggwire, ira jirire.

<sup>10</sup> Wavauwáva an erwaunde á kure palle ge diya názena á kataná Yaakadada.

<sup>11</sup> Gawaterápteka ge emnde a mága názu watse baaka nampire-aara d'ekideki, una ba slera á tabedammire na. Amá marawateránmara shagerkire na tá ankwá maganá itare na ba parakke.

<sup>12</sup> Duksa na tá maganá jeba á emnde ñanna an nasherire wá, ba enndaha-aara keni zherwe ge miya.

<sup>13</sup> Amá má mí ndaaternda duksa-aha á zherwe ñanna ba parakke wá, emnde bademme tá de diyeddiye nja-aatare ba shagera.

<sup>14</sup> Adaba duksa na má sesse am parakkire, duksa ñanna keni gevge parakkire. Adaba una ñanna, ta bantsaa: Ekka na ká am hare na, tsetse am hare, tsetse am emtsa, Yaisu \*Almasiihu á maraká parakkire.

<sup>15</sup> Adaba una ñanna, magaumága enkale ba shagera am njá á kure bademme, geni de gawevka emnde a cekwire á enkale, amá gawevge emnde a enkale.

<sup>16</sup> Zamane á miya na degiya badzávbadze. Kefawanaaka sarte ba dey, magaumága shagerire.

<sup>17</sup> Adaba una ñanna, gawevka emnde a cekwire á enkale, cenaucena názena ni á kataná Yaakadada ázekure na.

<sup>18</sup> Zlaɓe ádaliye: a dakurseka mbazla am enɗkale ɗekidɗeki, aɗaba á keɗákurá ba una ɗanna. Kure wá, nawantenaha ervaunɗe á kure an Sheɗekwe Cudeɗɗe.

<sup>19</sup> Ma ware á kure keni galaugálá Yaakadada am dagave á kure. Galaugálá an jabura, galaugálá an lahe-aha na á vakurtá Sheɗekwe Cudeɗɗe na, antara lahe-aha umele baɗemme. Galaugálá Yaakadada an ervaunɗe á kure palle.

<sup>20</sup> Slafawanánsrafe we á kure ge Eddemiya Dadaamiya ba kelaazare aɗaba duksa-aha na a maganaa ɗane na baɗemme, slafawanánsrafe we an zhera á Yaakadada á miya Yaisu \*Almasiihu.

### *Nwasha antara zála-aha-aatare*

<sup>21</sup> Ma ware á kure keni, faufa zherwe am dagave á kure, aɗaba kwa emnde na kwá an lyawa á Yaakadada.

<sup>22</sup> Yá elvan ge kure ɗwasha: Faufa zherwe áte zala-aha á kure áte una á kataná Yaakadada Yaisu \*Almasiihu na.

<sup>23</sup> Aɗaba ba zhele una á kwara mukse, ba seke una á kwaraná Yaisu Almasiihu aiklaisiya, aiklaisiya gevge ba seke vuwa-aara na. ɗane wá, ire antara slelya.

<sup>24</sup> Aɗaba una ɗanna, sey ɗwasha tá fa zherwe áte zála-aha-aatare am duksa baɗemme, ba seke una aɗkwa fáná aiklaisiya zherwe áte Yaisu Almasiihu am duksa baɗemme na.

<sup>25</sup> Ekkure keni zála: wayauwáyá ɗwasha-aha á kure ba seke una a wayanaa Yaisu Almasiihu aiklaisiya-aara, a naba yaa shifa-aara aɗaba ɗane,

<sup>26</sup> a baranve tseɗaɗe an yawe, antara elva-aara, geni á ganvege cudeɗɗe.

<sup>27</sup> A magaa una ɗanna baɗemme na wá, aɗaba á kátá zhara aiklaisiya-aara ba tseɗaɗe á katafke-aara, zariya jipu, cudeɗɗe, á gevge an daradza baaka duksa mandzawe áte ɗane.

<sup>28</sup> Ba duksa palle ge zála keni: Wayauwáyá ɗwasha-aha á kure ba seke shifa á kure. Ma ware una zhele, wayetewáyá mukse-aara, a wayete ba shifa-aara.

<sup>29</sup> Baaka ura á magantá kelaadire ge ire-aara, amá á zanu duksa, á fanu hyema ba seke una aɗkwa á fanuwa Yaisu \*Almasiihu hyema ge aiklaisiya na.

<sup>30</sup> Aɗaba baɗemmire á miya na wá, mi ba seke uɓiya-aha antara duksa-aha umele na am vuwa-aara na.

<sup>31</sup> A ba wakita á Dadaamiya wá: A sesse zhele am mba á eddeɗara, a njarinja antara mukse-aara. Itare ta buwa ɗanna tá de gev ba vuwa palle.

<sup>32</sup> Elva na am wakita á Dadaamiya ɗanna wá, a sanse elva yaikke. Ate iya wá, aɗkwa á pálá elva a Yaisu Almasiihu antara aiklaisiya-aara.

<sup>33</sup> Amá wá, antara ba názá á kure keni, geni ma ware á kure keni a ewwáyá mukse-aara ba seke shifa-aara, mukse keni a effa zherwe áte zhele-aara.

## 6

### *Náwa tá nja estuwa egdzara antara emnde a há-aatare*

<sup>1</sup> Ekkure egdzara, cenaucena elva á dada-aha á kure an mama-aha á kure, aɗaba una ɗanna duksa na á kataná Yaakadada ázekure, zlayákurzláyá ge kure na kwa emnde-aara.

<sup>2</sup> A ba palle á shairiya-aha á Dadaamiya wá: «Effa zherwe áte tara eddeɗa an emmeɗa.» Zunɗwe ba una ɗanna am shairiya-aha á

Dadaamiya na a ba Dadaamiya, á de vaterte duksa ge emnde na má d'abartedaba an jirire na.

<sup>3</sup> Duksa ɲanna wá: Ká de gedetegedá, ká de shekwaashekwa am duniya, á bina.

<sup>4</sup> Ekkure dada-aha á egdzara keni, zladawaterveka ervaunɗe ge egdzara á kure, amá kwarawatersekwáre duksa, kwá ámbera giyatergiya áte una á de kwarakursá Yaakadada Yaisu \*Almasiihu.

*Náwa tá nja estuwa náve-aha antara dada-aha-aatare*

<sup>5</sup> Ekkure náve-aha, fawatersarefe ge dada-aha á kure am duniya. Faufa zherwe áte itare, gawanaaga ire á kure á katafke-aatare, magaumága slera á kure an ervaunɗe á kure palle, ba seke una kwá anƙwa fansaare ge Yaisu \*Almasiihu na.

<sup>6</sup> Magauka slera adaba ice-aatare geni a galarakurgálá, amá zharauzhára ire á kure ba seke kwá náve-aha á Yaisu Almasiihu. Magaumága názena á kataná Dadaamiya an higa á kure campaukkwe am ervaunɗe.

<sup>7</sup> Magaumága slera á kure an ervaunɗe palle, ba seke kwá magaterán ge emnde-ka slera ɲanna, amá kwá maganán ge Yaakadada.

<sup>8</sup> Diyaweddiye una ba shagera: ma ware una á maga ba shagerire na, edda-aara ma náve, ma á kwaraná ɲane ire-aara keni, watse á de pelansepele Yaakadada Yaisu Almasiihu.

<sup>9</sup> Ekkure dada-aha á náve-aha keni: Magaumága shagerire á ervaunɗe áte náve-aha á kure, gawaterteka lyáwa, diyaweddiye geni kure antara náve-aara á kure bademme Edda á kure ba palle, anƙwa am samaya. ɲane wá, bademme á emnde ta ba kalkale ázenára.

*Kazlaɲa á wáwa á emnde a fetarfe*

<sup>10</sup> Náwa jugená á elva na yá bakurná ya ge kure. Ekkure wá, tatayautátaya ndzedá á kure á ba áza Yaakadada, yawánya a ndzedakurtendzedá ba ɲane an hakuma-aara na jauje ge duksa bademme na.

<sup>11</sup> Ngwadawápsengwada ba shagera an kazlaɲa na a vakurtaa Dadaamiya na bademme, tsawaatse ba shagera an ɲane, geni ma watse á sawa am laukte-ara Shaitaine ge badakurbáda keni, kwá gáná ba kure ndzedá.

<sup>12</sup> Wáwa á miya ɲanna wá, degi mí wawa an emndimagwaha-ka, mí wawa an male-aha á jini-aha, antara jini-aha-aatare na tá an hákuma am zhegela antara am duniya bademme na.

<sup>13</sup> Adaba una ɲanna, ngwadawápsengwáda ba shagera an kazlaɲa na a vakurtaa Dadaamiya na bademme, lauktu kwá de tsaatse degdege am sarte á emtanƙire, kwá de dzegwándzegwa, kwá de gevá midala-aha dete halawuwa-aara bademme.

<sup>14</sup> Daaci, njawinja am niya á kure ba kelaazare; tsawaatse á ba áte jirire. Adaba jirire wá, gevge ba seke náza nguda huɗe á kure ge kure. Zlaɓe adaliye, magaumága dzayyire á ervaunɗe. Má kwá anƙwa maga dzayyire á ervaunɗe wá, una ɲanna ba seke kwá tsekweme am kebebbe.

<sup>15</sup> Balaubálá labara á higa, elva a Yaisu \*Almasiihu na á de vatertá ɲane hairire ge emnde. Yawánka d'ekideki. Una ɲanna keni maa, gevge duksa na kure kwá tse átekwa, ba seke kimake na am sera á kure ge d'ába unɲule á Dadaamiya.

<sup>16</sup> Ma vaatara keni, gulawanaaka fetarfire á kure. Una ɲanna ba seke tsakuraatse am gulakwa ge lyiya gurme-aha na á devaná Shaitaine á se wakurwa an ɲane na.

<sup>17</sup> Eksawanteksa am ervaunḡe á kure geni á lyákurlye Dadaamiya. Una ḡanna ba seke tunḡur ge tsufakura ire á kure. Zlabe ádalije, ḡawanaaḡa elva á Dadaamiya an ervaunḡe á kure palle. Una ḡanna keni ba seke masalám á kure a vakurtaa Shedekwe Cufedḡe.

<sup>18</sup> ḡalaunḡála Dadaamiya ba kelaazare am laukte-aha baḡemme. ḡalaunḡála an ervaunḡe á kure palle áte una á de marakurná Shedekwe-aara. Ma vaatara keni melawaterumele ge emnde a fetarḡe umele an maduwa-aha á kure, yawanka una dekiḡeki.

<sup>19</sup> Magaumága maduwa arge iya keni, geni yá ndáhá elva á Dadaamiya ba parakke, yá palaternaapálá labare á higa na a tsekwanaa Dadaamiya na ge emnde.

<sup>20</sup> Adaba una ḡanna, una ma yá am danḡay keni, ya ba slebela á Yaisu Almasiihu. Daaci melawiyumele an maduwa geni a gazlanka dekiḡeki, amá yá enndaha baḡemme áte una á kataná Dadaamiya.

*Ga use am halavuwa á elva-aha*

<sup>21</sup> Egdza emmemiya Tikikus na mí wayaná an ervaunḡe á miya palle, ḡane keni ba sleslera á Yaakadada Yaisu \*Almasiihu an ervaunḡe-aara palle na wá, á de palakurnaapálá ba ḡane labare-aaruwa, antara duksa na yá anḡwa maganá ya baḡemme.

<sup>22</sup> Yá belán ba ge una á dezekure, geni kure keni kwá diyeddiye zláláva á ḡere áhuna, antara geni á de ekhyakurnaakhya ervaunḡe.

<sup>23</sup> Tara Eddemiya Dadaamiya, tá antara Yaakadada Yaisu Almasiihu, a varakurteva hairire, a faremfa háyávire am dagave á kure, a magarakturánmaga ḡurna geni kwá farḡe ge fetar áte Yaisu Almasiihu á ba an jirire.

<sup>24</sup> A magateránmaga Dadaamiya ḡurna ge emnde na wayarwáya an Yaisu Almasiihu ge shifa-aatare am duniya baḡemme na.



## Wakita na a puwatertaa Paul ge emnde a FILIPHI

### *Ga Use á Paul*

<sup>1</sup> Wakita na yá anƙwa puwaná ba iya Paul, ñá antara Timaute, ña emnde a slera á Yaisu \*Almasiihu. Náj puwakurte ge kure emnde a dǎba Dadaamiya am Filipi, ge kure bademme á emnde na kwá átuge Yaisu Almasiihu na. Náj puwakurte ge kure male-aha á emnde á Dadaamiya, antara emnde na tá an slera-aha am aiklaisiya bademme.

<sup>2</sup> Eddemiya Dadaamiya antara Yaakadada á miya Yaisu Almasiihu a magarakuránmaga ñgurna, á varakurteva hairire.

### *Maduwa á Paul ge emnde a Filipi*

<sup>3</sup> Ba kelaa má dzamanakurtedzámá, yá slafaná ba we-aaruwa ge Dadaamiya.

<sup>4</sup> Ba kelaa má yá anƙwa maga maduwa arge kure, yá ñalakuru Dadaamiya an higa am ervaunđe.

<sup>5</sup> Yá slafaná we-aaruwa jipu ge Dadaamiya adaba kure. Adaba kwáye ba vacite na gakurevge emnde á fetarfe na, sem kina, kwa ba palle antara ya am slera á bálá labara á higa, elva a Yaisu \*Almasiihu.

<sup>6</sup> Diyandiya ba jirire geni Dadaamiya na a fantau ge mága slera jirire am ervaunđe á kure na wá, á de yanka am dagave, sey á de zlanazle, á yanka dekideki dem sarte á sawa Yaisu Almasiihu.

<sup>7</sup> Shagera jipu yá anƙwa á dzámá una ñanna am ervaunđe-aaruwa arge kure. Wayanakurwáyá an ervaunđe-aaruwa palle. Adaba kure antara iya wá, bademme á miya Dadaamiya a gamiyaare barka. Adaba una ñanna melawiyumele. Ma kina yá am dangay na, ma am sarte na watse yá de katafke á shairiya na keni, melawiyumele geni yá palanaapálá labara á higa elva a Yaisu Almasiihu. Melawiyumele geni yá marateránmára jirire ge emnde.

<sup>8</sup> Dadaamiya diyaadiya bademme geni wayanakurwáyá an ervaunđe-aaruwa palle. Yaisu Almasiihu na am iya na á wayakúra ba ñane.

<sup>9</sup> Dalila á una ni yá anƙwa ñalakuru Dadaamiya na wá, yá kátá kwá wayaavewaye am dagave á kure ma vaatara keni, lauktu kwá de diyeddiye jirire á Dadaamiya ba shagera, kwá de diyeddiye shagerire antara shagerkire bademme.

<sup>10</sup> Daaci, kwá de dzegwándzegwa lanaale názena gevge shagerire antara shagerkire, kwá de geva estuwa emnde na dzayye ervaunđe-aatare, dem vaciya á sawa á Yaisu \*Almasiihu keni á de jerka shagerkire am kure dekideki.

<sup>11</sup> An ndzedá á Yaisu Almasiihu watse kwá de maga ba duksa shagera bademme. Daaci estuwa, bademme á emnde na tá de zhára una ñanna, tá de fá zherwe á ba áte Dadaamiya, tá de gálá zhera-aara.

### *Sey ba Yaisu \*Almasiihu palle una slefa shifa am ura*

<sup>12</sup> Egdzar mama-aha-aaruwa, yá kátá kwá diyeddiye geni masiba-aha na á shá ya na wá, á piyeka labare á higa ge de katafke, amá á dáná á ba de katafke.

<sup>13</sup> Adaba una nanna, bademme á sawji-aha na tá ufa há á male á lárde, antara emnde umele kwakya, diyardiya ganakini yá am dangay kina adaba zhera á Yaisu \*Almasiihu.

<sup>14</sup> Zlabe ádaliye: Yá am dangay tsa, aley anjwa á vaterte ndzedá ge emnde a fetarfe kwakya áte unjule á Yaakadada Yaisu Almasiihu, jauje ge una werre. Sharánshá ndzedá jipu ge bálá elva á Dadaamiya á de katafke, baaka lyawa-aatare.

<sup>15</sup> Amá tá anjwa emnde umele-aatare wá, tá bálá waazu á elva á Yaisu Almasiihu, tá ámbera shelha áte iya. Amá emnde umele wá, tá bálá ba elva á Dadaamiya an shagerire á ervaunđe.

<sup>16</sup> Itare na tá maganá an shagerire á ervaunđe na wá, adaba wayarwáyá an Yaisu Almasiihu. Diyardiya geni a siyaa ba Dadaamiya ásehuna, geni yá se palaternaapala elva-aara ge emnde, geni una nanna jirire.

<sup>17</sup> Emnde umele na tá shelha áte iya na maa, tá maga waazu á elva á Yaisu Almasiihu tsa, mele tá kátá gev male arge iya zlabe. Amá ervaunđe-aatare shagereka, tá kátá fiyaare ba ge zladá zlabe ádaliye am dangay.

<sup>18</sup> Mbate, ma tá maganá an danjwire á ervaunđe waazu nanna, ma tá maganá á ba an shagerire á ervaunđe-aatare keni, tá bálá ba elva á Yaisu Almasiihu, daaci á vite ba higa ge iya. Yá ndaakur ba jirire, ma vaatara keni yá á ba an higa-aaruwa ya.

<sup>19</sup> Adaba diyandiya geni bademme á una nanna ba barama ge njezlijezla. Una nanna keni adaba ba maduwa á kure antara Shedekwe á Yaisu Almasiihu, bademme á meliyuwa ba una nanna.

<sup>20</sup> Názena yá kataná ya an ervaunđe-aaruwa kwakya wá, ma andze á wika zherwe, ma yá gazleka ba cekwaanjudi keni tsete am vatená dem ba ge dekideki, ma yá an shifa, ma yá an emtsa keni. Adaba an názena yá anjwa maganá ya na wá, yá kátá ba maratera yaikkire á Yaisu \*Almasiihu ge emnde, geni a galargálá ba nane palle.

<sup>21</sup> Iya wá, ma yá an shifa keni, shifa-aaruwa ba Yaisu Almasiihu palle. Sakwa má emtsanemtsa, una vayvaya zlabe ádaliye.

<sup>22</sup> Amá am sarte na zlabe yá an shifa wá, yá naba melaterumele ge emnde. Daaci diyanka názena yá eksesa ya, ma njá an shifa, ma emtsa keni.

<sup>23</sup> Am duksa-aha nanna buwa na wá, ire-aaruwa gevge bu-buwa, amá yá kátá ba emtsa, geni njá de njá antara Yaisu Almasiihu, ya hayaa ba una nanna arge njá an shifa.

<sup>24</sup> Amá nja-aaruwa an shifa keni wá, anjwa nampire-aara ge kure.

<sup>25</sup> Estuwa, diyandiya ba jirire geni zlabe yá njá an shifa. Mí nja kerde an shifa, geni kwá farfe ge ndzedá á kure áte unjule á Dadaamiya, antara kwá farfe ge higa á kure am fetarfire.

<sup>26</sup> Daaci, vacite na má sanesse am dangay danemda zlabe ádaliye á dem dagave á kure wá, kwá de gálá Yaisu Almasiihu adaba una nanna.

<sup>27</sup> Duksa palle wá, zlalava á kure a gevka gergere antara una kwa cenanaa am labare á higa, elva a Yaisu \*Almasiihu na. Yá kátá ba cena geni kwá an ndzedá áte unjule á Dadaamiya, we á kure palle, kwá wava an ervaunđe á kure palle geni kwá da labare á Yaisu á de katafke, ma yá anjwa am dagave á kure, ma ya baaka keni.

<sup>28</sup> A wakurka lyawa átuge kelaade-aha á kure mazla-aara. Estuwa, ba itare an ire-aatare keni tá de diyeddiye geni tá an keda ba itare, amá kure wá, an lya shifa á kure ba jirire. Una nanna keni á de maratarná ba Dadaamiya.

<sup>29</sup> Ge kure wá, Dadaamiya a magakuraa ngurna geni kure keni kwá fetarfe áte ñane adaba Yaisu Almasiihu. Una ñanneka palle, amá a magakuraa ngurna geni kwá shushe zladfa adaba ñane.

<sup>30</sup> Á ba am nja-aaruwa keni, kure nakuranna wawa-aaruwa. Ba kina keni kwá cená ba ñane geni yá á ba am wáva ñanna. Kina wá, kure keni dakuremda am wáva ñanna ba seke iya.

## 2

### *Yaisu a shanaa estuwa yaikkire áza Dadaamiya*

<sup>1</sup> Am gakurevge palle antara Yaisu \*Almasiihu na, a ndzedakurtaa ba una ñanneka emtu? Wáyáva-aara áte kure na ankwá á vakurteva emtu ndzedá? Ankwá emtu Shedekwe á Dadaamiya á maga slera-aara am kure? Kwá ankwá wayaavewáye emtu kure keni? Ankwá emtu zezarziire am dagave á kure?

<sup>2</sup> Máki estuwa wá, wayawaavewaye am dagave á kure ma vaatara keni. Enkale á kure á gevge palle, we á kure keni á gevge palle. Má magakurnaamaga una ñanna wá, iya keni á de higetehiga ervaunđe-aaruwa kwakya.

<sup>3</sup> Zharauka sey ba ire á kure, galauka ire, amá arge una ñanna wá, gawanaaga ire á kure, zharauzhárá emnde umele ba seke ta male-aha arge kure.

<sup>4</sup> Ma ware keni a emmága názena ni á de melateru ge emnde umele, zharauka sey ba ire á kure palle ge maga názena á de melakuru ba ge kure palle na.

<sup>5</sup> Eksawanteksa enkale á Yaisu Almasiihu á dem ire á kure.

<sup>6</sup> Ñane wá, ba jirire geni ñane antara Dadaamiya tá ba palle, amá ñane tatayaaka gev kalkale an Dadaamiya d'ekid'eki.

<sup>7</sup> A yaa dzámá una ñanna ba d'ekid'eki, a ganve ire-aara urimagwe. Á ba am urimagwire ñanna keni, a geve sleslera á emnde zlafe ádaliye.

<sup>8</sup> An una ñanna wá, a ganve ire-aara cekwa, a fansaarfe ge Dadaamiya, haa a danaa á dem emtsa. Emtsa ñanna keni, baira ta janaa á ba áte dzangala.

<sup>9</sup> Adaba una ñanna, a naba walantehe ge Dadaamiya, a vante yaikkire arge duksa bademme, a fanaa zhera na jauje ge zhera-aha bademme ba seke zawa á slera-aara.

<sup>10</sup> A vante una ñanna geni bademme á názena am samaya antara názena áte haha antara ba názena am ekte á haha keni, má cenarácena zhera-aara wá, tá se kezlan ugje á katafke-aara.

<sup>11</sup> Zlafe ádaliye ma ware keni á de ndahaná á ba an we-aara geni Yaisu Almasiihu wá, Yaakadada. Estuwa tá de gálá Eddeñara Dadaamiya keni.

### *Gawuvge ba seke parakkire*

<sup>12</sup> Adaba una ñanna egdzar mama-aha-aaruwa, kure keni fawansarfe ge Dadaamiya. Am sarte na ndza yá ankwá ázekure wá, kwa fansaare ge Dadaamiya. Kina na yá baaka ázekure na keni, fawarfe zlafe ádaliye ge fesarfire á kure. Adaba Dadaamiya a lyakursehe, daaci kure keni magawanánmaga slera na ni á de mára geni a lyakursaa ñane. Magaumága una ñanna an lyawa-aara.

<sup>13</sup> Adaba Dadaamiya wá, ankwá á maganá ba ñane slera-aara am kure, geni kwá wáyá ba názena á kataná ñane kwá ámbera emmága.

<sup>14</sup> Baɗemme á názena kwá maganá kure, magauka an ga jawe bi an ervaunɗe.

<sup>15</sup> Daaci estuwa kure egdzara á Dadaamiya, kwá gev emnde na dzayye ervaunɗe á kure, ɓaaka laakire am kure ge mága mandzawire. Gawuvge kwa parakkire-aha ba kure am dagave á emnde a mága kemaŋgerire,

<sup>16</sup> kwá baterná ba kure elva á shifa na, an shagerire á ervaunɗe. Má magakurnaamaga una ɗanna wá, yá de nanna geni zlaɗa á slera na ya maganaa iya na gevka dey.

<sup>17</sup> Ervaunɗe á kure na kwa vante ge Yaisu \*Almasiihu na wá, una ɗanna gevge ba seke sadake á nasherire á kure na kwa vante ge Dadaamiya. Iya wá, ámbane tá de ja shifa-aaruwa baɗemme, amá ma jarija keni, ba higa ge iya. Aɗaba uzhe-aaruwa keni á de gevge sadake na yá fakuraare ge náza á kure na. Má gevge estuwa, yá de higa jipu, yá kátá higa á kure keni a gevge ba seke náza-aaruwa.

<sup>18</sup> Estuwa higaumihiga baɗemme á kure, higaumihiga átirpalle.

### *Timaute antara Aipafrauditus*

<sup>19</sup> Má wayetewayaya Yaakadada Yaisu wá, yá tama bela Timaute ba herzhe na á dezekure, geni watse á se mbediwá ɗane labare á kure. Watse yá shá ndzeɗa átekwa ba seke una á de vakurte ge kure na.

<sup>20</sup> Áhuna wá, ɓaaka ura eŋkale á ɗere palle seke ɗane, aɗaba ɗane wá, á dzamakurdzámá jipu.

<sup>21</sup> Amá emnde umele wá, ma ware keni á magá ba názena watse shagera ba ge ɗane na, tá dzameka názá á Yaisu \*Almasiihu ɗekideki.

<sup>22</sup> Amá Timaute wá, ba kure keni diyakurdiya shagerire á zlála-aaara. Ná aŋkwa maga waazu á labare á higa á ba antara ɗane, á meliyumele jipu am slera ɗanna, ba seke egdzere á melanu ge eddeɗara am slera.

<sup>23</sup> Daaci yá paka ba má icaranvice shairiya-aaruwa, yá de bela ɗane á dezekure ba watsewatse.

<sup>24</sup> Má wayetewayaya Yaakadada wá, ba iya keni, diyandiya yá aŋkwa duwa á dezekure ba herzhe na.

<sup>25</sup> Egdza emmeruwa Aipafrauditus na kwa belanaa kure á sezeruwa an náza ja wedera-aaruwa na wá, maganernaamaga slera kwakya antara ɗane. Kina wá, shagera ba yá belanaabela, á eptsá á dezekure zlaɓe ádaliye.

<sup>26</sup> Aɗaba ɗane keni wesheteweshe ire-aaara, wayaawayaya jipu geni á de zharakurzhará, aɗaba diyaadiya ganakini cenakuráncena lapikere-aaara ge ɗane.

<sup>27</sup> Ba jirire geni ndza lapika ba zlazlaɗa, a juwa ba cekwaangudi ge emtsa. Daaci a zanvaare ba Dadaamiya, a mbanaahe. A zanvaare ge ɗane palleka, a zivaare ge iya keni, geni a shananka shunɗula umele zlaɓe ádaliye.

<sup>28</sup> Aɗaba una ɗanna, wayanwayaya jipu geni yá eptsanaaptsa zlaɓe ádaliye á dezekure, geni má de puwakurtepuwa ice á kure áte ɗane, kwá de higa jipu, iya keni á de ekhya ervaunɗe-aaruwa.

<sup>29</sup> Daaci má de damda am dagave á kure, lyauvaalya an higa á kure baɗemme, aɗaba egdza emmekure áte unɗule á Yaakadada, faufa zherwe áte jeba á emnde ɗanna.

<sup>30</sup> Aɗaba ɗane a juwaa ba cekwaangudi ma á emtsa aɗaba slera á Yaakadada. Dzameka shifa-aaara ɗekideki, geni á zlanazle slera na ma kwá maginá kure.

### 3

#### *Tá shaná estara dzayyire á ervaunŋde á katafke á Dadaamiya*

<sup>1</sup> Egdzar mama-aha-aaruwa, higauhiga mazla-aara adaba kwa emnde á Yaakadada. Elva nanna yá ekkudeka ya dekiŋdeki ge endáhá-aara, yá anŋkwa fakuraarefe zlaŋe adaliye eppuwa-aara adaba baaka shaige-aara kwá de shá ndzedá an nane.

<sup>2</sup> Faufa hyema áte emnde á bala labare á fida, ngudi-aha na tá kátá ba puwa emnde á dem shedekwe na.

<sup>3</sup> Dem shedekwe á jirire áza Dadaamiya wá, á ba am miya, itare diyarka. Adaba miya wá, mí nala Dadaamiya an hakuma á Shedekwe Cudedŋde. Mí gala ba Yaisu \*Almasiihu palle, mí fetarka áte názena mí maganna miya geni mí de shá dzayyire á ervaunŋde áza Dadaamiya.

<sup>4</sup> Ma seke naŋe-aha á emnde am duniya na á maga nampire wá, iya keni ma andze yá galá ire an nane. Má bánba edda-aara geni anŋkwa nampire á daba naŋe-aha á emnde am duniya na wá, náza-aaruwa ma andze á tsaaka.

<sup>5</sup> Adaba iya wá, yá ba egdza á \*Iserayiila miyenne, yá egdza á Bainjamain am jeba á Ibraniŋkau-aha miyenne, ta fiya am shedekwe am hare tiisire. Má ge daba \*tawraitá á Yahudiya-aha, baira iya ndza ya ura Farisá.

<sup>6</sup> Ndza nannaana á ba áte kalkalire-aara bademme názena am tawraitá á Yahudiya-aha, de ba am zlaŋa keni puwanaterempuwa emnde na tá daba Yaisu Almasiihu na. Má ge daba tawraitá wá, baaka ura á biyá: dabanŋka tawraitá.

<sup>7</sup> Bademme á duksa-aha nanna ndza ya zharater ba seke duksa á nampire, amá kina wá, adaba yá anŋkwa daba Yaisu Almasiihu na wá, yá zharater ba seke duksa ba dey mazla-aara.

<sup>8</sup> Eptsanaterveptsá iga ba dekiŋdeki ge duksa-aha nanna, adaba diyandiya Yaakadada Yaisu Almasiihu. Una nanna jauje ge duksa bademme. Eptsanaterveptsá iga ge duksa-aha nanna adaba nane, yá zharater ba seke dŋge mazla-aara am ice-aaruwa, geni a jauje ba Yaisu Almasiihu palle am ervaunŋde-aaruwa.

<sup>9</sup> Ma yá njá an shifa keni, yá njá á ba an nane palle. Ya ndahaka mazla-aara geni yá ura dzayye ervaunŋde áza Dadaamiya adaba yá fansaare ge tawraitá, amá názena á givege sledzayye á ervaunŋde áza Dadaamiya wá, sey ba yá fetaare áte Yaisu Almasiihu. Ba Dadaamiya palle a giyanvege ervaunŋde dzayye, adaba yá fetaare áte nane.

<sup>10</sup> Názena yá kataná iya kina wá, ba yá diyeddiye Yaisu Almasiihu antara hakuma-aara na a tsete am faya an nane na, antara yá shushe laruwa ba seke una a shanaa nane; má yá emtsa keni, yá emtsa ba seke náza-aara,

<sup>11</sup> geni má a ewwáyá Dadaamiya wá, á shifiteshifa ba seke una a shifante nane na.

#### *Yá zhagade á ba á de katafke ge báká názena á katafke-aaruwa*

<sup>12</sup> Ndahanka ya geni iya wá, damda duksa nanna yá bakaná ya na am erva-aaruwa, ndahanka keni ganevge ura cudedŋde, amá yá ámbera á ba wava geni a demda duksa nanna am erva-aaruwa, adaba lyivalya Yaisu \*Almasiihu, ya am erva-aara ge nane.

<sup>13</sup> Egdzar mama-aha-aaruwa, ndahanka ya geni iya wá, shanánsa duksa nanna zlauzle, amá duksa palle yá maganá ya wá, yá eptseka wafke-aaruwa ge zhárá názena ya eptsanve iga, amá yá zhagade á ba á de á katafke geni a shanánsa duksa nanna yá bakaná ya na.



<sup>14</sup> Yá zhagade á ba á de á katafke, geni a danemda á dem tate ñanna á kataná ervaunċe-aaruwa, yá de lyevalya ladfa na á dċahamiya Dadaamiya ge ñane na, á ba ñane: Sawmbare á sem mba-aaruwa am samaya, adaba fakurtarfe áte Yaisu Almasiihu.

<sup>15</sup> Adaba una ñanna, miya emnde na gyaimiyebgye am elva á Dadaamiya na wá, shagera enjkale á miya a gevge palle áte duksa ñanna. Máki tá anjwa emnde na elva ñanna daaka á dem enjkale-aatare, watse á de marateránmára Dadaamiya ba parakke.

<sup>16</sup> Duksa yaikke wá, unñule ñanna mí dabaná miya sem vatená na wá, eptsaumika á dem iga, amá mí zlaláwa á ba á de katafke.

<sup>17</sup> Egdzar mama-aha-aaruwa, ekkure bademmire á kure dċabaudċaba ba sera-aaruwa, zharauzhára gáráva á zlala ñanna áte náza á emnde na tá anjwa magán ba kalkale antara náza á ñere na. Ekkure keni magaumága á ba áte una ñanna.

<sup>18</sup> Adaba tá anjwa emnde umele kwakya, labare-aatare keni ndza ya bakuránba ser kwakya, kina keni yá bakuránba zlaċe ádaliye an yawe kyuwa am ice: mága-aatare ñanna wá, tá kelaade-aha á emtsa á Yaisu \*Almasiihu áte dzanċgala.

<sup>19</sup> Vaci shairiya wá, watse tá dem kára, adaba dċabarka Dadaamiya. Dadaamiya-aatare ge itare sey ba huċe, tá maga ba názena zherwe bademme, amá á waterka dċekidċeki, baira tá gala ire an ñane, tá dzama ba kazlana á duniya.

<sup>20</sup> Miya wá, watse mí dem mba á Dadaamiya, mí páká ba sawa á Yaakadada Yaisu Almasiihu Slelyamilya, á sawa am samaya.

<sup>21</sup> Am sarte na má de samsa ñane an hakuma-aara, á se ganvege duksa bademme am sera-aara, á se eptsamiyantepsta vuwa a laakire á miya na, geni vuwa á miya keni á gevge an dárádza seke náza-aara.

## 4

### *Higauhiga, baaka lámbe á kure, kwá am erva á Yaakadada*

<sup>1</sup> Adaba una ñanna egdzar mama-aha-aaruwa, tsawaatse ba dzanċzane, adaba kure wá, kwá am erva á Yaakadada. Á higa jipu ervaunċe-aaruwa áte kure, yá kátá ba ya pute ice-aaruwa áte kure, adaba kure wá, ñgahire-aaruwa ya shanaa á ba áte kure.

<sup>2</sup> Ekkure tara Aiwaudiya antara Sintike keni, yá ñalakurñala taslawa á kure melaumela. Adaba bukerdċire á kure kwa ba emnde á Yaakadada.

<sup>3</sup> Daaci yá bakanba ge ekka keni sleslera palle antara iya: Melaterumele ge ñwasha na, adaba wavanjeruwava jipu antara itare ge balateraa labare á higa, elva a Yaisu \*Almasiihu ge emnde. Iya, ñwasha ñanna, Kelementus, antara emnde a Yaakadada umele na anjwa zhera-aatare am wakita á Dadaamiya na keni, bademmire á ñere ndza ña magaa slera átirpalle.

<sup>4</sup> Higauhiga ba kelaazare, adaba gakurevge am erva á Yaakadada. Yá ndahakurndaha zlaċe ádaliye: Higauhiga.

<sup>5</sup> Magaumága názena tá de diyeddiye emnde átekwa geni kwa emnde a farvaunċe. Yehauteyeha geni Yaakadada á eptsá ba herzhe na.

<sup>6</sup> Dzamauka ire dċekidċeki, bawanánba názena ektsakuraarektse bademme ge Dadaamiya, ñalaunála ba ñane palle geni á melakurumele, antara slafa we á kure ge ñane campaukkwe.

<sup>7</sup> Daaci Dadaamiya á de vakurteva hairire-aara na jauje ge diya emnde bademme na, á de tsufakurná ba hairire ñanna ervaunċe á kure antara enjkale á kure, adaba kwá am erva á Yaisu Almasiihu.

*Dzamaudzama duksa-aha na*

<sup>8</sup> Egdzar mama-aha-aaruwa, náwa una halavuwa á elva-aaruwa. Baðemme á názena gevge shagera, antara názena á wayaná Dadaamiya, viyawanaaka. Dzamaudzama názena gevge jirire, názena hyafhye geni emnde tá fa zherwe áte ñane, názena áte unñule-aara, názena gevge cuðeðde, názena an dárádza, názena á de maga námpire, baðemme.

<sup>9</sup> Baðemme á názena kwa tsahesaa kure ázeruwa kwa lyevaahé na, antara názena kwa cenanaa am mbuwe-aaruwa, názena ya maganaa ya zharakurnaazhara na, magaumága áte unñule-aara. Daaci Dadaamiya slevamite hairire na á de tsufakurtsufa.

*Paul á slafater we ge Filipi-aha aɗaba sadake á nasherire-aatare*

<sup>10</sup> Yá slafaná we-aaruwa jipu ge Yaakadada Yaisu \*Almasiihu, antara higa-aaruwa campaukkwe, aɗaba zlaɓe danseka am ire á kure. Á ba am zunñwire keni, ba jirire kwa dzamidzama, amá shakuranka ba barama á velita duksa, haa harahare estuwa.

<sup>11</sup> Banakuranka una aɗaba yá am baakire, mbansembe njá an higa ma ankwá duksa-aaruwa, ma baaka duksa-aaruwa keni.

<sup>12</sup> Diyandiya nja ma yá am baakire, ma yá berba keni. Diyandiya nja ma yá estara keni, ma ankwá duksa ge zuze-aaruwa, ma baaka ba názena yá zuze keni, ma yá berba, ma ektsiyarektse náza ja wedera-aaruwa keni.

<sup>13</sup> Yá dzegwándzegwa mága una-aha ñanna baðemme aɗaba barka á Yaisu Almasiihu ñane slevita ndzeɗa.

<sup>14</sup> Aley keni, kwa magaa ba shagera ge una ni kwá ankwá meliyumele am laruwa-aaruwa na.

<sup>15</sup> Ekkure emnde a Filipi wá, diyakurdiya ba kure keni geni kwaye á ba am sarte na ya fantuwanfe ge ðalakura elva á Yaisu \*Almasiihu am Makiduniya na keni, ya zlalehe ba estuwa am larde á kure, sey ba kure palle una kwa meliyumele, ba kure palle una kwa vitaa duksa.

<sup>16</sup> Am sarte na ya am Taisalauniki keni, ndza kwa velitaa ba kure duksa ser buwa ge ja wedera-aaruwa.

<sup>17</sup> Yá ndahakur una geni yá kátá duksa-ka, amá yá higa aɗaba diyandiya geni Dadaamiya á de ga barka áte kure aɗaba sadake á nasherire á kure.

<sup>18</sup> Lyanvalya názena kwa velitaa kure na baðemme am erva á Aipafraditus, hyafhye jipu, jauje am názena ndza ya katanaa ya. Duksa-aha ñanna shagera jipu ge sadake á nasherire á katafke á Dadaamiya, ervaunðe á Dadaamiya emtake jipu.

<sup>19</sup> Dadaamiya na baðemme á kwakyire á duksa á ba azeñara na, á de hyakuranvehye wedera-aha á kure baðemme an zhera á Yaisu Almasiihu.

<sup>20</sup> Demðemire ge Eddemiya Dadaamiya dem ba ge ðekideki. \*Aamin.

*Use á tara Paul an emnde umele*

<sup>21</sup> Gawaterga use-aaruwa ge emnde a fetarfe na tá am erva á Yaisu \*Almasiihu baðemme. Egdzar mama-aha á miya na tá antara iya áhuna keni tá ankwá gakur use-aatare.

<sup>22</sup> Baðemme á emnde a fetarfe tá ankwá gakur use-aatare, kwakya-aara ba emnde na tá á mba á male á larde á Rauma.

<sup>23</sup> Yaakadada á miya Yaisu Almasiihu á gakurarga barka ge kure baðemme.

## Wakita na a puwatertaa Paul ge emnde a KAULAUSIYA

### *Ga use á Paul*

<sup>1</sup> Wakita na yá anƙwa puwaná ba iya Paul, a eksisaa Dadaamiya geni yá gevge slebela á Yaisu \*Almasiihu, ná anƙwa puwaná antara Timaute egdza emmemiya am elva á Yaisu Almasiihu.

<sup>2</sup> Ná puwakurte wakita na ge kure emnde á Dadaamiya na kwá am Kaulausiya. Ekkure, kwa egdzar mama-aha á miya na kwa dábete Yaisu Almasiihu an ervaunƙe á kure palle, Eddemiya Dadaamiya a magakuranmaga ngurna, a vakurteva hairire.

### *Maduwa á Paul ge Kaulausiya-aha*

<sup>3</sup> Ba kelaa ma ná anƙwa maga maduwa adaba kure wá, ná slafaná we á nƙere jipu ge Dadaamiya Eddenjara ge Yaakadada Yaisu \*Almasiihu, ná slafaná we adaba kure,

<sup>4</sup> adaba cenanjerancena labare á fetarfire á kure áte Yaisu Almasiihu, antara wayakurwaya an emnde na tá anƙwa daba Dadaamiya bademme.

<sup>5</sup> Kwá anƙwa maga una, adaba fakurtefa tama á kure áte duksa shagera na a fakuraa Dadaamiya am samaya na. Duksa njanna keni kwa cenán kinekinaka am labare á higa na elva a jirire na.

<sup>6</sup> Labare á higa njanna wá, njane wá, ba seke njá á nafa, á wálá, daaci á yá egdzere shagera. Adaba hyemhye am duniya bademme. Am kure keni hyemhye ba estuwa. Adaba kwaye ba vacite na kwa cenvaa ge zuññwire geni Dadaamiya magakuranmaga ngurna jirire na, sem vatena kwá far ba maga ba duksa na shagera.

<sup>7</sup> Ba Aipafras una a de mbakurse labare njanna, wayanjerwáyá jipu dawale njanna an ervaunƙe á nƙere palle. Nere antara njane, na emnde a slera á Yaisu \*Almasiihu. Njane á anƙwa maganá slera ge Yaisu Almasiihu an ervaunƙe-aara palle. Daaci ba njane una gevge sera á nƙere antara we á nƙere am dagave á kure.

<sup>8</sup> Ba njane una a se mbedanjeru labare á kure geni Shedekwe á Dadaamiya a vakurte mága wayavire ge kure.

### *Jirire á názena á njalaterwa Paul ge emnde a Kaulausiya*

<sup>9</sup> Adaba una njanna, kwaye ba vacite na cenanjerancená labare á kure, sem vatena, ná njala ba Dadaamiya adaba kure, geni kwá diyeddiye názena á kataná Dadaamiya ázekure bademme, antara geni kwá shansha ilmu na á vatertá Shedekwe á Dadaamiya ge emnde na, geni a ektsakuraareka enjkale am duksa bademme.

<sup>10</sup> An ilmu njanna maa, kwá de shá zlaláva na ni á zlayáter ge emnde á Yaakadada, zlaláva na á kataná njane. Daaci bademme á názena kwá de maganá kure, kwá de maga ba názena á de maganá nampire ge njane. Diya á kure áte Dadaamiya keni á de farfe ba kelaazare.

<sup>11</sup> Ná anƙwa njala Dadaamiya zlafe adaliye geni á gakurvege midale-aha an hakuma-aara na jauje ge duksa bademme na, lauktu kwá de gevge emnde a farvaunƙe. Daaci kwá de dzegwándzegwa basha duksa bademme.

<sup>12</sup> Slafawananslafa we á kure ge Eddemiya Dadaamiya an higa á kure bademme, adaba ba njane una a magakuraa pute, geni kure keni kwá de

lyevalya dza á kure am duksa shagera na a fater ge emnde cufedfe. Duksa nanna wá, am zlan-na-aara na ankwá parakkire jipu na.

<sup>13</sup> Ba nane una a lyamise am erva á slekse á tabedammire, a samiya á sem kwára á Egdza-aara na wayaawaya jipu na.

<sup>14</sup> Daaci á ba kya erva an Egdza-aara palle, a varamise, a yamiyaarhe.

*Ngahire á \*Almasiihu antara slera-aara*

<sup>15</sup> Baaka edda una á nanna Dadaamiya an ice, amá Yaisu \*Almasiihu wá, ndza naranna emnde. Nane garava á Dadaamiya, á maramiya njá á Dadaamiya. Ba nane una \*Egdza á Dadaamiya, male arge duksa-aha na a nderanaa Dadaamiya bademme. Adaba nane wá, ndza ankwá am fakta á duksa bademme.

<sup>16</sup> Dadaamiya a nderaa duksa bademme á kya erva an nane. Duksa-aha na tá am samaya antara una-aha áte haha, duksa-aha na tá nanna emnde antara una tá nanka emnde, malika-aha na tá an hakuma am samaya antara male-aha-aatare bademme, Dadaamiya a nderateraa á kya erva an Egdza-aara nanna bademme, a nderater ba ge nane.

<sup>17</sup> Zunjwe á ba nane arge duksa bademme. Duksa bademme á njá an unjule-aara keni, á naterá ba nane an hakuma-aara.

<sup>18</sup> Ba nane una á kwára emnde na fartarfe áte nane. Nane wá, ba seke ire, emnde a fetarfe keni ta ba seke vuwa-aara. Ba nane una fakte á duksa bademme, zunjwe á ba nane zlafe adaliye ge tseta am faya, geni a gevge ire arge duksa bademme.

<sup>19</sup> Wayetewáyá Dadaamiya geni Egdza-aara á de eksa ba nane am duksa bademme.

<sup>20</sup> A naba magaa pute geni bademme á názena a nderanaa nane, názena am samaya antara una áte haha, a sharánsha mela antara nane bademme, adaba uzhe na a puwanvaa Egdza-aara áte dzangala na. A magaa una nanna geni duksa bademme a sharánsha hairire antara nane.

<sup>21</sup> Werre wá, ndza tegakurevtega antara Dadaamiya, ndza kwa kelaade-aha-aara adaba shagerkire á názena kwa maganaa kure.

<sup>22</sup> Amá kina wá, Dadaamiya a magakuraa pute umele ge kure, shakuránsha mela antara nane adaba emtsa á Egdza-aara am sarte na gevge urimagwe a emtsehe na. A magaa una nanna geni kwa gevge emnde na dzayye ervaunfe á kure; watse kwá de katafke-aara baaka kwazlambire am ervaunfe á kure dekideki.

<sup>23</sup> Amá wa, yawánka dába Yaisu \*Almasiihu, tsawaatse ba dzandzane, gazlauka dekideki, fautefa tama á kure áte názena tá ndahaná emnde a bala labare á higa, elva a Yaisu Almasiihu na. Labare á higa nanna wá, balateresebale ge emnde bademme am huđe á duniya. Ba iya Paul keni ya sleslera á Dadaamiya ba ge balaterá waazu á una nanna ge emnde.

*Slera na a faraa Dadaamiya ge Paul*

<sup>24</sup> Yá higa jipu am zladá-aaruwa na yá shaná adaba kure. Ba seke una ni Yaisu \*Almasiihu shushe zladá werre na wá, iya keni yá shushe zladá kina, geni yá zlan-aazle slera-aara na a shu zladá adaba nane na. Yá shá zladá adaba emnde na ta fetaare áte nane garevge ba seke vuwa-aara na.

<sup>25</sup> Iya, ganevge sleslera á emnde a fetarfe, ba Dadaamiya una a fiyaare slera nanna geni yá melakurumele, yá magaterá waazu á elva-aara ge emnde, yá gulanaaka.

<sup>26</sup> Werre wá, Dadaamiya ndza maraaka elva nanna dekideki ndza á ba an shebe. Amá kina wá, a naba maraterse ge emnde na tá ankwá daba nane na.

<sup>27</sup> Dadaamiya wayetewáyá maratera slera shagera na watse á de maganá ñane na ge emnde-aara. Slera ñanna wá, baaka argena ðekideki an shagerire, anƙwa á maganá am dagave á emnde na garevka Yahudiya-aha keni baðemme. Amaana: Yaisu Almasiihu anƙwa am kure, baaka shaige geni kwá dem zlanne tate na átekwa Dadaamiya an yaikkire-aara.

<sup>28</sup> Ba Yaisu Almasiihu una ñá anƙwa balaterá elva-aara ge emnde, ñá anƙwa faterem am taða-aatare ge emnde baðemme, ñá mbaterse duksa áte ñane an ilmu na a vañertaa Dadaamiya, aɗaba ñá kátá emnde baðemme tá vante ervaunðe-aatare ge Yaisu Almasiihu, tá gyebye am elva á Dadaamiya.

<sup>29</sup> Aɗaba una ñanna nguðansengufe huðe geni yá zlanazle slera ñanna an ndzeɗa na á vitá Yaisu Almasiihu.

## 2

<sup>1</sup> Yá kátá kwa cenancena wawa yaikke na yá anƙwa maganá ya aɗaba kure, antara emnde á Lawdikiya ira emnde na itare keni narika an ice-aatare.

<sup>2</sup> Yá anƙwa á maga una ñanna geni baðemme á kure kwa shansha ndzeɗa ge ɗaba Yaisu Almasiihu, kwa wayaavewayaya am dagave á kure áte ervaunðe palle, antara geni kwa cenvaacena elva na a sakuransehe ge Dadaamiya, daaci kwá tsaatse átekwa, ñane keni á gá barka áte kure. Elva ñanna ndza an shebe, a sakuransehe ge Dadaamiya na wá, ba Yaisu Almasiihu.

<sup>3</sup> Tara enƙale antara ilmu na á vatertá Dadaamiya ge emnde na keni baðemme anƙwa am ñane.

<sup>4</sup> Yá bakurá una, geni a badakuruka ura umele ba dey an elva emtakemtake.

<sup>5</sup> Ma baaka ba ire-aaruwa am dagave á kure keni, am ervaunðe-aaruwa yá á ba am dagave á kure. Daaci yá higa jipu áte kure aɗaba duksa baðemme kwá anƙwa maganá á ba áte unñule-aara, antara aɗaba dzanðzanjire á fetarfe á kure áte Yaisu Almasiihu.

### *Shifa jirire wá, á ba am Yaisu palle*

<sup>6</sup> Ba seke una ni lyakurvalya Yaisu \*Almasiihu ge Yaakadadire na wá, zlaláva á kure keni a gevge ba seke una á kataná ñane.

<sup>7</sup> Ba seke nafa, máki á wálá, á vela slalwe-aara á dem haha lauktu á tse degdege na wá, ge kure keni ba estuwa, njawinja degdege am erva-aara, ekhyawanaaka fetarfire á kure, ɗabaudɗaba á ba áte una ta mbakursembe na. Slafawannaaslafa we á kure ge Dadaamiya ba kelaazare.

<sup>8</sup> Faufa hyema geni a keɗakuraaka ura umele ba dey an diya na tá mbesa emnde á ba am duniya na, baaka nampire-aara ðekideki, aɗaba saaka á sawa aza Yaisu Almasiihu, á sawa aza jini-aha antara male-aha-aatare.

<sup>9</sup> Ba Yaisu Almasiihu palle una a de eksa Dadaamiya am njá-aara baðemme.

<sup>10</sup> Daaci am nja á kure antara Yaisu na wá, shakuransha duksa baðemme am shifa á kure. Ñane wá, malika-aha na tá an hakuma am samaya baðemme, tá á ba am erva-aara.

<sup>11</sup> Gakurevge tsawe palle antara Yaisu Almasiihu wá, dakuremda am shedekwe. Amá dema am shedekwe na tá maganá emndimagwaha-ka, á maganá Yaisu Almasiihu an hakuma-aara. Amaana: a mbedakurse ervaunðe á kure na ndza á ɗakurá á dem haypa na.



<sup>12</sup> Am sarte na ta magakuraa baptisma, una nanna á mára una ni kwa tsetaa am faya átirpalle antara nane. Fakurtarfe geni Dadaamiya a tsante nane am faya an hakuma-aara, fakurtarfe geni á de tsakurtetse kure keni.

<sup>13</sup> Werre, ndza kwa ba seke emtsa-aha am ice á Dadaamiya adaba haypa-aha á kure, antara adaba ndza diyakurka shairiya-aha-aara. Amá kina wá, Dadaamiya a vakurtaa shifa anwaslire átirpalle antara Yaisu Almasiihu, a naba yamiyaare haypa-aha á miya bademme.

<sup>14</sup> Haypa-aha nanna wá, ndza ba seke gema áte miya, hyephye ge mbedamiya am shairiya. Amá Dadaamiya a naba yamiyaa gema nanna, á ndavamiyuka mazla-aara adaba emtsa á Yaisu Almasiihu áte dzangala.

<sup>15</sup> A ganaa á ba áte dzangala nanna midalire arge jini-aha antara male-aha-aatare bademme, a sluwatervaahe, a jaterse zherwe á katafke á emnde bademme.

<sup>16</sup> Máki estuwa, a mberzarakurka geni labara kwa za una? Bi labara kwa sha una? Labara magakurka munri na? Bi náza ja tere na antara kwaskwe á puwansepuwe?

<sup>17</sup> Bademme á una-aha nanna ndza miyenne-aareka emtsaade, ndza ba ge ufa duksa shagera na á de sawa na. Duksa nanna wá, ba Yaisu \*Almasiihu.

<sup>18</sup> Tá ankwa emnde umele, ta ganve ire-aatare ba seke ta emnde na wayarka gálá ire, tá ankwa baterán ge emnde umele keni geni gálá ire wá, shagerka, tá baterán ge emnde geni a yekaryeka an zhera á malika-aha, wayarwáyá jipu ge bálá názena tá zharaná am shene-aha-aatare keni. Jeba á emnde nanna wá, ta gala ire ba dey, dzama ire-aatare ba dzama ire á emnde am duniya. Vawaterteka barama ge maga una nanna am dagave á kure, a tegarakuraaka antara duksa shagera na á katafke á kure.

<sup>19</sup> Itare, ta yiyiye an Yaisu Almasiihu na nane ire na, emnde na tá adaba nane bademme ta vuwa-aara. Daaci máki mí adaba ba nane, vuwa bademme, dzagwa á ubiya-aha antara perde-aha tá wálá á ba áte unjule-aara, áte una á kataná Dadaamiya.

### *Emtsá átirpalle antara Yaisu, tsete átirpalle antara Yaisu*

<sup>20</sup> Diyakurdiya geni emtsakuramtsa átirpalle antara Yaisu \*Almasiihu, daaci baaka hakuma á jini-aha áte kure mazla-aara emtu? Ay ba estuwa wá, labara kwá njá ba seke mága á emnde na diyarka Yaisu Almasiihu na? Labara kwá fatersarfe ge shairiya-aha na a ba itare:

<sup>21</sup> Gawanávteka ge duksa estuwa, zauka duksa estuwa, fauka erva áte duksa estuwa na?

<sup>22</sup> Adaba jeba á shairiya-aha nanna, tá ndaha ba elva á názena á de zlauzle á ba am duniya na. Ta jansaara ba emnde ge una-aha nanna.

<sup>23</sup> Ge jirire wá, má ká cena shairiya-aha nanna wá, ká cenán ba seke náza vante enkale ge ura. Adaba a ba itare: sey kwá maga duksa ba kwakya ge adaba Dadaamiya, sey kwá ganaaga ire á kure ba shagera, kwá ámbere maganá laruwa ge ire á kure. Amá una-aha nanna bademme á de melakuruka dekideki geni kwá kwarukware ervaunde á kure am emtanjire á názena á kátá maganá vuwa á kure bademme.

## 3

<sup>1</sup> Diyakurdiya geni Dadaamiya a tsakurtehe am faya átirpalle antara Yaisu \*Almasiihu emtu? Adaba una nanna tatayautátaya kazlaña na am samaya am tate na ankwa á njá Yaisu Almasiihu am nadafa á Dadaamiya.

<sup>2</sup> An enkale á kure bademme, dzamaudzama ba kazlaña na am samaya na, dzamauka kazlaña na am duniya.

<sup>3</sup> Adaba diyakurdiya geni shifa á kure werre na wá, emtsamtsa, Dadaamiya a tsakurtehe átirpalle antara Yaisu Almasiihu. Daaci shifa á kure anwaslire anƙwa antara Yaisu Almasiihu, a shebakuranvehe ge Dadaamiya ázenara.

<sup>4</sup> Ge jirire wá, shifa á kure ba Yaisu Almasiihu. Má de jesarja ɲane, kure keni kwá de jesarje an ɲane átirpalle am yaikkire-aara.

*Zláláva werre antara náza vatena*

<sup>5</sup> Adaba una ɲanna, shagerkire á názena jauje am ervaunƙe á kure na sawansese bademme, a gevge ba seke lipa á katafke á kure. Yawanya dakarire antara gwardzire antara mága emtaɲkire na á kátá maganá vuwa á kure bademme, antara waya duksa an ervaunƙe á kure bademme. Adaba má kwá waya duksa an ervaunƙe á kure bademme, duksa ɲanna gevge ba seke dadaamiya á kure.

<sup>6</sup> Kwaya ɲane názena ni á piyaterte ge emnde geni a faransareka ge Dadaamiya. Adaba una ɲanna tá anƙwa am ervaunƙe á Dadaamiya.

<sup>7</sup> Kure keni, am sarte na zlaƙe sakurseka am duksa-aha ɲanna, zláláva á kure ndza ba estuwa.

<sup>8</sup> Amá kina wá, puwanvepuwe kazlaɲa-aha na bademme, mága ervaunƙe, mága kemaɲgerire, zlazla ura antara elva yaihyaihe.

<sup>9</sup> Magawaterka fida ge emnde, adaba kure sakuresse am zláláva werre, puwakuranvepuwe kazlaɲa werre bademme,

<sup>10</sup> kwa eksante zláláva umele anwaslire. Una ɲanna keni a eptsakuranta ba Dadaamiya. Ba ɲane una a de gakuranvege ervaunƙe á kure anwaslire ba kelaazare, geni á gevge ba seke náza-aara, daaci kwá de diyeddiye Dadaamiya ba shagera.

<sup>11</sup> Daaci estuwa, baaka una Yahudiya-aha, una emnde á jeba umele. Baaka una emnde na ta am shedekwe, una emnde na ta baaka am shedekwe. Baaka una emnde na weraaka ire-aatare, una emnde na tá á kataliya á emnde bademme. Baaka una nave-aha, una emnde na tá kwará ire-aatare. Bademme á emnde ta ba kalkale áza Dadaamiya. Adaba ba Yaisu \*Almasiihu palle una ura yaikke, anƙwa á njá am ervaunƙe á emnde-aara bademme.

<sup>12</sup> Diyakurdiya geni zunɲwe a wayakurtaa ba Dadaamiya emtsaafde, daaci a naba dzerakursehe geni kwá gevge emnde-aara. Adaba una ɲanna, gawevge emnde a zavarze, emnde a maggwire á sawa am ervaunƙe, gawevge emnde a kemaare, emnde a ga ire á katafke á emnde umele, ira emnde a farvaunƙe.

<sup>13</sup> Faufa ervaunƙe am dagave á kure. Má ura a naba magakurte emtaɲkire, naba yawanarye haypa-aha-aara. Yaakadada á miya a naba yamiyaare ge miya. Adaba una ɲanna, kure keni yawateraarye ge emnde umele.

<sup>14</sup> Duksa yaikke wá, wayawavewayaya am dagave á kure. Adaba ba wayava palle una á jatermaare ge emnde bademme.

<sup>15</sup> Hairire na a vakurtaa Yaisu Almasiihu na wá, yawanya a shapteshe am ervaunƙe á kure. Adaba Dadaamiya a dƙahakur ba ge una ɲanna, geni kwá gevge ba seke vuwa á ura palle. Daaci slafawanaslafa we á kure ge ɲane.

<sup>16</sup> Yawanya a hyemhya elva á Yaisu Almasiihu am vuwa á kure. Tsahautsáha ba shagera am dagave á kure. Fawanemfa am vuwa ma ge ware á kure keni am dagave á kure, an ilmu na a vakurtaa Dadaamiya. Galaugala Dadaamiya an jabura, galaugala an lahe á emnde-aara, galaugala an lahe na ni kwa jansaare an hakuma á Shedekwe

Cudefde. Galaugala Dadaamiya an lahe-aha nanna kwá ámbera slafaná we á kure an higa am ervaunde.

<sup>17</sup> Slera á kure antara názena kwá ndahaná kure bademme, magaumága an zhera á Yaakadada Yaisu Almasiihu. Slafawanaslafa we á kure ge Eddemiya Dadaamiya an zhera-aara.

*Shairiya-aha geni a njarinja emnde a fetarfe áte unjule-aara*

<sup>18</sup> Ekkure nwasha-aha, faufa zherwe áte zala-aha á kure, ba seke una á zlayater ge emnde a daba Yaakadada.

<sup>19</sup> Ekkure keni zala-aha, wáyáuwaya an nwasha-aha á kure, fauka zlada áte itare.

<sup>20</sup> Kina wá, yá elvan ge kure egdzara: Fawatersarfe ge dada-aha a kure antara mama-aha a kure am duksa bademme. Adaba má kwá maga una nanna, Yaakadada wayaawaya jipu.

<sup>21</sup> Ekkure dada-aha á egdzara, fauka zlada áte egdzara á kure ba dey, adaba má estuwa, á de nezla ervaunde á egdzara jipu.

<sup>22</sup> Yá elvan ge kure kina nave-aha: Fawatersarfe ge dada-aha á kure am duksa bademme. Magawaterka slera adaba ice-aatare geni tá de zlebakurzleba, amá magawateranmaga slera an ervaunde á kure palle adaba fa-zherwe á kure áte Yaakadada á miya Yaisu \*Almasiihu.

<sup>23</sup> Ma ta fakuraare ba slera-ara keni, magaumága an ervaunde á kure palle ba seke ta fakuraara emnde-ka slera nanna, kwá maganá ba ge Yaakadada Yaisu Almasiihu.

<sup>24</sup> A viyakuraareka geni ba Yaakadada Yaisu Almasiihu una á de vakurte lada á kure. Názena a fater ge emnde-aara am samaya na wá, á de vakurteva ge kure keni. Daaci edda á kure na kwá maganá slera kina wá, ba Yaisu Almasiihu.

<sup>25</sup> Amá edda una á magá emtanjire, nane keni á de pelansepele Yaakadada emtanjire-aara ma ware edda-aara keni, adaba Yaakadada wá, á de eggerka emnde deki-deki.

## 4

<sup>1</sup> Yá elvan ba ge kure dada-aha á nave-aha: Nawateraana nave-aha á kure an jirire, magaumaga antara itare an unjule-aara. A viyakuraareka geni kure keni anjwa Edda á kure am samaya.

*Magaumága maduwa*

<sup>2</sup> Yawánka mága maduwa deki-deki, ekkudauka ge maga maduwa kwá ámbera slafaná we á kure ge Dadaamiya.

<sup>3</sup> Má kwá maga maduwa á kure wá, magaumága maduwa arge nere keni, geni Dadaamiya a vanjerteva barama antara nara shagera ge balatera waazu á elva-aara ge emnde, na palaternaapala jirire á elva á Yaisu \*Almasiihu na ndza an shebe werre na bademme. Diyakurdiya yá am dangay kina keni, ta siya adaba ba una nanna.

<sup>4</sup> Magaumaga maduwa geni a meliyumele Dadaamiya, ya palaternaapala elva-aara ge emnde an unjule-aara.

<sup>5</sup> Magaumága enjale am zlaláva á kure am dagave á emnde na zlafe dabarka Yaisu Almasiihu. Kedawanaaka sarte shagera na a vakurtaa Dadaamiya geni kwá melaterumele na.

<sup>6</sup> Tsatsawanaatsatse elva am mbuwe á kure ba shagera, a gevge emtake ba seke izhe. Diyaweddiye geni kwá de vanta estara jawapa shagera ge edda una á de ndava elva ázekure bademme.

*Ga use á Paul am halavuwa á elva*

<sup>7</sup> Tikikus, ba ɲane una egdza emmemiya na wayamiwaya jipu, ɲane keni anƙwa á maga slera á Yaisu \*Almasiihu an ervaunƙe-aara palle, ɲere antara ɲane wá, ɲá maga ba slera á Yaakadada palle. Á de bakuránba ɲane labare-aaruwa baɗemme.

<sup>8</sup> Yá bela ɲane á dezekure, geni á de bakuránba ɲane labare á ɲere, á de vakurte antara ndzedá.

<sup>9</sup> Ya anƙwa bela Unaizimus egdza emmemiya na wayamiwaya jipu na á duwa antara ɲane á dezekure. Unaizimus wá, palle á kure ba ge kure, ɲane keni ba sledaba Yaisu Almasiihu an ervaunƙe-aara palle, tá de bakuránba itare názena á magavá áhuna baɗemme.

<sup>10</sup> Tá anƙwa gakur use-aatare tara Aristarkus, ɲane una ɲa kerɗe am danƙay, ta antara Markus ɲane palle á kudere-aha-ɲara ge Barnabas. Má dámda Markus á dezekure wá, lyauvalya á ba an higa ba seke una ndza ya ndakurndaa na.

<sup>11</sup> Anƙwa á gakur use-aara Yaisu na tá ɗahaná an Yustus na ɲane keni. Sey ba emnde keye ɲanna njanɲe am Yahudiya-aha una tá anƙwa maga slera antara iya áhuna ge sa emnde á sem \*kwara á Dadaamiya. Ba itare una tá anƙwa vite ndzedá jipu ahuna.

<sup>12</sup> Á anƙwa gakur use-aara Aipafras keni, ɲane keni palle á kure ba ge kure, sleslera á Yaisu Almasiihu. Ba kelaazare á maga ba maduwa arge kure an ervaunƙe-aara palle, geni kwá tsaatse dzaɲɲaɲe, kwá gevge emnde na gyairebgye am elva á Dadaamiya, antara geni kwá ɗabetedaba názena á kataná Dadaamiya.

<sup>13</sup> Yá anƙwa zharaná á ba an ice-aaruwa wáwa-aara ge magakuru slera ge kure antara emnde á Lawdikiya, antara ge emnde á Hiyairapaulis baɗemme.

<sup>14</sup> Tara Lukas, dauktar á miya na wayamiwaya jipu na, ta antara Daimas, tá anƙwa gakur use-aatare itare keni.

<sup>15</sup> Gawaterga use-aaruwa ge egdzar mama-aha á miya emnde a fetarfe na tá am Lawdikiya. Gawanga use-aaruwa ge Nimfa keni antara emnde a fetarfe na ta jahava á mba-aara na baɗemme.

<sup>16</sup> Ma ndakursendahe nalmesheri na am dagave á kure wá, vawaterteva ge aiklaisiya á Lawdikiya keni, itare keni a de ndarndaha am dagave-aatare. Emnde á Lawdikiya keni, a velarakurtevela umele na ta shanaa itare na, geni kure keni kwá se ndaha una ɲanna zlaɓe ádaliye am dagave á kure.

<sup>17</sup> Bawanánba ge Arkipus wá: Slera na a faara Yaakadada Yaisu Almasiihu geni a magannaamaga na wá, a ewwáwa geni á zlannaazle.

<sup>18</sup> Am tate na náwa ɲane na wá, yá anƙwa puweta ba iya Paul an erva-aaruwa geni yá gakur use. A viyakuraareka geni yá am danƙay na. A vakurteva Dadaamiya hairire.

## Zunḡwire á wakita na a puwatertaa Paul ge emnde a TAISALAUNIKI

### *Ga use á Paul*

<sup>1</sup> Wakita na yá anḡkwa puwaná ba iya Paul, nḡ antara Silwanus, ira Timaute. Ná puwakurte ge kure emnde á Dadaamiya, antara Yaakadada Yaisu \*Almasiihu na kwá am larde á Taisalauniki na: Eddemiya Dadaamiya á magakuránmaga ḡgurna, á vakurteva hairire.

### *Njá á emnde a Taisalauniki am fetarfire-aatare*

<sup>2</sup> Nḡere, nḡ anḡkwa slafaná we á nḡere ba kelaazare ge Dadaamiya adaba kure bademme. Ba kelaa má nḡ anḡkwa maga maduwa á nḡere ádeza Dadaamiya, nḡ anḡkwa yehakuryeha kure keni am huḡde-aara.

<sup>3</sup> Am maduwa á nḡere ḡanna, nḡ anḡkwa yeha názu kwá anḡkwa maganá kure adaba fetarfire á kure áte Yaisu \*Almasiihu, antara wáva á kure ge mága hayavire adaba zhera-aara, ira tama yaikke na kwá anḡkwa maganá kure áte Yaakadada á miya Yaisu Almasiihu na bademme.

<sup>4</sup> Egdzar mama-aha-aaruwa, nḡere nḡ anḡkwa slafaná we á nḡere ge Dadaamiya adaba kure na wá, adaba ḡa dise á ba an diye geni a wayakurtaa ḡane, a dzerakursaa ḡane ge kwa emnde-aarire.

<sup>5</sup> Am sarte na ḡa balakuraa labare á higa, elva a Yaisu Almasiihu na wá, banḡerakuranka á ba áte we ba estuwa, amá ndza ḡa bakurnaa an hakuma á Shedekwe Cufedde. Nḡere diyanḡerdiya geni bademme á názu nḡ bakurná nḡere ḡanna ba jire. Ba kure keni diyakurdiya geni názu ndza ḡa maganaa nḡere ázekure na, ḡa wayakurante ba shagerire.

<sup>6</sup> Ekkure wá, dḡabakurtedfaba sera á nḡere, dḡabakurtedfaba náza á Yaakadada keni. Adaba shakurushe zladá kwakya adaba elva á Dadaamiya, aley kwá á ba an higa á kure argena, kwá an higa na á vakurtá Shedekwe Cufedde na.

<sup>7</sup> Daaci, an una ḡanna wá, kwá anḡkwa á maraterá garava shagera ge emnde á Dadaamiya na tá am larde á Makiduniya, an larde á Akaya na bademme.

<sup>8</sup> Adaba barka á kure, elva á Yaakadada hyemhye am slede bademme am Makiduniya antara Akaya. Ma áme keni emnde tá cena ba labare á fetarfire á kure áte Dadaamiya, una ḡanna ma ndahanḡerka nḡere keni ba kalle.

<sup>9</sup> Tá anḡkwa ndahaná ba emnde an ire-aatare, geni ndza kwa lyanḡervaahē, kwa ḡanḡerḡaa á ba an jirire am sarte na nḡ am mba á kure. Zlabe tá anḡkwa á ndaha geni kwa eptsannaa iga ba dḡekidēki ge hele, kwa sem sera á Dadaamiya á jirire, kwa anḡkwa á maganá slera ba ge ḡane na ni an shifa na.

<sup>10</sup> Ira paka na ni kwá anḡkwa pakaná kure Egdza-aara na ni watse á eptsá á sawa am samaya na. Egdza-aara ḡanna wá, ba Yaisu na ndza a tsantaa ḡane am faya, watse á de lyamiya am lámare na á de shá emnde na. Lámare ḡanna watse á de magava am sarte na ni má jaaja ervaunḡde Dadaamiya am halavuwa á duniya na.

## 2

*Paul ndza a magán estuwa slera á Dadaamiya am Taisalauniki*



<sup>1</sup> Egdzar mama-aha-aaruwa, ba kure an ire á kure keni, diyakurdiya geni duwa á ñere ádezekure na gavka dey.

<sup>2</sup> Diyakurdiya geni ba lauktu ñá dáada ádezekure keni, ndza ta zlazlanerse emtsaade, magarañeránmaga palase kwakya am Filipi. Daneremde ázekure keni, ña de beraa ba kelaade-aha zlafe ádaliye kwakya, aley Dadaamiya a fañerem ndzedá keni kwakya am vuwa, geni ñá balakursebale labare á higa na a sawa ázeñara na.

<sup>3</sup> Waazu na ñá magaterá ñere ge emnde na wá, gevka elva á fida, baaka elva á danñwire am huđe-aara, ma zlerma keni baaka am huđe-aara ðekideki.

<sup>4</sup> Ñere wá, ñá bala ba názena á kataná Dadaamiya, adaba zunñwe a habazesaa ñane názu am ervaunđe á ñere, lauktu a fañerar de balatera labare á higa ñanna ge emnde. Estuwa ñere keni ñá bálá ba názena á kataná Dadaamiya arge názu tá kataná ba emnde. Adaba ñane wá, diyaadiya ervaunđe á ñere.

<sup>5</sup> Ba kure keni diyakurdiya ganakini banerakuranka elva-aha na emtakemtaka áte we ge badakurbada an ñane, bi elva a kátá duksa. Una Dadaamiya diyaadiya jirire-aara bademme.

<sup>6</sup> Emtu kwá kurken ndza ñá kátá yaikkire ázekure emtu? Una estuweka, katanerka ñere yaikkire ma ázekure, ma áza emnde-ara keni ðekideki.

<sup>7</sup> Má áte jirire wá, ma andze ñá naba marakuranmára hakuma á ñere ge kure, adaba ñere ña emnde á bela á Yaisu \*Almasiihu. Amá slaslanerka ñere una ñanna ðekideki, baira am sarte na ñá ázekure na, ndza ña marakuraa ba tsekadfire ba seke njá á tara mama antara egdzara-aara.

<sup>8</sup> Adaba ña wayakuraa ñere an ervaunđe á ñere palle na wá, ba shifa á ñere keni ndza wayañerwaya ñá yainya adaba kure. Á tsaaka á ba an labare á higa na a sawa áza Dadaamiya, ña de balakursaa ñere na, amá ndza ña wayakurte ba seke shifa á ñere.

<sup>9</sup> Egdzar mama-aha-aaruwa, ábi ba kure keni zlafe viyakurarka zladá á slera na ndza ña shanaa ñere am dagave á kure am sarte na ndza ña de balakuraa labare á higa na? Vayi vacika ndza ñá maga ba slera geni ñá shansha ba názu ñá zanuze ge we á ñere keni, geni a ganerefka gwatama arge kure.

<sup>10</sup> Emtsaade wá, kure kwá diya ba njiinja ge seyde-aha á ñere, Dadaamiya keni diyaadiya bademme geni ndza shagera zlaláva á ñere am dagave á kure, ndza baaka duksa mándzawe na ña maganaa ñere, ndza emtake njá á ñere áte kure bademme.

<sup>11</sup> Ekkure bademme diyakurdiya geni ma am uwe keni ndza ña magakuran ba seke una ni á maganá dada áte egdzara-aara,

<sup>12</sup> ndza ñá vakurte sawari-aha gergere, ñá ekhyakurá ervaunđe, ba kelaazare ndza ñá bakurá ba magaumága názu á kataná Dadaamiya, a ðahakur ge de nja antara ñane am zlanna-aara, am sleksire-aara na an daradza jipu, wulwule jipu na.

<sup>13</sup> Duksa palle zlafe ádaliye wá, ñá yainka slafana we ge Dadaamiya adaba ñane: Am sarte na ndza ña de balakuraa elva á Dadaamiya, zharakurka seke elva á ura, amá kwa cenvaahe, kwa lyevaahe an ervaunđe á kure palle geni elva á Dadaamiya ba jirire. Ba jire á kure una Dadaamiya ba jirire. A eptsantaa ba ñane zlalava á kure kwa emnde na fakurtarfe na.

<sup>14</sup> Egdzar mama-aha-aaruwa, iyau kure keni shakursha názu ndza a shaa emnde á Dadaamiya na tá yeka an zhera á Yaisu \*Almasiihu am Yahudiya na: Adaba tá anñkwa shakuruwa ba emnde a larde á kure zladá seke una

ndza ta shateruwa Yahudiya-aha zlaɗa ge emnde-aatare na ta fetaare áte Yaisu Almasiihu na.

<sup>15</sup> Degiya ba Yahudiya-aha ɲanna una ndza ta jaa Yaakadada Yaisu ba seke una ndza ta ceɓaa nabi-aha werre na. Kina keni tá aɲkwa maganjerá palase ge ɲere ma áme keni baɗemme. Itare wá, garevge ba seke kelaade-aha á emnde baɗemme, tá maga ba názu wayaaka erwaunde á Dadaamiya ɗekideki na.

<sup>16</sup> Adaba ta ettapa baɗemme ge piyaɲerte de balatera elva á Dadaamiya ge emnde a jeba umele. Itare keni wayarka geni emnde umele tá lyelye shifa-aatare áza Dadaamiya. Kina wá, haypa-aha-aatare ɲanna jauje ge ndzedá, nahetenaha am erwaunde á Dadaamiya mazla-aara, tá de ɲezleka am shairiya á Dadaamiya ɗekideki.

*Paul á kátá ba á de tsateraretse zlaɓe ádaliye ge emnde á Taisalauniki*

<sup>17</sup> Egdzar mama-aha-aaruwa, degi ba kwaye vaci tegava á miya antara kure na, ɲere ekhyaaka erwaunde á ɲere ɗekideki, ire á ɲere á ba ázekure. Baaka pute na maganjerka ɲere geni a shanersha de tsakurartse na.

<sup>18</sup> Ge eptsa ádezekure na wá, ɲere ndza wayanerwáyá jipu. Iya Paul wá, ndza ya tapán ser palle-ka geni a shanansha eptsa ádezekure na, amá baɗemme una ɲanna ndza a piyetaa ba Shaitaine.

<sup>19</sup> Ge jirire wá, kure keni gakurevge duksa palle ázeɲere ge melaɲeru ge fa tama á ɲere áte Dadaamiya am duksa baɗemme, gakurevge dalila á higa á ɲere; zlaɓe ádaliye gakurevge dalila á geɗa á ɲere má de samsa Yaisu \*Almasiihu.

<sup>20</sup> Una ba estuwa, ɲá de gefetegeɗa adaba kure, ɲá de higa á ba áte kure.

### 3

<sup>1</sup> Am haraare cenaneránka labare á kure ɗekideki, dzegwaneránka ɲere farwaunde mazla-aara. Daaci ɲa naba njante, a ba ɲere: Ambane ɲá bela Timaute ádezekure, ɲere ɲá njinja emtsaade an ire á ɲere am Ataina.

<sup>2</sup> Timaute na ɲa belanaa ɲere á dezekure na wá, ɲane egdza emmemiya na ɲá aɲkwa maganá slera ge Dadaamiya átirpalle ge balatera labare á higa, elva a Yaisu Almasiihu ge emnde. ɲa belanaa ɲere ge de fakurem ndzedá am vuwa, geni kwa fetarfe ba shagera áte Yaisu Almasiihu.

<sup>3</sup> Ma ware á kure keni a gazleka adaba zlaɗa na kwá aɲkwa bashaná kure na. Má ba zlaɗa wá, ba kure keni diyakurdiya una gevge duksa palle am názu a famiyaare Dadaamiya ge miya emnde a fetarfe.

<sup>4</sup> Am sarte na ɲa ázekure keni, ndza ɲa ndakurnda baɗemme ge kure, geni miya wá, ma vaatara keni watse mí ɲezleka am zlaɗa. ɲane una a shaa kure am iga á ɲere na, amá kure diyakurdiya jirire-aara baɗemme.

<sup>5</sup> Adaba una ɲanna dzegwanánka farwaunde mazla-aara, ya naba bela Timaute ádezekure, geni á de cenanervacena ɲane má degdege fetarfire á kure. Adaba yá an lyawa jipu geni bi shakurtushe Shaitaine, daaci slera á ɲere gevge ba dey.

<sup>6</sup> Amá kina wá, saasa Timaute ásezeɲere, a saneraa labare emtakemtake á sawa ázekure, a banerantsa ɲane: Farfe fetarfire á kure, farfe háyáviire am dagave á kure. A ba ɲane zlaɓe ádaliye: Shagera erwaunde á kure áte ɲere, kure keni kwá kumá ba kwa naɲerhe an ice, seke una ni ɲere keni ɲá kumá ba puwete ice áte kure na.

<sup>7</sup> Egdzar mama-aha-aaruwa, nja ba palase, antara zladá na njá naana njere na, aley am sarte na saasa Timaute ásezenere, bademme saasa higa á njere adaba labare á fetarfire á kure na na cenáncena farfe na.

<sup>8</sup> Daaci kina wá, saasa shifa am njere mazla-aara, adaba diyanjerdiya geni tsakuraatse degdege, emtake njá á kure an Yaakadada.

<sup>9</sup> Adaba na shaa higa kwakya áte kure á katafke á Dadaamiya na wá, ma njá slafaná ba ser wanyara we ge Dadaamiya keni, una á hyefka ba názara keni.

<sup>10</sup> Vayi vacika njá njala ba Dadaamiya geni á melanjerumele njá daada á de zharakurzhará, we á njere una, we á kure una, ge kwarakurse názu zlafe kwá an wedere-aara ge far ge fetarfire á kure na.

<sup>11</sup> Daaci sey tá de vanjertá ba tara Eddemiya Dadaamiya, tá an Yaakadada á miya Yaisu barama a de zharakurzhará na.

<sup>12</sup> A fakurarefe Yaakadada ge háyáva á kure, geni kwá wayaavewaye am dagave á kure, kwá waya emnde bademme, ba seke una ni njá anjkwá wayakurá njere na.

<sup>13</sup> Yaakadada á de vakurtá ba estuwa ndzedá, geni kwá de gevge emnde na shagera ervaunje-aatare, baaka duksa mándzawe am itare, vacite na má de samsa Yaakadada á miya Yaisu an emnde-aara. Daaci kwá de gevge emnde cufedfe á ba an jirire áza Dadaamiya.

## 4

### *Zlalava shagera na á kataná Dadaamiya*

<sup>1</sup> Náwa elva na njá zlaná átekwa na: Ekkure wá, kwanjerakursekwáre bademme geni tá njá estara emnde á fetarfe áte una á kataná Dadaamiya na. Diyanjerdiya tsa ganakini kwá maganá á ba áte una njanna, amá njá anjkwá á njalakurnála zlafe adaliye an zhara á Yaakadada Yaisu, fawarfe zlafe adaliye á de katafke á de katafke.

<sup>2</sup> Náwa názu ndza a kwanjersaa Yaakadada Yaisu ge njere. Njere keni na kwarakursaa á ba an ndzedá-aara diyakurdiya bademme.

<sup>3</sup> Názu á kataná Dadaamiya ázekure wá, á kátá kwá gevge emnde cufedfe á ba an jirire, kwá tsufa ire á kure ba krette ge mága gwardzire.

<sup>4</sup> Ma ware edda una á ba an mukse am kure na, sey a mbesembe njá mukse-aara áte una á kataná Dadaamiya, emnde tá de zleba ba itare na.

<sup>5</sup> Wáyáva á kure áte itare a gevka áfaba ndzedá á mbagrire seke una ni tá anjkwá maganá emnde na dábarka Dadaamiya na.

<sup>6</sup> Ma ware á kure keni a maganáka kelaadire an gwardzire d'ekid'eki ge sleriya-aara. Zlermauka sleriya á kure d'ekid'eki. Baira ge kure, njá fantau vatene-ka ge bakuránba-aara, ndza fanjerakuremfe am vuwa, geni Yaakadada Yaisu á de fateraare shairiya ge jeba á emnde a mága kelaadire njanna.

<sup>7</sup> Dadaamiya damiteka ge bamiya magaumága gwardzire, amá a damite ge gev emnde-aara, ge nja am cufedf'ire.

<sup>8</sup> Kwáye njane elva njanna; má edda-aara cenaaka, a kwalare ge ura-ka, a kwalare ba ge Dadaamiya na a vakurte Shed'ekwe Cufedfe na.

<sup>9</sup> Egdzar mama-aha-aaruwa, áte elva a háyáva á egdza mamire am dagave á kure emnde a fetarfe wá, ma banjerakuránka elva njanna mázla-aara keni ba kalle. Adaba ba kure an ire á kure keni cenakurancena názu a kwarakursaa Dadaamiya ge mága háyávire.

<sup>10</sup> Ba kina keni má ba háyávire wá, a'aa kure kwá aṅkwa emmága áte emnde a fetarfe na tá am lárde á Makiduniya na bademme. Aley keni ṅere njá bakurá ba magaumága zlaḅe ádaliye á de katafke.

<sup>11</sup> Iyau, ba seke una ndza ya ndakurnda na wá, magauka gaagusa d'ekideki ge tátaya nja áte ye palle, dawmbareka á dem elva á emnde. Ma ware á kure keni a emmága ba mbera-aara.

<sup>12</sup> Daaci má kure gakurevge estuwa wá, ba emnde na zlaḅe fartarka áte Yaisu \*Almasihu na keni, watse tá fa zherwe áte kure, kure keni kwá de weshateranteka ire ge emnde, kwá de ṅaleka duksa áze itare.

### *Vaci eptsá á Yaakadada á sa am samaya*

<sup>13</sup> Egdzar mama-aha-aaruwa, náwa názu njá bakurná ṅere áte emnde na zlauzle shifa-aatare am duniya na; geni kure keni njauka an dzámá ire seke emnde na baaka táma-aatare ge sha shifa umele am iga á emtsa na.

<sup>14</sup> Miya wá, famitarfe geni ndza emtsamtsa Yaisu, amá tsettse am fáyá. Estuwa, mí naba fetarfe zlaḅe ádaliye geni emnde na tá emtsa am fetarfire na wá, Dadaamiya keni á de tsatertetse geni tá de njá antara Yaisu.

<sup>15</sup> Náwa elva na ndza ṅa shanaa ṅere áza Yaakadada, a ba ṅane wá: Vaci eptsá-aara á sawa am samaya ṅanna wá, watse mí desá mi-ka zuṅṅwe arge emnde na emtsaremtsa na, á bina.

<sup>16</sup> Vacite ṅanna wá, Dadaamiya á de ndasendahe elva-aara á ba an ká kwára. Male á malika-aha keni á de keta kwara, a ndahese náza-aara. Derkwákwá á Dadaamiya keni tá de fertanteferta, lauktu á de tsekwa Yaakadada á sawa am samaya. Am iga á una ṅanna maa, tá de tsettse emnde a fetarfe na ndza matsarmatsa werre na am fáyá,

<sup>17</sup> lauktu á de dámida Dadaamiya átirpalle antara miya emnde na watse má an shifa na bademmire á miya á dem kumba, mí de ja ire an Yaakadada am zhegela. Kwaye ṅane njá á miya na ni watse mí de njá estuwa áza Yaakadada dem ba ge d'ekideki.

<sup>18</sup> Kwa cenáncenka-he una bademme? Ekhyawakhya ervaṅḍe á kure an elva ṅanna ma vaatara keni am dagave á kure.

## 5

### *Ma vaatara keni njawinja am niya á kure ge ufa Yaakadada*

<sup>1</sup> Egdzar mama-aha-aaruwa, áte sarte na á de sawa duksa-aha ṅanna átekwa na maa, kure, ma banerakuranka mazla-aara keni ba kalle.

<sup>2</sup> Adaba kure keni diyakurdiya bademme, geni vacite na Yaakadada á de eptsá á sawa na wá, watse ba bresse ba estuwa ba seke sawa á neyle.

<sup>3</sup> Á ba am sarte na tá de banba emnde: Kina wá, aṅkwa hairire na, keda-aatare ba ge d'ekideki na keni á de tsekwateraare á ba am sarte ṅanna, am bressire ba estuwa seke má á tsekwaara yá egdzere ge mukse á huḍe. Vacite ṅanna wá, watse baaka ṅezla-aatare d'ekideki.

<sup>4</sup> Egdzar mama-aha-aaruwa kure wá, gakurevka ba seke emnde na tá am tabedammire na, geni á se shakursha sarte ṅanna am bressire ba estuwa.

<sup>5</sup> Bademmire á kure, kwa ba seke emnde na tá zlálá am parakkire á vaciya na. Miya emnde a fetarfe wá, bademmire á miya gamiyevka ba seke emnde na ni tá zlálá am tabedammire á vaciya na.

<sup>6</sup> Adaba una ṅanna wá, paumika hare, njawamika ba seke emnde umele, weshawamiyanteka eṅkale á miya an duksa umele d'ekideki.

<sup>7</sup> Njá ba nja keni ábi tá paná ba emnde na tá am vaciya na hare. Am larde-aha á miya, eṅkale am ire á emnde tá weshante á ba an vaciya ṅanna.

<sup>8</sup> Amá miya wá, samiyesse am vayiyire, gamiyevge emnde a zlala am parakkire á vaciya. Adaba una nanna, njawaminja an enkale á miya, fawamitarfe áte Yaisu \*Almasiihu, magawamimaga háyáviere. Duksa-aha nanna gevge ba seke kebebbe á miya ge tsufa vuwa á miya. Zlabe ádaliye: faumifa táma ba shagera áte vacite na watse á de nezlamisenejezle Dadaamiya ba ge dekideki na. Táma nanna keni gevge ba seke tunkur ge tsufa ire á miya.

<sup>9</sup> Njauminja ba estuwa, adaba Dadaamiya dzeramiseka ge za miya an shairiya má de jaaja ervaunde, amá a dzeramise geni á nezlamisenejezle á kya erva an Yaakadada á miya Yaisu Almasiihu.

<sup>10</sup> Yaisu Almasiihu wá, ndza a emtsaa adaba miya. Ndza a emtsaa adaba miya geni watse mí de njá kerde antara nane. Una ma emtsamimetsa, ma watse má á ba an shifa á miya emtsaade keni, watse mí de njá kerde má eptsapta á sawa.

<sup>11</sup> Kwa cenanceneka-he una bademme? Ma ware á kure keni a fanemfe ndzedá am vuwa ge ura umele an nane, melawanumele ge ire á kure ma vaatara keni, áte una kwá ankwá maganá kure kina na.

*Názu á kwaratersá Paul am halavuwa á elva-aara*

<sup>12</sup> Egdzar mama-aha-aaruwa, njá ankwá á nalakurnála: taslawá á kure, faufa zherwe áte emnde na a dzeratersaa Yaakadada ge maganaa slera-aara am dagave á kure na, a dzeraterse ge fakuru hyema antara tá kwarakurse elva-aara na.

<sup>13</sup> Faufa zherwe áte itare, marawateránmara háyáva á kure adaba slera na tá maganá itare am dagave á kure na. Iyau, njawinja áte emtakire am dagave á kure kwa emnde a fetarfe bademme.

<sup>14</sup> Njá ankwá á nalakurnála zlabe ádaliye egdzar mama-aha-aaruwa, taslawá á kure, valawaterarvale ge emnde a mága masefire na tá am dagave á kure; fawateremfe ndzedá am vuwa ge emnde na tá shekwaaka gázla na; melawaterumele ge emnde na baaka payda-aatare; fawaterfe ervaunde ge emnde bademme.

<sup>15</sup> Ekkure wá, faufa hyema ba shagera, eptsawannaaka emtanjkire ge ura an emtanjkire. Arge una nanna wá, ma vaatara keni wavauwáva ba shagera ge mága maggwire am dagave á kure, magaumága una nanna áte emnde bademme.

<sup>16</sup> Ma vaatara keni njawinja á ba an higa á kure.

<sup>17</sup> Magaumága maduwa, icawanseka dekideki.

<sup>18</sup> Ma a shakur vaatara duksa keni, bawanánba ususe ge Dadaamiya, una ma emtakire, ma emtanjkire keni. Una duksa na á kataná Dadaamiya ázekure emnde na gakurevge palle antara Yaisu \*Almasiihu na.

<sup>19</sup> Piyawanteka dekideki ge Shedekwe Cufedde slera-aara.

<sup>20</sup> Estuwa, má ura á ndahá nabiyire keni, epsawanaaka elva-aara.

<sup>21</sup> Ma uwe keni lawanaale emtsaade ba shagera, lauktu kwá nanaana una shagera am hude-aara.

<sup>22</sup> Bademme á názu átuge shagerkire na, kure sawansese ire á kure am hude-aara.

<sup>23</sup> Dadaamiya na edda á vamita hairire na, a gakurvege ba nane zlabe adaliye emnde cufedde bademme, am enkale á kure, am shifa á kure, ira vuwa á kure bademme. Daaci á de jerka duksa mándzawe am kure dekideki vaci eptsá á Yaakadada Yaisu \*Almasiihu.

<sup>24</sup> Dadaamiya na a dzerakursaa nane ge gakurve emnde-aara na wá, nane á eptseka elva-aara dekideki, á de gakuranvege ba nane una nanna.



<sup>25</sup> Na baa ba kure egdzar mama-aha-aaruwa: magaumága maduwa arge n̄ere keni.

<sup>26</sup> Gauga use-aha á n̄ere ba shagera am dagave á kure emnde a fetarfe.

<sup>27</sup> Yá magakurá ba tasle, an zhera á Yaakadada, ndaundaha wakita na á katafke á emnde a fetarfe baɗem̄me.

<sup>28</sup> Ngurna na á magaterá Yaakadada á miya Yaisu Almasiihu ge emnde na, a hyetehye áte kure baɗem̄me.

## Buwire á wakita na a puwatertaa Paul ge emnde a TAISALAUNIKI

### *Ga use á Paul*

<sup>1</sup> Wakita na yá anƙwa puwaná ba iya Paul, nǎ antara Silwanus, ira Timaute. Nǎ anƙwa gaku use ge kure emnde á Dadaamiya an Yaakadada Yaisu \*Almasiihu na kwá am larde á Taisalauniki na.

<sup>2</sup> Tara Eddemiya Dadaamiya tá an Yaakadada Yaisu Almasiihu a magarakuránmaga ngurna, a varakurteva hairire.

### *Shairiya á emnde vaci eptsá á Yaakadada Yaisu*

<sup>3</sup> Na baa ba kure egdzar mama-aha-aaruwa: Nere wá, ma vaatara keni sey nǎ yanka slafaná we á nere ge Dadaamiya áɗaba kure. Una zlaya jipu, áɗaba farfe zlaɓe áɗaliye fetarfe á kure áte Yaisu \*Almasiihu, háyáviire na am dagave á kure keni farfe ba kwakya.

<sup>4</sup> Áɗaba una nanna, nere nǎ higa á ba an higa ge ndaha labare á fetarfire á kure áza emnde á Dadaamiya baɗemme, áɗaba tá shakuru zlaɗa kwakya, aley gazlakurka ɗekideki, kwá á ba an fetarfire á kure áte Yaisu Almasiihu.

<sup>5</sup> Una nanna á maramiya shairiya á jirire na watse á se maganá Dadaamiya áte emnde na. Iyau, ba kwakyire á zlaɗa na kwá anƙwa ɓashaná kure kina na keni, á maramiya ba duksa, geni kure hyaikurephye emnde a dem zlanna á Dadaamiya, zlanna na kwá anƙwa ɓasha zlaɗa áɗaba nane na.

<sup>6</sup> Una ba jirire, Dadaamiya wá, á de kyá shairiya-aara á ba áte jirire. Nane á de eptsaternaaptsa zlaɗa nanna ge emnde na tá anƙwa magakurá palase kina na.

<sup>7</sup> Amá kure emnde na kwá anƙwa shá zlaɗa am erva-aatare kina na, antara nere, ge miya wá, á de vamiteva puwansepuwe, má eptsaptsa Yaakadada Yaisu á sa am samaya antara malika-aha-aara tá an ɗemɗemire na.

<sup>8</sup> Má watse á sáwá Yaakadada Yaisu nanna wá, á de sáwá am dagave á nara á kára yaikke, ge se kya shairiya á emnde na ɗabarka Dadaamiya, antara emnde na eksaranteka labare á higa, elva á Yaakadada á miya Yaisu na.

<sup>9</sup> Ba seke bikere-aatare, Dadaamiya á de faterare laruwa yaikke, tá de njá am laruwa nanna ba ge ɗekideki, yiyiye an nane, tá de puweteka ice-aatare ɗekideki áte sleksire á Yaakadada á miya an daradza-aara jipu na.

<sup>10</sup> Baɗemme á una-aha nanna á de magava ba vaci á eptsá á Yaakadada Yaisu á sa am samaya. Vacite nanna, baɗemme á emnde na ta fetaare áte nane wá, tá de gálá ba nane á ba an ká kwara, tá de eɗɗema baɗemme. Daaci, kure wá, watse kwá anƙwa am dagave á emnde nanna keni, áɗaba eksakuranteksa elva-aara na ndza nǎ ɓalakurseɓale na.

<sup>11</sup> Áɗaba una nanna wá, ma vaatara keni nǎ yanka njála Dadaamiya áɗaba kure. Nǎ anƙwa njala ba nane geni á gakuvege zlalava á kure áte una a dzerakurse geni kwá zlalá estuwa. Nǎ anƙwa njala zlaɓe áɗaliye geni a melakurumele ge mága názu kwá kátá maganá kure ge shagerire, antara slera na kwá anƙwa maganá áɗaba fetarfire á kure áte Yaisu \*Almasiihu.

Ná anƙwa ɲala zlaɓe geni a magakuránmaga una-aha ɲanna an hakuma-aara.

<sup>12</sup> Daaci, aɗaba ɲurna á tara Eddemiya Dadaamiya antara Yaakadada Yaisu Almasiihu na wá, baɗemme á emnde tá shánsha gálá Yaakadada Yaisu aɗaba kure. Kure keni, watse tá galakurgála emnde aɗaba ɲane.

## 2

### *Sesse á edda una zlazlaɗa hala-aara na lauktu á de sawa Yaisu*

<sup>1</sup> Egdzar mama-aha-aaruwa, náwa názu yá kwarakursá ya áte sarte a eptsa á Yaakadada Yaisu \*Almasiihu na, watse baɗemme á miya mí de jammeje ázeɲara na. Ná anƙwa ɲalakurnjala, taslawá á kure,

<sup>2</sup> ma a se bakurnaa ware geni hyephye sarte á tsekwa á Yaakadada keni, kure magauka najipu-aara emtsaade, gazlauka ɗekideki. Una ma edda-aara a se balakurse am nabiyire, ma kwa cenanaa am waazu á malum-aha, bi watse á de bánba ura umele geni ndza a puwetaa ba Paul, ɗabauka kure ɗekideki.

<sup>3</sup> A keɗakuraaka ura umele ba dey sele, aɗaba vacite ɲanna á de sawka am tsekadfire ba estuwa. Am sarte ɲanna, emnde kwakya watse tá de dzámka áte Dadaamiya ɗekideki. Zlaɓe ádaliye keni sey má sesse edda una mándzawe hala-aara na watse tá dá ba ɲane zunɲwe á dem tate á shá zlaɗa á emnde a mága haypa na.

<sup>4</sup> Má sesse edda una mándzawe hala-aara ɲanna maa, watse á ganvege ire-aara ba seke Dadaamiya, watse á piyartertepiya ge emnde baɗemme geni a yaránya názu tá anƙwa kezlán ugje na baɗemme, una ma emnde na tá anƙwa kezlán ugje ge Dadaamiya an jirire na, ma emnde na tá kezlán ugje ge uwe keni, baɗemmire á emnde. De bá am mashidi á Dadaamiya na yaikke na keni, watse á naba duwa ɲane á de njá am huɗe-aara, geni emnde tá kezlán ugje ba ge ɲane palle na.

<sup>5</sup> Ábi am sarte na yá ázekure keni, ndza ya ndakurnda duksa ɲanna baɗemme. Una ɲanna dedde am ire á kure emtu?

<sup>6</sup> Amá kina wá, zlaɓe anƙwa názu a piyetaa lámare ɲanna ge mágava kina. Kure keni diyakurdiya una ɲanna baɗemme. Estuwa, sey má hyephye sarte na a tsanaa Dadaamiya na, lauktu á de sesse edda una mándzawe hala-aara ɲanna áte parakkire.

<sup>7</sup> Aɗaba ba kina na keni, ɲane á ba átira mága emtanƙire-aara ɲanna am ervaunɗe á emnde kwakya, amá emnde ɲanna diyarka emtsaade. Watse á sawa, amá zlaɓe kinaka emtsaade, sey má Dadaamiya ndansendahe ge edda una ni anƙwa á piyantepiya na, geni a yanánya barama.

<sup>8</sup> Am iga á una ɲanna wá, daaci á de sesse ɲane. Amá á se keɗanaakeda Yaakadada Yaisu \*Almasiihu á ba an effeya na watse á segashe am mbuwe-aara na, má samsa ɲane an hákuma-aara á sawa am samaya.

<sup>9</sup> Sawa á edda á hala ɲanna wá, watse an hákuma á Shaitaine, á se mára nalaama-aha gergere, an najipu-aha gergere, amá watse baɗemme ba fida.

<sup>10</sup> Má samsa ɲane wá, á se maga jeli á emtanƙire gergere ge jateraa enƙale ge emnde na tá áte unɲule á keɗa na. Daaci tá de keɗa náza ba ge ɗekideki, aɗaba itare kwalarevkwale ge ɗába jirire, wayarteka geni jirire á lya ura am lámare ɲanna.

<sup>11</sup> Aɗaba yarnaaya jirire á Dadaamiya na wá, Dadaamiya keni a naba magaa hákuma-aara áte itare, a heɗateraa enƙale, ta naba fetaare áte duksa na fida ba dey.

<sup>12</sup> Kwa cenánceneka-he una bademme? Daaci bademme á emnde na ervaunđe-aatare yanaaya fetaare áte jirire, tá kátá mága ba emtanjire bademme na wá, tá de ɳezleka vaci shairiya.

### *Dadaamiya a dzerakurse ge lyakurselye*

<sup>13</sup> Ɗere wá, ma vaatara keni ɳá yanka slafaná we ge Dadaamiya adaba kure, egdzar mama-aha-aaruwa. Dadaamiya wá, wayakurwaya, ndza a dzerakurse kwaye zlaɓe am fantaufe á duksa bademme, geni watse á lyakurselye an hakuma á Shedekwe Cudedde. Estuwa a gakurvaa ɳane emnde-aara, adaba kure eksakuranteksa jirire-aara.

<sup>14</sup> Adaba una ɳanna Dadaamiya a dƙurte am sarte na ɳa de balakursaa labare á higa na. Daaci kure keni, watse kwá á ba an slede á kure ge higa antara Yaakadada Yaisu \*Almasiihu am yaikkire-aara na an daradza jipu na.

<sup>15</sup> Adaba una ɳanna, tsawaatse ba degdege am fetarfire á kure, egdzar mama-aha-aaruwa. Ɗawanaaɳa ba shagera názu ɳa kwarakursaa ɳere na bademme, ma una ndza ɳa kwarakurse á ba an we, ma una ndza ɳa puwakurte áte nalmesheri keni, a seska am ire á kure dƙidƙeki.

<sup>16</sup> Eddemiya Dadaamiya wayamiwaya. Am ɳgurna-aara a naba vamite tsekadfire am ervaunđe názá ba ge dƙidƙeki, anƙwa á melamiyumele ge fete táma á miya áte ɳane.

<sup>17</sup> A fakuremfa ba ɳane palle, tá antara Yaakadada Yaisu Almasiihu tsekadfire am ervaunđe; ma vaatara keni a varakurteva ba itare ndzedá ge ndáhá názu shagera, ma ge mága duksa jirire keni bademme.

## 3

### *Magaumága maduwa arge ɳere*

<sup>1</sup> Anƙwa duksa palle jauje, egdzar mama-aha-aaruwa: magaumága maduwa arge ɳere, geni a hyemhye elva á Yaakadada am slede bademme áte watsewatsire. Magaumága maduwa geni emnde keni a farfe zherwe áte elva á Yaakadada ba seke názá á kure.

<sup>2</sup> Zlaɓe adaliye, ɳalaunjala Dadaamiya geni a daɳeremka am erva á emnde a mándzawe. Adaba tá anƙwa emnde na yanaaya ervaunđe-aatare fetaare áte Yaakadada.

<sup>3</sup> Yaakadada á yakurka an ire á kure. Á de fakurma ba ɳane ndzedá am vuwa, á de tsufakurtsufa am masiba-aha na á de saná shaitaine á sete kure bademme na.

<sup>4</sup> Ɗere keni a melaɳerwa ba Yaakadada geni a magaɳerka shaige áte kure dƙidƙeki. Diyaɳerdiya ganakini kwá anƙwa maga ba názu ndza ɳa kwarakursekware na, diyaɳerdiya geni kwá de yánka ma vaatara keni.

<sup>5</sup> A melakurumele Yaakadada Yaisu \*Almasiihu am ervaunđe á kure geni kwá diyeddiye háyáva na á wayakurá Dadaamiya an ɳane na. A melakurumele geni kure keni kwá gevge emnde á farvaunđe ba seke ɳane.

### *Shagera ma ware keni a emmága slera*

<sup>6</sup> Egdzar mama-aha-aaruwa, názu ɳá bakurná ɳere an zhera á Yaakadada Yaisu \*Almasiihu wá, ɳá bakurá ba ni: má kwa naa ura fetarfe á maga masefire, ɳane cenaaka elva á ɳere na wá, ura estuwa, naba yawánya tate-aara.

<sup>7</sup> Ba kure an ire á kure keni, diyakurdiya sera-aara bademme ge nja áte náza á ɳere. Adaba am sarte na ɳá ázekure na wá, magaɳerka masefire dƙidƙeki.

<sup>8</sup> Njere zanjerka dáfá áte ura ba dey. Njere keni ndza njá maga ba ngedepa á njere vayi vacika, geni a ganjerevka gwatame arge kure ge zanjeru náza za.

<sup>9</sup> Una njanna keni ndza njá magán geni baaka hakuma á njere ge zá dáfá áte kureka. Amá ndza njá magán ge marakura gáráva shagera.

<sup>10</sup> Am sarte na zlafe njá ázekure keni, ndza njá ndakurndaha bademme, a ba njere: Má edda-aara kwalekwale ge mága slera, a zeka dáfá keni.

<sup>11</sup> Njandahanaa ádfaba uwe una njanna? Adfaba njá anjwa cena: tá anjwa emnde na wayarka mága slera dfekideki na am dagave á kure, slera-aatare ba dem elva-aha á emnde umele.

<sup>12</sup> Náwa elva na njá baterán ge jeba á emnde njanna an zhera á Yaakadada Yaisu \*Almasiihu: Ekkure keni eksawanteksa mága enjale, magaumága slera á kure ge gela ire á kure.

<sup>13</sup> Daaci, egdzar mama-aha-aaruwa, kure wá, ma vaatara keni yawánka mága maggwire dfekideki.

<sup>14</sup> Má kwa naa ura ni cenaaka názu njá anjwa kwarakursá njere am wakita na wá, diyaweddiye edda-aara ba shagera, yawánya tate-aara, geni a jejja zherwe.

<sup>15</sup> Amá wá, eksauka áte kelaadire; ekkure wá, bawanánba áte njá á egdza mamire.

*Use antara barka am halavuwa á elva-aha*

<sup>16</sup> Yaakadada wá, edda á hairire ba njane. Ma vaatara keni a vakurteva hairire áte una a disaa njane; a yákuraaka dfeme Yaakadada.

<sup>17</sup> Náwa una wá, yá anjwa puwaná ba iya Paul an erva-aaruwa mazla-aara ge gakur use-aaruwa zlafe adaliye, ba seke una ni yá magán ba estuwa am wakita-aha-aaruwa bademme na. Kwaye njane fantefa erva-aaruwa ahuna.

<sup>18</sup> A hyetehye ngurna á Yaakadada Yaisu \*Almasiihu áte kure bademme á kure.



## Zuññwire á wakita na a puwantaa Paul ge TIMAUTE

### *Ga use á Paul ge Timaute*

<sup>1</sup> Wakita na yá anƙwa á puwetá ba iya Paul, ya slebela á Yaisu \*Almasiihu na mí fete tama á miya áte ñane na. Ya slebela-aara adaba ta eksisaa ba itare antara Dadaamiya Slelyamilya.

<sup>2</sup> Yá anƙwa puwaktá ge ekka Timaute, ekka na gakevge ba seke egdza-aaruwa, adaba ka fetare áte Yaisu Almasiihu ázeruwa. Ed-demiya Dadaamiya antara Yaakadada Yaisu Almasiihu, a magarakánmaga ñgurna, a zarakvaarze, a varakteva hairire.

### *Faufa hyema, tsahauka názena á zlaleka an elva á Dadaamiya*

<sup>3</sup> Am sarte na yá zláá á dem Makiduniya keni, ndza ya bakánba geni njinja am Aifaisus. Kina keni ya bakánba zlaɓe ádaliye: njinja á ba áhuwa, geni ká piyaterantá ka ge emnde na tá kwaraterse názena á zlaleka an elva á Dadaamiya na ge emnde.

<sup>4</sup> Ká baterná ka geni a yaránya shuññula á labare á eggye-aha an ervaunɗe-aatare bademme na. A yaránya pákyá \*kergema á eggye-aha ɓaaka halavuwa-aara ɗekideki na. Adaba á melateruka ge emnde ɗekideki ge mága namaari á Dadaamiya, á saterá ba gá jawe ge emnde. Namaari á Dadaamiya ñanna wá, mí dise á ba an fetarfire á miya áte ñane.

<sup>5</sup> Dalila una ni ká de bateraná ka una ñanna maa, ba geni a wayarwaya an emnde an ervaunɗe-aatare palle. Ge wáyá emnde umele keni maa, ervaunɗe-aatare a gevge an bara, tá maga ba duksa shagera na á kataná Dadaamiya na, antara tá fetarfe á ba an jirire.

<sup>6</sup> Emnde umele wá, dzalarevdzále áte unñule á jirire, yaranya mága shagerire ñanna, tá shuññula ba elva-aha na ɓaaka nampire-aara ɗekideki na.

<sup>7</sup> Wayarwáya geni tá gevge malum-aha á \*tawraitá, tá kwaraterse ge emnde á ba an ndzedá, amá ba itare keni tá cenánka duksa ñanna tá ndahaná ba itare an we-aatare, tá ámbera kwaraterse ge emnde na.

<sup>8</sup> Diyamidiya ganakini shairiya-aha á Dadaamiya wá, shagera má ura á eɗɗaba an unñule-aara.

<sup>9</sup> Diyamidiya geni Dadaamiya wá, a saterán ge emnde a jirireka shairiya-aha-aara, amá ge emnde na kwalarefkwale ɗaba ñane. A saterán ge emnde na ɓaaka lyáwá á Dadaamiya am ervaunɗe-aatare, ge emnde na ta feka zherwe áte ñane, antara emnde a mága haypa, antara ge emnde na ta epsawa názu a ndahanaa wakita-aara, antara ge emnde a ceɓa shifa á ɗada-aha-aatare antara mama-aha-aatara, ge emnde a ceɓa shifa á emnde bademme.

<sup>10</sup> Zlaɓe ádaliye: Dadaamiya a sateraa shairiya-aha-aara ge emnde a mága gwardzire, antara emnde na tá zlava an zala-aha umele ba seke itare ge muksire; ge emnde na tá ila emnde ge de valateraa am tate umele, ira ge emnde a fida. Dadaamiya a saa shairiya-aha-aara wá, adaba bademme á duksa-aha na á badza názu a kwaramisaa ñane.

<sup>11</sup> Bademme á duksa-aha ñanna wá, á kwaramisá ba labare á higa, elva a Yaisu \*Almasiihu. Labare á higa ñanna wá, á sawa áza Dadaamiya

Saksage, ba ɲane una edda á barka, a fiyaare de balaterá labare á higa ɲanna ge emnde.

*Paul á gálá Dadaamiya adaba ɲurna na a magannaa ɲane*

<sup>12</sup> Yá aɲkwa slafaná we-aaruwa jipu ge Yaakadada Yaisu \*Almasiihu, adaba diyeddiye ganakini watse yá maganá slera-aara an ervaunɗe-aaruwa palle, daaci a naba eksise, a give slebela-aara. Adaliye yá slafaná we-aaruwa adaba ndzedá na aɲkwa á vitá ɲane am slera ɲanna.

<sup>13</sup> Werre wá, ndza kwakya elva yaiyaihe na ya velyanaa ya áte ɲane, ya naba zlazla zhera-aara, antara ba zlada keni fanaterarfe ge emnde-aara. Baɗemme á una ɲanna, aley Yaisu Almasiihu a naba zivaarhe, adaba zlaɓe fantarka áte ɲane, ndza diyanka názu ya maganaa ya.

<sup>14</sup> Yaakadada Yaisu wá, magiyánmaga ɲurna kwakya. A naba vite fetarfire, antara wáyáva ganakini yá wayetewayá ɲane.

<sup>15</sup> Náwa elva a jirire na baaka arge ɲane ɗekiɗeki, shagera tá lyevaalya emnde baɗemme an ervaunɗe-aatare palle: Yaisu Almasiihu a sawhe á sem duniya, a se lyá emnde a mága haypa, kwakya-aara ba iya edda á mága haypa ɲanna.

<sup>16</sup> Amá Yaisu Almasiihu wá, ba iya na janateruje ge emnde baɗemme an haypa na keni, a naba zivaarhe. De katafke keni, á maraterná an una ɲanna ge emnde ganakini ɲane wá, slefarvaunɗe jipu, a fartarfe áte ɲane, tá shansha shifa na á zleka na.

<sup>17</sup> Dadaamiya wá, ma vaatara keni Sleksa ba ɲane palle. ɲane aɲkwa ba jirire, amá ura á nánka an ice. Ba ɲane una Dadaamiya, baaka kalle-aara. Emnde baɗemme a galargálá ba ɲane palle. \*Aamin.

<sup>18</sup> Ekka Timaute wá, gakevge ba seke egdza-aaruwa. Daaci náwa elva na yá bakaná ya: Elva na ta ndanaa nabi-aha werre na wá, ɲanaaɲa elva ɲanna ba shagera am ire á ɲa, lauktu ká de tsaatse an dzaɲɗaɲire.

<sup>19</sup> Ma vaatara keni tsaatse á ba áte fetarfire á ɲa, a demka duksa á baakire á zherwe á dem ervaunɗe á ɲa. Emnde umele wá, cenarka názu á baterná ervaunɗe-aatare. Adaba una ɲanna, garevge yiyye an Dadaamiya.

<sup>20</sup> Náwa tara Himainaiyus, antara Alaikzandere ta ɗabete sera á emnde ɲanna. Adaba una ɲanna yanateraaya am erva á Shaitaine, geni a sharánsha enjkale-aatare, lauktu watse tá dalika á valya elva yaiyaihe áte Dadaamiya.

## 2

*Melawaterumele ge emnde baɗemme an maduwa-aha á kure*

<sup>1</sup> Duksa zunɲwe na yá bakurná ya ge kure emnde a fetarfe wá: melawaterumele ge emnde baɗemme an maduwa-aha á kure. ɲalawaterunɲale Dadaamiya an slafa we á kure campaukkwe, adaba názu á magaterná ɲane ge itare.

<sup>2</sup> Magaumága maduwa arge slekse-aha, antara male-aha umele na tá an hakuma na baɗemme, ganakini mí njinja an lampire, mí njinja an hairire am larde á miya. Má shamiyánsha una, lauktu mí shá fa-zherwe áte Dadaamiya, mí njá an lyawa-aara am ervaunɗe.

<sup>3</sup> Mága maduwa arge emnde wá, shagera jipu. Adaba á higarhiga Dadaamiya Slelyamilya.

<sup>4</sup> Adaba ɲane wá, wayaawayá emnde baɗemme tá diyeddiye jirire á elva-aara, tá fetarfe, tá lyelye shifa-aatare.

<sup>5</sup> Adaba baaka Dadaamiya umele, sey ba palle. Slemela emnde antara Dadaamiya keni sey ba palle. Nane keni ba urimagwe, ba nane una Yaisu \*Almasihu.

<sup>6</sup> A se yaa shifa-aara, geni á lyelye emnde bademme am sarte na a wayetaa Dadaamiya na. An emtsa-aara nanna wá, á maraterán ge emnde geni Dadaamiya wayaawaya á lyelye emnde bademme.

<sup>7</sup> Adaba una nanna, Dadaamiya a give slebela-aara, geni yá de balaterá elva nanna ge emnde á larde umele, yá de kwaratersekwere jirire á elva nanna, geni itare keni a fartarfe áte nane. Una yá ndaha ba jirire, icaneka fida defideki.

<sup>8</sup> Daaci duksa na yá kataná ya wá, ma am tate-ara keni yá kátá zala bademme tá welaavewele an mága maduwa. Amá wá, sey erwaunde-aatare an bara, an ekhya, baaka ga jawe keni am dagave-aatare.

<sup>9</sup> Ge nwasha keni maa, yá kátá tá nguda patele-aatare ba deydey-aara, a magarka jeba á nguda patele na ni tá maganá an niya, ganakini a zharaterzhara emnde bademme na. Zlabe ádaliye wayanka tá keda sarte-aatare bademme ba ge tataya ndera ire an lawa gergere, antara nguda náza ngelawire, antara tataya kakakaca na zlazlada jipu na. Amá, a tsekwartsekwa kazlana-aatare an unjule-aara.

<sup>10</sup> Ngelawire-aatare ge itare wá, a gevge an mága shagerire. Zlaya-aatare ba una nanna ge nwasha na tá an lyawa á Dadaamiya am erwaunde.

<sup>11</sup> Daaci, máki kwá ankwa tsaha duksa á katafke á Dadaamiya wá, a njarinja nwasha ba tsekadde, a magarmaga fesarfire an erwaunde-aatare bademme.

<sup>12</sup> Vananteka ya baráma ge mukse ganakini á kwaratersá nane duksa ge zala, bi á geva male nane arge itare, amá a njinja ba tsekadde.

<sup>13</sup> Adaba Dadaamiya a nderaa ba Naadama zunjwe, lauktu a nderaa Hawwa.

<sup>14</sup> Zlabe ádaliye maa, Shaitaine a de janaa enkale ge Naadama ka, amá a de janaa enkale ba ge mukse. Daaci ba mukse una fansarka ge Dadaamiya.

<sup>15</sup> Amá mukse wá, á de shá shifa áza Dadaamiya adaba egdzara na á yáná nane. Amá wá, sey á fetarfe áte nane, á maga wayavire áte emnde, á maga názena á kataná Dadaamiya, ira zlalava shagera.

### 3

#### *Male am aiklaisiya*

<sup>1</sup> Nawa elva yaikke, jirire zlabe ádaliye: Edda una wayaawaya mága slera á gev male am aiklaisiya wá, slera shagera una á kataná nane.

<sup>2</sup> Male am aiklaisiya wá, sey zlalava-aara a gevge ba kalkale, baaka duksa mándzawe am nane. Edda á mukse palle. A gevge edda una á kwarukware vuwa-aara am duksa bademme, slenkale am duksa na a maganaa nane bademme, a gevge edda á daradza, a gevge slelyiya wayve-aha am mbaaara an higa, a gevge slediya ge kwaraterse duksa an unjule-aara ge emnde.

<sup>3</sup> Male am aiklaisiya wá, a gevka slembazla, bi sledagala, bi slegá jawe, bi slewáyá nalmane, amá a gevge slefarwaunde.

<sup>4</sup> Zlabe ádaliye sey edda una ni a kwarukware huđe á há-aara keni, egdzara-aara tá cená elva-aara, tá fansarfe an ndzedá-aatare bademme.

<sup>5</sup> Yá ndahaná adaba uwe una? Adaba má edda-aara diyaaka kwara huđe á há-aara, á de tsanmaare estara kena ge aiklaisiya á Dadaamiya?

<sup>6</sup> Zlabe ádaliye: A gefka edda una a fetaare ba herzhe na áte Yaisu \*Almasiihu, geni a demka am gala ire. Máki estuwa wá, shairiya-aara á de gev ba palle an náza á Shaitaine.

<sup>7</sup> Edda una gevge male am aiklasiya wá, a shánsha seydire shagera á sawa áza emnde na ta ágashe geni shagera zlalava-aara. Má baaka una nanna wá, tá de epsawepsawa emnde, daaci á de demda am erva á Shaitaine zlabe adaliye.

#### *Emnde a sawari á aiklasiya*

<sup>8</sup> Daaci, ba duksa palle ge emnde a sawari á aiklasiya keni. Sey a garevge emnde na shagera zlalava-aatare, a garevka emnde na tá an nara bu-buwa. A garevka emnde a mbazla, bi emnde a gá nalmane an zlerma.

<sup>9</sup> Itare wá, a tsaraatse á ba áte elva a fetarfire na a kwaramisaa Dadaamiya am wakita-aara na palle, a magarmága názena á kataná Dadaamiya.

<sup>10</sup> Zlabe ádaliye: Lauktu kwá dzera emnde a sawari á aiklasiya wá, sey kwá zlauzle am gya hala-aatare emtsaade. Má shakuránka duksa mándzawe am itare wá, lauktu kwá faterar slera nanna.

<sup>11</sup> Nwasha-aha-aatare keni maa, a garevge ba nwasha na ni shagera zlalava-aatare na. A garefka emnde a paysada, bi emnde a mbazla. Itare wá, a garevge emnde na dzayye ervaunde-aatare am duksa bademme.

<sup>12</sup> Slesawari á aiklasiya wá, mukse-aara sey ba palle, diyaadiya tsatermaare ge egdzara-aara, antara huđe á há-aara bademme.

<sup>13</sup> Emnde a sawari á aiklasiya wá, má shagera slera-aatare wá, tá an daradza jipu áza emnde. Itare tá dzegwándzegwa ndaha elva á Yaisu \*Almasiihu ba parakke á katafke á emnde, adaba fartarfe an unjule-aara.

#### *Jirire á elva na a samiyansaa Dadaamiya*

<sup>14</sup> Yá tama dezena ba herzhe na, amá keni náwa yá puwakte nalmesheri na wá,

<sup>15</sup> ganakini ma danaaka watsewatse keni, ká naba diyeddiye geni tá njá estara emnde na tá am huđe á há á Dadaamiya. Huđe á há á Dadaamiya nanna wá, amaana aiklasiya á Dadaamiya, Dadaamiya na ni ankwá ba jirire na. Aiklasiya nanna wá, á naná ba nane jirire á Dadaamiya, ba seke náza á kawé á bere á naná nane ire á bere na.

<sup>16</sup> Elva na ni a samiyansaa Dadaamiya am nadina á miya na wá, elva a jirire jauje ge duksa na am duniya bademme, baaka ura á gan jawe dekideki. Elva nanna ba Yaisu \*Almasiihu:

Nane a naba gev urimagwe, a maresaa ba Shedekwe Cudedde geni nane slejirire, malika-aha keni naránna, emnde keni balarsebale waazu-aara am larde-aha gergere, emnde kwakya fartarfe áte nane am duniya, daaci a eksante ge Dadaamiya á dem samaya, á dem tate na an daradza jipu na.

## 4

#### *Má herzhapteherzhe zla á duniya, emnde umele tá de yá fetarfire*

<sup>1</sup> Shedekwe á Dadaamiya a enndaha ba parakke, geni má herzhapteherzhe zla á duniya wá, emnde umele tá de yá fetarfire, tá de cena elva á emnde na kedateraakeda shaitaine, tá de dabete shagerkire na a kwaratersaa shaitaine ge emnde nanna.

<sup>2</sup> Emnde a fida nanna baaka jirire-aatare dekideki, gaaga shaitaine ervaunde-aatare, tá de kedátera ba itare emnde áte unjule a jirire.

<sup>3</sup> Ta bantsa emnde ɲanna: Ba gá mukse keni shagerka. Zlabe ádaliye, tá aɲkwa piyaterante ge emnde geni a zarka náza za-aha umele aɲkwa gergere. Amá Dadaamiya a nderaa náza za gergere wá, ba geni tá de záná emnde. Daaci emnde na fartarfe, diyareddiye jirire á Dadaamiya wá, ta naba za duksa ɲanna, má slafarannaaslafa we-aatare ge Dadaamiya.

<sup>4</sup> Adaba bademme á názu a nderanaa Dadaamiya shagera, baaka una laake am hufe-aara, má mí lyiyaná an slafa we á miya ázeɲara.

<sup>5</sup> Adaba elva á Dadaamiya, antara maduwa am zhara-aara á ganvege náza za ɲanna cuɖeɖe.

### *Sleslera á Yaisu \*Almasiihu an jirire*

<sup>6</sup> Naba kwaratersekwere elva ɲanna ge egdzar mama-aha á miya emnde a fetarfe, ká gevge sleslera á Yaisu \*Almasiihu á ba an jirire, ká gevge ndzendzedá áte unɲule á Dadaamiya, adaba ɲakanaaɲa jirire an ervaunɖe á ɲa palle, hyemhye elva-aara am vuwa á ɲa.

<sup>7</sup> Yanánka ervaunɖe á ɲa ge narwandza-aha na á melakuka ɖekideki áte unɲule á Dadaamiya na. Ekka wá, ma vaatara keni emmága ba názena á kataná Dadaamiya an ndzedá á ɲa bademme.

<sup>8</sup> Á ba am duniya na keni, edda una aɲkwa á sala vuwa-aara wá, aɲkwa nampire-aara cekwaanɲudi. Amá slewava ge maga názena á kataná Dadaamiya wá, kwakya nampire-aara. Adaba á ba am duniya na keni diyaadiya ganakini á shansha shifa aɲwaslire, diyaadiya geni shifa ɲanna á zleka ɖekideki.

<sup>9</sup> Elva ɲanna wá, elva a jirire, shagera tá lyeválya emnde an ervaunɖe-aatare palle.

<sup>10</sup> Adaba una ɲanna, má aɲkwa wava an ndzedá á miya bademme ge mága slera ɲanna, adaba mi fete tama á miya áte Dadaamiya na aɲkwa ba jirire na. Diyamidiya ganakini ba ɲane una Slelya emnde bademme, kwakya-aara ba emnde na ta fetaare áte Yaisu Almasiihu.

<sup>11</sup> Bateránba elva ɲanna ge emnde, kwaratersekwere eɖɖaba-aara keni.

<sup>12</sup> Tsaatse ba dzaɲdzaɲe, a farakarka uksaɲwire adaba ka egdzere. Ekka wá, gevge gáráva shagera ge emnde a fetarfe bademme, ma am ndaha elva, ma am zlalava shagera, ma ge waya emnde, ma ge fetaare áte Dadaamiya, ma ge nja cuɖeɖe keni, gevge garává shagera ge itare.

<sup>13</sup> Tsaatse ba shagera ge ndahater wakita á Dadaamiya ba kelaazare, ká palaternaapala sera-aara. Kwaratersekwere á ba áte una ɲanna dem sarte na má danemda ya.

<sup>14</sup> Maɲka slera an hakuma na a vaktaa Dadaamiya na an iga á erva. Adaba vacite ɲanna nabi-aha á Dadaamiya, ta magaa nabiyaire áte ka, emnde a sawari á aiklaisiya keni ta puwakarhe \*erva a barka-aatare.

<sup>15</sup> Una ɲanna slera á ɲa, emmága an ervaunɖe á ɲa palle, a naranna emnde bademme ganakini ká aɲkwa wálá á ba de katafke.

<sup>16</sup> Effa hyema áte ire á ɲa, emmága eɲkale am názena ká kwaratersá ka ge emnde na. Yanka una ɲanna ɖekideki, naba emmága. Má magakanaamaga una ɲanna wá, ká de lyelye shifa á ɲa, antara emnde na tá cenakvaare elva ɲanna keni bademme.

## 5

### *Slera á Timaute am aiklaisiya*



<sup>1</sup> Emgyegwe a zhele wá, valarka an ndzedá. Ma ankwá názu a guwa nane keni, ndandaha á ba an enkale ba seke eddenja. Ma dawalaa keni, giyatergiya á ba an enkale ba seke egdzar mama-aha a nja.

<sup>2</sup> Ma emgyegwar njwasha keni, ba seke mama-aha a nja. Máki gyaale-aha, ba seke egdzar mama-aha a nja. Gevge edda á jirire á katafke á gyaale-aha njanna.

<sup>3</sup> Fanufe hyema ge wegyege a mukse na baaka ura-aara ba jirire ge fanu hyema na.

<sup>4</sup> Má tá ankwá egdzara á wegyege a mukse njanna bi eggye-aha-njara wá, kwaratersekware emtsaade ge egdzara njanna fa zherwe áte emnde-aatare. A faranufe hyema ge emmetare, ba seke una ndza ta fateruwa dada-aha-aatare antara mama-aha-aatare hyema ge itare am sarte na zlafe ta egdzara mesheshe na. Una njanna duksa na á kataná Dadaamiya ázetare.

<sup>5</sup> Wegyege a mukse na baaka ura-aara ba jirire na wá, njane a fetefa tama-aara á ba áte ndzedá á Dadaamiya palle. Vayi vacika á njala ba Dadaamiya ge melanumele.

<sup>6</sup> Amá wegyege a mukse na á maga ba názena á kataná ire-aara na wá, ma zlafe á ba an shifa-aara keni, am ice á Dadaamiya ba seke an emtsa.

<sup>7</sup> Kwaratersekware elva njanna, a njarnaanja ba shagera am ire-aatare, geni ma ware-aatare keni a jerka duksa mándzawe am njane.

<sup>8</sup> Zlafe ádaliye: edda una á fateruka hyema ge vara-aha-njara, sakwa emnde na tá am hude á há-aara ba ge njane, njane wá, dzalevdzale áte unjule á Dadaamiya, njgulme ba edda una d'abaaka Yaisu \*Almasiihu d'ekideki na arge njane.

<sup>9</sup> Má ká ankwá farfe zlafe ádaliye ge puwa wegyegwar njwasha áte nalmesheri geni kwá de melaterumele wá, sey ká puwa ba edda una hyephye iva kul unkwahé, ámaslán ndza zlalaaka á de gá zhele umele.

<sup>10</sup> Adaliye: máki emnde keni ndza hayaranhaya slera-aara, máki ndza a fateru hyema ge egdzara-aara, ndza a lyiya wayve-aha am mba-aatare an unjule-aara, ndza a baraternaabara sera ge emnde a Dadaamiya, ndza a melaterumele ge emnde na ndza ta shaa zlafe, máki ndza a magaa ba slera á magwire.

<sup>11</sup> Amá wegyege a mukse na zlafe gyaale á mukse wá, puweka zhera-aara, diyanka ambane watse á wáyá de gá zhele zlafe ádaliye, estuwa demda am fida yaikke, dzalevdzala áte unjule á Yaisu \*Almasiihu.

<sup>12</sup> Daaci estuwa tá de nezleka am shairiya, adaba badzaranvebadze elva na ndza ta ndaasa ba itare an we-aatare ganakini wayarka an ga zhele mazla-aara na.

<sup>13</sup> Zlafe ádaliye: Ma de garka ba zhele umele keni, tá de gev masefe-aha, tá de d'aba sera á wakyiya á emnde ge ja d'aba ba dey. Á tsaaka an masefire, tá de bala paysada, tá de bala ice á dem duksa á emnde, tá de dem am elva-aha á emnde ba dey, tá de maga ba názu zlayeka d'ekideki na.

<sup>14</sup> Adaba una njanna maa, wegyege a mukse, má ba zlafe gyaale á mukse wá, wayanwaya geni á de ga zhele ádaliye, á de yaya egdzara-aara, á de fanufe hyema ge hude á há-aatare, geni a tateraaka barama ge kelaade-aha á miya ge zlazla zhera á miya.

<sup>15</sup> Adaba tá ankwá emnde umele-aatare, kertenj dzalarevdzále áte unjule á Dadaamiya, ta d'abete Shaitaine.

<sup>16</sup> Mukse a fetarfe wá, máki jerje wegyege a mukse am dagave á vara-aha-njara wá, a fanufe hyema ge wegyege a mukse njanna, a farka gwatame

ɲanna ge aiklaisiya, geni aiklaisiya wá, á fateru hyema ge wegyegwar ɲwasha na baaka emnde-aatare ɔ́kideki na.

<sup>17</sup> Nazu yá bakaná ya áte emnde á sawari á aiklaisiya wá, má tá aɲkwa maga slera-aatare an unɲule-aara wá, slafawatera we á kure ba kwakya. Baaka ɔ́eme seke emnde a bala waazu, antara emnde a kwaraterse wakita á Dadaamiya ge emnde.

<sup>18</sup> Adaba a ba wakita á Dadaamiya: ɲgudawanaanuka \*japa ge we á dalau má aɲkwa á magakurá slera. A ba ɲane zlaɓe ádaliye: Sleslera wá, zlayanzlaya ganakini á zuze mbera-aara.

<sup>19</sup> Má ura a se icaar sera ge slesawari á aiklaisiya wá, liyieka elva-aara ɔ́kideki, sey má jerje seyde-aha buwa bi keye.

<sup>20</sup> Ge emnde na tá aɲkwa maga haypa na wá, naba valaterarvále á katafke á emnde baɔ́emme, geni a waterwa lyáwa ge emnde umele.

<sup>21</sup> Náwa názu yá bakaná ya á katafke á Dadaamiya, antara Yaisu \*Almasiihu, antara á katafke á malika-aha na a dzeratersaa ɲane na, ɲanaaɲa elva ɲanna ba shagera am ire á ɲa: kuveka ice á emnde, eggerka emnde ɔ́kideki.

<sup>22</sup> Hadzalka ge puware \*erva a barka ge ura geni á maga slera á aiklaisiya, amá ká zlauzle am gya hala á edda-aara emtsaade. Ekka wá, dauka ka á dem haypa á emnde ɔ́kideki, ettsufa ire á ɲa am cudeɔ́ɔ́ire.

<sup>23</sup> Sheka sey ba yawe danɲwe mazla-aara, naba kuke egdza mbazla keni cekwaanɲuɔ́ɔ́i. Adaba uwe, ba kelaazare ka lapika, á wáká huɔ́e á ɲa na wá, naba kuke geni ká shansha ɲgulmire.

<sup>24</sup> Haypa-aha á emnde umele wá, má zlaɓe kyarka ba shairiya-aatare keni, diyardiya emnde. Amá náza á emnde umele wá, tá taa diseka, sey tá dise am iga á shairiya.

<sup>25</sup> Slera shagera keni ba estuwa, tá aɲkwa nanna emnde. Ma naránka áte watsewatsire keni, á de shebeka ɔ́kideki.

## 6

<sup>1</sup> Una wá, yá baká elva á náve-aha. Baɔ́emme á náve-aha, a faratersarfe ge dada-aha-aatare ba shagera, geni a zlazlarka emnde zhera á Dadaamiya, antara elva-aara na má aɲkwa kwaratersá miya ge emnde na.

<sup>2</sup> Daaci náve-aha na dada-aha-aatare garevge emnde a fetarfe na wá, a baránka am ire-aatare ganakini: ɲá gulanaagula fatersarfe, adaba gamiyevge egdzar mama-aha am elva á Yaisu \*Almasiihu, mi ba kalkale mazla-aara. Una estuweka. A magarmága slera-aatare, baira a jaranauje ge una werre. Adaba dada-aha-aatare ɲanna wá, itare fartarfe á ba an jirire áte Yaisu Almasiihu, daaci náve-aha-aatare keni wayaraterwaya ba kwakya. Kwaya ɲane duksa na ká baterná ka ge emnde, ká kwaratersekware emmága-aara keni.

### *Berbire a jirire*

<sup>3</sup> Má aɲkwa ura á kwaraterse elva umele tsekemme ge emnde, ɔ́abaaka jirire á elva á Yaakadada Yaisu \*Almasiihu na mí kwaratersá miya ge emnde na wá,

<sup>4</sup> edda-aara baaka duksa na a disaa ɲane, á gálá ire ba dey, a dise ba gá jawe antara dzágwa elva an emnde. Jeba á emnde ɲanna wá, baɔ́emme á emnde tá aɲkwa cenatercena na, itare keni tá kátá gev ba seke itare. Ta gá jawe, tá zlazla emnde, tá dzamaterve duksa shagerka ge ukfe-aha-aatare.

<sup>5</sup> Jeba á emnde ñanna wá, gá jáwe á zleka ázetare ðekideki, adaba shagerka enkale-aatare, diyarka jirire. Itare, tá kurken má daremda am elva á Dadaamiya wá, watse tá geva emnde a berba.

<sup>6</sup> Ge jirire wá, má dakemda am elva á Dadaamiya wá, gakevge sleberba ba jirire. Amá wá, sey máki ká ankwá á higa arge una ankwá am erwa á ña na.

<sup>7</sup> Mi sem duniya an erwa dey, mí de eptsa keni á ba an erwa dey.

<sup>8</sup> Daaci má shamiyansha kacakaca-aha á miya antara náza za wá, higaumihiga arge una ñanna.

<sup>9</sup> Amá emnde na tá ankwá á kuma berbire na wá, tá átire á wáyá duksa na ni á badza emnde ba ðekideki na. Tá ankwá mbedá á dem bada á shaitaine, ta ba seke emnde na ni ta fem sera-aatare am zlegde. Tá de kedanaakeda shifa-aatare ba ðekideki.

<sup>10</sup> Wáyá á shungu wá, bademme á haypa-aha á ba am huðe-aara. Emnde umele, dzalarevdzale áte unñule á Dadaamiya adaba ba wáyá á shungu ñanna. Ta naba yaa fetarfire ba ðekideki, kina keni njaaka erwaunðe-aatare ðekideki.

#### *Sawari-aha umele am halavuwa á elva*

<sup>11</sup> Timaute, ekka wá, ka ura á Dadaamiya, ettsufa ire á ña, ganávteka ge duksa ñanna ðekideki. Gevge slejirire á katafke á Dadaamiya, ká maga ba názena á kataná ñane, ekhyanaaka fetarfire á ña, antara wáyáva á ña, ira farwaunðe á ña. Gevge ura kemaare áza emnde.

<sup>12</sup> Tsaatse ba shagera áte unñule á Dadaamiya, geni ká shánsha shifa na á zleka ðekideki a ðaaká Dadaamiya ge ñane na. Adaba una ñanna ka magaa seydire á katafke á emnde kwakya áte elva na ka fetaara ka átekwa na.

<sup>13</sup> Yá ndaaka adaba Dadaamiya na a femaa ñane shifa am duksa bademme na, antara adaba Yaisu \*Almasiihu na a magaa seydire á katafke á sleksu \*Pilaatu na.

<sup>14</sup> Effa hyema am názena a ndaaka Dadaamiya, emmága an erwaunðe á ña palle. Ettsufu ire á ña, a jerka duksa mándzawe áte ka. Njinja á ba áte una ñanna dem vacite na á de saasa Yaakadada Yaisu Almasiihu.

<sup>15</sup> Á de sawa ñane vacite na má bánba Dadaamiya Saksage, ba ñane palle una Dadaamiya, ba ñane palle una edda á barka, Slekse arge slekse-aha, Yaakadada á male-aha bademme na.

<sup>16</sup> Ba ñane palle una á njá an shifa dem ba ge ðekideki. Ankwá á njá am tate á parakkire na baaka sleganavtege ðekideki na. Baaka ura a naa Dadaamiya. Zlaðe ádalije baaka edda una á de nanna. Yaikkire antara hakuma wá, ba náza-aara palle dem ba ge ðekideki. \*Aamin.

<sup>17</sup> Náwa názu ká baterán ge emnde a berba: ma garevge emnde a berba am duniya na keni, a magarka kuravire, a farka tama-aatare keni áte berbire. Adaba diyarka laukte na ni watse á zlala nalmáne ñanna am erwa-aatare. Itare keni a farfa tama-aatare á ba áte ndzedá á Dadaamiya na á vamáta ñane duksa bademme, ganakini mí njinja an higa na.

<sup>18</sup> Bateranba geni a magarmága maggwire ba kwakya an berbire-aatare, a magarmaga shagerire. A magarka wadahire, a varaterteva duksa-aatare ge emnde keni.

<sup>19</sup> Má tá ankwá maganá áte una ñanna wá, tá ankwá jahaná nalmane á jirire na á zleka ðekideki na ge ire-aatare, tá de shansha shifa a jirire keni.

<sup>20</sup> Ekka Timaute wá, effa hyema am slera na a fakaara Dadaamiya na. Gateravteka ge emnde na wayarwaya bedá nara ba dey, antara mága duksa na á zlalaaveka an elva á Dadaamiya ðekideki na. Emnde ñanna

ta bantsa itare ta emnde a diya, amá diya-aatare ɲanna gevka diya jirire dekiɗeki.

<sup>21</sup> Ya ndaanaa aɗaba uwe estuwa? Aɗaba ndza ta bantsa emnde umele ba estuwa ganakini ta emnde a diya; cekwaangudɗi wá, ta naba yaa fetarfire ba dekiɗeki.

A magakuránmaga Dadaamiya ɲurna-aara.

## Buwire á wakita na a puwantaa Paul ge TIMAUTE

### *Ga use á Paul ge Timaute*

<sup>1</sup> Wakita na yá anƙwa á puwetá ba iya Paul, ya slebelá á Yaisu \*Almasiihu. Ya slebela áte namaari á Dadaamiya geni yá bálá elva á shifa na a baa Dadaamiya á vaterteva ge emnde na má garevge palle antara Yaisu Almasiihu na.

<sup>2</sup> Yá puwakte ge ekka wakita na Timaute, ekka na gakevge ba seke egdza-aaruwa wayanak-wáyá jipu na. A magarakanaamaga tara Eddemiya Dadaamiya, antara Yaakadada á miya Yaisu Almasiihu ngurna, a zarakvaarze, a varakteva hairire.

### *Paul anƙwa á fanem ndzeɗa am vuwa ge Timaute*

<sup>3</sup> Yá anƙwa á slafaná we-aaruwa jipu ge Dadaamiya adaba ka. Ba Dadaamiya na yá anƙwa á maganá slera an shaigerire á erwaunɗe-aaruwa ba seke názá á eggye-aha-aaruwa werre na. Vayi vacika, ba kelaa má yá anƙwa á maga maduwa wá, yá anƙwa á yehaka-yeha ekka keni am huɗe-aara.

<sup>4</sup> Am sarte na ya zlalá ázekure, ekka ndza ka kyuwa á ba an yáwe á kyuwa, una ɗanna zlaɓe anƙwa am ire-aaruwa. Wayanwáyá an erwaunɗe-aaruwa baɗemme, ganakini yá puwetepuwa ice-aaruwa áte ka, á naatenáhá erwaunɗe-aaruwa an higa.

<sup>5</sup> Yá anƙwa á slafaná we-aaruwa jipu ge Dadaamiya á ba ya na wá, adaba diyandiya ganakini faktarfe áte Yaisu \*Almasiihu ba jire. Fetarfire á ɗa ba seke názá á mama-aha á ɗa tara Luwiz, antara emmeɗa Aiwɓike. Kina wá, diyandiya ganakini fetarfire á ɗa keni ba seke náza-aatare.

<sup>6</sup> Adaba fetarfire á ɗa ɗanna wá, yá anƙwa á yehakanteyeha zlaɓe adaliye hákuma na a vaktaa Dadaamiya ge mága slera-aara am sarte na ya puwakar \*erva a barka-aaruwa na. Emmága slera an hákuma ɗanna,

<sup>7</sup> gazleka ɗekideki. Adaba Dadaamiya vamiteka shedekwe na á puwaná vuwa ge ura, amá Shedekwe na ni á vante dzanɗanɗire ge ura, á vante wáyávire ge ura, ira enƙale ganakini mi ɗanaaɗa vuwa á miya.

<sup>8</sup> Adaba una ɗanna, maɗka lyawa ɗekideki ge mága seyɗire á Yaakadada á miya. Ma iya na náwa yá am danɗay adaba ɗane na keni, maɗka lyawa ge ba diyakidiyire. Naba eksarekse ba seke náza-aaruwa, zlaɗa na má a fakaara Dadaamiya adaba slera á labare á higa. Emmága una ɗanna an hákuma na a vaktaa Dadaamiya na.

<sup>9</sup> Dadaamiya wá, a ɗahamitaa ba ɗane, a lyamisaa ɗane geni mi gevge emnde-aara. A magamiyaa una ɗanna adaba shagerire á slera á miya ka, a magamiyaa ba ngurna-aara, a wayetaa ba erwaunɗe-aara. A magamiyaa ngurna ɗanna kwaye am fakta á duksa baɗemme á kya erva an Yaisu \*Almasiihu.

<sup>10</sup> Amá kina wá, Dadaamiya marsemáre ngurna-aara ɗanna ba parakke mazla-aara an sawa á Yaisu Almasiihu Slelyamilya. A se keɗanaa ɗane hákuma á emtsa, a marese ganakini má lyamivalya labáre á higa wá, mi shansha shifa na á zleka na.

<sup>11</sup> Iya wá, Dadaamiya a give slebela á Yaisu Almasiihu ɗanna deme, geni yá balaterá labáre á higa ɗanna ge emnde, antara geni yá kwaratersekwáre.



<sup>12</sup> Kina yá am zlaɗa aɗaba ba una ɲanna. Amá ɓaaka lámbe-aaruwa ɗekidɗeki, aɗaba diyandiya edda una ya fetaara ya áte ɲane. Baaka shaige-aaruwa ɗekidɗeki, diyandiya ganakini ɲane á dzegwándzegwa fanu hyema ge duksa ɲanna a yinaa am erva na, dem vaci zla á duniya.

<sup>13</sup> Ekka keni ndaaternda ka ba elva a jirire na ya ndakndaa na ge emnde an wáyávire, ká ámbera á fetarfe am ervaunɗe á ɲa. Hákuma á emmága una ɲanna wá, mi shanaa á ba áza Yaisu Almasiihu.

<sup>14</sup> Fanufe hyema ba shagera ge labáre á higa na Dadaamiya a yanaa am erva á ɲa na. Fanufe hyema an hákuma na a vaktaa Shedekwe Cufedɗe na anɗkwa á njá am miya na.

<sup>15</sup> Bademme á emnde á Dadaamiya na tá am haha á Aziya yariyaaya, diyakdiya ba ka keni una ɲanna. Antara ba tara Figailus antara Hairmauzhaine keni tá á ba am emnde ɲanna.

<sup>16</sup> Amá Aunaizifaur wá, yá anɗkwa á yekanu barka á Yaakadada ge ɲane, antara emnde na tá am huɗe á há-aara bademme. Aɗaba ɲane a ekhyiyaa ervaunɗe ba kelaazare, magaaka lyawa ɗekidɗeki ge ndavindáva, yá am dangay tsa.

<sup>17</sup> Am sarte na samsa ɲane á sem Rauma, a tatayiyaa an enɗkale-aara bademme, a naba se beribera am tate na yá amkwa.

<sup>18</sup> ɲane keni a yánka Yaakadada. Kwakyire á slera na a maginaa ɲane am Aifaisus wá, ba ka keni diyakdiya. Sey watse á pelansepela Yaakadada vaci tsafaya.

## 2

### *Sawji á Yaisu \*Almasiihu an jirire*

<sup>1</sup> Daaci ekka wá, eccena názena yá bakaná ya egdza-aaruwa: Yánya a ndzedaktendzedá ba Yaisu \*Almasiihu an ɲurna na a magaminaa ɲane aɗaba gamiyevge palle antara ɲane na.

<sup>2</sup> Elva na ka cenanaa ázerwa, ya ɓalanaa á katafke á zlamaakelaawa na wá, ekka keni vaterteva ge emnde a jirire na ni watse tá dzegwándzegwa kwaraterse ge emnde umele keni.

<sup>3</sup> Zlaɗa na má a fakaara Dadaamiya aɗaba zhera á Yaisu Almasiihu wá, naba ekserekse, gevge sawji á jirire, sawji á Yaisu Almasiihu.

<sup>4</sup> Sawji á jirire wá, má á kátá háyá áza male-aatare, á duka á dem elva á emnde a ekse ɗekidɗeki.

<sup>5</sup> Ba duksa palle ge emnde a zhagade ganakini á de icaná ware ire. Diyeddiye geni máki edda-aara magaaka názena ta kwaratersekwáre ge maganaa am zhagade-aatare, ɲane á shánka duksa na ni tá vaterte ge emnde na ta icanaa itare ire.

<sup>6</sup> Zlaɓe ádaliye, sleherɗa na ni anɗkwa á herɗaná fe ge zanwe-aara wá, zlaya á lyevaalya ba ɲane zunɲwe dza á ɲgedɗepa-aara am duksa na ta halanaa am fe ɲanna.

<sup>7</sup> Eppuwa sawari am ire á ɲa áte elva-aha ɲanna ya tsakanaa ya na, a melakumela Yaakadada am huɗe-aara ganakini ká diyeddiye bademme.

<sup>8</sup> Yeheteyeha Yaisu \*Almasiihu na a naba tsetaa am faya, ɲane ndza wulfe á \*Dawuda na. Kwaya ɲane názu ni ya beranaa ya am labáre á higa na yá anɗkwa ɓalaná ya na.

<sup>9</sup> Yá anɗkwa shá zlaɗa kina, náwa ta se ɲgudiyaa am dangay keni, aɗaba ba una ɲanna palle. Ta give ba seke ya gu duksa mándzawé. Amá ta dzegwánka ɲgudá elva á Dadaamiya, ɲane á zlala á ba á de katafke.

<sup>10</sup> Adaba una nanna, ma vaatara keni yá báhá ba zladá nanna. Yá bashaná adaba emnde na tá an dzera áza Dadaamiya na, geni itare keni a sharánsha lya shifa-aatare áza Yaisu Almasiihu, a sharánsha de nja antara nane am yaikkire-aara.

<sup>11</sup> Náwa elva a jirire zlafe ádaliye yá bakaná ya: Máki emtsamimtsa kerde antara nane, ge tse keni, watse mí tsetse zlafe ádaliye an shifa antara nane.

<sup>12</sup> Máki mí basha zladá wá, watse mí de nja ba kerde am yaikkire-aara keni. Amá máki yaminaaya nane wá, nane keni watse á de yamiyaaya.

<sup>13</sup> Ma mi eptsantaa miya elva ge daba nane keni, nane á eptseka elva-aara na a ndaasa áte miya na dekideki, nane á taa badzanveka elva-aara.

### *Sleslera na shagera zlaláva-aara*

<sup>14</sup> Yehateranteyeha elva-aha nanna ya bakanaa ya na ge emnde a fetarfe, faterfa magiya ba shagera á katafke á Dadaamiya, geni a magarka gájáwe am elva. Adaba gájáwe wá, á melanuka ge ura dekideki, baira á badza emnde a eccena-aara.

<sup>15</sup> Ekka wá, tsaatse ba shagera áte una á kataná Dadaamiya. Gevge sleslera á jirire na á manka zherwe am slera-aara dekideki na. Bateránba elva a jirire na ge emnde an unjule-aara.

<sup>16</sup> Amá gájáwe wá, ekka feka we á na á dem hude-aara, adaba baaka nampire-aara, wayaaka Dadaamiya. Emnde a mága una nanna ta far ba badza an Dadaamiya.

<sup>17</sup> Itare ka palle, elva-aatare nanna á far ba za slede, ba seke wige na anjwa á hwiya na. Tara Himainaiyus, antara Filaistus wá, tá anjwa am emnde nanna.

<sup>18</sup> Itare wá, jaraaveje áte unjule á jirire. Adaba ta bántsa itare baaka tse á emnde am faya mazla-aara, dedda zamane-aara. Daaci emnde umele yaránya unjule á Dadaamiya adaba lámare-aatare.

<sup>19</sup> Amá jirire á Dadaamiya wá, njaanja degdege ba seke ekte á bere na ni an mága shagera na, baaka gejava-aara. Ta puwetaa áte ekte á bere nanna, a ba itare: Yaakadada diyaadiya emnde-aara. Ta puwete zlafe ádaliye, a ba itare: Ma a ndasaa ware parakke ganakini nane wá, átuge Yaakadada, a manka mandzawire mazla-aara.

<sup>20</sup> Am mba á emnde a berba wá, anjwa kazlana gergere: Gahe-aha gergere antara tasa-aha gergere. Kazlana nanna wá, umele ta maganaa an dindar antara lipela, amá umele-aha-aara wá, ta maganaa á ba an haha, antara náfa. Mága slera an kazlana nanna keni gergere bademme. Kazlana na an dárádza na, tá maga slera na an dárádza na an nane. Amá kazlana na cekwa dárádza-aara na wá, tá maga slera na cekwa dárádza-aara keni an nane.

<sup>21</sup> Ba duksa palle ge miya keni. Edda una an bara ervaunde-aara, nane cufedde am shagerkire nanna yá anjwa á ndahaná ya na wá, nane an fa giraara áza Dadaamiya ba seke kazlana na an dárádza na, ge maganaa slera á jirire ma vaatara keni. Adaba nane a yanaa ire-aara bademme ge Yaakadada-aara.

<sup>22</sup> Adaba una nanna, ekka wá, kumeka názena tá kumaná dawale-aha umele an ervaunde-aatare bademme na, njeka antara jeba á emnde nanna dekideki. Ekka wá, emmága ba jirire an ervaunde á na palle, fetarfe an ervaunde á na palle, emmága wáyávire, njawinja lapiya antara emnde na an bára ervaunde-aatare, tá anjwa á nala Yaakadada.

<sup>23</sup> Amá máki tá gá jawe am fida ba dey emnde, bi tá gá jawe arge náza laakire ba dey, duka á dem huđe-aara đekideki. Adaba diyakdiya geni á sa ba dágala.

<sup>24</sup> Sleslera á Yaakadada wá, á zlayánka dágala. Njane wá, shagera a gevge slefaterá ervaunđe ge emnde bademme, slekwaraterse duksa an unjule-aara, slekemaare áza emnde bademme.

<sup>25</sup> Njane wá, a kwaratersekwáre duksa an shagerire á ervaunđe ge emnde na tá nyanya elva-aara na keni, ámbane watse Dadaamiya á magateránmaga ngurna, tá de diyeddiye jirire, tá de maga tuba.

<sup>26</sup> Daaci estuwa, watse tá diyeddiye názu am shifa-aatare, watse tá sesse am zlegde na a tsagwadatervaa Shaitaine, ma uwe keni tá maganá á ba áte náza-aara na.

### 3

#### *Názu watse á magava má herzhapteherzhe zla á duniya*

<sup>1</sup> Diyeddiye ganakini má herzhapteherzhe zla á duniya wá, watse anƙwa sarte-aha na ni zlazlada jipu na.

<sup>2</sup> Adaba bademme á emnde, ma ware keni watse á dzámá ba ire-aara palle, emnde tá de gevá emnde a wáyá shunƙu an ervaunđe-aatare bademme, tá de maga ba kurávire antara gálá ire, tá de valya elva mándzawe áte Dadaamiya, tá de fatersarka ge dada-aha-aatare antara mama-aha-aatare đekideki. Ma tá melaterumele emnde umele keni, tá de slafateránka we, tá de feka zherwe áte názu am dalbe á Dadaamiya đekideki.

<sup>3</sup> Emnde tá de gevá mándzawe-aha á ba am huđe á há-aatare keni, watse baaka zevarzire ázetare đekideki, tá de valya ba elva mándzawe, watse slera-aatare ba dágala. Emnde tá de tsufeteka we-aatare đekideki, ervaunđe-aatare á de yanaaya jirire ba đekideki.

<sup>4</sup> Zlabe ádaliye, emnde tá de ndaha ba elva á fitenire áte ura, tá de dzameka názu á katafke watse á saterná mága-aatare njanna, itare tá de gálá ba ire, tá de đaba ba emtakire á duniya arge đaba Dadaamiya.

<sup>5</sup> Jeba á emnde njanna wá, watse ta ba seke emnde á Dadaamiya đeme, amá wá, eksaranteka hákuma-aara ganakini á gatervege emnde-aara á ba an jirire. Ekka wá, njauka antara jeba á emnde njanna đekideki.

<sup>6</sup> Jeba á emnde njanna wá, ba kina keni emnde umele-aatare tá ámberá á ba ngyangye á dem huđe á há á emnde an nasherire, tá de zlerma njwasha na tsemarka ire-aatare na, ganakini tá lyevalya elva-aatare, tá maga ba názena á kataná ire-aatare na, tá tegaavka an haypa đekideki.

<sup>7</sup> Njwasha njanna keni ba kelaazare tá tsaha ba duksa tsa, amá tá cenvaaka jirire á Dadaamiya đekideki.

<sup>8</sup> Emnde a de zlerma njwasha njanna wá, ta yanaa á ba an ervarva jirire á Dadaamiya ba seke náza tara Yannais antara Yambairais na ndza ta yaa elva á Muusa werre na. Emnde njanna badzavbadze enjale-aatare, tá fetarka an unjule-aara đekideki.

<sup>9</sup> Amá watse tá zlaleka á de katafke an slera-aatare njanna, adaba watse kwakya emnde na tá de diyeddiye ngudiyire na tá maganá itare, ba seke una ndza ta disaa emndu werre náza á tara Yannais, antara Yambairais na.

#### *Tsaatse á ba áte názena ka tsasaa ka*

<sup>10</sup> Amá ekka wá, diyakdiya názu yá anƙwa á kwaratersa ya ge emnde, ba palle keni á kedakarka đekideki. Zlalava-aaruwa, názu yá

kwamaná ya am slera-aaruwa, fetarfire-aaruwa an Dadaamiya, farvaunċe-aaruwa, wáyáva-aaruwa, ira dzanċzanċire-aaruwa am elva á Dadaamiya, baċemme diyakdiya.

<sup>11</sup> Zlaċe áċaliye, ekka diyakdiya palasa na ta magiyaa emnde, antara zlaċa-aha-aaruwa umele am Antakiya, antara am Ikauniya, ira am Listira. Ma nanánna zlaċa keni, enċlisenċle Yaakadada am zlaċa-aha ŋanna baċemme.

<sup>12</sup> Deme keni wá, emnde na ni garevge palle antara Yaisu \*Almasiihu tá kátá njá áte una á kataná Dadaamiya wá, itare tá nanna palasa áza emnde.

<sup>13</sup> Amá emnde a mándzawe antara ŋguċi-aha ŋanna wá, baaka tsemartse-aatare ċekidėki, zlalava-aatare á de far ba bádza, aċaba á keċaterá shaitaine, lauktu itare keni tá de keċa emnde umele ŋanna.

<sup>14</sup> Amá ekka wá, tsaatse á ba áte názena ka tsasaa ka, ka lyevaa an ervaunċe á ŋa palle na. Aċaba diyakaterdiya emnde na ni ta kwaraksekware na, diyakdiya ganakini ta kwaraksaa á ba an ervaunċe-aatare palle.

<sup>15</sup> Tsaatse á ba áte názena ka tsasaa ka, aċaba ka waltaa á ba an diya názu am wakita á Dadaamiya. Daaci wakita ŋanna á dzegwándzegwa vakte enċkale ge ċaba unċule a lya, ganakini a lyakaalya Dadaamiya aċaba fetarfire á ŋa áte Yaisu \*Almasiihu.

<sup>16</sup> Baċemme á duksa na ni ta puwetaa am wakita á Dadaamiya na wá, a baternaa ba ŋane an hákuma á Shedekwe-aara ge emnde ŋanna. Á kwaramisá ba wakita ŋanna jirire á Dadaamiya, á maraná ŋane haypa-aha á miya, á tsamimare ba ŋane am bádza-aha á miya, á kwaramisá ŋane zlaláva a jirire na á kataná Dadaamiya.

<sup>17</sup> Baċemme á una ŋanna wá, ba ganakini ura á Dadaamiya wá, a jerka duksa mándzawe áte ŋane. Ma vaatara keni ŋane wá, á njá á ba am niya á mága duksa shagera.

## 4

<sup>1</sup> Náwa názu yá ndaaka ya aċaba Dadaamiya, antara aċaba Yaisu \*Almasiihu na watse á kyáná ŋane shairiya á emnde a faya, antara náza á emnde na tá an shifa baċemme na. Yaisu wá, ba jirire watse á sawa, á se maga sleksire-aara. Yá anċkwa á ndaaka aċaba una ŋanna:

<sup>2</sup> Ekka wá, ndaternda ka ba elva á Dadaamiya ge emnde an ndzeċa á ŋa baċemme, a kezlaranċka elva á ŋa ċekidėki. Wayarwáyá an wayarka keni naba ndaterndaa ka, marateránmára haypa-aha-aatare ba parakke, valaterarvale ba shagera, fateremfa ndzeċa am vuwa, kwaratersekwáre duksa á ba an farvaunċe.

<sup>3</sup> Emmága una ŋanna. Aċaba anċkwa á sawa sarte na ni watse emnde tá ceneka jirire na tá de kwaratersekwáre ċekidėki. Watse hyema-aatare á kátá cena ba shagerkire na tá kataná itare, daaci watse tá jáháva á ba á deza malum-aha á fida na tá kwaraterse ba názena emtake am hyema-aatare na. Malum-aha ŋanna keni watse ta vayye jipu.

<sup>4</sup> Watse emnde tá ceneka jirire mazla-aara, watse tá jáháva á ba áza emnde a bálá fida ŋanna. Una ŋanna názena tá de fa hyema emnde ge eccena-aara.

<sup>5</sup> Amá ekka wá, tsaatse á ba áte slera á ŋa, ebbálá labáre á higa. Gevge slefarvaunċe am zlaċa, maganaamaga slera na a fakaara Dadaamiya baċemme.

<sup>6</sup> Náza-aaruwa wá, yá haraaka kwakya mazla-aara, zlauzla sarte-aaruwa, yá de gevá ba seke sadake na tá vante ge Dadaamiya na.

<sup>7</sup> Iya zlanuzle am wáva-aaruwa á ba an unṅule-aara am slera á Yaisu \*Almasihu. Magannaamaga názena a fiyaara Dadaamiya, ganevge ba seke edda una ni a icanaa ṅane ire am zhagade, ganakini watse á de icaná ware ire. Kezlananveka fetarfire-aaruwa áte názena mi fetaare átekwa.

<sup>8</sup> Kina wá, tá aṅkwa ufiyá an laḍa na tá de tegater ge emnde a jirire vaci shairiya. Laḍa ṅanna á de vitá ba Yaakadada an erva-aara, ṅane edda á shairiya á jirire. Á de vite ge iya ka palle, amá ge emnde na ni wayaawáyá ervaunḍe-aatare an sawa-aara baḍemme.

*Ba Yaakadada palle una aṅkwa antara Paul*

<sup>9</sup> Emmága watsewatsire se beribera áhuna, shekwaaka ḍekideki.

<sup>10</sup> Yiyaaya Daimas zlazlálá á dem Taisalauniki, aḍaba ṅane a hayaa ba duniya na. Kairaiskais wá, ṅane a dem Galatiya. Titus a dem Dalmatiya.

<sup>11</sup> A juwa ba Lukas palle ázerwa. Má ká sawa ṅanna wá, siyánsa Markus am erva, aḍaba ṅane á meliyumele jipu am slera-aaruwa.

<sup>12</sup> Tikikus wá, ṅane ya belanaa ba iya á dem Aifaisus.

<sup>13</sup> Má ká sawa wá, dedde á kya Terauwás, lyivaalya nanṅyuwe á ekhye-aaruwa ya yanaa am mba á Karpus, haliyantehálá antara wakita-aha-aaruwa keni aṅkwa ya yanaa áhuwa. Wakita-aha ṅanna, kwakya-aara yá kátá ba una-aha na ta maganaa an gwagwa na.

<sup>14</sup> Alaikzandere edda á egzla wá, magiyánmaga emtanṅkire kwakya. Duksa na a magitaa ṅane na wá, sey á de kyaná ba Dadaamiya shairiya-aara.

<sup>15</sup> Ettsufa ire á ṅa. Ekka keni á de magaktemága ba estuwa. Aḍaba ṅane yanaaya ervaunḍe-aara elva na mi kwaratersaa miya ge emnde na.

<sup>16</sup> Vacite na ta di ge zuṅṅwire á de katafke á shairiya ganakini yá ndaasende jirire-aaruwa wá, palle á ura a tsifetse baaka ḍekideki, baḍemme á emnde yariyaaya. A dateránda Dadaamiya gabera.

<sup>17</sup> Amá wá, ndza aṅkwa Yaakadada antara ya, a vitaa ṅane ndzedá. An ndzedá na a vitaa ṅane, ya magaa waazu á elva-aara baḍemme á dem hyema á emnde a larde gergere. Enṅlisenṅzla Yaakadada am mbuwe á ervare.

<sup>18</sup> Baaka shaige-aaruwa ḍekideki, ma am lámare-ara keni á de ṅezlisenṅzla Yaakadada, á diyaada ba lapilayye á dem zlan-na-aara am samaya. Yaikkire ba náza-aara palle, dem ba ge ḍekideki. \*Aamin.

*Paul aṅkwa á gater use-aara ge emnde umele keni*

<sup>19</sup> Gaterga use-aaruwa ge tara Akilas, antara mukse-aara Piriskila, ira emnde á Aunaizifaur.

<sup>20</sup> Airastus, ṅane aṅkwa am Kaurintus duksa-aara. Tauraufimus wá, ya yanaa am Milaitus aḍaba á wáná vuwa-aara.

<sup>21</sup> Emmága watsewatsire ganakini ká saasa á sehuna lauktu á sawa sarte á ekhye.

Tá aṅkwa á gak use-aatare tara Aiwbulus, Pudais, Linus, Kalawdiya, antara egdzar mama-aha á miya emnde a fetarfe na tá áhuna baḍemme.

<sup>22</sup> A njiinja Yaakadada antara ka. A magakuránmaga Dadaamiya ṅgurna ma ge ware á kure keni baḍemme.



## Wakita na a puwanta Paul ge TITUS

### *Ga use á Paul ge Titus*

<sup>1</sup> Wakita na yá anƙwa á puwetá ba iya Paul, ya nave á Dadaamiya, ya slebela á Yaisu \*Almasiihu. Slera-aaruwa wá, ya se melateru ge emnde na a dzeratersaa Dadaamiya na, geni tá de fetarfe áte ɗane, ira tá diyeddiye zlaɓe jirire-aara. Jirire-aara ɗanna maa, á fa ura áte unɗule á Dadaamiya.

<sup>2</sup> Ate unɗule á Dadaamiya ɗanna maa, emnde ta naba diyeddiye geni sharansha shifa na á zleka na. Adaba Dadaamiya wá, ɗane á iceka fida dƙeƙeƙe, ndza a ɗgudateraa namána-aara ge emnde, kwaye am fakte á duksa bademme, geni tá de shá shifa ɗanna.

<sup>3</sup> Ba samsa sarte na ndza a fanaa ɗane na wá, a naba jesarehe ge shifa ɗanna am elva-aara na tá anƙwa balaná emnde-aara na. Ge iya keni a fiyaare ba Dadaamiya na Slelyamilya na slera á de balatera elva ɗanna ge emnde umele keni.

<sup>4</sup> Yá anƙwa puwakta ge ekka Titus, ekka na gakevge ba seke egdzaraaruwa, adaba má áte barama palle am elva á Yaisu \*Almasiihu. Tara Eddemiya Dadaamiya tá antara Yaisu Almasiihu Slelyamilya, a magarakanaamaga ɗurna, a varakteva hairire.

### *Slera á Titus am larde á Kairaita*

<sup>5</sup> Ndza ya yakaa am Kairaita geni ká tsatsanaatsatse názena ndza jauje na, ira ká bazlaterɓázla male-aha á aiklaisiya am ekse-aha bademme ba seke una ya ndakndaa na.

<sup>6</sup> Má ká fá ura am malire á aiklaisiya wá, sey ká fa edda una baaka duksa mándzawe am ɗane, zhele á mukse palle, egdzara-aara keni fartarfe áte Yaisu \*Almasiihu, shagera zlalava-aatare keni. Daaci emnde tá taa shánka duksa mándzawe áte itare, tá anƙwa nanna geni egdzara ɗanna tá anƙwa fansarfe ge eddetare.

<sup>7</sup> Male am aiklaisiya wá, ɗane sleslera á Dadaamiya. Adaba una ɗanna, sey ká fá ba edda una baaka duksa mandzawe áte ɗane. Á taa gevka an edda una á kátá gálá, bi slervaunɗe, bi slembazla, bi sledágala an emnde, bi sletataya nalmane an zlerma.

<sup>8</sup> Sey edda una á lyiya wayve-aha-aara an higa, á kátá mága ba shagerire. Adaliye, sey slenƙale antara slejirire, slecudedɗe, á ɗanaaɗa vuwa-aara.

<sup>9</sup> Male á aiklaisiya wá, sey edda una ɗanaaɗa jirire á elva á Dadaamiya na má anƙwa kwaratersá miya ge emnde na. Daaci ɗane keni á dzegwándzegwa vaterte ndzedá ge emnde umele keni an elva ɗanna, á naba dzegwándzegwa ndaterndaha ba parakke haypa-aatare ge emnde na kwalarevkwale jirire á Dadaamiya na keni.

<sup>10</sup> Bazlaterɓázla á ba áte una yá anƙwa ndakndaa na, adaba tá vayye jipu emnde na degdege ire-aatare, tá tsáká ba elva na baaka sera-aara dƙeƙeƙe na, tá keɗa ba emnde an ɗane. Jeba á emnde ɗanna vayya ba Yahudiya-aha na ta bantsa itare: sey emnde tá demda am shedekwe na.

<sup>11</sup> Daaci male-aha á aiklaisiya-aha wá, sey tá ndaternda ba parakke ge Yahudiya-aha ɗanna geni a dárude we-aatare ba tseriyye, adaba tá wesha emnde kwakya am mba-aha-aatare an elva-aha-aatare ɗanna. Elva na tá

aŋkwa kwaratersá itare ge emnde na wá, una zlayeka dekiđeki, tá zlerma ba shungu an ɲane.

<sup>12</sup> Ndza aŋkwa ura Kairaita umele nabi wá, ba ɲane keni a ba ɲane: Emnde a Kairaita tá njá á maga ba fida, ta ba seke dabba-aha an mandzawire, ta emnde a masefe zlafe ádaliye, baaka nampire-aatare dekiđeki, slera-aatare ba huđe.

<sup>13</sup> Elva a nabi ɲanna wá, ba jirire. Daaci ekka wá, valaterarvala ba shagera ge jeba á Kairaita-aha ɲanna, lauktu itare keni tá de daba Dadaamiya á ba an jirire.

<sup>14</sup> Belaternaka una sey ba ka ndaterndaha geni á dábarka elva á eggye-aha á Yahudiya-aha antara nađe-aha á emnde na tá dábeka jirire á Dadaamiya na.

<sup>15</sup> Emnde na dzayye ervaunde-aatare á katafke á Dadaamiya wá, ma jeba-ara keni, tá slaslanu ba ge cufedfire. Amá emnde na fartareka áte Dadaamiya wá, ervaunde-aatare danɲwe, ma jeba-ara keni itare tá slaslanu ba ge danɲwire. Baďemme á názena tá slaslana itare am ervaunde-aatare, antara názena tá maganá itare, duksa á zherwe baďemme, amá baaka lambe-aatare ge itare.

<sup>16</sup> A ba itare ta emnde á Dadaamiya, amá názena tá maganá itare wá, shagerka dekiđeki. Daaci tá dise á ba áte una ɲanna emnde geni itare dábarka Dadaamiya. Adaba tá fansareka dekiđeki ge ɲane, ta kelaade-aha jipu am ice-aara, tá taa maganaaka duksa shagera.

## 2

### *Náwa tá dabaná estuwa emnde unɲule á Dadaamiya*

<sup>1</sup> Amá Titus ekka wá, kwaratersekwáre ka ba jirire á Dadaamiya ge emnde.

<sup>2</sup> Bateránba ge emgyegwar zála geni a garevge emnde a eŋkale, a magarmága duksa á ba áte unɲule-aara, a kwararukwáre vuwa-aatare am duksa baďemme, a garevge emnde a wáyáva, emnde a farvaunde antara emnde a fetarfe.

<sup>3</sup> Ba estuwa ge emgyegwar ɲwasha keni, naba ndaternda ka geni a magarmága názena á kataná Dadaamiya. A balarka paysadfa, a garevka emnde a mbazla, amá a kwararatersekwáre zlaláva na shagera ge emnde umele keni.

<sup>4</sup> Má emgyegwar ɲwasha tá nja estuwa, ɲwasha umele keni tá de tsahese áte itare geni tá wayaná estara emnde zala-aha-aatare, ira egdzara-aatare.

<sup>5</sup> Zlafe ádaliye tá de tsahese mága eŋkale á jirire am duksa baďemme, tá de dzegwándzegwa ɲá vuwa-aatare, tá de gev ɲwasha jirire am huđe á há-aatare, tá de fatersare ge zala-aha-aatare. Daaci má zlalava-aatare gevge estuwa, emnde keni tá de ndaaka elva mándzawe áte elva á Dadaamiya.

<sup>6</sup> Ba estuwa ge dawalaa keni, naba ndaternda geni a garevge emnde a eŋkale am duksa baďemme.

<sup>7</sup> Ekka keni sey ká maga ba duksa na ni watse shagera na, lauktu dawalaa umele keni tá de daba ba sera á ɲa. Máki ká aŋkwa kwaraterse duksa, kwaratersekwáre á ba an jirire, an eŋkale á ɲa baďemme.

<sup>8</sup> Kwaratersekwáre jirire á Dadaamiya ge emnde, áte una ni baaka ura á de epsawa elva á ɲa ɲanna, daaci emnde na tá kátá nyanya elva á ɲa na keni, tá de háslá ba itare, adaba tá de shanka duksa mándzawe áte miya.

<sup>9</sup> Ba estuwa ge nave-aha keni, naba ndaternda geni a faratersarfe ba kelaazare ge dada-aha-aatare, a magarateránmaga názena tá kataná itare na, a kwalarevka elva-aatare dekiđeki.

<sup>10</sup> A ilarka egdzar duksa-aha-aatare. Arge una nanna wá, itare a magarmága ba slera-aatare, daaci tá de dise áte una nanna dada-aha-aatare geni dzayye ervaunđe-aatare. Má tá nja estuwa, emnde tá de fa zherwe áte elva á Dadaamiya Slelyamilya na má anƙwa ndaná miya na.

<sup>11</sup> Shagera emnde a fetarfe tá njá áte una yá anƙwa ndakndaha na, adaba Dadaamiya keni marsemare ngurna-aara áte ice á emnde bademme, geni nane wayaawaya á lyamiyaalya.

<sup>12</sup> Dadaamiya a magamiyaa ngurna estuwa na wá, daaci adaba ngurna nanna wá, má dzegwándzegwa yá mága názu wayaaka nane, ira shagerkire na á kataná ervaunđe á emnde am duniya. Am zamane á miya kina na wá, gaumiyevge emnde a enƙale, emnde a jirire, emnde a mága namaari á Dadaamiya.

<sup>13</sup> Magaumimága una, ge páká háre yaikke na má tamáná miya ge de higa am huđe-aara na. Amaana: Vaci sleksire á Dadaamiya, vaci sawa á Yaisu \*Almasiihu na Slelyamilya.

<sup>14</sup> Nane a naba emtsehe adaba miya, geni a varamisevare am haypa á miya bademme, geni a gamiyevge emnde cuƙeƙe á katafke-aara, mí higa ge mága shagerire.

<sup>15</sup> Kwaye nane duksa na ká de kwaratersá ka ge emnde. Adaliye: fateremfa ndzedá am vuwa ge emnde na tá anƙwa cenakvaara elva na, naba valaterarvala ge emnde na tá cenka elva á nja na keni. Má ká ndaha elva, ndaterndaha á ba an hakuma, a epsawaraƙka ƙekideki.

### 3

#### *Zlalava á emnde na sharansha shifa anwaslire*

<sup>1</sup> Yehateranteyeha ge emnde a fetarfe geni a faratersarfe ge slekse-aha á larde, antara male-aha á ekse, a magarka gardire am názena tá ndaná itare, amá ma vaatara keni a magarmága niya á mága názu shagera.

<sup>2</sup> Bateránba zlaƙe adaliye geni a valyarka elva yaiyaihe áte ura, a dagalarka an emnde. Itare wá, a garevge emnde a kemaare, a farfa dárádza áte emnde umele keni.

<sup>3</sup> Ba miya keni ndza cekwa enƙale á miya werre, ndza má fansareka ge ura ƙekideki, ndza má an keda áte unjule á jirire, ndza má maga ba shagerkire á duksa na á kataná ervaunđe á miya, ndza ma emnde a mándzawe, ndza má shelha áte duksa á ura, ndza má hayánka emnde ƙekideki, itare keni tá hayámika.

<sup>4</sup> Ma ndza má maga ba una nanna keni, am sarte na hyephye sarte á Dadaamiya Slelyamilya wá, a naba maramiya kwakyire á kemaarire-aara geni nane wayaawáyá emnde bademme.

<sup>5</sup> Daaci a naba lyamisehe. A lyamise adaba mi maganaa duksa ka, a lyamise adaba kwakya zevarzire-aara. An hakuma á Shedekwe Cuƙeƙe a baramise haypa am ervaunđe, a yamise ge buwire, geni má shansha shifa anwaslire.

<sup>6</sup> Dadaamiya a vamite Shedekwe-aara baaka zlakta-aara á kya erva an Yaisu \*Almasiihu Slelyamilya.

<sup>7</sup> A magamiyaa ngurna geni mí gevge emnde a jirire á katafke-aara, má de shansha shifa na á zleka na keni baaka shaige-aara.

<sup>8</sup> Bademme á elva-aha nanna, ba jirire. Wayanwaya ka ndaterndaha ba kelaazare ge emnde a fetarfe, geni a magarmága duksa áte unjule-aara. Mága duksa an unjule-aara wá, shagera a naba melaterumele ge emnde umele keni.

<sup>9</sup> Má emnde tá maga ga jawe am dagave-aatare wá, feka we á ña am huđe-aara. Ma tá ga jawe arge đabava á eggye-aha werre, ma arge nade-aha á Yahudiya-aha keni, feka we á ña á dem huđe-aara đekideki, adaba baaka nampire-aara.

<sup>10</sup> Má jerje sletega ye á emnde, naba valarvale ge edda-aara. Má zlađe á yanka wá, valarvale ge buwire. Má á cenka đekideki wá, đabeka tate-aara.

<sup>11</sup> Ba ekka keni diyakdiya geni jeba á emnde ñanna jaraaveje áte barama á Dadaamiya, itare mbarsembe mága mandzawire, haypa-aatare á shebeka đekideki.

*Ga use á Paul am halavuwa á elva-aha*

<sup>12</sup> Náwa watse yá bela ura á dezekure, bi Artaimas bi Tikikus. Má daada wá, ettataya pute ba watsewatse ge dezeruwa am Nikaupaulis. Náwa njanantenja átekwa, geni yá de njá áhuwa am sarte á ekhye.

<sup>13</sup> Melaterumele ba shagera ge tara Zainas ñane una edda á shairiya, tá antara Apaulaus, geni a ektsaterareka náza a ja wedere-aatare am shula má tsarettse azekure.

<sup>14</sup> Emnde a miya keni, sey a tsartsaha mága slera á maggwire, lauktu tá de mbesembe itare keni melateru ge emnde na cekwa ndzedá-aatare ge ja wedera á jirire. A magarmaga una ñanna geni zlaláva-aatare a gevka ba dey.

<sup>15</sup> Bademme á emnde na ña kerđe áhuna tá anjka gak use-aatare. Gaterga use-aaruwa ge egdzar mama-aha á miya am fetarfire. A hyantehye Dadaamiya ngurna-aara áte kure bademme á kure.

## Wakita na a puwantaa Paul ge FILAIMAUN

### *Ga use á Paul ge Filaimaun*

<sup>1</sup> Ba iya Paul yá am dangay adaba slera á Yaisu \*Almasiihu, náj anƙwa puwaktá wakita na antara egdza emmemiya Timaute, náj puwakante ge ekka Filaimaun, ka ura á n̄ere, slera á miya palle na.

<sup>2</sup> Náj puwakurte ge kure antara egdza emmemiya Afiya antara Arkipus n̄ane una palle á miya am wáwa ge mága slera á Yaisu Almasiihu, ira emnde na tá jáhava am mba á n̄a ge cena waazu na bademme.

<sup>3</sup> Eddemiya Dadaamiya antara Yaakadada Yaisu Almasiihu a magarakturmaga n̄gurna, a varakurteva hairire.

### *Fetarfire antara wayavire á Filaimaun*

<sup>4</sup> Ba kelaa ma yá anƙwa á maga maduwa-aaruwa ádeza Dadaamiya wá, yá slafaná we-aaruwa jipu adaba ka am maduwa-aaruwa.

<sup>5</sup> Adaba cenanácena labare á n̄a ganakini vakanteva ervaun̄de á n̄a bademme ge Yaakadada Yaisu \*Almasiihu, wayakaterwaya jipu emnde na ta fetaare áte n̄ane bademme.

<sup>6</sup> Adaba una n̄anna, yá anƙwa n̄ala Dadaamiya jipu geni ba seke una ni gakevge palle antara n̄ere áte barama á Yaisu Almasiihu na wá, yá anƙwa á n̄ala Dadaamiya geni de ba á katafke keni ka emmága ba estuwa. Yá n̄ala zlaɓe, ganakini ká diyeddiye shagerire á názena ni mi shanaa miya áza Yaisu Almasiihu na.

<sup>7</sup> Egdza emmeruwa, higantehiga jipu arge wayavire na ká anƙwa maganá ka áte emnde a fetarfe na. Una n̄anna á vite ndzedá jipu ge iya adaba fakateremfa ndzedá am vuwa ge emnde a fetarfe kwakya.

### *Paul á slapala Filaimaun arge Unaizimus*

<sup>8</sup> Yá n̄aláká adaba una n̄anna geni ká maga názena yá ndaaka ya. Am ganevge ya slebela á Yaisu \*Almasiihu na wá, yá naba ndaknda názena ká maganá ka bademme.

<sup>9</sup> Amá wá, yá bakanka áte una n̄anna, ya n̄aláká á ba an n̄ala an martaapire na am dagave á miya. Iya Paul wá, ganevge emgyegwe a zhele, amá yá am dangay adaba slera á Yaisu Almasiihu.

<sup>10</sup> Yá anƙwa slapala Unaizimus ázeɓa, adaba n̄ane gevge ba seke egdza-aaruwa am dangay áhuna, iya ganevge ba seke eddenjara am elva á Yaisu Almasiihu.

<sup>11</sup> Werre wá, ndza magakánka nampire, amá kina wá, antara ba iya keni á de magamiyánmaga nampire kwakya.

<sup>12</sup> Daaci kwaye yá eptsaká egdze n̄anna á dezeɓa, amá ba seke ya duwaa ba ya an ire-aaruwa.

<sup>13</sup> Am n̄ja-aaruwa kina áhuna am dangay adaba elva á Yaisu Almasiihu na wá, wayanwáyá á meliwa n̄ane am kela á n̄a,

<sup>14</sup> amá wayanka yá maganá áte namaari-aaruwa, yá hyakareka an ndzedá geni ká magiyá shagerire. Arge una n̄anna wá, meliyumele ba ka áte waya á ervaun̄de á n̄a.

<sup>15</sup> Yalla a maganaa ba Dadaamiya d̄eme pakyave á kure antara Unaizimus na, geni á de eptsá zlaɓe ádaliye á de mba á n̄a, kwa de n̄a kerde náza ba ge kelaazare.



<sup>16</sup> Ma nane náve keni wá, kina wá, gevka seke náve mazla-aara, gevge egdza emmemiya. Iya wá, wayanwaya jipu, amá ká de wayaná ba ka kwakya-aara. Zunḡwe wá, ká de wayaná adaba náve á ḡa. Adaliye, adaba nane gevge egdza emmeḡa am elva á Yaisu Almasiihu.

<sup>17</sup> Ba seke una ni diyakdiya anḡwa urire á miya na wá, lyevaalya nane, ba seke ka lyevaa ba iya.

<sup>18</sup> Anḡwa haypa a gakuwaa nane emtu? Emtu anḡwa duksa á ḡa ká dabaná ka ázeḡara emtu? Máki anḡwa wá, naba ndinda, ká zhára ba iya.

<sup>19</sup> Am tate na náwa nane na wá, yá anḡwa á puwetá ba iya Paul an erva-aaruwa, geni ya jiranvejire elva-aaruwa na, yá de pelaksepele ba jirire. Amá wá, zlaya á ḡa-ka ni ká ndaviyu duksa ge iya. Adaba shifa á ḡa na ka shanaa ka anwaslire na keni, ya melakuwa ba iya ḡanna.

<sup>20</sup> Ba estuwa egdza emmeruwa, yá ḡaláká adaba Yaakadada, tasle á ḡa maginaamaga názena yá kataná ya ázeḡa na, cekinaaceka higa-aaruwa. Adaba dagave á miya antara ka am elva á Yaisu Almasiihu wá, gamiyevge ba palle.

<sup>21</sup> Ba lauktu yá puwakte wakita na keni wá, diyandiya gánakini ká de kwaleka, baira dēme ká de januje ka am una yá kataná ya.

<sup>22</sup> Má daada Unaizimus á dem huḡe á há á ḡa wá, tsatsinaatsatse slede-aaruwa keni, adaba anḡwa tama-aaruwa geni Dadaamiya á de lyevaalya ḡála á kure, á de maginaamaga nane pute geni yá daada ádezekure.

*Ga use á Paul am halavuwa á elva-aha*

<sup>23</sup> Anḡwa á gak use-aara Aipafras na ḡá am dangay kerde adaba elva á Yaisu \*Almasiihu na.

<sup>24</sup> Tara Markus antara Aristarkus, an Daimas an Lukas, itare ta emnde na slera á ḡere palle, itare keni tá anḡwa á gak use-aatare.

<sup>25</sup> Yaakadada Yaisu Almasiihu a vakurteva hairire-aara.

## Wakita na a puwatertaa ura umele ge EGGYE-AHA Á IBRAHIMA

### *Dadaamiya á bamiya elva an we á Egdza-aara*

<sup>1</sup> Ndza werre wá, Dadaamiya a ndater elva ser kwakya ge eggye-aha a miya an we á nabi-aha, ndza a ndater elva an pute gergere kwakya.

<sup>2</sup> Amá am kinire na wá, Dadaamiya anƙwa á bamiyá elva an we á Egdza-aara. A nderaa duksa baɗemme keni á ba áte erva an Egdza-aara ɲanna. Ndza a eksesaa ba ɲane geni á de kwaraná ɲane duksa baɗemme.

<sup>3</sup> Tá zharaná am ɲane emnde yaikkire antara njá á Dadaamiya baɗemme. Duksa baɗemme njaanja an unɲule-aara na wá, á ɲana ba ɲane an hakuma á elva-aara. A magaa pute geni emnde tá sesse am ervaunɗe á Dadaamiya, tá gevge emnde cufedɗe. Am iga a una ɲanna maa, a zlalehe á dem samaya, anƙwa á nja am naɗafa á Dadaamiya, slekse arge duksa baɗemme.

### *Yaisu ɲane male arge malika-aha baɗemme*

<sup>4</sup> Dadaamiya a ganve Egdza-aara male arge malika-aha baɗemme, a vante zhera na jauje ge náza-aatare baɗemme. Adaba a detaa ɲane Egdza-aara. Daaci a jateru an una ɲanna ge malika-aha.

<sup>5</sup> Adaba baaka malika na Dadaamiya a banaa: Ba ekka una ka egdza-aaruwa, iya keni ya Eddeɲa. Amá a banaa una ge Yaisu. Zlabe á daliye, baaka malika na ndasenda Dadaamiya áte ɲane: Yá de gev Eddeɲara, ɲane keni á de gev egdza-aaruwa.

<sup>6</sup> Amá am sarte na átira bela Egdza-aara na, gevge ba seke makaji-aara na wá, á ba ɲane: Baɗemme a malika-aha-aara tá de kezlan ugje ge ɲane.

<sup>7</sup> Á ba Dadaamiya áte malika-aha wá: A fater ba ge maganaa slera, itare ta ba seke effeya antara nara á kára.

<sup>8</sup> Amá áte Egdza-aara wá, á ba ɲane: Ámbarka á ɲa Dadaamiya, sleksire á ɲa á de zleka ɗekideki. Ká de maga sleksire á ɲa an jirire.

<sup>9</sup> Ekka wá, wedere á ɲa ba jirire, yakanaaya mandzawire. Adaba una ɲanna, a eksaksehe ge Dadaamiya á ɲa, a gakve male arge emnde á ɲa baɗemme, a gedaktehe, ervaunɗe á ɲa ba seke nama.

<sup>10</sup> Adaliye a ba ɲane á ba áte Egdza-aara ɲanna: Yaakadada, am fakta, ba ekka una ka nderaa haha, samaya keni ba slera á erva á ɲa.

<sup>11</sup> Baɗemme á duksa-aha ɲanna tá de zlauzle, amá ekka wá, ká nja dem ba ge ɗekideki. Baɗemme a duksa-aha ɲanna tá de gevge emgyegwe ba seke kacakaca,

<sup>12</sup> ká de takwalatertakwala ba seke bagwadza, ká de keɗanaakeda daradza-aatare, amá ekka wá, ká nja dem ba ge ɗekideki, baaka halawuwa á shifa á ɲa.

<sup>13</sup> Baaka malika na Dadaamiya a banaa: Sawa, njinja am naɗafa-aaruwa, yá gatervege kelaade-aha á ɲa náza puwa sera á ɲa.

Amá a banaa una ɲanna ge Egdza-aara.

<sup>14</sup> Malika-aha wá, itare ta ba emnde a slera á Dadaamiya, Dadaamiya á belaterbela, tá de melateru ge emnde na ni tá de lyelye shifa-aatare.

## 2

### *Faumifa hyema áte unŋule a lya na a maramiyaa Dadaamiya*

<sup>1</sup> Adaba una ŋanna faumifa hyema ba shagera áte elva na mi cenanaa miya geni a dzalamiyefka áte unŋule.

<sup>2</sup> Adaba werre wá, ndza ta se balanaa ba malika-aha labare na gevge jirire na, daaci ma ware una cenaaka, fansareka na, ŋanaaŋa Dadaamiya an shairiya.

<sup>3</sup> Náza á miya wá, a tsaaka an una ŋanna. Mí de shaná estara kena shifa á miya, má mí feka hyema am elva a lya shifa na a sanaa ba Yaakadada Yaisu an ire-aara na? Emnde na ta cenanaa á ba an hyema-aatare wá, ndaramindaha geni elva ŋanna jirire.

<sup>4</sup> Dadaamiya keni a naba maresehe seydire á elva ŋanna an nalaama-aha, an najipu-aha, antara duksa gergere ta maganaa emnde ŋanna an hakuma á Shedekwe Cufedŋe na a vatertaa Dadaamiya an namaari-aara.

### *Yaisu wá, Slelya á emnde ba ŋane*

<sup>5</sup> Dadaamiya vaterteka ŋekideki ge malika-aha geni tá de kwaraná itare duniya na á de sawa, mí ndahaná miya na.

<sup>6</sup> Amá aŋkwa am wakita á Dadaamiya, a bantsa ura umele: Ázara urimagwe keni, geni ka Dadaamiya, ká dzámá ŋane? Urimagwe keni duksa he, geni ká fanu hyema?

<sup>7</sup> Ka naba ganaahe emtsaade cekwaanŋudí á katafke á malika-aha, ádaliye ka vante yaikkire antara dárádza.

<sup>8</sup> Ka yaa duksa baŋemme am erva-aara.

Má Dadaamiya a yaa duksa baŋemme am erva-aara wá, amaana baaka duksa ŋekideki ni ŋane á kwareka na. Amá am kinire na wá, mí nánka emtsaade sleksire-aara na á kwára duksa baŋemme na.

<sup>9</sup> Diyamidiya geni duksa baŋemme á kwaraná ba Yaisu, amá a naba ganaahe ge Dadaamiya am sarte cekwaanŋudí á katafke á malika-aha, geni á emtsamtsa am sleŋe á emnde baŋemme. Una ŋanna keni Dadaamiya a magateraa ba ŋurna ge emnde. Daaci Dadaamiya a vante yaikkire antara darádza ge Yaisu adaba a shu zlaŋa, a eksar emtsa ŋanna.

<sup>10</sup> Duksa baŋemme á ba am erva á Dadaamiya, a nderanaa ba ŋane. Zlaya jipu una ni a naba yaa Yaisu am zlaŋa na, geni ŋane a gevge edda una hyephye am duksa baŋemme, lauktu á de gatervá ŋane emnde kwakya egdzara á Dadaamiya, á lyatersá ŋane, á daterá ŋane á de katafke á Dadaamiya am yaikkire-aara.

<sup>11</sup> Ba Yaisu una á gatervege emnde cufedŋe á katafke á Dadaamiya. ŋane antara emnde na a barateraa ŋane, garevge ba egdzara á ura palle. Adaba una ŋanna wanka zherwe ge Yaisu, a dateraa an egdzara á Edeŋara.

<sup>12</sup> Ndza a bantsa ŋane: Yá de balaterá zhera á ŋa ge egdzar mama-aha-aaruwa, yá de galáká am dagave á emnde á ŋa.

<sup>13</sup> Adaliye a ba ŋane: Yá njá á ba áte Dadaamiya palle. Zlaŋe ádaliye a ba ŋane: Náwa iya antara emnde na a puwimaa Dadaamiya am erva.

<sup>14</sup> Emnde ŋanna, ta ba emndimagwaha, daaci Yaisu a naba gev urimagwe ba seke itare, a emtsehe geni á keŋanaakeda ba ŋekideki hakuma á Shaitaine na an hakuma ge ceba emnde na.

<sup>15</sup> A palateraa an una ŋanna emnde na ndza ŋateraaŋa lyawa á emtsa na baŋemme.

<sup>16</sup> ŋane saaka á se melateru ge malika-aha, amá a se melateru ge eggye-aha á Ibrahim.

<sup>17</sup> Daaci una zlaya geni á gevge ba seke egdzar mama-aha-ṅara am duksa baɗemme. Estuwa á dzegwándzegwa gev \*liman yaikke, slebara haypa á emnde ge meláterá an Dadaamiya. Ɗane slekemaare, dzayye ervaunɗe-aara am slera á Dadaamiya.

<sup>18</sup> Kina wá, á dzegwándzegwa a melateru ge emnde na tá am bada á shaitaine, aɗaba ɳane keni ndza a shushe zlaɗa am lámare ɳanna.

### 3

#### *Yaisu male arge Muusa*

<sup>1</sup> Daaci egdzar mama-aha-aaruwa, emnde cuɗeɗɗe, kure keni a dzerakursaa ba Dadaamiya geni kwá gevge emnde-aara, tsawanaatse enjkale á kure á ba áte Yaisu palle. Ba ɳane una slebela á Dadaamiya geni á se gev \*liman á miya emnde a fetarfe.

<sup>2</sup> Ba Dadaamiya una a faare slera ɳanna, ɳane keni a magaa slera ɳanna an ervaunɗe-aara palle, ba seke una Muusa keni ndza a magaa slera-aara an ervaunɗe-aara palle am huɗe á há á Dadaamiya.

<sup>3</sup> Emnde tá galeka há, amá tá gálá edda una a nderaa há. Ba duksa palle ge tara Yaisu an Muusa keni, shagera tá gálá ba Yaisu arge Muusa.

<sup>4</sup> Ba kelaa há a nderanaa ba ura, amá duksa baɗemme wá, a nderanaa ba Dadaamiya.

<sup>5</sup> Muusa wá, ɳane ndza ba walaadi am huɗe á há á Dadaamiya, slera-aara ndza ba mága seydire á názena watse á baterná Dadaamiya ge emnde. A magaa slera ɳanna an ervaunɗe-aara palle.

<sup>6</sup> Amá \*Almasiihu wá, ɳane Egdza huɗe á há á Dadaamiya, baɗemme á huɗe á há á Dadaamiya á ba am erva-aara. Ɗane keni a magaa slera-aara an ervaunɗe palle am huɗe á há ɳanna. Huɗe á há á Dadaamiya ɳanna wá, ba miya, má tsamiyaatse dzaɗzane áte unṅule-aara, má kezlamiyanveka tama á miya áte ɳane.

#### *Tate á puwansepuwe á emnde á Dadaamiya*

<sup>7</sup> Aɗaba una ɳanna, cenaumicena názena a baminaa Shedekwe Cuɗeɗɗe, a ba ɳane:

Vatená má cenakurancena kwara á Dadaamiya wá,

<sup>8</sup> magauka degdegire á ire seke una ndza ta maganaa eggye-aha á kure werre, am sarte na ta magaa yawe kul ufade am kaamba na. Ndza ta maganaa gardire ge Dadaamiya, ta naba gya hala-aara.

<sup>9</sup> A ba Dadaamiya, naránna tsa najipu-aha na ya maganaa iya antara itare am yawe kul ufade ɳanna, aley ta naba gyaa hala-aaruwa.

<sup>10</sup> Aɗaba una ɳanna, a naba jihe ge ervaunɗe jipu áte emnde ɳanna, a ba iya am ervaunɗe-aaruwa: Emnde na ervaunɗe-aatare yiyiye an iya, tá ɗabeka unṅule-aaruwa ɗekideki.

<sup>11</sup> Am jija ervaunɗe áte itare, ya naba zu wada geni yá de belaternaaka ɗekideki ge emnde ɳanna, ge se puwansepuwe antara iya am tate na ya maraternaa iya.

<sup>12</sup> Egdzar mama-aha-aaruwa, faufa hyema geni a jerka ura am dagave á kure una yiyiye ervaunɗe-aara an Dadaamiya, geni a de yánka Dadaamiya Sáksage.

<sup>13</sup> Amá ma vaatara keni ndaunda ba elva na ni á de vakurte ndzedá na am dagave á kure. Daaci á de badakuruka shaitaine ge mága haypa, antara ge mága degdegire á ire. Magaumága una ba kelaazare am sarte na zlaɓe kwá an shifa na.

<sup>14</sup> Máki kezlamiyánveka fetarfire á miya áte Yaisu, ba kalkale antara una am zunṅwire wá, daaci mi emnde á Yaisu á ba an jirire.

<sup>15</sup> Anṅkwa am wakita á Dadaamiya, a ba ṅane: Vatená, ma cenakuráncena kwára á Dadaamiya, magauka degdegire á ire seke una ndza ta maganaa eggye-aha á kure werre, ta maganaa gardire ge Dadaamiya.

<sup>16</sup> Emnde-ara ṅane cenaráncena tsa kwara á Dadaamiya, ta naba maganaa gardire na? Ba emnde na ndza a satersaa Muusa a sawa am larde a Misera na.

<sup>17</sup> Emnde-ara ṅane yawe kul ufaḍe tá já Dadaamiya an ervaunḍe na? Ba itare ṅanna zlaḍe ádaliye emnde na ta gu haypa kwakya an Dadaamiya, adaba una ṅanna ta naba matsehe am huḍe á kaamba.

<sup>18</sup> Emnde-ara ṅane Dadaamiya a zateru waḍa geni á de vaterteka ḍekideki de puwansepuwe antara ṅane na? Ba emnde ṅanna zlaḍe ádaliye ndza faransarka ḍekideki na.

<sup>19</sup> Ba estuwa egdzar mama-aaruwa, náwa namiyánna baḍemme geni Dadaamiya a piyaterante dem tate á puwansepuwe adaba baakire á fetarfire-aatare.

## 4

<sup>1</sup> Werre, á ba Dadaamiya á de vaterte tate á puwansepuwe ge emnde, una ṅanna namána na zlaḍe ba nja-aara ge miya keni. Daaci, faumifa hyema áte ire á miya, geni a eptseka palle á miya á dem kataliya, daaci watse á taa daaka á dem tate á puwansepuwe ṅanna.

<sup>2</sup> Miya cenamiyancena labare á higa ba seke náza eggye-aha á miya werre am kaamba, amá elva ṅanna magateranka payḍa ge itare adaba cenaráncena, amá fartarka átekwa.

<sup>3</sup> Miya emnde na famitarfe áte ṅane na wá, mí de shánsha dem tate á puwansepuwe ṅanna. Amá emnde na fartarka áte Dadaamiya wá, anṅkwa elva a ndasaa Dadaamiya áte itare, a ba ṅane:

Jija ervaunḍe, daaci ya naba zu waḍa geni ya de belaternaaka ḍekideki geni tá se puwansepuwe antara iya am tate na ya maraterna iya. Am fantaufe, am sarte na Dadaamiya zlauzle am slera á nderá duksa baḍemme wá, a naba puwansehe. Puwansepuwe ṅanna wá, anṅkwa sem vatená.

<sup>4</sup> Am tate umele am wakita á Dadaamiya, anṅkwa á ndaha elva a háre ge vuyire, a ba ṅane: Dadaamiya a zlaa slera-aha-aara am háre ge unṅkwahire, ge vuyire wá, a naba puwansehe.

<sup>5</sup> Am tate umele keni a ba ṅane: Tá de demka ḍekideki á dem puwansepuwe antara iya am tate na ya maraterna iya.

<sup>6</sup> Emnde na ta cenaa labare á higa zunṅwe, amá daraaka á dem tate á puwansepuwe ṅanna wá, adaba faransarka ge Dadaamiya. Ge puwansepuwe ṅanna wá, sem vatená keni zlaḍe anṅkwa baráma-aara ge emnde umele keni.

<sup>7</sup> Adaba una ṅanna, Dadaamiya a faa sarte umele zlaḍe ádaliye, amaana, zamane na. Náwa a faa sarte ṅanna estuwa, haraare á maga yawe kwakya am iga una ni eggye-aha á miya ta maganaa gardire na, a ba Dadaamiya an we á \*Dawuda: Vatená, ma cenakuráncena kwára-aaruwa wá, magauka degdegire á ire.

<sup>8</sup> Ma andze daterda Zhausuwe á dem tate á puwansepuwe á jirire wá, Dadaamiya ma andze á feka sarte umele ge dá ura á dem tate á puwansepuwe.



<sup>9</sup> Daaci diyamidiya geni aŋkwa puwansepuwe á jirire á katafke á emnde á Dadaamiya ba seke una ndza a puwansaa ŋane am háre ge vuyire na.

<sup>10</sup> Ma ware una shansha puwansepuwe ŋanna áza Dadaamiya, ŋane keni zlauzla slera-aara, ba seke una a puwanse ge Dadaamiya am slera-aara na.

<sup>11</sup> Daaci wavaumiwava ge dem tate á puwansepuwe ŋanna, faumifa hyema geni a jerka ura am dagave á miya una á fansarka ge Dadaamiya, seke una ndza faransarka eggje-aha á miya werre na. Daaci edda-aara á de geyegeye á kataliya.

<sup>12</sup> Elva á Dadaamiya wá, an hákuma jipu, á vaterte shifa na á zleka na ge emnde, á dzegwándzegwa mága slera yaikke am ervaunđe á ura. Elva ŋanna wá, an ndzedá jipu ba seke masalam na an ga slare we bukerđe na. Á dzegwándzegwa ŋgye á dem dzágwa á ubiye-aha, dete zefa keni bademme. Elva ŋanna wá, jauje ba ge masalam keni an ndzedá. A dzegwándzegwa tsanmaare ge ura am názena á slaslaná ŋane am ervaunđe-aara bademme.

<sup>13</sup> Baaka duksa na ni an shebe am ice á Dadaamiya. Duksa bademme a nderanaa ba ŋane, ŋane diyaadiya bademme. Watse mí de eppálá á katafke-aara názena mi maganaa miya bademme.

#### *Yaisu ŋane male á \*liman-aha bademme*

<sup>14</sup> Miya, diyamidiya ganakini aŋkwa \*liman á miya yaikke. Ba ŋane una Yaisu, \*Egdza á Dadaamiya, zlaazlálá á dem samaya. Daaci sey mi tsaatse ba shagera ate názena mi fetaare átekwa na.

<sup>15</sup> Liman á miya ŋanna wá, slezamivarze jipu, adaba diyaadiya názena zlazlada áte miya bademme. ŋane keni shaushe zladá-aha gergere ba seke náza á emnde bademme. Ba báda keni, ndza ta ebbada an duksa gergere bademme, amá ŋane magaaka haypa dfekideki.

<sup>16</sup> Adaba una ŋanna, gaumiyaptege á deza Dadaamiya slemagamiya ŋgurna ba kelaazare, gaumiyaptege á dezeńara an baakire á shaige, geni á de zamivarze, á de magamiya ŋgurna am wedera-aha á miya bademme.

## 5

<sup>1</sup> Bademme a male-aha á \*liman-aha, tá dzeraterá á ba am dagave á emnde, tá tsater ge mága slera á Dadaamiya am dagave á emnde, tá dáná itare sadake á emnde á de katafke á Dadaamiya, geni á yateraare haypa-aha-aatare.

<sup>2</sup> Má emnde diyarka mága jirire, dzalarevdzále áte barámá á Dadaamiya, liman wá, ŋane á naba cenatercena, adaba ŋane diyaadiya názena zlazlada áte emnde. Diyaadiya geni ŋane keni hyefka am duksa umele.

<sup>3</sup> Daaci sadake na á danná ŋane ge Dadaamiya na wá, á dándá náza á ire-aara emtsaade, geni a yanaarye Dadaamiya haypa-aara, lauktu á danná náza á emnde geni á yateraarye Dadaamiya ge itare keni.

<sup>4</sup> Baaka ura á dzegwándzegwa eksese slera á limanire an ire-aara, sey má a dahanaa Dadaamiya ge mága slera á limanire ŋanna, seke una ndza a dahá \*Haruna werre.

<sup>5</sup> Yaisu keni ekseseka ba ŋane an ire-aara, geni á gevge \*liman yaikke, amá ndza a eksesaa ba Dadaamiya, a ba ŋane, á elvan ge ŋane: Ba ekka una ka Egdza-aaruwa, iya keni ya Eddeŋa.

<sup>6</sup> Am tate umele keni aŋkwa am wakita á Dadaamiya a ba ŋane, á elvan ge ŋane: Ekka, ka liman dem ba ge dfekideki, limanire á ŋa seke limanire á Malkisadaka.

<sup>7</sup> Am sarte na Yaisu aṅkwa am duniya wá, ndza a ṅala Dadaamiya á ba an ká kwara, ámbera á kyuwa geni á se melanumele, adaba diyaadiya geni aṅkwa hakuma á Dadaamiya ge se lya shifa-aara. Dadaamiya cenanvarcene. Am iga á emtsa-aara, a naba tsantehe zlaḅe ádaliye, adaba fesarfira-aara áte ṅane.

<sup>8</sup> ṅane \*Egdza á Dadaamiya, aley keni wá, a naba shu zlaḅa, geni fesarfira-aara á gevge ba parakke.

<sup>9</sup> Am sarte na zlanazle slera ṅanna baḅemme maa, ṅane gevge slelyaterlya ba ge ḅekidēki ge emnde na tá aṅkwa fansarfe na baḅemme.

<sup>10</sup> Á dzegwándzegwa lyaterlya adaba a tsanaa ba Dadaamiya liman yaikke áte limanire á Malkisadaka.

### *Faufa hyema, dzalawevka áte unṅule á Dadaamiya*

<sup>11</sup> Kwakya elva na ṅá kátá ndakurnda áte ṅane, amá wá, zlazlaḅa jipu ge palakurá una ṅanna, adaba kure keni yiye hyema á kure, kwa taa cenvaaka duksa áte watsewatsire.

<sup>12</sup> Kina wá, zlaya ma kwá kwaratersá kure elva á Dadaamiya ge emnde, adaba harakuraahare am huḅe-aara, amá kwá kátá tá kwarakursá ba emnde zlaḅe ádaliye ba duksa na ndza kwa tsahese zunṅwe keni. Zlaya ma kwá de katafke áte unṅule á Dadaamiya, amá kwasau kwá ba am fantaufe. Ekkure wá, zlaya ma kwá zá ḅafa dzaṅdzaṅe seke dawalaa, amá kwá kátá shá ba uba seke egdzere áte erva.

<sup>13</sup> Ma ware una zlaḅe á kátá ba sha uba na, ṅane wá, zlaḅe ba seke egdzere áte erva. Egdzere áte erva wá, zlaḅe diyaaka duksa na shagera antara duksa na shagerka.

<sup>14</sup> Amá dawalaa diyardiya lanaale tara duksa na shagera, antara duksa na shagerka baḅemme, ma zlazlaḅa keni.

## 6

<sup>1</sup> Daaci geyaumika arge duksa na kwaye mi tsahese am fantaufe á miya ge fetaare áte Yaisu \*Almasihu na, mí zlalawa á de katafke an tsáha duksa-aara na zlazlaḅa na keni. Una názu á zlyater ge emnde na hararaare am fetarfire na. Duksa ṅanna mi tsahese kwaye am fantaufe na wá, amaana, mága tuba arge serhaypa na á dá ura á dem emtsa na, antara fetarfe áte Dadaamiya.

<sup>2</sup> Adaliye elva a mága baptisma gergere antara puwaare \*erva á barka ge ura, an elva a tsa emnde a faya, ira elva á shairiya á Dadaamiya vaci tsafaya.

<sup>3</sup> Baḅemme á una-aha ṅanna wá, diyamidiya. Kina wá, mi zlalawa á de katafke má wayatewáyá Dadaamiya.

<sup>4</sup> Eptsaare ge duksa na diyardiya emnde wá, kurguneka, adaba má ura a yanaa ba ṅane unṅule á Dadaamiya, baaka pute umele ḅekidēki ge melanumele geni á eptsa am tuba. Adaba emnde na ndza tá am parakkire á Dadaamiya, ndza sharánsha barka á Dadaamiya antara Shedekwe-aara am ervaunḅe,

<sup>5</sup> ndza emtáke elva á Dadaamiya am hyema-aatare, ndza sharánsha hakuma am duniya na á de sawa na keni, ma tá de njá am huḅe-aara,

<sup>6</sup> aley ni tá eptsaná ba iga ge Dadaamiya wá, baaka pute umele ḅekidēki ge melaterumele geni tá eptsa am tuba. Adaba ba seke tá átira ja \*Egdza á Dadaamiya ge buwire áte dzaṅgala, ta ganve zhera-aara duksa ba dey á katafke á emnde baḅemme.

<sup>7</sup> Itare ta ba seke fe: Má yawe aṅkwa á hya á dem fe ṅanna, fe ṅanna á mága náza za an barka jipu, aṅkwa á melaterumele ge emnde a ehherḍa-aara, baaka yanya-aara.

<sup>8</sup> Amá má fe ṅanna á eptsa ba dake antara masa wá, fe ṅanna baaka nampire-aara. Baaka barka am fe ṅanna, a yaranya ba ge ḍekidēki.

<sup>9</sup> Amá, egdzar mama-aha-aaruwa, ma ṅa ndaase estuwa keni wá, diyaṅerdiya geni ekkure kwá aṅkwa áte unṅule á jirire, daaci á de lyakurlya Dadaamiya.

<sup>10</sup> Dadaamiya ṅane slejirire, á taa viyannaaka slera na kwa maganaa kure, kwa naba melateruhe ge emnde a fetarfe, sem vatená kwá á ba átira melaterumele na. Una ṅanna á mara wáyáva á kure áte Dadaamiya. Baḍemme á una-aha ṅanna, á taa viyanaaka.

<sup>11</sup> Duksa na ṅá kátáná ṅere ázekure wá, ma ware á kure keni magaumága ba estuwa an higa á kure campaukkwe dem halavuwa á duniya, yawanka ḍekidēki. Daaci kwá de shánsha názena kwá tamaná kure áza Dadaamiya.

<sup>12</sup> Gawevka emnde a masefe, amá ḍabauḍába sera á emnde a fetarfe na tá an ndzeḍa jipu, hararaare áte unṅule á Dadaamiya. Ba itare una tá de shá názena a ba Dadaamiya á de vaterte ge emnde-aara na.

### *Názena a ndasaa Dadaamiya baaka pekyaaara*

<sup>13</sup> Am sarte na Dadaamiya a ṅuḍanaa namána ge Ibrahima, a zu waḍa geni ba jirire á de emmága duksa na a ndasaa ṅane ṅanna. Adaba baaka duksa umele á jauje ge Dadaamiya an yaikkire, geni á za waḍa an ṅane maa, a naba zu waḍa á ba an ire-aara.

<sup>14</sup> A zu waḍa, a ba ṅane: Ba jirire yá de gakar barka-aaruwa. Yá de yákteya ba kwakya.

<sup>15</sup> Ibrahima a naba fetarhe áte elva na a ndasaa Dadaamiya, a faa ervaunḍe jipu ge eppaka-aara, daaci shansha duksa ṅanna a ba Dadaamiya á de vanteva na.

<sup>16</sup> Má emndimagwaha tá za waḍa, tá zaná an duksa na jauje ge ndzeḍa-aatare. Zá waḍa wá, á zlanauzle ge elva-aha baḍemme, emnde keni tá tsaatse á ba átekwa.

<sup>17</sup> Daaci Dadaamiya a naba zu waḍa, á kátá maraterán ge emnde na a ṅuḍateraana namána na, geni á de emmága duksa na a ndasaa ṅane ṅanna, á eptseka elva ḍekidēki.

<sup>18</sup> Namána na a ṅuḍanaa Dadaamiya, antara waḍa na a zanaa ṅane na maa, duksa-aha buwa ṅanna a ndasaa Dadaamiya na wá, baaka pekyaaara, Dadaamiya á zeka waḍa á fida ḍekidēki. Daaci miya emnde na mi se shaa ire á miya am sera á Dadaamiya na wá, una á vamite ndzeḍa jipu geni mí njantenja tama á miya áte duksa na a ba Dadaamiya á de vamiteva na.

<sup>19</sup> Táma á miya áte duksa ṅanna wá, á tsáná ba ṅane shifa á miya degdege, geni a dzalamiyefka áte unṅule á Dadaamiya. A weramiyantaa ba ṅane kacakaca á dzegwa na ta icanse mashidi an ṅane na, ge de katafke á Dadaamiya.

<sup>20</sup> Yaisu wá, ṅane dedde á katafke á miya, á dem tate ṅanna adaba miya. Ba ṅane una \*liman á miya yaikke áte limanire á Malkisadaka, liman yaikke dem ba ge ḍekidēki.

## 7

*Malkisadaka \*liman yaikke, slekse yaikke*

<sup>1</sup> Malkisadaka ṅanna wá, ṅane ndza slekse yaikke am Salaam, zlaḅe adaliye ndza \*liman á Dadaamiya Saksage. Vacite umele wá, Ibrahimia a dem wáva, a de ceḅaa slekse-aha umele. Átire sa wá, a naba de yainuhe ge liman Malkisadaka, a gan barka.

<sup>2</sup> Daaci Ibrahimia a de sanse luser am nalmane-aara baḁemme, a vante ge liman Malkisadaka. Emtsaade wá, zhera á Malkisadaka ṅanna wá, amaana slekse na tsaatse áte jirire. ṅane ndza slekse am Salaam. Salaam na maa, amaana hairire.

<sup>3</sup> ṅane, ḅaaka ura diyaadiya eddeṅara antara emmeṅara, ḅaaka jeba-aara, ḅaaka ura diyaadiya fakta á shifa-aara antara halavuwa á shifa-aara. Ba seke una wakita á Dadaamiya á ndaaka fakta-aara antara halavuwa-aara na wá, ba seke ṅane wá, liman na aṅkwa ma vaatara keni. ṅane gevge gáráva á Yaisu \*Egdza á Dadaamiya.

<sup>4</sup> Diyaweddiye geni Malkisadaka wá, liman yaikke. Ibrahimia ṅane una eggyemiya baḁemme a sanse luser am duksa na a zanaa am wáva baḁemme, a vante ge ṅane.

<sup>5</sup> Diyamidiya geni emnde umele am eggye-aha á Laiwi garevge liman-aha. Am \*tawraita á Muusa wá, a ba Dadaamiya á elvan ge itare wá, dawmbare á deza egdzara á \*Iserayiila-aha, a varakurteva luser na tá sansa am nalmane-aatare baḁemme. Amaana luser ṅanna tá de lyiyaná á ba áza emnde a larde-aatare, itare keni ta ba eggye-aha á Ibrahimia.

<sup>6</sup> Amá Malkisadaka wá, ṅane ura a emnde á Laiwi ka, aley a lyevaa luser áza Ibrahimia. Ibrahimia ṅane edda una Dadaamiya a ṅgudḁaa namána antara ṅane geni á de vante duksa. Amá ba Malkisadaka una a gar barka.

<sup>7</sup> Adaliye, diyamidiya geni edda una á gar barka ge ura wá, yaikke ba ṅane arge edda una a shaa barka. Daaci yaikke ba Malkisadaka arge Ibrahimia.

<sup>8</sup> Zlaḅe ádaliye, baḁemme á liman-aha na ta segáshe am jeba á Laiwi, tá lyiyaná itare luser áza emnde a larde-aatare na wá, itare keni tá emtsa ba seke emnde baḁemme. Amá Malkisadaka wá, a ba wakita á Dadaamiya ṅane aṅkwa an shifa.

<sup>9</sup> Daaci ba Laiwi na eggye-aha-ṅara tá lyiya luser áza emnde na keni, ba seke a vante luser-aara ge Malkisadaka, aḁaba eggyeṅara Ibrahimia a vante luser-aara ge Malkisadaka.

<sup>10</sup> Amaana, am laukte na Ibrahimia a vante luser ge liman Malkisadaka na wá, wulfe-aha-aara baḁemme á ba am ṅane emtsaade. Daaci ba seke Laiwi antara egdzara-aara na á de yaterá ṅane na keni varanteva.

<sup>11</sup> Dadaamiya a vaterte \*tawraita ge emnde-aara Iserayiila-aha keni á ba áte erva an liman-aha na tá segashe am emnde a jeba á Laiwi, amá slera á limanire na ndza ta maganaa emnde á Laiwi hyefka, dzegwaranka magannaamaga ge Dadaamiya názena a katanaa ṅane. Ma andze dzegwarándzegwa wá, ma ḅaaka wedera-aatare an liman umele yaikke seke Malkisadaka. Ma andze dzegwarándzegwa wá, baḁemme á liman-aha ma tá segashe á ba am eggye-aha á Laiwi seke \*Haruna.

<sup>12</sup> Má Dadaamiya mbedesembede limanire á emnde á Laiwi an liman umele wá, daaci tawraita keni á de eptsanteptsa.

<sup>13</sup> Náwa namiyanna geni limanire, a eptsaptehe ba estuwa. Yaakadada Yaisu na ṅá aṅkwa á ndaha elva-aara áhuna na keni, ṅane ura jeba á Laiwi ka, jeba-aara ba tsekemme. Ba ura palle keni jarka am emnde a jeba-aara una gevge liman, a daa sadake á de katafke á Dadaamiya.

<sup>14</sup> Diyamidiya geni Yaisu wá, ṅane a jesare am dagave á emnde a jeba á Yahuda. Am laukte na Muusa á ndáhá elva á liman-aha na wá, tsalaaka jeba ṅanna đekideki.

*\*Liman yaikke áte limanire á Malkisadaka*

<sup>15</sup> Náwa mí dise áte una, geni ba jirire ndza hyefka limanire á emnde á Laiwi, adaba Dadaamiya a fanem slera á limanire ṅanna am erva ge Yaisu, ṅane keni ba ura jeba umele seke \*liman Malkisadaka.

<sup>16</sup> ṅane gevka liman yaikke áte nade á liman-aha, amá a gev liman yaikke adaba an hakuma ge nja an shifa dem ba ge đekideki.

<sup>17</sup> Adaliye a ba wakita á Dadaamiya: Ekka ká liman yaikke dem ba ge đekideki seke liman Malkisadaka.

<sup>18</sup> Dadaamiya a naba yaa nade á liman-aha adaba hyefka, cekwa hakuma-aatare ge melateru ge emnde.

<sup>19</sup> An nade á limanire wá, emnde dzegwaránka shá dzayyire á ervaunde á katafke á Dadaamiya. Amá kina wá, anḳwa edda una ni jateruje ge liman-aha werre. Máki má anḳwa fa tama á miya áte ṅane wá, á de vamitá ṅane barama ge de katafke á Dadaamiya.

<sup>20</sup> Zlađe adaliye maa, am sarte na ni watse Dadaamiya á de far slera á limanire ge Yaisu na wá, a zu wada emtsaade, geni Yaisu á de gev liman yaikke, amá ge liman-aha umele wá, magaaka estuwa.

<sup>21</sup> Amá ge Yaisu wá, Dadaamiya a zanu wada, a ba ṅane: Yá etpseka elva-aaruwa dammaru ká njá liman dem ba ge đekideki.

<sup>22</sup> Máki Dadaamiya a zu wada estuwa wá, amaana adaba Yaisu wá, shamiyansha namána áza Dadaamiya jauje ge namána-aara werre na.

<sup>23</sup> Anḳwa jawapa umele. Liman-aha werre wá, ndza ta vayye, ba á emtsa una, á eksaná una slera á limanire, á emtsa una á eksaná una slera á limanire.

<sup>24</sup> Amá limanire á Yaisu wá, baaka tsa-aara, adaba ṅane á emtseka đekideki.

<sup>25</sup> Daaci ma vaatara keni á dzegwándzegwa lyaterlya emnde na tá yeka an zhera-aara na bademme, adaba ṅane anḳwa an shifa dem ba ge đekideki, sledagave-aatare an Dadaamiya.

<sup>26</sup> Ba ṅane una liman yaikke, a hyevhye ge wedera á miya bademme. ṅane dzayye hude-aara, gauka haypa đekideki, ṅane cudede am duksa bademme, anḳwa dagave-aatare antara emnde a mága haypa, ṅane anḳwa áza Dadaamiya am samaya.

<sup>27</sup> Liman-aha werre wá, ba kelaazare sey ta dándá sadake á ire-aatare emtsaade á deza Dadaamiya geni á yateraarye haypa-aha-aatare, lauktu tá dá náza á emnde geni a yateraarye Dadaamiya ge itare keni. Amá Yaisu wá, ṅane magaaka slera á limanire-aara áte una ṅanna đekideki. A magaa sadake-aara ba ser palle á katafke á Dadaamiya an shifa-aara, hyevhye geni Dadaamiya á yateraarye ge emnde bademme.

<sup>28</sup> Emnde na ndza ta faterar slera á limanire áte una a ndanaa \*tawraita á Muusa wá, ta ba emndimagwaha, tá naba mbedá adaliye á dem haypa, nampire-aara á de haraaka, á de keđa ba đekideki. Amá am sarte na Dadaamiya a zu wada geni Egdza-aara á de gev liman yaikke na wá, a eptsante am sarte ṅanna tawraita keni. Daaci a vante slera á limanire ge Egdza-aara, ṅane hyevhye am duksa bademme dem ba ge đekideki.

## 8

*Yaisu \*liman á miya yaikke*



<sup>1</sup> Náwa una wá, jirire á elva-aha na nǎ aṅkwa tsakaná ṅere baɗemme na: Miya wá, shamiyánsha \*liman yaikke zlaazlala á dem samaya, aṅkwa á nǎ am naɗafa á Dadaamiya na ni ṅane slekse arge duksa baɗemme na.

<sup>2</sup> ṅane aṅkwa á maga slera á limanire-aara am tate na cuɗeɗɗe jipu, Dadaamiya á nǎ amkwa na. Werre wá, liman-aha ndza ta magaa slera á limanire-aatare á ba am \*mashidi á kacakaca ta maganaa ba emnde. Amá Yaisu wá, ṅane aṅkwa á maga slera á limanire-aara am samaya, am mashidi á jirire na a maganaa Dadaamiya.

<sup>3</sup> Baɗemme á liman-aha wá, ta fater ba ge dá sadake-aha gergere á de katafke á Dadaamiya. Daaci shagera ba liman á miya yaikke na keni á dánda sadake á de katafke á Dadaamiya.

<sup>4</sup> Ma andze ṅane aṅkwa áte duniya wá, ma andze á maṅka slera á limanire ɗekidɗeki, aɗaba tá aṅkwa liman-aha umele ge dá sadake á de katafke á Dadaamiya áte una á ndaná \*tawraita á Muusa.

<sup>5</sup> Liman-aha ṅanna, tá maga limanire-aatare am mashidi, amá una ṅanna ba garava á mashidi á jirire na am samaya na. Am sarte na ni watse Muusa á de maga mashidi á kacakaca wá, a ba Dadaamiya á elvan ge ṅane: Eccena ba shagera, de emmága á ba áte una ya kwaraksaa iya átire á wa na.

<sup>6</sup> Daaci náwa namiyanna baɗemme geni slera na a faara Dadaamiya ge Yaisu, jauje ge náza á liman-aha baɗemme. Namána na ta shanaa emnde áza Dadaamiya aɗaba Yaisu na jauje ge namána werre. Aɗaba duksa na Dadaamiya a ṅuɗaamiya namána-aara na, jauje ge una werre.

<sup>7</sup> Ma andze hyefhye namána werre wá, Dadaamiya keni ma á maṅka umele.

<sup>8</sup> Amá diyamidiya geni namána werre na hyefka ɗekidɗeki, aɗaba emnde yaránka mága haypa. Daaci Dadaamiya aṅkwa á valaterarvale, á ba ṅane á elvan ge itare:

Cenaucena una ba shagera: aṅkwa á sawa zámame na ni yá de ṅuɗaterá namána-aaruwa aṅwaslire ge emnde á \*Iserayiila antara ge emnde a Yahuda.

<sup>9</sup> Una ṅanna gergere antara namána na ndza ya ṅuɗater ge eggye-aha-aatare werre am sarte na ya saterse am larde á Misera na. Itare ɗabarka namána-aaruwa, mele iya keni fanateruka hyema. Una ya ndanaa ba iya ya Yaakadada.

<sup>10</sup> Náwa yá de maganá estuwa namána-aaruwa antara emnde a Iserayiila: yá de faterem shairiya-aaruwa am makhyakhya-aatare, yá de magaterá ṅurna geni a seseka am ire-aatare ɗekidɗeki. Yá de gev Dadaamiya-aatare, itare keni tá de gev emnde-aaruwa.

<sup>11</sup> Am sarte ṅanna wá, watse baaka wedera á emnde ge de balaterá zhera-aaruwa ge emnde, aɗaba an male-aha ka, an egdzara ka, baɗemme á emnde tá de diyisediye.

<sup>12</sup> Aɗaba yá de zatervarze am haypa-aatare, yá de ṅaterka am ervaunɗe ɗekidɗeki.

<sup>13</sup> Kwaya ṅane názu a ndanaa Dadaamiya am namána aṅwaslire. Daaci diyaweddiye ganakini Dadaamiya a ganve namána werre ba seke emgyegwe a duksa. Má duksa gevege emgyegwe wá, cekwa nampire-aara, á de haraaka, á de keɗa ba ɗekidɗeki.

## 9

*Tara slera á \*liman-aha am duniya antara náza á Yaisu am samaya*

<sup>1</sup> Am namána á zuṅṅwire wá, Dadaamiya a vaterte shairiya-aha-aara ge emnde, geni tá dabaná áte una ṅanna am jahava-aatare á katafke-aara, adaba ndza aṅkwa mashidi ta maganaa itare ge ṅála Dadaamiya am huḍe-aara.

<sup>2</sup> Ta magaa mashidi an kelise, ta fem mekere am huḍe-aara an kacakaca á dzegwa. Mekere na á sete we-aara na wá, ta dahanaa an sleḍe cuḍeḍe. Am huḍe-aara tá fa kára á fanus an nara vuye, antara tabel, depain cuḍeḍe átekwa, tá fan ge Dadaamiya.

<sup>3</sup> Am mekere ge buwire am ice á kacakaca á dzegwa na wá, ta dahanaa an sleḍe na cuḍeḍe jipu na.

<sup>4</sup> Am huḍe á una ṅanna keni maa, ta magaa tate á diza kajiji á katafke á Dadaamiya, ta maganaa an dindar baḍemme, antara nakwati, ṅane keni ta baranaa an dindar ṅanna. Nakwati ṅanna wá, tá yeha namána á Dadaamiya átekwa. Am nakwati ṅanna maa, aṅkwa erba á dindar. Am erba ṅanna maa, ta fem dafa na ndza a vatertaa Dadaamiya á sawa am samaya am sarte na ndza ta am kaamba na. Aṅkwa zlaḍe zade á \*Haruna na ndza a magaa hyema na, antara naláwa-aha á nakwa buwa na ndza Dadaamiya a puwaterte shairiya-aha-aara átekwa na. Baḍemme á una-aha ṅanna tá á ba am nakwati ṅanna.

<sup>5</sup> Ate nakwati ṅanna maa, ta magaa garava á malika-aha buwa. Amaana, ba Dadaamiya an ire-aara keni aṅkwa am tate ṅanna. Lyambake á malika-aha ṅanna ta jamme tekeppe áte ire á tate na male á \*liman-aha á de tedantá uzhe á sadake ge Dadaamiya, geni á yateraarye ge emnde na. Amá kina wá, ṅá dzegwánka emtsaḍe palakura jirire-aara baḍemme.

<sup>6</sup> Am sarte na zlaruzle am mága mashidi ṅanna baḍemme maa, liman-aha ta duwa ba kelaazare á dem mekere ge zuṅṅwire na ge mága slera-aatare.

<sup>7</sup> Amá á dem mekere ge buwire na wá, sey á duwa ba male á liman-aha palle. A duwa ṅanna keni sey ba ser palle am sakanderi. Má á duwa keni maa, á duwa an uzhe á dabba am erva á danán ge Dadaamiya, geni Dadaamiya á yateraar haypa-aha-aatare, ṅane antara emnde á Dadaamiya baḍemme.

<sup>8</sup> Náwa názu á kwaramisa Sheḍekwe Cuḍeḍe an duksa-aha ṅanna: Máki zlaḍe aṅkwa mekere á zuṅṅwire am mashidi ṅanna wá, zlaḍe baaka barama ge dem sleḍe na cuḍeḍe jipu na.

<sup>9</sup> Duksa-aha na tá maganá emnde sem vatená na wá, tá maga ba garava una mí zharaná miya kina. Baḍemme á sadake-aha ṅanna, á dzegwánka baraterá ervaṅḍe ge emnde.

<sup>10</sup> Una ṅanna á kwaraterse ba elva á náza za, geni a zarza una, a zarka una, antara elva á náza sha, ira elva á tseḍaṅjire. Baḍemme á shairiya-aha ṅanna ba iga-aara emtsaḍe, dem sarte na Dadaamiya á de mbaḍesembaḍe duksa baḍemme aṅwaslire.

<sup>11</sup> Kina wá, samsa Yaisu \*Almasiihu, ba ṅane una male á \*liman-aha baḍemme, a sanaa ba ṅane duksa shagera na mi shanaa miya áza Dadaamiya. ṅane aṅkwa á maga slera-aara am tate na jauje ge mashidi á kelise na ndza ta maganaa emndimagwaha werre na. Ta maganaa emnde ka tate ṅanna, una ṅanna slera á Dadaamiya an ire-aara.

<sup>12</sup> Am sarte na Yaisu a duwa á dem tate na cuḍeḍe jipu na wá, daaka an uzhe á usale, bi an uzhe á egdze á dalau, amá a duwa an uzhe á ire-aara ba ge ṅane. A demhe ba ser palle, daaci hyevhye ge lya emnde baḍemme dem ba ge dekiḍeki.

<sup>13</sup> Itare ba ta icetaa usale, bi egdze á dalau, daaci ta ucaterve uzhe-aara ge emnde na d̄abaraaka shairiya á Dadaamiya, bi ta icetaa gyaale á esla, ta deraahe an kárá, ta kutaterva kelpakara-aara. Má magarnaamaga baɗemme áte una á ndahaná \*tawraitá wá, ma ware una ndza a dzaleve áte shairiya á Dadaamiya keni, an bara haypa-aara.

<sup>14</sup> Daaci má uzhe á dabba ndza an hákuma estuwa ge bara haypa, sakwa uzhe á Yaisu Almasiihu emtu? Yaisu keni baaka duksa mándzawe áte ṅane d̄ekideki. An hákuma á Shedekwe Cud̄ed̄de na á nja ba ge d̄ekideki na, a naba yanaa shifa-aara ge Dadaamiya. Uzhe-aara na a puwanvaa ṅane na wá, á baramiyá haypa ge miya, á ekhyamiya ervaun̄de geni mí maganá slera ge Dadaamiya Saksage.

<sup>15</sup> Ad̄aba una ṅanna, Yaisu wá, slemela emnde ba ṅane antara Dadaamiya. Ba ṅane una á mará namána an̄waslire na a ṅgud̄ateraa Dadaamiya ge emnde na. Ad̄aba una ṅanna, baɗemme á emnde na a dzeratersaa Dadaamiya geni ta emnde-aara na, tá de lyevaalye duksa shagera na a ba Dadaamiya am namána-aara, á de vaterteva na. Duksa ṅanna ba seke ta zu am warita, baaka slelyatervulye d̄ekideki. Tá de shá una ba seke warita ad̄aba emtsa á Yaisu Almasiihu. An emtsa-aara ṅanna, a de lyatersaa ṅane emnde am haypa na ta maganaa itare werre, am sarte na tá d̄aba emgyegwe á namána.

<sup>16</sup> Má an̄kwa ura a yaa nasherire á nalmane-aara, geni má de kedaakeda ṅane, tá de teganá emnde-aara áte una a ndasaa ṅane wá, sey tá paka ba má kedaakeda ṅane emtsaade, lauktu tá tega warita ṅanna.

<sup>17</sup> Má edda una a ndaase nasherire á nalmane-aara na tá de záná emnde am warita na zlaɓe á ba an shifa-aara wá, baaka ura á maga názena a ndasaa ṅane na, sey má kedaakeda ṅane, lauktu tá emmága.

<sup>18</sup> Ba namána á zun̄wire na ndza a maganaa Dadaamiya werre na keni, sey máki jarja dabba emtsaade, lauktu á gevge duksa na a ndasaa ṅane na.

<sup>19</sup> Am sarte ṅanna maa, nabi Muusa a palaternaahē shairiya-aha á Dadaamiya na am \*tawraitá na baɗemme ge emnde. Daaci a eksante uzhe á egdzar esla-aha, antara usale-aha, a kante yawe, a icevaa erva á nafa umele tá d̄ahaná an isaup, antara úgje á duksa umele han̄je. Daaci a wecanve uzhe antara yawe na ge wakita á \*tawraitá, a wecaterve ge emnde na tá katafke-aara keni baɗemme.

<sup>20</sup> Am iga a una ṅanna maa, a ba ṅane á elvan ge itare: Una na wá, uzhe na Dadaamiya a magaa namána an ekkure an ṅane, tsufautsufa ba shagera.

<sup>21</sup> Zlaɓe ad̄aliye, nabi Muusa a de wecanve uzhe na ge mashidi na ta maganaa an kelise na, antara kazlaṅa á mága slera á limanire na am huɗe-aara na baɗemme.

<sup>22</sup> Áte názena á ndaná \*tawraitá wá, cekwa duksa na tá wecanveka uzhe na geni tá ganvege cud̄ed̄de á katafke á Dadaamiya. Má puwaraaka uzhe wá, Dadaamiya á yateraarka haypa ge emnde d̄ekideki.

*Yaisu \*Almasiihu a bezateraa haypa ge emnde an uzhe á ire-aara*

<sup>23</sup> Ate una á ndaná \*tawraitá á Muusa wá, má jarejja dabba wá, ma uwe keni tá naba ganvege cud̄ed̄de an uzhe-aara. Amá a viyamiyarka geni slera á limanire zun̄we na wá, ndza ba garava-aara ge jirire á duksa na am samaya na. Jirire-aara na am samaya na wá, sey uzhe na jauje ge uzhe á dabba, una ṅanna uzhe á Yaisu \*Almasiihu.

<sup>24</sup> Náwa cenamiyancena geni Yaisu Almasiihu demde á dem tate na cud̄ed̄de jipu na. Amá wá, am mashidi á kelise na ndza ta maganaa

emndimagwaha ka, una ṅanna ndza ba garava-aara ge jirire á tate na Dadaamiya á njá ámkwa na.

ṅane zlaazlala á dem samaya, tate na Dadaamiya á njá átekwa na. Kina wá, ṅane aṅkwa á katafke á Dadaamiya, aṅkwa á magamiya wedera á miya bademme.

<sup>25</sup> Male á \*liman-aha wá, ṅane ba kelaa sakanderi á duwa an uzhe á dabba á dem tate na cuḑeḑe jipu na. Amá Yaisu wá, ṅane daaka an uzhe á dabba á de katafke á Dadaamiya. ṅane a yaa shifa-aara sadake ge Dadaamiya, a magaa ba ser palle ṅanna, daaci hyevhye náza á dem ba ge ḑekideki.

<sup>26</sup> Ma andze a magaa sadake-aara ser kwakya wá, kwaye am fakte á duniya dem halavuwa-aara keni, ma andze á sha ba zlada. Amá, a shu zlada-aara ba ser palle. A semhe ba ser palle ṅanna herzhe an halavuwa á duniya na, a se yaa shifa-aara sadake ge Dadaamiya, geni ma vaatara keni, á barateraabara haypa-aha-aatare ge emnde, baaka hákuma á haypa mazla-aara.

<sup>27</sup> Bademme á emnde, ma ware keni á de emtsa ba ser palle. Am iga á emtsa maa, tá de katafke á shairiya á Dadaamiya.

<sup>28</sup> Yaisu \*Almasiihu keni a emtsa ba ser palle. A yaa shifa-aara sadake ge Dadaamiya, geni á barateraabara haypa-aha-aatare ge emndimagwaha. Á de sawa zlaḑe ádaliye, amá sawa-aara ṅanna wá, á se baraterá haypa ka mazla-aara ge emnde, amá á se enzla ba emnde na ni tá aṅkwa ufa ṅane na.

## 10

<sup>1</sup> Shairiya-aha na am \*tawraitá á Muusa na wá, á maramiya ba gáráva á duksa shagera na mi shanaa miya kina. Shairiya-aha ṅanna, ba garava-aara ka wá, jirire-aara ka. Male-aha á \*liman-aha wá, ba kelaa sakanderi icaranseka ḑekideki ge dá sadake á de katafke á Dadaamiya am tate na cuḑeḑe jipu na. Má estuwa wá, una á dzegwánka ḑekideki melateru ge emnde geni tá gevge cuḑeḑe á katafke á Dadaamiya.

<sup>2</sup> Ma andze emnde tá shansha cuḑeḑe náza dem ba ge ḑekideki adaba sadake ṅanna wá, ma andze á enzleka ervaunḑe-aatare mazla-aara áte elva á haypa, ma andze tá ádalika á maga sadake mazla-aara.

<sup>3</sup> Amá sharánka una ṅanna, baira deme sadake-aha ṅanna á yehaterante haypa-aha-aatare ba kelaa sakanderi.

<sup>4</sup> Adaba uzhe á dalau antara uzhe á usale á hyefka ḑekideki ge bára haypa.

<sup>5</sup> Adaba una ṅanna, am sarte na samsa Yaisu \*Almasiihu á sem duniya, a ba ṅane á elvan ge Dadaamiya:

Uzhe á dabba antara sadake-aha umele, baaka wedera á ṅa an ṅane.

Adaba una ṅanna ka give urimagwe, geni yá se yá shifa-aaruwa á katafke á ṅa.

<sup>6</sup> Sadake á dabba-aha na tá epshaká emnde, antara sadake á bara haypa na wá, baaka wedera á ṅa an ṅane mazla-aara.

<sup>7</sup> Ya ndaaka adaba una: Náwa iya, Dadaamiya-aaruwa, sanemse á sem duniya, ya se maga názena ká kataná ka, ba seke una ta puwete am wakita á ṅa arge iya na.

<sup>8</sup> Am zunṅwire keni, a ba Yaisu á elvan ge Dadaamiya: «Uzhe á dabba-aha antara dabba-aha na tá epshaká emnde na, antara sadake á bára haypa,

ira sadake-aha umele, una-aha ṅanna baɗemme higakarka.» Sadake-aha ṅanna tá magáná á ba áte una á ndaná \*tawraitá tsa kalkale, aley Dadaamiya lyiyaaka.

<sup>9</sup> Daaci á ba ṅane zlaɓe áɗaliye: «Náwa iya sanemsa á sem duniya, ya se maga názena ká kataná ka.» Elva-aara ṅanna wá, á palaamiyá una ni Dadaamiya á liyeyeka sadake werre na mazla-aara, a naba mbedese an sadake umele.

<sup>10</sup> Miya wá, gamiyevge emnde cuɗeɗɗe á katafke á Dadaamiya, aɗaba Yaisu \*Almasiihu maganaamaga názena á kataná Dadaamiya, a yaa shifa-aara ba ser palle sadake na.

<sup>11</sup> Baɗemme á \*liman-aha wá, ma ware-aatare keni má daada áte ṅane, ba kelaazare baaka ṅjinja-aatare ɗekidɗeki am slera-aatare ge fa sadake-aha á emnde á katafke á Dadaamiya. Sadake-aha ṅanna keni baraaka haypa á emnde ɗekidɗeki.

<sup>12</sup> Amá Yaisu Almasiihu ṅane a naba yaa shifa-aara sadake ge Dadaamiya. Ba ṅane una an hakuma á baraterá haypa ge emnde dem ba ge ɗekidɗeki. Am iga a una ṅanna maa, zlaazlala á dem samaya, anṅwa á njá am naɗafa á Dadaamiya,

<sup>13</sup> á páká sarte na ni Dadaamiya á de gatervege kelaade-aha-aara tate á puwa sera-aara na.

<sup>14</sup> An sadake-aara ṅanna ndza a maganaahe ba ser palle na wá, a baraterse an una ṅanna ervaunɗe ge emnde na a dzeratersaa ṅane, garevge emnde cuɗeɗɗe náza á dem ba ge ɗekidɗeki na.

<sup>15</sup> Sheɗekwe Cuɗeɗɗe keni anṅwa á bamiyanba geni ba sadake-aara palle una hyevhye. Aɗaba ndza a ba ṅane:

<sup>16</sup> A ba Yaakadada Dadaamiya: Náwa ṅane duksa na am namána-aaruwa yá de magaterán ge emnde-aaruwa: am sarte ṅanna yá de ṅaternaaja shairiya-aha-aaruwa am ire-aatare, yá de magaterá pute geni á seska am enṅkale-aatare ɗekidɗeki.

<sup>17</sup> Daaci a ba ṅane zlaɓe áɗaliye: Yá de yateraarye haypa-aha-aatare, yá de ṅaterka am ervaunɗe mazla-aara.

<sup>18</sup> Máki yateraarye Dadaamiya ge emnde wá, elva a sadake umele baaka mazla-aara.

### *Gaumiyaṅtege á deza Dadaamiya*

<sup>19</sup> Egdzar mama-aha-aaruwa, kina wá, baaka názu á piyamite ge dem tate na ni cuɗeɗɗe jipu na. Aɗaba Yaisu a puwaa uzhe-aara aɗaba miya.

<sup>20</sup> Yaisu ṅane a naba tanve kacakaca á dzegwa na ni ndza am dagave á miya antara tate na cuɗeɗɗe jipu na. A vamitaa ṅane baráma á dem tate ṅanna, geni mí shansha shifa na á zleka na. Kacakaca á dzegwa na a tanvaa ṅane na wá, amaana vuwa-aara ba ge ṅane.

<sup>21</sup> Miya, shamiyansha \*liman yaikke, á kwaraterá ṅane emnde na tá am huɗe á há á Dadaamiya baɗemme.

<sup>22</sup> Ba seke una ni Yaisu a weramiyante barama na wá, mi zlalawa á de katafke á Dadaamiya an ervaunɗe á miya palle, magaumika shaige ɗekidɗeki. Aɗaba Yaisu a baramise ervaunɗe an uzhe-aara, a baramive an yawe tseɗanṅe.

<sup>23</sup> Yaumiyanṅa mága seydire á shifa na á zleka na, a ba Dadaamiya á de vamiteva na. Aɗaba má ṅane ndaasendaha elva wá, á eptseka elva-aara ɗekidɗeki. Daaci naba faumitarfe á ba áte názena a ndasaa ṅane, magaumika shaige ɗekidɗeki.



<sup>24</sup> Magaumimága wáyávire am dagave á miya, ma ware keni a fanemfa ndzedá am vuwa ge ukfeŋara, geni a emmága shagerire antara wayavire ba kelaazare.

<sup>25</sup> Náwa emnde umele mbarsembe icanse sem jahava, una ŋanna shagerka dekideki. Daaci yaumiyanka jahava átirpalle, ma ware keni a fanemfa ndzedá am vuwa ge ura. Adába diyakurdiya geni herzhapthe-herzhe sawa á Yaakadada Yaisu.

<sup>26</sup> Má ura diyaadiya jirire á Dadaamiya, aley á maga ba haypa an niya wá, baaka sadake na ni á de barannaabara haypa-aara ŋanna.

<sup>27</sup> Má ura á maga jeba á haypa ŋanna wá, sey á njá á ba an iyawa, adába Dadaamiya aŋkwa eppaka an shairiya, á de záterá kara á jahanama antara kelaade-aha á Dadaamiya umele.

<sup>28</sup> Diyakurdiya geni má ura cuducude \*tawraitá á Muusa, emnde buwa bi keye naranna an ice-aatare átire á maga duksa ŋanna wá, daaci tá já ba shifa-aara, tá zanvarka dekideki.

<sup>29</sup> Má bikere á edda una a cudu tawraitá á Muusa ni estuwa wá, náza á edda una a epsawaa \*Egdza á Dadaamiya antara Shedekwe Cudedde na á magaminá ŋane ŋgurna á daba Dadaamiya na, á tsaaka an una ŋanna. Adába edda-aara a zharaa uzhe á Egdza á Dadaamiya na ba seke duksa ba dey. Uzhe na ni Dadaamiya a ŋgudateraa namána an ŋane ge emnde bademme, ŋane keni a baranaa ba uzhe ŋanna tsa.

<sup>30</sup> A ba Dadaamiya á ba an ire-aara wá:

Diyandiya ya zladá na ni yá de faara ya ge edda una má kwalevkwale ge dábídaba na. Yá de pelatersepele mandzawire na tá maganá itare bademme.

Diyamiyeddiye ganakini má Dadaamiya ndasendahe elva-aara wá, sey á ganvege. Zlabe adaliye, aŋkwa an puwa am wakita á Dadaamiya, a ba ŋane: Ba Yaakadada una á de maga shairiya á emnde-aara.

<sup>31</sup> Dadaamiya wá, ŋane edda á shifa. Daaci watse laruwa ge edda una ni má de ŋanaaŋa shairiya á katafke-aara.

<sup>32</sup> Yehanteyeha midalire na kwa maganaa kure werre am sarte na lyakurvalya Yaisu. Kwakya zladá na ndza kwa shanaa kure áza emnde, aley kwa naba bashuhe.

<sup>33</sup> Adába am sarte umele, ta zlazlakurzlázle emnde á katafke á zlamaha, magarakuránmaga laruwa kwakya. Am sarte umele zlabe adaliye, kure shakuransha ire á kure, kwa de ekhyateraa ervaunde ge emnde na tá am jeba á zladá-aha ŋanna.

<sup>34</sup> Kwa de zatervaare ge emnde na tá am dangay adába zhera á Yaisu. Am sarte umele ta naba lyevaa nalmane á kure emnde an ndzedá, aley kwa naba yateranhe á ba an higa, adába diyakurdiya ganakini kure shakuransha una ni jauje ge nalmane-aha umele bademme, nalmane na a zleka dekideki na.

<sup>35</sup> Fakurantaufe fetarfire á kure shagera, daaci yawánka. Naba fautarfe áte Dadaamiya. Adába edda una má kezlanveka fetarfire-aara, á de shá ladá yaikke áza Dadaamiya.

<sup>36</sup> Estuwa, shagera ba kwá farvaunde, kwá maga názena á kataná ŋane, lauktu á de vakurte duksa na a ndanaa ŋane na.

<sup>37</sup> Adába a ba wakita á Dadaamiya:

A juwa ba cekwaanġudí, aŋkwa á sawa edda una ni mí pakaná miya na, á shekwaaka mazla-aara.

<sup>38</sup> Edda una dzayye ervaunde-aara, á de shá shifa na á zleka na, má kezlanveka fetarfire-aara áte iya dem halavuwa-aara. Amá edda una kezlanvekezle fetarfire-aara wá, yá de higarka ge ṅane.

<sup>39</sup> Amá miya wá, tamanka ganakini mí de geva am dagave á emnde na tá anṅwa eptsá á dem kataliye am fetarfire-aatare, tá átira keḍa na. Miya wá, anṅwa fetarfe á miya áte Dadaamiya, daaci mí shansha shifa na á zleka na.

## 11

### *Fetarfire á emnde á Dadaamiya werre*

<sup>1</sup> Fetarfire na wá, amaana njeta áte duksa na á tamaná ura, geni duksa ṅanna á de gevge ba jirire na. Ma á nánka duksa ṅanna an ice-aara keni, diyaadiya geni baaka shaige am huḍe-aara.

<sup>2</sup> Emnde á Dadaamiya werre keni ndza ta fetaare ba estuwa áte ṅane. Adaba una ṅanna ndza hayaterhaya Dadaamiya.

<sup>3</sup> An fetarfire á miya mi diyeddiye geni duksa baḍemme wá, ndza a nderanaa ba Dadaamiya an elva-aara. Daaci baḍemme á názu anṅwa á zharaná ice á ura na wá, a nderanaa ba Dadaamiya an názu á taa nánka ura.

<sup>4</sup> An fetarfire ṅanna, Habila a vante sadake á nasherire-aara ge Dadaamiya jauje ge una a vantaa Kayinu. Adaba fetarfire-aara wá, Dadaamiya a naba vante jirire. Dadaamiya lyevaalya sadake-aara, a naba maranánhe ganakini hayanhayire. Daaci Habila ṅanna wá, ma emtsamtsa ba ṅane keni, labare-aara á eksa ba slera sem vatená, adaba fetarfire-aara.

<sup>5</sup> Á ba an fetarfire ṅanna, Anuhu ndza nánka emtsa ḍekideki, a naba kapte á dem samaya an vuwa-aara baḍemme, puwarteka ice áte ṅane ḍekideki, adaba danda Dadaamiya ba estuwa. A ba wakita á Dadaamiya wá, Dadaamiya ndza hayanhaya Anuhu ṅanna, daaci a naba eksante ba estuwa.

<sup>6</sup> Baaka duksa na ni ura á shá haya an ṅane áza Dadaamiya sey á ba an fetarfire palle. Ma ware una á seza Dadaamiya keni, sey á fetarfe geni Dadaamiya wá, anṅwa ba jirire. Sey á diyeddiye geni Dadaamiya á yaterka emnde na ni tá anṅwa ganáptega ge ṅane.

<sup>7</sup> Á ba an fetarfire ṅanna \*Nuhu keni ndza a fansarfe ge Dadaamiya. Dadaamiya a balanse elva-aara am wahayu, zlaḍe nánka tsa duksa ṅanna emtsaade, amá a naba fansarhe. A naba nderaa paare á yawe yaikke áte una a kwaransaa Dadaamiya am wahayu na. Daaci ta demhe antara emnde-aara baḍemme. A lyaterse estuwa Dadaamiya am yawe na ndza a balansaa ṅane. Adaba una ṅanna a naba marateranhe ge emnde geni ṅateraana shairiya, adaba fartarka áte Dadaamiya. Amá ṅane wá, shansha jirire áza Dadaamiya adaba fetarfire-aara.

<sup>8</sup> Á ba an fetarfire ṅanna zlaḍe adaliye, ndza fansarfe Ibrahimima ge Dadaamiya. A naba duhe á dem larde na a bannaa Dadaamiya ge de nja amkwa, á de gev náza-aara larde ṅanna. Ba tate ṅanna keni ndza diyaaka emtsaade Ibrahimima, aley a naba duhe.

<sup>9</sup> An fetarfire-aara a naba nja am larde ṅanna ndza a fannaa Dadaamiya ge ṅane am namana-aara. Ma gevka ekse-aara miyenne keni, a naba nja áhuwa. Ndza a nja á ba am \*bere á kacakaca ba estuwa, lauktu ta melsaa tara Isiyaaku antara Yakubu larde á namána ṅanna, itare keni ta nja á ba am bere á kacakaca ba estuwa.

<sup>10</sup> Ibrahimia a fansaare estuwa ge Dadaamiya na wá, adaba njantenja am ervaunde-aara ganakini watse á daada á dem berni na a nderanaa Dadaamiya am samaya, baaka badza-aara deki deki na.

<sup>11</sup> Saraatu keni ba estuwa. An fetarfire-aara a naba shaa huɗe, gevge emgyegwe á mukse tsa. Adaba diyaadiya geni Dadaamiya na a banaa watse á de vanta egdzere na, á iceka fida deki deki.

<sup>12</sup> Adaba una nanna, ba Ibrahimia palle, nane una ndza gevge emgyegwe á zhele kurcumme, ndza baaka elva a ya egdzere ázenara mazla-aara, ba nane nanna wá, a naba yehe egdzere baaka kezlakula á eggye-aha-nara, ta ba seke shiili na am guwa na, ta ba seke terlyakwa na áte samaya.

<sup>13</sup> Emnde á Ibrahimia nanna ta matsaa ba estuwa, yáranka fetarfire-aatare deki deki. Amá itare an ire-aatare wá, pakarvaaka duksa-aha nanna ndza a baterna Dadaamiya na. Duksa palle wá, ndza njarantenja am ervaunde-aatare geni baaka shaige áte názu a ndasaa Dadaamiya. Daaci ta higa jipu áte duksa-aha nanna. Baira ndza ta enndáhá ba parakke geni itare ta ba seke wayve-aha am duniya na, tate á nja-aatare miyenne wá, áhuna ka.

<sup>14</sup> Emnde nanna, am nja-aatare wá, shebarka deki deki ganakini anƙwa larde-aatare ba giraara watse tá zláá á de njá am huɗe-aara.

<sup>15</sup> Dzamarka deki deki áte ekse-aatare na ndza ta segashe am huɗe-aara na. Ma andze tá kátá tate na ndza ta sawa átekwa wá, sey ma tá shantaushe ge barama á eptsa á dehuwa.

<sup>16</sup> Amá dzamarka itare una nanna deki deki. Itare wá, anƙwa tate umele am ire-aatare, amaana: samaya. Una nanna jauje ge tate na ndza ta sawa átekwa na. Adaba fetarfire-aatare nanna wá, á wanka shaige deki deki ge Dadaamiya geni tá dáhá nane an Dadaamiya á emnde nanna, a tsatsateraa berni yaikke ázenara.

<sup>17-18</sup> Á ba an fetarfire nanna zlaɓe ádaliye, Ibrahimia á kátá icaná egdza-aara palle ba nane sadake-aara ge Dadaamiya. A ba Dadaamiya á elvan ge nane: Iciyantice egdza á na Isiyaaku sadake-aara. An elva-aara nanna wá, a se gya ba hala á Ibrahimia, adaba ndza a bantsa ba nane am namána-aara geni eggye-aha á na, wulfe á Isiyaaku, tá de gevge kwakya.

<sup>19</sup> Ibrahimia á kátá icetaa egdza-aara na wá, adaba diyaadiya geni Dadaamiya an hákuma á shifeta emnde a faya. Am sarte na Dadaamiya a naba piyante ge Ibrahimia na wá, Isiyaaku wá, ba seke a tsete am faya.

<sup>20</sup> An fetarfire, Isiyaaku a gaterar barka ge tara Yakubu antara Isuwa. Am gá barka-aara nanna wá, a bateraa názu á de magava á katafke.

<sup>21</sup> An fetarfire nanna, Yakubu keni am sarte na gevge emgyegwe a juwa ba emtsa, a naba gaterar barka ge egdzara á Yusufa buwa. A tsetehe áte zade-aara, a galante Dadaamiya.

<sup>22</sup> Á ba an fetarfire nanna, Yusufa keni am sarte na gevge emgyegwe a juwa ba emtsa, ndza a enndaha elva á segashe á emnde-aatare, egdzara á \*Iserayiila am larde á Misera. Ndza a kwaratersekware bademme náza na ni watse tá maganá an hyehye-aara má emtsamtsa nane.

<sup>23</sup> Tara eddenjara antara emmenjara ge Muusa keni ba estuwa. An fetarfire-aatare am sarte na yaireye Muusa, naránna geni zariya egdza-aatare, daaci magarka lyawa deki deki ge ya elva na a tsanaa sleksu \*Firawna. Ta naba shebanvehe am mba dem tere keye.

<sup>24</sup> Adaba fetarfire nanna, am sarte na waltewala Muusa, eksarka mazla-aara geni tá dahaná an eggyenara ge sleksu \*Firawna.

<sup>25</sup> Ɗane a hayaa ba tá shá zlaḍa átirpalle antara emnde á Dadaamiya, arge una ni á njá am geḍa am sarte cekwaangudi, amá slehaypa.

<sup>26</sup> Ndza diyaadiya geni ambane ba sha epsawa áza emnde adaba Almasihu na watse á belaná Dadaamiya á sem duniya na, arge una ni á zuze duniya an nalmane na an ndaaka am larde á Misera na. Adaba ɗane a fete ire-aara áte laḍa na á de vantá Dadaamiya na.

<sup>27</sup> Adaba fetarfire-aara ndza sessa Muusa am larde á Misera. Slekse á Misera jaaja ervaunde, amá ɗane magaaka lyawa-aara ɗekiɗeki. Baaka lambe-aara ba seke ɗane aṅkwa á nanna Dadaamiya an ice-aara.

<sup>28</sup> Ba Muusa ɗanna zlaɓe ádaliye, adaba fetarfire-aara, a kwaraterse ge emnde a \*Iserayiila geni a wecarweca uzhe á dabba áte wakiya-aha-aatare, geni malika na a se ceɓa makaji-aha na a demka á dem mba-aatare. Daaci Muusa a tsa muṅri á una ɗanna tá aṅkwa emmága ba kelaa sakanderi. Tá ɗáhá muṅri ɗanna: \*Paska.

<sup>29</sup> Á ba an fetarfire ɗanna zlaɓe ádaliye, emnde a \*Iserayiila ebzarubze haye kyaṅɗe áte shiili cakasse ba seke ndza baaka yawe am guwa yaikke ɗanna, amá ba ta demhe ge emnde a Misera wá, a naba ndateruhe ge haye.

<sup>30</sup> An fetarfire-aatare, ndza zazaraazaza emnde a Iserayiila dala yaikke na emnde a Yairikau ta jantaave ge ekse-aatare an ɗane. Ba kelaazare wá, ta de jantaave ser palle áte una ndza a kwaratersaa Dadaamiya. Am hare ge vuyire wá, zazaazaze dala yaikke ɗanna baɗemme.

<sup>31</sup> Ndza aṅkwa mukse zaware umele, zhera-aara Rahab. Adaba fetarfire-aara áte Dadaamiya, a naba lyevaa emnde a Iserayiila na ta se gya nasherire á ekse-aatare á dem mba-aara. Daaci am sarte na emnde a Iserayiila ta ceɓaa emnde a ekse na wá, ta yaa ɗane an shifa.

<sup>32</sup> Yá maganá estara kina? Adaba cekwa sarte ganakini yá palakurnaa-pala labare á fetarfire á emnde á Dadaamiya umele, seke tara Gidiyaun, Barak, Samsaun, Yaifta, \*Dawuda, Samiyail, ira nabi-aha umele.

<sup>33</sup> An fetarfire-aatare emnde ɗanna ndza garega ndzeḍa arge larde-aha umele. Baɗemme á názena ndza a baterna Dadaamiya am namána-aara sharánsha an fetarfire-aatare, dzalarefka áte unṅule-aara. Emnde á Dadaamiya werre ɗanna wá, ba ervare keni dzegwánka wera we-aara ge magatera emtaṅkire.

<sup>34</sup> Adaba fetarfire-aatare, ba derve á kára keni zaterka emnde ɗanna. Zlaɓe ádaliye, ndza tá kátá cebaterceɓa kelaade-aha-aatare an katsakar keni, ta ganaa ba itare ndzeḍa. Ndza baaka payḍa-aatare, amá an fetarfire-aatare wá, ndza ta emnde a ndzeḍa ba itare. Mbarmbe wáva jipu, ma vaatara keni sey tá bakáterá ba itare emnde a wáva á larde-aha umele.

<sup>35</sup> Á ba an fetarfire ɗanna zlaɓe ádaliye, ndza aṅkwa ɗwasha umele emtsaremtsa emnde-aha-aatare, amá naraterna zlaɓe ádaliye an shifa.

Amá emnde umele-aatare ndza naranna zlaḍa kwakya. Ma andze baránba ganakini tá dalika á ɗaba elva á Dadaamiya wá, ma tá naba yáteryá, amá eksaraareka una ɗekiɗeki, ta eksese ba emtsa am zlaḍa ɗanna, lauktu á de tsatertetsa Dadaamiya, á de vaterte shifa na jauje ge una am duniya an emtakire na.

<sup>36</sup> Emnde umele keni naránna laruwa ba estuwa, ta epsawateraahe, ta gyegaterse an ja, ta puwateremhe am kadcerci, ta zlaṅateruhe am dangay.

<sup>37</sup> Emnde umele ndza ta ceɓaa ba shifa-aatare an nakwa, emnde umele ndza ta ɗatsaterthe bubuwa, emnde umele ndza ta cebateraa an katsakar, emnde umele keni ndza ta zaɗateremhe am sleɗe ba

estuwa, garevge talaga-aha, ta ṅgudfaa ba gwagwa, sharaterushe wahala, magarateránmaga palasa jipu.

<sup>38</sup> Ta naba nja áte bala-aha umele am kaamba, antara áte ire á wa-aha, ta hare am hwalakwa-aha antara am evege-aha. Emnde ṅanna wá, baaka arge itare an jirire. Zlaya-aatareka ḑekideki nja am duniya á laakire na.

<sup>39</sup> Emnde ṅanna baḑemme wá, hayaterháya Dadaamiya, aḑaba fetarfire-aatare áte ṅane. Amá wá, pakarvaaka an shifa am duniya na názena ni a baternaa Dadaamiya geni á de vaterteva na.

<sup>40</sup> Aḑaba uwe? Áza Dadaamiya wá, ndza an tsatse duksa ṅanna zlauzle, geni á geramika antara itare ḑekideki, mí de Iyiyaná á ba átirpalle antara itare cudeḑfire na á de vamita ṅane. Una ṅanna duksa na shagera ge miya.

## 12

### *Dadaamiya Eddemiya baḑemme*

<sup>1</sup> Daaci miya wá, emnde a fetarfe ṅanna ba seke tá jamitaave á ba an je. An fetarfire-aatare ṅanna, tá kwaramisá itare fetarfire áte Dadaamiya. Aḑaba una ṅanna, miya keni yaumiyanya haypa-aha na wayaaka mi pakyava ḑekideki na, valyawamiyaavalya gwatama na a piyamite de katafke áte barama á Dadaamiya na baḑemme, mí zlalawa á ba de katafke, kuḑaumika.

<sup>2</sup> Zlaḑe ádaliye, zharaumizhara ba sera á Yaisu, aḑaba a magaminaa ba ṅane ṅurna geni mí fetarfe, á de zlamiyansauwa ba ṅane zlaḑe ádaliye ge fetarfire á miya ṅanna. Yaisu ṅane a naba eksaarhe geni ta ja shifa-aara áte dzangala, wanka zherwe ḑekideki ge emtsa estuwa, aḑaba a fete ire-aara áte higa na á de vantá Dadaamiya na. Kina wá, ṅane aṅkwa am naḑafa á Dadaamiya am sleksire-aara.

<sup>3</sup> Dzamaumidzámá ba shagera emtaṅkire na ni ta maganta emnde a haypa ge Yaisu na. Nja ba zlaḑa na ta magannaa emnde ṅanna, a naba bashuhe baḑemme. Slaslauslasle á ba áte náza-aara emtsaḑe, lauktu mí de shá ndzeḑa am zlaḑa-aha á miya keni.

<sup>4</sup> Ge jirire wá, ekkure keni kwá aṅkwa wava jipu geni kwá janaaja haypa. Amá wá, zlaḑe jerka edda una ni emtsamtsá aḑaba una ṅanna am dagave á kure. Daaci gazlauka ḑekideki.

<sup>5</sup> Viyakurnaaviya elva na ndza a bakurnaa Dadaamiya ge vakurte ndzeḑa an ṅane na emtu? Nawa a ḑakurte an egdzara-aara. Aḑaba aṅkwa am wakita á Dadaamiya, á ba ṅane:

Egdza-aaruwa, má ya Yaakadada Dadaamiya, yá aṅkwa giyakgiya wá, sey ká fa hyema áte elva ṅanna. Ma yá valakarvale keni, á guleka higa á ṅa áte iya.

<sup>6</sup> Aḑaba iya Yaakadada wá, yá giya edda una ni wayanwaya na, yá ja ba edda una ni gevge egdza-aaruwa na, a bina.

<sup>7</sup> Aṅkwa egdzere ni á giyeka eddeṅara ḑekideki emtu? Daaci áte zlaḑa ṅanna wá, kwá naba diyeddiye geni á dzerakursaa ba Dadaamiya, kwa ba seke egdzara-aara. Má estuwa wá, bashawabasha baḑemme á zlaḑa-aha na shakursha na, lauktu kwá de shansha nampire-aara.

<sup>8</sup> Á giyatera ba estuwa Dadaamiya egdzara-aara. Daaci máki á giyakurka kure wá, kwa egdzara-aareka ḑekideki, kwá ba seke masagwa-aha am emnde-aara.

<sup>9</sup> Zlaḑe ádaliye, dada-aha a miya am duniya keni ndza ta giyamigiya, ndza mí fa zherwe áte itare. Daaci faumifa zherwe áte Eddemiya na am



samaya na keni. Má má aṅkwa fa zherwe áte ṅane wá, mí de shá shifa na á zleka na.

<sup>10</sup> Dada-aha a miya na ta yamiya am duniya na wá, ndza ta giyamiya á ba am sarte na mi egdzara mesheshe, ba seke una ta beranaa itare ge shagerire. Amá Eddemiya na am samaya na wá, ṅane á giyamigiya geni á famiyem ndzedá am vuwa, lauktu mí gevge emnde cufedde ba seke ṅane.

<sup>11</sup> Má Dadaamiya aṅkwa giya ura wá, vacite ṅanna wá, zladá áte edda-aara, baaka higa-aara defekideki. Amá má zlauzle zladá ṅanna wá, edda una má diyeddiye nampire á zladá ṅanna wá, á shá hairire antara zlalava shagera áte unṅule á Dadaamiya.

### *Faufa hyema áte ire á kure*

<sup>12</sup> Diyakurdiya tsawe ganakini Dadaamiya á yanka giya egdzara-aara wá, daaci a guleka higa á kure, naba daumbare á de katafke áte unṅule-aara.

<sup>13</sup> Tá aṅkwa emnde umele am dagave á kure, ta ba seke emnde a dere, cekwa ndzedá-aatare áte unṅule á Dadaamiya. Daaci dabaudfaba unṅule na shagera na, geni a dzalarevka áte unṅule ṅanna, amá a sharansha ndzedá átekwa.

<sup>14</sup> Tatayautataya nja lapiya antara emnde bademme. Tatayautataya an ervaunde á kure palle, geni kwá gevge emnde cufedde áza Dadaamiya. Adaba má baaka una ṅanna wá, ma ware edda-aara keni á taa daaka á deza Dadaamiya.

<sup>15</sup> Faufa hyema áte ire á kure, geni ma ware á kure keni a yanaaka ṅgurna á Dadaamiya. Adaliye, faufa hyema geni a jerka ura am dagave á kure ni mándzawe zlalava-aara. Ura estuwa á melateruka ge emnde áte barama á Dadaamiya, baira á badzaterbádza ba seke namgena am dagave á hiya am fe.

<sup>16</sup> Zlabe adaliye, faufa hyema áte ire á kure, geni a jerka ura ṅudfi am dagave á kure, á feka zherwe áte názena a wayanantaa Dadaamiya, ba seke Isuwa werre. ṅane wá, a naba velu makajiyire-aara ira warita á makajiyire bademme adaba zu duksa ser palle.

<sup>17</sup> Ba ekkure keni diyakurdiya geni, am sarte na zlauzle veluvele wá, a deza eddenara ágira a de kátá barka, amá a naba kwaleve ge eddenara gar barka ṅanna. Baaka názu magaaka ṅane, antara yawe á kyuwa-aara campaukkwe átekwa, aley shanka pute geni á tsatsanaatsatse názena a badzanvaa ṅane.

<sup>18</sup> Diyaweddiye geni tate á tse á kure ge kure á katafke á Dadaamiya wá, gevka seke náza á \*Iserayiila-aha werre áte vuwa á wa Sina. Itare wá, ma tá naba dzegwandzegwa fetefa ba erva-aatare keni áte wa ṅanna. Ndza naranna nara á kára yaikke áte ire á wa ṅanna, ndza naránna tabedammire antara gwehya, ira válale yaikke.

<sup>19</sup> Zlabe adaliye, ndza cenarácena hula á duksa ba seke gaashi áte wa ṅanna, cenarácena kwára umele, kwára ṅanna wá, ba kwára á Dadaamiya. Am sarte na cenarácena kwára ṅanna wá, gazlargazla jipu, baira ta yeka ganakini a semka kwára ṅanna mazla-aara á sem hyema-aatare.

<sup>20</sup> Adaba edda-aara a se balaterse elva na zlazladá áte itare. A ba ṅane, ma ware keni a feka erva-aara áte wa ṅanna. Una ma ba dabba keni sey tá jana á ba an nakwa, a zlauzle shifa-aara ba estuwa.

<sup>21</sup> Duksa-aha ṅanna ta naaná itare na wá, gazlateraagazla jipu. Ba Muusa an ire-aara keni a ba ṅane: Gazlangazla, yá gyagye ba seke maagara ge lyawa, a bina.

<sup>22</sup> Amá ekkure wá, estuweka. Ekkure kwa sete wa na tá d'ahaná an wa \*Siyauna, am tate na átekwa berni á Dadaamiya Saksage. Berni ṅanna wá, ba Urusaliima na am samaya na. Kwa sem tate na ta átekwa malika-aha baḍemme baaka kezlakula-aatare na.

<sup>23</sup> Adaliye, ekkure, aṅkwa sleḍe á kure am dagave á nalga á emnde na tá am geḍa yaikke átevege Dadaamiya na. Emnde ṅanna ta ba seke makaji-aha átevege eddetare, zhera-aha-aatare baḍemme aṅkwa an puwa áza Dadaamiya am samaya. Ekkure wá, kwa seza Dadaamiya na á de kyaná ṅane shairiya á emnde baḍemme na. Ekkure d'abakurteḍaba emnde na tá aṅkwa áza Dadaamiya, a gatervaa ṅane cuḍeḍe am duksa baḍemme na.

<sup>24</sup> Ekkure, dakuraada á deza Yaisu. Ba ṅane una slemela emnde antara Dadaamiya, geni Dadaamiya á maga namána aṅwaslire antara itare. Ekkure, dakuraada á deza Yaisu na, ṅane a gakurve cuḍeḍe an uzhe-aara na. Uzhe-aara ṅanna wá, aṅkwa á kwaramise duksa shagera gergere antara una mi tsahese áte uzhe á Habila.

<sup>25</sup> Daaci faufa hyema ba shagera áte ire á kure, eblyawanveka elva á edda una aṅkwa á bakurá elva na. Werre wá, baḍemme á emnde na ndza ta kwaleve elva á edda una ni á fater magiya an elva á Dadaamiya am duniya wá, eṅzarseka ḍekideki. Ge miya emnde na má aṅkwa cena elva á Yaisu na a sawa am samaya na keni, watse ba estuwa. Amaana, má kwalamiyevkwale, watse baaka pute á miya umele geni mí eṅzlesenjle an ṅane.

<sup>26</sup> Ndza werre ṅanna wá, Dadaamiya a ndaase ba elva an kwara yaikke, daaci a naba gejaavte ge haha á ba an ndzeḍa. Kina keni elva-aara aṅkwa á bamiyánba geni watse á de emmága zlaḍe ádaliye ba estuwa. Amá antara ba samaya keni á de gejaava á ba an ndzeḍa, a bina.

<sup>27</sup> A ba ṅane, buwaaka ḍekideki wá, baḍemme á názena a nderanaa ṅane, á de gejaava zlaḍe ádaliye á ba an ndzeḍa, lauktu tá de zlauzle ba estuwa. Daaci tá de juwa ba duksa-aha na baaka halavuwa-aatare ge itare ḍekideki na.

<sup>28</sup> Máki estuwa wá, miya wá, slafauminaaslafe ba we á miya ge Dadaamiya an ervaunḍe á miya palle. Aḍaba ṅane a famiyaa yaikkire na baaka halavuwa-aara ḍekideki na ge miya. Galaumigálá Dadaamiya, njauminja á katafke-aara an fesarfire am elva-aara, njauminja an lyawa-aara am ervaunḍe áte una á kataná ṅane.

<sup>29</sup> Aḍaba Dadaamiya na mí yeka ázeṅara na wá, ṅane slera-aara ba seke slera á kára. Amaana, ṅane á shekwaaka keḍanaakeda názena hayánka ṅane.

## 13

### *Á kátá uwe Dadaamiya áza emnde?*

<sup>1</sup> Ekkure emnde a fetarfe wá, yawánka mága wayavire am dagave á kure, njawinja ba seke egdzar mama.

<sup>2</sup> A viyakurarka elva á lyiya wayve-aha na tá se tsekwa am mba á kure. Fawaterufe hyema ba shagera, aḍaba ndza aṅkwa emnde umele ta lyevaa wayve-aha-aatare, faraterufe hyema ba shagera, mbate wá, wayve-aha ṅanna malika-aha.

<sup>3</sup> Emnde na tá am daṅgay na keni dzamauterdzámá, zlaḍa-aatare ṅanna a gevge ba seke áte kure. Adaliye emnde na tá am zlaḍa-aha umele na keni, dzamauterdzámá ba seke kwa kerḍe antara itare am zlaḍa ṅanna.

<sup>4</sup> Emnde baḍemme a faransarfe ge Dadaamiya am elva á nika. Am dagave á tara zhele an mukse-aara, ma ware-aatare keni a badzanveka

cudɛdɛfire á nika-aatare. Adaba Dadaamiya á de yanka záterá an shairiya, bademme á emnde a mága dakarire antara emnde a mága gwardzire.

<sup>5</sup> Yawanánka ervaunɛde á kure ba ge waya shunḡu, naba higauhiga arge una anḡwa am erva á kure, adaba a ba Dadaamiya: Yá anḡwa antara ekka, ma vaatara keni, yá yanḡa dey.

<sup>6</sup> Adaba una ḡanna, bawamiyánba ganakini Yaakadada, Dadaamiya-aaruwa anḡwa am iga-aaruwa, baaka lyawa-aaruwa, á magiya uwe urimagwe? Baaka shaige-aaruwa dɛkideki.

<sup>7</sup> Yehauteyeha male-aha á kure na ndza ta balakursaa itare elva á Dadaamiya na. Yehauteyeha zlalava-aatare, antara fetarfire-aatare áte Dadaamiya dem halavuwa á shifa-aatare am duniya. Daaci ekkure keni fautarfe áte Dadaamiya ba seke itare.

<sup>8</sup> Yaisu \*Almasiihu wá, werre keni ndza ba ḡane, vatená keni ba ḡane ḡanna, ḡane á njá á ba áte una ḡanna dem ba ge dɛkideki.

<sup>9</sup> Faufa hyema áte ire á kure, adaba tá anḡwa emnde na tá anḡwa jansaare ba itare an ire-aatare tsaha-aha umele gergere, ndza cenaránka emnde dɛkideki. Enkalaawa, geni a kedarakuraaka áte baráma. Adaba a ba itare: sey má ura dabetedaba naɛ-aha áte elva a náza za bademme, lauktu á zlava ervaunɛde-aara. Cenauka una ḡanna dɛkideki. Sey an ḡgurna á Dadaamiya palle. Bademme á emnde na ndza ta dabete jeba á naɛ-aha ḡanna, palle á názu ta shanaa itare ge nampire baaka.

<sup>10</sup> Bademme á \*liman-aha á Yahudiya-aha na kwasau zlaɛe tá faná ba sadake ge Dadaamiya am mashidi-aatare na wá, diyamidiya ganakini una mi shanaa miya áza Dadaamiya na, amaana emtsa á Yaisu na wá, náza-aatare ka, adaba itare zlaɛe diyarka nampire-aara.

<sup>11</sup> Male á liman-aha, má á daná sadake ge Dadaamiya adaba haypa á larde wá, tá ica dabba, á daná uzhe-aara á dem tate na cudɛdɛ jipu na. Hyuwa á dabba ḡanna maa, tá de deraná áte iga a ekse-aatare.

<sup>12</sup> Náza á Yaisu keni ndza a mágava ba estuwa. Ta de jaa shifa-aara á ba áte iga a ekse ḡanna, a shu zladá áhuwa, geni á baraterá haypa-aha-aatare ge emnde bademme an uzhe á ire-aara.

<sup>13</sup> Daaci máki estuwa wá, baaka nampire á jeba á nadina ḡanna mazla-aara. Saumisse, mi zlaláwa á deza Yaisu, mí de bshán ba kerɛe epsawa á emnde.

<sup>14</sup> Adaba baaka ekse na mí njá am huɛe-aara dem ba ge dɛkideki am duniya na. Amá mí fete ire á miya áte ekse umele anḡwa, mí de njá amkwa dem ba ge dɛkideki.

<sup>15</sup> Daaci galaumigala Dadaamiya, yawamiyanka. Má mí gálá Dadaamiya ḡanna wá, una ḡanna ba seke sadake á miya na mí vante ge ḡane adaba slera á Yaisu. Galaumigala zhera á Dadaamiya ge maraterá zhera-aara ge emnde bademme.

<sup>16</sup> Viyawanaaka magatera maggwire ge emnde. Magaumága zevarzire an duksa na am erva á kure, adaba jeba á sadake ḡanna á vante higa kwakya ge Dadaamiya.

<sup>17</sup> Cenaucena názena tá bakurná male-aha á kure, fawatersarfe ba shagera, adaba tá ufaná ba itare shifa á kure, Dadaamiya keni á de ndavateru ba ge itare slera na ta maganaa itare ge fakuru hyema. Daaci má ekkure keni kwá anḡwa fathersarfe wá, tá maga slera ḡanna á ba an higa. Má baaka una wá, tá higeka am slera ḡanna. Má gulaagula higa-aatare wá, slera-aatare á magakuránka payɛa ge kure.

<sup>18</sup> Yawánka ɲala Dadaamiya arge ɲere. ɲere wá, diyaɲerdiya ba parakke geni dzayye ervaunɗe á ɲere, wayaɲerwaya ɲá maga duksa baɗemme á ba an unɲule-aara ma vaatara keni.

<sup>19</sup> Duksa na yá kataná iya ázekure kwakya-aara wá, ɲalaunálá Dadaamiya geni a meliyumele, lauktu yá shansha baráma á eptsa á dezekure á ba áte watsewatsire.

*Názena yá yekaná iya áza Dadaamiya*

<sup>20</sup> Dadaamiya slevante hairire ge emnde, a tsantaa ba ɲane suni á miya yaikke am faya, amaana Yaakadada Yaisu. ɲane suni á miya á bá iya na wá, aɗaba ɲane a emtsehe aɗaba miya. Miya wá, mi ba seke kyawe-aha-aara. An uzhe-aara, Dadaamiya a ɲgudamiyaa namána na á zleka ɗekidɗeki na.

<sup>21</sup> Daaci a melakurumele Dadaamiya, geni kwá shansha mága názena á kataná ɲane baɗemme. A ganvega Dadaamiya namaari-aara am miya áte erva an Yaisu \*Almasiihu, geni mí gevge áte una á kataná ɲane. Galaumigala Yaisu Almasiihu dem ba ge ɗekidɗeki. \*Aamin.

*Ga use am halavuwa á elva-aha*

<sup>22</sup> Egdzar mama-aha-aaruwa, kwaya ɲane egdza elva na ya puwkurtaa ya, geni yá vakurta ndzedá an ɲane. Elva ɲanna kwakyeka, daaci yá aɲkwa ɲalakurɲala, taslawá á kure, faufa ervaunɗe, cenauvaacena elva ɲanna ba shagera.

<sup>23</sup> Ambane zlaɓe cenakuránka ɗeme ganakini egdza emmemiya Timaute keni ta bantsa ɓelaranaabela, sesse am ɗaɲgay. Má samsa á sezeruwa wá, watse á puwisá ɲane ádeze kure.

<sup>24</sup> Gawaterga use-aaruwa ge male-aha á kure, antara emnde a fetarfe umele baɗemme. Emnde a fetarfe na tá am larde á Italiya keni tá aɲkwa gakur use-aatare.

<sup>25</sup> A magakuránmaga Dadaamiya ɲurna ge kure baɗemmire á kure.

## Wakita na a puwetaa YAKUBA

### *Ga use á Yakuba*

<sup>1</sup> Wakita na yá anƙwa puwaná ba iya Yakuba, waladfi á Dadaamiya antara Yaakadada Yaisu \*Almasiihu, yá anƙwa á puwakurte wakita na, yá gakur use ge kure bademme á emnde a Dadaamiya na kyarakuraakya á dem duniya bademme na.

### *Njá á emnde a fetarfe má shatersha zladá*

<sup>2</sup> Egdzar mama-aha-aaruwa, ma a shakuraa am sarte-ara zladá keni, higauhiga an ervaunƙe á kure bademme.

<sup>3</sup> Adaba ba kure keni diyakurdiya, ganakini máki tsakuraatse dzaɗɗaɗe, kezlakuranveka fetarfire á kure am sarte ɗanna wá, kure kwá gevá emnde a farvaunƙe an tsáká ire.

<sup>4</sup> Amá tsawatse ba ɗga. A marápsmare farvaunƙe á kure am duksa bademme. Estuwa kwá de gevá emnde na baaka duksa mándzawe áte itare, hyairephye am duksa bademme. Á de ektsakurarka jirire keni am duksa bademme.

<sup>5</sup> Má anƙwa ura am dagave á kure diyaaka názena á maganá ɗane, a enndava enƙale áza Dadaamiya. Dadaamiya á de vanteva. Adaba Dadaamiya á kwalarka ge edda una á ndava enƙale ázenara, á vanteva ma vaatara keni. Adaba ɗane wá, bárbare ge vaterte duksa ge emnde bademme.

<sup>6</sup> Amá má ura á ndava duksa áza Dadaamiya wá, a fetarfe geni Dadaamiya á de vanteva. A maɗka shaige am ervaunƙe. Adaba edda una á maga shaige am ervaunƙe wá, ɗane ba seke njá á haye na á weshaná effeya, á dáná á dehuwa, á sehuna, á dem dalbe-aha bademme.

<sup>7</sup> Ura estuwa, a sleka am ervaunƙe-aara ganakini á de shansha názena á ndavaná ɗane áza Yaakadada.

<sup>8</sup> Adaba gevge an ire bubuwa, tsanaaka ire-aara am tate palle.

### *Elva arge berba-aha antara talage-aha*

<sup>9</sup> Ura talage, má fetarfe áte Yaisu \*Almasiihu wá, a ehiga an ervaunƙe-aara bademme. Adaba kanteka Dadaamiya.

<sup>10</sup> Ge sleberba na fetarfe áte Yaisu Almasiihu keni maa, ɗane keni a ehiga an ervaunƙe-aara bademme, arge una ni a genahe ge Dadaamiya na. Adaba diyaadiya ɗane ganakini á de zla shifa-aara, ba seke mága ugbene á mása am fe, má á geda, á geda á ba áte watsewatsire.

<sup>11</sup> Má mberatembera vaciya an kára-aara, á badza zariyire-aara, á geda á dem áhá, mása keni á emtsa bademme. Ba duksa palle ge sleberba keni. Á ba am sarte na ɗane á shunɗula ge mága slera-aha-aara na wá, a naba icanmica emtsa.

### *Elva a mbedá á dem haypa antara zladá*

<sup>12</sup> Watse gefa yaikke ge edda una tsaatse ba shagera am zladá-aha gergere. Adaba má tsaatse shagera mbedáaaka wá, á de shansha ladá-aara. Amaana: á de shá shifa na á zleka, a ba Dadaamiya, á de vaterte ge emnde na wayarwaya an ɗane na.



<sup>13</sup> Amá má á kátá mbedá edda-aara wá, a banka ni a maganaa ba Dadaamiya. Adaba ura á dzegwánka mbedá Dadaamiya. Dadaamiya keni á mbedeka ura dfekideki.

<sup>14</sup> Ba emtaŋkire na á dzamaná ura am ervaunđe-aara na wá, á mbedaná ba una ɲanna á dem haypa.

<sup>15</sup> Duksa shagerka na á dzamaná ura am ervaunđe-aara, am iga-aara cekwaanɗudí á maganá á ba áte parakkire. Daaci má waltewa haypa, á saná emtsa.

<sup>16</sup> Daaci a keɗarakuraaka emnde, egdzar mama-aha-aaruwa.

<sup>17</sup> Názena á sáwá áza Dadaamiya wá, baɗemme ba shagera, ɓaaka una laake am huɗe-aara. Baɗemme á názena á já lámbe á ura wá, á sáwá á ba áza Dadaamiya na a nderaa parakkire-aha am samaya na. Adaba Dadaamiya, ɲane a eptsaaवेका, á zláleka seke náza vaciya geni á yakurya am tabeɗammire.

<sup>18</sup> A wayetaa ba ervaunđe-aara ge vamite shifa na á zleka na, a vamite an elva-aara na elva a jirire na, geni mí gevge ma emnde zuɲɲwa ba miya am ice-aara am názena a nderanaa ɲane baɗemme.

### *Cenaucena elva á Dadaamiya, fawansaarfe*

<sup>19</sup> Egdzar mama-aha-aaruwa, faufa hyema ge cena názena yá bakurná ya na: Ma ware keni a eccena názena ni tá banna emnde. A gevka slewatsewatse am elva, a gevka slervaunđe.

<sup>20</sup> Adaba slervaunđe wá, á taa maganaaka názena á kataná Dadaamiya.

<sup>21</sup> Adaba una ɲanna, tara danɲwire antara mándzawire na am ervaunđe á kure na wá, yawanya baɗemme, gawanaaga ire á kure á katafke á Dadaamiya. Ma uwe keni magaumága á ba áte elva-aara na anƙwa am kure na, adaba elva-aara ɲanna wá, á dzegwándzegwa lyakurlya.

<sup>22</sup> Cenaucena elva á Dadaamiya, kwá ámbera maga názena á bakurná ɲane. Edda una ba a cenvaache an hyema, amá á maɲka názena á ndahaná Dadaamiya wá, á keɗa ba ire-aara.

<sup>23</sup> Edda una ba a cenvaache an hyema, amá á maɲka názena á ndahaná Dadaamiya na wá, ɲane á garáva an edda una á zhára ice am kweteram.

<sup>24</sup> Ba a zharaa wafke-aara, cekwaanɗudí am iga á una ɲanna wá, kertenj a viyanaaviya njá á wafke-aara.

<sup>25</sup> Amá edda una a cenaa shairiya á Dadaamiya, a maganaahe an unɲule-aara maa, Dadaamiya á gá barka áte ɲane am slera-aha-aara baɗemme. Adaba ɲane cenaaka shairiya á Dadaamiya á ba an hyema kertenj a viyanaahe na, amá a fansaarfe. Adaba shairiya á Dadaamiya ɲanna wá, ɓaaka duksa mándzawe am huɗe-aara. An hakuma jipu ge samise am haypa.

<sup>26</sup> Má ura á zhára ire-aara ganakini ɲane slenadina, amá á taa ɲanaaka nara-aara, daaci ɲane wá, á keɗá ire-aara, ɗaba nadina-aara ba dey.

<sup>27</sup> Daba nadina á jirire na cuɗeɗe, á kataná Eddemiya Dadaamiya wá, fanu hyema ge egdzar tahe-aha, antara wegyegwar ɲwasha na tá am laruwa, ira á mága enƙale áte ire-aara ba ge ɲane keni, geni a demka am slakwatsa na tá maganá emnde a duniya na.

## 2

### *Baɗemme á emnde ta ba kalkale áza Dadaamiya*

<sup>1</sup> Egdzar mama-aha-aaruwa, ekkure wá, fakurtaarfe áte Yaakadada Yaisu \*Almasiihu na ɓaaka seke ɲane an daradza na. Adaba una ɲanna, eggrauka emnde dfekideki.

<sup>2</sup> Ba seke má daremda emnde buwa á dem jahava á kure á katafke á Dadaamiya, palle-aatare sleberba am zane zariya, amá palle ñane talage am emgyegwe a zane,

<sup>3</sup> daaci kwá belanu ice ge zhel na am zane zariya na, kwá de yainu an use, kwá baná: Nawa njinja am kurshi na ambarkana; amá ge talage wá, kwá baná: Sawá njinja am áhá am sera-aaruwa áhuna.

<sup>4</sup> Má kwá maga una, magakurnaaka gergerire am dagave á emnde emtu? Kwa epsawaa palle, una ñanna kwa slanaa ba kure, amá sawari á kure ñanna shagerka.

<sup>5</sup> Egdzar mama-aha-aaruwa, cenaucena ba shagera. Diyakurka emtu geni Dadaamiya a dzerse talage-aha am duniya na, geni tá fetarfe áte Yaisu \*Almasiihu, ta gevge emnde a berba am ervaunđe-aatare? Ñane a dzeraterse geni tá shansha yaikkire na a ba ñane, á de vaterte ge emnde na wayarwáyá an ñane.

<sup>6</sup> Amá kure, kwá perdá talage-aha. Ábi ba emnde a berba una tá magakurá palasa, tá dakurá á de katafke á shairiya?

<sup>7</sup> Zlabe adaliye, ábi ba itare una tá zlazla zhera á Ura yaikke na kwá dabaná kure?

<sup>8</sup> Máki dabakurtedaba shairiya á Dadaamiya áte una an puwa am wakita-aara, a ba ñane: Ewwaya sleriya á ña ba seke ire á ña na wá, kwa magaa duksa shagera. Adaba shairiya-aara ñanna wá, baaka seke ñane.

<sup>9</sup> Amá má kwá maga gergerire am dagave á emnde wá, kwá mága haypa. Nakuraana Dadaamiya an shairiya. Adaba fakuransaarka ge shairiya-aara.

<sup>10</sup> Ma ura a dabete shairiya-aha á Dadaamiya bademme keni, máki a yaa palle, bademme á umele-aha na keni ba seke dabaaka.

<sup>11</sup> Adaba a ba Dadaamiya: Manka gwardzire. Ba Dadaamiya ñanna zlabe adaliye una a ba ñane: Jeka shifa. Daaci ma maganka ba gwardzire keni, máki ka de jaa shifa, ba fakansaarka ge shairiya-aara.

<sup>12</sup> Adaba una ñanna yá bakurá ba jirire: Bademme á názena kwá ndahaná kure, antara una kwá maganá kure, diyaweddiye ganakini Dadaamiya á de kya shairiya-aara bademme, á de zhára má fakuransaarfe ge shairiya-aara na a samisaa ñane am haypa na.

<sup>13</sup> Ma ware una á zanvaarka ge emnde, vaci shairiya wá, Dadaamiya á de zanvaarka ge ñane keni. Amá má á zanvarze ge emnde wá, ñane keni á de mbedeka vaci shairiya.

### *Mága slera á Yaisu a zlaláva an fetarfire áte ñane*

<sup>14</sup> Má banba edda-aara ganakini ñane fetarfe áte Dadaamiya, amá á manka názena á ndahaná Dadaamiya, ázara námpire-aara? Jeba á fetarfire ñanna á sanánka shifa na á zleka na.

<sup>15</sup> Ba seke má sámsá slefetarfe ásezekure, ma zhele ma mukse, má baaka kacekaca-aara, baaka náza za-aara,

<sup>16</sup> daaci kwá baná: Á jamima shifa, a vakteva Dadaamiya kacekaca antara dafa, amá ba uwe keni kwá vanteka, una ñanna ngulme ge uwe?

<sup>17</sup> Ba duksa palle ge fetarfire áte Dadaamiya. Má bánba edda-aara á daba Dadaamiya, amá á manka názena á ndahaná Dadaamiya, fetarfire-aara ba dey.

<sup>18</sup> Má bánba edda-aara ñane wá, á fetarfe, amá iya yá maga ba slera á maggwire wá, náwa názena yá banná ya: A ndindaha, á fetaare estara áte Dadaamiya, amá á manka slera á maggwire? Lauktu iya keni yá ndandáhá

slera á maggwire-aaruwa, á diyisediye ganakini ya ura á Dadaamiya á ba an jirire.

<sup>19</sup> Ábi diyakdiya ganakini baaka Dadaamiya umele, sey ba palle. Máki estuwa wá, shagera kwaye! Amá ba jini-aha keni diyardiya una nanna. Adaba una tá an lyawa-aara jipu.

<sup>20</sup> Amá ekka wá, degdege ire á ña! Wayanwáyá ka diyeddiye geni má ká d'aba Dadaamiya, amá ká mañka slera á maggwire wá, d'aba Dadaamiya á ña ba dey?

<sup>21</sup> Yehauteyeha eggyemiya Ibrahim. Nane a gev estara sledzayya ervaunđe á katafke á Dadaamiya? Ábi a gev sledzayya ervaunđe á katafke á Dadaamiya an slera na a maganaa nane, a eksevaa Isiyaaku egdzar a huđe-aara ba ge nane, á kátá icaná sadake-aara ge Dadaamiya.

<sup>22</sup> Ká anƙwa nanna emtu mazla-aara ganakini fetarfe Ibrahim, fetarfire-aara a z'áláwa á ba antara slera-aara nanna? Fetarfire-aara hyephye adaba slera-aara nanna.

<sup>23</sup> A maganaahe á ba áte una a ndahanaa wakita á Dadaamiya, a ba nane: Ibrahim a fetaare áte Dadaamiya. Adaba una nanna a gev sledzayya ervaunđe á katafke á Dadaamiya. Ibrahim a gev slakate á Dadaamiya.

<sup>24</sup> Daaci ká anƙwa nanna emtu mazla-aara ganakini ura á shá dzayyire á ervaunđe áza Dadaamiya an slera-aara, baaka ni ba a fetaare áte nane z'lauzle?

<sup>25</sup> Yehauteyeha z'lafe ádaliye zaware umele zhera-aara Rahab, nane keni a shán ba estuwa dzayyire á ervaunđe-aara. Am sarte na daremda emnde a \*Iserayiila á dem mba-aara, a kwaratersaa nane unñule geni tá enzlesenjle an nane. Adaba a magaa una nanna, a shaa dzayyire á ervaunđe áza Dadaamiya.

<sup>26</sup> Ba seke una ni má dedde shifa am ura, edda-aara á emtsa na wá, fetarfire keni ba estuwa. Má edda-aara á mañka slera á maggwire, baaka shifa am fetarfire-aara.

### 3

#### *Nara á urimagwe wá, ba kalkale antara kára*

<sup>1</sup> Ya ndaa ba kure egdzar mama-aha-aaruwa, tatayauka gev malum-aha bademme á kure, amá dzamaudzámá emtsaade. Adaba nere ña emnde a kwaraterse wakita á Dadaamiya ge emnde wá, shairiya á nere á de jauje ge náza á emnde.

<sup>2</sup> Bademmire á miya mí maga ba haypa am duksa bademme. Má ura maganaaka haypa am ndaha elva wá, edda-aara baaka slejirire arge nane. Nane á dzegwándzegwa n'á vuwa-aara am duksa bademme.

<sup>3</sup> Zharauzhára áte belsa, mí puwaterem lidza am mbuwe ge belsa-aha wá, geni a faramisaarfe. Ba jirire tá d'aba ba tate na mí kataná miya.

<sup>4</sup> Z'lafe ádaliye, zharauzhára áte paare á yawe. Paare á yawe wá, yaikke vayvaya. Amá náza ebbáká-aara wá, ba cekwaangudí. Una ma a tsetaa valale keni, slebaka paare nanna á tsanmaare á ba an nane.

<sup>5</sup> Ba duksa palle ge nara á urimagwe. Má ge jirire wá, nane ba egdza duksa cekwaangudí am mbuwe. Amá an hakuma jipu. Zharauzhára huđe á kaamba, antara baakire á zlakta-aara, amá á ñezlarka ge egdza nara á kára ba cekwaangudí.

<sup>6</sup> Nara á urimagwe keni ba kalkale antara kára. Adaba bademme á mandzawire na am huđe á duniya na anƙwa am nane. Nara wá, á badzámiya ba nane am n'á á miya bademme. Á mbáná ba nane kára

ge badza shifa á ura bademme. Kára ñanna keni tá an dzágwáva an kára á jahanama.

<sup>7</sup> Emnde tá dzegwándzegwa kwára duksa bademme. Tá dzegwándzegwa kwára dabba-aha, antara yiye-aha, antara bademme á názena á hulmba am haha, ira názu am yawe keni bademme.

<sup>8</sup> Amá tá taa kwaruka nara dekideki. Nara wá, mándzawe jipu, á njeka tsekadde dekideki. Kwakya wenye-aara á shekwaaka ja shifa.

<sup>9</sup> Ná gálá Eddemiya Dadaamiya an ñane, ñá zlazla emnde na a nderateraa ñane áte zati-aara keni á ba an nara ñanna zlafe.

<sup>10</sup> Ba ura palle, á gálá Dadaamiya á ba an we-aara; á ba an we ñanna zlafe ádaliye wá, á zlazla emnde an ñane. Egdzar mama-aha-aaruwa, magaumika una ñanna.

<sup>11</sup> Ankwa suwa ni tá ká yawe shagera am huđe-aara, ádaliye á segashe yawe danđañe emtu?

<sup>12</sup> Egdzar mama-aha-aaruwa, ankwa nabugda ni á ya anyaranyara emtu? Emtu ankwa anyaranyara na á ya nabugda emtu? Baaka dekideki. Ba duksa palle an suwa. Baaka suwa yawe-aara danđañe, ádaliye á segashe yawe á shá am huđe-aara.

### *Enkale na á sáwá áza Dadaamiya*

<sup>13</sup> Ankwa slenjkale an ilmu jipu am dagave á kure emtu? A marsemare edda-aara zlaláva shagera an ga ire am zlaláva-aara, lauktu tá de diyeddiye emnde ganakini ñane slenjkale.

<sup>14</sup> Amá má kwá shelha áte emnde, kwá maga danñwire á ervaunđe, duksa bademme kwá wayanánta ba ge ire á kure wá, galauka ire ba dey geni kwa emnde a enkale. Eptsawanaaka iga ge jirire.

<sup>15</sup> Jeba á enkale ñanna wá, saaka á sawa áza Dadaamiya, a sawa áza Shaitaine. Ta jansare ba emndimagwaha. Ba názá á duniya.

<sup>16</sup> Adaba am tate na tá shelha emnde, ma ware keni á wayanánte duksa ba ge ire-aara wá, duksa bademme á zlaláveka an unñule-aara. Daaci bademme á shagerkire á ba am tate ñanna.

<sup>17</sup> Amá enkale na á vatertá Dadaamiya ge emnde wá, gergere an una ñanna. Edda una shansha jeba á enkale ñanna wá, ñane cudfedde á katafke á Dadaamiya. Ñane gevge slemela emnde, slekemaare, slezevarze. Ñane a eggerka emnde, ervaunđe-aara ba palle áte emnde bademme. Bademme á názena á maganá ñane an nampire jipu.

<sup>18</sup> Emnde na ni tá ankwa á maga slera á mela emnde geni itare keni a sharánsha hairire wá, slera-aatare an nampire jipu, itare tá sha dzayyire á ervaunđe áza Dadaamiya.

## 4

### *Kumauka njá á emnde a duniya*

<sup>1</sup> Labara ankwa gajawe antara dagala am dagave á kure? Baaka hairire am dagave á kure adaba kwakya wáyá á duksa á kure.

<sup>2</sup> Kwá maga wáyá á duksa, amá kwá shanka. An una ñanna wá, kwá já shifa. Kwá kumá duksa. Duksa ñanna keni kwá shanka tsa. Adaba ba una ñanna ankwa gajawe antara dagala am dagave á kure. Adaba uwe kwá shánká názena kwá kataná kure, adaba ñalakurka áza Dadaamiya.

<sup>3</sup> Ma kwá ñalaná á ba áza Dadaamiya keni, kwá shánka, adaba kwá ñalaná áte unñule-aareka. Adaba kure, kwá kataná ba ge emtakire á duniya.

<sup>4</sup> Kure, eptsakuranteptsa elva áte Dadaamiya á kure. Adaba ba jirire diyakurdiya ganakini má ura wayaawáyá an emtakire á duniya, nane gevge kelaade á Dadaamiya. Ura má a eksese emtakire á duniya wá, nane a eksese gev kelaade á Dadaamiya.

<sup>5</sup> Gawanveka názena a ndahanaa wakita á Dadaamiya na ba dey. Adaba a ba nane: Dadaamiya á shelha jipu áte shifa-aara na a femaa nane am miya na, geni á njá á ba átuge nane palle.

<sup>6</sup> Diyaweddiye zlafe adaliye geni Dadaamiya a magamiyaa ngurna yaikke geni mí dzegwándzegwa dába ba nane palle. Adaba ankwa puwartepuwa am wakita-aara, a ba nane: Dadaamiya á nwateraareka ge emnde á mága kurávire, á magaterá ngurna ba ge emnde na garnaaga ire-aatare.

<sup>7</sup> Adaba una nanna, fawansarfe ge Dadaamiya, tsawatse ba shagera á katafke á Shaitaine, á de zhagade ba nane átuge kure.

<sup>8</sup> Gawáptege á sem sera á Dadaamiya, nane keni á de gakuraptege. Kure emnde a mága haypa, sawansese erva á kure mazla-aara. Kure emnde na kwá an dzama ire bubuwa keni, dabaudfába ba Dadaamiya palle.

<sup>9</sup> Dzamaudzámá ire, kyuwaukyuwa, kyuwaukyuwa á ba an yawe á kyuwa adaba haypa-aha na kwa maganaa kure. Dzaka á kure a gevge dákwa, higa á kure keni a gevge dzámá ire.

<sup>10</sup> Gawanaaga ire á kure á katafke á Yaakadada, nane á de tsakurmartse.

### *Badzauka zhera á sleriya á kure*

<sup>11</sup> Egdzar mama-aha-aaruwa, badzauka zhera á emnde. Edda una á badza zhera á sleriya-aara, bi á epsawanaahe wá, a epsawanaahe, á badzanve ba shairiya á Dadaamiya na a ba nane: Ewwaya sleriya á na ba seke ire á na. Daaci má ká badza shairiya á Dadaamiya wá, ká daban geni ká fansarfeka, amá ká epsawepsawa.

<sup>12</sup> Sey ba Dadaamiya palle una slevaterte shairiya-aara ge emnde, ba nane palle una sleshairiya. Daaci ba nane palle una an hákuma ge lya emnde, bi ge kedateraakeda. Amá ekka, ka kuran ka ware, geni ká epsawa emnde umele?

### *Magauka kuravire*

<sup>13</sup> Cenawivaacena emtsaade, kure emnde na kwa bantsa: Ma vatena, ma makuralla keni, ná zlalá á dem berni yaikke, ná de ga sakanderi palle am tsakala áhuwa, ná sheta shungu kwakya na.

<sup>14</sup> Kure emnde na kwa slaa una nanna, diyakurdiya názena á de magava makuralla emtu? Adaba shifa á kure ba seke mága á yire á kara. Ká ezzhárá á tsetse, amá kertenj zadevzade.

<sup>15</sup> Arge una nanna, ma andze kwá ba: Má wayetewayá Dadaamiya daada shifa wá, watse ná de maga tara una antara una.

<sup>16</sup> Amá kure, kwá kuráva ba dey am elva. Kuráva á kure nanna wá, shagerka.

<sup>17</sup> Diyaweddiye ganakini má edda-aara diyaadiya názena ma andze á maganá nane, amá magaaka, nane guge haypa.

## 5

<sup>1</sup> Ekkure emnde a berba, cenawivaacena, náwa yá bakurá elva: Kyuwaukyuwa, kyuwaukyuwa á ba an yawe á kyuwa. Adaba kwakya zlada na kwá de shaná kure.

<sup>2</sup> Bademme á nalmane á kure na watse á badza. Dikele á zane-aha á kure na keni, á de zuze tarare bademme.



<sup>3</sup> Dindar á kure, antara lipela á kure baɗemme á de zaná ba haha. Una ɗanna watse seydire mándzawe áte kure. Ba irice á kure keni kwá de badza ba estuwa ba seke a zakuraa ba kára. Amá kure, kwá far ba jahaná nalmane ge ire á kure. Diyakurka ganakini herzhe á zla duniya ɗanna emtu?

<sup>4</sup> Kwa zlermu emnde geni tá de magakurá slera am fe, tá de halakurá duksa ba ge kure á sem mba, amá zakuruze mbera-aatare. Diyaweddiye ganakini tá anƙwa kyuwa emnde ɗanna á katafke á Dadaamiya geni á cenatervaare labare. Dadaamiya na sleksa ba ɗane cenáncena kyuwa-aatare baɗemme.

<sup>5</sup> Zakuruze emtakire á duniya na, kwá anƙwa maga ba názena á kataná ire á kure, kwá anƙwa ezza, kwá anƙwa essha ba seke tá de herakurherá.

<sup>6</sup> Iyau, emnde na baaka haypa-aatare keni, kwa puwateraa ba kure á dem shairiya, haa kwa cebaa shifa-aatare, amá itare magarka gajawe ɗekideki.

### *Faufa ervaunɗe; magaumaɗa maduwa*

<sup>7</sup> Daaci egdzar mama-aha-aaruwa, kure wá, faufa ervaunɗe dem sarte á eptsa á Yaakadada Yaisu \*Almasiihu. Zharauzhára áte sleherɗa. Emtsaade wá, á páká madare, á fa ba ervaunɗe dem slakslakire, lauktu á shansha nampire á fe-aara.

<sup>8</sup> Kure keni faufa ervaunɗe ba estuwa. Tsawatse ba shagera, aɗaba herzhe sawa á Yaakadada.

<sup>9</sup> Cenacena ba shagera egdzar mama-aha-aaruwa: Magauka mauniyire am dagave á kure, daaci Dadaamiya á de ɗakurka an shairiya. Náwa sleshairiya am niya-aara herzhe á sawa.

<sup>10</sup> Yehauteyeha njá á nabi-aha á Dadaamiya werre, zlaɗa na ta shanaa itare, an farvaunɗe-aatare. Kure keni ɗabaudaba á ba áte una ɗanna.

<sup>11</sup> Miya wá, má zharater tá á ba am geɗa-aatare, aɗaba dzegwarándzegwa ebbasha-aara. Cenakuráncena labare á Ayuba werre emtu? Ervaunɗe na a fanaa ɗane am zlaɗa-aha-aara, an barka na a garaa Dadaamiya am iga á una ɗanna keni, diyakurdiya baɗemme. Ba jirire Dadaamiya wá, slezevarze, slemagatera ɗurna ge emnde.

<sup>12</sup> Egdzar mama-aha-aaruwa, náwa názena á jauje ge duksa baɗemme: Zauka waɗa, ma an Dadaamiya, ma an haha, ma an jeba-ara keni ɗekideki. Máki eksakuraarekse elva ɗanna, bawanba: Ane. Máki eksakuraarka wá, bawanba: A'aa. Dadaamiya keni á de ɗakurka an shairiya.

<sup>13</sup> Anƙwa ura am dagave á kure am zlaɗa emtu? A enɗala Dadaamiya. Anƙwa ura am dagave á kure am geɗa emtu? A eggala Dadaamiya an lahe.

<sup>14</sup> Anƙwa ura lapika am dagave á kure emtu? A eɗɗaha male-aha á aiklaisiya, tá de magar maduwa, tá de ganve waye an zhera á Yaakadada Yaisu.

<sup>15</sup> Máki emnde ɗanna fartarfe, magarka shaige am názena tá ɗalaná itare, Yaakadada keni á melanumele ge edda una lapika na, á tsantetse. Ma anƙwa haypa na a guwaa ɗane keni, á yanarye.

<sup>16</sup> Aɗaba una ɗanna, shebauka haypa, ndaundáhá názu am ervaunɗe á kure am dagave á kure. Magaumaɗa maduwa am dagave á kure, ma ware keni a emmaɗa maduwa arge ura, geni kwá mbembe. Maduwa á edda una ni an bárá ervaunɗe-aara wá, an hakuma jipu á maga slera kwakya.

<sup>17</sup> Yehauteyeha nabi \*Ailiya werre. ɗane keni urimagwe ba seke miya, a ɗala Dadaamiya an ervaunɗe-aara palle geni a hyeka yawe. Daga ba vacite ɗanna dem sakanderi keye an kyalma, hayaaka yawe ɗekideki am larde ɗanna.

<sup>18</sup> Am iga á una ñanna maa, a magaa maduwa geni a sawa yawe á zhegela, Dadaamiya a fantau ge hya yawe zlafe ádaliye, lauktu duksa bademme a fantau ge segashe am haha.

<sup>19</sup> Egdzar mama-aha-aaruwa, máki mbedfaambeda palle á kure áte barama á Dadaamiya, duwa á ura umele am kure a de tsantehe wá, a magaa duksa shagera jipu.

<sup>20</sup> Diyaweddiye ba shagera ganakini má edda-aara a tsante ura mbedfaambeda áte barama á Dadaamiya ñanna wá, a ñezlese am emtsa. Ma a kwakyevaa estara haypa á edda-aara keni, Dadaamiya á yanarye bademme.

## Zunḡwire á wakita na a puwetaa PIYER

### *Ga use á Piyer*

<sup>1</sup> Wakita na yá anḡkwa á puwaná ba iya Piyer, ya slebela á Yaisu \*Almasiihu. Yá puwakurte ge kure emnde na a dzerakursaa Dadaamiya ge kwa emnde-aarire na. Yá puwakurte ge kure na kyarakuraakya am larde á kure, kwa wayve-aha kina am Pauntus, am Galatiya, am Kapadaukiya, am Aziya ira Bitiniya.

<sup>2</sup> Amá a wayete vateneka Eddemiya Dadaamiya geni á gakturvege emnde-aara an hakuma á Shedfekwe Cufedfde, kwá fansarfe ge Yaisu Almasiihu, kwá gevge emnde cufedfde an uzhe-aara.

A magakuránmaga Dadaamiya ḡurna ba kwakya, a vakurteva hairire keni ba estuwa.

### *Tama na á zleka na*

<sup>3</sup> Galaumigálá Dadaamiya Eddeḡara ge Yaakadada á miya Yaisu \*Almasiihu! Adaba kwakya zezarziye-aara áte miya, a tsantaa ḡane Yaisu am faya. An una ḡanna wá, a vamitaa shifa anḡwaslire antara tama na á zleka na ge miya.

<sup>4</sup> Zlabe adaliye Dadaamiya a famiyaa duksa shagera na á ḡeka liya, á badzeka, á guleka dfekideki na am samaya.

<sup>5</sup> Daaci kure emnde na fakurtarfe na wá, anḡkwa á tsufakurtsufa Dadaamiya an hákuma-aara. Vaci zla á duniya wá, á de lyakurselye náza ba dfekideki, tá de nanna emnde bademme.

<sup>6</sup> Adaba tama á kure áte duksa-aha ḡanna wá, naba higauhiga, ma kwá anḡkwa á shá zlaḡa á duksa gergere keni, ba ge sarte cekwaḡḡuḡi.

<sup>7</sup> Zlaḡa na kwá sháná kure kina na wá, bademme á una ba ge kura fetarfire á kure, máki fakurtarfe á ba an jirire. Dindar wá, á ḡjeka dem ba ge dfekideki. Amá tá ezzhárá emnde am kára, máki ba dindar miyenne. Sakwa fetarfire emtu? Diyaweddiye geni an dárádza ba fetarfire á kure arge dindar. Zlaḡa á kure kina na wá, ba ge kura fetarfire á kure ḡanna. Am iga a una ḡanna maa, watse kwá shá gálá áza Dadaamiya, antara yaikkire ira dárádza, vacite na má watse sasse Yaisu Almasiihu á sawa am ice á emnde bademme.

<sup>8</sup> Ndza nakuranka an ice á kure, kina keni baaka ura á nanna, aley wayakurwáyá, fakurtarfe áte ḡane. Adaba una ḡanna emtake ervaḡḡe á kure, kwakya higa á kure, yá taa palanaaka bademme.

<sup>9</sup> Kwakya higa á kure, adaba diyakurdiya názena kwá de shaná kure adaba fakurtarfe na. Duksa ḡanna wá, kwá de lyelye shifa á kure.

<sup>10</sup> Ate elva a lya shifa ḡanna wá, nabi-aha ta ettataya diyeddiye-aara an enḡkale-aatare bademme, ganakini Dadaamiya á de lyaná estara emnde. Daaci ta fantau ge balateraa ḡurna ḡanna kwa shanaa kure na ge emnde.

<sup>11</sup> Emtsaadfe wá, a balatersaa Shedfekwe á Almasiihu na anḡkwa am itare na, zlaḡa na watse á de shaná Almasiihu ḡanna, antara yaikkire na watse á de shaná am iga a zlaḡa ḡanna. Daaci ta ettataya diyeddiye-aara an enḡkale-aatare bademme, ganakini watse á de magava am zamane-ara, á de magava estara.

<sup>12</sup> Dadaamiya a naba maraterse ganakini duksa ḡanna wá, watse á magava am zamane-aatare ka, amá am zamane á kure. Ta balakurse ba

ɲane emnde a bala labare á higa, elva á Almasiihu. Ta balakurse waazu ɲanna an hákuma á Shedekwe Cufedɛde na a belanaa Dadaamiya á sawa am samaya na. Ba malika-aha keni tá kátá ba dise huɛ-aara baɛemme.

### *Gawevge emnde cufedɛde*

<sup>13</sup> Adaba una ɲanna maa, ma vaatara keni njawinja á ba am niya á kure ge ɛaba Dadaamiya, pauka hare ɛekideki, faufa tama á kure áte ɲgurna na ni á de magakurná Dadaamiya vaci eptsa á Yaisu \*Almasiihu.

<sup>14</sup> Daaci kina wá, fawansarfe ge Dadaamiya, yawanya mazla-aara mága názena á kataná ire á kure na. Adaba kina wá, diyakurdiya jirire.

<sup>15</sup> Gawevge emnde cufedɛde am názena kwá maganá kure baɛemme, ba seke Dadaamiya na a ɛaakurtaa ɲane, ɲane cufedɛde na.

<sup>16</sup> Adaba a ba wakita á Dadaamiya: «Gawevge emnde cufedɛde, adaba iya ya cufedɛde.»

<sup>17</sup> Am maduwa á kure kwá anƙwa ɛaha Dadaamiya an Dada. Watse á kyaná ba ɲane shairiya á emnde baɛemme, ma ware keni áte názena a maganaa edda-aara, ɲane á zhareka ice á ura ɛekideki. Máki diyakurdiya estuwa wá, kuvaukuva ba Dadaamiya palle am zlááva á kure baɛemme, am sarte á kure na jauje cekwaanƣuɛ ge njá am duniya na.

<sup>18</sup> Diyakurdiya geni a se varakursaa ba Yaisu Almasiihu am zlááva á eggye-aha a kure werre na baaka nampire-aara ɛekideki na. A varakurse an shunƣu ka, an dindar ka, adaba duksa-aha ɲanna tá njeka dem ba ge ɛekideki.

<sup>19</sup> Amá a varakurse an uzhe á ire-aara jauje ge duksa baɛemme. Yaisu Almasiihu wá, ɲane gevge ba seke egdza zhel kyawe á sadake á Dadaamiya, baaka ververe áte ɲane, baaka duksa mandzawe am ɲane ɛekideki.

<sup>20</sup> A eksesaa Dadaamiya ganakini watse á varakurvára an ɲane na wá, kwaye am fakta, amá náwa a sanse am sali kataliya á zamane na, ganakini á magakurá shagerire ɲanna.

<sup>21</sup> Adaba ba ɲane una, fakurtarfe áte Dadaamiya na a tsante ɲane am faya, a vante yaikkire na. Estuwa, fakurtarfe áte Dadaamiya, fakurtefa tama á kure á ba áte ɲane palle.

<sup>22</sup> Kina wá, an bára ervaunɛde á kure, adaba kwá anƙwa fansarfe ge Dadaamiya am elva-aara na ba jirire na. Adaba una ɲanna, kwá anƙwa waya egdzar mama-aha á kure an ervaunɛde á kure palle. Daaci wayawavewaye am dagave á kure ma vaatara keni áte una ɲanna.

<sup>23</sup> Adaba Dadaamiya yaikurseye ge buwire an elva-aara na á fá shifa am ura, á zleka ɛekideki na. Daaci kina wá, gakurevka wulfe-aha á edda una á emtsa na, amá kwa wulfe-aha á edda á shifa na á zleka ɛekideki na.

<sup>24</sup> Adaba a ba wakita á Dadaamiya:  
«Baɛemme á emnde ta ba seke másá, á shekwaaka ula, zarire-aatare ba seke zarire á ugbene-aha, á shekwaaka valya á dem áhá.»

<sup>25</sup> Amá elva á Yaakadada wá, á njá dem ba ge ɛekideki.»  
Elva ɲanna wá, ba labare á higa na kwa cenancena na.

## 2

### *Nákwá á shifa an emnde cufedɛde*

<sup>1</sup> Ba seke una ni Dadaamiya a vakurte shifa anwaslire na wá, yawanya mazla-aara mága kemangere antara fida, faskire, shelha ira zá vuwa á ura.

<sup>2</sup> Kure wá, gawevge ba seke egdzara áte erva, wedera-aatare ba uba geni tá wálá an ñane. Kure keni, tatayautataya ba elva á Dadaamiya á jirire, geni kwá wálá an ñane. Á de lyakursá ba ñane náza ba ge ðekidëki.

<sup>3</sup> Ábi kina wá, tapakurnaatapa emtakire á Yaakadada?

<sup>4</sup> Sawmbare á sezeñara. Adaba ñane nákwá na á vante shifa ge ura. Velyaranvevelye emnde, a ba itare: Nákwá na laake, amá a eksesaa Dadaamiya, jauje ge nákwá-aha umele bademme an daradza.

<sup>5</sup> Daaci sawmbare á sezeñara, kure keni gawevge nákwá-aha á shifa, Dadaamiya á nyaña bere-aara an ñane, á njá Shedekwe-aara am huðe-aara. Zlafe ádaliye am bere á Dadaamiya ñanna maa, kwá gev \*liman-aha cuðedde ge danaa sadake ge Dadaamiya áte una á kataná ñane. Á de hayanhaya sadake á kure adaba Yaisu \*Almasiihu.

<sup>6</sup> Adaba ankwá an puwa am wakita á Dadaamiya, a ba ñane:

«Ankwá nákwá palle an daradza jipu ya eksesaa ya, watse yá nyaña bere-aaruwa an ñane am \*Siyauna, á de ñáná ñane ndzedá á bere ñanna bademme. Ma a fetaara ware áte nákwá ñanna keni, á hasleka ðekidëki.»

<sup>7</sup> Daaci ázekure na fakurtarfe áte ñane na wá, nákwá ñanna an daradza jipu. Amá emnde na fartarka áte ñane na wá, estuweka. Adaba a ba wakita á Dadaamiya:

«Ba nákwá ñanna ta eblyanvaa emnde a nyaña bere na una, a eksantehe ge Dadaamiya, a ganve nákwá na á ñáná ñane ndzedá á bere ñanna bademme.»

<sup>8</sup> A baa ba wakita á Dadaamiya ñanna zlafe ádaliye:

«Nákwá ñanna á de gev náza vatertaa ektápaare ge emnde umele, á de mbadatermbada.»

Tá mbadá, adaba tá fansarka ge Dadaamiya. A tsanaa ba estuwa Dadaamiya ge jeba á emnde ñanna.

<sup>9</sup> Daaci kure wá, kwa jeba na a dzerakursaa Dadaamiya, kwa \*liman-aha á Slekse yaikke, kwa nalga cuðedde na kwá átuge Dadaamiya. A ðaakursaa Dadaamiya am tabedammire, a sakuraa á sem parakkire-aara na hyemhye am slede bademme na. Dadaamiya a gakurve estuwa, geni kwá balaterá shagerire á slera-aha-aara ge emnde.

<sup>10</sup> Werre wá, ndza kwa emnde a Dadaamiya ka, amá kina wá, gakurevge emnde a Dadaamiya. Werre wá, ndza zakurvarka Dadaamiya, amá kina wá, ankwá á zakurvarze.

### *Gawevge emnde a slera á Dadaamiya*

<sup>11</sup> Egdzar mama-aha-aaruwa, am duniya na wá, kwa ba wayve-aha, kwá njá ba ge sarte cekwaanḡuðí. Adaba una ñanna, taslawá á kure, magauka názena á kataná ire á kure mazla-aara, á kedákurá ba una ñanna.

<sup>12</sup> Zláláva á kure a gevge shagera am dagave á emnde na baaka nadina-aatare na. Daaci estuwa, ma ta fakuraa áte kwa emnde a mandzawe keni, ta de diyeddiye geni ndza baaka haypa á kure, daaci tá de gala Dadaamiya vacite na má watse daraada ákatafke-aara.

<sup>13</sup> Kure emnde na ðabakurteðaba Yaakadada á miya Yaisu \*Almasiihu wá, faufa zherwe áte emnde na tá an hákuma am duniya na bademme. Faufa zherwe áte male á larde á Rauma, adaba ire ba ñane arge male-aha umele bademme.

<sup>14</sup> Faufa zherwe áte male-aha á larde na a bazlateraa ñane bademme. A bazlater geni tá za emnde a mága shagerkire an bikere, tá gálá emnde a mága shagerire.



<sup>15</sup> Kure wá, Dadaamiya á kátá kwá maga ba shagerire kina, geni a sharanka ngudi-aha na baaka názu ta disaa itare na ndaha elva mandzawe áte kure dekiđeki.

<sup>16</sup> Kina wá, kwá kwaraná ba kure ire á kure, njawinja ba estuwa. Amá am kwará ire á kure nanna wá, bawánka zlafe am ervaunđe á kure geni kwá dzegwándzegwa mága mandzawire keni. Gawevge emnde a slera á Dadaamiya.

<sup>17</sup> Faufa zherwe áte emnde bademme, wayauwaya an egdzar mama-aha á kure emnde a fetarfe, kuvaukuva Dadaamiya, faufa zherwe áte male á larde á Rauma keni.

### *Shaa zlađa áte náza á \*Almasiihu*

<sup>18</sup> Náwa una wá, yá ndaakur ge kure kwa emnde a mága slera am mba á emnde: Fawatersarfe ge zanwe-aha á kure. Faufa zherwe áte itare ba shagera, ma áte zanwe-aha na ta mándzawe-aha keni.

<sup>19</sup> Máki bashakurušashe zlađa adaba Dadaamiya, gavka adaba haypa á kure wá, magakurnaamaga názena á kataná Dadaamiya.

<sup>20</sup> Amá má gakuruge haypa lauktu tá jakurá adaba nane wá, ma kwa bashu zlađa keni, baaka ura á galakurgála dekiđeki. Máki kwa bashu já adaba shagerire, aley kwa naba eksarhe wá, á vante higa ge Dadaamiya.

<sup>21</sup> Dadaamiya a daakur ba ge una nanna. Adaba \*Almasiihu keni shaushe zlađa adaba kure. An zlađa-aara nanna wá, á marakurá ba garava á nja, geni kwá dabaná á ba áte náza-aara.

<sup>22</sup> Nane wá, maganaaka haypa dekiđeki, cenaranka elva a fida am mbuwe-aara.

<sup>23</sup> Nane wá, ma zlazlarvaazlazle emnde keni, eptsaternaaka an zlazle dekiđeki. Ndza ta shanu zlađa kwakya, amá a du ba we-aara, a fetaare á ba an Dadaamiya nane Edda á shairiya jirire.

<sup>24</sup> Daaci a lyamivaare ba Almasiihu an ire-aara haypa-aha ge miya, a emtsa an nane áte dzanjala. A magaa una nanna geni mí gevge ba seke má an emtsa áza haypa, amá má á ba an shifa á miya ge mága jirire. Adaba ververe-aha-aara, kure mbakuraambe.

<sup>25</sup> Werre wá, ndza kwa ba seke kyawe-aha na kedarkedá na, amá kina wá, sakuraasa, kwá am erva á Suni á piyakurá nane, baaka názu á geja shifa á kure dekiđeki.

## 3

### *Nwásha an zála-aha-aatare*

<sup>1</sup> Kina wá, yá elvan ge kure njwásha: Faufa zherwe áte zála-aha á kure. Máki kwá anjwa magaterá una nanna wá, ukfe-aha a kure na zlafe fartarka zála-aha-aatare na keni, zála-aha-aatare nanna tá de shá enjale. Kwá de baterná kure-ka elva á Dadaamiya, amá tá de fetarfe ba itare an ire-aatare, adaba shagerire á zlaláva á njwásha-aha-aatare.

<sup>2</sup> Watse tá nanna ba itare keni, geni baravbare zlaláva á kure, kwá anjwa fá zherwe jipu áte itare.

<sup>3</sup> Zariyire á kure a gevka an mága ngelawire ba seke ndera úgje na zariya jipu na, antara kazlana á mága ngelawire na tá maganá an dindar, ira sandaa zarizariya.

<sup>4</sup> Amá magaumága ngelawire á kure á sawa am ervaunđe. Jeba á ngelawire nanna á zleka dekiđeki. Amaana shagerire á enjale antara ervaunđe. An daradza ba una nanna áza Dadaamiya.

<sup>5</sup> Adaba njwasha werre na d'abarted'aba Dadaamiya, ta fete tama-aatare áte njane na wá, itare ta magán ba estuwa ngelawire-aatare, ta faa zherwe jipu áte zála-aha-aatare.

<sup>6</sup> Yehauteyeha Saraatu, mukse á Ibrahimia werre. Njane a magán ba estuwa ngelawire-aara, a faa zherwe jipu áte zhele-aara, a d'ana an dada. Kure keni, máki magakurka lyawa ge d'aba Dadaamiya, kwá an'kwa maga ba shagerire wá, gakurevge egdzara á Saraatu njanna.

<sup>7</sup> Kina wá, yá elvan ge kure zála: Kure keni njawanaanja njwasha-aha á kure ba shagera, faufa zherwe. Diyaweddiye ganakini gergere ndzed'aatare antara náza á kure. Adaba shifa na a vakurtaa Dadaamiya na wá, a vakurte ge kure antara itare bademme. Njaternja á ba áte una njanna, lauktu á daada maduwa á kure ádeza Dadaamiya.

### *Sha zlad'a adaba jirire*

<sup>8</sup> Yá an'kwa fakurarfe zla'be adaliye ge kure bademme, en'kale á kure á gevge palle, magaumága zavarzire am dagave á kure, wayawaptewaye am dagave á kure ba shagera. Zla'be adaliye gawevge emnde a maggwe antara emnde a kemaare.

<sup>9</sup> Má edda-aara a magakurte emtan'kire wá, kure eptsawanaaka an emtan'kire mazla-aara. Ma edda-aara a zlazlakurzlazle keni, epsawanaaka an zlazle. Arge una njanna wá, bawanánba ge edda-aara: Dadaamiya a vakteva shifa. Adaba Dadaamiya a d'akur ba ge una njanna kure keni.

<sup>10</sup> An'kwa an puwa am wakita á Dadaamiya, a ba njane:

«Edda una má á kata emtakire am shifa-aara, geni a gedetege'da wá, a njanaanja nara-aara ge valya elva yaiyaihe, antara fida.

<sup>11</sup> Zla'be adaliye a yanya mága kema'ngerire, a emmaga shagerire an ervaun'de-aara palle, a ettataya hairire an emnde ma vaatara keni.

<sup>12</sup> Adaba Dadaamiya wá, á fateru hyema ba ge emnde a mága jirire. Bademme á názena tá yekaná itare, á vaterteva. Amá emnde a mága dan'jwire wá, á eptsaterá ba iga.»

<sup>13</sup> Daaci má kwá an'kwa maga ba shagerire an ervaun'de á kure palle wá, baaka ura á gakuraptege d'ekid'eki ge magakura kema'ngerire.

<sup>14</sup> Amá wá, ma kwá an'kwa shá zlad'a kina, adaba shagerire na kwá an'kwa maganá kure keni, watse higa yaikke ge kure. Kuvauterka emnde d'ekid'eki, a gazleka ervaun'de á kure.

<sup>15</sup> Kure wá, demawanvedema kure ba \*Almasiihu am ervaun'de á kure, a gevge ba njane palle Yaakadada á kure. Ma vaatara keni njawinja á ba am niya á kure ge vaterte jawapa ge emnde na tá se ndava ázekure, áte tama na kwá faná kure áte Yaisu Almasiihu.

<sup>16</sup> Má kwá an'kwa vaterte jawapa njanna wá, vawaterteva an shagerire á ervaun'de, kwá ámbera á fá zherwe áte itare. Ma vaatara keni magaumága slera á kure á ba an shagerire á ervaun'de. Estuwa wá, ma ta zlazlakurzlazla emnde adaba shagerire á zlaláva á kure am elva á Yaisu Almasiihu keni, watse zherwe ba ge itare.

<sup>17</sup> Máki una njanna namaari á Dadaamiya wá, shagera ba kwá shá zlad'a adaba shagerire, arge una tá shakuru zlad'a adaba haypa á kure.

<sup>18</sup> \*Almasiihu wá, njane a naba emtsehe adaba haypa á emnde. A emtsehe ba ser palle, zlanazle slera-aara bademme. Njane dzayye ervaun'de-aara, amá a emtsaa adaba emnde na baaka jirire-aatare. A magaa una njanna, geni á damiyá njane ádeza Dadaamiya. Jareja shifa-aara, amá Shedekwe Cuded'de a naba fem shifa am njane zla'be adaliye.

<sup>19</sup> An hákuma á Shedekwe Cufedfe ñanna maa, a de balateraa elva á Dadaamiya ge shedekwe-aha na tá am dangay na.

<sup>20</sup> Shedekwe-aha ñanna wá, ba shedekwe-aha á emnde na ndza degdege ire-aatare ge cena elva á Dadaamiya am zamane á \*Nuhu na. Dadaamiya a fater ervaunde kwakya, amá Nuhu a zlau ba estuwa am slera á mága paare, cenarka. Ba emnde tiise una ta deme am paare ñanna, Dadaamiya a ñezlaterse itare an yawe ñanna.

<sup>21</sup> Yawe na ta ñezlesaa itare an ñane na wá, gevge ba seke baptisma na tá magakurán ge kure kina, Dadaamiya á ñezlakurá an ñane na. Yawe á baptisma ñanna wá, gergere antara yawe ba dey na emnde tá bára an ñane. Adaba mí ñala áza Dadaamiya, geni á baramiyá ervaunde. Yaisu Almasiihu wá, ñane tsetse am faya. Adaba una ñanna á ñezlakurñezla baptisma.

<sup>22</sup> Kina wá, ñane eptsaptsa á dem samaya, anjwa am nadafa á Dadaamiya. Á kwaraterá ñane malika-aha á Dadaamiya antara shedekwe-aha umele na tá an hákuma am samaya na bademme.

## 4

### *Njawinja an shifa na anwaslire*

<sup>1</sup> Ba seke una ni \*Almasiihu se shaushe zlada am duniya na wá, kure keni wavauwava ganakini enkale á kure a gevge palle antara ñane, ma ge shá zlada-ara keni. Adaba má edda-aara a naba eksar shá zlada wá, a yaa ba mága haypa.

<sup>2</sup> Daaci kina wá, tsante am vatena dem halavuwa á shifa á kure am duniya na wá, magauka názena á kataná ire á kure mazla-aara, magaumága namaari á Dadaamiya.

<sup>3</sup> Njá á kure werre na ndza kwá maga ba názena wayaaka Dadaamiya na wá, hyaahya mazla-aara. Adaba slera á kure ndza ba mága zawarire, dakarire, ndza kwa emnde a mbazla jipu, ndza kwa emnde a waya dem tate á gusa mandzawe, ndza kwa emnde a kezlan ugje ge hele arge daba shairiya-aha á Dadaamiya.

<sup>4</sup> Amá kina wá, kwa emnde ñanna-ka mazla-aara. Tá maga ba najipu-aara emnde na zlafe tá á ba am kazlaja ñanna, tá zlazlakurzlafe adaba kwá dábaterka mazla-aara á dem tate á mága haypa ñanna.

<sup>5</sup> Amá ákatafke á sleshairiya wá, watse tá diyeddiye slera-aha-aatare ñanna bademme. Edda una watse á kyaná ñane shairiya á emnde a faya an emnde na tá an shifa, á ufa ba itare.

<sup>6</sup> Náza á emnde a faya wá, ndza naranna palasa am duniya ba seke una ni emnde bademme tá njá ba ge ñane na. Amá Yaisu Almasiihu a de magateraa waazu am faya ñanna, geni itare keni a sharansha shifa na an ñane Dadaamiya.

### *Magaumága názena a fakuraara Dadaamiya*

<sup>7</sup> Kina wá, herzhapteherzhe halavuwa á duksa bademme. Adaba una ñanna faufa hyema, pauka hare dekideki ge mága maduwa.

<sup>8</sup> Duksa yaikke wá, magaumaga wayavire am dagave á kure an ervaunde á kure palle, adaba ba wayavire una á ganse haypa kwakya am dagave á emnde.

<sup>9</sup> Ma ware á kure keni, a lyevaalya ura-aara á ba an higa am huđe á há-aara.

<sup>10</sup> Ma ware á kure keni, a effa hyema áte hákuma á mága duksa na a faraa Dadaamiya ge ñane. Magawateránmaga shagerire ge emnde an hákuma ñanna.

<sup>11</sup> Edda una a shaa hákuma á mága waazu, a ndaha ba elva á Dadaamiya. Edda una a shaa hákuma á melateru ge emnde am slera, a emmága an ndzedá na a vantaá Dadaamiya. Daaci am názena kwá maganá kure bademme wá, emnde a galargálá Dadaamiya adaba Yaisu \*Almasiihu. Yaikkire an hákuma ba náza-aara dem ba ge dekideki. \*Aamin.

### *Sha zladá adaba zhera á Yaisu*

<sup>12</sup> Daaci ma ankwá zladá áte kure kina keni, a wesheka ire á kure emnde-aaruwa, zharauka seke duksa na ni a shaa ba kure palle; Dadaamiya á kurá ba fetarfire á kure an ñane.

<sup>13</sup> Baira fawarfe ge higa á kure, adaba gakurevge palle antara \*Almasiihu am zladá-aha na a shanaa ñane. Vacite na má de samsa ñane am yaikkire-aara, watse higa yaikke ge kure zlafe adaliye.

<sup>14</sup> Má tá ankwá zlazlakurzlazle emnde adaba kwa emnde á Almasiihu wá, higa yaikke ge kure, adaba Shedekwe Cufedde á Dadaamiya á se njá am kure an yaikkire-aara.

<sup>15</sup> Amá a jerka zlafe ura am dagave á kure á shá zladá adaba mandzawire-aara, bi a jaa shifa, bi a ilu duksa á ura, bi a deme am elva á emnde.

<sup>16</sup> Má edda-aara á shá zladá adaba Almasiihu wá, a wanka zherwe dekideki, a slafannaaslafa we-aara ge Dadaamiya adaba fetarfire na a shanaa ñane, párákke áza emnde bademme na.

<sup>17</sup> Kina wá, herzhe shairiya á emnde bademme. Diyaweddiye geni Dadaamiya á de fantau á ba áte emnde-aara zunñwe. Má Dadaamiya zatervarka ge emnde-aara, watse á tse áme kena náza á emnde na fartarka áte labare á higa na a belanaa ñane?

<sup>18</sup> Ankwá an puwa am wakita á Dadaamiya, a ba ñane:  
«Má ta ñezla zlahhe emnde a jirire mu, watse estara náza á emnde a mága mandzawire na dabarka Dadaamiya na?»

<sup>19</sup> Daaci estuwa, emnde na tá ankwá shá zladá adaba namaari á Dadaamiya na wá, a faranemfa itare shifa-aatare am erva ba ge Slenderaterndera, ñane á eptseka elva-aara dekideki. A magarmága shagerire, a yaranka dekideki.

## 5

### *Fawaterufe hyema ge emnde á Dadaamiya*

<sup>1</sup> Kina wá, yá elvan ge male-aha á kure kwa emnde á Dadaamiya. Iya keni, ya slesawari á emnde a fetarfe ba seke itare, ya seyde á Yaisu \*Almasiihu am zladá-aha-aara bademme; iya keni watse yá á ba an slede-aaruwa am yaikkire-aara má de samsa ñane. Náwa názu yá yekaná ázekure:

<sup>2</sup> Fawaterufe hyema ba shagera ge emnde á Dadaamiya na tá am erva á kure, ba seke suni á fateru hyema ge kyawe-aha-aara. Magauka slera ñanna áte laarire, amá magaumága adaba a wayetaa ba ervaunđe á kure. Magauka adaba waya á nalmane, amá adaba a eksesaa ba ervaunđe á kure slera ñanna áte namaari á Dadaamiya.

<sup>3</sup> Magauka yaikkire arge itare, amá marawateránmara zlaláva shagera, ganakini a dabarakurdfaba itare keni.

<sup>4</sup> Máki magakurnaamága slera á kure áte una ñanna wá, watse kwá shá \*ɗaŋkaula na á zleka daráɗza-aara ɗekideki na, má watse samsa Male á suni-aha baɗemme.

<sup>5</sup> Kina wá, yá elvan ge kure dawalaa: Faufa zherwe áte male-aha á kure. Amá baɗemme á kure ákatafke á Dadaamiya, ma ware keni a ganaaga ire-aara á katafke á emnde. Adaba a ba wakita á Dadaamiya: «Dadaamiya a liyieka emnde na tá gálá ire, amá á magaterá ñgurna ge emnde na tá aŋkwa ga ire-aatare á dem áhá.»

<sup>6</sup> Adaba una ñanna, gawanaaga ire á kure á katafke á Dadaamiya na Slekse ba ñane palle na, á de kakuránteka ñane má daada áte náza-aara.

<sup>7</sup> Dzamauka ɗekideki ma uwe keni, fawanemfa am erva ba ge ñane, adaba ñane Slefakuru hyema.

<sup>8</sup> Faufa hyema áte ire á kure, tsakautsaka hyema, adaba kelaade á kure Shaitaine tsantetse hala-aara, aŋkwa tsagwaɗa ba ura ge keɗanaakeɗa, ba seke mága á erva na á waná waya á tsegwaɗa názu á ezza.

<sup>9</sup> Ma vaatara keni vawánteka baráma ɗekideki, fautarfe á ba áte Dadaamiya. Diyakurdiya emnde umele keni kwakya am duniya na tá aŋkwa shá zlaɗa ba seke kure.

<sup>10</sup> Má shakurushe zlaɗa am sarte cekwaangudí na wá, Dadaamiya na baɗemme á ñgurna á magaterná ba ñane ge emnde na, á de magakuránmaga ñgurna. Amaana á de gakurvege emnde na hyairephye am duksa baɗemme, á de ndzedakurtendzedá am duksa baɗemme, kwá de tsaatse, baaka názu á de dzegwándzegwa mbedakuraambedá ɗekideki. Adaba a ɗaakuraa Dadaamiya ganakini kwá de njá antara \*Almasiihu am yaikkire-aara náza dem ba ge ɗekideki.

<sup>11</sup> Hákuma ba náza á Dadaamiya dem ba ge ɗekideki. \*Aamin.

*Ga use am halavuwa á elva-aha*

<sup>12</sup> Kwaye ñane egdza wakita ñanna a meliwa Silwanus ge puwakurte ge kure. Ñane egdza emmemiya na yá ezzhara dzayye ervaunɗe-aara. An wakita ñanna wá, yá kátá fakurem ndzedá am vuwa, yá kátá kwá diyeddiye ñgurna jirire na a magakurnaa Dadaamiya. Daaci tsawaatse á ba áte ñgurna ñanna.

<sup>13</sup> Emnde a fetarfe na a dzeratersaa Dadaamiya ba seke kure, tá am larde á \*Babila áhuna, tá aŋkwa gakur use-aatare. Egdza-aaruwa Markus keni aŋkwa gakur use-aara.

<sup>14</sup> Gauga use á ñere am dagave á kure baɗemme an ervaunɗe á egdza mamire.

Dadaamiya a vakurteva hairire ge kure emnde á \*Almasiihu baɗemme.



## Buwire á wakita na a puwetaa PIYER

### *Ga use á Piyer*

<sup>1</sup> Wakita na yá anƙwa á puwaná ba iya Simaun Piyer, ya nave an ya slebela á Yaisu \*Almasiihu. Yá puwakurte ge kure emnde na kwá fetaare áte Yaisu Almasiihu, shagera fetarfire á kure ba seke náza á ɲere na. Fetarfire ɲanna wá, kwa shanaa an namaari á Dadaamiya, Yaakadada keni ba ɲane, amaana Yaisu Almasiihu na ma vaatara keni á maga duksa á ba an unɲule-aara na.

<sup>2</sup> A magakuránmaga Dadaamiya ɲgurna ba kwakya, a vakurteva hairire keni ba estuwa, adaba diya á kure áte ɲane antara Yaakadada á miya Yaisu Almasiihu.

### *A dzerakursaa ba Dadaamiya, a dʼaakuraa ɲane*

<sup>3</sup> Yaisu \*Almasiihu wá, a kwaramisaa ba ɲane zhera á Dadaamiya na a dzeramise an sleksire-aara ge de njá antara ɲane am yaikkire-aara na. Estuwa, Yaisu vamiteva názena má an wedere-aara bademme ge njá á miya antara Dadaamiya. A vamite una ɲanna an hákuma-aara na saksage na.

<sup>4</sup> An una ɲanna wá, se vamiteva ɲane duksa-aha na an daradza jipu, a ba Dadaamiya watse á vamiteva na. Daaci shakuránsha ire á kure, kwa baaka am mága dakarire na á badza emnde am duniya na, kwá njá á ba áte náza á Dadaamiya.

<sup>5</sup> Adaba una ɲanna, wavauwava an ndzedá á kure bademme, ganakini kwá farfe zlaɓe adaliye zlaláva a jirire ge fetarfire na kwa shanaa kure. Máki shakuránsha zlaláva a jirire wá, fawarfe zlaɓe adaliye enƙale.

<sup>6</sup> Arge enƙale ɲanna zlaɓe adaliye mausembe ɲá vuwa á kure am duksa bademme, gawevge emnde a farvaunɗe, dʼabaudʼaba Dadaamiya an ervaunɗe á kure palle,

<sup>7</sup> wayawaptewáyá am dagave á kure ba seke egdzar mama, marawateránmárá wayava a jirire ge emnde bademme.

<sup>8</sup> Daaci má kwá anƙwa maga una-aha ɲanna bademme, yakuránka wá, diya á kure áte Yaakadada á miya Yaisu Almasiihu na á de maga nampire kwakya.

<sup>9</sup> Edda una máki baaka duksa-aha ɲanna ázeɲara wá, baaka názu á naaná ɲane, ɲane gevge ba seke wulfe, adaba viyanaaviya ganakini an bárá haypa-aha na a maganaa ɲane werre áza Dadaamiya.

<sup>10</sup> Adaba una ɲanna egdzar mama-aha-aaruwa, kure wá, a dzerakursaa ba Dadaamiya, a dʼaakurtaa ɲane. Daaci wavauwava an ndzedá á kure bademme, ganakini kwá tsaatse á ba áte una ɲanna. Adaba má kwá njá áte una ɲanna wá, baaka mbedá á kure dʼekidʼeki.

<sup>11</sup> Á de vakurtá ba una ɲanna baráma ge kure, baaka shaige-aara, ge dem zlanna á Yaakadada á miya Yaisu Almasiihu Slelyamilya keni ba ɲane.

<sup>12</sup> Kwaye ɲane duksa-aha ɲanna, diyandiya tsa ganakini diyakurdiya duksa-aha ɲanna bademme, tsakuraatse dzaɲdzaɲe am jirire na kwa shanaa kure, aley keni yá peka hare dʼekidʼeki, sey ba yá yehakuranteyeha ma vaatara keni.

<sup>13</sup> Máki zlaɓe yá á ba an shifa am duniya na wá, shagera ba yá yehakuranteyeha geni kure keni, kwá fá hyema.

<sup>14</sup> Iya wá, diyandiya ganakini sarte-aaruwa a juwaa ba cekwaangudi ná tegava an vuwa laakire na, ba seke una a binaa Yaakadada á miya Yaisu Almasiihu.

<sup>15</sup> Adaba una nanna yá anƙwa magakurá názu ya dzegwanaa iya bademme, ganakini a deska duksa-aha nanna am ire á kure, ma ya baaka ba iya keni.

*Emnde na naranna \*Almasiihu am yaikkire-aara*

<sup>16</sup> Kure wá, na kwarakurse vateneka sawa á Yaakadada Yaisu \*Almasiihu an yaikkire-aara á sem duniya. Am sarte na ná anƙwa kwarakursekware, tsakanjerakurseka elva á emndimagwaha ba dey, amá na bakuraa názu na naana an ice á nere parakke. Adaba na naana á ba an ice á nere am yaikkire-aara.

<sup>17</sup> Am sarte na a shaa yaikkire áza Eddenjara Dadaamiya, nere ndza ná anƙwa am tate nanna. Na cenanaa á ba an hyema á nere kwara á Dadaamiya an sleksire-aara, a ba nane: «Una na wá, Egdza-aaruwa. Bademme á higa-aaruwa á ba áte nane.»

<sup>18</sup> Nere na cenanaa á ba an hyema á nere Dadaamiya á ndaha una nanna á sawa am samaya, am sarte na na átire á wa na cudede na antara nane.

<sup>19</sup> Daaci nere wá, baaka shaige á nere áte názena ta ndaana nabi-aha werre. Kure keni, shagera ba kwá fá hyema ge cená elva á nabi-aha. Adaba elva-aatare gevge ba seke kára á fanus na á mbe an vayiya. Magaumága una nanna dem sarte na má sesse terlyakwa á irenja, kyaakya paazare, duksa bademme gevge parakke am ervaunde á kure.

<sup>20</sup> Amá diyaweddiye ganakini elva á nabi-aha werre na anƙwa an puwa am wakita á Dadaamiya na wá, baaka ura á dzegwándzegwa palanná ge ura an diya á ire-aara.

<sup>21</sup> Adaba bademme á nabi-aha baaka elva na ta ndaasa ba itare an ire-aatare, amá a vatertaa Shedekwe Cudede elva-aha nanna, geni tá de balaná itare elva na a sawa áza Dadaamiya.

## 2

*Emnde a kwaraterse tsaha fida ge emnde*

<sup>1</sup> Ba werre nanna keni wá, ndza tá anƙwa nabi-aha fida keni am dagave á emnde á Dadaamiya. Á de gev ba estuwa am dagave á kure keni. Tá de jesarje emnde a kwaraterse tsaha fida ge emnde, tá de jansaare ge tsaha mandzawe tá badza emnde an nane, tá de eptsanve iga ge Yaakadada na a lyaterse am haypa-aha-aatare. An una nanna wá, tá fá ire-aatare á dem shairiya á Dadaamiya, tá kedanaakeda shifa-aatare ba dekideki.

<sup>2</sup> Emnde kwakya tá de dabaterdaba am záláva á zawarire-aatare nanna. Adaba una nanna, emnde tá de nyanya baráma a jirire.

<sup>3</sup> Emnde a kwaraterse fida ge emnde nanna wá, adaba ta emnde a waya duksa kwakya, tá zlerma ba duksa á kure an tsaha-aatare nanna. A magaa niya á shairiya-aatare vateneka Sleshairiya, keda-aatare ba keski, tá de nezeleka dekideki.

<sup>4</sup> Adaba uwe, Dadaamiya wá, ba malika-aha-aara keni zatervarka nane ge emnde na ta magaa haypa. A naba puwateremhe am jahanama, evege sladde tabedamme jipu, tá ufa shairiya-aatare am hude-aara.

<sup>5</sup> Emnde na ndza tá am duniya werre na keni, Dadaamiya zatervarka dekideki, a naba hyaterarhe yawe yaikke á sawa am samaya, a kedaterahe, adaba dabarka nane. Amá a nezelese \*Nuhu na a

kwaratersaa ɲane baráma a jirire ge emnde, antara emnde vuye itare cenaránvarcene.

<sup>6</sup> Anƙwa zlaɓe ekse-aha buwa \*Saudauma an \*Gaumaura, Dadaamiya a naba zu ekse-aha ɲanna an shairiya, a zateruhe an kára, a gaterve kelpakara baɗemme. An una ɲanna wá, á maraterá názu watse á shá itare keni ge emnde na tá ɗabeka ɲane na.

<sup>7</sup> Amá am sarte ɲanna wá, a naba ɲezlese \*Ludu, ɲane na ura jirire na. Am zamane á Ludu wá, ndza emtaɲka ervaunɗe-aara jipu aɗaba zawarire á emnde na á zharaná ɲane.

<sup>8</sup> ɲane na ura jirire á njá am dagave-aatare na maa, ba kelaazare á zhára ba zawarire na tá maganá itare na, á cená shagerkire na tá maganá itare na, daaci ɲane á maga ba emtaɲkire am ervaunɗe-aara.

<sup>9</sup> Mí diyeddiye á ba áte una-aha ɲanna geni Yaakadada diyaadiya názena á de maganá ɲane ge ɲezlese emnde-aara am zlaɗa-aha-aatare gergere. Emnde na tá ɗabeka ɲane keni, ɲane diyaadiya tate na á de puwaterá átekwa ge ufa shairiya-aatare vaci shairiya.

<sup>10</sup> Emnde ɲanna wá, baaka ɗeme seke emnde na mbasembe vuwa-aatare mága dakarire, epsawaranaapsawa yaikkire á Dadaamiya na.

Daaci emnde a kwaraterse tsaha fida ge emnde ɲanna ya ndaakurndaha na wá, ta emnde a garɗa jipu, kwakya kurava-aatare. Dete ba emnde a hákuma na ndza tá njá am samaya keni, tá kuvaterka ɗekiɗeki, tá anƙwa epsawaterpsawa.

<sup>11</sup> Amá ba malika-aha á Dadaamiya na ta yaikke ba itare arge itare, tá jateruje an hákuma na keni, tá valyeka elva áte emnde ɲanna.

<sup>12</sup> Emnde ɲanna wá, am mága-aatare ta ba seke dabba-aha á kaamba na Dadaamiya a nderater ba geni tá sluwatersluwa emnde, tá cebaterceɓa na. Itare keni watse tá keɗá ba seke dabba-aha ɲanna, aɗaba tá zlazla názu diyarka.

<sup>13</sup> Zlaɗa na tá anƙwa shateruwa itare ge emnde na wá, itare keni Dadaamiya á de pelaterse á ba an zlaɗa ɲanna. Aɗaba itare baaka waya-aatare áte mága shagerire, sey ba mága dakarire, baira tá maganá á ba áte ice á emnde. Daaci má tá se maga munri antara kure, tá sawa an zlaláva-aatare ɲanna, una ɲanna duksa zherwe ge kure. Amá itare wá, tá higa jipu aɗaba sharakursha á dem dalbe-aatare.

<sup>14</sup> Itare wá, ice-aatare á ba áte ɲwasha ge mága gwardzire, á hyaterka mága haypa ɗekiɗeki. Daaci tá vaterte ektápaare ge emnde na tsafsafe fetarfire-aatare. Zlaɓe ádaliye, ervaunɗe-aatare á njá á ba á kuma duksa, tá an nyainye áza Dadaamiya.

<sup>15</sup> Emnde ɲanna keɗarkeɗa áte baráma a jirire, ta eksante mága á nabi \*Balaama, egdza á Baiyaur. Aɗaba ɲane ndza wayaawaya mága emtaɲkire ge shaa shunƙu an ɲane.

<sup>16</sup> Amá Dadaamiya a naba valarhe vacite umele, aɗaba á fansarka ɲanna. Diyakurdiya ezzenwa wá, á ndaaka elva seke urimagwe, amá vacite ɲanna wá, a ndaan elva ge ɲane ba seke ura. A piyanante estuwa mága slakwatsa-aara ɲanna ge nabi ɲanna.

<sup>17</sup> Daaci emnde ɲanna wá, itare ta ba seke mánjeɓa-aha na baɗemme matsamatsa na. Zlaɓe ádaliye, ta ba seke kumba-aha na á dáná válale baaka nampire-aara ge emnde na. Dadaamiya a tsatsateraa sleɗe tabeɗamme ba gyeguniiye ge itare.

<sup>18</sup> Ba itare ɲanna zlaɓe ádaliye, ta emnde a tsaka elva laakire na baaka nampire-aara ɗekiɗeki na, baira tá kurava an ɲane. An dakarire-aatare

ɲanna wá, tá tsagwada emnde na zlaɓe ba unɲule a segashe-aatare am dagave á emnde a mága haypa, ge eptsateraapta.

<sup>19</sup> Adaba tá bantsa emnde ɲanna: Má kwá dabanɛrdaba wá, kwá kwaraná ba kure ire á kure, ma ge mága uwe keni. Amá itare an ire-aatare wá, ta nave-aha á haypa na á keɗaterkeɗa na. Adaba má ká taa kwaruka ire á ɲa ge yaa duksa ɲanna wá, ka gevge nave á duksa ɲanna.

<sup>20</sup> Am sarte na má diyareddiye emnde Yaakadada á miya Yaisu \*Almasiihu, Slelyamilya keni ba ɲane na wá, ɲezlareɲezla am shagerkire á zlááva na á badza emnde am duniya na. Amá máki eptsarepta zlaɓe ádaliye á dem zlááva-aatare werre, de garevge nave-aha á duksa-aha ɲanna zlaɓe ádaliye wá, badza shifa á emnde ɲanna á gev ɲgulme ba una am zuɲɲwire ndza diyarka Yaisu na.

<sup>21</sup> Máki estuwa wá, náza á jeba á emnde ɲanna, ambane ma andze diyarseka baráma a jirire ba ɗekideki, arge una ta dise baráma á Dadaamiya amá tá fansarka ge názena á ndaana shairiya-aara na.

<sup>22</sup> Názena a shaa emnde ɲanna wá, a shateraa ba názena á ndaaná naraje na náwa ɲane na. A ba naraje ɲanna wá: «Kere a eptsarhe zlaɓe ádaliye ge názena ni a melesaa ba ɲane.» Ankwa zlaɓe naraje umele a ba ɲane: «Ta baranve nabezhe, amá ɲane a eptsehe zlaɓe ádaliye, á de tabareme am terbe.»

### 3

#### *Watse á eptsá Yaakadada Yaisu*

<sup>1</sup> Emnde-aaruwa, buwire á wakita-aaruwa una yá puwakurte ge kure. Am wakita-aha-aaruwa ɲanna bukerɗe yá kátá tsakurte am hare, ganakini kwá yeheteyeha názena kwa tsaasaa kure baɗemme.

<sup>2</sup> Názena yá kataná ya ázekure wá, yá kátá kwá yeheteyeha elva á nabi-aha werre, antara elva á Yaakadada Yaisu \*Almasiihu na Slelyamilya, ta kwarakursaa emnde a bela-aara na.

<sup>3</sup> Elva yaikke na yá kátá kwá diyeddiye ba shagera wá, am kataliye á zamane wá, watse tá sesse emnde a nyainya ura, watse tá maga ba názena tá kataná itare, watse tá nyainyaikurnyainye,

<sup>4</sup> watse tá bakurá: «A ba Yaisu Almasiihu á kure ɲanna watse á eptsá mu, áme ɲane kina? Dada-aha á miya baɗemme emtsaremtsa, duksa á duniya keni baɗemme gejaaka á ba áte una a nderanaa Dadaamiya.»

<sup>5</sup> Emnde a nyainya ura ɲanna wá, tá kwalve á ba an niya ge fetaare áte elva-aha á Dadaamiya na náwa ɲane na: Am fakta a ndaase ba elva-aara Dadaamiya, daaci an ndera samaya antara haha, a sanse haha am yawe, baɗemme á názu áte haha á ɲaná á ba an yawe ɲanna.

<sup>6</sup> Á ba an yawe ɲanna zlaɓe ádaliye Dadaamiya a keɗaa duniya baɗemme werre.

<sup>7</sup> A ba Dadaamiya zlaɓe ádaliye, samaya antara haha keni, tá njeka dem ba ge ɗekideki, watse á zlateraazle an kárá, má watse á kyá shairiya á emnde a mága haypa ge keɗateraakeɗa ba ɗekideki.

<sup>8</sup> Náwa elva yaikke zlaɓe ádaliye, yá kátá kwá diyeddiye, emnde-aaruwa: Áza Yaakadada wá, hare palle ba seke iva debu, iva debu keni ba seke hare palle.

<sup>9</sup> Ta bantsa emnde umele: Yaakadada á maɲka watsewatse názena a ndaasa ɲane. Amá estuweka, á emmága. A fakuraa ba ervaunɗe geni kwá tsaatse am tuba. Adaba ɲane wayaaka emnde tá keɗa ba palle keni. ɲane á kátá emnde baɗemme tá maganaamaga tuba.

<sup>10</sup> Ba jirire watse á eptsa Yaakadada Yaisu á sawa, amá watse á sawa ba seke sawa á neyle. Vacite ɲanna wá, watse á zlauzle samaya, bademme á emnde tá de cenancena mága-aara. Názena áte samaya keni bademme watse á zlanazle kárá. Haha antara názu am duniya bademme á de halevuhále vacite ɲanna.

<sup>11</sup> Máki bademme á kazlaɲa ɲanna watse á zlauzle áte una kwa cenancena na wá, kwá naba diyeddiye názena kwá maganá kure keni am zlaláva á kure. Fawanemfa ire á kure bademme am erva ge Dadaamiya, dabaufaba an ervaunde á kure palle.

<sup>12</sup> Ufawufa hare na ni watse á sawa ɲane átekwa an sleksire-aara na. Mbawantembe kárá geni a semsa hare ɲanna ba watsewatse. Vacite ɲanna wá, watse kárá á zauze samaya antara názu átekwa bademme, ba uwe keni á de jauka.

<sup>13</sup> Amá Dadaamiya a magaa \*waada, a ba ɲane, watse á ndera samaya aɲwaslire antara haha aɲwaslire. Am una-aha ɲanna wá, watse tá njá ba emnde a jirire am huđe-aara. Kwaye ɲane názena mí pakaná miya.

<sup>14</sup> Daaci emnde-aaruwa, kwa emnde a ufa una ɲanna tsawe wá, wavauwava an ervaunde á kure palle ge njá am cuƒeƒeƒire antara hairire á katafke á Dadaamiya.

<sup>15</sup> A viyakurarka ganakini á sauka Yaakadada á miya watsewatse na wá, ba ganakini a sharánsha emnde sarte ge mága tuba, á ɲezlatersenjezele ɲane. Egdza emmemiya Paul keni a ndaakurndaha duksa-aha ɲanna am wakita na a puwakurtaa ɲane an ilmu á Dadaamiya.

<sup>16</sup> Am wakita-aha-aara bademme wá, aɲkwa á ndán ba estuwa, máki á ndá elva áte una ɲanna. Am wakita-aha-aara ɲanna maa, aɲkwa elva-aha na tá cenanka emnde watsewatse. Emnde na baaka ilmu-aatare, tsemarka ire-aatare keni, tá aɲkwa eptsante elva-aha ɲanna, tá ganve umele. Tá magán ba estuwa an nayya-aha umele keni am wakita á Dadaamiya. Emnde a mága una ɲanna wá, tá keƒaná ba itare ire-aatare.

<sup>17</sup> Amá kure wá, náwa faɲerakuremfa elva ɲanna am vuwa á kure emnde-aaruwa. Afaba una ɲanna faufa hyema am ire á kure geni a kefarakuraaka emnde a badza elva á Dadaamiya ɲanna. Tsawaatse ba shagera, a dzalarakurevka áte jirire á kure.

<sup>18</sup> Kure wá, fawarfe ge diya á kure áte Yaakadada á miya Yaisu \*Almasiihu, Slelyamilya keni ba ɲane na, ɲane keni á de magakurá ɲgurna ba kelaazare. Yaikkire ba náza-aara palle vatena antara dem ba ge ƒekideki. \*Aamin.



## Zunḡwire á wakita na a puwetaa YUHANNA

### *Seydire arge Yaisu slevamite shifa*

<sup>1</sup> Náwa ḡá aḡkwa puwakurte ba ḡere wakita na, á ndáhá elva á Dadaamiya na á vante shifa a jirire ge emnde na. Kwaye zlaḡe ba duniya keni ḡaaka, amá ḡane ndza aḡkwa. ḡere ndza ḡa cenaa elva am mbuwe-aara ba ge ḡane, ḡa nanna, ḡa zharanaahe an ice á ḡere, ḡa fetehe antara ba erva á ḡere keni áte ḡane.

<sup>2</sup> A naba jesaarhe ge elva ḡanna á vanta shifa a jirire ge emnde ḡanna á katafke á ḡere á ba am parakkire, daaci ḡa zharanaahe. Adaba una ḡanna, ḡá aḡkwa maga seydire-aara, ḡá aḡkwa ḡalakurá elva á shifa na á zleka na. ḡane ndza á ḡá antara Eddemiya Dadaamiya am samaya. Daaci kina wá, a maramiyansehe ge Dadaamiya áte ice á miya baḡemme.

<sup>3</sup> Ba duksa na ḡa naanaa ḡere, antara ḡa cenanaa ḡere na, ḡá ḡalakurá ba una ḡanna, geni kure keni kwá gevge palle antara ḡere, ba seke una gaḡerevge palle antara Eddemiya Dadaamiya, ira Egdza-aara Yaisu \*Almasiihu na.

<sup>4</sup> ḡá aḡkwa puwakurte duksa-aha ḡanna, geni a naatenáhá ervaunḡe á miya an higa.

### *Dadaamiya ḡane parakkire*

<sup>5</sup> Dadaamiya wá, ḡane parakkire, ḡaaka tabeḡammire ḡekideki am tate na aḡkwa ḡane átekwa. Una ḡanna wá, labáre na ḡa cenanaa am mbuwe á Yaisu \*Almasiihu geni ḡá ḡalakurán ge kure.

<sup>6</sup> Má mí bánba geni miya antara Dadaamiya jamiyammeje am ervaunḡe palle, amá ámbera mí zlálá am tabeḡammire wá, una wá, ma emnde a fida am elva-aha á miya, antara am slera-aha á miya baḡemme, magamika jirire ḡekideki.

<sup>7</sup> Amá má mí zlálá an parakkire ba seke una Dadaamiya ḡane an parakkire na wá, mi gevge palle, uzhe á Yaisu Almasiihu \*Egdza á Dadaamiya á bezamiya haypa-aha á miya baḡemme.

<sup>8</sup> Má bamiyánba ḡaaka haypa á miya, una wá, mi keḡanaa ba miya ire á miya, ḡaaka jirire á Dadaamiya am ervaunḡe á miya ḡekideki.

<sup>9</sup> Amá má mí ḡalese haypa-aha á miya á segáshe, daaci Dadaamiya keni á yamiyaareye baḡemme. Adaba ḡane Dadaamiya á jirire, ma a ndaase uwe keni, sey á gevge. Daaci á de gamiyanvege ba ḡane ervaunḡe á miya dzayye, am kelaa haypa na mi maganaa miya baḡemme.

<sup>10</sup> Má bamiyánba ḡaaka haypa na mi maganaa miya, una ḡanna, amaana: mi faare fidire ge Dadaamiya, eksamiyanteka elva-aara an ervaunḡe á miya palle.

## 2

### *\*Almasiihu a sawa ge se melamiyumele*

<sup>1</sup> Náwa yá puwakurte una-aha na wá, ba geni magauka haypa mázla-aara egdzara-aaruwa. Amá ma a guwa ware haypa keni, aḡkwa sletsamiyemtse am iga áza Eddemiya Dadaamiya, ba ḡane una Yaisu \*Almasiihu edda á jirire.

<sup>2</sup> Adaba nane a yaa ba shifa-aara sadake ge miya, lauktu Dadaamiya a yamiyaare haypa-aha á miya. A yamiyaare ba ge miya palle-ka, amá á kátá yateraare ge emnde a duniya bademme.

<sup>3</sup> Má mi fansaarefe ge Dadaamiya am shairiya-aha-aara bademme, mi diyeddiye áte una nanna geni diyamidiya nane.

<sup>4</sup> Má bánba edda-aara diyaadiya Dadaamiya, amá á fansaareka am elva na a ndahanaa nane, edda-aara slefida, baaka jirire-aara.

<sup>5</sup> Amá edda una nanaana elva na á ndahaná Dadaamiya, ámbera á fansaarefe, ba nane una wayaawáya an Dadaamiya an ervaunđe-aara bademme. Daaci mi diyeddiye áte una nanna geni gamiyevge emnde á Dadaamiya.

<sup>6</sup> Má bánba edda-aara nane á njá á ba áte vuwa á Dadaamiya, sey a dabetedaba nane keni zlááva á Yaisu Almasiihu.

### *Shairiya á Dadaamiya a jaare áɲwaslire*

<sup>7</sup> Slakate-aha-aaruwa, elva na náwa yá anƙwa puwakurta iya na wá, gevka shairiya na a jaare áɲwaslire á sawa áza Dadaamiya; ba duksa palle antara una kwa cenaná kure zunɲwire. Shairiya nanna, kwa cenán kinekineka, ba shairiya á Dadaamiya na kwa cenanaa am fantaufe na.

<sup>8</sup> Amá ba seke áɲwaslire tsa shairiya á Dadaamiya nanna ya puwakurte iya na. Zlááva á Yaisu \*Almasiihu, antara ba náza á kure á kwaramise ba jirire á shairiya nanna. Anƙwa á zláála tabedammire, samsa parakkire á sem kela-aara.

<sup>9</sup> Daaci má bánba edda-aara, nane am parakkire, amá ámbera á maga kelaadire áte egdza emmenara wá, diyaweddiye geni nane zlaɓe á ba am tabedammire-aara sem vatena.

<sup>10</sup> Amá edda una wayaawáya an egdza emmenara, nane á njá am parakkire, baaka duksa am ervaunđe-aara na ni á de ja nane áte unɲule.

<sup>11</sup> Amá edda una á maga kelaadire áte egdza emmenara, nane zlaɓe á ba am tabedammire sem vatena. Bademme a názena á maganá nane, á maganá á ba am tabedammire. Máki á zláála, ma á deme keni diyaaka. Adaba á nánka ice ge tabedammire.

<sup>12</sup> Egdzara-aaruwa, náwa yá puwakurte una na wá, adaba yakuraareye Dadaamiya haypa-aha á kure adaba zhera á Yaisu Almasiihu.

<sup>13</sup> Ekkure dada-aha, yá puwakurte una na wá, adaba diyakurdiya edda una kwaye á ba am fakta á duniya keni, nane ndza á ba anƙwa. Ekkure dawalaa, yá puwakurte una, adaba shakuránsha midalire arge Shaitaine.

<sup>14</sup> Ekkure egdzara-aaruwa, yá puwakurte una zlaɓe ádalije, adaba diyakurdiya Eddemiya Dadaamiya. Ekkure dada-aha, yá puwakurte una, adaba diyakurdiya edda una kwaye zlaɓe á ba am fantaufe keni, nane ndza anƙwa na. Ekkure dawalaa, yá puwakurte una, adaba kwá an ndzedá jipu, ɲakurnaana elva á Dadaamiya an ervaunđe á kure palle, shakuránsha midalire arge slekse á tabedammire.

<sup>15</sup> A badakuruka duniya, antara kazlaɲa-aara. Edda una wayaawáya an kazlaɲa á duniya wá, baaka waya-aara ge nane áte Eddemiya Dadaamiya.

<sup>16</sup> Náwa nane zlááva á njá á duniya: emnde tá anƙwa daba ba názena á kataná ervaunđe-aatare. Bademme á názena zharaná itare, tá kátá ma ba á jerje am mba-aatare keni, ámberá tá máraɲa jipu an názena am erva-aatare nanna. Daaci bademme á una-aha nanna, kazlaɲa á duniya saaka áza Eddemiya Dadaamiya.

<sup>17</sup> Diyaweddiye geni watse á zla duniya, antara názena á duwa ice á emnde amkwa bademme. Amá ge edda una á maga ba názena á kataná Dadaamiya na, nane á de njá an shifa ba ge dekideki.

*Faufa hyema tá anjwa kelaade-aha á Yaisu \*Almasiihu*

<sup>18</sup> Egdzara-aaruwa, zamane á miya na wá, mi herzhe an zle á duniya. Ba seke una ndza cenakuráncena geni watse tá sawa kelaade-aha á Yaisu \*Almasiihu má herzhapteherzhe zle á duniya na wá, ba kina keni kwakya kelaade-aha á Almasiihu jarsaareje, daaci mi dise á ba áte una nanna geni mi herzhe an zle á duniya ba jirire.

<sup>19</sup> Emnde nanna ndza tá á ba am dágave á miya, amá ba jirire garevka palle antara miya dekideki. Adaba una nanna ta naba sesehe am dágave á miya. Ma andze ta palle an miya wá, ma andze tá degasheka am dágave á miya. Amá a de jaare una na wá, ba geni tá diyeddiye átekwa, geni garevka palle antara miya.

<sup>20</sup> Amá ge kure, Yaisu \*Almasiihu a vakurte Shedekwe Cudedde. Adaba Shedekwe nanna wá, diyakurdiya jirire bademme.

<sup>21</sup> Ya puwakurte una na wá, ganakini diyakurka jirireka, diyakurdiya jirire. Zlabe ádaliye, diyakurdiya geni tara fida, antara jirire wá, tá taa jammeka am slede palle.

<sup>22</sup> Ware nane una slefida na? Ba edda una eksarka geni Almasiihu na wá, ba nane una Yaisu a eksesaa Dadaamiya geni nane á se lya emnde; ira á fetarka áte Eddemiya Dadaamiya, antara Egdza-aara. Edda-aara wá, ba nane una kelaade á Almasiihu.

<sup>23</sup> Edda una eksarka geni Yaisu \*Egdza á Dadaamiya, amaana: baaka Eddenjara Dadaamiya am nane. Amá edda una eksaarekse geni Yaisu Egdza á Dadaamiya wá, ba nane una Eddenjara Dadaamiya am nane.

<sup>24</sup> Amá kure wá, wavauwáva geni kwá nanaana an ervaunde á kure palle elva nanna kwa cenaanaa am fantaufe na. Má njakurnaana bademme elva nanna kwa cenaanaa am fantaufe na, kure keni kwá anjwa njá áte vuwa á \*Egdza á Dadaamiya, ira Eddenjara Dadaamiya.

<sup>25</sup> Náwa \*Almasiihu a ngudamiyaa namána ge miya, geni á vamite shifa na á njá ba ge dekideki na.

<sup>26</sup> Bademme a názena yá puwakurta iya na wá, yá puwakurta arge emnde na tá kedakurá áte unjule a jirire na.

<sup>27</sup> Amá ge kure wá, Almasiihu a vakurte Shedekwe-aara anjwa á ba am kure. Adaba una nanna, kwa baaka an wedera á ura umele ge mbakurse duksa, adaba Shedekwe na a vakurtaa Almasiihu na anjwa am kure, á mbakursá nane duksa bademme. Duksa nanna á mbakursá nane na keni bademme jire, baaka fida am huđe-aara dekideki. Adaba una nanna, fawansaarefe ba ge nane am názena á mbakursá nane bademme, njawinja antara Yaisu Almasiihu.

<sup>28</sup> Daaci ba estuwa egdzara-aaruwa, njawinja á ba antara nane am ervaunde á kure, lauktu á de wamika lyáwá, ma zherwe keni ge de katafke-aara vacite na má de samsa nane.

<sup>29</sup> Diyakurdiya geni Yaisu Almasiihu nane slejirire á Dadaamiya. Daaci diyaweddiye geni, ma a maganaa ware jirire á Dadaamiya keni, nane keni ba egdza á Dadaamiya.

### 3

*Miya ma egdzara á Dadaamiya*

<sup>1</sup> Zharauzhárá wáyáva yaikke na á wayamiya Eddemiya Dadaamiya an ñane, haa á cfahámiya an egdzara-aara, ba kina keni gamiyevge ba egdzara-aara ñanna ba jire. Emnde a duniya diyarka geni mi egdzara á Dadaamiya, adaba uwe? Ba adaba diyarka cfekideki Eddemiya Dadaamiya ñanna.

<sup>2</sup> Slákáte-aha-aaruwa, kina wá, gamiyevge egdzara á Dadaamiya ba jirire, amá ma watse mí de geva estara keni diyamika. Názena mi disa miya palle wá, má de saasa \*Almasiihu wá, mí de gárava antara ñane, adaba mí de nanna an ice á miya parakke ma estara ñane keni.

<sup>3</sup> Ma ware keni edda una a fa tama estuwa áte Yaisu Almasiihu, sey á gevge cudfedfe: á mañka haypa ba seke una ñane keni slecudfedfe.

<sup>4</sup> Edda una á maga haypa, á maga ba baakire á fansaare ge shairiya á Dadaamiya, adaba má tá fansaareka ge Dadaamiya am shairiya-aara, haypa-ñara ba ñane.

<sup>5</sup> Diyakurdiya sawa á Yaisu Almasiihu á sem duniya wá, a sawa geni á se jaminaaja haypa-aha á miya. Ñane an ire-aara, maganaaka haypa cfekideki.

<sup>6</sup> Daaci ma ware keni, edda una á njá áte vuwa á Yaisu Almasiihu, sey á yánya mága haypa. Amá edda una á de ba katafke an haypa-aha-aara, amaana: nánka Yaisu Almasiihu, diyaaka Yaisu Almasiihu ba cfekideki keni.

<sup>7</sup> A kefarakuraaka emnde ekkure egdzara-aaruwa. Edda una á maga ba jirire á Dadaamiya, ñane slejirire ba seke una Yaisu Almasiihu slejirire na.

<sup>8</sup> Má ura yánka mága haypa-aha-aara, ñane ura á Shaitaine. Adaba Shaitaine ñane á gá ba haypa kwaye am fakta á duniya. Una ñanna pute á sawa á \*Egdza á Dadaamiya á sem duniya, geni á se kefanaakeda slera-aha á Shaitaine bademme.

<sup>9</sup> Má ware keni má gevge egdza á Dadaamiya á geke haypa mázla-aara, adaba shifa a jirire na a vanta Dadaamiya na añkwa am ñane. Á dzegwánka de katafke an haypa-aha-aara adaba gevge egdza á Dadaamiya.

<sup>10</sup> Náwa názena tá de diyeddiye átekwa garava á egdzara á Dadaamiya, antara egdzara á Shaitaine: Ma ware keni má á mañka jirire á Dadaamiya, ñane gevka egdza á Dadaamiya. Ba duksa palle antara edda una wayaaka an egdza emmenjara na keni.

### *Wayaumiyaavewáye an jirire*

<sup>11</sup> Náwa názena kwa cenanaa kure am fantaufe á kure ge cena elva á Dadaamiya, a ba ñane: sey mi wayaavewáye am dágave á miya.

<sup>12</sup> Gawamiyevka seke Kayinu na ñane ndza ura á Shaitaine slemándzawe na, ñane a naba ja shifa á egdza emmenjara ba ge ñane. A janaa adaba uwe shifa-aara? Adaba bademme á názena ndza a maganaa Kayinu ñanna, ndza shagerka, amá náza á egdza emmenjara wá, ndza shagera.

<sup>13</sup> Egdzar mama-aha-aaruwa, máki emnde a duniya tá fá kelaadire áte kure wá, magauka najipu-aara.

<sup>14</sup> Miya kina wá, diyamidiya geni jamiyaaveje am tate a emtsa, shamiyánsha shifa-aha á miya. Mi dise estara una ñanna? Mi dise adaba wayamiwáyá egdzar mama-aha á miya. Edda una wayaaka an egdzar mama-aha-ñara wá, ñane zlafe tegaraaveka an emtsa.

<sup>15</sup> Ma ware keni, edda una á magante kelaadire ge egdza emmenjara, ñane ta ba kalkale antara sleceba shifa á emnde. Diyakurdiya geni sleceba shifa wá, ñane zlafe shánka shifa na á nja ba ge cfekideki na am ñane.

<sup>16</sup> Yaisu \*Almasiihu wá, ñane wayamiwáya. Am a sawhe, a se yaa ba shifa-aara adaba miya. Mi dise áte una ñanna wáyáva a jirire áte emnde umele. Daaci miya keni shagera mi yánya ba shifa á miya keni adaba egdzar mama-aha a miya.

<sup>17</sup> Amá ma ware keni má gevge berba an nalmáne á duniya na, á zhára egdza emmenara am baakire, aley zanvaareka, daaci á ndahaná estara geni wayaawáyá an Dadaamiya?

<sup>18</sup> Egdzar mama-aha-aaruwa, estuwa, wayawamiyaaveka á ba an we, amá wayawamiyaavewáye á sawa am ervaunđe, ámberá mi emmága an jirire.

#### *Egdzara á Dadaamiya tá de gazleka á katafke-aara*

<sup>19</sup> Názena kwa cenanaa kure na, mi diyeddiye átekwa geni ma egdzara á slejirire; zlađe adaliye, ervaunđe á miya keni an ekhya á katafke-aara.

<sup>20</sup> Ma ankwá á ndamindáhá deme ervaunđe á miya geni mi magaa haypa keni, ervaunđe á miya á njá á ba an ekhya á katafke á Dadaamiya, adaba yaikke ba Dadaamiya arge ervaunđe á miya. Ñane diyaadiya duksa bademme.

<sup>21</sup> Daaci slakate-aha-aaruwa, má ba jirire á dzegwánka ervaunđe á miya ge mbedamiya an shairiya wá, daaci a gazleka ervaunđe á miya ge de katafke á Dadaamiya mázla-aara.

<sup>22</sup> Bademme á názena mi ñalanaa miya ázenara keni á vamiteva, adaba má ankwá fansaare ge shairiya-aara, antara mi maga názena á kataná ñane bademme.

<sup>23</sup> Náwa shairiya-aara ñanna: Mi fetaare áte Egdza-aara Yaisu \*Almasiihu, antara mi wayaavewáye ba seke una a ndaamiya ñane.

<sup>24</sup> Slefansaarefe ge Dadaamiya am shairiya-aara maa, ñane slenjá á ba áte vuwa á Dadaamiya, Dadaamiya keni ankwá antara ñane. Diyamidiya geni ankwá Dadaamiya antara miya, adaba á baminá ba Shedekwe-aara na a famimaa ñane am ervaunđe.

## 4

### *Lawanaale tara Shedekwe á Dadaamiya antara shedekwe á kelaade á \*Almasiihu*

<sup>1</sup> Slakate-aha-aaruwa, má dámnda ura á dezekure, a ba ñane á ndáhá elva an hákuma á Shedekwe á Dadaamiya wá, fawtaareka watsewatse, amá lawanaale emtsaade, bi Shedekwe á Dadaamiya á jirireka una am ñane, amá názá kelaade-aara. Yá ndahaná adaba uwe una? Adaba tá ankwá nabi-aha fida kwakya am duniya.

<sup>2</sup> Náwa názena ni kwá dise edda una an Shedekwe á Dadaamiya átekwa: Máki bánba edda-aara geni samsa Yaisu \*Almasiihu á sem duniya, a se gev urimagwe wá, ñane an Shedekwe á Dadaamiya jirire.

<sup>3</sup> Amá má kwalekwále edda-aara ge ndáhá una áte Yaisu Almasiihu wá, shedekwe na am ñane na saaka áza Dadaamiya, ñane an shedekwe á kelaade á Almasiihu. Shedekwe ñanna wá, ndza kwa cenáncena geni á de sawa. Ba kina keni ñane ankwá á ba am duniya.

<sup>4</sup> Amá kure egdzara-aaruwa, kwa emnde á Dadaamiya, shakuránsha midalire arge nabi-aha á fida ñanna. Adaba Shedekwe na am ervaunđe á kure na jauje ge shedekwe na am ervaunđe á emnde a duniya na an ndzefa.

<sup>5</sup> Nabi-aha fida ñanna wá, itare ta náza-aha á duniya. Adaba una ñanna tá ndáhá ba elva á duniya, daaci emnde a duniya keni tá cenatervaarecene.



<sup>6</sup> Amá miya wá, mi emnde á Dadaamiya. Edda una diyaadiya Dadaamiya wá, á cena elva á miya keni. Amá edda una gevka ura á Dadaamiya wá, á ceneka elva á miya. Mí laná estuwa edda una an Shedekwe á slejirire, an edda una an shedekwe á kedfa emnde.

*Dadaamiya á mbamise wáyáva jirire áte emnde*

<sup>7</sup> Slakate-aaruwa, wayaumiyaavewáye am dágave á miya. Adaba á maganá ba Dadaamiya geni tá wayaavewáye emnde am dágave-aha-aatare, antara tá wáyá nane keni. Má mi wayaavewáye áte una nanna, una nanna á mára una ni gamiyevge egdzara á Dadaamiya, diyamidiya Dadaamiya.

<sup>8</sup> Amá ma ware una á maŋka wáyáva áte una nanna, edda-aara diyaaka Dadaamiya. Adaba Dadaamiya slewáyáva.

<sup>9</sup> Náwa názena a maraminaa Dadaamiya ba parakke, geni nane wayamiwáyire: Nane a belaa Egdza-aara palle ba nane á sem duniya, geni á se vamite shifa á jirire.

<sup>10</sup> Náwa názena á maramiya wáyáva á jirire: Miya gamiyevka emnde zuŋŋwe ge wáyá Dadaamiya, amá a wayámiyá nane zuŋŋwe. Nane a naba belaa Egdza-aara geni á se emtsemntsa am duniya adaba miya, lauktu á yamiyaareye haypa-aha á miya.

<sup>11</sup> Slakate-aha-aaruwa, ba seke una ni a naba wayamitehe ge Dadaamiya na wá, miya keni sey mi wayaavewáye am dágave á miya ba shagera.

<sup>12</sup> Baaka ura ndza nanna Dadaamiya dekideki, amá má mí wayaavewáye am dágave á miya wá, Dadaamiya keni á njá antara miya. Daaci wáyáva-aara na a wayámiyaa an nane na, á de njá am miya ba jirire.

<sup>13</sup> Dadaamiya a naba vamite Shedekwe-aara. An una nanna, diyamidiya ganakini má an nane, nane keni aŋkwa an miya.

<sup>14</sup> Ba miya an ice á miya namiyanna, Eddemiya a belaa Egdza-aara á sem duniya geni á se lya emnde. Mí balaterán ge emnde kina geni elva nanna jire.

<sup>15</sup> Ma a ndahesaa ware geni Yaisu \*Egdza á Dadaamiya wá, Dadaamiya aŋkwa antara nane, nane keni á njá á ba áte vuwa á Dadaamiya.

<sup>16</sup> Nere wá, diyajerdiya geni Dadaamiya wayajerwáya. Fanjertaarefe áte una nanna. Dadaamiya nane slewáyáva. Edda una á njá an wáyáva, nane gevge slenja áte vuwa á Dadaamiya, Dadaamiya keni aŋkwa antara nane.

<sup>17</sup> Náwa názena mi dise átekwa geni wayamiwáyá an Dadaamiya á ba an jirire: Una nanna ba njá á miya am duniya, mí njá ba seke názá á Yaisu \*Almasiihu. Daaci vaci shairiya, á de gazleka ervaunŋde á miya dekideki.

<sup>18</sup> Má Dadaamiya wayaawáyá ura, baaka lyawa ge edda-aara dekideki. Adaba wáyáva á Dadaamiya á janaaja lyawa bademme. Má ura á njá an lyawa wá, amaana: ba seke nane wá, aŋkwa bikere-aara ge nane nánana shairiya. Daaci má ura á njá an lyawa, á seska námpire á wáyáva á Dadaamiya arge nane dekideki.

<sup>19</sup> Miya wá, a wayaamiya ba Dadaamiya zuŋŋwe. Adaba una nanna wayamiwáyá an Dadaamiya, antara wayamiyaavewáye am dágave á miya.

<sup>20</sup> Má bánba edda-aara wayaawáyá an Dadaamiya, amá á maga kelaadire áte egdza emmenjara, ba fida á edda-aara. Adaba má edda-aara wayaaka an egdza emmenjara na aŋkwa á zharaná an ice-aara, á de dzegwáná estara wáyá Dadaamiya na nánka dekideki?

<sup>21</sup> Náwa shairiya á Dadaamiya na mi shanaa miya ázenjara, a ba ñane: Edda una wayaawáyá Dadaamiya, sey a ewwáyá an egdza emmenjara keni.

## 5

### *Fetarfire wá, sha midalire arge lámara á duniya*

<sup>1</sup> Ma a fetaara ware geni Yaisu wá, ñane \*Almasiihu, edda-aara egdza á Dadaamiya. Ma ware una wayetewáyá daada, á wayetewáyá egdzara-aara keni.

<sup>2</sup> Náwa názena ni mi dise átekwa geni wayamiwáyá an egdzara á Dadaamiya: una ñanna, ba má wayamiwáyá an Dadaamiya, ira má mi fansaarefe am shairiya-aha-aara.

<sup>3</sup> Má mí maga názena á baminá Dadaamiya am shairiya-aha-aara na wá, ñane ñara á mara una ni wayamitewáyá Dadaamiya á ba an jirire. Daaci shairiya-aha-aara keni á de jamiviyaareka.

<sup>4</sup> Adába bademme á egdzara á Dadaamiya, tá an ndzedá jipu ge sha midalire arge lámara á duniya. Mí de sháná estara midalire ñanna? Mí de sháná an fetarfire á miya na ni mi fetaare áte Yaisu Almasiihu na.

<sup>5</sup> Ware edda una slemidala arge lámara á duniya? Sey ba edda una fetarfe geni Yaisu Almasiihu ñane \*Egdza á Dadaamiya.

### *Seydire arge Yaisu \*Almasiihu*

<sup>6</sup> Yaisu \*Almasiihu a sawhe á sem duniya, a demhe am yáwe á baptisma, a naba puwaa uzhe-aara áte dzangala, a emtsehe. Sey ba a dema am yáwe-ka palle, amá a puwaa uzhe-aara. Shedekwe á Dadaamiya á ba an ire-aara a magaa seydire-aara geni una ñanna jirire, ba kangelanje. Adába ñane wá, á baterá ba jirire bademme ge emnde.

<sup>7</sup> Ankwa duksa-aha keye tá maga seydire áte Yaisu, geni ñane \*Egdza á Dadaamiya.

<sup>8</sup> Duksa-aha keye ñanna wá, ba Shedekwe á Dadaamiya, antara yawe á baptisma, ira uzhe á Yaisu. Bademme á una-aha ñanna, tá mára ba duksa palle.

<sup>9</sup> Má emndimagwaha tá ankwa á magamiya seydire áte názena ta naaná itare, mí lyiya elva-aatare. Daaci diyaweddiye geni náza á Dadaamiya wá, názena a maganaa ñane, seydire-aara jauje ge una tá maganá ba emnde. Adába ba ñane an ire-aara una a magaa seydire an duksa-aha ñanna arge Egdza-aara.

<sup>10</sup> Edda una lyevaalya Egdza á Dadaamiya wá, seydire á Dadaamiya na keni lyevaalya am ervaunđe-aara geni bademme jire. Amá edda una lyiyaaka seydire á Dadaamiya, a faare fidire ge Dadaamiya, adába lyiyaaka názena a ndahanaa Dadaamiya arge Egdza-aara.

<sup>11</sup> Seydire á Dadaamiya ñanna wá, ñane a vamite shifa na á zleka na. Shifa ñanna wá, mí sháná áte erva an Egdza-aara.

<sup>12</sup> Daaci edda una ankwa Egdza á Dadaamiya am ñane, shánsha shifa ñanna, edda una baaka Egdza á Dadaamiya am ñane wá, shánka shifa.

### *Shifa na á zleka na*

<sup>13</sup> Ya puwakurte duksa-aha ñanna ge kure na fakurtaarefe áte \*Egdza á Dadaamiya, ganakini kwá diyeddiye geni kertenj ankwa shifa na á zleka na am kure.

<sup>14</sup> Á katafke-aara, baaka lyawa á miya dekideki, adába diyamidiya ba jirire geni, ma mí ñala ba uwe ázenjara keni, á cenamivaarcene, máki mí ñalaná áte namaari-aara.

<sup>15</sup> Máki diyamidiya ganakini aɲkwa á cenamivarcene ma mí ɲala ba uwe ázeɲara keni wá, daaci diyamidiya geni á vamiteva duksa ɲanna mi ɲalanaa ázeɲara ɲanna.

<sup>16</sup> Má ura nanna egdza emmeɲara á maga haypa, shagera ba á ɲala Dadaamiya adaba ɲane. Daaci Dadaamiya keni á de vante shifa ge egdza emmeɲara ɲanna. Amá aɲkwa haypa da ura á dem emtsa, ndanakurka ya geni ɲalaunáala Dadaamiya arge emnde na tá maga jeba á haypa ɲanna. Una ɲanna sey ba ge emnde na ta gu ba haypa na á dánka ura á dem emtsa na.

<sup>17</sup> Baɗemme a shagerkire na tá maganá emnde na wá, haypa áza Dadaamiya. Amá aɲkwa haypa na á dánka ura á dem emtsa.

<sup>18</sup> Diyamidiya geni ma ware keni, máki gevge egdza á Dadaamiya wá, á duka á de katafke an mága haypa-aha-aara, amá Yaisu \*Egdza á Dadaamiya á tsufa ba ɲane. Daaci baaka názena á eksáná Shaitaine áte ɲane dekiɗeki.

<sup>19</sup> Diyamidiya geni miya ma egdzara á Dadaamiya, amá emnde umele am duniya wá, baɗemme tá á ba am erva á Shaitaine.

<sup>20</sup> Diyamidiya geni Egdza á Dadaamiya a sawhe á sem duniya, a se vamitaa ɲane eɲkale geni mi diyeddiye Dadaamiya á jirire. Miya wá, gamiyevge emnde a njá an Dadaamiya á jirire adaba Egdza-aara Yaisu \*Almasiihu, ba ɲane una Dadaamiya á jirire ɲanna, á vamita ɲane shifa na á zleka na.

<sup>21</sup> Tsufautsufa ire á kure egdzara-aaruwa, magauka hele.

## Buwire á wakita na a puwetaa YUHANNA

### *Ga use á Yuhanna*

<sup>1</sup> Náwa yá puwaktá ba iya wakita na, ya slesawari am dágave á emnde a dɔ́ba Yaisu. Yá puwakte ge ekka mukse na a eksakaa Dadaamiya na, antara egdzara á ɲa na wayanaterwáyá á ba an jirire na. Sey yá wayákurá ba iya palleka, antara emnde na diyardiya jirire baɗemme wayarakurwáyá.

<sup>2</sup> Wayanakurwáyá jipu, aɗaba jirire á elva á Dadaamiya ɲanna aɲkwa am miya, á njá am miya dem ba ge dekiɗeki.

<sup>3</sup> Tara Eddemiya Dadaamiya, antara Egdza-aara Yaisu \*Almasiihu, a ɲjarinja antara miya ma emnde na wayamiyaavewáyá an wáyáva jirire, ira má aɲkwa maga jirire á Dadaamiya na. A magaraminaamaga ɲgurna, a zaramivaareze, a varamiteva ba itare hairire.

### *Magaumimága wáyáva na a mbamisaa \*Almasiihu*

<sup>4</sup> Higantehiga jipu, aɗaba cenanáncena ganakini tá aɲkwa emnde na dɔ́bartedɔ́ba jirire am dagave á kure, tá aɲkwa á maga názena a baminaa Eddemiya Dadaamiya am shairiya-aha-aara na.

<sup>5</sup> Daaci kina wá, yá ɲalakɲále kwa emmaye-aaruwa dzagwale geni mi wayaavewáyé ba shagera. Una ɲanna yá aɲkwa puwakta ya na keni gevka shairiya á Dadaamiya a jaare aɲwaslire ndza cenakuránka, amá ba elva na mi cenán kwaye am fakta-aara na.

<sup>6</sup> Wáyáva ɲanna wá, amaana: mi fansaare ba ge shairiya á Dadaamiya. Shairiya á Dadaamiya ɲanna keni ba una mi cenán kwaye am fakta-aara na. A ba ɲane: Wayawaavewáyé antara emnde umele.

<sup>7</sup> Ya bakurnaa aɗaba uwe? Aɗaba kwakya emnde a kedɔ́a ura áte unɲule a jirire jarsaareje, hyairemhye am duniya baɗemme. Itare wayarka dekiɗeki cena samsa Yaisu \*Almasiihu á sem duniya, a se gev urimagwe. Ura estuwa, slekedɔ́a emnde áte barama a jirire, daaci ba ɲane una kelaade á Yaisu Almasiihu.

<sup>8</sup> Aɗaba una ɲanna, faufa hyema áte ire á kure, geni kedawanaaka námpire á slera á kure, amá kwá de lyevaalya láɗá na Dadaamiya a fakur ge kure.

<sup>9</sup> Ma ware una dɔ́baaka elva na a kwaramisaa Almasiihu, ɲane a dɔ́bete umele wá, Dadaamiya baaka am ɲane. Amá edda una dɔ́betedɔ́ba elva á Almasiihu ɲanna, ɲane wá, tara Eddemiya Dadaamiya, tá antara Egdza-aara tá aɲkwa antara ɲane.

<sup>10</sup> Aɗaba una ɲanna, máki samsa ura á sem mba á kure, amá á kwaraterse duksa ge emnde gergere antara náza á Almasiihu wá, liyauka edda-aara á mba á kure, ba use keni gawanka.

<sup>11</sup> Aɗaba ma a liyanaa ware, ma a gan ba use keni, shagerkire á názena á maganá ɲane na, ta buwa am huɗe-aara antara edda-aara.

### *Halavuwa á elva-aha*

<sup>12</sup> Aɲkwa elva-aha-aaruwa ba kwakya yá kátá bakuránba, amá keni wayanka yá puwakurte una-aha ɲanna áte nalmesheri. Arge una ɲanna wá, shagera yá duwa ba iya an ire-aaruwa á dem mba á kure, mí de

ndáhá elva-aha ɲanna we-aaruwa una, we á kure keni una, lauktu mí de higeŋehiga ba kwakya.

<sup>13</sup>Egdzara á egdza emmeɲa mukse na a eksesaa Dadaamiya na, tá aɲkwa gakur use-aatare itare keni.



## Keyire á wakita na a puwetaa YUHANNA

### *Ga use á Yuhanna*

<sup>1</sup> Náwa yá anƙwa puwakta ba iya wakita na Gayus; ya slesawari am dágave á emnde a ɗaba Yaisu. Yá puwakte ge ekka, ka edda una wayanak-wáyá á ba an jirire na.

<sup>2</sup> Slakate-aaruwa, yá anƙwa yekakuyeke, geni baɗemme á duksa-aha na ká maganá ka a gevge shagera ge ekka, antara ká njinja an lapiyire. Ervaunɗe á ɗa wá, diyandiya shagera áza Dadaamiya.

<sup>3</sup> Á higa ervaunɗe-aaruwa jipu, aɗaba kwakya egdzar mama-aha á miya saremsa á sehuna wá, ta se biya geni ká anƙwa maga jirire an ervaunɗe á ɗa palle. Diyandiya tsawe geni ká magan ba estuwa ɗanna an shifa á ɗa baɗemme.

<sup>4</sup> Má cenanácena geni egdzara-aaruwa ɗabarteɗaba jirire á Dadaamiya wá, ya higa jipu. Higa-aaruwa ɗanna keni á jauje ge una yá higa arge ma uwe keni am duniya.

### *Yuhanna á zleba Gayus*

<sup>5</sup> Slakate-aaruwa, ka slemággwe jipu am názena ká maganá ka ge melateru ge egdzar mama-aha á miya, ma ta wayve-aha keni.

<sup>6</sup> Ta se magaa seydire á katafke á emnde a fetarfe áhuna áte wáyáva á ɗa, geni magakateránmaga maggwire kwakya. Yá anƙwa ɗalakɗála geni ká emmága ba estuwa ge melateru ge jeba á emnde ɗanna am shula-aha-aatare, áte una ni á de hayánháya Dadaamiya na.

<sup>7</sup> Shula-aatare ɗanna wá, ba ge slera á Yaisu \*Almasiihu, ba uwe keni liiyarka ɗekideki am erwa á emnde na ɗabarka Yaisu Almasiihu má tá kátá melaterumele an ɗane.

<sup>8</sup> Aɗaba una ɗanna, miya emnde a fetarfe wá, shagera jipu geni mí melaterumele ge jeba á emnde ɗanna seke itare na, geni mí gevge palle antara itare am slera na tá anƙwa maganá itare ge bálese jirire.

### *Elva arge Diyautairafais*

<sup>9</sup> Náwa ya puwaterte nalmesheri ge aiklaisiya-aha á ɗa, amá Diyautairafais ɗane edda una á kátá geva male arge itare, liiyaaka elva-aaruwa ɗanna ɗekideki.

<sup>10</sup> Aɗaba una ɗanna, má watse danemda ya, yá de palakanaapála emtanƙire na a maganaa ɗane; ba seke elva a laakire, antara fida-aha na a tsakanaa ɗana á dete iya na. Baira á tsaaka á ba an una ɗanna: Ba emnde a fetarfe na ta wayve-aha am mba-aara keni, liyaterka. Ba emnde na tá kátá liyaterlyiya na keni, a naba piyaterthe, á kátá bakaterbáká am aiklaisiya.

### *Seydire shagera arge Daimatriyus*

<sup>11</sup> Slakate-aaruwa, ɗabeka sera á emnde na shagerka mága-aatare, sey ká maga ba názena shagera na. Aɗaba ba edda una á maga duksa shagera na una gevge egdza á Dadaamiya, amá edda una á de ba katafke an mága duksa shagerka wá, ɗane zlaɓe diyaaka Dadaamiya.

<sup>12</sup> Amá Daimatriyus wá, baɗemme á emnde tá gálá ba ɗane, geni ɗane á maga duksa shagera. Baira elva á Dadaamiya na á balaná ɗane na keni, á maraterá ba una ge emnde, geni ɗane wá, á maga duksa shagera. Nere

keni ɲá ndáha ba názena ni shagera na á dete ɲane, geni ɲane ɲanna wá, slejirire. Ba ekka keni diyakdiya ganakini elva-aha na ɲá ndaasá ɲere na, bademme ba jirire.

*Halavuwa á elva*

<sup>13</sup> Kwakya elva-aha-aaruwa na yá kátá bakánba na, amá wayanka yá puwakte elva-aha ɲanna an narkálam.

<sup>14</sup> Yá tama dezeɲa ba herzhe na, daaci mí ndáhá elva-aha ɲanna antara ka, we-aaruwa una, we á ɲa keni una.

<sup>15</sup> A vakteva Dadaamiya hairire. Bademme á slakate-aha á ɲa na tá áhuna tá aɲkwa gak use-aatare. Gaterga use á ɲere ge slakate-aha á ɲere keni an palpalire-aatare.

## Wakita na a puwetaa YAHUDA

### *Ga use á Yahuda*

<sup>1</sup> Náwa wakita na yá anƙwa puwetá ba iya Yahuda, ya sleslera á Yaisu \*Almasiihu, ya egdza emmenjara ge Yakuba. Yá anƙwa puwakurte ge kure emnde na a wayakurtaa Dadaamiya, daaci a naba dzerakurse, anƙwa á tsufakurtsufa Yaisu Almasiihu na.

<sup>2</sup> A kwakyakuranvekwákyá Dadaamiya ngurna-aara, hairire-aara, ira wáyáva-aara.

### *Shairiya á emnde a kefa jirire á Dadaamiya*

<sup>3</sup> Slakate-aha-aaruwa, ndza yá wawa an enƙale-aaruwa bademme, geni yá puwakurte wakita áte elva a lya shifa na má am huƙe-aara kina na. Amá ambane yá puwakurte názena yá vakurte ndzedá an njane am wává á kure. Adaba am fetarfire na a vatertaa Dadaamiya ge emnde-aara ba ser palle, hyephye ge náza ba ge deƙideƙi na wá, má am wawa yaikke.

<sup>4</sup> Adaba famika hyema, saremsa emnde a mándzawe á sem dágave á miya, se badzaranvebadze elva a ngurna á Dadaamiya á miya. Ta bantsa itare: Anƙwa ngurna á Dadaamiya, mí naba emmága názena á kataná ire á miya. An una njanna maa, amaana tá kataná jirire ge ire-aatare am mága-aha-aatare. Emnde njanna yarnaaya Eddemiya Yaisu \*Almasiihu na ba njane palle una Yaakadada na. Shairiya á emnde njanna ta puwete kineƙineƙa, anƙwa am wakita á Dadaamiya.

<sup>5</sup> Diyakurdiya tsa elva njanna bademme, aley kina wá, yá yehakuranteyeha zlaƙe ádaliye geni Dadaamiya a lyesaa \*Iserayiila-aha, a saterse am larde á Misera; am iga a una njanna, a naba kefaa emnde na faransaareka na.

<sup>6</sup> Yehauteyeha malika-aha na hayaránka hákuma na a vatertaa Dadaamiya, ta naba yaa slede-aha-aatare na keni. Adaba una njanna Dadaamiya a zlenaterme am tate na tabedamme jipu na, tá am tsávaytsávaye na baaka badza-aara deƙideƙi na, tá anƙwa ufa kwaskwe á shairiya-aatare.

<sup>7</sup> Zlaƙe ádaliye yehauteyeha \*Saudauma antara \*Gaumaura, ira ekse-aha na ta herherzhe an itare na. Emnde a ekse-aha njanna keni ndza ta magán ba seke náza á malika-aha njanna, kwakya haypa-aha-aatare, tá maga ba názena zlayeka deƙideƙi na an vuwa-aatare. Tá anƙwa maga palasa kina am kára á jahanáma. Daaci a cenarancena emnde bademme ge faterem duksa am vuwa ge itare keni.

<sup>8</sup> Mága á emnde njanna ta dema am dágave á kure na keni, ba kalkale antara una njanna. Á dáterá ba shene-aatare á de maga máme njanna an vuwa-aatare, tá epsawa hakuma á Dadaamiya, tá zlazla male-aha na tá am samaya na bademme.

<sup>9</sup> Una, názu ba \*Mikayiilu male á malika-aha keni magaaka. Am sarte na ndza tá anƙwa gá jawe antara Shaitaine arge emtsa á Muusa, geni á dáná ware am dágave-aatare maa, Mikayiilu wayeteka ndanse elva yayiaihe deƙideƙi. Adaba una njanna, a ba njane á elván ge njane: á hyephye Yaakadada.

<sup>10</sup> Amá emnde ḡanna wá, itare tá valya ba elva yaiyaihe áte názu diyarka. Tá maga ba názena á kataná ervaunḡe-aatare ba seke dabba-aha. Una ba jirire á de kedátera ba una ḡanna.

<sup>11</sup> Kay! Ázara una! Emnde ḡanna ḡabartedaba sera á Kayinu. Tá njá á ba an fida ge zlerma nalmane áza emnde seke una ndza a maganaa \*Balaama werre. Kedarkedá emnde ḡanna, adaba ta emnde a gardá seke una ndza a maganaa Kaura.

<sup>12</sup> Má kwá anḡwa zá ḡafa á Yaakadada átirpalle antara emnde ḡanna, mága á emnde ḡanna tá maganá am dáḡave á kure na wá, zherwe jipu ge kure. Adaba itare baaka zherwe-aatare ḡekideki, tá dzáma ba ire-aatare palle. Itare ta ba seke kumba na má á dáná effeya, á hyeka yáwe-aara ḡekideki na. Ta ba seke náfa-aha na ma samsa ba sarte-aatare keni tá yeka egdzere ḡekideki na, ta ba seke náfa-aha na ni a batanaa effeya an slalwe-aara bademme, emtsaremtsa na.

<sup>13</sup> Itare ta ba seke vádza á háye na mándzawe jipu na; shagerkire na tá maganá itare na, ba seke ugbalyaiye á yáwe á guwa. Ta ba seke terlyakwa na ḡezlareḡezla áte samaya na. Dadaamiya a tsatsateraa sleḡe tabedamme ba gyeguniye ge itare, watse baaka segashe-aatare dem ba ge ḡekideki.

<sup>14</sup> Anuhu, unḡwahire á eggye ge Naadama wá, ndza a magaa nabiyire áte jeba á emnde ḡanna. A ba ḡane wá: Cenausena ba shagera: Watse á sawa Yaakadada an malika-aha-aara cuḡedḡe ma debu wanyara keni,

<sup>15</sup> á se maga shairiya á emnde bademme, á se maga shairiya á emnde a mándzawe na ta magaa duksa shagerka na, antara adaba gardíre na ta maganá ge Dadaamiya, ira elva-aha yaiyaihe na ta valyanaa itare áte ḡane bademme na.

<sup>16</sup> Emnde ḡanna, itare ma vaatara keni tá njá á ba kyuwava an emnde, tá njá á ba an ervaunḡe áte emnde, tá maga ba názena á kataná ire-aatare. Elva-aatare keni, tá ndáhá ba elva a kurávire bademme, tá njá á ba gálá emnde ge ḡála duksa. Nja-aatare ba una ge itare.

### *Faufa hyema ba shagera*

<sup>17</sup> Amá kure wá, a viyakuraareka elva na ndza ta balakursaa emnde a bela á Yaakadada á miya Yaisu \*Almasihu na, emnde-aaruwa.

<sup>18</sup> Adaba á ba am zunḡwire keni ndza barakuránba emnde a bela, a ba itare: «Máki herzhapteherzhe zle á duniya wá, tá de jesaareje emnde a epsawa ura, tá de epsawakurepsawa, tá de maga ba emtanḡkire na ni á kataná ire-aatare.»

<sup>19</sup> Emnde ḡanna wá, tá teganá ba itare ye á emnde. Bademme á názena tá maganá itare, tá maganá á ba áte hala á urimagwe, baaka Shedekwe á Dadaamiya am itare.

<sup>20</sup> Amá kure wá, ma ware á kure keni, a melanumele ge ura ge de katafke am fetarfire na kwa shanaa kure áza Ura cuḡedḡe na, emnde-aaruwa. Njalaunála áza Dadaamiya an hákuma a Shedekwe Cuḡedḡe.

<sup>21</sup> Yawánka mága wáyávire na a vakurtaa Dadaamiya na. Ufawufa Yaakadada á miya Yaisu Almasihu geni á se magakurnaamaga ḡurna, á se vakurte shifa na á zleka na.

<sup>22</sup> Zawatervaareze ge emnde na tá anḡwa maga shaige na.

<sup>23</sup> Lyawaterselye am huḡe á kára. Yau, emnde na ma am uwe keni tá maga ba názena á kataná ire-aatare na keni maa, zawatervaareze ge itare keni. Amá wá, faufa hyema ba shagera, geni a ndebarakurveka haypa-aatare ge kure.

*Yahuda á gálá Dadaamiya*

<sup>24</sup> Dadaamiya wá, hyephye ba ñane ge tsufákurá áte baráma-aara, geni a mbedakuraaka duksa umele. Hyephye ba ñane ñanna, ganakini á dákuraada ba laiyye á de katafke-aara am tate á sleksire-aara na an dárádza jipu na, baaka duksa mandzawe áte kure d'ekid'eki, kwá á ba an higa á kure am ervaunđe.

<sup>25</sup> Ba ñane palle una Dadaamiya baaka umele, á lyámiyá ba ñane palle á kya erva an Yaakadada á miya Yaisu \*Almasiihu. Ba ñane palle una ura yaikke, an demdemire, an hákuma kwaye kinekinaka am zamáne-aha na dedde na, kina keni ba ñane, antara dem ba ge d'ekid'eki. \*Aamin.



## Wakita á WAHAYU Á YUHANNA

### *Názu á fantau an ñane Yuhanna*

<sup>1</sup> Wakita na wá, á mara názena Yaisu \*Almasiihu á kátá marateranse ge emnde a slera á Dadaamiya. Ge ñane keni a vantaa ba Dadaamiya duksa ñanna ge se marateránmárá, ganakini a njarka an kaltáda názena watse ba jirire á de magava á katafke na. Daaci Yaisu Almasiihu a naba ñelive malika-aara ge iya Yuhanna sleslera-aara, a se marisaa ñane nasherire á duksa-aha ñanna baðemme.

<sup>2</sup> Duwa-aaruwa ge iya keni, ya ndaterhe názena ya naana ya na baðemme ge emnde, ya ñalese geni una ñanna elva á Dadaamiya, a ndaasa ba Yaisu Almasiihu an ire-aara, baðemme á duksa-aha ñanna ba jirire.

<sup>3</sup> Barka ge edda una má ankwá ndaha wakita á elva ñanna a sawa áza Dadaamiya na; barka ge emnde na tá ankwá cena elva ñanna keni, tá ámberá fansaarefe na keni. Adaba herzhapteherzhe sarte na watse á magava duksa-aha ñanna baðemme átekwa na.

### *Use á Yuhanna ge aiklaisiya-aha am ekse-aha gergere vuye*

<sup>4</sup> Ba iya Yuhanna ñanna zlaðe áðaliye una keni, yá puwakurte use-aaruwa ge kure aiklaisiya-aha na kwá am ekse-aha gergere vuye am larde á Aziya na. A magakurnaamaga Dadaamiya ñgurna, a vakurteva hairire. Ba ñane Dadaamiya am fakta keni ndza ankwá, kina keni á ba ankwá, watse á sawa keni ba ñane na. Tara Shedekwe-aha-aara na ta vuye a ñazlateraa ñane á katafke-aara am kurshi á sleksire-aara na,

<sup>5</sup> antara Yaisu \*Almasiihu na ñane sleseyde á jirire, ñane gevge ba seke makaji ge tsete am fáyá, slekse arge slekse-aha keni baðemme na, a magariakurnaamaga ba itare ñgurna, a varakurteva hairire keni.

Yaisu Almasiihu wá, wayamitewáyá ge miya, a naba yaa shifa-aara, a ñezlesaa miya am haypa an uzhe-aara.

<sup>6</sup> Zlaðe áðaliye, a vamite njá antara ñane am sleksire-aara, ira a vamite limanire ge mága slera á Eddenjara Dadaamiya. Sey emnde baðemme a ñemaranvedeme, a galargála ba ñane palle dem ba ge ñekideki. \*Aamin!

<sup>7</sup> Ñane wá, kwaye ñane ankwá á sawa antara kumba, baðemme á emnde watse tá nanna, antara ba emnde na ndza ta ñgyanse upa am ñane na keni, watse tá nanna. Emnde a jeba na tá áte duniya na baðemme watse tá kyuwa, tá tsaka ñákwa má watse á sawa ñane. Una ba jirire watse á de magava ba estuwa. \*Aamin!

<sup>8</sup> Á bá Dadaamiya Yaakadada: «Ba iya una ya zuññwe arge duksa-aha baðemme, watse ba iya ñanna zlaðe áðaliye am halavuwa á duksa-aha baðemme.» Ba ñane una kwaye am fantaufe keni kertenj ndza ankwá, ankwá vatená, á katafke keni watse á sawa ba ñane ñanna, baðemme á sleksire á ba am erva-aara palle.

### *Marápsemáre Yaisu \*Almasiihu am ice á Yuhanna*

<sup>9</sup> Yá ankwá puwakuránta ba iya una keni, ya egdza emmekure Yuhanna. Iya antara kure ma ba palle, gamiyevge palle antara Yaisu \*Almasiihu. Iya keni yá ankwá shá zlaðá ba seke kure. Daaci estuwa, farvaunðe á miya antara kure ba palle. Náza-aaruwa wá, ta eksivahe, náwa ta se eblyiya am ñágave á háye áte wa na tá ñahaná an Patmaus na. Ta bantsa ya magaa

shagerkire adaba yá ndater elva á Dadaamiya, antara labare á Yaisu ge emnde. Daaci ma ba palle antara kure am sleksire-aara kina.

<sup>10</sup> Vacite ñanna an kwaskwe á Yaakadada wá, a naba eksite ge Shedekwe Cufedde, daaci yá cena ba kwára umele á hula am iga-aaruwa an ndzedá jipu ba seke hula á derkwákwa.

<sup>11</sup> A biyantsa kwára ñanna wá: «Puwetepuwa názena ká naaná ka na bademme áte nalmesheri, velatertevela ge aiklaisiya-aha na tá am ekse-aha gergere vuye na.» A ba ñane wá: «Velatertevela ge emnde na tá am Aifaisus, ge emnde na tá am Samirna, ge emnde na tá am Pairgamus, ge emnde na tá am Tiyatira, ge emnde na tá am Sardis, ge emnde na tá am Filadailfiya, antara emnde na tá am Lawdikiya bademme.»

<sup>12</sup> Ya naba eptsapte ge zhara edda una á ndahi elva ñanna, ware ñane edda-aara? Ya naa ba duksa-aha na tá bazla kára á fanus-aha átekwa na vuye kalkale ta maganaa an dindar.

<sup>13</sup> Zlabe adaliye, ya naa duksa ba seke urimagwe, á tse am dagave á duksa-aha ñanna, an tsekwa am nangyuwe sladde de ba áte iga á sera-aara, a ngudese uksuwe an párapara ta maganaa an dindar ñane keni.

<sup>14</sup> Úgje á ire-aara dzayye ba telle jauje ba ge sluzhe keni, ice-aha-aara tá mbe á ba an mbe ba seke nara á kára.

<sup>15</sup> Sera-aha-aara ba seke ire na má ta devese am egzla ba kyanje. Kwára-aara ge ñane ba seke hula á yawe má á degeza áte guwa yaikke.

<sup>16</sup> A ñaa terlyakwa-aha vuye am nadafa-aara. Katsakar an gá sláre we bukerde ankwá á segashe am mbuwe-aara, wafka-aara á mbe ba pelpele ba seke kára á vaciya átire.

<sup>17</sup> Iya ba yá puwete ice-aaruwa áte ñane wá, kreppe ya mbedehe am sera-aara, ganevge ba seke una ni baaka shifa am iya na. Daaci a naba fetaa ba ñane ñanna nadafa-aara áte iya: «A wanika lyawa,» á bina á elvan ge iya. «Degiya ba iya edda una ya zunje ba iya arge duksa bademme, am halavuwa á duksa bademme keni watse ba iya ñanna,» á bina.

<sup>18</sup> «Ba iya edda una yá njá an shifa dem ba ge dekideki, ndza emtsanemtsa, amá náwa ya tsanetse am fáya, yá njá an shifa ba ge dekideki, ba iya una yá an egdza a tsekweram á fáya ñanna bademme.

<sup>19</sup> Daaci puwetepuwa názena ká nanna kina, názena ankwá á magava, antara una watse á de magava á katafke na bademme.

<sup>20</sup> Náwa nasherire buwa yá ndaksa ya: Terlyakwa vuye na ká ankwá zharaná am nadafa-aaruwa na wá, tá mara malika-aha vuye áte aiklaisiya-aha vuye na. Duksa vuye na ta maganaa an dindar ge bazla kára á fanus-aha átekwa na maa, itare tá mara aiklaisiya-aha vuye ñanna.»

## 2

### *Elva na á velaná Yaisu á dem Aiklaisiya á Aifaisus*

<sup>1</sup> Puwetepuwa elva na, velantevela ge Malika á aiklaisiya á Aifaisus: Banánba wá: Náwa názena á ndaaka edda una a ñanaa ñane terlyakwa vuye am nadafa-aara na. Ñane á ja dába am dagave á duksa vuye na ta maganaa an dindar ge bazla kára á fanus-aha átekwa na. A ba ñane wá:

<sup>2</sup> Diyandiya slera á ña bademme, diyandiya wáva á ña, antara duksa na ká ankwá bashaná ka bademme. Diyandiya ganakini ekka ká taa vaterteka baráma ge emnde a mága emtanjire. Emnde na ta bantsa itare ta emnde a bela-aaruwa mbate keni fida, ka habezesa ka názu am hala-aatare, ka naba shantauhe ganakini ta emnde a fida, una ñanna keni diyandiya ya bademme.

<sup>3</sup> Kwaye ɲane duksa na ká ɓashaná ka aɗaba iya, aley gazlanƙa ɗekiɗeki.

<sup>4</sup> Amá aɲkwa duksa palle ka badzanva ka: Ekka yakiyaaya, wayakika mázla-aara seke una ndza ka wayiia am zuɲɲwire na.

<sup>5</sup> Eddzama emtsaade ba shagera áte njá á ɲa am fantaufe, diyeddiye ba ka ma ka mbaɗe am sarte-ara keni. Eptseptsá am tuba, fantaufe zlaɓe ádaliye ba seke una ndza ka maganaa am fantaufe na. Máki eptsanƙa am tuba, náwa yá aɲkwa duwa á dezeɲa, yá de jánaaja tate á fá kára á fanus á ɲa am sleɗe-aara.

<sup>6</sup> Amá náwa názu á kaku yawe cekwa: Aɗaba ekka keni yakanaaya názena tá maganá emnde á Nikaulas ba seke una ya yanaa ya.

<sup>7</sup> Kwaya ɲane názena á baterná Shedekwe Cudedɗe ge aiklaisiya-aha á Dadaamiya. Edda una aɲkwa hyema-aara a cenevaacena. Ge emnde na má garega ndzeɗa, yá de vaterta za egdza á náfá á shifa na am zlanna á Dadaamiya na ge itare.

### *Elva na á velaná Yaisu á dem Aiklaisiya á Samirna*

<sup>8</sup> Puwetepuwa elva na, velantevela ge Malika á aiklaisiya á Samirna. Banánba wá: Náwa názena á ndaaka edda una zuɲɲwe ba ɲane arge duksa baɗemme, am halavuwa á duksa baɗemme keni ba ɲane ɲanna, ndza emtsamtsa, amá tsetse am fáya na. A ba ɲane wá:

<sup>9</sup> Diyandiya zlaɗa á ɲa baɗemme, diyandiya talagire na a shaa ka na, amá berbire á jirire keni tá ndavaná á ba ázeɲa. Diyandiya emtanƙire na tá tsakaná Yahudiya-aha áte ka na baɗemme. Ta bantsa ta Yahudiya-aha, amá ta Yahudiya-aha á ba áte we, itare ta emnde á Shaitaine.

<sup>10</sup> Herzhapteherzhe zlaɗa á kure ge kure, kwaye watse Shaitaine á de ndzeɗa arge kure, á de puwa emnde umele am dagave á kure á dem dangay, amá gazlauka ɗekiɗeki. Náwa watse kwá de ná zlaɗa am hare kelaawa, ma gevge áte emtsa keni tsawatse ba shagera. Yá de vakurte laɗa á kure, laɗa ɲanna wá, shifa.

<sup>11</sup> Kwaya ɲane názena á baterná Shedekwe Cudedɗe ge aiklaisiya-aha á Dadaamiya. Edda una aɲkwa hyema-aara a cenevaacena. Ge emnde má garega ndzeɗa, itare á de shaterka emtsa na watse á ceɓa emnde ge buwire na.

### *Elva na á velaná Yaisu á dem Aiklaisiya á Pairgamus*

<sup>12</sup> Puwetepuwa elva na, velantevela ge Malika á aiklaisiya á Pairgamus: Banánba wá: Náwa elva na á ndaaka edda una an katsakar an gá slare we bukerɗe na: A ba ɲane wá:

<sup>13</sup> Diyandiya ekse á ɲa, diyandiya ganakini ká ba am tate na ni á njá amkwa Shaitaine an sleksire-aara na. Ta jaa shifa á Antipas á ba am dagave á kure aɗaba ɲane á nater elva-aaruwa ge emnde, kezlanveka fetarfire-aara áte iya ɗekiɗeki. Ta janaa á ba am dagave á kure ekse á Shaitaine ɲanna, aley ɓaaka názu a eksanaa una ɲanna áte kure, fetarfire á kure áte iya ba kelaara.

<sup>14</sup> Amá náwa názu ka badzanva ka: Ekka ka puwa emnde a ɗaba názena ndza a kwaratersaa \*Balaama ge emnde am mba á ɲa. Aɗaba Balaama, ndza a kwaransaa ɲane pute á mbeɗa \*Iserayiila-aha á dem haypa ge sleksu \*Balak. Ndza ta vaterta estuwa ektápaare ge Iserayiila-aha geni a zaruze hyuwa á mága hele, antara mága zawarire.

<sup>15</sup> Daaci ekka ká an emnde a mága ba jeba á una ɲanna zlaɓe ádaliye am mba á ɲa. Tá aɲkwa magava an názena ta mbatersaa emnde a Nikaulas ge emnde na.

<sup>16</sup> Ay degiya eptsepsa am tuba. Máki ká eptseka am tuba, ba kinamina náwa yá duwa an katsakar na á segashe am mbuwe-aaruwa na, yá de wawa an emnde ñanna.

<sup>17</sup> Kwaya ñane názu á baterná Shedefkwe Cudeddfe ge aiklaisiya-aha á Dadaamiya. Edda una aṅkwa hyema-aara a cenevaacena. Ge emnde na má garega ndzedá, yá de vaterte dáfá á samaya. Dáfá na, tá taa diseka emndimagwaha, yá de vaterta antara nákwa dzayye, an puwa zhera átekwa, tá taa diseka emnde umele dfekideki, sey ba edda una nákwa ñanna am erva-aara.

### *Elva na á velaná Yaisu á dem Aiklaisiya á Tiyatira*

<sup>18</sup> Puwetepuwa elva na, velantevela ge Malika á aiklaisiya á Tiyatira. Banánba wá: Náwa elva na ni á ndaaka \*Egdza á Dadaamiya na. Ice-aha-aara ge ñane tá mbe á ba an mbe ba seke nara á kára, sera-aha-aara keni ba seke íre na ta devese am egzla kyaṅṅe na. A ba ñane wá:

<sup>19</sup> Diyandiya slera á ña bademme, wáyáva á ña, antara fetarfire á ña, farvaunḡe á ña am duksa, ira maggwire á ña. Diyandiya ganakini ká aṅkwa wálá am duksa bademme jakuje ge una am fantaufe.

<sup>20</sup> Amá náwa názu ka badzanva ka: Ekka, ka yanaa baráma ge Ijabail, mukse na a bantsa ñane, ñane nabi, mbate aṅkwa á mbaḡa emnde a slera-aaruwa á dem zawarire, antara za hyuwa á mága hele.

<sup>21</sup> Ya vante sarte ganakini a eptsepsa am tuba, amá wayaaka, ñane á maga ba zawarire-aara.

<sup>22</sup> A njinja ñane, sey yá zlavanaazlava á dem áhá, watse á tapánaatápa ba ñane áte vuwa-aara. Zala-aha-aara na ta magaa zawarire kerde na keni, diyandiya iya zladá na yá de faterarfe na. Sey máki eptsarepsa am tuba, yaránya mágava an mukse ñanna ba dfekideki.

<sup>23</sup> Bademme á egdzara á mukse ñanna, sey yá cebaterceba. Tá de diyeddiye á ba áte una ñanna aiklaisiya-aha, ganakini diyandiya ya názu am huḡe á emnde bademme, antara názena tá kataná itare na bademme. Ekkure bademme á kure na watse yá pelakursepele, ma ware keni á ba áte slera na ndza a maganaa edda-aara na.

<sup>24</sup> Amá kure emnde na dʒabakurka shagerkire na ta bantsa itare nasherire á Shaitaine, tsahakurka na wá, shagera slera á kure, yá fakuraareka duksa umele mázle-aara ge kure.

<sup>25</sup> Amá duksa palle wá, ba tsawátse á ba áte názena ni kwa disa kure kina na, dem sarte na ni má watse sanaasa ya na.

<sup>26</sup> Ge emnde na má garega ndzedá dem halavuwa-aara, yá de vaterte hakuma, tá de kwaráná ba itare emnde na fartareka áte iya na bademme.

<sup>27</sup> Ge itare keni yá de vaterte ba hakuma na ndza a vita Edderwa ge iya na. Daaci tá de maganá ba itare hakuma áte emnde ñanna an zade á íre, tá de ṅgerdʒaterṅgerdʒa ba seke má tá kyaba emgyegwe a gahe-aha.

<sup>28</sup> Zlaḡe ádalije, yá de vaterta antara terlyakwa á ireṅlyá.

<sup>29</sup> Kwaya ñane názena á baterná Shedefkwe Cudeddfe ge aiklaisiya-aha á Dadaamiya, edda una aṅkwa hyema-aara, a cenevaacena.

## 3

### *Elva na á velaná Yaisu á dem Aiklaisiya á Sardis*

<sup>1</sup> Puwetepuwa elva na, velantevela ge Malika á aiklaisiya á Sardis. Banánba wá: Náwa elva na á ndaaka ba edda una Shedefkwe-aha á Dadaamiya vuye, antara terlyakwa vuye am erva-aara na. A ba ñane wá:

Iya diyandiya mága á ña baɗemme. Emnde tá zleba ba ka geni njaktenja áte shifa, mbate baaka shifa am ka.

<sup>2</sup> Tsetse am hare, farefe ge ndzedá á ña, amá má fakareka, ká de emtsa. Adaba ya naa slera á ña zlaɓe hyefka ba názara keni áza Dadaamiya.

<sup>3</sup> Yeheteyeha názena ndza ka cenanaa ka am fantaufe, antara názena ndza ka shanaa ka áza Dadaamiya. Eptseptsá am tuba, fansaarefe ge Dadaamiya. Máki ká tseka am hare, náwa yá anƙwa duwa an ila ba seke neyle, ká taa diseke sarte ñanna ɗekideki.

<sup>4</sup> Emnde na itare nyamalaranveka zane-aha-aatare, amaana: Cudedɗe ervaunɗe-aatare na keni, diyanaterdiya ya am dagave á kure, amá wá, ta cekwa. Itare maa, yá de vaterte zane dzayye, watse ña de njá kerɗe adaba hyarephye.

<sup>5</sup> Baɗemme na má garega ndzedá, názu yá de vaterte ge itare wá, yá de tsekwatema am zane dzayye, yá de badzeka zhera-aha-aatare am wakita na an puwa zhera-aha á emnde na tá an shifa na. Iyau yá buweka zhera-aha-aatare á katafke á tara Edderwa antara malika-aha-aara geni ta emnde-aaruwire.

<sup>6</sup> Kwaya ñane názena á baterná Sheɗekwe Cudedɗe ge aiklasiya-aha á Dadaamiya. Edda una anƙwa hyema-aara, a cenevaacena.

#### *Elva na á velaná Yaisu á dem Aiklasiya á Filadailfiya*

<sup>7</sup> Puwetepuwa elva na, velantevela ge Malika á aiklasiya á Filadailfiya. Banánba wá: Náwa elva na á ndaaka edda una cudedɗe, edda á jirire na: Á ñaná ba ñane egdza a tsekweram á sleksire á Dadaamiya. Má a werantaa ba ñane, baaka ura á dzegwándzegwa heɗanuheɗe. Má a zlenetaa ba ñane, baaka ura á dzegwándzegwa werantuwera. A ba ñane wá:

<sup>8</sup> Diyandiya slera á ña, diyandiya ganakini cekwa ndzedá á ña, amá magakanaamaga názu ya ndanaa ya, yakika ɗekideki. Ya werakantaa ba iya wákyiya, baaka edda una á zlenakvezleña.

<sup>9</sup> Ká cenáncena emtu? Náwa názu watse yá de magaterná ya ge emnde na ta bántsa itare ta Yahudiya-aha, mbate ta Yahudiya-aha á ba áte we na: Sey yá de satersá á sem sera á ña, tá de diyeddiye ganakini wayanak-wáyire.

<sup>10</sup> Ba seke una ni ekka ka tsufete elva-aaruwa, fakisaarefe na wá, iya keni sey yá tsufaktsufa am laruwa na watse á setarge emnde baɗemme am duniya ge dise názu am itare na. Á de shaŋka zlaɗa-aha ñanna ɗekideki ge ekka.

<sup>11</sup> Náwa iya, watse yá eptsá ba herzhe, tsaatse ba shagera áte názena ka shanaa ka kina, ganakini ká keɗanaaka názena watse tá de faɗakse ire an ñane na.

<sup>12</sup> Ge emnde na má ta ganaa itare midalire, itare yá de gatervege ba seke ta kawe-aha am mashidi á Dadaamiya-aaruwa, baaka názu á de kabalaterkábala ɗekideki. Watse yá puwete zhera á Dadaamiya-aaruwa, antara zhera á berni á Dadaamiya áte itare. Berni ñanna, Urusaliima áñwaslire na watse á de tsekwa á sawa áza Dadaamiya am samaya. Zlaɓe adaliye, yá de puwete zhera-aaruwa na watse áñwaslire na áte itare.

<sup>13</sup> Kwaya ñane názena á baterna Sheɗekwe Cudedɗe ge aiklasiya-aha á Dadaamiya. Edda una anƙwa hyema-aara, a cenevaacena.

#### *Elva na á velaná Yaisu á dem Aiklasiya á Lawdikiya*

<sup>14</sup> Puwetepuwa elva na, velantevela ge Malika á aiklasiya á Lawdikiya. Banánba wá: Náwa elva na á ndaaka edda una zhera-aara \*Aamin,



amaana: Edda una ɲane sleseyde á jirire, baaka fida ázenara ɔ́kideki na. Baɔ́emme á názena a nderanaa Dadaamiya, a nderanaa áte erva an ɲane. A ba ɲane wá:

<sup>15</sup> Iya diyanakdiya baɔ́emme. Ekka, ka ba seke yáwe na a váha áte vaciya, gevka yáwe lailaiɔ́ɔ́, gevka yáwe á mbera, ura á taa ɲanaaka am mbuwe na. Iya wayanka jeba á una ɲanna ɔ́kideki, ya háyá ba ka eksese baráma palle.

<sup>16</sup> Am ka ba seke yáwe na a váha áte vaciya, gakefka seke yáwe lailaiɔ́ɔ́, gakefka seke yáwe á mbera tsawe wá, sey ba yá puwakpuwa am mbuwe-aaruwa.

<sup>17</sup> Ekka, ka bántsa ka edda berba, baaka názu á jakviyaaja ɔ́kideki. Ay degiya ba diɲkire ka wá, ká am kataliya ba ka am emnde, hyakephye ge zagvaareze, ka talága am emnde, ká an ukhyiye dey, ka wulfe zlaɔ́e ádaliye.

<sup>18</sup> Sawari na yá vaktá ya wá, sawa shekwepshekwe dindar na an bára, á maga wulwulire jipu na ázerwa, watse ká gegga rezegire á jirire. Sawa shekwepshekwe nanɲyuwe dzayye ázerwa ge sheɔ́a nasherire á ɲa, antara kurgune á ice ganakini ká nanna ice.

<sup>19</sup> Iya wá, yá valateraare ge emnde na wayanaterwáyá na, yá giyatergiya. Aɔ́aba una ɲanna, magauka gaagusa an elva-aaruwa na, eptsauptsa am tuba, eksawanteksa baráma-aaruwa palle.

<sup>20</sup> Cenaucena: Iya wá, náwa ya ba seke edda una á gá use áte we á wákyiya, ma ware keni má cenáncena kwára-aaruwa, a se weritaa wákyiya na, yá demda antara ɲane, yá de njá antara ɲane, njá de za duksa kerɔ́e.

<sup>21</sup> Ge emnde na má garega ndzeɔ́a, watse yá vaterta baráma ge se nja antara ya am sleksire-aaruwa, ba seke una ni ndza ya ganaa iya midalire, iya keni náwa njá antara Edderwa am sleksire-aara na.

<sup>22</sup> Kwaya ɲane názena á baterná Sheɔ́ekwe Cuɔ́eɔ́e ge aiklaisiya-aha á Dadaamiya. Edda una anɲkwa hyema-aara a cenevaacena.

## 4

### *Gálá Dadaamiya na tá galáná am Samaya na*

<sup>1</sup> Am iga á una-aha ɲanna maa, ya keta ice-aaruwa wá, ya naa ba wakyiya an wacene wanɲe am samaya. Daaci yá cena ba kwára á edda una ndza a biya elva na, kwára-aara á zlala jipu ba seke hula á derkwákwá: Eɔ́dala ásezerwa áhuna, náwa yá se maraká názu watse á de magava á katafke, a ba ɲane á elvan ge iya.

<sup>2</sup> Kerten a eksitehe ge Sheɔ́ekwe Cuɔ́eɔ́e, daaci yá zhara ba kurshi á sleksire am ice-aaruwa, anɲkwa ura á njá am kurshi ɲanna.

<sup>3</sup> Edda una á njá am kurshi ɲanna zariya-aara ba seke uwe, wafke-aara á maga wulwulire ba seke nákwá-aha umele tá ɔ́ahaterá an Yaspa, umele tá ɔ́ahaná an Sardisa na. A jantaave kataliyavere ge kurshi á sleksire ɲanna ta takarre zariya jipu. Zariyire-aara ba seke jeba á nákwá umele zlaɔ́e ádaliye tá ɔ́ahaná an Imiradi.

<sup>4</sup> Kurshi-aha á sleksire umele kul buwa ju ufaɔ́e a jantaave ge slekse yaikke na á njá am kurshi na, emgyegwar zala keni ta kul buwa ju ufaɔ́e tá njanja am kurshi-aha ɲanna, tá tsákwá am zane dzay-dzayye baɔ́emme, tá an dzákwa á sleksire, ta maganaa an dindar baɔ́emme am ire-aha-aatare.

<sup>5</sup> Daaci á sa am huɔ́e á kurshi á sleksire na yaikke na wá, á segashe ba kára á ráde, antara kwára á duksa umele ba tsekemme, ira vála á samaya. Zlaɔ́e ádaliye, a mbetehe kára-aha vuye á katafke á kurshi á

sleksire ñanna. Una-aha ñanna wá, ta Shedfekwe-aha á Dadaamiya ta vuye.

<sup>6</sup> Á ba á katafke á slekse yaikke ñanna wá, ndza anjwa duksa umele á maga wulwule ba seke kweteram. Tá anjwa duksa-aha umele zlafe ádaliye ta ufafe kálkale tá an shifa, ta fem slekse yaikke ñanna am dágave. Wafke-aatare, antara iga-aatare bademme an cepa ba ice áte duksa-aha ñanna.

<sup>7</sup> Zujjwire á duksa-aha ñanna á gáráva an ervare; buwire-aatare á gáráva an egdza a dalau; keyire á duksa-aha ñanna, wafke-aara ba seke wafke á urimagwe. Ufafire-aatare á gáráva an zeke, ñane á ñgye an lyákwá.

<sup>8</sup> Duksa-aha ñanna ta ufafe an shifa na, tá an lyambake unjwahe unjwahe áte itare, an cepa ba ice áte duksa-aha ñanna, áte iga, antara á kya huđe keni bademme. An vayi vacika tá bela ba lahe. A ba itare am lahe-aatare:

Ekka Dadaamiya Yaakadada wá, ka cufedfe, ka cufedfe, ka cufedfe, ba ka palle baaka umele. Ka edda á hakuma ba ka palle, ware umele.

Kwaye am fakta keni ndza ba ekka, vatena keni ba ekka, á katafke keni ká sawa ba ka ñanna.

<sup>9</sup> Estuwa á ba lahe á duksa-aha ñanna ta gergere ufafe na. Edda una á njá am kurshi á sleksire, á njá an shifa ba ge dekideki na, tá anjwa edfema, tá anjwa slafaná we bademme.

<sup>10</sup> Ba kelaa má itare tá anjwa maganá una ñanna ge edda una an kurshi á sleksire na wá, emgyegwar zala kul buwa ju ufafe na keni bademme tá puwa dzákwa á malire-aatare na á dete haha, á katafke á slekse yaikke na am kurshi ta jantaave itare na, tá anjwa kezlan ugje, tá baná:

<sup>11</sup> Yaakadada á ñere, Dadaamiya á ñere, ba ekka palle una ka edda á hakuma, hyakephye geni tá galakgálá emnde bademme, geni tá demakdema emnde bademme, geni tá faksaarefe emnde bademme. Adaba duksa bademme ka nderanaa ba ka, an namaari á ña ka nderateraahe, ka njateraahe.

## 5

### *Tá anjwa gálá edda una ba seke egdza zhel kyáwe a sadake na*

<sup>1</sup> Daaci ya naa wakita an fádá, am nadafa á edda una á njá am kurshi yaikke na, anjwa an puwa duksa am wakita ñanna, áte iga, antara am huđe bademme. Ta fafete dámshe á vadale ser vuye áte we á wakita ñanna, ganakini a waranteka ura umele.

<sup>2</sup> Zlafe ádaliye, ya naa gwarda á malika, á ndaha elva á ba an ká kwará, a ba ñane wá: «Áma edda una hyephye ge wára wakita na náwa ta hadante, ta fafete dámshe átekwa na?»

<sup>3</sup> Amá jarka ba palle keni edda una hyephye dekideki. Ma am huđe á samaya, ma áte duniya, ma huđe á haha keni, jarka dekideki edda una hyephye ge wera wakita ñanna, ge á zharanaazhárá názu an puwa am wakita ñanna.

<sup>4</sup> Iya ba ya cenaa una ñanna wá, ya fantau ge kyuwa.

<sup>5</sup> «Kyuweka,» a ba palle á emgyegwar zala kul buwa ju ufafe na á elvan ge iya. «Ezzhárá ka ba ervare na ta yanaa emnde á Yahuda, ta emnde a jeba á sleksu \*Dawuda na,» á bina. «Ñane gaage ndzedfa áte duksa bademme, ñane hyephye ganakini á fáy dámshe á vadale ñanna, ñane hyephye ge wára huđe á wakita ñanna,» á bina.

<sup>6</sup> Daaci yá zhárá ba egdza zhel kyáwe, á tse am dagave á tara slekse yaikke, antara duksa-aha ufade na tá an shifa am vuwa na, ta jatertaave emgyegwar zála kul buwa ju ufade na. Zhel kyáwe ñanna, á gáráva an egdza zhel kyáwe na ndza ta iceta sadake-aara na. Ñane wá, an derma vuye, ice-aha-aara keni vuye am ire. Ice-aha-aara vuye ñanna wá, ta shedekwe-aha na ta vuye á katafke á Dadaamiya, á beláterá á sem duniya bademme na.

<sup>7</sup> Daaci a duhe ge egdza zhel kyáwe ñanna, a de lyevaa wakita na am nadafa á slekse yaikke na.

<sup>8</sup> Ba ñane lyevaalya wakita ñanna am erva-aara wá, duksa-aha ufade na tá an shifa am vuwa na, antara emgyegwar zála kul buwa ju ufade na bademme garaavege á dem áhá, tá kezlan ugje á katafke-aara. Itare bademme tá á ba an gadzavera-aha-aatare am erva, antara egdzara erba-aha á dindar-aatare zarizariya ba seke uwe, an naha an kajiji am hude-aara bademme. Kajiji ñanna wá, maduwa-aha á emnde a fetarfe na tá maganá ádeza Dadaamiya na.

<sup>9</sup> Tá anƙwa belá ba láhe-aatare anwaslire, ta bantsa itare:  
Ba ekka una hyakephye ge lyiya wakita na, hyakephye ge wárá wakita na. Adaba ekka ndza ta jaka adaba emnde, ekka ka varese emnde an uzhe á ña. Ka varanse emnde a jeba gergere ge Dadaamiya, emnde a ndaha elva-aha gergere, emnde a larde-aha gergere, ka sateraahe ásezenara.

<sup>10</sup> Ka gatervaa ba ekka ganakini a njarinja antara ka am sleksire á ña. Ka gaterve \*liman-aha ge mága slera á Dadaamiya á miya, watse tá de kwaráná itare duniya.

<sup>11</sup> Daaci yá zhárá ba malika-aha ta kwákya jipu, baaka kezlakula-aatare dƙeƙeƙe, ta ba seke iwe á waya, ta jatertaave itare ge tara slekse yaikke am kurshi na, antara duksa-aha ufade na tá an shifa na, ira emgyegwar zála kul buwa ju ufade na bademme.

<sup>12</sup> Tá belá láhe an ndzedá-aatare bademme, a ba láhe-aatare:  
Ekka, ka edda una ndza ta icaktiya ba seke zhel kyáwe á sadake na. Bademme á hákuma á ba am erva á ña. Bademme á duksa á ba am erva á ña. Ka edda á ilmu, ka edda á ndzedá, hyakephye ge tá galakgálá emnde, ge tá zlebagzleba emnde bademme.

<sup>13</sup> Zlabe ádaliye yá cená ba tá belá láhe duksa-aha na a nderanaa Dadaamiya bademme. Kazlaña na am samaya, una áte haha, una am hude á haha, una an háye, bademme á názena a nderanaa Dadaamiya. A ba láhe-aatare:

Galaumigálá edda una am kurshi á sleksire na, antara edda una a gev ba seke egdza zhel kyáwe á sadake na. Ta emnde a dárádza ba itare, tá an dƙeƙeƙe, hákuma bademme á ba am erva-aatare. Galaumigálá ba itare, dem ba ge dƙeƙeƙe.

<sup>14</sup> \*Aamin, a ba duksa-aha ufade na tá an shifa na. Tepekke, á ba emgyegwar zála kul buwa ju ufade na keni á dem áhá, tá kezlater ugje ge tara slekse yaikke, antara egdza zhel kyáwe na.

## 6

### *Egdza zhel kyáwe á wárá dámshe-aha na vuye na*

<sup>1</sup> Daaci yá zhárá edda una tá daháná an egdza zhel kyáwe na, a fantau ge wera wakita na am erva-aara na. Ba a weraa dámshe á zunñwire an dámshe-aha vadale vuye na wá, yá cena ba palle á duksa-aha ufade na tá

an shifa na anƙwa á ndaha elva an ndzedá ba seke hula á samaya. A ba ɲane: Sesse!

<sup>2</sup> Estuwa ya kante ice wá, yá zhárá ba sesse belsa dzayye telle, antara ura áte iga. Edda una áte iga á belsa ɲanna an leka am erva, ta faɗanse ire an lánani. Edda-aara ɲanna slemidala jipu, a sessehe geni á de gá midalire zlaɓe ádaliye.

<sup>3</sup> Daaci egdza zhel kyáwe na a weraa dámshe á buwire, yá cená ba buwire á duksa-aha na tá an shifa á ndaha elva á ba an ká kwárá. A ba ɲane wá: Sesse!

<sup>4</sup> Kertenj sesse belsa umele kyanje antara ura áte iga. Ta fanem katsakar yaikke ge edda una áte iga á belsa ɲanna, ta vante hákuma ganakini a janaaja hairire am duniya baɗemme, tá cebaavecebe emnde am dágave-aatare.

<sup>5</sup> Egdza zhel kyáwe na a weraa keyire á dámshe, daaci yá cená ba keyire á duksa-aha ufade na tá an shifa na á ndáhá elva, a ba ɲane wá: Sesse! Yá zhárá ba sesse belsa duɲɲwe gyegunyiye, antara ura áte iga. Edda una áte iga á belsa ɲanna an daráme am erva-aara.

<sup>6</sup> Yá cená ba ndáhá elva duksa umele ba seke kwárá á urimagwe, a ba ɲane: Mbera á ura palle áte váha palle wá, a jauka am gane á gwázhama nagwadá palle, bi gane á gwasa nagwadá keye. Amá tara waye, antara mbazla wá, naba yaterya a njarinja, a ba ɲane.

<sup>7</sup> Daaci egdza zhel kyáwe na a weraa dámshe ufadire, yá cená ba ufadire-aatare ge duksa-aha ufade na tá an shifa na: Sesse! a ba ɲane.

<sup>8</sup> Yá zhárá ba sesse belsa umele, jili-aara izhegizhege, antara ura áte iga. Zhera á edda una áte iga á belsa ɲanna Emtsa. Anƙwa á ɗabaná fáyá am iga. Ta vaterte hákuma á ceba shifa á emnde an katsakar ge itare. Emnde umele, tá cebaterá an waya, emnde umele, tá cebaterá an lapikere, emnde umele keni tá cebateraaceba dabba-aha á kaamba. Daaci tá de keɗanaakeda itare kyalma á kyalma á duniya.

<sup>9</sup> Daaci egdza zhel kyáwe na a weraa dámshe ilyebire, yá zhárá ba shedekwe-aha á emnde na ndza ta cebateraa aɗaba ta lyevaa elva á Dadaamiya, ta anƙwa ndater elva á Dadaamiya ge emnde na, tá am sera á duksa na tá icaná sadake á dabba ge Dadaamiya átekwa na.

<sup>10</sup> Ta belu hula á ba an ndzedá, a ba itare: «Yaakadada á ɲere, ka cuɗeɗe, ka slejirire ba ekka. Ká ufa vaatara ge kyá shairiya á emnde na ta cebaa shifa-aha á ɲere am duniya na? Ká de fan vaatara zlaɗa áte itare?»

<sup>11</sup> Ta tegateraa zane dzayye ma ge ware-aatare keni baɗemme, ta bateraa: «Puwawansepuwe emtsaade ádaliye duksa á kure, zlaɓe njá á kure ɗemmeka una, kwa emnde na ta cebakuraa aɗaba elva á Dadaamiya. Sey má cebareceba egdzar mama-aha á kure emnde a fetarfe na jarauje, lauktu watse tá kya shairiya.»

<sup>12</sup> Daaci egdza zhel kyáwe na a weraa dámshe unkwahire, a naba gejaptehe ge duniya baɗemme á ba an ndzedá, vaciya nyefnye danɲwe gyegwenyiye ba seke jampi. Tere keni nyefnye kyanje hanje ba seke uzhe.

<sup>13</sup> Terlyákwa-aha keni tá geda á sem repepepepe ba seke egdza á náfá na á serbaná vaciya má á vátá effeya na.

<sup>14</sup> Samaya keni a faɗapte ba seke buce, a keɗehe ba estuwa. Tara wa-aha baɗemme, antara haha-aha na tá am dágave á háye-aha, tsaretse am sleɗe-aha-aatare baɗemme.

<sup>15</sup> Emnde baɗemme, an emnde na tá kwárá ire-aatare-ka, an náve-aha-ka, baɗemme zhagadarezhagade, de shabarevshabe am hwalakwa-aha áte

wa-aha. Antara ba slekse-aha á larde, ira mále-aha á ekse, antara mále-aha á sawji-aha, emnde a berba, ira emnde a ndzedá, bademme zlarzlálá á de shebe.

<sup>16</sup> Tá ankwá nater elva ge egdzar wa-aha, antara wa-aha sadadde, a ba itare an kyuwa: Zazawañerarzaze seke táslawa á kure. Shebawañerveshebe seke átuge ice á slekse yaikke na am kurshi, antara egdza zhel kyáwe na an erwaunde-aara na táslawa á kure.

<sup>17</sup> Adaba herzhe watse á maga hákuma-aara áte ñere, adaba jaaja erwaunde áte ñere. Ankwá ura watse á dzegwándzegwa tse vacite ñanna emtu, a ba itare.

## 7

### *Malika-aha tá fafa lámba á Dadaamiya áte emnde-aara*

<sup>1</sup> Am iga á una-aha ñanna maa, ya naa malika-aha ufade, tá tsaatse am karafke-aha ufade ge ekte á samaya. Ta ñanaahe effeya-aha gergere ufade na bademme, ganakini a sawka á sem duniya, ma áte haha, ma áte háye, ma áte náfa-aha keni.

<sup>2</sup> Ya nanna zlafe adaliye malika umele, á sawa á sa am gedí, am lámba á Dadaamiya na edda á shifa na am erwa. Daaci a kante kwára ba shagera ge dáha malika-aha na itare tá an hákuma á badza tara haha an yáwe na.

<sup>3</sup> A ba malika ñanna wá: «Fauka emtsaade erwa áte haha. Ma ge yáwe, ma ge náfa-aha keni fawaterfeka emtsaade erwa, sey má zlañeruzle ñere ge fafatera lámba-aha áte wafke-aha-aatare ge emnde a Dadaamiya á miya.»

<sup>4</sup> Cekwaangudí wá, yá cena tá biya kezlakula á emnde na ta fafaterte lámba á Dadaamiya áte wafke ñanna, ta emnde debu deremke an debu kul ufade ju ufade. Emnde ñanna bademme ta segáshe á ba am jeba-aha á \*Iserayiila-aha.

<sup>5</sup> Ta fafete lámba ñanna áte emnde á Yahuda, ta emnde debu kelaawa ju buwa. Ta fafete áte emnde á Raubain, ta emnde debu kelaawa ju buwa, ta fafete áte emnde á Gada, ta emnde debu kelaawa ju buwa.

<sup>6</sup> Ta fafete áte emnde á Asair, ta emnde debu kelaawa ju buwa, ta fafete áte emnde á Naiftalim, ta emnde debu kelaawa ju buwa, ta fafete áte emnde á Manasa, ta emnde debu kelaawa ju buwa.

<sup>7</sup> Ta fafete áte emnde á Simaun, ta emnde debu kelaawa ju buwa, ta fafete áte emnde á Laiwi, ta emnde debu kelaawa ju buwa, ta fafete áte emnde á Isakar, ta emnde debu kelaawa ju buwa.

<sup>8</sup> Ta fafete áte emnde á Jabulaun, ta emnde debu kelaawa ju buwa, ta fafete áte emnde á Yusufa, ta emnde debu kelaawa ju buwa, ira emnde á Bainjamain, itare keni ta emnde debu kelaawa ju buwa. Kwaya ñane emnde a \*Iserayiila na ta fafaterte lámba á Dadaamiya áte wafke na.

### *Nalgaadama á katafke á Dadaamiya am sleksire-aara*

<sup>9</sup> Am iga á una-aha ñanna maa, ya naa nalgaadama, baaka kezlakula-aatare dekideki, ta sawa am larde-aha á duniya bademme, jeba-aha á emnde bademme, ma una áme, ma emnde na tá ndáha elva a ekse-ara keni. Bademme á nánga á emnde ñanna a jamme á katafke á Dadaamiya am sleksire-aara, ta buwa antara egdza zhel kyáwe. Emnde ñanna bademme tá á ba am zane dzaydzaye, tá an erwa-aha á debina am erwa-aha-aatare bademme ge mára higa-aatare.



<sup>10</sup> Ta ketaa kwárá-aatare á dem zhegela, a ba itare: «A lyanjeraa ba Dadaamiya na náwa am sleksire-aara, ta buwa antara egdza zhel kyáwe baaka umele.»

<sup>11</sup> Malika-aha bademme ta jantaave ge Dadaamiya am sleksire-aara, antara emgyegwar zála kul buwa ju ufađe na, ira duksa-aha ufađe na tá an shifa am vuwa na. Daaci bademme-aatare reppe garaavege á dem áhá, tá anjwa kezlan ugje ge Dadaamiya na am kurshi á sleksire-aara na.

<sup>12</sup> Ta bántsa itare: «\*Aamin! Gálá wá, á zlayák ba ge ekka Dadaamiya. Ká an d'emdemire, ká an hákuma, ká an ilmu, ká an ndzeđa, ká an gázlagazla. Njá paslaká erva, njá slafaká we ba ge ekka palle, dem ba ge d'ekideki. \*Aamin!»

<sup>13</sup> Daaci, a ba palle á emgyegwar zála na á elvan ge iya: «Diyakaterdiya emtu emnde njanna tá am zane dzaydzaye na? Ta emnde-ara itare?»

<sup>14</sup> Ya njwanante: «Diyanaterka, ka slediyaterdiya ba ka ámbarka á nj.» Daaci a ba njane á elvan ge iya: «Una degiya emnde na ni ndza ta bashu zlađa yaikke am duniya, dete halavuwa á zlađa njanna keni gazlarka d'ekideki na. Itare ta emnde na ni revasereve zane-aha-aatare am uzhe á egdza zhel kyáwe, garanvege dzayye na. Amaana bararsebáre ervaunđe-aha-aatare am uzhe á Yaisu \*Almasiihu.

<sup>15</sup> Adaba una njanna, náwa itare saremsa á se katafke á Dadaamiya am kurshi á sleksire-aara. An vayi vacika tá maganá slera am mashidi-aara, á fateru hyema ba njane.

<sup>16</sup> Itare tegarevtege antara waya, antara ndera, ira kárá á vaciya. Ma jeba-ara keni baaka názu á de hyaterá lyuwa ge itare d'ekideki.

<sup>17</sup> Ya ndahanaa adaba uwe una? Adaba ba egdza zhel kyáwe na kwáye am dágave á kurshi-aha na una á de geva suni-aatare. Á de dáterá á dem tate á yáwe á shifa. Watse á de halatersa ba Dadaamiya an erva-aara yáwe á kyuwa am ice ge itare.»

## 8

### *Egdza zhel kyáwe anjwa á werá dámshe á vadale na á halavuwa átekwa*

<sup>1</sup> Am iga á una-aha njanna maa, egdza zhel kyáwe na a weraa dámshe vuyire. Dámshe na wá, á halavuhále átekwa. Am sarte na a werante na wá, bademme á názu am huđe á samaya tsaatse kedekke, á maga kyalma á saa baaka názu á gejava d'ekideki.

<sup>2</sup> Daaci yá zhárá ba malika-aha, ta vuye kalkale, tá tsaatse á katafke á Dadaamiya, ta tegaterem derkwákwá am erva.

<sup>3</sup> Anjwa malika umele zlađe adaliye, an egdza erba á dindar na tá d'iza kajiji am huđe-aara am erva, a de tsanve ge duksa na tá icaná sadake átekwa ge Dadaamiya na. Daaci ta halanu kajiji kwakya ge malika njanna, ganakini á d'izaná á katafke á Dadaamiya áte tate á icaná sadake njanna. Daaci ta weshapte estuwa tara yire á kajiji njanna, antara maduwa-aha á emnde na fartarfe á ba an jirire na.

<sup>4</sup> Daaci ta tsete estuwa tara yire á kajiji na, antara maduwa-aha á emnde a fetarfe á deza Dadaamiya.

<sup>5</sup> Daaci malika na, ba zlauzle am una njanna, a eksetaa egdza erba a d'iza kajiji na, a tsakem slaya á kárá na áte tate á faná sadake ge Dadaamiya na, a naba kyanaahe á sem duniya. Daaci njaanja tara hula á samaya, antara kárá á ráde, haha keni a naba gejava á ba an ndzeđa.

### *Ferta derkwákwá á Malika-aha vuye*

<sup>6</sup> Malika-aha vuye na ta tegaterem derkwákwá am erva na magarnaam-aga niya ge ferta derkwákwá-aha-aatare.

<sup>7</sup> Zunḡwe á malika-aha ḡanna a fertante náza-aara, wesharáptewesha tara nálandze, antara kárá, ira uzhe, tá anḡwa hya á sem duniya. An tega duniya kar keye, kar palle na an pesha an kárá, tara esseba, antara náfa-aha bademme tá an pesha.

<sup>8</sup> Buwire á malika-aha ḡanna keni a fertante derkwákwá-aara, ta mbar kárá ge daada duksa umele ba seke wa yaikke, ta deveze, ta eblyanme am háye.

<sup>9</sup> An tega háye-aha am duniya kar keye, kar palle na nyefnye uzhe háḡḡe, bademme á názena an matsaremátsa am háye-aha ḡanna. Paare-aha á yáwe keni bademme badzarevbadze am tate-aha ḡanna.

<sup>10</sup> Keyire á malika-aha ḡanna a fertante náza-aara keni, a ḡezlehe ge daada terlyákwá, á mba ba kárá bademme, daaci a eblyeme am kar palle á derve-aha yáwe, antara mánjebe-aha, tate á yáwe bademme, ḡane a badzeva yáwe kar palle am keye.

<sup>11</sup> Zhera á terlyákwá ḡanna wá, Agugu, amaana: yaiyaihire. Yáwe-aha am duniya bademme a tegese kar keye, kar palle na gevge yaiyaihe bademme ba seke wáye á dále, yaiyaihire á yáwe-aha ḡanna a cebaa emnde kwakya.

<sup>12</sup> Ufadire á malika-aha ḡanna ḡane keni a fertante derkwákwá-aara, ma ura-ara keni a tegese kar keye ge tara vaciya, antara tere, daaci vaciya keni kar palle gevge danḡwe, tere keni kar palle gevge danḡwe. Terlyákwá-aha keni ba estuwa: am keye, palle gevge danḡwe, am keye, palle gevge danḡwe, bademme ba estuwa. Daaci a gulaa estuwa parakkire á duksa-aha na tá am samaya na. Am kar keye, ta kedaa palle. Váha palle a tegese kar keye, am palle baaka parakkire ba cekwaanḡudfi keni. Vayiya keni ba estuwa ḡanna.

<sup>13</sup> Daaci ya ketaa ice á dem samaya wá, yá cena ba kyuwa á zele am samaya yiyiye jipu, herzhe á shanaasha samaya. Álawlawlawlaw, a ba zele ḡanna, paláse á kure kwa emnde na kwá áte haha! Anḡwa á tsekwa zlada yaikke má fertaranteferta malika-aha na jaruje na derkwákwá-aha-aatare!

## 9

<sup>1</sup> Kertenḡ fertanteferta názá-aara ilyebire á malika-aha ḡanna. Yá zhára ba terlyákwá umele á belá am haha, a eblyaa sawa am samaya. Ta vante egdza a tsekweram am erva ge ḡane, ge wera evege shagerka na baaka halavuwa á sladḡfire-aara dḡekidḡeki na.

<sup>2</sup> Ba a wertaa evege ḡanna wá, shelle ge yire, á segashe am hudḡe á evege ḡanna, ba seke yire á kárá na yaikke jipu na. A hedanuhe ge vaciya bademme, tábedámme sledḡe bademme.

<sup>3</sup> Daaci á kelá ba dikele á iwe-aha, á segashe am yire ḡanna, hyemhye am duniya bademme. Ta vaterte hákuma ge iwe-aha ḡanna ba seke názá á herdza-aha na tá am haha na.

<sup>4</sup> Ta bateraa a farka we-aatare dḡekidḡeki ma áte mása, ma áte náfa-aha keni, a wawarwáwa ba emnde na ta baaka an lámba á Dadaamiya áte wafke-aha-aatare na.

<sup>5</sup> Amá ganakini tá zlanazle ba dḡekidḡeki shifa am ura wá, varaterteka baráma-aara. Ta bateraa ba a magaraternaamaga paláse am tere ilyeḡe ḡanna. Iwe-aha ḡanna má warewa ura wá, zlada-aara ba kalkale antara zlada na á tapaná ura má waawa herdza.

<sup>6</sup> Am tere ilyebe ṅanna, emnde tá de katáná an kátá emtsa, amá watse baaka pute. Watse tá yekaná an yeka emtsa, amá watse á duka emtsa ádezeta.

<sup>7</sup> Iwe-aha ṅanna wá, tá gáráva an belsa-aha na má tá dem wáva na. Tá an duksa-aha umele ba seke dzakwa á sleksire na ta maganaa an dindar na am ire-aha-aatare. Wafke-aha-aatare tá gáráva an zála.

<sup>8</sup> Úgje-aatare ba seke úgje á ṅwasha, slare-aatare keni ba seke slare á ervare.

<sup>9</sup> Ta shabanve uksuwe-aha-aatare am duksa umele ba seke kyebebbe á íre. Hula á lyambáke-aatare ba seke hula á darkwa-aha na tá tađáná belsa-aha na tá hadzala á dem tate á wává.

<sup>10</sup> Iwe-aha ṅanna, itare tá wa ura an kataliya seke herdza. Tere ilyebe tá anṅwa á magaterá palása ge emnde an kataliya-aha-aatare.

<sup>11</sup> Tá an slekse-aatare yaikke arge itare. Slekse-aatare ṅanna wá, malika na á kwaraná ṅane evege shagerka na baaka halavuwa á sladfire-aara đekideki na. Slekse-aatare ṅanna wá, an elva á Ibraniṅkau tá đaháná an Abadaun, an elva á Yunaniṅkau wá, tá đaháná an Apauliyaum. (A ba zhera-aha ṅanna wá: Slebadza duksa.)

<sup>12</sup> A degáshe estuwa palása á zunṅwire áte una ni a ndahanaa zele ṅanna. Tá anṅwa sawa zladfa-aha umele zlađe ádaliye buwa.

<sup>13</sup> Daaci unkwahire á malika-aha ṅanna a fertante derkwákwá-aara ṅane keni. Ya ketaa ice wá, ya naa duksa na tá faná sadake átekwa ge Dadaamiya, na ta maganaa an dindar. Yá cena ba kwára á ura á segáshe am we á námbanwa-aha-aara ufadé kerde ge duksa na tá fa sadake átekwa na.

<sup>14</sup> A ba edda-aara á elvan ge malika ṅanna: «Palateraapálá malika-aha na ufadé na tá an ṅwada áte we á guwa na tá đaháná an Aifratis na.»

<sup>15</sup> Daaci ta palaterahe malika-aha na. Itare wá, ndza ta fáter ganakini slera-aatare sey tá maganá am iva ṅanna, am tere ṅanna, am hare ṅanna, antara am sarte ṅanna keni. Am sarte ṅanna wá, tá de ceba emnde kwakya am duniya. Am kar keye, kar palle na tá de ceba emnde ṅanna bađemme.

<sup>16</sup> Ta biyaa kezlakula á dikele á sawji-aha á malika-aha ṅanna tá áte belsa-aha na wá, ta meliyaun deremke buwa.

<sup>17</sup> Am wáháyu-aaruwa wá, ya náternaa belsa-aha, antara emnde na tá áte iga-aha-aatare bađemme. Emnde ṅanna tá am kyebebbe á íre an deva ba kyanṅe ba seke kára, zlađe ádaliye áte danṅwire seke yire á kára na yaikke vayvaya na, seke jili á yáwe á tambali zlađe ádaliye. Ire á belsa-aatare wá, seke ire á ervare. Á segashe ba kára, antara yire, ira \*baraudau am mbuwe-aha-aatare.

<sup>18</sup> Sabaaba-aha keye ṅanna, amaana: tara kára, antara yire, ira \*baraudau na á segashe am mbuwe á belsa-aha ṅanna, cebaaceba emnde kwakya. Am emnde keye, a jaa palle.

<sup>19</sup> Hákuma á belsa-aha ge magateraa palása ge emnde na wá, á ba am mbuwe, antara kataliya. Ágira kataliya-aatare wá, ba záhe surum-surume ge belsa-aha ṅanna, tá ceba emnde an ṅane.

<sup>20</sup> Aley, emnde na jaruje an shifa na magarka tuba đekideki. Itare tá kezlater ugje ba ge shaitaine-aha, tá maga ba hele-aha-aatare gergere. Hele umele tá maganá an dindar, umele tá maganá an lipela, umele ba náfa, umele nákwá. Duksa-aha ṅanna wallá tá nanna ice-ka, wallá tá cenáncena duksa á dem hyema-ka, tá zlaltezlálá-ka, uwe-ka.

<sup>21</sup> Zlaɓe ádalíye, emnde ɲanna tá ceɓa ba shífa, tá maga ba gwardzire, antara zawaríre, íra neylíre, tá yánka ɗekídeki.

## 10

### *Malika an egdza wakita*

<sup>1</sup> Am iga á una ɲanna maa, ya naa gwarda á malika umele zlaɓe ádalíye, á tsekwa á sa am samaya. Malika ɲanna an tsekwa am kumba, antara kataliyavere takarre am íre. Wafke-aara á maga wulwulíre ba seke vaciya, sera-aha-aara ba seke nara á kára.

<sup>2</sup> Malika ɲanna an egdza wakita am erva, wakita ɲanna á ba an wera. Sera á naɗafa-aara á tsaná am dagave á háye, sera á názlaba wá, kwaye á de tsaná áte haha ba yiyíye an háye.

<sup>3</sup> Ndasendahe elva-aara palle wá, zlála á kwára-aara ba seke kyuwa á ervare. Am iga á kwára-aara ɲanna, yá cena ba ɲwartenɲa válaha á samaya ta vuye.

<sup>4</sup> Yá kátá puwetepuwa názu ta ndahanaa válaha á samaya ɲanna ta vuye na, kertenɲ yá cena kwára umele zlaɓe ádalíye á ndahi elva á sa am samaya, á ba edda-aara: «Puweka elva ɲanna, a ɲinja á ba am huɗe á ɲa.»

<sup>5</sup> Daaci malika na sera-aara palle a tse am dagave á háye, palle áte haha na, a ketaa erva naɗafa-aara á dem samaya,

<sup>6</sup> a zu waɗa á katafke á Saksage na ma vaatara keni ɲane ba ɲja-aara, a nderanaa ba ɲane samaya, antara názu átekwa baɗemme, a nderanaa ba ɲane haha, antara názu átekwa baɗemme, a nderanaa ba ɲane yáwe, antara názu am huɗe-aara baɗemme na. A zu waɗa geni ba jirire duksa-aha ɲanna herzhe á magava, má zlaruzle malika-aha baɗemme ge ferta derkwákwá.

<sup>7</sup> A bá ɲane wá: «Ba máki fertanteferta vuyire á malika-aha derkwákwá-aara wá, Dadaamiya keni á zlanazle áte una ɲanna ge mága jirire á názena á kataná ɲane, ndza a bela emnde a slera-aara nabi-aha, ta se eɓbála na.»

<sup>8</sup> Daaci edda una ndza ya cenaa kwára-aara á ndahi elva á sa am samaya na, fiyantaufe zlaɓe ádalíye, a ba ɲane: «Edduwa lyevaalya egdza wakita na an wera am erva á malika na a tsa sera palle am dagave á háye, sera palle áte haha na.»

<sup>9</sup> Daaci duwa-aaruwa á de lyíya egdza wakita am erva á malika ɲanna. Viteva wakita na, á ba íya á elvan ge ɲane. A ba ɲane: «Náwa lyevaalya, zuze baɗemme, watse ɲenɲene am mbuwe á ɲa ba seke nama, amá watse á de gevge yayíaihe am kulmbe á ɲa ba seke ɗále.»

<sup>10</sup> Ya lyevaa egdza wakita na am erva-aara, ya zuhe. Ba jirire wá, ndza ɲenɲene am mbuwe-aaruwa ba seke nama, amá de gevge yayíaihe am kulmbe.

<sup>11</sup> Daaci, ta biya de emmága zlaɓe ádalíye nábiyire áte emnde a jeba gergere, áte larde-aha gergere, áte emnde a ndáha elva-aha gergere, antara slekse-aha-aatare baɗemme.

## 11

### *Seyde-aha buwa*

<sup>1</sup> Daaci ta fiyem zade á gamara am erva, slaɗɗe ba seke lále á kura duksa, ta biyaa: «De kursekure huɗe á mashidi an ɲane, kursekure antara duksa na tá faná sadake átekwa ge Dadaamiya na, kezlaterkezla emnde na tá maga maduwa am mashidi ɲanna baɗemme.

<sup>2</sup> Amá kureka huđe á riya-aara, fanuka hyema ge tate ñanna đekideki. Adaba yarateránya tate ñanna, antara huđe á berni cudedđe ñanna bademme ge emnde na đabarka Dadaamiya na. Watse tá de záná itare, tá de payáná itare an sera-aha-aatare am tere kul ufađe ju buwa.

<sup>3</sup> Amá watse yá bela seyde-aha-aaruwa, tá an tsakwa am bagwadza-aha ba estuwa. Am sarte ñanna, watse tá baláná ba itare waazu á elva-aaruwa am háre debu an deremke buwa an kul unkwaha ñanna.»

<sup>4</sup> Seyde-aha buwa ñanna wá, itare ta ba seke náfa-aha á juwe buwa, antara kára á fanus-aha buwa, tá á katafke á Dadaamiya.

<sup>5</sup> Máki ura á magaterá emtañkire wá, á naba segáshe kára am mbuwe-aatare, á ceba kelaade-aha-aatare ñanna, tá taa ñezleka đekideki, sey ba tá emtsa.

<sup>6</sup> Am zamáne-aatare na ni tá de maga nábiyire na, watse tá an hákuma jipu. Watse tá an hákuma á piyeta yáwe á samaya ganakini a hyeka đekideki; watse tá an hákuma á nyanve yáwe, á geva uzhe. Zlađe adaliye, watse tá an hákuma á sa sabaaba-aha gergere á sem duniya ge magateraa palása ge emnde, tá de magán ba seke una tá kataná itare.

<sup>7</sup> Má watse zlaruzle itare á balá elva á Dadaamiya wá, watse á sesse náza kaamba am evege shagerka na baaka halavuwa á sladđire-aara đekideki na. Watse á se wava dabba ñanna an itare, á de gáná ba ñane midalire, á de cebaterceba ba bukerđe.

<sup>8</sup> Amá emtsa-aatare watse tá yáterá á ba áte we á layye, am berni na ndza ta jaa edda-aatare áte dzañgala na. Adaba názu ta maganaa emnde a berni, watse tá đáhá berni ñanna an \*Saudauma, bi Misera.

<sup>9</sup> Emnde na tá am emtsa na wá, watse an piya ge hedaterhedfa. Watse tá se zharaterzhára emnde á sa am larde-aha gergere, emnde a jeba gergere, antara emnde a ndáhá elva gergere, emnde bademme tá de zhára ba emtsa-aatare am háre keye an kyalma.

<sup>10</sup> Watse bademme á emnde na tá am duniya na ervaunđe-aatare á de geva ba seke nama arge emtsa á emnde buwa ñanna. Emnde a há tá de maga muñri-aara, adaba ndza tá katerva ye kwakya áte ndáhá-aatare.

<sup>11</sup> Daaci am iga á háre keye an kyalma ñanna, Dadaamiya á de fertaterem puwa shifa zlađe adaliye á dem vuwa-aha-aatare, tá naba tsatsetehe. Daaci emnde na naráterna na gazlaregazla bademme.

<sup>12</sup> Ba itare keni tsaretse am haha, tá cena ba kwára á ura, á đaháterá á sa am samaya, a ba kwára ñanna á elvan ge itare: Dalauđalá ásehuna. Daaci ta naba ñgye á dem samaya am kumba, am ice á kelaade-aha-aatare bademme.

<sup>13</sup> Am sarte ñanna maa, a naba gejapte ge haha á ba an ndzedfa, am bere kelaawa an ñgerđfa palle, am bere kelaawa an ñgerđfa palle, huđe á berni ñanna bademme ba estuwa. Emnde debu vuye una matsaremátsa bademme. Daaci emnde na jaruje an shifa na gazlaregazla jipu, farantaufe gálá Dadaamiya geni Sleksa ba ñane palle, ankwá am samaya.

<sup>14</sup> A degashe estuwa palása buwire, amá keyire keni ankwá sawa ba kinamina.

### *Malika á ferta derkwákwá vuyire*

<sup>15</sup> Am iga á una ñanna maa, vuyire á malika-aha a fertante derkwákwá-aara keni. Daaci yá cena ba kwára-aha tá valaha á sawa am samaya, a ba kwára-aha ñanna: «Dadaamiya Yaakadada, antara edda una a eksesaa ñane farantaufe sleksire-aatare áte duniya náza ba ge đekideki.»



<sup>16</sup> Ba ɗarude itare maa, reppe puwaraapuwa emgyegwar zála na ta kul buwa ju ufade na tá am kurshi-aha á sleksire na á dem áhá, tá anƙwa kezlan ugje ge Dadaamiya, a ba itare:

<sup>17</sup> Dadaamiya Yaakadada arge duksa baɗemme, am fantaufe keni ndza ba ekka, kina keni ba ekka ɗanna. Njá anƙwa slafaká we aɗaba hákuma á ɗa na ni eptsakanaptsa duksa baɗemme á sem sera á ɗa na.

<sup>18</sup> Kwakya emnde am larde-aha gergere ndza ta magaa ervaunɗe an ekka. Kina wá, hyephye sarte á ɗa keni geni ká eptsaternaaptsa, hyephye sarte á ɗa ge kya shairiya á emnde a fáyá, hyephye sarte á ɗa ge tegateraa láɗá ge emnde a slera á ɗa nabi-aha, antara ge emnde á ɗa umele keni baɗemme, ge male-aha, antara emnde na garevka male-aha, emnde na tá an lyáwá á ɗa am ervaunɗe na baɗemme ká de tegateraa láɗá. Emnde a bádza duniya keni hyephye sarte á ɗa ge ká ɗgerɗateraangerɗa.

<sup>19</sup> Ba ɗarude itare wá, batanɗe a naba wertehe ge mashidi á Dadaamiya am samaya, antara ba nakwati am huɗe á mashidi ɗanna ura á nanna baɗemme. Nakwati ɗanna wá, á mára namána-aha na a ɗgudanaa Dadaamiya an emnde na. Am iga-aara, wesharáptewesha tara kára á ráde, antara válaha á samaya, nálandze keni ba seke una ni tá puwaná an puwa á sa am samaya, haha keni a naba gejapte ba ɗarɗare.

## 12

### *Mukse antara náza nye*

<sup>1</sup> Daaci marápsamáre najipu yaikke am samaya. Anƙwa mukse wá, a tsekweme am vaciya ákurá nanɗyuwe-aara, a puwete sera-aha-aara áte tere. Ákura náza faɗa ire-aara wá, an terlyákwá kelaawa ju buwa am ire. Una ɗanna dzakwa á sleksire-aara ge ɗane.

<sup>2</sup> Mukse ɗanna keni á huɗe, hyephye sarte-aara ge ya egdzere, ámbera anƙwa á hula ge zlaɗa a ya.

<sup>3</sup> Zlaɓe ádaliye, marápsamáre najipu umele yaikke á ba am samaya ɗanna. Ya naa ba dada náza nye, vuwa-aara an deva ba kyanɗe, an ire vuye á ba áte ɗane palle, antara derma-aha-aara kelaawa. Zlaɓe ádaliye, an dzakwa á sleksire am ire-aha-aara ɗanna vuye kerɗe.

<sup>4</sup> Kataliya á náza nye ɗanna shánaasha samaya, haa a bataa terlyakwa ba kwakya an ɗane á sem áhá. Am terlyakwa keye áte samaya, ɗane a betaa palle, am terlyakwa keye a betaa palle, baɗemme ba estuwa. Daaci a tsahe arge mukse na anƙwa á ya egdzere na, ganakini má watse yaaya egdza-aara ɗanna, watse á ndunde ɗane.

<sup>5</sup> Cekwaanɗuɗi wá, mukse na yaaya egdzere zhele, watse á kwará egdze ɗanna duniya baɗemme an zade á íre. Daaci ta eksante egdze ɗanna, kwaye ta naba danaa á de katafke á Dadaamiya am sleksire-aara.

<sup>6</sup> Emmarge egdzere maa, ɗane a kezlanaa á dem kaamba, á dete ɓálá na a tsatsanaa Dadaamiya ganakini á de fanu hyema áhuwa ge ɗane na. Watse á njá áhuwa am hare debu an deremke buwa an kul unƙwahe.

<sup>7</sup> Am iga á una ɗanna maa, njaanja wáva yaikke am samaya. Ba náza nye ɗanna zlaɓe ádaliye antara malika-aha-aara, tá anƙwa wawa antara \*Mikayiilu ɗane keni tá antara malika-aha-aara.

<sup>8</sup> Amá hyafka náza nye ɗanna áza \*Mikayiilu. Ngyaratersenɗye antara malika-aha-aara baɗemme, tá taa piyeteka ba sera-aatare keni am huɗe á samaya mazle-aara.

<sup>9</sup> Ta naba ngyanse estuwa dada náza nye nanna. Nane wá, tá eǵǵáhá zlaǵe an emgyegwe a záhe keni. Ta ngyaterse á segashe antara malika-aha-aara baǵemme. Zlaǵe áǵaliye, nane slekse á jini-aha, bi Shaitaine, una baǵemme ba zhera-aha-aara.

<sup>10</sup> Am iga á wáva-aatare nanna, ya cenaa ba kwára yaikke á valaha á sawa am samaya, a ba nane wá: «Kina wá, Dadaamiya maresemáre hákuma á sleksire-aara baǵemme, lyámilya ba ge ǵekidǵeki mazle-aara. Edda una a eksesaa nane na keni maresemáre-aara baǵemme, aǵaba kwaye ngyansengye edda á fida na am samaya. Ba edda una ni ndza an vayi vacika á se icateraare sera ge egǵzar mama-aha á miya áza Dadaamiya na.

<sup>11</sup> Amá egǵzar mama-aha á miya garega midalire. Názena ni itare ta gaken midalire na wá, ta gáná aǵaba uzhe á egǵza zhel kyawe, antara aǵaba seyǵire na ta maganaa áte elva á Dadaamiya, ta ndater ge emnde, ma emtsa keni eksaraarekse na.

<sup>12</sup> Aǵaba ngyaratersengye nanna wá, ekkure samaya-aha higauhiga. Ekkure emnde na kwá am huǵe á samaya-aha nanna keni higauhiga baǵemme. Amá palasa á kure kwa emnde na kwá áte haha, antara názena am huǵe á haye keni baǵemme. Ya ndaná aǵaba uwe una? Aǵaba kwaye tsekwátsekwá Shaitaine á ǵezekure, ankwá á tsekwá á ba an erǵaunǵe-aara, aǵaba ǵiyaadiya ganakini sarte-aara a juwa ba cekwaanǵuǵi.»

<sup>13</sup> Am nána náza nye na ganakini ngyaransengye á sete haha, a fantau ge baka mukse na a yaa egǵzere zhele na, ankwá á ǵabaná á dem kaamba.

<sup>14</sup> Mbate kertenǵ varanteva lyambake-aha á dada zele ge mukse na, geni á ngye an nane á dem tate na a tsatsanna Dadaamiya geni á ǵe geláná átekwá am iva keye an kyalma na. Áhuwa wá, á shanaaka emgyegwe a záhe nanna mázle-aara.

<sup>15</sup> Daaci ge baka mukse na wá, emgyegwe a zahe nanna a naba melese yawe wá, a naba gev guwa yaikke ganakini á ǵe ǵánǵa yawe á guwa mukse na.

<sup>16</sup> Amá: «Yá ankwá ya,» a ba haha, ankwá á melanumele ge mukse na. Daaci haha keni warta we-aara, a shu yawe na ni a maganaa náza nye na baǵemme.

<sup>17</sup> Daaci jaaja emtanǵkire náza nye na áte mukse na. A naba ǵatera wava ge egǵzara á mukse nanna mázle-aara, amaana: Emnde na ni lyarvaalye elva á Yaisu \*Almasiihu, tá ankwá á fansaarefe ge Dadaamiya á ba an jirire na.

<sup>18</sup> Á ba ankwá náza nye na a tsanu ge we á háye.

## 13

### *Náwa dabba-aha ta buwa*

<sup>1</sup> Am iga-aara maa, yá zhára ba ankwá á segashe dabba umele am háye, an ire vuye á ba áte nane palle, derma-aha-aara keni kelaawa. An ǵzakwa á sleksire áte derma-aha-aara nanna baǵemme, áte ire-aha-aara keni baǵemme ta pupuwete názu zlayeka ǵekidǵeki na ge zláza Dadaamiya an nane.

<sup>2</sup> Dabba nanna ya nanna na wá, tá gáraya an ubela, amá sera-aha-aara wá, ba seke sera-aha á kere á kaamba, we-aara keni ba seke we á ervare. Náza nye na a vanta zade-aara, antara sleksire-aara, ira hákuma-aara baǵemme ge dabba nanna.

<sup>3</sup> Ankwá palle am ire-aha á dabba nanna wá, ba seke ndza kyanamárekye, ba seke ndza emtsametsa ǵeme, amá mbaambe. Am

duniya bademme emnde tá maga ba najipu-aara, emnde bademme tá daba ba nane.

<sup>4</sup> Daaci emnde bademme tá anƙwa á kezlan ugje ba ge náza nye na, adaba a vanta nane hákuma ge dabba nanna. Tá anƙwa kezlan ugje ge dabba nanna keni, ta bantsa itare: Ware edda una ta kalle an dabba na náwa nane na? Ware edda una á hyephye seke nane?

<sup>5</sup> Dabba nanna shansha ndzedá á válya elva, antara mága kuravire áte Dadaamiya. A shaa ndzedá á mága una nanna, am tere kul ufaɗe ju buwa.

<sup>6</sup> Daaci a naba fantau ge valya elva áte Dadaamiya, a fantau ge nyanya zhera á Dadaamiya, antara tate na á njá Dadaamiya átekwa na, ira emnde na tá am samaya na bademme tá an nyainye.

<sup>7</sup> Dabba nanna wá, shánsa ndzedá ge wáwa an emnde na tá anƙwa daba Dadaamiya, a ganaa ba nane ndzedá zlaɓe ádaliye. Dadaamiya a naba vante baráma ge sha hákuma áte larde-aha bademme, antara emnde am ekse-aha gergere bademme, ma tá ndaha elva a eksa-ara keni, duniya bademme á ba am erva-aara.

<sup>8</sup> Bademme á emnde am duniya, watse tá kezlan ugje ba ge nane, sey ba emnde na ndza an puwa zhera-aha-aatare am wakita á egdza zhel kyawe na, itare wá, tá de kezlanka ugje. Am wakita nanna wá, an puwa zhera-aha á emnde na ni tá an shifa na á zleka na. Ta puwaterte daga am fakta á duksa bademme.

<sup>9</sup> «Edda una anƙwa hyema-aara wá, a effa ba shagera áte elva na yá ndahaná iya na:

<sup>10</sup> Edda una ta yanu ganakini watse á dem erva á kelaade-aha na, ma estara keni baaka pekyaa-aara. Iyau, edda una ta yanu ge katsakar, ma vaatara keni sey tá jana á ba an katsakar nanna, baaka pekyaa-aara dƙidƙi. Duksa palle ge emnde a daba Dadaamiya wá, a garevge emnde a farvaunɗe, a fartarefe áte Dadaamiya.»

<sup>11</sup> Am iga-aara wá, ya nanna zlaɓe dabba umele, nane a segashe am huɗe á haha. An derma buwa, derma-aha-aara á gáráva an náza á egdza zhel kyawe. Dabba nanna á ndaha elva, ndaha elva-aara ba seke názá á náza nye.

<sup>12</sup> Dabba nanna keni fantauka ba nane an ire-aara mága duksa. Hákuma á mága duksa-aara wá, ba kalkale an názá á dabba zunɗwire na. A magaa najipu-aha gergere á katafke á dabba zunɗwire, a hyaterarhe á ba áte laarire ge emnde bademme am duniya, geni sey tá kezlan ugje ge dabba zunɗwire na ndza ba seke kyanamárekye, ndza ba seke emsamtsa, amá mbaambe na.

<sup>13</sup> Kwakya najipu-aha na a maganaa buwire á dabba nanna. Nane a tsekwaá kára á sawa am samaya á sete haha áte ice á emnde bademme, antara najipu-aha umele gergere.

<sup>14</sup> Nane varanteva baráma ge mága najipu-aha nanna estuwa á katafke á dabba zunɗwire na. A badu emnde bademme an una nanna, a bateraa: «Nderaundera gáráva á dabba zunɗwire na ndza kyanamárekye an katsakar, ba seke ndza emsamtsa, amá mbáambe na, daaci kwá fansarefe.»

<sup>15</sup> Dabba nanna wá, ta naba bashanaa ge nane á fatanem effeya á shifa am vuwa ge hele nanna ta nderndera na. Gevge wá, anƙwa á ndaha elva hele na, ganakini emnde na má kezlaranka ugje ge nane wá, á cebaterceɓa bademme.

<sup>16</sup> Dabba nanna yá anƙwa ndahaná ya na wá, a hyateraarehe á ba áte laarire ge emnde bademme am huɗe á duniya, ganakini sey tá lyevalya lámbe-aara áte iga a naɗafa, antara áte wafke-aha-aatare bademme. Una

an male-aha-ka, an egdzara-ka, emnde a berba an talága-aha, emnde na tá kwára ire-aatare, an náve-aha, emnde bademme.

<sup>17</sup> Edda una má lyiyaaka lámba-aara wá, á taa shekweveka duksa, á taa veluka názá-aara keni d'ekideki. Lámba nanna wá, zhera á dabba nanna. Ankwa zlahe umele kezlakula, una nanna keni á mára ba zhera-aara nanna.

<sup>18</sup> Kezlakula na wá, sey á kyepkye enkale á edda-aara, lauktu á diyeddiye názu am huđe-aara. Kezlakula nanna wá, á maramiya tate na tá halavuwa átekwa emndimagwaha. Kezlakula-aara nanna deremke unkwaha an kul unkwaha ju unkwaha.

## 14

### *Láhe á emnde na tá an várá na am samaya*

<sup>1</sup> Am iga a una-aha nanna maa, ya ketaa ice á dem samaya, yá zhára ba tara egdza zhel kyawe áte ire á wa \*Siyauna, tá antara emnde debu deremke, an debu kul ufáde ju ufáde na ndza ta fafete zhera-aatare, antara Eddeñara áte wafke á emnde nanna.

<sup>2</sup> Yá cena ba kwára-aatare á sawa am samaya ba seke mága á yawe áte guwa yaikke. Ká kwára-aatare ba seke válahe á samaya, amá tá belá láhe, antara gadzavera-aha-aatare tá jante ge láhe am hula-aatare nanna.

<sup>3</sup> Una nanna tá bela láhe emnde debu deremke an debu kul ufáde ju ufáde na, tá ankwa gálá Dadaamiya am kurshi á sleksire-aara, ta jantaave duksa-aha ufáde na tá an shifa am vuwa, ira emgyegwar zála kul buwa ju ufáde na. Láhe nanna wá, láhe anwaslire, baaka ura á diyeddiye láhe-aatare nanna d'ekideki, sey ba emnde nanna ta varaterse á sa am duniya na.

<sup>4</sup> Sey ba itare ta emnde na ta tsufete vuwa-aatare am cufed'fire, farka erva-aatare áte mukse d'ekideki na. Sey ba itare ta emnde na ta varaterse itare am dagave á emnde na tá am duniya na, tá ankwa d'aba ba egdza zhel kyawe ma á dem tate-ara keni. Itare wá, tá átuge tara Dadaamiya antara egdza zhel kyawe.

<sup>5</sup> Itare wá, ta emnde na ndza cenaranka elva fida am mbuwe-aatare d'ekideki, ta emnde cufed'fe.

### *Malika-aha keye an slera-aha-aatare*

<sup>6</sup> Daaci ya ketaa ice, yá zhara ba ankwa á ngye malika umele yiyiye jipu herzhe á shanaasha samaya. Malika nanna ankwa á saterá labáre á higa ge emnde na tá am duniya. Labáre nanna baaka zle-aara d'ekideki. Á saterán ge emnde a larde antara jeba gergere, ma tá ndaha elva-ara keni. Am duniya bademme, á saterá ba labáre nanna ge emnde.

<sup>7</sup> Malika nanna a ketaa kwara-aara ba shagera, a ba nane á elvan ge itare: «Kuvaukuva Dadaamiya, galaugála Dadaamiya am yaikkire-aara, adaba hyephye sarte-aara ge mága shairiya á emndimagwaha. Kezlawankezla ugje ba ge nane edda una a nderaa samaya, antara haha, a magaa tate-aha á yáwe bademme na.»

<sup>8</sup> Kertenj a d'abemhe ge buwire-aara, a ba malika nanna: «Kina wá, zlauzle \*Babila mazle-aara, á de mbed'a berni yaikke na. Nane a hyante shagerkire-aara áte larde-aha bademme, haa a jatera an ja ge emnde ba seke mbazla.»

<sup>9</sup> Am iga a malika-aha ta buwa na wá, a d'abateremhe ge malika ge keyire. Nane keni a ketaa kwara-aara ba shagera, a ba nane: «Ma ware una a kezlankezla ugje ge dabba nanna, antara gárava á dabba nanna, ma

ware edda una a lyevaa lám̄ba á dabba ɲanna áte iga a naɗfafa-aara, bi áte wafke-aara, má ta magaa una ɲanna,

<sup>10</sup> daaci tá de shá palása áza Dadaamiya aɗaba jaaja ervaunɗe. Á de jaterá á ba an ja palása ba seke mbazla na karanteka yáwe ɗekideki na. Ma ware edda una maganaamaga duksa á dabba-aha ɲanna, edda-aara á dem kára, kára ɲanna an wesha an \*baraudau, daaci á maga palása-aara á katafke á malika-aha á Dadaamiya, antara egdza zhel kyáwe.

<sup>11</sup> Ma vaatara keni yire á kára ɲanna á wálá á ba an wálá shelle á dem zhegela, tá maga palása-aatare am huɗe-aara. Baɗemme á emnde na ni kezlarankezla ugje ge dabba ɲanna, ma ge hele-aara na keni, bi má lyarvaalya lám̄ba-aara na áte vuwa-aatare, watse baaka puwansepuwe-aatare ɗekideki, an vayi vacika baɗemme tá shá ba zlada.»

<sup>12</sup> Aɗaba una ɲanna wá, ekkure emnde na kwá aɲkwa ɗaba Dadaamiya, fakurtarefe áte Yaisu an jirire na wá, sey kwá gevge emnde a farvaunɗe ba shagera.

<sup>13</sup> Daaci yá cena ba kwára umele zlaɓe ádaliye á sawa am samaya á ba an ndzedá. A biyantsa kwára ɲanna: Puwetepuwa una: Geɗa wá, watse aɲkwa áza emnde na tá emtsa am erva á Yaakadada na, a ba ɲane. Daaci a ɲutehe ge Shedefke Cufedɗe: «Una ba estuwa, a puwaransepuwe, aɗaba zlazladire á slera na ta maganaa itare na á keɗeka.»

#### *Dadaamiya, antara emnde am halavuwa á duniya*

<sup>14</sup> Am iga a una-aha ɲanna wá, ya ketaa ice zlaɓe ádaliye wá, yá zhára ba kumba dzayye ba telle. Aɲkwa duksa umele a njete áte kumba ɲanna, duksa ɲanna ba seke urimagwe. An dzakwa á sleksire ta maganaa an dindar am ire-aara, antara náza wá mása an slare jipu, a ɲanaahe am erva.

<sup>15</sup> Daaci yá zhára ba sesse malika umele am mashidi, a ba ɲane á elvan ge edda una á njá áte kumba na á ba an ká kwára: «Werawera slakslakire áte duniya baɗemme, hyephye sarte a hálá duksa á se mba, eksanteksa náza wá mása á ɲa, ezslálá á de ica hiya.»

<sup>16</sup> Daaci a naba huviyante dada náza wá mása-aara ge edda una áte kumba na, a zlawanme am duksa na áte haha, kertenɗ baaka an ica duksa baɗemme.

<sup>17</sup> Yá zhára sesse malika umele keni á ba am mashidi ɲanna am samaya na, ɲane keni an dada náza wá mása-aara, sláre jipu, a ɲanaahe am erva.

<sup>18</sup> Sesse malika umele zlaɓe ádaliye am huɗe á duksa na tá faná sadake ge Dadaamiya átekwa na. Malika ɲanna wá, male á kára baɗemme. A ba ɲane á elvan ge ukfeɲara na an náza wá mása am erva na, á ba an ká kwára: «Egdzara á náfa-aha na tá herɗaná emnde am duniya baɗemme navene, ekka keni de eɗɗatsa an názá wá mása á ɲa.»

<sup>19-20</sup> Daaci ɲane keni naba huviyante náza wá mása-aara, a tsakaa egdzara áte náfa-aha ɲanna am duniya baɗemme. Kwaye a de ndakanaa am tate á beca egdzara á náfa. Tate na ni tá beca egdzara á náfa átekwa na wá, kwaye áte iga a ekse. Am sarte na tá aɲkwa beca egdzara á náfa ɲanna baaka duksa umele, á kela ba uzhe ba kyanɲe ba seke yáwe á kela, haa a magaa guwa yaikke. Yiyire á guwa ɲanna kilaumaiter deremke keye. Sledɗire-aara keni a ektseve ba cekwa am wálá á ura. Una-aha ɲanna baɗemme na wá, á kwaramise ba názu watse á magaterná Dadaamiya ge emnde na ni tá aɲkwa am ervaunɗe-aara ge mageteraa palása am halavuwa á duniya.



## 15

### *Malika-aha tá an zlakta á masiba-aha*

<sup>1</sup> Am iga á una ñanna maa, ya naa ba marápsemáre najipu umele am samaya. Ya naa malika-aha ta vuye, masiba-aha keni vuye tá an ñane. Á halavuhále masiba-aha áte una ñanna, ervaunǵe á Dadaamiya keni baaka mazle-aara am iga á una ñanna.

<sup>2</sup> Daaci yá zhára ba duksa umele ba seke háye, amá anƙwa á maga wulwulire ba seke kweteram, an wesha an kára am huǵe-aara. Zlaǵe ádaliye, ya náternaa emnde na garega midalire arge dabba, garega midalire arge gáraǵa á dabba ñanna, itare lyiyarka lámǵa á dabba ñanna zhara-aara kezlakula na. Ya náternaa tá anƙwa á tsaatse áte we á háye ñanna ba seke kweteram na, tá an gadzavera-aha-aatare am erva, a vatertaa Dadaamiya.

<sup>3</sup> Tá anƙwa ǵela láhe á Muusa sleslera á Dadaamiya, antara láhe á egdza zhel kyawe. A ba láhe-aatare:

Dadaamiya Yaakadada, ba ka palle una ka edda á hákuma áte duksa baǵemme. Slera á ña ge ekka, ǵaaka kalle-aara an shagerire. Slera á ña, slera yaikke. Ka slekse á larde-aha baǵemme. Baǵemme á názena ká maganaa ka, ká maganá á ba áte unǵule-aara, ba ekka una ka edda á jirire.

<sup>4</sup> Yaakadada, ekka keni anƙwa ura á kuvanƙa emtu? Anƙwa edda una á kezlanƙa ugje emtu? Baǵemme á larde-aha watse tá se ba am sera á ña, tá se galakǵalá. Aǵaba ba ekka palle una ka cuǵeǵe. Názu ká maganá ka am bereka. Baǵemme ká anƙwa maganá á ba áte unǵule-aara.

<sup>5</sup> Am iga á una ñanna zlaǵe ádaliye maa, ya ketaa ice á dem samaya wá, yá zhára ba we á mashidi am samaya an wacene. Am huǵe á mashidi ñanna, anƙwa egdza mashidi á nalba na tá ja ire tara Dadaamiya antara emndimagwaha amkwa na.

<sup>6</sup> Daaci yá zhára ba malika-aha vuye na tá an masiba-aha na tá anƙwa segashe am mashidi ñanna. Tá an tsekwa am nanǵyuwe dzaydzaye ba telle, áte leǵeǵire, ta ngwadese uksuwe-aha-aatare an kanda á dindar.

<sup>7</sup> Daaci duksa-aha na tá an shifa na, palle-aatare wá, a tegateraa egdzara erba-aha ta maganaa an dindar ge malika-aha ñanna. Egdzara erba-aha ñanna tá an naha degwun á Dadaamiya ba caicare an we-aara, Dadaamiya na an shifa, ma vaatara keni ba ñane.

<sup>8</sup> Daaci, baǵemme á huǵe á mashidi na an naha an yire. Yire ñanna wá, hákuma, antara ǵemǵemire á Dadaamiya. Palle á ura á dzegwándzegwa dem mashidi ñanna ǵaaka, sey má zlaruzle malika-aha ñanna ta vuye na ge mága masiba-aha-aatare baǵemme.

## 16

### *Malika-aha tá de puwa masiba-aha am duniya*

<sup>1</sup> Daaci yá cena ba kwára yaikke, á ndaha elva á sawa am huǵe á samaya, a ba kwára ñanna á elvan ge malika-aha na ta vuye na: «Zlauzlálá á de puwa degwun-aha á Dadaamiya na am egdzara erba-aha na, de puwawpuwa baǵemme á dem duniya.»

<sup>2</sup> Daaci zunǵwire á malika-aha ñanna a de puwanve náza-aara á dem duniya, sesse wige-aha áte emnde na lyarvaalya lámǵa á dabba áte vuwa-aatare, kezlarankezla ugje ge gáraǵa á dabba ñanna. Wige ñanna zlazlaǵa á we jipu.

<sup>3</sup> Daaci buwire á malika-aha ñanna a de puwanve náza-aara keni, ñane a de puwanaa á dem háye. Háye-aha bademme nyairevnye uzhe, ba seke uzhe a emtsa, bademme á názena an shifa na emtsaremtsa am huđe á háye-aha ñanna.

<sup>4</sup> Daaci, keyire á malika-aha ñanna keni a de puwanve náza-aara á dem derve-aha, antara tate-aha á yáwe bademme, yáwe-aha bademme ta naba nyef uzhe ba kyanñe.

<sup>5</sup> Yá cena ndaha elva á malika umele, ñane wá, male á yawe-aha bademme, a ba ñane wá: «Ekka Dadaamiya, ka cudedde. Kwaye am fakta, sem kina keni ba ekka ñanna. Shairiya á ña ká ankwá maganá áte unñule-aara.

<sup>6</sup> Adaba emnde ñanna ndza ta puwa uzhe á emnde á ña, ndza ta puwa uzhe á nabi-aha á ña. Daaci má vatena ká ankwá vaterite uzhe geni a sharushe wá, una tá shá nampire á názena ndza ta maganaa itare na.»

<sup>7</sup> Daaci yá cena ba kwára umele zlafe adaliye á ba an ndzeda, á segashe am duksa na tá faná sadake ge Dadaamiya átekwa na, a ba kwára ñanna wá: «Ba estuwa Dadaamiya Yaakadada, ká an hákuma ba ekka palle, ka slejirire, shairiya á ña á ba áte unñule-aara.»

<sup>8</sup> Daaci ufadire á malika-aha ñanna keni a de puwanve náza-aara. Ñane, kwaye a de puwanaa áte vaciya. Daaci varanteva baráma ge vaciya, ganakini a farfe ge mbera kára-aara ba shagera áte emnde am duniya.

<sup>9</sup> Am emnde taparántápá warwarire á vaciya, itare ta fantau ge zláza Dadaamiya kelaa bademme á masiba-aha á ba am erva-aara na. Dzamarka áte yaikkire á Dadaamiya, magarka tuba arge haypa-aha-aatare.

<sup>10</sup> Daaci ilyebire á malika-aha ñanna a de puwanve náza-aara keni. Ñane, a de puwanaa áte kurshi á sleksire á dabba yaikke na. Daaci a naba tsekwa ge tabedammire á dem kwára-aara bademme, emnde tá datsa ba nara an slare ge sha zladá.

<sup>11</sup> Aley kwalarevkwále ge tuba. Baira itare tá zlazla Dadaamiya adaba wige-aha na áte vuwa-aha-aatare, antara palase na tá ankwá á maganá itare na.

<sup>12</sup> Daaci unkwahire á malika-aha ñanna keni a de puwanve náza-aara. Ñane, a de puwanaa am guwa yaikke na tá dfahaná an Aifratis na. Daaci a naba derehe ge yawe am guwa yaikke ñanna bademme, haa slekse-aha umele am gedí sharánsha baráma ge sawa ásehuna mazle-aara.

<sup>13</sup> Daaci yá zhára ba jini-aha ta keye, tá gárava an mugdza-aha. Palle-aatare, a segashe am mbuwe á náza nye, palle, a segashe am mbuwe á dabba yaikke, palle keni a segashe am mbuwe á nabi fida.

<sup>14</sup> Bademme ba jini-aha á shaitaine na mbarsembe mága najipu-aha kelaazare na. Ba jini-aha ñanna una watse tá dem slekse-aha á larde bademme, watse tá jatermaare átirpalle ganakini tá wava an Dadaamiya Saksage na hákuma bademme á ba am erva-aara na. Una ñanna á de magava am hare yaikke na Dadaamiya á de mára hákuma-aara arge duksa bademme na.

<sup>15</sup> «Ay degiya, faufa hyema ba shagera, watse yá sawa an ila ba seke neyle. Gedá wá, watse ankwá áza edda una paaka háre, fanufe hyema ge nangyuwe-aara na. Ñane wá, yá se bereka an ukhyiye dey, á demka am zherwe yaikke.»

<sup>16</sup> Jini-aha ñanna wá, kwaye ta de jemaa slekse-aha ñanna am tate na tá dfaháná an Harmagaidaum an elva a Ibraniñkau na.

<sup>17</sup> Daaci vuyire á malika-aha ñanna, ñane keni a de puwanve náza-aara am zhegela ba estuwa, yá cena ba kwára yaikke á sa am huđe á mashidi.

Kwára ñanna a segashe am tate á kurshi á sleksire á Dadaamiya. A ba ñane wá: «Zlauzle áte una mázle-aara.»

<sup>18</sup> Daaci njaanja válaha á zhegela, antara kára á rade, a naba gyaigyajte ge haha á ba an ndzedá ba ñárnare. Daga ta nderaa estuwa urimagwe am duniya keni ndza gyaigyajteka haha estuwa ðekideki.

<sup>19</sup> A naba tapse ge berni yaikke gergere keye daga á sawa am huðe á haha baðemme. Berni-aha umele na ni tá am huðe á duniya na keni baðemme badzarevbadze. Afaba zlaðe seska emtañkire na ta maganaa emnde a \*Babila ñanna am ervaunðe á Dadaamiya. Afaba una ñanna, añkwa á magaterá palása, tá taa kanteka ba ire keni ge zlaða ñanna, ba seke emnde na a cebateraa mbazla na karemka yawe am huðe-aara ðekideki na.

<sup>20</sup> Wa-aha baðemme, antara ba haha-aha na am dáðave á háye-aha keni tsaretse am sleðe-aha-aatare, meðaremeða ba estuwa.

<sup>21</sup> Nálandze sadadðe a naba fantau ge puwa á sawa am samaya á sa arge emnde, ðemðemire á palle ba seke nákwá á uvera. Emnde baðemme tá zlazla ba Dadaamiya afaba zlaða á nálandze ñanna jauje ge ndzedá.

## 17

### *Elva a berni yaikke na ta fante zhera á zawarire*

<sup>1</sup> Am iga a una ñanna maa, palle á malika-aha vuye na ndza ta tegaterem erba á masiba-aha am erva na a se ðahite, a ba ñane: Sawa náwa yá maraká zlaða na ni watse á shaná mukse záware ñgelawa na. Amaana: Berni yaikke ta maganaa áte we á háye-aha gergere kwakya na.

<sup>2</sup> Duwa á slekse-aha á larde-aha baðemme, ta de magaa gwardzire an mukse zaware ñgelawa ñanna, amá a cebaa emnde am duniya ba seke mbazla na karemka yawe ðekideki na. Estuwa, á ba elva á malika ñanna.

<sup>3</sup> Daaci a naba tsekwiyarhe ge Shedekwe Cufedðe, daaci a naba eksite ge malika ñanna, kwaye a diya á dem huðe á kaamba. Ya naa ba mukse umele am kaamba ñanna, a njeta áte iga á dabba, dabba ñanna ba háñje. Ire vuye á ba áte dabba ñanna palle, derma-aha-aara kelaawa. Baðemme a vuwa-aara, an puwa ba zhera-aha na zlayeka ðekideki na ge zláza Dadaamiya an ñane.

<sup>4</sup> Mukse na áte iga-aara na keni maa, á tsekwa am nanjyuwe lefedlefedðe buwa. Nanjyuwe-aha-aara ñanna bukerðe ba jili hanje. Palle, hanjire-aara ba seke makala á iga a bere, amá palle na ba hanje. Vuwa á mukse ñanna baðemme ba náza ñgelawire: Kazlaña á dindar, antara naberasla, antara náza hyema zarizariya baðemme, ira erba á dindar-aara a ñanaahe am erva. Añkwa laakire an naha am erba-aara ñanna. Duksa ñanna wá, zawarire na a maganaa ñane baðemme na.

<sup>5</sup> Añkwa zhera ta puwete áte wafke á mukse ñanna, amá elva am huðe á elva. Ákyiye wá: «\*Babila berni yaikke na wá, ñane emmarge zaware-aha, antara shagerkire na tá maganá am duniya baðemme.»

<sup>6</sup> Ya naa mukse ñanna ðalanemðála uzhe á emnde á Dadaamiya am ire, uzhe á emnde na shebarka elva a Yaisu na. Ba nanna-aaruwa, yá maga ba najipu-aara.

<sup>7</sup> «Ká maga najipu á uwe ka,» a ba malika na á elvan ge iya, «naba effa ervaunðe. Añkwa duksa palle yá kwaraksekwáre. Kwaye tara mukse ñanna, antara dabba na á njá átekwa, antara ire-aha á dabba ñanna vuye na, ira derma-aha kelaawa na, baðemme yá ndaksendáhe názu am huðe-aara.

<sup>8</sup> Dabba ɲanna ka naaná ka na wá, ba dabba na ndza an shifa, amá kina baaka na. Watse á sesse am evege shagerka na baaka halavuwa-aara ɔekidɔeki na, amá á se haraaka kwakya mázle-aara, tá se kedanaakeda shifa-aara bademme. Emnde a duniya na puwarteka zhera-aha-aatare am wakita á shifa daga am fakta á duniya na wá, itare watse tá maga najipu kwakya áte dabba ɲanna. Adaba werre, ndza ankwá an shifa, amá kina baaka, aley watse á sesse zlaɓe ádaliye.»

<sup>9</sup> A biyántsa zlaɓe ádaliye, a ba ɲane: «Duksa-aha na náwa ɲane na wá, sey á hyephye enkale á edda-aara lauktu á cenáncena. Ire-aha á dabba ɲanna vuye na wá, á mára egdzar wa-aha vuye na a njetaa mukse ɲanna atekwa na. Zlaɓe ádaliye, á mára slekse-aha sadadde vuye.

<sup>10</sup> Ilyeɓe-aatare wá, daredde slekse-aha ɲanna. Kina wá, unkwahire-aatare kina am sleksire. Amá una watse á sawa ge vuyire na á se haraaháre ba cekwa am sleksire ɲanna.

<sup>11</sup> Dabba ɲanna ndza ankwá, amá kina baaka na wá, ba ɲane an ire-aara una slekse ge tiisire, ɲane keni ba palle á slekse-aha ɲanna ta vuye na. Má watse sessa ɲane wá, tá se ba ekkedá ba ɔekidɔeki.

<sup>12</sup> «Derma-aha kelaawa na ka nateraa ka na maa, itare tá mára slekse-aha kelaawa na watse tá sawa á katafke na. Má watse saremsa itare, Dadaamiya á de vaterte sarte ba cekwaangudí ge mága sleksire-aatare antara dabba ɲanna.

<sup>13</sup> Slekse-aha kelaawa ɲanna wá, watse tá jema ye-aatare palle, sleksire-aatare bademme, watse tá maganá ba ge dabba ɲanna palle.

<sup>14</sup> Itare bademme na, watse tá gwaare ba ge egdza zhel kyawe an wáva. Amá watse á de gáná ba egdza zhel kyáwe na ndzedá, tá antara emnde-aara na a dzeratersaa ɲane, a ɔatersaa ɲane, tá ankwá á dabaná an ervaundé-aatare palle na. Á de gáná ba ɲane ndzedá, adaba ɲane Slekse arge slekse-aha bademme, Yaakadada arge dada-aha bademme.»

<sup>15</sup> A biyántsa malika ɲanna zlaɓe ádaliye, a ba ɲane wá: «Háye-aha ɲanna ka naaná ka, á njá mukse ɲanna áte itare na wá, á mára emnde a larde-aha gergere, emnde a jeba gergere, antara emnde a ndáhá elva-aha gergere bademme.

<sup>16</sup> Derma-aha á dabba ɲanna kelaawa, antara ba dabba ɲanna an ire-aara, watse tá gwaare ge mukse záware na an degwune, watse tá zuze áte há-aara bademme, watse tá yana á ba an ukhyiye dey. Ba hyuwa á vuwa-aara keni watse tá zuze, tá de zlanazle an kára ba ɔekidɔeki-aara.

<sup>17</sup> Adaba a maganaa ba Dadaamiya slera-aara am ervaundé á slekse-aha ɲanna, ganakini tá ɲgudá ye-aatare palle, tá maganá sleksire-aatare ba ge dabba ɲanna palle. Dadaamiya a magaa una ɲanna geni ta maganaamaga názena á kataná ɲane, dem sarte na má gevge názena a ndaasa ɲane.

<sup>18</sup> «Mukse ɲanna ka naaná ka na wá, ɲane á mára berni yaikke. Bademme á slekse-aha na tá am duniya na tá á ba am sera-aara.»

## 18

### *Palase na á de maganá Dadaamiya ge \*Babila*

<sup>1</sup> Am iga a una ɲanna maa, yá zhára ba malika umele á tsekwa á sawa am samaya. Hákuma, antara ɔemɔemire-aara hyemhye am huɔe á duniya bademme.

<sup>2</sup> Malika ɲanna a ketaa kwára-aara á ba an ndzedá, a ba ɲane: «Kina wá, zlauzle \*Babila mázle-aara, á de mbedá berni yaikke. Daaci gevge

tate á njá á shaitaine-aha, jini-aha, antara yiye-aha na ta shagerka-aha, wayarka emnde na tá njá am huđe-aara.

<sup>3</sup> Adaba ñane a ganve ire-aara ba seke mukse zaware, slekse-aha á duniya bađemme ta naba magaa gwardzire an ñane, zawarire-aara a ceɓaa emnde a larde bađemme am duniya ba seke a ceɓateraa ba mbazla. Emnde a tsakala am duniya bađemme garega nalmáne an mukse na, adaba ñane wayaawáyá za emtakire á duniya bađemme.»

<sup>4</sup> Daaci yá cena ba kwára umele zlaɓe adaliye á sawa am samaya á ba an ndzedá, a ba ñane: «Ekkure emnde-aaruwa bađemme, sawesse am berni na! A ndebakurveka haypa-aatare, antara geni a sharkurka palase-aatare keni.

<sup>5</sup> Adaba hyaahya haypa á berni ñanna, de shanaasha Dadaamiya am samaya, shagerkire na tá maganá itare na á segasheka am ervaunde á Dadaamiya ba estuwa.

<sup>6</sup> Sey tá magateránmaga palase ge emnde ñanna ba seke una ndza ta magateranta itare ge emnde umele na. Baira a jaranuje ge una ni ndza ta magateranta itare ge emnde ma ser buwa keni. Ba ire keni a karanteka ge zlaɓa ba seke emnde na a ceɓateraa narge na.

<sup>7</sup> Ba seke una ñane zauze emtakire á duniya kwakya na wá, zlaɓa keni kwerawanaakwera á ba áte una ñanna, magawantemága palasa ba shagera. Adaba a bántsa am ire-aara: Iya ganevka seke weggye a mukse, ya slekse ba iya an ire-aaruwa, á jañerma uwe antara kyuwa ba ðekideki.

<sup>8</sup> Adaba una ñanna wá, sey tá se gwargwe masiba-aha saɗaɗɗe ge berni ñanna á ba áte háre palle. Tá se gwargwe tara lapikere, antara emtsa, ira waya, lauktu watse tá zlanazle an kára ba ðekideki. Adaba Dadaamiya Yaakadada, sey ba ñane palle an sleksire-aara ɓaaka umele, á de ndahaná ba ñane názu tá maganá ge berni ñanna.»

<sup>9</sup> Má watse slekse-aha á duniya naránna yire á kára na á za berni ñanna wá, watse tá puwumpuwa erva am ire, tá tsaka ɗákwa, tá kyuwa gwardzire na ndza ta maganaa antara berni ñanna, ira emtakire á duniya na ndza ta nanaa itare áhuwa ñanna bađemme, adaba berni ñanna zauze kára.

<sup>10</sup> Kwaye watse tá tse yiye ge lyawa á zlaɓa, tá ámbera fa hula: «Alawlawlaw! Baaka berni yaikke! Nja seke \*Babila na ni shekwaaka ba ðekideki keni?»

<sup>11</sup> Ba estuwa ge emnde a tsakala na tá am duniya bađemme keni, tá de puwa ba erva am ire, tá de tsaka ɗákwa ge kyuwa berni ñanna, adaba ta ɓaaka emnde a gáne-aatare.

<sup>12</sup> Adaba itare tá aɗkwa tsakala duksa kwakya áhuwa. Tá tsakala dindar, antara lipela, ira jeba á nákwaha umele aɗkwa gergere kwakya. Tá tsakala sandá-aha, lefedlefedire-aatare ba seke uwe. Umele-aha-aatare jili haɗɗe, haɗɗire-aara ba seke makala á iga a bere, umele wá, ba haɗɗe. Zlaɓe adaliye, tá aɗkwa tsakala jeba á náfa-aha umele an ɗarádza jipu, antara egdzar duksa-aha na tá maganá an sláre á guwe, umele tá maganá an náfa na an ɗarádza jipu na, umele á duksa-aha ñanna tá maganá an verzagane, umele íre danɗwe, umele tá maganá an jeba á nákwaha umele aɗkwa an ɗarádza jipu.

<sup>13</sup> Zlaɓe adaliye, tá aɗkwa tsakala názase gergere kwakya áhuwa: Umele yawe-aara, umele waye á gáná áte vuwa, umele tá ɗisaná am kára ba seke kajiji, tá aɗkwa tsakala wáye á ɗále, antara nalkáme, antara ukpa-aara, ira mbazla. Tá aɗkwa tsakala esla-aha, kyáwe-aha, belsa-aha, ira darkwa-aha, antara ba urimagwe keni: Náve-aha, antara emnde na tá



halaterá áte we á wáwa. Baaka názu tsakalarka itare áhuwa. Adaba una nanna tá kyuwa berni nanna.

<sup>14</sup> A ba itare: «Kina kazlaŋa zarizariya na ndza á kataná ervaunŋe á ŋa na ba baaka mázle-aara? Kwakyire á nalmane á kure na, antara emtakire á duniya na ndza kwa zanaa kure na ba yakuránya kwá jammeka d'ekid'eki?»

<sup>15</sup> Bademme á emnde na tá tsakala berni nanna wá, garege nalmána amkwa. Kwáye watse tá tse yiyiye ge lyáwa á zladá, tá ámbera kyuwa, tá tsaka dákwa-aatare.

<sup>16</sup> Watse tá ba: «Alawlawlaw baaka berni yaikke! Berni zariya na ndza á shakwa sanda-aha lefed'lefed'ŋe na, jili haŋŋe ba seke makala á iga a bere, umele ba haŋŋe, tá an dárádza jipu, ira yaadi-aha umele zarizariya bademme, an dárádza jipu na. Baaka berni ŋgelawa na an náza ŋgelawire kwakya ázeŋara, kazlaŋa a ŋgelawire-aara, umele ta maganaa an dindar, umele ta maganaa an jeba á nákwá umele aŋkwa an dárádza jipu.

<sup>17</sup> Bademme a dikele á duksa-aha nanna shekwaaka d'ekid'eki, kedaakeda ba estuwa.»

Ba estuwa ge emnde a mága slera áte ire á háye keni. Emnde a báká paare á háye sadad'ŋe, antara male-aha-aatare, ira emnde a tsakala na tá maga shula an paare-aha á yawe, itare keni kwaye ta tsatsehe bademme yiyiye.

<sup>18</sup> Ba ta puwete ice-aatare áte yire á kárá na aŋkwa á zá berni nanna wá, a ba itare: «Á jare áme kwa berni yaikke seke una mázle-aara!»

<sup>19</sup> Ba ta ndaase una nanna wá, ta fantau ge kyuwa. Tá tsaka dákwa, tá slatsa erva, tá zá erva-aatare an sláre, tá puwa hula: «Alawlawlaw! Baaka berni yaikke! Bademme á emnde a paare á yáwe sadadsadad'ŋe na ta gaa nalmáne á ba áte ŋane na ba cekwaanŋudí keni shakwaaka degi!» A zluwa estuwa hula á emnde nanna.

<sup>20</sup> Ekkure emnde na kwá am samaya, higauhiga arge keŋa á berni nanna. Ekkure emnde a bela á Dadaamiya, antara nabi-aha, ira emnde á Dadaamiya bademme, higauhiga arge keŋa á berni nanna. Adaba pelansepele Dadaamiya ge berni nanna názena ndza a magakurtaa ŋane na bademme.

<sup>21</sup> Am iga a una nanna maa, yá zhárá ba gwarda á malika umele, a eksante dada nákwá am erva, yaikkire-aara ba seke nákwá á uvera, a eblyanme á dem háye á ba an ndzedá, a ba ŋane: «\*Babila berni yaikke na watse ba estuwa.

<sup>22</sup> Baaka ura á de puwete ice áte emnde a mága gusa am Babila d'ekid'eki. Ma emnde a jaa gadzavera, ma emnde a ferta derma antara nalgaita, watse ba tseriye baaka ura á de cena mágava á duksa am huŋe á Babila. Ma emnde a mága dzera, ma emnde a ndera gahe, ma emnde a haa hiya, bademme watse baaka ura á tse am zhegela ba palle keni.

<sup>23</sup> Ekka Babila wá, baaka ura á de puwete ice áte kárá á wáye ázeŋa mázle-aara, baaka ura á de cena elva a gaa mukse, ma elva a de gaa zhele keni am mba á ŋa. Abi werre, ndza ta bántsa emnde a tsakala á ŋa: Sey ba ŋere ka mu ware edda una á jaŋeruje na? Ta zlermu nalmáne á duniya bademme an kurguna. Adaba una nanna mbedakmbedá na.»

<sup>24</sup> Zlaŋe ádalíye, Dadaamiya nanna uzhe á nabi-aha-aara, antara uzhe á emnde a daba ŋane, bademme á ba am mbiye á Babila. Bademme a uzhe á emnde na ta cebateraa am duniya na, á ba am mbiye á berni nanna baaka ura umele.

## 19

<sup>1</sup> Am iga a una nanna maa, yá cena ba kwárá á sawa am samaya, ba seke kwárá á nalga yaikke hedihediye, a ba itare: «\*Halailuya! Ba Dadaamiya á miya una slelya ura, edda á dẽmde, hákuma bademme á ba am erva-aara.

<sup>2</sup> Adaba nane á kya shairiya-aha-aara bademme á ba áte jirire áte unjule-aara bademme. Adaba una nanna, maganánmaga palase ge mukse záware na a badzanve duniya bademme an gwardzire-aara, zlaɓe ádaliye, adaba a ceɓaa shifa á emnde a slera-aara na.»

<sup>3</sup> A ba itare zlaɓe ádaliye: «\*Halailuya! Kwaye yire á kára na á za berni nanna shelle am zhegela, baaka emtsa-aara dem ba ge dekideki.»

<sup>4</sup> Am iga a bela láhe-aatare maa, emgyegwar zála kul buwa ju ufaɗe, antara duksa-aha ufaɗe na tá an shifa na reppe puwaraapuwa á dem áhá á katafke á Dadaamiya am kurshi á sleksire-aara, tá anjwa kezlan ugje. \*Halailuya! \*Aamin! a ba itare.

### *Edda una tá d'ahána an egdza zhel kyáwe na anjwa á gá larusa-aara*

<sup>5</sup> Daaci yá cena ba kwárá umele á segashe am tate á kurshi á sleksire, a ba nane: «Ekkure emnde á Dadaamiya bademme, an male-aha-ka, an egdzara-ka, bademme á kure kwa emnde na kwá an lyawa-aara am ervaunde na, galaugála Dadaamiya á miya.»

<sup>6</sup> Zlaɓe ádaliye, yá cena ba kwárá umele ba seke kwárá á nalga, kwára-aatare ba seke mága á yáwe áte guwa yaikke, zlaɓe ádaliye, ba seke válaha á samaya. A ba itare: «\*Halailuya! Adaba Dadaamiya Yaakadada edda á hákuma bademme, Sleksire ba nane palle.

<sup>7</sup> Higaumihiga bademme! Shamisha geɗa yaikke! Galaumigála Dadaamiya, adaba hyephye sarte, njwatenjwa nane geni egdza zhel kyawe á gá larusa-aara, larusa-aara nanna keni maganaamaga niya.

<sup>8</sup> Varanteva baráma ge larusa, geni á tsekwemtsekwa nanjyuwe lefedde jipu ámberá á maga pulpulire keni jipu, cuɗedde zlaɓe ádaliye na.» Nanjyuwe nanna wá, á maramiya shagerire-aha na ndza ta maganaa emnde á Dadaamiya an ervaunde-aatare palle na.

<sup>9</sup> Daaci a ba malika na á elvan ge iya: «Puwetepuwa elva na náwa yá ndakndáha na am wakita: Má ba geɗa wá, watse anjwa áza emnde na d'ahaterdáha Dadaamiya á dem larusire á egdza zhel kyawe na.» A farhe zlaɓe ádaliye, a ba nane: «Baaka fida am elva na dekideki, a ndaasa ba Dadaamiya an we-aara.»

<sup>10</sup> Daaci, ya gaavehe am sera-aara, yá kátá kezlan ugje, amá a naba piyite: «Mañka una,» á bina. «Iya keni ya ba sleslera á Dadaamiya ba seke kure antara egdzar mama-aha á nã na fakurtarefe áte elva a Yaisu na. Kezlankezla ugje ba ge Dadaamiya palle.»

Elva a Yaisu na wá, ba elva na ndza a baterna Shedeke Cuɗedde ge nabi-aha, lauktu ta se balaterán ge emnde na.

### *Zhele midala áte belsa dzayye*

<sup>11</sup> Am iga-aara maa, ya ketaa ice á dem zhegela wá, yá zhára ba samaya wanje an wacene. Zlaɓe ádaliye, yá zhára ba belsa dzayye telle, antara ura áte iga-aara. Zhara á edda una nanna: Slejirire, antara baaka fida ázenára. Nane á kya shairiya-aara á ba áte jirire, á wawa keni á ba áte unjule-aara.

<sup>12</sup> Ice-aha-aara ba seke nara á kára, dzakwa á sleksire keni baaka zlakta-aara am ire-aara. Zlaɓe ádaliye, anjwa zhara an puwa áte nane, baaka slediyeddiye dekideki, sey ba nane palle duksa-aara.

<sup>13</sup> Nanɣyuwe-aara baɗemme ba uzhe. Zhera-aara wá: Elva á Dadaamiya.

<sup>14</sup> Am iga-aara, ta ɗabemhe ge emnde a wáwa am samaya, itare keni baɗemme tá á ba áte belsa dzaydzaye, tá am nanɣyuwe keni dzayye ba telle, lefedɗe jipu, cuɗedɗe zlaɓe ádaliye keni.

<sup>15</sup> Anɣkwa á segashe katsakar am mbuwe-aara, an ga slare jipu. Á de gáná an una ɲanna ndzedá arge duniya baɗemme. Ba ɲane palle una á de geva slekse an zade á íre am erva, slekse na an hakuma jipu na. Watse á ɲgerɗa kelaade-aha-aara an sera ba seke una tá ɲgerɗa egdzara á náfa am Tate-aara, ge ɓeca yáwe-aara na. Una ɲanna, á maramiya já ervaunɗe á Dadaamiya Yaakadada áрге duksa baɗemme.

<sup>16</sup> Anɣkwa zhera-aara an puwa áte nanɣyuwe-aara, antara pákwálá-aara, a ba itare: Slekse arge slekse-aha baɗemme, Yaakadada arge dada-aha baɗemme.

<sup>17</sup> Daaci yá zhárá ba malika umele a tsanve ge vaciya, a fantau ge ɗáha yiye-aha tá anɣkwa ɲgye am huɗe á zhegela, herzhá á shanaasha samaya baɗemme na, a ba ɲane á ba an ndzedá, á elvan ge yiye-aha ɲanna: «Sawmbare baɗemme ásehuna, náwa Dadaamiya a gyakur munri yaikke!

<sup>18</sup> Sawmbare á se za hyuwa á slekse-aha á larde-aha, antara hyuwa á sawji-aha, antara male-aha-aatare, hyuwa á belsa-aha, antara emnde na ndza tá áte belsa-aha ɲanna, hyuwa á náve-aha antara emnde na tá kwárá ire-aatare, hyuwa á male-aha, antara egdzara, hyuwa á emnde baɗemme, sawmbare zauza.»

<sup>19</sup> Daaci yá zhárá ba dabba na, antara slekse-aha á larde-aha, ira sawji-aha-aatare, jarammeje baɗemme ganakini tá daná wáwa ge edda una áte belsa dzayye na antara emnde a wáwa-aara.

<sup>20</sup> Daaci ta puwatersaa erva ákataliya ge tara dabba ɲanna, antara nabi fida na ndza a magaa najipu-aha á katafke á dabba ɲanna. Ndza a badu emnde á ba an najipu-aha ɲanna, ta lyevaa lámbe á dabba ɲanna, ta kezlan ugje ge gáráva-aara hele na. Daaci ta valyateremhe á ba an shifa emnde buwa ɲanna á dem derve á kárá, an wesha an \*baraudau, jauje ge kárá-aha baɗemme.

<sup>21</sup> Amá sawji-aha-aatare, antara emnde na tá am iga á dabba ɲanna baɗemme na wá, a ceɓateraa ba katsakar na á segashe am mbuwe á edda una áte belsa na. Yiye-aha baɗemme zaruze hyuwa-aatare, ta yanaa ba itare.

## 20

### *Elva a zara sleksire am iva debu*

<sup>1</sup> Am iga-aara wá, yá zhárá ba malika umele zlaɓe ádaliye, á tsekwa á sawa am samaya, an egdza a tsekweram am erva, ge se wera evege shagerka na ɓaaka halawuwa á sladɗire-aara ɗekideki na, antara tsavaytsavaye yaikke.

<sup>2</sup> Daaci a naba eksavaa náza nye na emgyegwe a záhe keni ba ɲane na. Amaana: Male á jini-aha, bi Shaitaine. Daaci a naba ɲgudanaahe ciyye ge malika ɲanna, geni á gá iva debu am tsavaytsavaye ɲanna.

<sup>3</sup> Kwaye a de eblyanme am evege ɲanna, a zlenɗa an egdza a tsekweram, a venyanuhe zlaɓe ádaliye geni á gá iva-aha na am huɗe-aara, á shanka se bada emnde am duniya mázle-aara. Sey má zlauzle iva debu ɲanna, lauktu tá de ɓelanaabela cekwaanɗuɗi.

<sup>4</sup> Am iga a una ɲanna maa, yá zhárá kurshi-aha á sleksire, emnde tá aɲkwa á njanja am kurshi-aha ɲanna, ta vaterte hákuma á kya shairiya ge itare. Zlabe ádaliye, ya náternaa shedefekwe-aha á emnde umele, ndza ta cebáteraa adabá tsaraatse áte elva a Yaisu, tá aɲkwa ndater elva á Dadaamiya ge emnde. Itare ndza kezlaranka ugje ge dabba ɲanna deki, ma ge gáráva á dabba ɲanna keni. Lyyarká lámbe á dabba ɲanna deki ma áte erva a nadafa-aatare, ma áte wafke-aatare keni. Ya naterna emnde tá á ba an shifa-aha-aatare zlabe ádaliye laɲɲe, tá aɲkwa zá sleksire-aatare antara Yaisu \*Almasiihu am iva debu.

<sup>5</sup> Una wá, zunɲwire á tseta emnde am fáyá. Emnde umele maa, zlabe tá tseteka emtsaade, sey má zlauzle iva debu ɲanna.

<sup>6</sup> Má geɗa wá, sharánsha emnde ɲanna Dadaamiya a tsaterete zunɲwe am fáyá na. Tá de jammeka antara emtsa na watse á de ceba emnde ge buwire na deki, itare watse tá de geva \*liman-aha á Dadaamiya, antara Yaisu Almasiihu, tá de za sleksire-aatare antara Yaisu Almasiihu am iva debu.

#### *Halavuhále ndzeɗa á Shaitaine*

<sup>7</sup> Am iga á iva debu ɲanna maa, watse tá belanaabelá zlabe ádaliye Shaitaine, á de sesse am evege-aara ɲanna.

<sup>8</sup> Watse á de bada emnde zlabe ádaliye am larde-aha bademme am duniya. Ba larde-aha ɲanna una tá dahaná an Gaug, antara Magaug na. Watse á jatermaare bademme, ganakini tá de wawa. Kwakyire-aatare, watse ta ba seke shiili na am guwa na.

<sup>9</sup> Daaci yá zhárá ba daredde, tá kela á dem huɗe á duniya bademme, tá aɲkwa á jantaave ge tate-aha na tá átekwa emnde á Dadaamiya, tá jantaave ge berni yaikke na a wayeta ervaunde-aara ba estuwa. A naba tsekwa ge kárá á sa am samaya, a se zlateraahe bademme.

<sup>10</sup> Daaci ta eksevaa Shaitaine na a kedeteraa ɲane na, ta de eblyanme am derve á kárá na an wessa an \*baraudau, tá am huɗe-aara tara dabba, antara nabi fida na. Tá de maga palása-aatare áhuwa vayi vacika dem ba ge deki.

#### *Shairiya á emnde am halavuwa á duniya*

<sup>11</sup> Daaci yá zhárá ba kurshi á sleksire yaikke vayvaya, dzayye ba telle, aɲkwa ura á njá am kurshi ɲanna. Tara samaya antara haha zhagadarzhagade á katafke-aara, puwarteka ice áte itare deki.

<sup>12</sup> Daaci yá zhárá ba nalga á emnde na ndza emtsaremtsa na, male-aha, antara egdzara bademme tá aɲkwa á tsaatse á katafke á slekse yaikke ɲanna. Daaci ta naba werta wakita-aha. Aɲkwa wakita umele, an puwa zhera-aha á emnde na tá an shifa na á zleka na am huɗe-aara, ɲane keni ta werantehe. Daaci Dadaamiya a fantau ge kya shairiya á emnde a fáyá ɲanna bademme, ma shairiya á ware keni ta kyánaa á ba áte názena ndza a maganaa edda-aara, ta beranaa am wakita na.

<sup>13</sup> Antara ba emnde na ndza ndaterunde háye keni, a naba melatersehe á segashe. Tara emtsa, antara fáyá keni eptsananaaptsa emnde na ndza tá ázetare, Dadaamiya a se kya shairiya-aatare bademme, ma ware keni ta kyánaa á ba áte názena ndza a maganaa edda-aara na.

<sup>14</sup> Am iga-aara maa, ta puwum tara emtsa, antara fáyá á dem kárá. Derve á kárá ɲanna emtsa umele ge buwire.

<sup>15</sup> Daaci ma ware una shanka zhera-aara am wakita á emnde a shifa na wá, ɲane tá velyaná á ba á dem derve á kárá.

## 21

### *Samaya antara haha bukerde tá áŋwaslire*

<sup>1</sup> Daaci yá zhárá ba samaya áŋwaslire, antara haha áŋwaslire, emgyegwe-aha-aara na medarmeda bademme. Ba háye-aha keni ta baaka medarmeda bademme.

<sup>2</sup> Zlabe ádaliye, yá zhárá ba berni cufedde. Una nanna, berni á Urusaliima áŋwaslire, anjwa á tsekwa á sawa áza Dadaamiya am samaya. Dadaamiya a cadese ba seke una ni larusa á cada vuwa-aara má anjwa á zlalá á de gá zhele na.

<sup>3</sup> Yá cena ba kwárá yaikke, an ndzedá jipu, á segashe am tate á kurshi á sleksire. A ba kwárá nanna wá: «Kina wá, tate á njá á Dadaamiya á ba am dágave á emnde mázle-aara, tá de geva emnde-aara ba miyenne, Dadaamiya keni á njá á ba am dágave-aatare, á de geva ba nane palle Dadaamiya-aatare.

<sup>4</sup> Á de halatersá ba nane an erva-aara yáwe á kyuwa am ice. Watse baaka á de emtsa mázle-aara. Ma kyuwa, ma tsáká dákwa, ma wá á vuwa keni bademme duksa-aha nanna ndza na á dedde.»

<sup>5</sup> Daaci á ba Slekse yaikke na am kurshi na: «Ka cenáncena emtu, duksa bademme sey yá maga ba umele áŋwaslire.» A fiyarhe zlabe ádaliye, a ba nane: «Puwetepuwa elva nanna, adaba jirire baaka fida am huđe-aara d'ekideki.»

<sup>6</sup> A farhe zlabe ádaliye ge enndáhá-aara, a ba nane wá: «Zlauzle áte una. Ba iya una ya zunŋwe arge duksa bademme, watse ba iya nanna zlabe ádaliye am halavuwa á duksa bademme. Ya slekatafke keni ba iya, ya slekataliya keni ba iya. Ma á wáná ndera ge ware keni, yá vanteva ya yáwe á shushe ge edda-aara ba dey. Yáwe nanna, yáwe á suwa na á fá shifa am ura na.

<sup>7</sup> Daaci ma a ganaa ware ndzedá keni yá vanteva duksa-aha nanna. Iya keni yá gevge Dadaamiya-aara, nane keni á gevge ba egdza-aaruwa.

<sup>8</sup> Amá tara emnde a lyáwa, emnde na fartareka, emnde a mága danŋwire á huđe, emnde a ceba shifa, emnde a mága gwardzire, emnde a kyula hele, antara emnde a mága fida, emnde nanna bademme tá de ngyakaterá á dem derve á kárá na an wesha an \*baraudau na. Una nanna, emtsa-aatare ge buwire.»

### *Elva a Urusaliima áŋwaslire*

<sup>9</sup> Daaci malika-aha vuye na ndza tá an erba-aha vuye am erva-aatare, an naha an masiba-aha na á halavuwa átekwa na, palle-aatare a naba dahite, a ba nane á elvan ge iya wá: «Sawa náwa yá maraká larusa á gáná egdza zhel kyáwe na.»

<sup>10</sup> Daaci a naba tsekwiyarhe ge Shedekwe Cufedde, kertenj a naba eksite ge malika nanna, kwáye a de d'alta antara iya áte ire á wa sladde jipu, a mariya berni cufedde, berni á Urusaliima anjwa á tsekwa á sawa áza Dadaamiya á sawa am samaya.

<sup>11</sup> Berni nanna ámbera á maga wulwulire ba seke jeba á nákwá umele anjwa tá daháná an Yaspa, an dárádza jipu. Wulwulire nanna á maganá ba demdemire á Dadaamiya.

<sup>12</sup> Ta jantaave ge berni nanna an riya yaikke, an sladfire á dem zhegela keni nane. Wákyiya kelaawa ju buwa áte riya nanna. Malika-aha keni ta kelaawa ju buwa áte wakyiya-aha nanna. An puwa zhera-aha á jeba-aha á \*Iserayiila-aha kelaawa ju buwa na áte wákyiya-aha nanna bademme.



<sup>13</sup> Wákyiya keye keye áte dalbe-aha á riya ñanna ufáde kerde. Wákyiya keye á dem gedí, keye á dem manem, keye á dem pute, keye keni á dem yala.

<sup>14</sup> Riya á berni ñanna baðemme ta fanaa ekte á ba an nákwá-aha kelaawa ju buwa ñaññe. Ba kelaa nákwá am nákwá-aha ñanna, an puwa zhera á ura palle am pukura-aha á egdza zhel kyáwe ta kelaawa ju buwa na.

<sup>15</sup> Malika ñanna a ndahi elva na, an zade á dindar sláðde am erva-aara ge kura duksa an ñane. Á de kura ba tara berni ñanna an ñane, antara riya-aha-aara, ira wákyiya-aha-aara baðemme.

<sup>16</sup> Berni ñanna wá, gevka takarre. Daaci malika ñanna a kuranaahe, dalbe-aha-aara ufáde kerde ba kalkale. Ma am sláððire, ma am hwiya keni ba zawa debu kelaawa ju buwa. An wálá á dem zhegela keni ba estuwa.

<sup>17</sup> Daaci a kurese riya-aara keni. Wálá á riya ñanna deremke, an kul ufáde ju ufáde áte erva. Una ñanna wá, a kuran ba seke kura duksa á emnde.

<sup>18</sup> Riya á berni ñanna baðemme wá, ta nyananaa á ba an jeba á nákwá umele ankwá tá dahána an Yaspa, nákwá ñanna an dárádza jipu. Berni ñanna maa, baðemme ta nderanaa á ba an dindar miyenne, dáláwwe ba seke kweteram.

<sup>19</sup> Nákwá-aha na ta fanaa ekte ge riya ñanna maa, baðemme an cádá. Ta caðanaa an jeba á nákwá-aha umele ankwá tá an dárádza jipu, nákwá-aha ñanna jeli gergere baðemme. Zunñwire á nákwá-aha á ekte á riya ñanna, ta caðanaa an Yaspa, buwire, ta caðanaa an Safira, keyire, ta caðanaa an Kaldaidaun, ufáðire ta caðanaa an Imiradi,

<sup>20</sup> ilyebire ta caðanaa an Sardunisu, unkwahire ta caðanaa an Sardiyus, vuyire ta caðanaa an Kirisauliti, tiisire ta caðanaa an Bairil, ñane jeli slerekke. Maselmanire tá caðanaa an Tupas, kelaawire ta caðanaa an Kirisauparasu, kelaawa jemtekwire ta caðanaa an Turkuwas, ñane jeli lipela. Kelaawa ju buwire ta caðanaa an Amaitistu.

<sup>21</sup> Amá wákyiya-aha kelaawa ju buwa na áte riya á berni ñanna, ta fafanu ba jeba á nákwá umele ankwá zariya jipu ákura paare, amá heðaaka. Ba kelaa wákyiya ta fanu nákwá ñanna palle. Baráma am huðe á berni ñanna wá, ba dindar miyenne, dáláwwe ba seke kweteram.

<sup>22</sup> Puwanteka ice-aaruwa ðekideki áte mashidi am berni ñanna, aðaba Dadaamiya Yaakadada, antara egdza zhel kyawe tá ankwá am huðe-aara. Aðaba una ñanna baaka mashidi na.

<sup>23</sup> Tara vaciya antara tere keni ta baaka ðekideki. Aðaba ðemðemire á Dadaamiya hyephye, Egdza zhel kyáwe keni ankwá á mára parakkire-aara am huðe á berni ñanna baðemme.

<sup>24</sup> Emnde na ndza tá am duniya, tá am berni ñanna, tá ankwá já dába á ba áte parakkire ñanna. Emnde na ndza ta slekse-aha am duniya na keni, halarantehála sleksire-aatare ñanna á dem huðe-aara.

<sup>25</sup> Wákyiya-aha áte riya á berni ñanna tá heðeka ðekideki, á njá á ba an wácene, aðaba baaka vayiya mázla-aara.

<sup>26</sup> Sleksire, antara duksa shagera na ndza am duniya na, watse baðemme tá de ndakaná á ba am berni ñanna.

<sup>27</sup> Baðemme á názena ankwá harám am huðe-aara maa, á demka á dem berni ñanna ðekideki. Emnde a mága názu zlayeka, antara emnde a fida wá, baaka baráma ge itare ðekideki á dem huðe-aara, sey ba emnde na an

puwa zhera-aha-aatare am wakita á emnde a shifa na á zleka na, wakita á egdza zhel kyáwe na. Sey ba itare palle una watse tá dehuwa.

## 22

<sup>1</sup> Daaci malika ɲanna a naba mariya guwa, aɲkwa á kelá yáwe á shifa átekwa, aɲkwa á maga wulwulire ba seke kweteram. Yáwe ɲanna, á kela á sawa am tate na tá átekwa tara Dadaamiya tá am kurshi á sleksire-aatare antara egdza zhel kyáwe.

<sup>2</sup> Daaci yáwe ɲanna á kelá á ba áte baráma am huɗe á berni ɲanna. Aɲkwa náfá á shifa áte we á guwa ɲanna, áte iga guwa ɲanna, antara ásehuna-aara keni ba ɲane. Náfá á yá egdzere ser kelaawa ju buwa áte iva palle. Ba kelaa tere, á yá ba egdzere. Hyema-aara keni kurgune ge emnde na ta sawa á sa am larde-aha am duniya na.

<sup>3</sup> Baɗemme á názena a nyainyanvaa Dadaamiya á taa demka á dem berni ɲanna ɗekidɗeki.

Tara Dadaamiya, antara egdza zhel kyáwe tá aɲkwa á njanja am kurshi á sleksire am berni ɲanna. Emnde a slera-aara tá aɲkwa kezlan ugje ge ɲane.

<sup>4</sup> Itare wá, tá de nanna wafke á Dadaamiya ba shagera, watse tá shá zhera-aara áte wafke-aha-aatare baɗemme.

<sup>5</sup> Vayiye wá, watse ɓaaka ɗekidɗeki, watse ɓaaka wedere á parakkire umele ɗekidɗeki, ma kára á wáye, ma vaciya keni. Aɗaba ba Dadaamiya Yaakadada an ire-aara una á de geva parakkire na á hyetehye áte emnde baɗemme. Daaci tá de zá sleksire-aatare emnde dem ba ge ɗekidɗeki.

### *Yaisu aɲkwa á eptsá*

<sup>6</sup> Daaci a ba malika á elvan ge iya: «Elva-aha na wá, baɗemme ba jirire, ɓaaka fida am huɗe-aara ɗekidɗeki. Ba Dadaamiya una ndza a vaterte Sheɗekwe-aara ge nabi-aha, zlaɓe ádaliye, a ɓelaa malika-aara ge emnde a slera-aara, ge se maraterá názu herzhe watse á magava ba jirire na.» A zla elva-aara estuwa.

<sup>7</sup> «Ya baa ba kure! Náwa herzhe yá aɲkwa duwa, yá de gedatertegeda emnde na má tsufartetsufa elva a nabiyire na am huɗe á wakita na.»

<sup>8</sup> Iya Yuhanna wá, ya cenanaa á ba an hyema-aaruwa duksa-aha ɲanna, ya nanna an ice-aaruwa. Am sarte na cenanvaacena, zharannaazhárá duksa-aha ɲanna ba shagera, kreppe ya naba mbedeɓe am sera á malika na a mariyaa duksa-aha ɲanna, yá kezlan ugje.

<sup>9</sup> Amá a naba piyite: «Maɲka una,» a ba ɲane á elvan ge iya. «Iya keni ya ba sleslera á Dadaamiya ba seke kure antara egdzara mama-aha á ɲa nabi-aha umele. Ya ba seke emnde na ta de ɗaba názena ka puweta ka kina an ervaunɗe-aatare baɗemme. Kezlankezla ugje ba ge Dadaamiya palle.»

<sup>10</sup> Názu a binaa ɲane zlaɓe ádaliye, a ba ɲane: «Elva-aha na wá, a tsekwanaa ba Dadaamiya. Sheɓatervuweka elva-aha ɲanna ge emnde. Aɗaba herzhe watse á magava duksa-aha ɲanna.»

<sup>11</sup> Názu yá bakurná ya wá: Má ura a eksese mága kelaadire, a naba emmága ɲane. Edda una a eksese mága harám, a naba emmága ɲane. Edda una ɲane a eksese mága maggwire, a yanka emmága-aara. Edda una ɲane a eksese mága cuɗeɗɗire, a yanka, a emmága cuɗeɗɗire.»

<sup>12</sup> A ba Yaisu: «Náwa herzhe yá aɲkwa duwa antara láɗá-aaruwa am erva yá de tegakurtega. Amá wá, ma ware keni yá de vanta á ba áte názena ndza a maganaa edda-aara.»

<sup>13</sup> Ba iya una ya zuɲɲwe arge duksa baɗemme, am halavuwa á duksa baɗemme keni ba iya ɲanna zlaɓe áɗaliye. Ya slekatafke keni ba iya, ya slekataliya keni ba iya.»

<sup>14</sup> Má ba geɗa wá, watse tá shansha ba emnde na tá yanka liya am nanɲyuwe-aatare ɗekiɗeki na. Itare wá, watse tá shansha baráma á dem berni, tá de zá egdza á náfá á shifa na ba seke una tá kataná itare.

<sup>15</sup> Amá emnde a mága ɲɗuɗiyire, antara emnde a mága náfá, emnde a mága gwardzire, emnde a ceɓa shifa, an emnde a mága hele, ira emnde na tá njá á ba an fida am mbuwe na, emnde ɲanna baɗemme wá, itare tá taa demka á dem berni ɲanna ɗekiɗeki.

<sup>16</sup> «Iya Yaisu, ya ɓelakuraa malika-aaruwa, ganakini á de ɓalakurseɓále duksa-aha ɲanna baɗemme ge kure aiklaisiya-aha. Ya wulfe á \*Dawuda ɲará ba iya, ya terlyakwa á ireɲlya keni ba iya.»

<sup>17</sup> Daaci a ba tara Sheɗekwe Cuɗeɗe, antara larusa á egdza zhel kyáwe: «Ane! naba sawa». Ma a cenanaa ware keni, ɲane keni a bánba: «Sawa». Ma á wáná ndera ge ware keni, sawmbare shawushe yáwe á shifa. Ma a se katanaa ware yáwe ɲanna keni, tá vante ba dey.

*Elva na am halavuwa á elva-aha*

<sup>18</sup> Iya Yuhanna wá, náwa yá aɲkwa fater magiya ge emnde na tá aɲkwa cená elva á nabiyire am wakita na: Ma ware una a far názá-aara ge názena am wakita na keni, Dadaamiya á de fanaarfe ge ɲane masiba-aha ɲanna á ndahaná wakita na.

<sup>19</sup> Ma ware una a gulese elva a nabiyire na am huɗe á wakita na keni, Dadaamiya á de tsakese dza-aara am egdzara á náfá á shifa aɲkwa an puwa am wakita na. Watse ɓaaka sleɗe á edda-aara ba ɗekiɗeki am berni cuɗeɗe na á ndahaná wakita na.

<sup>20</sup> A bántsa edda una a magaa seyɗire á ba an jirire áte elva-aha ɲanna baɗemme na: «Ba jirire, náwa yá á ba áte we á sera, yá aɲkwa duwa.»

\*Aamin! Naba sawa ka Yaakadada Yaisu!

<sup>21</sup> Yaakadada Yaisu a hyantehye ɲurna-aara ma áte ware keni baɗemme.